

# GINITAĀO VARIĀUNA



The New Testament in the Sinaugoro Language of Papua New  
Guinea

GINITAĠO VARIĠUNA

The New Testament in the Sinaugoro Language of Papua New Guinea  
Nupela Testamen long tokples Sinaugoro long Niugini

Copyright © 1995 The Bible Society of Papua New Guinea

Language: Sinaugoro

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 4 Mar 2019 from source files dated 18 Feb 2019  
a998e4ce-f2f7-5577-968e-5d2feef358f1

## Contents

MATAIO . . . . .	1
MAREKO . . . . .	51
LUKA . . . . .	81
IOANE . . . . .	133
APOSTOLO . . . . .	172
ROMA . . . . .	221
1 KORINTO . . . . .	246
2 KORINTO . . . . .	269
GALATIA . . . . .	287
EFESO . . . . .	297
FILIPI . . . . .	306
KOLOSE . . . . .	312
1 TESALONIKA . . . . .	318
2 TESALONIKA . . . . .	323
1 TIMOTEO . . . . .	326
2 TIMOTEO . . . . .	333
TITO . . . . .	338
FILEMONA . . . . .	342
HEBERU . . . . .	344
IAKOBO . . . . .	361
1 PETERO . . . . .	367
2 PETERO . . . . .	374
1 IOANE . . . . .	378
2 IOANE . . . . .	384
3 IOANE . . . . .	385
IUDAS . . . . .	387
APOKALUPO . . . . .	389

## VARI NAMONA MATAIO NA ETOREATO

Mataio vaḡa-foforina guruḡari

Mataio arana ta tu Levi. Ġia tovotovonai tu takesi gogo tarimana, senaḡi Iesu na ekeaiato, benamo ḡena mero ai eiaḡoto.

Ġia tu Iuda tarimana, ma mai Vari Namona tu Iuda tarimari ḡeri etoreato.

Ġia na Iuda tarimari ekirarito, Iesu tu moḡoni Barau na ekiraḡi-toreato Kerisona o vevaḡa-maḡuri verena. Ginitaḡo Guinena o Old Testament ai Keriso beiaḡomani guruḡana ḡetoreato tu varau bema moḡoni. Barau ḡena guruḡa tauri mabarari tu beḡe vetoreni veḡata (Mataio 5:17). Mataio na ḡena Vari Namona nuḡanai Keriso varina Old Testament ai ḡekiraḡi-toreato guruḡari ḡutuma ma ema torerito anina tu moḡea.

Mataio na mai buka tu laḡani 58 ema 70 fakari ai etoreato, mo tu Iesu emaseto murinai. Mataio ḡena toretore tu maiḡesina eboioḡaiato:

1. Iesu aiḡesina eiaḡomato besena ema ḡena maḡuri varina - karoa 1-2
2. Ġena vetuḡunaḡi ḡauveina bene sinaia ḡana tauḡena everovinato varina - karoa 3-4:11
3. Ġena ḡauvei esinaiato, evevaḡa-ribato, eḡobatato, e keve evaḡa-namorito variri - karoa 4:12-25:46
4. Ġena midigumidigu varina - karoa 26-27
5. Mase na evariḡisi-ḡenoḡoito ema ḡena mero etuḡurito variri - karoa 28

*Iesu eiaḡomato besena*

<sup>1</sup> Iesu Keriso emaḡurito, tubuna ḡatana ḡerina eiaḡomato varina tu maiḡa: Iesu tu Davida garakana, Davida tu Aberahamo garakana.

<sup>2</sup> Aberahamo tu Isako tamana; Isako tu Iakobo tamana; Iakobo tu Iuda ma kakana ema tarina merori ḡesi tamari; <sup>3</sup> Iuda tu Perese e Sera tamari, sinari tu Tamar; Perese tu Hesron tamana; Hesron tu Ram tamana; <sup>4</sup> Ram tu Aminadab tamana; Aminadab tu Nasona tamana; Nasona tu Salmon tamana; <sup>5</sup> Salmon tu Boas tamana, Boas sinana tu Rahaba; Boas tu Obed tamana, Obed sinana tu Ruta; Obed tu Iese tamana; <sup>6</sup> Iese tu Kini Davida tamana.

Davida tu Solomona tamana. Solomona tu Uria ḡaraḡona ḡenana emaḡurito, (Uria ḡaraḡona etava-verariato murinai); <sup>7</sup> Solomona tu Rehoboam tamana; Rehoboam tu Abia tamana; Abia tu Asa tamana; <sup>8</sup> Asa tu Iehosafat tamana; Iehosafat tu Ioram tamana; Ioram tu Usia tamana; <sup>9</sup> Usia tu Iotam tamana; Iotam tu Ahasa tamana; Ahasa tu Hesehia tamana; <sup>10</sup> Hesehia tu Manase tamana; Manase tu Amon tamana; Amon tu Iosia tamana; <sup>11</sup> Iosia tu Iekonia ma tarina merori ḡesi tamari. Mo ḡaro ai Babulona tarimari na Isaraela tarimari ḡeḡabi-iaḡorito Babulona ḡana.

<sup>12</sup> Babulona ḡana ḡeḡabi-iaḡorito murinai, Iesu eiaḡomato besena ema ḡemaḡurito varina tu maiḡa: Iekonia tu Sealtiele tamana; Sealtiele tu Serubabele tamana; <sup>13</sup> Serubabele tu Abiud tamana; Abiud tu Eliakim tamana; Eliakim tu Asoro tamana; <sup>14</sup> Asoro tu Sadok tamana; Sadok tu Akim tamana; Akim tu Eliud tamana; <sup>15</sup> Eliud tu Eleasara tamana; Eleasara tu Matan tamana; Matan tu Iakobo tamana; <sup>16</sup> Iakobo tu Iosefa tamana, Iosefa ḡaraḡona tu Maria. Maria ḡenana Iesu emaḡurito; Iesu arana ḡekiraḡiani Keriso ḡetoni. (Keriso anina tu Barau na ekiraḡi-toreato vevaḡa-maḡuri tauna).

<sup>17</sup> Ġuru mabarari Aberahamo ḡenana eiaḡomato mo Kini Davida tu ḡuru gabanana vasivasi (14), e Davida ḡenana eiaḡomato mo Babulona ḡana ḡeḡabi-iaḡorito tu ḡuru gabanana vasivasi (14), ema Babulona ḡana ḡeḡabi-iaḡorito negana na eiaḡomato mo Keriso tu ḡuru gabanana vasivasi (14).

*Iesu eḡorato*

*Luka 2:1-7*

<sup>18</sup> Iesu Keriso tu maiġesi eġorato: Ġia sinana Maria tu Iosefa kirakauna, senaġi ġia tauri ruarua tu roġosi roġo beġene veġaraġo nuġanai, Iauka Veaġa na mero evaġa-ġoraiato Maria diana nuġanai. <sup>19</sup> Iosefa, Maria ġaraġona, tu vei iobukaiobuka tarimana, ema asi eurato, tarimarima ġoirari ai Maria bene vaġa-maiakaia. Moġesina naima ġena ura tu, vekure-toġai vau Maria bene dobi-kwanea etato. <sup>20</sup> Ġia moġesi etuġamaġito-ġoi nuġanai, Vereġauka ġena aneru ta nuvi ai efoforito, benamo ekiraiato, ekirato, “Iosefa, Davida natuna, kirakaumu Maria ġabiraġena garina asi bono vei, korana ġia tu Iauka Veaġa na mero bevaġa-ġoraia ġia diana nuġanai. <sup>21</sup> Ġia na mero ta beġabiani, arana bono vatoa Iesu, (Iesu anina tu vevaġa-maġuri tauna); korana ġia na ġena tarimarima ġeri rakava ġerina bevaġa-maġuririni.”

<sup>22</sup> Maiġeri dagara mabarari ġeġorato tu, Vereġauka na peroveta tarimana muruna na ekiraġirito guruġari bene vaġa-moġoniri ġana, ekirato,

<sup>23</sup> “Ġoġitaia, ġuiato ta bekuġani, mero ta beġabiani, mo mero keina arana beġe vatoani Emanuela.”

Emanuela anina tu ‘Barau tu ġita sevisevirai.’

<sup>24</sup> Iosefa gena na etataġato nai tu, Vereġauka ġena aneru na ekiraiato veiġari eveirito. Maria eġabi-raġeato, benamo eġaraġoato. <sup>25</sup> Senaġi ġia ġesi asi ġegenasebonato mo, natuna eġabiato. Benamo mero arana evatoato, Iesu.

## 2

### *Iaunega tarimari* ġaro-raġeraġena rekena na ġeiaġomato

<sup>1</sup> Iesu tu Iudea tanonai vanuġa ta arana Betelehemama ai emaġurito. Mo tu Kini Heroda na Iudea tanona eġitaġauato-ġoi neganai. Iesu emaġurito murinai, iaunega tarimari tu ġaro eraġeni rekena na ġeiaġomato, Ierusalemia ġema-raġasito. <sup>2</sup> Benamo ġevedanaġito, ġekirato, “Iuda tarimari ġeri kini ta bemaġuri ġetoni tu ainai? Ġia ġena visiġu baġa ġitaia ġaro eraġeni rekenai. Ġai tu ġia toma-rakariġo vinina baġa iaġoma.”

<sup>3</sup> Kini Heroda na mo guruġa eseġaġiato nai, nuġana eketo-bokoto, ema Ierusalemia tarimari mabarari maki. <sup>4</sup> Benamo ġia na Rubu Veaġa vereri baregori e taravatu vaġa-riba-iaġina tarimari mabarari evaġa-vegogorito, benamo edanaġirito, ekirato, “Peroveta tarimari tu kara ġetato, Keriso, (Barau na ekiraġi-toreato vevaġa-maġuri tauna), tu ainai bemaġurini?” <sup>5</sup> Ġia na ġevaġa-veseato, ġekirato, “Betelehemama vanuġana, mo tu Iudea tanonai, korana peroveta tarimana Mika na maiġesi etoreato,

<sup>6</sup> ‘Betelehemama o, Iudea tanonai otanuni vanuġana, Iuda vanuġari vekearavari ai ġoi tu dia vanuġa misina, asi arana vanuġana ta, korana tu veġorikau tauna ta ġoi ġemuna beiaġomani, ġia na au ġegu Israela tarimari beguine-iaġirini.’ ”

<sup>7</sup> Benamo Heroda na iaunega tarimari vekuretoġai ekearito, benamo edanaġi-ginikau ginikaurito, ekirato, kamara ġaro korikori ai visiġu efoforito. <sup>8</sup> Benamo etuġurito Betelehemama ġana, ekirato, “Ġoiaġo, mero misina boġonoa vetau-ginikaua, boġo doġariani neganai, boġonoma vaġa-ribagu, be au maki bana iaġo, bana toma-rakariġo vinia.”

<sup>9</sup> Heroda ġena guruġa ġeseġaġiato murinai, ma ġerakato dabara na. Dabara na ġeiaġoto-ġoi nuġanai, mo visiġu, ġaro eraġeni rekenai ġeġitaiaato visiġuna, na eguine-iaġirito mo, mero misina ġena gena gabuna iatanai eruġa-tarito. <sup>10</sup> Ġia na mo visiġu ġeġitaiaato nai, ġeikaku-rakavato. <sup>11</sup> Mo numai ġeraka-toġato nai, mero misina ma sinana Maria ġesi ġeġitarito, benamo ġevetui-tarito, ġetoma-rakariġoato. Moġa murinai ġeri farefare ġeġurarito dagarari ġekeorito, bena ġevarevare-viniato. Ġevarevare-viniato dagarari tu golo, e muramura arana frenkinsens, mai tu goġuna ma bonana namona muramurana, ema vedau muramurana arana muro. <sup>12</sup> Benamo Barau na nuvi ai evaġa-ribarito, ekirato, “Heroda ġenai asi boġono ġenoġoi.” Moġa lorinai dabara boruna na ġeri tanobara e vanuġa ġana ġeġenoġoito.

*Iesu Aigupito* ġana ġeġwa-iaġoato

<sup>13</sup> Ĝia ĝerakato murinai, Vereĝauka ĝena aneru nuvi ai Iosefa ĝenai efororito, ekirato, “Novaisiraĝe, mero misina ma sinana ĝesi Aigupito ĝana noraga-ĝori iaĝori. Monai boĝono tanu mo, au na ma bavaĝa-guruĝamuni, korana Heroda na mero misina evetauani, bene vaĝi-masea etoni.” <sup>14</sup> Benamo Iosefa evariĝisito, mero misina ma sinana ĝesi eĝabirito, boĝi nuĝanai Aigupito ĝana ĝeiaĝoto. <sup>15</sup> Monai ĝetanuto mo, Heroda emaseto. Moĝesina Vereĝauka na peroveta tarimana muruna na ekiraĝiato guruĝana ema moĝonito, ekirato, “Aigupito na natugu akea-rosiato.”

*Heroda ĝena guruĝa lorinai mero misiri ĝutuma ĝevaĝi-maserito*

<sup>16</sup> Heroda eriba-maoroto, mo iaunega tarimari na ĝia tu ĝeĝofaiato nai, ebaru-rakava rakavato. Benamo vetari tarimari o soldia etuĝurito, Betelehema e rikina tanori ai mero misiri ĝeri maĝuri laĝaniri ruarua e gabivau ma ĝemaĝurito mabarari ĝevaĝi-maserito. Mo mero misiri ĝeri maĝuri laĝanina ruarua ma murinai ĝevaĝi-maserito anina tu, iaunega tarimari na visiĝu ĝeĝitaiato ĝarona na, eiaĝoto mo, Heroda eribato ĝarona tu laĝani ruarua kavana. <sup>17</sup> Mo ĝaro ai Barau na peroveta tarimana Ieremia muruna na kara ekiraĝiato guruĝana tu ema moĝonito, ekirato,

<sup>18</sup> “Ĝaro ta Rama vanuĝanai ĝeseĝaĝiato, taĝi-koĝokoĝo e taĝi-vanorovanoro tu barego, Rahela natuna taĝiri eveini, e asi eurani beĝene vaĝa-magoa, korana natuna tu beĝe mase.”

*Nasareta ĝana ĝeĝenoĝoito*

<sup>19</sup> Heroda emaseto murinai, Vereĝauka ĝena aneru Iosefa ĝenai nuvi ai ma efororito Aigupito ai. <sup>20</sup> Benamo mo aneru Iosefa ekiraĝiato, ekirato, “Novaisiraĝe, mero misina ma sinana ĝesi noĝabiri, Isaraela tanona ĝana ĝoiaĝo. Korana tu mero misina beĝene vaĝi-masea ĝetato-ĝoi tarimari tu varau beĝe mase.” <sup>21</sup> Iosefa evariĝisito, benamo mero misina ma sinana ĝesi eĝoririto, Isaraela tanona ĝana ĝeiaĝoto.

<sup>22</sup> Senaĝi Iosefa eseĝaĝito, Akelao na Iudea eĝitaĝauato-ĝoi tamana Heroda gabunai, benamo mo ĝana iaĝo tu egarito. A Barau na nuvi ai evaĝa-ribaiato ilailanai erakavanaĝito, eiaĝoto Galilea tanona rekena ĝana. <sup>23</sup> Galilea tanonai vanuĝa ta arana Nasaretaĝi etanuto. Monana Barau na peroveta tarimari ĝerina Iesu ekiraĝiato guruĝana emoĝonito, ekirato, “Ĝia tu Nasareta tarimanai beĝe kiraĝiani.”

### 3

*Ioane Babatiso eĝobatato*

*Ioane 1:19-28*

<sup>1</sup> Moĝeri ĝarori ai Ioane Babatiso eiaĝomato, tano fakanai Iudea nuĝanai eĝobatato-ĝoi, ekirato, <sup>2</sup> “Ĝemi rakava ĝerina ĝovetuĝamaĝi-kure, ema ĝoraka-kure Barau ĝenai, korana Guba Basileiana tu bevotu, (Barau ĝena veĝitaĝau seĝukana evaĝa-ruĝaiani maiĝa).” <sup>3</sup> Mai Ioane maiĝa tu Isaia peroveta tarimana na ekiraĝiato-ĝoi, maiĝesi ekirato,

“Tarima ta tano fakanai ekeani, ekirani, ‘Vereĝauka ĝena dabara ĝoiarevaia, ĝena iaĝoma dabarana ĝovaĝa-maoromaoroa.’”

<sup>4</sup> Ioane ĝena dabuĝa tu kamela ĝuiri na ĝeveiato, ĝena gabaĝau tu nanigosi kefina. Ĝana ĝaniĝani dagarari tu madudu e gode nanuri moĝo. <sup>5</sup> Tarimarima Ierusema na e Iudea mabarana na ema Ioridana douka vanuĝari mabarari na maki ĝeiaĝoto-ĝoi Ioane ĝenai. <sup>6</sup> Ĝeri rakava ĝekiraĝi-foforirito-ĝoi vau, ebatisorito-ĝoi Ioridana ĝarukanai.

<sup>7</sup> Farisea e Sadukea tarimari ĝutuma maki ĝia ĝenai ĝeiaĝoto bene babatisori ĝana. Ioane na eĝitarito nai, ekirarito, ekirato, “Ĝomi mota naturi, dei na bekirami, Barau ĝena Kota baregona ĝarona ĝenana boĝo raga-maĝurini? <sup>8</sup> Ĝemi rakava ĝerina boĝono vetuĝamaĝi-kure, benamo ĝemi maĝuri ai ĝwaĝwa namori boĝono vaĝa-ĝwari. <sup>9</sup> Ema nuĝami ai asi boĝono kira, ‘Aberahamo tu ĝai tamama, (be Barau na beĝabi-raĝemani).’

Korana akiramini, Barau tu ma seḡukana, Aberahamo natuna tu mai fore ḡerina bevaḡa-ḡorarini!”<sup>10</sup> Toma koko tu ḡau korari ai varau beḡe toreri; moḡa lorinai ḡwaḡwa namori asi ḡevaḡa-ḡorarini ḡauri mabarari tu beḡe basirini, karavai beḡe fiu-raḡerini.

<sup>11</sup> Deikara ḡena rakava ḡerina evetuḡamaḡi-kureni tarimana, au na tu nanu na ababatisoani. Senaḡi au murigu na beiaḡomani tarimana ḡena seḡuka tu lelevaḡi, au ḡegu seḡuka maki evanaḡiani, ema ḡia ḡena tamaka maki au na asi baḡwa-rakaorakaoani riba. ḡia na tu Iauka Veaḡa e karava na bebabatisomini. <sup>12</sup> ḡia ḡimanai tu iareva-iareva dagarana, widi momona tu widi tauri ḡenana bene iareva-ḡitakauri ḡana. Benamo widi tu ḡena vaḡa-vegogo numanai bevaḡa-vegogorini, senaḡi widi momona begabuani asi ebuseni karavanai.”

*Ioane na Iesu ebabatisoato*  
*Mareko 1:9-11; Luka 3:21-22*

<sup>13</sup> Moḡa neganai Iesu tu Galilea vanuḡana na Ioridana ḡarukana ḡana eiaḡoto, Ioane na bene babatisoa ḡana. <sup>14</sup> Senaḡi Ioane na ekiraḡoiato, ekirato, “Bere namo ḡoi na au boro babatisogu. Karase nai au ḡegu ai boiaḡoma?” <sup>15</sup> A Iesu na evaḡa-veaseato, ekirato, “Veiḡana noveia, korana veiḡa iobukaiobuka o Barau ḡena ura veiḡari mabarari bitana korana-iaḡiri tu namo.” Benamo Ioane na Iesu ḡena ura veiḡana eveiato.

<sup>16</sup> Iesu ebabatisoato, nanu na eraka-raḡasito nuḡanai, guba evekeo-fakato, benamo ḡia na Barau Iaukana eḡitaiato, pune kavana emariḡoto ḡia iatanai. <sup>17</sup> Ema garo ta guba na ekea-riḡoto, ekirato, “Mai tu au Natugu, aura-viniani; ema ḡia ḡenai aiaku-rakavani maki.”

## 4

*Diabolo o Satani na Iesu eriba-ḡaniato*

<sup>1</sup> Moḡa murinai Iauka Veaḡa na Iesu tano fakana ḡana eḡori-iaḡoato, Diabolo na bene riba-ḡania ḡana. <sup>2</sup> ḡaro e boḡi gabana vasivasi (40) nuḡari ai asi eḡaniḡanito, eḡani-veaḡato; moḡa lorinai vito na eḡabi-rakavaiaato. <sup>3</sup> Benamo Veribaḡani Tarimana Diabolo ḡia ḡenai eiaḡoto, ekiraiato, ekirato, “Bema ḡoi Barau Natuna nai, mai fore nokirari, be ḡaniḡani ai ḡeiaḡo.” <sup>4</sup> A Iesu na evaḡa-veaseato, ekirato, “Buka Veaḡa nuḡanai maiḡesi ekirani, ‘Tarimarima tu dia ḡaniḡani na moḡo bemaḡurini. Senaḡi Barau ḡena guruḡa beḡabi-raḡerini e bekorana-iaḡirini tarimana tu maḡuri beḡabiani.’ ”

<sup>5</sup> Benamo Diabolo na Ierusalem, siti veaḡana, ḡana eḡori-iaḡoato, Rubu Veaḡa tuḡuna vanigerenai evaḡa-ruḡakauato. <sup>6</sup> Benamo ekirato, “Bema ḡoi Barau Natuna, mainana noburi-firiḡo, korana Buka Veaḡa nuḡanai maiḡesi ekirani, ‘Barau na ḡena aneru bevaḡa-naḡirini, benamo ḡimari na beḡe ḡobemuni, beḡe ḡabi-vaishimuni, kwakumu fore ai asi boraraiani.’ ”

<sup>7</sup> Iesu na ma evaḡa-veaseato, ekirato, “Buka Veaḡa nuḡanai maki ekirani, ‘Vereḡauka ḡoi ḡemu Barau asi bono riba-ḡania.’ ”

<sup>8</sup> Benamo Diabolo na Iesu eḡori-raḡeato ḡoro baregona e maukana ta tuḡunai, tanobara basileiari mabarari ma marevari namori e ma seḡukari ḡesi evaḡa-ḡitaiato, <sup>9</sup> ekirato, “Bema ḡoiragu ai bovetui-tarini e au botoma-rakarioḡo viniguni nai tu, maiḡeri mabarari au na bavanimuni.” <sup>10</sup> Benamo Iesu na ekiraiato, ekirato, “Satani, au ḡeguna noraka-veḡita. Korana Buka Veaḡa nuḡanai ekirani, ‘Vereḡauka ḡoi ḡemu Barau bono toma-rakariḡo vinia, ḡia moḡo ḡereḡana vetuḡunaḡina bono iaḡo-vini!’ ”

<sup>11</sup> Benamo Diabolo na eraga-kwaneato. Aneru kotari Iesu ḡenai ḡeiaḡoto, ḡenariato.

*Iesu ḡena ḡauvei esinaiaato Galileai*  
*Mareko 1:14-15; Luka 4:14-15*

<sup>12</sup> Iesu eseḡaḡito, Ioane ḡe-diburaiato, benamo Galilea tanona ḡana ma eḡenoḡoi-iaḡoto. <sup>13</sup> Senaḡi Nasareta vanuḡana ma eragakwaneato, asi etanuto, eiaḡoto, Kaperanaumai ea tanuto. Kaperanaumai tu Genesareta kouna sevina vanuḡana ta, Sebulun e Naftali tanori nuḡanai. <sup>14</sup> Moḡa ḡenana Isaia, peroveta tarimana, ḡena guruḡa emoḡonito, ekirato,

<sup>15</sup> “Sebulun e Naftali tanori ai ġotanuni tarimami o, Galilea kouna rikinai ema Ioridana ġarukana mo rekenai, irau bese tarimami, Barau asi ribami tarimami, ġemi Galilea tu moġa, ġoseġaġi.

<sup>16</sup> Mukunai ġetanuto-ġoi tarimari tu mama barana varau ġeġitaiani. E mo dei mukuna furufuru tanonai ġetanuto-ġoi tarimari iatari ai mama varau bema fofori.”

<sup>17</sup> Mo negai vau Iesu na ġena vari eġobata-iaġi-foforiato, ekirato, “Ġemi rakava ġerina ġovetuġamaġi-kure, ema ġoraka-kure Barau ġenai, korana Guba Basileiana tu bevotu, (Barau ġena veġitaġau seġukana evaġa-ruġaiani maiġa).”

*Iesu na tarima vasivasi (4) ekearito, ġia murinai beġene raka*

*Mareko 1:16-20; Luka 5:1-11*

<sup>18</sup> Iesu Galilea kouna kone rikina na eraka-iaġoto-ġoi nuġanai, tarikaka ruarua, Simona, arana ta tu Petero, ma tarina Anduru ġesi eġitarito, ġeri reke kou ai ġefiuato, korana ġia tauri ruarua tu maina tarimari. <sup>19</sup> Benamo Iesu na evaġa-guruġarito, ekirato, “Ġoiaġoma, murigu ai ġoma raka, be au na tu tarimarima maina viniri bana vaġa-ribami.” <sup>20</sup> Benamo maoromaoro ġeri reke ġeraga-kwanerito, Iesu murinai ġerakato.

<sup>21</sup> Monana ġeraka-iaġoto-ġoi nai, Iesu na tarikaka ruarua ma eġitarito, Iakobo (o Iames) Sebedaio ma tarina Ioane ġesi; ġeri ġasi ai tamari Sebedaio ġesi ġeri reke ġwadarerri ġeturirito. Iesu na ekearito, <sup>22</sup> benamo maoromaoro ġeri ġasi e tamari ġeraga-kwanerito, Iesu murinai ġerakato.

*Iesu evevaġa-ribato ema keve tarimari evaġa-namorito*

*Luka 6:17-19*

<sup>23</sup> Iesu Galilea tanona mabaranai erakaoto-ġoi, Iuda tarimari ġeri rubu nuġari ai evevaġa-ribato-ġoi, e Barau ġena Basileia, (ġena veġitaġau seġukana evaġa-ruġaiani), varina namona eġobata-iaġiato-ġoi. Ema tarimarima ġeri keve e midigu irauirau mabarari evaġa-namorito. <sup>24</sup> Ġia varina ġefiuato, Siria tanona mabarana eġabiato, benamo tarimarima na ġeri keve tarimari mabarari ġia ġenai ġeġwa-iaġorito e ġeġori-iaġorito: Midigu irauirau, iauka rakavari na ġeboroġirito tarimari, ġue na evaġiani kevena, tauġani ġeġoġoġoġoni, e tauġaniri tavi tari ġemaseto tarimari, Iesu na mabarari evaġa-namorito. <sup>25</sup> Tarimarima ġutuma-bara ġia murinai ġerakato, Galilea na, Vanuġa Gabanana (10) na, Ierusalemna na, Iudea na, ema Ioridana ġarukana mo rekena na maki ġia ġekavaiato.

## 5

*Iesu ġoro tuġunai eġobatato*

<sup>1</sup> Iesu na tarima ġutuma-bara eġitarito, benamo ġoro tai eraġeto, iatanai etanu-tarito. Ġena mero ġia ġenai ġeiaġoto. <sup>2</sup> Benamo ġia na evaġa-riba matamarito, maiġesina ekirato:

*Iaku e verere korikorina*

*Luka 6:20-23*

<sup>3</sup> “Manau tarimari, Barau ġenai moġo ġevetabekauni tarimari, tu beġene iaku, korana Barau ġena Basileia tu ġia ġeri.

<sup>4</sup> Deidei toma ġenuġa-midigu midiguni tarimari tu beġene iaku, korana Barau na ġeri nuġa-midigumidigu bevaġa-magorini.

<sup>5</sup> Manau tarimari tu beġene iaku, korana Barau na tanobara mabarana ġia bevinirini.

<sup>6</sup> Veiġa iobukaiobuka vitona ġevito-iaġiani e nanumasena ġenanumase-iaġiani tarimari tu beġene iaku, korana vau beġe ġani-maseni.

<sup>7</sup> Vevetuġaġwa tarimari tu beġene iaku, korana Barau na ġia maki bevetuġa-ġwarini.

<sup>8</sup> Deidei nuġari namo vedaurea tarimari tu beġene iaku, korana ġia na Barau beġe ġitaiani.

<sup>9</sup> Deidei na toma vevaġa-maino veiġari ġeveirini tarimari tu beġene iaku, korana Barau na ġia natunai bekiraġirini.



<sup>10</sup> Deidei na toma veiḡa iobukaiobukari ḡeveirini ḡaramanai ḡevaḡa-midigu midigurini e ḡevaḡa-rakavarini tarimari tu beḡene iaku, korana Guba Basileia tu ḡia ḡeri.

<sup>11</sup> Bema au murigu ai ḡorakani ḡaramanai ḡomi beḡe mugumugu-iaḡimini, beḡe vaḡa-midigu midigumini, e veiḡa rakavari irairau ḡemi ai beḡe kiraḡirini beḡe ḡofaḡofa-iaḡimini nai, boḡono iaku. <sup>12</sup> Boḡono iaku, boḡono verere, korana Barau na voimi baregona bevinimini gubai. Maiḡesina veiḡa ilailana, ḡomi murimi tarimari, peroveta tarimari guineri, na maki moḡesi ḡevaḡa-rakavarito.”

*Damena e mama*

*Mareko 9:50; Luka 14:34-35*

<sup>13</sup> “Ḗomi tu tanobara damenana. Bema damena mamina korikorina bekorini nai, kamara dabarai mamina ma beḡenoḡoini? Mai tu varau berakava, asi ḡena namo ta. Moḡa lorinai beḡe fitoḡaiani, benamo tarimarima kwakuri na ma beḡe fanafana-tariani.

<sup>14</sup> Ḗomi tu tanobara mamana. Ḗoro tuḡunai ḡevaḡa-ruḡaiato vanuḡana tu asi bevekuretoḡani riba. <sup>15</sup> Lamefa beḡe gabuani maki, ḡuro gaburenai asi beḡe toreani, senaḡina lamefa toretorena fatana korikorinai beḡe tore-kauani. Benamo ḡia mamana na numa tarimari mabarari bevinirini. <sup>16</sup> Ilailana, ḡomi ḡemi mama tarimarima ḡoirari ai moḡesi boḡono vaḡa-foforiri, be ḡemi veiḡa namori beḡene ḡitari, benamo Tamami gubai etanuni tu beḡene vaḡa-raḡea.”

*Iesu ema taravatu*

<sup>17</sup> “Maiḡesina asi boḡono tuḡa-maḡi, au aiaḡomato tu, Mose ḡena taravatu e peroveta tarimari ḡeri guruḡa asi aniri ai bana vaḡa-iaḡori ḡana. Asiḡina. Au tu asi aiaḡomato moḡeri guruḡa asi tauri ai bana vaḡa-iaḡori ḡana, senaḡi bana vaḡa-moḡoniri e bana vaḡa-kori ginikauri uranai aiaḡomato. <sup>18</sup> Moḡoni akira-mini, guba e tanobara roḡo ḡetanuni nuḡanai, taravatu ḡena leta misina korokorona ta o ḡena koma ta asiḡina ḡinavaḡi berekwa-rekwani, beiaḡoni mo, taravatu mabarari tauri korikori beḡea ḡorani. <sup>19</sup> Moḡa lorinai, tarima ta na taravatu misina korokorona ta bekira-sirivaḡi viniani, ema ḡena ura veiḡanai tarima kotari mai veiḡa ilailana ma bea vaḡa-ribarini, ḡia tu Guba Basileiai gabi tarimanai beḡe kiraḡiani. Senaḡina tarima ta na taravatu bekorana-iaḡirini ema tarima kotari ma bea vaḡa-riba iaḡirini, ḡia tu guine tarimanai beḡe kiraḡiani Guba Basileia nuḡanai. <sup>20</sup> Akira-korikorimini, bema ḡomi ḡemi vei-iobukaiobuka na Farisea e taravatu ḡevevaḡa-riba iaḡiani tarimari ḡeri vei-iobukaiobuka asi bevanaḡiani nai, ḡomi tu Guba Basileia nuḡanai asi boḡo raka-toḡani, asiḡina ḡinavaḡi.”

*Vaḡivaḡi*

*Luka 12:57-59*

<sup>21</sup> “Ḗomi ma ribami, tarima guineri na taravatu guruḡari ḡeḡabirito, ḡekirato, ‘Asi bono vaḡivaḡi! A deikara na tarima ta bevaḡiani nai, ḡia tu Kota gabuna ḡana beiaḡoni.’

<sup>22</sup> Senaḡi toma au na akiramini: Tarima ta tarikakana bebaru-viniani nai, ḡia tu Kota gabunai beḡe danaḡiani. E dei na tarikakana beguruḡa-rakava viniani nai, ḡia tu Kota baranai beḡe vaḡa-ruḡaiani. Ema dei na tarikakana bekiraiani, ‘Ḗoi tu babo korikori’ betoni nai, ḡia tu asi ebuseni karavana ḡana beiaḡoni.

<sup>23</sup> Moḡa lorinai, bema ḡemu varevare dagarana fata veaḡana iatanai bono torekaua, Barau bono vinia otoni nuḡanai, ḡoi tarikamu otuḡamaḡiani, ḡia ma ḡena meto ḡoi ḡemu ai, <sup>24</sup> benamo ḡemu varevare dagarana fata veaḡana ḡoiranai noraga-kwanea, noiaḡo, tarikakamu ḡesi maino boḡono ḡabia roḡo, gabivau bono ḡenoḡoi-iaḡo, ḡemu varevare dagarana fata veaḡanai bono torea Barau ḡena.

<sup>25</sup> Ḗoi ebaru-vinimuni tarimana ḡesi maino boḡono raga-ḡabia, Kota gabuna ḡana roḡo mani ḡoraka-vegogoni nuḡanai. Korana ebaru-vinimuni tarimana na Kota eseḡaḡini tarimana ḡimanai bea tore-kaumuni ḡesi, ema Kota eseḡaḡini tarimana na dibura numana ḡitaḡauna tarimana ḡimanai betoremuni, benamo ḡia na dibura numana nuḡanai bebiri-ḡaumuni garina. <sup>26</sup> Au na akira-korikorimuni: Monana asi roḡo borakarosini, beiaḡoni mo, ḡemu meto voina bodava-ḡosiani.”

*Veḡura-vanaḡi*

<sup>27</sup> “Ḡomi ma ribami, tarima guineri na taravatu guruḡari ḡeḡabirito, ḡekirato, ‘Asi bono veḡura-vanaḡi!’ <sup>28</sup> Senaḡi au na akiramini: Deikara na tarima ta ḡaraḡona beḡita-karakaraiani ma eurani bene ḡabia ḡia ḡena, ḡia tu nuḡana tuḡamaḡina ḡenana varau beveḡura-vanaḡi mo vavine ḡenai. <sup>29</sup> Bema ḡoi matamu aroribana na evaḡa-rakavamuni nai, bono ḡibo-vaḡia, bono fitoḡaia! Korana tauḡanimu rakavana rekena berekwarekwani tu namo, a asi namo tauḡanimu mabarana karava asi ebuseni gabunai beḡe fiukauani. <sup>30</sup> Ma bema ḡoi ḡimamu aroribana na evaḡa-rakavamuni nai, bono basi-ḡutua, bono fitoḡaia. Veḡa namona tu, tauḡanimu rakavana rekena bono fitoḡa-guinea, be tauḡanimu mabarana karava eḡara-vanaḡi vanaḡini gabuna ḡana asi bene iaḡo.”

*Vavine tuḡuraka*

*Mataio 19:9; Mareko 10:11-12; Luka 16:18*

<sup>31</sup> “Tarima guineri na taravatu guruḡari ḡeḡabirito, ḡekirato, ‘Tau ta ḡaraḡona betuḡu-rakaiani nai, ḡia na veḡaraḡo ruḡaruḡana fefana bene tore-vinia.’ <sup>32</sup> Senaḡina au na akiramini: Bema tarima ta ḡaraḡona betuḡu-dobiani, senaḡi vavine tu veḡura-vanaḡi veiḡari asi eveini, mo tau na ḡaraḡona tu veḡuravanaḡi vavinenai evaḡa-iaḡoani. Ema deikara na etuḡu-rakaiato vavinenana beḡaraḡoani tarimana tu, beveḡura-vanaḡini.”

*Guruḡatore*

<sup>33</sup> “Ḡita senera ḡevaḡa-ribarito guruḡari ḡomi tu ma ribami: ‘Ḡemi guruḡatore asi boḡono vaḡa-rakavaia, senaḡi Vereḡauka ḡoiranai ḡokiraḡi-toreto dagarari boḡono veiri.’ <sup>34</sup> Senaḡi au na akiramini: Asi boḡono guruḡatore veḡata! Ḡemi guruḡa vaḡa-gwaḡiḡiri ḡana guba asi boḡono kiraḡia, guba aranai asi boḡono guruḡatore, korana ḡia tu Barau ḡena terona; <sup>35</sup> o tanobara aranai maki asiḡina, korana ḡia tu Barau kwakuna ḡena fanakau dagarana; o Ierusalemara aranai, korana ḡia tu Kini baregona ḡena siti. <sup>36</sup> Ḡoi debamu, ḡemu maḡuri, maki asi bono kiraḡia ḡemu guruḡatore vaḡa-gwaḡiḡina ḡana, korana ḡoi na ḡuimu sebona ta asi bovaḡa-kurokuroani e asi bovaḡa-dubadubaiani riba. <sup>37</sup> Namona tu maiḡa: Ḡemu guruḡa bono kiraḡia, ‘Oi’ bene oi e ‘Asiḡina’ bene asiḡina. Moḡa moḡo, a guruḡa tari ma okiraḡirini tu Tarima Rakavana, Satani, ḡenana eiaḡomani.”

*Evaḡa-rakavamuni tarimana voina asi bono veia*

*Luka 6:29-30*

<sup>38</sup> “Tarima guineri ḡevaḡa-ribarito guruḡari ḡomi tu ma ribami, maiḡesi ḡekirato: ‘Mata voina mata e doḡa voina doḡa.’ <sup>39</sup> Senaḡina au na akiramini, veiḡa rakavana eveivinimuni tarimana asi bono veiḡa rakava-vinia. Bema tarima ta na taḡomu aroribana beforoani nai, taḡomu kaurina ma bono vinia maki. <sup>40</sup> E bema tarima ta na Kotai betoremuni ḡemu sedi bene ḡabia ḡana nai, ḡemu koudi maki bono vinia. <sup>41</sup> Ema tarima ta na belau-naḡimuni, kilomita sebonai bono kavaia betoni nai, kilomita ruarua ai ma bono raka ḡia ḡesi. <sup>42</sup> Ema enoḡinoḡini tarimana bono vinia, e ḡemu ai bene ḡabitore etoni tarimana maki asi bono kira-sirivaḡi vinia.”

*Ḡevaḡa-rakavamuni tarimari bono ura-viniri*

*Luka 6:27-28; 6:32-36*

<sup>43</sup> “Tarima guineri ḡevaḡa-ribarito taravaturi ma ribami, ḡekirato: ‘Ḡoi sevimu tarimana bono ura-vinia, a evaḡa-rakavamuni tarimana bono vaḡa-rakavaia.’ <sup>44</sup> Senaḡina au na akiramini: Ḡebaru-vinimini tarimari boḡono ura-viniri, e dei na ḡevaḡa-rakavamini tarimari maki iatari ai boḡono ḡauḡau. <sup>45</sup> Maiḡa ḡenana boḡo vaḡa-foforiani, ḡomi tu Tamami gubai etanuni na natunai evaḡa-iaḡomito. Korana ḡia na ḡaro tu veiḡa rakava tarimari e veiḡa namo tarimari iatari ai evaḡa-raḡekauani, ema ḡura maki veiḡa iobukaiobuka e veiḡa ḡeḡeva-ḡeḡeva tarimari ḡeri etuḡu-riḡoani. <sup>46</sup> Bema ḡouravinirini tarimari tu ḡomi ḡeura-vinimini tarimari moḡo nai, kamara varevare namona boḡo ḡabiani? Takesi ḡegogoni tarimari o ḡofaḡofa tarimari na maiḡesina maki

ġeveiani. <sup>47</sup> Ema tarikakami moġo boġo vaġa-namorini, ġemi namo tu kara? Barau asi ribari tarimari na maki mai veiġa ġeveiani. <sup>48</sup> Moġa lorinai ġomi tu asi vetoukaumi boġono tanu, ġomi Tamami gubai etanuni asi vetou-kauna kavana.”

## 6

*Vini korikorina rabu tarimari ġeri ai*

<sup>1</sup> “Rorimi boġono vetore, ġemi veiġa namori tarimarima ġoirari ai asi boġono vaġa-foforiri, ġia na beġene vaġa-raġemi ġana. Maiġeri boġo veirini nai, Tamami gubai etanuni ġenana voimi asi boġo ġabini.

<sup>2</sup> Moġesi nai, ġemu varevare rabu tarimari bovinirini nai, asi bono ġobata-iaġia ma kibimu ġesi, ġofaġofa tarimari rubu ai e vanuġa ġatamanai ġeveini kavana, tarimarima na beġene vevato-iaġiri ġana. Akira-korikorimini, ġia tu tarimarima na ġevaġa-raġerini, be voiri tu varau ġeġabirito. <sup>3</sup> Sena-ġina ġoi ġemu varevare asi ġena-ġana tarimana novinia botoni nai, ġimamu kaurina asi bene riba, ġoi ġimamu aroribana na kara eveiani. <sup>4</sup> Be ġemu varevare vekuretoġai bono vini. Ema Tamamu na, kara eġorani vekure-toġai eġitarini, ġia na vau voimu bevinimuni.”

*Vereġauka ġena ġauġau*

*Luka 11:2-4*

<sup>5</sup> “Bema boġo ġauġauni nai, ġofaġofa tarimari kavana asi boġono iaġo! Ġia ruġaruġari ai ma iakuri ġesi ġeġuriġurini, rubu nuġari ai e vanuġa ġatamanai ema dabarai maki, tarimarima na beġene ġitari ġana. Au na akira-korikorimini, ġia voiri varau ġeġabito. <sup>6</sup> A ġoi ourani bono ġauġau otoni nai, ġemu numa daiġutuna nuġanai bono rakatoġa, ġatama-boka bono biri-ġaua, monai vau Tamamu bono noġi-vinia, ġia tu vekuretoġai etanuni. Ema Tamamu na, kara eġorani vekuretoġai eġitarini, ġia na vau voimu bevinimuni.

<sup>7</sup> Ġomi boġo ġauġauni nai, asi boġono kiraġi ġenoġoi-ġenoġoi guruġa asi aniri ġeri ai, Barau asi ribari tarimari ġeveini kavana. Ġia ġetuġamaġini, ġeri guruġa vovoka ġekiraġirini naima, Barau na beseġaġirini. <sup>8</sup> Ġia kavari asi boġono iaġo. Korana ġomi na kara ġoura-vinirini, Tamami na eriba-guineani, gabivau ġomi na ġonoġi-viniani.

<sup>9</sup> Maiġesina boġono ġuriġuri:

‘Ġai Tamama o, gubai otanuni; ġoi aramu baġana vaġa-veaġaia;

<sup>10</sup> ġemu Basileia bene iaġoma; ġemu ura tanobarai baġana veia, gubai ġeveiani kavana.

<sup>11</sup> Ġema-ġama toma bono vinima.

<sup>12</sup> Ġema rakava notuġamaġi-fitoġari, ġai ġevaġa-rakavamani tarimari ġeri rakava ġatuġamaġi-fitoġarini vaġa-ilailana.

<sup>13</sup> Veribaġani ai asi bono ġori-kauma, a Rakava Tarimana, Satani, ġimana na bono vaġa-maġurima. [Korana Basileia tu ġoi ġemu, seġuka ġoi ġemu, mareva baregona ġoi ġemu, toma bene iaġo mo vanaġivanaġi, Amen.]’

<sup>14</sup> Bema ġomi na ġevaġa-rakavamini tarimari ġeri rakava boġo tuġamaġi-fitoġarini nai, Tamami gubai etanuni na ġemi rakava maki betuġamaġi-fitoġarini. <sup>15</sup> Senaġina, bema ġomi na ġevaġa-rakavamini tarimari ġeri rakava asi boġo tuġamaġi-fitoġarini nai, Tamami na ġemi rakava maki asi betuġamaġi-fitoġarini.”

*Ġaniveaġa*

<sup>16</sup> “Boġo ġani-veaġani nai, asi boġono boġe-vetuġa, ġofaġofa tarimari ġeveini kavari. Ġoirari ai ġevevaġa-fofori ġofakauni, tarimarima na mataboru beġene kira, ‘Ġeġani-veaġani kika’ beġene si. Akira-korikorimini, ġia voiri tu varau ġeġabirito. <sup>17</sup> A ġoi, bema bono ġani-veaġa botoni nai, debamu ai deoro bono tore e ġoiramu bono ġuriġia, <sup>18</sup> be tarimarima na asi beġene ribamu, ġoi tu oġani-veaġani, senaġina Tamamu veġuni ai moġo bene riba. Ema Tamamu na, kara eġorani vekuretoġai eġitarini, ġia na vau voimu bevinimuni.”

Ġemi farefare gubai boġono vaġa-vegogo

*Luka 12:33-34*

<sup>19</sup> “Ġemi farefare tu mai tanobarai asi boġono vaġa-vegogo! Korana faro ema lalalala o rasta na beġe vaġa-rakavarini ġesi, ema lema tarimari na numa beġe dareani ema beġe lemarini. <sup>20</sup> Ġemi farefare gubai boġono vaġa-vegogo, faro e lalalala na asi beġe vaġa-rakavarini, ema lema tarimari na maki numa asi beġe dareani ema asi beġe lemarini riba. <sup>21</sup> Ġoi ġemu farefare ainai etanuni, ġoi nuġamu maki monai etanuni.”

*Mata tu tauġani ġena mama*

*Luka 11:34-36*

<sup>22</sup> “Mata tu tauġani ġena lamefa kavana. Bema ġoi matamu namo nai, tauġanimu mabarana maki bemamani. <sup>23</sup> Senaġina bema ġoi matamu tu rakava nai, tauġanimu mabarana maki bemukunani. A bema mama ġoi nuġamu ai tu mukuna nai, mai mukuna tu bebarego-vedaureani!”

*Tarima ta vere ruarua vetuġuri asi beiaġo-vinini riba*

*Luka 16:13*

<sup>24</sup> “Tarima ta na vere ruarua vetuġunaġiri asi beiaġo-vinirini riba. Korana ġia na ta tu asi beura-viniani, a ta tu beura-viniani; ta bevaġa-moġoniani, a ta tu beġofaġofa-iaġiani. Barau ema moni nega sebonai vetuġunaġiri asi boġo iaġo-vinirini riba.”

*Asi boġono nuġa-vekwaraġi*

*Luka 12:22-31*

<sup>25</sup> “Moġesi naima akiramini, ġemi maġuri asi boġono tuġamaġiri, kara boġo ġanini o boġo niuni; o tauġanimi kara na boġo dabuġarini. Aiġa tu dagara barana, maġuri ba ġaniġani? E aiġa tu dagara barana, tauġani ba dabuġa? <sup>26</sup> Gubai ġerovoni manuri ġoġitari! Ġia tu asi ġevarovaroni e asi ġekwakwani, ema vamoka numari ai maki ġaniġani asi ġevaġa-vegogoni. Senaġi Tamami gubai etanuni na eġuburini. Ġomi tu dagara baregomi, a manu tu kei! <sup>27</sup> Ġomi deikara onuġa-vekwaraġini nai, ġemu maġuri kota ma bovaġa-maukaiani riba ba?

<sup>28</sup> Karase dabuġa urari ai ġove-tuġamaġi-vekwaraġini? Boġa veraverari ġoġitari, aiġesi ġegarani. Asi ġeġauveini e dabuġa asi ġeturini. <sup>29</sup> Senaġina akiramini, Kini Solomona ġena vedabuġa marevana maki ġevanaġiani. <sup>30</sup> Mai tu Barau na tano ġauġari evaġa-dabuġarini, ġia tu toma ġegarani, a boinani tu karavai beġe fiu-raġerini, Barau tu moġesina evaġa-dabuġarini. Ġia na ġomi asi veġatana bevaġa-dabuġamini, ei? Ġomi veġabidadama misimisi tarimami! <sup>31</sup> Moġesi nai, asi boġono nuġa-vekwaraġi, asi boġono kira, ‘Kara toma taġanini?’ O ‘Kara toma taniuni?’ O ‘Kara toma tariġoni?’ <sup>32</sup> Barau asi ribari tarimari na maiġeri dagara mabarari ġeraga-vetaurini, a Tamami gubai etanuni tu ribana, ġomi na maiġeri ġoura-vinirini. <sup>33</sup> Senaġina giniguine ġia ġena Basileia ema ġena vei-iobukaiobuka boġono vetau-guineri, benamo maniġeri dagara mabarari ġomi bevinimini. <sup>34</sup> Moġesina naima boinani ġaro tuġamaġi-vekwaraġina asi boġono vei; boinani ġaro ġena vekwaraġi tu Barau ġimanai. Toma ġaro ġena vekwaraġi iatanai meto ma boġo torekauani nai, kamasi boġo ġwaiiani?”

## 7

*Tarimarima asi boġono vetau-viniri*

<sup>1</sup> “Tarimarima asi boġono vetau-viniri, be Barau na maki asi bene vetau vinimi. <sup>2</sup> Korana tu ġomi ġemi vetauvinini ilailanai, ġomi maki moġesina moġo Barau na bevetau-vinimini; ema aiġesi ġovevaġa-vetovo vinirini, Barau na maki moġesi bevevaġa-vetovo vinimini. <sup>3</sup> Karase nai tarikakamu matanai libika oġitaiani, senaġi ġau tubina ġoi matamu nuġanai maniġa tu asi otuġamaġiani? <sup>4</sup> Kamara dabarai ġoi tarikakamu okiraiani, ‘Ġata, au na roġo matamu ai libika nakokia,’ senaġina ġoi tauġemu matamu ai ġau tubina ta etanuni? <sup>5</sup> Ġoi ġofaġofa taumu, guine tu ġoi matamu ai ġau tubina

nokoki-vaġia roġo, benamo boboġeboġe-ginikauni vau, tarikakamu matanai libika bono ġabi-vaġia.

<sup>6</sup> Dagara veaġari kwaiva (o kira-sirivaġi tarimari) asi boġono viniri, ema ġemi aġeva maki asi boġono fiu-rosiri bai ġoirari ai! Kwakuri na beġe fana-taririni, benamo beġe doġe-kureni, ma beġe dare-misi misimini garina.”

*Noġinoġi, vetauvetau, sekeseke o fidifidi*

*Luka 11:9-13*

<sup>7</sup> “Noġinoġi ai Barau na bevini-mini, vetauvetau ai boġo doġarini, sekeseke ai ġemi ġatama boka bekeoani. <sup>8</sup> Korana benoġi-noġini tarimana tu beġabini, bevetauni tarimana bedoġarini, ema beseke-sekeni tarimana Barau na ġena ġatama-boka bekeoani.

<sup>9</sup> Ġomi dei bema natumu merona ġaniġani benoġini nai, ġoi na fore boviniani? <sup>10</sup> O maġani-kone benoġini nai, mota boviniani? <sup>11</sup> Boġono tuġamaġi, ġomi tu rakava tarimami, senaġi dagara namori natumi viniviniri ma ribami, moġa lorinai ġomi Tamami gubai etanuni, ġia na dagara namori ġenoġi-viniani tarimari bevinirini veġatana!

<sup>12</sup> Ġomi kara ġourani tarimarima na ġemi ai beġene veiri veiġari, ġia ġeri ai maki moġeri veiġa boġono veiri. Mose ġena taravatu e peroveta ġeri vevaġa-riba guruġari tauna korikorina tu moġa.”

*Barau ġena Basileia rakatoġana*

*Luka 13:24*

<sup>13</sup> “Ġatama-boka kibobonai boġono rakatoġa. A mase gabuna ġana eiaġoni dabarana tu baġaka, e ġena ġatama-boka tu barego rakava, ema ġutuma maki monai ġerakatoġani. <sup>14</sup> Senaġi maġuri vanaġivanaġi ġana eiaġoni ġatama bokana tu kibobo e dabara maki kei rakava, ema tarimarima viravira na moġo ġedoġariani.”

*Peroveta tarimari ġofaġofari*

*Luka 6:43-44*

<sup>15</sup> “Rorimi boġono vetore peroveta tarimari ġofaġofari ġerina. Ġia ġomi ġemi ai ġeiaġomani tu ma mamoe dabuġari ġesi, senaġina nuġari ai ġeri tuġamaġi tu boġa kwaivari rakavari kavari. <sup>16</sup> Ġia ġwaġwari ai vau boġo ribarini. Vine ġwari (o grapes) tu ġau ma giniri ġerina asi ġebokoni, ema figi ġwari maki ġauġa ġiniġiniri ġeri ai asi ġeġabini. <sup>17</sup> Ġau namona ġenana ġwaġwana namona bevaġa-ġoraiani, a ġau rakavana ġenana maki ġwaġwana rakavana bevaġa-ġoraiani. <sup>18</sup> Ġau namona na ġwaġwa rakavana asi beġwani riba, ilailana ġau rakavana na ġwaġwa namona asi beġwani riba. <sup>19</sup> Ġwaġwa namori asi ġeġwani ġauri tu beġe basirini, ma karavai beġe fiu-raġerini. <sup>20</sup> Moġesina ilailanai peroveta tarimari ġofaġofari tu ġwaġwari ai boġo ribarini.

<sup>21</sup> Dia ‘Vereġauka, Vereġauka,’ ġetoguni tarimari mabarari tu Guba Basileiai beġe raka-toġani. Asiġina. Deikara Tamagu gubai etanuni ekorana-iaġiani e ġena ura veiġari eveirini tarimana ġereġana moġo. <sup>22</sup> Kota baregona ġarona beraġasini nai, tarima ġutuma na beġe kiraguni, beġe kirani, ‘Vereġauka, Vereġauka, ġoi aramu ai ġaperovetato, e ġoi aramu ai iauka rakavari ġalai-vaġirito, ma ġoi aramu ai nuġa-farevaġi veiġa boruri ġutuma maki ġaveirito.’ <sup>23</sup> Benamo au na bakirarini, bakirani, ‘Au asi ribagu ġomi. Ġeguna ġoraka-veġita, ġomi veiġa rakava tarimami!’ ”

*Numa ruarua raġaragari tauri*

*Luka 6:47-49*

<sup>24</sup> “Moġa lorinai, tarima ta na ġegu guruġa maiġeri eseġaġirini, ma veiġari eveirini tu, tarima iaunegana na ġena numa fore iatari ai evaġa-ruġaiato kavana. <sup>25</sup> Ġura baregona eraguto, ġaruka mabarari ġeġabatarito, iavara asikeikeina eragato nai, mo numa edoriato; senaġina asi eġwa-lauato, korana ġia tu fore iatanai evaġa-ruaġaiato nai. <sup>26</sup> A deikara na ġegu guruġa maiġeri eseġaġirini, senaġi veiġari tu asi eveirini, ġia tu tarima babona noġa, numa eragato nai, miri iatanai moġo evaġa-ruġaiato. <sup>27</sup> Ġura

baregona eraguto, ġaruka mabarari ġeġabatarito, iavara asikei eraġasito, mo numa edoriato nai, eġwa-lauato, benamo eġwa-rovorovoto.”

<sup>28</sup> Iesu na ġena ġobata guruġari maiġeri ekiraġi-ġosirito nai, mai vegogo tarimari ġutuma-bara na ġena vevaġa-riba guruġari ġeġaba-iaġirito. <sup>29</sup> Korana ġena guruġa ma seġukana, dia ġeri taravatu ġevevaġa-riba iaġiato-ġoi tarimari ġeri guruġa kavana.

## 8

*Iesu na lepera tarimana evaġa-namoato*

*Mareko 1:40-44; Luka 5:12-14*

<sup>1</sup> Iesu ġoro tuġuna na ma emariġoto nai, tarima ġutuma-bara ġia murina na ġerakato. <sup>2</sup> Benamo tarima ta ma leperana Iesu ġenai eiaġoto, ġoiranai evetui-tarito, ekirato, “Vereġauka, bema ġoi ourani nai, moġoni boiarevaguni, bovaġa-namoguni riba!” <sup>3</sup> Iesu na ġimana eduġi-roroġotoato, keve tarimana eġabi-karaiato, ekirato, “Aurani, be nonamo!” Benamo vaġa-sebo lepera na enamoto. <sup>4</sup> Iesu na evaġa-guruġaiato, ekirato, “Tarima ta asi bono kira-varaia. Noiaġo, Rubu Veavaġa verena na bene ġitamu, ema veiareva varevare dagarari Mose na ekiraġiato ilailanai bono vinia; be tarimarima beġene riba, ġoi tu bonamo.”

*Roma vetari verena ġena vetuġunaġi merona*

*Luka 7:1-10*

<sup>5</sup> Iesu Kaperanauma ai eraġasito nai, Roma vetari verena ta ġia ġenai eiaġoto, Iesu enoġiato, <sup>6</sup> ekirato, “Vereġauka, ġegu vetuġunaġi merona tauġanina asi eġarevani, be numai egena-taġoni, ema midigu maki barego eġanini.” <sup>7</sup> Iesu na ekiraiato, ekirato, “Au aiaġosini, be asi-vaġa-namoani.” <sup>8</sup> Vetari verena na evaġa-veaseato, ekirato, “Vereġauka, au tu asi ilaila ġoi ġegu numai boraġe-kauni; senaġi ġoi noguruġa moġo, benamo au ġegu vetuġunaġi merona benamoni. <sup>9</sup> Au maki tarima kota ġeri veġitaġau gabureri ai, ema vetari tarimari o soldia tu au gaburegu ai. Au na ta bakiraiani, ‘Noraka!’, benamo berakani, ma ta bakiraiani, ‘Noiaġoma!’, benamo beiaġomani. Ema au ġegu vetuġunaġi merona bakiraiani, ‘Maiġa noveia!’, benamo beveiani.”

<sup>10</sup> Iesu na ġena guruġa eseġaġiato nai, eġaba-rakavato. Benamo ġia murinai ġerakato tarimari evaġa-guruġarito, ekirato, “Au na akira-korikorimini, Isaraela nuġanai mai-ġesina veġabidadama ta roġosi bana doġaria. <sup>11</sup> Au na akiramini maki, tarimarima ġutuma ġaro-raġe e ġaro-riġo rekeri na beġe iaġomani, Aberahamo, Isako, e Iakobo ġesi vereko baregonai beġe ġani-vegogoni Guba Basileiana nuġanai. <sup>12</sup> Senaġina tovtovonai Barau na eġabi-viriġirito tarimari, Basileia nuġanai beġene tanu etato tarimari tu, Barau na befiu-rosirini murikai, mukuna furufuru nuġanai. Monai beġe taġini, e gadikari maki beġe veġara-tarini.”

<sup>13</sup> Benamo Iesu na vetari verena ekiraiato, ekirato, “Noiaġo, ġemu numa ġana! Boveġabidadama lorinai, veiġana beġorani.” Ġena vetuġunaġi merona mo horai varau enamoto.

*Iesu na Simona ġena taġama evaġa-namoato*

*Mareko 1:29-31; Luka 4:38-39*

<sup>14</sup> Iesu Petero ġena numai eraka-toġato. Monai Petero ġena taġama vavinena ekeveto, tauġanina eseġukato, be egena-taġoto-ġoi, Iesu na eġitaiato; <sup>15</sup> ġimanai eġabito, benamo ġena keve ekorito, evaisi-raġeto, benamo ġia eġubuato.

*Iesu na tarimarima ġutuma evaġa-namorito*

*Mareko 1:32-34; Luka 4:40-41*

<sup>16</sup> Lavilavi ai iauka rakavari na ġeboroġirito tarimari ġutuma Iesu ġenai ġeġori-iaġorito. Iesu na moġeri iauka rakavari ġena guruġa seġukana ġenana moġo elai-vaġirito, e keve tarimari mabarari maki evaġa-namorito. <sup>17</sup> Maiġeri veiġa vaġa-moġoniri tu Isaia, peroveta tarimana, na ekiraġiato kavana, ekirato, “Ġia na ġera midigumidigu eġabi-veġitarito, ema ġera keve irauirau eġwarito, evaġa-namorito.”

*Iesu murinai be*gene raka gētato tarimari

*Luka 9:57-60*

<sup>18</sup> Iesu na tarimarima gūtuma na gēvegogo-gēgēraḡiatio eḡitarito, benamo gēna mero ekirarito, ekirato, “Siveḡasi-vanaḡi, kou mo rekena ḡana.” <sup>19</sup> Nuḡanai taravatu evevaḡa-riba iaḡiatio-ḡoi tarimana ta Iesu gēnai eiaḡoto, ekirato, “Vevaḡa-riba tarimamu, ḡoi aiḡana boiaḡoni nai, au ḡoi murimu ai moḡo bana raka atoni.” <sup>20</sup> Iesu na ekiraiatio, ekirato, “Boḡa kwaivari ma ḡeri kouḡa, ema manu ma ḡeri nuḡi, senaḡi Tarimarima Natuna tu asi gēna gena gabuna.”

<sup>21</sup> Iesu gēna mero ta na maki evaḡa-guruḡaiatio, ekirato, “Vereḡauka, mani ḡemu veiḡa, naḡenoḡoi, be tamagu roḡo naguria.” <sup>22</sup> Iesu na evaḡa-veseato, ekirato, “Murigu ai noma raka, mani tu noiaḡuiri; mase tarimari (o Barau asi ḡekorana-iaḡiani tarimari) na ḡeri mase tauḡeri na beḡene guriri.”

*Iesu na iavara e geta o ureure ekira-ḡoirito*

*Mareko 4:36-41; Luka 8:22-25*

<sup>23</sup> Iesu ḡasi ai eraḡeto nai, gēna mero maki ḡia ḡesi ḡeraḡe-sebonato. <sup>24</sup> ḡeiaḡoto-ḡoi nai, asikauna iavara asikei kou ai eraḡasito, benamo ureure tu ḡasi nuḡanai ḡevebubu-ḡurato. A Iesu tu egenato-ḡoi. <sup>25</sup> Benamo gēna mero ḡeiaḡoto ma ḡevaḡoato, ḡekirato, “Vereḡauka, novaḡa-maḡurima, ḡita tu mai taburuni, dori tamaseni. <sup>26</sup> Iesu na evaḡa-veserito, ekirato, “Karase nai ḡogarini? Veḡabidadama kei rakava tarimami!” Benamo Iesu evariḡisito, iavara ma ureurena ḡesi ekira-ḡoirito, benamo ḡedokoto, ḡemeḡomeḡo-tarito. <sup>27</sup> Tarimarima mabarari ḡeḡaba-rakavato, ḡekirato, “Mai tu kamara tarima se? Iavara e ureure na maki garona ḡeseḡaḡiani!”

*Iesu na tarima ruarua iauka rakavari na* ḡeboroḡirito evaḡa-namorito

*Mareko 5:1-17; Luka 8:26-37*

<sup>28</sup> Galilea kouna tavina rekenai, Gadara (o Gerasa) tarimari ḡeri tano ai, Iesu eraḡasito, benamo iauka rakavari na ḡeboroḡirito tarimari ruarua gara kouḡari na ḡeiaḡomato-ḡoi Iesu gēnai. Mai tarima ruarua tu ma gariri, moḡa lorinai tarima ta mo dabara na asi eraka-vanaḡito-ḡoi. <sup>29</sup> Benamo tauri ruarua Iesu ḡeḡaba-viniatio, ḡekirato, “Barau Natuna o, kara ḡai ḡemai noveia otoni? ḡoi boiaḡoma maiḡa tu, noma vaḡa-midiguma ḡana, ḡaro korikorina roḡosi roḡo bene raḡasi nuḡanai, ei?”

<sup>30</sup> Monai, asi manaḡa lelevaḡi, bai serina ḡedokadokato-ḡoi. <sup>31</sup> Moḡesina nai iauka rakavari na Iesu ḡenoḡiatio, ḡekirato, “Bema ḡoi na ḡai bolai-vaḡimani nai, notuḡuma bai ḡeri ai, ḡia nuḡari ai ḡaraka-toḡa.” <sup>32</sup> Iesu na ekirarito, ekirato, “Be ḡoiaḡo!” Benamo iauka rakavari mo tarima ruarua ḡerina ḡeraka-vaḡito, ḡeiaḡoto, bai ḡeri ai ḡeraka-toḡato. Benamo bai serina mabarana eḡwa-bubu-lausiatio, lalaḡa na ḡekokosi-firiḡoto, kou ai ḡeveḡuḡutu-maseto.

<sup>33</sup> Bai ḡitaḡauri tarimari ḡeraga-kwareḡato, vanuḡa ḡana ḡeiaḡoto, vari mabarana ḡekiraḡiatio, ema iauka rakavari na ḡeboroḡirito tarimari ḡeri ai kara ḡeḡorato mabarari maki ḡevaḡa-foforirito. <sup>34</sup> Benamo vanuḡa tarimari mabarari ḡeḡoto-iaḡoto, Iesu beḡene ḡitaia ḡana. Iesu gēnai ḡeraḡasito nai, ḡenoḡiatio, ḡeri tano na bene raka-veḡita.

## 9

*Iesu na rakava etuḡamaḡi-fitoḡarito*

<sup>1</sup> Iesu ḡasi tai eraḡekauto, ma eḡenoḡoito, kou na evanaḡito, gēna vanuḡa korikori ḡana eiaḡoto. <sup>2</sup> Monai tarima kotari na tauḡanina tavi ta emaseto tarimana ta gedai genagenanai Iesu gēnai ḡeḡwa-iaḡoato. Iesu na ḡeri veḡabidadama vetoḡana aiḡa barana eḡitaiatio, benamo keve rakava tarimana ekiraiatio, ekirato, “Natugu, bono kokore, ḡemu rakava batuḡamaḡi-fitoḡari.”

<sup>3</sup> Benamo taravatu ḡevevaḡa-riba iaḡiatio-ḡoi tarimari tauḡeri maiḡesina ḡekirato, “Mai tarima na Barau ekira-fitoḡaiiani.”

<sup>4</sup> Iesu ma ribana ġia kara ġetuġa-maġirito-ġoi nai evaġa-guruġarito, ekirato, “Karase nai maniġesina tuġamaġi rakavari ġoġabini? <sup>5</sup> Aiġesina baguruġani tu meraġa, ‘Ġemu rakava batuġamaġi-fitoġari’ banasi, ba bara kira, ‘Noruġa-vaisi, noraka’ barasi? <sup>6</sup> Au na navaġa-ġitami, Tarimarima Natuna tu ma ġena maoro, rakava betuġamaġi-fitoġarini tanobarai.” Benamo Iesu na keve rakava tarimana evaġa-guruġaiato, ekirato, “No-variġisi, ġemu geda noġabia, be numa ġana noiaġo!” <sup>7</sup> Benamo mo tarima evaisiraġeto, ġena numa ġana eiaġoto. <sup>8</sup> Tarimarima na mo veiġa ġeġitaiato nai, ġegarito e Barau ġevaġa-raġeato, korana seġuka moġesina tarimarima evinirito nai.

*Iesu na Mataio ekeaiato*

*Mareko 2:13-17; Luka 5:27-32*

<sup>9</sup> Iesu monana eraka-vanaġito nai, ġia na tarima ta arana Mataio eġitaiato, takesi moniri ġeġabito-ġoi numanai etanu-taġoto-ġoi nai eġitaiato. Benamo Iesu na ekiraiato, ekirato, “Murigu ai noma raka.” Benamo Mataio evaisiraġeto, Iesu murina na eiaġoto.

<sup>10</sup> Iesu Mataio ġena numai eġaniġanito-ġoi nai, takesi gogo tarimari vovoka e vei-rakava tarimari ġutuma maki ġeiaġomato, Iesu ma ġena mero ġesi ġeġaniġani-vegogoto. <sup>11</sup> Farisea tarimari kotari na ġeġitaiato nai, Iesu ġena mero ġedanaġirito, ġekirato, “Karase nai ġomi ġemi vevaġa-riba tarimana tu takesi gogo e vei-rakava tarimari ġesi ġeġaniġani-vegogoni?”

<sup>12</sup> Iesu na mo guruġa eseġaġiato, benamo evaġa-veserito, ekirato, “Namo tarimari na doketa asi beġe vetaurini, senaġina keve tarimari na moġo. <sup>13</sup> Ġoiaġo, tauġemi na Buka Veaġa na ekiraġiani guruġana ġoa vetaua, maiġesina ekirani, ‘Au na dia ġomi ġemi ginitaġo o boubou varevareri aura-vinirini. Au aurani ġomi na vevetuġaġwa e veiaunamo boġono vaġa-foforiri.’ Au tu vei-iobukaiobuka tarimari keakeari asi aiaġomato, senaġi vei-rakava tarimari moġo.”

*Ġaniveaġa*

*Mareko 2:18-22; Luka 5:33-39*

<sup>14</sup> Moġa murinai Ioane Babatiso ġena mero Iesu ġenai ġeiaġoto, benamo ġedanaġiato, ġekirato, “Karase nai ġai e Farisea tarimari tu ġaġani-veaġani, a ġoi ġemu mero tu asi ġeġani-veaġani?”

<sup>15</sup> Iesu na evaġa-veserito, ekirato, “Ġomi ġotuġamaġini, veġaraġo varigu tarimana ġatana seviri ai etanuni nuġanai beġe taġini ba? Asiġina! Ġarona eiaġomani, veġaraġo variġu tarimana ġatana ġerina beġe ġabi-veġitaiani, monai vau beġe ġani-veaġani.

<sup>16</sup> Tarima ta na dabuġa variġuna veseana dabuġa guinena ġesi asi bebani-vegogoani. Bema moġesina beveini nai, dabuġa variġuna na guinena bedareani, ema vedarena maki bebaregoni. <sup>17</sup> Tarima ta na maki vine nanuna variġuna nanigosi kefina guinenai asi besisiani. Bema moġesina beveini nai, nanigosi kefina guinena bevedareni, vine nanuna bebebubuni, ema kefi maki berakavani. Senaġina vine nanuna variġuna nanigosi kefina variġunai bebubu-ġuriaiani tu namo. Benamo ruarua, vine nanuna e kefi, beġe tanuni, asi beġe rakavani.”

*Iesu na kekeni ta ema vavine ta evaġa-namorito*

*Mareko 5:22-43; Luka 8:41-56*

<sup>18</sup> Iesu na roġo ġena mero evaġa-ribarito-ġoi nuġanai, vere ta eraġasito, Iesu kwakuna koranai evetui-tarito, ekirato, “Au natugu kekenina inivau moġo bemase. Si-iaġo, ġimamu iatanai bono tore-kaua, benamo natugu bemaġurini.” <sup>19</sup> Iesu evaisi-raġeto, ġia ġesi ġeiaġoto. Ġena mero maki ġia ġesi ġeiaġo-sebonato.

<sup>20</sup> Ġeiaġoto-ġoi nuġanai, vavine ta, ġena keve tu rara kevena, laġani gabanana ruarua (12) ekeve-iaġiato, eiaġomato Iesu murina rekena na, ma ġena dabuġa dudunai eveġabikauto. <sup>21</sup> Korana tu ġia evetuġamaġito, “Ġena dabuġai moġo baveġabikauni nai, banamoni.” <sup>22</sup> Iesu eruġa-kureto, eġitaiato, ekirato, “Natugu, bono kokore! Ġemu veġabidadama na bevaġa-namomu.” Benamo vaġa-sebo ġena keve enamo-ġosito.



<sup>23</sup> Iesu tu mo vere ġena numai eraka-toġato. Ivirikou furufuru tarimari e taġitaġi tarimari ma gururi baregori ġesi eġitarito, <sup>24</sup> benamo Iesu na evaġa-guruġarito, ekirato, “Ġoraka-roſi. Kekeni tu asi bemase, ġia tu egenani moġo.” Senaġi tarimarima na ġerikiriki-iaġiato. <sup>25</sup> Iesu na mo tarimarima ġutuma etuġu-rosirito murinai, ġia eraka-toġato numa nuġanai, kekeni ġimanai eġabito; benamo mo kekeni evaisi-raġeto. <sup>26</sup> Mai veiġa varina tu mo tano mabaranaġi evarifiu-iaġiato.

*Iesu na mata-bubu tarimari ruarua evaġa-namorito*

<sup>27</sup> Iesu na mo gabu ma eraga-kwaneato. Erakato-ġoi nai, mata-bubu tarimari ruarua murina na ġeiaġoto, ġekea-viniato, ġekirato, “Davida Natuna o, ġai novetuġama!” <sup>28</sup> Iesu numai eraka-toġato nai, mo mata-bubu tauri ruarua maki ġeraġe-kauto. Benamo Iesu na edanaġirito, ekirato, “Ġomi na ġovaġa-moġoniguni, au na bavaġa-namomini riba?” Ġia ġevaġa-veseto, ġekirato, “Vereġauka, oi, ġavaġa-moġonimuni.” <sup>29</sup> Benamo Iesu na matari eġabi-kararito, ekirato, “Ġemi veġabidadama lorinai, veiġana tu bana veia ġemi.” <sup>30</sup> Benamo matari ġefafato. Iesu na ma nuġana mabarana ġesi evaġa-guruġa gwaġiġi-rito, ekirato, “Mai veiġa beġora maiġa varina tarima ta asi boġono kira-varaia!” <sup>31</sup> Senaġina tauri ruarua ġeraka-rosito, ġeiaġoto, Iesu varina mo tano mabaranaġi evarifiu-rovorovoato.

*Iesu na muru-bubu tarimana ta evaġa-namoato*

<sup>32</sup> Tauri ruarua numa na ġeraka-rosito-ġoi nuġanai, tarima ta, iauka rakavana na eborogġiato nai asi eguruġato-ġoi, Iesu ġenai ġeġabi-iaġoato. <sup>33</sup> Iesu na iauka rakavana elai-vaġiato murinai, mo muru-bubu tarimana varau eguruġato. Tarimarima mabarari na mai eġorato veiġana ġeġaba-iaġiato, ġekirato, “Maiġesina veiġana ta Isaraela nuġanai roġosi bene ġora!” <sup>34</sup> A Farisea tarimari ġekirato, “Mai tu iauka rakavari ġeri vere ġena seġukana na iauka rakavari ġia na elai-vaġirini.”

*Iesu na ġena mero Isaraela tarimari ġeri ai etuġurito*

<sup>35</sup> Iesu na vanuġa baregori ema keiri mabarari eiaġo-vinirito: Ġeri rubu ai evevaġa-ribato-ġoi, Barau ġena Basileia varina namona eġobata-iaġiato-ġoi, ema keve e midigu-midigu tarimari mabarari evaġa-namorito. <sup>36</sup> Iesu na mo tarimarima ġutuma-bara eġitarito nai evetuġarito, korana ġenuġa-vekwaraġito e asi ġeri veduru ġabi tarimari, vaġa-ilailana mamoe asi ġitaġauri tarimana ta kavana. <sup>37</sup> Benamo Iesu na ġena mero ekirarito, ekirato, “Makora ġitaġitana tu barego, senaġina ġauvei-iaġina tarimari tu asi ġutuma. <sup>38</sup> Vamoka ġaniġanina vinivinina Vereġaukana boġono noġia, be ġauvei tarimari bene tuġuri, ġena ġaniġani gogo vamokari ġana.”

## 10

*Iesu na ġena apostolo merori gabanana ruarua (12) ekearito*

<sup>1</sup> Iesu na ġena mero gabanana ruarua (12) ekearito, benamo seġuka evinirito, iauka rakavari beġene lai-vaġiri, e keve ema midigu-midigu mabarari beġene vaġa-namori ġana.

<sup>2</sup> Mai apostolo tarimari gabanana ruarua (12) arari tu maiġeri: Giniguinena tu Simona, arana ta tu Petero, e ġia tarina Anduru; Iakobo (o Iames), Sebedaio natuna, ma tarina Ioane ġesi; <sup>3</sup> Filippo e Batolomeo; Tomasi e takesi gogo tarimana Mataio; Iakobo (o Iames), Alfeo natuna, e Tadeo; <sup>4</sup> Simona, Selote tarimana, ema Iudas Isakariota, Iesu berevaiani tarimana.

*Iesu na apostolo tarimari ġeri ġauvei evinirito*

*Mareko 6:7-13; Luka 9:1-5*

<sup>5</sup> Mai tarima gabanana ruarua (12) Iesu na etuġu-rosirito ema velaunaġi sisibari maiġesina evinirito, ekirato, “Irau bese tarimari ġeri ai asi boġono iaġo, e Samaria vanuġari tai maki asi boġono raka-toġa; <sup>6</sup> senaġina Isaraela besena ġeri ai boġono iaġo, ġia tu ġerekwa-rekwato mamoei kavana. <sup>7</sup> Ġoiaġo, ma maiġesi boġono ġobata,

boḡono kira, ‘Guba Basileiana tu bevotu, (Barau ḡena veḡitaḡau seḡukana evaḡa-ruḡaiani maiḡa)!’ <sup>8</sup> Keve tarimari boḡono vaḡa-namori, mase tarimari boḡono vaḡa-maḡuriri, lepera tarimari boḡono iarevari boḡono vaḡa-namori, e iauka rakavari boḡono lai-vaḡiri! Ḡomi na ḡoḡabiato asi voina, boḡono vini maki asi voina.

<sup>9</sup> Ḡemi iaḡoiaḡo ai moni asi boḡono ḡabikau, golo o silva moniri o kopa moniri maki asi boḡono ḡwakau. <sup>10</sup> Dura asi boḡono ḡabikau, sedi ruarua, tamaka, ema togoi maki asi boḡono ḡabi. Korana ḡauvei tarimana ḡena-ḡana tu beḡene vinia veḡata.

<sup>11</sup> Vanuḡa baregona tai o vanuḡa keina tai boḡo raka-toḡani nai, deikara eurani ḡena numai bene ḡabi-raḡemi etoni tarimana boḡono vetaua. Mo numai moḡo boḡono tanu, bene iaḡo mo, vanuḡa ma boḡono raga-kwanea. <sup>12</sup> Numai ḡoraka-toḡani nai, numa tarimari boḡono vaḡa-namori, boḡono kira, ‘Maino ḡomi ḡemi ai bene tanu!’ <sup>13</sup> Bema mo numa tarimari na beḡe ḡabi-raḡemini nai, Barau ḡena maino ḡeri ai betanuni. Senaḡina bema ḡia na asi beḡe ḡabi-raḡemini nai, Barau ḡena maino ḡeri ai asi betanuni, ḡemi ai ma beḡenoḡoini. <sup>14</sup> Kamara numai o vanuḡai tarimarima na asi beḡe ḡabi-raḡemini e ḡemi guruḡa asi beḡe seḡaḡirini nai, mo numa o vanuḡa boḡono iaḡuia, kwakumi kauri boḡono kwari-ketoketori, (ḡia ḡeri kira-sirivaḡi vaḡa-moḡoniri ḡana). <sup>15</sup> Au na akira-korikorimini, Barau ḡena Kota ḡaronai mo numa o vanuḡa ḡeri rakava voina metona tu barego lelevaḡi beḡabiani, Sodoma e Gomora ḡeri rakava voina maki bevanaḡiani.”

*Vanevane e midigumidigu ḡoirai*

*Mareko 13:9-13; Luka 21:12-17*

<sup>16</sup> “Ḡoseḡaḡi, au na mai atuḡumini mamoe kavana boḡa kwaivari rakavari vefakari ai. Moḡa lorinai, mota kavana boḡono iaunega ema boḡono manau pune kavana. <sup>17</sup> Lorimi boḡono vetore tarimarima ḡeri ai! Korana ḡia na beḡe ḡabimini ma beḡe tuḡu-iaḡomini Iuda ḡeri kanisoro tarimari ḡeri ai, ema ḡeri rubu nuḡari ai beḡe kwarimini. <sup>18</sup> Au ḡoḡabi-raḡeguni dainai, gavana e vere barari o kini ḡeri ai roḡo beḡe ḡabi-iaḡomini, ḡia ḡoirari ai au vaḡa-moḡonigu ai boḡono iaḡo, korana irau bese tarimari maki Vari Namona beḡene ribaia. <sup>19</sup> Bema Kota tarimari ḡoirari ḡana beḡe ḡabi-iaḡomini nai, kara toma boḡoa kiraḡirini o kamasi boḡo kiraḡirini guruḡari asi boḡono nuḡa-vekwaraḡi-iaḡiri. Korana mo ḡaro ai kara boḡo kiraḡirini guruḡari tu, Barau na vau bevinimini. <sup>20</sup> Dia ḡomi boḡo guruḡani, senaḡina Barau Iaukana ḡomi ḡemina beguruḡani.

<sup>21</sup> Kakana na tarina berevaiani bene mase ḡana, tamana na natuna maki moḡesina beveiani. Naturi na tamari sinari beḡe seḡafore-vinirini ema mase ai maki beḡe torerini. <sup>22</sup> Tarimarima mabarari na beḡe iau-rakavamini, korana au ḡoḡabi-raḡeguni nai. Senaḡina deikara bevevaḡa-gwaḡiḡini mo dokona tu bemaḡurini. <sup>23</sup> Vanuḡa tai beḡe vaḡa-rakavamini e beḡe laimini nai, vanuḡa ta ḡana ma boḡono raga-iaḡo. Boḡono riba-maoro, ḡegu ḡauvei asi roḡo boḡo vaḡa-koriani Isaraela vanuḡari mabarari nuḡari ai, beiaḡoni mo, Tarimarima Natuna bema-raḡasini.

<sup>24</sup> Riba evetauani merona na ḡena vevaḡa-riba tarimana asi bevanaḡiani; vetuḡunaḡi tarimana na guine-iaḡina tarimana maki asi bevanaḡiani riba. <sup>25</sup> Riba evetauani merona bevevaḡa-iaḡoni ḡena vevaḡa-riba tarimana ḡesi beḡe ilailani, ema vetuḡunaḡi tarimana guine-iaḡina tarimana ḡesi maki beḡe ilailani tu namo. Boḡono tuḡamaḡia, tarimarima kotari na au tu doḡoro debana, Belsebul o Satani ḡetoni, be ḡomi, ḡegu doḡoro tarimami, maki moḡesi beḡe kiramini, ema beḡe vaḡa-metomini maki.”

*Barau boḡono gari-vinia*

*Luka 12:2-7*

<sup>26</sup> “Moḡa lorinai, tarimarima gariri asi boḡono vei. Vekouḡau dagarari mabarari beḡea foforini, vekuretoḡa guruḡari mabarari beḡea ribani. <sup>27</sup> Au na kara dagara akira-varamini mukunai tu, ma boḡono kiraḡi-ḡenoḡoiri laḡani matabarai, kara dagara ḡereḡami na boḡo seḡaḡia tu, numa tuḡuri na ma boḡono kiraḡi-foforia, (tarimarima

mabarari na beḡene seḡaḡia ḡana). <sup>28</sup> Tauḡanina beḡe vaḡiani tarimari asi boḡono gari-viniri, korana ḡia na iauka asi beḡe vaḡiani. A Barau garina neḡi boḡono gari, korana ḡia na ruarua bevaḡirini riba, tauḡanina e iauka, karava asi ebuseni gabunai.

<sup>29</sup> Bisini ruarua maki fene sebona na moḡo ḡevoirini, ene? Senaḡina moḡeri ta maki asi beketo-riḡo kavani tano ai, bema Tamami asi beurani nai. <sup>30</sup> A ḡomi tu debami ḡuiri maki mabarari Barau na eiavi-ginikaurito. <sup>31</sup> Be asi boḡono gari; ḡomi voimi tu varaḡe lelevaḡi, bisini ḡutuma voiri maki ḡovanaḡirito.”

*Iesu asi boḡono kira-ḡuniḡaua*

*Luka 12:8-9*

<sup>32</sup> “Deikara na au tarimarima ḡoirari ai bekiraḡi-foforiguni, ḡia maki au na bakiraḡi-foforiani Tamagu gubai etanuni ḡoiranai. <sup>33</sup> Senaḡina au deikara na tarimarima ḡoirari ai beruḡaguni e bekira-ḡuniḡauguni, ḡia maki au na baruḡaiani e bakira-ḡuniḡauani Tamagu gubai etanuni ḡoiranai.”

*Dia maino, senaḡi vetari*

*Luka 12:51-53; 14:26-27*

<sup>34</sup> “Asi boḡono tuḡamaḡi, au tu maino tanobara ḡana aḡwa-iaḡomaiato. Asiḡina, au tu dia maino aḡwa-iaḡomaiato, senaḡi vetari urana na aiaḡomato. <sup>35</sup> Au aiaḡomato tu, maiḡeri nama vaḡa-ruḡari ḡana: Natu tauri na tamari beḡe vevaḡi-vinirini, natu vavineri na sinari beḡe vevaḡi-vinirini, taḡama vavine keiri na ḡeri taḡama vavine barari beḡe vevaḡi-vinirini. <sup>36</sup> Numa biaguna tu tauḡena ḡena numa tarimari na moḡo beḡe iau-rakava viniani.

<sup>37</sup> Deikara tamana o sinana beuravini-baregoani, a au tu betuḡamaḡi-keiguni nai, ḡia tu asi ilaila au ḡegu tarimai beḡe kiraḡiani. Ema deikara na natuna merona o kekenina beuravini-baregoani, a au beuravini-keiguni nai, ḡia tu asi ilaila au ḡegu tarimai beḡe kiraḡiani. <sup>38</sup> E deikara tauḡena ḡena satauro asi beḡwaiani, ema murigu na asi berakani, ḡia tu asi ilaila au ḡegu tarimai beḡe kiraḡiani. <sup>39</sup> Deikara ḡena maḡuri moḡo lorina etoreani tarimana, ḡena maḡuri befitoḡaiani. A deikara au daigu ai ḡena maḡuri befitoḡaiani tarimana, ḡena maḡuri asi bevei-rekwarekwaiani.”

*Iesu ḡena mero beḡe ḡabi-raḡerini tarimari na voiri namori beḡe ḡabirini*

*Mareko 9:41; Luka 10:16*

<sup>40</sup> “Dei na ḡomi eḡabi-raḡemini, au maki eḡabi-raḡeguni, ema au eḡabi-raḡeguni tarimana na au etuḡuguto Barauna maki eḡabi-raḡeani. <sup>41</sup> Dei na peroveta tarimana ta eḡabi-raḡeani, korana ḡia tu Barau ḡena guruḡa vaḡa-foforina tauna ta, ḡia na peroveta tauna davana tu beḡabiani. Ema dei na veiḡa iobukaiobuka tarimana eḡabi-raḡeani, korana ḡia tu Barau ḡena ura ekorana-iaḡiani tauna, ḡia na vei-iobukaiobuka tarimana davana beḡabiani. <sup>42</sup> E tarima ta na mai ḡegu mero ta nanu faraka kapusi sebona ta beviniani, korana ḡia tu au ḡegu vetuḡunaḡi tarimana, akira-korikori-mini, ḡia voina tu beḡabiani veḡata.”

## 11

*Ioane na ḡena mero Iesu ḡenai etuḡu-iaḡorito*

<sup>1</sup> Iesu na moḡeri sisiba guruḡari ḡena mero gabanana ruarua (12) ḡeri ekiraḡi-ḡosirito murinai, ḡia monana Galilea vanuḡari ḡana eiaḡoto, monai Barau ḡena guruḡa bene vevaḡa-riba iaḡia e bene ḡobata-iaḡia ḡana.

<sup>2</sup> Ioane Babatiso dibura numanai etanuto-ḡoi nai, Keriso ḡena ḡauvei veiḡari varina eseḡaḡiato, benamo ḡia na ḡena mero Iesu ḡenai etuḡu-iaḡorito. <sup>3</sup> Iesu ḡedanaḡiato, ḡekirato, “Barau na ekiraḡi-toreato beiaḡomani tarimana tu ḡoi, ba tarima boruna ta baḡana vaḡa-nogaia?”

<sup>4</sup> Benamo Iesu na evaḡa-veserito, ekirato, “Ḡoḡenoḡoi, ḡomi na boḡo seḡaḡiri e boḡo ḡitari veiḡari Ioane boḡono kira-varaia: <sup>5</sup> Mata-bubu tarimari ḡeboḡeboḡeni, kwaku rakava tarimari ḡerakani, lepera tarimari ḡenamoni, seḡa-bubu tarimari ḡeseḡaḡini,

mase tarimari ġevariġisi-ġenoġoini, ema Vari Namona gara veġubu e asi ġeri-ġari tarimari ġeri eġobata-iaġiani. <sup>6</sup> Au ġegu ai asi ġena daradara tarimana tu eiakuni.”

<sup>7</sup> Ioane ġena mero ġerakato vau, Iesu na ġevegogoto tarimari evaġa-guruġarito, Ioane varina ġeri ekiraġi-ato, ekirato, “Ioane ġenai ġoiaġoto nai, mo tano fakanai tu kara boġono ġitaia ġana? Gobu iavara na ekwari-ġareva ġarevaiani ġitaġitana ġoiaġoto? <sup>8</sup> Bema asiġina nai, kara boġono ġitaia ġana ġoiaġoto? Dabuġa namona eveiani tarimana ġitaġitana ġoiaġoto? Asiġina. Dabuġa namori ġeveirini tarimari tu kini ġeri numai ġetanuni. <sup>9</sup> Be, kara boġono ġitaia ġana ġoiaġoto? Peroveta tarimana dainai? Aba! Akiramini, ġoġitaiato tarimana tu peroveta tarimari mabarari evanaġirini. <sup>10</sup> Ioane varina Buka Veaġai maiġesi etoreato, Barau ekirato, ‘Au na ġegu vetuġunaġi

tarimana tu batuġu-guineani,

ġemu dabara ġoiramu ai vaġa-maġatana.’

<sup>11</sup> Moġoni akiramini, mai tanobarai beġe maġuri tarimari mabarari fakari ai Ioane Babatiso tu barego vedaurea, ta na asi bevanaġiani. Senaġina Guba Basileiana nuġanai gabi tarimana na Ioane tu evanaġiani. <sup>12</sup> Ioane Babatiso ġena ġobata evari-fiurito-ġoi ġenana beiaġoma mo initoma, Barau na ġena Basileia o veġitaġau seġukana evaġa-ruġaiani, senaġina tarima tari na ġevevaġi-viniani, ġeri ura tu tauġeri beġene veġitaġau, a deikara Barau ġena Basileiai neraka-toġa etoni tarimana, ġia na ġekouani. (Mataio23:13).

<sup>13</sup> Peroveta tarimari mabarari e Mose ġena taravatu maki na Barau ġena Basileia o veġitaġau ġeġobata-iaġiato-ġoi, eiaġomato mo, Ioane ġena negai. <sup>14</sup> Ema ġomi na ġeri guruġa boġo ġabi-raġeani ba asiġina, senaġina Ioane tu moġoni peroveta tarimana Elia, ġena iaġoma tu ġekiraġiato-ġoi. <sup>15</sup> Ma seġana tarimana bene seġaġi.

<sup>16</sup> Toma ġuru tarimari tu deikara ġesi bavaġa-ilailarini? Ġia tu noġa mero keiri kavana, vanuġa ġatamanai ġetanu-taġoni, ġeġereni, tavi ta merori na tavi tai ġekea-vinirini, ġekirani,

<sup>17</sup> ‘Ġai tu veġaraġo vererenai gita ġalauto-ġoi ġomi ġemi, senaġi ġomi tu asi ġobarato-ġoi! Ġai tu mase mariri ġaġabito-ġoi, senaġi ġomi tu asi ġotaġito-ġoi!’

<sup>18</sup> Ioane eiaġomato, eġani-veaġato ema vine nanuna asi eniuato. Benamo ġekirani, ‘Ġia tu iauka rakavana na eboroġiato,’ ġetoni. <sup>19</sup> A Tarimarima Natuna eiaġomato, ġia tu ġaniġani ta asi eruġaiani. Benamo ġekirani, ‘Ġia tu boġeka tarimana ema vine nanuna eniu-ġutumani tarimana, takesi gogo tarimari e vei-rakava tarimari ġatari!’ ġetoni. Senaġi Barau ġena iaunega vaġa-foforina e vaġa-moġonina tu ġena vetoġa namori ġerina.”

*Asi veġabidadama vanuġari*

*Luka 10:13-15*

<sup>20</sup> Iesu na ġena seġuka ġauveiri vanuġa baregori tari nuġari ai eveirito, senaġi ġeri rakava ġerina asi ġevetuġamaġi-kureto-ġoi, naima Iesu na moġeri vanuġa tarimari evanerito. <sup>21</sup> Ekirato, “Korasini o, ġoi ema Betesaida, vetuġami kika! Korana nuġa-farevaġi veiġa boruri ġemi ai ġefoforito-ġoi tu, Taia e Sidono nuġari ai beġere fofori, benamo ġia tu irau laġani ai ġere vetuġamaġi-kure, fuse rakavari ai e tauġaniri ma gurumari ai ġeri vetuġamaġi-kure ġere vaġa-foforia. <sup>22</sup> Senaġina akiramini, Barau na tarimarima bekota-vinirini ġaronai, ġomi na boġo doġariani metona tu Taia e Sidono ġeri meto bevanaġiani. <sup>23</sup> Ġoi maki, Kapera-nauma o, ġoi ourani guba ġana bono varaġe otoni? Asiġina, ġoi tu mase gabuna ġana boiaġoni! Bema nuġa-farevaġi veiġa boruri ġemi ai ġefoforito-ġoi tu Sodoma nuġanai beġere fofori nai, ġia tu roġo bere tanu mo initoma. <sup>24</sup> Senaġina akira-mini, Barau na tarimarima bekota-vinirini ġaronai, ġomi na boġo doġariani metona tu Sodoma ġeri meto bevanaġiani.”

*Au ġegu ai ġoiaġoma, be ġoiaġaraġi*

*Luka 10:21-22*

<sup>25</sup> Mo negai Iesu ekirato, “Tamagu o, guba ema tanobara Verena, avaḡa-namomuni, korana ḡoi na ma iaunegari e riba tarimari ḡeri ai okure-toḡarini dagarari tu, asi ḡeri riba tarimari ḡeri ai ovaḡa-foforirini. <sup>26</sup> Aba, Tamagu, ḡemu ura tu maiḡesina bene vetore veḡata. <sup>27</sup> Dagara mabarari Tamagu na eviniguto. Natuna tarima ta asi ribana, senaḡina Tamana ḡereḡana moḡo ribana, ema Tamana tarima ta asi ribana, senaḡi Natuna ḡereḡana moḡo ribana, ema Natuna na bene vaḡa-fofori vinia etoni tarimana.

<sup>28</sup> Au ḡegu ai ḡoiaḡoma, ḡomi deikara maruna metori ḡoḡwani e boḡo gau tarimami mabarami, au na iaḡaraḡi banama vinimi. <sup>29</sup> Au ḡegu maruna, mai tu ḡegu veḡitaḡau namona, ḡoma ḡabi-raḡea, ma au ḡegu ai riba maki ḡoma ḡabia! Korana au na asi badori-naḡinaḡimini e asi baḡita-fitoḡamini. Au ḡegu ai iaḡaraḡi korikorina boḡo doḡariani. <sup>30</sup> Auna maruna tu meraḡa e ḡegu ḡwaḡwa iatami ai batore-kauani maki asi metona.”

## 12

### *Iesu tu Sabadi Verena*

<sup>1</sup> Mo negai Iesu tu Sabadi ai widi vamokari na eraka-vanaḡito. Ḣena mero ḡevitorito nai, widi ḡwaḡwari ḡebukito-ḡoi e ḡeḡanirito-ḡoi. <sup>2</sup> Farisea tarimari na ḡeḡitarito, benamo Iesu ḡekiraiato, ḡekirato, “Noḡitaia, ḡemu mero na ḡita ḡera taravatu asi ḡekorana-iaḡiani, Sabadi ai widi ḡebukini.” <sup>3</sup> Iesu na evaḡa-veserito, ekirato, “Davida na veiḡa ta eveiato, ḡia ma karona ḡesi ḡevitorito nai, ḡomi na mai veiḡa eḡorato tu roḡosi roḡo boḡono iavia? <sup>4</sup> Barau ḡena numai eraka-toḡato, Barau ḡoiranai ḡetorerito-ḡoi beredi ḡia ma karona ḡesi ḡeḡanito. Mo beredi tu veaḡa, Rubu Veaḡa vereri moḡo ḡari, taravatu. <sup>5</sup> Ema ḡomi na Mose ḡena taravatu nuḡanai mai guruḡa maki roḡosi roḡo boḡono iavia, ekirani, Sabadi ai Rubu Veaḡa vereri tu Rubu Veaḡai ḡeḡauveini. Moḡesina nai Sabadi taravatuna ḡevaḡa-rakavaiani, senaḡi ḡia tu asi ḡeri kerere? <sup>6</sup> Au na akiramini, mainai tarima ta, ḡia na Rubu Veaḡa evanaḡiani. <sup>7</sup> Buka Veaḡa ekirani, ‘Vevetuḡaḡwa neḡi aurani, a varevare dagarana tu asiḡi.’ Bema mai guruḡa anina ḡoro riba nai, asi ḡeri kerere tarimari ḡomi na asi ḡoro vaḡa-bade-iaḡiri. <sup>8</sup> Korana Tarimarima Natuna tu Sabadi Verena.”

### *Iesu na ḡima boso tarimana evaḡa-namoato*

#### *Mareko 3:1-6; Luka 6:6-11*

<sup>9</sup> Iesu na mo gabu eiaḡuiato, ma eiaḡoto, Iuda tarimari ḡeri rubu ai eraka-toḡato, <sup>10</sup> ḡimana ebosoto tarimana ta maki monai. Benamo Farisea tarimari na Iesu beḡene ḡofaḡofa-iaḡia ḡana ḡedanaḡiato, ḡekirato, “Sabadi ai keve bita vaḡa-namorini tu ma taravatuna ba?” <sup>11</sup> Benamo Iesu na evaḡa-veserito, ekirato, “Ḣomi ta ḡena mamoe sebona kwariḡutu moḡo, Sabadi ai guri tai beketo-riḡoni nai, vaḡa-maḡurina ḡana ḡomi na asi boḡo inu-raḡeani? <sup>12</sup> Boḡono tuḡamaḡi: Tarimarima tuḡamaḡi-iaḡina tu barego vedaurea, a mamoe ḡenai tu kei! Moḡa lorinai Sabadi ai veiḡa namona veiveina tu maoro vedaurea.” <sup>13</sup> Benamo Iesu na mo ḡima boso tarimana ekiraiato, ekirato, “Ḣimamu noduḡi-roroḡotoa.” Ḣia ḡimana eduḡi-roroḡotoato, benamo mabarana enamo-ḡosito, ḡimana reke ta kavana. <sup>14</sup> Senaḡi Farisea tarimari ḡeraka-rosito, benamo ḡea boioḡa-veḡogoto, kamasi Iesu beḡene vaḡi-masea dabarana ḡea vetauato.

### *Iesu tu Barau na eviriḡiato tarimana*

<sup>15</sup> Farisea ḡeri boioḡa Iesu na varau eriba-guineato nai, ḡia mo gabu na eraka-veḡitato. Tarimarima ḡutuma ḡia murina na ma ḡeiaḡoto, ema keve tarimari mabarari evaḡa-namorito. <sup>16</sup> Senaḡi eguruḡa gwaḡiḡi-vinirito, ḡia varina tarima ta maki asi beḡene vaḡa-ribaia. <sup>17</sup> Maiḡesi eguruḡato, korana Isaia peroveta tarimana muruna na eraka-rosito guruḡana bene moḡoni ḡana, ekirato,

<sup>18</sup> “Mai tu au ḡegu vetuḡunaḡi tarimana, aviriḡiato. Au na ḡia aura-viniani, e ḡia ḡenai maki aiakuni; Au Iaukagu ḡia ḡenai batoreani, e ḡia na au ḡegu guruḡa e veiḡa iobuka-iobukari beḡobata-iaḡirini bese mabarari ḡeri ai.

- <sup>19</sup> Ġia asi bevanevaneni, ma asi befararani; ema ġatamai garona maki ta na asi beseġaġiani.
- <sup>20</sup> Ġia na gobulefa moirana asi betau-koruani, ema irau mo emoreni lamefana maki asi bevei-buseani, beiaġoni mo, ġia na guruġa e veiġa iobukaiobukari bea vaġa-ruġarini, benamo beġe kokoreni.
- <sup>21</sup> Ġia ġenai tarimarima mabarari ġeri vetuġamaġikau beġe toreani.”

*Iesu e Belsebul*

*Mareko 3:20-30; Luka 11:14-23; 12:10*

<sup>22</sup> Benamo kotari na iauka rakavana na eboroġiato tarimana Iesu ġenai ġeġabi-iaġoato. Mo tarima tu matana bubu e muruna bubu. Iesu na evaġa-namoato, benamo ma eguruġato e eboġeboġeto. <sup>23</sup> Tarimarima mabarari na mai veiġa eġorato ġeġaba-iaġiato, ġekirato, “Mai tu betaġu Davida Natuna banaġu, (Barau na ekiraġi-toreato vevaġa-maġuri tauna)?” <sup>24</sup> Senaġi Farisea tarimari na maiġa ġeseġaġiato nai, ġekirato, “Mai tu Belsebul, iauka rakavari ġeri vere, na seġuka eviniani nai, mai tarima na iauka rakavari elai-vaġirini.”

<sup>25</sup> Iesu na ġeri tuġamaġi varau eribarito nai, ekirarito, ekirato, “Gavamani bevetavini, tauġena bevevaġi-vinini nai, ġia tu berakavani; e vanuġa ta o doġoro ta bevetavini, tauġena bevevaġi-vinini nai, asi beruġani riba. <sup>26</sup> E diablo ta na diablo ta belai-vaġiani nai, Satani tu tauġena bevevaġini, moġa anina tu, doġoro tatai varau bevetavi nai, asi beruġani riba? <sup>27</sup> Ġomi ġokirani, au tu Belsebul ġena seġuka na iauka rakavari alai-vaġirini, a ġomi murimi ai ġerakani tarimari na iauka rakavari aiġesi ġelai-vaġirini? Ġia na ġevaġa-moġoniani, ġomi ġemi guruġa tu kerere. <sup>28</sup> Asiġina, dia Belsebul, senaġina Barau laukana ġena seġukai alai-vaġirini, naima boġono riba, Barau ġena Basilea tu ġomi ġemi ai varau beraġasi. <sup>29</sup> Tarima ta gwada tarimana ġena numa asi bedareani riba, ma ġena farefare beġwa-rakarini, senaġi ġia na gwada tarimana varo na bebarubaruani, monai vau ġia na ġena numa farefareri beġabi-rakarini. <sup>30</sup> Deikara na au asi evaġa-kavaguni, ġia na tu au eruġaguni, e deikara au ġesi asi etore-vegogoni, tarimana tu eveiari-lausilausini. <sup>31</sup> Moġa lorinai akiramini, tarimarima rakava beġe veini ema Barau beġe kira-rakava viniani tarimari, ġeri rakava mabarari Barau na betuġamaġi-fitoġarini riba, senaġi tarima ta na iauka Veaġa bekira-rakava viniani tarimana, ġena rakava asi betuġamaġi-fitoġaiani. <sup>32</sup> Tarima ta na Tarimarima Natuna bekira-rakava viniani nai, ġena rakava tu betuġamaġi-fitoġaiani, senaġi tarima ta na iauka Veaġa bekira-rakava viniani tarimana, ġena rakava asi betuġamaġi-fitoġaiani, toma mai maġuri ai ema maġuri gabinai maki asi betuġamaġi-fitoġaiani.”

*Ġau e ġia ġwaġwana*

*Luka 6:43-45*

<sup>33</sup> “Bema ġau namo nai tu, ġwaġwana maki namo, a bema ġau rakava nai, ġwaġwana maki rakava. Ġau tu ġwaġwana ġenana boribaiani. <sup>34</sup> Ġomi mota naturi, ma rakavami ġesi ġotanuni, be guruġa namona ta tu kamasi boġo kiraġiani? Korana tarima tu nuġana na kara eiaġomani, murunai ekiraġirini. <sup>35</sup> Tarima namona na dagara namori nuġanai evaġa-vegogorini dagarari bevaġa-raka-rosirini. Tarima rakavana na dagara asi namori nuġanai evaġa-vegogorini dagarari bevaġa-raka-rosirini.

<sup>36</sup> Senaġi au na akiramini, guruġa taġuitaġui mabarari, tarimarima na beġe kiraġirini tu, Barau ġena Kota baregona ġaronai voiri beġe ġabirini. <sup>37</sup> Ġemu guruġa ġenana Barau na vei-iobukaiobuka tarimamu bekiraġi-muni, o vei-rakava tarimamu bekiraġimuni.”

*Farisea tarimari na vetoġa ġevetauani Iesu ġenai*

*Mareko 8:11-12; Luka 11:29-32*

<sup>38</sup> Taravatu vaġa-riba-iaġina tarimari e Farisea tarimari kotari na Iesu ġevaġa-guruġaiato, ġekirato, “Vevaġa-riba tarimamu, ġai ġaurani vetoġa boruna ta ġoi ġemuna baġana ġitaia.”

<sup>39</sup> Iesu na evaḡa-veserito, ekirato, “Toma ḡuru rakavana ma veḡura-vanaḡina ḡesi, (Barau ḡenana ḡeveḡitato ḡuruna), seḡuka vetoḡana ta ḡeḡita-vetauani, senaḡi vetoḡa ta asi beḡe doḡariani, Iona, peroveta tarimana, vetoḡana moḡo. <sup>40</sup> Iona tu ḡaro toitoi ema boḡi toitoi maḡani-kone barana, rakana donodono diana nuḡanai etanuto, moḡesina kavana Tarimarima Natuna maki ḡaro toitoi ema boḡi toitoi tano nuḡanai betanuni. <sup>41</sup> Kota baregona ḡaronai Nineva tarimari beḡe ruḡa-vaisini, toma ḡuru tarimari beḡe samanirini, korana Iona ḡena ḡobata ḡeseḡaḡiato neganai, ḡia ḡeri rakava ḡerina ḡevetuḡamaḡi-kureto, ema ḡeraka-kureto Barau ḡenai. Senaḡi ḡoḡitaia, tarima ta na Iona evanaḡiani tu maiḡa. <sup>42</sup> Kota baregona ḡaronai maki, Seba vavine baregona o Kwin beruḡa-vaisini, mai ḡuru tarimari besamanirini, korana ḡia tu ḡena tanobara manaḡana na eiaḡomato, Solomona ḡena iaunega guruḡari bene seḡaḡiri ḡana. Senaḡi ḡoḡitaia, tarima ta na Solomona evanaḡiani tu maiḡa.”

*Iauka rakavana ma eḡenoḡoito*

*Luka 11:24-26*

<sup>43</sup> “Iauka rakavana ta tarima ta ḡenana eraka-vaḡito, benamo gabu kaukauri na eraka-vanaḡito, iaḡana bene ḡania etato, senaḡi iaḡaraḡi gabuna ta asi edoḡariato. <sup>44</sup> Benamo ḡia tauḡena ekirato, ‘Naḡenoḡoi, araga-kwaneato numana ḡana.’ Eḡenoḡoi-iaḡoto, numa edoḡariato. Numana tu korina, veiareva ema ḡitaḡitana namo vedaurea. <sup>45</sup> Benamo ḡia na iauka rakava kwaikwairi imaima ruarua (7) ma eḡori-iaḡorito, mabarari ḡeraka-toḡato, monai ḡetanuto. Moḡa lorinai mo tarima tu guinenai ḡena rakava tu kota misina, senaḡi dokonai ḡena rakava tu barego vedaurea. Maiḡesina toma ḡuru rakavana ḡenai beḡorani.”

*Iesu sinana e tarina doḡoro*

*Mareko 3:31-35; Luka 8:19-21*

<sup>46</sup> Iesu tu tarimarima roḡo evaḡa-guruḡarito-ḡoi nai, ḡia sinana e tarina doḡoro ḡeraḡasito. Numa murikanai ḡeruḡa-tarito, ḡeri ura tu Iesu beḡene vaḡa-guruḡaia. <sup>47</sup> Benamo tarima ta na ekiraiato, ekirato, “Ḡoi sinamu e tarimu merori tu numa murikanai ḡeruḡa-taḡoni, ḡevaḡa-guruḡamu ḡetoni.” <sup>48</sup> Iesu na evaḡa-veserito, ekirato, “Au sinagu tu dei, e au tarigu merori tu deikarari?” <sup>49</sup> Benamo ḡia ḡimana na ḡena mero eduḡi-vinirito, ekirato, “Au sinagu e au tarigu merori tu maiḡeri! <sup>50</sup> Deikara na au Tamagu gubai etanuni ḡena ura veiḡari eveirini tarimana tu, au tarigu tauna, e au tarigu vavinena, ema au sinagu.”

## 13

*Barabore - Iaraḡa tarimana na widi ḡueri efiurito*

<sup>1</sup> Mo ḡaro sebonai moḡo Iesu na numa eraga-kwaneato, eiaḡoto, Galilea kouna rikinai etanu-tarito. <sup>2</sup> Tarimarima ḡutuma-bara na ḡevegogo-ḡeḡeraḡiato nai, ḡia tu ḡasi tai eraḡekauto, benamo etanu-tarito, a tarima mabarari tu fenu ai ḡeruḡato. <sup>3</sup> Iesu na dagara ḡutuma barabore ai evaḡa-ribarito.

Ekirato, “Iaraḡa tauna ta ḡena widi ḡueri varovarori eiaḡoto. <sup>4</sup> Ḡia na widi ḡueri efiu-lautilusirito-ḡoi nai, gabu irauirau ai ḡeketoto. Kotari dabarai ḡeketoto, benamo manu ḡeiaḡomato, ḡeḡani-ḡosirito. <sup>5</sup> Kotari forefore gaburi ai ḡeketokauto tano maḡiḡiri ai. Asikauna ḡegarato, korana tano iatanai moḡo. <sup>6</sup> Senaḡi ḡaro eraḡekauto nai, etunurito, ema lamuri asi ḡevariḡo-ginikauto nai, asikauna ḡemaraito. <sup>7</sup> Kotari tu ḡauḡa ḡiniḡiniri vefakari ai ḡeketoto. Mai ḡauḡa ḡiniḡiniri ḡetubu-baregoto nai, varovaro dagarari ḡetubu-ḡaurito. <sup>8</sup> A kotari tu tano namonai ḡeketoto, ḡwaḡwari ḡetaunato nai, kotari sinau ta (100), ma kotari gabana imaima ma gabanana (60), ema kotari tu gabana toitoi (30).” <sup>9</sup> Iesu ḡena guruḡa dokonai ekirato, “Ma seḡana tarimana bene seḡaḡi!”

*Kara dainai Iesu na barabore ekiraḡirito*

*Mareko 4:10-12; Luka 8:9-10*

<sup>10</sup> Iesu ġena mero ġia ġenai ġe-iaġoto, benamo ġedanaġiato, ġekirato, “Kara dainai barabore ai tarimarima ovaġa-guruġarini?” <sup>11</sup> Iesu na evaġa-veserito, ekirato, “Guba Basileia ġena riba vekuretoġari ġomi ġemi ai tu fofori, senaġi ġia ġeri ai tu asiġina. <sup>12</sup> Ma ġena seġaġi tarimana Barau na tuġamaġi-faka beviniani, barego vedaurea bene doġari ġana. Asi ġena seġaġi tarimana, ġena tuġamaġi-faka misina maki beġabi-vaġiani. <sup>13</sup> Moġesi naima au na barabore ai avaġa-guruġarini. Korana matari na ġeboġe-boġeni, senaġi asi ġeġita-maġatani, seġari na ġeseġaġini, senaġi asi ġetuġamaġi-maoroni. <sup>14</sup> Ġia ġeri ai Isaia ġena peroveta guruġana bema moġoni, maiġesi ekirato, ‘Ġomi tu boġo seġaġini, ma boġo seġaġini, senaġi asi boġo riba-maoroni.

Ġomi tu boġo ġitani,  
ma boġo ġitani,  
senaġi debami asi beġe vekeoni.

<sup>15</sup> Korana mai bese tarimari nuġari tu gwaġiġi foroforo, seġari maki bubu, matari maki ġevékouto. Matari na beġe ġitani garina, seġari na beġe seġaġini, e nuġari na beġe riba-maoroni garina, ma au ġegu ai beġe vetuġamaġi-kureni ġeri Barau, benamo bavaġa-maġuririni garina.’

<sup>16</sup> A ġomi tu boġono iaku, korana matami tu ġeġitani e seġami tu ġeseġaġini. <sup>17</sup> Au na akira-korikorimini: Peroveta tarimari vovoka ma Barau ġena vei-iobukaiobuka tarimari ġutuma kaiveġata na ġeri ura baregona tu, ġomi na initoma kara ġoġitaiani beġene ġitaia, senaġi asi ġeġitaia, e ġomi na kara ini ġoseġaġiani beġene seġaġia, senaġi asi ġeseġaġiato.”

*Widi ġueri baraborena anina  
Mareko 4:13-20; Luka 8:11-15*

<sup>18</sup> “Ġoseġaġi, widi fiu-rovorovona tarimana baraborena anina tu maiġa: <sup>19</sup> Tarima kotari na Barau ġena Basileia varina ġeseġaġiani, senaġi asi ġetuġamaġi-fakaiani. Benamo Satani eiaġomani, ma mo kara ġia nuġari ai beġe varo dagarari tu, ġia na eġabi-vaġirini. Moġeri tarima tu widi ġuturi dabarai ġeketoni kavana. <sup>20</sup> Widi ġueri kotari forefore ai ġeketoto, mai tu tarima kotari na Barau ġena Vari Namona ma iakuri ġesi ġeseġaġiani e ġeġabi-raġeani. <sup>21</sup> Senaġina ġia nuġari ai asi erakatoġa-ginikauni nai, asi etanu-maukani. Barau ġena guruġa dainai nega rakavari ġeġoitaġoni e ġevaġa-midigu midigurini ġarori ai, ġia ġenana ġeraka-veġitani. <sup>22</sup> Widi ġueri kotari tu ġauġa ġiniġiniri vekaravari ai ġeketoto, mainana ekiraġiani tu, tarima kotari na Barau ġena guruġa ġeseġaġiani, senaġi tauġeri ġeri maġuri e farefare ġutumari ġetuġamaġi-baregorini ġerina, Barau ġena guruġa ġevékouni, e ġwaġwana maki asi evetoreni. <sup>23</sup> A widi ġueri kotari tu tano namonai ġeketoto, mainana ekirarani tu, tarima kotari na Barau ġena guruġa ġeseġaġiani, ma ġeġabi-raġeani nuġari mabarari ġesi, ġia ġwaġwari ġevetoreni maki, kotari sinau ta (100), ma tari gabana imaima ma gabanana (60), ma kotari gabana toitoi (30).”

*Barabore - Widi e ġauġa*

<sup>24</sup> Iesu na barabore ta ġeri ma ekiraġiato, ekirato: Guba Basileia tu tarima ta kavana, ġue ġuturi namori ġena vamokai evarorito. <sup>25</sup> Benamo boġi tai, tarimarima mabarari roġo ġegenato-ġoi nai, ebaru-viniato-ġoi tarimana eiaġomato, ġauġa ġuturi widi vekaravari ai efiurito, benamo erakato. <sup>26</sup> Widi ġetubu-foforito, ġegara-baregato e ġwaġwari ġeburito nai, ġauġa rakavari maki ġia vefakari na ġefoforito. <sup>27</sup> Benamo vamoka biaguna ġena vetuġunaġi merori ġia ġenai ġeiaġomato, ġekirato, ‘Vereġauka,



ḡoi ḡemu vamokai ḡue ḡuturi namori ovarorito, nene? Senaḡi mai ḡauḡa rakavari tu ainana beḡe iaḡoma?’ <sup>28</sup> Ḡia na evaḡa-veserito, ekirato, ‘Ebaru-vinirani tarimana na mai veiḡa bema veia.’ Vetuḡunaḡi merori na ḡedanaḡiato, ḡekirato, ‘Bema ourani nai, ḡaiaḡo, be baḡana lauri ba?’ <sup>29</sup> Ḡia evaḡa-veseto, ekirato, ‘Asiḡina, korana ḡomi na ḡauḡa boḡo laurini nai, widi maki lamuri ḡesi boḡo lau-sebonarini garina. <sup>30</sup> Ḡia ruarua beḡene gara-sebona, ma beḡene tanu mo, widi ḡwaḡwana basibasina ḡarona bene raḡasi. Mo ḡaro ai au na basi-basina tarimari maiḡesina bakirarini, bakirani: Giniguine tu, ḡauḡa mabarari ḡovaḡa-vegogori, ḡobaru-sebonari, be karava na bene ḡarari, a widi ma boḡono vaḡa-vegogoa, be ḡegu ḡaniḡani vaḡa-vegogo gabunai boḡono toreri.’ ”

*Barabore - Mastadi ḡauna ḡutuna*

*Mareko 4:30-32; Luka 13:18-19*

<sup>31</sup> Iesu na barabore ta ma ekira-vararito, ekirato, “Guba Basileia tu mastadi ḡauna ḡutuna kavana, tarima ta na eḡabiato, ḡena vamokai evaroato. <sup>32</sup> Tanobarai varovaro dagarari ḡueri mabarari fakari ai ḡia ḡereḡana misina korokoro, senaḡi etubuni nai, varovaro dagarari mabarari fakari ai ḡia moḡo barego vedaurea. Ḡia tu ḡau ai eiaḡoni naima, rovo manuri ḡeiaḡomani, ma ḡeri nuḡi ḡeveini ḡia leganai.”

*Barabore - Farao vaḡa-tubuna muramurana*

*Luka 13:20-21*

<sup>33</sup> Iesu na barabore ta ḡeri ma ekiraḡiato, ekirato, “Guba Basileia tu farao vaḡa-tubuna muramurana kavana, vavine ta na kotuna ta moḡo eḡabiato, benamo farao fuseri toitoi ḡesi egiroato, eiaḡoto mo, muramura na mabarana evaḡa-tubu baregoato.”

*Barabore aniri*

*Mareko 4:33-34*

<sup>34</sup> Iesu na mai dagara mabarari barabore ai tarimarima evaḡa-riba iaḡirito-ḡoi. Ḡena ḡobatai barabore asi eraga-kwanerito-ḡoi. <sup>35</sup> Mai veiḡa eveiato ḡenana, peroveta tarimana ḡena guruḡa ema vaḡa-moḡoniato, ekirato,

“Au na barabore ḡerina  
ḡia bavaḡa-guruḡarini;  
tanobara evesinato ḡarona na  
beiaḡoma mo initoma  
veḡuni ḡetanuni dagarari,  
au na ḡia ḡeri bakiraḡi-foforirini.”

*Iesu na widi e ḡauḡa baraborena anina ekiraḡi-foforiato*

<sup>36</sup> Iesu na mo tarimarima ḡutuma eraga-kwanerito, benamo numai eraka-toḡato. Ḡena mero ḡia ḡenai ḡeiaḡomato, bena ḡekiraiato, ḡekirato, “Ḡauḡa rakavari vamoka nuḡanai baraborena ḡai ḡemai nokiraḡi-maḡataia.”

<sup>37</sup> Iesu na evaḡa-veserito, ekirato, “Widi ḡueri namori evarorini tarimana tu Tarimarima Natuna. <sup>38</sup> Vamoka tu tanobara, ḡue ḡuturi namori tu Barau ḡena Basileia o veḡitaḡau seḡukana gaburenai ḡetanuni tarimari; ḡauḡa rakavari tu Satani ḡena tarimarima doḡoro. <sup>39</sup> E ḡauḡa varovarona tarimana tu Diabolo, ḡita ebaru-vinirani tarimana; kwakwa tu tanobara magona beraḡasini kavana. Ḡwaḡwana kwakwa e basibasina tu aneru na beḡe korana-iaḡiani. <sup>40</sup> Vaḡa-ilailana ḡauḡa ḡevaḡa-vegogorini, ma karavai ḡegaburini, ḡeḡara-ḡosirini, tanobara bea korini nai, moḡesina kavana bevetoreni: <sup>41</sup> Tarimarima Natuna na ḡena aneru tu betuḡurini, benamo tarimarima ḡeḡori-kerererini tarimari, ema veiḡa rakavari ḡeveirini tarimari mabarari, Barau ḡena Basileia ḡenana beḡe ḡabi-veḡitarini, <sup>42</sup> e karava seḡukana ma moremorena nuḡanai beḡe fiu-toḡarini, ema monai roḡo beḡe taḡini, gadikari maki beḡe veḡara-tarini. <sup>43</sup> Moḡa ḡaronai maki Barau ḡena vei-iobukaiobuka tarimari tu, ḡaro kavana ma mamari

ġesi Tamari ġena Basileia nuġanai beġe tanuni. Deikara ma seġana tarimana, bene seġaġi.”

*Barabore - Tarima ta na farefare namona ta ekure-toġaiato*

<sup>44</sup> “Guba Basileia tu farefare vekuretoġana tanobarai kavana. Tarima ta na edoġariato, benamo ma eguriguri-ġauato. E ma iakuna ġesi eiaġoto, ġena dagara mabarari ea voivoi-iaġirito, benamo mo tano evoiato.”

*Barabore - Galasi forena davana barego forena*

<sup>45</sup> “Guba Basileia tu bisinesi tarimana kavana, galasi foreri davari barego dagarari evetaurini. <sup>46</sup> Ġia na voina barego lelevaġina forena ta edoġariato, benamo ġena farefare mabarari evoivoi-iaġi fitoġarito roġo, monai vau mo davana forena evoiato.”

*Barabore - Reke*

<sup>47</sup> “Guba Basileia tu reke kavana, davarai ġefiu-riġoani nai, maġani-kone irauirau nuġanai ġetoġani. <sup>48</sup> Reke evonuni nai, ġeinu-raġeani tanobara ġana, benamo reke tarimari ġetanu-tarini vau, maġani-kone reke nuġanai moġeri mabarari ġeviriġirini, namori mabarari tu baketi ai ġeġurarini, a rakavari tu ġefitoġarini. <sup>49</sup> Moġesi vetoġa bevetoreni, tanobara magona beraġasini nai. Aneru beġe iaġomani nai, veiġa rakava tarimari tu beġe tore-veġitarini veiġa iobukaiobuka tarimari ġerina; <sup>50</sup> e karava more-morena nuġanai beġe fiu-toġarini. Monai beġe taġini, gadikari maki beġe veġaratarini.”

*Guruġa moġoniri variġuri e guineri*

<sup>51</sup> Iesu na ġena mero edanaġirito, ekirato, “Mai guruġa mabarari nuġami ai boġo riba-ġitakauri ba?” Ġia na ġekiraiato, “Oi, Vereġauka.” <sup>52</sup> Iesu na ma ekirarito, ekirato, “Moġesina nai, bema taravatu vaġa-ribana tarimana ta Guba Basileia ġena vevaġa-riba tarimanai beiaġoni neganai, ġia tu numa biaguna ta kavana, ġena farefare variġuri ema guineri eġabi-rosirini ġena farefare vaġa-vegogo numana na.”

*Nasareta tarimari na Iesu asi ġeġabi-raġeato*

*Mareko 6:1-6; Luka 4:16-30*

<sup>53</sup> Iesu na maiġeri barabore ekiraġi-ġosirito vau, mo gabu eraga-kwaneato. <sup>54</sup> Monana vau ebaregato vanuġanai eraġasito. Iuda tarimari ġeri rubu ai evevaġa-ribato-ġoi nai, ġia ġeseġaġiato-ġoi tarimari na ġena ġobata guruġari ġeġaba-iaġirito, ema maiġesi ġevedanaġito, ġekirato, “Mai tarima ġena riba tu ainana eġabito, e mai nuġa-farevaġi veiġari maki kamasi eveirini? <sup>55</sup> Ġia tu kamuda tarimana natuna, ene? Ġia sinana arana Maria ġetoni, ene? E ġia tarina merori arari tu Iakobo (o Iames) e Iosefa, Simona e Iudas, ene? <sup>56</sup> Ema ġia tarina vavineri mabarari maki ġita ġesi maiġeri. Senaġi mai riba ema seġuka mabarari ne ainana eġabito?” <sup>57</sup> Moġesi ġetuġamaġi-ġutumama viniato nai, ġia na asi ġeġabi-raġeato. Iesu na maiġesi ekirarito, ekirato, “Peroveta tarimana tu gabu mabarari ai beġe gubakauani, senaġi ġena vanuġa korikori ema ġena numa tarimari na moġo asi beġe gubakauani.” <sup>58</sup> Monai nuġa-farevaġi veiġa boruri viravira moġo eveirito, korana asi ġeri veġabidadama nai.

## 14

*Ioane Babatise ġena mase*

<sup>1</sup> Mo negai Heroda, Galilea verena, Iesu varina eseġaġiato. <sup>2</sup> Benamo ġia na ġena vetuġunaġi tarimari evaġa-guruġarito, ekirato, “Mai tu Ioane Babatise mase na bevaisiraġe-ġenoġoi nai, seġuka veiġari boruri eveirini.”

<sup>3</sup> Heroda na Ioane eġabi-tariato ma ebarubaruato, dibura numai ekou-ġauato. Ġia na maiġesina evei-viniato, korana ġia kakana Filipo ġaraġona, Herodia, ġaramanai. <sup>4</sup> Ioane Babatise na Heroda evaġa-guruġaiato-ġoi, ekirato, “Ġoi na Herodia boġaraġo-veraria tu asi maoro.” <sup>5</sup> Heroda eura-rakavato, Ioane bene vaġia, senaġi tarimarima gariri eveito, korana ġia na Ioane ġetuġamaġiato-ġoi tu peroveta tarimana ta.

<sup>6</sup> Senaḡi Heroda ḡena ḡora ḡaronai o betdei, Herodia natuna ḡuiatona tu varivari tarimari ḡoirari ai ebarato. Heroda maki mai bara na evaḡa-iakuato. <sup>7</sup> Moḡesina nai ḡia ma nuḡana mabarana ḡesi guruḡa gwaḡiḡinai maiḡesina bara-ḡuiatona ekiraḡitoreviniato, ekirato, “Ḡoi kara oura-viniani dagarana nokiraḡia, benamo bavinimuni.” <sup>8</sup> Ḡuiato tu sinana na varau evaḡa-guruḡa guineato ema elaunaḡiato nai, ḡia maiḡesina ekirato, “Ioane Babatiso debana diḡu ai mainai noma vinigu.”

<sup>9</sup> Heroda nuḡana emetoto, senaḡi ḡena guruḡatore ḡuiato ḡenai varau eveiato e ḡena varivari tarimari dairi ai ekirato, beḡene vinia. <sup>10</sup> Benamo tarima debari ebasi-ḡuturito-ḡoi tarimana ta etuḡuato dibura numai, Ioane debana ebasi-ḡutuato. <sup>11</sup> Ioane debana tu diḡu ai ḡeḡuraiato vau, ḡuiato ḡeviniato, benamo sinana ḡenai eḡwa-iaḡoato. <sup>12</sup> Benamo Ioane ḡena mero ḡeiaḡomato, tauḡanina ḡeḡabiato, ḡeguriato. Moḡa murinai ḡeiaḡoto Iesu ḡekira-varaiato.

*Iesu na tarimarima daḡara imaima (5,000) eḡuburito*

*Mareko 6:31-44; Luka 9:10-17; Ioane 6:1-13*

<sup>13</sup> Iesu na Ioane ḡena mase varina eseḡaḡiato nai, ḡia monana eraka-ḡerevaḡito ḡasi na, asi tarimarima gabuna ḡana eiaḡoto. Senaḡi tarimarima na ḡeseḡaḡiato nai, ḡeri vanuḡa ḡeiaḡuirito, tano na kwakuri na ḡerakato, Iesu murina na ḡeiaḡoto. <sup>14</sup> Iesu fenu ai edarokauto nai, ḡia na tarimarima ḡutuma-bara eḡitarito, benamo evetuḡarakavarito, ema ḡeri keve tarimari evaḡa-namorito.

<sup>15</sup> Lavilavi rekenai Iesu ḡena mero ḡia ḡenai ḡeiaḡoto, bena ḡekirato, “Mai tu gabu fakana, asi tarima-rimana, ḡaro varau beviriḡo naima, mai tarimarima ḡutuma-bara notuḡuri, be vanuḡai ḡari ḡaniḡani beḡenea voi.” <sup>16</sup> A Iesu ekirato, “Ḡia asi beḡene raka-veḡita, ḡomi na ḡari boḡono viniri, be beḡene ḡaniri.” <sup>17</sup> Ḡia na ḡekiraiato, ḡekirato, “Ḡai ḡemai tu beredi imaima (5) e maḡani-kone ruarua (2) moḡo maiḡeri.” <sup>18</sup> Iesu na ekirarito, ekirato, “Maiḡana ḡoḡabi-iaḡomari au ḡegu ai.”

<sup>19</sup> Benamo ḡia na mai ḡutuma-bara elaunaḡirito, ḡauḡa iatari ai beḡene tanutanu-tari etato, monai vau ḡia na beredi imaima e maḡani-kone ruarua eḡabirito, gubai eboḡeraḡeto, Barau evaḡa-namoato vau, etavi-kirakirarito, ḡena mero evinirito, benamo ḡia na vau mai tarimarima ḡutuma-bara ḡevinirito. <sup>20</sup> Mabarari ḡeḡani-maseto; ḡaniḡani kwari ḡevaḡa-vegogorito, boseḡa gabanana ruarua (12) ḡevaḡa-vonurito. <sup>21</sup> Ḡeḡaniḡanito, tau moḡo, mabarari tu 5,000 kavana, senaḡi vavine ma naturi keikeiri ḡesi tu asi ḡeiavirito.

*Iesu nanu iatanai erakato*

*Mareko 6:45-52; Ioane 6:16-21*

<sup>22</sup> Moḡa murinai Iesu na ḡena mero evaḡa-guruḡarito, ḡasi ai beḡene raḡekau, beḡene guine, kou reke ta ḡana beḡene iaḡo etato. A ḡia tu mo tarimarima ḡutuma-bara roḡo etuḡu-rovorovorito. <sup>23</sup> Mai tarimarima vovoka etuḡu-rakarito vau, ḡia ḡereḡana ḡoro ḡana evaraḡeto, bene ḡauḡau ḡana.

Varau eboḡito nai, ḡia tu roḡo moḡa, ḡereḡana. <sup>24</sup> Ḡasi tu kotuna ma fakana tanobara ḡenana kou nuḡanai, e ureure na edori-ḡareva ḡarevaiato, korana iavara na ḡasi ḡena raga ḡoirana rekena na etoḡato-ḡoi nai. <sup>25</sup> Horaḡauna 3 ema 6 koloko vekaravari ai boḡiboḡi rekenai, Iesu ḡia ḡeri ai eiaḡoto. <sup>26</sup> Senaḡi ḡena mero na nanu iatana na erakato-ḡoi ḡeḡitaiato, benamo nuḡari maki ḡefare-vaḡito, ema ḡegari-rakavato, ḡekirato, “Mo tu murava ta!” Ḡegarito nai ḡeḡabato maki. <sup>27</sup> Iesu na asikauna evaḡa-guruḡarito, ekirato, “Ḡonuḡa-gwaḡiḡi, mai tu au; asi ḡogari.”

<sup>28</sup> Petero na evaḡa-veseato, ekirato, “Vereḡauka, bema moḡoni ḡoi neganai, bono launaḡigu, be nanu iatanai bana raka, ḡemu ai bana iaḡosi.” <sup>29</sup> Iesu ekirato, “Noiaḡoma!” Benamo Petero ḡasi na eraka-riḡoto, nanu iatanai erakato, Iesu ḡenai eiaḡoto. <sup>30</sup> Senaḡi Petero na iavara (e ureure) eḡitaiato, benamo egarito, erei-riḡoto nai eḡaba-fouto, ekirato, “Vereḡauka o, noma vaḡa-maḡurigu.” <sup>31</sup> Iesu asikauna ḡimana etuḡu-iaḡoato, ḡenai eveḡabikauto, ekirato, “Veḡabidadama kei tarimana, karase nai odaradarani?”

<sup>32</sup> Tauri ruarua ġasi ai ġeraġekauto vau iavara edokoto. <sup>33</sup> Ġasi tarimari tu ġia ġoiranai vau ġetoma-rakariġoto, ġekirato, “Moġoni veġata, ġoi tu Barau Natuna.”

*Iesu na keve tarimari Genesareta ai evaġa-namorito*

*Mareko 6:53-56*

<sup>34</sup> Ġia ġasi na ġevanaġito, Genesareta tanonai ġeraġasito. <sup>35</sup> Mo gabu tarimari na Iesu ġea ġita-doġariato, benamo ġia varina mo gabu vanuġari mabarari ġevaġa-ribarito. Benamo keve tarimari ġia ġenai ġeġwa-iaġorito, <sup>36</sup> e ġenoġiato, ġena dabuġa dudunai moġo maki beġene veġabikau. Gabivau, ġeveġabi-kauto tarimari mabarari varau ġenamoto.

## 15

*Namo e rakava*

<sup>1</sup> Farisea tarimari e taravatu ġevevaġa-riba iaġiato-ġoi tarimari kotari Ierusalemna na Iesu ġenai ġeiaġoto, ġekirato, <sup>2</sup> “Karase nai ġoi ġemu mero na ġita senera vereri ġeri vevaġa-riba asi ġeseġaġirini? Ġia ġimari maki dabara korikoriri ai asi ġeġuriġirini vau ġeġaniġanini!” <sup>3</sup> Iesu na evaġa-veserito, ekirato, “Be karase senemi vereri ġeri vevaġa-naġi boġono korana-iaġiri urari ai, Barau ġena taravatu guruġari ġoruġarini? <sup>4</sup> Barau ekirato, ‘Tamamu e sinamu bono gubakauri,’ ema ‘Deikara ta na tamana o sinana beguruġa-rakava viniani tarimana tu boġono vaġi-mase!’ <sup>5</sup> Senaġi ġomi ġokirani, tarima ta na tamana o sinana bevaġa-guruġaiani, bekirani, ‘Au na ġomi asi bavaġa-kavamini, korana bara vinimi dagarana tu Barau ġena dagara, naima ġia aviniani.’ <sup>6</sup> Moġesi veiġai ġomi na tarima ġokouani, tamana e sinana asi bene vaġa-kavari e asi bene gubakauri ġana. Ġemi sene maġuriri maiġesiri ġerina Barau ġena taravatu guruġari asi aniri ai ġovaġa-iaġorini. <sup>7</sup> Ġofaġofa tarimami, Isaia na eperoveta-iaġimito tu moġoni, ekirato, <sup>8</sup> ‘Mai besena tu mururi koriri ai moġo au ġegubakauguni ġeri Barau, senaġina ġia nuġari tu manaġa rakava au ġegu ai. <sup>9</sup> Ġetoma-rakariġo vini-kavaguni, ġeri vevaġa-riba tu tarimarima ġeri vevaġa-naġi taravaturi, a dia au ġegu!’ ”

*Dagara kotari na tarima ġevaġa-rakavarini*

*Mareko 7:14-23*

<sup>10</sup> Iesu na tarimarima ġutuma ġia ġenai ekea-iaġomarito, benamo ekirarito, ekirato, “Ġoseġaġi, ema boġono riba-maoro: <sup>11</sup> Murika na eraka-toġani tarima murunai dagarana na ġia asi evaġa-rakavaiani, senaġina kara ġia nuġana o loruna ġutuna na ma muruna na eraka-rosini dagarana na ġia evaġa-rakavaiani.”

<sup>12</sup> Ġena mero ġia ġenai ġeiaġomato, benamo ġekiraiato, ġekirato, “Ġoi ribamu, Farisea tarimari tu ġoi ġemu guruġa beġe seġaġia nai, nuġari beġe midigu?” <sup>13</sup> Iesu evaġa-veseto, ekirato, “Tamagu gubai etanuni na ġau asi evarorito mabarari tu beġe raġa-vaġirini. <sup>14</sup> Ġotuġamaġi-fitoġari! Ġia matari bubu, senaġi ġeurani mata-bubu tarimari beġene ġori-kauri. Bema mata-bubu tarimana na mata-bubu tarimana ta beġori-kauani nai, tauri ruarua koufai beġe keto-riġoni.”

<sup>15</sup> Petero na ekiraiato, ekirato, “Mai guruġa veabanaġina tauna korikori novaġa-ribama.” <sup>16</sup> Iesu na ekirarito, ekirato, “Ġomi maki asi ġotuġamaġi-fakani tarima kotari kavana? <sup>17</sup> Asi ġoribani maki? Dagara ta tarima muruna na eraka-toġani, eiaġoni sinaġenai, monana eiaġoni tauġanina ġenana ea raka-rosini. <sup>18</sup> Senaġina muruna na ġeraka-rosini dagarari tu nuġana o loruna na ġeiaġomani naima, maiġeri dagara na tarima ġevaġa-rakavaiani. <sup>19</sup> Tarima nuġana o loruna ġenana tuġamaġi rakavari ġeraġeni nai, evaġivaġini, eveġura-vanaġini, emata-boraġani, elemeni, Kota gabunai

gōfaḡofa guruḡari ekiraḡirini, ema tarima namori arari ḡofaḡofa veiḡari ai evari-fiurini.  
<sup>20</sup> Maiḡeri dagara na tarima evaḡa-rakavaiani; senaḡina ḡimamu asi oḡuriḡiani vau oḡaniḡanini, monana tarima asi evaḡa-rakavaiani.”

*Irau bese vavinena ta ḡena veḡabidadama*

*Mareko 7:24-30*

<sup>21</sup> Iesu na mo gabu eraga-kwaneato, eraka-iaḡoto Taia e Sidono rekeri tanori ai eraḡasito. <sup>22</sup> Benamo monai etanuto-ḡoi vau, Kanana vavinena ta Iesu ḡenai eiaḡomato, eḡaba-fouto, ekirato, “Vereḡauka, Davida Natuna o, au novetuḡagu! Au natugu ḡuiatona tu iauka rakavana na beborogia nai, ḡena midigu initoma tu barego rakava moḡo.”

<sup>23</sup> Senaḡina Iesu na ḡia asi evaḡa-veseato. Benamo ḡena mero ḡia ḡenai ḡeiaḡomato, ḡenoḡiato, ḡekirato, “Notuḡu-rakaia! ḡita murira na eiaḡomani ema guru baregona eveiani.”

<sup>24</sup> Iesu evaḡa-veseto, ekirato, “Barau na au etuḡuguto tu, rekwarekwa mamoei, Isaraela tarimari, ḡeri moḡo.” <sup>25</sup> Benamo mo vavine Iesu kwakuna koranai evetuitarito, ekirato, “Vereḡauka, novaḡa-kavagu!” <sup>26</sup> Iesu evaḡa-veseto, ekirato, “Mero misiri ḡari ḡaniḡani bita ḡabirini, ma kwaiva bita fiu-vinirini tu asi maoro.” <sup>27</sup> Vavine na evaḡa-veseato, ekirato, “Vereḡauka, mani tu moḡoni, senaḡina kwaiva na ḡaniḡani kwari ḡeketo-firiḡoni, biaguri ḡeri ḡaniḡani fatari na, maki ḡeḡanirini.” <sup>28</sup> Benamo Iesu na evaḡa-veseato, ekirato, “Veḡabidadama barego vavinemu! Kara oura-viniani veiḡana beḡorani.” Mo horai moḡo ḡia natuna ḡuiatona enamoto.

*Iesu na keve tarimari vovoka evaḡa-namorito*

<sup>29</sup> Iesu na mo gabu eiaḡuiato, Galilea kouna sevina na eraka-vanaḡito. Benamo ḡoro tai eraḡeto, tuḡunai etanu-tarito. <sup>30</sup> Tarimarima ḡutuma-bara ḡia ḡenai ḡeiaḡomato, keve irauirau tarimari ḡeḡabi-iaḡomarito, kotari kwaku rakava, mata-bubu, kobari na ḡedarato-ḡoi tarimari, muru-bubu, ema keve irauirau ḡutuma maki. Iesu kwakuna koranai ḡema tore-taririto, benamo ḡia na evaḡa-namorito. <sup>31</sup> Tarimarima mabarari na mai vetoḡa ḡeḡitaiato nai, ḡeḡaba-rakavato, korana mururi bubu tarimari ḡeguruḡato, ḡedarato-ḡoi tarimari tauḡaniri vinuba gaburi ai ḡevetoreto, kwaku rakava tarimari ḡerakato, mata-bubu tarimari ḡeboḡe-boḡeto. Benamo ḡia na Isaraela ḡeri Barau ḡevaḡa-raḡeato.

*Iesu na tarimarima daḡara vasivasi (4,000) eḡuburito*

*Mareko 8:1-10*

<sup>32</sup> Iesu ḡena mero ḡia ḡenai ekea-iaḡomarito, ekirato, “Au na mai tarimarima avetuḡarini, korana ḡaro toitoi veḡatana au ḡesi mainai beḡe tanu, ma kara ta maki roḡosi roḡo beḡene ḡania. ḡaniḡani ta roḡosi roḡo beḡene ḡani nuḡanai, au na asi batuḡu-rakarini, korana dabarai beḡea borimarini garina.” <sup>33</sup> ḡena mero na ḡedanaḡiato, ḡekirato, “Mai tano fakanai ḡaniḡani vovoka tu kamasi bita doḡarini vau, mai ḡutuma-bara bita ḡuburini?” <sup>34</sup> Iesu na evaḡa-veserito, ekirato, “ḡomi ḡemi ai beredi tu vira maniḡa?” ḡia ḡekirato, “Beredi imaima ruarua (7) ḡai ḡemai maiḡa, ema maḡani-kone misiri kotari maki.”

<sup>35</sup> Benamo Iesu na mai tarimarima asisebo ekirarito, tano ai ḡetanutanu-tari. <sup>36</sup> Benamo beredi imaima ruarua (7) e maḡani-kone eḡabirito, Barau evaḡa-namoato, ebuki-ḡuturito, ḡena mero evinirito, ḡia na vegogo tarimari ma ḡevinirito. <sup>37</sup> Mabarari ḡeḡani-maseto murinai, Iesu ḡena mero na ḡaniḡani kwari ḡegogorito, boseḡa imaima ruarua (7) ḡevaḡa-vonurito. <sup>38</sup> Mo ḡaniḡani ḡeḡaniato ḡenana tau moḡo mabarana tu 4,000, senaḡina vavine ma naturi ḡesi tu asi ḡeivirito. <sup>39</sup> Benamo Iesu na mai ḡutuma-bara etuḡu-rovo rovorito, a ḡia ḡasi ai eraḡeto, Magadan tanona ḡana eiaḡoto.

<sup>1</sup> Farisea e Sadukea tarimari kotari Iesu ġenai ġeiaġoto, benamo ġedanaġi-ribaġaniato. Ġeri ura vetoġa ta guba na bene mariġo, beġene ġitaia, ġia tu moġoni Barau na etuġuato tarimana. <sup>2</sup> Senaġi Iesu na evaġa-veserito, ekirato, “Lavilavi ai ġaro evariġoni nai, ġokirani, ‘Guba bekakakaka, be ġura asi beraguni, ġitaġitana tu nega namo.’ <sup>3</sup> A boġi-boġi rekenai ġokirani, ‘Toma tu ġura ma iavarana ġesi eiaġomani, korana guba bekakakaka, ema ġitaġitana maki ma garina.’ Guba ġoġitaiani nai, kara boġo kiraġiani, nega namo o nega rakava ġeri ai tu lorinai, senaġina maitoma ġaro vetoġari tu asi ribami! <sup>4</sup> Maitoma ġuru rakavana ma veġura-vanaġina ġesi, (Barau ġenana ġeveġitato ġuruna), vetoġa ma evetauani, senaġina vetoġa ta asi bavinimini, a Iona, peroveta tauna, ġenai eġorato vetoġana moġo.” Benamo Iesu na eraga-kwanerito, ġerina eraka-veġitato.

*Iesu ġena mero ġedaradarato*

*Mareko 8:14-21*

<sup>5</sup> Kou na ġeġasi-vanaġito reke ta kefo ai vau, Iesu ġena mero ġeribato, ġaniġani asi ġeġabikauto. <sup>6</sup> Benamo Iesu na ekirarito, ekirato, “Lorimi boġono vetore, boġono boġeboġe, korana Farisea tarimari e Sadukea tarimari ġeri farao vaġa-tubuna muramurana lorina boġono torea.” <sup>7</sup> Ġia tauġeri ġeguruġa-guruġa iaġi-vegogo-ato, ġekirato, “Ġia maiġesi eguruġani, korana beredi asi bita ġabikau nai.” <sup>8</sup> Iesu ribana ġia na kara ġekiraġiato naima, edanaġirito, ekirato, “Karase nai ġereġami na beredi asi boġo ġabikau ġoguruġa-guruġa iaġiani? Veġabidadama kei tarimami! <sup>9</sup> Ġomi roġosi roġo boġono riba-maoro? E asi ġotuġamaġiani beredi imaima (5) ġenana tarimarima 5,000 ġeġaniġanito, e beredi kwari ġogogorito tu boseġa vira ġovaġa-vonurito? <sup>10</sup> Ema ta maki, farao imaima ruarua (7) ġenana tarimarima 4,000 ġeġaniġanito, e beredi kwari ġogogorito tu boseġa vira ġovaġa-vonurito? <sup>11</sup> Kamasi se nuġami asi ġevekeoni, ma asi ġoribani, au na tu dia beredi aguruġa-iaġiani? Ma nakira: Farisea tarimari e Sadukea tarimari ġeri farao vaġa-tubuna dagarana lorina boġono torea!” <sup>12</sup> Benamo ġia nuġari ġevekeoto, ema ġeribato maki, Iesu na dia farao vaġa-tubuna muramurana eguruġa-iaġiato, senaġina Farisea e Sadukea tarimari ġeri vevaġa-riba guruġari ġofaġofari rekeri ai eguruġato.

*Petero na Iesu ekiraġi-foforiato, Keriso*

*Mareko 8:27-30; Luka 9:18-21*

<sup>13</sup> Iesu eiaġoto, Kaisarea Filipi vanuġana tanona rekenai eraġasito. Monai vau ġia na ġena mero edanaġirito, ekirato, “Tarimarima tu kara ġetoni, Tarimarima Natuna tu deikara?” <sup>14</sup> Ġia ġekirato, “Kotari ġekirani, ġoi tu Ioane Babatiso, kotari ġekirani, Elia, ma tari ġekirani tu, Ieremia o peroveta tarimana ta.” <sup>15</sup> Iesu na ġia edanaġirito, ekirato, “A ġomi tu kara ġotoni au tu deikara?” <sup>16</sup> Simona Petero na evaġa-veseato, ekirato, “Ġoi tu Keriso, maġuri Barauna Natuna.” <sup>17</sup> Iesu na evaġa-vese viniato, ekirato, “Simona, Ioane natuna, bono iaku ema vevaġa-namo iatamu ai bene tanu, korana mai vevaġa-vese moġonina bovinia, maiġa tu dia tarima ta ġenana beiaġoma, senaġina mai tu au Tamagu gubai etanuni na ġoi bevinimu. <sup>18</sup> Moġa lorinai akiramuni: Ġoi tu Petero, (anina tu fore), ema mai fore iatanai au ġegu ekalesia bavaġa-ruġaiani. Mase ġena seġuka na maki asi bevaġa-darereani. <sup>19</sup> Au na Guba Basileia kiri maki ġoi bavinimuni; tanobarai bobarurini dagarari mabarari gubai maki Barau na bebarurini; e tanobarai boruġarini dagarari mabarari gubai maki Barau na beruġarini.” <sup>20</sup> Benamo Iesu na ġena mero ekirarito, tarima ta asi beġene vaġa-ribaia ġia tu Keriso, (Barau na ekiraġi-toreato vevaġa-maġuri tauna).

*Iesu na ġena mase e variġisi-ġenoġoi eguruġa-iaġirito*

*Mareko 8:31-9:1; Luka 9:22-27*

<sup>21</sup> Mo nega na veġata Iesu na ġena mero evaġa-riba guinerito, ekirato, “Au tu Ierusema ġana aiaġoni, be Iuda vereri, e Rubu Veaġa vereri baregori, ema taravatu vaġa-riba-iaġina tarimari ġerina roġo amidigu-lelevaġini; ema beġe vaġi-maseguni

maki, senaġina ġaro vaġa-toitoinai vau, mase na ma bavaisiraġe-ġenoġoini.” <sup>22</sup> Petero na eġori-veġitaiato, benamo esisiba-viniato, ekirato, “Vereġauka, dia maniġesina; maniġesina asi beġe vei-vinimuni, ma asi beġorani maki.” <sup>23</sup> Benamo Iesu eboġe-kureto, Petero ekiraiato, ekirato, “Ġoi Satani, ġeguna noraka-ġerevaġi! Au ġegu iaġoiaġo ġoi na odiu-ġauani, korana mai ġemu tuġamaġi guruġana tu dia Barau ġenana eiaġomani, senaġina tarimarima ġerina.”

<sup>24</sup> Iesu na ġena mero evaġa-guruġarito, ekirato, “Bema tarima ta au murigu ai bene raka etoni nai, tauġena bene veruġa, ġena satauro bene ġwaia, ma murigu ai bene raka.” <sup>25</sup> Moġa lorinai deikara tauġena moġo ġena maġuri lorina etoreani tarimana, ġena maġuri befitoġaiani. A deikara au daigu ai ġena maġuri befitoġaiani tarimana, ġena maġuri asi bevei-rekwarekwaiani, senaġi bedoġariani. <sup>26</sup> Tarima ta na tanobara mabarana uranai ġena maġuri befitoġaiani, ġena namo tu kara ġia ġenai? Korana tarima ta ġena maġuri efitoġaiato nai, kara na vau ma bevoi-ġenoġoiani? <sup>27</sup> Korana Tarimarima Natuna tu Tamana mamana marevana e seġuka baregona e ma ġena aneru mabarari ġesi beġe iaġomani, benamo tarimarima tata ġeri veiġa ilailanai voiri tu bevinirini. <sup>28</sup> Moġoni akiramini, mai kotari ini ġeruġa-taġoni maiġeri tu asi roġo beġe maseni, beiaġoni mo, Tarimarima Natuna ġena Basileia nuġanai beiaġomani beġe ġitaiani.

## 17

### *Iesu vetoġana eirauto*

<sup>1</sup> Ġaro imaima sebona (6) ġekorito murinai, Iesu na Petero, e Iakobo (o Iames), ema tarina Ioane eġabirito, ġoro baregona ta tuġuna ġana ġevaraġeto, monai ġia ġereġari moġo. <sup>2</sup> Ġia ġeboġe-taġoto-ġoi nuġanai, Iesu ġitaġitana varau eirauto: Ġia ġoirana ekimore-kimoreato ġaro noġa, ma ġena dabuġa ekuro-ġaroġaroto. <sup>3</sup> Benamo mai mero toitoi na Mose e Elia ġeġitarito, Iesu ġesi ġeguruġa guruġato-ġoi. <sup>4</sup> Monai Petero eguruġa-fouto, Iesu ekiraiato, ekirato, “Vereġauka, namo vedaurea ġita mainai maiġera! Be, ourani nai, fouta toitoi naragari, ta ġoi ġemu, ta Mose ġena, ema ta Elia ġena.” <sup>5</sup> Ġia roġo eguruġato-ġoi, magube kuro-ġaroġarona na ema ġabi-ġaurito vau, garo ta mai magube nuġana na ekea-rosito, ekirato, “Mai tu au Natugu, auravini-baregoani; ġia ġenai aiaku-rakavani. Ġia boġono seġaġi-vinia!” <sup>6</sup> Iesu ġena mero toitoi na mai garo ġeseġaġiatio nai, tano ai ġeketo-tarito ġoirari maki tano ai, korana ġegari-rakavato nai. <sup>7</sup> Benamo Iesu tu ġia ġeri ai eiaġoto, tauġaniri eġabi-kararito, ekirato, “Ġovaisivaisiraġe, asi ġogari.” <sup>8</sup> Ġia ġeboġe-vaisito nai, ġia na tarima ta asi ġeġitaiato ġia ġesi, Iesu moġo ġereġana.

<sup>9</sup> Mabarari ġoro na ġemariġoto-ġoi nai, Iesu na evaġa-guruġarito, ekirato, “Boġo ġita dagarari tarima ta asi boġono vaġa-ribaia, bene iaġo mo, Tarimarima Natuna mase na bene variġisi-ġenoġoi.”

<sup>10</sup> Benamo Iesu ġena mero na ġedanaġiatio, ġekirato, “Kara dainai taravatu vaġa-riba-iaġina tarimari ġekirani, Elia tu beiaġoma-guineni?” <sup>11</sup> Iesu evaġa-veseto, ekirato, “Moġoni veġata, Elia tu beiaġoma-guineni, dagara mabarari bevaġa-variġu ġenoġoirini. <sup>12</sup> A au na akiramini, Elia tu varau eiaġomato, senaġi tarimarima tu asi ribari ġia tu deikara. Ġeri ura veiġari ai moġo ġevei-viniato-ġoi. Moġa ilailanai Tarimarima Natuna maki beġe vaġa-midigu midiguani.” <sup>13</sup> Mai guruġa ġerina Iesu ġena mero ġeribato, ġia na tu Ioane Babatiso ekiraġi-kara-viniato.

### *Iesu na iauka rakavana na eboroġiatio merona evaġa-namoato*

#### *Mareko 9:14-29; Luka 9:37-42*

<sup>14</sup> Ġia ma ġeġenoġoito tarimarima ġutuma ġeri ai nai, tarima ta Iesu ġenai eiaġomato, ġoiranai ema vetui-tarito, <sup>15</sup> ekirato, “Vereġauka, au natugu merona novetuġaia! Ġia tu ġue na evaġiani, ema tauġanina evaġa-ġoġo-ġogo rakavaiani. Nega ġutuma karavai

eburi-raḡeni e nanu ai eburi-reini. <sup>16</sup> Ġemu mero ḡeri ai aḡabi-iaḡoato, senaḡina vaḡa-namona ḡia tu asi ilaila.” <sup>17</sup> Iesu evaḡa-veseto, ekirato, “Asi veḡabidadamami e kira-sirivaḡi ḡuruna! Ġaro vira au tu sevimi ai bana tanu? Ġaro vira bana vevaḡa-gwaḡiḡi vinimi? Mero ḡegu ai ḡoḡori-iaḡomaia!” <sup>18</sup> Iesu na mero tauḡanina ḡenai etanuto iauka rakavana ekira-ḡoiato, benamo iauka rakavana eraka-vaḡito, ma asikauna mero enamoto.

<sup>19</sup> Gabivau Iesu ḡena mero ḡenai ḡeiaḡoto, vekuretoḡai ḡedanaḡiato, ḡekirato, “Karase nai ḡai na iauka rakavana asi ilaila baḡa lai-vaḡia?” <sup>20</sup> Iesu na evaḡa-veserito, ekirato, “Korana ḡemi veḡabidadama asi ilaila naima. Akira-korikorimini, bema ḡemi veḡabidadama mastadi ḡutuna misina korokorona kavana nai, mai ḡoro boḡo kiraiani, boḡo kirani, ‘Mainana noveḡabi-vaisi, ma iomonai noa vetore!’, benamo beveḡabi-vaisini ma beiaḡoni. Veiḡa mabarari maki boḡo veirini riba. [<sup>21</sup> Iauka rakavari maiḡesina lailairi tu dabara irauna tai asiḡina, senaḡina ḡauḡau e ḡaniveaḡai ḡereḡana moḡo.]”

*Iesu ḡena mase ma ekiraḡi-ḡenoḡoiato*

*Mareko 9:30-32; Luka 9:43-45*

<sup>22</sup> Ġaro ta, Iesu ma ḡena mero ḡesi Galileai ḡetanuto-ḡoi nai, Iesu na ekirarito, ekirato, “Tarimarima Natuna tu beḡe revaiani vau tarimarima ḡimari ai beḡe toreani. <sup>23</sup> Benamo beḡe vaḡi-maseani, senaḡi ḡaro vaḡa-toitoinai ma bevaisiraḡe-ḡenoḡoini.” Ġena mero ḡeseḡaḡiato nai, nuḡari ḡemeto-rakavato.

*Rubu Veaḡa takesi moniri vinina*

<sup>24</sup> Iesu ma ḡena mero ḡesi Kaperanauma vanuḡanai ḡeraḡasito, benamo Rubu Veaḡa monina ḡegogoato-ḡoi tarimari ḡeiaḡomato, Petero ḡedanaḡiato, ḡekirato, “Ḡomi ḡemi vevaḡa-riba tauna Rubu Veaḡa ḡena takesi moniri tu evinini ba asiḡina?” <sup>25</sup> Petero na evaḡa-veseato, ekirato, “Oi, evinini.” Petero numa ḡana eḡenoḡoito nai, Iesu na edanaḡiato, ekirato, “Simona, ḡoi ḡemu tuḡamaḡi tu kamasi? Tanobara vereri o kini ḡeri takesi moniri tu deikara na beḡene viniri? Ġia naturi na ba tarima boruri na beḡene viniri?” <sup>26</sup> Petero evaḡa-veseto, ekirato, “Tarima boruri na.” Iesu na ekiraiato, ekirato, “Moḡa anina, ḡia naturi tu asi beḡe vinini. <sup>27</sup> Senaḡina asi bitana vaḡa-baruri ḡana, naima noiaḡo kou ḡana. Kimai bono fiu-riḡoa, maḡani-kone giniguinena boinu-raḡeani nai, bokana bono keo-baḡakaia, silva monina ta bodoḡariani nuḡanai. Bono ḡabia, benamo bono viniri ḡita taura ruarua ḡera Rubu Veaḡa takesi monina.”

## 18

*Deikara tu barego vedaurea Guba Basileia nuḡanai?*

<sup>1</sup> Mo negai Iesu ḡena mero ḡenai ḡeiaḡoto, ḡekirato, “Deikara tu barego vedaurea Guba Basileia nuḡanai?”

<sup>2</sup> A Iesu na mero misina ta ekea-iaḡomaiato, benamo vekaravari ai evaḡa-ruḡa-tariato, <sup>3</sup> ekirato, “Moḡoni veḡata, akiramini, ḡomi asi boḡo vetuḡamaḡi-kureni e mai mero misina kavana asi boḡo iaḡoni nai, ḡomi tu Guba Basileia nuḡanai asi boḡo raka-toḡani. <sup>4</sup> Tarima ta tauḡena evevaḡa-manauni mai mero misina kavana, ḡia tu barego lelevaḡi Guba Basileia nuḡanai. <sup>5</sup> Ema deikara mero misina maiḡesina kavana au aragu ai beḡabiraḡeani tarimana na au maki eḡabi-raḡeguni.”

*Tarima ta na mero misina ḡena veḡabidadama asi bene vaḡa-rakavaia*

*Mareko 9:42-48; Luka 17:1-2*

<sup>6</sup> Senaḡina bema tarima ta na au eḡabidadama-viniguni mero misina ta ḡena veḡabidadama evaḡa-rakavaiani, ḡia tu bere namo fore barana ḡaiḡonai ḡere baru-kaua, ma davara dodokunai bere vebora-mase. <sup>7</sup> Tanobara vetuḡana kekei, korana veribaḡani ḡenana tarima ḡeri veḡabi-dadama evaḡa-rakavaiani. Dagara moḡesina vanaḡivanaḡi beḡe ḡorani veḡata, senaḡina veribaḡani evaḡa-ḡoraiiani tarimana neḡi, vetuḡana kekei.

<sup>8</sup> Bema ḡoi ḡimamu o kwakumu na rakavai etoremuni nai, bono basi-ḡutua, bena bono fitoḡaia! Ḡimamu sebonai o kwakumu sebonai maḡuri vanaḡivanaḡi bono doḡaria tu



namo, a asi namo ġimamu ruarua ma kwakumu ruarua karava eġara-vanaġi vanaġini gabunai beġe fiu-kaumuni. <sup>9</sup> Bema ġoi matamu na rakavai etoremuni nai, bono ġibo-vaġia, bena bono fitoġa-kwareġaia. Matamu sebonai maġuri vanaġivanaġi bono doġaria tu namo, a asi namo matamu ruarua karava eġara-vanaġi vanaġini gabunai beġe fiu-kaumuni.”

*Barabore - Rekwerekwa mamoen*

*Luka 15:3-7*

<sup>10</sup> “Lorimi boġono vetore, mai mero misiri ta boġo ruġaiiani ġesi. Korana akiramini: Ġia aneruri na au Tamagu gubai etanuni ġoirana nega vanaġivanaġi ġeġitaiani. [<sup>11</sup> Tarimarima Natuna tu rekwerekwa tarimari vaġa-maġuriri ġana eiaġomato.]

<sup>12</sup> Kamasi ġotuġamaġiani? Bema tarima ta ma ġena mamoe sinau ta (100), senaġina sebona berekwa-rekwani nai, ġia kara beveini? Ġia na tu 99 ġoro gabakanai beragkwane-rini, benamo beiaġoni, rekwa-rekwa mamoen bea vetauani. <sup>13</sup> Bedoġariani nai, moġoni akiramini, beiaġo-rakavani moġo. A ġena mamoe 99, asi ġedobito dagarari, maki bevanaġirini. <sup>14</sup> Moġa ilailanai Tamami gubai etanuni asi ġena ura, mai mero misiri ta bene rekwerekwa.”

*Tarikakamu ta na bevei-rakava vinimuni*

<sup>15</sup> “Bema ġoi tarikakamu ta na bevei-rakava vinimuni nai, bono iaġo, ġena veiġa rakavana bono vaġa-fofori vinia. Senaġina, vekuretoġai mai veiġa bono veia, ġia ma ġoi ġesi moġo. Bema ġia na ġoi beseġaġimuni ema beġabi-raġemuni nai, tarikakamu ġoi ġemu ai beġenoġoi. <sup>16</sup> Senaġina bema asi beġabi-raġemuni nai, tarima sebona o ruarua bono ġabiri, ġoi ġesi boġono iaġo ġenai, benamo ‘guruġa mabarari beġene vaġa-moġoniri, seġaġiseġaġi tarimari ruarua o toitoi ġerina,’ Buka Veaġa ekirani kavana. <sup>17</sup> Bema ġia asi beseġaġirini nai, beġe ġora dagarari mabarari tu rubu o ekalesia vegogona bono kira-varaia. Bema ekalesia vegogona garona asi beseġaġiani, ġoi na ġia tu Barau asi ribana tarimanai ema takesi gogo o vei-rakava tarimanai bono vaġa-iaġoa.

<sup>18</sup> Moġoni akiramini: Tanobarai boġo barurini dagarari mabarari gubai maki Barau na bebarurini; e tanobarai boġo ruġarini dagarari mabarari gubai maki Barau na beruġarini.

<sup>19</sup> Au na akira-ġenoġoimini: Tano-barai ġomi tarima ruarua dagara tai nuġami boġo tore-sebonaiani ema boġo ġauġau-iaġiani tu, Tamagu gubai etanuni na bevinimini.

<sup>20</sup> Korana au aragu ai tarima ruarua o toitoi beġe tanu-vegogoni gaburi ai, au maki ġia ġesi monai.”

*Barabore - Rakava asi etuġamaġi-fitoġaiiani tarimana*

<sup>21</sup> Benamo Petero tu Iesu ġenai eiaġoto, ekirato, “Vereġauka, au tari-kakagu bevaġa-rakava iaġoguni nai, ġena rakava tu nega vira kavana bana tuġamaġi-fitoġaia? Imaima ruarua (7) ba?” <sup>22</sup> Iesu evaġa-veseto, ekirato, “Asiġina, dia 7 moġo, senaġina 70 ma vaġa-baregona 7, o 70 taims 7, (moġa anina tu vanaġivanaġi).

<sup>23</sup> Ġoseġaġi, Guba Basileia tu vere ta kavana, ġia eurato, ġena vetuġu-naġi tarimari ġeri ġabitore bene vetauri ema bene vaġa-maorori. <sup>24</sup> Ġia na ġabitore dori evetaurito-ġoi nuġanai, vetuġunaġi tarimana ta ġema-ġabi-toġaiato, ġia ġena ġabitore ġenai vira milion kina, moni barego vedaurea, eveiato. <sup>25</sup> Mai vetuġunaġi tauna ġena moni asi ilaila ġena ġabitore voina vinivinina ġenai. Moġesina naima vere na ġena vetuġu-naġi merori ekirarito, mai tarima beġene voivoi-iaġia, vere ta ġena vetuġunaġi meronai bene iaġo, ma ġaraġona e ma natuna ema ġena farefare mabarari ġesi maki, mo ġena ġabitore bene davaia ġana. <sup>26</sup> Vetuġu-naġi tauna vere kwakuna koranai evetui-tarito, enoġiato, ekirato, ‘Au ġegu ai bono vevaġa-gwaġiġi. A au na ġemu dagara mabarari voiri bavanimuni.’ <sup>27</sup> Vere na evetuġaiato nai, vetuġunaġi tauna ġena ġabitore etuġamaġi-fitoġaiato, benamo etuġu-rakaiato.

<sup>28</sup> Mai vetuġunaġi tauna eraka-rosito, ġia ġatana vetuġunaġi tarimana ta edoġariato. Mai ġatana moni kotuna eġabi-toreato ġia ġenai. Eġabi-tariato, ma ġaiġona eggiato,

ekirato, 'Au ġegu ai oġabi-toreato monina voina novinigu!' <sup>29</sup> Ġatana vetuġunaġi tarimana ġia kwakuna koranai evetui-tarito, enoġiato, ekirato, 'Nega kota novinigu roġo, be voina mabarana bana vinimu!' <sup>30</sup> Senaġina ġia asi eurato, benamo dibura numai edori-toġaiato. Monai bene tanu, bene iaġo mo, ġena ġabitore voina bene dava-iaġia etato.

<sup>31</sup> Benamo ġia ġesi vetuġunaġi ġeiaġo-vini vegogoato-ġoi tarimari na mo veiġa ġeġitaiaato nai, ġia nuġari ġemetoto, benamo ġeiaġoto vere ġenai, mo kara ġeġorato dagarari mabarari ġevaġa-ribaiato. <sup>32</sup> Moġesi nai ġia na vetuġunaġi tauna numai ekea-toġaiato, ekiraiato, ekirato, 'Ġoi vetuġunaġi tauna rakavana! Au na ġoi moni vira milion au ġegu ai oġabi-toreato dagarari mabarari atuġamaġi-fitoġarito, voina asi oviniguto, korana onoġiguto nai. <sup>33</sup> Ilailana ġoi na maki karomu vetuġunaġi tauna boro vetuġa-ġwaia, au na ġoi avetuġa-ġwamuto kavana.' <sup>34</sup> Mai vere ebaru-rakavato, benamo vetuġunaġi tauna dibura numai etoreato, monai metona bene ġwaia mo, ġena ġabitore voina mabarana ma bene vini-ġenoġoia.

<sup>35</sup> Iesu ġena guruġa magona rekenai maiġesina ekirato: Tamagu gubai etanuni na ġomi mabarami mai veiġa sebonai moġo bevei-vinimini, bema ġoi tarikakamu ġena rakava nuġamu mabarana ġesi asi botuġamaġi-fitoġaiiani nai."

## 19

### *Veġaraġo ruġaruġana*

<sup>1</sup> Iesu na maiġeri dagara mabarari eguruġa-iaġi ġosirito murinai, Galilea eiaġuiato, Iudea tanona ġana eiaġoto, Ioridana ġarukana reke ta kefonai. <sup>2</sup> Tarimarima ġutumabara ġia murinai ġeiaġomato, e monai ġeri keve evaġa-namorito.

<sup>3</sup> Farisea tarimari kotari ġia ġenai ġeiaġoto, ġevedanaġi-veribaġaniato, ġekirato, "Tau ta ġena ura ġaraġona bene fitoġaia etoni nai, taravatu na beġabiani?"

<sup>4</sup> Iesu na evaġa-veserito, ekirato, "Ġomi na Buka Veaġa asi ġoiaviani? Maiġesi ekirani, 'Tovotovona na veġata, Barau na dagara mabarari eveirito nai, ġia na tarimarima maki eveirito tau e vavine.' <sup>5</sup> Benamo Barau ekirato, 'Moġesina nai tau ta na tamana e sinana beraga-kwanerini, ġaraġona ġesi beġe tanuni, benamo ġia tauri ruarua beġe sebonani.' <sup>6</sup> Moġa lorinai ġia tu dia ruarua, senaġi sebona moġo. Moġesi nai Barau na etore-sebonarito tarimari tu, tarima ta na asi ma bene tore-kirari."

<sup>7</sup> Farisea tarimari na ġekiraiato, ġekirato, "Karase nai Mose na taravatu eveiato nai, ekirani, tau na veġaraġo ruġaruġana fefana betoreani vau, ġaraġona betuġu-rakaiani?"

<sup>8</sup> Iesu evaġa-veseto, ekirato, "Mose na maoro evinimito, ġaraġomi boġono tuġurakari ġana, korana ġomi vaġa-ribami tu gwaġiġi rakava nai. Senaġina Barau na dagara mabarari eveirito nai, maiġesina tu asiġina. <sup>9</sup> Akiramini: Deikara na ġaraġona, enabe asi eveġura-vanaġini, senaġi efitoġaiiani moġo, vavine ta ma beġaraġoani, ġia tu beveġura-vanaġini."

<sup>10</sup> Iesu ġena mero na ġekiraiato, ġekirato, "Veġaraġo dabarana mo-ġesina nai, tarimarima asi beġene veġaraġo tu namo banaġu." <sup>11</sup> Iesu evaġa-veseto, ekirato, "Mai vevaġa-riba maiġa tarimarima mabarari na asi beġe tuġamaġi-fakaiani, senaġi Barau na deikara tuġamaġi-faka evinirito tarimari moġo. <sup>12</sup> Tarimarima kotari asi ġeveġaraġoni, korana moġesi veġatana ġemaġurito sinari ġerina, be asi ilaila beġe veġaraġoni; ma kotari tu eunuko tauri kavari, (tarimarima na seuri ġefararini); ema kotari tu Guba Basileia o Barau vetuġunaġina beġene iaġo-vinia uranai asi ġeveġaraġoni."

### *Iesu na mero misiri evaġa-namorito*

#### *Mareko 10:13-16; Luka 18:15-17*

<sup>13</sup> Tarima kotari na naturi Iesu ġenai ġeġwa-iaġorito, ġimana ġia iatari ai bene tore-kauri, ema bene ġauġau ġana. Senaġina ġena mero na ġekira-ġoirito. <sup>14</sup> Iesu na ekirarito, ekirato, "Mani mero misiri ġeiaġoma au ġegu ai, asi ġokira-ġoiri, korana Guba Basileia tu maniġesina kavana tarimari ġeri." <sup>15</sup> Benamo Iesu ġimana iatari ai etore-kaurito, evaġa-namorito vau eiaġuirito.

*Tarima variḡuna ma ḡena farefare vovoka  
Mareko 10:17-31; Luka 18:18-30*

<sup>16</sup> ḡaro tai tau ta Iesu ḡenai eiaḡoto, ekirato, “Vevaḡa-riba tauna, kara dagara namona baveiani vau, maḡuri vanaḡivanaḡi baḡabiani?” <sup>17</sup> Iesu na evaḡa-veseato, ekirato, “Karase nai au odanaḡiguni, aiḡa tu dagara namona? Sebona moḡo namo, Barau. Bema ourani maḡuri vanaḡi-vanaḡi bono ḡabia nai, Barau ḡena taravatu bono korana-iaḡiri.” <sup>18</sup> ḡia na Iesu edanaḡiatio, ekirato, “Kamara taravatu okiraḡirini?” Iesu ekirato, “Asi bono vaḡivaḡi, asi bono veḡura-vanaḡi, asi bono lema, asi bono vevaḡa-bade ḡofaḡofa, <sup>19</sup> tamamu e sinamu bono gubakauri, e sevimu tarimana maki bono ura-vinia, ḡoi tauḡemu oveura-vinini kavana.” <sup>20</sup> Mai maraḡa variḡuna ekirato, “Au na mani taravatu mabarari akorana-iaḡirini. Kamara dagara tu au na ma bana veia?”

<sup>21</sup> Iesu na ḡia evaḡa-veseato, ekirato, “Bema ḡoi ourani bono iobukaiobuka nai, giniguine tu noiaḡo, ḡemu farefare mabarari bono voivoi-iaḡiri, be moniri tu asi ḡeri-ḡari tarimari bono viniri, benamo gubai tu ma ḡemu farefare. Gabivau murigu ai bonoma raka.” <sup>22</sup> Maraḡa variḡuna na maiḡa eseḡaḡiatio nai, nuḡana ma metona ḡesi eiaḡiatio, korana ḡia tu ma ḡena farefare ḡutuma tarimana.

<sup>23</sup> Iesu na ḡena mero ekirarito, ekirato, “Au na akira-korikorimini: Farefare vovoka tarimari ḡeri rakatoḡa Guba Basileia nuḡanai tu gwaḡiḡi rakava. <sup>24</sup> Ma akiramini: Kamela tu nila kadarena na bevanaḡini kotuna gwaḡiḡi, senaḡi ḡena farefare vovoka tarimana Barau ḡena Basileiai ḡena rakatoḡa tu gwaḡiḡi rakava.” <sup>25</sup> ḡena mero mai guruḡa ḡeseḡaḡiatio nai, ḡeḡaba-rakavato moḡo. Benamo ḡevedanaḡito, ḡekirato, “Be deikara na maḡuri vanaḡivanaḡi bedoḡariani?” <sup>26</sup> A Iesu na eḡita-karakararito, benamo evaḡa-veserito, ekirato, “Tarimarima ḡeri ai tu asi ilaila, senaḡi Barau ḡenai dagara mabarari tu ilaila.”

<sup>27</sup> Benamo Petero eguruḡa-fouto, ekirato, “ḡoi ribamu, ḡai ḡema dagara mabarari tu ḡaraga-kwanerito, benamo ḡoi murimu ai ḡarakani! Be ḡai kara baḡa ḡabini?” <sup>28</sup> Iesu na ekirarito, ekirato, “Moḡoni akiramini, tanobara variḡuna befoforini nai, Tarimarima Natuna ḡena terona o vere seana kimorekimorenai betanu-kauni, ma ḡomi gabanana ruarua (12) au murigu ai ḡorakani tarimami maki vere seari gabanana ruarua (12) ai boḡo tanukauni, Isaraela ḡena doḡoro gabanana ruarua (12) boḡo ḡita-ḡaurini, ema boḡo ḡori-kaurini. <sup>29</sup> Tarima ta na ḡena numa, kakana, tarina, tobana, tamana ma sinana e natuna, ema ḡena tano, au uragu ai beiaḡuirini nai, ḡia tu sinau-sinau ai dagara bedoḡarini, ema maḡuri vanaḡivanaḡi maki beḡabiani. <sup>30</sup> Senaḡina tarimarima ḡutuma toma ḡeguineni tu beḡe gabini, ema ḡutuma maki initoma ḡegabini tu beḡe guineni.”

## 20

*Barabore - ḡauvei tarimari vine tavoḡanai*

<sup>1</sup> “Guba Basileia tu maiḡesi kavana: Vine tavoḡana tarimana ta boḡiboḡi iamoiamo ai numa na eraka-rosito, ḡena vine tavoḡanai beḡene ḡauvei tarimari evetaurito. <sup>2</sup> Benamo ḡauvei tarimari ḡesi ḡeguruḡa-vegogoto ma ḡevaḡa-moḡoniatio, mo ḡauvei tarimari ḡaro sebona ta beḡe ḡauveini voiri silva monina sebona bevinirini ḡetato. Benamo ḡena vine tavoḡana nuḡanai etuḡu-iaḡorito. <sup>3</sup> Boḡiboḡi 9 koloko kavana ḡia ma eraka-rosito, maketi gabuna ḡana eiaḡoto, monai tarima kotari ḡeruḡa-reko rekoto-ḡoi eḡitarito. <sup>4</sup> Benamo ekirarito, ekirato, ‘Ḗomi maki ḡegu vine tavoḡana ḡana ḡoiaḡo, ḡoa ḡauvei, be voimi maorona bana vinimi.’ <sup>5</sup> Ḗia maki ḡeiaḡoto. Ḗaroḡota 12 koloko ma 3 koloko kavana ḡia numa na ma eraka-rosito, kotari ma edoḡaririto, etuḡurito. <sup>6</sup> Lavilavi rekenai 5 koloko kavana ma erakarosi-ḡenoḡoito, kotari roḡo mo ḡeruḡa-taḡoto-ḡoi nai edoḡaririto. Benamo edanaḡirito, ekirato, ‘Karase nai mainai ḡoruḡa-kava ruḡa-kavani mo, ḡaro mo evariḡoni?’ <sup>7</sup> Ḗia na ḡevaḡa-veseato, ḡekirato, ‘Korana tarima ta na ḡauvei asi evinimani nai.’ Benamo ekirarito, ‘Ḗomi maki ḡegu vine tavoḡana ḡana ḡoiaḡo, ḡoa ḡauvei.’

<sup>8</sup> Ġaro eboraiato-ġoi nai, tavoġa biaguna na ġauvei tarimari eġita-ġaurito-ġoi tauna ekiraiato, ekirato, ‘Ġauvei tarimari nokeari, be voiri noviniri, vau beġe ġauvei tarimari bono vini-guine, bene iaġo mo, bakea-guineri tarimari bono vini-raġasi. <sup>9</sup> Benamo mo lavilavi 5 koloko etuġurito tarimari ġeiaġoma-guineto, benamo silva moniri sebori-sebori ġeġabito. <sup>10</sup> Ġeiaġo-guineto tarimari ġeiaġomato nai, ġia matoru ġekirato tu, voiri kotari ma betore-kaurini, senaġi ġia maki silva moniri sebori-sebori moġo ġeġabito. <sup>11</sup> Ġeri moni ġeġabito nai, ġemugu-muguto tavoġa biaguna ġenai, <sup>12</sup> ġekirato, ‘Mai tarimarima gabivau ġeiaġomato maiġeri tu, hora sebonai moġo beġe ġauvei ma voiri, a ġai tu ġaro vinubana ġavekwaraġini, ma ġaro ġena seġuka na etunu-rakavamani, nuġanai voima ġia ġeri ġesi bovini-sebonama.’

<sup>13</sup> Tavoġa biaguna na ġia ta ekiraiato, ekirato, ‘Ġatagu, noseġaġi, au na ġoi asi baġofamu. Taguruġa-vegogoto nai, ġaro sebona voina tu silva monina sebona tatato, nene? <sup>14</sup> Mai moġo voimu noġabia, be noraka! Au aurani mai gabi tarimana bana vinia, ġoi baviniu ilailanai. <sup>15</sup> Be, au ma ġegu maoro, mai ġegu moni tu ġegu ura ilailani bana vini. Ba ġoi obaruni, korana au tu nuġagu ma iakuna ġesi avinini nai?’

<sup>16</sup> Iesu ġena guruġa evaġa-magoato nai ekirato, “Guine tarimari tu beġe gabini, ma gabi tarimari tu beġe guineni.”

*Iesu ġena mase ma ekiraġi-foforiato*

*Mareko 10:32-34; Luka 18:31-33*

<sup>17</sup> Iesu Ierusalemata dabarana na evaraġeto-ġoi nai, ġia na ġena mero gabanana ruarua (12) eġabi-ġere-vaġirito, veġuni ai evaġa-guruġarito, ekirato, <sup>18</sup> “Ġoseġaġi, ġita tu Ierusalemata ġana tavaġeni. Monai Tarimarima Natuna tu Rubu Veaġa vereri baregori ema taravatu vaġa-riba-iaġina tarimari ġimari ai beġe toreni. Ġia na ġena mase guruġana beġe vaġa-moġoniani, <sup>19</sup> benamo irau bese (o Roma) tarimari beġe vinirini, ġia na beġe vaseva-vaseva iaġiani, beġe kwariani e beġe vaġa-satauroani; senaġi ġaro vaġa-toitoinai vau ma bevaisiraġe-ġenoġoini.”

*Sina ta ġena noġinoġi*

*Mareko 10:35-45*

<sup>20</sup> Benamo Sebedaio ġaraġona ma natuna ruarua Iakobo (o Iames) ema Ioane ġesi Iesu ġenai ġeiaġoto, ġoiranai ea vetui-tarito, dagara ta nenoġia ġana. <sup>21</sup> Benamo Iesu na vavine edanaġiato, ekirato, “Ġoi kara ourani?” Ġia evaġa-veseto, ekirato, “Nokiravaragu, au natugu tauri ruarua iniġeri, ġoi ġesi beġeneasi tanu, ta aroribamu ai, ma ta kaurimu ai ġemu Basileia nuġanai.” <sup>22</sup> A Iesu na evaġa-veserito, ekirato, “Ġomi tu asi ribami kara ġonoġiani. Au na midigu bedina banianuani ġomi maki boġo niuni riba?” Ġia ġevaġa-veseto, ġekirato, “Oi, baġa niuani.” <sup>23</sup> Iesu na ma ekirarito, ekirato, “Moġoni, au ġegu bedi na ġomi maki boġo niuni, senaġi au aroribagu rekenai o kaurigu ai boġono tanu ġotoni tu, dia au na bavaġa-moġoniani; a mai tu au Tamagu na eġabi-torerito tarimari ġeri.”

<sup>24</sup> Mero gabanana (10) na maiġa ġeseġaġiato nai, tarikaka ruarua Iakobo (o Iames) ema Ioane ġebaru-vinirito. <sup>25</sup> Benamo Iesu na mabarari ekea-vegogorito, benamo evaġa-guruġarito, ekirato, “Ġomi ribami, irau bese tarimari ġeri vere na tarimarima ġedori-naġinaġirini, ema ġeri veguine-iaġi tarimari baregori na tu ġeri maoro seġukari na ġelaunaġi-naġirini. <sup>26</sup> Senaġi ġomi fakami ai moġesina tu asi boġono vei. Bema ta ġomi fakami ai bene barego etoni nai, ġia tu ġomi mabarami vetuġunaġimi bene iaġovini, <sup>27</sup> ema dei bene guine etoni tarimana, ġia tu ġemi vetuġunaġi tarimanai bene iaġo. <sup>28</sup> Tarimarima Natuna kavana, ġia eiaġomato tu, dia tarimarima na ġia vetuġunaġina beġene iaġovini ġana, senaġina ġia eiaġomato tu, tarimarima vetuġunaġiri bene iaġovini, ema ġena maġuri bene tore-taria, tarimarima ġutuma bene voi-ġenoġoiri e bene vaġa-maġuriri ġana.”

*Iesu na mata-bubu tarimari ruarua evaġa-namorito*

*Mareko 10:46-52; Luka 18:35-43*

<sup>29</sup> Iesu ma ġena mero ġesi Ieriko ġeraga-kwaneato, tarimarima ġutuma-bara ġia murina na ġeiaġoto. <sup>30</sup> Mata-bubu tarimari ruarua dabara rikinai ġetanu-taġoto-ġoi, ġeseġaġito Iesu eraka-vanaġito, benamo ġekea-fouto, ġekirato, “Vereġauka o, Davida natuna, ġai novetuġama!” <sup>31</sup> Tarimarima na ġekira-ġoirito, asi beġene guruġa ġetato, senaġi ġia ġekea-ġiġiraġe ġiġiraġeto-ġoi, “Vereġauka, Davida Natuna o, ġai novetuġama!” <sup>32</sup> Iesu eruġa-tarito, benamo ekea-iaġomarito, ekirato, “Kara ġemi naveia ġotoni?” <sup>33</sup> Ġia na ġekiraiato, ġekirato, “Vereġauka, ġai ġaurani tu, matama noma keo-fakari!” <sup>34</sup> Benamo Iesu na evetuġa-ġwarito, matari eġabi-kararito, ma asikauna matari ġenamoto e ġeboġeboġe-ginikauto, benamo Iesu murina na ġeiaġoto.

## 21

*Iesu ġena rakatoġa Ierusalemaj ġevonevone-raġe viniato*

*Ioane 12:12-19*

<sup>1</sup> Iesu ma ġena mero ġesi ġeraka-iaġoto-ġoi, Ierusalemaj ġekavinaġiato-ġoi, ma Betefage ai ġeraġasito Olive Ġorona rekenai, benamo Iesu na ġena mero ruarua etuġu-guinerito, <sup>2</sup> ekirarito, ekirato, “Ġoiaġo, ġoira vanuġana ġana. Monai doniki ta barutari ma natuna ġesi boġo doġaririni, boġono ruġari, benamo au ġegu ai boġono ġori-iaġomari. <sup>3</sup> Bema tarima ta na bedanaġimini nai, boġono kiraia, ‘Vereġauka na eura-vinirini, vau ma betuġu-iaġomarini, asi bekwaiiboni.’” <sup>4</sup> Maiġa eġorato ġenana, peroveta tauna ġena guruġatore guruġana evaġa-moġoniani, ekirani, <sup>5</sup> “Siona natuna, (Ierusalemaj tarimari), nokirari, ‘Noġitaia, ġemu Vere mani eiaġomani, manau tarimana, doniki tuġunai eraġeni, mai tu doniki natuna doġenai betanukau.’”

<sup>6</sup> Mai mero ruarua ġeiaġoto, Iesu na ekirarito veiġana ilailanai ġeveiato. <sup>7</sup> Ġia na doniki ma natuna ġesi Iesu ġenai ġeġori-iaġorito, ġeri dabuġa barari doniki doġeri ai ġeiava-kaurito, benamo Iesu etanu-kauto. <sup>8</sup> Tarimarima ġutuma-bara ġeri dabuġa barari dabarai ġeiavarito, kotari tu ġau legari ma lauri ġesi ġebasito, benamo dabarai ġeiavato. <sup>9</sup> Tarimarima ġutuma-bara ġia ġoiranai ġerakato e murinai ġerakato, maiġesina ġevone-raġeto-ġoi, ġekirato, “Hosana, Davida natuna ġena! Vereġauka aranai eiaġomani tarimana sivaġa-namoal! Hosana guba tuġuna vanigerenai!”

<sup>10</sup> Iesu Ierusalemaj eraka-toġato nai, vanuġa tarimarimari mabarari ġeveraga veragato-ġoi ema ġevedanaġi-vedanaġito-ġoi, ġekirato, “Mai tu deikara?” <sup>11</sup> Iesu ġesi ġeraka-sebonato tarimari ġevaġa-veseto, ġekirato, “Mai tu Iesu, peroveta tauna, Galilea vanuġana Nasareta na eiaġomani.”

*Iesu na Rubu Veaġa eiarevaiato*

*Mareko 11:15-19; Luka 19:45-48; Ioane 2:13-22*

<sup>12</sup> Iesu Rubu Veaġa nuġanai eraka-toġato, benamo voivoi tarimari mabarari elai-rosirito. Moni ġesenisito-ġoi tarimari ġeri fata e pune ġevoivoi iaġirito-ġoi tarimari ġeri diġoka eġuke-vebuburito, <sup>13</sup> ema ekirarito, ekirato, “Buka Veaġa nuġanai tu maiġesi etoreato, Barau ekirato, ‘Au ġegu numa tu bese irauirau ġeri ġuriġuri numanai beġe kiraġiani,’ senaġi ġomi na tu lema tarimari ġeri gumu gabunai boġo vaġa-iaġoa.”

<sup>14</sup> Mata-bubu e kwaku rakava tarimari Iesu ġenai ġeiaġomato Rubu Veaġa nuġanai, benamo ġia na evaġa-namorito. <sup>15</sup> Rubu Veaġa vereri baregori e taravatu ġevevaġa-riba iaġiato-ġoi tarimari na ġena nuġa-farevaġi veiġari ġeġitarito, ema mero misiri garori ġeseġaġirito, Rubu Veaġa nuġanai ġevone-raġeto-ġoi, ġekirato, “Hosana, Davida natuna ġena,” benamo ġia tu ġebaru-rakavato, <sup>16</sup> benamo Iesu ġedanaġiato, ġekirato,

“Ĝia na ini kara ĝekiraĝirini ne oseĝaĝirini ba?” Iesu na evaĝa-veserito, ekirato, “Oi aseĝaĝini, senaĝi ĝomi na Buka Veaĝa nuĝanai asi ĝoiaviani, ‘Mero misiri ema sinari ratari roĝo ĝeniurini merori na maki ĝoi ĝevaĝa-raĝemuni!’” <sup>17</sup> Benamo Iesu na eraga-kwanerito, vanuĝa barana na eraka-rosito, Betania ĝana eiaĝoto, monai ea genato.

*Iesu na figi ĝauna etovoĝaiato*

*Mareko 11:12-14; 11:20-24*

<sup>18</sup> Boĝiboĝi, Iesu vanuĝa barana ĝana ma eĝenoĝoito, eraka-iaĝoto-ĝoi nuĝanai, ĝia evitoato. <sup>19</sup> Ĝia na figi ĝauna ta dabara rikinai eĝitaiato, benamo eiaĝo-viniato, senaĝi asi ĝwaĝwana, a launa korina moĝo. Benamo Iesu na figi ĝauna ekiraiato, ekirato, “Ĝoi ĝemuna ĝwaĝwamu asi ma befofori-ĝenoĝoini!” Asikauna moĝo figi ĝauna emarai-ĝosito.

<sup>20</sup> Ĝena mero na figi ĝauna emarai-ĝosito ĝeĝitaiato nai, ĝeĝaba-rakavato, ĝekirato, “Figi ĝauna tu kamasi se beraga-mase moĝo?” <sup>21</sup> Iesu evaĝa-veseto, ekirato, “Moĝoni akiramini, bema ĝomi boĝo veĝabidadamani, ma asi boĝo daradarani nai, ĝomi na maki mai figi ĝauna ĝenai baveia kavana boĝo veiani riba; a dia moĝa moĝo, senaĝi mai ĝoro boĝo kiraiani, ‘Noveĝabivaisi, be davarai noa vefiu-rei,’ benamo mo veiĝa tu beĝorani. <sup>22</sup> Dagara mabarari ĝauĝau ai boĝo kiraĝirini ma veĝabidadamami ĝesi nai tu, boĝo doĝaririni.”

*Iesu ĝena seĝuka korana ĝevedanaĝi-iaĝiato*

*Mareko 11:27-33; Luka 20:1-8*

<sup>23</sup> Iesu Rubu Veaĝa nuĝanai eraka-toĝato, evevaĝa-ribato-ĝoi nai, Rubu Veaĝa vereri baregori ema luda vereri ĝia ĝenai ĝeiaĝomato, benamo ĝedanaĝiato, ĝekirato, “Kamara seĝukai ĝoi na mai veiĝa oveirini? Dei na maoro evinimuto?”

<sup>24</sup> Iesu na evaĝa-veserito, ekirato, “Au na maki vedanaĝi sebona avinimini; bema boĝo vaĝa-veseani nai, au na kamara maoro ai mai veiĝa aveirini bakira-varamini. <sup>25</sup> Ioane ĝena babatise veiĝana tu ainana eiaĝomato? Guba na eiaĝomato, ba tarimarima ĝerina?” Ĝia fakari ai ĝeverorito, ĝekirato, “Bema ĝita bita kirani, ‘Barau ĝenana’ bita toni nai, ĝia bekirani ‘Karase nai Ioane asi ĝovaĝa-moĝoniato?’ betoni. <sup>26</sup> Senaĝi bema ĝita bita kirani, ‘Tarimarima ĝerina’ bita toni nai, tarimarima gariri bitana vei, korana ĝia ribari, Ioane tu peroveta tarimana korikori.” <sup>27</sup> Moĝa lorinai ĝia na Iesu ĝevaĝa-veseto, ĝekirato, “Ĝai asi ribama.” Benamo Iesu na ĝia ekirarito, “Au na maki kamara maoro ai mai veiĝa aveirini tu, asi bakira-varamini.”

*Barabore - Mero ruarua*

<sup>28</sup> “Mai barabore tu kamasi ĝotuĝa-maĝiani? Tarima ta ma natuna ruarua. Tau-guinena ĝenai eiaĝoto, ekiraiato, ekirato, ‘Natugu, toma noiaĝo, vine tavoĝanai noa ĝauveil’ <sup>29</sup> Natuna na evaĝa-veseto, ekirato, ‘Asi aurani,’ senaĝina gabivau evetuĝa-maĝi-kureto, benamo eiaĝoto. <sup>30</sup> Ĝia ma eiaĝoto natuna vaĝa-ruaruana ĝenai, tau-guinena evaĝa-guruĝaiato ilailanai ekiraiato. Mero evaĝa-veseto, ekirato, ‘Aiaĝoni,’ senaĝi asi eiaĝoto. <sup>31</sup> Ĝia tauri ruarua vekaravari ai dei na tu tauri ĝena ura eveiato?” Ĝia ĝevaĝa-veseto, ĝekirato, “Tau-guinena.” Iesu na ekirarito, “Moĝoni veĝata akiramini, takesi gogo tarimari e mata-boraĝa vavineri na ĝeguine-iaĝimini Barau ĝena Basileia rakatoĝanai. <sup>32</sup> Ioane Babatise ĝomi ĝemi ai eiaĝomato tu, vei-iobukaiobuka dabarana ĝemi ai evaĝa-foforiato, senaĝi asi ĝoseĝaĝi-viniato. A takesi gogo tarimari e mata-boraĝa vavineri na ĝevaĝa-moĝoniato. Ĝomi na maki ĝoĝitarito, senaĝi asi ĝovetuĝamaĝi-kureto, asi ĝovaĝa-moĝoniato.”

*Barabore - Tavoĝa narinarina tarimari rakavari*

*Mareko 12:1-12; Luka 20:9-19*

<sup>33</sup> Iesu ekirato, “Barabore ta ma ĝoseĝaĝia: Tano biaguna ta na vine tavoĝana evaroato, maĝuna eĝabiato, tano ai vine gigi-gigina gurina ekwaiato, tavoĝa narinarina numana maki evaĝa-ruĝaiato. Moĝa murinai tavoĝa ĝitaĝauna tarimari ĝeri ai ĝena

tavoḡa eraga-kwaneato, benamo erakato gabu ta ḡana. <sup>34</sup> Vine ḡwari (o grapes) ḡemaḡeto, benamo ḡia na ḡena vetuḡunaḡi tauri etuḡurito tavoḡa narinarina tarimari ḡeri ai, ḡena vine ḡwaḡwari kota beḡenea ḡabi ḡana. <sup>35</sup> Senaḡi tavoḡa ḡitaḡauna tarimari na vetuḡunaḡi tauri ḡeḡabi-taririto, benamo ta ḡekwariato, ma ta ḡevaḡiato, ema ta fore na ḡetakiato. <sup>36</sup> Tavoḡa biaguna na ḡena vetuḡunaḡi tauri vovoka kotari ma etuḡurito, senaḡi moḡesina ma ḡevei-vinirito. <sup>37</sup> Dokonai ḡia na natuna korikori ḡeri ai etuḡu-iaḡoato, ekirato, 'Natugu na-tuḡua, ḡia na beḡene gubakaua.' <sup>38</sup> Senaḡi tavoḡa ḡitaḡauna tarimari natuna ḡeḡitaiato nai, tauḡeri ḡeveguruḡa-vevinito, ḡekirato, 'Mani tu tavoḡa beḡaunaiani merona, be siḡabia, sivaḡi-masea, be ḡena tavoḡa bitana ḡaunaia!' <sup>39</sup> Benamo ḡeḡabi-tariato, vine tavoḡana murikanai ḡeinu-iaḡoato, ḡevaḡi-maseato."

<sup>40</sup> Iesu evedanaḡito, ekirato, "Tavoḡa biaguna beiaḡomani nai, mo tavoḡa ḡitaḡauna tarimari kamasi beveirini?"

<sup>41</sup> ḡia ḡevaḡa-veseto, ḡekirato, "Mo veiḡa rakava tarimari ḡia na bevaḡirini veḡata, ma vine tavoḡana tu narinarina tarima boruri tari ma bevinirini, benamo ḡeri ḡwaḡwa negari ai, ḡwaḡwari ḡia ḡenai beḡene ḡwa-iaḡori."

<sup>42</sup> Iesu na ma ekirarito, ekirato, "Ḗomi na mai toretore Buka Veaḡai asi ḡoiaviani, iniḡesi ekirani, 'Fore numari ḡeragarini tarimari na asi ḡeura-viniato ma ḡefitoḡaiato forena tu duḡu forenai eiaḡoto. Mai veiḡa maiḡa tu Vereḡauka na eveiato, matara na taḡitaiani, ḡitaḡitana irau veḡata.'

<sup>43</sup> Moḡesi naima akiramini, Barau ḡena Basileia tu ḡemina beḡabi-vaḡiani, ema ḡwaḡwa evaḡa-ḡorani besena beviniani. [<sup>44</sup> Deikara mo fore iatanai beketokauni tarimana tu, beḡwa-kirakiraiani; ema mai fore tarima ta iatanai beketokauni nai, bevare-fatafataiani.]"

<sup>45</sup> Rubu Veaḡa vereri baregori e Farisea tarimari na Iesu ḡena barabore ḡeseḡaḡirito nai, ḡeribato, Iesu na tu ḡia ekiraḡirini, <sup>46</sup> naima ḡia ḡeri ura tu beḡene ḡabi-taria. Senaḡi tarimarima ḡutuma ḡevegogo taḡoto-ḡoi gariri ḡeveito, korana ḡia na ḡetuḡamaḡiato-ḡoi, Iesu tu peroveta tauna ta.

## 22

### *Barabore - Veḡaraḡo verekona*

<sup>1</sup> Iesu na Iuda vereri ḡeri barabore ta ma ekiraḡiato: <sup>2</sup> "Guba Basileia tu noḡa moḡo vere ta, natuna ḡena veḡaraḡo verekona evei-toreato kavana. <sup>3</sup> Benamo ḡena vetuḡunaḡi tarimari etuḡurito, ekea-kaurito tarimari keakeari, senaḡi asi ḡeurato nai, asi ḡeiaḡomato. <sup>4</sup> Moḡa lorinai ḡia na vetuḡunaḡi tarimari tari ma etuḡurito, ekirarito, 'Akea-kaurito tarimari ḡoa kirari, "Au ḡegu vereko tu badabara-ḡosia, ḡegu boromakau tauri ema boromakau naturi mona mase tu bavaḡiri, dagara mabarari bavei-toreri, be ḡoiaḡoma vereko ḡana." ' <sup>5</sup> Senaḡi ḡia tu ḡeḡoiaḡito, ḡeri ura ḡauveiri moḡo ḡeveito. Ta vamoka ḡana eiaḡoto, ma ta tu ḡena sitoa ḡana eiaḡoto. <sup>6</sup> O tari tu vetuḡunaḡi tarimari ḡeḡabi-taririto, ḡekwaririto, ema ḡevaḡi-maserito.

<sup>7</sup> Vere tu ebaru-rakavato, ḡena vetari doḡorori etuḡurito, mo vaḡivaḡi tarimari ḡevaḡi-maserito, ma ḡeri vanuḡa barana ḡegabu-kauato. <sup>8</sup> Benamo ḡia na ḡena vetuḡunaḡi tarimari evaḡa-guruḡarito, ekirato, 'Au ḡegu veḡaraḡo verekona tu bavei-torea, senaḡi au na akea-kaurito tarimari tu asi ilaila beḡe iaḡomani. <sup>9</sup> Moḡa lorinai mai moḡo ḡoiaḡo, ḡatama baregori rakaḡutu dabarari ai boḡo doḡaririni tarimari mabarari boḡono kirari, beḡene iaḡoma vereko ḡana.' <sup>10</sup> Benamo vetuḡunaḡi tarimari ḡeiaḡoto, ḡatamai ema dabarai ḡedoḡaririto tarimari mabarari, namori, rakavari, ḡegogo-iaḡorito, veḡaraḡo numana maki ḡevaḡa-vonuato.

<sup>11</sup> Benamo vere eraka-toḡato, ḡeiaḡomato tarimari ḡitaḡitari nuḡanai, ḡia na tarima ta monai eḡitaiaato, asi ḡena veḡaraḡo dabuḡana. <sup>12</sup> Benamo edanaḡiato, ekirato, ‘Gata, ḡoi tu ainana boraka-toḡa, asi ḡemu veḡaraḡo dabuḡana?’ Senaḡi mo tarima asi eguruḡato. <sup>13</sup> Benamo vere na ḡena vetuḡunaḡi tarimari evaḡa-guruḡarito, ekirato, ‘Gimana ema kwakuna ḡobarubaruri, benamo ḡofiu-rosia murika mukunanai. Monai bene taḡi, gadikana maki bene vaḡa-ḡaratariri.’ <sup>14</sup> Korana tarima ḡutuma Barau na ekearito, senaḡi viravira moḡo eḡabi-torerito maḡuri beḡe ḡabiani.”

*Kaisara, Roma ḡeri vere, ḡena takesi moniri*

*Mareko 12:13-17; Luka 20:20-26*

<sup>15</sup> Farisea tarimari ḡeraka-veḡitato, ḡeboioḡa-vegogoto, Iesu beḡene vaḡa-vedaḡa-raḡea vedanaḡiri ḡea veito. <sup>16</sup> Benamo ḡia na ḡeri mero tari ema Heroda murinai ḡerakato-ḡoi tarimari tari ḡetuḡu-iaḡorito, ḡekirato, “Vevaḡa-riba tarimamu, ḡai ribama ḡoi tu moḡoni vei-iobukaiobuka tarimamu. ḡoi na moḡoni ai Barau ḡena dabara ovevaḡa-riba iaḡi-ḡitakauani. Tarimarima gariri asi oveini, tarima ḡeri dagi maki asi otuḡamaḡirini. <sup>17</sup> Moḡa lorinai nokira-varama, kamasi otuḡa-maḡini: Kaisara, Roma ḡeri vere, ḡenai takesi baḡana vini ba asiḡi?”

<sup>18</sup> Senaḡi Iesu ma ribana ḡeri boioḡa rakavari nai, ekirarito, “ḡomi ḡofaḡofa tarimami! Karase nai au ḡoribaḡaniguni? <sup>19</sup> Takesi monina ta ḡovinigu, nama ḡitaia!” Benamo silva monina ta ḡeviniato. <sup>20</sup> Benamo ḡia na edanaḡirito, ekirato, “Mai tu dei laulauna ema dei arana?” <sup>21</sup> ḡia ḡevaḡa-veseto, “Kaisara ḡena.” Iesu na evaḡa-guruḡarito, ekirato, “Be, Kaisara ḡena dagara Kaisara boḡono vinia, Barau ḡena dagara Barau boḡono vinia.”

<sup>22</sup> Mo guruḡa ḡeseḡaḡiato nai, ḡeḡaba-rakavato, benamo ḡeraga-kwaneato, ḡerakato.

*Variḡisi-ḡenoḡoi guruḡari*

*Mareko 12:18-27; Luka 20:27-40*

<sup>23</sup> Mo ḡaro sebonai Sadukea tarimari kota Iesu ḡenai ḡeiaḡoto. ḡia ḡeri tuḡamaḡi tu mase tarimari asi ma beḡe variḡisi-ḡenoḡoini. Benamo Iesu ḡedanaḡiato, ḡekirato, <sup>24</sup> “Vevaḡa-riba tarimamu, Mose maiḡesi ekirato, ‘Bema tau ta asi natuna bemaseni nai, ivana vabuna kakana o tarina ta na bene ḡaraḡoa, naturi beḡene maḡuri mase tauna ḡena.’ <sup>25</sup> Mero mabarari tu imaima ruarua (7) mainai ḡetanuto-ḡoi. Mero guinena na eḡaraḡoato, ma emaseto asi natuna, benamo tarina na ma eḡaraḡoato. <sup>26</sup> Mo veiḡa sebona tarina vaḡa-ruaruana ḡenai eḡorato, mero vaḡa-toitoina maki moḡesina moḡo mo vaḡa-imaima ruaruana (7). <sup>27</sup> Dokonai mo vavine maki emaseto. <sup>28</sup> Variḡisi-ḡenoḡoi ḡaronai mo vavine tu dei ḡaraḡona? Korana ḡia tu tauri 7 na ḡeḡaraḡoato.”

<sup>29</sup> Iesu na evaḡa-veserito, ekirato, “ḡomi tu ḡokerereni, korana Buka Vevaḡa anina ema Barau ḡena seḡuka asi ribami. <sup>30</sup> Mase na ma beḡe variḡisi-ḡenoḡoini tarimari tu asi ma beḡe veḡaraḡoni. ḡia tu aneru kavana gubai. <sup>31</sup> A mase na ma beḡe variḡisi-ḡenoḡoini guruḡari Barau ḡena bukai asi ḡoiaviani? ḡia ekirato, <sup>32</sup> ‘Au tu Aberahamo ḡena Barau, Isako ḡena Barau, ema Iakobo ḡena Barau.’ ḡia tu maḡuri tarimari ḡeri Barau, dia mase tarimari ḡeri Barau!” <sup>33</sup> Tarimarima ḡutuma na mo guruḡa ḡeseḡaḡiato nai, nuḡari ḡefarevaḡito ḡena vevaḡa-riba guruḡari na.

*Veuravini tu taravatu mabarari evanaḡirito*

*Mareko 12:28-31; Luka 10:25-28*

<sup>34</sup> Farisea tarimari ḡeseḡaḡito, Iesu na Sadukea tarimari ḡeri guruḡa ekou-ḡaurito, benamo ḡeraka-vegogoto. <sup>35</sup> ḡia fakari ai ta tu taravatu vaḡa-riba-iaḡina tarimana. ḡia na Iesu edanaḡi-veribaḡaniato, ekirato, <sup>36</sup> “Vevaḡa-riba tarimamu, taravatu nuḡanai kamara taravatu tu barego vedaurea?” <sup>37</sup> Iesu na evaḡa-veseato, ekirato, “‘Vereḡauka ḡoi ḡemu Barau bono ura-vinia ma nuḡamu mabarana, ma iaukamu mabarana, ma ḡemu tuḡamaḡi mabarana ḡesi.’ <sup>38</sup> Maiḡa tu taravatu giniginena ema barego vedaureana. <sup>39</sup> Taravatu barego vedaureari vaḡa-ruaruana ḡia ilailana tu maiḡa: ‘Sevimu tarimana



bono ura-vinia, ȳoi tauȳemu oveura-vinini kavana! <sup>40</sup> Maiȳeri taravatu ruarua na taravatu mabarari ema peroveta tarimari ȳeri guruȳa mabarari eȳabi-vegogorini.”

*Keriso tu Davida natuna ba Barau Natuna?*  
*Mareko 12:35-37; Luka 20:41-44*

<sup>41</sup> Farisea tarimari ȳevegogoto-ȳoi nai, Iesu na edanaȳirito, ekirato, <sup>42</sup> “ȳomi na Keriso tu aiȳesi ȳotuȳa-maȳiani? ȳia tu deikara natuna ȳotoni?” ȳia ȳevaȳa-veseto, ȳekirato, “ȳia tu Davida natuna.”

<sup>43</sup> Iesu na ma edanaȳirito, ekirato, “Davida tu kamasi nai Keriso tu ‘Vereȳauka’ etoni? Korana Davida Iauka Veaȳa na tuȳamaȳi-faka e riba eviniato, benamo ekirato,

<sup>44</sup> ‘Barau na au ȳegu Vereȳauka ekiraiato:

Au ȳimagu aroribana rekenai  
noma tanu,

bene iaȳo mo, ȳoi ȳebaru-vinimuni tarimari ȳoi kwakumu gaburenai batorerini.’

<sup>45</sup> Bema Davida na Keriso tu ‘Vereȳaukana’ ekiraȳito, kamasi nai Keriso tu Davida natuna?” <sup>46</sup> ȳia mabarari ta na maki asi evaȳa-veseato, ema mo nega na eiaȳoto mo, tarima ta na maki asi ma edanaȳiato, korana ȳegarito nai.

## 23

*Iesu na taravatu vaȳa-riba-iaȳina tarimari ema Farisea tarimari evanerito*  
*Mareko 12:38-39; Luka 11:43; 11:46; 20:45-46*

<sup>1</sup> Iesu na tarimarima ȳutuma-bara e ȳena mero evaȳa-guruȳarito, ekirato, <sup>2</sup> “Taravatu vaȳa-riba-iaȳina tarimari e Farisea tarimari na Mose ȳena taravatu ȳevevaȳa-riba iaȳirini. <sup>3</sup> Moȳa lorinai ȳomi ȳevaȳa-ribamini guruȳari mabarari boȳono korana-iaȳiri e boȳono veiri. A ȳeri veiȳa asi boȳono tovtovori, korana kara ȳeȳobata-iaȳirini, tarimarima na beȳene veiri veiȳari tu, tauȳeri na asi ȳekorana-iaȳirini. <sup>4</sup> ȳia na maruna metori tarimarima ȳevaȳa-faȳarini, senaȳina ȳimari didiri na ta maki ȳeri marunai asi ȳeveȳabikauni, asi ȳevaȳa-kavarini, maruna beȳene ȳwari ȳana. <sup>5</sup> ȳeri veiȳa mabarari ȳeveirini tu, tarimarima na beȳene ȳitari ȳana. ȳia bakuri e ȳimari ai tu dagara veaȳari ȳebarubarurini, nuȳari ai Buka Veaȳa siriri ȳeȳurarini, moȳeri dagara ȳevaȳa-baregorini, ema ȳeri dabuȳa geveri maki ȳevaȳa-maukarini. <sup>6</sup> ȳanivegogo gaburi ai e rubu nuȳari ai ȳeri ura tanutanu namori ai beȳene tanu. <sup>7</sup> ȳia ȳeurani maketi gaburi ai beȳene rakaorakao, tarimarima na beȳene vaȳa-namori urari ai, ema tarimarima na ‘Vevaȳa-riba Tarimari’ beȳene kiraȳiri.

<sup>8</sup> A ȳomi tu ‘Vevaȳa-riba Tarimami’ ai asi beȳene kiraȳimi, korana Barau ȳereȳana moȳo ȳemi Vevaȳa-riba Tauna, ema ȳomi mabarami tu tarikaka. <sup>9</sup> Ema tanobarai tarima ta ‘Tama’ asi boȳono kiraȳia, korana ȳomi Tamami tu sebona moȳo, ȳia tu gubai etanuni. <sup>10</sup> ȳomi maki ‘Veȳori-kau Tarimami’ asi beȳene kiraȳimi, korana ȳemi Veȳorikau Tauna tu sebona moȳo, Keriso, (Barau na ekiraȳi-toreato vevaȳa-maȳuri tauna). <sup>11</sup> Deikara barego vedaurea ȳomi fakami ai, ȳia tu ȳomi vetuȳunaȳimi beiaȳo-vinini. <sup>12</sup> Tauȳena eveȳabi-vaisini tarimana tu Barau na bevaȳa-manauani, a tauȳena evevaȳa-manauani tarimana tu beȳabi-vaisiani.”

*Iesu na Farisea tarimari e taravatu vaȳa-riba-iaȳina tarimari ȳeri ȳofaȳofa ekiraȳirito*  
*Mareko 12:40; Luka 11:39-52; 20:47*

<sup>13</sup> “Taravatu vaȳa-riba-iaȳina tarimami e Farisea tarimami, ȳofaȳofa tarimami, vetuȳami kika! Korana Guba Basileia ȳatama bokana tu tarimarima ȳoirari ai ȳokou-ȳauani. ȳomi tauȳemi asi boȳo raka-toȳani, ema ȳeraka-toȳa ȳetoni tarimari ȳeri dabara maki ȳomi na ȳokourini. [<sup>14</sup> Taravatu ȳovevaȳa-riba iaȳiani tarimami e Farisea tarimami, ȳofaȳofa tarimami, vetuȳami kika! ȳomi na vabu ȳeri numa e ȳeri farefare ȳovaȳa-koririni. ȳemi ȳauȳau tu mauka kenene, ȳoȳofaȳofani. Moȳesi nai ȳomi tu meto barego vedaurea boȳo ȳabiani.]

<sup>15</sup> Taravatu vaḡa-riba-iaḡina tarimami e Farisea tarimami, ḡofa-ḡofa tarimami! Ḡomi gabu mabarari ḡana ḡoiaḡoni, davarai e tanobarai, tarima sebona kwariḡutu ḡemi doḡoro ai bene raka-toḡa uranai. Ḡoḡabiani, benamo karava eḡara-vanaḡi vanaḡini gabuna natunai ḡovaḡa-iaḡoani, ḡemi kira-sirivaḡi e seḡafore maki bevanaḡi-lelevaḡirini.

<sup>16</sup> Veḡorikau taumi, matami bubuḡau, vetuḡami kika! Ḡemi vevaḡa-ribai ḡokirani, Rubu Veaḡa aranai bekiraḡi-toreni tarimana ḡena kiraḡitore tu asi anina ḡotoni, a Rubu Veaḡa golona (o gold-na) aranai bekiraḡi-toreni tauna tu, ḡena kiraḡitore roḡo bekorana-iaḡiani. <sup>17</sup> Babo e mata-bubu tarimami! Aiḡa tu barego, golo ba golo evaḡa-veaḡaiani Rubu Veaḡana? <sup>18</sup> Ma ḡokirani, fata veaḡana aranai bekiraḡi-toreni tarimana ḡena kiraḡitore tu asi anina, a varevare dagarana fata veaḡana iatanai ḡetoreato dagarana aranai bekiraḡi-toreni tarimana tu ḡena kiraḡitore roḡo bekorana-iaḡiani. <sup>19</sup> Mata-bubu taumi. Aiḡa tu barego, varevare dagarana ba varevare dagarana evaḡa-veaḡaiani fata veaḡana? <sup>20</sup> Moḡa lorinai fata veaḡa aranai ekiraḡi-toreni tarimana na fata veaḡa e fata veaḡa iatanai ḡetorerito dagarari mabarari arari ai ekiraḡi-toreni. <sup>21</sup> Ema Rubu Veaḡa aranai ekiraḡi-toreni tarimana na Rubu Veaḡa ema nuḡanai etanuni Barauna arari ai ekiraḡi-toreni. <sup>22</sup> Ema guba aranai ekiraḡi-toreni tarimana na Barau ḡena terona e iatanai etanuni Barauna arari ai ekiraḡi-toreni.

<sup>23</sup> Taravatu vaḡa-riba-iaḡina tarimami e Farisea tarimami, ḡofaḡofa tarimami, vetuḡami kika! Korana ḡomi na Barau ḡovarevare-viniani dagarari, ḡemi ḡaniḡani ḡailauri misimisiri maki, karava gabanana (10) ḡoveirini, karava sebona boubou dagaranaḡi ḡovaḡa-iaḡoani, senaḡina taravatu ḡena dagara baregori, vei-iobukaiobuka, vevetuḡaḡwa ema vetuḡamaḡikau tu ḡolearini. Ḡomi na tu maiḡeri veiḡa baregori ḡoro veiri ema mo veiḡa keiri maki asi boḡoro iaḡuiri. <sup>24</sup> Veḡorikau tarimami, matami bubu! Ḡami nanu na nagama ḡovei-vaḡiani, senaḡina kamela tu ḡolauboḡerini.

<sup>25</sup> Taravatu vaḡa-riba-iaḡina tarimami e Farisea tarimami, ḡofaḡofa tarimami, vetuḡamai kika! Ḡomi ḡemi kapusi e mereki muriri moḡo ḡoḡuriḡirini, senaḡi nuḡari tu lema e mata-ḡaniḡani ḡoveini dagarari na beḡe vonuvonu-raḡe. <sup>26</sup> Farisea tarimami, matami bubu! Kapusi e mereki nuḡari ai ḡotorerini dagarari boḡono iareva-guineri, benamo murina rekena maki bene veiareva.

<sup>27</sup> Taravatu vaḡa-riba-iaḡina tarimami e Farisea tarimami, ḡofaḡofa tarimami, vetuḡami kika! Ḡomi tu gara gaburi ḡefeni-kuro-kurorito kavana, murikari ḡitaḡitari tu namo vedaurea, senaḡina nuḡari tu mase tarimari turiḡari ema miro mabarari na ḡevonuto. <sup>28</sup> Ḡomi maki moḡesina, tarimarima na ḡeḡitamini veiḡa iobukaiobuka tarimari noḡa, senaḡina nuḡami tu ḡofaḡofa e vei-rakava na ḡevonuvonu-raḡeto.”

*Iesu na taravatu vaḡa-riba-iaḡina tarimari e Farisea tarimari ḡeri kerere voiri ekiraḡirito*

<sup>29</sup> “Taravatu vaḡa-riba-iaḡina tarimami e Farisea tarimami, ḡofaḡofa tarimami, vetuḡami kika! Ḡomi na peroveta tarimari ḡeri gara gaburi ḡovei-ginikaurini, tuḡamaḡi-iaḡina foreri ḡovaḡa-ruḡarini, ema vei-iobukaiobuka tarimari ḡeri gara gaburi ḡovaḡa-vera verarini. <sup>30</sup> Ḡokirani, ‘Tubuma ḡatama ḡeri negai ḡara maḡuri nai, peroveta tarimari vaḡivaḡiri ai asi ḡara vaḡa-kavari.’ <sup>31</sup> Moḡesi ḡokirani nai, tauḡemi ḡovekiraḡini, ḡomi tu peroveta ḡevaḡirito tarimari naturi. <sup>32</sup> Oba, ḡomi maki tubumi ḡatami ḡeveitoḡoi kavana ma ḡovei-iaḡoni, ḡeri rakava ḡomi na ḡovaḡa-ḡuḡururini.

<sup>33</sup> Ḡomi mota! Mota naturi! Barau ḡena Kota baregona ḡarona beraḡasini nai, karava eḡara-vanaḡi vanaḡini gabuna na kamasi boḡo raga-maḡurini? <sup>34</sup> Moḡa lorinai akiramini, au na peroveta tarimari e iaunega tarimari ema vevaḡa-riba tarimari batuḡu-iaḡorini. Benamo kota tu boḡo vaḡi-maserini, aba, boḡo vaḡa-sataurorini; ma kotari tu rubu nuḡari ai boḡo kwaririni, rarari maki beḡe riḡoni, ema vanuḡa ta na boḡo lairini ma vanuḡa ta. <sup>35</sup> Moḡesina nai vei-iobukaiobuka tarimari ḡevaḡirito metori tu ḡomi iatami

ai, Abela ġevaġi-maseato, monana eiaġomato mo Sakaria, Barakia natuna, ġia tu fata veaġana ema numa veaġana fakari ai ġovaġi-maseato. <sup>36</sup> Akira-korikorimini, mabarari metori tu toma ġuru tarimami iatami ai beġe ketokauni.”

*Iesu Ierusalemata taġina eveito*

*Luka 13:34-35; 19:41-44*

<sup>37</sup> “Ierusalemata, Ierusalemata o, ġoi na peroveta tarimari ovaġirini ema Barau na etuġu-iaġosirini tarimari fore na otaki-maserini. Nega ġutuma aurato, natumi bana gana-ġeġeraġiri, kokoroku vavinena na natuna egoru-taririni kavana, senaġi ġomi tu asi ġourato! <sup>38</sup> Moġa lorinai ġemi vanuġa ema Rubu Veaġa tu korina betanuni. <sup>39</sup> Korana au na akiramini, ġomi roġo au asi boġo ġitaguni, beiaġoni mo, ġaro ta beraġasini, monai vau boġo kirani, ‘Barau aranai eiaġomani tauna sivaġa-namoa.’ ”

## 24

*Iesu na vau beġea ġorani dagarari ekiraġirito*

<sup>1</sup> Iesu Rubu Veaġa na eraka-rosito, eraka-veġitato nuġanai, ġena mero ġia ġenai ġeiaġoto, ġeri ura Rubu Veaġa numari baregori beġene vaġa-ġitaia. <sup>2</sup> Senaġi Iesu na evaġa-guruġarito, ekirato, “Mai dagara mabarari ġoġitarini? Au na moġoni akiramini: Mai fore ta fore ta iatanai asi beġe tanuni, mabarari beġe vare-bubu riġorini.”

<sup>3</sup> Iesu Olive Ġoronai etanu-taġoto-ġoi, benamo ġena mero ġia ġenai ġeiaġoto, ġedanaġi-ġairiato, ġekirato, “Nokira-varama, mai dagara tu aitoma beġe ġorani? E ġoi boġenoġoi-iaġomani ema tanobara dokona beġabiani maki kamara vetoġa na bevaġa-foforiani?”

<sup>4</sup> Iesu evaġa-veseto, ekirato, “Ġomi lorimi boġono vetore, tarima ta na asi bene ġofami. <sup>5</sup> Korana tarima ġutuma au aragu ai beġe iaġomani, beġe kirani, ‘Keriso tu au maiġegu!’ Tarima vovoka beġe ġofarini. <sup>6</sup> Ġomi na vetari gururi e tuari variri boġo seġaġirini nai, nuġami asi beġene raġe. Maniġeri dagara tu beġe ġorani, senaġi dokona tu asi roġo. <sup>7</sup> Tanobara ta tanobara ta ġesi beġe vevaġini, gavamani ta gavamani ta ġesi beġe vetarini. Gabu ġutuma nuġari ai doġe beġe ġorani, tano maki beġe iagani. <sup>8</sup> Mai tu midigu moġo besinaiani, noġa moġo mero keina emaġurini midiguna kavana.

<sup>9</sup> Mo negai beġe ġabi-tarimini, beġe vaġa-midigu midigumini, beġe vaġi-masemini. Bese mabarari na beġe baru-vinimini, korana au ġovaġa-moġoniguni dainai. <sup>10</sup> Benamo tarima ġutuma ġeri veġabidadama beġe raga-kwanerini, tata beġe verevani e beġe vebaru-vevinini. <sup>11</sup> Peroveta ġofaġofa tarimari beġe variġisini, tarima ġutuma beġe ġofarini. <sup>12</sup> Vei-rakava maki beġora-rovorovoni, benamo ġutuma ġeri veuravini maki beġe farakani. <sup>13</sup> Senaġina deikara bevevaġa-gwaġiġini mo magona tu bemaġurini. <sup>14</sup> Barau ġena Basileia Varina Namona tu tanobara mabarani beġe ġobata-iaġiani, bese mabarari na beġene seġaġia ġana, moġa murinai vau magona beraġasini.”

*Vevaġa-gari dagarana befoforini*

*Mareko 13:14-23; Luka 21:20-24*

<sup>15</sup> “Ġomi na dagara rakava vedaureana, vevaġa-gari dagarana, peroveta tarimana Daniela na ekiraġiato dagarana, boġo ġitaiani gabu veaġanai beruġani.” Mai guruġa beiaviani tarimana bene riba maoro anina tu kara. <sup>16</sup> “Benamo deidei Iudeai ġetanuni tarimari ġoro ġana beġene raga-iaġo. <sup>17</sup> Deikara numa tuġunai etanu-taġoni tu, asi ma bene raka-toġa numa nuġana ġana ġena farefare ġabiġabiri. <sup>18</sup> Deikara vamoka nuġanai maki asi ma bene ġenoġoi ġena koudi ġabiġabina. <sup>19</sup> Mo negai vavine ma baniri e ġabi-variġu vavineri kika ma vetuġari! <sup>20</sup> Boġono ġauġau Barau ġenai, be ġura e nagure negari ai o Sabadi ai asi boġono raga-kwareġa! <sup>21</sup> Korana mo negai midigumidigu tu asi keikeiri beġe ġorani, Barau na tanobara eveiato beiaġoma maitoma, midigu moġesina asi ġeġorani. Ma maiġa murinai moġesina kavana ta asi ma beġora-ġenoġoini. <sup>22</sup> Bema Barau na mo ġaro rakavari asi bere vaġa-kubiri, tarimarima ta asi bere maġuri riba, senaġi eġabi-hidirito tarimari dairi ai, ġia na ġarori bevaġa-kubirini.

<sup>23</sup> Mo negai, bema tarima ta na bekiramini, ‘Ġoġitaia, Keriso tu maiġa!’ o ‘Ġia tu iomoġa!’ betoni nai, asi boġono vaġa-moġonia. <sup>24</sup> Korana tu Keriso ġofaġofari e peroveta tarimari ġofaġofari beġe foforini, vetoġa boruri e nuġa-farevaġi veiġari baregori beġe veirini, Barau na eġabi-viriġirito tarimari beġene ġofa-veġonuri ġana.

<sup>25</sup> Boġono tuġamaġi-taġoa, maiġeri dagara tu akiravara-guinemini, hora roġosi bene raġasi nai. <sup>26</sup> Bema tarima ta na bekiramini, ‘Ġoġitaia, ġia tu tano fakanai moġa,’ moġana asi boġono iaġo; o bekirani, ‘Ġoġitaia, ġia tu mo numa nuġanai etanuni,’ asi boġono vaġa-moġonia. <sup>27</sup> Korana Tarimarima Natuna beiaġomani tu fofori-taġo, noġa moġo kiriku ekimoreani gubai ġaro raġeraġena na mo ġaro riġoriġona kavana; <sup>28</sup> ma mase tauġanina etanuni gabunai gaio maki monai beġe vegogoni, (be ġia na beġe vaġa-foforiani).”

*Tarimarima Natuna ġena iaġoma*

*Mareko 13:24-27; Luka 21:25-28*

<sup>29</sup> “Mo rakava beġe ġorani murinai, ġaro bemukunani e ġue maki asi bemamani, visiġu guba na beġe ketoni e guba seġukari beġe iagaiagani. <sup>30</sup> Benamo Tarimarima Natuna vetoġana gubai befoforini. Mo ġaro ai tanobara beseri mabarari beġe taġi-vanoro vanoroni, korana Tarimarima Natuna beġe ġitaiani, magube iatana na beiaġomani ma seġuka barana e ma marevana ġesi. <sup>31</sup> Benamo ġia na ġena aneru betuġurini ma kibi gururi baregori ġesi, eġabi-viriġirito tarimari beġe vaġa-vegogorini tanobara mabarari na.”

*Barabore - Vevaġa-riba figi ġauna ġenana*

*Mareko 13:28-31; Luka 21:29-33*

<sup>32</sup> “Figi ġauna ġenana mai barabore boġono ribaia: Kabona ġefori-raġeni e launa ġefafani nai, ġoribani, ġaro ġena tora taimina tu bekavinaġi ġotoni. <sup>33</sup> Moġa ilailanai, ġomi maki bema mai dagara mabarari beġe ġorani boġo ġitarini nai, boġono riba, Tarimarima Natuna tu bekavinaġi ġatama bokai. <sup>34</sup> Moġoni akiramini, mai ġuru asi bekorini, beiaġoni mo, mai dagara mabarari beġe ġorani. <sup>35</sup> Guba e tanobara beġe rekwa-rekwani, senaġi au ġegu guruġa tu asi beġe rekwa-rekwani, beġe tanu-vanaġi vanaġini.”

*Ġaro e hora tarima ta asi ribana*

*Mareko 13:32-37; Luka 17:26-30; 17:34-36*

<sup>36</sup> “Senaġi mo ġaro e hora tu tarima ta asi ribana, aneru gubai asi ribari e Natuna maki asi ribana, senaġi Tamana ġereġana moġo ma ribana. <sup>37</sup> Tarimarima Natuna ġena iaġoma tu noġa moġo Noa ġena negai kara ġeġorato kavana. <sup>38</sup> Ġutuġutu roġosi bere raga nai, tarimarima tu ġeveini kavana ġeġaniġanito-ġoi, ġeniuniuto-ġoi, ema tau e vavine ġeveġaraġoto-ġoi, eiaġomato mo, Noa ġena lagatoi ai eraka-toġato ġaronai. <sup>39</sup> Senaġi matari asi ġekanito, asi ġeribato kara beġorani mo, ġutuġutu eraġasito, benamo mabarari eġutu-masemaserito. Tarimarima Natuna beiaġomani maki moġesina beġorani. <sup>40</sup> Mo ġaro ai tau ruarua vamokai beġe ġauveini, ta tu Barau na beġabi-vaġiani, a ta tu betanuni. <sup>41</sup> Vavine ruarua widi giro dagarana beġe giro-vegogoani, ta tu beġabi-vaġiani, a ta tu betanuni. <sup>42</sup> Moġesi nai tataġa-taġo boġono tanu, korana ġomi asi ribami ġemi Vereġauka tu aitoma beiaġomani. <sup>43</sup> Boġono riba-maoro: Bema numa tarimana ma ribana kamara aonai lema tarimana beiaġomani nai, ġia tu tataġa-taġo betanuni, benamo lema tauna na numa asi bedareani. <sup>44</sup> Moġa lorinai ġomi maki boġono verovinatore, korana Tarimarima Natuna aitoma beraġasini aonai ġomi asi boġo ribani.”

*Vetuġunaġi tarimana namona*

*Luka 12:42-46*

<sup>45</sup> “Deikara tu mo farefare nari tarimari na guruġa eseġaġini ema veiġa roroġotori eveini, ġena vere na eġabi-hidiato numa ema vetuġunaġi tarimari bene ġita-ġauri, ema ġani-ġani maki nega korikori ai bene viniri? <sup>46</sup> Mo vetuġunaġi tarimana, ġena vere na ekiraiato ilailanai eġauveini, bema-ġoitaġoani tu namo. <sup>47</sup> Moġoni akiramini, ġia tu ġena vere ġena farefare mabarari ġitaġauri tarimanai betoreani. <sup>48</sup> Senaġina bema ġia

vetuḡunaḡi tarimana rakavana, tauḡena nuḡana bekirani, 'Au ḡegu vere ḡena ḡenoḡoi tu bekwaibo-rakava,'<sup>49</sup> benamo ḡia na karona bekwaririni, ma ḡia tu niuniu tarimari ḡesi beḡe ḡaniḡani-vegogoni e beḡe niuniu-vegogoni.<sup>50</sup> Vetuḡu-naḡi tarimana ḡena vere ḡena ḡenoḡoi ḡarona tu asi etuḡamaḡiani ḡaronai, ma asi eribaiani aoanai beraḡasini.<sup>51</sup> Benamo ḡena vere na bea basi-ḡutuḡutuani, ma ḡofaḡofa tarimari ḡesi bea toreani. Monai beḡe taḡini, gadikari maki beḡe veḡara-tarini."

## 25

*Barabore* - ḡuiato gabanana (10)

<sup>1</sup> "Mo ḡaro ai Guba Basileia tu noḡa moḡo ḡuiato gabanana (10) kavana, ḡeri lamefa ḡeḡabirito, ḡeraka-rosito, veḡaraḡo variḡu tauna ḡesi beḡene vedoḡari ḡetato.<sup>2</sup> ḡuiato imaima (5) tu ma iaunegari, a imaima (5) tu babori.<sup>3</sup> Korana ḡuiato babori ḡeri lamefa moḡo ḡeḡabito, senaḡi keresini kota ma asi ḡeḡabikauto.<sup>4</sup> A iaunega ḡuiatori ḡeri lamefa ḡeḡabito nai, keresini maki kavabu ai ḡeḡabikauto.<sup>5</sup> Veḡaraḡo variḡu tauna ekwaiboto dainai, gena na matari eḡararito, benamo mabarari ḡegenato.

<sup>6</sup> Boḡi nuḡanai ta ekoḡoto, ekirato, 'Veḡaraḡo variḡu tauna mani eiaḡomani, be ḡoiaḡo, ḡia ḡesi boḡono vedoḡari!' <sup>7</sup> Benamo ḡuiato 10 ḡetataḡato, ḡeri lamefa ḡeieararito.<sup>8</sup> ḡuiato babori na iaunega ḡuiatori ḡevaḡa-guruḡarito, ḡekirato, 'ḡemi keresini kota ḡovinima, korana ḡai ḡema lamefa mai ḡebuseni.'<sup>9</sup> Senaḡi iaunega ḡuiatori ḡevaḡa-veseto, ḡekirato, 'Asiḡina, ḡomi ema ḡai tu asi beilailani. Namona tu sitoa ḡana ḡoiaḡo, tauḡemi ḡemi ḡoa voi.'<sup>10</sup> Keresini voi ḡeiaḡoto-ḡoi nai, veḡaraḡo variḡu tauna eraḡasito. Benamo ḡerovina-toreto ḡuiatori tu ḡia ḡesi veḡaraḡo verekonai ḡerakatoḡato. Benamo ḡatama-boka ḡekou-ḡauato.

<sup>11</sup> Gabivau ḡuiato tari maki ma ḡevotuto, ḡekirato, 'Vereḡauka, Vereḡauka o, ḡema ḡatama-boka noma keoa!' <sup>12</sup> Senaḡi veḡaraḡo variḡu tauna evaḡa-veseto, ekirato, 'Moḡoni akiramini, au tu asi ribagu ḡomi.'<sup>13</sup> Moḡa lorinai, boḡono venari-taḡo, korana ḡemi Vereḡauka beiaḡomani ḡarona e horana asi ribami."

*Barabore* - Vetuḡunaḡi tarimari moni ḡenarito*Luka 19:11-27*

<sup>14</sup> "Guba Basileia tu noḡa moḡo tarimana ta, gabu manaḡana ḡana bene iaḡo etato. Roḡosi bere raka nai, ḡena vetuḡunaḡi tarimari ekea-iaḡomarito, ḡena farefare evinirito, beḡene ḡauvei-iaḡiri ḡana.<sup>15</sup> ḡia na golo moniri ḡia tata sebori sebori ḡeri riba e kokore ilailari ai evinirito. (Golo monina ta tu tarima ta davana laḡani toitoi nuḡanai beḡabini kavana). Ta tu golo moniri imaima (5) eviniato, ma ta tu golo moniri ruarua (2), ma ta tu golo monina sebona eviniato. Benamo eraga-kwanerito, ḡena iaḡoiaḡo eiaḡoto.<sup>16</sup> Golo moniri imaima eḡabirito tarimana maoromaoro eiaḡoto, ḡena moni eḡauvei-iaḡirito, golo moniri boruri imaima ma edoḡaririto.<sup>17</sup> Moḡesina kavana golo moniri ruarua eḡabirito tarimana na maki moni boruri ruarua ma edoḡaririto.<sup>18</sup> Senaḡi golo monina sebona eḡabiato tarimana eiaḡoto, tano ai guri ekwaiato, biaguna ḡena moni ekure-toḡaiato.

<sup>19</sup> Nega varau emanaḡato nuḡanai, mo vetuḡunaḡi tarimari ḡeri vere ma eḡenoḡoi-iaḡomato, ḡena moni kamasi ḡeḡauvei-iaḡirito beḡene vevarifui-iaḡiri etato.<sup>20</sup> Benamo golo moniri imaima eḡabirito tarimana ema raka-toḡato, moni boruri imaima eḡabikaurito, ekirato, 'Verebara, ḡoi na golo moniri imaima oviniguto nuḡanai, au na tu moni boruri imaima ma badoḡariri maiḡeri.'<sup>21</sup> ḡia na evaḡa-namoato, ekirato, 'Namo baregona! ḡoi tu vetuḡunaḡi taumu namona, ma vetuḡamaḡikaumu! Dagara misiri oḡau-vei-iaḡi ginikaurini nai, au na dagara ḡutuma avinimuni, ḡoi na boḡita-ḡaurini. Noma raka-toḡa, au ḡesi sima iaku-vegogo!'

<sup>22</sup> Benamo golo moniri ruarua eviniato tarimana ma ema raka-toḡato, ekirato, 'Verebara, ḡoi na golo moniri ruarua oviniguto nuḡanai, au na tu moni boruri ruarua ma badoḡariri, maiḡeri.'<sup>23</sup> ḡena vere na evaḡa-namoato, ekirato, 'Namo vedaurea!

Ġoi tu vetuġunaġi taumu namomu, ma vetuġamaġikaumu! Dagara misiri oġauvei-iaġi ginikaurini nai, au na dagara ġutuma avinimuni, ġoi na boġita-ġaurini. Noma raka-toġa, au ġesi sima iaku-vegogo!

<sup>24</sup> Benamo golo monina sebona eġabiato tarimana ema raka-toġato, ekirato, 'Verebara, au ribagu ġoi tu asi vegubakau taumu, dia ġoi na ovarorito dagarari okwarini, ema dia ġoi na ġue-ġuturi ofiu-rovorovorito dagarari ovaġa-vegogorini. <sup>25</sup> Moġesi naima agarito, aiaġoto, ġemu moni tano nuġanai akure-toġaiato. Noġitaia, dagarana iniġa, ġemu noġabia.'

<sup>26</sup> Ġena vere na ekiraiato, ekirato, 'Ġoi vetuġunaġi taumu rakavamu ma ġubulefimu. Ġoi ribamu, dia au na avarorito dagarari akwarini, ema dia au na afiu-rovorovorito dagarari avaġa-vegogorini. <sup>27</sup> Kamuto, bere namo ġegu moni tu banikai boro torea, benamo au bara ġenoġoi-iaġoma nai tu, ma torekauna ġesi bara doġaria. <sup>28</sup> Bevaitovo, ġia na vetuġunaġi tarimari tari ekirarito, ekirato, 'Mani moni sebona ġenai maniġa ġoġabia, moni gabanana (10) tarimana ġovinia. <sup>29</sup> Korana ma ġena-ġana tarimana tu ġutumari ma bavini, be barego lelevaġi beġabini, a asi ġena-ġana tarimana tu ġenai misina maki baġabi-vaġiani. <sup>30</sup> Ma mai vetuġunaġi tarimana rakavana ġofiu-rosia murika mukunana ġana. Monai bene taġi, gadikana maki bene vaġa-ġaratariri.'

#### *Kota baregona ġarona*

<sup>31</sup> "Tarimarima Natuna tu ma mamana marevana e seġuka baregona, ema ma ġena aneru mabarari ġesi beġe iaġomani, ġena teronai betanu-kauni. <sup>32</sup> Bese mabarari ġia ġoiranai beġe vaġa-vegogorini, benamo ġia na bevaġa-farararini, noġa moġo mamoe narinari tarimana na mamoe nanigosi ġerina etore-ġerevaġirini kavana. <sup>33</sup> Mamoe tu aroribana rekenai, ma nanigosi tu kaurina rekenai betorerini. <sup>34</sup> Benamo Vere na aroribana tarimari bevaġa-guruġarini, bekirani, 'Ġoiaġoma! Tamagu na evaġa-namomini tarimami, ġoiaġoma! Barau ġena Basileia ġoma ġabia, guba tanobara eveirito neganai varau erovina-toreato ġomi ġemi. <sup>35</sup> Korana au evitoguto nai, ġoġubuguto; bokagu ekoketo nai, nanu ġoviniguto; au vanuġa boru tarimagu ġomi fakami ai atanuto, senaġi ġoġabi-raġeguto; <sup>36</sup> au asi ġegu dabuġa, ġovaġa-dabuġaguto; akeveto nai, ġonariguto; dibura numai atanuto nai, ġoraka-ġitaguto.'

<sup>37</sup> Benamo vei-iobukaiobuka tarimari na beġe vaġa-veseani, beġe kirani, 'Vereġauka, aitoma ġaġitamuto ovitoto, ġaġubumuto? O onanu-maseto, nanu ġavinimuto? <sup>38</sup> Aitoma ġoi vanuġa boru tarimamu ai ġaġitamuto, ġaġabi-raġemuto ġai ġema numai, o asi ġemu dabuġa, ġavaġa-dabuġamuto? <sup>39</sup> Kamara ġaro ai ġaġitamuto ġoi okeveto, o diburai otanuto, ġaraka-ġitamuto?'

<sup>40</sup> Benamo Vere na bevaġa-veserini, bekirani, 'Moġoni akiramini, tarikakagu asi ġeivirini tarimari maiġeri ta ġovei-viniato ilailanai, au maki moġesi ġovei-viniguto.'

<sup>41</sup> Benamo kaurina rekena tarimari bevaġa-guruġarini, bekirani, 'Au ġegu na ġoraka-veġita, meto barego lele-vaġina iatami ai etanuni tarimami, ġoiaġo, eġara-vanaġi vanaġini karavana ġana, Satani ma ġena aneru ġeri Barau na varau evei-toreato. <sup>42</sup> Korana evitoguto, senaġi asi ġoġubuguto; nanu na emaseguto, senaġi nanu asi ġoviniguto; <sup>43</sup> au tu vanuġa boru tarimagu ġomi fakami ai atanuto, senaġi asi ġoġabi-raġeguto ġemi numai; asi ġegu dabuġa, senaġi asi ġovaġa-dabuġaguto; akeveto ema dibura numai atanuto, senaġi asi ġoraka-ġitaguto.'

<sup>44</sup> Benamo ġia maki beġe vaġa-veseani, beġe kirani, 'Vereġauka, kamara ġaro ai ġaġitamuto, ovitoto o onanu-maseto, o vanuġa boru tarimamu, o asi ġemu dabuġa, o okeveto, o diburai otanuto, ġai na asi ġavaġa-kavamuto?' <sup>45</sup> Benamo Vere na bevaġa-veserini, bekirani, 'Moġoni akiramini, ġomi na mai tarikaka asi ġeivirini tarimari maiġeri, ta asi ġovaġa-kavaiato nai, au maki moġesi ġovei-viniguto, asi ġovaġa-kavaguto.' <sup>46</sup> Tauna moġa, ġia tu midigu vanaġivanaġi gabuna ġana beġe iaġoni, a vei-iobukaiobuka tarimari tu maġuri vanaġivanaġi gabuna ġana beġe iaġoni."

## 26

*Iesu beḡene vaḡi-masea dabarana ḡevetauato*

*Ioane 11:45-53*

<sup>1</sup> Iesu na maiḡeri dagara mabarari evevaḡa-riba iaḡi-ḡosirito nai, ḡena mero evaḡa-guruḡarito, ekirato, <sup>2</sup> “Gomi ma ribami, ḡaro ruarua moḡo, benamo Pasova beḡe veiani. (Moḡa tu Iuda tarimari mase aneruna na evanaḡirito moḡo, asi evaḡirito verekona). Mo ḡaro ai Tarimarima Natuna tarima tari ḡimari ai beḡe toreani, beḡene vaḡa-satauroa ḡana.”

<sup>3</sup> Benamo Rubu Veaḡa vereri baregori ema Iuda ḡeri vere baregori ḡesi ḡevegogoto, Kaiafas, Rubu Veaḡa verena barana, ḡena numai. <sup>4</sup> ḡeboioḡato, Iesu beḡene ḡabi-lemmai, benamo beḡene vaḡi-masea. <sup>5</sup> Senaḡi ḡekirato, “Dia vereko nuḡanai bene ḡora, korana vereko beḡe iaḡomani tarimari ḡia iatana na beḡe burini garina.”

*Vavine ta na Iesu ediḡaiato Betania ai*

*Mareko 14:3-9; Ioane 12:1-8*

<sup>6</sup> Iesu tu Betania ai, Simona, lepera tarimana, ḡena numai. <sup>7</sup> ḡeḡaniḡanito-ḡoi nuḡanai, vavine ta ḡia ḡenai eiaḡoto; kavabu namona ta, alabasta forena na ḡeveiato kavabuna, eḡabi-kauato, nuḡanai tu muramura ma bonana namona, voina barego vedaurea; Iesu ḡaniḡani gabunai etanu-taḡoto-ḡoi nai, mo vavine na Iesu debanai ebubuato. <sup>8</sup> ḡena mero na ḡeḡitaiao, benamo ḡebaruto, ḡekirato, “Karase nai mai muramura efitoḡa-kavaiani? <sup>9</sup> Mai muramura bere voivoi-iaḡia, be moni baregona bere ḡabia, benamo asi ḡeri-ḡari tarimari bere viniri!

<sup>10</sup> Iesu ribana ḡia tu kara ḡekiraḡiato, moḡesina nai evaḡa-guruḡa-rito, ekirato, “Karase nai mai vavine ḡomugumugu-iaḡiani? Mai vavine na veiḡa namona au ḡegu ai beveia. <sup>11</sup> Asi ḡeri-ḡari tarimari tu ḡomi ḡesi boḡo tanu-vanaḡi vanaḡini. Senaḡi au tu dia ḡaro mabarari ḡomi ḡesi batanuni. <sup>12</sup> Mai vavine na muramura au tauḡanigu ai bebubu-guinea, gurigurigu ḡana. <sup>13</sup> Moḡoni akiramini, Vari Namona beḡe ḡobata-iaḡiani tanobara mabarari nuḡari ai, mai vavine na veiḡa beveia veiḡana maki beḡe kiraḡiani, ḡia tuḡamaḡi-iaḡina.”

*Iudas na Iesu erevaiato*

*Mareko 14:10-11; Luka 22:3-6*

<sup>14</sup> Benamo gabanana ruarua (12) tarimari ta, arana Iudas Isakariota, Rubu Veaḡa vereri baregori ḡeri ai eiaḡoto, <sup>15</sup> edanaḡirito, ekirato, “Kara boḡo viniguni, bema Iesu ḡimami ai batore-kauani nai? ḡia na silva moniri gabana toitoi (30) ḡeivirito, benamo ḡeviniato. <sup>16</sup> Mo nega monana Iudas na ḡimari ai betore-kauani dabarana evetauato-ḡoi.

*Iesu ma ḡena mero ḡesi ginitaḡo mamoea ḡeḡaniato*

*Mareko 14:12-21; Luka 22:7-14; 22:21-23; Ioane 13:21-30*

<sup>17</sup> Asi etubuni faraona verekona ḡarona giniguenai ḡena mero Iesu ḡenai ḡeiaḡoto, ḡedanaḡiato, ḡekirato, “ḡai tu ainai Rubu Veaḡa verekona baḡana vei-torea, bono ḡania?” <sup>18</sup> Benamo Iesu na evaḡa-veserito, ekirato, “ḡoiaḡo vanuḡa barana nuḡanai, mo bakiraḡia tarimana ḡenai, boḡono vaḡa-guruḡaia, boḡono kira, ‘Vevaḡa-riba tauna ekirani: ḡegu hora varau beraḡasi. ḡegu mero ḡesi ḡoi ḡemu numai ginitaḡo mamoea baḡa ḡaniani.’ ” <sup>19</sup> Benamo mero Iesu na ekirarito ilailanai vereko ḡevei-toreato.

<sup>20</sup> Lavilavi ai Iesu ma ḡena mero gabanana ruarua (12) ḡesi ḡetanu-tarito, vereko ḡeḡania ḡana. <sup>21</sup> Benamo ḡeḡaniḡanito-ḡoi nai, ekirarito, ekirato, “Moḡoni akiramini, ḡomi ta na au borevaguni.” <sup>22</sup> ḡia mabarari nuḡari ma metori ḡesi irau sebori irau sebori na ḡedanaḡiato, ḡekirato, “Vereḡauka, moḡoni dia au, ene?” <sup>23</sup> Iesu evaḡa-veseto, ekirato, “Au ḡesi diḡu sebonai ḡanaba-riḡoni tarimana na au berevaguni. <sup>24</sup> Tarimarima Natuna bemaseni Buka Veaḡai ḡetoreato ilailanai. Senaḡi Tarimarima Natuna berevaiani tarimana ḡenai tu vetuḡana kekei; asi bere maḡuri tu namo.” <sup>25</sup> Benamo Iudas, reva tarimana, ekirato, “Vevaḡa-riba taumu, moḡoni dia au, ene?” Iesu evaḡa-veseto, ekirato, “Dagarana maniḡa, mani okiraḡiani.”

*Vere*ġauka ġena ġanivegogo veaġana

*Mareko 14:22-26; Luka 22:15-20; 1Korinto 11:23-25*

<sup>26</sup> Ġeġaniġanito-ġoi nuġanai, Iesu na beredi eġabiato, Barau evaġa-namoato, etavianto, evinirito, benamo ekirato, “Ġoġabia, ġoġania, mai tu au tauġanigu.” <sup>27</sup> Ġia na kapusi ma eġabiato, evaġa-namoato murinai, evinirito, ekirato, “Ġoniuva, ġomi mabarami. <sup>28</sup> Korana mai tu au raragu, Ginitaġo Variġuna evaġa-moġoniani, bevebubuni, tarimarima ġutuma ġeri rakava tuġamaġi-fitoġari ġana. <sup>29</sup> Akiramini, mai vine nanuna asi ma baniau-ġenoġoiani, beiaġoni mo, ġaro beraġasini vau, au ġomi ġesi ma bita niu-vegogoani au Tamagu ġena Basileia nuġanai.” <sup>30</sup> Benamo mari ta ġemariato murinai, ġeraka-rosito, Olive Ġorona ġana ġeiaġoto.

*Iesu na Petero* ġena vekira-ġuniġau ekiraġi-toreato

*Mareko 14:27-31; Luka 22:31-34; Ioane 13:36-38*

<sup>31</sup> Benamo Iesu na evaġa-guruġarito, ekirato, “Toma boġi ġomi mabarami ġemi veġabidadama au ġegu ai boġo raga-kwaneani, korana Buka Veaġai maiġesi ekirani, ‘Au na mamoe ġitaġauri tarimana bavaġiani, benamo mamoe mabarari beġe raga-lausini.’

<sup>32</sup> Senaġi au mase na ma bavariġisi-ġenoġoiani murinai, baraka-guineni Galilea ġana. Monai vau bitana vedoġari.”

<sup>33</sup> Petero eguruġa-fouto, Iesu ekiraiato, ekirato, “Bema mabarari na ġeri veġabidadama ġoi ġemu ai beġe raga-kwaneani, senaġi au na tu asiġina.” <sup>34</sup> Iesu na Petero evaġa-guruġaiato, ekirato, “Moġoni akiramuni, toma boġi kokoroku roġosi bene goġi nuġanai, ġoi na au vaġa-toittoi bokira-ġuniġauguni.” <sup>35</sup> Senaġi Petero eguruġa-ġiġiraġeto, ekirato, “Bema ġoi ġesi bita mase-vegogoni maki, au na ġoi tu asi veġata bakira-ġuniġaumuni.” Ġena mero mabarari maki moġesi ġekirato.

*Iesu eġauġauto* Getesemane ai

*Mareko 14:32-42; Luka 22:39-46*

<sup>36</sup> Iesu ma ġena mero ġesi ġeiaġoto gabu ta arana Getesemane, benamo ġia na evaġa-guruġarito, ekirato, “Mainai ġotanutaġo, au tu iomo ġana aiaġoni, naġauġau.”

<sup>37</sup> Benamo Petero ema Sebedaio natuna ruarua moġo eġoririto, ġia ġesi ġeiaġoto. Moġa nuġanai Iesu tau-ġanina efarakaiato, egarito, nuġana maki evekvaraġito-ġoi. <sup>38</sup> Benamo ekirarito, ekirato, “Au nuġagu na meto asikei eġwaiiani, dori evaġiguni. Mainai ġotanu, boġono vevaġa-gwaġiġi au ġesi.” <sup>39</sup> Iesu kota ma eraka-naġito, ġoirana tano ai ekokofatarito, benamo eġuriġurito, ekirato, “Tamagu o, bema ma dabara ta, mai midigu bedina ġeguna noma ġabi-vaġia. Senaġi dia au ġegu ura, ġoi ġemu ura moġo.”

<sup>40</sup> Ġena mero toittoi ġeri ai eġenoġoito nuġanai, ġia tu gena-maseri ai eġoitaġorito, benamo Petero ekiraiato, ekirato, “Kamasi nai ġomi taumi toittoi au ġesi aoa sebona ta kavana maki asi boġo vevaġa-gwaġiġini? <sup>41</sup> Boġono vevaġa-gwaġiġi, boġono ġauġau, be veribaġani beiaġomani nai tu, asi boġono moira. Iauka tu moġoni eurani, senaġi tau-ġani tu emoirani.”

<sup>42</sup> Iesu nega vaġa-ruarua eraka-veġitato, ea ġuriġurito, ekirato, “Tamagu o, bema asi dabara ta mai midigu bedina ġeguna boġabi-vaġiani nai, ġoi ġemu ura bono veia moġo.”

<sup>43</sup> Ma eġenoġoi-iaġomato nuġanai tu, ġia asi ġeri vevaġa-gwaġiġi nai, genamaseri ai ma edoġaririto, korana matari tu gena na eġabi-rakavarito.

<sup>44</sup> Iesu na ma eiaġurito, ma eiaġoto, vaġa-toittoi ma eġauġauto, ġena ġuriġuri guruġari guineri ma ekiraġi-ġenoġoirito. <sup>45</sup> Benamo ġena mero ġeri ai ma eġenoġoi-iaġomato, ekirarito, “Ġomi tu roġo ġogenani e ġoiaġaraġini? Ġoġitaia! Aoana varau beraġasi! Tarimarima Natuna tu beġe revaia, rakava tarimari ġimari ai beġe torea.

<sup>46</sup> Ġovariġisi, be si-iaġosi! Ġoġitaia, au revarevagu tarimana mai beraġasi!”



*Iesu tuari tarimari na ġeġabiato**Mareko 14:43-50; Luka 22:47-53; Ioane 18:3-12*

<sup>47</sup> Iesu roġo eguruġato-ġoi nuġanai, Iudas, mero gabanana ruarua (12) tauna ta, eraġasito. Tarimarima ġutuma maki ġia ġesi ma ġeri vetari baġari e vevaġi kwariri. Ġia tu Rubu Veaġa vereri baregori ema Iuda vereri na ġetuġurito. <sup>48</sup> Reva tarimana na vetoġa ta ekiravara-torerito, ekirato, “Baveruani tarimana tu moġa, boġono ġabitaria.” <sup>49</sup> Iudas eraġasito nai, maoromaoro eiaġoto Iesu ġenai, benamo ekirato, “Vevaġa-riba tarimamu, boġi namona!” benamo everauato. <sup>50</sup> Iesu na evaġa-veveato, ekirato, “Ġata, veiveina uranai boiaġoma veiġana noraga-veia!” Benamo ġeiaġomato, ġimari na Iesu ġeġabi-tariato, ġedegodegoato.

<sup>51</sup> A Iesu ġena mero ta ġena vetari baġana einu-vaġiato, edaveato, benamo Rubu Veaġa verena baregona ġena vetuġunaġi tarimana seġana ebasi-vaġiato. <sup>52</sup> Benamo Iesu na ekiraiato, ekirato, “Ġemu baġa tu ġuraġurana gabunai noġura-ġenoġoia. Korana vetari baġari ġeġabini tarimari mabarari tu vetari baġari na beġe maseni. <sup>53</sup> Ġoi asi ribamu, Tamagu ġena vevaġa-kava banoġiani, benamo ġia na aneru vaġa-sebo au ġegu ai betuġurini, aneru doġorori gabanana ruarua (12) o 70,000 ema tari maki betuġurini au vaġa-kavagu? <sup>54</sup> Moġesi bere vei, senaġi Buka Veaġai varau ġetoreato guruġana tu kamasi bemoġonini? Be, maiġesi moġo beġene vetore!”

<sup>55</sup> Iesu na monai mo tarima ġutuma evaġa-guruġarito, ekirato, “Au tu seġafore doġorona ta aġori-kauani, be ġomi boġo iaġoma au ġabiġabigu tu ma ġemi vetari baġari e vevaġi kwariri ġesi? Ġaro mabarari ai au tu ġomi sevimi ai, Rubu Veaġa nuġanai avevaġa-ribato-ġoi, senaġi asi ġoġabi-tariguto. <sup>56</sup> A mai dagara mabarari ġeġorani tu, peroveta tarimari na Buka Veaġai ġetore-guinerito guruġari vaġa-moġoniri ġana.” Benamo Iesu ġena mero mabarari na ġeraga-kwaneato, ġeraga-rovorovoto.

*Iesu kanisoro tarimari ġoirari ai**Mareko 14:53-65; Luka 22:54-55; 22:63-71; Ioane 18:13-14; 18:19-24*

<sup>57</sup> Mo ġeġabi-tariato tarimari na Iesu ġeġori-iaġoato, Kaiafas, Rubu Veaġa verena baregona, ġena numa ġana. Monai taravatu ġevevaġa-riba iaġiato-ġoi tarimari ema Iuda vereri varau ġeraka-vegogoto. <sup>58</sup> Petero na Iesu eraka-tuġuato-ġoi, ma fakana eiaġoto mo, Rubu Veaġa verena baregona ġena numa ġana. Eraka-toġato maġu nuġanai, benamo veġitaġau tarimari fakari ai ea tanu-tarito, bene ġita, mo veiġa magonai kara beforini.

<sup>59</sup> Rubu Veaġa vereri baregori e Iuda ġeri kanisoro tarimari mabarari na vevaġa-bade ġofaġofa tarimari ġevetaurito, Iesu beġene ġofaġofa-iaġia, be beġene vaġia ġana. <sup>60</sup> Vevaġa-bade ġofaġofa tarimari ġutuma ġevariġisito, ġeġofaġofa-iaġiato, senaġi ġeri guruġa tu asi ġesebonato-ġoi. Magonai vau ġofaġofa tarimari ruarua ġevaisi-raġeto, <sup>61</sup> ġekirato, “Mai tarima ekirato, ‘Au tu ma seġukagu mai Barau ġena Rubu Veaġa barovoani, ema ġaro toitoi nuġanai ma bavaġa-ruġa ġenoġoiani.’”

<sup>62</sup> Benamo Rubu Veaġa verena baregona eruġa-vaesito, Iesu edanaġiato, ekirato, “Ġoi tu asi bovaġa-veseni? Maiġeri na ġoi ġevarifiu-iaġimuni guruġari tu kamasi?”

<sup>63</sup> Senaġi Iesu asi eguruġato. Rubu Veaġa verena baregona na ma edanaġi-ġenoġoiato, ekirato, “Maġuri Barauna aranai au na ġoi akiramuni, nokira-varama: Ġoi tu Keriso, Barau Natuna?” <sup>64</sup> Iesu na evaġa-veveato, ekirato, “Dagarana okiraġiani maniġa! Ma au na ġomi mabarami akiramuni: Mai ġaro maiġa, mo beiaġoni ġoirai, ġomi na Tarimarima Natuna roġo boġo ġitaiani, seġuka Barauna ġimana aroribanai betanuni, e guba maguberi iatari na beiaġomani!”

<sup>65</sup> Benamo Rubu Veaġa verena baregona tauġena ġena dabuġa edareato, ekirato, “Barau vaġa-rakavana guruġana tu ekiraġi-ġosiato! Karase vevaġa-ġita tarimari roġo tavetaurini? Barau vaġa-rakavana guruġana bekiraġia, varau boġo seġaġia. <sup>66</sup> Kara mani ġotoni?” Ġia mabarari ġekirato, “Bene mase moġo.” <sup>67</sup> Benamo ġoirana ġekanunuato,

ġefaisiato. Kotari na ġeforoato, <sup>68</sup> ġekirato, “Keriso, ġoi tu peroveta tarimana, be nokiravarama, deikara na bebotamu?”

*Petero na Iesu ekira-ġuniġauato*

<sup>69</sup> Petero roġo numa maġuna nuġanai etanu-taġoto-ġoi, benamo vetuġunaġi ġuiatona ta ġia ġenai eiaġomato, ekirato, “Ġoi maki Iesu, Galilea tauna, ġesi orakaoto-ġoi, okavaiato-ġoi.” <sup>70</sup> Senaġi Petero evekira-ġuniġauto mabarari ġoirari ai, ekirato, “Au asi ribagu ġoi kara okiraġiani.” <sup>71</sup> Benamo eraka-rosito, maġu ġatama bokana sevina ġana eiaġoto. Ma vetuġunaġi ġuiatona ta na eġitaiato, benamo sevina tarimari evaġa-guruġarito, ekirato, “Ġia maki Iesu, Nasareta tarimana, ekavaiato tarimana.” <sup>72</sup> Petero ma evekira-ġuniġauto, eguruġa-gwaġiġito, ekirato, “Au asi ribagu mani tarima.” <sup>73</sup> Nega kotuna evanaġito nuġanai, monai ġeruġa-taġoto-ġoi tarimari Petero ġenai ġeiaġomato, ġevaġa-guruġaiato, ġekirato, “Moġoni, ġoi maki ġia ġesi tarimamu ta, korana garomu na evaġa-foforimuni.” <sup>74</sup> Benamo Petero na ekirarito, “Asiġina ġinavaġi, akira-korikorimini, mani tarima au asi ribagu!”

Asikauna kokoroku egoġito. <sup>75</sup> Benamo Petero na Iesu ġena guruġa etuġamaġi-doġariato, ekiraiato, “Kokoroku roġosi bene goġi nai, ġoi na au vaġa-toittoi bokira-ġuniġauguni.” Benamo eraka-rosito murikai, etaġi-rakava rakavato.

## 27

*Iesu ġeġori-iaġoato Pilato ġenai*

<sup>1</sup> Boġiboġi ekini-mama mamaiato-ġoi, Rubu Veaġa vereri baregori mabarari ema Iuda vereri ġeboioġa-vegogoto, Iesu beġene vaġia ġana. <sup>2</sup> Seini na ġebarubaruato, ġeġori-iaġoato, Pilato, Roma gavana, ġimanai ġetore-kauato.

*Iudas Isakariota emaseto  
Apostolo 1:18-19*

<sup>3</sup> Iudas, reva tauna, na Iesu eġitaiato, vaġa-masena guruġana varau ġeveiato, benamo evetuġamaġi-kureto. Benamo silva moniri gabana toittoi (30) eġwa-ġenoġoirito Rubu Veaġa vereri barari e Iuda vereri ġeri ai. <sup>4</sup> Ekirato, “Au tu bavei-rakava, korana asi ġena rakava tarimana barevaia, bemaseni.” Ġevaġa-veseto, ġekirato, “Mani tu dia ġai ġema nuġa-vekwaraġi, mani tu ġoi tauġemu ġemu ġauvei moġo.” <sup>5</sup> Iudas na silva moniri Rubu Veaġa nuġanai efiu-toġarito, eraka-veġitato. Benamo eiaġoto, tauġena ea veborato.

<sup>6</sup> Benamo Rubu Veaġa vereri baregori na mo silva moniri ġeġabirito, ġekirato, “Mai tu rara voina monina, be boubou mauġanai asi veġata bita ġuraini, taravatu.” <sup>7</sup> Ġeguruġa-iaġiato, ġevaġa-moġoniato murinai, mo moni ġeġabiato, ġuro eveini tarimana ġena tano ġevoiato, tanobara boru tarimari ġeri gara gabunai ġevaġa-iaġoato. <sup>8</sup> Moġesina nai mo tano arana ġevatoani “Rara Tanona” beiaġoma mo maitoma.

<sup>9</sup> Monana Ieremia peroveta tarimana ġena guruġa ema moġonito, ekirato, “Mo silva moniri gabanana toittoi (30) ġeġabirito, mo tu Isaraela tarimari na ġevaġa-moġoniato voina misina, mo tau beġene voia ġana. <sup>10</sup> Ma mo moni na ġuro eveini tarimana ġena tano ġevoiato, Vereġauka ekirato ilailanai.”

*Iesu Pilato ġoiranai*

*Mareko 15:2-5; Luka 23:3-5; Ioane 18:33-38*

<sup>11</sup> Iesu Roma gavanana ġoiranai eruġato, ġia na edanaġiato, ekirato, “Ġoi tu Iuda tarimari ġeri kini ba?” Iesu evaġa-veseto, ekirato, “Oi, okiraġiani maniġa.”

<sup>12</sup> Benamo Rubu Veaġa vereri baregori ema Iuda vereri na Iesu ġeġofaġofa-iaġiato, senaġi guruġa ta asi ekiraġiato. <sup>13</sup> Moġa lorinai Pilato na evaġa-guruġaiato, ekirato, “Ġoi asi oseġaġini, iatamu ai tu meto ġutuma ġekiraġirini?” <sup>14</sup> Senaġi Iesu asi eġoiaġito, guruġa sebona tai maki asi evaġa-veserito. Monana gavana nuġana efarevaġi-rakavato.

*Pilato na Iesu ġena mase ekiraġiato*

*Mareko 15:6-15; Luka 23:13-25; Ioane 18:38-19:16*

<sup>15</sup> Vanaġivanaġi Pasova verekona ġaronai tu gavana na ġia ġeri dibura numai etanuni beġe kiraġiani tarimana ta etuġu-rosiato-ġoi. <sup>16</sup> Mo laġani ai tarima rakava kwaikwaina ta dibura numai etanuto, arana tu Barabas. <sup>17</sup> Moġa lorinai tarima ġutuma ġevegogoto nuġanai, Pilato na edanaġirito, ekirato, “Deikara ġoura-viniani natuġu-rosia: Barabas ba Iesu, ġekiraġiani Keriso?” <sup>18</sup> Korana Pilato ribana ginikau, Iuda tarimari baregori ġeri mama dainai, Iesu ġia ġimanai ġetoreato.

<sup>19</sup> Pilato na Kota eġorikauato-ġoi nuġanai, Pilato ġaraġona na ġena keakau ta etuġu-raġasiato, ekirato, “Mani vei-iobukaiobuka tarimana ġenai dagara ta asi bono veia, korana au tu boġi ai banuvi, ġegu nuvi ai midigumidigu baregona na beġabigu ġia dainai.”

<sup>20</sup> Senaġi Rubu Veaġa vereri baregori ema Iuda vereri na vegogo tarimari nuġari ġeġanirito, Pilato beġene kiraia, Barabas bene tuġu-rosia, a Iesu bene mase. <sup>21</sup> Senaġi gavana na vegogo tarimari ma edanaġirito, ekirato, “Ġia tauri ruarua dei tu ġomi ġemi natuġu-rosia?” Vegogo tarimari ġefararato, ġekirato, “Barabas!” <sup>22</sup> Benamo Pilato na edanaġirito, ekirato, “O mai Iesu, ġekiraġiani Keriso, tu kamasi bana veia?” Ġia mabarari ġevaġa-vese vegogoto, ġekirato, “Novaġa-satauroa!” <sup>23</sup> Senaġi Pilato na ma edanaġirito, ekirato, “Kara dainai? Kamara veiġa rakavana eveiato nai?” Senaġi mabarari ġefarara-gitarito, ġekirato, “Novaġa-satauroa!”

<sup>24</sup> Pilato etuġamaġi-fakato, ġia ġena riba guruġari tu asi beġe ġabi-raġerini, ma tarimarima ġia iatana na beġe burini garina, benamo ġia tu nanu eġabito, ġimana eġuriġiato mo tarimarima ġutuma ġoirari ai, ema maiġesi ekirato: “Au tu asi ġegu kerere mai vei-iobukaiobuka tarimana rarana ġenai; mai tu ġomi ġemi ġauvei moġo!”

<sup>25</sup> Vegogo tarimari mabarari ġevaġa-veseto, ġekirato, “Mai tarima rarana o ġena mase metona tu ġai iatamai bene tanu ema ġai natuma iatari ai.” <sup>26</sup> Benamo Pilato na Barabas etuġu-rosiato ġia ġeri, a Iesu tu ġekwaria etato vau soldia evinirito, beġene vaġa-satauroa ġana.

*Iesu ġevaseva-vaseva iaġiato*

*Mareko 15:16-20; Ioane 19:2-3*

<sup>27</sup> Benamo Pilato ġena vetari tarimari na Iesu ġeġori-iaġoato gavana ġena numa nuġanai, benamo karori mabarari ġekea-vegogorito, bena ġeruġa-ġeġeraġiato. <sup>28</sup> Ġena dabuġa ġeruġa-vaġirito, dabuġa kakakakana ġevaġa-veiato, <sup>29</sup> debana dagarana ġau ma giniginina na ġevatoato, korona noġa ġeveiato, benamo Iesu debanai ġetorekauato. Oro ta maki ġimana aroribanai ġevaġa-ġabiato, benamo ġoiranai ġevetuitarito, ġevaseva-vaseva iaġiato, ġekirato, “Iuda ġeri Kini o, ġaro namona!” <sup>30</sup> Benamo ġekanunu-kanunuato, mo oro ġeġabi-rariato, debana ġekwari-ġenoġoi ġenoġoiato-ġoi. <sup>31</sup> Ġevaseva-vaseva iaġi-ġosiatu murinai, dabuġa kakakakana ġeġabi-vaġiato, ġena dabuġa korikorina ma ġevaġa-veiato. Benamo ġeġori-rosiato, beġenea vaġa-satauroa ġana.

*Iesu ġevaġa-satauroato*

*Mareko 15:21-32; Luka 23:26-43; Ioane 19:17-27*

<sup>32</sup> Ġeraka-rosito-ġoi nai, Kurene tarimana ta ġeġoitaġoato arana Simona. Vetari tarimari o soldia na ġelaunaġi-naġiato, Iesu ġena satauro neġwaia. <sup>33</sup> Benamo vanuġa na ġeraka-rosito, gabu tai ġeraġasito arana tu Golgota, anina tu ‘Deba Ġavana Gabuna’. <sup>34</sup> Monai vine nanuna midigu vaġa-keina muramurana arana gal ġesi ġebubu-vegogoato dagarana, Iesu ġeviniato; eiamuse-tovoato, senaġi asi eniuato.

<sup>35</sup> Ġevaġa-satauroato murinai, ġena dabuġa ġia fakarai ai ġevarerito kasi ai. <sup>36</sup> Moġa murinai ġetanutanu-tarito, benamo ġenariato. <sup>37</sup> Ġia debana iatanai kara koranai ġevaġa-satauroato guruġana ġekafa-kauato, maiġesi ġetoreato, “MAI TU IESU, IUDA ĠERI VERE.” <sup>38</sup> Seġafore tarimari ruarua maki Iesu ġesi ġevaġa-sataurorito, ta aroribana rekenai, ma ta kaurina rekenai.

<sup>39</sup> Ġeraka-vanaġito-ġoi tarimari debari ġekorakorarito-ġoi, guruġa rakavari Iesu ġeviniato-ġoi, <sup>40</sup> ġekirato-ġoi, “O ġoi okirato, Rubu Veaġa borovoani, ġaro toitoi nuġanai ma bovaġa-ruġa ġenoġoiani otato, tauġemu novevaġa-maġuri! Bema ġoi Barau Natuna, satauro tuġuna na noraka-riġo.”

<sup>41</sup> Rubu Veaġa vereri baregori e taravatu ġevevaġa-riba iaġiato-ġoi tarimari ema Iuda vereri na maki maiġesi ġevaseva-vaseva iaġiato-ġoi, ġekirato, <sup>42</sup> “Ġia na tarima boruri evaġa-maġuririto-ġoi, kamuto ġia tauġena tu asi evevaġa-maġurini! Bema ġia moġoni Isaraela tarimari ġeri vere nai, satauro na inimoġo neraka-riġo, be baġana vaġa-moġonia. <sup>43</sup> Ġia na Barau eġabidadama viniato-ġoi, be siġitaia, Barau na maki betuġamaġi-kauani, bevaġa-maġuriani ba? Evekiraġito-ġoi, ‘Au tu Barau Natuna,’ nene?” <sup>44</sup> Iesu ġesi ġevaġa-satauro vegogorito seġafore tarimari ruarua na maki moġesi ġeguruġa-rakava viniato.

*Iesu ġena mase*

*Mareko 15:33-41; Luka 23:44-49; Ioane 19:28-30*

<sup>45</sup> Horaġauna 12 koloko ea ġabiato nai, tanobara mabarana mukuna na eġabi-ġauato, mukuna etanuto eiaġoto mo horaġauna 3 koloko. <sup>46</sup> Horaġauna 3 koloko rekenai Iesu eġabato, ekirato, “Eloi, eloi, lama sabaktani?” anina tu, “Au ġegu Barau, au ġegu Barau, kara dainai au boraga-kwanegu?” <sup>47</sup> Tarimarima tari monai ġeruġa-taġoto-ġoi nai, ġeseġaġiato, benamo ġekirato, “Ġia tu Elia ekeaiani.” <sup>48</sup> Benamo ġeri tarima ta eraga-iaġoto, nanu erimaiani dagarana ta eġabiato, vine nanuna mamakina nuġanai eduġi-fereiato, gobu lefai egwanu-kauato, benamo eduġi-raġeato, Iesu na neniua ġana. <sup>49</sup> Senaġi kotari ġekirato, “Sivaġa-noga roġo, siġitaia, Elia beiaġomani, bevaġa-maġuriani ba asiġina.” <sup>50</sup> Iesu ma eġaba-fouto murinai emaseto.

<sup>51</sup> Benamo mo negai moġo Rubu Veaġa nuġanai veaġa lelevaġi daiġutunai, kouġau dabuġana o ketin evedare-kikimato, eruaruato, tuġuna na mo gabigabina. Tano eiagaiagato, fore barari ġeġwa-kirarito. <sup>52</sup> Mase guriri ġevekeo-fakato, ma tarima ġutuma, Barau ġena ura ġeveirito-ġoi tarimari, mase na ma ġevaisiraġe-ġenoġoito, <sup>53</sup> ġeri guri gaburi ġeiaġuirito. Iesu ġena variġisi-ġenoġoi murinai, Siti Veaġana ġana ġeiaġoto, monai tarimarima ġutuma ġoirari ai ġefoforito.

<sup>54</sup> Vetari verena ma ġena vetari tarimari ġesi, Iesu ġenariġauato-ġoi tarimari, na tano-iaga ema ġeġorato dagarari mabarari ġeġitarito nai, ġegari-rakavato, ġekirato, “Mai tarima tu moġoni Barau Natuna!”

<sup>55</sup> Vavine ġutuma maki monai, kotuna manaġai ġeruġato, ġemarereto-ġoi. Moġeri vavine Iesu murinai ġerakato Galilea na eiaġoto mo Ierusalemna ġana, ema ġia vetuġunaġina ġeiaġo-vinito-ġoi. <sup>56</sup> Ġia fakari ai tu Maria, Magadala vavinena; Maria, Iakobo (o Iames) e Ioane sinari; ema Iakobo e Ioane Sebedaio sinari.

*Iesu ġeguriato*

*Mareko 15:42-47; Luka 23:50-55; Ioane 19:38-42*

<sup>57</sup> Mo lavilavi ai farefare ġutuma tarimana Arimatea vanuġa na eraġasito, arana tu Iosefa; ġia maki Iesu ġena mero ta. <sup>58</sup> Ġia tu Pilato ġenai eiaġoto, benamo enoġiato, Iesu tauġanina bene ġabia etato. Benamo Pilato na ġena vetari tarimari ekirarito, Iesu tauġanina Iosefa beġene vinia. <sup>59</sup> Moġa lorinai Iesu tauġanina eġabiato, dabuġa kurokuro na namona na ekumuato, <sup>60</sup> gara gabuna fore kouġanai ea tore-toġaiato. Mo gara tu fore gwaġiġinai kouġa ta ġekoroato, ġia tauġena ġena guri gabuna variġuna ta. Fore baregona na ġatama-boka ekure-ġauato, benamo eraga-kwaneato. <sup>61</sup> Maria, Magadala vavinena, ema Maria ta tu monai ġetanu-taġoto-ġoi, guri ġetanu-ġoiraiato.

*Vetari tarimari na gara gabuna ġenari-ġauato*

<sup>62</sup> Vereko ġevei-toreani ġarona ekorito vau, Sabadi varau beġabia, Rubu Veaġa vereri baregori e Farisea tarimari Pilato ġenai ġeiaġoto, <sup>63</sup> ġekirato, “Verebara, ġai ġatuġa-maġini, mo ġofaġofa tarimana roġo maġuri nai, ekirato, ‘Ġaro toitoi murinai au tu mase na ma bavariġisi-ġenoġoini.’ <sup>64</sup> Moġa lorinai gadi tauri bono kirari, be guri

gabuna beḡene nari-ginikaua, bene iaḡo mo, ḡaro toitoi murinai. Irau ḡena mero beḡe iaḡoni, ma tauḡanina beḡe lemaiiani, benamo tarimarima beḡe ḡofarini, beḡe kirani, ‘Ḡia tu mase na bevariḡisi-ḡenoḡoi,’ beḡe toni garina. Mai ḡofaḡofa maiḡa na ḡofaḡofa guinena bevanaḡiani.”<sup>65</sup> Pilato na ekirarito, ekirato, “Gadi tarimari ḡoḡabiri, ḡeiaḡo, be guri gabuna beḡene ruḡaḡau-ginikaua.”<sup>66</sup> Benamo gara ḡana ḡeiaḡoto, guri kouḡana ekou-ḡauato forena ḡekada-ḡauato, tabu vetoḡana ta ḡeveiato, benamo gadi tarimari ḡetorerito, beḡene riviḡaua.

## 28

*Iesu evariḡisi-ḡenoḡoito* Ioane 20:1-18

<sup>1</sup> Sabadi ekorito murinai, fura ḡarona giniguinenai, boḡiboḡi iamoiamo, Maria, Magadala vavinena, Maria ta ḡesi ḡeiaḡoto, gara gabuna ḡea ḡitaiato. <sup>2</sup> Asikauna tu tano-iaga baregona eḡorato, korana Vereḡauka ḡena aneru ta guba na emariḡoto, fore ekure-veḡitaiato, benamo iatanai etanukauto. <sup>3</sup> Ḡia vetoḡana tu noḡa moḡo kiriku ekimoreani kavana, ema ḡena dabuḡa tu kuro-ḡaroḡaro kaufa o snou noḡa. <sup>4</sup> Guri gabuna ḡeḡitaḡauto tarimari tu ḡegari-rakavato nai ḡeḡoḡo-ḡoḡorito, benamo tano ai ḡeketo-tarito mase tarimari kavana.

<sup>5</sup> Aneru na mo vavine evaḡa-guruḡarito, ekirato, “Asi ḡogari, au ribagu ḡomi tu Iesu, ḡevaḡa-satauroato tauna, ḡovetauani. <sup>6</sup> Ḡia mainai tu asiḡina; ḡia tu bevariḡisi-ḡenoḡoi, evaḡa-guruḡamito ilailanai. Ḡetoreato gabuna ḡoma ḡitaiata. <sup>7</sup> Be ḡoiaḡo-ḡariḡari, ḡena mero boḡonoa kira-varari, boḡono kira, ‘Iesu tu mase na bevariḡisi-ḡenoḡoi, ema beguineni Galilea ḡana. Monai vau boḡoa ḡitaiiani.’ Mai guruḡa nakiravarami ḡana baiaḡoma.”

<sup>8</sup> Benamo mo vavine na guri gabuna ḡeragakwane-ḡariḡariato, ma gariri e ma verereri ḡesi ḡeragato ḡena mero ḡeri ai, mo aneru ḡena guruḡa ḡea vaḡa-ribari ḡana. <sup>9</sup> Ḡeragato-ḡoi nai, asikauna Iesu tu ḡia ḡoirari ai eruḡato, ekirato, “Maino ḡomi ḡesi bene tanu!” Benamo ḡoiranai ḡevetui-tarito, kwakuna ḡeregorito, ḡetoma-rakariḡo viniato. <sup>10</sup> Iesu na evaḡa-guruḡarito, ekirato, “Asi ḡogari, ḡoiaḡo, au tarikakagu ḡoa kiriri, Galilea ḡana beḡene iaḡo; monai vau au beḡene ḡitagu.”

*Guri gabuna* ḡenari-ḡauato vetari tarimari ḡeri ḡofaḡofa guruḡana

<sup>11</sup> Vavine ruarua dabara na ḡeiaḡoto-ḡoi nuḡanai, tuari tarimari tari, guri gabuna ḡenari-ḡauato tarimari, ḡeḡenoḡoito vanuḡa barana ḡana, karakara ḡeḡorato dagarari mabarari Rubu Veaḡa vereri baregori ḡekira-vararito. <sup>12</sup> Benamo mo Rubu Veaḡa vereri barari tu Iuda vereri ḡesi ḡeboioḡa-vegogoto, gadi tarimari moni baregona ḡevinirito. <sup>13</sup> Maiḡesi ḡekirarito, ḡekirato, “Ḡomi tu boḡono kira, ‘Ḡena mero boḡi nuḡanai beḡe iaḡoma, ḡai tu genamai beḡe lemaia.’ <sup>14</sup> Bema mai vari gavana na beseḡaḡiani nai tu, ḡai na ḡia nuḡana baḡa vei-magomagoani, be ḡomi veiḡa rakavana ta asi bevei-vinimini.” <sup>15</sup> Gadi tarimari na moni ḡeḡabiato, ḡevaḡa-guruḡarito ilailanai ḡeguruḡato. Mai vari tu Iuda tarimari fakari ai ḡekiraḡi-rakaorakaoato, ma maitoma maki roḡo ḡekiraḡiani.

*Iesu* ḡena mero ḡeri ai efororito

*Mareko 16:14-18; Luka 24:36-49; Ioane 20:19-23*

<sup>16</sup> Ḡena mero gabanana sebana (11) tu Galilea ḡana ḡeiaḡoto, Iesu na ekiraḡi-guineato ḡorona ḡana. <sup>17</sup> Monai ḡeḡitaiato nai, ḡetoma-rakariḡo viniato; senaḡi tari tu ḡedaradarato: ‘Mai tu moḡoni Iesu ba?’ <sup>18</sup> Benamo Iesu eraka-kavito, evaḡa-guruḡarito, ekirato, “Barau na seḡuka mabarana gubai ema tanobarai au varau bevinigu. <sup>19</sup> Moḡa lorinai ḡoiaḡo tanobara mabarari ḡana, bese mabarari ḡegu mero ai boḡono vaḡa-iaḡori. Ema Tamana, Natuna, Iauka Veaḡa aranai boḡono babatisori. <sup>20</sup> Boḡono vaḡa-ribari maki, avinimito vevaḡa-naḡiri mabarari beḡene korana-iaḡiri. Boḡono riba, au tu ḡaro mabarari ai ḡomi ḡesi bita tanuni, beiaḡoni mo, tanobara magona!”

## VARI NAMONA MAREKO NA ETOREATO

Mareko vaḡa-foforina guruḡari

Mareko arana ta tu Ioane. ḡia tu dia mo Iesu ḡena mero gabanana (12) vekaravari ai tarimana ta. Mai Vari Namona tu laḡani 64 beiaḡo 68 fakari ai ta etoreato, mo tu Iesu emaseto murinai. Mai fefa tu Roma siti ai Petero ḡesi ḡeḡauvei-vegogoto nuḡanai etoreato. Iesu ḡekorana-iaḡiato-ḡoi tarimari Roma nuḡanai ḡetanuto-ḡoi tarimari Iesu Varina Namona ekiravara-ginikaurito.

Mareko na ḡia guruḡana baregona ekira-vararito tu ekirarito, Iesu tu Barau ḡena vetuḡunaḡi-iaḡovinina tarimana namo vedaureana e ma ḡena vetuḡamaḡikau (Mareko 10:45). Korana Iesu tu Barau ḡena maoro baregona gaburenai eḡauveito-ḡoi ema ḡena guruḡa mabarari ekorana-iaḡirito-ḡoi. Moḡeri tu Iesu na ḡauvei e nuḡa-farevaḡi veiḡari eveirito-ḡoi moḡerina ḡeri ai evaḡa-foforirito ḡeri.

Mareko ḡena toretore tu maiḡesina eboioḡaiato:

1. Vetuḡunaḡi tarimana Iesu ḡena iaḡoma ema everovinato veiḡana - karoa 1:1-13
2. Vetuḡunaḡi tarimana ḡena ḡauvei - karoa 1:14-13:37
3. Vetuḡunaḡi tarimana ḡena mase - karoa 14-15
4. Vetuḡunaḡi tarimana ḡena variḡisi-ḡenoḡoi ema guba vanuḡana ḡana ma evaraḡeto - karoa 16

*Ioane Babatiso* ḡena ḡobata

<sup>1</sup> Iesu Keriso Barau Natuna Varina Namona maiḡesina evesinato. <sup>2</sup> Peroveta tarimana arana Isaia na etoreato,

“Barau ekirato,

‘Au na ḡegu vetuḡunaḡi tarimana tu batuḡu-guineani, ḡemu dabara vaḡa-maḡatana.’

<sup>3</sup> Tarima ta tano fakanai ekeani, ekirani,

‘Vereḡauka ḡena dabara ḡoiarevaia,

ḡena iaḡoma dabarana ḡovaḡa-maoromaoro!’ ”

<sup>4</sup> Moḡa lorinai Ioane eiaḡomato, tano fakanai tarimarima ebabatorito-ḡoi e eḡobatato-ḡoi, tarimarima ḡeri rakava ḡerina beḡene vetuḡamaḡi-kure e beḡene raka-kure, ema babatiso beḡene ḡabia, Barau na ḡeri rakava bene tuḡamaḡi-fitoḡari ḡana.

<sup>5</sup> Tarimarima mabarari Iudea vanuḡari na e Ierusalem na ḡeiaḡoto-ḡoi Ioane ḡenai. ḡeri rakava ḡekiraḡi-foforirito-ḡoi vau, ebabatorito-ḡoi Ioridana ḡarukanai.

<sup>6</sup> Ioane ḡena dabuḡa tu kamela ḡwiri na ḡeveiato, ḡena gabaḡau tu nanigosi kefina, ḡana ḡaniḡani daḡarari tu madudu e gode nanuri moḡo. <sup>7</sup> Eḡobatato-ḡoi, ekirato,

“Tarima ta au murigu na beiaḡomani, ḡia ḡena seḡuka na au ḡegu seḡuka tu evanaḡiani.

Au maki asi ilaila ḡia ḡena tamaka varona baruḡaiani. <sup>8</sup> Au na ḡomi tu nanu na ababatorisomini, a ḡia na tu Iauka Veaḡa na bebabatorisomini.”

*Ioane na Iesu ebabatorisoato*

*Mataio 3:13-17; Luka 3:21-22*

<sup>9</sup> Mo negai Iesu tu Nasareta, Galilea vanuḡana ta, na eiaḡomato, benamo Ioane na Ioridana ḡarukanai ebabatorisoato. <sup>10</sup> Iesu nanu na eraka-raḡasito nuḡanai, guba eḡitaiato, evekeo-fakato, benamo Iauka Veaḡa pune kavana emariḡoto ḡia ḡenai. <sup>11</sup> Benamo garo ta guba na ekea-riḡoto, ekirato, “ḡoi tu au Natugu, aura-vinimuni; ema ḡemu ai aiaku-rakavani maki.”

*Satani na Iesu eribaḡaniato*

*Mataio 4:1-11; Luka 4:1-13*

<sup>12</sup> Moḡa murinai Iauka Veaḡa na Iesu tano fakana ḡana etuḡu-iaḡoato. <sup>13</sup> Monai ḡaro e boḡi gabana vasivasi (40) etanuto, Satani na eriba ḡaniato-ḡoi. ḡia tu boḡa bairi ḡesi ḡetanuto-ḡoi, aneru na ḡenariato-ḡoi.

*Iesu ġena ġauvei esinaiato Galileai*

*Mataio 4:12-17; Luka 4:14-15*

<sup>14</sup> Ioane ġediburaiato murinai, Iesu Galilea ġana eiaġoto, Barau Varina Namona ea ġobata iaġiato-ġoi. <sup>15</sup> Eġobatato, ekirato, “Barau ġena ġaro tu varau beraġasi, ġena Basileia bevotu, (ġena veġitaġau seġukana evaġa-ruġaiani maiġa)! Ġemi rakava ġerina ġovetuġamaġi-kure, Vari Namona nuġami na ġovaġa-moġonia!”

*Iesu na tarima vasivasi (4) ekearito, ġia murinai beġene raka*

*Mataio 4:18-22; Luka 5:1-11*

<sup>16</sup> Iesu Galilea kou rikina na eraka-iaġoto-ġoi nuġanai, Simona ma tarina Anduru ġesi eġitarito, ġeri reke kou ai ġefiuato, korana ġia tu maina tarimari. <sup>17</sup> Benamo Iesu na evaġa-guruġarito, ekirato, “Ġoiaġoma, murigu ai ġoma raka, be au na tu tarimarima maina viniri bana vaġa-ribami.” <sup>18</sup> Benamo maoromaoro ġeri reke ġeraga-kwanerito, Iesu murinai ġerakato.

<sup>19</sup> Asi ġeraka-manaġato, benamo Iesu na Iakobo (o Iames) Sebedaio, tarina Ioane ġesi eġitarito, ġasi ai ġeri reke ġwadareri ġeturirito-ġoi; <sup>20</sup> ekearito, benamo ġia na tamari Sebedaio ma ġena ġauvei tarimari ġesi ġasi ai ġeraga-kwanerito, Iesu murinai ġerakato.

*Iauka rakavana na eboroġiato tarimana*

*Luka 4:31-37*

<sup>21</sup> Ġeraka-iaġoto, Kaperanaumai ġevotuto. Monai Sabadi ai Iesu Iuda tarimari ġeri rubu ai eraka-toġato, benamo evevaġa-ribato. <sup>22</sup> Ġia ġena vevaġa-riba guruġari tarimarima na ġeseġaġirito nai, ġeġaba-rakavato, korana tu ġena guruġa ma seġukana, dia taravatu ġevevaġa-riba iaġiato-ġoi tarimari ġeri guruġa kavana.

<sup>23</sup> Mo rubu ai tarima ta tu iauka rakavana na eboroġiato tarimana. Ġia ekeato, ekirato, <sup>24</sup> “Iesu, Nasareta tarimamu o, kara ġemai noveia otoni? Ġoi tu ġai vaġa-rakavama uranai boiaġoma? Au ribagu ġoi tu deikara, ġoi tu Barau ġena Veaġa Tarimamu!” <sup>25</sup> Iesu na ekira-ġoiato, “Gurumu! Ġia ġenana noraka-vaġi!” <sup>26</sup> Benamo iauka rakavana na mo tarima evaġa-ġoġo-ġoġoato, benamo ma ġabana ġesi eraka-vaġito. <sup>27</sup> Tarimarima mabarari ġeġaba-rakava rakavato, benamo tauġeri ġevedanaġi-vedanaġito, ġekirato, “Mai tu kara? Vevaġa-riba variġuna? Ġia tu ma seġukana na iauka rakavari evaġa-guruġarini, ema garona maki ġeseġaġiani!” <sup>28</sup> Benamo Iesu varina asikauna eraga-rovorovoto Galilea vanuġari mabarari ai.

*Iesu na keve tarimari vovoka evaġa-namorito*

*Mataio 8:14-15; Luka 4:38-39*

<sup>29</sup> Rubu na ġeraka-rosito murinai, Iakobo (o Iames) ema Ioane ġesi ġeiaġoto, Simona ema Anduru ġeri numai ġea raġekauto. <sup>30</sup> Simona ġena taġama vavinena tu ekeveto, tauġanina eseġukato, be egena-taġoto-ġoi, benamo Iesu ġekira-varaiato. <sup>31</sup> Iesu eiaġoto ġenai, ġimanai eġabito, benamo evaġa-tanu vaisiato. Mo keve ekorito, benamo ġia eġuburito.

<sup>32</sup> Lavilavi, ġaro eketoto murinai, tarimarima na keve tarimari e iauka rakavari na ġeboroġirito tarimari Iesu ġenai ġeġori-iaġorito. <sup>33</sup> Vanuġa tarimari mabarari numa ġoiranai ġevegogoto. <sup>34</sup> Iesu na keve irauirau tarimari vovoka evaġa-namorito e iauka rakavari ġutuma elai-vaġirito. Iauka rakavari mururi ekourito asi beġene guruġa, korana ġia ribari Iesu.

*Iesu Galilea vanuġari ai eġobatato*

*Luka 4:42-44*

<sup>35</sup> Boġiboġi rekenai, roġosi bene laġani nai, Iesu evariġisito, tano fakana ġana eiaġoto, ea ġuriġurito. <sup>36</sup> Benamo Simona ma karonna ġesi Iesu ġea vetauato, <sup>37</sup> ġea doġariato nai, ġekiraiato, ġekirato, “Tarimarima na tu ġoi ġevetaumuni!” <sup>38</sup> Iesu evaġa-veseto, ekirato, “Vanuġa kavinaġiri ġana si-iaġo. Moġeri ai maki bana ġobata, au ġegu iaġoma korana

tu moġa.”<sup>39</sup> Benamo ġia eiaġoto Galilea vanuġari mabarari ġana. Rubu ai eġobatato-ġoi e iauka rakavari elai vaġirito-ġoi.

*Lepera tarimana Iesu na evaġa-namoato*

*Mataio 8:1-4; Luka 5:12-16*

<sup>40</sup> Lepera tarimana ta Iesu ġenai eiaġoto, evetui-tarito, benamo enoġiato, ekirato, “Bema ġoi ourani nai, moġoni boiarevaguni, bovaġa-namoguni riba.”<sup>41</sup> Iesu na evetuġaiato, ġimana etuġu-iaġoato, eġabi-karaiato, benamo ekirato, “Aurani, be non-amo!”<sup>42</sup> Benamo vaġa-sebo lepera na eraga-kwaneato, enamoto.<sup>43</sup> Iesu na evaġa-guruġa gwaġiġiato, ekirato,<sup>44</sup> “Mai veiġa tarima ta asi bono kira-varaia. Noiaġo, Rubu Veaġa verena na bene ġitamu, ema veiareva varevare dagarari Mose na ekiraġiato ilailanai bono vinia. Be tarimarima beġene riba, ġoi tu bonamo.”

<sup>45</sup> Senaġi ġia tu eiaġoto, mo veiġa varina efiuato. Moġesi nai Iesu tu vanuġa tai asi ma eraka-toġato, a tano fakari ai moġo etanuto-ġoi. Senaġina tarimarima gabu irauirauri na Iesu tu roġo ġeiaġo-viniato-ġoi.

## 2

*Iesu na rakava etuġamaġi-fitoġarito*

<sup>1</sup> Ġaro kotari ġevanaġito vau, Iesu Kaperanauma ġana eġenoġoito. Tarimarima na varina ġeseġaġiato Iesu tu numai.<sup>2</sup> Moġa lorinai tarimarima ġutuma ġeġaru-vegogoto, numa nuġana ġevaġa-vonuato, eiaġoto ġatama-boka korana maki asi faka ta. Monai vau Iesu na Vari Namona eġobata-vinirito,<sup>3</sup> nuġanai tarima vasivasi (4) na tauġanina tavi ta emaseto tarimana ta Iesu ġenai ġeġwa-iaġoato.<sup>4</sup> Tarimarima ġutuma nai, asi ġeri dabara Iesu sevina ġana beġe raka-kavi iaġoni. Naima ġia na Iesu eruġato iatana ġuduġuna ġeġiu-vaġiato vau, keve rakava tarimana ma gedana ġesi ġetuġu-riġoato Iesu ġoirana ġana.<sup>5</sup> Iesu na ġeri veġabidadama eġitaiato nai, ġia na keve rakava tarimana evaġa-guruġaiato, ekirato, “Natugu, ġemu rakava batuġamaġi-fitoġari.”

<sup>6</sup> Taravatu ġevevaġa-riba iaġiato-ġoi tarimari kotari monai tanutaġori ai, nuġari ai maiġesi ġetuġamaġito,<sup>7</sup> “Karase nai mai tarima moġesina ekirani? Ġia na Barau ekira-fitoġaiani. Dei na rakava betuġamaġi-fitoġarini? Barau moġo ġereġana!”<sup>8</sup> Iesu ma ribana ġia kara ġetuġamaġirito-ġoi nai edanaġirito, ekirato, “Karase nai maniġesi ġotuġamaġini?”<sup>9</sup> Aiġesina baguruġani tu meraġa, keve rakava tarimana bavaġa-guruġaia, bakira, ‘Ġemu rakava batuġamaġi-fitoġari’ banasi, ba bara kiraia, ‘Noruġa-vaisi, ġemu geda noġabia, be noraka’ barasi?<sup>10</sup> Au na navaġa-ġitami, Tarimarima Natuna tu ma ġena maoro, rakava betuġa-maġi-fitoġarini mai tanobarai.” Ġia na keve rakava tarimana evaġa-guruġaiato, ekirato,<sup>11</sup> “Akiramuni, noruġa-vaisi, ġemu geda noġabia, be numa ġana noiaġo!”<sup>12</sup> Maoromaoro eruġa-vaisito, ġena geda eġabiato, tarimarima ġoirari ai eraka-rosito. Moġa lorinai mabarari ġeġaba-rakava rakavato, Barau ġevaġa-raġeato, ġekirato, “Maiġesina kavana ta roġosi tara ġitaia.”

*Iesu takesi gogo tarimari ġesi ġeġaniġani-vegogoto*

*Mataio 9:9-13; Luka 5:27-32*

<sup>13</sup> Iesu ma eiaġoto kou rikinai. Tarimarima ġutuma ġia ġenai ġeiaġoto, benamo ġia na evaġa-ribarito.<sup>14</sup> Iesu eraka-iaġoto-ġoi nuġanai, ġia na Alfeo natuna arana Levi takesi moniri ġeġabito-ġoi numanai tanutaġo eġitaiato, benamo ekiraiato, ekirato, “Murigu ai noma raka.” Benamo Levi evariġisito, Iesu murinai erakato.

<sup>15</sup> Iesu Levi ġena numai eġani-ġanito-ġoi nai, takesi gogo tarimari e vei-rakava tarimari ġutuma maki Iesu ma ġena mero ġesi ġeġaniġani-vegogoto, korana tarimarima vovoka ġia murinai ġerakato-ġoi.<sup>16</sup> Taravatu ġevevaġa-riba iaġiato-ġoi tarimari, Farisea ġeri doġoro tarimari, na Iesu ġeġitaiato, takesi gogo tarimari e vei-rakava tarimari ġesi ġeġaniġani-vegogoto-ġoi, benamo ġia na Iesu ġena mero ġedanaġirito, ġekirato, “Ġia tu karase nai takesi gogo e vei-rakava tarimari ġesi ġeġaniġani-vegogoni?”<sup>17</sup> Iesu eseġaġito, benamo evaġa-guruġarito, ekirato, “Namo tarimari na doketa asi beġe



vetaurini, senaḡina keve tarimari na moḡo. Au aiaḡomato maki dia vei-iobukaiobuka tarimari keakeari, senaḡi vei-rakava tarimari.”

### Ḡaniveaḡa

*Mataio 9:14-17; Luka 5:33-39*

<sup>18</sup> Ḡaro ta Ioane Babatiso ḡena mero e Farisea tarimari ḡeḡani-veaḡato-ḡoi nai, tarima kotari Iesu ḡenai ḡeiaḡoto, benamo ḡedanaḡiato, ḡekirato, “Kara dainai Ioane Babatiso ḡena mero e Farisea tarimari ḡeri mero tu ḡeḡani-veaḡani, senaḡi ḡoi ḡemu mero tu asiḡi?”

<sup>19</sup> Iesu na evaḡa-veserito, ekirato, “Ḡomi ḡotuḡamaḡini, veḡaraḡo variḡu tauna ḡatana seviri ai etanuni nuḡanai beḡe ḡani-veaḡani ba? Asiḡina! Veḡaraḡo variḡu tauna ḡatana seviri ai neganai, asi beḡe ḡani-veaḡani. <sup>20</sup> Ḡarona eiaḡomani veḡaraḡo tauna ḡatana ḡerina beḡe ḡabi-veḡitaiani, monai vau beḡe ḡani-veaḡani.

<sup>21</sup> Tarima ta na dabuḡa variḡuna veseana dabuḡa guinena ḡesi asi bebani-vegogoani. Bema moḡesina beveiani nai, dabuḡa variḡuna na guinena bedareani, ema vedarena maki bebaregoni. <sup>22</sup> Tarima ta na vine nanuna variḡuna nanigosi kefina guinenai asi besisiani. Bema moḡesina beveiani nai, vine nanuna variḡuna na nanigosi kefina guinena bevei-fakaiani. Vine nanuna e kefi beḡe rakavani. Senaḡi vine nanuna variḡuna nanigosi kefina variḡunai besisiani tu namo.”

### Iesu tu Sabadi Verena

*Mataio 12:1-8; Luka 6:1-5*

<sup>23</sup> Sabadi tai Iesu ma ḡena mero ḡesi widi vamokari na ḡeraka-vanaḡito-ḡoi nai, ḡena mero tu rakarakari ai widi ḡebukito-ḡoi. <sup>24</sup> Farisea tarimari na Iesu ḡekiraiato, ḡekirato, “Noḡitari, ḡia kara ḡeveini! Maniḡesi asi beḡene vei Sabadi ai, taravatu.”

<sup>25</sup> Iesu na evaḡa-veserito, ekirato, “Davida na kara eveiato guruḡari ḡoiaviato ba asiḡina, ḡia ma karona ḡesi ḡevitorito nai? <sup>26</sup> Barau ḡena numai eraka-toḡato, Barau ḡoiranai ḡetorerito-ḡoi beredi eḡabito, eḡanito, karona maki evinirito. Mo beredi tu veaḡa veḡata, Rubu Veaḡa vereri ḡereḡari moḡo ḡari. Mo veiḡa tu Abiata Rubu Veaḡa verena baregona ḡena negai eḡorato.”

<sup>27</sup> Benamo Iesu na ma ekirarito, ekirato, “Barau na Sabadi eveiato tu tarimarima ḡeri, dia tarimarima eveirito Sabadi ḡena. <sup>28</sup> Moḡesi nai Tarimarima Natuna tu Sabadi Verena.”

## 3

### Ḡima boso tarimana

<sup>1</sup> Ḡaro tai Iesu rubu ai ma eraka-toḡato. Ḡima boso tarimana ta tu monai. <sup>2</sup> Tarima kotari maki monai, Iesu ḡeḡita-taḡoato-ḡoi, Sabadi ai mo tarima bevaḡa-namoani ba, beḡene ḡita-kaua, be beḡene vaḡa-bade-iaḡia ḡetato-ḡoi nai. <sup>3</sup> Iesu na ḡima boso tarimana evaḡa-guruḡaiato, ekirato, “Noruḡa-vaisi, tarima mabarari ḡoirari ai noma ruḡa.” <sup>4</sup> Benamo Iesu na edanaḡirito, ekirato, “Aiḡa tu maoro, Sabadi ai veiḡa namori veiveiri namo ba veiḡa rakavari sini veiri? Tana vevaḡa-maḡuri ba tana vaḡivaḡi?”

Senaḡi ḡia asi ḡeguruḡato. <sup>5</sup> Iesu ma baruna e ma nuḡa-metona ḡesi eḡita-ḡeḡeraḡirito, korana tarimarima ḡenuḡa-bubuto nai. Benamo ḡima boso tarimana ekiraiato, ekirato, “Ḡimamu notuḡu-roroḡotoa.” Ḡimana etuḡu-roroḡotoato, benamo enamoto. <sup>6</sup> Moḡa murinai Farisea tarimari rubu na ḡeraka-rosito, Heroda murinai ḡerakato-ḡoi tarimari ḡesi ḡeboioḡa-vegogoto, Iesu kamasi beḡe vaḡiani dabarana ḡevetauato.

### Tarimarima ḡutuma Galilea kouna rikinai

*Luka 6:17-19*

<sup>7</sup> Iesu ma ḡena mero ḡesi ḡeraka-veḡitato, Galilea kouna ḡana ḡeiaḡoto. Tarimarima ḡutuma lelevaḡi Galilea na ḡia murina na ḡeiaḡoto, ema vovoka lelevaḡi maki Iudea na, <sup>8</sup> Ierusema na, Idumea na, Ioridana ḡaruka mo reke na, Taia e Sidono rekeri na

ġeiaġoto, korana Iesu varina ġeseġaġiato nai. <sup>9</sup> Tarimarima ġutuma nai, Iesu na ġena mero ekirarito, ġasi misina ta beġene ġabi-torea, tarimarima ġutuma be beġe ruġaruġa-ġauani garina. <sup>10</sup> Iesu na keve tarimari ġutuma evaġa-namorito dainai, keve tarimari mabarari maki ġeġoto-iaġoto, Iesu ġenai beġene veġabi-kau ġana. <sup>11</sup> Iauka rakavari na ġeboroġirito tarimari na ġia ġeġitaiaito tu, ġoiranai ġeketo-tarito, ġekoġoto, ġekirato, “Ġoi tu Barau Natuna!”

<sup>12</sup> Iesu na evaġa-guruġa gwaġiġirito, asi beġene vaġa-foforia ġia tu deikara.

*Iesu na tarima gabanana ruarua (12) eġabi-viriġirito*

*Mataio 10:1-4; Luka 6:12-16*

<sup>13</sup> Moġa murinai Iesu ġoro ġana evaraġeto, benamo eura-vinirito tauri ea kearito, benamo ġia ġenai ġeiaġoto. <sup>14</sup> Iesu na tarima gabanana ruarua (12) eġabi-viriġirito, arari apostolo evatorito, ġia beġene kavaia. Benamo ma bene tuġuri, beġene ġobata, <sup>15</sup> ema seġuka beġene ġabi, iauka rakavari beġene lai-vaġiri.

<sup>16</sup> Eġabi-viriġirito tarimari tu maiġeri: Simona, arana variġuna evatoato Petero; <sup>17</sup> Iakobo (o Iames), Sebedaio natuna, ma tarina Ioane ġesi, arari variġuna evatoato, Boanere, anina tu guba eguruani natuna; <sup>18</sup> Anduru; Filipino; Batolomeo; Mataio; Tomasi; Iakobo (o Iames), Alfeo natuna; Tadeo; Simona, Selote tarimana; <sup>19</sup> ema Iudas Isakariota, ġia tu Iesu berevaiani tarimana.

*Iesu ema Belsebul*

*Mataio 12:24-32; Luka 11:14-23; 12:10*

<sup>20</sup> Iesu tu numai ma eraġekauto. Tarimarima ġutuma lelevaġi ma ġevegogo-ġenoġoito nai, ġia ma ġena mero ġesi asi ġeri ġaniġani dabarana. <sup>21</sup> Iesu garagarana na varina ġeseġaġiato, benamo ġabiġoina ġeiaġoto, korana tarimarima ġekirato, “Ġia tu bebabo!” ġetato nai.

<sup>22</sup> Taravatu ġevevaġa-riba iaġiato-ġoi tarimari Ierusalemna na ġemariġoto, ġekirato, “Belsebul, (mai tu Satani), iauka rakavari ġeri vere, na ġia eboroġiato nai, iauka rakavari elai-vaġirini.”

<sup>23</sup> Benamo Iesu na ekea-iaġoma-rito, barabore ai evaġa-guruġarito, ekirato, “Satani na Satani kamasi belai-veġitaiani? <sup>24</sup> Bema gavamani ta bevetavini, tauġena bevevaġi-vinini nai, mo gavamani asi beruġani riba. <sup>25</sup> Bema doġoro ta bevetavini, tauġena bevevaġi-vinini, mo doġoro maki asi beruġani riba. <sup>26</sup> Bema Satani bevetavini, tauġena bevevaġi-vinini, ġia asi beruġani, senaġi bekorini.

<sup>27</sup> Tarima ta na gwada tarimana ġena numai asi beraka-toġani riba, ġena fafare asi beverariani riba, senaġi mo gwada tarimana bebarubaru-guineani vau, ġena numa fafareri beverariani.

<sup>28</sup> Moġoni akiramini, tarimarima rakava beġe veini ema Barau beġe kira-fitoġaiani tarimari ġeri rakava mabarari Barau na betuġamaġi-fitoġarini riba. <sup>29</sup> Senaġi tarima ta na Iauka Veaġa bekira-fitoġaiani tarimana, ġena rakava asi betuġamaġi-fitoġaiani, mo rakava tu betanu-vanaġi vanaġini.” <sup>30</sup> Iesu moġesi ekirato, korana tarima kota ġekirato, “Ġia tu iauka rakavana ġia nuġanai” ġetato nai.

*Iesu sinana ema tarina*

*Mataio 12:46-50; Luka 8:19-21*

<sup>31</sup> Benamo Iesu sinana ma tarina ġeraġasito. Numa murikanai ġeruġa-tarito, ġevetuġuto, Iesu ġea kiraia, ġema vaġa-guruġaia ġana. <sup>32</sup> Ġia tu tarimarima ġutuma na ġetanu-ġeġeraġiato, benamo ġekiraiato, ġekirato, “Ġoi sinamu e tarimu tu murikai, ġoi ġevetaumuni.” <sup>33</sup> Iesu na evaġa-veserito, ekirato, “Au sinagu e au tarigu tu deiri?”

<sup>34</sup> Benamo ġetanu-ġeġeraġiato tarimari eġitarito, ekirato, “Au sinagu e au tarigu tu maiġeri! <sup>35</sup> Barau ġena ura ġeveirini tarimari tu au tarigu, e au tobagu, ema au sinagu.”

<sup>1</sup> Iesu ma ea vevaḡa-riba ḡenoḡoito Galilea kouna rikinai. Tarimarima ḡutuma lelevaḡi na ma ḡea vegogo-ḡeḡeraḡiatio nai, ḡasi ai ma eraḡekauto, benamo etanu-tarito. ḡasi kota ḡelei-veḡitatio, a tarimarima tu kou rikina na moḡo ḡevegogo-iaḡoto. <sup>2</sup> Iesu na dagara vovoka evaḡa-ribarito barabore ai. ḡia ḡena vevaḡa-riba nuḡanai ekirato,

<sup>3</sup> “ḡoseḡaḡi! Iaraḡa tarimana ta eiaḡoto, ḡena widi ḡueri benea fiuri ḡana. <sup>4</sup> Efiurito-ḡoi nai, kota tu dabarai ḡeketoto. Benamo manu ḡeiaḡomatio, ḡeḡanirito. <sup>5</sup> Kotari tu forefore gaburi ai ḡeketokauto tano maḡiḡiri ai. Asikauna ḡetubu-raḡeto, korana tano iatanai moḡo. <sup>6</sup> Benamo ḡaro eraḡekauto nai, ḡia ḡemaḡuḡuto, korana lamuri asi ḡevariḡo-ḡitakauto lorinai, asikauna ḡemaseto. <sup>7</sup> Kotari tu ḡauḡa ḡiniḡiniri nuḡari ai ḡeketoto. Benamo ḡauḡa ḡiniḡiniri ḡetubu-baregato, varovaro dagarari ḡetubu-ḡaurito e ḡetuturarito nai, asi ḡeḡwato. <sup>8</sup> Kotari tu tano namonai ḡeketoto, benamo ḡetubuginikauto, ḡegara-baregato, ḡeḡwato kotari ḡwari tu gabana toitoi (30), kotari tu gabana imaima ma gabanana (60), kotari tu sinau sebona (100).”

<sup>9</sup> Benamo Iesu ekirato, “Ma seḡana tarimana bene seḡaḡi!”

*Kara dainai Iesu na barabore ekiraḡirito*

*Mataio 13:10-17; Luka 8:9-10*

<sup>10</sup> Iesu ḡereḡana moḡo ḡaronai, ḡena mero gabanana ruarua (12) ma ḡia murinai ḡerakato-ḡoi tarimari kotari tu ḡia sevinai ruḡa-ḡeḡeraḡi, benamo mo barabore anina ḡevedanaḡi-iaḡiatio. <sup>11</sup> Iesu na evaḡa-guruḡarito, ekirato, “Barau ḡena Basileia guruḡari vekuretoḡari ḡomi ḡemi ai tu fofori, senaḡi murika tarimari tu barabore ai avaḡa-guruḡarini, korana tu,

<sup>12</sup> ‘beḡene ḡitaia,

senaḡi anina asi beḡene ribaia,

beḡene seḡaḡia,

senaḡi asi beḡene tuḡamaḡi-maoroa,

beḡe vetuḡamaḡi-kureni Barau ḡenai,

benamo ḡeri rakava betuḡamaḡi-fitoḡarini garina.’ ”

*Widi ḡueri baraborena anina*

*Mataio 13:18-23; Luka 8:11-15*

<sup>13</sup> Benamo Iesu na ma evaḡa-guruḡarito, ekirato, “Mai barabore anina asi ḡoribaiani nai, barabore tari tu kamasi boḡo ribarini? <sup>14</sup> Iaraḡa tarimana na Barau ḡena guruḡa efiuani. <sup>15</sup> Tarima kotari tu widi ḡueri dabarai ḡeketoni kavana. Guruḡa ḡeseḡaḡini nai, Satani na eḡabivaḡi-ḡariḡaririni. <sup>16</sup> Tarima kotari tu widi ḡueri forefore ai ḡeketoni kavana. Guruḡa ḡeseḡaḡini nai, ma iakuri ḡesi ḡeḡabi-raḡeani. <sup>17</sup> Senaḡi guruḡa tarima nuḡari ai asi ḡevetoreni nai, asi ḡetanu-maukani. Barau ḡena guruḡa dainai, nega rakavari ḡeḡoitaḡoni, e ḡevanerini, o ḡevaḡa-midigu midigurini ḡarori ai ḡia ḡenana ḡeraka-veḡitani. <sup>18</sup> Tarima kotari tu widi ḡueri ḡauḡa ḡiniḡiniri nuḡari ai ḡefiurini kavana. Barau ḡena guruḡa ḡeseḡaḡiani, <sup>19</sup> senaḡi tanobara dagarari tuḡamaḡiri na, tanobara farefareri ḡetuḡamaḡi-gogogogorini, ema ḡeri ura dagarari kotari na Barau ḡena guruḡa ḡelautariani, naima Barau ḡena guruḡa ḡia ḡeri ai asi ḡwaḡwari. <sup>20</sup> Tarima kotari tu widi ḡueri tano namonai ḡefiurini kavana. Guruḡa ḡeseḡaḡiani, ḡeḡabi-raḡeani, tauri ḡevetoreni kotari tu gabana toitoi (30), kotari tu gabana imaima ma gabanana (60), kotari tu sinau sebona (100).”

*Lamefa betore-kauani*

*Luka 8:16-18*

<sup>21</sup> Iesu na ma evaḡa-guruḡarito, ekirato, “Tarima ta lamefa begabuani nai, ḡuro na beḡoḡoi-tariani o fata gaburenai betoreani? Asiḡina, toretorena fatanai betore-kauani.

<sup>22</sup> Vekuretoḡa dagarari mabarari beḡe foforini, ḡeseḡo-ḡaurito dagarari mabarari beḡe ḡabi-fakarini. <sup>23</sup> Ma seḡana tarimana bene seḡaḡi!”

<sup>24</sup> Iesu na ma ekirarito, ekirato, “Boḡo seḡaḡirini guruḡari boḡono tuḡamaḡi-ginikauri. Ġemi seḡaḡi ilailari ai Barau na riba e tuḡamaḡi-faka bevinimini. Tuḡamaḡi-faka kotari ma betore-kaurini. <sup>25</sup> Ma ḡena seḡaḡi tarimana tu tuḡamaḡi-faka beviniani, asi ḡena seḡaḡi tarimana, ḡena tuḡamaḡi-faka misina maki beḡabi-vaḡiani.”

*Barabore - Widi ḡueri tauḡeri ḡetubuni*

<sup>26</sup> Iesu ma ekirato, “Barau ḡena Basileia tu noḡa moḡo tarima ta, widi ḡueri tano ai efiurini kavana. <sup>27</sup> Ġia tu boḡi ai egenani, laḡani ai evariḡisini nuḡanai, mo widi ḡueri ḡetubuni, ḡegarani, senaḡina ḡia tu asi ribana kamasi ḡegarani. <sup>28</sup> Tano tauḡena na tauna evaḡa-ḡoraiani. Guine tu gwabena etoreani, gabivau fekana, moḡa murinai tauna etoreani feka nuḡanai. <sup>29</sup> Tauna bekirini nai, bebasiani, korana basibasi ḡarona bevotu.”

*Barabore - Mastadi ḡauna ḡutuna*

*Mataio 13:31-32; Luka 13:18-19*

<sup>30</sup> Iesu evedanaḡito, ekirato, “Barau ḡena Basileia tu kara ḡesi bita vaḡa-ilailaiani? Kamara barabore na bevaḡa-foforiani? <sup>31</sup> Ġia tu mastadi ḡauna ḡutuna ta noḡa, tanobarai varovaro dagarari ḡueri mabarari fakari ai ḡia ḡereḡana misina korokoro, tano ai ḡevaroani. <sup>32</sup> Senaḡi tano ai ḡevaroani nai, egara-varaḡeni, varovaro dagarari mabarari fakari ai ḡia moḡo barego vedaurea. Ġia legana maki baregori ḡetubuni. Monai rovo manuri ḡia legana iauḡanai ḡenuḡini.”

<sup>33</sup> Moḡesina kavana baraboreri asisebo ai Iesu na Barau ḡena guruḡa eḡobata-vinirito-ḡoi, ḡia ḡeri riba e tuḡamaḡi-faka ilailari ai. <sup>34</sup> Ġena ḡobatai barabore asi eraga-kwanerito-ḡoi, senaḡi ḡena mero moḡo ḡereḡari ai vau, guruḡa aniri mabarari evaḡa-foforirito-ḡoi.

*Iesu na iavara e geta o ureure ekira-ḡoirito*

*Mataio 8:23-27; Luka 8:22-25*

<sup>35</sup> Mo lavilavi ai Iesu na ḡena mero ekirarito, ekirato, “Siveḡasi-vanaḡi, kou mo rekena ḡana.” <sup>36</sup> Benamo mo tarimarima ḡutuma ḡeraga-kwanerito, ḡena mero na ḡekavaiato Iesu etanu-taḡoto-ḡoi ḡasinai, benamo ḡeḡura-rakaiato. Ġasi kotari maki ḡia ḡesi. <sup>37</sup> Iavara asi keikeina ta eraḡasito e ureure barego maki ḡasi ai ebebubu-ḡurato-ḡoi, ḡasi maki dori evonuto-ḡoi. <sup>38</sup> Iesu tu ḡasi gabinai fila iatanai egenato-ḡoi. Ġena mero na ḡevaḡoato, ḡekirato, “Vevaḡa-riba tarimamu o, ḡoi tu asi ogarini? Ġita tu mai taburuni!”

<sup>39</sup> Benamo Iesu evariḡisito, iavara ekira-ḡoiato e ureure ekiraiato, “Nodoko, asi noḡareva.” Benamo iavara edokoto e emeḡomeḡo-tarito, asi eḡareva-ḡarevato. <sup>40</sup> Iesu na ḡena mero ekirarito, ekirato, “Karase nai ḡogarini? Ġomi tu roḡo asi ḡemi veḡabidadama?”

<sup>41</sup> Ġia ḡegari-rakava rakavato, benamo tauḡeri ḡevedanaḡi-vedanaḡito, ḡekirato, “Mai tu kamara tarima? Iavara e ureure na maki garona ḡeseḡaḡiani!”

## 5

*Iesu na iauka rakavari na ḡeboroḡiatio tarimana evaḡa-namoato*

<sup>1</sup> Kou tavi tai ḡea vanaḡito Gerasa (o Gadara) tarimari ḡeri gabu ai. <sup>2</sup> Iesu ḡasi na eraka-rigoto-ḡoi nai, iauka rakavana na eboroḡiatio tarimana ta gara gabuna na eiaḡomato-ḡoi Iesu ḡenai. <sup>3</sup> Ġia tu gara kouḡari ai etanuto-ḡoi. Tarimarima ḡia barutarinai ḡeferauto, seini maki ḡia ḡenai asi gwaḡiḡi. <sup>4</sup> Nega ḡutuma kwakuna e ḡimana seini na ḡebarurito-ḡoi, senaḡi seini edabu-ḡuturito-ḡoi, ema kwakunai auri dagarari maki elau-kirarito-ḡoi. Ġia tu gwada rakava, tarima ta na maki asi bevaḡa-maranaiani riba. <sup>5</sup> Boḡi e laḡani ai ḡia tu garai e ḡoro tuḡuri ai ekoḡoto-ḡoi ema tauḡena maki fore na everamato-ḡoi.

<sup>6</sup> Ġia na Iesu manaḡai eḡitaiato, eraga-iaḡoto, ḡoiranai eketo-tarito, <sup>7</sup> ekoḡoto edueto, ekirato, “Iesu o, Iaru-korokoro Barauna Natuna, kara au ḡegu ai noveia otoni? Barau aranai anoḡimuni, asi bono vaḡa-midigu midigugu.” <sup>8</sup> Ġia moḡesi ekirato, korana Iesu

na evaḡa-guruḡaiato, ekirato, “Iauka rakavamu, mani tarima ḡenana noraka-vaḡi!”  
<sup>9</sup> Benamo Iesu na edanaḡiatio, ekirato, “Ḡoi aramu tu deikara?” Ḡia evaḡa-veseto, ekirato, “Au aragu tu ‘Vetari Tarimari Ḡutuma,’ korana ḡai tu vovoka.”<sup>10</sup> Ḡia na Iesu enoḡi-ḡiḡiraḡeato, mo gabu na asi bene lai-rosiri.

<sup>11</sup> Monai bai serina ḡoro gabakanai ḡedokadokato-ḡoi. <sup>12</sup> Moḡesina nai iauka rakavari na Iesu ḡenoḡiatio, ḡekirato, “Notuḡuma bai ḡeri ai, ḡia nuḡari ai ḡaraka-toḡa.”<sup>13</sup> Iesu na etuḡu-iaḡorito. Benamo iauka rakavari mo tarima ḡenana ḡeraka-vaḡito, bai nuḡari ai ḡeraka-toḡato. Benamo lalaḡa na ḡekokosi-firiḡoto, kou ai ḡevebora-ḡuḡututo. Mo bai serina nuḡanai bai mabarari 2,000 kavana.

<sup>14</sup> Bai ḡitaḡauri tarimari ḡeragato, mo vari ḡea fiuato vanuḡa barana nuḡanai e vanuḡa keiri ai. Tarimarima ḡeraka-rosito, ḡeiaḡoto mo kara eḡorato dagarana ḡitaḡitana.  
<sup>15</sup> Iesu ḡenai ḡeraḡasito nai, ḡia na mo tarima iauka rakavari vovoka na ḡeboroḡiatio tarimana ḡeḡitaiato, ma dabuḡana e ḡena tuḡamaḡi maki maoro etanu-taḡoto-ḡoi, benamo ḡia mabarari ḡegarito. <sup>16</sup> Mo veiḡa ḡeḡorato, ḡeḡitarito tarimari na iauka rakavari na ḡeboroḡiatio tarimana varina, ema bai variri, tarimarima ḡekira-vararito.  
<sup>17</sup> Benamo ḡia na Iesu ḡenoḡiatio, ḡeri tano na bene raka-veḡita.

<sup>18</sup> Iesu ḡasi ai eraḡekauto-ḡoi nai, iauka rakavari ḡenana ḡeraka-vaḡito tarimana na enoḡiatio, Iesu ḡesi bene iaḡo etato. <sup>19</sup> Senaḡi Iesu na ekiraiato, ekirato, “Noḡenoḡoi numa ḡana e ḡemu numa tarimari ḡeri ai. Benamo bonoa kira-varari, Barau na ḡemu ai kara beveia ema ḡena vevetuḡaḡwa ḡemu ai beḡora dagarana.”<sup>20</sup> Benamo ḡia eiaḡoto Vanuḡa Gabanana (10) tanori ai, ea vevari-fiuto, kara Iesu na ḡia ḡenai eveiatio. Benamo tarimarima mabarari ḡeḡaba-rakavato.

*Iesu na kekeni ta ema vavine ta evaḡa-namorito*

*Mataio 9:18-26; Luka 8:40-56*

<sup>21</sup> Iesu ḡasi na ma eḡenoḡoito kou tavi ta ḡana maia. Mo kou rikinai tarimarima ḡutuma lelevaḡi na ma ḡea ḡaru-ḡeḡeraḡiatio. <sup>22</sup> Rubu ḡitaḡauna tarimana ta arana Iairo eiaḡoto, Iesu eḡitaiatio nai, kwakuna koranai evetui-tarito,<sup>23</sup> ma nuḡana mabarana ḡesi enoḡiatio, ekirato, “Au natugu kekenina bekeve-rakava, dori emaseni. Mani ḡemu veiḡa, noiaḡoma, ḡimamu iatanai bono tore-kaua, be natugu bene namo!”

<sup>24</sup> Benamo Iesu ḡia ḡesi ḡeiaḡoto-ḡoi nai, tarimarima ḡutuma lelevaḡi maki ḡeḡotokauto, ḡia na ḡeraka-vebibi vebibiatto-ḡoi.

<sup>25</sup> Monai vavine ta, ḡena keve tu rara kevena, laḡani gabanana ruarua (12) ekeve-iaḡiatio. <sup>26</sup> Doketa vovoka na muramura ḡeviniatio-ḡoi, senaḡi asi enamoto-ḡoi. Ḡena moni mabarari evaḡa-koririto, nenamo ḡana, senaḡi asi enamoto-ḡoi, ḡena keve moḡo emeto-iaḡoto-ḡoi. <sup>27</sup> Ḡia na Iesu varina eseḡaḡiatio naima eiaḡomato, tarimarima ḡutuma nuḡari na eraka-rokarokato mo Iesu murinai ea raḡasito, benamo ḡena dabuḡai eveḡabikauto. <sup>28</sup> Korana tu ḡia evetuḡamaḡito, “Ḡena dabuḡai moḡo baveḡabikauni nai banamoni.”<sup>29</sup> Benamo rara kevena edokoto, tauḡaninai emami-raḡiatio ḡena keve varau ekorito.

<sup>30</sup> Mo negai Iesu eribato, ḡia ḡenana seḡuka eraka-vaḡito. Benamo tarimarima ḡutuma nuḡari na eruḡa-kureto, evedanaḡito, ekirato, “Deikara na au ḡegu dabuḡa beḡabi-karaia?”<sup>31</sup> Ḡena mero ḡevaḡa-veseto, ḡekirato, “Noboḡeboḡe, mai tarimarima tu ḡutuma na ḡebebesi-karamuni, kamasi tu ma ovedanaḡini, okirani, ‘Deikara na beḡabi-karagu?’”<sup>32</sup> Senaḡi Iesu tu roḡo eboḡeboḡeto-ḡoi, eḡabi-karaiatio tarimana eḡita-vetauato-ḡoi. <sup>33</sup> Mo vavine eriba-maoroto kara ḡenai eḡorato, benamo ma garina e ma ḡoḡo-ḡoḡona ḡesi Iesu kwakuna koranai ea vetui-tarito, benamo kara eḡorato mabarana ekiraḡi-foforirito. <sup>34</sup> Iesu na mo vavine evaḡa-guruḡaiatio, ekirato, “Natugu, ḡemu veḡabidadama na bevaḡa-namomu. Be, ma iakumu ḡesi noiaḡo, ḡemu keve bekori-moḡovaḡi.”

<sup>35</sup> Iesu roḡo eguruḡato-ḡoi nuḡanai, rubu ḡitaḡauna tauna Iairo ḡena numa na tarima kotari ḡeiaḡomato, Iairo ḡekiraiatio, ḡekirato, “Natumu tu bemase. Vevaḡa-riba

tarimana asi novaḡa-vekwaraḡia.”<sup>36</sup> Iesu na mo guruḡa tu eseḡaḡi-ḡuiraḡiato moḡo, benamo rubu ḡitaḡauna tarimana evaḡa-guruḡaiato, ekirato, “Asi bono gari, bono veḡabidadama moḡo.”<sup>37</sup> Benamo Iesu na mabarari ekira-ḡoirito, murina na asi beḡene iaḡo, senaḡi Petero, e Iakobo (o Iames), ema tarina Ioane moḡo ḡia ḡesi beḡene iaḡo.<sup>38</sup> Iairo ḡena numai ḡeraḡasito, benamo Iesu na tarimarima eḡitarito, ḡeguru-raḡeto-ḡoi e ḡetaḡi-guruḡa guruḡato-ḡoi.<sup>39</sup> Benamo Iesu numai eraka-toḡato, evaḡa-guruḡarito, ekirato, “Karase nai ḡoguru-raḡeni e ḡotaḡini? Kekeni tu asi bemase, ḡia tu egenani moḡo.”<sup>40</sup> Senaḡina tarimarima na ḡerikiriki-iaḡiato. Benamo Iesu na etuḡu-rosirito, bena kekeni tamana sinana e ḡia ḡekavaiato tarimari toitoi ḡesi moḡo kekeni ḡevaḡa-genaiato gabunai ḡeraka-toḡato.<sup>41</sup> Benamo Iesu na kekeni ḡimantai eḡabito, evaḡa-guruḡaiato, ekirato, “Talita kumi!” Mo guruḡa anina tu “Kekeni, au na ḡoi akiramuni, novariḡisi!”<sup>42</sup> Benamo kekeni vaḡa-sebo evariḡisito, erakaorakaoto. ḡia ḡena laḡani tu gabanana ruarua (12). Mai veiḡa eḡorato nai, tarimarima ḡeḡaba-rakava rakavato.<sup>43</sup> Iesu na evaḡa-guruḡarito, mai veiḡa varina asiḡina ḡinavaḡi beḡene kiraḡia etato, ema ekirarito, mo kekeni beḡene ḡubua.

## 6

### *Iesu Nasareta tarimari na asi ḡegubakauato*

<sup>1</sup> Iesu na mo gabu eraga-kwaneato, benamo ḡena vanuḡa ḡana eiaḡoto; ḡia ḡena mero maki murina na ḡeiaḡoto. <sup>2</sup> Sabadi ḡaronai Iesu tu rubu ai ma ea vevaḡa-ribato, tarimarima ḡutuma na ḡeseḡaḡiato tu, ḡeḡaba-rakavato, ḡekirato, “Mai tarima mai riba tu ainana eḡabito? ḡena iaunega maki dei na eviniato? Mai nuḡa-farevaḡi veiḡa boruri tu kamasi eveirini ḡimana na? <sup>3</sup> ḡia tu kamuda tarimana, ene? Maria natuna; Iakobo (o Iames), e Iosefa, e Iudas, e Simona kakari, ema tobana maki sevira iniḡeri.” Benamo asi ma ḡevaḡa-moḡoniato-ḡoi.

<sup>4</sup> Iesu na ekirarito, ekirato, “Peroveta tarimana tu gabu mabarari ai beḡe gubakauani, senaḡi ḡena vanuḡa korikori, garagarana, ema ḡena numa tarimari, na moḡo asi beḡe gubakauani.”

<sup>5</sup> Monai ḡia na seḡuka veiḡari boruri asi eveito, a keve tarimari tu sebosebo moḡo iatari ai ḡimana etore-kauato, evaḡa-namorito. <sup>6</sup> Iesu edaradara-rakavato, korana asi ḡeri veḡabidadama nai.

### *Iesu ḡena mero gabanana ruarua (12) etuḡurito*

#### *Mataio 10:5-15; Luka 9:1-6*

Benamo Iesu ma erakato, eiaḡoto vanuḡa kotari ai ma ea vevaḡa-ribato-ḡoi. <sup>7</sup> Benamo Iesu na ḡena mero gabanana ruarua (12) ekearito, benamo ruari ruari etuḡurito, ema seḡuka evinirito, iauka rakavari beḡene lai-vaḡiri ḡana. <sup>8</sup> Iesu na evaḡa-naḡirito, ekirato, “Kara ta asi boḡono ḡabi-kaua ḡemi iaḡoiaḡo ai, togoi moḡo. Dura, ḡaniḡani dagarari e moni maki asi boḡono ḡwakau. <sup>9</sup> Tamaka boḡono vei, senaḡi sedi ruarua asi boḡono vei.” <sup>10</sup> Ma evaḡa-guruḡarito, ekirato, “Numa tai boḡo raḡekauni nai, mo numai moḡo boḡono tanu, bene iaḡo mo, vanuḡa boḡono raga-kwanea. <sup>11</sup> Bema vanuḡa tai asi beḡe ḡabi-raḡemini e garomi asi beḡe seḡaḡirini nai, boḡono raga-kwanea, kwakumi kauri moḡo boḡono kwari-ketoketori ḡia ḡeri kira-sirivaḡi vaḡa-moḡoniri ḡana.”

<sup>12</sup> Benamo ḡeiaḡoto, ḡea ḡobatato, tarimarima ḡeri rakava na beḡene vetuḡamaḡi-kure e beḡene raka-kure ḡana. <sup>13</sup> Iauka rakavari vovoka tarimarima ḡerina ḡelai-vaḡirito, keve tarimari ḡutuma maki diḡa na ḡedaurito, ḡevaḡa-namorito.

### *Ioane Babatiso ḡena mase*

#### *Mataio 14:1-12; Luka 3:19-20; 9:7-9*

<sup>14</sup> Heroda, Galilea verena, na mai veiḡa variri ea seḡaḡirito, korana Iesu arana gabu mabarana eraga-rovorovoto. Tarima kotari ḡekirato, “Ioane Babatiso mase na ma beviriḡisi-ḡenoḡoi. Moḡa lorinai mai veiḡa baregori mabarari evaḡa-foforirini.”

<sup>15</sup> Ma kota ḡekirato, “Mai tu Elia,” ma kota ḡekirato, “Mai tu Peroveta tarimana ta,

peroveta tarimari guineri kavana.” <sup>16</sup> Senaḡi Heroda eseḡaḡito nai, ekirato, “Mai tu Ioane Babatiso, au na debana abasi-ḡutuato tarimana, mase na ma bevariḡisi-ḡenoḡoi!”

<sup>17</sup> Korana Heroda tauḡena etetuḡuto, Ioane ḡea ḡabi-tariato, benamo dibura numai ḡebarubaruato, ḡebiri-ḡauato. Mo veiḡa eveiato, korana tu etava-rariato vavinena Herodia, ḡia kakana Filipino ḡaraḡona, bene vaḡa-iakua ḡana. <sup>18</sup> Ioane na Heroda evaḡa-guruḡaiato-ḡoi, ekirato, “Ḗoi na kakamu ḡaraḡona boḡaraḡo-veraria tu asi maoro!” <sup>19</sup> Moḡesina nai Herodia na Ioane ebaru-viniato, ḡena ura bene vaḡia, senaḡina asi ḡena dabara, <sup>20</sup> korana Heroda na Ioane egari-viniato-ḡoi e eḡita-ḡauato-ḡoi. Heroda ribana Ioane tu vei-iobukaiobuka ema veaḡa tarimana. Ioane garona eseḡaḡiato nai, edaradarato-ḡoi, senaḡi eurato bene seḡaḡi-vinia.

<sup>21</sup> Herodia ḡena ḡaro namona ta eraḡasito. Heroda ḡena ḡora ḡarona vetuḡamaḡi-iaḡina verekona o betdei pati eveiato, ḡena veguine-iaḡi tarimari baregori, e vetari ḡorikauro tarimari, ema Galilea vanuḡari ai veguine-iaḡi tarimari ekearito. <sup>22</sup> Herodia natuna ḡuiatona ema raka-toḡato, benamo ebarato nai, Heroda ma ḡena varivari tarimari mabarari ḡesi evaḡa-iakurito. Benamo Heroda na mo ḡuiato ekiraiato, ekirato, “Ḗoi kara oura-viniani dagarana nokiraḡia, benamo bavanimuni.” <sup>23</sup> Benamo ekiraiato, ekirato, “Kara bonoḡiguni dagarana bavanimuni, ḡegu Basileia tavina bonoḡiguni maki bavanimuni.”

<sup>24</sup> Benamo eraka-rosito, sinana edanaḡiato, ekirato, “Kara banasi?” Sinana na evaḡa-veveato, ekirato, “Ioane Babatiso debana, bonosi!” <sup>25</sup> Benamo mo ḡuiato ma eraga-ḡenoḡoito, benamo vere barana Heroda enoḡiato, ekirato, “Au aurani inimoḡo Ioane Babatiso debana diḡu ai novinigu.”

<sup>26</sup> Vere barana ma etetuḡamaḡi-ḡenoḡoito, senaḡi asi eurato bene kira-sirivaḡi, korana ḡena varivari tarimari ḡoirari ai ekiraḡi-toreato bene. <sup>27</sup> Maoromaoro vere barana Heroda na tarima debari ebasi-ḡuturito-ḡoi tarimana ta etuḡuato, Ioane debana bene ḡwa-iaḡomaia ḡana. Benamo ḡia eiaḡoto, Ioane Babatiso dibura numanai debana ebasi-ḡutuato. <sup>28</sup> Benamo diḡu ai eḡwa-ḡenoḡoito, benamo mo ḡuiato ema viniato. Ḗia na sinana eviniato. <sup>29</sup> Ioane ḡena mero na mo vari ḡeseḡaḡiato, benamo ḡeiaḡoto, tauḡanina ḡea ḡabiato, benamo gara gabunai ḡea guriato.

*Iesu na tarima daḡara imaima (5,000) eḡuburito*

*Mataio 14:13-21; Luka 9:10-17; Ioane 6:1-13*

<sup>30</sup> Apostolo tarimari ma ḡeḡenoḡoito Iesu ḡenai, benamo kara ḡeveito e ḡevevaḡa-riba iaḡirito dagarari mabarari ḡekira-varaiato. <sup>31</sup> Iesu na evaḡa-guruḡarito, ekirato, “Gabu fakana ta ḡana si-iaḡosi, ḡoa iaḡaraḡi kotuna.” Korana tarimarima vovoka ḡeiaḡomato-ḡoi ema mainana ḡeiaḡoto-ḡoi, be ḡia maki asi ilaila beḡene iaḡaraḡi o beḡene ḡaniḡani. <sup>32</sup> Benamo mabarari ḡasi tai ḡeraḡeto, gabu fakana ta ḡana ḡeiaḡoto.

<sup>33</sup> Senaḡi tarimarima ḡutuma na ḡeḡitarito, ḡeribato aiḡana ḡeiaḡoni. Benamo vanuḡa tata tarimarimari mabarari kwakuri na ḡeraka-ragaraga-iaḡoto, mo gabu ai ḡea raḡasi-guineto. <sup>34</sup> Iesu ḡasi na eraka-riḡoto nai, tarimarima vovoka lelevaḡi eḡitarito, benamo etetuḡarito, korana ḡia tu noḡa moḡo mamoe asi ḡitaḡauri tarimana ta noḡa. Benamo ḡia na dagara vovoka evaḡa-ribarito. <sup>35</sup> Elavilavito-ḡoi nai, Iesu ḡena mero ḡia ḡenai ḡeiaḡoto, benamo ḡekirato, “Mai tu gabu fakana e ḡaro maki mo evariḡoni. <sup>36</sup> Notuḡu-rakari, vamoka vei tarimari ḡeri tanu gaburi e vanuḡa kavinaḡiri ḡana ḡeiaḡo, be ḡari ḡaniḡani ḡea voi.”

<sup>37</sup> Senaḡi Iesu na evaḡa-veserito, ekirato, “Ḗomi na ḡaniḡani tari ḡoviniri.” Benamo ḡia na ḡedanaḡiato, ḡekirato, “Ḗoi ourani tu ḡaiaḡo, beredi silva moniri sinau ruarua (200) na ḡavoiri, benamo ḡama-ḡuburi otoni?” (Mai tu tarima ta davana ḡue imaima toitoi (8) nuḡanai beḡabini kavana). <sup>38</sup> Iesu na ekirarito, ekirato, “Ḗomi ḡemi ai beredi tu vira maniḡeri? Ḗoiaḡo, ḡoa ḡitari.” Ḗea ḡitarito, benamo ḡekirato, “Beredi imaima, maḡani-kone ruarua maki.”

<sup>39</sup> Iesu na ḡena mero evaḡa-guruḡarito, tarimarima beḡene vareri, doḡoro doḡoro ai ḡauḡa iatari ai beḡene tanutanu-tari. <sup>40</sup> Benamo doḡoro loriri ai ḡetanuto, tari

sinau sebori (100), tari gabana imaimari (50). <sup>41</sup> Benamo Iesu na mo beredi imaima e maḡani-kone ruarua eḡabirito, eboḡe-raḡeto, gubai eḡitaiato, Barau evaḡa-namoato vau, beredi etavi-kirakirarito, benamo ḡena mero evinirito beḡene vareri ḡana. Maḡani-kone ruarua maki moḡesina edudu-ḡutuḡuturito. <sup>42</sup> Tarimarima mabarari ḡeḡani-maseto. <sup>43</sup> Murinai vau Iesu ḡena mero na beredi kwari e maḡani-kone kwari mabarari ḡevaḡa-vegogo-rito, boseḡa gabanana ruarua (12) ḡevaḡa-vonurito. <sup>44</sup> Ḗeḡaniḡanito tauri mabarari tu 5,000.

*Iesu nanu iatanai erakato*

*Mataio 14:22-33; Ioane 6:16-21*

<sup>45</sup> Maoromaoro Iesu na ḡena mero ḡasi ai evaḡa-raḡerito, benamo etuḡu-guinerito kou tavi tai Betesaida ḡana, ma ḡia tu mo tarimarima ḡutuma roḡo etuḡu-lauserito. <sup>46</sup> Benamo etuḡu-lauserito murinai, ḡoro ḡana evaraḡeto ḡuriḡuri. <sup>47</sup> Emukuna-mukunato-ḡoi nai, ḡasi tu kou nuḡanai, a Iesu tu ḡereḡana tano ai. <sup>48</sup> Benamo ḡena mero eḡitarito, ḡevekwaraḡi rakavato-ḡoi levai, korana iavara tu ḡoirari na eiaḡomato-ḡoi. Benamo Iesu ḡeri ai eraka-iaḡoto nanu iatana na, ḡasi bene raka-vanaḡia etato. Mo tu horaḡauna 3 ema 6 koloko vefakanai boḡiboḡi rekenai. <sup>49</sup> Senaḡi ḡena mero na ḡeḡitaiato, nanu iatanai erakato-ḡoi, ḡetuḡamaḡito, ḡekirato, “Murava ta!” ḡetato. Benamo ḡeḡaba-fouto, <sup>50</sup> korana mabarari na ḡeḡitaiato e ḡegari-rakavato.

Senaḡina Iesu na eraga-vaḡa-guruḡarito, ekirato, “Ḗokokore, mai tu au, asi ḡogari!”

<sup>51</sup> Benamo ḡasi ai eraḡekauto, ema iavara maki edokoto. Ḗena mero ḡeḡaba-rakavato, <sup>52</sup> korana tu mo beredi evaḡa-ḡutumarito nuḡa-farevaḡi veiḡana anina roḡosi ḡere tuḡamaḡi-doḡaria, nuḡari roḡo bubu nai.

*Iesu na keve tarimari evaḡa-namorito e evaḡa-maḡuririto Genesareta ai*

*Mataio 14:34-36*

<sup>53</sup> Benamo ḡasi ai kou na ḡevanaḡito, Genesareta tanonai ḡeraḡasito. Ḗeri ḡasi monai ḡebaru-tariato. <sup>54</sup> Benamo ḡasi na ḡeraka-vaḡito nai, maoromaoro tarimarima na ḡeḡita-leaiato, ḡeribato mo tu Iesu. <sup>55</sup> Benamo mo tano mabarana ḡeraga-ḡauato, benamo ḡeri keve tarimari ma gedari ḡesi Iesu ainai ḡeseḡaḡiato-ḡoi gaburi ḡana ḡeḡwa-iaḡorito-ḡoi. <sup>56</sup> Iesu na eiaḡo-vinirito-ḡoi gaburi mabarari ai, vanuḡa barari ai, vanuḡa keiri ai, vamoka vei tarimari ḡeri tanu gaburi ai, ḡeri keve tarimari maketi gaburi ai ḡetorerito-ḡoi, benamo ḡenoḡiato-ḡoi, ḡena dabuḡa rikina moḡo maki beḡene veḡabikau. Ḗeveḡabikauto-ḡoi tarimari tu ḡenamoto-ḡoi e ḡemaḡurito-ḡoi.

## 7

*Namo e rakava*

<sup>1</sup> Farisea tarimari e taravatu ḡevevaḡa-riba iaḡiato-ḡoi tarimari kota Ierusalem na ḡeiaḡomato, Iesu ḡevegogo-ḡeḡeraḡiato. <sup>2</sup> Benamo ḡena mero ḡeḡitarito, ḡeḡaniḡanito-ḡoi kota ḡimari ma “mirori” ḡesi, ḡimari asi ḡeḡuriḡirito ḡia seneri vereri ḡeri vevaḡa-naḡi ilailanai. <sup>3</sup> Boḡono riba, Farisea tarimari e Iuda tarimari mabarari tu asi roḡo beḡe ḡaniḡanini, senaḡi ḡimari roḡo beḡe ḡuriḡirini murinai vau beḡe ḡaniḡanini. Mai tu ḡia seneri vereri na ḡevaḡa-moḡoniato ema ḡevei-iaḡomaiato-ḡoi veiḡana. <sup>4</sup> Maketi gaburi na beḡe iaḡomani maki asi roḡo beḡe ḡaniḡanini, senaḡi beḡe veḡuriḡi-guineni vau. Seneri ḡeri vevaḡa-naḡi vovoka kotari maki ḡekorana-iaḡirito-ḡoi, kapusi ḡuriḡi, ḡuro, ketolo [e geda maki] ḡeḡuriḡirito-ḡoi.

<sup>5</sup> Moḡesi nai Farisea tarimari e taravatu ḡevevaḡa-riba iaḡiato-ḡoi tarimari na Iesu ḡedanaḡiato, ḡekirato, “Karase nai ḡemu mero na senera vereri ḡeri vevaḡa-naḡi asi ḡekorana-iaḡirini, ḡimari ma ‘mirori’ ḡesi ḡeḡaniḡanini?”

<sup>6</sup> Iesu na evaḡa-veserito, ekirato, “Isaia na eperoveta-iaḡimito ḡofaḡofa tarimami tu moḡoni, maiḡesi etoreato,  
‘Mai besena tu  
mururi koriri ai moḡo  
au ḡegubakauguni ḡeri Barau,



senaġina ġia nuġari tu manaġa rakava.

<sup>7</sup> Ġetoma-rakariġo vini-kavaguni,  
ġeri vevaġa-riba tu tarimarima ġeri vevaġa-naġi taravaturi,  
a dia au ġegul'

<sup>8</sup> Ġomi na Barau ġena taravatu tu ġoraga-kwanerini, benamo tarimarima ġeri vevaġa-naġi ġokorana-iaġirini."

<sup>9</sup> Iesu na ma ekirarito, "Moġoni, ġomi na Barau ġena taravatu ġotuġamaġi-fitoġarini, tauġemi ġemi vevaġa-naġi boġono korana-iaġiri ġana. <sup>10</sup> Mose ekirato, 'Tamami sinami boġono gubakauri. Dei na tamana o sinana guruġa rakavari eviniani tarimana tu boġono vaġi-masea.' <sup>11</sup> Senaġi ġomi ġokirani, tarima ta na tamana o sinana bevaġa-guruġaiani, bekirani, 'Au na ġomi asi bavaġa-kavamini, korana bara vinimi dagarana tu au na Koban aviniani nai.' Koban anina tu Barau ġena. <sup>12</sup> Moġesi veiġai ġomi na tarima ġokouani, tamana e sinana asi bene vaġa-kavari ġana. <sup>13</sup> Ġomi na senemi ġeri vevaġa-naġi ġerina Barau ġena guruġa asi tauri ai moġo ġovaġa-iaġorini. Dagara vovoka moġesi ġoveirini."

*Tarimarima ġevaġa-rakavarini dagarari*  
*Mataio 15:10-20*

<sup>14</sup> Benamo Iesu na tarimarima ġutuma ma ekea-vegogorito ġenai, benamo ekirarito, ekirato, "Mabarami ġoseġaġi ema boġono riba-maoro. <sup>15</sup> Tarimarima murika na ġeġanirini, ġevariġoni tarima nuġari ġana, dagarari na tarima asi ġevaġa-rakavarini, senaġi tarimarima nuġari o loruri ġuturi na ġemaraġeni dagarari na vau tarimarima ġevaġa-rakavarini. [<sup>16</sup> Ma seġana tarimana bene seġaġi!]"

<sup>17</sup> Iesu na mai tarimarima ġutuma eraga-kwanerito, numai eraġekauto; benamo ġena mero na mo barabore anina ġevedanaġi-iaġiato. <sup>18</sup> Iesu na evaġa-guruġarito, ekirato, "Ġomi maki asi ġotuġamaġi-fakani? Asi ġoribani, murika na ġevariġoni dagarari na tarimarima asi ġevaġa-rakavarini? <sup>19</sup> Korana mo tu dia loruna na ġevariġoni, senaġina sinaġena na ġevariġoni, be ġeiaġoni moġo." Moġa anina tu, ġia na ġaniġani mabarari evaġa-moġonirito, asi ġeri rakava.

<sup>20</sup> Benamo ma ekirato, "Kara tarimarima loruna na emaraġeni, monana tarimarima evaġa-rakavaiani, <sup>21</sup> korana tarima loruna na tuġamaġi rakavari, kima veiġari, lema, vaġivaġi, <sup>22</sup> veġura-vanaġi, mata-ġaniġani, veiġa rakavari mabarari, ġofaġofa, mata-boraġa, mama, vevaġa-bade, veiavi, vei-babobabo ġeiaġomani. <sup>23</sup> Mabarari dagara rakavari, maiġeri loruna na ġemaraġeni, tarima ġevaġa-rakavarini."

*Vavine ta ġena veġabidadama*  
*Mataio 15:21-28*

<sup>24</sup> Iesu monana evariġisito, Taia e Sidono tanori ġana eiaġoto. Benamo numa tai ea raġekau-ġairito, ġia asi eurato tarima ta na bene ribaia ġia tu monai, senaġi asi ġena vekuretoġa dabarana. <sup>25</sup> Vavine ta, natuna ġuiatona iauka rakavana na eboroġiato, Iesu varina eseġaġiato nai, eiaġoto, kwakuna koranai evetui-tarito. <sup>26</sup> Mo vavine tu Grik vavinena, Siriafonesia ai emaġurito. Benamo ġia na Iesu enoġiato, mo iauka rakavana natuna ġuiatona ġenana bene lai-vaġia. <sup>27</sup> Benamo Iesu na ekiraiato, ekirato, "Mero misiri roġo beġene ġani-mase guine, korana asi maoro, mero misiri ġari ġaniġani bita ġabirini, kwaiva bita fiu-vinirini."

<sup>28</sup> Vavine na ma evaġa-veseato, ekirato, "Vereġauka, mani tu moġoni, senaġi kwaiva maki fata gaburenai mero misiri ġeġaniġanini momori tu ġeġanirini."

<sup>29</sup> Benamo ġia na mo vavine ma evaġa-guruġaiato, ekirato, "Maniġesi bovaġa-vese dainai, noġenoġoi, iauka rakavana tu natumu ġenana beraka-vaġi." <sup>30</sup> Benamo mo vavine eġenoġoito ġena numa ġana nuġanai, natuna ġuiatona ea doġariato, ġena gedai eġena-taġoto-ġoi eġitaiato, iauka rakavana tu moġoni eraka-vaġito.

*Iesu na seġa-bubu e muru-bubu tarimana evaġa-namoato*

<sup>31</sup> Benamo Iesu Taia tanona eraga-kwaneato, Sidono e Vanuġa Gabanana (10) tanori eraka-vanaġirito, Galilea kou ai eraġasito. <sup>32</sup> Benamo tarima kotari na seġa-bubu e asi

eguruḡa-ginikauto-ḡoi tarimana ta ḡeḡabi-iaḡoato, benamo ḡenoḡiato, ḡimana iatanai bene tore-kaua. <sup>33</sup> Benamo Iesu na tarimarima ḡutuma nuḡari na eḡori-veḡitaiato, didina seḡana kouḡanai eduḡi-toḡarito, ekanunuto, benamo meana eḡabi-karaiato. <sup>34</sup> Gubai eboḡe-raḡeto, eiaḡa-raḡeto ma ḡabana ḡesi, ekirato, “Efata!” anina tu “Noḡwa-faka!”

<sup>35</sup> Benamo seḡana ḡeḡwa-fakarito, meana everuḡato, eroroḡototo, benamo eguruḡa-ḡitakauto. <sup>36</sup> Iesu na ekirarito, tarima ta asi beḡene kira-varaia, senaḡi ekirarito-ḡoi guruḡari tu asi ḡeseḡaḡiato-ḡoi, ḡia varina tu ḡefiu-rovorovoato-ḡoi. <sup>37</sup> Tarimarima nuḡari ḡefarevaḡi-rakavato, ḡekirato, “Ḳia na dagara mabarari evei-ḡitakaurini, seḡa-bubu tarimari evaḡa-seḡaḡirini, muru-bubu tarimari evaḡa-guruḡarini.”

## 8

*Iesu na tarimarima daḡara vasivasi (4,000) eḡuburito*

<sup>1</sup> Mo negai tarimarima ḡutuma lelevaḡi ma ḡevegogo-ḡenoḡoito. Ḳia asi ḡari ḡaniḡani nai, Iesu na ḡena mero ekea-kavirito sevina ḡana, benamo evaḡa-guruḡarito, ekirato, <sup>2</sup> “Au na mai tarimarima avetuḡarini, korana mai tu ḡaro toitoi veḡata au ḡesi maiḡeri, nuḡanai tu asi ḡari ḡaniḡani. <sup>3</sup> Bema au na batuḡu-ḡenoḡoirini ḡeri vanuḡa ḡana ma vitori ḡesi nai, dabarai beḡe borimarini, korana kotari tu gabu manaḡa na ḡeiaḡomato nai.” <sup>4</sup> Benamo ḡena mero na ḡevaḡa-veseato, ḡekirato, “Kamara dabarai tarima ta na mai tarimarima beredi na beḡuburini mai tano fakanai?” <sup>5</sup> Benamo Iesu na edanaḡirito, ekirato, “Ḳomi ḡemi ai beredi tu vira?” Ḳia ḡevaḡa-veseto, ḡekirato, “Imaima ruarua (7).”

<sup>6</sup> Iesu na vegogo tarimari evaḡa-guruḡarito, tano ai ḡetanutanu-tari. Benamo beredi imaima ruarua (7) eḡabirito, Barau evaḡa-namoato, ebuki-ḡuturito, ḡena mero evinirito, mo tarimarima ḡoirari ai beḡene toretore-tariri ḡana. Benamo moḡesi ḡeveirito. <sup>7</sup> Ḳia ḡeri ai maki maḡani-kone misiri kotari. Iesu na Barau ma evaḡa-namoato, ḡena mero ekirarito, moḡeri maki ḡevareri. <sup>8</sup> Benamo tarimarima ḡeḡani-maseto murinai, Iesu ḡena mero na ḡaniḡani kwari ḡegogorito, boseḡa mabarari imaima ruarua (7) ḡevaḡa-vonurito. <sup>9</sup> Tarimarima mabarari tu 4,000 kavana. Benamo Iesu na etuḡu-rovorovorito, <sup>10</sup> ma ḡia ema ḡena mero ḡesi ḡasi ai ḡeraḡeto, Dalmanuta tanona ḡana ḡeiaḡoto.

*Farisea tarimari ḡeri ura vetoḡa ta guba na bene mariḡo*  
*Mataio 16:1-4*

<sup>11</sup> Farisea tarimari kota Iesu ḡenai ḡeiaḡoto, benamo ḡedanaḡi-ribaḡaniato. Ḳeri ura vetoḡa ta guba na bene mariḡo. <sup>12</sup> Iesu iaḡana eḡaniato ma nuḡa metona ḡesi, benamo ekirato, “Karase nai toma ḡuru tarimari na vetoḡa ḡeḡita-vetaurini? Moḡoni akiramini, vetoḡa ta asiḡina ḡinavaḡi bavinimini!” <sup>13</sup> Benamo eraga-kwanerito, ḡasi ai ma eraḡeto, kou tavi ta ḡana ea vanaḡito.

*Farisea tarimari e Heroda*  
*Mataio 16:5-12*

<sup>14</sup> Iesu ḡena mero ḡevetuḡa-rekwato, ḡaniḡani asi ḡeḡabikauto, beredi sebona moḡo ḡasi ai. <sup>15</sup> Benamo Iesu na esisiba-vinirito, ekirato, “Lorimi boḡono vetore, Farisea tarimari e Heroda ḡari farao evaḡa-tubuani muramurana garina.”

<sup>16</sup> Benamo mo guruḡa tauḡeri fakari ai ḡeverori-iaḡiato, ḡekirato, “Moḡesina bekira, korana ḡita tu asi ḡara beredi nai.”

<sup>17</sup> Iesu na eribarito, benamo evaḡa-guruḡarito, ekirato, “Karase nai beredi ta sevimi ai asiḡi guruḡana ḡoveini? Ḳomi roḡosi boḡono riba, roḡosi boḡono tuḡamaḡi-faka? Nuḡami maki roḡo bubu? <sup>18</sup> Ma matami, senaḡi asi ḡoḡitani? Ma seḡami, senaḡi asi ḡoseḡaḡini? Asi ḡovetuḡamaḡi-taḡoni maki? <sup>19</sup> Au na beredi imaima abuki-ḡutuḡuturito tarimarima 5,000 ḡari nai, beredi kwari ḡogogorito tu, boseḡa vira ḡovaḡa-vonurito?” Ḳia ḡevaḡa-veseto, ḡekirato, “Gabanana ruarua (12).”

<sup>20</sup> “Au na beredi imaima ruarua (7) abuki-ġutuġuturito tarimarima 4,000 ġari nai, beredi kwari ġogogorito tu boseġa vira ġovaġa-vonurito?” Ġia ġevaga-veseto, ġekirato, “Imaima ruarua (7).” <sup>21</sup> Benamo Iesu na ekirarito, “Ġomi roġosi boġono tuġamaġi-faka?”

*Iesu na mata-bubu tauna matana evaġa-iaġaiato Betesaida ai*

<sup>22</sup> Ġia Betesaida ġana ġeiaġoto, benamo tarima kotari na mata-bubu tauna ta Iesu ġenai ġeġori-iaġoato, benamo ġenoġiato, bene ġabi-karaia. <sup>23</sup> Benamo Iesu na mata-bubu tauna ġimananai eġabito, eġori-rosiato vanuġa na, benamo matana ekanunuato, ma ġimana ġenai etore-kaurito, edanaġiato, “Dagara tari oġitarini ba?”

<sup>24</sup> Mo tarima eboġe-vaesito, ekirato, “Oi, tarima tari aġitani, senaġina noġa moġo ġau noġa ġerakao-rakaoni.”

<sup>25</sup> Benamo Iesu ġimana matanai ma etore-kaurito, benamo eboġeboġe-ginikauto, dagara mabarari eġita-ginikaurito. <sup>26</sup> Benamo Iesu na numa ġana etuġu-iaġoato, evaġa-guruġaiato, ekirato, “Vanuġa nuġana na asi bono iaġo.”

*Petero na Iesu tu Kerisona ekiraġito*

*Mataio 16:13-20; Luka 9:18-21*

<sup>27</sup> Iesu na ġena mero ġesi Kaisarea Filipi tanona vanuġari ġana ġeiaġoto-ġoi nuġanai, dabarai Iesu na ġena mero edanaġirito, ekirato, “Tarimarima tu kara ġetoni au tu dei?”

<sup>28</sup> Ġia ġevaġa-veseto, ġekirato, “Kotari ġekirani tu Ioane Babatiso, ma kotari tu Elia, ma kotari tu peroveta tarimana ta.” <sup>29</sup> Iesu na edanaġirito, ekirato, “Senaġi ġomi tu kara ġotoni au tu dei?” Petero na evaġa-veseato, ekirato, “Ġoi tu Keriso, (Barau na ekiraġi-toreato vevaġa-maġuri tauna).” <sup>30</sup> Benamo Iesu na evaġa-guruġarito, tarima ta asi beġene kira-varaia.

*Iesu ġena mase e variġisi-ġenoġoi guruġari*

*Mataio 16:21-28; Luka 9:22-27*

<sup>31</sup> Benamo Iesu na ġena mero ma evaġa-ribarito, ekirato, “Tarimarima Natuna tu midigu vovoka roġo beġanini. Iuda vereri, e Rubu Veaġa vereri baregori, e taravatu ġevevaġa-riba iaġiani tarimari na beġe ruġaiani; ema beġe vaġi-maseani maki, senaġina ġaro toitoi murinai mase na ma bevariġisi-ġenoġoini.” <sup>32</sup> Mai guruġa ekiraġi-foforiato, benamo Petero na eġori-veġitaiato, ekira-ġoiato. <sup>33</sup> Senaġi Iesu eruġa-kureto, ġena mero eġitarito, ġia na Petero ekira-ġoiato, ekirato, “Satani, noraka-veġita, korana ġemu tuġamaġi tu dia Barau ġena, senaġi tarimarima ġeri moġo.”

<sup>34</sup> Iesu na tarimarima ġutuma ma ġena mero ġesi ekea-vegogorito, benamo evaġa-guruġarito, ekirato, “Bema tarima ta eurani au murigu ai bene raka etoni tarimana, tauġena bene veruġa, ġena satauro bene ġwaia, au murigu ai bene raka. <sup>35</sup> Korana deikara ġena maġuri moġo lorina etoreani tarimana, ġena maġuri befitoġaiiani. A deikara au daigu ai e Vari Namona dainai ġena maġuri befitoġaiiani tarimana, ġena maġuri asi bevei-rekwarekwaiani. <sup>36</sup> Bema tarima ta na tanobara mabarana uranai ġena maġuri befitoġaiiani, ġena namo tu kara ġia ġenai? <sup>37</sup> Korana tarima ta ġena maġuri efitoġaiato nai tu, kara na vau ma bevoi-ġenoġoiani? <sup>38</sup> Deikara na au bemaika-viniguni ema ġegu guruġa bemaika-viniani mai veġura-vanaġi e vei-rakava tarimari ġoirari ai, ġia maki Tarimarima Natuna na bemaika-viniani ġena iaġomai, ġia Tamana mamana marevana e seġuka baregona e ma ġena aneru veaġari ġesi beġe iaġomani ġaronai.”

## 9

<sup>1</sup> Benamo ekirarito, ekirato, “Moġoni akiramini: Tarima kotari mai ġeruġa-taġoni tu asi roġo beġe maseni, beiaġoni mo, Barau ġena Basileia ma seġukana ġesi beiaġomani beġe ġitaiiani.”

*Iesu vetoġana eirauto*

*Mataio 17:1-13; Luka 9:28-36*

<sup>2</sup> Ġaro imaima sebona (6) ġevanaġito murinai, Iesu na Petero, e Iakobo (o Iames), ema Ioane eġabirito, benamo ġoro baregona tai eġori-raġerito. Monai ġia ġereġari

moḡo nuḡanai Iesu ḡeḡitaiato, vetoḡana eirauto, <sup>3</sup> ema ḡena dabuḡa ekuro-ḡaroḡaroto, tanobarai tarima ta na asi ilaila moḡesina bevaḡa-kurokuroani. <sup>4</sup> Benamo ḡia ḡoirari ai Elia ma Mose ḡefoforito, Iesu ḡesi ḡeguruḡa guruḡato-ḡoi.

<sup>5</sup> Benamo Petero na Iesu evaḡa-guruḡaiato, ekirato, “Vevaḡa-riba tarimamu o, namo vedaurea ḡita tu maiḡera, be fouta toitoi ḡaragari. Ta ḡoi ḡemu, ta Mose ḡena, ta Elia ḡena.” <sup>6</sup> Petero asi ribana kara bekiraḡiani, korana ḡia tu ḡegari-rakavato. <sup>7</sup> Benamo magube na ema iauka-taririto, ekumu-ḡaurito nuḡanai, garo ta magube nuḡana na ekearosito, ekirato, “Mai tu au Natugu, aura-viniani; ḡia boḡono seḡaḡi-vinia!” <sup>8</sup> ḡia na mo gabu ḡeraga-ḡita-ḡeḡeraḡiato, senaḡi ta asi ḡeḡitaiato ḡia ḡesi, Iesu moḡo ḡereḡana.

<sup>9</sup> ḡoro na ḡemariḡoto-ḡoi nuḡanai, Iesu na evaḡa-guruḡarito, kara ḡeḡitaiato dagarana tarima ta asi beḡene kira-varaia, bene iaḡo mo, Tarimarima Natuna mase na ma bene variḡisi-ḡenoḡoi. <sup>10</sup> Moḡa lorinai ḡena guruḡa fakari ai moḡo etanuto, senaḡi ḡia fakari ai ḡeverorito, mai mase na variḡisi-ḡenoḡoi anina tu kara. <sup>11</sup> Benamo ḡia na Iesu ḡedanaḡiato, ḡekirato, “Karase nai taravatu ḡevevaḡa-riba iaḡiani tarimari ḡekirani, Elia tu beiaḡoma-guineni?”

<sup>12</sup> Iesu evaḡa-veseto, ekirato, “Moḡoni, Elia tu beiaḡoma-guineni, dagara mabarari bevaḡa-variḡurini. A Tarimarima Natuna guruḡana kamasi ḡetoreato midigu vovoka beḡanini e beḡe ḡita-fitoḡaiani? <sup>13</sup> Senaḡi akiramini, Elia tu varau eiaḡomato, ema ḡeri ura veiḡari ḡia ḡenai varau ḡeveirito, ḡia guruḡana Buka Veaḡai ḡetore-guineato ilailanai.”

*Iesu na iauka rakavana na eboroḡiato merona evaḡa-namoato  
Mataio 17:14-21; Luka 9:37-43*

<sup>14</sup> ḡena mero ḡeri ai ḡevotuto tu, tarimarima ḡutuma lelevaḡi na ḡeruḡa-ḡeḡeraḡirito, ḡeḡitarito, taravatu ḡevevaḡa-riba iaḡiato-ḡoi tarimari maki ḡia ḡesi ḡeveḡare veḡareto-ḡoi. <sup>15</sup> Tarimarima na Iesu ḡeḡitaiato nai, nuḡari ḡefarevaḡito, benamo ḡenai ḡeraga-iaḡoto, ḡea vaḡa-namoato. <sup>16</sup> Iesu na edanaḡirito, ekirato, “Mai tarima ḡesi tu kara veḡare-veḡarena ḡoveini?”

<sup>17</sup> Benamo tarima ta ḡutuma nuḡari na evaga-veseto, ekirato, “Vevaḡa-riba tarimamu, au natugu ḡoi ḡemu ai baḡori-iaḡomaia. ḡia tu muru-bubu iaukana na eboroḡiato nai, asi eguruḡani. <sup>18</sup> Ma mai iauka na eḡabiani ḡarori ai, tano ekwaraḡi-iaḡiani. Bokana na kaburoburo ḡeraka-rosini, gadikana eveḡara-tarini, tauḡanina egwaḡiḡini. Moḡa lorinai ḡoi ḡemu mero banoḡiri, mai iauka rakavana ḡelai-vaḡia basi, senaḡi beḡe lai-kavaia.”

<sup>19</sup> Benamo Iesu ekirato, “Asi veḡabidadama tarimami! ḡaro vira au ḡomi sevimi ai bana tanu? ḡaro vira bana vevaḡa-gwaḡiḡi vinimi? ḡoḡori-iaḡomaia!” <sup>20</sup> Benamo mo mero Iesu sevina ḡana ḡeḡori-iaḡoato. Iauka rakavana na Iesu eḡitaiato nai, vaḡa-sebo mero evaḡa-ḡoḡo-ḡoḡoato, tano ai eketoto, egena-vebiro vebirototo, bokana na kaburoburo ḡeraka-rosito.

<sup>21</sup> Iesu na mero tamana edanaḡiato, ekirato, “Aitoma mai keve edoḡariato?” Tamana evaḡa-veseto, ekirato, “Mai tu keina na veḡata! <sup>22</sup> Nega vovoka iauka rakavana na karavai efiu-kauani, ema nanu ai efiu-reiani bene vaḡia ḡana. Bema dagara ta boveiani riba nai, mani ḡemu veiḡa, boro vetuḡa-ḡwama, boro vaḡa-kavama.” <sup>23</sup> Benamo Iesu ekirato, “Bema dagara ta boveiani riba otoni? Barau ḡenai eveḡabi-dadamani tarimana dagara mabarari beveirini riba.” <sup>24</sup> Benamo mero tamana asikauna eḡaba-fouto, ekirato, “Au aveḡabidadamani, senaḡi ḡegu tuḡamaḡi iauvoiauvo noma boroḡia.”

<sup>25</sup> Iesu na tarimarima ḡutuma ḡeraga-vegogoto-ḡoi eḡitarito nai, ḡia na mo iauka rakavana ekira-ḡoiato, ekirato, “Muru-bubu e seḡa-bubu iaukana, akiramuni, noraka-vaḡi, ma nuḡanai asi ma bono raka-toḡa ḡenoḡoi!” <sup>26</sup> Benamo iauka rakavana eḡabafouto, ḡia na mero evaḡa-ḡoḡoḡoḡo rakavaiato, benamo eraka-vaḡito. Mero tu ḡitaḡitana noḡa emaseto, moḡa lorinai tarimarima ḡutuma ḡekirato, “Mai tu bemase.” <sup>27</sup> Senaḡi Iesu na ḡimanai eḡabito, einu-vaisiato, benamo eruḡa-vaisito.

<sup>28</sup> Moġa murinai Iesu numai eraġekauto, ġena mero na vekuretoġai ġedanaġiato, ġekirato, “Karase nai ġai na iauka rakavana asi ilaila baġa lai-vaġia?” <sup>29</sup> Benamo Iesu na evaġa-veserito, ekirato, “Iauka maiġesina lailairi tu kara ta asiġina, senaġina ġauġau [e ġaniveaġa] ġereġana moġo.”

*Iesu ġena mase ma ekiraġi-ġenoġoiato*

*Mataio 17:22-23; Luka 9:43-45*

<sup>30</sup> Mo gabu ġeraga-kwaneato, Galilea tanona na ġevanaġito. Iesu asi ġena ura tarima ta bene riba ġia tu ainai, <sup>31</sup> korana ġena mero evaġa-ribarito, ekirato, “Tarimarima Natuna tu beġe revaiani vau, tarimarima ġimari ai beġe toreani, benamo beġe vaġi-maseani, senaġi beġe vaġiani nai, ġaro toitoi murinai tu ma bevariġisi-ġenoġoini.”

<sup>32</sup> Senaġi ġia tu asi ġeriba-maoroto Iesu tu kara ekiraġiato, senaġi asi ma ġedanaġiato, korana ġegarito nai.

*Deikara tu barego vedaurea*

*Mataio 18:1-5; Luka 9:46-48*

<sup>33</sup> Kaperanaumai ġeraġasito, benamo Iesu na numa nuġanai vau edanaġirito, ekirato, “Ġomi dabarai tu kara ġokiraġiani-ġoi?” <sup>34</sup> Senaġi ġia tu asi ġevaġa-veseto, korana dabarai tu, deikara barego vedaurea ġekiraġiato-ġoi. <sup>35</sup> Iesu etanu-tarito, ġena mero gabanana ruarua (12) ekearito, benamo ekirarito, ekirato, “Dei bene guine etoni tarimana tu gabi taunai bene iaġo, ema tarimarima mabarari vetuġunaġiri bene iaġo-vini.” <sup>36</sup> Benamo ġia na mero keina ta eġabiato, ġia fakari ai evaġa-ruġa-tariato, efani-vaiaġo, benamo ekirarito, ekirato, <sup>37</sup> “Dei na mero keina maiġesina kavana beġabi-raġeani au aragu ai, ġia na tu au beġabi-raġeguni. Bema tarima ta na au beġabi-raġeguni tu, dia au ġereġagu moġo beġabi-raġeguni, senaġi etuġuguto Barauna maki beġabi-raġeani.”

*Deikara na ġita asi bevaġa-rakavarani tarimana tu ġita ġesi*

*Luka 9:49-50*

<sup>38</sup> Ioane na Iesu ekiraiato, ekirato, “Vevaġa-riba tarimamu, tarima ta ġaġitaiato, ġoi aramu ai iauka rakavari elai-vaġirito-ġoi, senaġi ġai na ġakira-ġoiato, korana ġia tu dia ġita ġesi taraka-vegogoni.”

<sup>39</sup> Iesu na ekirarito, ekirato, “Asi boġono kira-ġoia, korana tarima ta au aragu ai nuġa-farevaġi veiġa boruri eveirini tarimana tu, au murigu ai au asi ma bekira-rakavaguni. <sup>40</sup> Korana deikara na ġita asi evaġa-rakavarani tarimana tu ġita ġesi. <sup>41</sup> Moġoni akiramini, tarima ta na nanu kapusina au aragu ai bevinimini, korana ġomi tu Keriso ġena tarima nai, ġia voina tu beġabiani veġata.”

*Tarima ta na mero misina ġena veġabidadama asi bene vaġa-rakavaia*

*Mataio 18:6-9; Luka 17:1-2*

<sup>42</sup> “Bema tarima ta na au eġabidadama-viniguni mero misina ta ġena veġabidadama evaġa-rakavaiani, ġia tu bere namo fore baregona ta ġaiġonai ġere baru-kaua, davarai ġere fiu-reia. <sup>43</sup> Bema ġoi ġimamu na evaġa-rakavamuni nai, bono basi-ġutua. Ġimamu sebonai maġuri vanaġivanaġi bono doġaria tu namo, a asi namo ġimamu ruarua karava eġara-vanaġi vanaġini asi ebuseni gabuna ġana boiaġoni. [<sup>44</sup> Monai ‘dimo na beġe ġani-vanaġi vanaġimini, ema karava asi ebuseni.’] <sup>45</sup> Bema ġoi kwakumu na evaġa-rakavamuni nai, bono basi-ġutua. Kwakumu sebonai maġuri vanaġivanaġi bono doġaria tu namo, a asi namo kwakumu ruarua karava eġara-vanaġi vanaġini gabunai beġe fiu-kaumuni. [<sup>46</sup> Monai ‘dimo na beġe ġani-vanaġi vanaġimini, ema karava asi ebuseni.’] <sup>47</sup> Bema ġoi matamu na evaġa-rakavamuni nai, bono ġibo-vaġia. Matamu sebonai Barau ġena Basileiai bono raka-toġa tu namo, a asi namo matamu ruarua karava eġara-vanaġi vanaġini gabunai beġe fiu-kaumuni. <sup>48</sup> Monai ‘dimo na beġe ġani-vanaġi vanaġimini, ema karava asi ebuseni.’

<sup>49</sup> Mabarari karava na bedamenarini, beiarevarini.

<sup>50</sup> Damena tu namo, senaḡi bema damena mamina bekorini nai, mamina kamasi ma bovaḡa-mamina ḡenoḡoiani? Nuḡami ai damena bene tanu, e ḡomi tata karomi ḡesi maino nuḡanai boḡono tanu.”

## 10

### *Veḡaraḡo ruḡaruḡana*

<sup>1</sup> Iesu mo gabu eraga-kwaneato, benamo Iudea tanona ḡana eiaḡoto, Ioridana ḡarukana tavi tai evanaḡito. Tarimarima ḡutuma lelevaḡi ḡia ḡenai ma ḡeiaḡoto, benamo eveito-ḡoi kavana ma evaḡa-ribarito.

<sup>2</sup> Benamo Farisea tarimari ma ḡeiaḡoto, benamo ḡea danaḡi-ḡofakauato, ḡekirato, “Tau ta ḡaraḡona befitoḡaiani nai, taravatu na beḡabiani?” <sup>3</sup> Iesu na ma evaḡa-veserito, ekirato, “Mose ḡena taravatu nuḡanai kara etoni?” <sup>4</sup> ḡekirato, “Mose ḡena taravatu tu maiḡesi ekirani, veḡaraḡo ruḡaruḡana fefana betoreani vau, ḡaraḡona betuḡu-rakaiani.” <sup>5</sup> Iesu na ekirarito, ekirato, “Mose na mai taravatu etoreato, korana ḡomi nuḡami tu roḡo bubu. <sup>6</sup> Senaḡina Barau na dagara mabarari eveirito nai, ḡia na tarimarima maki eveirito tau e vavine. <sup>7</sup> Moḡesina nai tau ta na tamana e sinana beraga-kwanerini, ḡaraḡona ḡesi beḡe tanuni. <sup>8</sup> Benamo ḡia tauri ruarua beḡe sebonani, moḡa lorinai ḡia tu dia ruarua, senaḡi sebona moḡo. <sup>9</sup> Moḡesi nai dei Barau na evaḡa-sebonarito tu, tarima ta na asi ma bene tore-kirari.”

<sup>10</sup> Ma ḡeḡenoḡoito numai, ḡena mero na ma ḡedanaḡiato mo guruḡa anina tu kara. <sup>11</sup> Iesu na evaḡa-veserito, ekirato, “Deikara na ḡaraḡona betuḡu-rakaiani, vavine ta ma beḡaraḡoani, ḡia tu beveḡura-vanaḡini. <sup>12</sup> Vavine maki moḡesina, ḡia ḡaraḡona beraga-kwaneani, tau ta na ma beḡaraḡoani, ḡia maki beveḡura-vanaḡini.”

### *Iesu na mero misiri evaḡa-namorito*

#### *Mataio 19:13-15; Luka 18:15-17*

<sup>13</sup> Tarima kotari na naturi ḡeḡwa-iaḡorito-ḡoi Iesu ḡenai bene ḡabi-karari ḡana, senaḡi ḡena mero na ḡekira-ḡoirito. <sup>14</sup> Iesu na eḡitarito nai tu ebaruto. Benamo ḡena mero ekirarito, ekirato, “Mani mero misiri ḡeiaḡoma au ḡegu ai, asi ḡolai-ḡoiri, korana Barau ḡena Basileia tu maniḡesina kavana tarimari ḡeri. <sup>15</sup> Moḡoni akiramini, dei na Barau ḡena Basileia asi beḡabi-raḡeani mero misina na kavana, ḡia Basileiai tu asi beraka-toḡani.” <sup>16</sup> Benamo Iesu na mero misiri efaḡa-vaisirito, benamo ḡimana iatari ai etore-kaurito, evaḡa-namorito.

### *Farefare vovoka tarimana*

#### *Mataio 19:16-30; Luka 18:18-30*

<sup>17</sup> Iesu monana ma evaisi-raḡeto, benamo erakato nuḡanai, tarima ta ḡenai eraga-iaḡoto, benamo ḡoiranai ea vetui-tarito, edanaḡiato, ekirato, “Vevaḡa-riba tarimamu namona, au tu kara baveini vau maḡuri vanaḡivanaḡi baḡabiani?” <sup>18</sup> Iesu na evaḡa-veveato, ekirato, “ḡoi tu karase nai au namogu okiraḡini? Tarima ta asi namo, Barau moḡo ḡereḡana. <sup>19</sup> Taravatu mabarari ma ribamu, ‘Asi bono vaḡivaḡi, asi bono veḡura-vanaḡi, asi bono lema, asi bono vevaḡa-daḡa ḡofaḡofa, asi bono ḡabi-kuretoḡa, tamamu sinamu bono gubakauri.’”

<sup>20</sup> Benamo mo tarima ekirato, “Vevaḡa-riba tarimamu, au tu keigu na beiḡoma toma, mani taravatu mabarari akorana-iaḡirini.” <sup>21</sup> Iesu na eḡitaiato ma veuravinina ḡesi ekirato, “Dagara sebona moḡo orabuni, noiaḡo, ḡemu farefare mabarari noa voivoi-iaḡiri, rabu tarimari bono viniri, benamo gubai tu ma ḡemu farefare; ma bono iaḡoma, murigu ai bonoma raka.” <sup>22</sup> Mo tarima na mai guruḡa eseḡaḡiato nai, ḡoirana evaḡa-gwaḡiḡiato, nuḡana ma metona ḡesi eraka-veḡitato, korana ḡia ḡena farefare tu ḡutuma lelevaḡi.

<sup>23</sup> Benamo Iesu na ḡena mero eḡita-ḡeḡeraḡirito, benamo evaḡa-guruḡarito, ekirato, “ḡeri farefare vovoka tarimari Barau ḡena Basileiai ḡeri rakatoḡa tu gwaḡiḡi rakava.”

<sup>24</sup> Benamo Iesu ḡena mero na mo guruḡa ḡeseḡaḡiato nai, nuḡari ḡefarevaḡito,

senaḡi Iesu na ma evaḡa-guruḡa ḡenoḡoirito, ekirato, “Natuḡore, Barau ḡena Basileia rakatoḡana tu gwaḡiḡi rakava.”<sup>25</sup> Kamela nila kadarena na bevanaḡini tu kotuna gwaḡiḡi, senaḡi ḡena farefare vovoka tarimana Barau ḡena Basileiai ḡena rakatoḡa tu gwaḡiḡi rakava.”<sup>26</sup> Benamo ḡena mero nuḡari ḡefarevaḡi-rakavato, benamo ḡevaḡa-guruḡaiato, ḡekirato, “Be deikarari vau maḡuri beḡe ḡabiani?”<sup>27</sup> Iesu na eḡitarito, benamo ekirato, “Tarimarima ḡeri ai tu asi ilaila, senaḡi Barau ḡenai tu ilaila, korana Barau ḡenai dagara mabarari tu ilaila.”

<sup>28</sup> Petero na ekiraiato, ekirato, “Ḡoi ribamu, ḡai ḡema dagara mabarari tu ḡaraga-kwanerito, benamo ḡoi murimu ai ḡarakani.”<sup>29</sup> Iesu evaḡa-veseto, ekirato, “Moḡoni akiramini, tarima ta ḡena numa eraga-kwaneato, o tarikakana merori, tobana, sinana, tamana, natuna e ḡena tano au daigu ai ema Vari Namona dainai,<sup>30</sup> ḡia mai maḡuri nuḡanai ḡena numa, tarikakana merori, tobana, sinana, natuna e tano sinau-sinau beḡoitaḡoni, ema midigumidigu maki; ema ḡaro beiaḡomani nai, maḡuri vanaḡivanaḡi bedoḡariani.”<sup>31</sup> Senaḡi tarimarima ḡutuma toma ḡeguineni tu beḡe gabini, gabi tarimari tu beḡe guineni.”

*Iesu ḡena mase ma ekiraḡi-foforiato*

*Mataio 20:17-19; Luka 18:31-34*

<sup>32</sup> Iesu ma ḡena mero ḡesi Ierusalemata ḡana ḡevaraḡeto-ḡoi, dabara na ḡeraka-iaḡoto-ḡoi, Iesu tu ḡoirari ai erakato, benamo ḡia ḡeḡaba-rakavato, ema muriri na ḡerakato tarimari maki ḡegarito. Benamo Iesu na ḡena mero gabanana ruarua (12) ma eḡori-veḡitarito, benamo ḡenai kara beḡe ḡorani dagarari ekira-vararito,<sup>33</sup> ekirato, “Ḡoseḡaḡi, ḡita tu Ierusalemata ḡana tavaḡeni. Monai Tarimarima Natuna tu Rubu Veaḡa vereri baregori e taravatu ḡevevaḡa-riba iaḡiani tarimari ḡimari ai beḡe toreani. Ḡia na ḡena mase guruḡana beḡe vaḡa-moḡoniani, benamo irau bese (o Roma) tarimari ḡimari ai beḡe toreani.”<sup>34</sup> Ḡia na beḡe vaseva-vaseva iaḡiani, beḡe kanunuani, beḡe kwariani e beḡe vaḡi-maseani. Senaḡi ḡaro toitoi murinai ma bevariḡisi-ḡenoḡoini.”

*Iakobo (o Iames) ma Ioane ḡeri noḡinoḡi*

*Mataio 20:20-28*

<sup>35</sup> Benamo Sebedaio natuna, Iakobo ma Ioane, Iesu ḡenai ḡeiaḡoto, benamo ḡekirato, “Vevaḡa-riba tarimamu, ḡai ḡaurani kara baḡa noḡimuni dagarana bono vinima.”<sup>36</sup> Iesu na ekirarito, ekirato, “Kara ḡemi ai bana veia ḡotoni?”<sup>37</sup> Benamo ḡia na ḡevaḡa-guruḡaiato, ḡekirato, “Ḡai ḡaurani, ḡai ta aroribamu rekenai, ma ta tu kaurimu rekenai baḡana tanu ḡoi ḡemu Basileia marevana nuḡanai.”

<sup>38</sup> Senaḡi Iesu na ekirarito, ekirato, “Ḡomi tu asi ribami kara ḡonoḡiani. Au na midigu bedina banianuani ḡomi maki boḡo niuni riba? Au beḡe babatisoguni babatisona ḡomi na maki boḡo ḡabiani riba?”<sup>39</sup> Ma ḡevaḡa-veseto, ḡekirato, “Oi.” Iesu na ekirarito, ekirato, “Moḡoni, au banianuani bedinai ḡomi maki boḡo niuni, ema au beḡe babatisoguni babatisona ḡomi maki beḡe babatisomini.”<sup>40</sup> Senaḡi aroribagu rekenai o kaurigu ai boḡono tanu ḡotoni tu, dia au na bavaḡa-moḡoniani, a mai tu Barau na eḡabi-torerito tarimari ḡeri.”

<sup>41</sup> Mai guruḡa mero gabanana (10) ḡeseḡaḡiato nai, Iakobo e Ioane ḡebaru-vinirito.<sup>42</sup> Benamo Iesu na mabarari ekea-vegogorito, benamo evaḡa-guruḡarito, ekirato, “Ḡomi ribami, irau bese tarimari ḡeri vere na tarimarima ḡedori-naḡinaḡirini, ema ḡeri veguine-iaḡi tarimari baregori na tu ḡeri maoro seḡukari na ḡelaunaḡi-naḡirini.”<sup>43</sup> Senaḡi ḡomi fakami ai moḡesina tu asi boḡono vei. Bema ta ḡomi fakami ai bene vere etoni nai tu, ḡomi mabarami vetuḡunaḡimi bene iaḡo-vini,<sup>44</sup> ema dei bene guine etoni tarimana, ḡia tu mabarari ḡeri vetuḡunaḡi tarimanai bene iaḡo.<sup>45</sup> Korana Tarimarima Natuna eiaḡomato tu, dia tarimarima na ḡia vetuḡunaḡina beḡene iaḡo-vini ḡana, senaḡina ḡia eiaḡomato tu, tarimarima vetuḡunaḡiri bene iaḡo-vini, ema ḡena maḡuri bene tore-taria, tarimarima ḡutuma bene voi-ḡenoḡoiri e bene vaḡa-maḡuriri ḡana.”

*Iesu na mata-bubu tarimana Batimeo matana evaḡa-namoato*

*Mataio 20:29-34; Luka 18:35-43*

<sup>46</sup> Ieriko ai ḡeraḡasito, monana Iesu ma ḡena mero e tarimarima ḡutuma lelevaḡi ḡesi Ieriko ma ḡeraga-kwaneato nuḡanai, Batimeo, mata-bubu e noḡivegame tarimana, Timeo natuna, dabara rikinai etanu-taḡoto-ḡoi. <sup>47</sup> Ḡia eseḡaḡito Iesu, Nasareta tarimana, tu ḡia sevinai, benamo ekea-fouto, ekirato, “Iesu o, Davida natuna, au novetuḡa-ḡwagu!” <sup>48</sup> Tarimarima ḡutuma na ḡekira-ḡoiato, asi bene guruḡa ḡetato, senaḡi ḡia ekea-ḡiḡiraḡe ḡiḡiraḡeto-ḡoi, “Davida Natuna o, au novetuḡa-ḡwagu!”

<sup>49</sup> Iesu eruḡa-tarito, benamo ekirato, “Ḡokeaia.” Benamo ḡia na mata-bubu tarimana ḡekeaiato, ḡekirato, “Asi bono gari, novariḡisi, Iesu na ekeamuni bene.” <sup>50</sup> Benamo ḡena koudi efitoḡaiato, eburi-vaisito, Iesu sevina ḡana eiaḡoto. <sup>51</sup> Benamo Iesu na edanaḡiato, ekirato, “Kara ḡemu naveia otoni?” Mata-bubu tarimana evaḡa-veseto, ekirato, “Vevaḡa-riba tarimamu, matagu noma keo-fakaia.” <sup>52</sup> Benamo Iesu ekirato, “Noiaḡo, ḡemu veḡabidadama na bevaḡa-namomu.” Benamo asikauna matana enamoto e eboḡeboḡe-ginikauto, benamo Iesu murina na dabara na eraka-iaḡoto.

## 11

*Iesu ḡena rakatoḡa Ieruselema ai ḡevonevone-raḡe viniato*

*Ioane 12:12-19*

<sup>1</sup> Ḡeraka-iaḡoto-ḡoi, Ieruselema ḡekavinaḡiato-ḡoi, ma Betefage e Betania ai ḡeraḡasito Olive Ḡorona rekenai, benamo Iesu na ḡena mero ruarua etuḡu-guinerito, <sup>2</sup> ekirarito, ekirato, “Ḡoiaḡo, ḡoira vanuḡana ḡana. Boḡo raḡasini nai, doniki natuna ta barutarinai boḡo ḡitaiani, iatanai tarima ta roḡosi bene raḡe. Boḡono ruḡaia, benamo boḡono ḡori-iaḡomaia. <sup>3</sup> Bema tarima ta na bedanaḡimini, bekirani, ‘Ḡomi tu karase nai maniḡesi ḡoveiani?’ betoni nai, boḡono kiraia, ‘Vereḡauka na eura-viniani, vau ma betuḡu-ḡenoḡoiani.’”

<sup>4</sup> Benamo ḡerakato, ḡeiaḡoto, doniki natuna ḡea ḡoitaḡoato numa ta ḡoiranai barutari. Ḡeruḡaiato-ḡoi nuḡanai, <sup>5</sup> monai ḡeruḡa-taḡoto-ḡoi tarimari na ḡedanaḡirito, ḡekirato, “Ḡomi tu karase nai mani doniki natuna ḡoruḡaiiani?” <sup>6</sup> Benamo ḡevaḡa-veserito Iesu na ekirarito kavana, vau ḡetuḡu-rakarito.

<sup>7-8</sup> Benamo doniki natuna Iesu ḡenai ḡeḡori-iaḡoato, ḡeri dabuḡa barari doniki doḡenai ḡeiava-kaurito, benamo Iesu etanukauto. <sup>8</sup> Tarimarima ḡutuma ḡeri dabuḡa barari dabarai ḡeiavarito. Kota tu ḡau lauri boḡai ḡebasito, benamo dabarai ḡetorerito. <sup>9</sup> Ḡoirai e gabi ai ḡerakato tarimari mabarari na ḡevone-raḡeato-ḡoi, ḡekirato,

“Hosana, Vereḡauka aranai  
eiaḡomani tarimana sivaḡa-namoal!

<sup>10</sup> Davida ḡita Tamara  
ḡena Basileia eiaḡomani,  
sivaḡa-namoal!  
Hosana guba tuḡunai!”

<sup>11</sup> Iesu Ieruselemai eraḡasito nai, Rubu Veavaḡa nuḡanai eraka-toḡato, dagara mabarari eḡita-vaḡa-ḡaurito. Senaḡi elavilavito nai, ḡia ma ḡena mero gabanana ruarua (12) ḡesi ḡeraka-rosito, Betania ḡana ma ḡeḡenoḡoito.

*Iesu na figi ḡauna etovoḡaiato*

*Mataio 21:18-19*

<sup>12</sup> Ma elaḡanito, ḡia na Betania ḡeraga-kwaneato, ḡeraka-iaḡoto-ḡoi nuḡanai, Iesu evitoato. <sup>13</sup> Eboḡeto, figi ḡauna ma launa ta eḡitaiato fakana kota manaḡai, benamo eiaḡoto, nea ḡitaia ma tauna ba asiḡina. Monai ea raḡasito tu, ḡwana ta asi edoḡariato, launa korina moḡo, korana ḡena ḡwa ḡarona roḡo nai. <sup>14</sup> Benamo Iesu na figi ḡauna ekiraiato, ekirato, “Ḡoi ḡwaḡwamu tarima ta na asi ma beḡaniani, toma beiaḡoni vanaḡivanaḡi!” Mai guruḡa ḡena mero na ḡeseḡaḡiato.



*Iesu na Rubu Veaḡa eiarevaiato*

*Mataio 21:12-17; Luka 19:45-48; Ioane 2:13-22*

<sup>15</sup> Ierusalemāi ḡevotuto, Iesu Rubu Veaḡa nuḡanai eraka-toḡato, benamo voivoi tarimari elai-rosirito. Moni ḡesenisito-ḡoi tarimari ḡeri fata e pune ḡevoivoi-iaḡirito-ḡoi tarimari ḡeri diḡoka eḡuke-vebuburito. <sup>16</sup> Rubu Veaḡa nuḡana na ḡeri farefare ḡeḡwa-iaḡorito-ḡoi tarimari maki ekira-ḡoirito. <sup>17</sup> Benamo tarimarima evaḡa-ribarito, ekirato, “Buka Veaḡa nuḡanai tu maiḡesi etoreato, Barau ekirato, ‘Au ḡegu numa tu bese irauirau ḡeri ḡuriḡuri numanai beḡe kiraḡiani,’ senaḡi ḡomi na tu lema tarimari ḡeri gumu gabunai boḡo vaḡa-iaḡoa.”

<sup>18</sup> Rubu Veaḡa vereri baregori e taravatu ḡevevaḡa-riba iaḡiato-ḡoi tarimari na ḡeseḡaḡiato nai, Iesu beḡene vaḡia dabarana ḡevetauato. Iesu garina ḡeveito-ḡoi, korana tarimarima mabarari na ḡena vevaḡa-riba guruḡari ai ḡeḡaba-rakavato-ḡoi.

<sup>19</sup> Elavilavito, benamo Iesu ma ḡena mero ḡesi vanuḡa barana ḡeraga-kwaneato.

*Figi ḡauna emaseto*

*Mataio 21:20-22*

<sup>20</sup> Boḡiboḡi ai dabara na ma ḡeraka-vanaḡito nuḡanai, mo figi ḡauna ḡeḡitaiaito, emarai-ḡosito, ḡokana maki ḡemaseto. <sup>21</sup> Petero na etuḡamaḡi-taḡoato, benamo Iesu ekiraiato, ekirato, “Vevaḡa-riba tarimamu, noḡitaia, ḡoi na mo figi ḡauna otovoḡaiaito dagarana tu varau bemase.”

<sup>22</sup> Benamo Iesu na evaḡa-veserito, ekirato, “Barau boḡono ḡabidadama-vinia. <sup>23</sup> Moḡoni akiramini, tarima ta na mai ḡoro bekiraiani, ‘Noveraḡa-raḡe, be davarai noa vefiu-rei,’ benamo nuḡana asi ma bedaradarani, senaḡi bevaḡa-moḡoniani, kara bekiraḡiani dagarana bemoḡonini nai, mo veiḡa tu beḡorani. <sup>24</sup> Moḡa lorinai akiramini, kara boḡo noḡini ḡauḡau ai nai, boḡo vaḡa-moḡonia, boḡo doḡaria, benamo boḡo ḡabiani. <sup>25</sup> Bema ḡoruḡa-tarini, benamo ḡoḡauḡauni nai, rakava boḡono tuḡamaḡi-fitoḡari, bema tarima ta ḡenai ma ḡemi nuḡa meto nai, benamo ḡomi Tamami gubai etanuni na maki ḡemi rakava betuḡamaḡi-fitoḡarini. [<sup>26</sup> Senaḡi bema ḡomi na tarima ḡeri rakava asi boḡo tuḡamaḡi-fitoḡarini nai, ḡomi Tamami gubai etanuni na maki ḡemi rakava asi betuḡamaḡi-fitoḡarini.]”

*Iesu ḡena seḡuka korana ḡedanaḡiato*

*Mataio 21:23-27; Luka 20:1-8*

<sup>27</sup> Benamo ḡia Ierusalemāi ma ḡeraḡasito. Monai Iesu Rubu Veaḡa nuḡanai erakato-ḡoi nuḡanai, Rubu Veaḡa vereri baregori, e taravatu ḡevevaḡa-riba iaḡiato-ḡoi tarimari, ema Iuda vereri ḡia ḡenai ḡeiaḡoto. <sup>28</sup> Benamo ḡedanaḡiato, ḡekirato, “Kamara maoro ai ḡoi na mai veiḡa oveirini? Dei na maoro evinimuto?”

<sup>29</sup> Iesu na evaḡa-veserito, ekirato, “Au na vedanaḡi sebona avinimini, boḡo vaḡa-vearani nai, au na kamara maoro ai mai veiḡa aveirini bakira-varamini. <sup>30</sup> Ioane ḡena babatiso veiḡana tu guba na eiaḡomato, ba tarimarima ḡerina?”

<sup>31</sup> Ḣia fakari ai ḡeverorito, ḡekirato, “Bema ḡita bita kirani, ‘Barau ḡenana’ bita toni nai, ḡia bekirani, ‘Karase nai Ioane asi ḡovaḡa-moḡoniato?’ betoni. <sup>32</sup> Senaḡi bema ḡita bita kirani, ‘Tarimarima ḡerina’ bita toni nai maki asi ilaila.” Ḣia tu tarimarima gariri ḡegarito, korana ḡia ribari, Ioane tu peroveta tarimana korikori.

<sup>33</sup> Moḡa lorinai ḡia na Iesu ḡevaḡa-veseato, ḡekirato, “Ḣai asi ribama.” Benamo Iesu na ḡia maki ekirarito, ekirato, “Au na maki kamara maoro ai mai veiḡa aveirini asi bakira-varamini.”

## 12

*Barabore - Vine tavoḡana ḡitaḡauna tarimari rakavari*

<sup>1</sup> Iesu na barabore ai ma evaḡa-guruḡarito, ekirato, “Tarima ta vine tavoḡana evaroato, maḡuna eḡabiato, tano ai vine gigi-gigina gurina ekwaiato, tavoḡa ḡitaḡauna numana maki evaḡa-ruḡaiaito. Moḡa murinai tavoḡa ḡitaḡauna tarimari ḡeri ai ḡena tavoḡa eraga-kwaneato, benamo erakato gabu ta ḡana. <sup>2</sup> Vine ḡwari (o grapes) ḡemaḡeto,

benamo ġia na ġena vetuġunaġi tauna ta etuġuato tavoġa narinarina tarimari ġeri ai, vine ġwari kota benea ġabi ġana. <sup>3</sup> Senaġi ġeġabi-tariato, benamo ġekwariato vau, ġimana kori ġetuġu-ġenoġoiato. <sup>4</sup> Tavoġa biaguna na ġena vetuġunaġi tauna ta ma etuġuato, senaġi ġia tu debana ġekodo-fakaiato e ġevei-maiaka maiakaiato. <sup>5</sup> Benamo ta ma etuġuato, senaġi ġevaġi-maseato; ema vetuġunaġi tarimari ġutuma etuġurito, kota tu ġekwaririto, kota tu ġevaġirito. <sup>6</sup> Tarima sebona ta tu roġo ġia sevinai, ġia natuna korikori, ġena lalokau merona. Dokonai ġia etuġuato, ekirato, 'Natugu natuġua, ġia na beġene gubakaua.' <sup>7</sup> Senaġi tavoġa ġitaġauna tarimari tauġeri ġeveguruġa-vevinito, ġekirato, 'Mani tu tavoġa beġaunaiani merona, be siġabia, sivaġia, benamo tavoġa tu ġita ġera.' <sup>8</sup> Benamo ġeġabi-tariato, ġevaġiato, vine tavoġana murikanai ġefiu-rosiato."

<sup>9</sup> Iesu evedanaġito, ekirato, "Tavoġa biaguna na tu kara beveiani? Ġia beiaġomani, tavoġa narinarina tarimari bevaġi-ġosirini, benamo vine tavoġana tarima irauri tari ma bevinirini. <sup>10</sup> Ġomi na mai toretore Buka Veaġai asi ġoiaviani, iniġesi ekirani,

'Fore numari ġeragarini  
tarimari na asi ġeura-viniato  
ma ġefitoġaiato forena tu  
duġu forenai eiaġoto.

<sup>11</sup> Mai veiġa maiġa tu  
Vereġauka na eveiato,  
matara na taġitaiani,  
ġitaġitana irau veġata.' "

<sup>12</sup> Benamo Iuda vereri na Iesu beġene ġabia dabarana ġevetauato, korana ġia ribari, Iesu na mai barabore tu ġia ekiraġirito-ġoi nai. Senaġi tarimarima ġutuma ġevegogo-taġoto-ġoi gariri ġeveito naima ġeraga-kwaneato, ġerakato.

*Kaisara, Roma* ġeri vere, ġena takesi moniri

*Mataio 22:15-22; Luka 20:20-26*

<sup>13</sup> Gabivau Farisea tarimari e Heroda murinai ġerakato-ġoi tarimari kotari Iesu ġenai ġetuġu-iaġorito, ġena guruġai beġene vaġa-vedaġa-raġea e beġene ġabia ġana.

<sup>14</sup> Ġeiaġomato, benamo Iesu ġema ribaġaniato, ġekirato, "Vevaġa-riba tarimamu, ġai ribama ġoi tu moġoni vei-iobukaiobuka tarimamu, tarimarima gariri asi oveini. Tarima ġeri dagi maki asi otuġamaġirini, senaġi ġoi na moġoni ai Barau ġena dabara ovevaġa-riba iaġi-ġitakauani. Novaġa-ribama, Kaisara, Roma ġeri vere, ġenai takesi baġana dava ba asiġi? Baġana vinia ba asi baġana vinia?"

<sup>15</sup> Senaġi Iesu na ġeri ġofaġofa eribaiato nai, ekirarito, ekirato, "Karase nai au ġoribaġaniguni? Silva monina ta ġoġwa-iaġomaia, nama ġitaia." <sup>16</sup> Benamo ta ġeġwa-iaġomaiato, Iesu na edanaġirito, ekirato, "Mai tu dei laulauna e dei arana?" Ġia ġevaġa-veseto, ġekirato, "Kaisara ġena." <sup>17</sup> Iesu na ekirarito, "Kaisara ġena dagara Kaisara boġono vinia, Barau ġena dagara Barau boġono vinia." Benamo ġeġaba-rakavato ġia ġenai.

*Variġisi-ġenoġoi guruġari*

*Mataio 22:23-33; Luka 20:27-40*

<sup>18</sup> Sadukea tarimari kota Iesu ġenai ġeiaġoto. Ġia ġeri tuġamaġi tu, mase tarimari asi ma beġe variġisi-ġenoġoini. Benamo Iesu ġedanaġiato, ġekirato, <sup>19</sup> "Vevaġa-riba tarimamu, Mose na taravatu ġai ġema maiġesina etoreato, 'Bema tau ta kakana bemaseni, vabuna bemase-kwaneani, ma asi naturi nai, mo tau na kakana vabuna bene ġaraġoa, naturi beġene maġuri mase tauna ġena.' <sup>20</sup> Mero mabarari tu imaima ruarua (7). Mero guinena na eġaraġoato, ma emaseto asi natuna. <sup>21</sup> Mero vaġa-ruaruana na vabuna ma eġaraġoato, senaġi ġia maki emaseto asi natuna. Mero vaġa-toitoina maki moġesina moġo. <sup>22</sup> Moġa nuġanai ġia mabarari tu imaima ruarua (7), naturi ta asi ġevaġa-ġoraiato. Dokonai mo vavine maki emaseto. <sup>23</sup> Variġisi-ġenoġoi ġaronai mo vavine tu dei ġaraġona? Korana ġia tu tauri 7 na ġeġaraġoato."

<sup>24</sup> Iesu na evaḡa-veserito, ekirato, “Ḡomi tu ḡokereremi, korana Buka Veaḡa anina ema Barau ḡena seḡuka asi ribami. <sup>25</sup> Mase na ma beḡe variḡisi-ḡenoḡoini tarimari tu asi ma beḡe veḡaraḡoni. Ḡia tu aneru kavana gubai. <sup>26</sup> Mase na ma beḡe variḡisi-ḡenoḡoini guruḡari Mose ḡena bukai asi ḡoiaviani? Ḡau eḡaraiato varina nuḡanai Barau na Mose ekiraiato, ekirato, ‘Au tu Aberahamo ḡena Barau, Isako ḡena Barau, ema Iakobo ḡena Barau.’ <sup>27</sup> Ḡia tu dia mase tarimari ḡeri Barau, senaḡi maḡuri tarimari ḡeri Barau. Ḡomi tu ḡokerere-rakava rakavani!”

*Veuvavini tu taravatu mabarari evanaḡirito*

*Mataio 22:34-40; Luka 10:25-28*

<sup>28</sup> Taravatu ḡevevaḡa-riba iaḡiato-ḡoi tarimana ta eiaḡomato, ḡeri guruḡa-guruḡa eseḡaḡiato, benamo eḡitaiato, Iesu na evaḡa-vese ginikaurito nai, edanaḡiato, ekirato, “Taravatu mabarari nuḡari ai aiḡa tu barego vedaureana?” <sup>29</sup> Iesu na evaḡa-veseato, ekirato, “Barego vedaureana tu maiḡa: ‘Isaraela tarimami o, ḡoseḡaḡi, Vereḡauka ḡita ḡera Barau tu Vereḡauka sebona kwariḡutu. <sup>30</sup> Vereḡauka ḡoi ḡemu Barau bono ura-vinia ma nuḡamu mabarana, ma iaukamu mabarana, ma ḡemu tuḡamaḡi mabarana, ma kokoremu mabarana ḡesi.’ <sup>31</sup> Vaḡa-ruaruana tu maiḡa: ‘Sevimu tarimana bono ura-vinia, ḡoi tauḡemu oveura-vinini kavana.’ Taravatu ta na mai taravatu ruarua asi bevanaḡirini.”

<sup>32</sup> Taravatu evevaḡa-riba iaḡiato-ḡoi tarimana ma evaḡa-veseto, ekirato, “Vevaḡa-riba tarimamu, ḡoi ḡemu guruḡa tu moḡoni, Barau tu sebona moḡo, asi ta maia. <sup>33</sup> Bono ura-vinia ma nuḡamu mabarana, ma ḡemu tuḡamaḡi mabarana, ma gwadamu mabarana, ema sevimu ai etanuni tarimana maki bono ura-vinia, ḡoi tauḡemu oveura-vinini kavana. Maiḡa tu barego vedaurea, ginitaḡo dagarari e boubou dagarari mabarari evanaḡirito.”

<sup>34</sup> Benamo Iesu na mo tarima ḡena vevaḡa-vese eḡitaiato ma iaunegana e ma tuḡamaḡi-fakana ḡesi, benamo ekiraiato, ekirato, “Ḡoi e Barau ḡena Basileia fakami tu asi manaḡa.”

Moḡa murinai tarima ta na asi ma edanaḡiato, korana ḡegarito nai.

*Keriso tu Davida natuna ba Davida ḡena Vereḡauka?*

*Mataio 22:41-46; Luka 20:41-44*

<sup>35</sup> Iesu Rubu Vevaḡa nuḡanai evevaḡa-ribato-ḡoi nuḡanai, ekirato, “Taravatu ḡevevaḡa-riba iaḡiani tarimari tu kamasi nai Keriso tu Davida natuna ḡetoni? <sup>36</sup> Davida Iauka Vevaḡa na riba e tuḡamaḡi-faka eviniato, benamo eguruḡa-foforito, ekirato,

‘Barau na au ḡegu Vereḡauka ekiraiato:

Au ḡimagu aroribana rekenai

noma tanu,

bene iaḡo mo, ḡoi ḡebaru-vinimuni tarimari ḡoi kwakumu gaburenai batorerini.’

<sup>37</sup> Davida na Keriso tu ‘Vereḡaukana’ ekiraḡito; kamasi nai Keriso tu Davida natuna?”

*Taravatu ḡevevaḡa-riba iaḡiato-ḡoi tarimari ḡeri ḡofaḡofa veiḡari*

*Mataio 23:1-36; Luka 11:37-54; 20:45-47*

Tarimarima ḡutuma lelevaḡi Iesu ḡena guruḡa ma iakuri ḡesi ḡeseḡaḡiato. <sup>38</sup> Ḡena vevaḡa-riba nuḡanai ekirato, “Taravatu ḡevevaḡa-riba iaḡiani tarimari boḡono ḡita-ginikauri. Ḡia ḡeurani dabuḡa maukari beḡene riḡo, maketi gaburi ai beḡene rakao-rakao, tarimarima na beḡene vaḡa-namori urari ai. <sup>39</sup> Rubu nuḡari ai e ḡanivegogo gaburi ai ḡeri ura sea namori ai beḡene tanu. <sup>40</sup> Ḡia na vabu ḡeri numa e farefare ḡevaḡa-koririni. Ḡeri ḡauḡau tu mauka kenene, ḡeḡofaḡofani. Ḡia tu meto barego vedaurea beḡe ḡabini.”

*Vabu ḡena boubou monina*

*Luka 21:1-4*

<sup>41</sup> Iesu moni-tore mauḡana ḡoiranai etanu-tarito, benamo tarimarima moni ḡeḡurato-ḡoi eḡitarito. Farefare e moni vovoka tarimari ḡutuma moni barari ḡeḡurato-ḡoi. <sup>42</sup> Senaḡi asi-ḡena e asi-ḡana vabuna ta eiaḡomato, ḡena moni misiri ruarua moḡo eḡurari-ḡorito, mai tu noḡa moḡo toea sebona kavana. <sup>43</sup> Benamo Iesu na ḡena mero ekearito ḡia ḡenai, benamo ekirarito, ekirato, “Moḡoni akiramini, mai vabu na beḡuraia monina na mabarari ḡeri vini bevanaḡiri. <sup>44</sup> Korana ḡia mabarari ḡeri moni vovoka ḡerina koturi moḡo beḡe vini, senaḡi mai vabu tu asi ḡena-ḡana na nuḡanai ḡenai kara ḡetanuni ḡena maḡuri ai bere vevaḡa-kava-iaḡiri dagarari mabarari beḡurari.”

## 13

*Iesu na vau beḡea ḡorani dagarari ekiraḡirito*

<sup>1</sup> Iesu Rubu Veaḡa na eraka-rosito-ḡoi nai, ḡena mero ta na ekiraiato, ekirato, “Vevaḡa-riba tarimamu, mai fore asikeikeiri noḡitari e mai numa baregori ma marevari maki noḡitari.” <sup>2</sup> Iesu na evaḡa-veseato, ekirato, “Mai numa baregori oḡitarini? Mai fore ta fore ta iatanai asi beḡe tanuni, mabarari beḡe vare-bubu-riḡorini.”

<sup>3</sup> Iesu Olive ḡorona tuḡunai etanu-taḡoto-ḡoi, Rubu Veaḡa Ierusalemi eḡita-iaḡoato-ḡoi nuḡanai, Petero, e Iakobo (o Iames), e Ioane, ema Anduru na ḡedanaḡi-ḡairiato, ḡekirato, <sup>4</sup> “Nokira-varama, mai dagara tu aitoma beḡe ḡorani, ema beḡe ḡorani nai, kamara vetoḡa na bevaḡa-foforiani, maniḡeri mabarari beḡe ḡorani?”

<sup>5</sup> Benamo Iesu na evaḡa-veserito, ekirato, “ḡomi lorimi boḡono vetore, tarima ta na asi bene ḡofami. <sup>6</sup> Tarima vovoka au aragu ai beḡe iaḡomani, beḡe kirani, ‘Tarimana tu au maiḡegu!’ Tarima ḡutuma beḡe ḡofarini. <sup>7</sup> Bema ḡomi na vetari o tuari gururi e tuari variri boḡo seḡaḡirini nai, nuḡami asi beḡene raḡe. Maniḡeri dagara tu beḡe ḡorani, senaḡi dokona tu asi roḡo. <sup>8</sup> Tanobara ta tanobara ta ḡesi beḡe vevaḡini, gavamani ta gavamani ta ḡesi beḡe vetarini. Gabu ḡutuma nuḡari ai tano beḡe iagani, doḡe maki beḡe ḡorani. Mai tu midigu moḡo besinaiani, noḡa moḡo mero keina emaḡurini midiguna kavana.

<sup>9</sup> Tauḡemi boḡono venari-ginikau, korana beḡe ḡabimini, Iuda ḡeri kanisoro tarimari ḡeri ai beḡe ḡori-iaḡomini e rubu nuḡari ai beḡe kwarimini. Au ḡoḡabi-raḡeguni dainai, gavana e vere barari o kini ḡoirari ai roḡo boḡo ruḡani, au vaḡa-moḡonigu ai boḡono iaḡo. <sup>10</sup> Vari Namona tu tanobara mabarari nuḡari ai beḡe ḡobata-iaḡi guineani. <sup>11</sup> Bema Kota tarimari ḡoirari ḡana beḡe ḡori-iaḡomini nai, kara toma boḡoa kiraḡirini guruḡari asi boḡono nuḡa-vekwaraḡi-iaḡiri. ḡarona beraḡasini vau, Barau na kara bevaḡa-ribamini guruḡari boḡono kiraḡiri, korana dia ḡomi boḡo guruḡani, senaḡi Iauka Veaḡa beguruḡani. <sup>12</sup> Kakana na tarina berevaiani bene mase ḡana, tamana na natuna maki moḡesina beveiani. Naturi na tamari sinari beḡe seḡafore-vinirini ema beḡe vaḡirini. <sup>13</sup> Tarimarima mabarari na beḡe iau-rakavamini, korana au ḡoḡabi-raḡeguni nai. Senaḡina deikara bevevaḡa-gwaḡiḡini mo dokona tu bemaḡurini.”

*Vevaḡa-gari dagarana befororini*

*Mataio 24:15-28; Luka 21:20-24*

<sup>14</sup> “Bema ḡomi na dagara rakava vedaureana, vevaḡa-gari dagarana, boḡo ḡitaiani, asi bene ruḡa gabunai beruḡani.” Mai guruḡa beiaviani tarimana bene riba maoro anina tu kara. “Benamo deidei Iudeai ḡetanuni tarimari ḡoro ḡana beḡene raga-iaḡo. <sup>15</sup> Deikara numa tuḡunai etanu-taḡoni tu, asi ma bene raka-toḡa numa nuḡana ḡana ḡena farefare ḡabiḡabiri. <sup>16</sup> Deikara vamoka nuḡanai maki asi ma bene ḡenoḡoi ḡena koudi ḡabiḡabiri. <sup>17</sup> Mo negai vavine ma baniri e ḡabi-variḡu vavineri kika ma vetuḡari! <sup>18</sup> Boḡono ḡauḡau, mai dagara asi bene ḡora ḡura e nagure ḡarori ai! <sup>19</sup> Korana mo negai rakava e midigu barego beḡe raḡasini, Barau na tanobara eveiato beiaḡoma maitoma, rakava e midigu moḡesina asi ḡeḡorani. Ma maiḡa murinai moḡesina kavana ta asi ma beḡorani. <sup>20</sup> Bema Vereḡauka na mo ḡaro rakavari asi bere vaḡa-kubiri, tarima ta asi bere maḡuri riba, senaḡi eḡabi-hidirito tarimari dairi ai, ḡia na ḡarori evaḡa-kubirito.

<sup>21</sup> Mo negai, bema tarima ta na bekiramini, ‘Ġoġitaia, Keriso tu maiġa!’ o ‘Ġoġitaia, ġia tu iomoġa!’ betoni nai, asi boġono vaġa-moġonia. <sup>22</sup> Korana tu Keriso ġofaġofari e peroveta tarimari ġofaġofari beġe foforini, vetoġa boruri e nuġa-farevaġi veiġari beġe veirini, Barau na eġabi-viriġirito tarimari beġene ġofa-veġonuri ġana. <sup>23</sup> Moġesi nai tauġemi boġono venari; dagara mabarari tu akiravara-guinemini, aoa roġosi bene raġasi nai.”

*Tarimarima Natuna ġena iaġoma*

*Mataio 24:29-31; Luka 21:25-28*

<sup>24</sup> “Senaġi mo negai, rakava beġe ġorani murinai, ġaro bemukunani e ġue maki asi bemamani, <sup>25</sup> visiġu guba na beġe ketoni e guba seġukari beġe iagaiagani. <sup>26</sup> Benamo tarima na Tarimarima Natuna beġe ġitaiani, magube na beiaġomani ma seġuka barana e ma marevana ġesi. <sup>27</sup> Benamo ġia na aneru betuġurini, eġabi-viriġirito tarimari beġe vaġa-vegogorini tanobara mabarari na.”

*Barabore - Vevaġa-riba figi ġauna ġenana*

*Mataio 24:32-35; Luka 21:29-33*

<sup>28</sup> “Figi ġauna ġenana mai barabore boġono ribaia: Kabona ġefori-raġeni e launa ġefafani nai, ġoribani, ġaro ġena tora taimina tu bekavinaġi ġotoni. <sup>29</sup> Moġa ilailanai, ġomi maki bema mai dagara beġe ġorani boġo ġitarini nai, boġono riba, Tarimarima Natuna tu bekavinaġi ġatama bokai. <sup>30</sup> Moġoni akiramini, mai ġuru asi bekorini, beiaġoni mo, mai dagara mabarari beġe ġorani. <sup>31</sup> Guba e tanobara beġe rekwa-rekwani, senaġi au ġegu guruġa tu asi beġe rekwa-rekwani, beġe tanu-vanaġi vanaġini.”

*Ġaro ema hora tarima ta asi ribana*

*Mataio 24:36-44*

<sup>32</sup> “Senaġi mo ġaro ema aoa tu tarima ta asi ribana, e aneru gubai asi ribari, ema Natuna maki asi ribana, senaġi Tamana ġereġana moġo ma ribana. <sup>33</sup> Lorimi boġono vetore, boġono venari-ginikau, korana asi ribami, aitoma mo aoa beraġasini.

<sup>34</sup> Ġia tu maiġesina kavana, tarima ta eraka-ġerevaġito, ġena numa eraga-kwaneato, benamo ġena vetuġunaġi tarimari maoro evinirito, tata ġeri ġauvei beġene vei. Ġatama-boka narinarina tarimana maki ekiraiato, bene riviġaua. <sup>35</sup> Moġesi nai ġomi maki tataġa-taġo boġono tanu, korana numa biaguna beġenoġoini aoana tu asi ribami, lavilavi ai, ba boġi nuġanai, ba kokoroku begoġini ai, ba boġiboġi ai. <sup>36</sup> Irau mai moġo beraġasini, benamo genami ai beġoitaġomini ġesi. <sup>37</sup> Au na kara ġomi akira-varamini guruġana tu tarimarima mabarari maki akira-vararini, akirani, ‘Tataġa-taġo boġono tanu e boġono venari-ginikau!’ ”

## 14

*Iesu beġene vaġia dabarana ġevetauato Ioane 11:45-53*

<sup>1</sup> Ġaro ruarua moġo, benamo Pasova verekona o Iuda tarimari mase aneruna na evanaġirito asi evaġirito verekona e asi etubuni faraona verekona beġe veiani nuġanai, Rubu Veaġa vereri baregori e taravatu ġevevaġa-riba iaġiato-ġoi tarimari na Iesu beġene ġabi-lemmaia, benamo beġene vaġi-masea dabarana ġevetauato-ġoi. <sup>2</sup> Senaġi ġekirato, “Dia vereko nuġanai bene ġora, korana vereko beġe iaġoma tarimari ġia iatana na beġe burini garina.”

*Vavine ta ġena veiġa namona*

*Mataio 26:6-13; Ioane 12:1-8*

<sup>3</sup> Iesu Betania ai Simona lepera tarimana ġena numai eġaniġanito-ġoi nuġanai, vavine ta eraka-toġato, kavabu namona ta, alabasta forena na ġeveiato kavabuna, eġabi-kauato, nuġanai tu muramura ma bonana namona. Mo muramura tu ġauġa arana nad ġokana na ġeveito-ġoi dagarana, ma voina tu varaġe rakava. Mo vavine na mo kavabu bokana ebota-fakaiato, benamo muramura Iesu debanai ebubuato. <sup>4</sup> Ġia sevinai tarimari kota tu ma nuġa-metori ġesi ġeveguruġa-vevinito, ġekirato, “Karase nai mai muramura bonana

namona efitoḡa-kavaiani? <sup>5</sup> Bere voivoi-iaḡia, benamo silva moniri sinau toitoi (300) bere ḡoitaḡoa, (mai tu tarima ta davana laḡani ta nuḡanai kavana), benamo asi ḡeri-ḡari tarimari bere viniri.” Benamo ḡia na mo vavine ḡevaneato.

<sup>6</sup> Senaḡi Iesu ekirato, “Ḡoraga-kwane! Kara dainai ḡomi na meto ḡoviniani? Mai vavine na tu veiḡa namona au ḡegu ai beveia. <sup>7</sup> Asi ḡeri-ḡari tarimari tu ḡomi ḡesi boḡo tanu-vanaḡi vanaḡini, be boḡo urani nai, boḡono vaḡa-kavari. Senaḡi au tu dia ḡaro mabarari ḡomi ḡesi batanuni. <sup>8</sup> Mai vavine na tu kara bere veia dagarana beveia, ḡia na au tauḡanigu ai muramura bebubu-guinea gurigurigu ḡana. <sup>9</sup> Moḡoni akiramini, Vari Namona beḡe ḡobata-iaḡiani tanobara mabarari nuḡari ai, mai vavine na veiḡa beveia veiḡana maki beḡea kiraḡiani, ḡia tuḡamaḡi-iaḡina.”

*Iudas na Iesu erevaiato*

*Mataio 26:14-16; Luka 22:3-6*

<sup>10</sup> Benamo Iudas Isakariota, gabanana ruarua (12) tarimana ta, Rubu Veaḡa vereri baregori ḡeri ai eiaḡoto, Iesu benea reveia ḡia ḡeri ai ḡana. <sup>11</sup> Benamo ḡia na ḡeseḡaḡiato nai, ḡeiku-rakavato, benamo ḡekira-toreato, moni beḡe viniani. Benamo Iudas na ḡimari ai betore-kauani dabarana ma evetauato-ḡoi.

*Iesu ma ḡena mero ḡesi ginitaḡo mamoea ḡeḡaniato*

*Mataio 26:17-25; Luka 22:7-14; 22:21-23; Ioane 13:21-30*

<sup>12</sup> Ḡaro giniginenai, asi etubuni faraona verekona veiveina e ginitaḡo mamoea vaḡivaḡina ḡaronai, Iesu ḡena mero ḡevedanaḡito, ḡekirato, “Ḡai tu ainai Pasova verekona baḡana vei-torea, bono ḡania?” <sup>13</sup> Benamo Iesu na ḡena mero ruarua etuḡurito, ekirarito, ekirato, “Vanuḡa baregonai boḡono raka-toḡa, benamo tarima ta nanu gwaḡutuna befaḡaiani boḡo ḡoitaḡoani. Murina na boḡono iaḡo. <sup>14</sup> Benamo beraḡekauni numanai numa biaguna boḡono vaḡa-guruḡaia, boḡono kira, ‘Vevaḡa-riba tarimana ekirani: Au ḡegu varivari daiḡutuna tu aiḡa, ḡegu mero ḡesi monai ginitaḡo mamoea baḡana ḡania?’ <sup>15</sup> Benamo ḡia na daiḡutu baregona ta numa tuḡunai bevaḡa-ḡitamini iarevatore. Monai boḡono dabaraia ḡita ḡara.”

<sup>16</sup> Benamo mero ḡeiaḡoto, vanuḡa barana nuḡanai ḡeraka-toḡato, Iesu na ekiraḡirito ilailari ai ḡedoḡaririto. Monai vereko ḡeveiato.

<sup>17</sup> Elavilavito, Iesu ma ḡena mero gabanana ruarua (12) ḡesi ma ḡeraḡasito. <sup>18</sup> Ḡeḡaniḡanito-ḡoi nuḡanai Iesu ekirato, “Moḡoni akiramini, ḡomi ta na au borevaguni, ta au ḡesi ini taḡaniḡani-vegogoni tarimamu ta na.” <sup>19</sup> Ḡia mabarari nuḡari ma metori ḡesi irau sebori irau sebori na ḡedanaḡiato, ḡekirato, “Moḡoni dia au, ene?”

<sup>20</sup> Iesu na ekirarito, ekirato, “Mai tu ḡomi gabanana ruarua (12) fakami ai ta dei au ḡesi diḡu sebonai ḡanaba-riḡoni tarimana. <sup>21</sup> Tarimarima Natuna bemaseni, Buka Veaḡai ḡetoreato ilailanai. Senaḡi Tarimarima Natuna berevaiani tarimana vetuḡana kekei, asi bere maḡuri tu namo.”

*Vereḡauka ḡena ḡanivegogo veaḡana*

*Mataio 26:26-30; Luka 22:15-20; 1 Korinto 11:23-25*

<sup>22</sup> Ḡia ḡeḡaniḡanito-ḡoi nuḡanai, Iesu na beredi eḡabiato, Barau evaḡa-namoato, etaviato, evinirito, benamo ekirato, “Ḡoḡabia, mai tu au tauḡanigu.”

<sup>23</sup> Ḡia na kapusi ma eḡabiato, evaḡa-namoato murinai evinirito, benamo mabarari na ḡeniuato. <sup>24</sup> Benamo Iesu na ekirarito, ekirato, “Mai tu au raragu, Ginitaḡo Variḡuna evaḡa-moḡoniani, bebebubuni, tarimarima ḡutuma vaḡa-maḡuriri. <sup>25</sup> Moḡoni akiramini, vine nanuna asi ma banu-ḡenoḡoiani, beiaḡoni mo, Barau ḡena Basileiai vau ma banu-ḡenoḡoiani.”

<sup>26</sup> Benamo mari ta ḡemariato murinai, ḡeraka-rosito, Olive Ḡorona ḡana ḡeiaḡoto.

*Iesu na Petero ḡena vekira-ḡuniḡau ekiraḡi-toreato*

*Mataio 26:31-35; Luka 22:31-34; Ioane 13:36-38*

<sup>27</sup> Benamo Iesu na evaḡa-guruḡarito, ekirato, “Ḡomi mabarami ḡemi veḡabidadama au ḡegu ai boḡo raga-kwaneani, korana Buka Veaḡai maiḡesi etoreato, ‘Au na mamoe ḡitaḡauri tarimana bavaḡiani, benamo mamoe mabarari beḡe raga-lausini.’

<sup>28</sup> Senaḡi au mase na ma bavariḡisi-ḡenoḡoini murinai, baraka-guineni Galilea ḡana. Monai vau bitana vedoḡari.”

<sup>29</sup> Petero ekirato, “Mabarari na ḡeri veḡabidadama ḡoi ḡemu ai beḡe raga-kwaneani, senaḡi au na tu asiḡina.” <sup>30</sup> Iesu na evaḡa-veaseato, ekirato, “Moḡoni akiramuni, toma boḡi kokoroku vaḡa-ruarua roḡosi bene goḡi nuḡanai, ḡoi na au vaḡa-toitoi bokira-ḡuniḡauguni.” <sup>31</sup> Senaḡi Petero eguruḡa-ḡiḡiraḡeto, ekirato, “Bema ḡoi ḡesi bita mase-vegogoni maki, au na ḡoi tu asi veḡata bakira-ḡuniḡaumuni.” Mabarari moḡesi moḡo ḡekirato.

*Iesu eḡauḡauto Getesemane ai*

*Mataio 26:36-46; Luka 22:39-46*

<sup>32</sup> Ḡia gabu arana Getesemane ai ḡea raḡasito, benamo Iesu na ḡena mero evaḡa-guruḡarito, ekirato, “Mainai ḡotanau, au tu naiaḡo, naḡuriḡuri roḡo.” <sup>33</sup> Benamo Petero, e Iakobo (o Iames), ema Ioane moḡo eḡoririto, ḡia ḡesi ḡeiaḡoto. Moḡa nuḡanai Iesu tauḡanina efarakaiato, egarito, nuḡana maki evekwarāḡito-ḡoi. <sup>34</sup> Benamo ekirarito, ekirato, “Au nuḡagu na meto asikei eḡwaiyani, dori evaḡiguni; mainai ḡotanau, boḡono venari.” <sup>35</sup> Iesu kota ma eraka-naḡito, tano ai eketo-tarito, benamo Barau enoḡiato, ekirato, bema ma dabara ta moḡa neganai, mai aoa metona ḡenana bene vanaḡi. <sup>36</sup> Ekirato, “Tama, Tamagai o, dagara mabarari ḡoi ḡemu ai veiveiri tu ilaila. Mai midigu bedina ḡeguna noma ḡabi-vaḡia. Senaḡi dia au ḡegu ura, ḡoi ḡemu ura moḡo.”

<sup>37</sup> Benamo eḡenoḡoito nuḡanai tu, ḡena mero genamaseri ai eḡoitaḡo-rito, benamo Petero ekiraiato, ekirato, “Simona, ḡoi tu ogenani? Aoa sebona ta kavana maki asi bovevaḡa-gwaḡiḡini? <sup>38</sup> Boḡono venari, boḡono ḡauḡau, be veribaḡani beiaḡomani nai, asi boḡono moira. Iauka tu moḡoni eurani, senaḡi tauḡani tu emoirani.”

<sup>39</sup> Benamo ma eraka-veḡitato, ea ḡuriḡurito, mo ḡauḡau guruḡari guineri ma ea kiraḡirito. <sup>40</sup> Ma eḡenoḡoi-iaḡomato nuḡanai tu, genamaseri ai ma edoḡaririto, korana matari tu gena na eḡabi-rakavarito. Ḡia asi ribari kamasi beḡe vaḡa-veaseani.

<sup>41</sup> Vaḡa-toitoina ma eḡenoḡoito, benamo ekirarito, ekirato, “Ḡomi tu roḡo ḡogenani e ḡoiaḡaraḡini? Bevaitovo! Aoana varau beraḡasi! Ḡoḡitaia, Tarimarima Natuna tu beḡe revaia, rakava tarimari ḡimari ai beḡe torea. <sup>42</sup> Ḡovariḡisi, be si-iaḡosi! Ḡoḡitaia, au revarevaḡu tarimana mai beraḡasi!”

*Iesu tuari tarimari o soldia na ḡeḡabiato*

*Mataio 26:47-56; Luka 22:47-53; Ioane 18:3-12*

<sup>43</sup> Iesu roḡo eguruḡato-ḡoi nuḡanai, Iudas, mero gabanana ruarua (12) tauna ta, eraḡasito. Tarimarima ḡutuma maki ḡia ḡesi ma ḡeri vetari baḡari e vevaḡi kwariri. Ḡia tu Rubu Veaḡa vereri baregori, e taravatu ḡevevaḡa-riba iaḡiato-ḡoi tarimari, ema Iuda vereri na ḡetuḡurito. <sup>44</sup> Reva tarimana na vetoḡa ta ekiravara-torerito, ekirato, “Baverauani tarimana tu moḡa. Boḡono ḡabi-taria, boḡono ḡori-iaḡoa ḡomi ḡemi veḡitaḡau gaburenai.”

<sup>45</sup> Iudas eraḡasito nai, maoromaoro eiaḡoto Iesu ḡenai, benamo ekirato, “Vevaḡa-riba tarimamu o!” benamo everauato. <sup>46</sup> Benamo tuari tarimari na ḡeḡabi-tariato, ḡedegodegoato.

<sup>47</sup> Senaḡi monai eruḡa-taḡoto-ḡoi tarimana ta, ḡena vetari baḡana einu-vaḡiato, edaveato, benamo Rubu Veaḡa verena baregona ḡena vetuḡunaḡi tarimana seḡana ebasi-vaḡiato. <sup>48</sup> Iesu na ekirarito, ekirato, “Au tu seḡafore doḡorona ta aḡori-kauani? Be ḡomi boḡo iaḡoma au ḡabiḡabigu tu, ma ḡemi vetari baḡari e vevaḡi kwariri ḡesi?”

<sup>49</sup> Ĝaro mabarari ai au tu ĝomi sevimi ai Rubu Veaĝa nuĝanai avevaĝa-ribato-ĝoi, senaĝi asi ĝoĝabiguto. A mai tu Buka Veaĝai ĝetore-guineato guruĝana vaĝa-moĝonina ĝana.”

<sup>50</sup> Ĝena mero mabarari na ĝeraga-kwaneato, ĝeraka-rovorovoto.

<sup>51</sup> Mero variĝuna ta tu kefina korina, senaĝi dabuĝa ta na moĝo tauĝanina eriĝo-ĝauato, Iesu murinai erakato. Ĝia maki ĝeĝabi-tariato, <sup>52</sup> senaĝi ĝena dabuĝa ĝimari ai eraga-kwaneato, kefina kori moĝo eraga-kwaraĝato.

*Iesu kanisoro tarimari ĝoirari ai*

*Mataio 26:57-68; Luka 22:54-55; 22:63-71; Ioane 18:13-14; 18:19-24*

<sup>53</sup> Ĝia na Iesu ĝeĝori-iaĝoato Rubu Veaĝa verena baregona ĝenai, ema Rubu Veaĝa vereri baregori, e Iuda vereri, ema taravatu ĝevevaĝa-riba iaĝiato-ĝoi tarimari mabarari ĝeraka-vegogoto. <sup>54</sup> Petero na Iesu eraka-ĝiuato, senaĝi ma fakana eiaĝoto mo, Rubu Veaĝa verena baregona ĝena numa maĝuna nuĝanai eraka-toĝato. Monai gadi tarimari fakari ai ea tanuto, benamo karava na etunuato-ĝoi.

<sup>55</sup> Rubu Veaĝa vereri baregori e Iuda ĝeri kanisoro tarimari mabarari na tu Iesu vaĝa-masena korana ta ĝevetauato, senaĝi ta tu asi ĝedoĝari-ato. <sup>56</sup> Tarimarima ĝutuma ĝeri ĝofaĝofa guruĝari na ĝevaĝa-badeato-ĝoi, senaĝi ĝeri guruĝa tu asi ĝesebonatogoi. <sup>57</sup> Benamo tarima kota ĝeruĝa-vaesito, benamo mai ĝofaĝofa guruĝari ĝekiraĝirito, ĝekirato, <sup>58</sup> “Ĝai tu ĝia ĝena guruĝa baĝa seĝaĝia, bekira, ‘Au na mai tarimarima ĝimari na ĝeragaiato Rubu Veaĝana barovoani, ema ĝaro toitoi nuĝanai ta ma baragaiani dia ĝima veiveina rubuna.’” <sup>59</sup> Senaĝi ĝia ĝeri vevaĝa-bade guruĝari maki asi sebona.

<sup>60</sup> Benamo Rubu Veaĝa verena baregona ĝoirari ai eruĝa-vaesito, benamo Iesu edanaĝiato, ekirato, “Ĝoi tu asi bovaĝa-veseni? Maiĝeri na ĝoi ĝevarifiu-iaĝimuni guruĝari tu kamasi?” <sup>61</sup> Senaĝi Iesu asi eguruĝato, ma asi evaĝa-veserito. Benamo Rubu Veaĝa verena baregona na ma edanaĝi-ĝenoĝoiato, ekirato, “Ĝoi tu Keriso, ĝevaĝa-namoani Barauna Natuna?” <sup>62</sup> Iesu na evaĝa-veseato, ekirato, “Tarimana au maiĝegu! Ĝomi na Tarimarima Natuna roĝo boĝo ĝitaiani, Seĝuka Barauna ĝimana aroribanai betanuni, e guba maguberi iatari na beiaĝomani!”

<sup>63</sup> Benamo Rubu Veaĝa verena baregona na ĝena dabuĝa edareato, ekirato, “Karase vevaĝa-ĝita tarimari roĝo tavetaurini? <sup>64</sup> Barau vaĝa-rakavana guruĝana boĝo seĝaĝia. Ĝomi kara ĝotoni?” Ĝia mabarari ĝekirato, “Bene mase moĝo.”

<sup>65</sup> Benamo kota na ĝekanunuato, matana ĝekumu-ĝauato, ĝefaisiato, ĝekiraiato, ĝekirato, “Ĝoi tu peroveta tarimana, be nokiraĝia, deikara na bekwarimu?” Benamo gadi tarimari na ĝeĝabiato, ĝimari na ĝeforoato.

*Petero na Iesu ekira-ĝuniĝauato*

*Mataio 26:69-75; Luka 22:56-62; Ioane 18:15-18; 18:25-27*

<sup>66</sup> Petero roĝo numa maĝuna nuĝanai, Rubu Veaĝa verena baregona ĝena vetuĝunaĝi ĝuiatori ta eiaĝoto. <sup>67</sup> Ĝia na Petero karava na etunuato-ĝoi eĝitaiato, benamo eĝita-ginikauato, ekiraiato, ekirato, “Ĝoi maki Iesu, Nasareta tauna, ĝesi orakaoto-ĝoi, okavaiato-ĝoi.” <sup>68</sup> Senaĝi ĝia evekira-ĝuniĝauto, ekirato, “Au asi ribagu ĝoi kara okiraĝiani,” benamo eraka-rosito maĝu ĝatama bokana ĝana, benamo kokoroku egoĝito.

<sup>69</sup> Mo vetuĝunaĝi ĝuiatona na ma eĝitaiato, benamo monai ĝeruĝa-taĝoto tarimari ekirarito, ekirato, “Tarimana ta tu maniĝa.” <sup>70</sup> Petero ma evekira-ĝuniĝauto. Nega kotuna evanaĝito nuĝanai, ĝia sevinaĝi ĝeruĝa-taĝoto-ĝoi tarimari na ĝekiraiato, ĝekirato, “Moĝoni, ĝoi maki ĝia ĝesi ĝorakaoto-ĝoi tarimamu ta, korana ĝoi tu Galilea taumu.”

<sup>71</sup> Benamo Petero na ekirarito, ekirato, “Asiĝina ĝinavaĝi, akira-korikorimini, ĝomi na ĝokiraĝiani tarimana au tu asi ribagu.”

<sup>72</sup> Kokoroku vaĝa-ruaruana ma egoĝito, benamo Petero na Iesu ĝena guruĝa etuĝamaĝi-doĝariato, ekiraiato, “Kokoroku vaĝa-ruaruana roĝosi bene goĝi nai, ĝoi na au vaĝa-toitoi bokira-ĝuniĝauguni.” Benamo etaĝi-rakava rakavato.



## 15

*Iesu Pilato ġoiranai*

<sup>1</sup> Boġiboġi iamoiamo, Rubu Veaġa vereri baregori, e Iuda vereri, e taravatu ġevevaġa-riba iaġiato-ġoi tarimari, ema kanisoro tarimari mabarari na ġevaġa-moġoniato. Benamo Iesu ġebarubaruato, ġeġori-iaġoato, Roma Gavana Pilato ġea viniato. <sup>2</sup> Pilato na edanaġiato, ekirato, “Ġoi tu Iuda tarimari ġeri vere o kini?” Iesu na evaġa-veaseato, ekirato, “Oi, okiraġiani maniġa.” <sup>3</sup> Benamo Rubu Veaġa vereri baregori na Iesu ġevaġa-badeato, guruġa ġutuma ġekiraġirito. <sup>4</sup> Pilato na ma edanaġi-ġenoġoiato, ekirato, “Ġoi tu asi bovaġa-veseni? Noġitaia, ġoi iatamu ai tu meto ġutuma ġekiraġirini.” <sup>5</sup> Senaġi Iesu asi eguruġato, benamo Pilato tu edaradarato.

*Pilato na Iesu ġena mase ekiraġiato*

*Mataio 27:15-26; Luka 23:13-25; Ioane 18:38-19:16*

<sup>6</sup> Vanaġivanaġi Pasova verekona ġaronai tu Pilato na ġia ġeri dibura numanai etanuni, beġe kiraġiani tarimana ta, etuġu-rosiato-ġoi. <sup>7</sup> Mo laġani ai tarima ta arana Barabas, ġia tu dibura numai etanuto tarima kota ġesi, korana ġevevaġito nai, tarima ta ġevaġi-maseato. <sup>8</sup> Benamo ġutuma monai ġevegogoto tarimari Pilato ġenoġiato, eveini kavana ma bene vei ġana. <sup>9</sup> Pilato na edanaġirito, ekirato, “Ġomi ġourani au na Iuda tarimami ġemi vere natuġu-rosia ba?” <sup>10</sup> Ġia ribana, Rubu Veaġa vereri baregori ġeri mama dainai, Iesu ġia ġimanai ġetoreato.

<sup>11</sup> Senaġi Rubu Veaġa vereri baregori na tarimarima nuġari ġeġanirito, Pilato na Barabas bene tuġu-rosia. <sup>12</sup> Benamo Pilato na ma edanaġirito, ekirato, “O mai Iuda tarimami ġemi vere ġotoni tu kamasi bana veia?”

<sup>13</sup> Ġia ġefararato, ġekirato, “Novaġa-satauroa!” <sup>14</sup> Pilato na edanaġirito, ekirato, “Karase nai, kamara veiġa rakavana eveiato nai?” Senaġi mabarari ġefarara-gigitarito, ġekirato, “Novaġa-satauroa!” <sup>15</sup> Pilato ġena ura mo tarimarima ġutuma nuġari bene vaġa-namori ġana, ġia na Barabas etuġu-rosiato, senaġi Iesu tu ġekwariato murinai, evinirito beġene vaġa-satauroa ġana.

*Iesu ġevaseva-vaseva iaġiato*

*Mataio 27:27-31; Ioane 19:2-3*

<sup>16</sup> Vetari tarimari na Iesu ġeġori-iaġoato gavana ġena numa nuġanai, benamo karori mabarari ġekea-vegogorito. <sup>17</sup> Benamo dabuġa kakakakana ġevaġa-veiato, debana dagarana ġau ma giniginina na ġevatoato, korona noġa ġeveiato, benamo Iesu debanai ġetore-kauato. <sup>18</sup> Benamo ġevaġa-namoato, ġekirato, “Iuda ġeri Kini o, ġaro namona!” <sup>19</sup> Benamo oro kwarina na debana ġekwari-ġenoġoi ġenoġoiato-ġoi, ġekanunu-kanunuato, ġevetui-tari viniato, ġetoma-rakariġo ġofakau-viniato. <sup>20</sup> Ġevaseva-vaseva iaġi-ġosiatu murinai, dabuġa kakakakana ġekoki-vaġiato, ġena dabuġa korikorina ma ġevaġa-veiato. Benamo ġeġori-rosiatu beġenea vaġa-satauroa ġana.

*Iesu ġevaġa-satauroato*

*Mataio 27:32-44; Luka 23:26-43; Ioane 19:17-27*

<sup>21</sup> Kurene tarimana ta arana Simona, Alesanda e Rufo tamari, gunika vanuġana ta na eiaġomato-ġoi, vetari tarimari na ġelaunaġi-naġiato Iesu ġena satauro neġwaia.

<sup>22</sup> Benamo Iesu ġeġori-iaġoato gabu ta arana Golgota ġana, anina tu “Deba Ġavana Gabuna.” <sup>23</sup> Benamo ġia na vine nanuna, midigu vaġa-keina muramurana arana muro ġesi ġebubu-vegogoato, ġeviniato, senaġi asi eniuato.

<sup>24</sup> Benamo ġevaġa-satauroato; ġena dabuġa dainai laki ġerena ta ġeveiato, benamo ġevarerito fakari ai. <sup>25</sup> Boġiboġi ai horaġauna 9 koloko rekenai ġevaġa-satauroato. <sup>26</sup> Kara koranai ġevaġa-satauroato guruġana satauro iatanai maiġesi ġetoreato, “IUDA TARIMARI ĠERI VERE.” <sup>27</sup> Lema tarimari ruarua maki Iesu ġesi ġevaġa-sataurorito, ta aroribana rekenai, ma ta kaurina rekenai. [<sup>28</sup> Monana Buka Veaġai ġetore-guineato guruġana evaġa-moġoniato, ekirato, “Ġia vei-rakava tarimari ġesi ġeiavi-vegogoato.”]

<sup>29</sup> Ĝeraka vanaĝito-ĝoi tarimari na guruĝa rakavari Iesu ĝeviniato-ĝoi, debari ĝekorakorarito, ĝekirato, “Aha, be ĝoi okirato Rubu Veaĝa borovoani, ĝaro toitoi nuĝanai ma bovaĝa-ruĝa ĝenoĝoiani otato! <sup>30</sup> Satauro tuĝuna na noraka-riĝo, tauĝemu novevaĝa-maĝuri!”

<sup>31</sup> Rubu Veaĝa vereri baregori e taravatu ĝevevaĝa-riba iaĝiato-ĝoi tarimari na maki fakari ai maiĝesi ĝevaseva-vaseva iaĝiato, ĝekirato, “Ĝia na tarima boruri evaĝa-maĝuririto, senaĝi tauĝena tu asi evevaĝa-maĝurini! <sup>32</sup> Keriso, Isaraela tarimari ĝeri vere, satauro na inimoĝo noraka-riĝo ĝai ĝoiramai, be baĝana vaĝa-moĝonimu!” Iesu ĝesi ĝevaĝa-satauro vegogorito tarimari ruarua na maki ĝeguruĝa-rakava viniato.

*Iesu ĝena mase*

*Mataio 27:45-56; Luka 23:44-49; Ioane 19:28-30*

<sup>33</sup> Horaĝauna 12 koloko ea ĝabiato nai, tanobara mabarana mukuna na eĝabi-ĝaunto; mukuna etanuto, eiaĝoto mo, horaĝauna 3 koloko. <sup>34</sup> Horaĝauna 3 koloko rekenai Iesu eĝabato, ekirato, “Eloi, eloi, lama sabaktani?” anina tu, “Au ĝegu Barau, au ĝegu Barau, kara dainai au boraga-kwanegu?” <sup>35</sup> Iesu sevinai ĝeruĝa-taĝoto-ĝoi tarimari kota ĝeseĝaĝito, benamo ĝekirato, “Ĝoseĝaĝi, Elia ekeaiani.” <sup>36</sup> Benamo tarima ta eragato, nanu erimaiani dagarana ta eĝabiato, vine nanuna mamakina nuĝanai efereiato, gobu lefai egwanu-kauato, benamo eduĝi-raĝeato Iesu na neniua ĝana, ekirato, “Siĝitaia, Elia beiaĝomani, bema ĝabi-riĝoani ba?” <sup>37</sup> Benamo Iesu eĝaba-fouto murinai emaseto.

<sup>38</sup> Benamo Rubu Veaĝa nuĝanai veaĝa lelevaĝi daiĝutuna kouĝauna dabuĝana o ketin evedare-kikimato, eruaruato, tuĝuna na mo gabigabina. <sup>39</sup> Roma vetari verena Iesu ĝoiranai eruĝa-taĝoto-ĝoi, ĝena ĝaba eseĝaĝiato e kamasi emaseto eĝitaiato, benamo ekirato, “Moĝoni veĝata, mai tarima tu Barau Natuna!”

<sup>40</sup> Vavine kotari maki ĝemarereto-ĝoi, kotuna manaĝai ĝeruĝato, fakari ai tu Maria, Magadala vavinena; e Maria, mai tu Iakobo (o Iames) keina e Iosefa ĝesi sinari; ema Salome. <sup>41</sup> Galileai mai vavine tu Iesu murina na ĝerakato-ĝoi e ĝia vetuĝunaĝina ĝeiaĝo-vinito-ĝoi. Vavine vovoka ĝia ĝesi Ierusalemna ĝana ĝemaraĝeto vavineri maki monai.

*Iesu ĝeguriato*

*Mataio 27:57-61; Luka 23:50-55; Ioane 19:38-42*

<sup>42</sup> Mo lavilavi ai vereko beĝe vei-toreani, Sabadi ĝarona roĝosi bere ĝabia nai. <sup>43</sup> Iosefa, Arimatea vanuĝa tarimana, ĝematauraiato-ĝoi kanisoro fakari ai tarimana ta, Barau ĝena Basileia evaĝa-nogaĝiato-ĝoi tarimana, Pilato ĝenai eiaĝoto, benamo enoĝi-ginikauato, Iesu tauĝanina bene ĝabia etato. <sup>44</sup> Pilato eseĝaĝito Iesu tu varau emaseto nai, nuĝana efarevaĝito, benamo vetari verena ekeaiato, edanaĝiato, ekirato, “Moĝoni, Iesu tu bemase ba?” <sup>45</sup> Benamo vetari verena na Iesu ĝena mase evaĝa-moĝoniato vau, Iesu tauĝanina Iosefa eviniato. <sup>46</sup> Moĝa murinai Iosefa na dabuĝa kurokurona namona ta evoiato, benamo Iesu eĝabi-riĝoato, dabuĝa na ekumuato. Gara gabuna fore kouĝanai ea tore-toĝaiato murinai, fore baregona na ĝatama-boka ekure-ĝaunto. <sup>47</sup> Maria, Magadala vavinena, e Maria, Iosefa sinana, na etoreato gabuna ĝeĝita-kauato.

## 16

*Iesu evariĝisi-ĝenoĝoito*

*Ioane 20:1-10*

<sup>1</sup> Iuda tarimari ĝeri Sabadi ekorito murinai, Maria, Magadala vavinena, e Maria, Iakobo (o Iames) sinana, ema Salome muramura ma bonana namona ĝevoito, beĝene iaĝo, Iesu tauĝanina beĝene daua ĝana. <sup>2</sup> Fura ĝarona giniginena o Sandei ai, boĝiboĝi ĝaro eraĝekauto nai, gara ĝana ĝeiaĝoto. <sup>3</sup> Benamo tauĝeri moĝo ĝeverorito-ĝoi, ĝekirato, “Deikara na mo fore barana gara ĝekouĝau-iaĝiato tu, dei na toma ea kure-veĝitaiani?”

<sup>4</sup> Senaĝi ĝeboĝe-iaĝoto nuĝanai, mo fore baregona tu irau ai vetore. <sup>5</sup> Ĝia gara kouĝana nuĝanai ĝeraka-toĝato nai tu, mero variĝuna ta ĝeĝitaiato, aroriba rekenai etanuto, ĝena dabuĝa tu kurokuro e mauka kenene, benamo nuĝari ĝefarevaĝi-rakavato.

<sup>6</sup> Ĝia na ekirarito, ekirato, “Asi ĝogari, au ribagu ĝomi tu Iesu, Nasareta tauna, ĝevaĝa-satauroato tarimana ĝovetauani. Ĝia tu bevargisi-ĝenoĝoi! Ĝia mainai tu asigina, ĝetoreato gabuna ĝoma ĝitaia. <sup>7</sup> Be ĝoiaĝo, ĝena mero e Petero boĝonoa kira-varari, boĝono kira, ‘Iesu tu beguineni Galilea ĝana. Monai vau boĝoa ĝitaiani evaĝa-guruĝamito ilailanai.’”

<sup>8</sup> Benamo mo vavine ĝeraka-rosito gara nuĝana na, korana nuĝari ĝefarevaĝito e tauĝaniri ĝeĝoĝo-ĝoĝorito-ĝoi nai. Tarima ta maki asi ĝevaĝa-guruĝaiato, korana ĝegarito nai.

*Maria, Magadala vavinena, na Iesu eĝitaiato*  
*Mataio 28:9-10; Ioane 20:11-18*

[<sup>9</sup> Fura ĝarona giniguinenai, boĝi-boĝi iamoiamonai, Iesu evariĝisi-ĝenoĝoito, benamo Maria, Magadala vavinena, ĝenai efofori-guineto. Ĝia ĝenana tu iauka rakavari imaima ruarua (7) elai-vaĝirito. <sup>10</sup> Ĝia eiaĝoto, benamo Iesu murina na ĝerakato-ĝoi tarimari ĝeri nuĝaraĝe e taĝitaĝi nuĝanai ekira-vararito. <sup>11</sup> Ĝeseĝaĝiato Iesu tu maĝuri, Maria na eĝitaiato, senaĝi ĝena guruĝa asi ĝevaĝa-moĝoniato.

*Dabara tarima ruarua na Iesu ĝeĝitaiato*  
*Luka 24:13-35*

<sup>12</sup> Moĝa murinai ĝia tauri ruarua gabu ta ĝana ĝeraka-iaĝoto-ĝoi nuĝanai, Iesu ĝeri ai efoforito, senaĝi vetoĝana tu eirauto. <sup>13</sup> Benamo tauri ruarua ĝeĝenoĝoito, karori ĝekira-vararito, senaĝi ĝeri guruĝa asi ĝevaĝa-moĝonirito.

*Iesu ĝena mero ĝeri ai efoforito e ĝia na seĝuka evinirito*  
*Mataio 28:16-20; Luka 24:36-49; Ioane 20:19-23*

<sup>14</sup> Moĝa murinai ĝena mero gabanana sebona (11) ĝeĝaniĝanito-ĝoi nuĝanai, ĝeri ai efoforito, evanerito, korana asi ĝeri veĝabidadama e ĝeri nuĝa-gwaĝiĝi dainai, korana mase na evariĝisi-ĝenoĝoito murinai, ĝeĝitaiao tarimari ĝeri guruĝa asi ĝevaĝa-moĝonirito. <sup>15</sup> Benamo ekirarito, ekirato, “Ĝoiaĝo, tanobara mabarari ai Vari Namona tarimarima mabarari ĝoirari ai boĝono ĝobata-iaĝia. <sup>16</sup> Deikara na mai Vari Namona bevaĝa-moĝoniani ema babatiso beĝabiani tarimana tu bemaĝurini, senaĝi asi bevaĝa-moĝoniani tarimana Barau na rakava voina beviniani. <sup>17</sup> Ĝeveĝabi-dadamani tarimari ĝesi mai vetoĝa beĝe iaĝo-sebonani: Iauka rakavari au aragu ai beĝe lai-vaĝirini. Garo variĝuri irauirau ai beĝe guruĝani. <sup>18</sup> Mota rakavari beĝe ĝabi-vaisini, mase ĝarikiri beĝe niurini, senaĝi asi beĝe vaĝa-rakavarini. Ĝimari keve tarimari iatari ai beĝe tore-kaurini, benamo keve tarimari beĝe namoni.”

*Iesu tu Barau na eĝabi-varaĝeato guba ĝana*  
*Luka 24:50-53; Apostolo 1:9-11*

<sup>19</sup> Iesu Vereĝauka na evaĝa-guruĝarito murinai, Barau na eĝabi-vaiaĝo, guba ĝana evaraĝeto, benamo Barau aroribana rekenai etanu-tarito. <sup>20</sup> Benamo Iesu ĝena mero ĝeraka-lausito, gabu mabarari ai ĝea ĝobatato. Vereĝauka maki ĝia ĝesi ĝeĝauvei-vegogoto-ĝoi, ema ĝeri guruĝa evaĝa-moĝonirito-ĝoi nuĝa-farevaĝi veiĝa boruri ai.]

## VARI NAMONA LUKA NA ETOREATO

Luka vaḡa-foforina guruḡari

Luka tu doketa tarimana, ma ḡia tu irau bese tarimana. ḡia tu dia mo Iesu ḡena mero 12 vekaravari ai tarimana ta, senaḡi ḡia tu Paulo ḡesi erakaorakaoto-ḡoi tauna.

Luka na mai Vari Namona tu Teofilo ḡena etoreato. Etoreato laḡanina tu 60 beiaḡo 65 fakanai ta, mo tu Iesu emaseto murinai.

Luka ḡena ura baregona Teofilo e Grik tarimari ema tarimarima mabarari maki beḡene riba, Iesu tu Barau na evaḡa-moḡoniato, e tarima namo vedaureana, e tarimarima na Barau ḡena vevaḡa-maḡuri beḡene ḡabia ḡana uranai eruḡa-boroḡirito, benamo ḡeri rakava eḡwaiato, satauro ai emaseto, ema Iesu ḡereḡana ḡenana moḡo Barau ḡena vevaḡa-maḡuri tarimarima na beḡe ḡabiani.

Luka ḡena toretore tu maiḡesina eboioḡaiato:

1. Iesu keina na beiaḡo mo etarimato varina - karoa 1:1-4:13
2. Iesu ḡena vetuḡunaḡi ḡauveiri eveirito variri - karoa 4:14-21:38
3. Iesu ḡena midigumidigu ema ḡena mase variri - karoa 22-23
4. Iesu ḡena variḡisi-ḡenoḡoi, e ḡena tarimarima ḡeri ai efoforito, ema guba vanuḡana evaraḡeto variri - karoa 24

*Luka na Vari Namona etoreato Teofilo ḡena*

<sup>1</sup> Vere taumu Teofilo, ḡoi atore-vinimuni. Tarimarima ḡutuma Iesu na eveirito veiḡari ḡita fakarai variri varau ḡetorerito. <sup>2</sup> Tovotovona na tarimarima na matari na ḡeḡitarito dagarari ema ḡeḡobata-iaḡirito variri ilailari ḡevaḡa-ribarato. <sup>3</sup> Moḡa lorinai au maki atuḡamaḡini, namona maiḡa, Vere o, karakara ḡeḡorato dagarari sigana toḡana na bavetau-ḡitakauri, benamo ḡeḡorato ilailari ai ama torerini ḡoi ḡemu. <sup>4</sup> Benamo vau bono riba, ḡevaḡa-ribamuto-ḡoi guruḡari tu moḡoni veḡata.

*Ioane Babatiso ḡena ḡora ḡekiraḡi-foforiato*

<sup>5</sup> Heroda, vere barana o kini, na Iudea tanona eḡitaḡauato-ḡoi nuḡanai, Rubu Veaḡa verena ta etanuto-ḡoi arana Sakaria, Abia ḡena doḡoro tarimana. ḡaraḡona arana tu Elisabeta. ḡia maki Arona senena, Rubu Veaḡa vereri doḡorori vavinena. <sup>6</sup> ḡia tauri ruarua tu vei-iobukaiobuka tarimari Barau ḡoiranai. Vereḡauka ḡena taravatu ema vevaḡa-naḡi mabarabarari ḡekorana-iaḡirito-ḡoi ma nuḡari mabarari ḡesi. <sup>7</sup> Senaḡi tauri ruarua asi naturi, korana Elisabeta tu gabani, ema ḡia tauri ruarua tu varau ḡeḡaukato.

<sup>8</sup> ḡaro ta Sakaria ḡena vevaḡa-veaḡa ḡauveiri eveirito Rubu Veaḡai Barau ḡoiranai, korana ḡena doḡoro ḡeri nega dainai. <sup>9</sup> Benamo Rubu Veaḡa vereri ḡeri veiḡa ilailanai Sakaria ḡeḡabi-hidiato, muramura ma bonana namona bene gabu ḡana. Moḡa lorinai eraka-toḡato Vereḡauka ḡena Rubu Veaḡa nuḡanai, <sup>10</sup> a tarimarima mabarari tu murikai ḡeḡuriḡurito-ḡoi muramura egabuto-ḡoi nuḡanai.

<sup>11</sup> Benamo Vereḡauka ḡena aneru ta ḡia ḡenai efoforito, muramura goḡuna ma bonana fatana vevaḡana aroriba rekenai eruḡataḡoto-ḡoi. <sup>12</sup> Sakaria na eḡitaiato nai, nuḡana efarevaḡito ema egarito. <sup>13</sup> Senaḡi aneru na ekiraiato, ekirato, "Sakaria, asi nogari, korana ḡemu ḡauḡau Barau na beseḡaḡia. ḡaraḡomu Elisabeta na natumu ta beḡabiani, arana bono vatoa Ioane. <sup>14</sup> ḡoi boiakuni, boverereni, tarimarima ḡutuma maki ḡia bemaḡurini nai, beḡe iakuni. <sup>15</sup> Korana Vereḡauka ḡoiranai ḡia tu vere baregonai beiaḡoni. ḡia tu vine nanuna asi bene niua ema niuniu dagarari gwaḡiḡiri maki asiḡina moḡo. ḡia roḡo sinana dianai, Iauka Veaḡa na bevaḡa-vonuani. <sup>16</sup> ḡia na Isaraela tarimari vovoka beḡori-kurerini Vereḡauka, ḡeri Barau, ḡenai. <sup>17</sup> Vereḡauka ḡoiranai berakani Elia peroveta tarimana ḡena kokore ema ḡena seḡuka kavana. Tama e natu ḡia na ma bevaḡa-tanu vegogorini. Kira-sirivaḡi tarimari maki bevaḡa-tanu kurerini,

vei-iobukaiobuka tarimari ai beḡe iaḡoni; benamo ḡia na tarimarima beḡabi-torerini Vereḡauka ḡena.”

<sup>18</sup> Sakaria na aneru ekiraiato, ekirato, “Au tu kamasi baribaiani? Au tu ḡauka, ḡaraḡogu maki beḡauka.”

<sup>19</sup> Aneru evaḡa-veseto, ekirato, “Au tu Gabriela, Barau ḡoiranai aruḡani. Barau na au betuḡugu, bana vaḡa-guruḡamu ema mai vari namona bana kira-varamu. <sup>20</sup> Senaḡi au ḡegu guruḡa asi ovaḡa-moḡoniani nai, ḡoi murumu bebubuni, asi boguruḡani, beiaḡoni mo, mai guruḡa anina bea ḡorani ḡaronai. Akiraḡirini dagarari ḡeri nega korikori ai beḡe ḡorani.”

<sup>21</sup> Mai veiḡa eḡorato-ḡoi nuḡanai, tarimarima na ḡenari-kavaiato nai, ḡeverorito karase nai Sakaria Rubu Veaḡa nuḡanai ea kwaibo-rakavato. <sup>22</sup> Eraka-rosito nai, asi evaḡa-guruḡarito, benamo ḡeribato, ḡia tu emata-vanaḡito, kara ta eḡitaiato Rubu Veaḡa nuḡanai. Benamo ḡia na vetoḡai moḡo evaḡa-ribarito, asi eguruḡato, korana muruna ebubuto nai.

<sup>23</sup> Sakaria ḡena ḡauvei ḡarori Rubu Veaḡai evaḡa-koririto murinai, eḡenoḡoito ḡena vanuḡa ḡana. <sup>24</sup> Moḡa murinai ḡia ḡaraḡona Elisabeta varau ekuḡato, benamo ḡue imaima (5) etanu-vekuretoḡato numai. <sup>25</sup> Ekirato, “Vereḡauka na bevetuḡagu, maiḡesina au ḡegu ai beveia. ḡegu maiaka tarimarima ḡoirari ai beḡabi-vaḡia.”

*Iesu ḡena ḡora aneru na ekiraḡiato*

<sup>26</sup> Elisabeta ma banina ḡue imaima sebona (6) nuḡanai, Barau na aneru ta arana Gabriela etuḡuato vanuḡa ta Galilea nuḡanai arana Nasareta ḡana. <sup>27</sup> ḡuiato ta monai. ḡia tu ma kirakauna arana Iosefa, Davida ḡena doḡoro tarimana. Mo ḡuiato arana tu Maria. <sup>28</sup> Aneru ḡia ḡenai eiaḡoto, ekirato, “ḡaro namona, Vereḡauka tu ḡoi ḡesi ema ḡena vevaḡa-namo bara ḡoi ḡemu ai.”

<sup>29</sup> Maria na mai guruḡa eseḡaḡiato nai, nuḡana evekwaḡi-rakavato, etuḡamaḡito mai vevaḡa-namo anina tu kara. <sup>30</sup> Benamo aneru na ma ekiraiato, ekirato, “Maria, asi nogari, Barau na ḡena namo e varevare-bara ḡoi iatamu ai betorea. <sup>31</sup> ḡoi tu bokuḡani ema mero ta boḡabiani, arana bono vatoa Iesu. <sup>32</sup> ḡia arana bevaraḡeni ema beḡe kiraḡiani Iaru-korokoro Barauna Natuna. Barau tuḡutuḡu na kini ai bevaḡa-iaḡoani, ḡia senena Davida kavana. <sup>33</sup> ḡia tu vere tuḡutuḡu ai beiaḡoni, vere betanu-vanaḡi vanaḡini Iakobo besena ḡeri, ḡena Basileia asi bekorini.”

<sup>34</sup> Maria na aneru ekiraiato, ekirato, “Mai tu kamasi beḡorani? Au tau ta ḡesi tu roḡosi baḡana gena-vegogo.”

<sup>35</sup> Aneru na evaḡa-veseato, ekirato, “Iauka Veaḡa ḡoi iatamu ai befororini, Barau ḡena seḡuka na beborogimuni. Moḡesina nai ḡoi ḡemuna bemaḡurini merona vevaḡana tu Barau Natunai beḡe kiraḡiani. <sup>36</sup> Bono riba, ḡoi garagaramu Elisabeta, ḡia varau beḡauka, senaḡi ma banina. Ribamu, tarimarima na ḡekiraḡiato-ḡoi, ḡia tu gabani vavinena ḡetato-ḡoi, senaḡi toma ḡena ḡue imaima sebona (6) maiḡa. <sup>37</sup> Korana Barau tu dagara mabarari veiveiri ma ribana.”

<sup>38</sup> Maria ekirato, “Au tu Vereḡauka ḡena vetuḡunaḡi vavinegu, be bokira kavana au ḡegu ai bene ḡora.” Benamo aneru na eraga-kwaneato, erakato.

*Maria Elisabeta ḡenai eiaḡoto*

<sup>39</sup> Mo negai Maria evariḡisito, Iudea ḡorori vanuḡana ta ḡana eraga-iaḡoto. <sup>40</sup> Monai Sakaria ḡena numai eraḡekauto, Elisabeta evaḡa-namoato. <sup>41</sup> Elisabeta na Maria ḡena vevaḡa-namo guruḡana eseḡaḡiato nai, natuna tu diana nuḡanai eḡarevato, benamo Elisabeta Iauka Veaḡa na evaḡa-vonuato, mamina eḡabiato. <sup>42</sup> Benamo eguruḡa-baregoto, ekirato, “Vavine vefakari ai Barau ḡena vevaḡa-namo ḡoi iatamu ai tu barego vedaurea, ema boḡabiani merona iatanai maki! <sup>43</sup> Senaḡi au ḡegu namo tu kara Vereḡauka sinana ḡegu ai beiaḡoma? <sup>44</sup> ḡemu vevaḡa-namo guruḡana baseḡaḡia nai,

natugu tu nuḡagu ai eiakuni nai eḡarevani. <sup>45</sup> Ḡoi overereni, korana oveḡabi-dadamato, Vereḡauka ḡena guruḡa bemoḡonini otato nai.”

*Maria* ḡena iaku marina

<sup>46</sup> Benamo Maria ekirato,

“Au nuḡagu na Vereḡauka evaḡa-raḡeani.

<sup>47</sup> Au iaukagu na maki au vaḡa-maḡurigu Barauna eiaku-viniani,

<sup>48</sup> korana tu au,

ḡena vetuḡunaḡi vavinena,

ḡegu tanu lealeai roḡo

etuḡamaḡi-taḡoguni!

Mainana, beiaḡoni mo,

ḡuru mabarari beḡe kirani,

Barau ḡena vevaḡa-namo tu

au iatagu ai beḡe toni,

<sup>49</sup> korana tu veiḡa baregori

Seḡuka Barauna na au ḡegu ai beveiri.

Ḡia arana tu veaḡa.

<sup>50</sup> Ḡena vetuḡaḡwa tu

ḡia ḡegari-viniani tarimari

iatari ai betoreani,

ḡuru ta beiaḡoni ḡuru ta

iatari ai betanuni.

<sup>51</sup> Ḡia ḡimana eḡabi-vaisirito seḡukana na ḡeveiavini tarimari elai-karovorito.

<sup>52</sup> Ḡia na vere baregori

ḡeri tanutanu gaburi na

edori-firiḡorito,

a tanu lealea tarimari

ḡia na eḡabi-vaisirito.

<sup>53</sup> Vito tarimari maki dagara namori ai evaḡa-vonurito,

a farefare vovoka tarimari

ḡia na ḡimari kori

evaḡa-ḡenoḡoirito.

<sup>54</sup> Ḡena kiraḡitore ḡita tubura ḡatara Isaraela tarimari ḡesi asi etuḡa-rekwarito,

ema ḡia eiaḡomato

ḡena vetuḡunaḡi tarimari Isaraela bene vaḡa-kavari ḡana,

<sup>55</sup> senera ekiraḡitore-vinirito ilailana.

Aberahamo ma besena ḡesi roḡo bevetuḡa-ḡwa vanaḡi-vanaḡirini, etato.”

<sup>56</sup> Maria monai tu Elisabeta ḡesi ḡetanuto ḡue toitoi (3). Moḡa murinai ḡena vanuḡa ḡana ma eḡenoḡoi-iaḡoto.

*Ioane Babatiso* emaḡurito

<sup>57</sup> Elisabeta ḡena ḡabi ḡarona varau eraḡasito nai, mero ta eḡabiato. <sup>58</sup> Benamo sevinai ḡetanuto tarimari ema garagarana na varina ḡeseḡaḡiato nai, ḡia ḡesi ḡeiaku-vegogoto, korana Vereḡauka ḡena namo e varevare-bara ḡia ḡenai eḡorato nai.

<sup>59</sup> Ḡaro vaḡa-imaima toitoinei (8) mero tauḡanina kefina beḡene lama-vaḡia ḡana ḡevegogoto. Mai ḡaro sebonai maki arana beḡene vatoa Sakaria, tamana beḡene turaia ḡetato. <sup>60</sup> Senaḡi sinana asi eurato nai ekirato, “Asiḡina! Ḡia arana tu Ioane.” <sup>61</sup> Ḡia ḡekirato, “Senaḡi ḡoi ḡemu bese nuḡanai mai ara tu asiḡina!” <sup>62</sup> Benamo ḡia na mero tamana ḡimari ai moḡo ḡedanaḡiato, mero arana tu deikara beḡene si. <sup>63</sup> Sakaria na toretore vetuḡuna ta ekiraḡiato, benamo maiḡesi etoreato, “Ḡia arana tu Ioane.” Benamo mabarari nuḡari ḡefarevaḡito. <sup>64</sup> Monai vau muruna evekeoto, meana maki eroroḡototo, benamo eguruḡato, Barau evaḡa-namoato.

<sup>65</sup> Moġa lorinai seviri ai ġetanuto tarimari mabarari ġeġaba-rakavato ema mo veiġa varina Iudea ġoro vanuġari mabarari nuġari ai ġevari-fiuato. <sup>66</sup> Varina ġeseġaġiato tarimari mabarari na ġetuġamaġi-iaġiato, ġekirato, “Mai mero tu kamasi beveini?” Korana tu Vereġauka ġimana seġukana tu ġia iatanai.

*Sakaria* ġena mari

<sup>67</sup> Ioane tamana Sakaria Iauka Veaġa na evaġa-vonuato, benamo Barau ġena guruġa evaġa-foforiato, ekirato,

<sup>68</sup> “Vereġauka,

Isaraela tarimari ġeri Barau,  
sivaġa-namo,

korana tu ġia ġena bese  
tarimari eiaġoma-vinirito  
bene voi-ġenoġoiri ema  
bene vaġa-maġuriri ġana.

<sup>69</sup> Vevaġa-maġuri tauna ma seġukana ġesi etuġuato ġita ġera,  
ġia tu ġena vetuġunaġi tauna  
Davida garakana.

<sup>70</sup> Mai kiraġitore tu

ġena peroveta tarimari veaġari na irau laġani ai ġekiraġi-foforiato:

<sup>71</sup> Ġita tu ġia na ekira-ġaurato,

ġevetari-vinirani ema ġebaru-vinirani tarimari ġimari na ġia na bevaġa-maġurirani etato.

<sup>72</sup> Ekirato maki, ġita tubura ġatara bevetuġa-ġwarini,  
ema ġena kiraġitore veaġana  
asi betuġa-rekwaiani.

<sup>73</sup> Ġia na ġita senera Aberahamo ekiraġitore-viniato,

<sup>74</sup> benamo ekirato, ġevetari-vinirani tarimari ġimari na beġabi-maġurirani.  
Benamo vetuġunaġina bisini iaġo-vini asi garira ġesi.

<sup>75</sup> Ġoiranai bisini raka ma veaġara e ma iobukaiobukara ġesi  
ġera maġuri ġarori mabarari ai.

<sup>76</sup> Natugu o, ġoi tu Iaru-korokoro Barauna ġena peroveta tarimana beġe kiraġimuni,  
korana tu boraka-guineni Vereġauka ġena dabara bono vaġa-maġataia ġana.

<sup>77</sup> Ġena bese tarimari

bono vaġa-ribari,

ġia na ġeri rakava bene tuġamaġi-fitoġari ema bene vaġa-maġuriri.

<sup>78</sup> Korana ġita ġera Barau ġena vetuġaġwa tu barego ġita ġerai.

Ġaro eraġekauni mamana kavana vevaġa-maġuri ġita iatarai betanuni.

<sup>79</sup> Benamo mukunai e mase gari nuġanai ġetanuni tarimari bevaġa-mamarini,  
ema maino dabaranai beġori-kaurini.”

<sup>80</sup> Ioane ebaregoto ema iaukana egwadato. Tano fakanai etanuto-ġoi, eiaġomato mo, Isaraela tarimari ġeri ai efororito ġarona.

## 2

*Iesu* ġena ġora

<sup>1</sup> Mo negai Kaisara Augusto, Roma ġeri vere, na ġena vevaġa-naġi etuġuato, tanobara tarimari mabarari arari beġene toreri, sensisi beġene ġabia. <sup>2</sup> Mai tu sensisi giniguinena, Kwirinio na Siria evereato-ġoi neganai ġeġabiato. <sup>3</sup> Moġa lorinai tarimarima mabarari arari toretoreri uranai tata ġeri vanuġa korikori ġana ġeġenoġoito.

<sup>4</sup> Iosefa maki erakato. Nasareta, Galilea rekena vanuġa ta na, Betelehema ġana eiaġoto, Iudea rekena vanuġa ta, Davida ġena vanuġa. Mo ġana eiaġoto, korana ġia tu Davida ġena doġoro tarimana. <sup>5</sup> Monai arana beġene torea ġana, ġia kirakauna Maria ġia ġesi ġeiaġoto. Ġia tu ma banina. <sup>6</sup> Tauri ruarua monai ġetanuto-ġoi nuġanai, ġena

ġabi ġarona varau evotuto. <sup>7</sup> Ġia eġabito, mero guinena eġabiato, dabuġai eseġoato, boromakau ġeri ġaniġani fatanai evaġa-genakauato, korana varivari tarimari ġeri numa asi faka ta dainai.

*Mamoe narinari tarimari ma aneru ġesi*

<sup>8</sup> Mo tano monai mamoe ġenaririto-ġoi tarimari kota tu boġai ġetanuto-ġoi, boġi ai ġeri mamoe ġeġitaġaurito-ġoi. <sup>9</sup> Benamo Vereġauka ġena aneru ta ġia ġeri ai efoforito, Vereġauka mamana na emama-taririto; ġegari-rakavato, <sup>10</sup> senaġi aneru na ekirarito, ekirato, “Asi ġogari! Vari Namona au na baġwa-iaġomaia ġomi ġemi, tarimarima mabarari vaġa-iakuri ema vaġa-verereri ġana. <sup>11</sup> Maitoma Davida ġena vanuġai ġemi vevaġa-maġuri tarimana bemaġuri, Keriso Vereġauka! <sup>12</sup> Vetoġana tu maiġa, mero raraka-raraka boġo doġariani boromakau ġeri ġaniġani fatanai genakau, dabuġa na beseġoa.”

<sup>13</sup> Benamo asikauna guba aneruri ġutuma mai aneru sebona ġesi ġefofori-barato, Barau ġevaġa-namoato, ġekirato,

<sup>14</sup> “Guba tuġuna vanigerenai

Barau beġene vonevone-raġe vinia,

ema tanobarai maino

ġia na eiaunamo-vinirini

tarimari na beġene ġabia!”

<sup>15</sup> Aneru mabarari na ġeraga-kwanerito, guba ġana ġeġenoġoito murinai, mamoe ġitaġauri tarimari ġeguruġa-vegogoto, ġekirato, “Ġita tu Betelehema ġana si-iaġo, Vereġauka na bevaġa-ribara dagarana sia ġitaia.”

<sup>16</sup> Benamo ġeraga-iaġoto, Maria e Iosefa ġedoġaririto, mero keina maki boromakau ġeri ġaniġani fatanai genataġonai ġeġoitaġoato. <sup>17</sup> Mero ġeġitaiato, benamo aneru na ġevaġa-ribarito mero varina ġekiraġi-foforiato. <sup>18</sup> Benamo ġeseġaġito tarimari mabarari mamoe ġitataġori tarimari ġeri guruġa na nuġari ġefarevaġito. <sup>19</sup> Maria na mo guruġa mabarari nuġanai etorerito ema etuġamaġirito-ġoi. <sup>20</sup> Mamoe ġeġitaġauto-ġoi tarimari ġeġenoġoito, Barau ġevevato-iaġiato, ġevaġa-raġeato, korana ġeseġaġirito ema ġeġitarito dagarari tu moġoni, aneru na ġia evaġa-ribarito ilailana.

*Iesu arana ġevatoato*

<sup>21</sup> Ġaro vaġa-imaima toitoinei (8), mero tauġanina kefina beġe lama-vaġiani ġaronai, ġia arana ġevatoato, Iesu. Sinana na roġosi bene ġoitaġoa nuġanai, aneru na ekiraġiato arana ġeviniato.

*Iesu Rubu Veāġai ġea vaġa-foforiato*

<sup>22</sup> Mero eġorato ġaro gabana vasivasi (40) murinai, ġia ġeri veiareva ġarona eraġasito, Mose ġena taravatu ekirani ilailanai. Benamo Iosefa e Maria na Iesu Ierusalemā ġana ġeġwa-iaġoato, Vereġauka ġoiranai ġea vaġa-foforia ġana. <sup>23</sup> Korana Vereġauka ġena taravatu ekirani, “Ġora guine merori mabarari tu veaġa Vereġauka ġena.” <sup>24</sup> Vereġauka ġena taravatu ilailana varevare dagarana beġene vinia ġetato, pune ruarua o pune variġuri ruarua.

<sup>25</sup> Tau ta Ierusalemā etanuto-ġoi, arana tu Simeona. Ġia tu vei-iobukaiobuka tarimana ema Barau ġena taravatu ekorana-iaġiato-ġoi tarimana. Ġia na Isaraela ġeri vevaġa-maġuri enariato-ġoi ema Iauka Veāġa na evaġa-vonuato. <sup>26</sup> Iauka Veāġa na maki evaġa-guruġaiato, ekirato, ġia asi roġo bemaseni mo, Keriso, (Barau na ekiraġi-toreato vevaġa-maġuri tauna), roġo beġitaiani. <sup>27</sup> Iauka Veāġa na Rubu Veāġa nuġanai Simeona eġori-toġaiato vau, Iesu tamana ema sinana na ġeġwa-toġaiato, taravatu ekirani veiġana beġene veia ġana. <sup>28</sup> Benamo Simeona na mero eġabiato, efaniato, Barau evaġa-namoato, ekirato,

<sup>29</sup> “Vereġauka, ġemu vetuġunaġi tauna mai vau bono tuġu-fitoġagu, ma mainogu ġesi mai baiaġoni ġemu kiraġitore vaġa-ilailana.



<sup>30</sup> Varau ġemu vevaġa-maġuri  
matagu na bama ġitaia,

<sup>31</sup> ġoi na ovei-toreato tarimarima mabarari ġoirari ai.

<sup>32</sup> Mamana maiġa,  
bese iraurau vaġa-mama-iaġiri,  
ma ġoi ġemu bese Isaraela  
vevato-iaġiri ġana.”

<sup>33</sup> Mero tamana e sinana na Simeona ġena guruġa ġeseġaġito nai, ġeġaba-rakavato.

<sup>34</sup> Benamo Simeona na tauri ruarua evaġa-namorito, Maria ekiraiato, ekirato, “Mai mero na Isaraela tarimari ġutuma vaġa-ketori ema ġutuma vaġa-vaisiraġeri ai beiaġoni. Ġia tu vetoġa ta Barau ġenana, tarimarima ġutuma na beġe kiraġi-fitoġaiani, <sup>35</sup> moġesi tarimarima nuġari vekuretoġari dagarari mabarari beġea foforini. Ġoi, Maria, maki midigumidigu asikei boġoitaġoni, noġa moġo lorumu kaia na beġe gwanu-toġaiani midiguna kavana.”

<sup>36</sup> Monai peroveta vavinena ta arana Ana. Ġia tu Fanuela natuna, Asere ġena doġoro vavinena. Ġia tu eveġaraġoto, laġani imaima ruarua (7) ġaraġona ġesi ġetanuto, <sup>37</sup> benamo evabuto, laġani gabana imaima ma gabana toitoi vasivasi (84) etanuto, varau eġaukato. Rubu Veaġa asi eraga-kwaneato, laġani e boġi ai Barau etomarakariġo viniato-ġoi, eġuriġurito-ġoi ema eġaniveaġato-ġoi. <sup>38</sup> Mo hora sebonai ġia maki eraġasito, benamo Barau evaġa-namoato, Ierusalemata vaġa-maġurina ġenariato-ġoi tarimari ġoirari ai mai mero varina ekiraġiato.

#### *Nasareta* ġana ma ġeġenoġoito

<sup>39</sup> Iosefa ema Maria na Vereġauka ġena taravatu ekirani veiġari mabarari ġeveirito murinai, Galilea ġana ġeġenoġoito, ġeri vanuġa Nasareta ġana. <sup>40</sup> Mai mero ebareġoto ma gwadana ġesi; Barau ġena iaunega na evonuvonu-raġeto ema ġena namo e varevarebara tu ġia iatanai.

#### *Iesu Rubu Veāġa* nuġanai

<sup>41</sup> Laġani mabarari nuġari ai Iesu tamana ema sinana tu Ierusalemata ġana ġeiaġoto-ġoi, Pasova verekona dainai. (Moġa tu Iuda tarimari mase aneruna na evanaġirito moġo, asi evaġirito verekona). <sup>42</sup> Iesu ġena laġani gabanana ruarua (12) eġabiato nai, ġia maki tamana ema sinana ġesi vereko urana ġeiaġoto, ġeveito-ġoi kavana. <sup>43</sup> Vereko ekorito murinai, ġeġenoġoito ġeri vanuġa ġana, senaġi ġia asi ribari, Iesu tu Ierusalemata ġeraga-kwaneato. <sup>44</sup> Ġia ġeri tuġamaġi Iesu tu ġia ġesi. Ġaro sebona ġerakato murinai, garagarari ema ġatari fakari ai ġevetauto. <sup>45</sup> Ġevetauto nuġanai asi ġeġoitaġoato, moġa lorinai ma ġeġenoġoito Ierusalemata ġana Iesu vetauvetauna. <sup>46</sup> Ġaro toitoi murinai ġeġoitaġoato, Iesu tu Rubu Veāġa nuġanai Iuda tarimari ġeri vevaġa-riba tarimari ġesi. Barau ġena guruġa ġekiraġirito-ġoi eseġaġirito-ġoi ema ġia na maki edanaġirito-ġoi mai guruġa aniri tu kara. <sup>47</sup> Mabarari na Iesu ġena vedanaġi ema evaġa-veseto guruġari ġeseġaġito nai, ġeġaba-rakavato. <sup>48</sup> Iesu tamana ema sinana mainai ġeġoitaġoato nai, nuġari ġefarevaġi-rakavato, benamo sinana na ekiraiato, ekirato, “Natugu, karase nai ġoi na ġai maiġesi boveima? Ġoi tamamu ema au tu ġoi daimu ai dabarama maki beġe doko, kamasu ta mai bovei baġasi.”

<sup>49</sup> Iesu ekirato, “Karase nai au ġovetauguni? Ġomi asi ribami au tu Tamagu ġena numai?” <sup>50</sup> Senaġi ġia asi ribari, Iesu karase maiġesina evevaġa-veseto.

<sup>51</sup> Moġa murinai Iesu tamana ma sinana ġesi ġeġenoġoito Nasareta ġana. Ġeri guruġa mabarari eiaġo-vinirito-ġoi. Maiġeri dagara ġeġorato mabarari Maria na nuġanai etorerito ema etuġamaġi taġorito-ġoi. <sup>52</sup> Iesu efutuato ma iaunegana ġesi, Barau ema tarimarima na maki ġeuraviniato-ġoi.

## 3

*Ioane Babatiso eḡobatato*

*Ioane 1:19-28*

<sup>1</sup> Tiberio Kaisara, Roma ḡeri vere, evereto laḡani gabanana imaima (15) nuḡanai, Pontio Pilato tu Iudea ḡeri gavana, Heroda tu Galilea verena, tarina Filipino tu Iturea ma Trakoniti tanori ḡeri vere, Lisania tu Abilene verena. <sup>2</sup> Anas ma Kaiafas tu Rubu Veaḡa vereri baregori. Mo negai Barau na Ioane Sakaria evaḡa-guruḡaiato tano fakanai. <sup>3</sup> Benamo Ioane na Ioridana ḡarukana tanona mabarana eraka-vaḡa-ḡauato, eḡobatato-ḡoi, tarimarima ḡeri rakava ḡerina beḡene vetuḡamaḡi-kure e beḡene raka-kure, ema babatiso beḡene ḡabia, Barau na ḡeri rakava bene tuḡamaḡi-fitoḡari ḡana. <sup>4</sup> Isaia, peroveta tarimana, ḡena bukai etoreato ilailanai, ekirato,

“Tarima ta tano fakanai ekeani, ekirani,

‘Vereḡauka ḡena dabara ḡoiarevaia,

ḡena iaḡoma dabarana ḡovaḡa-maoromaoroa.

<sup>5</sup> Douka gaburi mabarari

boḡono vaḡa-vonuri,

ḡoro baregori e ḡoro keiri mabarari boḡono vaḡa-faiarari.

Dabara ḡeḡeva-ḡeḡevari

boḡono vaḡa-maoromaorori,

ema dabara koufakoufari maki boḡono vaḡa-vonuri.

<sup>6</sup> Benamo tarimarima mabarari na Barau ḡena vevaḡa-maḡuri beḡe ḡitaiani!’ ”

<sup>7</sup> Tarimarima ḡutuma Ioane ḡenai ḡeiaḡoto, bene babatisori ḡana. Benamo Ioane na eḡobatarito, ekirarito, “Ḳomi mota naturi, dei na bekirami, Barau ḡena vevaḡa-maoro ḡenana boḡo raga-maḡurini? <sup>8</sup> Ḳemi rakava ḡerina boḡono vetuḡamaḡi-kure, ema boḡono raka-kure Barau ḡenai, benamo ḡemi maḡuri ai ḡwaḡwa namori boḡono buri. Asi boḡono kira, ‘Aberahamo tu ḡai tamama, (be Barau na beḡabi-raḡemani).’ Korana boḡono riba, Barau tu ma seḡukana Aberahamo natuna tu mai fore ḡerina bevaḡa-ḡorarini! <sup>9</sup> Koko tu ḡau korari ai varau beḡe toreri. Benamo ḡwaḡwa namori asi beḡe ḡwani ḡauri mabarari tu beḡe basirini, karavai beḡe fiu-raḡerini.”

<sup>10</sup> Vegogo tarimari na Ioane ḡedanaḡiato, ḡekirato, “Be, ḡai tu kara baḡana vei?”

<sup>11</sup> Ḳia na evaḡa-veserito, ekirato, “Ḳomi deidei ḡemi sedi ruarua nai, ta tu asi ḡena sedi tarimana bono vinia, e ma ḡana ḡaniḡani tarimana na maki moḡesi bene vei.”

<sup>12</sup> Takesi gogo tarimari maki babatiso beḡene ḡabi ḡana Ioane ḡenai ḡeiaḡoto, ḡedanaḡiato, ḡekirato, “Vevaḡa-riba taumu, ḡai tu kamasi baḡana vei?” <sup>13</sup> Ḳia evaḡa-veseto, ekirato, “Taravatu ekirani lorinai moḡo boḡono gogo.”

<sup>14</sup> Vetari tarimari o soldia na maki ḡedanaḡiato, ḡekirato, “Ḳai maki kamasi baḡana vei? Ḳia evaḡa-veseto, ekirato, “Tarima ḡeri moni asi boḡono verariri ema asi boḡono kira-rakavari. Ḳomi davami dainai maki asi boḡono mugumugu.”

<sup>15</sup> Tarimarima nuḡari ai maiḡesi ḡetuḡamaḡito, “Mai tarima tu Keriso, (Barau na ekiraḡi-toreato vevaḡa-maḡuri tauna), banaḡu,” ḡetato. <sup>16</sup> Benamo Ioane na mabarari evaḡa-guruḡarito, ekirato, “Au tu nanu na ababatisomini, senaḡi tarima ta beiaḡomani, ḡia ḡena seḡuka na au ḡegu seḡuka tu evanaḡiani. Au tu asi ilaila ḡia ḡena tamaka varona baruḡaiani. Ḳia na Iauka Veaḡa ema karava na bebabatisomini. <sup>17</sup> Ḳia ḡimanai tu iareva-iareva dagarana, widi momona tu widi tauri ḡenana bene iareva-ḡitakauri ḡana. Benamo widi tu ḡena vaḡa-vegogo numanai bevaḡa-vegogorini, senaḡi widi momona tu begabuani asi ebuseni karavanai.”

<sup>18</sup> Ioane na mo guruḡai ema guruḡa ḡutumai maki Barau ḡena Vari Namona tarimarima eḡobata-vinirito, ema enoḡirito, ḡeri rakava ḡerina beḡene vetuḡamaḡi-kure.

<sup>19</sup> Ioane na maki Heroda, Galilea verena, evaneato, korana tu ḡia kakana Filipino ḡaraḡona eḡaraḡoato nai, ema veiḡa rakavari ḡutuma eveirito nai. <sup>20</sup> Heroda na mo rakava mabarari iatari ai ta ma etore-kauato, ḡia na Ioane dibura numanai ma ekou-ḡauato.

*Ioane na Iesu ebabatisoato**Mataio 3:13-17; Mareko 1:9-11*

<sup>21</sup> Tarimarima mabarari Ioane na ebabatorito-ḡoi nai, Iesu maki ebabatisoato. Benamo Iesu eḡauḡauto-ḡoi nuḡanai, guba evekeo-fakato, <sup>22</sup> Iauka Veāḡa emariḡoto ḡia iatanai, vetoḡana noḡa pune kavana. Garo ta guba na ekea-riḡoto, ekirato, “Ḡoi tu au Natugu, aura-vinimuni; ema ḡemu ai aiaku-rakavani maki.”

*Iesu tubuna ḡatana arari**Mataio 1:1-17*

<sup>23</sup> Iesu na ḡena ḡauvei esinaiato nai, ḡena laḡani tu gabana toitoi (30) kavana. Tarimarima ḡekirato-ḡoi, ḡia tu Iosefa natuna. Besena tu maiḡeri: Iosefa tu Heli natuna, <sup>24</sup> Heli tu Matat natuna, Matat tu Levi natuna. Levi tu Melki natuna. Melki tu Ianai natuna. Ianai tu Iosefa natuna. <sup>25</sup> Iosefa tu Matatia natuna. Matatia tu Amosa natuna. Amosa tu Nahum natuna. Nahum tu Eseli natuna. Eseli tu Nagai natuna. <sup>26</sup> Nagai tu Mahat natuna. Mahat tu Matatia natuna. Matatia tu Semein natuna. Semein tu Ioseka natuna. Ioseka tu Ioda natuna. <sup>27</sup> Ioda tu Ioanan natuna. Ioanan tu Resa natuna. Resa tu Serubabele natuna. Serubabele tu Sealtiele natuna. Sealtiele tu Neri natuna. <sup>28</sup> Neri tu Melki natuna. Melki tu Adi natuna. Adi tu Kosam natuna. Kosam tu Elmadam natuna. Elmadam tu Ere natuna. <sup>29</sup> Ere tu Iosua natuna. Iosua tu Eliesere natuna. Eliesere tu Iorim natuna. Iorim tu Matat natuna. Matat tu Levi natuna. <sup>30</sup> Levi tu Simeona natuna. Simeona tu Iuda natuna. Iuda tu Iosefa natuna. Iosefa tu Ionam natuna. Ionam tu Eliakim natuna. <sup>31</sup> Eliakim tu Melea natuna. Melea tu Mena natuna. Mena tu Matata natuna. Matata tu Natan natuna. Natan tu Davida natuna. <sup>32</sup> Davida tu Iese natuna. Iese tu Obed natuna. Obed tu Boas natuna. Boas tu Salmone natuna. Salmone tu Nasona natuna. <sup>33</sup> Nasona tu Aminadab natuna. Aminadab tu Admin natuna. Admin tu Areni natuna. Areni tu Hesron natuna. Hesron tu Perese natuna. Perese tu Iuda natuna. <sup>34</sup> Iuda tu Iakobo natuna. Iakobo tu Isako natuna. Isako tu Aberahamo natuna. Aberahamo tu Tera natuna. Tera tu Nahoro natuna. <sup>35</sup> Nahoro tu Serug natuna. Serug tu Reu natuna. Reu tu Peleg natuna. Peleg tu Ebere natuna. Ebere tu Sela natuna. <sup>36</sup> Sela tu Kainana natuna. Kainana tu Afasada natuna. Afasada tu Sem natuna. Sem tu Noa natuna. Noa tu Lameka natuna. <sup>37</sup> Lameka tu Metusela natuna. Metusela tu Enoka natuna. Enoka tu Iared natuna. Iared tu Mahalalel natuna. Mahalalel tu Kainana natuna. <sup>38</sup> Kainana tu Enos natuna. Enos tu Seta natuna. Seta tu Adamu natuna. Adamu tu Barau natuna.

## 4

*Satani na Iesu eriba-ḡaniato*

<sup>1</sup> Iesu Ioridana ḡarukanai Iauka Veāḡa na evaḡa-vonuato vau, ea ḡenoḡoito, benamo Iauka na tano fakana ḡana eḡori-iaḡoato. <sup>2</sup> Monai ḡaro e boḡi gabana vasivasi (40) Diabolo na eribaḡaniato-ḡoi. Mo ḡaro mabarari nuḡari ai asi eḡaniḡanito-ḡoi, moḡa lorinai mo ḡaro ḡekorito murinai, ḡia evito-rakavaiato.

<sup>3</sup> Diabolo na ekiraiato, ekirato, “Bema ḡoi Barau Natuna nai, mai fore nokiraia, be ḡaniḡani ai neiaḡo.” <sup>4</sup> A Iesu na evaḡa-veaseato, ekirato, “Buka Veāḡa nuḡanai maiḡesi ekirani, ‘Tarimarima tu dia ḡaniḡani na moḡo bemaḡurini.’ ”

<sup>5</sup> Benamo Diabolo na Iesu eḡori-raḡeato gabu ta tuḡunai, tanobara basileiari mabarari vaḡa-sebo evaḡa-ḡitaiato. <sup>6</sup> Benamo Diabolo ekirato, “Au na seḡuka bavimimuni, maiḡeri dagara mabarari boḡita-ḡaurini, aramu maki bebaregoni. Mai dagara mabarari tu au ḡegu, benamo aura-viniani tarimana bavimiani. <sup>7</sup> Moḡa lorinai bema au botoma-rakariḡo viniguni nai, maiḡeri dagara mabarari boḡabirini ḡoi ḡemu.”

<sup>8</sup> Senaḡi Iesu evaḡa-veseto, ekirato, “Buka Veāḡai tu maiḡesi ḡetoreato, ‘Vereḡauka, ḡoi ḡemu Barau bono toma-rakariḡo vinia, ḡia moḡo ḡereḡana vetuḡunaḡina bono iaḡo-vini!’ ”

<sup>9</sup> Benamo Satani na Ierusema ḡana eḡori-iaḡoato, Rubu Veāḡa tuḡunai evaḡa-ruḡakauato, ekiraiato, “Bema ḡoi Barau Natuna, mainana noburi-firiḡo, <sup>10</sup> korana Buka Veāḡa nuḡanai maiḡesi ekirani, ‘Barau na ḡena aneru bekirarini, ḡoi beḡe narimuni.’ <sup>11</sup> Ekirani maki, ‘Aneru na ḡimari na beḡe ḡobemuni, beḡe ḡabi-vaisimuni, kwakumu fore ai asi boraraiani.’ ”

<sup>12</sup> Iesu evaḡa-veseto, ekirato, “Buka Veaḡa nuḡanai maki ekirani, ‘Vereḡauka ḡoi ḡemu Barau asi bono riba-ḡania.’ ”

<sup>13</sup> Satani ḡena veribaḡani mabarari evaḡa-koririto, benamo eraga-kwaneato, eiaḡoto mo, ḡaro ta.

*Iesu ḡena ḡauvei esinaiato Galileai*

*Mataio 4:12-17; Mareko 1:14-15*

<sup>14</sup> Iesu ma eḡenoḡoito Galilea ḡana, Iauka Veaḡa seḡukana maki ḡia ḡesi. ḡia varina Galilea tano nuḡanai ḡefiu-rovorovoato. <sup>15</sup> Iesu tu ḡeri rubu nuḡari ai evevaḡa-ribato-ḡoi, mabarari na ḡevaḡa-raḡeato.

*Nasareta tarimari na Iesu asi ḡeḡabi-raḡeato*

*Mataio 13:53-58; Mareko 6:1-6*

<sup>16</sup> Benamo Iesu Nasareta ḡana eiaḡoto. Mai tu ḡia ebaregoto vanuḡana. Vanaḡivanaḡi eveito-ḡoi kavana Sabadi ai ḡia rubu ai eraka-toḡato. Benamo Buka Veaḡa bene iavia ḡana evariḡisito nai, <sup>17</sup> Isaia peroveta tarimana ḡena buka rubu ḡitaḡauna tarimana na Iesu eviniato, benamo ḡia na ereraiato, ḡena iavi-iavi gabuna eḡoitaḡoato, maiḡesi ekirani,

<sup>18</sup> “Vereḡauka Iaukana tu  
au ḡegu ai maiḡa,  
korana ḡia na tu  
au eboroḡiguto,  
ema eviriḡiguto,

Vari Namona gara veḡubu tarimari bana ḡobata-viniri ḡana.

Etuḡuguto, dibura tarimari ḡeri ai Barau na dibura na varau eḡabi-vaḡirato varina bana varifua ḡana,

ema mata-bubu tarimari  
matari maki beḡene fafa.

ḡevaḡa-rakavarini tarimari  
bana vaḡa-maḡuriri,

<sup>19</sup> ema Vereḡauka na tarimarima bevaḡa-maḡuririni laḡanina bana ḡobata-iaḡia.”

<sup>20</sup> Benamo Iesu na buka ma eiokuato, rubu ḡitaḡauna tarimana ma evini-ḡenoḡoiato, benamo etanu-tarito. Mabarari rubu nuḡanai tarimari na ḡeḡita-karakaraiato.

<sup>21</sup> Benamo Iesu na eḡobata-vinirito, ekirato, “Mai boḡo seḡaḡia guruḡana tu toma ḡaro ai bemoḡoni.”

<sup>22</sup> Benamo mabarari na ḡevaḡa-namoato e ḡeḡabato, korana guruḡa namori ekiraḡirito nai. ḡekirato, “Mai tu Iosefa natuna ba?”

<sup>23</sup> Benamo Iesu na ekirarito, ekirato, “Au ribagu ḡomi na mai sisiba guruḡana au ḡegu ai boḡo kira-varaguni, boḡo kirani, ‘Doketa tarimamu, tauḡemu bono vevaḡa-maḡuri! Kaperanaumi oveirito veiḡari variri ḡama seḡaḡirito, be mainai ḡemu vanuḡa korikori ai maki bono vei.’ ” <sup>24</sup> Moḡoni akiramini, peroveta tarimana tu ḡena vanuḡa korikori ai asi beḡe ḡabi-raḡeani. <sup>25</sup> Maiḡa maki boḡono seḡaḡi: Moḡoni, Elia ḡena negai vabu ḡutuma Isaraelai ḡetanuto-ḡoi. Laḡani toitoi (3) ma ḡue imaima sebona (6) nuḡanai ḡura asi eraguto-ḡoi, tanobara mabarana doḡe na eḡabi-ḡauato. <sup>26</sup> Senaḡi mo Isaraela vaburi ḡeri ai Barau na Elia asi etuḡu-iaḡoato. Irau gabu vanuḡana ta arana Sarefata, Sidono tanonai, vabu ta ḡenai etuḡu-iaḡoato. <sup>27</sup> Elisa, peroveta tarimana, ḡena negai lepera tarimari ḡutuma Isaraelai ḡetanuto-ḡoi, senaḡi sebona ta asi evaḡa-namoato, Naman, Siria tarimana, moḡo ḡereḡana.

<sup>28</sup> Rubu ai ḡevegogoto tarimari mabarari mo guruḡa ḡeseḡaḡiato nai, ḡebaru-rakavato. <sup>29</sup> Benamo ḡevariḡisito, Iesu vanuḡa na ḡeinu-rosiato, ḡeri vanuḡa ḡevaḡa-ruḡaiato ḡorona tavi ta reke lofa asikeina na beḡene fiu-riḡoa ḡetato. <sup>30</sup> Senaḡi Iesu tu ḡia fakari na moḡo eraka-vaḡito, mo eiaḡoto.

*Iesu na iauka rakavana elai-vaḡiato*

*Mareko 1:21-28*

<sup>31</sup> Iesu tu Kaperanauma, Galilea vanuḡana ta, ḡana evariḡoto. Benamo Sabadi ai evevaḡa-ribato. <sup>32</sup> Ḳia ḡena vevaḡa-riba guruḡari tarimarima na ḡeseḡaḡiato nai, ḡeḡaba-rakavato, korana ḡena guruḡa ma seḡukana.

<sup>33</sup> Rubu nuḡanai iauka rakavana na eboroḡiato tarimana ta etanu-taḡoto-ḡoi. Ḳia ekoḡo-gigitarito, ekirato, <sup>34</sup> “Iesu, Nasareta taumu o, kara ḡemai noveia otoni? Ḳoi ḡai vaḡa-rakavama uranai boiaḡoma, ene? Au ribagu, ḡoi tu Barau ḡena Veaḡa Tarimamu.”

<sup>35</sup> Iesu na ekira-ḡoiato, ekirato, “Gurumu, ḡia ḡenana noraka-vaḡi!” Benamo mo iauka rakavana na tano eḡidara-iaḡiato tarimarima ḡoirari ai, ḡia ḡenana eraka-vaḡito, fau ta maki asi efororito ḡia ḡenai.

<sup>36</sup> Benamo tarimarima mabarari nuḡari ḡefarevaḡi-rakavato, ḡeveguruḡa-vevinito, ḡekirato, “Mainai kamasi eguruḡani? Be, ma seḡukana e ma gwadana ḡesi iauka rakavari evaḡa-guruḡarini, benamo ḡeraka-vaḡini!” <sup>37</sup> Benamo Iesu varina mo gabu mabarana ai ḡefiu-rovorovoato.

*Iesu na Simona ḡena taḡama evaḡa-namoato*

*Mataio 8:14-15; Mareko 1:29-31*

<sup>38</sup> Iesu rubu eraga-kwaneato, benamo Simona ḡena numa ḡana eiaḡoto. Simona ḡena taḡama vavinena ekeveto, tauḡanina eseḡuka-rakavato; benamo Iesu ḡenoḡiato bene vaḡa-kavaia. <sup>39</sup> Benamo Iesu eiaḡoto mo vavine sevinai eruḡato, keve ekira-ḡoiato, benamo keve ekorito. Vavine maoromaoro evariḡisito, benamo eḡuburito.

*Keve tarimari ḡutuma Iesu na evaḡa-namorito*

*Mataio 8:16-17; Mareko 1:32-34*

<sup>40</sup> Ḳaro ea keto-firiḡoto-ḡoi nai, tarimarima na keve iraurau tarimari mabarari Iesu ḡenai ḡeḡori-iaḡorito. Ḳia ḡimana tarima tata iatari ai etore-kaurito evaḡa-namorito. <sup>41</sup> Iauka rakavari maki tarimarima ḡutuma ḡerina ḡeraka-vaḡito, benamo iauka rakavari ḡekoḡoto, ḡekirato, “Ḳoi tu Barau Natuna!” Senaḡi Iesu na evaḡa-guruḡarito asi beḡene guruḡa, korana ḡia ribari Iesu tu Keriso, (Barau na ekiraḡi-toreato vevaḡa-maḡuri tauna).

*Iesu rubu nuḡari ai eḡobatato-ḡoi*

*Mareko 1:35-39*

<sup>42</sup> Elaḡanito, Iesu evariḡisito, tano fakana ḡana eiaḡoto. Tarimarima na ḡea vetauato, ḡedoḡariato, ḡeḡabi-tariato asi ḡeri ura ḡia na bene raga-kwaneri ḡetato. <sup>43</sup> Senaḡi Iesu na evaḡa-guruḡarito, ekirato, “Au tu vanuḡa irauri ai maki bana ḡobata, Barau ḡena Basileia varina namona bana fiua, Barau na etuḡuguto korana tu moḡa.”

<sup>44</sup> Benamo Iudea tanona ruburi nuḡari ai eḡobatato-ḡoi.

## 5

*Iesu na ḡena mero ekearito*

<sup>1</sup> Ḳaro ta Iesu tu Genesareta kouna rikina ai eruḡa-taḡoto-ḡoi, tarimarima na ḡeraga-ḡeḡeraḡiato, Barau ḡena guruḡa beḡene seḡaḡia ḡana. <sup>2</sup> Ḳia tu ḡasi ruarua eḡitarito, kou rikina ai ḡeinu-raḡerito; maina tarimari na ḡeraga-kwanerito, ḡeri reke ḡeḡuriḡirito-ḡoi. <sup>3</sup> Benamo Iesu tu mo ḡasi tai eraḡeto, Simona ḡena ḡasi. Ḳia na Simona ekiraiato, kota negini-rosia nanu ḡana. Benamo ḡasi ai etanu-tarito, tarimarima ḡutuma evaḡa-ribarito.

<sup>4</sup> Eguruḡa-ḡosito vau, ḡia na Simona ekiraiato, ekirato, “Ḳemi ḡasi dodoku rekena ḡana ḡogini-rosia, be ḡemi reke boḡono toreri, maḡani-kone boḡono vaḡi ḡana.”

<sup>5</sup> Simona evaḡa-veseto, ekirato, “Vevaḡa-riba taumu, ḡai tu baḡa vekwaraḡi-laḡani, maḡani-kone ta maki asi baḡa doḡaria, senaḡi ḡoi ḡemu guruḡa dainai reke atorineri.”

<sup>6</sup> Benamo ḡetorerito, maḡani-kone asisebo ḡetoḡato, ḡeri reke maki dori ḡevedareto.

<sup>7</sup> Moġesi nai karori ġasi tai ġelau-iaverito, beġene iaġoma, be ġia beġenema vaġa-kavari ġetato. Ġeiaġomato, ġasi ruarua maġani-kone na ġevaġa-vonurito, dori ġeburuto-ġoi.

<sup>8</sup> Simona Petero na mo veiġa eġorato dagarana eġitaiato, benamo Iesu kwakuna koranai eketo-tarito vau ekiraiato, ekirato, “Vereġauka, noraka-veġita au ġeguna, au tu vei-rakava tarimagu!” <sup>9</sup> Korana tu ġia ma karonna mabarana ġesi nuġari ġefarevaġi-rakavato, mo maġani-kone asisebo ġevaġirito nai. <sup>10</sup> Simona ġesi ġemainna-vegogoto-ġoi tarimari maki Iakobo (o Iames) e Ioane, Sebedaiio natuna, ġeġaba-rakavato. Iesu na Simona ekiraiato, ekirato, “Asi nogari; maitoma bevesina beiaġoni, ġoi tu tarimarima bomaina-vinirini.” <sup>11</sup> Benamo ġasi ruarua tu kou rikinai ġeinu-raġerito, ġeri dagara mabarari ġeraga-kwanerito, Iesu murinai ġerakato.

*Iesu na lepera tarimana evaġa-namoato*

*Mataio 8:1-4; Mareko 1:40-45*

<sup>12</sup> Ġaro ta Iesu tu vanuġa ta nuġanai, tarima ta monai kefina mabarana lepera moġo. Ġia na Iesu eġitaiato nai, ġoiranai evetui-tarito, enoġiato, ekirato, “Vereġauka, bema ġoi ourani nai, moġoni boiarevaguni, bovaġa-namoguni riba!” <sup>13</sup> Iesu ġimana etuġu-iaġoato, eġabi-karaiato, ekirato, “Aurani, be nonamo!” Benamo vaġa-sebo lepera na eraga-kwaneato.

<sup>14</sup> Iesu na evaġa-guruġaiato, ekirato, “Tarima ta asi bono kira-varaia.” Ma ekirato, “Noiaġo, Rubu Veaġa verena na bene ġitamun, ema veiareva varevare dagarari Mose na ekiraġiato ilailanai bono vinia, be tarimarima beġene riba, ġoi tu bonamo.”

<sup>15</sup> Senaġi Iesu varina tarimarima na ġefiu-rovorovoato-ġoi vau, tarimarima ġutumabara ġevegogoto-ġoi, ġia ġena guruġa seġaġi-seġaġiri e ġeri keve vaġa-namori uranai.

<sup>16</sup> Senaġi Iesu tu eraka-veġitato-ġoi tano fakana ġana, ea ġuriġurito-ġoi.

*Iesu na rakava etuġamaġi-fitoġarito*

*Mataio 9:1-8; Mareko 2:1-12*

<sup>17</sup> Ġaro tai Iesu evevaġa-ribato-ġoi nuġanai, Farisea tarimari e taravatu vaġa-riiba-iaġina tarimari Galilea e Iudea vanuġari mabarari na, ema Ierusalemna na ġeiaġomato, ġia sevinai ġema tanu-tarito. Barau ġena seġuka Iesu ġenai evaġa-foforiato, keve tarimari bene vaġa-namori ġana. <sup>18</sup> Tarima kotari na tauġanina tavi ta emaseto tarimana ta gedai genagenanai ġeġwa-iaġoato. Numa nuġanai beġene raka-toġa dabarana ġevetauato, Iesu ġoiranai beġene tore-taria ġetato. <sup>19</sup> Senaġi tarimarima ġutuma naima, rakatoġa dabara ta asi ġedoġariato. Moġa lorinai keve rakava tarimana ma gedana ġesi ġeġwa-raġeato numma tuġunai, ġuduġu ġeġiu-fakaiato vau, ġetuġu-riġoato tarimarima fakari ai Iesu ġoiranai. <sup>20</sup> Iesu na ġeri veġabidadama eġitaiato, benamo keve rakava tarimana ekiraiato, ekirato, “Ġata, ġoi ġemu rakava batuġamaġi-fitoġari.”

<sup>21</sup> Farisea tarimari e taravatu ġevevaġa-riiba iaġiato-ġoi tarimari maiġesi ġetuġamaġito, “Mai tu deikara, ġia na Barau ekira-fitoġaiani? Barau ġereġana na moġo rakava etuġamaġi-fitoġarini!”

<sup>22</sup> Iesu ma ribana ġia kara ġetuġamaġirito-ġoi, benamo evaġa-guruġarito, ekirato, “Karase nai nuġami ai maniġesi ġotuġamaġini? <sup>23</sup> Aiġesina baguruġani tu meraġa, ‘Ġemu rakava batuġamaġi-fitoġari’ banasi, ba bara kira, ‘Novariġisi, be noraka’ barasi?”

<sup>24</sup> Au na navaġa-ġitami, Tarimarima Natuna tu ma seġukana rakava betuġamaġi-fitoġarini tanobarai.” Ġia na keve rakava tarimana evaġa-guruġaiato, ekirato, “Novariġisi, ġemu geda noġabia, be numma ġana noiaġo!”

<sup>25</sup> Benamo ġia maoromaoro evariġisito tarimarima ġoirari ai, egena-iaġirito dagarari eġabirito, ġena numma ġana eiaġoto, Barau evaġa-raġeato. <sup>26</sup> Tarimarima mabarari nuġari ġefarevaġito ema Barau ġevaġa-raġeato. Gari na evaġa-vonurito, benamo ġekirato, “Veiġa boruri toma ġaro ai bita ġita!”

*Iesu na takesi gogo tarimana arana Levi ekeaiato*

*Mataio 9:9-13; Mareko 2:13-17*

<sup>27</sup> Moḡa murinai Iesu tu vanuḡa na eraka-rosito, benamo takesi gogo tarimana arana Levi takesi moniri ḡeḡabito-ḡoi numanai tanutaḡo eḡitaiao. Benamo Iesu na ekiraiato, ekirato, “Murigu ai noma raka.” <sup>28</sup> Benamo Levi evariḡisito, ḡena dagara mabarari eraga-kwanerito, Iesu murinai erakato.

<sup>29</sup> Benamo Levi na ḡaniḡani baregona ḡena numai eveiato Iesu ḡana. Varivari tarimari vefakari ai tarimarima ḡutuma takesi gogo tarimari ema tarima tari ḡia ḡesi ḡeḡaniḡanito. <sup>30</sup> Farisea tarimari tari e taravatu ḡevevaḡa-riba iaḡiato-ḡoi tarimari, ḡia ḡeri doḡoro tarimari, ḡevanevaneto Iesu ḡena mero ḡeri ai, ḡekirato, “Karase nai ḡomi tu takesi gogo tarimari e vei-rakava tarimari ḡesi ḡoḡaniḡanini ema ḡoniuniu-vegogoni?” <sup>31</sup> Iesu na evaḡa-veserito, ekirato, “Namo tarimari tu doketa asi beḡe vetaurini, senaḡi keve tarimari moḡo. <sup>32</sup> Au maki vei iobukaiobuka tarimari keakeari asi aiaḡomato, senaḡi vei-rakava tarimari beḡene vetuḡamaḡi-kure e beḡene raka-kure ḡana aiaḡomato.”

### ḡaniveaḡa

*Mataio 9:14-17; Mareko 2:18-22*

<sup>33</sup> Farisea tarimari na Iesu ḡevaḡa-guruḡaiato, ḡekirato, “Ioane Babatiso ḡena mero nega-ḡutuma ḡeḡani-veaḡani e ḡeḡuriḡurini. ḡai ḡema mero maki moḡesi ḡeveini, a ḡoi ḡemu mero tu ḡeḡaniḡanini e ḡeniuniuni moḡo.”

<sup>34</sup> Iesu na evaḡa-veserito, ekirato, “ḡomi ḡotuḡamaḡini veḡaraḡo variḡu tarimana ḡatana seviri ai etanuni nuḡanai beḡe ḡani-veaḡani ei? <sup>35</sup> ḡarona eiaḡomani, veḡaraḡo variḡu tarimana ḡia ḡerina beḡe ḡabi-veḡitaiani, monai vau beḡe ḡani-veaḡani.”

<sup>36</sup> Iesu na ḡeri barabore ta ma ekiraḡiato, ekirato, “Tarima ta na dabuḡa variḡuna asi bedareani, dabuḡa guinena bani-iaḡina. Bema moḡesi beveini nai, dabuḡa variḡuna bedareani, ema dabuḡa variḡuna veseana dabuḡa guinena ḡesi asi beḡe ilailani. <sup>37</sup> Tarima ta na vine nanuna variḡuna nanigosi kefina guinenai asi besisiani. Bema moḡesi beveini nai, vine nanuna variḡuna na kefi guinena beḡani-fakaiani. Vine nanuna bevebubuni e kefina berakavani. <sup>38</sup> Senaḡi vine nanuna variḡuna nanigosi kefina variḡunai besisiani tu namo! <sup>39</sup> Ema tarima ta na vine nanuna guinena eniuani murinai vine nanuna variḡuna asi beura-viniani, korana ḡia bekirani, ‘Vine nanuna guinena tu namo vedaurea.’”

## 6

### *Iesu tu Sabadi Verena*

<sup>1</sup> Sabadi tai Iesu widi vamokari nuḡari na eraka-iaḡoto-ḡoi, benamo ḡena mero widi ḡebukito, ḡimari ai ḡemuturito-ḡoi, benamo tauri tu ḡeḡanirito-ḡoi. <sup>2</sup> Farisea tarimari kotari na ḡedanaḡirito, ḡekirato, “ḡomi tu kara dainai ḡaina taravatu asi ḡokorana-iaḡiani, Sabadi ai widi ḡobukini?”

<sup>3</sup> Iesu na evaḡa-veserito, ekirato, “ḡomi Davida ma karonā ḡesi ḡevitorito nai, Davida na veiḡa ta eveiato guruḡana tu asi ḡoiaviani? <sup>4</sup> Barau ḡena numai eraka-toḡato, Barau ḡoiranai ḡetorerito-ḡoi beredi eḡabito, eḡanito ema karonā maki evinirito. Mo beredi tu veaḡa, Rubu Veaḡa vereri moḡo ḡari, taravatu.” <sup>5</sup> Iesu na ma ekirarito, ekirato, “Tarimarima Natuna tu Sabadi Verena.”

### ḡima boso tarimana

*Mataio 12:9-14; Mareko 3:1-6*

<sup>6</sup> Ma Sabadi tai Iesu rubu ai eraka-toḡato, benamo evevaḡa-ribato-ḡoi. Monai tarima ta tu ḡimana aroribana tu ebosoto. <sup>7</sup> Taravatu ḡevevaḡa-riba iaḡiato-ḡoi tarimari e Farisea tarimari na tu ḡia ḡeḡita-taḡoato-ḡoi, mai Sabadi ai bevevaḡa-namoni ba asiḡi, korana beḡene samania ḡana. <sup>8</sup> Senaḡina Iesu na ḡia kara ḡetuḡamaḡiato-ḡoi tu eribaiato, benamo mo tarima ḡimana boso ekiraiato, ekirato, “Noruḡa-vaisi, mainai noma ruḡa.” Benamo eruḡa-vasito, ea ruḡato. <sup>9</sup> Benamo Iesu na evaḡa-guruḡarito, ekirato, “Nadanaḡimi roḡo, taravatu nuḡanai aiḡa tu namo, Sabadi ai veiḡa namori veiveiri namo ba veiḡa rakavari sini veiri? Tana vevaḡa-maḡuri ba tana vaḡivaḡi?” <sup>10</sup> Eboḡe-ḡeḡeraḡito, mabarari eḡitarito, benamo mo tarima ekiraiato, ekirato, “ḡimamu

notuḡu-roroḡotoa.” Ġimana etuḡu-roroḡotoato, benamo enamoto ḡimana reke ta kavana.

<sup>11</sup> Senaḡina ḡia tu ḡebaru-rakavato, benamo tauḡeri fakari ai moḡo ḡeguruḡa-vegogoto Iesu kamasi ta beḡene veia ḡana.

*Iesu na tarima gabanana ruarua (12) eḡabi-hidirito*

*Mataio 10:1-4; Mareko 3:13-19*

<sup>12</sup> Mo ḡaro tai Iesu ḡoro ta tuḡuna ḡana evaraḡeto ḡuriḡuri, benamo mo boḡi vinubana Barau ḡenai eḡauḡauto. <sup>13</sup> Elaḡanito, ḡena mero ekea-vegogorito, benamo gabanana ruarua (12) eḡabi-viriḡirito, arari evatorito, apostolo. <sup>14</sup> Simona, arana ta tu Petero, ma tarina Anduru; e Iakobo (o Iames), e Ioane, e Filipino, e Batolomeo, <sup>15</sup> e Mataio, e Tomasi; e Iakobo (o Iames), Alfeo natuna; e Simona, Selote tarimana; <sup>16</sup> e Iudas, Iakobo (o Iames) natuna; ema Iudas Isakariota, Iesu berevaiani tarimana.

*Iesu evevaḡa-ribato e keve evaḡa-namorito*

*Mataio 4:24-25; Mareko 3:7-12*

<sup>17</sup> Ġia ḡesi ḡoro na ḡeseiriḡoto tano faiaranai, benamo Iesu ema ruḡa-tarito. Ġia ḡenai riba ḡeḡabito-ḡoi tarimari ḡutuma ema tarimarima ḡutuma lelevaḡiri maki Iudea ema Ieruselema na ḡeiaḡomato, Taia konena na e Sidono konena na ḡeiaḡomato, <sup>18</sup> ḡia beḡene seḡaḡia uranai ema ḡeri keve bene vaḡa-namori ḡana. Iauka rakavari na ḡeboroḡirito tarimari maki evaḡa-namorito. <sup>19</sup> Benamo tarimarima mabarari ḡeurato-ḡoi Iesu beḡene ḡabi-karaia, korana tu seḡuka ḡia ḡenana eiaḡomato-ḡoi, benamo tarimarima mabarari ḡeri keve ḡenamato-ḡoi.

*Deikara beḡene iaku e deikara ḡeri ai tu rakava*

*Mataio 5:1-12*

<sup>20</sup> Iesu eboḡeboḡeto, benamo eboḡe-iaḡoto ḡena mero eḡitarito vau ekirato:

“Gara veḡubu tu ḡoiaku,

korana Barau ḡena Basileia tu ḡomi ḡemi.

<sup>21</sup> Ġomi deidei toma ḡevitomini tu boḡono iaku,

korana ḡomi roḡo boḡo ḡani-maseni bene.

Ġomi deidei toma ḡotaḡi-taḡini tu boḡono iaku,

korana boḡo rikini bene.

<sup>22</sup> Boḡono verere bema tarima na beḡe baru-vinimini, beḡe kira-fitoḡamini, beḡe rori-toremini, ema arami beḡe vaḡa-rakavarini Tarimarima Natuna dainai. <sup>23</sup> Moḡeri beḡe ḡorani ḡaronai boḡono iaku e boḡono buri-vaishi ma vereremi ḡesi, korana davami tu asikeikeina gubai. Korana ḡia seneri na maki peroveta tarimari moḡesi ḡeveirito.

<sup>24</sup> Senaḡina ḡomi ma ḡemi

farefare ḡutuma tarimami

vetuḡami kika,

korana vaḡa-iakumi farefareri tu varau ḡoḡabito bene.

<sup>25</sup> Toma ḡoḡani-maseni tarimami,

vetuḡami,

korana beḡea vitomini.

Toma ḡorikini tarimami,

vetuḡami kika,

korana nuḡami beḡea metoni

e boḡoa taḡini.

<sup>26</sup> Tarimarima na ḡekiraḡi-varaḡe varaḡemini tarimami, vetuḡami, korana seneri na maki peroveta tarimari ḡofaḡofari tu maniḡesi ḡevaḡa-raḡerito.”

*Ġevaḡa-rakavamini tarimari boḡono ura-viniri*

*Mataio 5:38-48*



<sup>27</sup> “Senaḡina au ḡoseḡaḡiguni tarimami akiramini: ḡebaru-vinimini tarimari boḡono ura-viniri, ḡevaḡa-rakavamini tarimari veiḡa namori boḡono vei-viniri. <sup>28</sup> ḡekira-rakavamini tarimari boḡono vaḡa-namori ema veiḡa rakavari ḡevei-vinimini tarimari ḡeri boḡono ḡuriḡuri. <sup>29</sup> Bema tarima ta na taḡomu tavi ta beforoani nai, taḡomu reke ta maki bono vinia. Tarima ta na ḡemu koudi beḡabiani nai, sedi maki asi bono ḡabitaria, bene ḡabia. <sup>30</sup> ḡemu ai beḡe noḡinoḡini tarimari bono viniri ema deikara na ḡemu dagara ta beḡabi-rakaiani, ḡabiḡoina guruḡana asi bono vei. <sup>31</sup> Kara ourani tarimarima na ḡemu ai beḡene veia veiḡana, ḡia ḡeri ai maki mo veiḡa bono veia.

<sup>32</sup> Bema ḡoura-vinirini tarimari tu ḡomi ḡeura-vinimini tarimari moḡo nai, ḡomi ḡemi namo tu kara? Rakava tarimari maki ḡeura-vinirini tarimari moḡo ḡeura-vinirini. <sup>33</sup> O bema veiḡa namori ḡemi ai ḡeveini tarimari moḡo veiḡa namori ḡovei-vinirini, ḡomi ḡemi namo tu kara? Rakava tarimari maki mani veiḡa sebona ḡeveiani. <sup>34</sup> O bema ma beḡe vini-ḡoimini tarimari moḡo ḡovinirini, ḡomi ḡemi namo tu kara? Rakava tarimari na maki tarima ḡevinirini, murinai tu mabarari ma beḡene dava-ḡoiri ḡetoni. <sup>35</sup> Senaḡina ḡebaru-vinimini ema ḡevaḡa-rakavamini tarimari boḡono ura-viniri, veiḡa namori ḡeri ai boḡono vei, boḡono viniri, a tuḡu vaḡa-voi tuḡamaḡina asi boḡono vei. Benamo davami beḡene barego, ema Iaru-korokoro Barauna natunai boḡono iaḡo, korana tu ḡia na asi ḡevaḡa-namoani tarimari e vei-rakava tarimari evaḡa-namorini. <sup>36</sup> Boḡono vevetuḡa-ḡwa, ḡomi Tamami evevetuḡa-ḡwani kavana.”

*Nuḡami ai tarimarima asi boḡono vaḡa-rakavari*

*Mataio 7:1-5*

<sup>37</sup> “Nuḡami ai tarimarima asi boḡono kira-kerereri. Moḡesi tu Barau na maki asi bekiraḡimini ḡomi tu kerere. Rakava voina tarimarima ḡeri ai asi boḡono kiraḡi-kaua, benamo Barau na rakava voina ḡemi ai asi bekiraḡi-kauani. Rakava boḡono tuḡamaḡi-fitoḡaia, be Barau na maki ḡemi rakava bene tuḡamaḡi-fitoḡari. <sup>38</sup> Boḡono vini, be Barau na maki bene vinimi, ḡutumari bene dori-riḡori, bene kora-vegogori, bene vonu-fokafoka, bene ḡiḡiḡiḡi-seḡi, bene bubu-riḡoa ḡemi ai. Korana aiḡesi ḡomi ḡovinini, Barau na maki moḡesi bevinimini.”

<sup>39</sup> Iesu na barabore ta ma ekira-vararito, ekirato, “Mata-bubu tarimana na mata-bubu tarimana ta beḡori-kauani riba ba? Ba tauri ruarua koufai beḡea keto-ḡurani? <sup>40</sup> Riba vetau merona na evaḡa-ribaiani tarimana asi bevanaḡiani, senaḡina ḡena sikuli bevaḡa-koriani vau, evaḡa-ribaiani tarimana ḡesi beḡe ilailani.

<sup>41</sup> Kara dainai tarikakamu matanai libika oḡitaiani, senaḡi ḡoi matamu ai ḡau tubina tu asi otuḡamaḡiani. <sup>42</sup> Kamara dabarai ḡoi tarikakamu okiraiani, okirani, ‘Ḡata, au na roḡo matamu ai libika nakokia,’ senaḡina ḡoi tauḡemu matamu ai ḡau tubina tu asi oḡitaiani? Ḡofaḡofa tarimamu, guine tu ḡoi matamu ai ḡau tubina nokoki-vaḡia roḡo, benamo boboḡeboḡe-ginikauni vau, tarikakamu matanai libika bono kokia.”

*Ḡau ta ḡwaḡwana*

*Mataio 7:16-20; 12:33-35*

<sup>43</sup> “Ḡau namona beḡwani ḡwaḡwana tu dia rakava, ema ḡau rakavana beḡwani ḡwaḡwana tu dia namo. <sup>44</sup> Ḡau mabarari tu ḡwari ai bita ribani. Figi ḡwari maki ḡau ma giniginiri ḡerina asi ḡebokoni, ema vine ḡwari (o grapes) ḡauḡa ḡiniḡiniri ḡeri ai asi ḡebokoni. <sup>45</sup> Tarima namona na dagara namori nuḡanai evaḡa-vegogorini dagarari bevaḡa-raka-rosirini. Tarima rakavana na dagara asi namori nuḡanai evaḡa-vegogorini dagarari bevaḡa-raka-rosirini. Korana tarima tu nuḡana na kara eiaḡomani murunai ekiraḡirini.”

*Numa ḡeragani tarimari ruarua*

*Mataio 7:24-27*

<sup>46</sup> “Karase nai au ḡokiraḡiguni, ḡokirani, ‘Vereḡauka, Vereḡauka,’ nuḡanai au aguruḡani veiḡari tu asi ḡoveirini? <sup>47</sup> Navaḡa-ribami, deikara au ḡegu ai eiaḡomani, au ḡegu guruḡa ema seḡaḡini ma veiḡari eveirini tu kamasi. <sup>48</sup> Ḡia tu tarima ta ḡena numa

eragaiato kavana. Guri ekwa-variḡo kwareḡaiato, ema fore iatanai evaḡa-ruḡaiato, benamo ḡabata baregona eragato, mo numa edoriato, senaḡi asi eketoto, korana fore iatanai eragaiato nai. <sup>49</sup> A tarima ta au ḡegu guruḡa eseḡaḡirini, senaḡi veiḡari tu asi eveirini, ḡia tu numa eragaiato nai, tano moirana iatanai moḡo evaḡa-ruḡaiato, ḡabata na mo numa edoriato nai, eketo-tarito, benamo eḡwa-rovorovoato.”

## 7

### *Roma vetari verena ḡena vetuḡunaḡi merona*

<sup>1</sup> Iesu na moḡeri guruḡa mabarari tarimarima ḡoirari ai ekiraḡi-ḡosirito vau, Kaperanauma vanuḡanai eraka-toḡato. <sup>2</sup> Monai Roma vetari verena ta etanuto-ḡoi. Ḣena vetuḡunaḡi merona, euravini-baregoato-ḡoi merona, ekeve-rakavato, dori emaseto-ḡoi. <sup>3</sup> Vetari verena na Iesu varina eseḡaḡiato, benamo Iuda tarima baregori kota etuḡu-iaḡorito, Iesu beḡene noḡia, bene iaḡoma, ḡena vetuḡunaḡi merona benema vaḡa-namoa. <sup>4</sup> Benamo Iesu ḡenai ḡeiaḡoto, ma nuḡari mabarari ḡesi ḡenoḡiato, ḡekirato, “Mai vetari verena tu tarima namona naima bono vaḡa-kavaia. <sup>5</sup> Korana ḡia na ḡita besera eura-vinirini, ema ḡai ḡema rubu maki ḡia na eragaiato.”

<sup>6</sup> Iesu ḡia ḡesi ḡeiaḡoto. Numa ḡeraka-kavinaḡiato-ḡoi nai, vetari verena na ḡatana kota etuḡu-iaḡorito Iesu ḡoirana ḡana, benamo vetari verena ḡena guruḡa Iesu ḡekiravaraiato, ḡekirato, “Vereḡauka, asi novekwaragaḡi, au tu asi ilaila, ḡoi ḡegu numai boraḡekauni. <sup>7</sup> Au maki asi ilaila, ḡoi ḡemu ai baiaḡosini. Senaḡi ḡoi noguruḡa moḡo, benamo au ḡegu vetuḡunaḡi merona benamoni. <sup>8</sup> Au maki tarima kota ḡeri veḡitaḡau gabureri ai ema vetari tarimari o soldia tu au gaburegu ai. Au na ta bakiraiani, ‘Noraka!’ benamo berakani, ma ta bakiraiani, ‘Noiaḡoma!’ benamo beiaḡomani. Ema au ḡegu vetuḡunaḡi merona bakiraiani, ‘Maiḡa noveia!’ benamo beveiani.”

<sup>9</sup> Iesu na mai guruḡa eseḡaḡiato nai, eḡaba-rakavato, eruḡa-kureto, ḡia murinai ḡerakato tarimari ḡutuma evaḡa-guruḡarito, ekirato, “Au na ḡomi akiramini, veḡabidadama maiḡesi kavana Isaraela nuḡanai asi adoḡariato.”

<sup>10</sup> Benamo vetari verena na etuḡurito tarimari ma ḡeḡenoḡoito ḡia ḡena numa ḡana. Keve merona ḡedoḡariato, ḡena keve varau ekorito.

### *Iesu na vabu ta natuna mase na evaḡa-maḡuri-ḡenoḡoiato*

<sup>11</sup> Moḡa murinai Iesu tu vanuḡa ta ḡana eiaḡoto arana Nain. Ḣena mero ema tarimarima ḡutuma maki ḡia ḡesi ḡeiaḡoto. <sup>12</sup> Vanuḡa nuḡanai roḡosi ḡene raka-toḡa nuḡanai, mase ta vanuḡa nuḡana na ḡeḡwa-rosiato-ḡoi. Vabu ta natuna merona ḡora ḡereḡa emaseto. Vanuḡa tarimari ḡutuma na vabu ḡekavaiato. <sup>13</sup> Iesu na mo vabu eḡitaiao, benamo evetuḡaiato, ekiraiato, ekirato, “Asi notaḡi.” <sup>14</sup> Benamo Iesu eraka-kavi-iaḡoto, mase mauḡana eḡabi-karaiato. Mauḡa ḡeḡwaiato tarimari ḡeruḡa-tarito. Benamo Iesu ekirato, “Mero futua, akiramuni, novariḡisi!” <sup>15</sup> Benamo etanu-vaisito, eguruḡato. Moḡa murinai Iesu na ḡia sinana ma evini-ḡenoḡoiato.

<sup>16</sup> Mabarari gari na evaḡa-vonurito. Barau ḡevaḡa-raḡeato, ḡekirato, “Peroveta tarimana barana ta ḡita fakarai bema fofori!” ema, “Barau na ḡena bese tarimari benema vaḡa-kavari ḡana beiaḡoma!”

<sup>17</sup> Benamo mai veiḡa varina Iudea mabaranai ema Iudea sevina vanuḡari mabarari ai ḡefiu-rovorovoato.

### *Iesu ma Ioane Babatiso*

#### *Mataio 11:2-19*

<sup>18</sup> Ioane ḡena mero na mai dagara mabarari ḡeḡorato dagarari ḡekira-varaiato. Benamo Ioane na ḡena mero ruarua ekearito, <sup>19</sup> etuḡurito Vereḡauka ḡenai, ḡene danaḡia, “Ioane na ekiraḡiato, beiaḡomani tarimana tu ḡoi, ba tarima boruna ta baḡana vaḡa-nogaia?”

<sup>20</sup> Tauri ruarua Iesu ġenai ġeraġasito, benamo ġekirato, “Ioane Babatiso na betuġuma, bekira, ‘Ġia na ekiraġiato beiaġomani tarimana tu ġoi, ba tarima boruna ta baġana vaġa-nogaia?’ ”

<sup>21</sup> Mo aoa ai Iesu na tarimarima ġutuma evaġa-namorito, keve tarimari, midigu ġeġanito-ġoi tarimari, iauka rakavari na ġeboroġirito tarimari. Mata-bubu tarimari ġutuma maki matari evaġa-iaġarito. <sup>22</sup> Benamo Iesu na tauri ruarua evaġa-veserito, ekirato, “Ġoġenoġoi, ġomi na boġo ġitari e boġo seġaġiri veiġari Ioane boġono kira-varaia: Mata-bubu tarimari ġeboġeboġeni, kwaku rakava tarimari ġerakani, lepera tarimari ġenamoni, seġa-bubu tarimari ġeseġaġini, mase tarimari ġevariġisi-ġenoġoini, ema asi ġeri-ġari tarimari ġeri ai Vari Namona eġobata-vinirini. <sup>23</sup> Ġena veġabidadama au ġegu ai asi beraga-kwaneani tarimana tu eiakuni!”

<sup>24</sup> Ioane ġena vetuġunaġi tarimari ġerakato vau, Iesu na ġevegogoto tarimari evaġa-guruġarito, Ioane varina ġeri ekiraġiato, ekirato, “Kara boġono ġitaia ġana tano fakana ġana ġoiaġoto? Gobu iavara na ekwari-ġareva ġarevaiani ġitaġitana ġoiaġoto? <sup>25</sup> Kara boġono ġitaia ġana ġoiaġoto? Dabuġa namona eveiani tarimana ġitaġitana ġoiaġoto? Asiġina, dabuġa namori ġeveirini tarimari ema ġaniġani namori ġeġanirini tarimari tu vere tarimari ġeri numai ġetanuni! <sup>26</sup> Be, kara boġono ġitaia ġana ġoiaġoto? Peroveta tarimana dainai? Aba! Akiramini, ġoġitaiato tarimana tu peroveta tarimari mabarari evanaġirini. <sup>27</sup> Ioane varina Buka Veaġai maiġesi etoreato, Barau ekirato, ‘Au na ġegu vetuġunaġi tarimana tu batuġu-guineani, ġemu dabara ġoiramu ai vaġa-maġatana.’ ”

<sup>28</sup> Iesu ma ekirato, “Akiramini, mai tanobarai beġe maġuri tarimari mabarari fakari ai ta na Ioane asi bevanaġiani. Senaġi Barau ġena Basileia nuġanai gabi tarimana na Ioane tu evanaġiani.”

<sup>29</sup> Tarimarima mabarari ema takesi gogo tarimari maki mai guruġa ġeseġaġiato nai, ġia na Barau ġena dabara ġevaġa-moġoniato, Ioane ġena babatiso ġeġabiato. <sup>30</sup> Senaġi Farisea tarimari e taravatu ġevevaġa-riba iaġiato-ġoi tarimari na Barau ġena vevaġa-maġuri dabarana ġia ġeri ai ġetuġamaġi-fitoġaiato. Ioane ġena babatiso ġia ġeri ai asi ġeġabi-raġeato.

<sup>31</sup> “Toma ġuru tarimari tu deikarari ġesi bana vaġa-ilailari? Ġia tu kamasi? <sup>32</sup> Ġia tu noġa mero keiri kavana, vanuġa ġatamanai ġetanu-taġoni, ġeġereni, tavi ta merori na tavi tai ġekea-vinirini, ġekirani,

‘Ġai tu veġaraġo vererenai gita ġalauto-ġoi ġomi ġemi, senaġi ġomi tu asi ġobarato-ġoi!

Ġai tu mase mariri ġaġabito-ġoi, senaġi ġomi tu asi ġotaġito-ġoi!’

<sup>33</sup> Korana tu Ioane Babatiso eiaġomato, eġani-veaġato ema vine nanuna asi eniuato. Benamo ġomi ġokirani, ‘Ġia tu iauka rakavana na eboroġiato,’ ġotoni. <sup>34</sup> Tarimarima Natuna eiaġomato, ġia tu ġaniġani ta asi eruġaiani. Benamo ġomi ġokirani, ‘Ġia tu boġeka tarimana ema vine nanuna eniu-ġutumani tarimana, takesi gogo tarimari e vei-rakava tarimari ġatari,’ ġotoni. <sup>35</sup> Senaġi Barau ġena iaunega ġeġabi-raġeani tarimari na Barau ġena iaunega ġevaġa-moġoniani.”

*Iesu tu Simona, Farisea tarimana, ġena numai*

<sup>36</sup> Farisea tarimana ta na Iesu enoġiato, beġene ġaniġani-vegogo etato. Benamo Iesu eiaġoto ġena numa ġana, ġaniġani gabunai etanu-tarito. <sup>37</sup> Mo vanuġai vavine ta etanuto-ġoi, ġia tu mata-boraġa vavinena. Ġia eseġaġito, Iesu tu Farisea tarimana ġena numai eġaniġanito-ġoi, benamo fore kavabuna namona, alabasta forena na ġeveiato kavabuna, nuġanai tu muramura ma bonana namona eġabi-kauato, <sup>38</sup> eiaġoto Iesu murinai eritoġo-tarito, kwakuna koranai etaġi-rakavato, benamo matana nanuna na Iesu kwakuna evaġa-nufarito. Benamo ġwina na ma edau-kauaurito, kwakuna everauato, muramura ma bonana namona kwakunai ebubuato.

<sup>39</sup> Farisea tarimana na, mo veiḡa eḡitaiato nai, ḡia nuḡanai maiḡesi etuḡamaḡito, “Mai tau bema moḡoni peroveta tarimana nai tu, ḡia bere riba, ḡia eḡabi-karaiani vavinena tu deikara. ḡia bere riba, mo vavine tu mata-boraḡa vavinena!”

<sup>40</sup> Benamo Iesu na ḡia evaḡa-guruḡaiato, ekirato, “Simona, au tu ma ḡegu guruḡa ḡoi ḡemu ai.” Simona ekirato, “Vevaḡa-riba taumu, noguruḡa, be naseḡaḡi.”

<sup>41</sup> Iesu ekirato, “Tarima ruarua na moni evinito-ḡoi tarimana ḡenai moni ḡeḡabi-toreto. Tarima ta na silva moniri sinau imaima (500) eḡabi-torerito, ma ta na tu silva moniri gabana imaima (50) eḡabi-torerito. <sup>42</sup> Senaḡi mai tarima ruarua na ḡeri ḡabitore vaḡa-ḡenoḡoina tu gwaḡiḡi rakava nai, moni evinito-ḡoi tarimana na ḡeri ḡabitore etuḡamaḡi-fitoḡaiato moḡo. Dei na mo tarima euravini-baregoato?”

<sup>43</sup> Simona evaḡa-veseto, ekirato, “Au atuḡamaḡini tu, eḡabitore-baregoto tarimana.” Iesu ekirato, “Oi, ḡemu vaḡa-vese tu maoro.” <sup>44</sup> Moḡa murinai Iesu etanu-kureto, vavine eḡoiraiato vau, Simona ekiraiato, ekirato, “Mai vavine oḡitaiani? Au ḡoi ḡemu numai bama raḡekau nai, kwakugu ḡuriḡi-ḡuriḡina nanuna ta asi boḡwa-iaḡomaia, a mai vavine na tu matana gorana na au kwakugu beḡuriḡia vau, ḡwina na bedau-kaukauri.

<sup>45</sup> ḡoi na ḡita ḡera veḡabiraḡe veraunai au asi boḡabi-raḡegu, a mai vavine oḡitaiani, roḡosi bene doko au kwakugu roḡo everauani. <sup>46</sup> ḡoi na debagu ai diḡa ta asi bobubua, a ḡia tu au kwakugu muramura ma bonana namona na bevaḡa-fari vekoraḡiri. <sup>47</sup> Moḡa lorinai au na ḡoi akiramuni, ḡena rakava ḡutuma, senaḡi Barau na varau betuḡamaḡi-fitoḡari. Moḡa lorinai ḡena veuravini tu barego. A ḡena rakava koturi moḡo etuḡamaḡi-fitoḡarito tarimana tu ḡena veuravini maki asi barego.”

<sup>48</sup> Benamo Iesu na mai vavine ekiraiato, ekirato, “ḡemu rakava varau bama tuḡamaḡi-fitoḡari.”

<sup>49</sup> ḡia ḡesi ḡeḡaniḡani-vegogoto tarimari ḡevedanaḡi-vedanaḡito, ḡekirato, “Mai tu kamara tarima, be ḡia na tarima ḡeri rakava maki etuḡamaḡi-fitoḡarini etoni?”

<sup>50</sup> Senaḡi Iesu na vavine ma evaḡa-guruḡaiato, ekirato, “ḡemu veḡabidadama na varau bevaḡa-maḡurimu. Maivau noiaḡo ma nuḡa namomu ḡesi.”

## 8

### *Vavine kota Iesu ḡesi ḡeiaḡoto*

<sup>1</sup> Moḡa murinai Iesu na vanuḡa barari e vanuḡa keiri eiaḡo-vinirito-ḡoi, Barau ḡena Basilea Varina Namona eḡobata-iaḡiatio-ḡoi. ḡena mero gabanana ruarua (12) ḡia ḡekavaiato. <sup>2</sup> Vavine kota maki ḡia ḡesi ḡeiaḡoto. Iesu na iauka rakavari mo vavine ḡerina elai-vaḡirito ema ḡeri keve evaḡa-namorito. Ta tu Maria, arana ḡevatoato Magadala vanuḡana vavinena. Mai tu iauka rakavari imaima ruarua (7) ḡia ḡenana elai-vaḡirito vavinena. <sup>3</sup> Ma ta tu Ioana, Kusa ḡaraḡona. Kusa tu Heroda ḡena farefare eḡita-ḡaurito-ḡoi tarimana ta. Ta tu Susana ema vavine vovoka maki. Moḡeri vavine na Iesu ma ḡena mero ḡeri farefare na ḡevaḡa-kavarito.

### *Barabore - Iaraḡa tarimana widi ḡueri evaroto*

#### *Mataio 13:1-9; Mareko 4:1-9*

<sup>4</sup> Tarimarima ḡutuma bara ḡevegogoto, vanuḡa mabarari na Iesu ḡenai ḡeiaḡoto. Benamo ḡia na ḡeri barabore ta ekiraḡiatio, ekirato,

<sup>5</sup> “Iaraḡa tarimana vamoka ḡana eiaḡoto, ḡena widi ḡueri bene fiu-rovorovori ḡana. Efiurito-ḡoi nai, kota dabarai ḡeketoto. Benamo tarimarima na ḡefana-veḡonurito ema guba manuri na ḡeḡanirito. <sup>6</sup> Kotari tu fore tanonai ḡeketoto. ḡetubuto, senaḡi asikauna ḡemaraito, korana tano tu asi nanuna nai. <sup>7</sup> Kotari tu ḡauḡa ḡiniḡiniri nuḡari ai ḡeketoto. Benamo ḡauḡa ḡiniḡiniri ḡesi ḡetubu-sebonato, senaḡi varovaro dagarari ḡetuturarito nai ḡemaseto. <sup>8</sup> Kotari tu tano namonai ḡeketoto. Benamo ḡetubu-ginikauto, ḡeḡwato, tata ḡwana sinau ta (100).” Benamo Iesu garona evaḡa-baregoato, ekirato, “Ma seḡana tarimana bene seḡaḡi.”

*Kara dainai Iesu na barabore ekiraḡirito*

*Mataio 13:10-17; Mareko 4:10-12*

<sup>9</sup> Ḡena mero na Iesu ḡedanaḡiato mo barabore anina tu kara. <sup>10</sup> Iesu evaḡa-veseto, ekirato, “Barau ḡena Basileia guruḡari vekuretoḡari ḡemi ai evaḡa-foforirini, senaḡi mabarari tu barabore ai avaḡa-guruḡarini, beḡene ḡita, senaḡi anina asi beḡene ribaia, beḡene seḡaḡi, senaḡi asi beḡene tuḡamaḡi-fakaia.”

*Widi ḡueri baraborena anina*

*Mataio 13:18-23; Mareko 4:13-20*

<sup>11</sup> Mai barabore anina tu maiḡa: Widi ḡueri tu Barau ḡena guruḡa. <sup>12</sup> Dabarai ḡeketoto widi ḡueri tu tarimarima na Barau ḡena guruḡa ḡeseḡaḡiani. Senaḡi Satani eiaḡomani, Barau ḡena guruḡa ḡia nuḡari na eḡabi-vaḡirini, Vari Namona beḡe vaḡa-moḡoniani e beḡe maḡurini garina. <sup>13</sup> Tano ma forenai widi ḡueri ḡeketoto tu tarimarima na Barau ḡena guruḡa ḡeseḡaḡiani e ma iakuri ḡesi ḡeḡabi-raḡeani. Senaḡi ḡia tu noḡa tarima asi lamuri kavana. Nega-kotuna moḡo Barau ḡena guruḡa ḡekorana-iaḡiani, senaḡi veribaḡani beraḡasini nai, beḡe ketoni. <sup>14</sup> Ḡauḡa ḡiniḡiniri nuḡari ai ḡeketoto widi ḡueri tu tarimarima na Barau ḡena guruḡa ḡeseḡaḡiani, senaḡi ḡetuḡamaḡi-ḡutumani, tanobara farefareri ḡetuḡamaḡi-gogo gogorini ema tanobara ḡena maḡuri iakuri na Vari Namona elau-tariani. Moḡa lorinai ḡwaḡwa namori asi ḡeḡorani. <sup>15</sup> Senaḡi tano namonai ḡeketoto widi ḡueri tu tarimarima na Barau ḡena guruḡa ḡeseḡaḡiani, ma nuḡari namori e ma manauri ḡesi ḡeḡabi-raḡeani, ḡeḡabi-tariani mo, ḡwaḡwa namori ḡeḡorani.

*Lamefa toretorena gabuna*

*Mareko 4:21-25*

<sup>16</sup> “Tarima ta lamefa begabuani nai tu, dia ḡuro na beḡoḡoi-tariani o fata gaburenai betoreani. Asiḡina, ḡia tu lamefa toretorena fatanai betore-kauani. Benamo tarima beḡe raḡekauni nai, mabarari na mama beḡene ḡitaia ḡana.

<sup>17</sup> Vekuretoḡa dagarari mabarari beḡe foforini, veḡuni guruḡari beḡe ribani e beḡe kiraḡi-foforirini.

<sup>18</sup> Moḡa lorinai ḡoseḡaḡirini guruḡari loriri boḡono toreri. Korana ma ḡena seḡaḡi tarimana Barau na riba e tuḡamaḡi-faka beviniani, asi ḡena seḡaḡi tarimana, ḡia etuḡamaḡini ma ḡena tuḡamaḡi-faka, senaḡi ḡena tuḡamaḡi-faka aiḡesi misina maki beḡabi-vaḡiani.”

*Iesu sinana ema tarina merori*

*Mataio 12:46-50; Mareko 3:31-35*

<sup>19</sup> Iesu sinana ema tarina merori ḡia ḡenai ḡeiaḡoto, senaḡi tarimarima ḡutuma nai, asi ḡeri dabara Iesu ḡenai beḡe raka-kavini. <sup>20</sup> Tarima ta na Iesu ekira-varaiato, ekirato, “Ḡoi sinamu ema tarimu tu murikai ḡeruḡa-taḡoni, ḡoi ḡevetaumuni.” <sup>21</sup> Benamo Iesu na mabarari ekirarito, “Barau ḡena guruḡa ḡeseḡaḡirini e ḡeveirini tarimari tu au sinagu ema au tarigu.”

*Iesu na iavara e geta o ureure ekira-ḡoirito*

*Mataio 8:23-27; Mareko 4:35-41*

<sup>22</sup> Ḡaro ta Iesu ma ḡena mero ḡesi ḡasi ai ḡeraḡekauto, benamo Iesu na evaḡa-guruḡarito, ekirato, “Siveḡasi-vanaḡi, kou mo rekena ḡana.” Benamo ḡeiaḡoto. <sup>23</sup> Ḡeiaḡoto-ḡoi nuḡanai, Iesu egenamaseto. Benamo iavara asikei kou ai eraḡasito, benamo ureure ḡasi nuḡanai ḡevebubu-ḡurato nai, ḡasi dori eburuto. <sup>24</sup> Benamo ḡena mero Iesu ḡenai ḡeiaḡoto, ḡevaḡoato, ḡekirato, “Vevaḡa-riba taumu o, vevaḡa-riba taumu o, ḡita tu mai taburuni!” Iesu evariḡisito, iavara e ureure ekira-ḡoirito, benamo ḡedokoto, ḡemeḡomeḡo-tarito. <sup>25</sup> Iesu na ḡena mero evaḡa-guruḡarito, ekirato, “Ḡomi ḡemi veḡabidadama tu ainai?” Ḡia ḡegarito e ḡeḡaba-rakavato nai, tauḡeri mo ḡevedanaḡi-vedanaḡito, ḡekirato, “Mai tarima tu dei? Ḡia na iavara e ureure evaḡa-guruḡarito nai, garona ḡeseḡaḡiani!”

*Iesu na iauka rakavari na ġeboroġiatio tarimana evaġa-namoato*  
*Mataio 8:28-34; Mareko 5:1-20*

<sup>26</sup> Monana Iesu ma ġena mero ġeiaġoto, Gerasa (o Gadara) tarimari ġeri gabu ai ġeraġasito, Galilea tavi ta kefonai. <sup>27</sup> Iesu ġasi na eraka-riġoto nuġanai, iauka rakavari na ġeboroġiatio tarimana ta eiaġomato Iesu ġenai. Ġia tu mo vanuġa tarimana. Kai-veġata asi dabuġana etanuto-ġoi, dia numai, senaġi gara gabuna fore kouġari ai. <sup>28</sup> Ġia na Iesu eġitaiato nai, ekoġo-fouto, benamo Iesu kwakuna koranai eketo-tarito, ekirato, "Iesu o, ġoi Iaru-korokoro Barauna Natuna, kara au ġegu ai noveia otoni? Anoġimuni, asi bono vaġa-midigu midigugu!" <sup>29</sup> Ġia moġesi ekirato, korana Iesu na iauka rakavana evaġa-guruġaiato, mo tarima ġenana neraka-vaġi. Nega ġutuma iauka rakavana na eġabiato-ġoi, kwakuna e ġimana seini na ġebarurito-ġoi, senaġi seini edabu-ġuturito-ġoi, benamo iauka rakavana na tano fakana ġana eġwa-iaġoato-ġoi.

<sup>30</sup> Iesu na edanaġiatio, ekirato, "Ġoi aramu tu deikara?" Ġia na evaġa-veſeato, ekirato, "Au aragu tu 'Ġutuma,' " korana iauka rakavari vovoka na ġeboroġiatio nai. <sup>31</sup> Benamo iauka rakavari na Iesu ġenoġiatio-ġoi, guri variġo kwareġana ġana asi bene tuġu-iaġori. (Mo tu iauka rakavari ġeri dibura gabuna).

<sup>32</sup> Monai bai serina tu ġoro gabakanai ġedokadokato-ġoi. Moġa lorinai iauka rakavari na Iesu ġenoġiatio, bai nuġari ai ġeraka-toġa, ġetato. Benamo Iesu na ekirarito, "Be, ġoiaġo!" <sup>33</sup> Benamo iauka rakavari mo tarima ġenana ġeraka-vaġito, bai ġeri ai ġeraka-toġato. Benamo moġeri bai ġeġwa-bubu-lausiatio, lalaġa na ġekokosi-firiġoto, kou ai ġevebora-maseto.

<sup>34</sup> Bai ġitaġauri tarimari na kara eġorato dagarana ġeġitaiatio, benamo ġeragato, mo vari ġea fiuato vanuġa baranai e vanuġa keiri ai. <sup>35</sup> Tarima-rima ġeġoto-iaġoto, kara eġorato dagarana ġea ġitaia ġana. Iesu ġenai ġeraġasito nai, ġia na mo tarima, iauka rakavari vovoka ġia ġenana ġeraka-vaġito tarimana, ġedoġariatio, Iesu kwakuna koranai etanu-taġoto-ġoi ma dabuġana e ġena tuġamaġi maki maoro. Benamo ġia mabarari ġegarito. <sup>36</sup> Mo veiġa ġeġitaiatio tarimari na iauka rakavari na ġeboroġiatio tarimana kamasi enamoto varina tarimarima ġekira-vararito. <sup>37</sup> Benamo Gerasa tano tarimari mabarari na Iesu ġenoġiatio, neraga-kwaneri ġetato, korana ġegari-rakavato nai. Moġa lorinai Iesu ġasi ai eraġekauto, ma eġenoġoito. <sup>38</sup> Iauka rakavari ġia ġenana ġeraka-vaġito tarimana na enoġiatio, Iesu ġesi bene iaġo etato. Senaġi Iesu na etuġu-ġenoġoiatio, ekirato, <sup>39</sup> "Noġenoġoi ġemu numa ġana. Barau na ġoi ġemu ai beveia veiġana tarimarima bono kira-varari." Benamo ġia eiaġoto, ġena vanuġa tarimari mabarari Iesu ġena veiġa ġia ġenai ġeġorato eġobata-iaġirito.

*Iesu na kekeni ta ema vavine ta evaġa-namorito*  
*Mataio 9:18-26; Mareko 5:21-43*

<sup>40</sup> Iesu kou mo reke na ma eġenoġoito nai, tarimarima ġutuma na ġeġabi-raġeato ma iakuri ġesi, korana mabarari na Iesu ġevaġa-nogaiatio-ġoi. <sup>41</sup> Benamo tau ta arana Iairo, rubu ġitaġauna tarimana, Iesu ġenai eiaġoto, kwakuna koranai evetui-tarito, enoġiatio, ġena numa ġana ġeiaġo etato, <sup>42</sup> korana ġia natuna kekenina, ġora ġereġa, dori emaseto-ġoi nai. Ġena laġani tu gabanana ruarua (12).

Iesu eiaġoto-ġoi nuġanai, tarimarima ġutuma na ġeraka-vebibi vebibiatio-ġoi. <sup>43</sup> Moġa nuġanai vavine ta, ġena keve tu rara kevena; laġani gabanana ruarua (12) ekeve-iaġiatio. Ġia na ġena farefare e moni mabarari evaġa-koririto doketa ġeri ai ġena keve beġene vaġa-namo ġana. Senaġi ta na asi evaġa-namoato. <sup>44</sup> Tarimarima ġutuma muriri ai vau evebibi-toġato, ma tavi ta na ea raka-rosito mo, Iesu sevinai ea raġasito. Iesu ġena dabuġa dudunai eveġabikauto. Benamo vaġa-sebo ġena rara kevena ekorito. <sup>45</sup> Iesu evedanaġito, ekirato, "Dei na au beġabi-karagu?" Mabarari ġevekira-ġuniġauto, ġekirato, "Au tu asiġi." Benamo Petero ekirato, "Vevaġa-riba taumu, tarimarima oġitarini, ġekou-ġeġeraġimuni ema ġeraka-vebebesi vebebesini." <sup>46</sup> Senaġi Iesu ekirato, "Ta na au beġabi-karagu, korana au ribagu, seġuka au ġeguna varau beraka-vaġi." <sup>47</sup> Mai

vavine varau eribato, ġia asi ġena vekuretoġa dabarana, benamo ma ġoġo-ġoġona ġesi eiaġoto, Iesu kwakuna koranai evetui-tarito, Iesu kara dainai eġabi-karaiato ema ġena keve vaġa-sebo ekorito varina ekiraġi-foforirito tarimarima ġoirari ai. <sup>48</sup> Benamo Iesu na ekiraiato, ekirato, “Natugu, ġemu veġabidadama na bevaġa-namomu. Be, ma nuġa namomu ġesi noiaġo.”

<sup>49</sup> Iesu roġo mo eguruġato-ġoi nuġanai, tarima ta rubu ġitaġauna tauna Iairo ġena numa na eiaġomato, ekirato, “Natumu varau bemase. Vevaġa-riba tauna asi novaġa-vekwaraġia.” <sup>50</sup> Iesu na mo guruġa eseġaġiato nai, Iairo ekiraiato, ekirato, “Asi bono gari, bono veġabidadama moġo, benamo ġia tu bemaġurini.” <sup>51</sup> Iairo ġena numai eraġasito, benamo Iesu na tarimarima ekirarito, numai asi beġene raġekau, Petero, e Iakobo (o Iames), e Ioane, ema kekeni tamana ma sinana moġo. <sup>52</sup> Mabarari tu ġetaġito-ġoi ema ġetaġi-guruġa guruġato-ġoi nuġanai, Iesu ekirato, “Asi ġotaġi, kekeni tu asi bemase, ġia tu egenani moġo.” <sup>53</sup> Tarimarima na ġerikiriki-iaġiato, korana ġia ribari, kekeni tu emaseto. <sup>54</sup> Senaġi Iesu na kekeni ġimanai eġabito, evaġa-guruġaiato, ekeato, “Natugu o, novariġisi!” <sup>55</sup> Benamo iaukana eġenoġoito, ma emaġurito, vaġa-sebo evariġisito. Iesu na ekirarito, kekeni beġene ġubua. <sup>56</sup> Ġia tamana sinana ġeġaba-rakavato, senaġi Iesu na evaġa-naġirito, mai veiġa varina tarima ta asi beġene kira-varaia.

## 9

### *Iesu na ġena mero gabanana ruarua (12) etuġurito*

<sup>1</sup> Iesu na ġena mero gabanana ruarua (12) ekea-vegogorito, seġuka evinirito, iauka rakavari mabarari beġene lai-vaġiri, ema keve tarimari beġene vaġa-namori ġana. <sup>2</sup> Benamo etuġurito, Barau ġena Basileia varina beġene ġobata-iaġia, ema keve tarimari beġene vaġa-namori. <sup>3</sup> Evaġa-guruġarito, ekirato, “Ġemi iaġoiaġo ai kara ta asi boġono ġabi-kaua, togoi, dura, ġaniġani dagarari, moni, ema sedi ruarua maki asi boġono ġabi. <sup>4</sup> Beġe ġabi-raġemini numanai boġono tanu, bene iaġo mo, vanuġa boġono raga-kwanea. <sup>5</sup> Bema vanuġa tai asi beġe ġabi-raġemini nai, mo vanuġa boġono raga-kwanea, kwakumi kauri boġono kwari-ketoketori, ġia ġeri kira-sirivaġi vaġa-moġoniri ġana.”

<sup>6</sup> Iesu ġena mero ġerakato, vanuġa tata ġana ġeiaġoto, Vari Namona ġeġobata-iaġiato-ġoi ema keve tarimari ġevaġa-namorito-ġoi gabu mabarari ai.

### *Heroda ġena daradara*

#### *Mataio 14:1-2; Mareko 6:14-16*

<sup>7</sup> Heroda, Galilea tanona verena, Iesu varina eseġaġiato, benamo edaradara-rakavato, korana tarima kota ġekirato, Ioane Babatiso tu mase na ma evariġisi-ġenoġoito. <sup>8</sup> Ma kota ġekirato, Elia efoforito. Ma kota ġekirato, peroveta tarimana guinena ta evariġisi-ġenoġoito, ġetato. <sup>9</sup> Senaġi Heroda ekirato, “Ioane debana tu au na abasi-ġutuato. Be, mai varina aseġaġiani tarimana tu dei?” Heroda eurato Iesu bene ġitaia.

### *Iesu na tarimarima daġara imaima (5,000) eġuburito*

#### *Mataio 14:13-21; Mareko 6:30-44; Ioane 6:1-13*

<sup>10</sup> Iesu ġena apostolo ma ġeġenoġoito, karakara ġeveirito veiġari variri Iesu ġekiravaraiato. Benamo Iesu na eġori-ġerevaġirito, vanuġa ta arana Betesaida ġana eġori-iaġorito. <sup>11</sup> Senaġi tarimarima na ġeseġaġirito nai, Iesu murina na ġerakato. Benamo Iesu na eġabi-raġerito, Barau ġena Basileia varina eġobata-vinirito ema keve tarimari evaġa-namorito. <sup>12</sup> Ġaro evariġoto-ġoi nuġanai, ġena mero gabanana ruarua (12) Iesu ġenai ġeiaġoto, ġekirato, “Mai tarimarima notuġuri, be kavinaġi vanuġari ai ema vamoka vei tarimari ġeri tanu gaburi ai, ġari ġaniġani e gena-gaburi ġea vetau, korana mai tu tano fakana nai.” <sup>13</sup> Senaġi Iesu na evaġa-guruġarito, ekirato, “Ġomi na ġaniġani ġoviniri.” Ġia na ġevaġa-veseato, ġekirato, “Ġai ġemai beredi tu imaima (5) ema maġani-kone ruarua (2) moġo. Ġoi ourani ġai baġana iaġo, ġaniġani baġana voiri mai tarimarima ġutuma ġari?” <sup>14</sup> Korana tau mabarari tu 5,000 kavana.

Iesu na ġena mero ekirarito, ekirato, “Tarimarima ġovareri doġoro ta gabana imaima (50), doġoro ta gabana imaima (50), benamo ġene tanutanu-tari.”<sup>15</sup> Iesu ekirato lorinai ġeveiato, tarimarima mabarari ġevaġa-tanutanu-taririto.<sup>16</sup> Moġa murinai Iesu na beredi imaima e maġani-kone ruarua eġabirito, gubai egaga-raġeto, Barau evaġa-namoato vau, ebuki-ġutuġuturito ema ekini-misimisirito, benamo ġena mero evinirito beġene vareri.<sup>17</sup> Tarimarima na ġeġanirito nai, mabarari ġeġani-maseto. Gabivau Iesu ġena mero na ġaniġani kwari ġevaġa-vegogorito, boseġa gabanana ruarua (12) ġevaġa-vonurito.

*Petero na Iesu tu Kerisona ekiraġito*

*Mataio 16:13-19; Mareko 8:27-29*

<sup>18</sup> Ġaro ta Iesu ġereġana eġuriġurito, ġena mero maki ġia ġesi. Benamo Iesu na edanaġirito, ekirato, “Tarimarima tu kara ġetoni au tu dei?”<sup>19</sup> Ġia ġevaġa-veseto, ġekirato, “Kota ġekirani ġoi tu Ioane Babatiso, ma kota tu Elia, ma kota tu peroveta tarimana guinena ta evariġisi-ġenoġoito.”<sup>20</sup> Iesu na ekirarito, ekirato, “Senaġi ġomi tu kara ġotoni au tu dei?” Petero na evaġa-veveato, ekirato, “Ġoi tu Barau ġena Keriso, ġia na ekiraġi-toreato vevaġa-maġuri tauna.”

*Iesu ġena mase ema variġisi-ġenoġoi ekiraġirito*

*Mataio 16:20-28; Mareko 8:30-9:1*

<sup>21</sup> Iesu na elaunaġirito, ġia varina tarima ta asi beġene kira-varaia.<sup>22</sup> Ġia ma ekirato, “Tarimarima Natuna midigu vovoka roġo beġanini. Iuda vereri, e Rubu Veaġa vereri baregori, e taravatu ġevevaġa-riba iaġiani tarimari na beġe ruġaiani; ema beġe vaġi-maseani maki, senaġina ġaro vaġa-toitoinai vau mase na ma beviriġisi-ġenoġoini.”

*Maġuri guruġari o Iesu murinai raka*

*Mataio 10:33; 10:39; Ioane 12:25*

<sup>23</sup> Iesu na ġia mabarari evaġa-guruġarito, ekirato, “Bema tarima ta eurani au murigu ai bene raka etoni tarimana, tauġena bene vekira-fitoġa, ġena satauro bene ġwaia ġaro mabarari ai, au murigu ai bene raka.<sup>24</sup> Korana deikara ġena maġuri moġo lorina etoreani tarimana, ġena maġuri befitoġaiiani. A deikara au daigu ai ġena maġuri befitoġaiiani tarimana, ġena maġuri asi bevei-rekwarekwaiani.<sup>25</sup> Bema tarima ta na tanobara mabarana uranai ġena maġuri befitoġaiiani, a ġia tauġena ġena maġuri bevaġa-rakavaiani, ġena namo tu kara ġia ġenai?<sup>26</sup> Bema tarima ta na au ema ġegu guruġa maiakari na bemaikaiani nai tu, Tarimarima Natuna na maki ġia bemaikaviniiani ġena iaġomai, ma mamana marevana e seġuka baregona ġesi, Tamana ma aneru veaġari ġesi beġe iaġomani ġaronai.<sup>27</sup> Moġoni akiramini, mainai ġeruġa-taġoni tarimari kota asi roġo beġe maseni, Barau ġena Basileia beġe ġitaiani.”

*Iesu vetoġana eirauto*

*Mataio 17:1-13; Mareko 9:2-13*

<sup>28</sup> Mai guruġa ekiraġi-ġosiato murinai, ġaro imaima toitoi (8) kavana ġevanaġito vau, Iesu na Petero, e Ioane, ema Iakobo (o Iames) eġabirito, ġoro ta ġana ġevaraġeto bene ġuriġuri ġana.<sup>29</sup> Eġauġauto-ġoi nuġanai, ġia ġoirana vetoġana eirauto, ema ġena dabuġa ekuro-ġaroġaroto.<sup>30</sup> Benamo tarima ruarua ġefoforito, Mose ma Elia, Iesu ġesi ġeguruġa guruġato-ġoi.<sup>31</sup> Tauri ruarua ma marevari e mamari ġesi ġefoforito, Iesu ġesi ġeguruġato, Ierusalemaj bemaseni ġetato, Barau ġena ura ilailanai.<sup>32</sup> Petero ma karona ġegenamaseto, senaġi ma ġetataġato nai, Iesu ma marevana e mamana ġesi ġeġitaato, ema ġia ġesi ġeruġa-taġoto tarimari maki ġeġita-rito.<sup>33</sup> Tauri ruarua Iesu ġeraga-kwaneana ġana nuġanai, Petero na Iesu ekiraiato, ekirato, “Vevaġa-riba taumu, namo vedaurea ġita tu maiġera, be mainai fouta toitoi ġaragari. Ta ġoi ġemu, ta Mose ġena, ta Elia ġena.” Ġia asi ribana kara ekiraġiato.



<sup>34</sup> Ĝia roĝo eguruĝato-ĝoi nai, magube na ema iauka-taririto. Magube na eĝabi-ĝaurito nai, ĝia ĝegarito. <sup>35</sup> Garo ta magube nuĝana na ekea-rosito, ekirato, “Mai tu au Natugu, aĝabi-hidiato tarimana, ĝia boĝono seĝaĝi-vinia!”

<sup>36</sup> Mo garo ekorito nai, Iesu ĝereĝana ĝeĝitaiato. Mai veiĝa ĝeĝitarito dagarari, tarima ta asi ĝekira-varaiato mo negai.

*Iesu na iauka rakavana na eborogĝi*ato merona evaĝa-namoato  
*Mataio 17:14-21; Mareko 9:14-29*

<sup>37</sup> Ĝaro ta ekorito murinai, ĝia tu ĝoro na ĝeraka-variĝoto-ĝoi nuĝanai, tarimarima ĝutuma lelevaĝi ĝesi ĝeraka-veĝoitaĝoto. <sup>38</sup> Benamo tau ta ĝutuma nuĝari na ekeafouto, ekirato, “Vevaĝa-riba taumu o, anoĝimuni, au natugu merona noma ĝitaia. Mai tu au natugu sebona, ĝora ĝereĝa. <sup>39</sup> Nega tari ai ĝia tu iauka rakavana na eĝabiani, benamo ekoĝo-founi; tauĝanina maki evaĝa-ĝoĝo-ĝoĝoani, benamo bokana na kaburoburo ĝeraka-rosini. Maiĝesina evaĝi-mase vanaĝi-vanaĝiani. <sup>40</sup> Ĝoi ĝemu mero banoĝiri, ĝelai-vaĝia basi, senaĝi ĝia asi beĝe ilaila.”

<sup>41</sup> Iesu evaĝa-veseto, ekirato, “Asi veĝabidadama ema kira-sirivaĝi ĝuruna o! Ĝaro vira au tu sevimi ai bana tanu? Ĝaro vira bana vevaĝa-gwaĝiĝi-vinimi?” Benamo Iesu na mo tau ekiraiato, ekirato, “Natumu noĝori-iaĝomaia.” <sup>42</sup> Mero eiaĝomato-ĝoi nai, iauka rakavana na tano ekwaraĝi-iaĝiato, tauĝanina evaĝaĝoĝo-ĝoĝoato. Senaĝi Iesu na iauka rakavana ekira-ĝoiato, mero evaĝa-namoato, benamo tamana ma evini-ĝenoĝoiato. <sup>43</sup> Tarima mabarari ĝeĝaba-rakavato, korana Barau ĝena seĝuka ĝeĝitaiato nai.

*Iesu ĝena mase ma ekiraĝi-ĝenoĝoiato*  
*Mataio 17:22-23; Mareko 9:30-32*

Tarimarima roĝo Iesu ĝena veiĝa ĝeĝaba-iaĝiato-ĝoi nai, Iesu na ĝena mero evaĝa-guruĝarito, ekirato, <sup>44</sup> “Au na guruĝa ta ĝemi nakiraĝia, be ĝoseĝaĝi ema asi boĝono tuĝa-rekwaia. Tarimarima Natuna tu beĝe revaiani vau tarimarima ĝimari ai beĝe toreani.” <sup>45</sup> Senaĝi ĝena mero na asi ĝetuĝamaĝi-doĝariato, Iesu tu kara ekiraĝiato. Mo guruĝa anina tu ĝia ĝeri ai vekuretoĝa, asi beĝene ribaia ĝana, ema Iesu maki asi ĝedanaĝiato, korana ĝegarito nai.

*Deikara tu barego vedaurea*  
*Mataio 18:1-5; Mareko 9:33-37*

<sup>46</sup> Iesu ĝena mero fakari ai vevane eĝorato, korana tu ĝekirato, dei tu barego vedaurea ĝia fakari ai. <sup>47</sup> Iesu varau eribato kara ĝetuĝamaĝiato, moĝa lorinai mero keina ta eĝabiato, ĝia sevinai evaĝa-ruĝa-tariato vau, <sup>48</sup> ekirarito, ekirato, “Dei na mai mero beĝabi-raĝeani au aragu ai, ĝia na au beĝabi-raĝeguni. Bema tarima ta na au beĝabi-raĝeguni, etuĝuguto Barauna maki beĝabi-raĝeani. Korana deikara ĝomi na ĝokira-fitoĝaiani tarimana ĝomi fakami ai, ĝia tu barego vedaurea.”

*Iesu aranai nuĝa-farevaĝi veiĝa boruri eveirito tarimana*  
*Mareko 9:38-40*

<sup>49</sup> Ioane na Iesu evaĝa-guruĝaiato, ekirato, “Vevaĝa-riba taumu, tarima ta ĝaĝitaiato, ĝoi aramu ai iauka rakavari elai-vaĝirito-ĝoi, senaĝi ĝai na ĝakira-ĝoiato, korana ĝia tu dia ĝita ĝesi taĝauveini nai.”

<sup>50</sup> Iesu na ekirarito, ekirato, “Asi boĝono kira-ĝoia, korana deikara na ĝomi asi evaĝa-rakavamini tarimana tu ĝomi evaĝa-kavamini.”

*Samaria tarimari kotari na Iesu asi ĝeĝabi-raĝeato*

<sup>51</sup> Iesu guba ĝana bevaraĝeni ĝarona ekavinaĝiato-ĝoi nai, Ierusalem bene iaĝo-vinia, etato. <sup>52</sup> Benamo Iesu na vetuĝunaĝi tarimari etuĝu-guinerito, Samaria vanuĝana tai ĝeraĝasito, Iesu ĝena totoĝa gabuna ĝea vetauato. <sup>53</sup> Senaĝi vanuĝa tarimari na Iesu asi ĝeĝabi-raĝeato, korana tu Ierusalem eiaĝo-viniato-ĝoi nai. <sup>54</sup> Iesu ĝena mero Iakobo

(o Iames) e Ioane mo veiḡa ḡeḡitaiato, benamo ḡekirato, “Vereḡauka, ḡoi ourani karava guba na baḡana kiraḡia, bene mariḡo, bene vaḡa-rakavari?”

<sup>55</sup> Iesu eruḡa-kureto, tauri ruarua ekira-ḡoirito. <sup>56</sup> Benamo ḡia ma ḡerakato, vanuḡa ta ḡana ḡeiaḡoto.

*Iesu murinai beḡene raka ḡetato tarimari*  
*Mataio 8:19-22*

<sup>57</sup> ḡia dabara na ḡeiaḡoto-ḡoi nai, tarima ta na Iesu evaḡa-guruḡaiato, ekirato, “ḡemu iaḡoiaḡo gaburi mabarari ai bana kavamu.” <sup>58</sup> Iesu na ekiraiato, ekirato, “Boḡa kwaivari ma ḡeri kouḡa, ema manu ma ḡeri nuḡi, senaḡi Tarimarima Natuna tu asi ḡena gena-gabuna.”

<sup>59</sup> Iesu na tarima ta ma evaḡa-guruḡaiato, ekirato, “Murigu ai noma raka.” Senaḡi mo tarima evaḡa-veseto, ekirato, “Vereḡauka, asi roḡo, naḡenoḡoi, be tamagu roḡo naguria.” <sup>60</sup> Iesu na evaḡa-veveato, ekirato, “Mani tu noiaḡuiri, mase tarimari (o Barau asi ḡekorana-iaḡiani tarimari) na ḡeri mase tauḡeri na beḡene guriri. Senaḡi ḡoi tu noiaḡo, Barau ḡena Basileia varina noa vari-fiua.”

<sup>61</sup> Tarima ta na ma ekiraiato, ekirato, “Vereḡauka, murimu ai naraka, senaḡi naiḡo roḡo, ḡegu numa tarimari ḡesi ḡaveḡabi-tuḡu.” <sup>62</sup> Iesu na evaḡa-veveato, ekirato, “Tarima ta efokafokani nai, murina ḡana ma eboḡe-ḡenoḡoini, ḡia tu asi ilaila Barau ḡena Basileia beḡabiani.”

## 10

*Iesu na tarima gabana imaima ema gabana ruarua ma ruarua (72) etuḡurito*

<sup>1</sup> Moḡa murinai Vereḡauka na tarima 72 eḡabi-viriḡirito, benamo ruari ruari etuḡu-guinerito, ḡia beiaḡoni vanuḡari e gaburi mabarari ḡana. <sup>2</sup> Evaḡa-guruḡarito, ekirato, “Kwakwa ḡaniḡaniri tu ḡutuma lelevaḡi, senaḡi kwakwa tarimari tu viravira moḡo. Moḡa lorinai kwakwa Vereḡaukana ḡonoḡia, be kwakwa tarimari tari ma bene tuḡu-iaḡori, ḡaniḡani beḡenea kwari. <sup>3</sup> ḡoiaḡo, au na mamoe kavana atuḡumini, boḡa kwaivari rakavari fakari ai. <sup>4</sup> Moni fusefuseri, dura e tamaka asi boḡono ḡabikau; dabarai tarima ta asi boḡono vaḡa-guruḡaia. <sup>5</sup> Bema numa tai boḡo raḡekauni nai, boḡono kira, ‘Maino mai numai bene tanu.’ <sup>6</sup> Bema maino eura-viniani tarimana monai etanuni nai, ḡemi maino guruḡana ḡia iatanai bene tanu. Bema asiḡina nai, maino tu ḡemi ai ma bene ḡenoḡoi. <sup>7</sup> Karakara beḡe vinimini boḡono ḡaniri e boḡono niuri, korana eḡauveini tarimana davana bene ḡabia ḡana. Numa ta na ma numa ta ḡana asi boḡono iaḡo, senaḡi mo numa sebonai moḡo boḡono tanu.

<sup>8</sup> Bema vanuḡa tai boḡo raḡasini, beḡe ḡabi-raḡemini, karakara ḡoirami ai beḡe toresirini dagarari boḡono ḡaniri. <sup>9</sup> Mo vanuḡai keve tarimari boḡono vaḡa-namori e tarimarima boḡono vaḡa-guruḡari, boḡono kira, ‘Barau ḡena Basileia, (ḡena veḡitaḡau seḡukana evaḡa-ruḡaiani), tu sevimi ai maiḡa.’ <sup>10</sup> Senaḡi bema vanuḡai boḡo raḡasini, benamo asi beḡe ḡabi-raḡemini nai, ḡatamanai boḡono raka-rosi, boḡono kira, <sup>11</sup> ‘ḡemi vanuḡa gagauri kwakumai beḡe kafakau dagarari maki mai ḡakora-vaḡirini ḡemi kira-sirivaḡi vaḡa-foforiri ḡana. Senaḡi boḡono riba, Barau ḡena Basileia tu bekavi-naḡi.’ <sup>12</sup> Au na akiramini, Kota baregona ḡaronai mai vanuḡa na meto beḡwaiani tu, Sodoma ḡena meto maki bevanaḡiani.”

*Asi veḡabidadama vanuḡari*  
*Mataio 11:20-24*

<sup>13</sup> “Korasini o, ḡoi ema Betesaida, vetuḡami kika! Korana nuḡa-farevaḡi veiḡari ḡemi ai ḡefoforito-ḡoi tu, Taia e Sidono nuḡari ai beḡere fofori, benamo ḡia tu irau laḡani ai ḡere vetuḡamaḡi-kure, fuse rakavari ai e tauḡaniri ma gurumari ai ḡeri vetuḡamaḡi-kure ḡere vaḡa-foforia. <sup>14</sup> Barau na tarimarima bekota-vinirini ḡarona baregonai, ḡomi na boḡo doḡariani metona tu Taia e Sidono ḡeri meto bevanaḡiani. <sup>15</sup> ḡoi maki,

Kaperanauma o, ǵoi ourani guba ǵana bono varaǵe otoni? Asiǵina, ǵoi tu mase gabuna ǵana boiaǵoni!”

<sup>16</sup> Iesu na ǵena mero evaǵa-guruǵarito, ekirato, “Dei na ǵomi beseǵaǵi-vinimini, au maki beseǵaǵi-viniguni; dei na asi beǵabi-raǵemini, au maki asi beǵabi-raǵeguni; ema dei na asi beǵabi-raǵeguni, etuǵuguto Barauna maki asi beǵabi-raǵeani.”

*Iesu na etuǵurito tarimari 72 ǵeǵenoǵoito*

<sup>17</sup> Ǵena mero 72 ma ǵeǵenoǵoito ma iakuri ǵesi, ǵekirato, “Vereǵauka o, iauka rakavari ǵoi aramu ai ǵavaǵa-guruǵarito, benamo garoma ǵeseǵaǵirito-ǵoi.” <sup>18</sup> Iesu na evaǵa-veserito, ekirato, “Satani aǵitaiato, kiriku ekimoreani kavana guba na eketo-firiǵoto. <sup>19</sup> Boǵono riba, au na seǵuka varau avinimito, mota ema kavikavi boǵono fanatariri, ema Satani ǵena seǵuka maki boǵono vaǵa-farakaia ǵana; dagara ta na asi bevaǵa-rakavamini. <sup>20</sup> Senaǵina, dia boǵono iaku korana iauka rakavari ǵomi ǵemi seǵuka nuǵanai, asiǵina, a ǵomi tu boǵono verere korana arami gubai etorerito nai.”

*Iesu eiakuni*

*Mataio 11:25-27; 13:16-17*

<sup>21</sup> Mo tanu-vegogo nuǵanai Iauka Veaǵa na Iesu tu iaku na evaǵa-vonuato, benamo ekirato, “Tamagu o, avaǵa-namomuni, guba ema tanobara Verena! Korana ǵoi na ma iaunegari e riba tarimari ǵeri ai okure-toǵarini dagarari tu, asi ǵeri riba tarimari ǵeri ai ovaǵa-foforirini. Aba, Tamagu, mai tu ǵoi ǵemu veuravini korana evaǵa-foforiani. <sup>22</sup> Dagara mabarari Tamagu na eviniguto. Tarima ta asi ribana ǵia Natuna, Tamana moǵo ǵereǵana, ema ta asi ribana ǵia Tamana, senaǵi Natuna ǵereǵana moǵo, ema Natuna na eura-vinirini tarimari ǵeri ai vau evaǵa-foforirini.”

<sup>23</sup> Benamo Iesu eboǵe-kureto ǵena mero ǵeri ai, veǵuni ai evaǵa-guruǵarito, ekirato, “Ǵomi tu boǵono iaku, korana tu mai ǵoǵitarini dagarari dairi ai. <sup>24</sup> Au na akiramini, peroveta tarimari e tanobara vereri baregori o kini vovoka ǵeurato, mai ǵoǵitarini dagarari beǵere ǵitari, senaǵi asi ǵeǵitarito, ema ǵoseǵaǵirini dagarari beǵere seǵaǵiri, senaǵi asi ǵeseǵaǵirito.”

*Barabore - Samaria tarimana namona*

<sup>25</sup> Taravatu evevaǵa-riba iaǵiato-ǵoi tarimana ta evariǵisito, benamo Iesu eribaǵaniato, ekirato, “Vevaǵa-riba taumu, au tu kara baveini vau, maǵuri vanaǵivanaǵi badoǵariani?” <sup>26</sup> Iesu na evaǵa-veseato, ekirato, “Taravatu tu kara etoni? Ǵoi na tu kamasi oiaviani?” <sup>27</sup> Ǵia evaǵa-veseto, ekirato, “‘Vereǵauka ǵoi ǵemu Barau bono ura-vinia ma nuǵamu mabarana, ma iaukamu mabarana, ma kokoremu mabarana, e ma tuǵamaǵimu mabarana’; ema ‘Sevimu tarimana maki bono ura-vinia ǵoi tauǵemu oveura-vinini kavana.’”

<sup>28</sup> Iesu na ekiraiato, ekirato, “Bovaǵa-vese maoro, maniǵesi bono vei, be bono maǵuri.”

<sup>29</sup> Senaǵi taravatu evevaǵa-riba iaǵiato-ǵoi tarimana tu ma veiavina ǵesi Iesu ma edanaǵi-veribaǵaniato, ekirato, “Au sevigu tarimana tu dei?”

<sup>30</sup> Iesu evaǵa-veseto, ekirato, “Tau ta Ierusema na Ieriko evariǵo-viniato-ǵoi nuǵanai, lema tarimari na dabarai ǵeguru-viniato, ǵena dabuǵa ǵekokirito, ǵevaǵa-vevaǵiato, dori moǵo ǵevaǵi-maseato, benamo monai ǵeraga-kwaneato. <sup>31</sup> Moǵa Rubu Veaǵa verena ta mo dabara na evariǵoto-ǵoi nai, mo tau edoǵariato, senaǵi eraka-ǵevi-raǵiato moǵo. <sup>32</sup> Levi doǵorona tarimana ta, (Rubu Veaǵai vetuǵunaǵi tauna), maki moǵesi, mo tau ea doǵariato nai, maki eraka-ǵevi-raǵiato moǵo. <sup>33</sup> Senaǵina Samaria tarimana ta ǵena iaǵoiaǵo ai mo tau ea doǵariato, eǵitaiato nai, evetuǵaiato. <sup>34</sup> Sevina ǵana eiaǵoto, diǵa e vine nanuna manuǵanai ebubuto, ekumuato, benamo ǵena doniki ai evaǵa-tanu-kauato, vinitaǵo numana ǵana eǵori-iaǵoato, monai enariato. <sup>35</sup> Boǵiboǵi evariǵisito nai, silva moniri ruarua numa ǵitaǵauna tarimana eviniato, ekirato, ‘Mai tau bono nariǵau-ǵitakaua. Bema moni asi beilailani nai, ǵegu ǵenoǵoi ai vau ǵemu moni davana bavanimuni.’”

<sup>36</sup> Iesu evedanaḡito, ekirato, “Ḡoi tu kara otoni? Mai tarima toitoi fakari ai deikara sevina tarimana tu mo lema tarimari na ḡevaḡa-vevaḡiato tauna ḡenai bita kiraḡiani?”  
<sup>37</sup> Taravatu evevaḡa-riba iaḡiato-ḡoi tarimana evaḡa-veseto, ekirato, “Evetuḡaiato tarimana.” Benamo Iesu na ekiraiato, “Noiaḡo, ḡoi maki moḡesi bono vei.”

*Mareta e Maria*

<sup>38</sup> Iesu ma ḡena mero ḡesi ḡeri iaḡoiaḡo ai vanuḡa tai ḡea votuto. Monai vavine ta arana Mareta ḡena numai eḡabi-raḡeato. <sup>39</sup> Ḡia tu ma tarina arana Maria, benamo Maria tu eiaḡoto, Vereḡauka kwakuna koranai etanu-tarito, ḡena guruḡa eseḡaḡirito-ḡoi. <sup>40</sup> Mareta tu veḡabiraḡe dagarari eveito-ḡoi, evekwarāḡito-ḡoi. Benamo eiaḡomato, ekirato, “Vereḡauka, ḡoi tu otuḡamaḡini ba? Tarigu na beraga-kwanegu, au ḡereḡagu moḡo avekwarāḡini. Nokiraia, be nema vaḡa-kavagu!”

<sup>41</sup> Vereḡauka na evaḡa-veseato, ekirato, “Mareta! Mareta! Dagara ḡutumari na nuḡamu ḡevaḡa-veḡonuani e ḡevaḡa-vekwarāḡiani, <sup>42</sup> senaḡi dagara sebona moḡo ḡerevaḡi. Maria na tu namona beḡabi-viriḡia, ta na ḡia ḡenana asi ma beḡabi-vaḡiani.”

## 11

*Iesu na ḡena mero ḡuriḡuri evaḡa-ribarito*

<sup>1</sup> Ḡaro tai Iesu tu gabu tai eḡauḡauto. Ekorito nai, ḡena mero ta na evaḡa-guruḡaiato, ekirato, “Vereḡauka o, ḡuriḡuri novaḡa-ribama Ioane na ḡena mero evaḡa-ribarito ilailanai.” <sup>2</sup> Iesu na ekirarito, ekirato, “Ḡoḡuriḡurini nai, boḡono kira:

‘Ḡai Tamama o,  
 ḡoi aramu baḡana vaḡa-veaḡaia;  
 ḡemu Basileia bene iaḡoma.

<sup>3</sup> Ḡaro tata ḡai ḡema-ḡama bonoma vinima.

<sup>4</sup> Ḡema rakava notuḡamaḡi-fitoḡari,  
 korana ḡai maki ḡevaḡa-rakavamani tarimari ḡeri rakava ḡatuḡamaḡi-fitoḡarini.  
 Ema veribaḡani ai asi bono ḡori-kauma.’ ”

<sup>5</sup> Benamo Iesu na evaḡa-guruḡarito, ekirato, “Bema ḡomi ta boḡi nuḡanai ḡatana ḡenai bere iaḡo, bere noḡia, bere kira, ‘Ḡatagu o, ḡaniḡani dagarari kota naḡabi-toreri roḡo, <sup>6</sup> korana au ḡatagu ta tu ḡena iaḡoiaḡo ai ḡegu ai beiaḡoma, senaḡi au tu asi ḡegu ḡaniḡani ḡia baḡubuani.’ <sup>7</sup> Benamo mo tarima na numa nuḡana na bere vaḡa-vesea, bere kira, ‘Asi novaḡa-vekwarāḡigu. Ḡatama-boka varau babiria, ema au tu natugu ḡesi ḡagenani. Au tu asi bavariḡisini, dagara ta asi bavanimuni.’ <sup>8</sup> Akiramini, enabe ḡia ḡatana, senaḡi asi bevariḡisini, ḡaniḡani asi beviniani, senaḡi ḡena noḡinoḡi ḡenoḡoi-ḡenoḡoi dainai bevariḡisini, eura-vinirini dagarari beviniani.

<sup>9</sup> Moḡa lorinai, au na ḡomi akiramini, noḡinoḡi ai Barau na bevinimini, vetauvetau ai boḡo doḡarini, sekeseke o fidifidi ai ḡemi ḡatama-boka bekeoani. <sup>10</sup> Korana benoḡi-noḡini tarimana tu beḡabini, bevetauni tarimana bedoḡarini, ema beseke-sekeni tarimana Barau na ḡena ḡatama boka bekeoani.

<sup>11</sup> Ḡomi tama fakami ai deikara bema natumu merona maḡani-kone benoḡini nai, ḡoi na tu mota boviniani? <sup>12</sup> O ḡatoi benoḡini nai, kavikavi boviniani? <sup>13</sup> Boḡono tuḡamaḡi, ḡomi tu rakava tarimami, senaḡi dagara namori natumi viniviniri ma ribami, moḡa lorinai ḡomi Tamami gubai etanuni, ḡia na Iauka Veaḡa ḡenoḡi-viniani tarimari bevinirini veḡatana!”

*Iesu e Belsebul*

*Mataio 12:22-30; Mareko 3:20-27*

<sup>14</sup> Iesu na Iauka rakavana, muru-bubu Iaukana, elai-vaḡiato, benamo mo muru-bubu tarimana eguruḡato. Tarimarima ḡutuma na ḡevaḡa-raḡeato, <sup>15</sup> senaḡi tarima kota ḡekirato, “Mai tu Belsebul, Iauka rakavari ḡeri vere, ḡena seḡukai Iauka rakavari elai-vaḡirini.”

<sup>16</sup> Tarima kotari na Iesu ǵedanaǵi-veribaǵaniato, vetoǵa ta guba na bene viniri ǵetato. <sup>17</sup> Senaǵi Iesu na ǵia ǵeri tuǵamaǵi eribarito, benamo evaǵa-guruǵarito, ekirato, “Gavamani ta beveǵabi-kirani, ǵia tu berakavani, ema doǵoro ta beveǵabi-kirani, ǵia tu beketoni. <sup>18</sup> Moǵa lorinai Satani tu tauǵena moǵo bevevare-kirani, ǵena basileia tu kamasu beruǵani? Maiǵesi akiraǵiani, korana tu ǵomi ǵokirani, au tu Belsebul ǵena seǵukai iauka rakavari alai-vaǵirini. <sup>19</sup> Bema au iauka rakavari Belsebul ǵena seǵukai alai-vaǵirini nai, ǵomi murimi ai ǵerakani tarimari na iauka rakavari aiǵesi ǵelai-vaǵirini? Ǵia na ǵevaǵa-moǵoniani ǵomi ǵemi guruǵa tu asi anina. <sup>20</sup> Senaǵi bema au iauka rakavari Barau ǵena seǵukai alai-vaǵirini nai, boǵono riba, Barau ǵena Basileia, ǵena veǵitaǵau seǵukana, tu ǵomi ǵemi ai varau beraǵasi.

<sup>21</sup> Kokore tarimana ma ǵena vaǵivaǵi dagarari ǵesi ǵena numa beǵita-ǵauani nai, ǵena farefare tu roǵo beǵe tanu-ginikauni. <sup>22</sup> Senaǵina kokore vedaurea tarimana ta ma beiaǵomani, mai tarima bevaǵa-vevaǵiani, benamo bevaǵa-darereani, ǵia ǵena vaǵivaǵi dagarari, veǵabidadama dagarari, beverariani, benamo ǵena farefare mabarari bevare-rovorovorini.

<sup>23</sup> Deikara dia au ǵatagu tu, au ǵegu inai tarimana, ema deikara au ǵesi asi etore-vegogoni tu eveiari-lausilausini.”

#### *Iauka rakavana ma eǵenoǵoito*

*Mataio 12:43-45*

<sup>24</sup> “Iauka rakavana ta tarima ta ǵenana eraka-rosito, benamo gabu kaukauri na erakavanaǵito, iaǵana bene ǵania etato, senaǵi iaǵaraǵi gabuna ta asi edoǵariato. Benamo ǵia tauǵena ekirato, ‘Naǵenoǵoi, araga-kwaneato numana ǵana.’ <sup>25</sup> Eǵenoǵoi-iaǵoto, numa edoǵariato. Numana tu veiareva ema ǵitaǵitana namo vedaurea. <sup>26</sup> Benamo ǵia na iauka rakava kwaikwairi imaima ruarua (7) ma eǵori-iaǵorito, mabarari ǵeraka-toǵato, monai ǵetanuto. Moǵa lorinai mo tarima tu tovotovonai ǵena rakava tu kota misina, senaǵi dokonai ǵena rakava tu barego vedaurea.”

#### *Verere moǵonina*

<sup>27</sup> Mo guruǵa ekiraǵiato-ǵoi nai, vavine ta tarimarima ǵutuma fakari na eguruǵa-vaishito, ekirato, “Ǵoi evaǵa-maǵurimuto e evini-rurumuto vavinena tu namo!”

<sup>28</sup> Senaǵi Iesu evaǵa-veseto, ekirato, “Iniǵesi nokira, Barau ǵena ǵuruǵa ǵeseǵaǵiani ema ǵekorana-iaǵiani tarimari neǵi namo!”

#### *Seǵuka vetoǵana ǵevetauato*

*Mataio 12:38-42; Mareko 8:12*

<sup>29</sup> Tarimarima ǵutuma na Iesu ǵeruǵa-ǵeǵeraǵiato, benamo evaǵa-guruǵarito, ekirato, “Toma ǵuru tu ǵuru rakavana! Seǵuka vetoǵana ǵevetauani, senaǵi vetoǵa ta asi beǵe doǵariani, Iona, peroveta tarimana, vetoǵana moǵo. <sup>30</sup> Korana Iona tu vetoǵa ta Nineva tarimari ǵeri ai, moǵa ilailanai Tarimarima Natuna tu vetoǵai beiaǵoni mai ǵuru tarimari ǵeri ai. <sup>31</sup> Barau na tarimarima bekota-vinirini ǵaronai, Seba vavine baregona o Kwin beruǵa-vaishini, mai ǵuru tarimari besamanirini, korana ǵia tu ǵena tanobara manaǵana na eiaǵomato, Solomona ǵena iaunega guruǵari bene seǵaǵiri ǵana. Senaǵi ǵoǵitaia, tarima ta na Solomona evanaǵiani tu maiǵa. <sup>32</sup> Barau ǵena Kota baregona ǵaronai, Nineva tarimari beǵe ruǵa-vaishini, toma ǵuru tarimari beǵe samanirini, korana Iona ǵena ǵobata ǵeseǵaǵiato neganai, ǵia ǵeri rakava ǵerina ǵevetuǵamaǵi-kureto. Senaǵi tarima ta na Iona evanaǵiani tu maiǵa.”

#### *Tauǵani mamana*

*Mataio 5:15; 6:22-23*

<sup>33</sup> “Tarima ta na lamefa begabuani nai, asi bekure-toǵaiani, diǵu na asi beǵoǵoi-tariani, senaǵi lamefa tore-torena gabuna korikorinai betoreani, beǵe raka-toǵani tarimari na mama beǵene ǵitaia ǵana. <sup>34</sup> Ǵoi matamu tu ǵoi tauǵanimu ǵena lamefa kavana. Bema ǵoi matamu namo nai, tauǵanimu mabarana bemamani. Senaǵi ǵoi matamu rakava nai, tauǵanimu mabarana bemukunani. <sup>35</sup> Moǵa lorinai, lorimu bono

vetore, mama ġoi nuġamu ai bemukunani garina. <sup>36</sup> Bema ġoi tauġanimu mabarana mama na bevonuvonu-raġeni, mukuna kota maki asi betanuni, ġia tu mama dikadika, lamefa emore-rovorovoni, ġoi evaġa-mamamuni kavana.”

*Iesu na Farisea tarimari ema taravatu ġevevaġa-riba iaġiato-ġoi tarimari evanerito*

*Mataio 23:1-36; Mareko 12:38-40; Luka 20:45-47*

<sup>37</sup> Iesu eguruġa-ġosito nai, Farisea tarimana ta na ekeaiato, ġia ġesi beġene ġaniġani-vegogo; benamo ġena numa ġana eiaġoto, ġaniġani gabunai etanu-tarito. <sup>38</sup> Mo Farisea tarimana na eġitaiato nai, nuġana efarevaġi-rakavato, korana Iesu tu asi eveġuriġito, (ġia seneri vereri ġeri vevaġa-naġi ilailanai), senaġi eġani-ġanito moġo. <sup>39</sup> Benamo Vereġauka na evaġa-guruġaiato, ekirato, “Ġomi Farisea tarimami na ġemi kapusi ema disi muriri rekeri moġo ġoġuriġi-ginikaurini, senaġi nuġami tu verariverari ema veitaġuitaġui na ġevonu-fokafokato. <sup>40</sup> Ġomi tu babo! Ġomi asi ġoribani, murika rekena eveiato Barauna na nuġana rekena maki ġia na eveiato? <sup>41</sup> Senaġi kapusi ema disi nuġari dagarari tu asi ġeri-ġari tarimari boġono viniri vau, dagara mabarari ġemi ai beġe veiarevani.

<sup>42</sup> Farisea tarimami, vetuġami kika! Korana ġomi na Barau ġovarevare-viniani dagarari misimisiri, ġemi sivoġa, kodukarava ema ġaniġani ġailauri maki karava gabanana (10) ġoveirini, karava sebona boubou dagarana ġovaġa-iaġoani, senaġina vei-iobukaiobuka ema Barau uravinina maġurina tu ġoleaiani. Ġomi na tu maiġeri veiġa baregori ġoro veiri ema mo veiġa keiri maki asi boġoro iaġuiri.

<sup>43</sup> Farisea tarimami, vetuġami kika! Korana ġemi ura rubu ai tu tanutanu namori ai boġono tanu, ema ġemi ura maki maketi gaburi ai beġene vaġa-namomi. <sup>44</sup> Vetuġami kika! Ġomi tu asi ġita vetoġari gara gaburi kavana, tarimarima iatari na ġeraka-vanaġini nai ġemirorini, ġia asi ġeribani mo tu gabu rakavana.”

<sup>45</sup> Taravatu ġevevaġa-riba iaġiato-ġoi tarimana ta na Iesu evaġa-guruġaiato, ekirato, “Vevaġa-riba taumu o, maiġesi okirani nai, ġai maki okira-fitoġamani!”

<sup>46</sup> Iesu evaġa-veseto, ekirato, “Ġomi taravatu ġovevaġa-riba iaġiani tarimami maki vetuġami kika! Ġomi na maruna metori tarimarima ġovaġa-faġarini, senaġi ġimami didina ta maki ġeri marunai asi ġoveġabikauni, asi ġovaġa-kavarini. <sup>47</sup> Vetuġami kika! Ġomi tubumi ġatami na peroveta tarimari ġevaġi-maserito, ema ġomi na tu ġeri gara gaburi namori ġoveirini. <sup>48</sup> Moġesi ġomi tauġemi tubumi ġatami ġeri veiġa ġokiraġi-foforirini ema ġovaġa-moġonirini; moġoni veġata, tubumi ġatami na peroveta tarimari ġevaġi-maserito, ema ġomi na ġeri gara gaburi ġoveirini. <sup>49</sup> Moġa lorinai Barau ġena launega ekirani, ‘Au na peroveta tarimari ema apostolo tarimari batuġu-iaġorini ġeri ai, benamo tari tu beġe vaġi-maserini, ma tari tu beġe lai-lausilausirini.’ <sup>50</sup> Moġesi nai, peroveta tarimari mabarari ġevaġi-maserito, Barau na tanobara eveiato veġata beiaġoma mo maitoma, metona tu toma ġuru tarimari na beġe ġabiani. <sup>51</sup> Abela ġevaġi-maseato, monana eiaġomato mo Sakaria, ġia tu fata veaġana ema Barau ġena numa veaġana fakari ai ġevaġi-maseato. Aba, au na akiramini, mabarari metori tu toma ġuru tarimari na beġe ġabiani!

<sup>52</sup> Taravatu ġovevaġa-riba iaġiani tarimami, vetuġami kika! Riba numana keo-fakana ġatama-boka kina tu ġomi na ġoġabiato. Ġomi ġereġami asi boġo raka-toġani, ema ġeraka-toġa ġetoni tarimari ġeri dabara ġomi na ġokourini!”

<sup>53</sup> Iesu mo gabu na eraka-rosito, benamo taravatu ġevevaġa-riba iaġiato-ġoi tarimari ema Farisea tarimari na ġekira-fitoġaiato, ema dagara vovoka ġevedanaġi-viniato, <sup>54</sup> ġeribaġaniato, ġeri ura tu dagara ta bene kiraġi-kererea, be beġene samania ġana.

## 12

*Ġeġofaġofani tarimari boġono nariri*

<sup>1</sup> Mo faka nuġanai tarimarima ġutuma lelevaġi varau ġevevogoto, asi-iaġo asi-fana, benamo Iesu na ġena mero evaġa-guruġa guinerito, ekirato, “Boġono venari-ginikau

Farisea tarimari ġeri farao evaġa-tubuani muramurana ġerina, korana mani tu ġia ġeri ġofaġofa veiġana bene. <sup>2</sup> Vekouġau dagarari mabarari beġea foforini, vekuretoġa guruġari mabarari beġea ribani. <sup>3</sup> Moġa lorinai kara dagara mukunai ġokiraġiato, mamai beġea seġaġiani, kara dagara koutoġai seġai ġoguruġa-ġurato dagarana, beġea kiraġi-foforiani numa tuġuna na, tarimarima mabarari na beġene seġaġia ġana.”

*Barau bitana gari-vinia*

*Mataio 10:28-31*

<sup>4</sup> “Ġatagu mabarami, akiramini, tauġani beġe vaġiani, ma murinai kara ta ma asi beġe veiani tarimari gariri asi boġono vei. <sup>5</sup> Senaġi navaġa-ribami, deikara garina boġono vei: Barau boġono gari-vinia. Tauġani bevaġiani murinai ma ġena seġuka, ġomi ma befiu-ġuramini, karava eġara-vanaġi vanaġini gabunai. Aba, au na akiramini, ġia moġo boġono gari-vinia!

<sup>6</sup> Bisini imaima (5) maki fene ruarua na moġo ġevoirini, ene? Senaġina Barau na tu sebona ta maki asi etuġa-rekwaiani. <sup>7</sup> Moġoni veġatana, ġomi tu debami ġuiru maki mabarari Barau na eiavi-ginikaurito. Be asi boġono gari; ġomi voimi tu varaġe lelevaġi, bisini ġutuma voiri maki ġovanaġirito!”

*Iesu bekiraġi-foforiani ema bekira-ġuniġauani*

*Mataio 10:32-33; 12:32; 10:19-20*

<sup>8</sup> “Au na akiramini, deikara na au tarimarima ġoirari ai bekiraġi-foforiguni, ġia maki Tarimarima Natuna na Barau ġena aneru ġoirari ai bekiraġi-foforiani. <sup>9</sup> Senaġina au deikara na tarimarima ġoirari ai beruġaguni e bekira-ġuniġauguni, ġia maki Barau ġena aneru ġoirari ai baruġaiani e bakira-ġuniġauani.

<sup>10</sup> Tarimarima Natuna deikara na bekira-rakavaiani, Barau na ġia ġena rakava betuġamaġi-fitoġaiani, senaġina deikara na lauka Veaġa bekira-rakavaiani, ġia ġena rakava tu asi betuġamaġi-fitoġaiani.

<sup>11</sup> Iuda tarimari ġeri rubu ai beġe vaġa-kotamini, ema vanuġa vereri e Kota baregori ġeseġaġini tarimari ġoirari ġana beġe ġori-iaġomini nai, nuġami asi beġene vekwaraġi, aiġesi toma boġo guruġani o kara toma boġo kiraġirini. <sup>12</sup> Korana lauka Veaġa na mo ġaro ai kara boġo kiraġirini guruġari bevaġa-ribamini.”

*Barabore - Farefare vovoka tarimana*

<sup>13</sup> Tarimarima ġutuma nuġana na tarima ta na Iesu ekiraiato, ekirato, “Vevaġa-riba tarimamu o, au kakagu nokiraia, ġai tamama na eraga-kwanerito farefareri nevareri, be au tavi ta nevinigu.” <sup>14</sup> Iesu na evaġa-veveato, ekirato, “Ġoi tau o, au tu deikara na ġomi taumi ruarua ġemi farefare-tore viriġi-viriġina ġana etoreguto?” <sup>15</sup> Benamo evaġa-guruġarito, ekirato, “Boġono boġeboġe! Lorimi boġono vetore, farefare vovoka mata-ġaniġaniri boġo veini garina; korana tarimarima ġeri maġuri korikori tu dia ġeri farefare vovoka na ġevaġa-ġorarini.”

<sup>16</sup> Benamo mai barabore ekiraġiato, ekirato, “Farefare vovoka tarimana ta ġena tano na ġaniġani namori evaġa-ġorarito. <sup>17</sup> Ġia etuġa-maġito, ekirato, ‘Kamasi toma baveini? Mai ġaniġani mabarari tu ainai bana vaġa-vegogori?’ <sup>18</sup> Benamo ekirato, ‘Au tu maiġesi navei. Ġaniġani atorerini numari guineri narovori, benamo numa baregori naragari. Mainai vau au ġegu ġaniġani e farefare mabarari monai bana vaġa-vegogori.

<sup>19</sup> Benamo au tauġegu bana vekira, ‘Ġoi ġemu dagara namori tu ġutuma gorogoro bovaġa-vegogori laġani vovoka ġana. Be, noiaġaraġi, noġaniġani, noniuniu e noverere.’

<sup>20</sup> Senaġina Barau na ekiraiato, ekirato, ‘Kamuto, ġoi tu babo! Toma boġi ġoi ġemu maġuri aġabi-vaġiani ġemuna, benamo mai ġemu farefare bovaġa-vegogorini tu deikara na beġabirini?’

<sup>21</sup> Maiġesina mo deidei tauġeri moġo ġeri farefare ġevaġa-vegogoni tarimari tu asi ġeri farefare Barau ġoiranai.”

*Asi bono tuġamaġi-vekwaraġi*

*Mataio 6:25-34*

<sup>22</sup> Benamo Iesu na ġena mero evaġa-guruġarito, ekirato, “Moġa lorinai, akiramini, ġemi maġuri asi boġono tuġamaġiri, kara boġo ġanini; o tauġanimi kara na boġo dabuġarini. <sup>23</sup> Maġuri tu dagara baregona, a ġaniġani tu dagara keina, ema tauġani tu dagara baregona, a dabuġa tu dagara keina. <sup>24</sup> Gaio ġotuġamaġiri, asi ġevarovaroni ema asi ġekwa-kwani; asi ġeri ġaniġani-tore numari, senaġina Barau na eġuburini! Ġomi tu dagara baregomi, a manu tu kei! <sup>25</sup> Ġomi deikara otuġamaġi-vekwaraġini nai, ġemu maġuri kota maia bovaġa-maukaiani? <sup>26</sup> Mai dagara misina asi boveiiani riba, karase nai tu dagara tari maia urari ai ovetuġamaġini?”

<sup>27</sup> Boġa veraverari ġoġitari aiġesi ġegarani. Asi ġeġauveini ema dabuġa asi ġeturini. Senaġina akiramini, Kini Solomona ġena vedabuġa marevana maki ġevanaġiani. <sup>28</sup> Bema Barau na tanobara ġauġari moġesi edabuġarini, ġia toma tu ġegarani, ma boinani tu karavai beġe fiu-raġerini, Barau na ġomi tu bevaġa-dabuġa ginikau-raġemini. Ġomi veġabidadama misimisi tarimami! <sup>29</sup> Moġa lorinai asi boġono boġe vetau-vetau, kara toma ġoġanini e kara toma ġoniuni; ema asi boġono tuġamaġi-vekwaraġi maki. <sup>30</sup> Korana Barau asi ribari tarimari mabarari tu maniġeri dagara ġevetaurini, a ġomi Tamami tu ma ribana maniġeri dagara tu ġoura-vinirini. <sup>31</sup> Senaġina Barau ġena Basileia boġono vetaua, benamo maniġeri dagara mabarari bevinimini.”

*Farefare boġono vaġa-vegogo gubai*

*Mataio 6:19-21*

<sup>32</sup> “Seri misina, asi boġono gari, korana Tamami ġena ura tu ma nuġa namona ġesi ġena Basileia bene vinimi. <sup>33</sup> Ġemi farefare ġovoivoi-iaġiri, ma moni asi-ġeri e asi-ġari tarimari ġoviniri. Asi beġe rakavani moni fufuseri ġoġabiri, ġemi farefare gubai ġovaġa-vegogori, monai tu asi beġe korini, monai lema tarimari asi beġe raka-kavini ema faro na maki asi beġe vaġa-rakavarini. <sup>34</sup> Korana tu ġomi ġemi farefare ainai, ġomi nuġami maki monai.”

*Vetuġunaġi tarimari namori*

*Mataio 24:42-51*

<sup>35</sup> “Ġauvei ġana boġono vedabuġa-tore ema ġemi lamefa beġene ġara-taġo. <sup>36</sup> Vetuġunaġi tarimari na ġeri vere numai ġenari-taġoani kavana boġono tanu. Vevaġa-veġaraġo verekona na ma beġenoġoini, ġatama-bokai befidifidini nai, ġena ġatama beġene raga-keoa ġana. <sup>37</sup> Vetuġunaġi tarimari roġo tataġa ġeri vere beġenoġoini tu namo. Moġoni akiramini, ġena rami beriġoani, ġaniġani gabunai bevaġa-tanurini, benamo ġaniġani bevinirini. <sup>38</sup> Mo vetuġunaġi tarimari roġo naritaġo ġeri vere beġenoġoini tu namo, kamasi boġi nuġanai o boġiboġi rekenai beiaġomani.

<sup>39</sup> Senaġi boġono riba, bema numa tarimana ma ribana, kamara horai lema tarimana beiaġomani tu, numa benariani, be lema tarimana maki lema bevedaureani. <sup>40</sup> Moġa lorinai ġomi maki boġono venari-taġo, korana Tarimarima Natuna tu asi ġotuġamaġiani aonai beiaġomani.”

<sup>41</sup> Benamo Petero na edanaġiato, ekirato, “Vereġauka, mai barabore tu ġai ġemai moġo okiraġiani, ba tarimarima mabarari ġeri ai maki?” <sup>42</sup> Vereġauka evaġa-veseto, ekirato, “Deikara tu mo farefare nari tarimari na guruġa eseġaġini ema veiġa roroġotori eveini, ġena vere na eġabi-viriġiato, numa ema vetuġunaġi tarimari bene ġitaġauri, ema ġaniġani maki nega korikori ai bene viniri? <sup>43</sup> Mo vetuġunaġi tarimana, ġena vere na ekiraiato ilailanai eġauveini, bema-ġoitaġoani tu namo. <sup>44</sup> Moġoni akiramini, ġia tu ġena vere ġena farefare mabarari ġitaġauri tarimanai bevaġa-iaġoani. <sup>45</sup> Senaġina bema vetuġunaġi tarimana bekirani, ‘Au ġegu vere ġena ġenoġoi tu bekwaibo rakava,’ benamo vetuġunaġi tauri ema vavineri bekwaririni, ma beġanini e beniu-babobaboni. <sup>46</sup> Vetuġunaġi tarimana ġena vere ġena ġenoġoi ġaroni tu asi etuġamaġiani ġaronai, ma asi eribaiani aonai beraġasini. Ġena vere na bea basi-ġutuġutuani, ma asi ġevaġa-moġonini tarimari ġesi bea toreani.



<sup>47</sup> Mo vetuḡunaḡi tarimana ḡena vere ḡena ura tu ma ribana, senaḡi asi eḡabi-kavini ema ḡena vere ḡena ura asi eveiani tu, ribi baregona korikori beḡabiani. <sup>48</sup> A vetuḡunaḡi tarimana asi ribana ḡena vere ḡena ura, ma bea ḡauvei-kavani, voina tu ribi, senaḡi asi vovoka beḡabini. ḡutumari eviniato tarimana ḡenana tu ḡutumari ma beura-viniani; vovoka lelevaḡiri eviniato tarimana ḡenana tu vovoka lelevaḡiri ma bevetau-viniani.”

*Dia maino, senaḡi vetavi*  
*Mataio 10:34-36*

<sup>49</sup> “Au tu karava aḡabi-iaḡomaiato tanobara ḡana, ema ḡegu ura bere ḡarakau guine tu namo! <sup>50</sup> Senaḡi au tu babatiso ta baḡabiani, ema au tu anuḡa-vekwaraḡini, beiaḡoni mo, bavaḡa-koriani! <sup>51</sup> ḡomi ḡotuḡamaḡini, au tu maino tanobara ḡana aḡabi-iaḡomaiato? Asiḡi, senaḡi akiramini, vetavi-kirakira urana na aiaḡomato. <sup>52</sup> Toma beiaḡoni mo ḡoira laḡaniri ai, bese tai imaima tu beḡe vetavi-kirani, toitoi beḡe veḡitani ruarua ḡerina, ema ruarua beḡe veḡitani toitoi ḡerina. <sup>53</sup> Tamana natuna tauna ḡenana beveḡitani, natuna tauna tamana ḡenana beveḡitani; sinana natuna vavinena ḡenana beveḡitani, ma natuna vavinena sinana ḡenana beveḡitani; taḡama vavine barana taḡama vavine keina ḡenana beveḡitani, ma taḡama vavine keina taḡama vavine barana ḡenana beveḡitani.”

*Aoa beraḡasini vetoḡana*  
*Mataio 16:1-4*

<sup>54</sup> Iesu na tarimarima ḡutuma evaḡa-guruḡarito, ekirato, “Bema ḡaro eketoni rekenai magube dubadubari ḡeraḡekauni ḡoḡitarini nai tu, ḡokirani, ‘Ḣura beraguni,’ benamo eraguni. <sup>55</sup> Ma gabina rekena (o south) na iavara eiaḡomani nai ḡokirani, ‘Ḣaro beseḡukani,’ benamo ḡaro eseḡukani. <sup>56</sup> Ḣofaḡofa tarimami! Tanobara e guba vetoḡari kiraḡi-kiraḡiri tu ma ribami; kamasi nai mai toma ḡaro vetoḡana tu asi ribami?

<sup>57</sup> Karase nai tauḡemi na asi ḡotuḡamaḡi-fakaiani kara tu maoro? <sup>58</sup> Esanimamuto tarimana ḡesi roḡo ḡoiaḡoni Kota ḡana nuḡanai boḡono maino. Bema asiḡina nai, Kota eseḡaḡini tarimana ḡimanai bea tore-kaumuni, ma Kota eseḡaḡini tarimana na folisi ḡimanai bea tore-kaumuni, benamo folisi na dibura numanai bea fiu-toḡamuni. <sup>59</sup> Akiramuni, asi boraka-vaḡini, beiaḡoni mo, moni mabarana boa vaḡa-voi-ḡosiani.”

## 13

Ḣemi rakava ḡerina boḡono vetuḡamaḡi-kure e boḡono raka-kure boḡo maseni ḡesi

<sup>1</sup> Mo negai tarima kota Iesu ḡenai ḡeiaḡoto, benamo Iesu ḡekira-varaiato, Galilea tarimari Pilato na evaḡirito, ḡeri ginitaḡo dagarari Barau ḡeviniato-ḡoi nuḡanai; ḡia rarari tu ginitaḡo dagarari rarari ḡesi ebubu-sebonarito. <sup>2</sup> Iesu na evaḡa-veserito, ekirato, “Ḣomi ḡotuḡa-maḡini, mo Galilea tarimari moḡesi ḡevaḡirito-ḡoi nai, monana ḡevaḡa-moḡoniato, ḡeri rakava tu Galilea tarimari mabarari ḡeri rakava evanaḡirito? <sup>3</sup> Asiḡina! Au na akiramini, bema ḡemi rakava ḡerina asi boḡo vetuḡamaḡi-kureni, ḡomi mabarami moḡesi boḡo maseni ḡia ḡemaseto kavana. <sup>4</sup> A mo tarima gabanana imaima toitoi (18) Siloam kounai numa baregona eketoto ḡia iatari ai nai, evaḡirito tu kamasi? Ḣomi ḡotuḡamaḡini, mo tarima ḡeri rakava tu Ieruselema tarimari mabarari ḡeri rakava evanaḡirito? <sup>5</sup> Asiḡina! Au na akiramini, bema ḡemi rakava ḡerina asi boḡo vetuḡamaḡi-kureni, ḡomi mabarami maki boḡo maseni ḡia ḡemaseto kavana.”

*Barabore - Figi ḡauna asi ḡwana*

<sup>6</sup> Iesu na mai barabore ekira-vararito, ekirato, “Tarima ta ḡena vine tavoḡana nuḡanai figi ḡauna evaroato. Benamo eiaḡoto, figi ḡauna ḡwaḡwana ea vetauato, senaḡina ḡwana ta asi edoḡariato. <sup>7</sup> Moḡa lorinai ḡena vamoka narinarina tarimana evaḡa-guruḡaiato, ekirato, ‘Noḡitaia, laḡani toitoi beḡe iaḡo, au mai ḡau ḡitaḡitana aiaḡomani, senaḡina ḡwana ta asi adoḡariani. Nobasi-laua, korana asi tauna bene! Mai tano eḡauvei-iaḡi-taḡuiani.’ <sup>8</sup> Senaḡi vamoka ḡitaḡauna tarimana evaḡa-veseto, ekirato, ‘Vereḡauka, noraga-kwaneana, mai laḡani sebona moḡo bene tanu. Au na bakwa-ḡeḡeraḡiani ema tano

namori ma babubuni. <sup>9</sup> Benamo g̃waḡwana namori beḡe burini laḡani ḡoirai tu namo, bema asiḡi nai, vau bono basia.’ ”

*Iesu na Sabadi ai asi erakato vavinena evaḡa-namoato*

<sup>10</sup> Sabadi tai Iesu tu evaḡa-ribatoḡoi rubu ta nuḡanai. <sup>11</sup> Vavine ta monai iauka rakavana na eboroḡiato, evei-kevekeveato laḡani gabanana imaima toitoi (18). Ḡia doḡena eḡeḡevato, asi eruḡa-vaisito-ḡoi. <sup>12</sup> Iesu na eḡitaiato, benamo ekea-iaḡomaiato, ekiraiato, “Vavine o, ḡoi tu mani keve manina na varau bofaka.” <sup>13</sup> Benamo Iesu ḡimana mo vavine iatanai eveḡabikauto nai, vaḡa-sebo moḡo doḡena eroroḡototo, Barau evaḡa-raḡeato.

<sup>14</sup> Rubu ḡitaḡauna tarimana ebaruto, korana Iesu na Sabadi ai evevaḡa-namoto nai. Moḡa lorinai ḡia na tarimarima evaḡa-guruḡarito, ekirato, “Ḡaro imaima sebona tarimarima ḡeri ḡauvei ḡarori. Mo ḡaro ai vevaḡa-namo uranai boḡono iaḡoma, senaḡi Sabadi ai asi boḡono iaḡoma.”

<sup>15</sup> Vereḡauka na evaḡa-veseato, ekirato, “Ḡofaḡofa tarimami! Sabadi ai ḡemi boro-makau o doniki asi ḡoruḡarini, ḡeri numa na asi ḡoḡori-rosirini nanu niu? <sup>16</sup> A mai vavine, Aberahamo besena vavinena, Satani na laḡani gabanana imaima toitoi (18) ebarubaruato, au na Sabadi ai barubaru ḡenana asi baruḡaiiani ba?” <sup>17</sup> Moḡesi ekirato nai, ḡebaru-viniato-ḡoi tarimari ḡemaiakarito, senaḡi tarimarima mabarari na Iesu ḡena veiḡa boruri ḡeḡitarito nai, ḡeiaku-rakavato.

*Barabore - Mastadi ḡauna ḡutuna*

*Mataio 13:31-32; Mareko 4:30-32*

<sup>18</sup> Benamo Iesu na edanaḡirito, ekirato, “Barau ḡena Basileia tu aiḡesi? Kara ḡenai bavaḡa-ilailaiiani? <sup>19</sup> Ḡia tu mastadi ḡauna ḡutuna kavana. Tarima ta na eḡabiato, ḡena vamokai evaroato. Mastadi ḡauna ḡutuna egarato, ḡau ai eiaḡoto, benamo guba manuri leganai ḡesikokauto.”

*Farao evaḡa-tubuani muramurana*

*Mataio 13:33*

<sup>20</sup> Iesu na ma edanaḡirito, ekirato, “Barau ḡena Basileia tu kara ḡesi bavaḡa-ilailaiiani? <sup>21</sup> Ḡia tu maiḡesi, vavine ta na farao evaḡa-tubuani muramurana kotuna ta moḡo eḡabiato, benamo farao fuseri toitoi ḡesi egiroato, eiaḡoto mo, muramura na mabarana evaḡa-tubu baregoato.”

*Barau ḡena Basileia rakatoḡana*

*Mataio 7:13-14; 7:21-23*

<sup>22</sup> Iesu Ieruselema dabaranai eiaḡoto-ḡoi nai, vanuḡa baregori ema keiri nuḡari ai evevaḡa-ribato-ḡoi. <sup>23</sup> Tarima ta na edanaḡiato, ekirato, “Vereḡauka, tarima viravira moḡo beḡe maḡurini ba?” Iesu na evaḡa-veserito, ekirato, <sup>24</sup> “Boḡono vebibi-toḡa, ḡatama-boka kibobona boḡono raka-toḡa ḡana, korana au na akiramini, tarimarima ḡutuma ḡeraka-toḡa ḡetoni, senaḡi asi beḡe raka-toḡani. <sup>25</sup> Numa tarimana bevariḡisini, ḡatama-boka bekouani murinai, ḡomi tu murikai boḡo ruḡa-taḡoni, ḡatama-bokai boḡo fidifidini, boḡo kirani, ‘Vereḡauka, ḡai ḡema ḡatama-boka nokeoa!’ senaḡi ḡia bekirani, ‘Au asi ribagu ḡomi ainana boḡo iaḡoma!’ <sup>26</sup> Benamo ḡomi boḡo kirani, ‘Ḡai tu ḡoi ḡesi taḡaniḡanito-ḡoi ema taniuniu-vegogoto-ḡoi; ema ḡoi tu ḡai ḡema vanuḡa ḡatamanai ovevaḡa-ribato-ḡoi!’ <sup>27</sup> Senaḡina ḡia ma bekirani, ‘Au asi ribagu ḡomi ainana ḡoiaḡomani. Au ḡeguna ḡoraka-veḡita vei-rakava tarimami!’ <sup>28</sup> Benamo Aberahamo, Isako, Iakobo, ema peroveta tarimari mabarari boḡo ḡitarini Barau ḡena Basileia nuḡanai, senaḡi ḡomi tu murikai beḡe dori-rosimini; mo ḡaro ai boḡo taḡini, gadikami beḡe veḡara-tarini. <sup>29</sup> Tarimarima ḡaro eraḡekauni ema ḡaro evariḡoni, e debana (o north) ema gabina (o south) rekena na beḡe iaḡomani, beḡe tanu-tarini vereko ai Barau ḡena Basileia nuḡanai. <sup>30</sup> Boḡono riba, toma ḡegabini tarimari tu beḡe guineni, a ḡegueneni tarimari tu beḡe gabini.”

*Iesu Ierusalemata* taḡina eveito

*Mataio 23:37-39*

<sup>31</sup> Mo negai Farisea tarimari kota Iesu ḡenai ḡeiaḡoto, ḡevaḡa-guruḡaiato, ḡekirato, “Mai gabu noraga-kwanea, gabu ta ḡana noiaḡo, korana Heroda eurani ḡoi bene vaḡimu etoni.” <sup>32</sup> Iesu evaḡa-veseto, ekirato, “Ḡoiaḡo, mo boḡa kwaivana ḡoa kiraia, ‘Au tu iauka rakavari alai-vaḡirini ema tarimarima avaḡa-namorini toma, boinani, ema ḡaro vaḡa-toitoinai ḡegu ḡauvei bavaḡa-kori ginikauani.’ <sup>33</sup> Senaḡi toma, boinani, ilaḡani ḡegu iaḡoiaḡo ai roḡo baiaḡoni, korana peroveta tarimana tu irau gabu ai asi bemaseni, senaḡi Ierusalemata moḡo!

<sup>34</sup> Ierusalemata, Ierusalemata o, ḡoi na peroveta tarimari ovaḡirini ema Barau na etuḡua-iaḡosirini tarimari fore na otaki-maserini. Nega ḡutuma aurato, natumi bana gana-ḡeḡeraḡiri, kokoroku vavinena na natuna egoru-taririni kavana, senaḡi ḡomi tu asi ḡourato! <sup>35</sup> Moḡa lorinai ḡemi vanuḡa e Rubu Veavaḡa korina betanuni. Au na akiramini, ḡomi roḡo au asi boḡo ḡitaguni, beiaḡoni mo, ḡaro ta beraḡasini, monai vau boḡo kirani, ‘Barau aranai eiaḡomani tauna sivaḡa-namoa.’”

## 14

*Iesu na Sabadi ai keve tarimana evaḡa-namoato*

<sup>1</sup> Sabadi tai Iesu (ḡekeaiato nai) eiaḡoto, Farisea ḡeri veḡorikau tarimana ta ḡena numai beḡene ḡaniḡani ḡana, benamo tarimarima na ḡena veiḡa ḡeḡita-ginikaurito-ḡoi. <sup>2</sup> Monai tarima ta ḡia tauḡanina eroro-roroto, Iesu ḡoiranai etanu-taḡoto. <sup>3</sup> Benamo Iesu na taravatu ḡevevaḡa-riba iaḡiato-ḡoi tarimari e Farisea tarimari edanaḡirito, ekirato, “Sabadi ai keve vaḡa-namo tu maoro ba asiḡina?” <sup>4</sup> Senaḡi ḡia asi ḡeguruḡato, ta na maki asi evaḡa-veseato. Benamo Iesu na mo keve tarimana eḡabiato, evaḡa-namoato murinai etuḡuato. <sup>5</sup> Benamo ekirarito, ekirato, “Ḡomi deikara natumu o ḡemu boromakau nanu gurina nuḡanai bere keto-ḡura nai, ḡoi na Sabadi ai boro inu-raḡea ba asiḡina?” <sup>6</sup> Senaḡi ḡia na Iesu asi ḡevaḡa-veseato.

*Barabore - Veḡaraḡo verekona*

<sup>7</sup> Iesu na varivari tarimari eḡitarito, tanutanu namori moḡo ḡeḡaunarito, benamo ḡeri barabore ta ekiraḡiato, ekirato, <sup>8</sup> “Bema tarima ta na bekeamuni, veḡaraḡo verekona raka-vegogonai, gabu namonai asi bono tanu-tari, korana irau vereko ḡorikauna tauna na tarima barana ta bekeaiani ḡesi. <sup>9</sup> Benamo ekeamito tarimana beiaḡomani, bekiramuni, ‘Noveḡita, mai vere ḡena tanutanu novaḡa-fakaia.’ Ḡoi tu bemaikamuni, benamo botanu-riḡoni. <sup>10</sup> Bema ḡoi ḡekeamuni nai, tanutanu tanonai bono tanu. Benamo vereko ḡorikauna tarimana beiaḡomani nai, bekirani, ‘Ḡata, tuḡuna ḡana novaraḡe.’ Benamo ḡoi tu beḡe vaḡa-raḡemuni vereko tarimari mabarari na. <sup>11</sup> Korana tu tauḡena eveḡabivaisini tarimana tu, Barau na betore-riḡoani, a tauḡena evetore-riḡoni tarimana tu, beḡabi-vaisiani.”

<sup>12</sup> Iesu na vereko ḡorikauna tarimana ekiraḡiato, ekirato, “Bema ḡoi ḡaniḡani o vereko ta bodabaraiani nai, ḡatamu, tarikakamu, garagaramu o sevimu ai ḡetanuni taḡa tarimari asi bono keari, korana ḡia na ḡoi ma beḡe keamuni, ḡoina keakau beḡe vaḡa-voiani. <sup>13</sup> Senaḡi bema vereko ta bodabaraiani nai, gara veḡubu, tauḡaniri rakava, kwaku rakava, mata-bubu tarimari bono keari, <sup>14</sup> benamo ḡoi tu Barau ḡena vevaḡa-namo boḡoitaḡoani. Moḡoni, ḡia na asi beḡe vaḡa-voimuni, senaḡi veiḡa iobuka-iobuka tarimari mase na ma beḡe variḡisi-ḡenoḡoini ḡaronai vau, voimu boa ḡoitaḡoani.”

*Barabore - Vereko barana*

*Mataio 22:1-10*

<sup>15</sup> Iesu ḡesi ḡeḡaniḡani-vegogoto tarimana ta na mo guruḡa eseḡaḡiato nai, ekiraḡiato, ekirato, “Barau ḡena Basileiai vereko bea ḡaniani tarimana tu beiakuni.” <sup>16</sup> Iesu na evaḡa-veseato, ekirato, “Tarima ta na vereko barana ta edabaraḡato, benamo tarimarima ḡutuma ekearito. <sup>17</sup> Ḡani-vereko ḡaronai ḡena vetuḡunaḡi tarimana ta etuḡuato, ekearito tarimari nea kirari, ‘Ḡoiaḡoma, dagara mabarari beḡe rovina-toreri.’ <sup>18</sup> Senaḡi

ḡia mabarari ḡekira-sirivaḡito. Ta ekirato, 'Au tu tano ta bavoia, be aurani bana ḡitaia nai, asi bono baru.' <sup>19</sup> Ta ma ekirato, 'Au tu boromakau gabanana (10) bavoiri nai, aiaḡoni fokafokai atovo-naḡirini, be asi bono baru.' <sup>20</sup> Ta ma ekirato, 'Au tu inivau mo baveḡaraḡo nai, asi baiaḡosini.'

<sup>21</sup> Vetuḡunaḡi tarimana eḡenoḡoito, ḡena vere ekira-varaiato. Benamo numa tarimana ma baruna ḡesi ḡena vetuḡunaḡi tarimana ekiraiato, ekirato, 'Noraga-iaḡo vanuḡai, gara veḡubub, tauḡaniri rakava, mata-bubu ema kwaku rakava tarimari bono ḡori-iaḡomari.' <sup>22</sup> Benamo vetuḡunaḡi tarimana eḡenoḡoito, ekirato, 'Vere o, mani ḡemu ura ḡauveina tu varau baveia, senaḡi numa roḡosi bene vonu.' <sup>23</sup> Benamo vere na vetuḡunaḡi tarimana ma ekiraiato, ekirato, 'Noiaḡo dabara barai ema vamoka dabarari ai, tarimarima bono kirari, beḡene iaḡoma, be auna numa benema vonu. <sup>24</sup> Au na akiramini, akearito tarimari ta na ḡegu vereko ḡaniḡanina misina ta asi bevaḡa-mamiani.' "

*Barabore - Iesu ḡena mero tu vevaḡa-gwaḡiḡi tarimari*

*Mataio 10:37-38*

<sup>25</sup> Tarimarima ḡutuma-bara Iesu ḡesi ḡeiaḡoto-ḡoi, benamo eruḡa-kureto, ekirarito, ekirato, <sup>26</sup> "Bema tarima ta eurani, au ḡegu ai bene iaḡoma etoni, senaḡi ḡia tamana ema sinana, ḡaraḡona ema natuna, kakana tarina ema tauḡena ḡena maḡuri maki veuraviniri asi betuḡamaḡi-fitoḡaiani nai, ḡia tu dia au ḡegu mero. <sup>27</sup> Deikara tauḡena ḡena satauro asi beḡwaiani, benamo au murigu na asi berakani, ḡia tu dia au ḡegu mero.

<sup>28</sup> Bema ḡomi ta eurani numa ta bene ragaia etoni nai, betanu-tari guineni, numa voina beribaiani, moni beilailani ba asiḡina, ene? <sup>29</sup> Irau ḡauvei besinaiani, benamo asi bevaḡa-koriani, mabarari na beḡe ḡitaiani tarimari na beḡe rikiriki-iaḡiani, <sup>30</sup> beḡe kirani, 'Mai tarima na esinaiato, senaḡi asi evaḡa-koriato.'

<sup>31</sup> O kamara vanuḡa verena, irau vanuḡa verena ta bene vetari-vinia etoni, benamo asi betanu-tari guineni, sisiba asi bevetauni, ḡena vetari tarimari mabarari 10,000, ema reke ta vere ḡena 20,000, ḡia ḡeiaḡoma-viniani nai, bevaḡa-darereani ba? <sup>32</sup> Bema ḡia asi ilaila nai, ḡia aranai ḡena tarima tari betuḡu-iaḡorini, mo doḡoro barana roḡo fakari manaḡa nuḡanai, maino beḡene ḡabia dabarana beḡea veiani. <sup>33</sup> Moḡa ilailanai deikara ḡena dagara mabarari asi beiaḡuirini tu asi au ḡegu mero."

*Barabore - Damena*

*Mataio 5:13; Mareko 9:50*

<sup>34</sup> "Damena tu namo, senaḡi bema damena mamina berekwa-rekwani nai, kamara dabarai mamina ma beḡenoḡoini? <sup>35</sup> ḡia tu asi ilaila tano vaḡa-namona ema asi namo varovaro dagarari ḡesi vaḡa-garari ḡana; moḡa lorinai tarima na beḡe fitoḡaiani. Ma seḡana tarimana bene seḡaḡi!"

## 15

*Barabore - Rekwerekwa mamoeana*

*Mataio 18:12-14*

<sup>1</sup> Takesi gogo tarimari ema vei-rakava tarimari ḡutuma Iesu ḡenai ḡeiaḡoto, ḡena guruḡa beḡene seḡaḡiri ḡana. <sup>2</sup> Farisea tarimari ema taravatu ḡevevaḡa-riba iaḡiato-ḡoi tarimari ḡemugumuguto, ḡekirato, "Mai tarima tu rakava tarimari eḡabi-raḡerini ema ḡia ḡesi ḡeḡaniḡani-vegogoni!"

<sup>3</sup> Benamo Iesu na mai barabore ḡeri ekiraḡiato, ekirato, <sup>4</sup> "Bema ḡomi ta ma ḡena mamoe sinau ta (100), benamo sebana berekwa-rekwani nai, ḡia tu kara beveini? ḡia na 99 tano fakanai beraga-kwanerini, edobito mamoeana bevetauani mo beḡoitaḡoani. <sup>5</sup> Bedoḡariani nai, ḡabanai befaḡa-gabagabaiani ma iakuna ḡesi, <sup>6</sup> benamo numa ḡana beiaḡoni. Beraḡasini nai, ḡatana e sevina tarimari bekearini, bekirani, 'Sima iaku-vegogo, korana ḡegu mamoe, edobito dagarana, ma badoḡaria.' <sup>7</sup> Au na akiramini, moḡa ilailanai rakava tarimana ta ḡena rakava ḡerina evetuḡamaḡi-kureni nai, gubai iaku ema

verere tu barego lelevaḡi, a vei-iobukaiobuka tarimari 99 ḡeri vei-iobukaiobuka dairi ai asi beḡe vetuḡamaḡi-kureni maki bevanaḡirini.”

*Barabore - Rekwarekwa monina*

<sup>8</sup> “Bema vavine ta ḡena silva moniri mabarana gabanana (10), benamo sebona beveirekwa-rekwani nai, ḡia tu kara beveini? ḡia na lamefa begabuani, numa bedaroani, mo moni sebona bevetau-ḡitakauani mo bea ḡoitaḡoani. <sup>9</sup> Bedoḡariani nai, ḡia na ḡatana e sevina tarimari bekearini, bekirani, ‘Sima iaku-vegogo, korana tu ḡegu silva monina, erekwa-rekwato dagarana, varau badoḡaria.’ <sup>10</sup> Au na akiramini, rakava tarimana ta ḡena rakava ḡerina evetuḡamaḡi-kureni nai, Barau ḡena aneru moḡesi beḡe iakuni.”

*Barabore - Rekwarekwa merona*

<sup>11</sup> Iesu ma ekirato, “Tarima ta natuna ruarua. <sup>12</sup> Tau muriseina na tamana ekiraiato, ekirato, ‘Tama, ḡitana farefare novareri, be au debagu farefareri tu novinigu.’ Benamo farefare mabarari natuna ruarua fakari ai evarerito. <sup>13</sup> ḡaro asi vovoka ḡeiaḡoto nuḡanai, tau muriseina ḡena farefare evaḡa-vegogoto, benamo tano manaḡa ḡana erakato. Monai ḡena farefare ea ḡere-iaḡirito. <sup>14</sup> ḡena farefare mabarari evaḡa-koririto murinai, mo tano ai doḡe barego eḡorato. ḡia varau asi-ḡena, asi-ḡana. <sup>15</sup> Benamo eiaḡoto, mo tanobara tarimana ta ḡenai ḡauvei ea vetauto, benamo ḡia na etuḡuato ḡena tano ai bai bene ḡitaḡauri ḡana. <sup>16</sup> ḡia evito-rakavaiato nai, bai ḡari ḡaniḡani bene ḡaniri etato, senaḡi mo ḡaniḡani maki ta na asi eviniato. <sup>17</sup> Benamo ea vetuḡamaḡi-kureto, ekirato, ‘Tamagu ḡena ḡauvei tarimari tu vovoka, ema ḡari ḡaniḡani maki ḡutuma, senaḡi au tu mainai vitona evaḡiguni. <sup>18</sup> Naḡenoḡoi, tamagu ḡenai naiaḡo, benamo bana kiraia: Tama, Barau ḡoiranai ema ḡoi ḡoiramu ai avei-rakavato. <sup>19</sup> Au tu asi ilaila ḡoi natumu ai ma bono kiraḡigu; senaḡi anoḡimuni, ḡemu vetuḡunaḡi tarimanai bono vaḡa-iaḡogu, banasi.’ <sup>20</sup> Benamo evariḡisito, tamana ḡenai eiaḡoto.

Gabu manaḡa na roḡo eiaḡomato-ḡoi nai, tamana na varau eḡita-doḡariato, benamo evetuḡa-rakavaiato, benamo eraga-iaḡoto, ea faḡa-maḡuriato, everauato. <sup>21</sup> Benamo natuna na ekiraiato, ekirato, ‘Tama, au tu Barau ḡoiranai ema ḡoi ḡoiramu ai ma ḡegu vei-rakava. Au tu asi ilaila ḡoi natumu ai bono kiraḡigu.’ <sup>22</sup> Senaḡi tamana na ḡena vetuḡunaḡi tarimari evaḡa-guruḡarito, ekirato, ‘Ḗoraga-vei! Dabuḡa namo vedaureana ta ḡoḡwa-iaḡomaia, ḡoma vaḡa-riḡoa. Rini ta didinai ḡoma dori-toḡaia, ema tamaka maki kwakunai ḡoma toreri. <sup>23</sup> Ema boromakau natuna ma monana ḡoḡwa-iaḡomaia, ḡovaḡia, benamo bisini ḡania e bisini verere-vegogo. <sup>24</sup> Korana natugu maiḡa emaseto, senaḡi ma bemaḡuri-ḡenoḡoi; erekwa-rekwato, senaḡi ma bama doḡaria!’ Benamo ḡia ḡeverere-vegogoto.

<sup>25</sup> Natuna tau guinena tu vamokai. Vamoka na eḡenoḡoito, numa eiaḡo-viniato-ḡoi nai, mari e bara gururi eseḡaḡirito. <sup>26</sup> Benamo vetuḡunaḡi tarimana ta ekeaiato, mo guru korana evedanaḡi-iaḡiato. <sup>27</sup> Vetuḡunaḡi tarimana na evaḡa-veseato, ekirato, ‘Ḗoi tarimu beḡenoḡoi, tamamu na ma namona e ma maḡurina ḡesi bema doḡaria lorinai, ḡia na vetuḡunaḡi tarimari bevaḡa-guruḡari, boromakau natuna ma monana ḡesi beḡe vaḡia.’

<sup>28</sup> Tau guinena ebaru-rakavato, numai asi eraka-toḡato, benamo tamana eraka-rosito, enoḡiato neraka-toḡa ḡana. <sup>29</sup> Senaḡi ḡia na tamana evaḡa-veseato, ekirato, ‘Noḡitaia, au tu laḡani ḡutuma ḡoi rekemu ai atanuni, vetuḡunaḡimu aiaḡo-vinini, ḡemu ura mabarana akorana-iaḡirini, ḡemu vevaḡa-naḡi ta asi afitoḡaiato, senaḡi ḡoi na nanigosi natuna ta maki asi oviniguni au ma ḡatagu ḡesi vaḡa-iaku-iaḡima ḡana. <sup>30</sup> A mai natumu mata-boraḡa vavineri ḡeri ai ḡemu farefare mabarari bea vaḡa-koriri; bea ḡenoḡoi nai tu, ḡoi na tu boromakau natuna mona mase bovaḡia ḡia ḡana!’ <sup>31</sup> Tamana evaḡa-veseto, ekirato, ‘Natugu, ḡoi tu au seviguni ai otanu-vanaḡi vanaḡini, au ḡegu dagara mabarari tu ḡoi ḡemu. <sup>32</sup> A toma ḡita si-iaku, bisini verere, korana tarimu emaseto, senaḡi bemaḡuri; erekwa-rekwato, senaḡi ma bitama doḡaria.’”

## 16

*Vetuḡunaḡi tarimana ḡena tuḡamaḡi-iobuka*

<sup>1</sup> Iesu na ḡena mero evaḡa-guruḡarito, ekirato, “Farefare e moni vovoka tarimana ta etanuto-ḡoi. Benamo tarima kotari na farefare vovoka tarimana ḡekira-varaiato, ḡia ḡena farefare ḡitaḡauna tarimana na ḡena farefare eḡere-iaḡirini. <sup>2</sup> Moḡa lorinai taḡa tarimana na ekea-toḡaiato, benamo ekirato, ‘Ḡoi varimu baseḡaḡia moḡoni ba? Au ḡegu ḡauvei oḡwa-ragaiato nai, novevarifiu-iaḡia, korana initoma ḡoi tu dia au ḡegu farefare narinarina tarimana.’ <sup>3</sup> Benamo mo farefare ḡitaḡauna tarimana etuḡamaḡito, ekirato, ‘Au ḡegu baregona na toma evaḡa-dokoguni ḡegu ḡauvei na. Kara baveini? Au tu asi gwadagu baiaraḡani ema noḡinoḡi au ḡegu ai tu maiaka dagarana.’ <sup>4</sup> Etuḡamaḡito-ḡoi nuḡanai, ekirato, ‘Mai bama riba kara baveiani! Benamo bevaḡa-dokoguni nai, ḡatagu namori ḡutuma na beḡe ḡabi-raḡeguni ḡeri numai.’

<sup>5</sup> Moḡa lorinai ḡena baregona ḡenai ḡeḡabi-toreto tarimari mabarari ekea-vegogorito. Benamo ta edanaḡiato, ekirato, ‘Ḡoi ḡemu ḡabitore tu vira?’ <sup>6</sup> Evaḡa-veseto, ekirato, ‘Olive diḡana kavaburi sinau imaima toitoi (800).’ Benamo farefare ḡitaḡauna tarimana na ekiraiato, ‘Ḡemu ḡabitore fefana maiḡa, noraga-tanutari, benamo sinau vasivasi (400) notorea.’ <sup>7</sup> Benamo ta ma edanaḡiato, ekirato, ‘Ḡoi ḡemu ḡabitore tu vira?’ Ḡia ekirato, ‘Widi fuseri mabarari 1,000.’ Benamo farefare ḡitaḡauna tarimana na ekiraiato, ‘Ḡemu ḡabitore fefana maiḡa, noḡabia, benamo sinau imaima toitoi (800) notorea.’

<sup>8</sup> Dokonai mo farefare narinarina tarimana rakavana ḡena baregona na evaḡa-raḡeato, korana ḡena tuḡamaḡi-iobuka dainai. Korana tanobara tarimari tu ḡeiaunega-lelevaḡito ḡeri tanu-vegogo ai, a mamai ḡetanuni tarimari tu asiḡina.

<sup>9</sup> Au na akiramini, mai tanobara farefareri e moniri rakavari ḡerina tarimarima tu ḡomi ḡatami ai boḡono vaḡa-iaḡori, korana ḡemi moni bea korini nai, ḡomi tu beḡe tanu-vanaḡi vanaḡini numari ai beḡene ḡabi-raḡemi gubai.

<sup>10</sup> Deikara dagara misina ḡauvei-iaḡina ma ribana nai, dagara baregona maki ḡauvei-iaḡina ma ribana; ema deikara dagara keinai beḡofaḡofani nai, dagara baregonai maki beḡofaḡofani. <sup>11</sup> Bema ḡomi tanobara farefareri e moniri ḡauvei-iaḡiri asi ribami nai, Barau na kamasi farefare korikoriri gubai bevinimini boḡo ḡauvei-iaḡirini? <sup>12</sup> Ema bema ḡomi tarima ta ḡena farefare asi boḡo ḡitaḡau-ginikaurini nai, Barau na ḡomi ḡemi farefare maki asi bevinimini?

<sup>13</sup> Vetuḡunaḡi tarimana na baregona ruarua vetuḡunaḡiri asi beiaḡo-vinirini riba. Korana ḡia na ta tu asi beura-viniani, a ta tu beura-viniani; ta bevaḡa-moḡoniani, a ta tu beḡofaḡofa-iaḡiani. Ḡomi maki Barau ema moni nega sebonai vetuḡunaḡiri asi boḡo iaḡo-vinirini, asiḡina-ḡinavaḡi.”

*Iesu ḡena guruḡa kota*

<sup>14</sup> Farisea tarimari tu moni ḡeuravini-baregorito-ḡoi. Iesu ḡena guruḡa mabarana ḡeseḡaḡiato nai, ḡerikiriki-iaḡiato. <sup>15</sup> Iesu na evaḡa-guruḡarito, ekirato, “Ḡomi tu tarimarima ḡoirari ai ḡovekiraḡini, senaḡi Barau tu nuḡami ribana. Tarimarima na ḡevaḡa-raḡerini dagarari Barau na tu asi eura-vinirini, etuḡamaḡi-fitoḡarini.

<sup>16</sup> Mose ḡena taravatu ema peroveta tarimari ḡeri guruḡa ḡetanuto-ḡoi eiaḡomato mo, Ioane Babatiso ḡena negai. Monana Barau ḡena Basileia varina ḡeḡobata-iaḡiani nai, tarimarima mabarari ḡevebibi-toḡani beḡene raka-toḡa ḡana. <sup>17</sup> Guba ema tanobara beḡe rekwa-rekwani tu ma dabarana, senaḡi taravatu ḡena toutou ta maki asi berekwa-rekwani.

<sup>18</sup> Tau ta na ḡaraḡona belaiiani, benamo vavine ta ma beḡaraḡoani nai, ḡia mo tu veḡura-vanaḡi veiḡana beveiani; ma tarima boruna ta na mo tau na elaiato vavinena moḡa ma beḡaraḡoani nai, ḡia maki beveḡura-vanaḡini.”

*Farefare e moni vovoka tarimana ema Lasaro*

<sup>19</sup> “Farefare e moni vovoka tarimana ta etanuto-ḡoi. Ḡia tu dabuḡa namori moḡo eveito-ḡoi e ḡaro mabarari ai everereto-ḡoi ema ḡaniḡani namona moḡo eḡanito-ḡoi.

<sup>20</sup> Ĝena numa ĝatama bokanai tarima ta asi-ĝena ema asi-ĝana arana Lasaro egenataĝoto-ĝoi. Ĝia tu kefina mabarana lakufodo. <sup>21</sup> Eura-baregato-ĝoi taĝa tarimana ĝana ĝaniĝani momori bene ĝani. Kwaiva maki ĝeiaĝoto, ĝia manuĝana ĝeiamuserito-ĝoi.

<sup>22</sup> Asi ĝena-ĝana tarimana emaseto, benamo aneru na Aberahamo sevina ĝana ĝeĝwa-iaĝoato. Farefare vovoka tarimana ma emaseto, benamo ĝeguriato. <sup>23</sup> Mase gabunai (o Hades) midigu eĝanito-ĝoi nai, eboĝe-raĝeto, manaĝai Aberahamo eĝitaiato, ema Lasaro maki ĝia ĝesi. <sup>24</sup> Benamo ekeato, ekirato, 'Aberahamo, tamagu o, novetuĝagu, mani Lasaro notuĝua, ĝimana didina nanu ai nea duĝi-reia, be meagu moĝo nama vaĝa-ĝavea, korana tu au mai karava morenai midigu vovoka aĝanini.'

<sup>25</sup> Senaĝi Aberahamo ekirato, 'Natugu o, notuĝamaĝia, ĝoi omaĝurito-ĝoi ĝarori ai dagara namori oĝabito-ĝoi, a Lasaro tu dagara rakavari eĝabito-ĝoi. Senaĝi toma ĝia tu everereni, a ĝoi tu midigu oĝanini. <sup>26</sup> Ĝita fakarai maki koufa bara ta etanuni, moĝa lorinai maina na tarima ta maniĝana asi beiaĝosini, ema manina na maki ta maiĝana asi beiaĝomani.'

<sup>27</sup> Benamo farefare vovoka tarimana ekirato, 'Tamagu o, anoĝimuni, Lasaro notuĝua tamagu ĝena numa ĝana. <sup>28</sup> Au tarigu merori tu imaima. Ĝia na bene vaĝa-guruĝari, mai midigu ĝani gabuna ĝana beĝe iaĝomani garina.' <sup>29</sup> Senaĝi Aberahamo ekirato, 'Mose ema peroveta tarimari tu ĝia ĝesi, be garori neĝi beĝene seĝaĝiri.' <sup>30</sup> Taĝa tarimana ekirato, 'Asiĝi, tamagu! Senaĝi bema emaseto tarimana ta beiaĝoni nai, ĝia tu ĝeri rakava ĝerina beĝe vetuĝamaĝi-kureni.'

<sup>31</sup> Aberahamo ekirato, 'Bema Mose ĝena taravatu ema peroveta tarimari ĝeri ĝuruĝa asi beĝe seĝaĝirini nai, mase na tarima ta bere variĝisi-ĝenoĝoi maki asi ĝere seĝaĝi-vinia.'"

## 17

### *Veirakava ema rakava tuĝamaĝi-fitoĝari*

<sup>1</sup> Iesu na ĝena mero evaĝa-guruĝarito, ekirato, "Tarimarima vaĝa-ketori dagarari roĝo beĝe ĝorani, senaĝi bevaĝa-ĝorarini tarimana tu vetuĝana kekei. <sup>2</sup> Ĝia tu bere namo fore baregona ta ĝaiĝonai ĝere baru-kaua, benamo davarai ĝere fiu-reia, korana mai misimisiri ta rakavai beĝofa-toĝaiani garina.

<sup>3</sup> Moĝesi nai lorimi boĝono vetore! Bema ĝoi tarikakamu veiĝa rakavari eveini nai, bono kira-ĝoia, ema ĝena rakava ĝerina bevetuĝamaĝi-kureni nai, ĝena rakava bono tuĝamaĝi-fitoĝari. <sup>4</sup> Bema ĝia na ĝaro ta vaĝa-imaima ruarua (7) bevaĝa-rakavamuni, ema vaĝa-imaima ruarua (7) beĝenoĝoini ĝemu ai, bekirani, 'Bavetuĝamaĝi-kure,' betoni nai, ĝoi na ĝena rakava bono tuĝamaĝi-fitoĝari.'"

### *Veĝabidadama*

<sup>5</sup> Iesu ĝena apostolo na Vereĝauka ĝevaĝa-guruĝaiato, ĝekirato, "Ĝema veĝabidadama novaĝa-baregori!" <sup>6</sup> Vereĝauka na evaĝa-veserito, ekirato, "Bema ĝomi ĝemi veĝabidadama tu mastadi ĝauna ĝutuna ĝena barego kavana, misina korokoro moĝo, senaĝi ĝomi na mai ĝau baregona o malberi ĝauna boĝo kiraiani, 'Noveraĝa-vaĝi, be davarai noa vevaro!' boĝo toni, benamo garomi tu beseĝaĝiani.'"

### *Vetuĝunaĝi tarimana ĝena ĝauvei*

<sup>7</sup> "Bema ĝomi ta ĝemu vetuĝunaĝi tarimana tano befokani o mamoe beĝita-ĝaurini murinai, ĝauvei gabuna na numa ĝana beiaĝomani nai, ĝoi na bokiraiani, 'Noraka-ĝariĝari, be noma ĝaniĝani,' botoni ba? <sup>8</sup> Asiĝina, senaĝi ĝoi bokirani, 'Ĝagu ĝaniĝani novei, ema bono vedabuĝa, be bonoma nari-ĝaugu; au bana ĝaniĝani ema bana niuniu-ĝosi murinai vau, ĝoi ma bono ĝaniĝani ema bono niuniu.' <sup>9</sup> Ba vetuĝunaĝi tarimana ĝena seĝaĝi ai dainai bevaĝa-namoani? Asiĝina. <sup>10</sup> Ĝomi maki moĝesi; bema Barau na bekiramini ĝauveiri mabarari boĝo veirini nai, boĝo kirani, 'Ĝita vetuĝunaĝi tarimara ĝera ĝauvei.'"

*Iesu na lepera tarimari gabanana (10) evaġa-namorito*

<sup>11</sup> Iesu Ierusalemia eiaġo-viniato-ġoi nai, Samaria ema Galilea tanori vefakari na eraka-vanaġito. <sup>12</sup> Vanuġa tai eraka-toġato, benamo lepera tarimari gabanana (10) ġesi ġevedoġarito. Roġo manaġai ġeruġa-tarito, <sup>13</sup> ġia ġekeato, ġekirato, “Iesu! Ġema Vereġauka! Novetuġama!”

<sup>14</sup> Iesu na eġitarito, benamo evaġa-guruġarito, ekirato, “Rubu Veaġa vereri ġeri ai ġoiaġo, be beġenea ġitami.” Benamo ġeiaġoto-ġoi nuġanai, tauġaniri ġeveiarevato, ġenamoto. <sup>15</sup> Tarima sebona moġo ġia fakari ai kefina eġitaiato enamoto, benamo eġenoġoi-iaġoto, Barau evonevone-raġe viniato. <sup>16</sup> Benamo Iesu kwakuna koranai evetui-tarito, evaġa-namoato. Ġia tu Samaria tarimana. <sup>17</sup> Iesu ekirato, “Tarima mabarari tu gabanana (10) beġe namo. Imaima vasivasi (9) tu aiġeri? <sup>18</sup> Kara dainai mai irau gabu tarimana ġereġana moġo beġenoġoi-iaġoma, Barau bema vaġa-raġea?” <sup>19</sup> Benamo Iesu na ekiraiato, ekirato, “Novariġisi, noiaġo, ġemu veġabi-dadama na bevaġa-maġurimu.”

*Barau ġena Basileia beiaġomani guruġari*

*Mataio 24:23-28; 24:37-41*

<sup>20</sup> Farisea tarimari kota na Iesu ġedanaġiato, Barau ġena Basileia tu aitoma beiaġomani. Ġia na evaġa-veserito, ekirato, “Barau ġena Basileia beiaġomani tu asi boġo ġitaiani dagarana. <sup>21</sup> Tarima ta asi bekirani, ‘Noġitaia, iniġa!’ o ‘Iomoġa!’; korana Barau ġena Basileia tu ġomi fakami ai maniġa.”

<sup>22</sup> Benamo ġia na ġena mero evaġa-guruġarito, ekirato, “Ġaro ta beraġasini nai, ġomi ġemi ura baregona tu Tarimarima Natuna ġena ġaro sebona ta moġo boġono ġitaia, senaġi asi boġo ġitaiani. <sup>23</sup> Kotari na beġe kiramini, ‘Tarimana iomoġa!’ o ‘Tarimana maiġa!’ beġe toni. Senaġi asi boġono iaġo, murinai asi boġono raka. <sup>24</sup> Korana kiriku eragani nai, morena gubai reketa-reketa ġana eiaġoni kavana, Tarimarima Natuna ġena ġaro nuġanai maki moġesi beveini. <sup>25</sup> Senaġi ġia midigumidigu vovoka roġo beġaniguineni, ema toma ġuru tarimari na roġo beġe kira-fitoġaiani.

<sup>26</sup> Tarimarima Natuna beiaġomani ġaronai tu Noa ġena negai kavana. <sup>27</sup> Tarimarima mabarari ġeġaniġanito-ġoi, ġeniuniuto-ġoi, tau e vavine ġeveġaraġoto-ġoi, eiaġomato mo, Noa ġena lagatoi ai eraka-toġato ġaronai, benamo ġutuġutu na mabarari eġutumaserito. <sup>28</sup> Lota ġena negai maki moġesi moġo. Ġeġaniġanito-ġoi, ġeniuniuto-ġoi, ġeivoivoito-ġoi, ġevaro-varoto-ġoi, numa ġeragato-ġoi. <sup>29</sup> Senaġi Lota Sodoma eraga-kwaneato ġaronai, karava ma salfa o fore seġukari ġesi guba na ġeketo-firiġoto, mabarari evaġi-masemaserito. <sup>30</sup> Tarimarima Natuna befoforini nai, maki moġesina beġorani.

<sup>31</sup> Mo ġaro ai, bema tarima ta tu numa tuġunai etanu-taġoni, numai asi ma bene raka-toġa ġena farefare bene ġabiri. Ema bema tarima ta tu vamokai nai, ġia ġena numa ġana asi ma bene ġenoġoi ġena farefare ġabiġabiri. <sup>32</sup> Lota ġaraġona boġono tuġamaġia! <sup>33</sup> Deikara tauġena moġo ġena maġuri lorina etoreani tarimana, ġena maġuri beleaiani; a ġena maġuri eleaiani tarimana na maġuri bedoġariani.

<sup>34</sup> Akiramini, mo boġi ai tarima ruarua gEDA sebonai beġe genani nuġanai, ta tu Barau na beġabi-vaġiani, (korana beġabi-raġeani nai), a ta tu betanuni, (korana bekira-fitoġaiani nai). <sup>35</sup> Vavine ruarua widi giro dagarana beġe giro-vegogoani nai, ta tu beġabi-vaġiani, a ta tu betanuni. [<sup>36</sup> Tarima ruarua vamokai beġe ġauveini nai, ta tu beġabi-vaġiani, a ta tu betanuni.]”

<sup>37</sup> Iesu ġena mero na ġedanaġiato, ġekirato, “Vereġauka o, ainai beġorani?” Iesu evaġa-veseto, ekirato, “Mase tauġanina etanuni gabunai, gaio maki monai beġe veġogoni, (be ġia na beġe vaġa-foforiani).”



<sup>1</sup> Benamo Iesu na ġena mero ġeri barabore ta ekiraġiatio. Mo barabore na bene vaġa-ribari, be vanaġivanaġi beġene ġauġau ema asi beġene moiramoira ġana. <sup>2</sup> Maiġesi ekirato, “Vanuġa tai Kota eseġaġini tarimana ta etanuto-ġoi. Ġia tu Barau garina asi eveito-ġoi, ema tarimarima maki asi egubakaurito-ġoi. <sup>3</sup> Mo vanuġa vabuna ta mai Kota eseġaġini tarimana ġenai eiaġo-ġenoġoi ġenoġoito-ġoi, ġena maoro evevaġa-doġe-gani viniatio-ġoi ema ekirato-ġoi, ‘Novaġa-kavagu, be ġevaġa-rakavaguni tarimari davari noviniri!’ <sup>4</sup> Nega emanaġato nuġanai, Kota eseġaġini tarimana na vabu ġena ura veiġana asi eveiatio. Senaġi ġaro ta ġia tauġena evetuġamaġito, ekirato, ‘Au tu Barau garina asi aveini ema tarimarima maki asi agubakaurini, <sup>5</sup> senaġi dagara sebna tu, mai vabu na au evaġa-doġe-ganiguni nai, ġena ura veiġana naveia, korana vanaġivanaġi beiaġomani, benamo au bevaġa-doġe-gani iaġoguni ġesi.”

<sup>6</sup> Vereġauka ma ekirato, “Mo Kota eseġaġini tarimana kara etato, ġoseġaġia. <sup>7</sup> Be kamasi? Barau na eviriġirito tarimari, ġia ġenai boġi ema laġani mabarari ai ġetaġitaġini ema ġenoġinoġi-viniani tarimari, vevaġa-maoro nuġanai tu asi bevaġa-kavarini? Nevaġa-kavari ġana nai tu bekwaiboni? <sup>8</sup> Au na akiramini, ġeri maoro ai ġia na bevaġa-kava ġariġaririni. Senaġi Tarimarima Natuna ma beiaġomani nai, ġia veġabidadama tanobarai bedoġariani ba asiġina?”

#### *Farisea tarimana ema takesi gogo tarimana*

<sup>9</sup> Tarima kotari ġeri tuġamaġi ġia tu vei-iobukaiobuka, a tarimarima mabarari tu veirakava tarimari. Iesu na mai tarima ġeri barabore ekiraġiatio, ekirato, <sup>10</sup> “Tarima ruarua Rubu Veaġa ġana ġeiaġoto, ġea ġuriġurito; ta tu Farisea tarimana, a ta tu takesi gogo tarimana. <sup>11</sup> Farisea tarimana ġereġana reke tai eruġato, benamo eġauġauto, ekirato, ‘Barau o, avaġa-namomuni, korana au tu dia tarima mabarari kavana, be seġafore tarimari, vei ġeġeva-ġeġeva tarimari, veġura-vanaġi tarimari. Avaġa-namomuni, korana au tu dia iomo takesi gogo tarimana kavana. <sup>12</sup> Fura o wiki ta nuġanai au tu ġaro ruarua aġani-veaġani, ema adoġarini dagarari karava gabanana (10) aveirini, benamo karava sebna tu ġoi avinimuni.’

<sup>13</sup> Senaġi takesi gogo tarimana tu manaġai eruġato, asi eboġe-raġeto gubai, kobana ebotaio, ekirato, ‘Barau o, au tu rakava tarimagu, noma vetuġagu!’

<sup>14</sup> Au na akiramini, takesi gogo tarimana tu Barau na evaġa-moġoniatto, ma vei-iobukaiobukana ġesi vanuġa ġana eġenoġoito, a Farisea tarimana tu asiġina. Korana tauġena moġo eveġabi-varaġeni tarimana tu, Barau na bevaġa-variġoani, a tauġena evevaġa-variġoni tarimana tu, bevaġa-varaġeani.”

#### *Iesu na mero misiri evaġa-namorito*

*Mataio 19:13-15; Mareko 10:13-16*

<sup>15</sup> Tarima kotari mero misimisiri Iesu ġenai ġeġwa-iaġorito, ġimana iatari ai bene toreri ġana. Ġena mero na ġeġitarito, benamo ġekira-ġoirito. <sup>16</sup> Senaġi Iesu na mero misiri ekea-iaġomarito, ġena mero ekirarito, ekirato, “Mani mero misiri au ġegu ai ġeiaġoma, asi ġolairi, korana maniġesina kavana tu Barau ġena Basileia tarimari. <sup>17</sup> Moġoni au na ġomi akiramini, dei na Barau ġena Basileia asi beġabi-raġeani mero misina kavana, Basileiai asi beraka-toġani.”

#### *Farefare vovoka tarimana*

*Mataio 19:16-30; Mareko 10:17-31*

<sup>18</sup> Iuda tarimari ġeri vere tauna ta na Iesu edanaġiatio, ekirato, “Vevaġa-riba taumu namona, au kara baveini vau, maġuri vanaġivanaġi badoġariani?” <sup>19</sup> Iesu na evaġa-vevato, ekirato, “Ġoi karase nai au namogu okiraġini? Tarima ta asi namo, Barau moġo ġereġana. <sup>20</sup> Taravatu ma ribamu, ‘Asi bono veġura-vanaġi, asi bono vaġivaġi, asi bono lema, asi bono vevaġa-daġa ġofaġofa, tamamu sinamu bono gubakauri.’” <sup>21</sup> Mo tarima ekirato, “Au keigu na beiaġoma toma mani taravatu mabarari akorana-iaġirini.” <sup>22</sup> Iesu na mo guruġa eseġaġiatio, benamo ekiraiatio, “Ġoi tu dagara sebna moġo orabuni. Ġemu farefare mabarari novoivoi-iaġiri, moniri tu asi-ġeri ema asi-ġari tarimari bono

viniri, benamo gubai ǫoi ǫemu farefare bodoǫaririni. Moǫesi boveini vau, au murigu ai bonoma raka.”<sup>23</sup> Mo guruǫa eseǫaǫiato nai, nuǫana emeto-rakavato, korana ǫia tu farefare ǫutuma tarimana.

<sup>24</sup> Iesu na eǫitaiato, benamo ekiraiato, ekirato, “Farefare vovoka tarimari Barau ǫena Basileia ǫeri rakatoǫa tu gwaǫiǫi rakava!”<sup>25</sup> Kamela nila kadarena na ǫena rakatoǫa tu kotuna gwaǫiǫi, a farefare vovoka tarimana Barau ǫena Basileia rakatoǫana ǫia ǫenai tu gwaǫiǫi rakava.”<sup>26</sup> Tarimarima na mai guruǫa ǫeseǫaǫiato, benamo Iesu ǫedanaǫiato, ǫekirato, “Be, deikarari vau maǫuri beǫe doǫariani?”<sup>27</sup> Iesu evaǫa-veseto, ekirato, “Tarimarima na asi beǫe veirini riba dagarari tu Barau na beveirini riba.”

<sup>28</sup> Petero na ekiraiato, ekirato, “ǫoi ribamu, ǫai tu ǫema dagara mabarari ǫaraga-kwanerito, murimu ai ǫarakani.”<sup>29</sup> Iesu na ekirarito, “Moǫoni akiramini, tarima ta ǫena numa eraga-kwaneato, o ǫaraǫona, kakana, tarina, tamana, sinana, natuna Barau ǫena Basileia uranai,<sup>30</sup> ǫia na mai maǫuri nuǫanai dagara ǫutuma beǫoitaǫoni, ema mo negai vau maǫuri vanaǫivanaǫi bedoǫariani.”

*Iesu na ǫena mase ma ekiraǫi-foforiato*

*Mataio 20:17-19; Mareko 10:32-34*

<sup>31</sup> Iesu na ǫena mero gabanana ruarua (12) eǫori-veǫitarito, benamo ekirarito, ekirato, “ǫoseǫaǫi! ǫita tu Ierusalem ǫana tavaraǫeni. Monai peroveta tauri na Tarimarima Natuna varina ǫetore-guineto guruǫari aniri mabarari beǫe moǫonini.”<sup>32</sup> Irau bese (o Roma) tarimari ǫimari ai beǫe toeani. ǫia na beǫe vaseva vaseva-iaǫiani, beǫe rikiriki-iaǫiani e beǫe kanunu-kanunuani.<sup>33</sup> Beǫe botaiani e beǫe vaǫi-maseani, senaǫi ǫaro vaǫa-toitoinai vau ma beviriǫisi-ǫenoǫoini.”

<sup>34</sup> Iesu ǫena mero mo guruǫa tauna asi ǫeǫoitaǫoato. Guruǫa anina ǫia ǫeri ai tu vekuretoǫa. ǫia asi ribari Iesu na kara ekiraǫiato.

*Iesu na mata-bubu tauna evaǫa-namoato*

*Mataio 20:29-34; Mareko 10:46-52*

<sup>35</sup> Iesu tu Ieriko ekavinaǫiato nai, mata-bubu tauna ta dabara rikinai etanu-taǫoto-ǫoi, enoǫinoǫito-ǫoi.<sup>36</sup> Tarimarima ǫutuma dabarai ǫeraka-vanaǫito eseǫaǫito, benamo evedanaǫito, “Mai guru anina tu kara?”<sup>37</sup> ǫekirato, “Iesu, Nasareta tauna, eraka-vanaǫini.”<sup>38</sup> Benamo ekea-fouto, ekirato, “Iesu o, Davida natuna, au novetuǫagu!”<sup>39</sup> ǫoirai ǫerakato tarimari na ǫekira-ǫoiato, senaǫi ǫia ekea-ǫiǫiraǫe ǫiǫiraǫeto-ǫoi, “Davida Natuna o, au novetuǫagu!”

<sup>40</sup> Iesu eruǫa-tarito, benamo ekirato, “ǫoǫori-iaǫomaia!” ǫia eiaǫomato, benamo Iesu na edanaǫiato, ekirato,<sup>41</sup> “Kara ourani ǫemu ai naveia otoni?” ǫia evaǫa-veseto, ekirato, “Vereǫauka o, matagu noma vaǫa-iaǫaia.”<sup>42</sup> Iesu ekirato, “Be, matamu nenamo, ǫemu veǫabidadama na bevaǫa-namomu.”<sup>43</sup> Vaǫa-sebo matana enamoto, eboǫeboǫe-ǫinikauto, Iesu murinai erakato, Barau evaǫa-raǫeato. Mo veiǫa ǫeǫitaiato tarimari mabarari na maki Barau ǫevaǫa-raǫeato.

## 19

*Iesu ema Sagaio*

<sup>1</sup> Iesu Ieriko ai eraǫasito, benamo vanuǫa nuǫana na eraka-iaǫoto-ǫoi.<sup>2</sup> Monai tu takesi gogo tarimari ǫeri vere ta arana Sagaio; ǫia tu moni ema farefare vovoka tarimana.<sup>3</sup> ǫia ǫena ura tu Iesu neǫita-vetoǫaia ǫia tu dei, senaǫi tarimarima ǫutuma ema ǫia tu tau kubina nai, neǫitaia ǫana egera-kavato.<sup>4</sup> Moǫa lorinai eraga-guine-iaǫoto, sikamoa ǫauna tai eraǫeto, Iesu monana beraka-vanaǫini nai, bene ǫitaia ǫana.

<sup>5</sup> Iesu mo gabu ai eraǫasito, eboǫe-raǫeto, eǫitaiato, benamo ekiraiato, “Sagaio, no-rakariǫo-ragaraga, korana au toma tu ǫoi ǫemu numai batanuni bene.”<sup>6</sup> Benamo Sagaio eraga-rakariǫoto, ma iakuna ǫesi Iesu eǫori-iaǫoato ǫena numa ǫana.<sup>7</sup> ǫeǫitaiato

tarimari mabarari ġemugumuguto, ġekirato, “Mai tau tu rakava tarimana, ġena numai ea tanuni.”

<sup>8</sup> Sagaio eruġa-vaisto, Vereġauka evaġa-guruġaiato, ekirato, “Vereġauka, noseġaġi! Ġegu farefare reke-ta tu gara veġubu tarimari bavinirini, ema ġena farefare aġabi-kavaiato tarimana tu, nega vaġa-vasivasi bavinini-ġenoġoiani.” <sup>9</sup> Iesu na ekiraiato, ekirato, “Toma vevaġa-maġuri tu mai numai bema raġasi, korana mai tarima maki Aberahamo natuna. <sup>10</sup> Korana Tarimarima Natuna tu rekwerekwa tarimari vetauvetauri ema bene vaġa-maġuriri ġana eiaġomato.”

*Barabore - Vetuġunaġi tarimari moni ġenarito*  
*Mataio 25:14-30*

<sup>11</sup> Mabarari ġeseġaġito-ġoi nuġanai, Iesu na ġeri barabore ta ekiraġiato. Korana ġia tu Ierusema ekavi-naġiato nai, ġia matoru ġekirato, Barau ġena Basileia tu mo negai beforini. <sup>12</sup> Benamo ġia ekirato, “Dagi baregona tarimana ta gabu manaġana ġana eiaġoto, kini o vere dagina bene ġabia vau, ma bene ġenoġoi ġana. <sup>13</sup> Roġosi bere raka nai, ġena vetuġunaġi tarimari gabanana (10) ekea-iaġomarito, golo moniri ġia tata sebori-sebori evinirito, benamo ekirarito, ekirato, ‘Au murigu ai boġono ġauvei-iaġiri, be moni boruri tari ma boġono doġari.’

<sup>14</sup> Senaġi ġena tanobara tarimari na asi ġeura-viniato-ġoi nai, murina na guruġa ġetuġuto, ġekirato, ‘Ġai asi ġaurani mai tarima ġai ġema vere ai bene iaġo.’ <sup>15</sup> Senaġi mo tarima na kini dagina ġeviniato murinai, eġenoġoi-iaġomato. Benamo ġena vetuġunaġi tarimari ekea-iaġomarito, beġene vaġa-ribaia, moni boruri vira ġia tata ġedoġarito.

<sup>16</sup> Tarima ginigunena eiaġomato, benamo ekirato, ‘Vereġauka, golo monina sebona oviniguto nuġanai, au na tu moni gabanana (10) ma adoġaririto.’ <sup>17</sup> Ġia na evaġa-namoato, ekirato, ‘Ġoi tu vetuġunaġi taumu namona! Dagara misiri oġauvei-iaġi ginikaurini nai, au na vanuġa mabarari gabanana (10) avinimuni, ġoi na boġita-ġaurini.’ <sup>18</sup> Vaġa-ruaruana eiaġomato, benamo ekirato, ‘Vereġauka, sebona oviniguto nuġanai, au na moni imaima ma adoġaririto.’ <sup>19</sup> Ġena vere na ekiraiato, ‘Ġoi tu vanuġa imaima boġita-ġaurini.’

<sup>20</sup> Vetuġunaġi tarimana ta ma eiaġomato, benamo ekirato, ‘Vereġauka o, ġoi ġemu moni sebona tu iniġa, au na muko ai akumuato, akure-toġaiato. <sup>21</sup> Au tu ġoi garimu aveito, korana ġoi tu asi vegubakau taumu. Tarima ġeri dagara oġabirini, ema dia ġoi na ovarorito dagarari obasirini e okwarini.’ <sup>22</sup> Ġena vere na ekiraiato, ‘Ġoi tu vetuġunaġi tarimana rakavana! Tauġemu ġemu guruġa na bavevaġa-maoro vinimuni. Ġoi ribamu au tu asi vegubakau taugu, dia au ġegu dagarari aġabirini, ema dia avaroto dagarari abasirini. <sup>23</sup> Be, karase nai ġegu moni tu banikai asi otoreato? Benamo au bara ġenoġoi nai tu, ma torekaua o interestina ġesi bara doġaria.’

<sup>24</sup> Benamo monai ġeruġa-taġoto-ġoi tarimari ekirarito, ekirato, ‘Mani moni sebona ġenai maniġa ġoġabia, moni gabanana (10) tarimana ġovinia.’ <sup>25</sup> Senaġi ġia na ġekiraiato, ‘Vereġauka, ġia ġena moni tu varau 10 beġabia.’ <sup>26</sup> Ġia evaġa-veseto, ekirato, ‘Au na akiramini, ma ġena-ġana tarimana tu ġutumari ma baviniani, a asi ġena-ġana tarimana tu, ġenai misina maki baġabi-vaġiani.

<sup>27</sup> Senaġi au ġebaru-viniguni tarimari, asi ġeurato au ġia bana guine-iaġiri ġetato tarimari, ġoġori-iaġomari, au ġoiragu ai ġoma vaġi-maseri!’ ”

*Iesu ġena rakatoġa Ierusema ġevonevone-raġe viniato*

*Mataio 21:1-11; Mareko 11:1-11; Ioane 12:12-19*

<sup>28</sup> Eguruġa-ġosito vau, Iesu eraka-guineto, Ierusema ġana evaraġeto. <sup>29</sup> Betefage e Betania ekavinaġirito-ġoi nai, Olive Ġorona rekenai, benamo Iesu na ġena mero ruaru etuġu-guinerito, ekirarito, ekirato, <sup>30</sup> “Ġoira vanuġana ġana ġoiaġo. Boġo raġasini nai, doniki natuna ta barutari boġo ġitaiani, iatanai tarima ta roġosi bene raġe. Boġono ruġaia, benamo boġono ġori-iaġomaia. <sup>31</sup> Bema tarima ta na bedanaġimini, bekirani, ‘Karase nai ġoruġaiani?’ betoni nai, ġomi boġono kira, ‘Vereġauka na eura-viniani.’ ”

<sup>32</sup> Benamo tauri ruarua ġeiaġoto, Iesu na ekira-vararito ilailanai ġedoġariato. <sup>33</sup> Doniki natuna ġeruġaiato-ġoi nuġanai, doniki biaguri na ġedanaġirito, “Ġomi tu karase mani doniki ġoruġaiani?” <sup>34</sup> Ġevaġa-veseto, ġekirato, “Vereġauka na eura-viniani.”

<sup>35</sup> Benamo Iesu ġenai ġeġori-iaġoato. Ġeri dabuġa barari doniki doġenai ġeiavarito vau, Iesu ġevaġa-tanu-kauato. <sup>36</sup> Iesu eiaġoto-ġoi nai, tarimarima ġeri dabuġa barari dabarai ġeiavarito.

<sup>37</sup> Ierusalemata varau ekavinaġiato, Olive Ġorona na evariġoto-ġoi, benamo Iesu ġena mero ġutuma lelevaġi ġeikuto, Barau ġevonevone-raġe viniato, korana nuġa-farevaġi veiġari ġeġitarito nai. <sup>38</sup> Ġekirato,

“Ġera Vere baregona,  
Vereġauka aranai eiaġomani Kinina,  
sivaġa-namoal!

Maino gubai bene barego ema vevaġa-raġe tu guba tuġunai!”

<sup>39</sup> Benamo Farisea tarimari kota na tarimarima ġutuma nuġari na Iesu ġekiraiato, ġekirato, “Vevaġa-riba taumu, ġoi ġemu mero nokira-ġoiri!” <sup>40</sup> Iesu na evaġa-veserito, ekirato, “Au na akiramini, bema ġia asi beġe koġoni nai, mai fore beġe koġoni.”

#### *Iesu Ierusalemata taġina eveito*

<sup>41</sup> Iesu vanuġa barana Ierusalemata ġana eraka-kavinaġito, eġitaiato, benamo taġina eveito, <sup>42</sup> ekirato, “Toma ġaro ai ġemu maino korana boro ribaia bere namo! Senaġi toma, ġoi na asi oġitaiani. <sup>43</sup> Ġarona beraġasini nai, ġebaru-vinimuni tarimari na tano beġe ragaiani, beġe kobe-ġeġeraġimuni, asi ġemu rakarosi dabarana. <sup>44</sup> Benamo ġoi ema nuġamu ai ġetanuni tarimari beġe fuki-bubu-riġomini tano ai; fore maki ta iatanai asi beġe iaġuiani, korana Barau ġena vevaġa-kava emariġoto asi oribaiani nai.”

#### *Iesu na Rubu Veavaġa eiarevaiato*

*Mataio 21:12-17; Mareko 11:15-19; Ioane 2:13-22*

<sup>45</sup> Iesu Rubu Veavaġa nuġanai eraka-toġato, voivoi tarimari elai-rosirito, <sup>46</sup> ekirarito, ekirato, “Buka Veavaġa nuġanai tu maiġesi ekirani, ‘Ġegu numa tu ġuriġuri numana beġe kiraġiani,’ senaġi ġomi na tu lema tarimari ġeri gumu gabunai boġo vaġa-iaġoa.”

<sup>47</sup> Iesu tu ġaro mabarari ai Rubu Veavaġa nuġanai evevaġa-ribato-ġoi. Rubu Veavaġa vereri baregori, e taravatu ġevevaġa-riba iaġiato-ġoi tarimari, ema Iuda vereri na ġia beġene vaġia dabarana ġevetauato-ġoi. <sup>48</sup> Senaġi asi ġeri dabara, korana tu tarimarima mabarari ġeurato-ġoi, Iesu ġena guruġa ta maki asi beġene vei-kettoa.

## 20

#### *Ierusalemata vereri na Iesu ġena seġuka korana ġevedanaġi-iaġiato*

<sup>1</sup> Ġaro tai Iesu tu Rubu Veavaġa nuġanai evevaġa-ribato-ġoi, Vari Namona tarimarima eġobata-vinirito-ġoi. Benamo Rubu Veavaġa vereri baregori, e taravatu ġevevaġa-riba iaġiato-ġoi tarimari, ema Iuda vereri Iesu ġenai ġeiaġoto, <sup>2</sup> ġedanaġiato, ġekirato, “Kamara seġukai ġoi na mai dagara oveirini? Dei na mai seġuka evinimuto?”

<sup>3</sup> Iesu na evaġa-veserito, ekirato, “Au na maki vedanaġi ta avinimini. Ġokira-varagu, <sup>4</sup> Ioane ġena babatiseo veiġana tu Barau ġenana eiaġomato, ba tarimarima ġerina?”

<sup>5</sup> Ġia fakari ai ġeverorito, ġekirato, “Bema ġita bita kirani, ‘Barau ġenana,’ bita toni nai, ġia bekirani, ‘Karase nai Ioane asi ġovaġa-moġoniato?’ betoni. <sup>6</sup> Senaġi bema ġita bita kirani, ‘Tarimarima ġerina,’ bita toni nai, tarimarima mabarari na fore na beġe taki-maserani, korana ġia ġekirani, Ioane tu peroveta tarimana, ġetoni.” <sup>7</sup> Iesu ġevaġa-veseato, ġekirato, “Ġai asi ribama,” ġetato.

<sup>8</sup> Benamo Iesu na ġia maki ekirarito, ekirato, “Au na maki kamara seġukai mai dagara aveirini asi bakira-varamini.”

*Barabore - Tavoḡa ḡitaḡauna tarimari rakavari*

*Mataio 21:33-46; Mareko 12:1-12*

<sup>9</sup> Benamo Iesu na tarimarima mai barabore ekira-vararito, ekirato, “Tarima ta vine tavoḡana evaroato vau, tavoḡa ḡitaḡauna tarimari ḡeri ai eraga-kwaneato. Benamo erakato gabu ta ḡana. Monai ḡaro ḡutuma ea tanuto. <sup>10</sup> Vine ḡwari (o grapes) ḡemaḡeto, benamo ḡia na ḡena vetuḡunaḡi tauna ta etuḡuato tavoḡa narinarina tarimari ḡeri ai, vine ḡwari kota benea ḡabi ḡana. Senaḡi tavoḡa ḡitaḡauna tarimari na ḡekwariato vau, ḡimana kori ḡetuḡu-ḡenoḡoiato. <sup>11</sup> Benamo vetuḡunaḡi tauna ta ma etuḡuato, senaḡi ḡia maki ḡevaḡa-vevaḡiato, ḡevei-maiaka maiakaiato, ḡimana kori ḡetuḡu-ḡenoḡoiato. <sup>12</sup> Vetuḡunaḡi tauna vaḡa-toitoina maki etuḡuato, senaḡi ḡevaḡa-vevaḡi rakavaiato, kefina maki ma fauri vau ḡelai-rosiato. <sup>13</sup> Benamo tavoḡa biaguna ekirato, ‘Au tu kara ma beveini? Au natugu, auravini-baregoani merona, na-tuḡua, atuḡamaḡini ḡia beḡe gubakauani!’ <sup>14</sup> Senaḡi tavoḡa narinarina tarimari na ḡeḡitaiato nai, tauḡeri ḡeveguruḡa-vevinito, ḡekirato, ‘Mani tu tavoḡa biaguna natuna, be sivaḡia, benamo tavoḡa tu ḡita ḡera.’ <sup>15</sup> Benamo tavoḡa murikanai ḡeinu-rosiato, ḡevaḡi-maseato.

Iesu evedanaḡito, ekirato, “Tavoḡa biaguna tu kara beveiani ḡia ḡeri ai? <sup>16</sup> Ḳia beiaḡomani, tavoḡa ḡitaḡauna tarimari bevaḡi-ḡosirini, benamo tavoḡa tu tarima irauri ma bevinirini.” Tarimarima na mai guruḡa ḡeseḡaḡiato nai, ḡekirato, “Asiḡi, maiḡesi asi bene vetore!”

<sup>17</sup> Iesu na eḡitarito, benamo edanaḡirito, ekirato, “Be, mai guruḡa Buka Veaḡa nuḡanai anina tu kara? Maiḡesi ekirato, ‘Fore numari ḡeragarini tarimari na asi ḡeura-viniato ma ḡefitoḡaiato forena tu duḡu forenai eiaḡoto.’

<sup>18</sup> Deikara mo fore iatanai beketokauni tarimana beḡwa-kirakiraiani; ema mai fore tarima ta iatanai beketokauni nai, belau-fatafataiani.”

*Kaisara, Roma ḡeri vere, ḡena takesi moniri*

*Mataio 22:15-22; Mareko 12:13-17*

<sup>19</sup> Taravatu ḡevevaḡa-riba iaḡiato-ḡoi tarimari e Rubu Veaḡa vereri baregori na Iesu inimoḡo beḡene ḡabia dabarana ḡevetauato-ḡoi, korana ḡia ribari, Iesu na mai barabore tu ḡia iatari ai ekiraḡirito-ḡoi nai. Senaḡi tarimarima ḡutuma vegogo-taḡo naima ḡegarito. <sup>20</sup> Moḡa lorinai ḡeḡita-taḡoato moḡo. Gabivau ḡofaḡofa tarimari ḡetuḡurito, ḡia na beḡene danaḡia noḡa vei-iobukaiobuka tarimari kavana; beḡene danaḡia, bema Iesu ḡena guruḡa beiaḡo-irauni nai, Iesu beḡene ḡabia, Roma gavanana ḡimana seḡukanai beḡene torea. <sup>21</sup> Mo ḡofaḡofa tarimari na Iesu ḡedanaḡiato, ḡekirato, “Vevaḡa-riba taumu o, ḡai ribama, ḡemu guruḡa e ḡemu vevaḡa-riba tu maoromaoro. Tarimarima ḡeri dagi asi otuḡamaḡirini, senaḡi ḡoi na Barau ḡena dabara ovevaḡa-riba-iaḡi ḡitakauani ma moḡonimu ḡesi. <sup>22</sup> Nokirama, Kaisara, Roma ḡeri vere, takesi moniri bitana vinia tu namo ba asiḡi?” <sup>23</sup> Iesu na ḡeri ḡofaḡofa varau eḡitaiato, benamo ekirarito, ekirato, <sup>24</sup> “Silva monina ta ḡovaḡa-ḡitagu! Mai tu dei iouiouna e dei arana?” Ḳia ḡevaḡa-veseto, ḡekirato, “Mai tu Kaisara laulauna e arana,” ḡetato. <sup>25</sup> Benamo Iesu na ekirarito, “Kaisara ḡena, Kaisara boḡono vinia, Barau ḡena, Barau boḡono vinia.”

<sup>26</sup> Iesu ḡena guruḡa tarimarima ḡoirari ai tu maoro nai, asi ḡeri dabara ḡia beḡe ḡofa-darereani, senaḡi ḡena vevaḡa-vese na nuḡari ḡefarevaḡito, asi ma ḡeguruḡato.

*Variḡisi-ḡenoḡoi guruḡari*

*Mataio 22:23-33; Mareko 12:18-27*

<sup>27</sup> Sadukea tarimari kota Iesu ḡenai ḡeiaḡoto. Ḳeri tuḡamaḡi tu, mase tarimari asi ma beḡe variḡisi-ḡenoḡoini. Iesu ḡedanaḡiato, ḡekirato, <sup>28</sup> “Vevaḡa-riba taumu o, Mose na taravatu ḡai ḡema maiḡesi etoreato, ‘Bema tau ta kakana bemaseni, ma vabuna tu roḡo maḡuri, senaḡi asi naturi nai tu, mo tau na kakana vabuna bene ḡaraḡoa. Korana tu ḡia na naturi tari beḡene vaḡa-maḡuriri mo mase tauna ḡena.’ <sup>29</sup> Tarikaka tau moḡo korina

mabarari tu imaima ruarua (7). Tau guinena na vavine ta eḡaraḡoato, ma emaseto, natuna ta asi evaḡa-ḡoraiato. <sup>30</sup> Tau vaḡa-ruaruana na vabu ma eḡaraḡoato, <sup>31</sup> tau vaḡa-toitoina maki moḡesina moḡo. Moḡa nuḡanai ḡia mabarari tu imaima ruarua (7), senaḡi mabarari ḡemaseto, naturi ta asi ḡevaḡa-ḡoraiato. <sup>32</sup> Dokonai mo vavine maki emaseto. <sup>33</sup> Variḡisi-ḡenoḡoi ḡaronai mo vavine tu dei ḡaraḡona, korana ḡia tu tau imaima ruarua (7) na ḡeḡaraḡoato nai?”

<sup>34</sup> Iesu na evaḡa-veserito, ekirato, “Mai tanobarai tau e vavine ḡeveḡaraḡoni, <sup>35</sup> senaḡi roḡo beiaḡomani Basileianai, vei-iobukaiobuka tarimari beḡe variḡisi-ḡenoḡoini. ḡia tu asi beḡe veḡaraḡoni. <sup>36</sup> ḡia asi beḡe maseni maki, senaḡi aneru kavana beḡe tanuni. Barau natunai beḡe iaḡoni, korana ḡia tu variḡisi-ḡenoḡoi tarimari. <sup>37</sup> Mose na evaḡa-moḡoniato, mase na ma beḡe variḡisi-ḡenoḡoini. ḡau eḡaraiato-ḡoi varina nuḡanai, Mose na Vereḡauka tu ‘Aberahamo ḡena Barau, Isako ḡena Barau, Iakobo ḡena Barau’ ekiraḡiato. <sup>38</sup> Moḡoni, ḡia tu maḡuri tarimari ḡeri Barau, dia mase tarimari ḡeri Barau. Korana Barau ḡenai tu, tarimarima mabarari tu maḡuri.”

<sup>39</sup> Taravatu ḡevevaḡa-riba iaḡiato-ḡoi tarimari kota ḡekirato, “Vevaḡa-riba taumu o, vevaḡa-vese namona tu maniḡa.” <sup>40</sup> Benamo moḡa murina na asi ma ḡedanaḡi-ḡenoḡoiato, ḡegarito nai.

*Keriso tu Davida natuna ba Davida ḡena Vereḡauka?*

*Mataio 22:41-46; Mareko 12:35-37*

<sup>41</sup> Iesu na ekirarito, ekirato, “ḡia tu kamasi nai Keriso tu Davida natuna ḡetoni?”

<sup>42</sup> Davida tu Salamo nuḡanai ekirato,

‘Barau na ḡegu Vereḡauka ekiraiato:

Au ḡimagu aroribana rekenai bono tanu,

<sup>43</sup> bene iaḡo mo, ḡoi ḡebaru-vinimuni tarimari ḡoi kwakumu gaburenai batorerini.’

<sup>44</sup> Davida na Keriso tu ‘Vereḡauka’ etato. Kamasi nai Keriso tu Davida natuna?”

*Taravatu ḡevevaḡa-riba iaḡiato-ḡoi tarimari ḡeri ḡofaḡofa*

*Mataio 23:1-36; Mareko 12:38-40; Luka 11:37-54*

<sup>45</sup> Tarimarima mabarari ḡoirari ai Iesu na ḡena mero ekirarito, ekirato, <sup>46</sup> “Taravatu ḡevevaḡa-riba iaḡiani tarimari ḡerina lorimi boḡono vetore. ḡia ḡeurani dabuḡa maukari beḡene riḡo, maketi gaburi ai beḡene rakaorakao, tarimarima na beḡene vaḡa-namori urari ai. Rubu nuḡari ai ema ḡani-vegogo gaburi ai ḡeri ura tanutanu namori ai beḡene tanu. <sup>47</sup> ḡia na vabu ḡeri numa ma farefare ḡevaḡa-koririni. ḡeri ḡauḡau tu mauka kenene, senaḡi ḡeḡofaḡofani. Moḡesi ḡeveini tarimari meto barego vedaurea beḡe ḡabini.”

## 21

*Vabu ḡena boubou monina*

<sup>1</sup> Iesu eboḡe-vaisito nai, moni vovoka tarimari ḡeri boubou moni mauḡai ḡeḡurato-ḡoi eḡitarito. <sup>2</sup> Asi-ḡena ema asi-ḡana vabuna ta eiaḡomato, eḡitaiato, ḡena moni misiri ruarua moḡo eḡura-riḡorito, (mai tu noḡa moḡo toea sebona kavana). <sup>3</sup> Benamo Iesu ekirato, “Moḡoni, au na akiramini, mai vabu na beḡuraia monina tu mabarari ḡeri vini bevanaḡiri. <sup>4</sup> Korana mabarari ḡeri moni vovoka ḡerina koturi moḡo beḡe vini, senaḡi mai vabu tu ḡena moni misina ḡenana moḡo, ḡena maḡuri ai bere vevaḡa-kava-iaḡiri dagarari mabarari beḡurari.”

*Iesu na vau beḡea ḡorani dagarari ekiraḡirito*

*Mataio 24:1-14; Mareko 13:1-13*

<sup>5</sup> Iesu ḡena mero kota na Rubu Veaḡa ḡeguruḡa-iaḡiato, ḡitaḡitana ma marevana, ma ḡena fore namori ḡesi ema Barau ḡevarevare-viniato varevare dagarari namori na ḡevaḡa-veraiato, ḡetato. Senaḡi Iesu ekirato, <sup>6</sup> “ḡarona beraḡasini, mainai ḡoḡitarini

dagarari mabarari tarima tari na beḡe vare bubu-riḡorini, fore ta fore ta iatanai asi beḡe tanuni.”

<sup>7</sup> Benamo Iesu ḡedanaḡiato, ḡekirato, “Vevaḡa-riba taumu, aitoma beḡorani? Ema beḡorani nai, kamara vetoḡa na bevaḡa-moḡoniani?” <sup>8</sup> Iesu evaḡa-veseto, ekirato, “Ḡomi lorimi boḡono vetore, beḡe ḡofamini ḡesi. Korana tu tarimarima ḡutuma au aragu ai beḡe iaḡomani, beḡe kirani, “Tarimana tu au maiḡegu!” ema, ‘Ḡarona beraḡasi!’ beḡe toni. Senaḡi ḡia muriri ai asi boḡono raka. <sup>9</sup> Bema ḡomi na vetari o tuari gururi e gururaḡe boḡo seḡaḡirini nai, nuḡami asi beḡene raḡe. Mai dagara beḡe ḡora-guineni, senaḡi dokona asi roḡo beraḡasini.”

<sup>10</sup> Iesu ma ekirato, “Tanobara ta tanobara ta ḡesi beḡe vevaḡini, gavamani ta gavamani ta ḡesi beḡe vetarini. <sup>11</sup> Gabu ḡutuma nuḡari ai tano beḡe iagaiagani, doḡe beḡe ḡorani, ema tarimarima ḡutuma keve beḡe doḡarini ta ḡenana bevanaḡini ta ḡenai. Vevaḡa-gari vetoḡari baregori guba na beḡe foforini.

<sup>12</sup> Senaḡi mo dagara roḡosi beḡene ḡora nai, ḡia na ḡomi beḡe ḡabimini, beḡe vaḡa-midigumini. Rubu ai beḡe vaḡa-kotamini, dibura numari ai beḡe tore-toḡamini. Kini e gavana ḡoirari ai beḡe ḡori-iaḡomini, korana au ḡoḡabi-raḡeguni nai. <sup>13</sup> Mai tu ḡomi ḡemi nega namona au vaḡa-moḡonigu ai boḡo iaḡoni. <sup>14</sup> Boḡono vetuḡamaḡi, ḡemi vevaḡa-vese guruḡari asi boḡono tuḡamaḡi-guine guineri, <sup>15</sup> korana tu au na guruḡa e iaunega bavinimini, beḡe baru-vinimini tarimari na beḡe kira-ḡoimini, senaḡi asi beḡe kokoreni.

<sup>16</sup> Tamami, sinami, kakami, tarimi, garagarami, e ḡatami na tarimarima ḡimari ai beḡe revamini. Ḡomi kota maki beḡe vaḡi-masemini. <sup>17</sup> Tarimarima mabarari na beḡe iau-rakavamini, korana au ḡoḡabi-raḡeguni nai. <sup>18</sup> Senaḡi debami ḡuiri sebona maki asi berekwa-rekwani. <sup>19</sup> Boḡo vevaḡa-gwaḡiḡini nai tu, boḡo maḡurini.”

*Ierusalem* beḡe vaḡa-rakavaiani

*Mataio 24:15-21; Mareko 13:14-19*

<sup>20</sup> “Vetari o tuari doḡorori na Ierusalem beḡe tanu-ḡeḡeraḡiani boḡo ḡitaiani, benamo boḡo ribani, Ierusalem dori ḡevaḡa-rakavaiani. <sup>21</sup> Mo negai Iudeai ḡetanuni tarimari tu ḡoro ḡana beḡene raga-iaḡo. Vanuḡa barana Ierusalem nuḡanai ḡetanuni tarimari tu, vanuḡa beḡene raga-kwanea, ema gunikai ḡetanuni tarimari tu vanuḡa barana nuḡanai asi beḡene raka-toḡa. <sup>22</sup> Korana mo negai tu Barau na tarimarima ḡeri rakava voiri bevinirini Buka Vevaḡai ḡetore-guineato vaḡa-moḡoniri. <sup>23</sup> Vavine ma baniri e ḡabi-variḡu vavineri kika ma vetuḡari! Midigu barego mai tano ai beḡe raḡasini, ema Barau na ḡena bese tarimari bevaḡa-maoro vinirini. <sup>24</sup> Tarima kota tu vetari baḡari na beḡe vaḡi-maserini, kota tu beḡe ḡabi-maḡuririni, tanobara mabarari ḡana beḡe ḡori-iaḡorini, beḡea diburarini; ema irau bese tarimari na Ierusalem beḡe fana-tariani, beiaḡoni mo, ḡeri ḡaro bea korini.”

*Tarimarima Natuna* ḡena iaḡoma

*Mataio 24:29-31; Mareko 13:24-27*

<sup>25</sup> “Ḡaro, ḡue, ema visiḡu nuḡari ai vetoḡa beḡe ḡorani. Tanobara beseri davara ema ureure gururi ai beḡe gari-rakavani. <sup>26</sup> Tarimarima beḡe keto-founi gari dainai, ḡeri tuḡamaḡi maki roḡo beḡe korini mo beḡe ḡorani dagarari dairi ai; korana tu guba seḡukari beḡe iagaiagani. <sup>27</sup> Mo negai Tarimarima Natuna beḡe ḡitaiani, magube nuḡana na beiaḡomani ma seḡukana e ma mamana baregona ḡesi. <sup>28</sup> Mo dagara beḡe ḡorani nai, boḡono variḡisi, boḡono boḡe-vaisi, korana vaḡa-maḡurimi tu varau bekavinaḡi.”

*Barabore - Vevaḡa-riba* figi ḡauna ḡenana

*Mataio 24:32-35; Mareko 13:28-31*

<sup>29</sup> Iesu na ḡeri barabore ta ekiraḡiato, ekirato, “Figi ḡauna ema ḡau mabarari ḡoḡitari. <sup>30</sup> Lauri variḡuri ḡefafani ḡoḡitarini, ḡomi ḡoribani, ḡaro ḡena tora taimina varau bekavinaḡi. <sup>31</sup> Moḡa ilailanai, ḡomi maki bema boḡo ḡitarini, mai dagara beḡe ḡorani nai, boḡo ribani, Barau ḡena Basileia tu bekavinaḡi.

<sup>32</sup> Moḡoni akiramini, mai ḡuru asi bekorini, beiaḡoni mo, mai dagara mabarari beḡe ḡorani. <sup>33</sup> Guba e tanobara beḡe rekwa-rekwani, senaḡi au ḡegu guruḡa tu asi beḡe rekwarekwani, beḡe tanu-vanaḡi vanaḡini.”

*Boḡono venari*

<sup>34</sup> “Lorimi boḡono vetore, ḡaniḡani e niuniu ḡutuma, ema tanobara ḡena tuḡamaḡi dagarari na ḡomi nuḡami beḡe vaḡa-metorini ḡesi. Benamo mo ḡaro na nuḡami bevaḡa-farevaḡirini. <sup>35</sup> Korana mo ḡaro tu tanobarai ḡetanuni tarimari mabarari ḡeri ai beraḡasini. <sup>36</sup> Moḡa lorinai boḡono venari, boḡono ḡauḡau ḡaro mabarari ai, beḡe ḡorani dagarari mabarari ḡerina boḡono raga-maḡuri ḡana, korana Tarimarima Natuna ḡoiranai roḡo boḡo ruḡani.”

<sup>37</sup> Ḳaro mabarari ai Iesu tu Rubu Veaḡai evevaḡa-ribato-ḡoi, a lavilavi ai tu erakarasito-ḡoi, Olive Ḳorona tuḡunai ea genato-ḡoi. <sup>38</sup> Boḡiboḡi iamoiamonai tarimarima mabarari Rubu Veaḡai ḡevegogoto-ḡoi ḡia ḡena guruḡa beḡene seḡaḡia ḡana.

## 22

*Iesu beḡene vaḡia dabarana ḡevetauato*

<sup>1</sup> Asi etubuni faraona verekona arana Pasova varau ekavi-naḡito. (Mo tu Iuda tarimari mase aneruna na evanaḡirito moḡo, asi evaḡirito verekona). <sup>2</sup> Rubu Veaḡa vereri baregori ema taravatu ḡevevaḡa-riba iaḡiato-ḡoi tarimari na Iesu beḡene ḡabia, benamo beḡene vaḡi-ḡairia dabarana ḡevetauato, korana tarimarima gariri ḡeveito.

*Iudas na Iesu erevaiato*

*Mataio 26:14-16; Mareko 14:10-11*

<sup>3</sup> Mo negai Satani na Iudas Isakariota, tarima ta gabanana ruarua (12) fakari ai, eborogiato. <sup>4</sup> Benamo Iudas eiaḡoto Rubu Veaḡa vereri baregori ema Rubu Veaḡa narinarina tarimari ḡeri vere ḡeri ai, Iesu tu ḡia ḡimari ai kaması bene tore-kaua dabarana ḡeboioḡa-vegogoato. <sup>5</sup> Ḳia ḡeiaku-rakavato, ḡekira-toreato, moni beḡe viniani, ḡetato. <sup>6</sup> Iudas na eḡabi-raḡeato, benamo Iesu ḡia ḡimari ai vekuretoḡai betore-kauani dabarana evetauato-ḡoi.

*Ginitaḡo mamoea ḡerovina-toreato*

*Mataio 26:17-25; Mareko 14:12-21*

<sup>7</sup> Ginitaḡo mamoeeri beḡe vaḡirini ḡarona varau eraḡasito. <sup>8</sup> Benamo Iesu na Petero ma Ioane etuḡurito, ekirato, “Ḳoiaḡo, Pasova verekona boḡono dabaraia, bitana ḡania.” <sup>9</sup> Ḳevaḡa-veseto, ḡekirato, “Ḳai tu ainai baḡana dabara-torea?” <sup>10</sup> Benamo Iesu na ekirarito, ekirato, “Vanuḡa baregonai boḡo raka-toḡani nai, tarima ta nanu gwaḡutuna befaḡaiani boḡo ḡoitaḡoani. Murina na boḡono iaḡo, ḡia beraḡekauni numanai boḡono raḡekau. <sup>11</sup> Benamo numa tarimana boḡono vaḡa-guruḡaia, boḡono kira, “Vevaḡa-riba tauna ekirani, ‘Varivari daiḡutuna tu aiḡa, au ema ḡegu mero ḡesi monai ginitaḡo mamoea baḡana ḡania?’ <sup>12</sup> Benamo ḡia na daiḡutu baregona ta numa tuḡunai bevaḡa-ḡitamini, ḡeiareva-toreato. Monai boḡono dabara-torea.” <sup>13</sup> Benamo ḡeiaḡoto, Iesu na ekiraḡirito kavana ḡedoḡaririto. Monai vereko ḡedabaraiaato.

*Ḳani-vegogo veaḡana*

*Mataio 16:26-30; Mareko 14:22-26; 1 Korinto 11:23-25*

<sup>14</sup> Ginitaḡo mamoea beḡe ḡaniani aoana eraḡasito. Iesu tu ḡena apostolo tarimari ḡesi ḡaniḡani gabunai ḡetanu-tarito. <sup>15</sup> Benamo Iesu na evaḡa-guruḡarito, ekirato, “Au ḡegu ura baregona mai ginitaḡo mamoea ḡomi ḡesi bitana ḡani-vegogo-guinea vau, midigu bana ḡani. <sup>16</sup> Korana tu akiramini, ginitaḡo mamoea asi ma baḡaniani, beiaḡoni mo, ginitaḡo anina korikorina bea foforini Barau ḡena Basileia nuḡanai.”

<sup>17</sup> Benamo Iesu na kapusi ta eḡabiato, evaḡa-namoato, ekirato, “Maiḡa tu ḡoḡabia, mabarami boḡono niua. <sup>18</sup> Korana tu akiramini, vine nanuna asi ma banıu-ḡenoḡoiani, beiaḡoni mo, Barau ḡena Basileia beiaḡomani vau.”



<sup>19</sup> Benamo Iesu na beredi eḡabiato, evaḡa-namoato, ebuki-ḡutuato, evinirito, ekirato, “Mai tu au tauḡanigu, ḡomi avinimini; maiḡa boḡono veia, au vetuḡamaḡi-iaḡigu ḡana.”

<sup>20</sup> Ḣeḡani-ḡosito vau, kapusi ma eḡabiato, ekirato, “Mai kapusi tu Ginitaḡo Variḡuna, au raragu na bevaḡa-moḡoniani, bebebubuni ḡomi vaḡa-maḡurimi ḡana. <sup>21</sup> Senaḡi au berevaguni tarimana tu mainai au ḡesi taḡani-vegogoni! <sup>22</sup> Moḡoni, Tarimarima Natuna bemaseni, Barau na ekiraḡi-guineato ilailanai, senaḡi berevaiani tarimana vetuḡana kekei!” <sup>23</sup> Benamo tauḡeri ḡevedanaḡi-vedanaḡito, ḡia deikara na moḡesi beveiani.

*Deikara tu barego vedaurea*

*Mataio 20:25-28; Mareko 10:42-45*

<sup>24</sup> Benamo Iesu ḡena mero tauḡeri ḡeveḡare-veḡareto, deikara ḡia fakari ai barego lel-evaḡi. <sup>25</sup> Iesu na evaḡa-guruḡarito, ekirato, “Irau bese tarimari ḡeri vere na tarimarima ḡedori-naḡinaḡirini, ema veguine-iaḡi tarimari baregori na ḡeri maoro seḡukari na ḡelaunaḡi-naḡirini, ema tarimarima na beḡene vevato-iaḡiri ḡetoni. <sup>26</sup> Senaḡi ḡomi tu dia moḡesina. Ḣomi fakami ai tau guinena tu tau muriseinai bene iaḡo, ema vere tauna tu vetuḡunaḡi taunai bene iaḡo. <sup>27</sup> Dei tu barego, ḡaniḡani gabunai etanu-taḡoni tarimana ba vetuḡunaḡi tarimana? Ḣaniḡani gabunai etanu-taḡoni tarimana, ene? Senaḡi au tu ḡomi fakami ai vetuḡunaḡi tarimana noḡa.

<sup>28</sup> Ḣomi tu au ḡeribaḡaniguto-ḡoi nai, ḡotanu-gwaḡiḡito-ḡoi tarimami. <sup>29</sup> Moḡa lorinai au Tamagu na maoro eviniguto, Basileia ta au ḡegu ekiraḡiatao ilailanai, au maki Basileia ta ḡomi ḡemi akiraḡiani. <sup>30</sup> Benamo ḡomi maki au ḡegu Basileiai bita ḡaniḡani-vegogoni e bita niuniu-vegogoni, ema ḡomi teronai o vere seari ai boḡo tanuni, Isaraela beseri gabanana ruarua (12) boḡo vaḡa-maoro vinirini.”

*Iesu na Petero ḡena vekira-ḡuniḡau ekiraḡi-toreato*

*Mataio 26:31-35; Mareko 14:27-31; Ioane 13:36-38*

<sup>31</sup> “Simona, Simona o, noseḡaḡi! Au na akiramini, Barau na Satani maoro eviniato, ḡomi bene ribaḡanimi, namo e rakava bene tore-kirari ḡana, noḡa iaraḡa tarimana na widi ema momo etore-kirarini kavana. <sup>32</sup> Senaḡi au na ḡemu varau aḡuriḡurito, ḡemu veḡabidadama asi bene keto ḡana. Benamo ma bovetuḡamaḡi-ḡenoḡoini au ḡegu ai nai, tarikakamu bono vaḡa-kokoreri.”

<sup>33</sup> Petero evaḡa-veseto, ekirato, “Vereḡauka, au tu ḡoi ḡesi dibura numai beḡe torerani ema bita mase-vegogoni!” <sup>34</sup> Iesu ekirato, “Petero, au na akiramuni, toma kokoroku asi begoḡini, beiaḡoni mo, ḡoi na au vaḡa-toitoi bokira-ḡuniḡauguni, bokirani, ‘Au tu asi ribagu ḡia,’ botoni.”

*Nega rakavana*

<sup>35</sup> Iesu na ḡena mero evaḡa-guruḡarito, ekirato, “Au na ḡomi atuḡumito nai, asi ḡemi fusefuse, dura, o tamaka. Ḣomi dagara tai ḡorabuto ba? Ḣia ḡevaḡa-veseto, ḡekirato, “Asiḡina!”

<sup>36</sup> Iesu na ma evaḡa-guruḡarito, ekirato, “Senaḡi toma ḡomi deikara ma ḡena fusefuse ema dura, bene ḡabiri; ema deikara asi ḡena vetari baḡana, ḡena koudi bene voivoi-iaḡia, benamo ta ma bene voia. <sup>37</sup> Korana au na akiramini, Buka Veaḡa nuḡanai ekirani, ‘Seḡafore tarimari ḡesi beḡe iavi-vegogoani.’ Mo guruḡa au ḡegu ai bemoḡonini.”

<sup>38</sup> Iesu ḡena mero ḡevaḡa-veseto, ḡekirato, “Noḡitaia, Vereḡauka, vetari baḡari ruarua maiḡeri.” Iesu evaḡa-veseto, ekirato, “Benamo!”

*Iesu eḡuriḡurito Getesemane ai*

*Mataio 26:36-46; Mareko 14:32-42*

<sup>39</sup> Benamo Iesu tu vanuḡa barana eraga-kwaneato, Olive Ḣorona ḡana eiaḡoto eveito-ḡoi kavana. Ḣena mero ḡia murinai ḡerakato. <sup>40</sup> Monai ḡeraḡasito, benamo Iesu na evaḡa-guruḡarito, ekirato, “Boḡono ḡauḡau, be veribaḡani ai asi boḡono moira.”

<sup>41</sup> Benamo ḡereḡana eraka-ḡerevaḡito, fore tafiurini ḡea keto-tarini ḡena manaḡa ilailanai, benamo evetui-tarito, eḡuriḡurito. <sup>42</sup> Ekirato, “Tamagu o, bema nuḡamu ilaila

nai, mai midigu bedina au ġeguna noma ġabi-vaġia; senaġi dia au ġegu ura, ġoi ġemu ura moġo.”

[<sup>43</sup> Benamo aneru ta guba na emariġoto, Iesu kokore eviniato. <sup>44</sup> Midigu barana na ġia nuġana evaġa-vonuato, benamo eġauġauto ma nuġana mabarana ġesi, eiaġoto mo, seġurina tano ai eriġoto rara kabudona noġa.] <sup>45</sup> Eġauġau-ġosito vau, evariġisito, ġena mero ġeri ai eġenoġoi-iaġoto, genari ai eġoitaġorito, dabarari ġedokoto nai. <sup>46</sup> Benamo ġia na evaġa-guruġarito, ekirato, “Karase nai ġomi ġogenani? Ġovariġisi, ġoġuriġuri, be veribaġani ai asi boġono moira.”

*Iesu tuari tarimari na ġeġabi-tariato*

*Mataio 26:47-56; Mareko 14:43-50; Ioane 18:3-11*

<sup>47</sup> Iesu roġo mo eguruġato-ġoi nuġanai, tarimarima ġutuma ġeraġasito, Iudas, mero ta gabanana ruarua (12) fakari ai, ġia na eġori-kaurito. Iesu eiaġo-viniato bene veraua ġana. <sup>48</sup> Senaġi Iesu na ekiraiato, ekirato, “Iudas o, Tarimarima Natuna verau na borevaiani ba?”

<sup>49</sup> Iesu sevinai ġeruġa-taġoto merori na ġeġitaiato kara beġorani, benamo ġedanaġiato, ġekirato, “Vetari baġana na baġana basiri ba?” <sup>50</sup> Benamo ġia ta na Rubu Veaġa verena baregona ġena vetuġunaġi tarimana vetari baġana na eiaġo-viniato, benamo seġana aroribana ebasi-vaġiato. <sup>51</sup> Senaġi Iesu ekirato, “Benamo, ġovaġa-dokoa!” Mo tarima seġana eġabi-karaiato, evaġa-namoato.

<sup>52</sup> Benamo Iesu ġabiġabina ġeiaġomato tarimari, Rubu Veaġa vereri baregori e Rubu Veaġa ġitaġauna tarimari ġeri baregona ema Iuda vereri ġia na evaġa-guruġarito, ekirato, “Ġomi boġo iaġoma ma ġemi vetari baġari e ma ġemi fato ġesi, noġa moġo seġafore tarimana ta ġabiġabina ġoro iaġoma kavana? <sup>53</sup> Ġaro mabarari ai au tu ġomi sevimi ai Rubu Veaġa nuġanai, senaġi asi ġoġabi-tariguto. Mai tu ġomi ġemi nega, mukuna (o Satani) ġena seġuka negana.”

*Petero na Iesu ekira-ġuniġauato*

*Mataio 26:57-58; 26:69-75; Mareko 14:53-54; 14:66-72; Ioane 18:12-18; 18:25-27*

<sup>54</sup> Benamo ġia na Iesu ġeġabi-tariato, Rubu Veaġa verena baregona ġena numa ġana ġeġori-iaġoato. Petero maki ġia murinai erakato, senaġi ma fakana. <sup>55</sup> Numa maġuna nuġanai tarima kota na karava ġevaġa-ġaraiato, benamo ġetanu-ġeġeraġiato. Petero maki ġia seviri ai etanu-tarito. <sup>56</sup> Benamo vetuġunaġi ġuiatona ta na karava mamanai eġitaiato, eġita-karakaraiato, ekirarito, ekirato, “Mai tarima maki Iesu ekavaiato-ġoi!”

<sup>57</sup> Senaġi ġia evekira-ġuniġauto, ekirato, “Ġoi vavine, au tu asi ribagu ġia!”

<sup>58</sup> Nega kotuna evanaġito nuġanai, tarima ta na Petero eġitaiato, ekiraiato, “Ġoi maki ġia karori ta!” Senaġi Petero evaġa-veseto, ekirato, “Ġoi tau, au tu asiġi!” <sup>59</sup> Aoa ta evanaġito vau, tarima ta ma eguruġato ma nuġana mabarana ġesi, ekirato, “Moġoni, ġia maki Iesu ġesi tarimana ta, korana ġia maki Galilea tauna!” <sup>60</sup> Senaġi Petero evaġa-veseto, ekirato, “Ġoi tau, au asi ribagu ġoi kara okiraġiani!” Ġia roġo mo eguruġato-ġoi nuġanai, kokoroku egoġito.

<sup>61</sup> Benamo Vereġauka eruġa-kureto, ġia na Petero eġitaiato nai, Vereġauka ġena guruġa etuġamaġi-doġariato, ekiraiato, “Toma kokoroku asi begoġini, beiaġoni mo, ġoi na au vaġa-toitoi bokira-ġuniġauguni.” <sup>62</sup> Benamo Petero eraka-rosito, etaġi-rakava rakavato.

*Iesu ġevaseva-vaseva iaġiato*

*Mataio 26:67-68; Mareko 14:65*

<sup>63</sup> Iesu ġenariġauato tarimari na ġevaseva vaseva-iaġiato e ġekwariato. <sup>64</sup> Matana ġekumu-ġauato, ġekiraiato, ġekirato, “Ġoi tu peroveta tarimana, be nokiraġia, dei na bekwarimu?” <sup>65</sup> Guruġa rakavari ġutuma ġia ġeviniato.

*Iesu kanisoro tarimari ġoirari ai*

*Mataio 26:59-66; Mareko 14:55-64; Ioane 18:19-24*

<sup>66</sup> Elaḡanito, Iuda vereri, e Rubu Veaḡa vereri baregori, ema taravatu ḡevevaḡa-riba iaḡiato-ḡoi tarimari ḡeraka-vegogoto. Iesu ḡeḡori-iaḡoato Iuda kanisoro tarimari ḡoirari ai. <sup>67</sup> Benamo ḡekiraiato, ḡekirato, “Nokira-varama, ḡoi tu Keriso, (Barau na ekiraḡi-toreato vevaḡa-maḡuri tauna), ba?” Iesu na evaḡa-veserito, ekirato, “Bema au na bakiramini, ḡomi na asi boḡo vaḡa-moḡoniguni, <sup>68</sup> ema bema vedanaḡi ta baviniḡini, asi boḡo vaḡa-veseguni. <sup>69</sup> Senaḡi toma beiaḡoni mo ḡoira laḡaniri ai, Tarimarima Natuna tu Seḡuka Barauna ḡimana aroribanai betanu-taḡoni.”

<sup>70</sup> Benamo mabarari ḡekirato, “Be, ḡoi tu Barau Natuna otoni?” ḡia evaḡa-veseto, ekirato, “ḡomi na ḡokiraḡiani maniḡa.” <sup>71</sup> ḡia ḡekirato, “Karase vevaḡa-moḡoni tarimari tari roḡo tavetaurini? ḡia tauḡena muruna na bekiraḡia bita seḡaḡia.”

## 23

### *Iesu Pilato ḡoiranai*

*Mareko 15:1-5; Ioane 18:28-38*

<sup>1</sup> Benamo vegogo tarimari mabarari ḡevariḡisito, Iesu ḡeḡori-iaḡoato gavana Pilato ḡenai. <sup>2</sup> Monai ḡeḡofaḡofa-iaḡiato, ḡekirato, “Mai tarima maiḡa baḡa doḡaria, ḡai ḡema bese tarimari eḡorikau-kerererini, ekirani, Kaisara, Roma ḡeri vere, ḡena takesi moniri asi beḡene vinia etoni, ema tauḡena evekiraḡini, ḡia tu Keriso, Barau na ekiraḡi-toreato verena o kinina.”

<sup>3</sup> Benamo Pilato na edanaḡiato, ekirato, “ḡoi tu Iuda tarimari ḡeri vere ba?” Iesu evaḡa-veseto, ekirato, “Oi, okiraḡiani maniḡa.” <sup>4</sup> Benamo Pilato na Rubu Veaḡa vereri baregori e tarimarima ḡutuma ekirato, ekirato, “Kerere ta asi badoḡaria mai tarima ḡenai.” <sup>5</sup> Senaḡi mo tarimarima roḡo ḡeḡiḡiraḡeto, ḡekirato, “ḡia ḡena vevaḡa-riba guruḡari na Iudea tarimari mabarari nuḡari evei-veḡonurini. Galileai esinaiato mo beiaḡoma mai gabu ai.”

### *Iesu Heroda ḡoiranai*

<sup>6</sup> Mo guruḡa eseḡaḡiato nai, Pilato evedanaḡito, ekirato, “Mai tarima tu Galilea tarimana ba?” <sup>7</sup> Benamo Pilato eribato, Iesu tu Heroda ḡena seḡuka gaburenai nai, Iesu Heroda ḡenai ḡetuḡu-iaḡoato. ḡia maki Ierusalemāi mo ḡaro ai. <sup>8</sup> Heroda eiakurakavato Iesu eḡitaia nai, korana Heroda na Iesu varina eseḡaḡiato, ema kai-veḡata evaḡa-nogato Iesu bene ḡitaia ḡana. ḡia eurato Iesu na nuḡa-farevaḡi veiḡari kota bene veiri bene ḡitari. <sup>9</sup> Moḡa lorinai vedanaḡi ḡutuma Iesu edanaḡiato, senaḡi ḡia asi evaḡa-veseto. <sup>10</sup> Rubu Veaḡa vereri baregori ema taravatu ḡevevaḡa-riba iaḡiato-ḡoi tarimari monai ḡeruḡa-taḡoto-ḡoi, Iesu ḡeḡofaḡofa-iaḡi lelevaḡiato-ḡoi. <sup>11</sup> Heroda ema ḡena vetari tarimari o soldia na Iesu ḡerikiriki-iaḡiato-ḡoi, ḡevei-veḡare veḡareato, ema dabuḡa namona ta ḡevaḡa-dabuḡa-iaḡiato, benamo ma ḡetuḡu-ḡenoḡoato Pilato ḡenai. <sup>12</sup> Pilato ema Heroda ḡevebaru-vevinito-ḡoi, senaḡi mo ḡaro ai ḡeveḡata-ḡenoḡoito.

### *Iesu vaḡa-ruaruana Pilato ḡoiranai*

*Mataio 27:15-26; Mareko 15:6-15; Ioane 18:38-19:16*

<sup>13</sup> Pilato na Rubu Veaḡa vereri baregori, e Iuda vereri, ema tarimarima mabarari ekeavegogorito, <sup>14</sup> ekirato, ekirato, “ḡomi na mai tarima boḡo ḡori-iaḡomaia au ḡegu ai, ḡokirani, ḡia na tarimarima eḡorikau-kerererini ḡotoni. Toma au na ḡomi ḡoirami ai ḡemi guruḡa bavetauri, senaḡi kerere ta asi badoḡaria. <sup>15</sup> Heroda maki kerere ta asi edoḡariato ḡia ḡenai nai, ma betuḡu-ḡenoḡoi iaḡomaia ḡita ḡerai. ḡomi na ḡoḡitaiani, ḡia tu rakava ta asi eveiato bene mase ḡana. <sup>16</sup> Moḡa lorinai au na mai akwariani vau baruḡaiani.” [ <sup>17</sup> Vanaḡivanaḡi eveini kavana Pilato na Pasova verekona ḡaronai dibura numai etanuni tarimana ta beruḡaiani.]

<sup>18</sup> Senaḡi tarimarima mabarari ḡekoḡo-vegogoto, ḡekirato, “Bono vaḡia! Barabas noruḡaia, novinima!” <sup>19</sup> Barabas tu dibura numai ḡekou-ḡauato, korana vanuḡa barana nuḡanai ḡevevaḡito ema tarima ta ḡevaḡi-maseato nai.

<sup>20</sup> Pilato enuġa-vekwaraġito Iesu bene ruġaia, moġa lorinai tarimarima ma evaġa-guruġa ġenoġoirito, <sup>21</sup> senaġi ġia ma ġekoġo-ġenoġoi ġenoġoito-ġoi, ġekirato, “Novaġa-satauroa, novaġa-satauroa!”

<sup>22</sup> Nega vaġa-toitoina evaġa-guruġarito, ekirato, “Karase nai, kamara rakava mai tarima na eveiato? Au na rakava ta asi aġoitaġoani eveiato bene mase ġana. Moġa lorinai au na mai akwariani vau baruġaiani.”

<sup>23</sup> Senaġi ġia ġekoġoto ma nuġari mabarari ġesi, ġekirato, novaġa-satauroa; benamo dokonai ġia ġeri ura ekwalimuto. <sup>24</sup> Benamo Pilato na ġia ġeri ura eġabi-raġeato. <sup>25</sup> Mo vevaġi ema vaġivaġi dainai dibura numanai etanuto tarimana, eruġa-fitoġaiato ġeri noġinoġi ilailanai, a Iesu tu evinirito ġeri ura veiġana beġene veia.

*Iesu ġevaġa-satauroato*

*Mataio 27:32-44; Mareko 15:21-32; Ioane 19:17-27*

<sup>26</sup> Vetari tarimari na Iesu ġeġori-rosiato, benamo ġeġori-iaġoato-ġoi nai, tarima ta ġesi ġevedoġarito, Simona, Kurene tarimana, ġia tu gunika na ema raka-rosito vanuġa barana ġana eiaġoto-ġoi nai, tuari tarimari na ġeġabi-tariato, satauro ġia faġanai ġetore-kauato. Ġia na satauro efaġaiato, benamo Iesu murina na eiaġoto-ġoi.

<sup>27</sup> Tarimarima ġutuma tu Iesu murinai ġerakato. Ġia vefakari ai tari tu vavine, ġia tu Iesu taġina ġeveito-ġoi ema ġetaġi-guruġa guruġato-ġoi. <sup>28</sup> Benamo Iesu eruġa-kureto, evaġa-guruġarito, ekirato, “Ierusalem vavinemi! Au taġigu asi ġotaġi, senaġi tauġemi taġimi ema natumi taġiri ġovei. <sup>29</sup> Korana ġaro rakavari beġe iaġomani, tarimarima maiġesi beġe kirani, ‘Sinaġe gabani vavineri ema ratari asi ġerururini vavineri beġene iaku!’ <sup>30</sup> Benamo ġoro baregori beġe vaġa-guruġarini, beġe kirani, ‘Ġai iatamai ġoketokau!’ ema ġoro keiri beġe kirarini, ‘Ġai ġolautarima!’ <sup>31</sup> Bema au, ġau maġurigu, na maiġesi beġe veiguni nai tu, ġomi, ġau matuġumi, kamasi beġe veimini?”

<sup>32</sup> Seġafore tarimari ruarua maki Iesu ġesi ġeġori-rosirito ġia ġesi beġene vaġa-sataurori ġana. <sup>33</sup> Gabu ta arana “Deba Ġavana” ai ġeraġasito. Monai seġafore tarimari ġesi ġevaġa-satauroato, ta aroribana rekenai, ma ta kaurina rekenai. <sup>34</sup> Iesu ekirato, “Tamagu o, ġeri rakava bono tuġamaġi-fitoġari, korana kara ġeveiani ġia asi ribari.” Benamo laki ġerena ta ġeveiato vau, ġena dabuġa ġevarerito.

<sup>35</sup> Tarimarima ġeruġa-tarito, ġe-marereto-ġoi, ema Iuda tarima baregori na ġerikiriki-iaġiato-ġoi, ġekirato, “Ġia na tarima tari evaġa-maġuririto, a ġia tauġena tu asi bevevaġa-maġurini bema ġia Keriso, Barau na eġabi-viriġiato vevaġa-maġuri tauna.”

<sup>36</sup> Vetari tarimari na maki ġevaseva-vaseva-iaġiato, ġia ġenai ġeiaġoto, vine nanuna mamakina ġeduġi-viniato, <sup>37</sup> benamo ġekirato, “Bema ġoi Iuda tarimari ġeri vere otoni, ġoi tauġemu novevaġa-maġuri.” <sup>38</sup> Toretore ta maki ġia iatanai ġetoreato, ekirato: “MAI TU IUDA TARIMARI ĠERI VERE.”

<sup>39</sup> Seġafore tarimana ta, ġia ġesi ġevaġa-satauro vegogoato tarimana, na evaneato, ekirato, “Ġoi tu dia Keriso, (Barau na ekiraġi-toreato vevaġa-maġuri tauna)? Ġoi tauġemu novevaġa-maġuri, ġai maki novaġa-maġurima!” <sup>40</sup> Ġia karoni na ekira-ġoiato, ekirato, “Ġoi Barau garina asi ogarini? Ġoi maki bomaseni ġia ilailanai. <sup>41</sup> Dagara sebona, ġita taura ruarua tamaseni ġera rakava voiri dainai, senaġi mai tarima tu asi ġena veirakava.” <sup>42</sup> Benamo ġia na Iesu enoġiato, ekirato, “Iesu, ġemu Basileia boġabiani nai, au maki bono tuġamaġigu.” <sup>43</sup> Iesu na evaġa-veseato, ekirato, “Moġoni akiramuni, toma ġaro ai ġoi tu au ġesi paradaiso ai.”

*Iesu ġena mase*

*Mataio 27:45-56; Mareko 15:33-41; Ioane 19:28-30*

<sup>44</sup> Ġaroġota, horaġauna 12 koloko varau eġabiato, ġaro ġena seġuka ekorito, tanobara mabarana mukuna na eġabi-ġauato, eiaġoto mo, horaġauna 3 koloko. <sup>45</sup> Benamo Rubu Veaġa nuġanai veaġa lelevaġi daiġutuna kouġauna dabuġana o ketin evedare-kikimato.

<sup>46</sup> Iesu ekoġoto, ekirato, “Tamagu o, iaukagu tu ġoi ġimamu ai atoreani!” Eguruġa-ġosito vau emaseto.

<sup>47</sup> Vetari verena na mo veiḡa eḡitaiato, benamo Barau evaḡa-raḡeato, ekirato, “Moḡoni veḡata, mai tarima tu vei-iobukaiobuka tarimana!”

<sup>48</sup> Marere tarimari ḡutuma na mo veiḡa eḡorato dagarana ḡeḡitaiato, benamo kobari ḡeifarito, ḡevetuḡamaḡi-rakavato, ḡeri numa ḡana ḡeḡenoḡoito.

<sup>49</sup> Senaḡi Iesu ḡeribaiato tarimari mabarari, Galilea na ḡia murina na ḡeiaḡomato vavineri maki, manaḡai ḡeruḡato, ḡeḡorato dagarari ḡeḡitarito.

*Iesu ḡeguriato*

*Mataio 27:57-61; Mareko 15:42-47; Ioane 19:38-42*

<sup>50-51</sup> Tarima ta arana Iosefa etanuto-ḡoi Iudea vanuḡana Arimatea nuḡanai. ḡia tu varina namo tarimana ta, Barau ḡena Basileia evaḡa-nogaiaato-ḡoi. ḡia maki Iuda kanisoro tarimana, senaḡi ḡevekira-toreto veiḡana asi eḡabi-raḡeato. <sup>52</sup> Benamo Pilato ḡenai eiaḡoto, Iesu tauḡanina bene ḡabi-riḡoa etato. <sup>53</sup> Moḡa murinai Iesu tauḡanina eḡabi-riḡoato, dabuḡa kurokuroa namona na ekumuato, gara gabuna fore ḡebasiato kouḡanai etore-toḡaiato. Mo gara tu variḡuna, nuḡanai mase ta roḡosi beḡere torea. <sup>54</sup> Mo veiḡa tu Fraidei lavilavi ai eḡorato, Sabadi ḡana ḡevei-toreato-ḡoi ḡarona, Sabadi dori eraḡasito nai.

<sup>55</sup> Galilea na Iesu ḡesi ḡeiaḡomato vavineri, Iosefa murina na ḡeiaḡoto, gara kouḡana ema Iesu tauḡanina aiḡesi etore-toḡaiato ḡeḡitaiato. <sup>56</sup> Benamo ḡeḡenoḡoito Ierusalemata sitina ḡana, muramura ma bonari ema daudau muramurari ḡeḡabi-torerito.

Sabadi ai ḡeiaḡaraḡito taravatu ekirani lorinai.

## 24

*Iesu evariḡisi-ḡenoḡoito*

*Ioane 20:1-10*

<sup>1</sup> Fura ḡarona giniguenai o Sandei ai, vavine tu boḡiboḡi iamoiamonai gara ḡana ḡeiaḡoto, muramura bonari namori ḡerovina-torerito dagarari ḡeḡwa-iaḡorito.

<sup>2</sup> Gara kouḡana forena tu kure-veḡita, irau ai vetore ḡeḡitaiato. <sup>3</sup> Gara kouḡana na ḡeraka-toḡato, senaḡi Iesu Vereḡauka tauḡanina tu asi ḡedoḡariato. <sup>4</sup> ḡia roḡo mo ḡedaradarato-ḡoi nuḡanai, tau ruarua ḡia seviri ai ḡeruḡa-tarito, ḡeri dabuḡa tu kuro-ḡaroḡarori. <sup>5</sup> Vavine tu ḡegari-rakavato, tano ai ḡetutuḡu-tarito, benamo mo tarima na ḡevaḡa-guruḡarito, ḡekirato, “Karase nai maḡuri tarimana mase gabunai ḡovetauani? <sup>6</sup> ḡia tu dia mainai; mase na ma beviriḡisi-ḡenoḡoi. Galileai etanuto-ḡoi nai, evaḡa-guruḡamito guruḡana boḡono tuḡamaḡia, <sup>7</sup> ekirato, ‘Tarimarima Natuna tu rakava tarimari ḡeri ai beḡe revaiani, beḡe vaḡa-satauroani, ḡaro vaḡa-toitoinai vau ma beviriḡisi-ḡenoḡoini.’”

<sup>8</sup> Benamo vavine na mo guruḡa ḡetuḡamaḡi-doḡariato. <sup>9</sup> Gara ḡeraga-kwaneato, ḡeḡenoḡoito, mo dagara eḡorato dagarana varina mabarana Iesu ḡena mero gabanana sebona (11) ma karori ḡesi ḡekira-vararito. <sup>10</sup> Vavineri tu maiḡeri: Maria, Magadala vavinena, e Ioana, e Maria, Iakobo (o Iames) sinana, ema karori tari maki. ḡia na mai vari Iesu ḡena apostolo tarimari ḡeri ḡekiraḡito. <sup>11</sup> Senaḡi vavine ḡeri guruḡa asi ḡevaḡa-moḡonirito, korana apostolo ḡetuḡamaḡito, ḡia noḡa ḡeguruḡa-babobaboto-ḡoi. <sup>12</sup> Senaḡi Petero tu evariḡisito, eraga-iaḡoto, gara kouḡanai ea boḡe-toḡato, senaḡi Iesu ḡekumuato dabuḡari moḡo eḡitarito. Benamo numa ḡana eḡenoḡoi-iaḡoto nuḡanai, ḡeḡorato dagarari etuḡamaḡirito nai, eḡaba-rakavato.

*Iesu Emausa dabaranai eforito*

*Mareko 16:12-13*

<sup>13</sup> Mo ḡaro sebonai Iesu ḡena mero ruarua tu Emausa vanuḡana ḡana ḡeiaḡoto; mo gabu ḡena manaḡa Ierusalemata na tu 11 kilomita kavana. <sup>14</sup> ḡerakato-ḡoi nuḡanai, ḡeḡorato dagarari ḡeguruḡa-guruḡa iaḡirito-ḡoi. <sup>15</sup> ḡeri raka guruḡa-guruḡai Iesu maki eraka-kavi-iaḡoto, ḡia ḡesi ḡeraka-iaḡoto-ḡoi. <sup>16</sup> Senaḡi tauri ruarua asi ḡeribato ḡia tu dei.

<sup>17</sup> Iesu na edanaġirito, ekirato, “Ġomi tu kara mai dabarai ġoraka-guruġa guruġa-iaġiani?” Benamo tauri ruarua ġeruġa-tarito, ġeboġe-vetuġato. <sup>18</sup> Benamo ġia ta, arana Kleopa, na evaġa-veseato, ekirato, “Ierusalemata ġana ġeiaġomato tarimari fakari ai betaġu ġoi moġo ġereġamu mainai beġe ġora dagarari asi ribamu?” <sup>19</sup> Iesu evedanaġito, ekirato, “Kamara dagara?” Ġia ġevaġa-veseto, ġekirato, “Iesu, Nasareta tarimana, ġenai ġeġorato dagarari. Ġia tu peroveta tarimana, Barau ġoiranai e tarimarima mabarari ġoirari ai ġena veiġa ema ġena guruġa maki ma seġukari. <sup>20</sup> Ġita ġera Rubu Veaġa vereri baregori ema ġera veġorikau tarimari na ġerevaiato bene mase ġana, ġevaġa-satauroato. <sup>21</sup> Senaġi ġai ġatuġamaġito, ġia na Isaraela tarimari bevaġa-maġuririni.

Mai dagara eġorato beiaġoma toma tu varau ġaro toitoi beġe iaġo. <sup>22</sup> Moġa iatanai, ġema vavine tari na ġai nuġama beġe vaġa-farevaġiri. Ġia tu boġiboġi iamoiamonai gara ġana beġe iaġo. <sup>23</sup> Senaġi tauġanina asi beġe doġaria. Benamo beġe ġenoġoi-iaġoma, beġe kira tu, aneru beġe ġitari, mo aneru na beġe kirari, ‘Ġia tu varau bemaġuri-ġenoġoi,’ beġesi. <sup>24</sup> Ġai karoma tari maki gara ġana beġe iaġo, vavine na beġe kiraġia kavana beġe doġaria, senaġi Iesu asi beġe ġitaia.”

<sup>25</sup> Benamo Iesu na ekirarito, ekirato, “Ġomi tu babo, peroveta tarimari ġeri guruġa vaġa-moġoniri ai maki kwaibo rakava! <sup>26</sup> Keriso tu moġesi bene midigu-midigu murinai vau, mareva namonai bene raka-toġa, ene?” <sup>27</sup> Benamo ġia varina Mose e peroveta tarimari ġeri bukai ema Buka Veaġa mabarana maki ġetorerito guruġari aniri evaġa-ribarito.

<sup>28</sup> Ġeiaġo-viniato-ġoi vanuġana Emausa ġekavinaġiato, benamo ġia tu bene raka-vanaġi etato. <sup>29</sup> Senaġi ġekira-ġoiato, ġekirato, “Ġai ġesi notanu, korana belavilavi ema ġaro maki mai emukunani bene.” Benamo ġia ġesi ġeraka-toġato, ġetanuto. <sup>30</sup> Ġaniġani gabunai ġetanu-taġoto-ġoi nai, Iesu na beredi eġabiato, evaġa-namoato, edudu-ġutuato, tauri ruarua evinirito. <sup>31</sup> Benamo matari ġevekeoto, ġeribato mo tu ġia. Senaġi ġia tu ġoirari ai erekwa-rekwato.

<sup>32</sup> Benamo tauri ruarua ġeveguruġa-vevinito, ġekirato, “Dabarai evaġa-guruġarani-ġoi nai, ema Buka Veaġai ġetorerito guruġari aniri ġera ekiraġi-maġatarini-ġoi nai, ġita nuġara tu ġeseġuseġuni-ġoi, noġa moġo karava na ġeġararini-ġoi, ene?”

<sup>33</sup> Benamo maoromaoro ġevariġisito, Ierusalemata ġana ma ġeġenoġoi-iaġoto, Iesu ġena mero gabanana sebna (11) ma karori ġesi vegogo-taġori ai ġedoġaririto. <sup>34</sup> Ġia na tauri ruarua ġevaġa-guruġarito, ġekirato, “Moġoni veġata, Vereġauka tu bevariġisi-ġenoġoi ema Simona ġenai maki efoforito.” <sup>35</sup> Benamo tauri ruarua na dabarai eġorato dagarana ema kamasi Iesu na beredi edudu-ġutuato vauro, Iesu ġia na ġeġita-leiaito ġeri ġekiraġito.

*Iesu tu ġena mero ġeri ai efoforito*

*Mataio 28:16-20; Mareko 16:14-18; Ioane 20:19-23*

<sup>36</sup> Mo tarima ruarua roġo ġeguruġato-ġoi nuġanai, Vereġauka ġia fakari ai eruġa-rosito, benamo ekirarito, ekirato, “Maino ġemi ai bene tanu.” <sup>37</sup> Ġia tu nuġari maki ġefarevaġi-rakavato ema ġegarito, ġia matoru ġekirato, murava ta ġeġitaiaito. <sup>38</sup> Senaġi ġia ekirato, “Karase nai nuġami beġe vekwaraġi-rakava? Kara dainai ġodaradarani? <sup>39</sup> Ġimagu ema kwakugu ġoma ġitari, benamo boġono riba mai tu au. Ġoma ġabi-karagu, benamo boġono riba, korana murava tu asi viriġona ema asi turiġana, ġoġitaguni au tu ma viriġogu e ma turiġagu.” <sup>40</sup> Moġesi ekirato, benamo ġimana ema kwakuna evaġa-ġitarito. <sup>41</sup> Senaġi ġia tu roġo ġedaradarato-ġoi ġeri iaku ema ġeri nuġa-farevaġi dainai; benamo Iesu na edanaġirito, ekirato, “Ġaniġani tari maniġeri ba?” <sup>42</sup> Ġia na maġani-kone gabugabuna ta ġeviniato. <sup>43</sup> Benamo Iesu na eġabiato, ġoirari ai eġaniato.

<sup>44</sup> Benamo evaġa-guruġarito, ekirato, “Au tu roġo ġomi ġesi tatanu-vegogoto-ġoi nai, akiramito-ġoi: Mose ġena taravatu e peroveta tarimari ġeri guruġa ema Salamo

ai au varigu ġetorerito guruġari mabarari beġe moġonini.” <sup>45</sup> Benamo Iesu na nuġari ekeorito, Buka Veaġa guruġari aniri beġene tuġamaġi-fakari ġana. <sup>46</sup> Ma ekirarito, ekirato, “Maiġesi ġetoreato: Keriso tu moġesi roġo bemidigu-midiguni, ema ġaro vaġa-toitoinai mase na ma bevariġisi-ġenoġoini. <sup>47</sup> Ema ġia aranai vetuġamaġi-kure ema rakava tuġamaġi-fitoġari beġene ġobata-iaġi-rovorovori tanobara mabarari ai, Ierusalem na bene vematama. <sup>48</sup> Mai dagara vaġa-moġoniri tarimami tu ġomi. <sup>49</sup> Au tauġegu na tu Tamagu na ekiraġi-toreato Iaukana batuġuani, iatami ai befoforini. Ġomi tu Ierusalem na boġono tanu, bene iaġo mo, guba na bemariġoni seġukana boġo ġabiani.”

*Iesu Barau na eġabi-varaġeato guba ġana*

*Mareko 16:19-20; Apostolo 1:9-12*

<sup>50</sup> Moġa murinai Iesu na Ierusalem na eġori-rosirito, ġeiaġoto mo, Betania ġana, benamo ġimana eġabi-vaisirito, evaġa-namorito. <sup>51</sup> Evaġa-namorito-ġoi nuġanai, Iesu tu ġia ġerina eveġitato, Barau na eġabi-varaġeato guba ġana. <sup>52</sup> Ġia na ġetoma-rakariġo viniato murinai, ma iakuri e ma verereri ġesi Ierusalem na ma ġeġenoġoi-iaġoto. <sup>53</sup> Benamo Rubu Veaġai ġetanuto-ġoi, Barau ġevaġa-raġeato-ġoi.

## VARI NAMONA IOANE NA ETOREATO

Ioane vaḡa-foforina guruḡari

Ioane tu Iesu ḡena apostolo tarimari gabanana ruarua (12) nuḡari ai tarimana ta. Ḣia tamana tu Sebedaio, ma ḡia tu kone ai maina tarimari.

Ioane ḡena mai Vari Namona tu laḡani 85 beiaḡo 95 fakari ai ta etoreato, mo tu Iesu emaseto murinai. Ḣia na mai Vari Namona tu tanobara tarimari mabarari, ḡemaḡuri-ḡenoḡoito ema asi ḡemaḡuri-ḡenoḡoito, ḡeri etoreato.

Ḣia ḡena ura baregona tanobara tarimari mabarari bene vaḡa-ribari, Iesu Nasareta tarimana tu moḡoni Barau Natuna, e Iesu tu moḡoni Barau na tanobara ḡana etuḡu-mariḡoato, tanobara tarimari ḡia ḡenana maḡuri beḡene ḡabia uranai, ema Barau vetoḡana korikorina tu ḡia ḡenana ema vevaḡa-foforiato tarimarima ḡeri ai. Siri baregona Ioane ḡena Vari Namona bukana nuḡanai tu karoa 20:31, “Maiḡeri guruḡa atorerito, korana tu ḡomi na Iesu boḡono vaḡa-moḡonia, ḡia tu moḡoni Keriso, Barau Natuna. Ma bema ḡomi na ḡia boḡo vaḡa-moḡoniani nai tu, ḡia aranai maḡuri vanaḡivanaḡi boḡo ḡabiani.”

Ioane ḡena toretore tu maiḡesina eboioḡaiato:

1. Barau Natuna - karoa 1:1-18

2. Barau ḡena vetuḡunaḡi Iuda tarimari fakari ai ema iaḡo-vinito - karoa 1:19-12:50

3. Barau ḡena vetuḡunaḡi Iesu tauḡena ḡena mero fakari ai ema iaḡo-vinito - karoa 13-17

4. Barau vetuḡunaḡina ema iaḡo-vinito tanobara vaḡa-maḡurina ḡana - karoa 18-21

Maḡuri guruḡana

<sup>1</sup> Tovotovonai veḡata Guruḡa etanuto-ḡoi. Mo Guruḡa tu Barau ḡesi ḡetanuto-ḡoi, ema mo Guruḡa tu Barau. <sup>2</sup> Ḣia tu tovotovona na veḡata Barau ḡesi ḡetanuto-ḡoi. <sup>3</sup> Dagara mabarari tu Barau na ḡia ḡenana eveirito. Ma Barau na dagara sebona kwariḡutu ta maki dabara borunai ta maki asi eveiato, asiḡina ḡinavaḡi. <sup>4</sup> Maḡuri tu ḡia nuḡanai etanuni; mo maḡuri tu tarimarima ḡeri mama. <sup>5</sup> Mama tu mukuna nuḡanai emamani, senaḡi mukuna na asi etuḡamaḡi-fakaiato e asi eḡita-leaiato.

<sup>6</sup> Barau na tarima ta etuḡuato, arana tu Ioane. <sup>7</sup> Ḣia tu guruḡa moḡonina kiraḡi-kiraḡina ema mama vaḡa-foforina ḡana eiaḡomato. Be ḡia ḡenana tarimarima mabarari na vari beḡene seḡaḡia e beḡene vaḡa-moḡonia ḡana. <sup>8</sup> Ḣia tauḡena tu dia mo mama, senaḡi ḡia eiaḡomato tu, mama benema kiraḡia ḡana. <sup>9</sup> Mo mama tu mama korikorina, tanobara ḡana eiaḡomato, tarimarima mabarari mama benema viniri ḡana.

<sup>10</sup> Guruḡa tu tanobarai etanuto-ḡoi, ema mo guruḡa ḡenana Barau na tanobara eveiato, senaḡi tanobara na tu asi eribaiato. <sup>11</sup> Ḣia tu ḡena tanobara ḡana eiaḡomato, senaḡi ḡena tarimarima na asi ḡeḡabi-raḡeato. <sup>12</sup> A tarimarima kotari na ḡeḡabi-raḡeato e ḡevaḡa-moḡoniato nai, ḡia na maoro evinirito, Barau natunai beḡene iaḡo. <sup>13</sup> Ḣia Barau natunai ḡeiaḡoto tu dia tauḡanina ḡenana. Mo tu dia sina tama rarari na o tauḡani ḡena urai o sina tama ḡeri urai. Asiḡi, tarimarima tu Barau tauḡena ḡereḡana na moḡo ḡia natunai evaḡa-iaḡorini.

<sup>14</sup> Mo Guruḡa tu tarimarima tauḡaninai eiaḡoto, benamo ḡai fakamai ema tanuto. Ḣia marevana e seḡukana baregona ḡaḡitaiato. Moḡa tu Barau na Natuna sebona kwariḡutu eviniato marevana e seḡukana. Varevare-bara ema guruḡa e maḡuri moḡonina na evonuvonu-raḡeto.

<sup>15</sup> Ioane na ḡia guruḡana ekiraḡi-foforiato, ekeato, ekirato, “Au na akiraḡiato tarimana tu maiḡa, akirato, ‘Au murigu na beiaḡomani tarimana na au evanaḡiguto. Korana tu au maki roḡosi roḡo bana maḡuri nuḡanai veḡata, ḡia tu etanuto-ḡoi.’”

<sup>16</sup> Ḣia tu varevare-bara na evonuvonu-raḡeto. Mo ḡena varevare-bara lorinai ḡita mabarara vevaḡa-namo iatai-iatai maki evinirani. <sup>17</sup> Korana Barau na Mose ḡenana taravatu evinirato, a varevare-bara ema guruḡa e maḡuri moḡonina tu Iesu Keriso na



eḡwa-iaḡomarito. <sup>18</sup> Tovotovona na veḡata beiaḡoma maitoma tarima ta na Barau asi eḡitaiato. Natuna ḡora ḡereḡa, Tamana sevinai etanuni tarimana, ḡia na Barau ema vaḡa-foforiato.

*Ioane Babatiso* ḡena guruḡa-fofori

*Mataio 3:1-12; Mareko 1:7-8; Luka 3:15-17*

<sup>19</sup> Ioane ḡena guruḡa-fofori tu maiḡa. Iuda tarimari na Rubu Veaḡa vereri e Levi doḡorona tarimari, (mai tu Rubu Veaḡai vetuḡunaḡi tarimari), kotari Ieruselema na Ioane ḡenai ḡetuḡu-iaḡorito, beḡene danaḡia ḡana, beḡene kira, “Ḣia tu deikara?”

<sup>20</sup> Benamo Ioane asi evekira-ḡuniḡauto, senaḡi ḡoirari ai eguruḡa-foforito, ekirato, “Au tu dia Keriso, (Barau na ekiraḡi-toreato vevaḡa-maḡuri tauna).” <sup>21</sup> Ma ḡedanaḡiato, ḡekirato, “Ba ḡoi tu deikara? Ḣoi tu Elia ba?” Ḣia ekirato, “Au tu dia Elia.” Ma ḡekirato, “Ḣai na peroveta tarimana ḡanariani tarimana tu ḡoi ba?” Ḣia evaḡa-veseto, ekirato, “Asiḡina!” <sup>22</sup> Benamo ḡia na ma ḡedanaḡi-ḡenoḡoiato, ḡekirato, “Ba ḡoi tu deikara? Ḣemu vevaḡa-veve novini-ginikauma, be beḡe tuḡuma tarimari ḡeri ai baḡana iaḡo, baḡana vaḡa-ribari. Ḣoi tauḡemu varimu tu aiḡesi?” <sup>23</sup> Benamo Ioane tauḡena evevari-fiuto, ekirato, “Au tu garo ta tano fakana ekea-koḡokoḡoni, ekirani, ‘Vereḡauka ḡena dabara boḡono iareva-toretorea.’” Isaia peroveta tarimana na ekiraḡi-guineato ilailana.

<sup>24</sup> Mo vetuḡu ḡeiaḡo-viniato tarimari tu Farisea tarimari. <sup>25</sup> Benamo Ioane ḡedanaḡiato, ḡekirato, “Bema ḡoi tu dia Keriso, e dia Elia, e dia mo peroveta tarimana, karase nai ḡoi tu ovevaḡa-babatisoni?” <sup>26</sup> Ioane evaḡa-veseto, ekirato, “Au tu nanu na moḡo ababatisoni, senaḡina tarima ta tu ḡomi fakami ai eruḡa-taḡoni, ma ḡomi tu asi ribami ḡia. <sup>27</sup> Ḣia tu au murigu na eiaḡomani, ema au tu asi ilaila, ḡia ḡena tamaka varori baruḡarini.” <sup>28</sup> Mai dagara mabarari tu Betania, Ioridana ḡarukana mo rekenai, ḡeḡorato, Ioane ebatisoto-ḡoi gabunai.

*Barau* ḡena ginitaḡo mamoe

<sup>29</sup> Ma elaḡanito nuḡanai, Ioane na Iesu eḡitaiato, ḡia ḡenai eiaḡomato-ḡoi, benamo ekirato, “Ḣoboḡe, mani tu Barau ḡena Mamoe Natuna, ḡia na tanobara ḡena rakava beḡabi-vaḡiani. <sup>30</sup> Au na tu ḡia akiraḡiato, akirato, ‘Au murigu na eiaḡomani tarimana na evanaḡiguto, korana tu au roḡosi roḡo bara maḡuri nuḡanai veḡata, ḡia tu etanuto-ḡoi.’

<sup>31</sup> Tovo-tovonai au tu asi ribagu ḡia, senaḡi au aiaḡomato nanu na ababatisoni, korana tu Isaraela tarimari na Iesu beḡene ribaia ḡana.”

<sup>32</sup> Benamo Ioane ma eguruḡa-foforito, ekirato, “Iauka aḡitaiato, guba na emariḡoto pune noḡa, ḡia iatanai etanukauto. <sup>33</sup> Tovotovonai au tu asi ribagu ḡia, senaḡi Barau na etuḡuguto, bana iaḡoma tu, tarimarima nanu na bana babatisori ḡana. Ḣia na evaḡa-guruḡaguto, ekirato, ‘Ḣoi na tarima ta boḡitaiani, Iauka bemariḡoni, iatanai betanukauni. Mo tau tu tarimarima Iauka Veaḡa na bebabatisorini.’” <sup>34</sup> Ioane ekirato, “Au na aḡitaiato naima akiraḡi-foforiani, ḡia tu Barau Natuna.”

*Iesu* ḡena mero giniguineri

<sup>35</sup> Ma elaḡanito nai tu, Ioane e ḡena mero ruarua ḡesi monai ma ḡeruḡa-taḡoto-ḡoi. <sup>36</sup> Ḣeruḡa-taḡoto-ḡoi nuḡanai tu, Iesu eraka-vanaḡito, eḡitaiato, benamo ekirato, “Ḣoboḡe, Barauna Mamoe Natuna, (ḡena ginitaḡo mamoe), ḡoḡitaia.” <sup>37</sup> Ma Ioane ḡena mero ruarua na mo guruḡa ḡeseḡaḡiato, benamo Iesu murina na ḡeiaḡoto. <sup>38</sup> Iesu eruḡa-kureto, ma murinai ḡerakakauto tarimari ruarua eḡitarito, benamo edanaḡirito, ekirato, “Ḣomi tu kara ḡourani?” Ḣia ḡevaḡa-veseto, ḡekirato, “Rabi, ḡoi tu ainai otanuni?” Rabi anina tu vevaḡa-riba tarimana. <sup>39</sup> Ḣia evaḡa-veseto, ekirato, “Ḣoiaḡoma, ḡoma ḡitaia.” Benamo ḡia ḡesi ḡeiaḡoto, ma ḡena tanu gabuna ḡea ḡitaiato, mo ḡaro vinubana tu ḡia ḡesi ḡebukato. Mo tu horaḡauna 4 koloko lavilavi rekenai.

<sup>40</sup> Ioane ḡena guruḡa ḡeseḡaḡiato, benamo Iesu murinai ḡerakato tarimana ta tu Anduru, Simona Petero tarina. <sup>41</sup> Anduru na Iesu eraga-kwaneato. Asikauna kakana Simona edoḡariato, benamo ekiraiato, ekirato, “Ḣai na Mesia baḡa doḡaria.” Mesia anina

tu Keriso, (Barau na ekiraḡi-toreato vevaḡa-maḡuri tarimana). <sup>42</sup> Benamo ḡia na Simona Iesu ḡenai eḡori-iaḡoato. Iesu na eḡitaiato, benamo ekirato, “Ḡoi aramu tu Simona, Ioane natuna, senaḡi ḡoi toma aramu beḡe kiraḡiani tu Kefas beḡe toni.” Mai ara “Kefas” ema “Petero” aniri tu sebona, garo ai anina tu “Fore”.

#### *Iesu na Filipino e Natanaela ekearito*

<sup>43</sup> Ma elaḡanito nai tu, Iesu tu Galilea tanona ḡana neiaḡo etato. Ḡia na Filipino edoḡariato, benamo ekiraiato, ekirato, “Murigu ai noma raka.” <sup>44</sup> Filipino tu Betesaida tarimana, Anduru e Petero ḡesi vanuḡa sebona. <sup>45</sup> Filipino na Natanaela edoḡariato, benamo ekiraiato, ekirato, “Mose ḡena taravatu ai ema peroveta tarimari ḡeri bukai varina ḡetoreato tarimana tu baḡa doḡaria; ḡia tu Iesu, Nasareta tarimana, Iosefa natuna.” <sup>46</sup> Natanaela evedanaḡito, ekirato, “Nasareta na dagara namona ta beiaḡomani?” Filipino ekirato, “Noiaḡoma, noma ḡitaia.”

<sup>47</sup> Iesu na Natanaela eḡitaiato, eiaḡomato-ḡoi, benamo ḡia ekiraḡiato, ekirato, “Ḡoboḡe, mani tarima tu Isaraela tarimana korikorina, ḡia ḡenai ḡofaḡofa ta tu asi etanuni.” <sup>48</sup> Natanaela na edanaḡiato, ekirato, “Kamasi boribagu?” Iesu na evaḡa-veaseato, ekirato, “Filipo tu vau bekeamu. Au na ḡoi tu baḡita-guinemu figi ḡauna gaburenai roḡo otanuto-ḡoi nai.” <sup>49</sup> Benamo Natanaela na evaḡa-veaseato, ekirato, “Vevaḡa-riba tarimamu, ḡoi tu Barau Natuna; ḡoi tu Isaraela Verena.” <sup>50</sup> Iesu na ma evaḡa-veaseato, ekirato, “Ḡoi na au ovaḡa-moḡoniguni, korana au na bakira-varamu, ḡoi tu figi ḡauna gaburenai baḡita-guinemu, nene? Veiḡa tari vau boḡitarini, mai veiḡa maiḡa maki beḡe vanaḡiani.” <sup>51</sup> Benamo ma ekirarito, ekirato, “Moḡoni veḡata, au na ḡomi akiramini, guba bevekeo-fakani boḡo ḡitaiani, ema Barau ḡena aneru beḡe varaḡeni e beḡe mariḡoni boḡo ḡitarini Tarimarima Natuna ḡenai.”

## 2

#### *Veḡaraḡo verekona Kana vanuḡanai*

<sup>1</sup> Ḡaro ruarua ḡekorito murinai, Kana vanuḡana nuḡanai veḡaraḡo verekona ta ḡeveiato. Kana vanuḡana tu Galilea tanona nuḡanai. Mo veḡaraḡo verekona nuḡanai tu Iesu sinana maki monai. <sup>2</sup> Ema Iesu ma ḡena mero ḡesi maki ḡeura-maḡirito, be mo veḡaraḡo verekona nuḡanai ḡeraka-toḡato. <sup>3</sup> Vine nanuna o wain ekorito, benamo Iesu sinana na Iesu evaḡa-guruḡaiato, ekirato, “Ḡia tu asi ḡari vine nanuna.” <sup>4</sup> Iesu na evaḡa-veaseato, ekirato, “Vavine, karase nai au oma kira-varaguni? Mani tu ḡomi ḡemi ḡauvei. Au ḡegu ḡaro tu roḡosi bene votu. <sup>5</sup> Benamo sinana na vetuḡunaḡi tarimari evaḡa-guruḡarito, ekirato, “Kara bekira-varamini veiḡana boḡono veia.”

<sup>6</sup> Monai tu fore gwaḡuturi imaima sebona (6) vaḡa-ruḡa, Iuda tarimari ḡeri veiareva veiḡari ḡari ḡeḡauvei-iaḡirito-ḡoi. Mo fore gwaḡuturi tata nuḡari tauri galon gabana ruarua (20) o gabana toitoi (30) kavari. <sup>7</sup> Iesu na vetuḡunaḡi tarimari ekirarito, ekirato, “Mani gwaḡutu nanu na ḡovaḡa-vonuri!” Benamo ḡevaḡa-vonu fokafokarito. <sup>8</sup> Moḡa murinai ma ekirarito, ekirato, “Kota ḡoḡutu-vaḡia, ḡoḡwa-iaḡoa vereko ḡorikauna tarimana ḡenai.” Ḡeḡutu-vaḡito, benamo ḡeḡwa-iaḡoato, <sup>9</sup> vereko ḡorikauna tarimana na mo nanu, vine nanunai evaḡa-iaḡoato moḡa, eniu-tovoato. Ḡia tu asi ribana mo vine nanuna tu ainana eiaḡomato; a nanu ḡesisiato merori ḡereḡari moḡo ma ribari. Benamo vereko ḡorikauna tarimana na veḡaraḡo variḡu tauna ekea-iaḡomaiato, benamo evaḡa-guruḡaiato, ekirato, <sup>10</sup> “Tarimarima mabarari na vine nanuna namo vedaureana tu ḡetore-rosi guineani, benamo vereko tarimari ḡeniu-maseni murinai vau, vine nanuna kota namo raḡina ma ḡetore-rosiani. Senaḡina ḡoi na tu vine nanuna namo vedaureana tu boḡabi-taria mo maitoma.”

<sup>11</sup> Mai tu Iesu ḡena vetoḡa boruna giniguinena evaḡa-foforiato Kana vanuḡanai, Galilea tanona nuḡanai. Monana ḡia marevana e seḡukana baregona evaḡa-foforiato, ema ḡena mero na ḡevaḡa-moḡoniato.

<sup>12</sup> Moġa murinai Iesu ma sinana e tarina merori, ema ġena mero ġesi ġevariġoto Kaperanauma ġana. Ma monai ġaro viravira ta ġetanuto.

*Iesu na Rubu Veaġa eiarevaiato*

*Mataio 21:12-13; Mareko 11:15-17; Luka 19:45-46*

<sup>13</sup> Iuda tarimari ġeri Pasova o Iuda tarimari mase aneruna na evanaġirito moġo verekona ġoirai ekavinaġito naima, Iesu tu Ierusalemā ġana evaraġeto. <sup>14</sup> Rubu Veaġa nuġanai tarimarima na boromakau, e mamoe, ema pune ġevoivoi-iaġirito-ġoi, ema tarima kotari teibolo ai ġetanuto ma moni ġesenisito-ġoi edoġaririto. <sup>15</sup> Benamo varo kwarina ta evatoato. Monana Rubu Veaġa na mamoe e boromakau mabarari ema lailai-rosirito. Moni ġesenisirito-ġoi tarimari ġeri fata eġuke-vebuburito, ġeri moni ebubu-lausilausirito. <sup>16</sup> Benamo pune ġevoito-ġoi tarimari ekira-ġoirito, ekirato, “Maiġeri dagara mainana ġoġabi-rosiri! Au Tamagu ġena numa tu voivoi numanai asi ġovaġa-iaġoa!” <sup>17</sup> Benamo ġena mero na Buka Veaġai evetoreto guruġana ġetuġamaġi-doġariato, ekirani, “Ġoi ġemu numa uravinina nuġagu ai tu karava noġa eġarani.”

<sup>18</sup> Moġa murinai Iuda tarimari na ġevaġa-guruġaiato, ġekirato, “Maiġesi oveini anina tu kara? Kamara vetoġa na bevaġa-foforimuni ġai ġemai, ġoi tu ma ġemu maoro maiġeri boveirini?” <sup>19</sup> Iesu evaġa-veseto, ekirato, “Mai Rubu Veaġa ġorovoa, benamo ġaro toitoi nuġanai au na ma bana vaġa-ruġa-vaishi ġenoġoia.” <sup>20</sup> Ġia na ġekiraiato, ġekirato, “Mai Rubu Veaġa tu laġani gabana vasivasi ma imaima sebna (46) nuġari ai ġeragaiato. A ġoi na tu ġaro toitoi nuġanai ma boraga-ġenoġoiani otoni?”

<sup>21</sup> Senaġi Iesu na tu ġia tauġanina Rubu Veaġai evaġa-ilailaiato. <sup>22</sup> Iesu mase na evaisiraġeto murinai, ġena mero na mo guruġa ġetuġamaġi-doġariato, benamo ġia na Buka Veaġa ema Iesu na evaġa-ribarito guruġari ġevaġa-moġonirito.

*Iesu ribana tarimarima ġeri veiġa*

<sup>23</sup> Iesu Pasova o Iuda tarimari mase aneruna na evanaġirito moġo verekona ġarori ai Ierusalemā etanuto-ġoi nai, tarima vovoka na ġevaġa-moġoniato, korana tu vetoġa boruri ġutuma eveirito ġeġitarito nai. <sup>24</sup> Senaġi Iesu na ġia asi evaġa-moġonirito, korana tarimarima mabarari ġia tu ma ribana ginikau. <sup>25</sup> Ema tarima ta tu asi ilaila ġia tarimarima ġeri maġuri dabarari bekira-varaiani, korana tarimarima mabarari nuġari tu ġia ma ribana.

### 3

*Iesu e Nikodemo*

<sup>1</sup> Farisea tarimana ta etanuto-ġoi arana Nikodemo; ġia tu Iuda tarimari ġeri veġorikau tauna ta. <sup>2</sup> Nega ta boġi ai Iesu ġenai eiaġoto, benamo ekirato, “Rabi, ġai ribama, ġoi tu vevaġa-riba tarimamu, Barau ġenana oiaġomato, korana tu vetoġa boruri oveirini maiġeri tu Barau na asi evaġa-kavaiani tarimana na tu asiġina ġinavaġi beveirini riba.”

<sup>3</sup> Iesu na evaġa-veseato, ekirato, “Moġoni veġata akiramuni, asi beġora-ġenoġoini tarimana na Barau ġena Basileia tu asiġina ġinavaġi beġitaiani.” <sup>4</sup> Benamo Nikodemo na edanaġiato, ekirato, “Tarima baregona ta tu kamasi ma beġora-ġenoġoini? Sinana nuġanai ma beraka-toġani, benamo ma beġora-ġenoġoini?”

<sup>5</sup> Iesu ma evaġa-veseto, ekirato, “Au na akira-korikorimuni, tarima ta Barau ġena Basileia nuġanai asi berakatoġa-kavani, senaġina nanu ġenana beġorani ema Iauka ġenana maki beġorani tarimana vau beraka-toġani. <sup>6</sup> Tarimarima tauġanina ġenana eġorani tu tauġani, ma Barau Iaukana ġenana eġorani tu Iauka. <sup>7</sup> Ġoi nuġamu asi bene farevaġi maiġesi akiramuni nai, korana au bakira, ‘Ġomi mabarami boġono ġora-ġenoġoi.’ <sup>8</sup> Iavara etoġani tu, eurani gaburi ġana eġau-iaġoni. Guruna tu ġoseġaġiani, senaġi ainana eiaġomani, ma aiġana eiaġoni tu asi ġoribaiani. Barau Iaukana ġenana ġeġorani tarimari mabarari maki moġesina, asi ġoribani kamasi ġeġorani.”

<sup>9</sup> Nikodemo ma evedanaġito, ekirato, “Mai dagara tu kamasi beġe ġorani?” <sup>10</sup> Iesu ma evaġa-veseto, ekirato, “Ġoi tu Isaraela ġeri vevaġa-riba tarimamu, senaġi maiġeri

dagara ǵoi tu asi ribamu? <sup>11</sup> Au na akira-korikorimuni, ǵai tu ribama dagarari ǵaguruǵa-iaǵirini, ema ǵaǵitarito dagarari ǵakiraǵi-foforirini, senaǵina ǵema guruǵa tu asi ǵoǵabi-raǵerini. <sup>12</sup> Au na ǵomi ǵemi tu tanobara dagarari akiraǵirini, senaǵi asi ǵovaǵa-moǵoniguni, a guba dagarari bakira-varamini nai tu, kamasi boǵo vaǵa-moǵoniguni? <sup>13</sup> Tarima ta guba ǵana asiǵina ǵinavaǵi evaraǵeto, senaǵina guba na emariǵoto tarimana ǵereǵana moǵo, mo tu Tarimarima Natuna. <sup>14</sup> Mose na tano fakanai mota eǵabi-vaisiato ilailanai, Tarimarima Natuna maki moǵesi beǵe ǵabi-vaisiani. <sup>15</sup> Monana vau ǵia ǵenai beǵe veǵabidadamani tarimari mabarari na maǵuri vanaǵivanaǵi beǵe ǵabiani.

<sup>16</sup> Korana Barau na tanobara euravini-baregoato nai, Natuna ǵora ǵereǵa evinirato, be ǵia beǵe ǵabidadama-viniani tarimari mabarari tu asi beǵe maseni, a maǵuri vanaǵivanaǵi beǵe ǵabiani. <sup>17</sup> Korana Barau na Natuna etuǵu-mariǵoato tanobara ǵana tu, dia tanobara bene vaǵa-kotaia ǵana, senaǵi tanobara ǵia bakunai bene maǵuri ǵana. <sup>18</sup> Ǵia ǵenai eveǵabidadamani tarimana tu meto asi beviniani, senaǵi asi eveǵabidadamani tarimana tu varau meto eǵwa-taǵoani, korana ǵia na tu Barau Natuna ǵora ǵereǵa asi eǵabidadama-viniani nai. <sup>19</sup> Mo meto korana tu maiǵesi: Mama tu tanobarai varau ema foforito, senaǵi tarimarima na mukuna ǵeuravini-baregoato, korana ǵeri veiǵa tu rakava nai. <sup>20</sup> Veiǵa rakavari ǵeveini tarimari mabarari na tu mama ǵeruǵaiani, mama asi ǵeiaǵo-viniani. Ǵia tu ǵegarini, korana ǵeri veiǵa rakavari beǵe foforini mamai garina. <sup>21</sup> Senaǵi deikara dabara moǵonina ekorana-iaǵiani tarimana na mama eiaǵo-viniani, benamo tarimarima na beǵe ǵita-ginikauani, ǵena veiǵa namori eveirito tu Barau ǵenana eveirito.

#### *Iesu ema Ioane*

<sup>22</sup> Moǵa murinai Iesu ma ǵena mero ǵesi Iudea tanona rekena ǵana ǵeiaǵoto. Monai Iesu tu ǵena mero ǵesi ǵetanuto-ǵoi e ebatisoto-ǵoi. <sup>23</sup> Ioane maki Aenon ai, Salim rekenai, ebatisoto-ǵoi, korana nanu tu barego monai. Tarimarima mo ǵana ǵeiaǵoto-ǵoi, ea babatisorito-ǵoi. <sup>24</sup> Mo tu Ioane dibura numanai roǵosi ǵere kou-ǵaua nuǵanai.

<sup>25</sup> Moǵa ǵaronai Ioane ǵena mero Iuda tarimana ta ǵesi ǵeveǵare-veǵareto. Ǵia ǵeri guruǵa tu, kamara veǵuriǵi veiǵanai tu tarimarima benamo-vedaureani. <sup>26</sup> Ioane ǵena mero Ioane ǵenai ǵeiaǵoto, benamo ǵekirato, “Vevaǵa-riba tarimamu, Ioridana ǵarukana mo rekenai ǵoi ǵesi ǵotanuto-ǵoi e ǵoi na oguruǵa-iaǵiato tarimana tu ebatisoni, ema tarimarima vovoka ǵia ǵenai ǵeiaǵoni.”

<sup>27</sup> Ioane evaǵa-veseto, ekirato, “Tarima ta na dagara ta asi beǵoitaǵo-kavaiani, senaǵi Barau na guba na bevini-riǵoani vau beǵoitaǵoni. <sup>28</sup> Ǵomi tauǵemi na ǵoseǵaǵiguto, be ma ribami au akirato, ‘Au tu dia Keriso, (Barau na ekiraǵi-toreato vevaǵa-maǵuri tauna), senaǵi au tu etuǵu-guineguto ǵia ǵoirana ǵana.’ <sup>29</sup> Beveǵaraǵoni ǵuiatona tu beǵaraǵoani futuana na beǵaraǵoani. A beveǵaraǵoni futuana ǵatana tu eruǵa-taǵoni moǵo, (mai tu au, Ioane), ema ǵatana eseǵaǵi-ǵauni, ma ǵatana beveǵaraǵoni futuana garona beseǵaǵiani nai tu, beiakuni. Moǵesi naima au tu iaku na bama vonuvonu-raǵe. <sup>30</sup> Ǵia tu bene barego, a au tu bana kei.”

#### *Iesu tu guba na eiaǵomato*

<sup>31</sup> “Tuǵuna na emariǵoto tarimana tu dagara mabarari iatari ai; tano na eiaǵomato tarimana tu tanobara tarimana ema tanobara guruǵari moǵo bekiraǵini. Guba na eiaǵomato tarimana dagara mabarari iatari ai. <sup>32</sup> Ǵia tu monai eǵitato e eseǵaǵito dagarari ekiraǵi-foforirini, senaǵi tarima ta na ǵena guruǵa asi eǵabi-raǵeani. <sup>33</sup> Deikara na ǵia ǵena guruǵa eǵabi-raǵeani tarimana na evaǵa-moǵoni korikoriani, Barau tu moǵoni veǵata. <sup>34</sup> Korana tu Barau na etuǵuato tarimana na Barau ǵena guruǵa bekiraǵiani, korana tu Barau na ǵena Iauka Vevaǵa eviniato ema evaǵa-vonuvonu-raǵeani. <sup>35</sup> Tamana na Natuna eura-viniani, ema dagara mabarari ǵia ǵimanai etore-kaurito. <sup>36</sup> Deikara na Natuna evaǵa-moǵoniani tarimana na maǵuri vanaǵivanaǵi

beḡabiani. A Natuna asi evaḡa-moḡoniani tarimana na maḡuri asi beḡabiani, senaḡi Barau ḡena baru tu ḡia iatanai betanuni.”

## 4

*Iesu ema Samaria vavinena*

<sup>1</sup> Farisea tarimari tu varau ḡeseḡaḡito, Iesu na tarima vovoka eḡabirito, ḡena mero ai evaḡa-iaḡorito e ebabatorito, ma Ioane na tu asi vovoka eḡabirito. <sup>2</sup> Senaḡina Iesu tauḡena na ta tu asi ebabatorito; mo tu ḡena mero moḡo ḡebabatorito-ḡoi. <sup>3</sup> Iesu eribato ḡia varina Farisea tarimari na eseḡaḡiato, benamo Iudea eiaḡuiato, Galilea ḡana ma eḡenoḡoi-iaḡoto. <sup>4</sup> ḡalilea ḡana tu Samaria tanona na eraka-vanaḡito.

<sup>5</sup> Samaria vanuḡana tai eraḡasito. Mo vanuḡa arana tu Sika. Mo vanuḡa tu Iakobo na natuna Iosefa eviniato tanona sevinai. <sup>6</sup> Iakobo ḡena nanu gurina maki monai. Iesu tu eraka-iaḡomato, be egaugau-raḡeto, benamo mo nanu gurina sevinai etanu-tarito. Mo tu horaḡauna 12 koloko nuḡanai ḡaroḡotai.

<sup>7</sup> Etanu-taḡoto-ḡoi nuḡanai, Samaria vavinena ta nanu ḡutu eiaḡoto, benamo Iesu na enoḡiato, ekirato, “Nanu kota noma vinigu, be nama niu.” <sup>8</sup> ḡena mero tu vanuḡa ḡana, ḡaniḡani voi ḡeiaḡoto. <sup>9</sup> Samaria vavinena evaḡa-veseto, ekirato, “ḡoi tu Iuda taumu, ma au tu Samaria vavinegu, karase nai au ḡegu ai nanu onoḡini?” Moḡesi ekirato, korana Iuda tarimari tu Samaria tarimari ḡesi asi ḡevegara-garato-ḡoi. <sup>10</sup> Benamo Iesu na evaḡa-veseato, ekirato, “Bema Barau ḡena varevare dagarana boro riba, ema boro riba maki, nanu kota ḡemu ai enoḡiani tarimana tu deikara nai tu, ḡia boro noḡia, benamo ḡia na maḡuri nanuna bere vinimu.” <sup>11</sup> Vavine ekirato, “Vereḡauka, ḡoi tu asi ḡemu tuḡuriḡo dagarana e guri maki variḡo. Mani maḡuri nanuna tu ainana boḡabiani? <sup>12</sup> ḡoi tu varaḡe lelevaḡi, ma ḡai senema Iakobo tu kei, ei? Mai nanu gurina tu ḡia na evinimato, ema ḡia tauḡena na eniuato-ḡoi, natuna mabarari na ema ḡena boromakau e mamoe seriri na maki ḡeniuato-ḡoi.” <sup>13</sup> Iesu na ma evaḡa-veseato, ekirato, “Mai nanu beḡe niuani tarimari mabarari bokari ma beḡe koke-ḡenoḡoini. <sup>14</sup> A au na baviniyani nanuna beniuani tarimana tu, bokana asi ma beḡe-ḡenoḡoini. Korana au na baviniyani nanuna tu ḡia nuḡanai nanu gurinai beiaḡoni, bevoneḡoi-voneḡoini ema maḡuri vanaḡivanaḡi beviniani.” <sup>15</sup> Mo vavine na enoḡiato, ekirato, “Vereḡauka, mani nanu novinigu, be bokagu asi ma bene koke-ḡenoḡoi, ema maiḡana nanu-ḡutu asi ma bana iaḡoma.”

<sup>16</sup> Benamo Iesu na evaḡa-guruḡaiato, ekirato, “Noiaḡo, ḡaraḡomu noa keaia, benamo taumi ruarua boḡono iaḡoma.” <sup>17</sup> Mo vavine evaḡa-veseto, ekirato, “Au tu asi ḡaraḡogu.” Iesu ekirato, “Mani tu moḡoni okirani, ‘Au tu asi ḡaraḡogu’ otoni tuna. <sup>18</sup> ḡemu guruḡa tu moḡoni, korana ḡoi tu vaḡa-imaima veḡata oveḡaraḡoto, ema mani oḡabiato tarimana maniḡa tu dia ḡoi ḡaraḡomu. <sup>19</sup> Mo vavine ekirato, “Vereḡauka, au toma bama riba, ḡoi tu peroveta tarimamu. <sup>20</sup> ḡai tubuma ḡatama na tu mai ḡoro ai Barau ḡetoma-rakariḡo viniato-ḡoi, a ḡomi Iuda tarimami ḡokirani, toma-rakariḡo gabuna tu Ierusalem ai moḡa, be tarimarima tu monai beḡene toma-rakariḡo.”

<sup>21</sup> Iesu ekirato, “Vavine, ḡegu guruḡa bono vaḡa-moḡonia, ḡaro ta eiaḡomani, mai ḡoro ai e Ierusalem ai maki Tamara asi boḡo toma-rakariḡo viniani. <sup>22</sup> ḡomi Samaria tarimami na ḡotoma-rakariḡo viniani Barauna tu asi ribami; a ḡai na ḡatoma-rakariḡo viniani Barauna tu ribama, korana vevaḡa-maḡuri tu ḡai Iuda tarimama ḡemana eiaḡomani. <sup>23</sup> Senaḡi ḡarona eiaḡomani ema varau beraḡasi maiḡa, toma-rakariḡo tarimari moḡoniri na Tamara Barau tu iaukai e moḡoni ai beḡe toma-rakariḡo viniani. Korana Tamara na tu moḡesi beḡe toma-rakariḡo viniani tarimari evetaurini. <sup>24</sup> Barau tu iauka, ma beḡe toma-rakariḡo viniani tarimari na tu iaukai ema moḡoni ai beḡene toma-rakariḡo vinia.” <sup>25</sup> Mo vavine na ekiraiato, ekirato, “Au ribagu, Mesia, ḡekiraḡiani Keriso ḡetoni, tu beiaḡomani. ḡia beiaḡomani ḡaronai, ḡia na dagara mabarari bekiraḡi-foforirini.” <sup>26</sup> Benamo Iesu na evaḡa-veseato, ekirato, “Tarimana tu au maiḡegu, ḡoi avaḡa-guruḡamuni.”

*Iesu ġena mero ġeġenoġoito*

<sup>27</sup> Iesu moġesi eguruġato-ġoi nuġanai, ġena mero ġeraġasito. Ġia mabarari nuġari ġefarevaġito, korana Iesu tu vavine ta ġesi ġeguruġa guruġato-ġoi, senaġi tarima ta asi ekirato, “Ġoi tu kara ourani?” O “Karase nai mai vavine ġesi ġoguruġa-guruġani?” <sup>28</sup> Benamo mo vavine na ġena nanu gwaġutuna eraga-kwaneato, eġenoġo-iaġoto vanuġa ġana, benamo vanuġa tarimari ea kirarito. <sup>29</sup> Ekirato, “Ġoiaġoma, tarima ta ġoma ġitaia. Ġia na au ġegu veiġa aveirito dagarari mabarabarari bekiraġi-fofori foforiri. Betaġu ġia tu Keriso, (Barau na ekiraġi-toreato vevaġa-maġuri tauna), banaġu?” <sup>30</sup> Benamo tarimarima na vanuġa ġeiaġuiato, ma Iesu ġenai ġeiaġoto.

<sup>31</sup> Mo faka nuġanai ġena mero na Iesu ġekiraiato, ġekirato, “Vevaġa-riba tarimamu, noġaniġani.” <sup>32</sup> Senaġi ġia evaġa-veseto, ekirato, “Au tu ma ġagu ġaniġani, ġomi asi ribami ġaniġanina.” <sup>33</sup> Moġesina naima ġena mero tauġeri ġevedanaġito, ġekirato, “Tarima ta na ġana ġaniġani beġwa-iaġoma ba?” <sup>34</sup> Iesu na ekirarito, ekirato, “Au ġagu ġaniġani tu etuġuguto Barauna ġena ura bana veia, ema eviniguto ġauveina bana vaġa-koria.

<sup>35</sup> Ġomi ma ġemi sisiba guruġana, ġokirani, ‘Ġue vasivasi murinai vau kwakwa ġarona beiaġomani.’ A au na akiramini, matami ġokeori, benamo vamoka ġoġita-ginikauri, tauri tu varau beġe gwaġiġi, kwakwa ġarona tu beraġasi. <sup>36</sup> Kwakwa tarimana ġena ġauvei voina tu beġabiani, ema vamoka ġaniġanina bevaġa-vegogoani tu, maġuri vanaġivanaġi ġana. Tauna moġa, varovarona tarimana e kwakwa tarimana beġe iaku-vegogoni. <sup>37</sup> Korana moġesi bevetoreni nai tu, iniġesina ġekiraġiani guruġana tu moġoni, ‘Tarima ta na tu evaroani, ma ta na tu ekwaiani.’ <sup>38</sup> Au na ġomi atuġumito tu, asi ġovaro-vekwaraġito dagarari kwakwari. Varovarori vekwaraġiri tu tarima tari ġevekwaraġito, a ġomi na tu ġia ġeri vekwaraġi dagarari kwakwari boġo raka-toġa.”

*Samaria tarimari ġutuma na Iesu ġevaġa-moġoniato*

<sup>39</sup> Benamo Samaria tarimari vovoka mo vanuġa nuġanai Iesu ġevaġa-moġoniato, korana tu mo vavine ġena vevarifiu guruġana ġenana naima, ġia ekirato, “Au ġegu veiġa rakavari aveirito dagarari mabarabarari bekiraġi-fofori foforiri.” <sup>40</sup> Moġesina naima Samaria tarimari Iesu ġenai ġeiaġomato nai tu, ġenoġiato, ġia ġesi roġo beġene tanu. Moġa lorinai Iesu mo vanuġai ġaro ruarua ma etanuto. <sup>41</sup> Ma tarimarima vovoka na Iesu ġevaġa-moġoniato, korana ġena vevarifiu guruġari na. <sup>42</sup> Benamo ġia na mo vavine ġekiraiato, ġekirato, “Ġai na maitoma Iesu ġavaġa-moġoniani, dia ġoi ġemu guruġa lorinai, senaġi ġai tauġema na ġia baġa seġaġia, ma baġama riba-ginikau, ġia tu moġoni Keriso, tanobara Vaġa-maġurina Tarimana.”

*Vere ta natuna merona Iesu na keve na evaġa-maġuriato*

<sup>43</sup> Iesu monai ġaro ruarua etanuto murinai, Galilea ġana ma eiaġoto. <sup>44</sup> Iesu tauġena na ekiraġi-foforiato, ekirato, “Peroveta tarimana tu ġena vanuġa korikorina tarimari na asi beġe gubakauani.” <sup>45</sup> Benamo Galileai ea votuto nai tu, Galilea tarimari na ġeġabi-raġeato. Iesu ġeġabi-raġeato korana Ierusalemaj Pasova verekona nuġanai tu ġia maki monai, be Iesu na kara eveirito dagarari mabarari tu, matari na ġeġitarito.

<sup>46</sup> Benamo Iesu ma eġenoġoito Galilea vanuġana ta arana Kana ġana. Kana tu Iesu na nanu wain ai evaġa-iaġoato vanuġana. Monai kini ġena vere ta Kaperanaumaj etanuto-ġoi, ma ġia natuna merona tu ekeve-rakavato. <sup>47</sup> Mo vere eseġaġito, Iesu tu Iudea na eiaġomato Galilea ġana, benamo eiaġoto ġia ġenai, benamo enoġiato, Kaperanauma ġana nevariġo, be ġia natuna merona nea vaġa-maġuria, korana ġia natuna merona tu dori emaseto-ġoi.

<sup>48</sup> Iesu na ekiraiato, ekirato, “Ġomi tu vetoġa boruri e nuġa-farevaġi veiġari asi boġo ġitarini tu, asi boġo vaġa-moġoniguni.” <sup>49</sup> Mo vere ekirato, “Vereġauka, si-iaġo, natugu bemaseni ġesi.” <sup>50</sup> Iesu na ekiraiato, ekirato, “Noiaġo, natumu merona tu bemaġuri bene.” Mo tarima na Iesu ġena guruġa evaġa-moġoniato, benamo eiaġoto.

<sup>51</sup> Dabara na eġenoġoi-iaġoto-ġoi nuġanai, ġena vetuġunaġi tarimari ġesi ġevedoġarito, benamo ġekira-varaiato, ġekirato, “Ġoi natumu merona tu bemaġuri.”

<sup>52</sup> Benamo ġia na edanaġirito, kamara horai natuna merona enamoto. Ġia ġevaġa-veseto, ġekirato, “Ġoraġani horaġauna 1 koloko lavilavi rekenai ġia mo keve na eraga-kwaneato.” <sup>53</sup> Benamo tamana eriba-maoroto, mo aoa korikorinai enamoto, Iesu na ġia evaġa-guruġaiato, ekirato, “Ġoi natumu tu bemaġuri.” Benamo ġia e ġena numa tarimari mabarari ġesi Iesu ġevaġa-moġoniato. <sup>54</sup> Mai tu vetoġa boruna vaġa-ruaruana Iesu na eveiato, Iudea na Galilea ġana eiaġoto murinai.

## 5

### *Kou ai Iesu na tarima ta evaġa-namoato*

<sup>1</sup> Mai veiġa murinai Iesu tu Ierusalem ma evaraġeto, korana Iuda tarimari tu ġeri vereko ta ġeveiato-ġoi.

<sup>2</sup> Ierusalem ai kou ta tu ġatama-boka baregona arana Mamoe Ġatama-bokana sevinai. Mo kou arana Heberu garo ai tu Betesda, ma ġia sevinai tu iaġaraġi foutari imaima (5). <sup>3</sup> Ġaro mabarari ai kevekeve tarimari vovoka monai ġegena-taġoto-ġoi, mata-bubu, kwaku rakava, ema tauġaniri ġemaseto tarimari, [nanu ġena ġareva-ġareva ġevaġa-nogaiato-ġoi. <sup>4</sup> Korana aneru ta guba na emariġoto-ġoi, mo nanu evaġa-ġareva ġarevaiato-ġoi. Mo nanu eġarevato-ġoi nuġanai, eturu-ferei guineto-ġoi tarimana tu ġena keve enamoto-ġoi.]

<sup>5</sup> Monai tarima ta egena-taġoto-ġoi, ġena keve laġaniri tu gabana toitoi ma imaima toitoi (38). <sup>6</sup> Iesu na monai genataġonai eġitaiato, ma eribato, ġia tu ġaro vovoka veġata ekeve-iaġiato. Benamo Iesu na edanaġiato, ekirato, “Ġoi ourani nonamo ba?”

<sup>7</sup> Keve tarimana na evaġa-veseato, ekirato, “Vereġauka, nanu eġareva-ġarevani nai, au kou ai tu asi tau raga tore-reigu tarimana ta. Mainana tauġegu kou aiaġo-viniani nai tu, ta eraka-rei-guineni. <sup>8</sup> Iesu na ekiraiato, ekirato, “Novariġisi, ġemu geda noġabi-vaizia, be noraka.” <sup>9</sup> Benamo mo tarima ġena keve asikau enamoto, ma ġena geda eġabi-vaiziato, benamo eruġa-vaizito, erakato.

Mo veiġa tu Sabadi ai eġorato. <sup>10</sup> Moġa lorinai Iuda tarimari na mo keve na enamoto tarimana ġekiraiato, ġekirato, “Toma tu Sabadi, ġemu geda asi bono ġwa-rakao rakaoa, taravatu.” <sup>11</sup> Ġia na evaġa-veserito, ekirato, “Au bevaġa-namogu tarimana na bekiragu, bekira, ‘Ġemu geda noġabi-vaizia, be noraka,’ besi.” <sup>12</sup> Benamo ġia na ġedanaġiato, ġekirato, “Mo tu kamara tarima na bekiramu, ‘Ġemu geda noġabi-vaizia, be noraka,’ besi?” <sup>13</sup> Senaġi mo Iesu na evaġa-namoato tarimana tu asi ribana, dei na evaġa-namoato, korana Iesu tu eraka-veġitato, tarima ġutuma mo gabu ai vekaravari na.

<sup>14</sup> Gabivau Iesu na mo tarima Rubu Veaġa nuġanai edoġariato, benamo ekiraiato, ekirato, “Noseġaġi, maitoma ġoi tu bonamo. Veiġa rakavana ta asi ma bono veiġenoġoia, rakava barego vedaureana ta na beġabimuni ġesi.” <sup>15</sup> Benamo mo tarima erakato, eiaġoto, Iuda tarimari ea kira-vararito, ġia tu Iesu na evaġa-namoato.

<sup>16</sup> Monana vau Iuda tarimari na Iesu ġevaġa-rakavaiato-ġoi, korana Sabadi ai mo vevaġa-maġuri veiġana eveiato nai. <sup>17</sup> Benamo Iesu na evaġa-veserito, ekirato, “Au Tamagu tu vanaġivanaġi eġauveini naima, au maki aġauveini.” <sup>18</sup> Moġesi ma ekirato nai, Iuda tarimari ġeri ura tu dabara ta veġata beġene ġoitaġoa, be Iesu tu beġene vaġi-masea ġetato. Dia mo Sabadi asi ekorana-iaġiato moġo dainai, senaġina ekirato, Barau tu ġia Tamana ma etato. Korana mo dabarai ġia tu Barau ġesi ilaila etato.

### *Barau Natuna ġena seġuka*

<sup>19</sup> Benamo Iesu na evaġa-veserito, ekirato, “Moġoni, au na akira-korikorimini, Natuna ġereġana na kara ta asi beveiani, senaġi Tamana ġena veiġa beġitarini veiġari moġo ġia na beveirini. Tamana kara eveini dagarari mabarabarari Natuna na maki beveirini.

<sup>20</sup> Korana tu Tamana na Natuna eura-viniani, ema ġia na eveirini dagarari mabarari maki

evaġa-ġitaiani. Oba, dagara barego lelevaġiri maki ġenai bevaġa-foforiani, maiġeri dagara maki beġe vanaġirini, ġomi nuġami beġene farevaġi ġana. <sup>21</sup> Vaġa-ilailana Tamana na mase tarimari evaġa-vaisi-raġerini, benamo maġuri evinirini kavana, Natuna na maki ġena ura tarimari maġuri evinirini. <sup>22</sup> Tamana na tu tarima ta asi evaġa-kotaiani, korana vevaġa-kota seġukana mabarana tu Natuna eviniato. <sup>23</sup> Moġa tauna tu, tarimarima mabarari na Natuna beġene gubakaua, Tamana ġeguba-kauani kavana. Natuna asi eguba-kauani tarimana na tu Tamana maki asi egubakauani, korana Tamana na tu Natuna etuġuato.

<sup>24</sup> Moġoni au na akiramini, au ġegu guruġa eseġaġiani ema etuġuguto Barauna evaġa-moġoniani tarimana na maġuri vanaġivanaġi varau beġabia. Ġia tu Barau ġena Kota nuġanai asi beraka-toġani. Asiġina. Mase varau beraga-kwanea, maġuri nuġanai varau beraka-toġa.

<sup>25</sup> Moġoni akiramini, ġarona roġo beiaġomani, ma varau bevotu, mase tarimari na Barau Natuna garona beġe seġaġiani, ma beġe seġaġiani tarimari tu beġe maġurini. <sup>26</sup> Korana tu Tamana tauġena ġenai maġuri etanuni ilailanai, Natuna maki moġesi eviniato, maġuri ġenai etanuni. <sup>27</sup> Ema ġia Natuna maoro eviniato, bene vevaġa-kota ġana, korana ġia tu Tarimarima Natuna. <sup>28</sup> Nuġami asi beġene farevaġi! Ġarona mani eiaġomani, mase tarimari mabarari roġo gara nuġari ai na Barau Natuna garona beġe seġaġiani. <sup>29</sup> Benamo beġema raka-rosini: Vei-namo tarimari beġe vaisi-raġeni, maġuri beġene ġabia ġana, a vei-rakava tarimari beġe vaisi-raġeni, rakava voina metona beġene ġabia ġana.”

#### *Iesu beġe kiraġi-foforiani*

<sup>30</sup> “Au tu ġereġagu na dagara ta asi baveiani riba. Avevaġa-kotani maki Barau na ekiraguni aseġaġirini ilailari ai aveirini, moġa lorinai ġegu vevaġa-kota tu roroġoto, korana dia au tauġegu ġegu ura ta akorana-iaġiani, senaġi au etuġuguto Barauna ġena ura moġo aveiani.

<sup>31</sup> Bema au tauġegu moġo bara vekiraġi-fofori nai tu, au ġegu guruġa tu asi tau vaġa-moġonina. <sup>32</sup> Senaġi tarima ta na maki au evaġa-moġoniguni, ma au ribagu, ġia na au ekiraġi-foforiguni guruġana tu moġoni.

<sup>33</sup> Ġomi na tarima kotari ġotuġu-iaġorito Ioane ġenai, benamo ġia na guruġa moġonina ekiraġiato. <sup>34</sup> Au vaġa-moġonigu guruġari tu dia tarimarima ġerina eiaġomani, a Ioane bakiraġia korana tu, ġomi maġuri boġono doġaria uranai. <sup>35</sup> Ioane tu noġa moġo lamefa eġarato-ġoi ema emore-taġoto-ġoi, benamo ġomi mo faka kotunai ġemi ura tu, ġia ġena mamai boġono iaku-tanu moġo ġotato-ġoi.

<sup>36</sup> Senaġi au ġevaġa-moġoniguni veiġari na, Ioane na evaġa-moġoniguni guruġari, moġeri tu ġevanaġirini. Korana tu Tamagu na eviniguto ġauveina maitoma aveiani, mainana au evaġa-moġoniguni, au tu Tamagu na etuġuguto. <sup>37</sup> Au tu Tamagu na etuġuguto, ma ġia tauġena na maki au ekiraġi-foforiguto. Ġomi na ġia garona tu roġosi ġoro seġaġia, ema vetoġana maki roġosi ġoro ġitaia. <sup>38</sup> Ema ġena guruġa ġomi nuġami ai tu asi etanuni, korana ġia na etuġuato tarimana tu asi ġovaġa-moġoniani.

<sup>39</sup> Ġomi na Buka Veavaġa guruġari ġovetau-ginikaurini, korana ġomi ġotuġamaġini tu, moġeri guruġa nuġari ai maġuri vanaġivanaġi boġo doġariani. Moġeri guruġa na tu au ġekiraġiguni. <sup>40</sup> Senaġina ġomi maġuri ġabiġabina uranai au ġegu ai iaġoma tu asi ġourani.

<sup>41</sup> Au tu tarimarima ġerina vevaġa-raġe tu asi avetauani. <sup>42</sup> Senaġi ġomi aiġesi, au tu ma ribagu. Au ma ribagu ġomi nuġami o lorumi ġuturi ai Barau uravinina tu asi etanuni.

<sup>43</sup> Au aiaġomato tu Tamagu aranai, ma asi ġoġabi-raġeguni. Senaġi tarima boruna ma beiaġomani tauġena aranai nai tu, boġo ġabi-raġeani. <sup>44</sup> Ġomi tu tauġemi fakami ai moġo ġovevaġa-raġeni tu ġoġabi-raġerini. Senaġi mo vevaġa-raġe tu Barau ġereġana na moġo beveiani. Ma Barau ġenana eiaġomani mo vevaġa-raġe, ġomi na tu asi ġourani



boḡono ḡabia. Bema ḡomi maniḡesi tauḡemi fakami ai moḡo ḡovevaḡa-raḡeni nai tu, kamasi au boḡo vaḡa-moḡoniguni?

<sup>45</sup> Asi boḡono tuḡamaḡi, au na Tamagu ḡoiranai bavaḡa-daḡamini, asiḡina. Vaḡa-daḡa tarimana tu ḡoḡabi-raḡeani tarimana, Mose, ḡia na ḡomi bevaḡa-daḡamini. <sup>46</sup> Bema ḡomi na Mose moḡoni boḡoro vaḡa-moḡonia nai tu, au maki boḡoro vaḡa-moḡonigu, korana ḡia na tu au varigu etoreato. <sup>47</sup> Senaḡina bema ḡia na etoreato guruḡana asi boḡo vaḡa-moḡoniani nai, au ḡegu guruḡa tu kamasi boḡo vaḡa-moḡoniani?"

## 6

*Iesu na daḡara imaima (5,000) eḡuburito*

*Luka 9:10-17*

<sup>1</sup> Moḡa murinai Iesu Galilea kouna na evanaḡi-iaḡoto tavi ta reke ḡana. Mo kou arana ta tu Tiberia. <sup>2</sup> Benamo tarimarima vovoka tabutabu ḡia murina na ḡeiaḡoto, korana vetoḡa boruri eveito keve tarimari ḡeri ai ḡeḡitarito nai. <sup>3</sup> Moḡa murinai Iesu ḡoro ḡana evaraḡeto, benamo monai ḡena mero ḡesi ḡetanu-tarito. <sup>4</sup> Iuda tarimari ḡeri vereko arana Pasova ekavinaḡito-ḡoi ḡoirai. (Mai tu Iuda tarimari mase aneruna na evanaḡirito moḡo, asi evaḡirito, verekona).

<sup>5</sup> Iesu eboḡe-vaisito, tarimarima asisebo ḡia ḡenai ḡeiaḡomato-ḡoi, benamo ḡia na Filipo ekiraiato, ekirato, "Ḡita ḡaniḡani tu ainai toma tavoini, maiḡeri tarimarima mabarari taḡubu-iaḡirini?" <sup>6</sup> Iesu moḡesi ekirato, korana Filipo nuḡana bene ribaia ḡana. A ḡia tu ma ribana kara beveiani.

<sup>7</sup> Filipo na evaḡa-veaseato, ekirato, "Silva moniri sinau ruarua (200) na ḡaniḡani dagarari bita voini, senaḡi asi beḡe ilailani, mai tu koturi koturi moḡo maki asi veḡata mabarari beḡe ḡanini." (Silva moniri sinau ruarua (200) tu tarima ta davana ḡue imaima toitoi (8) nuḡanai beḡabini kavana).

<sup>8</sup> Ḡena mero ta arana Anduru, Simona Petero tarina, ḡia na ma evaḡa-veaseato, ekirato, <sup>9</sup> "Mero misina ta maiḡa, ḡia tu ma ḡana beredi imaima (5) e maḡani-kone ruarua (2). Senaḡi asi beḡe ilailani mai tarimarima mabarari ḡeri ai tu-na."

<sup>10</sup> Iesu na ekirarito, ekirato, "Tarimarima ḡokirari, ḡetanutanu-tari." Mo ḡabu moḡa ḡauḡana tu vovoka. Benamo tarimarima mabarari ḡetanutanu-tarito. Tau ḡereḡari moḡo mabarari tu 5,000 kavana. <sup>11</sup> Benamo Iesu na mo beredi eḡabirito, Barau evaḡa-namoato, benamo ḡetanutanu-tarito tarimari mabarari ḡevini-vaḡa-ḡaurito. Maḡani-kone maki moḡesi eveirito, mabarari ḡeḡabito ḡeri ura ilailari ai. <sup>12</sup> Ḡia mabarari ḡeḡanimaseto, benamo Iesu na ḡena mero ekirarito, ekirato, "Beredi kwari mabarari ḡovaḡa-vegogori, misina ta maki asi bene rekwa-rekwa." <sup>13</sup> Benamo mo beredi ḡeḡanirito kwakwari moḡeri mabarari ḡevaḡa-vegogorito, boseḡa gabanana ruarua (12) ḡevaḡa-vonurito.

<sup>14</sup> Tarimarima na Iesu na mai vetoḡa boruna eveiato ḡeḡitaiato nai, ḡekirato, "Moḡoni, mai tu peroveta tarimana tanobara ḡana beiaḡomani ḡetato tarimana." <sup>15</sup> Iesu eribato, tarimarima tu beḡe iaḡomani, ḡia beḡema ḡabi-tariani ḡeri kini ai beḡene vaḡa-iaḡoa ḡana. Moḡesina naima ḡereḡana ḡoro ḡana ma eiaḡo-ḡenoḡoito.

*Iesu nanu iatanai erakato*

*Mataio 14:22-33; Mareko 6:45-52*

<sup>16</sup> Elaviboḡi-iaḡoto nai, Iesu ḡena mero kou ḡana ḡevariḡoto. <sup>17</sup> Monai ḡasi tai ḡeraḡeto, benamo kou na ḡevanaḡito, Kaperanauma ḡana ḡeiaḡoto. Mo tu varau eboḡito, ma Iesu tu roḡosi bere rakakau ḡia ḡeri ai. <sup>18</sup> A iavara baregona tu eragato-ḡoi, be mo kou ureurena maki ebaregato. <sup>19</sup> Iesu ḡena mero kilomita imaima (5) o imaima sebona (6) kavana ḡasi ḡelevaiato nuḡanai, ḡia na Iesu ḡeḡitaiato, nanu iatana na eraka-iaḡomato-ḡoi, ḡasi eiaḡoma-viniato-ḡoi, benamo ḡia tu ḡegarito. <sup>20</sup> Iesu na ekirarito, ekirato, "Asi ḡogari, mai tu au." <sup>21</sup> Benamo ḡia ḡeḡabi-raḡeato, ḡasi ai eraḡekauto, ma asikauna tu ḡeiaḡo-viniato-ḡoi gabunai ḡevotuto.

*Tarimarima na Iesu ḡevetauato*

<sup>22</sup> Elaġanito boġiboġinai, tarimarima vovoka Iesu ġena mero ġasi ai ġeraġeto gabunai ġeruġa-taġoto-ġoi. Ġia ġeribato, tovotovonai monai ġasi tu sebona moġo mo kou rikinai. Ema ma ribari maki, Iesu tu ġena mero ġesi mo ġasi ai asi eraġeto, ġena mero tu ġereġari moġo ġeraġeto ema ġevanaġi-iaġoto. <sup>23</sup> Ġasi kotari Tiberia na ma ġeiaġomato, kou rikinai ġema darokauto. Ġia ġedarokauto gabuna moġa tu, Vereġauka na beredi Barau evaġa-namoato murinai, tarimarima evinirito, ġeġanirito gabuna sevina. <sup>24</sup> Mo tarimarima ġeriba-maoroto, Iesu ma ġena mero ġesi monai tu asiġina, benamo mo ġasi ai ma ġeraġekauto, Kaperanauma ġana ġevanaġi-iaġoto, Iesu ġea vetuato.

*Iesu tu maġuri ġaniġanina*

<sup>25</sup> Tarimarima na Iesu kou tavi ta kefonai ġedoġariato, benamo ġekiraiato, ġekirato, “Vevaġa-riba tarimamu, ġoi tu aitoma mainai boma votu?” <sup>26</sup> Iesu na evaġa-veserito, ekirato, “Au na moġoni akiramini, ġomi na au ġovetauguni korana tu mo beredi ġoġanito, benamo ġoġani-maseto, a dia mo vetoġa boruri ġoġitarito nai, ġovetauguni. <sup>27</sup> Ma beġe rakavani ġaniġaniri ġauveiri asi boġono vei, senaġi ġaniġani roġo betanua-iaġoni, beiaġoni mo, maġuri vanaġivanaġi, ġauveina boġono vei. Mo ġaniġani tu Tarimarima Natuna na bevinimini, korana Tamana Barau na ġia ġenai vetoġa ta eveiato, mo tu ġia evaġa-moġoniato vetoġana.”

<sup>28</sup> Benamo ġedanaġiato, ġekirato, “Ġai Barau ġena ura ġauveiri ġaveini baġa toni tu kara baġana veia?” <sup>29</sup> Iesu na evaġa-veserito, ekirato, “Barau ġena ġauveiri ġomi na boġono veia etoni ġauveina tu maiġa moġo: Etuġuato tarimana boġono vaġa-moġonia.”

<sup>30</sup> Ġia na ma ġedanaġiato, ġekirato, “Ġoi na ġai ġema tu kamara vetoġa boruna boveiani baġa ġitaiani, benamo ġoi baġa vaġa-moġonimuni? Ġoi na kara boveiani? <sup>31</sup> Ġai senema na tu mana ġeġaniato tano fakanai, Buka Veaġa nuġanai ekirani kavana, maiġesi ekirani, ‘Ġia na beredi guba na evini-riġorito ġeġanito.’”

<sup>32</sup> Iesu na evaġa-veserito, ekirato, “Moġoni veġata akiramini, dia Mose na mo beredi guba na evinimito. Asiġi. Au Tamagu na tu moġoni beredi korikorina guba na evinimini.

<sup>33</sup> Korana Barau ġena beredi tu guba na emariġoto tarimana. Ġia na tanobarai ġetanuni tarimari maġuri evinirini.” <sup>34</sup> Benamo ġia na ġekiraiato, ġekirato, “Vereġauka, mani beredi ġaro mabarari ai bono vinima.”

<sup>35</sup> Iesu na ekirarito, ekirato, “Maġuri beredina tu au maiġegu. Au ġegu ai beiaġomani tarimana tu asi ma bevitoani, ema au bevaġa-moġoniguni tarimana tu, bokana asi ma bekokeni. <sup>36</sup> Senaġi au na ġomi tu varau akiramito, ġoġitaguni, senaġi asi ġovaġa-moġoniguni. <sup>37</sup> Tamagu na au eviniguto tarimari mabarari tu, au ġegu ai beġe iaġomani, ema deikara au ġegu ai beġe iaġomani tarimari, au na asi balai-ġenoġoirini. <sup>38</sup> Korana au guba na amariġoto tu, dia au ġegu ura bana veia ġana, senaġina au etuġuguto Barauna ġena ura bana veia ġana. <sup>39</sup> Ema au etuġuguto Barauna ġena ura tu, au eviniguto tarimari mabarari ta asi bana vei-rekwa rekwaia, a mabarabarari mase na ma bana vaġa-variġisi ġenoġoiri ġaro magonai. <sup>40</sup> Korana au Tamagu ġena ura tu, Natuna beġe ġitaiani ema beġe vaġa-moġoniani tarimari mabarari na maġuri vanaġivanaġi beġe ġabiani, ma ġaro dokonai ma bavaġa-variġisi ġenoġoirini.”

<sup>41</sup> Benamo Iuda tarimari ġemugu-muguto, korana ġia ekirato, “Au tu guba na amariġoto beredina.” <sup>42</sup> Benamo ġekirato, “Mai tarima tu Iesu, Iosefa natuna, nene? Ġia tamana e sinana tu ġita ribara. Ma kamara dabarai ġia tu ekirani, ‘Au tu guba na amariġoto?’”

<sup>43</sup> Iesu na evaġa-veserito, ekirato, “Ġomi tauġemi fakami ai mugumugu ġovaġa-dokoa. <sup>44</sup> Au ġegu ai ta asi beiaġoma-kavani, senaġina Tamagu, au etuġuguto Barauna, ġia na deikara au ġegu ai beinu-kaviani tarimana moġo. Ema au ġegu ai beiaġomani tarimana tu, au na ġaro dokonai mase na bavaġa-variġisi ġenoġoiani. <sup>45</sup> Peroveta tarimari na maiġesi ġetoreato, ‘Ġia mabarari Barau na bevaġa-ribarini.’ Tamagu ġeseġaġi-viniani ema ġenana riba ġeġabini tarimari mabarari tu, au ġegu ai beġe iaġomani. <sup>46</sup> Au tu asi akirani, tarima ta na Tamagu eġitaato atoni, senaġi Barau ġenana eiaġomato tarimana

ġereġana na moġo Tamagu eġitaiato. <sup>47</sup> Moġoni akiramini, au evaġa-moġoniguni tarimana na maġuri vanaġivanaġi beġabiani. <sup>48</sup> Maġuri beredina tu au maiġegu. <sup>49</sup> Ġomi senemi na tano fakanai mana ġeġanito-ġoi, senaġi ma ġemaseto. <sup>50</sup> A guba na emariġoni beredina tu maiġea, ġia beġaniani tarimana tu asi bemaseni. <sup>51</sup> Au tu maġuri beredina guba na amariġoto. Tarima ta na mai beredi beġaniani, ġia tu bemaġuri-vanaġi vanaġini. Mai beredi au na baviniani tu au viriġogu. Au viriġogu bavini-fitoġaiani korana tu, tanobarai ġetanuni tarimari na maġuri beġene ġabia ġana.”

<sup>52</sup> Mainana Iuda tarimari tauġeri fakari ai veġare-veġare baregona eġorato, ġia ġekirato, “Mai tarima na tu kamara dabarai ġia viriġona bevinirani bita ġaniani?”

<sup>53</sup> Iesu na ekirarito, ekirato, “Moġoni akiramini, bema ġomi na Tarimarima Natuna viriġona asi boġo ġaniani ema rarana asi boġo niuani nai, ġomi nuġami ai maġuri asi betanuni. <sup>54</sup> Deikara na au viriġogu beġaniani ema raragu beniuani tarimana tu, maġuri vanaġivanaġi beġabiani, ema au na ġaro dokonai mase na bavaġa-variġisi ġenoġoiani. <sup>55</sup> Korana au viriġogu tu ġaniġani korikorina, ema au raragu maki niuniu dagarana korikorina. <sup>56</sup> Deikara au viriġogu beġaniani e raragu beniuani tarimana tu, au nuġagu ai betanuni, ema au maki ġia nuġanai batanuni. <sup>57</sup> Tamagu maġurina na etuġuguto ema au tu ġia korana amaġurini. Moġa ilailanai au viriġogu beġaniani tarimana maki bemaġurini, korana au amaġurini. <sup>58</sup> Au tu guba na emariġoto beredina maiġegu. Ġomi senemi tu mana ġeġanito ma ġemaseto. Senaġi mai beredi beġaniani tarimana tu bemaġuri-vanaġi vanaġini.” <sup>59</sup> Iesu na maiġeri guruġa Iuda tarimari rubu ai ekiraġirito, Kaperanaumai evevaġa-ribato-ġoi nuġanai.

#### Maġuri vanaġivanaġi guruġari

<sup>60</sup> Iesu ġena mero ġutuma na mai guruġa ġeseġaġiato nai tu, ġekirato, “Mai vevaġa-riba guruġana tu gwaġiġi rakava, dei na beġabi-raġeani.” <sup>61</sup> Iesu ribana ġena mero na mo guruġa ġemugumugu-iaġiato-ġoi, benamo ekirarito, ekirato, “Mai guruġa na bevaġa-daġa-raġemi? <sup>62</sup> Bema ġomi na Tarimarima Natuna boġo ġitaiani, beġenoġoi-varaġeni, etanu-iaġiato gabuna ġana tu kamasi? <sup>63</sup> Barau Iaukana na maġuri evinirani; tauġani na asi bevaġa-kavarani. Au na avaġa-guruġamini guruġari tu Iauka, ema ġia nuġari ai tu maġuri etanuni. <sup>64</sup> Senaġi ġomi kotari na tu asi ġovaġa-moġoniguni.” Iesu ribana tovotovona na veġata, deikara ta na tu asi evaġa-moġoniato-ġoi ema deikara na maki ġia berevaiani. <sup>65</sup> Ma ekirato, “Moġesina naima au na akiramito, ta au ġegu ai asi beiaġomakavani, senaġi Tamagu na bevaġa-moġoniani tarimana vau beiaġomani.”

<sup>66</sup> Mo guruġa ġeseġaġiato, monana Iesu ġena mero ġutuma ġia ġenana ġeraka-veġitato, ema ġia ġesi asi ma ġerakao-vegogoto-ġoi. <sup>67</sup> Benamo Iesu na ġena mero gabanana ruarua (12) edanaġirito, ekirato, “Ġomi maki ġourani boġono raka-veġita ba?”

<sup>68</sup> Simona Petero na evaġa-veseato, ekirato, “Vereġauka, ġai tu deikara ġenai ma baġa iaġoni? Maġuri vanaġivanaġi guruġari tu ġoi ġemu ai. <sup>69</sup> Ġai na ġavaġa-moġonimuni ema ġariba-korikorini, ġoi tu Barau ġena Veaġa Tarimana.”

<sup>70</sup> Iesu evaġa-veseto, ekirato, “Au na ġomi gabanana ruarua (12) aġabi-viriġimito nene? Senaġi sebomu ta tu bodiablo.” <sup>71</sup> Ġia na tu Iudas, Simona Isakariota natuna, ekiraġiato. Iudas maki mo mero gabanana ruarua (12) fakari merona ta, senaġi ġia na Iesu vau berevaiani.

## 7

#### Iesu ma tarina merori ġesi

<sup>1</sup> Moġa murinai Iesu tu Galileai erakaoto-ġoi. Ġia asi eurato, Iudea ġana bene iaġo, korana Iuda tarimari monai ġeri ura tu, ġia beġene vaġia. <sup>2</sup> Iuda tarimari ġeri Fouta Verekona ġarona ekavinaġito. (Mai fouta verekona ġeveiato-ġoi nai tu, fouta ġeragato-ġoi, benamo nuġari ai ġetanuto-ġoi, korana seneri tano fakanai fouta nuġari ai ġetanuto-ġoi, moġa beġene tuġamaġi-iaġia ġana). <sup>3</sup> Benamo Iesu tarina merori na ġekiraiato, ġekirato, “Mai gabu noraga-kwanea, Iudea ġana bono iaġo, benamo oveirini

dagarari ġemu mero na beġene ġitari. <sup>4</sup> Korana deikara tauġena bene vevaġa-fofori etoni tarimana, beġene ribaia uranai tu, kara ta asi bevei-vekuretoġaiiani. Ma ġoi tu maiġeri veiġa oveirini, be tanobara mabarari ai novevaġa-fofori!” <sup>5</sup> Korana Iesu tarina mabarari na maki ġia tu asi ġevaġa-moġoniato-ġoi.

<sup>6</sup> Moġa lorinai Iesu na ekirarito, ekirato, “Au ġegu ġaro tu roġosi bene raġasi. A ġomi ġemi ai ġaro mabarari tu loriri ai moġo. <sup>7</sup> Tanobara na ġomi tu asi ebaru-vinimini, senaġi au tu ebaru-viniguni, korana au tu veiġa rakavari eveirini dagarari akiraġi-foforirini. <sup>8</sup> Ġomi boġono iaġo mo vereko ġana. A au tu asi baiaġoni, korana au ġegu ġaro korikori tu roġosi roġo bene raġasi.” <sup>9</sup> Iesu moġesi ekirato, benamo Galileai etanuto.

#### *Iesu Ierusalem ai*

<sup>10</sup> Iesu tarina merori ġeiaġoto mo vereko ġana, muriri ai Iesu maki ma eiaġoto. Senaġi asi eraka-foforito, a vekuretoġai eiaġoto. <sup>11</sup> Mo vereko gabuna Iuda tarimari na tu mo vereko nuġanai ġevetauato-ġoi, ġevedanaġi-vedanaġito-ġoi, ġekirato-ġoi, “Ġia tu ainai?” <sup>12</sup> Mo ġutuma-bara nuġanai Iesu kiraġi-ġairiġairina tu ebarego-rakavato. Tarima kotari ġekirato-ġoi, “Ġia tu tarima namona” ġetato. Ma kotari tu ġekirato-ġoi, “Asiġi, ġia na tarimarima eġorikau-darere darererini.” <sup>13</sup> Senaġi tarima ta na asi eguruġa-iaġi foforiato, korana ġia mabarari Iuda vereri gariri ġeveito-ġoi.

<sup>14</sup> Vereko ġarori kotari ġekorito, kotari roġo moġeri nuġanai vau, Iesu Rubu Veaġai eraka-toġato, benamo evevaġa-ribato. <sup>15</sup> Benamo Iuda tarimari ġeġaba-vedaureato, ġekirato, “Mai tarima vevaġa-riba guruġari tu kamasi eribato, ġia vevaġa-riba gabuna ta ġana riba-vetau tu asi eiaġoto.” <sup>16</sup> Iesu evaġa-veseto, ekirato, “Kara au avevaġa-riba iaġini tu dia au ġegu vevaġa-riba, senaġi au etuġuguto Barauna ġenana ġeiaġomani. <sup>17</sup> Bema tarima ta eurani Barau ġena ura bene veiri etoni tarimana na, au ġegu vevaġa-riba guruġari beribarini. Beribani, au ġegu vevaġa-riba guruġari Barau ġenana ġeiaġomani, o au tauġegu ġeguna moġo. <sup>18</sup> Tarima ta deikara ġena ura guruġari ekiraġini tu, tauġena arana vaġa-raġena dabarana evetauani. Senaġi au etuġuguto Barauna vaġa-raġena dabarana eveiani tarimana ġenai tu, guruġa moġonina etanuni, a ġia ġenai ġofaġofa ta tu asi etanuni. <sup>19</sup> Mose na ġomi taravatu tu evinimito, ene? Senaġi ġomi ta na mo taravatu tu asi ġokorana-iaġiani. Ma karase nai ġomi na au tu ġovaġigu ġotoni?”

<sup>20</sup> Mo tarimarima ġutuma ġevaġa-veseto, ġekirato, “Ġoi tu iauka rakavana ta na eboroġimuto. Deikara na nevaġimu otoni?” <sup>21</sup> Iesu na evaġa-veserito, ekirato, “Au na mainai Ierusalem ai veiġa boruna sebona aveiato nai, ġomi mabarabarami nuġami ġefarevaġini. <sup>22</sup> Mose na mero tauġaniri kefi-lamavaġi veiġana evinimito, moġa lorinai ġomi na mero keiri Sabadi ai maki kefiri ġolama-vaġirini. Mo kefi-lamavaġi veiġana tu dia Mose na esinaiato, senaġi ġomi senemi na ġesinaiato. <sup>23</sup> Bema mero tauġaniri kefiri Sabadi ai ġolama-vaġirini Mose ġena taravatu boġo vanaġiani ġesi, kara dainai au tu ġobaru-viniguni, Sabadi ai tarima ta bavaġa-namo ginikaua nai, ei? <sup>24</sup> Ġomi na dagara tu murikari vetoġari ai asi boġono ġita-viriġiri, senaġi dagara mabarari veiġa roroġotori ai boġono ġita-viriġiri.”

#### *Mai tarima tu Keriso ba?*

<sup>25</sup> Benamo Ierusalem ai tarimari kotari ġekirato, “Mai beġene vaġia ġetoni tarimana tu maiġa. <sup>26</sup> Ġoġitaia, ġia tu ma guguraġina ġesi eguruġani, ma ta na ġenai guruġa ta asi ekiraġiani. Ba betaġu kanisoro tarimari beġe riba, Keriso korikorina tu maiġa. <sup>27</sup> Senaġi Keriso, (Barau na ekiraġi-toreato vevaġa-maġuri tauna), beiaġomani nai, ta asi beribani ġia tu ainana beiaġomani. A mai tarima ainana eiaġomato ġita tu mabarara ma ribara.”

<sup>28</sup> Iesu roġo Rubu Veaġai evevaġa-ribato-ġoi nuġanai, eguruġa-baregoto, ekirato, “Moġoni, ġomi ma ribami au tu deikara e ainana aiaġomato. Senaġi au tu dia tauġegu ġegu urai moġo aiaġomato. Au etuġuguto Barauna tu moġoni. Ma ġomi tu asi ribami ġia. <sup>29</sup> Senaġi au ġia tu ma ribagu, korana au tu ġia ġenana aiaġomato e ġia na etuġuguto.”

<sup>30</sup> Benamo ǵeǵabi-taria ǵetato, senaǵi tarima ta ǵimana ǵia ǵenai asi evenabakauto, korana ǵena ǵaro korikori tu roǵosi bere votu bene. <sup>31</sup> Senaǵi tarimarima vovoka mai ǵutuma nuǵanai ǵia ǵevaǵa-moǵoniato, ǵekirato, “Keriso beiaǵomani nai, vetoǵa boruri veiveiri ai mai tarima bevanaǵiani ba?”

*Nariǵau tarimari ǵetuǵurito Iesu beǵene ǵabia ǵana*

<sup>32</sup> Farisea tarimari ǵeseǵaǵito, tarimarima ǵutuma na mo guruǵa Iesu ǵenai ǵekiraǵi-ǵairiǵairito-ǵoi. Moǵa ǵaramanai Farisea tarimari e Rubu Veaǵa vereri baregori na Rubu Veaǵa ǵitaǵauna tarimari kota ǵetuǵurito, Iesu beǵene ǵabia ǵana. <sup>33</sup> Iesu ekirato, “Au tu ǵaro viravira moǵo ǵomi ǵesi bita tanuni, moǵa murinai ma baraka-veǵitani, etuǵuguto Barauna ǵenai baiaǵoni. <sup>34</sup> Ǵomi na boǵo vetauguni, senaǵi asi boǵo doǵariguni; ema au batanuni gabuna ǵana, ǵomi tu asi boǵo iaǵoni riba.”

<sup>35</sup> Benamo Iuda tarimari tauǵeri ǵevedanaǵito, ǵekirato, “Ǵia tu aiǵana beiaǵoni, be ǵita na asi bita doǵariani riba etoni? Betaǵu ǵia tu beiaǵoni irau bese tarimari ǵeri tanobara ǵana, Iuda tarimari ǵutuma maki ǵia fakari ai ǵetanuni gaburi, monai irau bese tarimari bea vaǵa-ribarini. <sup>36</sup> Mai tu kamara guruǵa ǵia na ekiraǵiani, ekirani, ‘Boǵo vetauguni, senaǵi asi boǵo doǵariguni,’ ema, ‘Au batanuni gabuna ǵana ǵomi tu asi boǵo iaǵoni riba?’”

*Maǵuri eviniani nanuna*

<sup>37</sup> Vereko magona ǵarona, mo tu ǵaro barego lelevaǵina, Iesu eruǵa-vaisito, benamo eguruǵa-fouto, ekirato, “Deikara nanu na bokana bekokeni tu, au ǵegu ai bene iaǵoma, nanu benema niu. <sup>38</sup> Buka Veaǵa nuǵanai ekirani ilailanai, ekirani, ‘Au bevaǵa-moǵoniguni tarimana nuǵana na tu maǵuri nanuna beǵaru-rosini.’” <sup>39</sup> Iesu na Iauka moǵesi ekiraǵiato-ǵoi, kamara tarima Iesu ǵevaǵa-moǵoniani tarimari na vau beǵe ǵabiani. Mo ǵaro ai Iauka Veaǵa tu Barau na roǵosi bere viniri, korana Iesu na Barau ǵena mareva baregona maki roǵosi bere ǵabia nai.

*Tarimarima tauǵeri ǵevetavito*

<sup>40</sup> Tarima kota mo ǵutuma nuǵari ai mo guruǵa ǵeseǵaǵiato, benamo ǵekirato, “Moǵoni, ǵita na peroveta tarimana tanariani tarimana tu maiǵea.” <sup>41</sup> Tarima kotari ǵekirato, “Mai tu Keriso.” Senaǵi kotari ǵekirato, “Asiǵi, Keriso tu Galilea na asi beiaǵomani. <sup>42</sup> Buka Veaǵa nuǵanai ekirani, Keriso tu Davida besena na beiaǵomani, ema Betelehemai, Davida etanuto-ǵoi vanuǵanai, bemaǵurini.” <sup>43</sup> Moǵesina naima tarima tauǵeri fakari ai moǵo ǵevetore-kirato, korana Iesu ǵaramanai. <sup>44</sup> Tarima kota ǵeurato beǵene ǵabia, senaǵina ta ǵimana ǵia ǵenai asi evenabakauto.

*Iuda vereri na Iesu asi ǵevaǵa-moǵoniato*

<sup>45</sup> Rubu Veaǵa ǵitaǵauna tarimari ǵeǵenoǵoito, benamo Rubu Veaǵa vereri baregori ema Farisea tarimari na ǵedanaǵirito, ǵekirato, “Karase nai ǵia tu asi boǵo ǵori-iaǵomaia?” <sup>46</sup> Rubu Veaǵa ǵitaǵauna tarimari ǵevaǵa-veseto, ǵekirato, “Mai tarima eguruǵani kavana, ta roǵosi bene guruǵa.” <sup>47</sup> Benamo Farisea tarimari na ǵekirarito, ǵekirato, “Be, ǵomi maki ǵia na beǵofami? <sup>48</sup> Veǵorikau tarimana ta o Farisea tarimana ta na ǵia evaǵa-moǵoniani ba? Asiǵina! <sup>49</sup> A mai tarimarima na ǵevaǵa-moǵoniani, ǵia tu Mose ǵena taravatu asi ribari tarimari. Barau na ǵeri rakava voiri bevinirini.”

<sup>50</sup> Farisea tarimana ta monai arana Nikodemo. Ǵia tu boǵi ta eiaǵoto Iesu ea ǵitaiato tarimana. Ǵia na ekirarito, ekirato, <sup>51</sup> “Ǵita ǵera taravatu ekirani, tarima tu ǵena guruǵa ǵeseǵaǵi-guineani roǵo, moǵa murinai vau ǵena rakava voina metona beǵe viniani.” <sup>52</sup> Ǵia na ǵevaǵa-veseato, ǵekirato, “Ǵoi maki Galilea tarimamu ba? Buka Veaǵa nuǵana bono vetaua, monana boribani, peroveta tarimana ta Galilea na tu asi beiaǵomani.”

[<sup>53</sup> Benamo tarimarima mabarari ǵeri numa ǵana ǵeiaǵoto.

<sup>1</sup> Senaḡi Iesu tu Olive Ġorona ḡana eiaḡoto. <sup>2</sup> Ma elaḡanito boḡiboḡi iamoiamo tu ḡia ma eḡenoḡoito Rubu Veaḡa ḡana. Monai tarimarima mabarari ḡeiaḡomato ḡenai, ḡetanu-ḡeḡeraḡiato, benamo etanu-tarito, evaḡa-ribarito. <sup>3</sup> Benamo taravatu ḡevevaḡa-riba iaḡirito-ḡoi tarimari e Farisea tarimari na vavine ta Iesu ḡenai ḡeḡori-iaḡoato. Mo vavine tu eveḡura-vanaḡito-ḡoi nuḡanai ḡedoḡariato, benamo ḡeḡori-iaḡoato mo, Iesu ḡesi ḡetanu-taḡoto-ḡoi tarimari mabarari ḡoirari ai ḡea vaḡa-ritoḡoato. <sup>4</sup> Iesu ḡekiraiato, ḡekirato, “Vevaḡa-riba tarimamu, mai vavine tu eveḡura-vanaḡini-ḡoi nuḡanai beḡe ḡoitaḡoa.” <sup>5</sup> Ma Mose ḡena taravatu ekirani, moḡesi beḡe veini vavineri tu, fore na baḡana taki-maseri. Ġoi tu kara mani otoni?” <sup>6</sup> Moḡesi ḡekirato tu, Iesu ḡeriba-ḡaniato, beḡene vaḡa-daḡaia ḡana. Senaḡi Iesu etutuḡu-tarito, tano ai didina ta na etoretoreto. <sup>7</sup> Ġia na roḡo Iesu ḡedanaḡiato-ḡoi nai, eruḡa-vaisito, benamo ekirarito, ekirato, “Deikara ḡomi fakami ai roḡosi roḡo bene vei-rakava nai tu, ḡia na fore bene ḡabia, mai vavine bene ḡidara-guinea.” <sup>8</sup> Benamo Iesu ma etoḡa-tarito, tano ai ma etoretoreto. <sup>9</sup> Ġia na mo guruḡa ḡeseḡaḡiato nai, ḡia tata nuḡari ai ḡeribato ma ḡeri vei-rakava, benamo irau sebori-sebori ḡerakaraka-veḡitato; tau ḡaukari ḡeraka-guineto murinai vau ḡuru-gabi ma ḡerakato. Iesu ḡereḡana moḡo etanuto, monai roḡo eruḡa-taḡoto-ḡoi vavinena ḡesi.

<sup>10</sup> Ġia eruḡa-vaisito nai tu, tarima ta asi eḡitaiato, mo vavine moḡo, benamo edanaḡiato, ekirato, “Ġoi beḡe vaḡa-daḡamu tarimari tu aiḡeri? Ta na ḡemu rakava voina metona asi bevinimu?” <sup>11</sup> Mo vavine evaḡa-veseto, ekirato, “Vereḡauka, sebona ta maki asiḡina.” Benamo Iesu ekirato, “Au na maki ḡemu rakava voina metona asi bavinimuni. Noiaḡo, senaḡi asi ma bono vei-rakava ḡenoḡoi.”]

#### *Iesu tanobara mamana*

<sup>12</sup> Benamo Iesu na tarimarima ma eḡobata-vinirito, ekirato, “Au tu tanobara mamana. Deikara au murigu ai berakani tarimana tu, mukunai asi berakani, senaḡi maḡuri mamana beḡabiani.”

<sup>13</sup> Farisea tarimari na ḡekiraiato, ḡekirato, “Ġoi tu tauḡemu ovekiraḡini; be ḡoi ḡemu vekiraḡi tu asi moḡoni.” <sup>14</sup> Iesu evaḡa-veseto, ekirato, “Asiḡi, au tauḡegu avekiraḡini, senaḡina au na kara akiraḡiani tu moḡoni. Korana au ribagu ainana aiaḡomato ema aiḡana ma baiaḡoni. A ḡomi tu asi ribami au ainana aiaḡomato ema aiḡana ma aiaḡoni. <sup>15</sup> Ġomi tu tarimarima ḡeri vevaḡa-maoro dabaranai ḡovevaḡa-maoroni. Au na ta tu asi avaḡa-maoroani. <sup>16</sup> Senaḡi bema au bavevaḡa-maoroni nai, ḡegu vevaḡa-maoro tu moḡoni. Korana au tu dia ḡereḡagu moḡo avevaḡa-maoroni, senaḡina Tamagu, au etuḡuguto Barauna, au ḡesi baḡa vevaḡa-maoroni. <sup>17</sup> Ġomi ḡemi taravatu ai maki maiḡesi ekirani, tarima ruarua na guruḡa sebona moḡo ḡekiraḡiani nai tu moḡoni. <sup>18</sup> Au tu tauḡegu avekiraḡini; ema Tamagu, etuḡuguto Barauna, na maki au ekiraḡiguni. <sup>19</sup> Benamo ḡia na ḡedanaḡiato, ḡekirato, “Ġoi tamamu tu ainai?” Iesu evaḡa-veseto, ekirato, “Ġomi tu asi ribami au, ma Tamagu maki asi ribami. Bema au boḡoro ribagu tu, Tamagu maki ḡoro ribaia.”

<sup>20</sup> Iesu na mai ḡena guruḡa tu Rubu Veaḡai evevaḡa-ribato-ḡoi, moni ḡevaḡa-vegogoto-ḡoi mauḡana gabunai. Tarima ta asi evenabakauto ḡenai, korana ḡia ḡena ḡaro roḡosi bere votu.

#### *Au baiaḡoni gabuna ḡana ḡomi tu asi boḡo iaḡoni riba*

<sup>21</sup> Iesu na ma evaḡa-guruḡa ḡenoḡoirito, ekirato, “Au tu araka-veḡitani. Ma ḡomi na boḡo vetauguni, senaḡi ḡemi vei-rakava nuḡanai boḡo maseni. Au baiaḡoni gabuna ḡana, ḡomi tu asi boḡo iaḡoni riba.” <sup>22</sup> Benamo Iuda tarimari ḡekirato, “Ġia bekira, ḡia beiaḡoni gabuna ḡana ḡita tu asi bita iaḡoni. Moḡa tauna ḡia tu tauḡena bevevaḡini ba?”

<sup>23</sup> Iesu evaḡa-veseto, ekirato, “Ġomi tu mai tanobara maiḡa mainana eveimito, senaḡi au tu tuḡuna na amariḡoto. Ġomi tu mai tanobara tarimari, senaḡi au tu dia mai tanobara

tarimagu. <sup>24</sup> Moġa lorinai au na ġomi bakirami, ġemi rakavai boġo maseni. Korana bema au, Keriso, asi boġo vaġa-moġoniguni nai tu, ġemi rakavai boġo maseni.”

<sup>25</sup> Benamo ġia na ġedanaġiatio, ġekirato, “Ġoi tu deikara?” Iesu na ma evaġa-veserito, ekirato, “Tovotovonai veġata ġemi akiraġito-ġoi kavana. <sup>26</sup> Guruġa vovoka bara kiraġiri ema bara vevaġa-maoro vinimi, korana ġemi veiġa lorinai. Senaġina sebona moġo, au etuġuguto Barauna tu moġoni, ma ġia ġenana aseġaġito guruġari tanobarai ġetanuni tarimari akira-vararini.”

<sup>27</sup> Ġia tu asi ġetuġamaġi-fakato Iesu na mo tu Tamana ekiraġiatio-ġoi. <sup>28</sup> Benamo ma ekirarito, ekirato, “Ġomi na Tarimarima Natuna ġau ġesi boġo ġabi-vaisiani murinai vau, boġo ribani au tu Keriso. Benamo boġo ribani, au ġereġagu na kara ta ġegu urai moġo asi aveiani, senaġi Tamagu na au kara evaġa-ribaguni guruġari moġo, au na ġomi akira-varamini. <sup>29</sup> Ema au etuġuguto Barauna tu au ġesi, au asi eraga-kwaneguni; korana au na vanaġi-vanaġi tu ġia na eiaku-iaġirini veiġari moġo aveirini.” <sup>30</sup> Tarima vovoka na Iesu ġevaġa-moġoniatio, maiġeri guruġa ekiraġirito-ġoi nai.

#### *Aberahamo natuna*

<sup>31</sup> Benamo Iesu na mo Iuda tarimari, ġia ġevaġa-moġoniatio tarimari, ekirarito, ekirato, “Bema ġomi na au ġegu vevaġa-riba guruġari boġo korana-iaġirini nai, ġomi tu moġoni au ġegu mero korikori. <sup>32</sup> Benamo guruġa moġonina boġo ribaiani, ma mo guruġa moġonina na beruġa-vaġimini, dagara ta na asi ma bebarubarumini.”

<sup>33</sup> Ġia ġevaġa-veseto, ġekirato, “Ġai tu Aberahamo garakana ema ġai tu tarima ta ġena tuġu-rakaorakao tarimanai tu asi ġaiaġoto. Ma ġoi kamasi nai tu okirani, ‘Guruġa moġonina na beruġa-vaġimini?’”

<sup>34</sup> Iesu na evaġa-guruġarito, ekirato, “Akira-korikorimini, deikara rakava eveini, ġia tu vei-rakava ġena tuġu-rakaorakao tarimana. <sup>35</sup> Tuġu-rakaorakao tarimana tu numai asi betanu-vanaġi vanaġini, senaġi numa tarimana natuna tu numai betanu-vanaġi vanaġini. <sup>36</sup> Moġa lorinai bema Barau Natuna na beruġa-vaġimini nai, ġomi tu boġo raka-vaġi korikorini, dagara ta na asi ma bebarubarumini.

<sup>37</sup> Au ribagu ġomi tu Aberahamo garakana, senaġi ġomi ġourani, au tu boġono vaġigu, korana ġomi na ġegu vevaġa-riba guruġari tu, asiġina ġinavaġi moġo ġoġabi-raġerini. <sup>38</sup> Au na tu kara Tamagu ġenai aġitarito dagarari ġomi akira-varamini, a ġomi tu tamami ġenana ġoseġaġito dagarari ġomi na ġoveirini.”

<sup>39</sup> Ġia na Iesu ma ġevaġa-veveto, ġekirato, “Ġai tamama tu Aberahamo.” Iesu na evaġa-veserito, ekirato, “Bema ġomi moġoni Aberahamo natuna nai, ġia na eveirito veiġari ġomi na maki ġoro veiri. <sup>40</sup> Au tu Barau ġenana aseġaġirito guruġari moġoniri mabarari ġomi akira-varamini, senaġi ġomi ġourani tu, au ġovaġigu ġotoni. Aberahamo moġesi asi eveito. <sup>41</sup> Ġomi tu tauġemi tamami, (Diabolo), na kara eveini veiġana ġoveiani.” Ġia ġevaġa-veseto, ġekirato, “Ġai tu dia kuġa-gara tarimama. Ġai Tamama tu Barau moġo ġereġana.”

#### *Diabolo natuna*

<sup>42</sup> Iesu na ekirarito, ekirato, “Bema Barau moġoni ġomi Tamami nai tu, au ġoro ura-vinigu. Korana au tu Barau sevina na aiaġomato. Au ġegu urai asi aiaġomato, senaġi ġia na etuġuguto. <sup>43</sup> Karase nai au na kara akiraġiani guruġana asi ġotuġa-maġi-fakani? Korana au ġegu guruġa tu asi ilaila boġo seġaġirini. <sup>44</sup> Ġomi tu tamami Diabolo ġena tarimarima, be ġomi ġourani tu tamami na euravini-rakavarini veiġari boġono veiri. Tovotovona na veġata ġia tu vevaġi-deba tarimana ema guruġa moġonina tu asi ekorana-iaġiani, korana ġia nuġanai guruġa moġonina ta tu asi etanuni. Ġia eġofaġofani, moġa tu ġia ġena maġuri korikori. Korana ġia tu ġofaġofa tarimana, ema ġofaġofa mabarari tamari. <sup>45</sup> Senaġi au na ġomi tu guruġa moġonina akira-varamini, nuġanai ġomi na au tu asi ġovaġa-moġoniguni. <sup>46</sup> Ġomi ta na au ġegu ai vei-rakava ta bodoġaria ba? A bema au na guruġa moġonina akiraġiani nai, kara dainai au tu asi

govaḡa-moḡoniguni, ei? <sup>47</sup> Barau natuna na Barau ḡena guruḡa beseḡaḡiani. A ḡomi tu dia Barau natuna, moḡa lorinai asi ḡoseḡaḡini.”

### *Iesu ema Aberahamo*

<sup>48</sup> Benamo Iuda tarimari na Iesu ḡekiraiato, ḡekirato, “Ḡai tu moḡoni ḡamaaroni. Ḡoi tu Samaria tarimamu ema iauka rakavana na beborogimu.” <sup>49</sup> Iesu evaḡa-veseto, ekirato, “Au tu iauka rakavana na asi beborogigu. Au tu Tamagu agubakauani, senaḡi ḡomi na au tu asi ḡogubakauguni. <sup>50</sup> Au tauḡegu aragu vaḡa-raḡena dabarana asi avetauani; senaḡi tarima ta na evetauani, ma ḡia tu Kota eseḡaḡini tarimana. <sup>51</sup> Moḡoni veḡata, akiramini, au ḡegu guruḡa bekorana-iaḡirini tarimana tu asi bemaseni.”

<sup>52</sup> Iuda tarimari ḡekirato, “Ḡai toma baḡa riba-ginikau, ḡoi tu iauka rakavana na eborogimuto. Aberahamo emaseto, peroveta tarimari maki ḡemaseto, a ḡoi okirani, deikara na ḡoi ḡemu guruḡa bekorana-iaḡirini tarimana tu asi bemaseni. <sup>53</sup> Ḡai tamama Aberahamo emaseto. Ḡoi na ḡia, tamama Aberahamo, ovanaḡiato, ei? Ḡia emaseto ema peroveta tarimari maki ḡemase-ḡosito. Ḡoi otuḡamaḡini, ḡoi tu deikara?”

<sup>54</sup> Iesu evaḡa-veseto, ekirato, “Bema au tauḡegu bara vevaḡa-raḡe, ḡegu vevaḡa-raḡe tu asi tauna. Senaḡina au tu Tamagu na evaḡa-raḡeguni. Ma ḡia tu ḡomi na ḡokiraḡiani, ḡokirani, ḡomi ḡemi Barau ḡotoni. <sup>55</sup> Ḡomi tu asi ribami ḡia, senaḡi au tu ma ribagu ḡia. Bema au bara kira, au asi ribagu ḡia, au tu ḡofaḡofa tarimagu ḡomi kavana, senaḡi au ma ribagu ḡia ema ḡena guruḡa akorana-iaḡirini. <sup>56</sup> Ḡomi tamami Aberahamo etuḡamaḡito, au ḡegu iaḡoma ḡarona beḡitaiani etato, benamo eiakuto. Eḡitaiato, benamo iauna enamoto.”

<sup>57</sup> Iuda tarimari na Iesu ḡekiraiato, ḡekirato, “Ḡoi ḡemu maḡuri laḡaniri tu gabana imaima (50) maki roḡosi bene doḡaria, ma kamasi tu Aberahamo oḡitaiato otoni?”

<sup>58</sup> Iesu na evaḡa-veserito, ekirato, “Moḡoni akiramini, Aberahamo roḡosi roḡo bere ḡora veḡata, au tu atanuto-ḡoi.” <sup>59</sup> Benamo fore ḡeḡabito, ḡetakia ḡetato, senaḡi Iesu egumuto, benamo vekaravari na Rubu Veavaḡa na eraka-rosito.

## 9

### *Iesu na mata-bubu tarimana evaḡa-namoato*

<sup>1</sup> Iesu eraka-vanaḡito-ḡoi nuḡanai, tarima ta eḡitaiato. Mo tarima tu mata-bubu emaḡurito. <sup>2</sup> Ḡena mero na Iesu ḡedanaḡiato, ḡekirato, “Vevaḡa-riba tarimamu, deikara evei-rakavato, benamo mai tarima matana bubu emaḡurito? Ḡia ba tamana sinana?”

<sup>3</sup> Iesu evaḡa-veseto, ekirato, “Dia ḡia ḡena rakava o dia tamana sinana ḡeri rakava dainai, senaḡi maiḡesi evetoreto korana tu, Barau ḡena seḡuka ḡia ḡenana bene fofori ḡana. <sup>4</sup> Au etuḡuguto Barauna ḡena ḡauvei tu laḡani nuḡanai bisini veiri. Boḡi mani eiaḡomani, ma ta asi beḡauveini riba. <sup>5</sup> Au roḡo tanobarai atanuni nuḡanai, au tu tanobara mamana.”

<sup>6</sup> Mai guruḡa ekiraḡiato murinai, Iesu tano ai ekanunuto. Kanununa na nigo emoḡeato, benamo mo nigo na mata-bubu tarimana matana eianaiato. <sup>7</sup> Ma ekiraiato, ekirato, “Noiaḡo, ḡoiramu Siloam kounai noa ḡuriḡia.” Siloam anina tu “Barau na etuḡuato tarimana.” Benamo eiaḡoto, ḡoirana ea ḡuriḡiato, ma eḡenoḡoito nai, matana tu varau eiaḡaiato.

<sup>8</sup> Ḡia sevina tarimari e vanaḡi-vanaḡi enoḡinoḡito-ḡoi gabunai ḡeḡitaiato-ḡoi tarimari ḡevedanaḡito, ḡekirato, “Mai tarima tu noḡinoḡi gabunai etanu-taḡoto-ḡoi tarimana ene?” <sup>9</sup> Kota ḡekirato, “Tarimana tu maniḡa.” Senaḡi kota ḡekirato, “Asiḡina, mani tu tarima boruna ta, senaḡina ḡitaḡitana moḡo ḡia kavana.” Benamo ḡia tauḡena ekirato, “Tarimana tu au maiḡegu.” <sup>10</sup> Tarimarima ḡekirato, “Be ḡoi matamu tu kamasi boiaḡaia?” <sup>11</sup> Ḡia evaḡa-veseto, ekirato, “Mo tarima arana Iesu, ḡia na nigo bemoḡea, ma au matagu ai beianaia, benamo bekiragu, ‘Siloam kounai noa ḡuriḡia.’ Baiaḡo, baḡuriḡia, benamo matagu baiaḡaia.” <sup>12</sup> Ma ḡedanaḡiato, ḡekirato, “Tarimana tu aiḡa?” Ḡia evaḡa-veseto, ekirato, “Au asi ribagu.”



*Farisea tarimari na mo enamoto tarimana* ġevedanaġi-iaġiatio

<sup>13</sup> Benamo matana enamoto tarimana Farisea tarimari ġeri ai ġeġori-iaġoato. <sup>14</sup> Mo ġaro Iesu na nigo emoġeato, ma mata-bubu tarimana matana evaġa-namoato tu Sabadi ġarona. <sup>15</sup> Moġa lorinai Farisea tarimari na ma ġedanaġi-ġenoġoiatio, kamasi matana eiaġaiatio. Ġia na ekirarito, ekirato, “Mo tarima na matagu nigo na eianaiatio, benamo ġoiragu aġuriġiatio, ma toma tu aboġeboġeni.” <sup>16</sup> Farisea tarimari kotari ġekirato, “Mai tarima tu dia Barau ġenana eiaġomato, korana ġia na Sabadi asi ekorana-iaġiani.” Ma kotari ġekirato, “Vei-rakava tarimari na moġesina veiġari tu kamasi beġe veirini?” Monana ġia tauġeri fakari ai ġevetavi-kirato.

<sup>17</sup> Benamo Farisea tarimari na mo tarima ma ġedanaġiatio, ġekirato, “Ġoi okirani ġia na matamu bevaġa-iaġaia otoni? Ġoi na ġia tu kamasi oġitaiani?” Ġia evaġa-veseto, ekirato, “Ġia tu peroveta tarimana.” <sup>18</sup> Iuda tarimari na mai tarima ġena guruġa asi ġevaġa-moġoniatio, korana ekirato, ‘Tovotovonai au matagu tu bubu, a mai vau aboġeboġe-ginikauni.’ Moġa lorinai tamana e sinana ġekea-iaġomarito. <sup>19</sup> Benamo ġia na ġedanaġirito, ġekirato, “Mai tu ġomi natumi ba? Ma moġoni ġia tu mata-bubu emaġurito ġotoni? Ma kamasi nai tu vau mai ma eboġe-boġeni?” <sup>20</sup> Benamo tamana e sinana ġevaġa-veseto, ġekirato, “Ġai ribama, ġia tu ġai natuma, ema ġai ribama maki, ġia tu mata-bubu emaġurito. <sup>21</sup> Senaġi ġai tu asi ribama, maitoma tu kamara dabarai eboġeboġeni. Ġai maki asi ribama, dei na matana bevaġa-namoa. Ġodanaġia, ġia tu mero barego, be tauġena bevaġa-veseni.” <sup>22</sup> Tamana e sinana moġesi ġekirato, korana Iuda tarimari gariri ġeveito nai. Korana Iuda tarimari na ġevaġa-moġoniatio, tarima ta na Iesu bekiraġiani Keriso betoni tarimana tu, rubu na beġe tore-veġitaiani. <sup>23</sup> Moġesi naima tamana e sinana ġekirato, “Ġia mero barego, be ġodanaġia,” ġetato.

<sup>24</sup> Matana enamoto tarimana ma ġekea-ġenoġoiatio, benamo ġekiraiatio, ġekirato, “Barau novaġa-raġea, be noguruġa-korikori. Ġai ribama, ġoi matamu bevaġa-namoa tarimana tu vei-rakava tarimana.” <sup>25</sup> Matana enamoto tarimana evaġa-veseto, ekirato, “Au asi ribagu, ġia tu vei-rakava tarimana ba asiġi. Dagara sebna moġo ma ribagu: Au matagu tu bubu, senaġi toma tu aboġeboġeni.”

<sup>26</sup> Ġia na ġekiraiatio, ġekirato, “Mo tarima tu kara eveiatio ġoi ġemu ai? Ġoi matamu bubu na tu kamasi evaġa-fafaiatio?” <sup>27</sup> Ġia evaġa-veseto, ekirato, “Au na ġomi tu varau bakira-varami, senaġi ġomi asi ġoseġaġini. Karase nai ġourani ma ġoseġaġi-ġenoġoi ġotoni? Ġomi maki ġia ġena mero ai boġono iaġo ġotoni ba?”

<sup>28</sup> Benamo ġia na ġeguruġa-gwaġiġi viniatio, ġekirato, “Ġoi neġi ġia ġena mero, ġai tu Mose ġena mero. <sup>29</sup> Ġai ribama Barau na Mose evaġa-guruġaiatio. A mani tarima, ġai asi ribama ġia tu ainana eiaġomato!” <sup>30</sup> Matana enamoto tarimana evaġa-veseto, ekirato, “Ia, ġomi tu kamasi ma ġoguruġani, ma ġokirani ġomi tu asi ribami ġia tu ainana eiaġomato ġotoni? Senaġina ġoġitaia, ġia na tu au matagu bevaġa-namoa. <sup>31</sup> Ġita ma ribara, Barau na vei-rakava tarimari tu asi eseġaġi-vinirini, a deikara na ġia ġekorana-iaġiani e ġena ura veiġari ġeveirini tarimari, ġia na tu eseġaġi-vinirini. <sup>32</sup> Tanobara evesinato na veġata tarima ta roġosi tara seġaġi, tarima ta mata-bubu eġorato tarimana matana evaġa-iaġaiatio. <sup>33</sup> Bema mai tarima Barau ġenana asi bere iaġoma, ġia na dagara ta asi bere veia riba.” <sup>34</sup> Ġia ġevaġa-veseto, ġekirato, “Ġoi tu omaġurito veġata na rakava tarimamu, ma kamasi tu ġai novaġa-ribama otoni?” Benamo rubu nuġana na ġelai-rosiatio.

*Farisea tarimari* ġeri mata-bubu

<sup>35</sup> Iesu eseġaġito, matana enamoto tarimana tu ġelai-rosiatio, benamo tarimana edoġariatio nai tu, ekiraiatio, ekirato, “Tarimarima Natuna ovaġa-moġoniani ba, ei?” <sup>36</sup> Mo tarima evaġa-veseto, ekirato, “Vereġauka, ġia tu dei? Nokira-varagu, be bana vaġa-moġonia.” <sup>37</sup> Iesu na ekiraiatio, ekirato, “Tarimana tu varau oġitaiani maiġa, ġoi inította ġia ġesi ġoguruġa-guruġani.” <sup>38</sup> Benamo matana enamoto tarimana ekirato, “Vereġauka, avaġa-moġonimuni.” Benamo evetui-tarito, Iesu etoma-rakariġo viniatio.

<sup>39</sup> Iesu ekirato, “Au tu vevaḡa-kota uranai mai tanobara ḡana aiaḡomato, mata-bubu tarimari beḡene boḡeboḡe ḡana, ema ḡeboḡeboḡeni tarimari matari beḡene bubu ḡana.” <sup>40</sup> Farisea tarimari kota monai ḡia ḡesi, mai guruḡa ḡeseḡaḡiato, benamo ḡekiraiato, ḡekirato, “Ḡoi okirani, ḡai tu mata-bubu otoni?” <sup>41</sup> Iesu evaḡa-veseto, ekirato, “Bema ḡomi mata-bubu nai tu, ḡomi asi ḡemi rakava ḡoro tanu, senaḡi ḡomi ḡokirani ‘Ḡai matama tu iaḡataḡo’ ḡotoni, naima ḡomi ḡemi rakava tu roḡo iatami ai.”

## 10

### *Mamoe narinariri tarimana*

<sup>1</sup> Iesu ekirato, “Moḡoni, au na ḡomi akira-korikorimini, mamoe maḡuna ḡatama bokana na asi beraka-toḡani, senaḡi dabara ta na befaḡa-seḡini tarimana tu lema e verari-verari tarimana. <sup>2</sup> A mamoe ḡitaḡauri tarimana tu ḡatama-boka na beraka-toḡani. <sup>3</sup> Ḡatama-boka narinarina tarimana na ḡena ḡatama-boka bekeoani, benamo mamoe na ḡia garona ḡeseḡaḡiani. Ḡia na ḡena mamoe arari evatorini, benamo eḡori-rosirini. <sup>4</sup> Ḡena mamoe mabarari eḡori-rosirini, benamo ḡia ḡoirari ai erakani, ma ḡena mamoe ḡia murinai ḡerakakauni, korana mamoe ma ribari ḡia garona. <sup>5</sup> A tarima boruna ta murina na tu asi beḡe iaḡoni, asiḡina ḡinavaḡi; tarima boruna ḡenana tu beḡe raga-kwareḡani, korana ḡia garona mamoe tu asi ribari.” <sup>6</sup> Iesu na mo barabore ekira-vararito, senaḡi ḡia tu asi ḡetuḡamaḡi-fakato.

### *Iesu tu mamoe ḡitaḡauri tarimana namona*

<sup>7</sup> Benamo Iesu na ma ekirarito, ekirato, “Au na moḡoni akiramini. Au tu mamoe ḡeri ḡatama-boka. <sup>8</sup> Ḡeiaḡoma-guineto tarimari mabarari tu lema e verari-verari tarimari. A mamoe na garori asi ḡeseḡaḡirito. <sup>9</sup> Au tu ḡatama-boka. Deikara au ḡeguna beraka-toḡani tarimana tu bemaḡurini. Beraka-toḡani, beraka-rosini, ema ḡaniḡani beḡoitaḡoni. <sup>10</sup> Lema tarimana tu asi beiaḡoma-kavani. Senaḡi ḡia tu lema beiaḡomani, vaḡivaḡi beiaḡomani, vevaḡa-rakava kwaikwai beiaḡomani. A au aiaḡomato tu, maḡuri beḡene ḡabia, ema maḡuri na beḡene vonuvonu-raḡe ḡana.

<sup>11</sup> Au tu mamoe ḡitaḡauri tarimagu namona. Mamoe narinariri tarimana namona tu ḡena maḡuri etore-tariani mamoe urari ai. <sup>12</sup> Ḡauvei tarimana ḡevoiani vau mamoe eḡitaḡauni tarimana, ḡia tu dia mamoe ḡitaḡauri tarimana korikori, ema ḡia tu dia mamoe biagunari. Moḡa lorinai boḡa kwaivana rakavana eiaḡomani beḡitaiani nai, mamoe beiaḡuirini ma beraga-kwareḡani. Benamo boḡa kwaivana rakavana na beḡabitaririni, benamo bevaḡa-gari lausirini. <sup>13</sup> Ma voina tarimana eraga-kwareḡani, korana ḡia tu vetuḡunaḡi tarimana ma voina, ema mamoe maki asi etuḡamaḡi-kaurini.

<sup>14</sup> Au tu mamoe narinariri tarimagu namona. Ḡegu mamoe ribagu e ḡegu mamoe maki ma ribari au. <sup>15</sup> Vaḡa-ilailana Tamagu ribana au e au maki ribagu Tamagu kavana. Ema ḡegu maḡuri maki atore-tariani ḡia urari ai. <sup>16</sup> Au ma ḡegu mamoe irauri kotari ḡetanuni. Senaḡi ḡia mai seri nuḡanai tu asi tauri roḡo. Au na ḡia maki baḡoriaḡomarini. Ḡia na au garogu beḡe seḡaḡiani, ema ḡia maki mai seri sebonai beḡe iaḡoni e ḡitaḡauri tarimana maki sebona. <sup>17</sup> Tamagu na eura-viniguni, korana ḡegu maḡuri tu atore-tariani, ema ma baḡabi-ḡenoḡoiani. <sup>18</sup> Tarima ta na au ḡegu maḡuri asi beḡabi-vaḡiani au ḡeguna. Au tauḡegu ḡegu urai atore-tariani. Au tu ma ḡegu seḡuka batoretariani, ema ma ḡegu seḡuka baḡabi-ḡenoḡoiani. Moḡa tu au Tamagu na ekiraguto bana veia.”

<sup>19</sup> Mai guruḡa ḡaramanai Iuda tarimari tauḡeri vekaravari ai moḡo ma ḡevevarekira-ḡenoḡoito. <sup>20</sup> Tarima vovoka ḡekirato, “Ḡia tu iauka rakavana na beboroḡia, be bebabo. Karase nai ḡia ḡoseḡaḡi-viniani?” <sup>21</sup> Senaḡi tarima kotari ḡekirato, “Tarima ta iauka rakavana na beboroḡiani nai tu, maiḡesi asi beguruḡani. Iauka rakavana na mata-bubu tarimari matari tu kamasi bevaḡa-fafarini?”

### *Iuda tarimari na Iesu ḡebaru-viniato*

<sup>22</sup> Monai Rubu Veāga Vaāga-veāgana Verekona Ierusalemāi ārona eābiato. Mo tu faraka āueri nuāanai. <sup>23</sup> Ma Iesu tu Rubu Veāgai Solomona āena touraāe na eraka-iaāoto-āoi. <sup>24</sup> Benamo Iuda tarimari na āeruāa-āeāeraāiato, benamo āedanaāiato, āekirato, “Āai tu roāo āadaradarani. Aitoma vau bokira-varamani, āoi tu deikara? Bema āoi moāoni Keriso, (Barau na ekiraāi-toreato vevaāa-maāuri tauna), nai tu, āemai novekiraāi-fofori ginikau.”

<sup>25</sup> Iesu na evaāa-veserito, ekirato, “Au na tu varau akiramito, senaāina asi āovaāa-moāoniguni. Au Tamagu aranai aveirini veiāari na tu au āevaāa-foforiguni. <sup>26</sup> Senaāi āomi na asi āovaāa-moāoniguni, korana āomi tu dia au āegu mamoe. <sup>27</sup> Au āegu mamoe na tu au garogu āeseāāiani. Ema au ribagu āia, ema āia tu au murigu ai āerakani. <sup>28</sup> Benamo au na maāuri vanaāivanaāi avinirini, ema āia tu asiāina āinavaāi beāe maseni; ema ta na au āeguna asi beāabi-āerevaāirini. <sup>29</sup> Āia tu au Tamagu na au eviniguto, e au Tamagu tu iaru-korokoro, ta na asi bevanaāiani. Ema ta na maki asi ilaila āia āena veāitaāau seāukana āenana beāabi-āerevaāirini. <sup>30</sup> Au ema au Tamagu tu sebona moāo.”

<sup>31</sup> Benamo Iuda tarimari fore ma āeāabito, āetakia āetato. <sup>32</sup> Iesu na ekirarito, ekirato, “Veiāa namori vovoka āomi āoirami ai aveirito. Mo veiāa mabarari tu au Tamagu na eviniguto bana veiri etato. Moāeri veiāa mabarari fakari ai tu, kamara veiāa āaramanai āourani au āotakigu āotoni?”

<sup>33</sup> Iuda tarimari āekirato, “Veiāa namona ta āaramanai āoi tu asi āatakimuni, senaāi āoi na Barau okira-fitoāaiani nai. Āoi tu tarimarima moāo, senaāi tauāemu Barau ai ovevaāa-iaāoni.”

<sup>34</sup> Iesu na evaāa-veserito, ekirato, “Āomi āemi taravatu nuāanai guruāa ta tu maiāesi ekirani, ‘Au akirato, āomi tu barau.’ <sup>35</sup> Āita ma ribara, kara Buka Veāgai ekiraāiani guruāana tu etanu-vanaāi vanaāini. Barau na mo tarimarima ekiraāirito ‘barau’, ma Barau na āena guruāa evinirito tarimari tu āia. <sup>36</sup> A au tu Tamagu na eāabi-viriāiguto, ema etuāuguto tanobara āana; ma kamasai nai tu āokiraguni, āokirani, au na Barau akira-fitoāaiani, korana au akirani, ‘Au tu Barau Natuna’ atoni ei? <sup>37</sup> Bema au Tamagu āena veiāa asi aveirini nai, asi boāono vaāa-moāonigu. <sup>38</sup> Senaāi āena veiāa aveirini nai, mo veiāa boāono vaāa-moāoniri, bema au asi boāono vaāa-moāonigu āotoni tu. Boāono riba ema boāono vaāa-moāonia, Tamagu tu au nuāagu ai etanuni, ema au maki Tamagu nuāanai atanuni.”

<sup>39</sup> Mo guruāa āaramanai āeurato, Iesu ma āeāabi-taria āetato, senaāina āimari na moāo ma eveāabi-vaāito, erakato. <sup>40</sup> Benamo monana Iesu ma eāenoāoito. Eraka-iaāoto, Ioridana āarukana eraka-vanaāito, eiaāoto reke ta kefo, guinenai Ioane ebatisoto-āoi gabuna āana; monai ea tanuto. <sup>41</sup> Tarima vovoka āia āenai āeiaāoto, benamo āekirato, “Ioane na vetoāa boruna ta asi eveiato, senaāi mai tarima guruāana ekiraāirito guruāari mabarari tu moāoni veāata.” <sup>42</sup> Monai tarima vovoka Iesu āevaāa-moāoniato.

## 11

### Lasaro āena mase

<sup>1</sup> Betania tarimana ta arana Lasaro ekeveto. Betania tu Maria ma tobana āuiatona Mareta āeri vanuāa. <sup>2</sup> Mai Maria maiāa mainana Vereāauka muramura bonana namo vedaureana na edioroato, ema Vereāauka kwakuna maki āuina na edau-kaukauato āuiatona. Lasaro tu Maria tobana futuana. <sup>3</sup> Benamo mai āuiato ruarua na Iesu āena guruāa āetuāuto, āekirato, “Vereāauka, āoi na oura-viniani tarimana tu bekeve.” <sup>4</sup> Iesu na mo vari eseāāiato nai tu, ekirato, “Mani keve na tu asi bevei-maseani. Mani tu Barau āena seāuka e mareva baregona bene fofori āana. Ema maniāa āenana Barau Natuna beāene vaāa-raāea.”

<sup>5</sup> Iesu na Mareta ma tarina ġuiatona Maria ema Lasaro tu eura-vinirito-ġoi. <sup>6</sup> Senaġi Lasaro ġena keve varina eseġaġiatio tu, ġaro ruarua roġo ma etanuto, mo etanuto-ġoi gabunai. <sup>7</sup> Mo ġaro ruarua muriri ai ġena mero evaġa-guruġarito, ekirato, “Ġita tu ma siġenoġoi-iaġo Iudea ġana.” <sup>8</sup> Ġena mero na ġekiraiato, ġekirato, “Vevaġa-riba tarimamu, ini ġoraġani Iuda tarimari na tu fore na ġetakimu ġetato, a toma tu siġenoġoi-iaġo ma otoni.” <sup>9</sup> Iesu na evaġa-veserito, ekirato, “Ġaro ta nuġanai horaġauna mabarana tu 12 ene? Bema tarima ta laġani mamana erakani nai tu, asi bevefutu-naġini, korana ġia tu mai tanobara laġani mamana eboġeboġeni. <sup>10</sup> Senaġi mukunai erakani tarimana tu evekaġe-kaġekauni, korana ġia nuġanai mama tu asi etanuni.”

<sup>11</sup> Iesu maiġesi evaġa-guruġa-ġosirito murinai, ma ekirarito, ekirato, “Ġita ġataru Lasaro tu egenani, senaġi au tu aiaġoni, gena na navaġo-tataġaia ġana.” <sup>12</sup> Benamo ġena mero ġekirato, “Vereġauka, bema egenani nai tu, vau ma benamoni.” <sup>13</sup> Senaġina Iesu na mo tu emaseto ekiraġiatio-ġoi. A ġena mero matoru ġekirato-ġoi tu, eiaġaraġini nai egenamaseto ekiraġiani, ġetato-ġoi. <sup>14</sup> Benamo Iesu na ekiravara-ginikaurito, ekirato, “Lasaro tu bemase. <sup>15</sup> Senaġi ġomi ġemi namo atuġamaġiani nai aiakuni, mo ġaro ai au ġia ġesi tu asiġi, korana maiġa ġenana au boġo vaġa-moġoniguni. Be si-iaġo ġenai.”

<sup>16</sup> Benamo Tomasi, arana ta tu Didimo o Kafa ġetato-ġoi, na Iesu ġena mero kotari ekirarito, ekirato, “Ġita maki ġia ġesi si-iaġo, be ġia ġesi bisini mase-sebona.”

#### *Iesu tu maġuri korana*

<sup>17</sup> Iesu ma eraġasito nai eribato, Lasaro tauġanina tu ġaro vasivasi (4) guri ai varau begena. <sup>18</sup> Betania e Ierusema vefakari tu kilomita toitoi (3) kavana. <sup>19</sup> Ema Iudea tarimari vovoka Mareta e Maria ġeri ai ġeiaġoto, tauri beġene vaġa-gwaġiġiri ġana, korana tobari emaseto bene.

<sup>20</sup> Mareta eseġaġito, Iesu tu eiaġomato-ġoi nai, eraga-raka toreġau-iaġoto Iesu ġesi ġea vedoġarito. A Maria tu numai etanu-gwaġiġito. <sup>21</sup> Benamo Mareta na Iesu ekiraiato, ekirato, “Vereġauka, ġoi bere mainai kavana tu, au tobagu asi bere mase. <sup>22</sup> Senaġi au ribagu, initoma maki kara dagara Barau bonoġiani tu, Barau na bevinimuni.”

<sup>23</sup> Iesu na ekiraiato, ekirato, “Ġoi tobamu tu bevariġisi-ġenoġoini.” <sup>24</sup> Mareta na Iesu evaġa-veseato, ekirato, “Au ribagu, ġaro magonai variġisi-ġenoġoi ġaronai ġia tu ma bevariġisi-ġenoġoini.” <sup>25</sup> Iesu na Maria ekiraiato, ekirato, “Au tu variġisi-ġenoġoi ema maġuri. Au bevaġa-moġoniguni tarimana tu bemaseni, senaġina roġo maġuri betanuni. <sup>26</sup> Ema deikara maġuri etanuni nuġanai, au evaġa-moġoniguni tu asiġina ġinavaġi bemaseni. Mai guruġa ovaġa-moġoniani ba?”

<sup>27</sup> Mareta na ekiraiato, ekirato, “Oi Vereġauka, au na avaġa-moġoni korikorimuni, ġoi tu moġoni Keriso, Barau Natuna, tanobara ġana boiaġomani tarimamu.”

#### *Iesu etaġito*

<sup>28</sup> Mareta moġesi ekirato murinai eġenoġoi-iaġoto, benamo tarina Maria vekuretoġai ea kea-ġairiato, ekirato, “Vevaġa-riba tarimana tu beiaġoma ema ġoi ekeamuni.”

<sup>29</sup> Maria na mo guruġa eseġaġiatio nai, asikauna evariġisito, benamo Iesu ġenai eiaġoto.

<sup>30</sup> Mo horai Iesu tu vanuġai roġosi roġo bere raka-toġa, ġia roġo Mareta na mo edoġariatio gabunai roġo. <sup>31</sup> Iuda tarimari, Maria ġetanu-dukudukuato-ġoi tarimari, na Maria ġeġitaiato, eraga-variġisito ma eraka-rosito nai tu, murina na ġerakato. Ġia matoru ġekirato, Maria tu gara ġana eiaġoni, mase tarimana nea taġi-vinia ġana.

<sup>32</sup> Maria eiaġoto, Iesu sevinai eraġasito, ma Iesu eġitaiato nai tu, kwakuna koranai evetui-tarito, benamo evaġa-guruġaiato, ekirato, “Vereġauka, ġoi bere mainai kavana tu, au tobagu asi bere mase.”

<sup>33</sup> Iesu na Maria eġitaiato etaġito-ġoi, ema mo Iuda tarimari, ġia ġesi ġeiaġomato tarimari, maki ġetaġito-ġoi nai tu, ġia nuġana maki tuġamaġina eġabi-rakavaiato, dori etaġito. <sup>34</sup> Benamo Iesu na edanaġirito, ekirato, “Ainai ġotoreato?” Ġia na ġevaġa-veseato, ġekirato, “Vereġauka, noiaġoma, be noma ġitaia.” <sup>35</sup> Iesu etaġito. <sup>36</sup> Benamo Iuda tarimari ġekirato, “Goġitaia, Lasaro tu euravini-rakavaiani.” <sup>37</sup> Senaġi Iuda tarimari

kotari ġekirato, “Mai tarima na mata-bubu tarimana matana evaġa-iaġaiato, be Lasaro maki asi veġata bere vaġa-masea, ene?”

*Iesu na Lasaro mase na evaġa-variġisi ġenoġoiato*

<sup>38</sup> Monana Iesu nuġana ma evaġa-vekwaraġi lelevaġiato, benamo gara gabuna ġana eiaġoto. Mo gara forena kouġana tu fore ta na ġetabe-ġauato. <sup>39</sup> Iesu ekirato, “Fore ġoġabi-veġitaia.” Ma Mareta, mo mase tarimana tobana, na Iesu ekiraiato, ekirato, “Vereġauka, ġia emaseto ġaronna na beiaġoma toma tu ġaro vaġa-vasivasina (4), be bonana tu rakava kwaikwai banaġu.” <sup>40</sup> Iesu na Mareta ekiraiato, ekirato, “Au na ġoi tu bakiramu, bema bovaġa-moġoniguni nai, Barau marevana baregona boġitaiani basi, ene?” <sup>41</sup> Benamo mase tarimana ġetoreato gabuna na fore ġeġabi-veġitaia. Moġa murinai Iesu eboġe-vaisito, benamo ekirato, “Tamagu o, au na ġoi atanikumuni, korana ġoi na varau boseġaġigu. <sup>42</sup> Au ribagu, ġoi na vanaġivanaġi oseġaġiguni. Senaġi maiġesi akirani korana tu mai tarimarima ġeruġa-taġoni maiġeri urari ai. Be ġia na beġene vaġa-moġonia, au tu ġoi na otuġuguto.”

<sup>43</sup> Moġesi eguruġato murinai ekea-fararato, ekirato, “Lasaro, noma rakarosi!” <sup>44</sup> Benamo mo emaseto tarimana mase dabuġari na ġimana kwakuna viriviri-tari e ġoirana ekumu-iaġiato dabuġana ġesi ema raka-rosito. Iesu na ekirarito, ekirato, “Ġoruġaia, be neraka.”

*Iesu vaġivaġina dabarana ġevetauato*

*Mataio 26:1-5; Mareko 14:1-2; Luka 22:1-2*

<sup>45</sup> Benamo mo Iuda tarimari vovoka, Maria ġenai ġeiaġoto moġeri, Iesu na mo veiġa eveirito ġeġitarito nai, vovoka tu Iesu ġevaġa-moġoniato. <sup>46</sup> Senaġi kotari tu ġeġenoġoi-iaġoto Farisea tarimari ġeri ai, benamo Iesu na kara eveirito dagarari ġea kira-vararito. <sup>47</sup> Benamo Rubu Veaġa vereri baregori ema Farisea tarimari na kanisoro tarimari ġekea-vegogorito, benamo ġekirato, “Ġita tu kara toma taveiani? Mai tarima na vetoġa boruri vovoka eveirini. <sup>48</sup> Bema ġia maiġesi ġita na bita ġita-ġuiraġiani moġo nai tu, tarimarima mabarari na ġia beġe vaġa-moġoniani. Benamo Roma tarimari beġe iaġomani, ġita ġera gabu (o Rubu Veaġa) ema ġera tanobara ġita ġerana beġema ġabi-vaġiani.”

<sup>49</sup> Benamo ġia fakari ai tarima ta arana Kaiafas, ġia mo laġani ai tu Rubu Veaġa verena baregona, ġia na ekirarito, ekirato, “Ġomi dagara ta tu asi ribami! <sup>50</sup> Ġomi asi ġotuġamaġi-fakani, namona tu tarima sebna moġo tarimarima mabarari urari ai bene mase, a mai tanobara mabarana beġe vaġa-rakava ġosiġosiani tu asi namo.” <sup>51</sup> Ġia moġesi ekirato tu, dia ġia tauġena nuġana siga moġo eguruġato; senaġi ġia mo laġani ai tu Rubu Veaġa verena baregona, moġa lorinai ġia mo tu eperovetato, Iesu tu bene mase Iuda tarimari mabarari urari ai. <sup>52</sup> Ema Iesu tu dia Iuda tarimari moġo urari ai bemaseni. Senaġi Barau natuna gabu irauirau ai ġetanu-lausilausini tarimari mabarari bene ġabi-vegogori, doġoro sebonai bene vaġa-iaġori ġana.

<sup>53</sup> Moġa lorinai mo ġaro na evesinato eiaġoto tu, Iuda tarimari baregori na Iesu kamasi beġe vaġi-maseani dabarana ġevetauato. <sup>54</sup> Moġesina naima Iuda tarimari ġoirari ai Iesu asi eraka-foforito-ġoi. Mo gabu na eraka-veġitato, eiaġoto tano fakana asi tarimarimana gabuna sevinai, vanuġa ta arana Efraim ġana. Ġena mero ġesi monai ġea tanuto-ġoi.

<sup>55</sup> Iuda tarimari ġeri Pasova verekona tu ekavinaġito. (Moġa tu Iuda tarimari mase aneruna na evanaġirito moġo, asi evaġirito verekona). Ma Iuda tarimari vovoka mo tanobarai ġetanuto Ierusalem ai ġema raka-vegogoto. Ġia ġema raka-vegogoto tauna korikori, Barau ġoiranai beġene veiareva vauro, Pasova verekona bene vesina. <sup>56</sup> Ġia na Iesu ġeġita-vetauato-ġoi, ma Rubu Veaġa nuġanai ġeruġa-vegogoto nai tu, tauġeri fakari ai moġo ġevedanaġi-vedanaġito, ġekirato, “Ġomi tu kamasi mani ġotuġamaġini? Mai vereko ai toma ema ġoira-refoni ba?” <sup>57</sup> Rubu Veaġa vereri baregori ema Farisea tarimari na vevaġa-naġi guruġana tu varau Iuda tarimari ġevinirito, ġekirarito, bema

ta beseḡaḡini Iesu tu ainai, ḡia tu maoromaoro bene iaḡo, Iuda vereri benea kira-varari, be beḡene ḡabia.

## 12

*Maria na Iesu ediḡaiato Betania ai*

<sup>1</sup> Pasova o Iuda tarimari mase aneruna na evanaḡirito moḡo verekona tu ḡaro imaima sebona (6) roḡo ḡoirai nuḡanai, Iesu Betania ḡana eiaḡoto. Lasaro tu Betaniai etanuto-ḡoi, ema monai emaseto, ma Iesu na mase na evaḡa-variḡisiato. <sup>2</sup> Monai Iesu ḡabiraḡena ḡaniḡanina ḡeveiato. Mareta na ḡari ḡaniḡani edabaraiato, ma Lasaro maki monai ḡaniḡani gabunai ḡetanu-vegogoto tarimari ḡesi ḡetanu-vegogoto, ḡeḡaniḡanito. <sup>3</sup> Benamo Maria na muramura bonana namo vedaureana lita kwana kavana eḡabiato, benamo Iesu kwakuna fanafanana ediḡa-iaḡiato, ema ḡuina na Iesu kwakuna fanafanana ma edau-kaukauato. Ma numa mabarana tu mo muramura bonana na evaiato. Mo muramura tu ḡauḡa arana nad ḡokana na ḡeveito-ḡoi, ema voina tu varaḡe rakava. <sup>4</sup> Senaḡi Iesu ḡena mero ta arana Iudas Isakariota, mai tu Iesu vau ma bea revaiani tarimana, ekirato, <sup>5</sup> “Karase mai muramura mabarana tu silva moniri sinau toitoi (300) ai asi bevoivoi-iaḡia? (Mai tu tarima ta davana laḡani ta nuḡanai kavana). Bere voivoi-iaḡia, be voina monina bere ḡabia tu, asi ḡeri-ḡari tarimari bere viniri.” <sup>6</sup> ḡia moḡesina eguruḡato tu, dia asi ḡeri-ḡari tarimari evetuḡa-ḡwarito-ḡoi lorinai, senaḡi korana ḡia tu lema tarimana naima. ḡia na tu moni fusena eḡwa-rakao rakaoato-ḡoi, ma mo fuse ai moni elemarito-ḡoi, benamo ḡena ura dagarari evoi-iaḡirito-ḡoi.

<sup>7</sup> Benamo Iesu ekiraiato, ekirato, “Ḡoraga-kwanea, mai vavinena tu kara bere veia dagarana beveia, ḡia na au tauḡanigu muramura na bedau-guinea, gurigurigu ḡana. <sup>8</sup> Asi ḡeri-ḡari tarimari tu vanaḡivanaḡi ḡomi ḡesi boḡo tanuni, a au tu vanaḡivanaḡi ḡomi ḡesi asi batanuni.”

*Rubu Veaḡa vereri baregori na Lasaro beḡene vaḡia ḡetato*

<sup>9</sup> Iuda tarimari vovoka tabutabu ḡeseḡaḡito Iesu tu Betania ai. Benamo moḡana ḡeiaḡoto, dia Iesu moḡo uranai, senaḡi Lasaro maki beḡene ḡitaia ḡana. Lasaro tu mase na Iesu na evaḡa-variḡisi ḡenoḡoiato. <sup>10</sup> Moḡesi naima Rubu Veaḡa vereri baregori tu ḡeboioḡato, Lasaro maki beḡene vaḡi-masea ḡetato. <sup>11</sup> Korana tu ḡia dainai Iuda tarimari vovoka ḡia ḡerina ḡeraka-veḡitato, benamo Iesu ḡevaḡa-moḡoniato.

*Iesu ḡena rakatoḡa Ierusalemāi ḡevonevone-raḡe viniato*

*Mataio 21:1-11; Mareko 11:1-11; Luka 19:28-40*

<sup>12</sup> Ma elaḡanito nai, vereko uranai ḡeiaḡomato tarimari vovoka ḡeseḡaḡito, Iesu tu Ierusalemāi ḡana varau eraka-iaḡomato-ḡoi. <sup>13</sup> Galamo lauri noḡa dagarari ḡeḡabito, benamo Iesu ḡenai ḡeiaḡoto, ḡeḡabato, ḡekirato, “Hosana!

Isaraela ḡeri Kini sivaḡa-namoa,  
Vereḡauka aranai eiaḡomani  
tarimana sivaḡa-namoa!”

<sup>14</sup> Ma Iesu na doniki natuna ta edoḡariato, benamo iatanai etanukauto, Buka Veaḡa nuḡanai ekirani ilailanai,

<sup>15</sup> “Siona natuna,  
(Ierusalemāi tarimami), asi ḡogari,  
ḡoboḡe, ḡemi Vere eiaḡomani,  
ḡia tu doniki natuna iatanai betanukau.”

<sup>16</sup> Mo ḡaro ai ḡena mero na maiḡeri tu asi ḡetuḡamaḡi-fakarito. Senaḡi Barau na Iesu evaḡa-raḡeato e mareva baregona eviniato murinai vau, ḡia ḡeriba-maoroto, maiḡeri mabarari ḡetorerito tu, ḡia ḡekiraḡiato. Ema ḡeribato, mo veiḡa mabarari tu ḡia ḡenai ḡeveirito.

<sup>17</sup> Iesu na Lasaro gara forena kouḡana na ekea-rosiato, ema mase na evaḡa-variḡisiato ḡaronai, tarimarima tu ḡutuma-bara ḡia ḡesi. Benamo moḡeri tarima na mo veiḡa

ġeġitaato varina tu roġo ġevari-fiuato-ġoi. <sup>18</sup> Tarima ġutuma ġeiaġoto Iesu ġesi vedoġari, korana ġeseġaġito, Iesu na mo vetoġa boruna eveiato dainai. <sup>19</sup> Moġesina nai Farisea tarimari tauġeri fakari ai ġevedare-mutukato, ġekirato, “Ġoġitaiani, ġomi tu asi ġokokoreni. Ġoboġe, mai tanobara tarimana mabarana tu ġia murinai ġerakani.”

*Grik tarimari kotari na Iesu ġevetauato*

<sup>20</sup> Vereko ġaronai toma-rakariġo uranai Ierusalemna ġana ġevaraġeto tarimari fakari ai tu, Grik o Helene tarimari kotari maki ġerakakauto. <sup>21</sup> Ġia ġeiaġoto Filipino ġenai, benamo ġekiraiato, ġekirato, “Verebara, ġai ġaurani tu Iesu ġaġitaia ġatoni.” Filipino tu Galilea tanonai vanuġa arana Betesaida tarimana. <sup>22</sup> Filipino eiaġoto Anduru ea kiraiato, benamo tauri ruarua ġeiaġoto, Iesu ġekiraiato. <sup>23</sup> Iesu na evaġa-veserito, ekirato, “Ġarona varau bema-raġasi, Tarimarima Natuna mareva baregona beġabiani. <sup>24</sup> Moġoni korikori akiramini, widi ġuena tano nuġanai beketo-ġurani ema bemaseni vau, vovokari ġia ġenana beġe ġorani. A widi ġuena tano ai asi beketoni ema asi maki bemaseni nai, ġereġana moġo betanuni. <sup>25</sup> Ġena maġuri eura-viniani tarimana na maġuri vanaġivanaġi tu asi beġabiani, beleaiani. A mai tanobarai ġena maġuri etuġamaġi-fitoġaiani tarimana na, ġena maġuri tu etore-taġoani maġuri vanaġivanaġi ġana. <sup>26</sup> Au vetuġunaġigu eiaġo-vinini tarimana tu au murigu na bene raka; be au ainai, au vetuġunaġigu eiaġo-vinini tarimana maki monai au ġesi. Au vetuġunaġigu eiaġo-vinini tarimana tu, au Tamagu na ġia maki bevaġa-namoani.”

*Iesu ġena mase eguruġa-iaġiato*

<sup>27</sup> “Maitoma au nuġagu tu evekwarāġini, e ġegu tuġamaġi bebarego. Be kara batoni? Nakira, “Tama, mai hora na noma vaġa-maġurigu’ nasi? Asiġina, au ġegu iaġoma tauna korikori aonai tu mai bama raġasi maiġea. <sup>28</sup> Tamagu, ġoi aramu novaġa-raġea.” Benamo garo ta guba na emariġoto, ekirato, “Au na aragu tu varau bavaġa-raġea, ema mai maki ma bavaġa-raġe ġenoġoiani.”

<sup>29</sup> Tarima ġutuma monai ruġa-vegogo na mo garo ġeseġaġiato, benamo ġekirato, “Guba begurua.” Ma kotari ġekirato, “Aneru ta na bevaġa-guruġaia.” <sup>30</sup> Iesu na evaġa-veserito, ekirato, “Mani garo tu dia au uragu ai nai beiaġoma, senaġi ġomi urami ai nai beiaġoma. <sup>31</sup> Maitoma tu tanobarai Barau na vevaġa-maoro eveiani. Maitoma Barau na mai tanobara verena, Satani, evaġa-darereani. <sup>32</sup> Benamo au tano iatana na beġe ġabi-vaiguni, monana tarimarima mabarari au ġegu ai bainu-kavirini.” <sup>33</sup> Ġia maiġesi eguruġato tu, ġia ġena mase ai tu aiġesi bemaseni moġa ekiraġi-rosiato.

<sup>34</sup> Tarimarima ġevaġa-veseto, ġekirato, “Ġai taravatu guruġari na ġaseġaġito, Keriso tu betanu-vanaġi vanaġini, ma ġoi kamasi nai tu okirani, Tarimarima Natuna tu beġe ġabi-vaiguni? Tarimarima Natuna tu deikara ei?” <sup>35</sup> Benamo Iesu na ekirarito, ekirato, “Mama ġomi ġesi tu asi betanu-maukani. Mama roġo ġomi ġesi nuġanai, mamai ġoraka, mukuna na beġabimini garina. Mukuna nuġanai erakani tarimana tu asi ribana, ġia tu aiġana eiaġoni. <sup>36</sup> Mama roġo ġomi ġesi nuġanai, mama boġono vaġa-moġonia, be mama natunai boġono iaġo.”

Maiġeri guruġa ekiraġi-ġosirito murinai eraga-kwanerito, benamo eiaġoto, asi beġe ġoitaġoani gabunai etanuto-ġoi.

*Iuda tarimari na Iesu roġo asi ġevaġa-moġoniato-ġoi*

<sup>37</sup> Iesu na Iuda tarimari ġoirari ai vetoġa boruri vovoka eveirito, senaġi roġo mo asi ġevaġa-moġoniato-ġoi. <sup>38</sup> Monana peroveta tarimana arana Isaia ġena guruġa emoġonito, Isaia maiġesi ekirato, “Vereġauka, deikara na ġai ġema guruġa bevaġa-moġonirini? Deikara ġenai Vereġauka ġena seġuka befoforini?”

<sup>39</sup> Ġia na Iesu asi ġevaġa-moġoniato anina tu, Isaia gabu tai ġena toretore ai ma ekirato,

<sup>40</sup> “Barau na matari evaġa-tufarito,

ema nuḡari evei-mukunarito,  
korana matari na asi beḡene boḡeboḡe,  
ema nuḡari ai asi beḡene tuḡamaḡi-faka ḡana.  
Au ḡegu ai beḡe ḡenoḡoini,  
benamo bavaḡa-namorini garina.”

<sup>41</sup> Isaia moḡesi ekirato, korana ḡia na Iesu marevana e seḡukana baregona eḡita-guineato nai, benamo ḡia eguruḡa-iaḡiato.

<sup>42</sup> Iuda ḡorikauna vereri vovoka na maki Iesu ḡevaḡa-moḡoniato, senaḡi Farisea tarimari gariri ḡeveito-ḡoi, be Iesu asi ḡekiraḡi-foforiato-ḡoi. Korana bema beḡe kiraḡi-foforiani nai tu, Farisea tarimari na rubu na beḡe tuḡu-vaḡirini garina. <sup>43</sup> Korana mo Iuda vereri ḡeri ura baregona tu, tarimarima na beḡene vaḡa-raḡeri, a Barau na bene vaḡa-raḡeri tuḡamaḡina tu asi ḡeveiato-ḡoi.

*Iesu ḡena guruḡa na tarimarima bekota-vinirini*

<sup>44</sup> Iesu efararato, ekirato, “Au bevaḡa-moḡoniguni tarimana tu dia au evaḡa-moḡoniguni, senaḡi au etuḡuguto Barauna evaḡa-moḡoniani. <sup>45</sup> Ema au eḡitaguni tarimana na tu au etuḡuguto Barauna eḡitaiani. <sup>46</sup> Au tu mama, mai tanobara ḡana aiaḡomato, be au bevaḡa-moḡoniguni tarimana tu mukuna nuḡanai asi betanuni. <sup>47</sup> Ma bema tarima ta na au ḡegu guruḡa eseḡaḡiani, senaḡi asi evaḡa-moḡoniani, au na mo tarima tu asi bakota-viniani. Korana au tu dia tanobara kota-vinina ḡana aiaḡomato. Asiḡina. Au tu tanobara vaḡa-maḡurina ḡana aiaḡomato. <sup>48</sup> Au eruḡaguni ema au ḡegu guruḡa asi eḡabi-raḡerini tarimana, kota-vinina tarimana ta etanuni. Au na akiraḡirito guruḡari, moḡeri guruḡa na ḡia beḡea kota-viniani mo ḡaro magonai. <sup>49</sup> Korana au tu dia tauḡegu ḡegu maoro ai aguruḡani. Senaḡi Tamagu, au etuḡuguto Barauna, na evaḡa-naḡiguto au na kara guruḡana bana kiraḡia ema kamasu bana kiraḡia. <sup>50</sup> Au ribagu, Tamagu ḡena guruḡa na tarimarima maḡuri vanaḡivanaḡi beḡe ḡabini. Moḡa lorinai au na kara akiraḡirini guruḡari tu, kara dagara Tamagu na ekiraguni bana kiraḡiri etoni guruḡari moḡo.”

## 13

*Iesu na ḡena mero kwakuri eḡuriḡirito*

<sup>1</sup> Pasova o Iuda tarimari mase aneruna na evanaḡirito moḡo verekona tu dori eḡabiato-ḡoi, benamo Iesu eribato, mai tanobara beiaḡuiiani ma Tamana ḡenai bevaraḡeni ḡarona tu varau beraḡasi. Mai tanobarai ḡena tarimarima ḡetanuto euravini-rakavarito, ma ḡena veuravini ḡeri ai tu asi edokoto, eiaḡoto mo magona.

<sup>2</sup> Iesu ma ḡena mero ḡesi lavilavi ḡaniḡanina ḡeḡaniato-ḡoi nuḡanai, Diabolo na Iudas Isakariota, Simona natuna, nuḡana eḡaniato, Iesu bene revaia ḡana. <sup>3</sup> Iesu ribana, Tamana na dagara mabarari tu ḡia ḡena seḡuka gaburenai etorerito. Ema ribana maki, ḡia tu Barau ḡenana eiaḡomato, ema ma beḡenoḡoini Barau ḡenai; <sup>4</sup> benamo ḡaniḡani gabuna na evariḡisito, ḡena koudi ekoki-vaḡiato, benamo tauḡela eriḡoato. <sup>5</sup> Benamo naḡu ai nanu ebubuto, benamo ḡena mero kwakuri eḡuriḡirito, ma eriḡoato tauḡelana na tu edau-kaukaurito.

<sup>6</sup> Kwakuri eḡuriḡi-iaḡomato mo, Simona Petero ḡenai eraḡasito, benamo Petero na ekiraiato, ekirato, “Vereḡauka, ḡoi tu au kwakugu noḡuriḡia otoni?” <sup>7</sup> Iesu na evaḡa-veaseato, ekirato, “Maitoma au na kara aveiani veiḡana tu asi otuḡamaḡi-fakaiani, senaḡi gabivau boribani.” <sup>8</sup> Petero na ekiraiato, ekirato, “Asiḡi, au kwakugu ḡoi na tu asiḡina ḡinavaḡi boḡuriḡiani.” Iesu na evaḡa-veaseato, ekirato, “Bema au na ḡoi kwakumu asi baḡuriḡiani nai, ḡoi tu dia au ḡegu mero.” <sup>9</sup> Simona Petero ekirato, “Vereḡauka, dia kwakugu moḡo, senaḡi ḡimagu ema debugu maki.” <sup>10</sup> Iesu na ekiraiato, ekirato, “Efouni tarimana tauḡanina mabarana tu veiareva, be ḡia tu kwakuna moḡo beḡuriḡiani. Ḳomi mabarami tu veiareva, senaḡi sebona ta moḡo asi veiareva.” <sup>11</sup> Iesu ma ribana deikara na ḡia berevaiani; moḡesina nai ekirato, “Dia mabarami veiareva.”



<sup>12</sup> Kwakuri eḡuriḡi-ḡosito murinai, ḡena dabuḡa baregona ma eveiato, ema eiaḡoto ḡena tanutanu gabunai ea tanu-tarito, benamo ekirarito, ekirato, “Au na ḡomi ḡemi ai kara baveia veiḡana tauna korikori boḡo tuḡamaḡi-fakaia ba? <sup>13</sup> Ḳomi na au ḡokiraḡiguni, ḡokirani ‘Vevaḡa-riba Tarimana’ ema ‘Vereḡauka’, mo tu moḡoni ḡokiraḡiguni, korana au tu moḡoni Vevaḡa-riba Tarimagu ema Vereḡauka. <sup>14</sup> Bema au ḡomi ḡemi Vereḡauka ema Vevaḡa-riba tarimagu na ḡomi kwakumi baḡuriḡiri nai, ḡomi maki tauḡemi fakami ai moḡo karomi tari kwakuri boḡono ḡuriḡiri. <sup>15</sup> Korana au na bavaḡa-ḡitami, be au na kara ḡomi ḡemi ai baveia veiḡana, ḡomi na maki boḡono veia. <sup>16</sup> Au na ḡomi moḡoni akiramini, ḡauvei merona na ḡena vere asi bevanaḡiani, e vetuḡunaḡi merona na betuḡua tarimana asi bevanaḡiani. <sup>17</sup> Toma maiḡeri dagara mabarari ḡomi na boḡo ribari, bema boḡo veirini nai tu boḡo iakuni.

#### *Iesu ḡena mase ekiraḡi-foforiato*

<sup>18</sup> Au na ḡomi mabarami asi akiraḡimini, au na aḡabi-viriḡirito tarimari tu au ribagu. Senaḡi mai tu Buka Vevaḡa nuḡanai ḡetorerito guruḡari beḡene moḡoni ḡana: ‘Deikara au ḡesi beredi baḡa ḡani-vegogoani tarimana tu, kwakuna gwadirina beḡabi-vaisiani au ḡegu ai.’ (Moḡa anina tu, Iesu ma bekira-fitoḡaiiani, benamo vaḡi-masena dabarana beveiani). <sup>19</sup> Toma au na ḡoirai beḡe ḡorani dagarari akira-varamini, be beḡe ḡorani nai tu boḡono riba-maoro, (Barau na etuḡuato) Tarimana tu Au. <sup>20</sup> Moḡoni akiramini, au na atuḡuani tarimana eḡabi-raḡeani tarimana na tu au eḡabi-raḡeguni. Ma au eḡabi-raḡeguni tarimana na au etuḡuguto tarimana, Barau, eḡabi-raḡeani.”

#### *Iesu Iudas Isakariota na berevaiani ekiraḡiati*

*Mataio 26:20-25; Mareko 14:17-21; Luka 22:21-23*

<sup>21</sup> Iesu na maiḡeri guruḡa ekiraḡirito murinai, nuḡana evekwaraḡi-baregote, benamo eguruḡa-foforito, ekirato, “Akira-korikorimini, ḡomi ta na tu au borevaguni.” <sup>22</sup> Benamo ḡena mero ḡeveḡita-veḡitato, asi ribari deikara ekiraḡiati. <sup>23</sup> Ḳena mero vekaravari ai Iesu na eura-viniato-ḡoi merona tu ḡia ḡenai evetabekauto. <sup>24</sup> Ma Simona Petero na vetoḡai moḡo Ioane evaḡa-guruḡaiato, eurato, Iesu nedanaḡia deikara ekiraḡiani. <sup>25</sup> Benamo (Iesu na eura-viniato-ḡoi merona) Iesu ḡenai ma evetabekauto, benamo edanaḡiati ekirato, “Vereḡauka, mo tu deikara, ei?” <sup>26</sup> Iesu evaḡa-veseto, ekirato, “Au na beredi bafereiiani, benamo ḡia baviniani tarimana tu moḡea.” Benamo Iesu na beredi efereiato, ma Simona natuna, Iudas Isakariota, eviniato.

<sup>27</sup> Iudas na mo beredi eḡabiato, benamo Satani nuḡanai eraka-ḡurato. Benamo Iesu na ekiraḡiati, ekirato, “Kara ourani noveia tu novei-ḡarimoḡia.” <sup>28</sup> Senaḡi mo ḡeḡaniḡani-vegogoto tarimari tu sebona ta maki asi eribato, karase nai Iesu na moḡesi ekiraḡiati. <sup>29</sup> Moḡa nuḡanai Iudas tu moni mauḡa-mauḡana eḡita-ḡauato-ḡoi. Moḡesina naima ḡia kotari ḡetuḡamaḡito, Iesu na tu bekiraia, vereko ai karakara ḡeura-vinirini dagarari nea voiri, o asi ḡeri-ḡari tarimari dagara tari nea viniri ḡetato. <sup>30</sup> Iudas na mo beredi eḡabi-raḡeato murinai tu, asikauna mo numa na eraka-rosito. Mo tu varau eboḡito.

#### *Iesu Petero na bekira-ḡuniḡauani ekiraḡiati*

<sup>31</sup> Iudas eraka-rosito murinai, Iesu ekirato, “Maitoma Tarimarima Natuna beḡe vaḡa-raḡeani, ema Barau maki Natuna ḡenana beḡe vaḡa-raḡeani. <sup>32</sup> Bema Barau na Iesu bakunai vevaḡa-raḡe e mareva baregona beḡabiani nai tu, Barau tauḡena na maki tauḡena ḡena mareva baregona Tarimarima Natuna beviniani. Ma Barau na asikauna beviniani. <sup>33</sup> Natugu, au ḡomi ḡesi tu asi bita tanu-maukani. Benamo ḡomi na au ma boḡo ḡita-vetauguni. Au na Iuda tarimari avaḡa-guruḡarito ilailanai, ḡomi maki mo guruḡa sebona avinimini: Au aiaḡoni gabuna ḡana, ḡomi tu asi boḡo iaḡoni riba. <sup>34</sup> Taravatu guruḡana variḡuna avinimini. Tarikakami ḡesi boḡono veuravini. Au na ḡomi aura-vinimini ilailanai, ḡomi maki tarikakami ḡesi boḡono veuravini. <sup>35</sup> Bema ḡomi tarikakami ḡesi boḡo veura-vinini nai, tarimarima mabarari beḡe ribani, ḡomi tu au ḡegu mero.”

<sup>36</sup> Simona Petero na Iesu edanaġiatio, ekirato, “Vereġauka, ġoi tu aiġana oiaġoni?” Iesu evaġa-veseto, ekirato, “Au aiġana aiaġoni gabuna ġana, maitoma au murigu na tu asi boġo iaġomani, senaġi gabivau boġo iaġomani murigu na.” <sup>37</sup> Petero na Iesu ekiraiato, ekirato, “Vereġauka, kara dainai toma au ġoi murimu na tu asi baiaġosini riba? Au tu ġoi uramu ai ġegu maġuri batore-tariani, bamaseni.”

<sup>38</sup> Iesu na Petero evaġa-veaseato, ekirato, “Ġoi ġemu maġuri tu au uragu ai botore-tariani otoni? Akira-korikorimuni, kokoroku roġosi roġo bene goġi nuġanai, ġoi na au tu vaġa-toittoi bokira-ġuniġauguni.”

## 14

### *Iesu tu dabara*

<sup>1</sup> “Nuġami asi beġene raġe, ema asi boġono tuġamaġi-ġutuma. Barau boġono vaġa-moġonia, ema au maki boġono vaġa-moġonigu. <sup>2</sup> Au Tamagu ġena numai daiġutu tu asisebo; bema asiġi nai tu, mai guruġa ġomi asi bara kira-varami: Au aiaġoni tu, ġomi ġemi gabu ta arovina-toreani. <sup>3</sup> Benamo aiaġoni, ġomi ġemi gabu barovina-toreani. Barovinatore-ġosiani vau, ma baġenoġoi-iaġomani, benamo ġomi baġori-iaġomini au ġesi bita tanuni. Be au ainai batanuni gabunai, ġomi maki monai au ġesi bita tanuni. <sup>4</sup> Au baiaġoni gabuna dabarana tu ġomi ma ribami.”

<sup>5</sup> Tomasi na ekiraiato, ekirato, “Vereġauka, ġai tu asi ribama ġoi aiġana oiaġoni, ma dabara tu kamasi baġa ribaiani?” <sup>6</sup> Iesu na ekiraiato, ekirato, “Dabara tu au, e moġonina maki au, ema maġuri maki au. Tarima ta Tamagu ġenai dabara boruna na ta asi beiaġoni. Asiġina ġinavaġi. Au ġeguna moġo. <sup>7</sup> Bema moġoni au ġomi na ġoribaguto tu, au Tamagu maki ġoro ribaia. Ma toma vau ġoribaiani ema varau boġo ġitaia.”

<sup>8</sup> Filipo na Iesu ekiraiato, ekirato, “Vereġauka, Tamara novaġa-ribama, be nuġama beġene genatari.” <sup>9</sup> Iesu na ekiraiato, ekirato, “Filipo, au ġoi ġesi tu kai-veġata atanuto, ma ġoi na au tu roġosi roġo boro ribagu? Au eġitaguni tarimana na Tamagu eġitaiani. Ma ġoi tu kamasi nai okirani, ‘Tamara novaġa-ribama otoni?’ <sup>10</sup> Ġoi na asi ovaġa-moġoniani, au tu Tamagu nuġanai, ma Tamagu tu au nuġagu ai, ei? Au na ġomi avaġa-guruġamini guruġari tu dia au tauġegu ġegu maoro ai avaġa-guruġamini. Asiġina. Mai tu Tamagu, ġia tu nuġagu ai etanuni, ġia na ġena ġauvei eveirini. <sup>11</sup> Au akirani, au tu Tamagu nuġanai atanuni ema Tamagu tu au nuġagu ai etanuni atoni nai tu boġono vaġa-moġonigu. Bema asiġina nai, mai veiġa aveirini ġoġitarini nai boġono vaġa-moġonigu.

<sup>12</sup> Moġoni akiramini, au evaġa-moġoniguni tarimana tu, au na aveirini veiġari, ġia na maki beveirini. Ema ġia na tu veiġa barego lelevaġiri beveirini, au na aveirini veiġari tu bevanaġirini. Korana au tu Tamagu ġenai ma aiaġoni. <sup>13</sup> Ema au aragu ai karakara boġo noġirini tu, au na baveirini. Monana Tamagu beġe vaġa-raġeani Natuna bakunai. <sup>14</sup> Au aragu ai kara boġo noġi-raġerini dagarari mabarari tu, veiġari au na baveirini.”

### *Iesu na Iauka Veaġa ekiraġi-toreato*

<sup>15</sup> “Bema ġomi na au ġoura-viniguni nai tu, au ġegu taravatu guruġari boġo korana-iaġirini. <sup>16</sup> Benamo au na Tamagu banoġiani, bema ġia na vevaġa-kava tarimana ta ma bevinimini. Mo vevaġa-kava tarimana tu ġomi ġesi betanu-vanaġi vanaġini. <sup>17</sup> Ġia tu guruġa moġonina evaġa-foforiani Iaukana. Ġia tu tanobara maġurinai ġetanuni tarimari na asi beġe ġabi-raġeani riba, korana asi ġeġitaiani ema asi ġeribaiani. Senaġi ġia ġomi tu ma ribami, korana ġia tu ġomi ġesi ġotanuni ema ġomi nuġami ai betanuni.

<sup>18</sup> Au na ġomi ġereġami gara noġa asi baiaġuimini. Au ma baġenoġoi-iaġomani ġomi ġemi ai. <sup>19</sup> Tanobara tarimari na asi ma beġe ġitaguni ġarona tu asi manaġa, senaġi ġomi na tu boġo ġitaguni. Ġomi tu au amaġuri-taġoni bakunai, be boġo maġuri-taġoni. <sup>20</sup> Mo ġaro ai ġomi boġo ribani, au tu Tamagu nuġanai atanuni, ema ġomi au nuġagu ai ġotanuni, ema au ġomi nuġami ai atanuni. <sup>21</sup> Au ġegu taravatu guruġari eġabi-raġerini ema ekorana-iaġirini tarimana na tu au eura-viniguni. Ema au eura-viniguni tarimana

tu au Tamagu na maki beura-viniani. Au na maki baura-viniani ema au tauḡegu ḡia ḡenai bavevaḡa-foforini.”

<sup>22</sup> Iudas, dia Iudas Isakariota, na ekiraiato, ekirato, “Vereḡauka, kamasi nai ḡoi tauḡemu ḡai ḡemai tu bovevaḡa-foforini, senaḡi tanobara ḡenai tu asiḡina?” <sup>23</sup> Iesu na evaḡa-veaseato, ekirato, “Au eura-viniguni tarimana na au ḡegu vevaḡa-riba bekorana-iaḡiani. Benamo au Tamagu na mo tarima beura-viniani. Benamo tauma ruarua baḡa iaḡoni ḡia ḡenai, bena ḡia ḡesi baḡa tanu-vanaḡi vanaḡini. <sup>24</sup> Au asi eura-viniguni tarimana tu, au ḡegu guruḡa asi ekorana-iaḡirini. Mai guruḡa ḡoseḡaḡirini tu dia au ḡegu, senaḡi Tamagu ḡena; au tu ḡia na etuḡuguto.

<sup>25</sup> Ḣomi ḡesi roḡo atanuni nuḡanai, maiḡeri guruḡa ḡomi akira-varamini. <sup>26</sup> A ḡomi vaḡa-kavami tarimana tu Iauka Veaḡa. Ḣia tu au aragu ai Tamagu na betuḡu-iaḡomaiani. Ḣia na dagara mabarari bevaḡa-ribamini, ema au na kara akiraḡirito dagarari, ḡemi tuḡamaḡi ai ma bevaḡa-fofori ḡenoḡoirini. <sup>27</sup> Maino ḡomi ḡesi mai aiaḡuiani. Mai tu au ḡegu maino ḡomi avinimini. Ema mai maino au na ḡomi avinimini tu, dia tanobara tarimari na ḡomi ḡevinimini kavana avinimini. Nuḡami asi beḡene raḡe e asi boḡono tuḡamaḡi-ḡutuma ema asi boḡono gari. <sup>28</sup> Au baguruḡa boḡo seḡaḡia, au bakira, ‘Au tu araka-ḡerevaḡini, senaḡi ma baḡenoḡoi-iaḡomani ḡomi ḡemi ai.’ Bema au boḡoro ura-vinigu nai tu, Tamagu ḡenai aiaḡoni, be ḡoro iaku, korana au Tamagu tu iarua-korokoro, au iata-raḡegu ai. <sup>29</sup> Mai veiḡa tu roḡosi roḡo bere ḡora nuḡanai akira-varamini. Be mai veiḡa befororini nai, boḡono vaḡa-moḡonigu. <sup>30</sup> Au ḡomi ḡesi asi bita guruḡa-guruḡa maukani, korana mai tanobara eḡori-kauani verena, Satani, tu dori eraḡasini. Ḣia tu asi kokorena, be au ḡegu ai kara ta asi beveiani. <sup>31</sup> Senaḡi mai tanobara tarimari beḡene riba, au na Tamagu aura-viniani. Ema au tu Tamagu na ekiraḡiatio ilailanai aveini.

Be ḡovariḡisi, mai gabu na siraka-veḡita.”

## 15

### *Vine ema legana*

<sup>1</sup> “Au tu vine ḡauna korikori, ma au Tamagu tu vine tavoḡana ḡauvei-iaḡina tarimana. <sup>2</sup> Vine legari au ḡegu ai kafakau dagarari, asi ḡeḡwani legari tu, ḡia na ebasi-vaḡirini; ma lega mabarari ma ḡwari tu, ḡia na eiarevarini, beḡene ḡwa-vovoka uranai. <sup>3</sup> Ḣomi tu varau boḡo iareva-ḡosi. Mo guruḡa avinimito moḡeri na beḡe iarevami. <sup>4</sup> Au ḡegu ai boḡono kafakau, be au maki ḡomi ḡemi ai kafakau-taḡo bana tanu. A vine legana ta ḡereḡana moḡo nai tu asi beḡwani, senaḡi vine ḡauna ḡenai bekafakau-taḡoni vau beḡwani. Ḣomi maki moḡesi, bema au ḡesi asi boḡo sebonani nai, ḡwaḡwami ta asi bevetoreni.

<sup>5</sup> Au tu vine, a ḡomi tu lega. Au ḡegu ai bekafakauni, au ḡia ḡenai bakafakauni kavana, tarimana tu ḡwaḡwana asisebo bevetoreni. Bema au boḡo iaḡuiguni nai, dagara ta asi boḡo veiani. <sup>6</sup> Au ḡegu ai asi ekafakauni tarimana tu, vine ḡauna legana noḡa beḡe ḡabiani, ma beḡe fitoḡaiani, benamo bea kaukauni. Mo ḡau legari kakorori tu ḡeḡabi-vegogorini, benamo karavai ḡefiu-raḡerini, benamo ḡegaburini. <sup>7</sup> Bema ḡomi au ḡegu ai boḡo kafakauni o au ḡesi boḡo sebonani, ma au ḡegu guruḡa ḡomi ḡemi ai betanuni nai tu, kara ḡoura-vinirini dagarari boḡo noḡini tu, ḡemi noḡinoḡi dagarari boḡo ḡoitaḡorini. <sup>8</sup> Bema ḡwaḡwami asisebo asisebo beḡe vetoreni nai tu, tarimarima na au Tamagu ḡevaḡa-raḡeani, ema ḡomi maki au ḡegu mero korikori ai boḡo iaḡoni.

<sup>9</sup> Tamagu na au eura-viniguni ilailanai, au na ḡomi maki aura-vinimini. Vanaḡivanaḡi au ḡegu veuravini nuḡanai boḡono tanu. <sup>10</sup> Bema au ḡegu taravatu guruḡari boḡo korana-iaḡirini nai, ḡomi tu au ḡegu veuravini nuḡanai boḡo tanuni, ilailana au Tamagu ḡena taravatu guruḡari akorana-iaḡirini, benamo ḡia ḡena veuravini nuḡanai atanuni kavana. <sup>11</sup> Au na maiḡeri guruḡa ḡomi bavini anina tu, au ḡegu iaku ḡomi nuḡami ai bene tanu, be ḡomi maki nuḡami iaku na beḡene vonuvonu-raḡe. <sup>12</sup> Au ḡegu taravatu

guruġana tu maiġa, tauġemi fakami ai karomi ġesi boġono veuravini, au na ġomi aura-  
vinimini kavana. <sup>13</sup> Ma ġena veuravini barego lelevaġina tarimana tu, karona urari ai  
ġena maġuri gwaina asi eġabiani, etore-tariani. Ma ġena veuravini barego tarimana  
korikori tu moġa, ma boruna ta tu asiġina maia. <sup>14</sup> Bema au na kara akiramini veiġari  
boġo veirini nai, ġomi tu au ġatagu. <sup>15</sup> Au na ġomi tu vetuġunaġi-iaġovini tarimami asi  
ma bakiraġimini, korana vetuġunaġi-iaġovini tarimana na ġena vere na kara eveiani, ġia  
tu asi ribana. A ġomi tu ġata batoni, korana au Tamagu ġenana kara aseġaġirito dagarari  
mabarari tu, ġomi varau avaġa-ribamito. <sup>16</sup> Ġomi na au asi ġoġabi-viriġiguto, senaġi au  
na ġomi aġabi-hidimito, ema avaġa-ruġamito boġono iaġo, ġwaġwami boġono vaġa-  
ġorari, ma moġeri tu namo moġo beġene tanu-vanaġi vanaġi. Moġesina tu karakara  
ġoura-vinirini dagarari au aragu ai Tamagu boġo noġiani tu, Tamagu na bevinimini.  
<sup>17</sup> Au ġegu taravatu guruġana ġomi avinimini tu maiġa, karomi ġesi boġono veuravini.”

*Tanobara tarimari na Iesu* ġena mero ġeiau-rakava vinirito

<sup>18</sup> “Bema tanobara tarimari na beġe iau-rakava vinimini nai, boġono riba, au tu  
ġeiau-rakava vini-guineguto. <sup>19</sup> Bema ġomi tanobara ġena tarimarima roġo ġoro  
tanu tu, tanobara tarimari na beġere ura-vinimi, korana ġomi tu ġia ġeri tarimarima  
bene. Senaġi ġomi tu dia tanobara ġena tarimarima. Asiġina. Ġomi tu varau  
aġabi-viriġimito, ma tanobara maġurina nuġana na aġabi-vaġimito. Moġa lorinai  
tanobara tarimari na ġeiau-rakavamini. <sup>20</sup> Akiramito guruġana boġono tuġamaġi-taġoa:  
‘Vetuġunaġi merona na etuġu-naġiani tarimana asi bevanaġiani.’ Bema au ġevaġa-  
midigu midiguguto, ġomi maki beġe vaġa-midigu midigumini. Bema au ġegu guruġa  
ġekorana-iaġirito, ġomi ġemi guruġa maki beġe korana-iaġirini. <sup>21</sup> Ġia na maiġeri veiġa  
asi namori mabarari ġomi ġemi ai beġe veirini tauna korikori tu, ġomi na au aragu  
ġokorana-iaġiani nai; korana au etuġuguto Barauna ġia tu asi ribari. <sup>22</sup> Bere au asi bara  
iaġoma, ma asi bara guruġa-viniri, ġia tu asi ġeri rakava. Senaġi ġia maitoma ġeri rakava  
na tu asi ġeri raga-maġuri dabarana. <sup>23</sup> Au eiau-rakavaguni tarimana na au Tamagu maki  
eiau-rakavaiani. <sup>24</sup> Bere au na nuġa-farevaġi veiġari, tarima tari na roġosi roġo beġene  
veiri dagarari, ġia vefakari ai asi bara veiri, ġia tu asi ġeri vei-rakava. Senaġi maitoma  
ġia na moġeri nuġa-farevaġi veiġari tu beġe ġitari, ma nuġanai ġia na au ma Tamagu  
ġesi tauma ruarua tu ġeiau-rakavamani. <sup>25</sup> Senaġi maiġeri veiġa ġeġorani korana tu,  
taravatu nuġanai ġetoreato guruġana bene moġoni ġana. Mo guruġa tu iniġesi ekirani:  
‘Au tu ġeiau-rakava-kavaguto moġo, asi korana tai.’

<sup>26</sup> Vevaġa-kava Iaukana tu beiaġomani. Ġia tu guruġa moġoniri kiraġi-kiraġiri  
Iaukana, Tamagu ġenana beiaġomani. Au na ġomi ġemi ai batuġuani, Tamagu sevinai  
batanuni nai tu. Ġia na au bema kiraġi-foforiguni. <sup>27</sup> Ġomi na maki au roġo boġono  
kiraġi-foforigu, korana ġomi tu au ġesi tatanuni tovotovona na veġata bene.”

## 16

<sup>1</sup> “Au na maiġeri guruġa akira-varamini, korana asi aurani ġemi veġabidadama na  
boġono raka-veġita. <sup>2</sup> Iuda tarimari ġeri rubu na beġe tore-veġitamini. Aba, ġarona  
mani eiaġomani, tau ta na bevaġi-masemini nai tu, ġia matoru bekirani, ġia tu Barau  
vetuġunaġina eiaġo-viniani. <sup>3</sup> Maiġeri veiġa ġomi ġemi ai beġe veirini korana tu ġia na  
au Tamagu asi ġeribaato, ema au maki asi ġeribaguto. <sup>4</sup> Senaġi au na maiġeri guruġa  
tu nakiravara-guinemi. Be ġoirai vau tarimarima na veiġari ġemi ai beġea veirini nai,  
maiġeri guruġa bakira-varami boġono tuġamaġiri.

*Iauka Veaġa* ġena ġauvei

Tovotovonai au tu roġo ġomi ġesi tatanuto-ġoi naima, maiġeri guruġa ġemi asi  
akiraġirito. <sup>5</sup> Senaġi toma tu etuġu-mariġoguto Barauna ġenai ma aġenoġoi-iaġoni, ma  
ta na tu asi odanaġiguni, ‘Ġoi tu aiġana oiaġoni?’ asi otoni. <sup>6</sup> Ġomi tu maiġeri guruġa  
bakira-varami nai, nuġami ġevewaraġini e ġetaġitaġini. <sup>7</sup> Senaġi moġoni akiramini,  
mai tu ġomi ġemi namo uranai ġomi vekaravami na araka-ġerevaġini, arakani. Korana

tu bema au asi barakani nai, vevaḡa-kava Iaukana ḡemi ai asi beiaḡomani. Senaḡi bema au baiaḡoni nai tu, ḡemi ai batuḡu-iaḡomaiani. <sup>8</sup> Ma ḡia beiaḡomani nai, mai tanobara tarimari ḡeri vei-rakava ma Barau ḡena vei-iobukaiobuka ema Barau na tanobara tarimari bekota-vinirini aniri bevaḡa-fofori ginikaurini. <sup>9</sup> ḡeri vei-rakava tauna korikori tu, au asi ḡevaḡa-moḡoniguni. <sup>10</sup> Barau ḡena vei-iobukaiobuka tauna korikori tu maiḡa, au tu Tamagu ḡenai aiaḡoni, be asi ma boḡo ḡita-ḡenoḡoiguni. <sup>11</sup> Ema Barau na tanobara tarimari bekota-vinirini anina tu maiḡea, mai tanobara verena tu varau ekota-viniato.

<sup>12</sup> Dagara vovoka roḡo aurani nakira-varami, senaḡi mabarari maitoma tu asi ilaila boḡo tuḡamaḡi-fakarini e asi boḡo ḡabi-raḡerini. <sup>13</sup> Senaḡi guruḡa moḡoni Iaukana beiaḡomani, ḡia na vau ḡomi beḡori-kaumini, benamo guruḡa moḡoniri boḡo ribarini. Korana ḡia tu dia tauḡena ḡena tuḡamaḡi guruḡari bekiraḡirini. Asiḡina. ḡia tu au ḡeguna beseḡaḡini guruḡari moḡo bekiraḡirini. Ema gabivau beḡe ḡorani dagarari bekiravara-guinemini. <sup>14</sup> ḡia na au bevaḡa-raḡeguni, korana au ḡeguna beḡabirini guruḡari ḡomi bekira-varamini. <sup>15</sup> Au Tamagu ḡena dagara mabarari tu au ḡegu. Moḡesi naima au bakira, ‘ḡia na au ḡeguna beḡabirini guruḡari ḡomi bekira-varamini.’ ”

“*ḡemi nuḡa*-midigumidigu tu iaku verere ai beḡe iaḡoni”

<sup>16</sup> “ḡaro asi manaḡa nuḡanai, ḡomi na au asi ma boḡo ḡitaguni, ma ḡaro asi manaḡa murinai tu, ma boḡo ḡitaguni. [Korana au tu Tamagu ḡenai aiaḡoni.]” <sup>17</sup> Benamo ḡena mero kotari tauḡeri vefakari ai moḡo ḡeguruḡa-guruḡato, ḡekirato, “Mai ḡia na tu kara ekiraḡiani, ekirani, ‘ḡaro asi manaḡa nuḡanai au asi ma boḡo ḡitaguni, ma ḡaro asi manaḡa murinai tu ma boḡo ḡitaguni,’ e ma ekirani, ‘Korana au tu Tamagu ḡenai aiaḡoni?’ ” <sup>18</sup> Moḡesina naima ḡekirato, “Mai ḡia na tu kara ekiraḡiani, ekirani, ‘ḡaro asi manaḡa’ etoni? ḡita asi taribani ḡia na tu kara ekiraḡiani!”

<sup>19</sup> Iesu eribato, ḡena mero ḡeri ura tu ḡedanaḡia ḡetato-ḡoi, naima ḡia na evaḡa-guruḡarito, ekirato, “ḡomi tu tauḡemi ḡereḡami au na kara bakiraḡia vedare-mutukana ḡoveini ei? Au bakira, ‘ḡaro asi manaḡa nuḡanai asi ma boḡo ḡitaguni, ma ḡaro asi manaḡa murinai tu ma boḡo ḡitaguni,’ basi anina ḡovetauani? <sup>20</sup> Moḡoni akiramini, ḡomi tu boḡo taḡini e boḡo taḡi-vanoro vanoroni, senaḡi tanobara tarimari tu beḡe iakuni, beḡe verereni. ḡomi tu boḡo nuḡa-midigu midiguni, senaḡi ḡemi nuḡa-midigumidigu tu iaku verere ai beḡe iaḡoni. <sup>21</sup> Vavine ta mero nevaḡa-maḡuria ḡana tu, emidigumidiguni, korana ḡena ḡabi aoana eraḡasini. Senaḡi mero emaḡurini nai, ḡenai mo midigumidigu tu etuḡa-rekwaiani, korana mero ta tanobarai varau bevaḡa-maḡuria iakunai. <sup>22</sup> ḡomi maki moḡesina: Toma tu ḡonuḡa-midigu midiguni, senaḡi au na ma baḡita-ḡenoḡoimini, be ma boḡo iakuni. Ma tarima ta na ḡomi ḡemi mo iaku tu asi ilaila ḡemina ma beḡabi-veḡitaiani.

<sup>23</sup> Ma mo ḡaro ai ḡomi na au dagara ta asi ma boḡo noḡiguni. Moḡoni akiramini, au aragu ai karakara boḡo noḡirini dagarari mabarari, au Tamagu na bevinimini. <sup>24</sup> Beiaḡoma mo initoma, ḡomi na au aragu ai dagara ta roḡosi roḡo boḡoro noḡia. Au aragu ai boḡono noḡi-raḡe, be boḡono doḡari; benamo nuḡami iaku na beḡene vonuvonu-raḡe.”

*Iesu na tanobara* ḡena seḡuka evaḡa-ketoato

<sup>25</sup> “Maiḡeri guruḡa au na ḡomi ḡemi tu barabore ai akiraḡirini, senaḡi ḡaro ḡoirai tu barabore ai asi ma bavaḡa-guruḡamini. ḡoirai vau au Tamagu varina tu ḡemi bakiraḡi-fofori ginikauani. <sup>26</sup> Mo ḡaro beraḡasini nai, ḡomi tu au aragu ai boḡo noḡinoḡini. A au tu asi akirani, au na ḡomi urami ai Tamagu banoḡiani; <sup>27</sup> korana Tamagu tauḡena na ḡomi eura-vinimini. ḡomi eura-vinimini, korana ḡomi na au ḡoura-viniguni, ema ḡovaḡa-moḡoniguni, au tu Barau ḡenana aiaḡomato. <sup>28</sup> Au tu Tamagu sevina na mai tanobara ḡana amariḡoto. Ma toma tu mai tanobara aiaḡuiani, Tamagu ḡenai ma aḡenoḡo-iaḡoni.”

<sup>29</sup> Ĝena mero na ĝevaĝa-guruĝaiato, ĝekirato, “Oĝitaiani, toma ĝoi tu oguruĝa-fofori ginikauni, asi oguruĝa-baraboreni. <sup>30</sup> Toma ĝai ĝama riba-korikorini, ĝoi tu dagara mabarari ma ribamu. Tarima ta na nedanaĝimu betoni vedanaĝina maki, ĝoi na tu boriba-guineani. Moĝa lorinai ĝavaĝa-moĝonimuni, ĝoi tu moĝoni Barau ĝenana oiaĝomato.”

<sup>31</sup> Iesu na evaĝa-veserito, ekirato, “Mai vau ĝovaĝa-moĝoniguni, ei? <sup>32</sup> Moĝoni, ĝarona mani eiaĝomani, varau beraĝasi, ĝomi tu boĝo raga-rovorovoni, tata ĝemi ura ragana boveini, benamo au tu ĝereĝagu boĝo iaĝui-momoraĝiguni. Senaĝi au tu dia ĝereĝagu, korana Tamagu tu au sevigu ai. <sup>33</sup> Au aurani, au ĝegu ai boĝono kafakau, be au ĝegu ai maino boĝono ĝabi uranai, au na maiĝeri guruĝa ĝomi bakira-varami. Mai tanobarai ĝotanuni nai, midigumidigu boĝo ĝoitaĝoani. Senaĝi boĝono kokore! Au na tanobara ĝena seĝuka avaĝa-ketoato.”

## 17

### *Iesu ĝena ĝuriĝuri*

<sup>1</sup> Iesu moĝesi eguruĝa-ĝosito murinai, egaga-raĝeto, guba eĝitaiaato, benamo ekirato, “Tamagu, horana tu maiĝa. Natumu marevana baregona novaĝa-foforia, be Natumu na ĝoi marevamu baregona maki bene vaĝa-foforia. <sup>2</sup> Korana ĝoi na maoro ĝia oviniato, tarimarima mabarari ĝia ĝena veĝitaĝau gaburenai beĝene tanu. Be ĝoi na ĝia oviniato tarimari mabarari maĝuri vanaĝivanaĝi bene viniri. <sup>3</sup> Maĝuri vanaĝivanaĝi tu maiĝa: Maĝuri vanaĝivanaĝi beĝe ĝabiani tarimari mabarari beĝene riba, Barau moĝonimu tu ĝoi sebonu kwariĝutu moĝo, ema Iesu Keriso beĝene ribaia. Iesu Keriso tu ĝoi na otuĝuato tanobara ĝana. <sup>4</sup> Au na ĝoi tanobarai bavaĝa-raĝemu. Ĝoi na oviniguto bana veia otato ĝauveina varau bavaĝa-koria. <sup>5</sup> Tama, tanobara roĝosi bere vesina ema au maki roĝo ĝoi ĝesi atanuto-ĝoi nuĝanai, au ĝegu ai tu mareva baregona etanuto-ĝoi. Toma aurani, mo mareva ĝoi tauĝemu ĝoiramu ai ĝegu ai novaĝa-foforia.”

### *Iesu ĝena mero ĝeri eĝauĝauto*

<sup>6</sup> “Tanobara maĝurina nuĝana na oĝabi-vaĝirito, benamo oviniguto tarimari ĝeri ai ĝoi tu avaĝa-foforimuto. Moĝeri tu ĝoi ĝemu tarimarima, ĝoi na au oviniguto. Ma ĝia na ĝoi ĝemu guruĝa ĝekorana-iaĝiato. <sup>7</sup> Toma ĝia beĝe riba, ĝoi na oviniguto dagarari mabarari tu ĝoi ĝemuna moĝo ĝeiaĝomato. <sup>8</sup> Korana ĝoi na oviniguto guruĝari mabarari akira-vararito. Ĝia na mo guruĝa mabarari ĝeĝabi-raĝerito, ma ĝeriba-maoroto, au tu ĝoi sevimu na aiaĝomato. Ema ĝevaĝa-moĝoniani, au ĝoi na otuĝu-iaĝomaguto.

<sup>9</sup> Au tu ĝia ĝeri aĝuriĝurini. Au tu dia mai tanobara maĝurinaĝi ĝetanuni tarimari ĝeri aĝauĝauni. Senaĝi au oviniguto tarimari ĝeri aĝauĝauni, korana ĝia tu ĝoi ĝemu tarimarima. <sup>10</sup> Au ĝegu tarimarima mabarari tu ĝoi ĝemu tarimarima. Ema ĝoi ĝemu tarimarima mabarari tu au ĝegu tarimarima. Ema ĝia ĝerina au aragu evaraĝeni, korana au ĝegu mareva baregona ĝevaĝa-foforiani. <sup>11</sup> Au tu ĝoi ĝemu ai aiaĝosini, mai tanobarai asi batanu-rovaĝini. Senaĝi ĝia tu tanobarai roĝo beĝe tanuni. Tamagu Veaĝamu, ĝoi na au oviniguto tarimari ĝoi aramu seĝukana na bono ĝitaĝauri. Be ĝia mabarari beĝene sebona, ĝita taura ruarua kavana. <sup>12</sup> Au tanobarai roĝo ĝia ĝesi atanuto-ĝoi nuĝanai, ĝoi aramu seĝukana na ĝia anariĝaurito-ĝoi. Ĝoi na au oviniguto tarimari tu aĝitaĝau-ginikaurito, be ta asi erekwarekwato; bene rekwarkwa tauna moĝo, moĝoni erekwarekwato, Buka Veaĝai ĝetoreato guruĝana vaĝa-moĝonina ĝana.

<sup>13</sup> Senaĝi toma au tu ĝoi ĝemu ai aiaĝosini. Au tu roĝo tanobarai maiĝegu nuĝanai, maiĝeri guruĝa bakiraĝiri, au ĝegu iaku e verere na ĝia nuĝari bene vaĝa-vonuvonu raĝeri ĝana. <sup>14</sup> Ĝoi ĝemu guruĝa au na ĝia varau avinirito. Ma tanobara maĝurinaĝi ĝetanuni tarimari na ĝeiau-rakavarini, korana ĝia toma tu dia mai tanobara tarimari, au kavana, au tu dia mai tanobara tarimagu. <sup>15</sup> Au tu dia ĝia mai tanobara na bono ĝabi-vaĝiri ĝuriĝurina aveini. Senaĝi anoĝimuni, bono nariĝauri, be Tarima Rakavana, Satani, na asi bene ĝabiri atoni. <sup>16</sup> Ĝia tu dia mai tanobara tarimari, au kavana, au tu dia

mai tanobara tarimagu. <sup>17</sup> Ĝoi ĝemu guruĝa moĝonina na novaĝa-veaĝari; ĝoi ĝemu guruĝa tu moĝoni. <sup>18</sup> Ĝoi na tanobara maĝurinai ĝetanuni tarimari fakari ai au otuĝu-toĝaguto ilailanai, au na ĝia maki tanobara maĝurinai roĝo ĝetanuni tarimari vekaravari ai batuĝu-toĝari. <sup>19</sup> Ĝia urari ai au tauĝegu avevaĝa-veaĝani, be ĝia maki beĝene veaĝa-korikori.”

*Iesu eĝuriĝurito veĝabidadama tarimari mabarari ĝeri*

<sup>20</sup> “Au tu dia ĝia ĝena mero ĝereĝari ĝeri moĝo aĝauĝauni. Asiĝi. Au tu ĝia na vari beĝea fiuani nai, au beĝe vaĝa-moĝoniguni tarimari mabarari maki ĝeri aĝuriĝurini. <sup>21</sup> Be ĝia mabarari sebonai beĝene iaĝo, Tama, ĝoi au nuĝagu ai otanuni ema au ĝoi nuĝamu ai atanuni ilailana. Moĝesi kavana au aurani, ĝia maki beĝene sebona moĝo, ma ĝita nuĝarai beĝene tanu, be tanobara maĝurinai roĝo ĝetanuni tarimari beĝene riba, au tu ĝoi na otuĝu-mariĝoguto. <sup>22</sup> Ĝoi na au mareva baregona oviniguto dagarana ĝia avinirito, ĝia sebonai beĝene iaĝo uranai, be ĝita taura ruarua sebona kavana, ĝia maki beĝene sebona. <sup>23</sup> Au ĝia nuĝari ai, ma ĝoi au nuĝagu ai, be ĝia maki beĝene sebona-kwariĝuto korikori. Benamo monana tanobara maĝurinai roĝo ĝetanuni tarimari beĝene riba, au tu ĝoi na otuĝu-iaĝomaguto, ema beĝene riba maki, ĝoi na ĝia oura-vinirini au oura-viniguni kavana.

<sup>24</sup> Tama, au ĝegu ura baregona tu, au ainai batanuni, au oviniguto tarimari maki au ĝesi, be monai baĝana tanu, be au mareva baregona oviniguto marevana beĝene ĝitaia. Mo mareva oviniguto, korana au ĝoi na tu tanobara roĝosi roĝo boro veia nuĝanai veĝata oura-viniguto. <sup>25</sup> Tamagu o, ĝoi tu vei-iobukaiobuka Baraumu, tanobara maĝurinai ĝetanuni tarimari na ĝoi asi ĝeribamoto. A au na tu ĝoi aribamoto, ema au ĝegu mero maiĝeri tu beĝe riba, au tu ĝoi na otuĝu-mariĝoguto. <sup>26</sup> Ĝoi aramu ĝia akira-vararito, e roĝo bakiraĝi-foforiani. Korana monana au oura-viniguni veuravinina ĝia nuĝari ai betanuni, ema au maki ĝia nuĝari ai batanuni.”

## 18

*Iesu tuari tarimari na ĝeĝabiato*

<sup>1</sup> Iesu na mo ĝauĝau ekiraĝi-ĝosiato murinai, ĝena mero ĝesi ĝerakato. Ĝeiaĝoto, Kidron ĝarukana na ĝeraka-vanaĝito, reke ta ĝana. Monai tu vamoka ta, ma ĝena mero ĝesi mo vamoka nuĝana na ĝeraka-toĝato. <sup>2</sup> Iudas, Iesu erevaiato tarimana, maki mo gabu tu ma ribana, korana Iesu ma ĝena mero ĝesi monai ĝaro vovoka ĝetanu-vegogoto-ĝoi. <sup>3</sup> Moĝesina naima Iudas na Roma vetari tarimari e Rubu Veaĝa ĝitaĝauna tarimari tari eĝoririto. Mo Rubu Veaĝa ĝitaĝauna tarimari tu Rubu Veaĝa vereri baregori e Farisea tarimari na ĝetuĝurito. Benamo mo vamoka ĝana ĝeiaĝoto, ma tosiri, ma lamefari, ema ma ĝeri vetari farefareri. <sup>4</sup> Iesu tu ribana guine, ĝia ĝenai kara beĝe ĝorani dagarari mabarari, naima eiaĝoto seviri ĝana, benamo edanaĝirito, ekirato, “Ĝomi na tu deikara ĝovetauani?”

<sup>5</sup> Ĝia ĝevaĝa-veseto, ĝekirato, “Iesu, Nasareta tarimana.” Iesu na ekirarito, ekirato, “Tarimana tu au.” Ma Iudas, Iesu erevaiato tarimana, maki ĝia ĝesi monai ruĝataĝo. <sup>6</sup> Iesu na ekirarito, ekirato, “Tarimana tu au,” etato nai, ĝia mabarari ĝeruĝa-ĝenoĝoito, benamo tano ai ĝeketo-tarito. <sup>7</sup> Iesu na ma edanaĝi-ĝenoĝoirito, ekirato, “Ĝomi na tu deikara ĝovetauani?” Benamo ĝia ĝekirato, “Iesu, Nasareta Tarimana.” <sup>8</sup> Iesu evaĝa-veseto, ekirato, “Au na bakirami, tarimana tu au. Bema ĝomi tu au moĝo ĝovetauguni nai, maiĝeri tarima ĝotuĝuri, ĝeraka.” <sup>9</sup> Moĝesi ekirato, korana ĝia ĝena guruĝa tovotovonai ekiraĝiato guruĝana bene moĝoni ĝana, ekirato, “Au oviniguto tarimari tu sebona ta maki asi avei-rekwa-rekwaiato.”

<sup>10</sup> Ma nuĝanai Simona Petero ĝimanai tu vetari baĝana ta. Mo vetari baĝana einuvaĝiato, edaveato, benamo Rubu Veaĝa verena baregona ĝena vetuĝunaĝi-iaĝovini tarimana seĝana aroribana ebasi-vaĝiato. Mo vetuĝunaĝi-iaĝovini tarimana arana tu

Malko. <sup>11</sup> Benamo Iesu na Petero ekiraiato, ekirato, “Goi na mani vetari baḡana faosinai noḡura-toḡaia! Au Tamagu na bevinigu midigumidigu bedina tu asi bana niua, ei?”

*Iesu Anas ḡenai ḡeḡori-iaḡoato*

<sup>12</sup> Benamo vetari tarimari ma ḡorikaure tarimana ema Iuda tarimari ḡeri Rubu Veaḡa ḡitaḡauna tarimari na Iesu ḡeḡabiato, benamo ḡebarubaruato, <sup>13</sup> benamo Anas ḡenai ḡeḡori-iaḡo guineato, korana Anas tu Kaiafas ḡena taḡama. Kaiafas na Anas natuna vavinena eḡaraḡoato. Kaiafas tu Rubu Veaḡa verena baregona mo laḡani ai. <sup>14</sup> Kaiafas na Iuda tarimari esisiba-vinirito, ekirato, “Namona tu tarima sebona ta moḡo tarimarima mabarari urari ai bene mase.”

*Petero na Iesu ekira-ḡuniḡauato*

*Mataio 26:69-70; Mareko 14:66-68; Luka 22:55-57*

<sup>15</sup> Simona Petero e Iesu ḡena mero ta na tu Iesu ḡeraka-ḡiuato. Rubu Veaḡa verena baregona tu ma ribana, mo Iesu ḡena mero moḡa. Moḡesi nai ḡia maki Iesu ḡesi evaḡa-rakatoḡa sebonaiato, Rubu Veaḡa verena baregona ḡena numa maḡuna nuḡanai Kota gabunai. <sup>16</sup> Senaḡi Petero tu ḡatama-boka murikanai moḡo eruḡato. Ma mo Iesu ḡena mero, Rubu Veaḡa verena baregona na eribaiato merona, ma eḡenoḡoito, benamo ḡatama-boka eḡita-ḡauato ḡuiatona ea vaḡa-guruḡaiato, ma Petero eḡori-toḡaiato. <sup>17</sup> Benamo ḡatama-boka eḡita-ḡauato ḡuiatona na Petero ekiraiato, ekirato, “Goi maki mai tarima ḡena mero ta, ene?” Petero evaḡa-veseto, ekirato, “Asiḡina, au tu asiḡi.” <sup>18</sup> Mo gabu faraka na eḡabiato, be vetuḡunaḡi-iaḡovini tarimari ema Rubu Veaḡa ḡitaḡauna tarimari na tu karava ta ḡetutuato. Benamo mo karava ḡeruḡa-ḡeḡeraḡiato, ḡevetunuto-ḡoi. Petero maki ḡia seviri ai eruḡato ma evetunuto-ḡoi.

*Rubu Veaḡa verena baregona na Iesu edanaḡiato*

*Mataio 26:59-66; Mareko 14:55-64; Luka 22:66-71*

<sup>19</sup> Mo horai tu Rubu Veaḡa verena baregona na Iesu edanaḡiato, Iesu ḡena mero e ḡena vevaḡa-riba evedanaḡi-iaḡirito. <sup>20</sup> Iesu na evaḡa-veseato, ekirato, “Au tu tarimarima ḡutuma-bara ḡoirari ai aguruḡa-foforito. Au tu vanaḡivanaḡi Iuda tarimari ḡeri rubu ai ema Rubu Veaḡa nuḡari ai avevaḡa-ribato-ḡoi, ma Iuda tarimari ḡema-raka-vegogoni gaburi ai, au asi aguruḡa-vekuretoḡato. <sup>21</sup> Kara dainai au odanaḡiguni? Mo au aguruḡato ḡeseḡaḡiguto tarimari noa danaḡiri, ḡia ma ribari au na kara akiravara-vinirito.”

<sup>22</sup> Iesu moḡesi eguruḡato nai, Rubu Veaḡa ḡitaḡauna tarimana ta ḡia sevinai eruḡa-taḡoto-ḡoi, monana Iesu ḡoirana eforo-bubuḡauato. Benamo Iesu ekiraiato, ekirato, “Goi mai Rubu Veaḡa verena baregona tu maniḡesi ovaḡa-guruḡaiani?” <sup>23</sup> Iesu na evaḡa-veseato, ekirato, “Bema au na guruḡa rakavana ta bakiraḡia nai, nokiraḡia, kamara guruḡa rakavana! Senaḡi bema au tu baguruḡa-korikori, kara dainai boforogu.”

<sup>24</sup> Benamo Anas na Iesu roḡo varo na barubaru Rubu Veaḡa verena baregona Kaiafas ḡenai etuḡu-iaḡoato.

*Petero na Iesu ma ekira-ḡuniḡau ḡenoḡoiato*

*Mataio 26:71-75; Mareko 14:69-72; Luka 22:58-62*

<sup>25</sup> Simona Petero tu roḡo ruḡataḡo karavai evetunuto-ḡoi. Benamo karava sevinai ḡeruḡa-vegogoto tarimari na ḡedanaḡiato, ḡekirato, “Goi maki ḡia ḡena mero ta, ene?” Petero evekira-ḡuniḡauto, ekirato, “Asiḡina, au tu asiḡi.”

<sup>26</sup> Rubu Veaḡa verena baregona ḡena vetuḡunaḡi-iaḡovini tarimana ta tu mo Petero na seḡana ebasi-vaḡiato tarimana garagarana ta, ḡia ekirato, “Au atuḡamaḡini tu, ḡoi maki ḡia ḡesi mo vamoka nuḡanai aḡitamuto banaḡu, ene?” <sup>27</sup> Petero ma evekira-ḡuniḡau ḡenoḡoito, ma nuḡanai asikauna tu kokoroku egoḡito.

*Iesu Pilato ḡoiranai*

*Mataio 27:1-2 ema 27:11-14; Mareko 15:1-5; Luka 23:1-5*

<sup>28</sup> Benamo Iuda tarimari na Iesu Kaiafas sevinai na ḡeḡori-iaḡoato Roma ḡeri gavana ḡena numa barana ḡana. Mo tu varau ekini-mama mamato-ḡoi. Ma Iuda tarimari tu asi ḡeurato, Roma ḡeri gavana ḡena numai beḡene raka-toḡa, korana ḡekirato, veiareva,



asi rakavari, beḡene tanu. Ġia ḡeri ura tu Pasova o mase aneruna na Isaraela tarimari evanaḡirito moḡo asi evaḡirito verekona beḡene ḡania veḡata. <sup>29</sup> Benamo Pilato ḡeri ai eraka-rosito, benamo ekirato, “Mai tarima boḡo ḡabi-iaḡomaia ḡena kerere korana tu kara?” <sup>30</sup> Ġia na ḡevaḡa-veḡeato, ḡekirato, “Bema ḡia veiḡa rakavari asi bere vei nai tu, ḡoi ḡemu ai asi baḡara ḡabi-iaḡomaia.” <sup>31</sup> Benamo Pilato na ekirarito, ekirato, “Ḡoḡabia, ma ḡoḡori-iaḡoa, benamo ḡemi taravatu ekirani ilailanai ḡoa vaḡa-kotaia.” Moḡesi naima Iuda tarimari na Pilato ḡekiraiato, ḡekirato, “Ḡai ḡema taravatu na tu maoro asi evinimani, tarima ta baḡana vaḡi-masea.” <sup>32</sup> Maiḡa eḡorato anina tu, Iesu na ḡia aiḡesina bemaseni ekiraḡiato guruḡana bene moḡoni ḡana.

<sup>33</sup> Benamo Pilato numa barana ḡana ma erakatoḡa-ḡenoḡoito, bena Iesu ekeaiato, ma edanaḡiato, “Ḡoi tu Iuda tarimari ḡeri vere ba?” <sup>34</sup> Iesu na evaḡa-veḡeato, ekirato, “Ḡoi maniḡesi au okiraḡini tu tauḡemu nuḡamu siga moḡo oguruḡani ba tarima tari na beḡe kira-varamu guruḡana.” <sup>35</sup> Pilato evaḡa-veḡeato, ekirato, “Be, au tu Iuda tarimagu, ei? Ḡoi tu ḡemu tanobara tarimari na ema Rubu Veaḡa vereri na beḡe ḡabi-iaḡomamu, au beḡema vinigu. Ḡoi tu kara kererena oveiato?” <sup>36</sup> Iesu na evaḡa-veḡeato, ekirato, “Au ḡegu Basileia tu dia mai tanobara dagarana. Bere au ḡegu Basileia mai tanobara nuḡanai bere vetore e bere ruḡa nai tu, au ḡegu vetuḡunaḡi-iaḡovini tarimari ḡere variḡisi, Iuda tarimari ḡesi ḡere vevaḡi, ma tarima ta maki asi bere ilaila, Iuda tarimari ḡimari ai bere toregu. Senaḡi au ḡegu Basileia tu dia mai tanobara nuḡanai eruḡani.” <sup>37</sup> Pilato na moḡesina naima Iesu edanaḡiato, ekirato, “Be ḡoi tu vere ba?” Iesu evaḡa-veḡeato, ekirato, “Ḡoi okirani au vere otoni tu moḡoni oguruḡani. Au tanobarai ama maḡurito tauna korikori, guruḡa moḡonina bana vaḡa-foforia ḡana. Guruḡa moḡoninai ḡetanuni tarimari mabarari na au garogu tu ḡeseḡaḡiani.” <sup>38</sup> Pilato ekirato, “Guruḡa moḡonina tu kara?”

*Iesu bene mase guruḡana*

*Mataio 27:15-31; Mareko 15:6-20; Luka 23:13-25*

Moḡesi eguruḡato murinai, ma eraka-rosito Iuda tarimari ḡeri ai, benamo ekirarito, ekirato, “Au na mai tarima ḡenai rakava ta tu asi badoḡaria. <sup>39</sup> Senaḡi ḡomi ḡemi veiḡa ta tu iniḡesi, Pasova verekona ḡaronai, dibura tarimana ta bana tuḡu-vaḡia. Be ḡomi ḡourani tu, ḡemi Iuda tarimari ḡeri vere natuḡu-vaḡia, ba?” <sup>40</sup> Benamo ḡia mabarari ḡekoḡoto, ḡekirato, “Asiḡina! Ġia tu asiḡi! Senaḡi Barabas.” A Barabas tu elemato-ḡoi e evevaḡito-ḡoi naima ḡediburaiato.

## 19

<sup>1</sup> Moḡesi naima Pilato na Iesu eḡabiato, vetari tarimari o soldia evinirito, benamo ḡekwariato. <sup>2</sup> Ema soldia na varovaro ma giniri dagarana ḡebito-ḡeḡeraḡiato, korona noḡa ḡeveiato, benamo Iesu debanai ḡetore-kauato. Ema dabuḡa maukana kakakakana na ḡevaḡa-dabuḡaiato. <sup>3</sup> Benamo ḡoirana ḡana ḡeraka-kavito, benamo ḡekiraiato, ḡekirato, “Iuda tarimari ḡeri Vere, ḡaro namona!” Benamo ḡoirana ma ḡeforoato.

<sup>4</sup> Pilato ma eraka-rosito Iuda tarimari ḡeri ai, benamo ekirarito, ekirato, “Ḡoḡitaia, au na ḡia ḡomi ḡoirami ai ama ḡori-rosiani anina tu nama vaḡa-ribami, au na ḡia ḡenai rakava ta tu asi badoḡaria.” <sup>5</sup> Benamo Iesu ema raka-rosito, debana tu ma koronana, ḡau ma giniginina ḡevatoato dagarana, ema dabuḡa kakakakana maki roḡo etogi-taḡoato-ḡoi. Benamo Pilato na Iuda tarimari ekirarito, ekirato, “Ḡoḡitaia, tarimana tu maiḡa.”

<sup>6</sup> Moḡesi Rubu Veaḡa vereri baregori ma ḡeri vetuḡunaḡi-iaḡovini tauri na ḡeḡitaiato nai, ḡefararato, ḡekirato, “Ḡovaḡa-satauroa! Ḡovaḡa-satauroa!” Benamo Pilato na ekirarito, ekirato, “Ḡomi tauḡemi na ḡoḡabi-iaḡoa, ma ḡoa vaḡa-satauroa, korana au na ḡia ḡenai kerere ta asi badoḡaria.” <sup>7</sup> Ma Iuda tarimari na ḡevaḡa-veḡeato, ḡekirato, “Ḡai tu ma ḡema taravatu, ma ḡai ḡema taravatu ekirani, ḡia tu bene mase veḡata, korana ḡia tu tauḡena moḡo Barau Natunai bevevaḡa-iaḡo.”

<sup>8</sup> Pilato na mo guruḡa eseḡaḡiato nai, egari-rakava rakavato. <sup>9</sup> Benamo numa baregonai ma eraka-toḡato, benamo Iesu ekiraiato, ekirato, “Ḡoi tu ainana oiaḡomato,

ei?” Senaḡi Iesu na asi evaḡa-veseato. <sup>10</sup> Benamo Pilato na ekiraiato, ekirato, “Ḡoi tu asi ourani au vaḡa-vesegu ei? Ḡoi asi ribamu au tu ma ḡegu seḡuka ḡoi bavaḡa-satauromuni, e ma ḡegu seḡuka ḡoi batuḡu-vaḡimuni?” <sup>11</sup> Iesu evaḡa-veseto ekirato, “Bere Barau na guba na ḡoi seḡuka asi bere vinimu nai tu, toma au ḡoi ḡemu seḡuka gaburenai asi bara ritoḡo. Moḡa lorinai, au eḡabiguto ma ḡoi ḡimamu ai etoreguto tarimana, ḡena rakava tu barego lelevaḡi”. <sup>12</sup> Pilato na mo guruḡa eseḡaḡiatio, benamo dabara evetauto-ḡoi, ḡena ura Iesu bene tuḡu-vaḡia. Senaḡi Iuda tarimari roḡo ḡekoḡoto-ḡoi, ḡekirato-ḡoi, “Bema ḡoi na mai tarima botuḡu-vaḡiani nai, ḡoi tu dia Kaisara ḡatana. Kamara tarima tauḡena evekiraḡini vere etoni, ḡia na tu Kaisara, Roma ḡeri vere, ekira-fitoḡaiani.”

<sup>13</sup> Pilato na mo guruḡa eseḡaḡiatio, benamo Iesu ema ḡori-rosiato, benamo eiaḡoto, Kota eseḡaḡini tarimana ḡena sea ai ea tanukauto. Mo gabu tu “Fore Touraḡena” ḡetato-ḡoi. Ma Heberu garonai tu “Gabata.” <sup>14</sup> Mo ḡaro tu Pasova o Iuda tarimari mase aneruna na evanaḡirito moḡo verekona ḡana rovinatore ḡarona, ma horaḡauna 12 koloko tu varau eḡabiato. Benamo Pilato na Iuda tarimari ekirarito, ekirato, “Ḡoboḡe, ḡemi vere iomaiḡa!” <sup>15</sup> Senaḡi ḡia tu ḡefararato, ḡekirato, “Ḡoḡabi-veḡitaia! Ḡoḡabi-veḡitaia! Ḡoa vaḡa-satauroa!” Pilato na ma edanaḡirito, ekirato, “Ḡomi ḡemi vere tu navaḡa-satauroa, ei?” Rubu Veaḡa vereri baregori ḡevaḡa-veseto, ḡekirato, “Kaisara ḡereḡana moḡo ḡai ḡema vere, ma vere boruna ta tu asiḡina.” <sup>16</sup> Benamo Pilato na Iesu ḡia ḡimari ai etorekauato beḡene vaḡa-satauroa ḡana.

#### *Iesu ḡevaḡa-satauroato*

*Mataio 27:32-44; Mareko 15:21-32; Luka 23:26-43*

Benamo vetari tarimari o soldia na Iesu ḡeḡabiato, ḡeḡori-iaḡoato. <sup>17</sup> Ma Iesu na ḡena satauro efaḡa-vaishiato, eraka-rosito, eiaḡoto gabu arana “Deba Ḡavana Gabuna” ḡana. Heberu garonai mo gabu arana tu “Golgota”. <sup>18</sup> Mo gabu ai ḡia na Iesu ḡevaḡa-satauroato tarima ruarua ḡesi; ta tavi tai, ta tavi tai, ma Iesu tu nuḡanai. <sup>19</sup> Ma Pilato na guruḡa tari ḡau lefalefa tai etorerito, benamo satauro tuḡunai ḡeikoko-kafakauato. Etorerito guruḡari tu maiḡeri, “IESU, NASARETA TAUNA, IUDA TARIMARI ḠERI VERE.” <sup>20</sup> Mo guruḡa tu Heberu garo ai, e Roma garo ai, ema Grik garo ai etorerito. Iesu ḡevaḡa-satauroato gabuna tu vanuḡa baregona sevinai, be Iuda tarimari vovoka na mo guruḡa debana ḡeiaviato. <sup>21</sup> Benamo Rubu Veaḡa vereri baregori na Pilato ḡekiraiato, ḡekirato, “‘Iuda tarimari ḡeri Vere’ tu asi notorea, senaḡi iniḡesi notorea, ‘Ḡia ekirato, au tu Iuda tarimari ḡeri Vere.’”

<sup>22</sup> Ma Pilato na evaḡa-veserito, ekirato, “Kara au na batorea guruḡana tu batorea veḡata.”

<sup>23</sup> Vetari tarimari na Iesu ḡevaḡa-satauroato murinai, ḡena dabuḡa ḡeḡabirito, ma karava vasivasi ḡeveirito, benamo vetari tarimari na ḡeri sebori sebori ḡeḡabito, ma vei-gabigabi dabuḡana tu ḡeiaḡuiato. Korana vei-gabigabi dabuḡana tu dabuḡa sebona na moḡo ḡeturiato. A ḡia tu dia dabuḡa vesavesari vovoka ḡeturi-kavikavito vau ḡeveiato dabuḡana. <sup>24</sup> Moḡesina naima tauḡeri fakari ai ḡeguruḡa-vegogoto, ḡekirato, “Asi sidarea, senaḡi laki ḡerena ta siveia, bewinini tarimana na mo dabuḡa bene ḡabia uranai.” Mai veiḡa ḡeveiato tauna korikori tu, Buka Veaḡai ḡetorerito guruḡari beḡene moḡoni ḡana, maiḡesi ekirani, “Au ḡegu dabuḡa ḡia fakari ai ḡekaravarito, ema au ḡegu dabuḡa uranai laki ḡerena ta ḡeveiato.” Moḡesi naima vetari tarimari na maiḡeri veiḡa ḡeveirito.

<sup>25</sup> Iesu ḡena satauro koranai tu vavine vasivasi (4) ḡeruḡa-taḡoto-ḡoi: Iesu sinana, e Iesu sinana tarina vavinena, e Maria, Klopa ḡaraḡona, ema Maria, Magadala vanuḡana vavinena. <sup>26</sup> Iesu na sinana e Iesu na eura-viniato-ḡoi merona monai ruḡataḡo eḡitarito, benamo Iesu na sinana ekiraiato, ekirato, “Natumu merona maniḡa.” <sup>27</sup> Ema ḡena mero ekiraiato, ekirato, “Sinamu maniḡa.” Mo ḡaro na evesinato, Iesu ḡena mai mero na Iesu sinana ḡena numa ḡana eḡori-iaḡoato, benamo enariato-ḡoi.

*Iesu ġena mase*

*Mataio 27:45-56; Mareko 15:33-41; Luka 23:44-49*

<sup>28</sup> Moġa murinai Iesu eribato, ġena ġauvei mabarari tu varau bevaġa-koriri. Ma Buka Veaġai ġetoreato guruġana bene moġoni uranai ekirato, “Au bokagu bekoke.”  
<sup>29</sup> A gwaġutu ta nuġanai tu vine nanuna mamakina monai toretaġo. Nanu erimaiani dagnarana mo vine nanuna mamakinai ġeduġi-fereiato. Ma vine nanuna mamakina na evonuto, benamo isopo legana dudunai ġetore-kauato, benamo ġeduġi-varaġeato, Iesu bokanai ġetore-kauato. <sup>30</sup> Iesu na mo vine nanuna mamakina eniuato, benamo ekirato, “Bema-kori.” Ma debana eġero-riġoto, benamo tauġanina na ġia iaukana eraka-vaġito, emaseto.

*Soldia ta na Iesu sebina egwanuato*

<sup>31</sup> Mo ġaro moġa tu rovinatore ġarona, korana beboġini ma belaġanini tu Sabadi veaġana baregona ta mo Pasova o Iuda tarimari mase aneruna na evanaġirito moġo verekona ġarori nuġari ai. Moġa lorinai Iuda tarimari asi ġeurato, mo Sabadi veaġana baregonai mase tarimari tauġaniri satauro tuġunai beġene tanu. Moġesi naima Pilato ġenogiato, Iesu ema mo tarima ruarua kwakuri beġene kwari-koruri, benamo satauro tuġuna na beġene ġabi-riġori. <sup>32</sup> Moġa lorinai vetari tarimari ġeiaġomato, benamo ġevaġa-satauro debaiato tarimana kwakuna ġekwari-koruato, ma tarima vaġa-ruaruana Iesu ġesi ġevaġa-satauroato moġa maki moġesi ġeveiato. <sup>33</sup> Senaġi Iesu ġenai ġeiaġomato nai, Iesu tu varau emaseto ġeġitaiato, be kwakuna asi ġekwari-koruato. <sup>34</sup> A vetari tarimana ta na moġo Iesu sebina garaġota na egwanuato. Benamo asikauna mo egwanuato gabuna na rara e nanu ġevebubu-rosito.

<sup>35</sup> Maiġa eġitaiato tarimana na evari-fiuato, ma ġia ġena vevarifiu tu moġoni. Ġia ma ribana, ġia tu eguruġa-korikorini, ma ġia na ekiraġi-foforiani anina tu, ġomi na maki boġono vaġa-moġonia ġana. <sup>36</sup> Maiġeri veiġa ġeveirito korana tu, Buka Veaġai ġetorerito guruġari beġene moġoni, ekirani, “Ġia tu turiġana sebna ta maki asi beġe lau-koruani.” <sup>37</sup> Ma Buka Veaġai etoreato guruġana ta tu maiġesi ekirani, “Sebina ġegwanuato tarimana ġenai ma beġe boġe-raġeni.”

*Iesu ġeguriato*

*Mataio 27:57-61; Mareko 15; 42-47; Luka 23:50-56*

<sup>38</sup> Maiġa murinai Iosefa, Arimatea tarimana, na Pilato enoġiato, Iesu tauġanina bene ġabia ġana. Pilato na maoro eviniato, benamo eiaġoto, Iesu tauġanina ea ġabiato. Iosefa tu Iesu ġena mero ta, senaġi Iuda tarimari gariri eveito-ġoi, be eraka-vekuretoġato-ġoi, ġena veġabidadama asi evaġa-foforito-ġoi. <sup>39</sup> Nikodemo, tovotovonai Iesu ġenai boġi eiaġoto tarimana, maki eiaġoto. Ġia na tu muro e aloe ġegiro-sebonarito muramurana kilogram gabana toitoi (30) maki eġabi-kauato. (Mo vedau muramurana bonana tu namo vedaurea). <sup>40</sup> Benamo Iesu tauġanina ġeġabiato, ma tauri ruarua na dabuġa kurokuroana namona mamuramurana dagnarana na ġekumuato, Iuda seneri na mase tarimari ġeveirito-ġoi ilailanai.

<sup>41</sup> Iesu ġevaġa-satauroato gabuna tu ma vamokana. Mo vamoka nuġanai tu gara kouġana ta fore na ġeveiato, ma nuġanai tarima ta tu roġosi beġere tore-toġaia. <sup>42</sup> Mo ġaro moġa tu Iuda tarimari ġeri rovinatore ġarona, ema mo gara kouġana maki kavinaġi, be Iesu ġeġabiato, monai ġea tore-toġaiato.

## 20

*Gara kouġana tu korina*

*Luka 24:1-12*

<sup>1</sup> Sabadi ġarona murinai, Sandei boġiboġi iamoiamo, roġo mukunamukunai, Maria, Magadala vavinena, gara ġana eiaġoto. Benamo eboġeto, gara ġatama bokana ġetabe-ġauato forena tu ġeġabi-veġitaiato, be irau ai vetore eġitaiato. <sup>2</sup> Benamo eraga-ġenoġoi-iaġomato, Simona Petero e Iesu ġena mero ta, Iesu na eura-viniato-ġoi merona, ġeri ai,

benamo ekirarito, ekirato, “Vereḡauka tu gara na beḡe ḡabi-rakaia, ma ḡita asi ribara ainai beḡe torea.”

<sup>3</sup> Benamo Petero ema Iesu ḡena mo mero ta moḡa ḡeraka-rosito, benamo gara ḡana ḡeiaḡoto. <sup>4</sup> Ma tauri ruarua ḡeraga-vegogo-iaḡoto, senaḡi Iesu ḡena mo mero ta na Petero eraga-kwaneato, ma gara forenai ea raḡasi-guineto. <sup>5</sup> Etoḡa-tarito, benamo eboḡe-toḡato, Iesu ḡekumuato mo dabuḡa kurokurona eḡitaiato monai toretari. Ḣia tu eboḡe-toḡato moḡo, asi eraka-toḡato. <sup>6</sup> Benamo Simona Petero eraḡasito, benamo eraka-toḡato gara kouḡana nuḡanai, ma Iesu ḡekumuato dabuḡa kurokurona eḡitaiato monai toretari, <sup>7</sup> ema Iesu debana mabarana ḡebaru-ḡauato mukona eḡitaiato, Iesu tauḡanina ḡekumu-ḡauato mo dabuḡa kurokurona ḡesi tu asi tore-sebona. Senaḡi mo muko tu ḡereḡana iokuioku, be irau ai. <sup>8</sup> Benamo Iesu ḡena mo mero ema raḡasi-guineto, moḡa maki eraka-toḡato. Moḡeri dagara eḡitarito, benamo evaḡa-moḡoniato. <sup>9</sup> Korana ḡia na Buka Veaḡai evetoreto guruḡana tu roḡosi roḡo beḡene riba-korikoria, guruḡana tu maiḡa: Iesu tu mase na ma bevareḡisi-ḡenoḡoini. <sup>10</sup> Benamo Iesu ḡena mero ruarua ma ḡeḡenoḡoito ḡeri numa ḡana.

#### *Iesu tu Maria, Magadala vavinena, ḡenai efororito*

<sup>11</sup> Senaḡi Maria tu gara kouḡana murikanai eruḡato vau etaḡito-ḡoi. Ma etaḡito-ḡoi nuḡanai etoḡa-tarito, benamo eboḡe-toḡato fore kouḡana nuḡana ḡana. <sup>12</sup> Benamo aneru ruarua eḡitarito, dabuḡa kurokuro ḡetogito, Iesu ḡevaḡa-genaiato gabunai tanutaḡo. Ta tu debakanai etanuto, ma ta tu gabikanai etanuto. <sup>13</sup> Benamo mo aneru ruarua na ḡekiraiato, ḡekirato, “Vavine, ḡoi tu karase nai otaḡini?” Maria na evaḡaveserito, ekirato, “Korana au ḡegu Vereḡauka tu beḡe ḡabi-rakaia, ma au asi ribagu ainai ma beḡea torea.”

<sup>14</sup> Maiḡesi eguruḡa-ḡosito murinai, eboḡe-ḡeḡeraḡito tu, Iesu monai ruḡataḡo eḡitaiato. Senaḡi Maria tu asi eriba-maoroto, mo tu Iesu eruḡa-taḡoto-ḡoi. <sup>15</sup> Iesu na ekiraiato, ekirato, “Vavine, ḡoi tu kara dainai otaḡini?” Ḣoi tu deikara ovetauani?” Maria etuḡamaḡito, Iesu tu mo vamokai eḡaukarani tarimana, be ekiraiato, ekirato, “Verebara, bema ḡoi na boḡabi-rakaia nai tu, ainai botorea gabuna nokira-varagu, be naḡabia.” <sup>16</sup> Iesu na ekiraiato, ekirato, “Maria!” Maria eruḡa-kureto, benamo ekiraiato Heberu garo ai, ekirato, “Raboni!” Mai guruḡa tauna tu, “Vevaḡa-riba Tauna.” <sup>17</sup> Iesu na ekiraiato, ekirato, “Au asi noḡabi-tarigu, korana au tu Tamagu ḡenai roḡosi roḡo bara varaḡe. Senaḡi noiaḡo au tarikakagu ḡeri ai, benamo bono kirari, ‘Au tu au Tamagu e ḡomi Tamami, ema au ḡegu Barau e ḡomi ḡemi Barau ḡenai avaraḡeni.’” <sup>18</sup> Maria, Magadala vavinena, Iesu ḡena mero ḡeri ai eiaḡoto, benamo ekirarito, ekirato, “Au na Vereḡauka tu baḡitaia.” Benamo Vereḡauka na evaḡa-guruḡaiato guruḡari mabarari maki ma ekira-vararito.

#### *Iesu ḡena mero ḡeri ai efororito*

*Mataio 28:16-20; Mareko 16:14-18; Luka 24:36-49*

<sup>19</sup> Mo Sandei boḡi ai, mo tu ḡaro giniginena fura ta nuḡanai, Iesu ḡena mero tu numa tai ḡevegogoto. Ḣia tu Iuda tarimari gariri ai, be ḡeri numa ḡatama bokana tu ḡebiri-ḡauato. Ma Iesu eiaḡomato, ḡia fakari ai eruḡa-tarito, benamo ekirato, “Asi ḡogari, nuḡami ai maino netanu.” <sup>20</sup> Moḡesi eguruḡa-ḡosito murinai, ḡimana ḡeikokorito e sebina ḡegwanuato moḡeri evaḡa-ḡitarito. Vereḡauka ḡeḡitaiato nai, ḡeiku-rakavato. <sup>21</sup> Benamo Iesu na ḡia ma ekirato, “Asi ḡogari, nuḡami ai maino netanu! Tamagu na au etuḡuguto kavana, au na maki ḡomi atuḡumini.” <sup>22</sup> Moḡesina evaḡa-guruḡa ḡosirito murinai, iaḡana efururu-iaḡoato ḡeri ai, benamo ekirarito, ekirato, “Iauka Veaḡa ḡoḡabia. <sup>23</sup> Ḣomi na ḡena rakava boḡo tuḡamaḡi-fitoḡaiiani tarimana, ḡena rakava tu Barau na maki betuḡamaḡi-fitoḡaiiani. A ḡena rakava asi boḡo tuḡamaḡi-fitoḡaiiani tarimana tu, ḡena rakava Barau na maki asi betuḡamaḡi-fitoḡaiiani.”

#### *Iesu Tomasi ḡenai efororito*

<sup>24</sup> Senaḡi Tomasi tu Iesu ḡena mero ḡeri ai eiaḡoto ḡaronai ḡia tu asiḡina. Tomasi arana ta tu Didimo o Kafa, ema ḡia maki Iesu ḡena mero ta mo mero gabanana ruarua (12) nuḡanai. <sup>25</sup> Moḡesina nai Iesu ḡena mero na ḡekira-varaiato, ḡekirato, “Vereḡauka tu ḡai na baḡa ḡitaia.” A Tomasi tu ekirato, “Au tu ḡimana ḡeikorito gaburi baḡitarini, ema didigu ikoko ḡeraka-toḡato gaburi na baduḡi-toḡaiani, e sebina ḡegwanuato, monana didigu baduḡi-toḡaiani vau, bavaḡa-moḡoniani.”

<sup>26</sup> ḡaro imaima toitoi (8) ḡekorito murinai, Iesu ḡena mero tu numa nuḡanai maia, ma mo ḡaro ai tu Tomasi maki ḡia ḡesi. Mo numa ḡatama bokana tu biribiri, senaḡi Iesu tu eiaḡomato, fakari ai eruḡa-tarito, benamo ekirato, “Asi ḡogari, nuḡami ai maino netanu.” <sup>27</sup> Benamo Tomasi ekiraiato ekirato, “Tomasi, ḡimagu noḡitari, didimu mai ikoko gaburi ai noma duḡi-toḡaia. E ḡimamu notuḡu-iaḡomaia, be didimu au sebigu ḡegwanuato mainai noma duḡi-toḡaia. ḡemu daradara novaḡa-dokoa, ma novaḡa-moḡonigu.” <sup>28</sup> Benamo Tomasi na Iesu evaḡa-veaseato, ekirato, “Au ḡegu Vereḡauka ema ḡegu Barau.” <sup>29</sup> Iesu na ekiraiato, ekirato, “Tomasi, ḡoi tu ovaḡa-moḡoniguni, korana boḡitagu nai. A asi ḡeḡitaguni, senaḡi ḡevaḡa-moḡoniguni tarimari tu beḡene iaku.”

*Mai buka Ioane na etoreato anina tu kara*

<sup>30</sup> Iesu na vetoḡa boruri ḡutuma ḡena mero ḡoirari ai eveirito. Senaḡi moḡeri mai bukai tu asi atorerito. <sup>31</sup> A maiḡeri atorerito korana tu, ḡomi na Iesu boḡono vaḡa-moḡonia, ḡia tu moḡoni Keriso, Barau Natuna. Ma bema ḡomi na ḡia boḡo vaḡa-moḡoniani nai, ḡia arana maḡuri vanaḡivanaḡi boḡo ḡabiani.

*Iesu mero imaima ruarua (7) ḡeri ai efororito*

## 21

<sup>1</sup> Moḡa murinai Tiberia kouna rikina Iesu ḡena mero ḡeri ai ma efororito. Monai tu maiḡesi efororito: <sup>2</sup> Simona Petero; Tomasi, arana ta tu Didimo o Kafa; Natanaela, Kana vanuḡa tarimana, Kana tu Galilea tanonai; Sebedaio natuna ruarua; ema Iesu ḡena mero ruarua; mabarari monai ḡetanu-vegogoto-ḡoi. <sup>3</sup> Benamo Simona Petero na ekirarito, ekirato, “Au tu kou ḡana maina aiaḡoni.” Ma mo kotari ḡekirato, “ḡai maki ḡoi ḡesi taiaḡoni.” Benamo tauri imaima ruarua (7) ḡeraka-rosito, ḡeiaḡoto, ḡasi ai ḡea raḡekauto, benamo ḡea mainato. Senaḡi mo boḡi barabara nuḡanai tu maḡani-kone ta maki asi ḡeḡoitaḡoato.

<sup>4</sup> Boḡiboḡi iamoiamo Iesu tu kou rikina eruḡa-taḡoto-ḡoi; senaḡi ḡena mo mero tu asi ḡeriba-maoroto, mo tu Iesu eruḡa-taḡoto-ḡoi. <sup>5</sup> Benamo Iesu na ekirarito ekirato, “Natugu, ḡomi ḡemi ai maḡani-kone tari maniḡeri, ba?” ḡia na ḡevaḡa-veaseato, ḡekirato, “Asiḡina.” <sup>6</sup> Benamo Iesu na ekirarito, ekirato, “Reke ḡasi aroribana rekena na ḡofiu-riḡoa, maninai tu maḡani-kone tari boḡo ḡoitaḡoni.” Reke ḡefiu-riḡoato, benamo ma ḡeinu-raḡea ḡetato nai tu ḡeinu-kavaiato meto fanifani, korana tu maḡani-kone vovoka tabutabu ḡevaḡa-toḡarito bene.

<sup>7</sup> Iesu ḡena mero ta tu Iesu na eura-viniato-ḡoi merona. Mai mero na Petero ekiraiato, ekirato, “Vereḡauka tu iomoḡa.” Simona Petero na mo guruḡa eseḡaḡiato, “Vereḡauka tu iomoḡa” nai, asikauna ḡena dabuḡa eraga-veiato, benamo kou ai ebaba-reito. Mo dabuḡa tu, eḡauveito-ḡoi be ekokiato. <sup>8</sup> Senaḡi Iesu ḡena mero kota tu mo bouti na vau ḡeleva-iaḡoto. Mo reke ma maḡani-konena maki ḡeinukau-iaḡo sebonaiato. Korana ḡia na mo reke ḡefiu-riḡoato gabuna ema fenu fakari tu asi manaḡa, mita sinau sebona (100) kavana moḡo.

<sup>9</sup> Fenu ai ḡea darokauto nai, ḡeboḡeto tu karava vaḡa-ḡara ḡeḡitaiato, e maḡani-kone karava torekau ḡeḡitarito, ema beredi tari maki monai toretaḡo. <sup>10</sup> Ma Iesu na ekirarito, ekirato, “ḡomi na reke ai boḡo vaḡa-toḡari maḡani-koneri tari ḡoḡabi-iaḡomari.” <sup>11</sup> Simona Petero ḡasi ai eraḡekauto, benamo reke fenu ai einu-raḡeato. Mo reke tu maḡani-kone baregori na evonuto, mo maḡani-kone baregori tu mabarari sinau sebona gabana imaima ma toitoi (153), ḡutuma lelevaḡi, senaḡi reke tu asi evedareto.

<sup>12</sup> Iesu na ekirarito, ekirato, “Gōiaḡoma, ḡoma ḡaniḡani.” Iesu ḡena mo mero moḡeri ta na Iesu tu iniḡesi asi ma ḡedanaḡiatio, “Goi tu dei, ei?” Korana ḡia ribari, mo tu Vereḡauka. <sup>13</sup> Iesu eiaḡomato, beredi eḡabiatio, benamo evinirito, ma maḡani-kone maki moḡesi eveirito.

<sup>14</sup> Mai tu nega vaḡa-toitoina ḡena mero ḡeri ai efororito, Barau na mase na evaga-variḡisi ḡenoḡoiatio murinai.

*Iesu na Petero elaunaḡiatio*

<sup>15</sup> Geḡaniḡani-ḡosito murinai, Iesu na Petero ekiraiatio, ekirato, “Simona, Ioane natuna, ḡoi na au oura-viniguni veuravinina na maiḡeri ḡeri veuravini au ḡegu ai ḡetoreani maki evanaḡiani, ei?” Petero ekirato, “Oi Vereḡauka, ḡoi ma ribamu, au na ḡoi tu aura-vinimuni.” Iesu na ekiraiatio, ekirato, “Au ḡegu mamoe naturi bono ḡuburi.”

<sup>16</sup> Iesu na ma edanaḡi-ḡenoḡoiatio, ekirato, “Simona, Ioane natuna, au oura-viniguni, ei?” Petero evaḡa-veseto, ekirato, “Oi Vereḡauka, ḡoi ma ribamu, au na ḡoi tu aura-vinimuni.” Iesu ekirato, “Au ḡegu mamoe bono nari-ginikauri.”

<sup>17</sup> Iesu na Petero vaḡa-toitoina ma edanaḡiatio, ekirato, “Simona, Ioane natuna, ḡoi na au oura-viniguni, ei?” Petero enuḡa-metoto, korana Iesu na mo tu vaḡa-toitoina edanaḡiatio, “Goi au tu oura-viniguni, ei?” Petero ekirato, “Vereḡauka, ḡoi tu dagara mabarari ma ribamu, e ḡoi ma ribamu, au na ḡoi tu aura-vinimuni.” Iesu ekirato, “Au ḡegu mamoe bono ḡuburi.

<sup>18</sup> Akira-korikorimuni, ḡoi variḡumu ai tu, tauḡemu na gabakamu gabaḡau na obaruato-ḡoi, benamo oura-vinirito-ḡoi gaburi ḡana oiaḡoto-ḡoi. Senaḡi ḡoi boḡaukani nai tu, ḡimamu botuḡu-roroḡotoani, benamo tarima ta na ḡimamu bebaruani, benamo beḡori-kaumuni, ma asi oura-viniani gabuna ḡana beḡori-iaḡomuni.” <sup>19</sup> Iesu na mai guruḡa ekiraḡiatio tu, Petero bemaseni dabarana ema ḡena mase na kamas Barau bevaḡa-raḡe baregoani, etore-rosiatio. Benamo Petero ekiraiatio, ekirato, “Au murigu ai noma raka.”

*Iesu ma ḡena mero ta*

<sup>20</sup> Petero eruḡa-kureto tu, Iesu na eura-viniatio-ḡoi merona eḡitaiatio, muriri na eraka-iaḡoto-ḡoi. Mai mero tu, mo Iesu ḡeḡaniḡani-vegogoto lavilavinai Iesu ḡenai evetabekauto, benamo edanaḡiatio, ekirato, “Vereḡauka, ḡoi berevamuni tarimana tu dei, ei?” <sup>21</sup> Petero na mo mero (o Ioane) eḡitaiatio, benamo Iesu ekiraiatio, ekirato, “Senaḡi Vereḡauka, ḡia maḡurina tu aiḡesi ei?” <sup>22</sup> Iesu na evaḡa-veseato, ekirato, “Bema au baurani, ḡia tu maḡuri bene tanu mo, au ma baḡenoḡoini, ḡoi tu asi ḡemu ḡauvei ta maniḡa ovedanaḡi-iaḡiani. Goi tu au murigu ai noma raka.” <sup>23</sup> Mai guruḡa dainai, tarikaka veḡabidadama nuḡanai fakari guruḡa leileiri ḡekiraḡirito-ḡoi, ḡekirato, “Iesu ḡena mai mero maiḡa tu asi bemaseni.” Senaḡi Iesu tu asi ekirato, mo mero tu asi bemaseni. Iesu maiḡesi moḡo ekirato, “Bema au baurani, ḡia tu maḡuri bene tanu mo, au ma baḡenoḡoini, ḡoi tu asi ḡemu ḡauvei ta maniḡa ovedanaḡi-iaḡiani.”

<sup>24</sup> Mo Iesu ḡena mero dagarana tu maiḡa, maiḡeri guruḡa evari-fiurini ema etorerini maiḡa. Gita ribara, ḡia ḡena vevarifiu guruḡari tu moḡoni.

<sup>25</sup> Iesu na dagara tu vovoka eveirito. Bere mabarari ḡere toreri nai tu, au atuḡamaḡini, mai tanobara gabuna mabarana tu bere kei, asi veḡata bere ilaila, moḡeri buka mabarari ḡetore-vegogori ḡana uranai tu-na.

## APOSTOLO ĠERI VEIĠA E ĠAUVEI

Apostolo ġeri ġauvei e veiġa vaġa-foforiri guruġari

Mai apostolo ġeri ġauvei e veiġa bukana anina baregona tu Iauka Veaġa Barau ġenana emariġoto ema apostolo ġerina ema ġauveito variri.

Mai buka maki Luka na Teofilo ġena ma etoreato. Etoreato laġanina tu laġani 63 beiaġo 68 fakari ai ta kavana, mo tu Iesu emaseto murinai.

Guruġa baregori Luka na Teofilo mai fefai evaġa-ribaiato tu maiġeri: 1) Kamasi ekalesia doġorori ġevesinato; 2) ma kamasi tanobara mabarana ekalesia doġorori na evaiato; 3) kamasi Keriso guba na Iauka Veaġa ġenana mai tanobarai ġena ekalesia doġorona eragaiani; 4) ekalesia mabarari Iauka Veaġa na bene vaġa-vonuri, korana ġia ġenana vauro ġia ġeri vetuġunaġi ġauveina bevaġa-tubuani e bevaġa-taunaiani, ema bevaġa-kokoreani ema bevaġa-seġukaiani (Apostolo 1:8; Sekaraia 4:6).

Luka ġena toretore tu maiġesina eboioġaiato:

1. Petero ġena ġauvei Iuda tarimari fakari ai - karoa 1-12
2. Paulo ġena ġauvei irau bese tarimari fakari ai - karoa 13-28

<sup>1</sup> Teofilo, ġoi atore-vinimuni. Ġegu toretore ginigunena nuġanai, Iesu ġena ġauvei e ġena vevaġa-riba guruġari mabarari atore-foforirito, ġena ġauvei esinaiato veġata, <sup>2</sup> eiaġoto mo, Barau na guba ġana eġabi-varaġeato. Roġosi roġo bere ġabi-varaġea nuġanai, Iauka Veaġa ġenana eġabi-viriġirito apostolori evaġa-ribarito. <sup>3</sup> Ġena midigu-midigu e mase murinai ġia mai apostolo ġeri ai efoforito ema vetoġa moġoniri vovokari ai ġia tauġena evevaġa-moġonito ġia tu maġuri etanuni. Ġia tu ġaro gabana vasivasi (40) nuġanai apostolo ġeri ai dabara vovokai efoforito-ġoi, ġeġitaiao-ġoi, ema Barau ġena Basileia, (ġena veġitaġau seġukana evaġa-ruġaiani maiġa), varina ġeri ekiraġiato-ġoi. <sup>4</sup> Ma Iesu ġesi ġeraka-vegogoto nai, Iesu na ekirarito, ekirato, "Ierusema asi boġono iaġuia, senaġi au na akira-varamito varevarena roġo boġono vaġa-nogaia, mo tu au Tamagu na ekiraġi-toreato varevarena. <sup>5</sup> Korana Ioane tu moġoni nanu na ebatisoto-ġoi, senaġina ġomi tu ġaro viravira beġe korini murinai tu, Iauka Veaġa na bebatisomini."

*Barau na Iesu guba ġana eġabi-varaġeato*

<sup>6</sup> Apostolo Iesu ġesi ġevegogoto nai, Iesu ġedanaġiato, ġekirato, "Vereġauka, ġoi na toma mai negai Isaraela tarimama, Roma ġeri veġitaġau na bovaġa-maġurimani, benamo Isaraela ġema veġitaġau o basileia ma bovini-ġenoġoimani ba?" <sup>7</sup> Iesu evaġa-veseto, ekirato, "Mani tu au Tamagu ġereġana ġena seġukai ġarori e negari etorerito, ġomi na tu asi boġo ribarini. <sup>8</sup> Senaġi ġomi tu Iauka Veaġa iatami ai berakarriġoni, benamo seġuka boġo ġabiani, ema au kiraġi-foforigu tarimami ai boġo iaġoni, Ierusema ai, Iudea ai e Samaria gaburi mabarari ai, beiaġoni mo, tanobara gaburi mabarari ai."

<sup>9</sup> Eguruġa-ġosito murinai, matari ġutuġuturi ai Barau na guba ġana eġabi-varaġeato. Ġeġita-ġauato mo, magube na ekou-ġauato, benamo asi ma ġeġitaiao. <sup>10</sup> Apostolo na Iesu guba ġana evaraġeto-ġoi roġo ġeġita-raġeato-ġoi nuġanai, tau ruarua dabuġa kurokurori na ġevedabuġato, asikauna ġia seviri ai ġema ruġa-tarito. <sup>11</sup> Benamo ġekirato, "Galilea tarimami, karase maninai boġo ruġa vau guba ġoġita-taġoani? Mai Iesu, ġomi ġemina guba ġana beġabi-varaġea tarimana, tu ma beġenoġoi-iaġomani. Ġia tu guba ġana bevaraġe boġo ġitaia kavana, guba na ma bemariġoni."

*Apostolo tu Ierusema ai ġevegogoto*

<sup>12</sup> Benamo apostolo Olive Ġorona na Ierusema ġana ma ġeġenoġoi-iaġoto. Mo gabu ruarua fakari tu kilomita sebona kavana. <sup>13</sup> Ierusemai ġeraġasito, benamo ġetanuto-ġoi numana tuġuna daiġutuna ġana ġeraġekauto. Mo daiġutu ai apostolo ġevegogoto,

arari tu Petero; Ioane; Iakobo (o Iames) e Anduru; Filipino e Tomasi; Batolomeo; Mataio; Iakobo Alfeo; Simona, Selote tauna; ema Iudas, Iakobo natuna. <sup>14</sup> Ĝia mabarari ma nuĝari sebona ĝesi ĝeĝuriĝuri-vegogoto-ĝoi, vavine tari maki e Maria, Iesu sinana, ema Iesu tarina doĝoro.

#### *Iudas gabuna eĝabiato tauna*

<sup>15</sup> Moĝeri ĝaro ai Iesu ĝevaĝa-moĝoniato-ĝoi tarimari mabarari tu sinau sebona ma gabana ruarua (120) ĝevevogoto-ĝoi. Ĝia fakari na Petero eruĝa-vaisito, benamo ekirato. <sup>16</sup> “Tarikakagu mabarami, toretore veaĝana tu bema moĝoni, mo tu Iauka Veaĝa Davida muruna na kai-veĝata ekirato, Iudas na Iesu ĝabitarina tarimari beĝori-kaurini guruĝana. <sup>17</sup> Iudas tu ĝai karoma ta, ema ĝia maki apostolo ĝauveina tarimana, ĝai kavana.”

<sup>18</sup> Ĝena vei-rakava voina monina na tano ta evoiato. Monai ĝia eketoto, benamo emaseto, ma nuĝana eĝwa-fakaiato, benamo sinaĝena ebebubu-rosito. <sup>19</sup> Ierusalemata tarimari mabarari na varina ĝeseĝaĝiato, benamo mo tano arana ĝeri garo ai ĝekiraĝiato “Akeledama” anina tu “Rara Tanona.” <sup>20</sup> Korana Salamo bukanai varau ĝetoreato, ekirani,

‘Ĝena numa bene karovo,  
tarima ta asi bene tanu.’  
Ma guruĝa ta Salamo nuĝanai ekirani,  
‘Ĝena veĝitataĝo ĝauveina maki  
ta na bene ĝabia.’

<sup>21</sup> Moĝa lorinai namona tu tau ta siĝabi-viriĝia. Mo tau tu ĝita ĝesi vanaĝivanaĝi tarakao-vegogoto-ĝoi, Iesu Vereĝauka ĝita fakarai taraka-toĝato-ĝoi e taraka-rosito-ĝoi nai, <sup>22</sup> ema Ioane na tarima ebatisorito negana na, beiaĝoma mo, Iesu ĝai ĝemana guba ĝana eĝabi-varaĝeato ĝarona tarimana ta. Korana tu ĝia maki ĝai ĝesi Iesu ĝena variĝisi-ĝenoĝoi bene kiraĝi-foforia.

<sup>23</sup> Moĝa lorinai ĝia na tau ruarua ĝeĝabirito, Iosefa, arana tu Barasaba ĝetato-ĝoi, arana ta maki Iusto; ema Matias. <sup>24</sup> Benamo ĝeĝauĝauto, ĝekirato, “Vereĝauka o, tarimarima mabarari nuĝari ĝoi na tu oribarini, moĝa lorinai novaĝa-ĝitama, dei tu ĝoi na boĝabi-hidia, <sup>25</sup> apostolo ĝauveina bene veia Iudas gabunai; a Iudas tu eiaĝoto ĝena gabu korikorina ĝana.” <sup>26</sup> Benamo fore ĝerena ĝeveiatio nuĝanai, fore tu Matias aranai eketoto, benamo Matias apostolo gabanana sebona (11) ĝesi ĝeiavi-sebonaiato.

## 2

#### *Iauka Veaĝa eraka-riĝoto*

<sup>1</sup> Pentekoste ĝaronai, Iesu ĝevaĝa-moĝoniato-ĝoi tarimari mabarari gabu sebonai ĝevevogoto. Pentekoste anina tu gabana imaima (50), mo tu Pasova verekona ĝarona na beiaĝoma mo, mai ĝaro maiĝa. <sup>2</sup> Benamo asikauna iavara baregona ta guruna noĝa guba na emariĝoto, ĝetanu-vegogoto numana nuĝana mabarana evaĝa-vonuato. <sup>3</sup> Benamo noĝa moĝo karava meari kavana ĝemariĝoto-ĝoi ĝeĝitarito. Mo karava meari ĝemariĝoto, benamo ĝia tata tubuari ai ĝemoreto. <sup>4</sup> Benamo ĝia mabarari Iauka Veaĝa na evaĝa-vonurito, benamo garo iraurauri ai ĝeguruĝato, Iauka Veaĝa na evinirito ilailanai.

<sup>5</sup> Moĝa ĝaronai tu Iuda tarimari, Barau garina ĝeveito-ĝoi tarimari, tu tanobara gaburi mabarari na ĝeiaĝomato, benamo Ierusalemata ĝetanuto-ĝoi. <sup>6</sup> Mo guru ĝeseĝaĝiatio nai, tarimarima ĝutuma ĝeĝaru-vegogoto. Nuĝari ĝefarevaĝito, korana ĝia tata na Iesu ĝevaĝa-moĝoniato-ĝoi tarimari ĝeseĝaĝirito tu mo ĝeraka-vegogoto tarimari ĝeri garo ai ĝeguruĝato-ĝoi. <sup>7</sup> Ĝia ĝeĝaba-rakavato e ĝedaradarato, ĝekirato, “Mai ĝeguruĝani tarimari tu Galilea tarimari, ene? <sup>8</sup> Kamara dabarai tu ĝita tata ĝera garo ai ĝeguruĝani taseĝaĝirini? <sup>9</sup> Ĝita tari tu Patia tarimara, tari tu Media tarimara e Elam tarimara. Tari tu Mesopotamia, Iudea e Kapadokia na, ema tari tu Ponto na e Asia na, <sup>10</sup> Frigia e Pamfilia



na, Aigupito e Kurene sevina Libia tanori na, ema tari tu Roma na taiaġomato, <sup>11</sup> Iuda tarimara, e irau bese tarimari Iuda ġera toma-rakariġo ġeġabi-raġeato tarimari; ema ġita tari tu Krete e Arabia tarimara. Senaġi ġita mabarara na taseġaġirini ġita tata ġera garo ai Barau na veiġa baregori boruri eveirito-ġoi ġekiraġi-foforirini.” <sup>12</sup> Mabarari ma nuġa-farevaġiri e ma daradarari ġesi tauġeri ġevedanaġi-vedanaġito, ġekirato, “Mai veiġa anina tu kara?” <sup>13</sup> Senaġina tarima tari na tu ġevaseva-vaseva-iaġirito, ġekirato, “Maiġeri tarima tu beġe niu-rakava.”

*Petero ġena vevarifiu*

<sup>14</sup> Benamo Petero ma apostolo gabanana sebna (11) ġesi ġeruġa-vaisito, ma garona evaġa-baregoato, benamo vegogo tarimari eġobata-vinirito, ekirato, “Iuda tarimami e Ierusalemami ġotanuni tarimami mabarami, boġono seġaġi-ginikau, mai veiġa tauna ġemi nakiraġi-maġataia. <sup>15</sup> Maiġeri tarima tu asi beġe niu-rakava, ġomi ġotuġamaġini kavana. Mai tu roġo boġiboġi horaġauna 9 koloko. <sup>16</sup> Senaġi maitoma tu loel, peroveta tarimana, na ekiraġi-guineato kavana efoforini, ekirato,

<sup>17</sup> ‘Barau ekirani:

Ġaro dokori ai au Iaukagu babubu-riġoani tarimarima mabarari iatari ai.

Benamo natumi merori e ġuiatori beġe perovetani,

ġemi maraġa variġu beġe mata-vanaġini,

ema ġemi tau ġaukari beġe nuvini.

<sup>18</sup> Oi, moġeri ġaro ai au ġegu vetuġunaġi tauri e vavineri iatari ai au Iaukagu babubu-riġoani,

benamo beġe perovetani.

<sup>19</sup> Benamo nuġa-farevaġi veiġari guba tuġunai bavaġa-foforirini,

ema vetoġa dagarari tanobarai;

rara, e karava, ema goġu barukari.

<sup>20</sup> Ġaro ma bevetore-kureni bemukunani, e ġue tu bekakakakani, rara kavanai beiaġoni,

Vereġauka ġena iaġoma ġarona baregona e irau vedaureana bekavinaġini nai.

<sup>21</sup> Benamo deikara Vereġauka aranai ekea-raġeni tarimana tu maġuri beġabiani.’

<sup>22</sup> Israela tarimami, mai guruġa boġono seġaġiri: Iesu, Nasareta tarimana, Barau na eviniato ġauveina tu ġomi ġemi ai evaġa-fofori ginikauato. Ġia ġenana Barau ġena seġuka veiġari e nuġa-farevaġi veiġari ema vetoġa tari eveirito ġomi vefakami ai, be ġomi tu ma ribami. <sup>23</sup> Barau ġena urai e ribai varau eboioġa-guineato ilailanai, Iesu ġomi ġimami ai etore-kauato, benamo rakava tarimari na ġevaġa-kavamito, benamo Iesu satauro ai ġoikoko-kauato nai ġovaġi-maseato. <sup>24</sup> Senaġina Barau na ġia mase na evaġa-variġisi ġenoġoiato, ema mase midiguna na eġabi-vaġiato, korana mase na ġia tu asi ilaila beġabi-tariani riba. <sup>25</sup> Davida na ġia ekiraġiato, ekirato, ‘Vereġauka tu ġaro mabarari ai ġoiragu ai aġitaiani.

Ġia tu au aroribagu ai,

be dagara ta na asi bevaġa-ġarevaguni.

<sup>26</sup> Moġa lorinai nuġagu iaku na bevonu,

ema ġegu guruġa tu iaku na beġe vonu.

Mase garina maki asi aveini,

<sup>27</sup> korana au tu mase tarimari ġeri gabu ai asi boraga-kwaneguni,

ema ġemu Tarima Veaġana tu asi beboragani.

<sup>28</sup> Maġuri dabarari tu varau ovaġa-ribaguto;

ġoi sevimu ai batanuni,

benamo iaku na bovaġa-vonuguni.’

<sup>29</sup> Tarikakagu mabarami, initoma au tu nuġagu ma kokorena ġesi bakirani, ġita senera baregona Davida tu emaseto ema ġeguriato, maitoma ġia gurina tu ġita ġesi maiġea.

<sup>30</sup> Senaġi ġia tu peroveta tarimana, ema ma ribana Barau na tu varau ekiraġi-toreato,

ekirato: Davida besena ta tu ġia ġena teronai betanukauni veġata. <sup>31</sup> Davida na eriba-guineato, Barau na kara ġoirai beveiani eġitaiato. Benamo Keriso ġena variġisi-ġenoġoi guruġana ekiraġiato, ekirato, ‘Ġia tu mase tarimari ġeri gabu ai asi eraga-kwaneato, ema tauġanina asi beboraġani.’ <sup>32</sup> Barau na mai Iesu, mase na evaġa-variġisi ġenoġoiato, ġai mabarama ribama. <sup>33</sup> Barau na eġabi-vaishiato, ġimana aroribanai etoreato, benamo Barau na ekiraġi-toreato, Iauka Veaġa na Tamana ġenana eġabiato. Benamo ġia na mo Iauka Veaġa toma bebubu-riġoa, ġomi na ġoġitaiiani ema ġoseġaġiani. <sup>34</sup> Korana Davida guba ġana tu asi evaraġeto, senaġi ekirato, ‘Barau na au ġegu Vereġauka ekiraiato, ekirato:

Au aroribagu ai noma-tanu,

<sup>35</sup> bene iaġo mo, ġevetari-vinimuni tarimari bana tore-riġori,

kwakumu vaġa-ruġa tarina dagaranai bana vaġa-iaġori.’

<sup>36</sup> Moġa lorinai Isaraela tarimari mabarari tu beġene riba-ginikau, mai Iesu, ġomi na ġovaġa-satauroato tu, Barau na Vereġauka e Keriso ai evaġa-iaġoato.”

*Tarimarima* ġutuma ġevetuġamaġi-kureto ma ġeraka-kureto

<sup>37</sup> Mai guruġa ġeseġaġiato nai, nuġari ġeraġeto, benamo Petero e mo apostolo tari ġedanaġirito, ġekirato, “Tarikaka, ġai tu kamasi toma ġaveini?” <sup>38</sup> Petero na ekirarito, ekirato, “Ġomi tata ġemi rakava ġerina boġono vetuġamaġi-kure ma boġono raka-kure, ema Iesu Keriso aranai babatiso boġono ġabia, be ġemi rakava bene tuġamaġi-fitoġari; ema ġena varevare, Iauka Veaġa, boġono ġabia. <sup>39</sup> Korana Barau ġena kiraġitore eveiato tu ġomi ġemi e ġomi natumi ġeri, ema manaġai ġetanuni tarimari ġeri. Aba, Vereġauka ġera Barau na ekiraġi-toreato Iauka Veaġana tu bekearini tarimari mabarari bevinirini.”

<sup>40</sup> Petero na guruġa ġutuma ekiraġirito, esisiba-vinirito e elau-naġirito, ekirato, “Mai bese tarimari rakavari ġerina tauġemi boġono raga-maġuri.” <sup>41</sup> Tarima ġutuma na ġena guruġa ġeġabi-raġeato, benamo babatiso ġeġabiato. Mo ġaro sebonai tarimarima mabarana daġara toitoi (3,000) kavana ġia ġeri doġoro nuġanai ġebere-toġato. <sup>42</sup> Benamo vanaġivanaġi apostolo tarimari ġerina riba ġeġabito-ġoi, ġevegogoto-ġoi e ġevevaġa-kavato-ġoi, beredi ġetavi-kirato-ġoi o anibou ġeġanito-ġoi e ġeġauġau-vegogoto-ġoi.

*Iesu* ġevaġa-moġoniato-ġoi tarimari ġeri maġuri

<sup>43</sup> Apostolo ġerina Barau na nuġa-farevaġi veiġari e vetoġa boruri ġutuma eveirito-ġoi, ema tarimarima mabarari ġegari-rakavato. <sup>44</sup> Iesu ġevaġa-moġoniato tarimari mabarari ġetanu-vegogoto-ġoi ema ġeri-ġari ġevevarevare-vevinito-ġoi. <sup>45</sup> Ġeri farefare e tano ġevoivoi-iaġirito-ġoi, benamo moniri tu ġia mabarari vefakari ai ġevarerito-ġoi, tata ġena rabu ilailanai. <sup>46</sup> Ġaro vanaġivanaġi mabarari Rubu Veaġai ġevegogoto-ġoi. Ġeri numai anibou ġeġanito-ġoi e ġeġaniġani-vegogoto-ġoi ma iakuri e ma mainori ġesi. <sup>47</sup> Barau ġevaġa-raġeato-ġoi, ema tarimarima mabarari ġeri veiau-namo ġeverere-iaġiato-ġoi. Benamo ġaro mabarari ai Vereġauka na evaġa-maġuririto-ġoi tarimari ġia ġesi etore-vegogorito-ġoi.

### 3

*Kwaku rakava tarimana enamoto*

<sup>1</sup> Ġaro ta lavilavi horaġauna 3 koloko ai ġauġau horanai, Petero e Ioane Rubu Veaġa ġana ġeiaġoto. <sup>2</sup> Monai tarima ta tu emaġurito kwakuna rakava ġeġoitaġoato. Ġaro mabarari ai ġeġwa-iaġoato-ġoi, Rubu Veaġa ġatama bokana arana “Namo Vedaurea” koranai ġevaġa-tanutariato-ġoi, benamo Rubu Veaġai ġeraka-toġato-ġoi tarimari ġeri ai moni enoġito-ġoi. <sup>3</sup> Ġia na Petero e Ioane ġeraka-toġa ġana nuġanai eġitarito, benamo kara ta ġevinia uranai enoġirito. <sup>4</sup> Tauri ruarua na ġeġita-karakaraiato, benamo Petero na ekiraiato, ekirato, “Ġai noġitama!” <sup>5</sup> Mo guruġa eseġaġiato lorinai, tauri ruarua eġitarito, ġia maboru ekirato tu, kara ta beġe viniani. <sup>6</sup> Senaġi Petero na ekiraiato, ekirato, “Au tu asi ġegu moni, senaġina ġegu ai kara etanuni dagarana

avinimuni. Iesu Keriso, Nasareta tauna, aranai akiramuni, novariġisi, noraka!” <sup>7</sup> Benamo Petero na kwaku rakava tarimana ġimana aroribanai eġabito, evaġa-ruġa-vaishiato. Asikauna ġia kwakuna ema kwakuna komukomuri ġetubutubu-kauto. <sup>8</sup> Ġia eburi-vaishito, eruġa-tarito, eraka-iaġoto. Benamo Petero ema Ioane ġesi Rubu Veaġanai ġeraka-toġato, erakato e eburi-vaishito, Barau evaġa-raġeato. <sup>9</sup> Tarimarima mabarari na ġeġitaiao, erakato e Barau evaġa-raġeato-ġoi, <sup>10</sup> ema ġeġita-leiaiao, ġia tu “Namo Vedaurea” ġatama-boka koranai etanuto-ġoi vau enoġinoġito-ġoi tarimana nai, ġia mabarari nuġari ġefarevaġito e ġeġaba-rakavato, mo veiġa ġia ġenai eġorato nai.

*Petero ġena ġobata Rubu Veaġai*

<sup>11</sup> Mo tau roġo Petero e Ioane ġeri ai eveġabikau-taġoto-ġoi, touraġe baregona arana “Solomona Ġena Touraġe” ai, tarimarima mabarari ġeġaba-rakavato, benamo ġeraga-iaġoto ġeri ai. <sup>12</sup> Petero na mo tarimarima eġitarito, benamo evaġa-guruġarito, ekirato, “Isaraela tarimami, karase nai mai dagara tu ġoġaba-iaġiani? Karase nai ġai ġoġita-karakaramani? Ġomi ġotuġamaġini mai tu tauġema ġema seġukai e Barau korana-iaġinai naima, mai tarima baġa vaġa-rakaia ġotoni? <sup>13</sup> Aberahamo, Isako, Iakobo ġeri Barau, ġita senera mabarari ġeri Barau, na ġena vetuġunaġi tarimana Iesu evaġa-raġeato, senaġi ġomi na Roma tarimari ġoviniato beġene vaġia ġana, ma Pilato ġena ura bene tuġu-vaġia asi beġene vaġia etato nai, ġomi tu asi ġourato. <sup>14</sup> Ġia tu Veaġa e Vei-Iobukaiobuka tarimana, senaġi ġomi na tu asi ġoura-viniato, ema Pilato ġonoġiato, vaġivaġi tarimana tu bene tuġu-rosia ġotato. <sup>15</sup> Maġuri eġwa-iaġomaiao tarimana tu ġomi na ġovaġi-maseato. Senaġi Barau na mase na ma evaġa-variġisi ġenoġoiato. Ġai maiġa tu ribama e ġakiraġi-foforiani. <sup>16</sup> Ġai ġema veġabidadama Iesu aranai nai, mai tarima ġomi na ġoġitaiani e ribami bevaġa-namo. Mai tu Iesu aranai ema veġabidadama ġia ġenana eiaġomani na, mai tarima bevaġa-namo korikoria, ġomi mabarami na ġoġitaiani maiġa.

<sup>17</sup> Tarikakagu mabarami, au toma aribani, kara ġemi veġorikau tarimari ġesi ġoveiato tu asi ribami dainai. <sup>18</sup> Senaġina Barau na guinenai ġena peroveta tarimari mabarari mururi na ekirato, ġia ġena Keriso tu midigu roġo beġanini etato. Mo guruġa tu ġomi ġemina ema moġonito. <sup>19</sup> Moġa lorinai ġovetuġamaġi-kure ma ġoraka-kure Barau ġenai, be ġia na ġemi rakava bene ġabi-vaġiri. <sup>20</sup> Bema moġesi boġo veini nai, Iauka ġena kokore Vereġauka ġenana beiaġomani, ema ġia na Iesu Keriso betuġu-iaġomaiani. Ġia tu Barau na ġomi ġemi eġabitore-guineato. <sup>21</sup> Ġia tu gubai roġo betanuni, beiaġoni mo, Barau na dagara mabarari bevaġa-variġu ġenoġoirini. Ġia na ġena peroveta tarimari veaġari mururi na kai-veġata ekiraġiato ilailanai. <sup>22</sup> Korana Mose ekirato, ‘Vereġauka ġemi Barau na ġomi ġemi tarimarima fakari na ġemi peroveta tarimana ta bevaġa-ruġaiani au kavana. Ġia na bevaġa-guruġamini guruġari mabarari tu boġono seġaġiri. <sup>23</sup> Tarima ta na ġia ġena guruġa asi beseġaġi-viniani tarimana tu, Barau na ġena tarimarima fakari na beġabi-vaġiani, benamo bevaġi-maseani.’

<sup>24</sup> Moġoni, peroveta tarimari mabarari Samuela na beiaġoma mo toma, ema ġia murina na ġeiaġomato peroveta tarimari maki ġutuma varau ġeguruġato, maiġeri ġaro ġekiraġirito. <sup>25</sup> Ġomi tu peroveta tarimari naturi, ema Barau ġena kiraġitore ġomi senemi ġeri eveiato maki ġomi ġemi. Barau na Aberahamo evaġa-guruġaiao nai, ekirato, ‘Ġoi natumu ġenana tanobara beseri mabarari namo beġe ġabiani.’ <sup>26</sup> Moġa lorinai Barau na ġena vetuġunaġi tarimana Iesu evaġa-ruġaiao, benamo ġemi ai etuġu-iaġosi guineato, ġomi bene vaġa-namomi ġana. Mo namo anina tu, ġomi tata ġemi rakava ġerina beġori-kuremini.

<sup>1</sup> Petero e Ioane na tarima-rima roḡo ḡevaḡa-guruḡarito-ḡoi nuḡanai, Rubu Veaḡa vereri, e Rubu Veaḡa ḡitaḡauna tarimari ḡeri vere, ema Sadukea tarimari ḡeraḡasito. <sup>2</sup> ḡia tu ḡebaruto, korana mai apostolo ruarua na tu tarimarima ḡevaḡa-ribarito-ḡoi e ḡeri ḡeḡobatato-ḡoi nai tu ḡekirato-ḡoi, Iesu tu mase na evariḡisi-ḡenoḡoito; moḡa lorinai mase tarimari maki beḡe variḡisi-ḡenoḡoini. <sup>3</sup> Benamo tauri ruarua ḡeḡabi-taririto, benamo dibura numai ḡebiri-ḡaurito; monai beḡene gena mo boḡiboḡi, korana tu ḡaro maki ekofuto. <sup>4</sup> Senaḡi Petero e Ioane ḡeri ḡobata tarima vovoka na ḡeseḡaḡiato, benamo tarima ḡutuma na ḡevaḡa-moḡoniato, benamo tau numerana eiaḡoto mabarana tu daḡara imaima (5,000) kavana.

<sup>5</sup> Elaḡanito nai tu, Iuda vereri, e vanuḡa tarima baregori, ema taravatu ḡevevaḡa-riba iaḡiato-ḡoi tarimari Ierusalemāi ḡevegogoto. <sup>6</sup> Anas, Rubu Veaḡa verena baregona, e Kaiafas, e Ioane, e Alesanda, ema Rubu Veaḡa verena baregona ḡena bese maki monai. <sup>7</sup> Benamo tauri ruarua ḡeḡori-iaḡorito, benamo ḡoirari ai ḡea vaḡa-ritoḡorito vau ḡedanaḡirito, ḡekirato, “Kamara seḡukai o deikara aranai mai veiḡa ḡoveiato?”

<sup>8</sup> Benamo Petero, Iauka Veaḡa na evonuto, evaḡa-veseto, ekirato, “Isaraela veremi e veḡitaḡau tarimami! <sup>9</sup> Bema ḡai toma boḡo kea-iaḡomama tu, ḡourani ḡai na ḡakiravarami, mai kwaku rakava tarimana ḡenai veiḡa namona baḡa veia ema kamara dabarai ḡia be-namo nai tu, <sup>10</sup> ḡomi mabarami e Isaraela nuḡanai tarimarima mabarami tu boḡono riba, Iesu Keriso, Nasareta tarimana, ḡomi na ḡovaḡa-satauroato, ma Barau na mase na evaḡa-variḡisi ḡenoḡoito tarimana, aranai mai tarima benamo-ḡosiḡosi, ḡomi ḡoirami ai eruḡa-taḡoni. <sup>11</sup> Mo Iesu tu, ‘ḡomi, numa raga tarimami, na ḡoruḡaiato forena, ḡia tu duḡu barana forenai eiaḡoto.’

<sup>12</sup> Vevaḡa-maḡuri tu ḡia ḡereḡana ḡenana bita doḡarini; tanobara mabarana nuḡanai Barau na ara ta tu asi evinirato, ḡita bene vaḡa-maḡurira ḡana.”

<sup>13</sup> Kanisoro tarimari na Petero e Ioane ḡeḡitarito, asi ḡegarito-ḡoi ema ḡeribarito maki, ḡia tu vevaḡa-riba gabuna ta ḡana asi ḡeiaḡoto, ma tauri ruarua asi iaunegari. Moḡa ḡeḡitaiato nai, ḡeḡabato e nuḡari ḡevekeoto, benamo ḡeribato, ḡia tu Iesu ḡesi ḡerakao-vekakoto-ḡoi tarimari. <sup>14</sup> Ema mo tarima ḡeḡitaiato namo-ḡosiḡosi Petero e Ioane ḡesi ḡeruḡa-taḡoto-ḡoi, benamo asi ḡeri guruḡa dabarana. <sup>15</sup> Moḡa lorinai ḡekirarito, mo vegogo gabuna na ḡeraka-veḡita. Benamo ḡeraka-rosito murika ḡana, benamo ḡia ḡereḡari moḡo ḡevedanaḡi-vevinito, ḡekirato, <sup>16</sup> “Maiḡeri tarima ruarua tu kamasi toma taveirini? Ierusalemāi ḡetanuni tarimari mabarari ma ribari, ḡia tu nuḡa-farevaḡi veiḡana ta beḡe veia, ema ḡita na asi bita kira-ḡuniḡauani riba. <sup>17</sup> Senaḡi tarimarima na beḡe vari-fiuanu garinai, maiḡeri tarima tu tana vaḡa-gariri e tana kira-ḡoiri, Iesu aranai tarima ta asi ma beḡene vaḡa-guruḡa ḡenoḡoia.” <sup>18</sup> Benamo ma ḡekea-toḡarito, benamo ḡekirarito, Iesu aranai asiḡina ḡinavaḡi ma beḡene ḡobata e beḡene vevaḡa-riba.

<sup>19</sup> Senaḡi Petero e Ioane na ḡevaḡa-veserito, ḡekirato, “ḡomi tauḡemi ḡotuḡamaḡi-viriḡia, aiḡa tu roroḡoto Barau ḡoiranai? ḡomi na kara ḡokiraḡiani baḡana veia, ba Barau na ekiraḡiani veiḡana baḡana veia? <sup>20</sup> Korana ḡaḡitarito e ḡaseḡaḡirito dagarari tu ḡai na asi ilaila baḡa kira-ḡuniḡaurini e muruma maki moḡeri kiraḡi-kiraḡiri ai asi baḡa kourini riba.”

<sup>21</sup> Ma ḡevaḡa-guruḡa gwaḡiḡirito murinai, ḡetuḡu-rosirito. Vaḡa-rakavari dabarana ta asi ḡedoḡariato, korana tarima mabarari na Barau ḡevaḡa-raḡeato-ḡoi, mo nuḡa-farevaḡi veiḡana lorinai. <sup>22</sup> Korana mo nuḡa-farevaḡi veiḡana na enamoto tarimana ḡena maḡuri laḡaniri tu gabana vasivasi (40) maki evanaḡiato.

### *Ekalesia ḡeḡuriḡurito*

<sup>23</sup> Petero e Ioane ḡetuḡu-vaḡirito murinai, karori ḡeri ai ḡeḡenoḡoi-iaḡoto. Ma Rubu Veaḡa vereri baregori e Iuda vereri na kara ḡekiravara-vinirito dagarari mabarari karori ḡeri ḡekiraḡirito. <sup>24</sup> Benamo karori na moḡeri guruḡa ḡeseḡaḡirito nai, ḡia mabarari

Barau ġeġuriġuri-vini vegogoato, ġekirato, “Vereġauka o, guba, tanobara, daġaru-bara, ema nuġari ai ġetanuni dagarari mabarari ġoi na oveirito. <sup>25</sup> Iauka Veaġa ġenana, ġai senema Davida, ġoi ġemu vetuġunaġi tarimana, muruna na oguruġato nai ekirato, ‘Kara dainai irau bese tarimari tu ġebaru-rakava rakavani?

Ema karase nai tarimarima na tu asi beġe ġauveini boioġari ġeveirini?

<sup>26</sup> Tanobara vereri ġeverovinato, ema veġitaġau tarimari baregori ġeġaru-vegogoto, Vereġauka ma ġena Keriso ġesi beġene vetari-viniri ġana.’

<sup>27</sup> Moġoni veġata, Heroda e Pontio Pilato, irau bese tarimari e Isaraela tarimari ġesi mai vanuġa baregonai ġevevogoto, ġoi ġemu vetuġunaġi tarimana veaġana Iesu, ġia tu ġoi na oviriġiato e Keriso ai ovaġa-iaġoato, ġana boioġa ġetogato. <sup>28</sup> Ġia na ġeveirito dagarari tu kara ġoi na ġemu seġukai e urai oboioġa-guinerito beġene vetore otato dagarari moġo. <sup>29</sup> Moġa lorinai, Vereġauka o, ġeri vevaġa-gari veiġari noġitari, ema ġai ġoi ġemu vetuġunaġi tarimama kokore novinima, be ġemu vari baġana kiraġia ma kokorema ġesi. <sup>30</sup> Ġimamu notuġu-rosia, be keve tarimari bono vaġa-namori, ema vetoġa boruri e nuġa-farevaġi veiġari bono veiri, Iesu, ġoi ġemu vetuġunaġi tarimana veaġana aranai.”

<sup>31</sup> Ġeġauġau-ġosito murinai, ġevevogoto numana eġareva-ġarevato. Benamo ġia mabarari Iauka Veaġa na ġevonuto, benamo Barau ġena vari ġekiraġiato ma kokoreri ġesi.

#### *Ekalesia guinena ġena maġuri*

<sup>32</sup> Iesu ġevaġa-moġoniato-ġoi tarimari mabarari ġeri tuġamaġi e nuġari tu sebonai moġo. Ta ġena farefare ġia ġereġana ġena asi etato-ġoi, senaġi ġeri dagara mabarari ġia tata ġevevarevare-vevinito-ġoi. <sup>33</sup> Seġuka barego ġesi apostolo tarimari na Iesu Vereġauka ġena variġisi-ġenoġoi ġevvari-fiuato-ġoi, ema Barau ġena namo e varevare-bara ġia mabarari iatari ai ebubu-riġoato. <sup>34</sup> Ġia fakari ai ta maki asi erabuto-ġoi. Korana ma ġeri tano o numa tarimari na, moġeri numa e tano ġevoivoi-iaġirito-ġoi, benamo davari moniri tu ġeġwa-iaġorito-ġoi, <sup>35</sup> Apostolo ġoirari ai ġetore-taririto-ġoi. Benamo mabarari ġevini-ilailarito-ġoi, tata ġena rabu ilailanai.

<sup>36</sup> Iosefa tu apostolo na arana ġevatoato Banabas, anina tu “Velaunaġi Tarimana”. Ġia tu Levi doġorona, Saipras motumotunai emaġurito. <sup>37</sup> Ġia ġena tano evoiato, benamo voina monina tu eġwa-iaġoato, apostolo kwakuri koranai ea tore-tariato.

## 5

#### *Anania e Safira*

<sup>1</sup> A tau ta etanuto-ġoi arana Anania, ġaraġona arana tu Safira. Anania na ġeri tano ta ea voivoi-iaġiato, ġaraġona na maki eġabi-raġeato. <sup>2</sup> Senaġina mo tano monina kwana tu eġabi-tariato, ma kwana reke ta moġo eġwa-iaġoato apostolo ġoirari ai ea tore-tariato. Mo veiġa eveiato ġaraġona tu ma ribana. <sup>3</sup> Benamo Petero na ekiraiato, ekirato, “Anania, karase nai Satani na beboroġimu, benamo Iauka Veaġa boġofaia, tano monina kwana tu ġoi ġemu boġabi-taria? <sup>4</sup> Roġosi boro voia nai tu, tano tu ġoi ġemu, ene? Ma beġe voia murinai maki moni tu ġoi ġemu. Kara botuġamaġia nai, mai veiġa bono veia bosì? Ġoi na tu dia tarimarima boġofari, senaġi Barau boġofaia.” <sup>5</sup> Anania na mo guruġa eseġaġiato nai, eketo-tarito, emaseto. Benamo mo veiġa eġorato varina ġeseġaġiato tarimari mabarari ġegari-rakavato. <sup>6</sup> Benamo tarima variġuri ġevvariġisito, Anania tauġanina dabuġa na ġeseġoato, ġeġwa-rosiato, benamo ġea guriato.

<sup>7</sup> Hora toitoi kavana murinai, ġaraġona ema raka-toġato, senaġi ġia kara eġorato tu asi ribana. <sup>8</sup> Petero na edanaġiato, ekirato, “Nokira-varagu, ġomi taumi ruarua na tano monina boġo ġabia tu maiġa moġo ba?” Ġia evaġa-veseto, ekirato, “Oi, voina tu maniġa moġo.” <sup>9</sup> Benamo Petero na ekiraiato, ekirato, “Karase nai ġoi ma

ġaraġomu ġesi nuġami ġovaġa-sebonarito, Vereġauka Iaukana ġoġofaiato? Noboġe, ġoi ġaraġomu beġe guria tarimari tu ġatama-bokai ġeruġa-taġoni, ġia na ġoi maki ma ġeġwa-rosimuni.”<sup>10</sup> Mo horai moġo ġia Petero kwakuna koranai eketo-tarito, emaseto. Benamo mo tarima variġuri ġeraka-toġato, ma ġeġitaiato mase, benamo tauġanina ġeġwa-rosiato, ġaraġona sevina ġea gurimoto.<sup>11</sup> Ekalesia mabarana e varina ġeseġaġiato tarimari mabarari gari baregona na eġabirito.

#### *Vetoġa e veiġa boruri*

<sup>12</sup> Vetoġa e veiġa boruri ġutuma apostolo na tarimarima ġoirari ai ġeveirito-ġoi. Ma Iesu ġevaġa-moġoniato-ġoi tarimari mabarari tu “Solomona Ġena Touraġe” ai ġevegogoto-ġoi.<sup>13</sup> Asi veġabidadama tarimari na ġevaġa-raġerito-ġoi, senaġi ġegarito-ġoi, be ġia ġesi asi ġea vegogoto-ġoi.<sup>14</sup> Senaġi tau e vavine tu ġutuma lelevaġi na Vereġauka ġevaġa-moġoniato-ġoi. Mo ġevaġa-moġonito-ġoi tauri e vavineri tu mabarari apostolo ġeri doġoro ai ġerakaraka-toġato.<sup>15</sup> Apostolo na ġeveirito-ġoi veiġari tarimarima na ġeribarito, benamo keve tarimari ġeġwa-rosirito dabara ġana, benamo genagena fatari ai e gedai ġetorerito, Petero bene raka-vanaġi nai, iouiouna na bene iauka-tariri ġana.<sup>16</sup> Ema tarimarima ġutuma-bara Ierusalemna sevina vanuġari na keve tarimari e iauka rakavari na ġeboroġirito tarimari ġeġwa-iaġorito, benamo mabarari ġenamoto.

#### *Apostolo tarimari ġevaġa-midigu midigurito*

<sup>17</sup> Benamo Rubu Veaġa verena baregona ma karona Sadukea doġorona ġesi, apostolo tarimari ġeri ai ġemama-rakavato.<sup>18</sup> Ġia na apostolo tarimari ġeġabi-taririto, benamo dibura numai ġebiri-ġaurito.<sup>19</sup> Senaġi mo boġi Vereġauka ġena aneru na dibura numa ġatama bokana erovoato, benamo apostolo eġori-rosirito, benamo evaġa-guruġarito, ekirato,<sup>20</sup> “Ġoiaġo, Rubu Veaġanai boġono ruġa, benamo mai maġuri variġuna mabarana tarimarima ġeri boġono kiraġia.”<sup>21</sup> Boġiboġi iamo-iamonai Rubu Veaġai ġeraka-toġato, aneru na ġevaġa-guruġarito ilailanai tarimarima ġevaġa-ribarito.

Rubu Veaġa verena baregona ma karona ġesi ġeraġasito, benamo kanisoro tarimari e Isaraela vereri mabarari ġekea-vegogorito, benamo dibura numa ġana ġevetuġu-iaġoto, apostolo tarimari urari na.<sup>22</sup> Senaġi vetuġunaġi tauri dibura numai ġea raġasito nai tu, apostolo tarimari asi ġedoġaririto. Benamo ġeġenoġoito, ġea kira-vararito, ġekirato,<sup>23</sup> “Dibura numana ġatama bokana tu biribiri, ema ġitaġau tarimari maki ruġataġo; senaġi ġatama-boka baġa rovo-fakaia nai tu, apostolo ta tu asi baġa ġoitaġoa.”

<sup>24</sup> Rubu Veaġa ġitataġona tarimana baregona e Rubu Veaġa vereri baregori na mo guruġa ġeseġaġiato nai tu, ġeiauvoiauvo-rakavato, asi ribari mo veiġa anina tu kara.<sup>25</sup> Ġedaradarato-ġoi nuġanai tu, tarima ta eraka-toġato, benamo ekirarito, ekirato, “Ġoseġaġi! Dibura numai ġobiri-ġaurito tarimari tu Rubu Veaġai ġeruġa-taġoni, ma tarimarima ġevaġa-ribarini.”<sup>26</sup> Benamo Rubu Veaġa ġitaġauna tarimana baregona ma ġena mero ġesi apostolo tarimari ġea ġori-ġenoġoirito. Asi ġevei-guguraġirito, korana tarimarima na fore na beġe ġidararini garina.

<sup>27</sup> Ġeġori-toġarito, kanisoro ġoiranai ġevaġa-ruġarito, benamo Rubu Veaġa verena baregona na edanaġirito, ekirato,<sup>28</sup> “Ġai na guruġa gwaġiġina ġavinimito, mai tarima aranai asi boġono vevaġa-riba, senaġi ġoġitaia, ġomi na kara boġo veia! Ġomi ġemi vevaġa-riba boġo vaġa-rega rovorovoa, benamo Ierusalemna mabarana varau beġaua, ema ġomi ġourani ġia ġena mase tu ġai baġana daġa.”

<sup>29</sup> Petero e apostolo kotari ġevaġa-veseto, ġekirato, “Ġai tu Barau ġena ura baġa korana-iaġiani, dia tarimarima ġeri ura.<sup>30</sup> Iesu tu ġomi na satauro tuġunai ġoikoko-kauato nai, ġovaġi-maseato, senaġi ġita tamara ġeri Barau na ma evaġa-variġisi ġenoġoiato.<sup>31</sup> Barau na eġabi-vaisiato, ġia aroribanai evaġa-ruġaiato, Veġitaġau Verena e Vevaġa-maġuri Tarimanai evaġa-iaġoato. Isaraela tarimari bene vaġa-vetuġamaġi-kureri, ema ġeri rakava bene tuġamaġi-fitoġari ġana.<sup>32</sup> Ġai tu mai dagara

kiraġi-foforiri tarimama. Iauka Veaġa na maki maiġeri dagara ekiraġi-foforirini. Mo Iauka Veaġa tu Barau na ġia ġeseġaġi-viniani tarimari mabarari evinirito.”

<sup>33</sup> Kanisoro tarimari na mai guruġa ġeseġaġiato nai tu ġebaru-rakavato, ma ġeri ura mo apostolo tarimari tu ġevaġi-maseri moġo. <sup>34</sup> Senaġi ġia fakari ai Farisea tarimana arana Gamaliel, taravatu evevaġa-riba iaġiato-ġoi, ema tarimarima mabarari na ġegubakauato-ġoi tarimana, kanisoro nuġari na eruġa-vaisito. Benamo ekirato, moġeri apostolo tarimari ġeġori-rosiri roġo. <sup>35</sup> Benamo ġia na kanisoro vegogona eki-raiato, ekirato, “Isaraela tarimami, maiġeri tarima kamasi ġoveiri ġotoni ġenai boġono tuġamaġi-ginikau. <sup>36</sup> Ġaro kotari varau beġe iaġo, Teuda eruġa-vaisito, evekiraġito, ġia tu tarima baregona ta, benamo tarima sinau vasivasi (400) kavana ġia ġesi ġekauto. Senaġi ġia ġevaġi-maseato nai tu, ġena tarimarima mabarari ġeraga-rovorovoto; mo doġoro toma tu asiġina maia. <sup>37</sup> Moġa murinai tu Iudas, Galilea tauna, tarimarima arari toretoreri o sensisi ġabiġabina ġarori ai efororito, ġia maki ġutuma-bara eġori-kaurito, senaġina ġia maki ġevaġiato nai, ġena tarimarima tu ġeraga-rovorovoto. <sup>38</sup> Moġa lorinai inította veiġanai, au na akiramini, mai tarima ġoraga-kwaneri, ema ġeri ai kara ta asi boġono veia. Korana bema ġeri boioġa e ġauvei maiġeri tarimarima ġerina eiaġomani nai tu berekwa-rekwani. <sup>39</sup> Senaġi bema mai tu Barau ġenana eiaġomani nai tu, ġomi na maiġeri tarima tu asi ilaila boġo kourini bene. Asi namo Barau boġo vetari-viniani!”

Kanisoro na Gamaliel ġeseġaġi-viniato. <sup>40</sup> Benamo apostolo ma ġekea-toġarito, ġekwaririto, benamo ġekirarito, Iesu aranai asiġina ġinavaġi ma beġene vevaġa-riba ġenoġoi; benamo ġetuġu-rakarito. <sup>41</sup> Apostolo na kanisoro vegogona ġeraga-kwaneato ma iakuri ġesi, korana Barau na eġabi-hidirito, ġia tu ilaila Iesu aranai maiaka beġe ġabiani bene. <sup>42</sup> Benamo ġaro vanaġivanaġi ai Rubu Veaġai e tarimarima ġeri numa nuġari ai Vari Namona ġevevaġa-ribato-ġoi e ġeġobata-iaġiato-ġoi, ġekirato-ġoi, Iesu tu Keriso.

## 6

### *Veavaġa-kava tarimari imaima ruarua (7)*

<sup>1</sup> Moġeri ġaro ai Iesu ġekorana-iaġiato-ġoi tarimari tu ġeġutuma-iaġoto-ġoi. Ma Iuda tarimari, Grik garo ai ġeguruġato-ġoi tarimari, e Heberu garo ai ġeguruġato-ġoi tarimari fakari ai veġareveġare eġorato. Grik garo ai ġeguruġato-ġoi tarimari ġekirato, ġia ġeri vabu tu ġaro tata ġaniġani ġevareto-ġoi nai tu ġevaġa-raburito-ġoi. <sup>2</sup> Moġa lorinai apostolo gabanana ruarua (12) na Iesu ġekorana-iaġiato-ġoi tarimari mabarari ġekea-vegogorito, benamo ġekirato, “Ġai na ġaniġani varevarena uranai, Barau ġena guruġa asi baġa vari-fiuani tu asi maoro. <sup>3</sup> Moġa lorinai, tarikakagu mabarami, ġomi vefakami ai tau imaima ruarua (7) ġoġabi-viriġiri, variri namo tarimari, Iauka Veavaġa na e iaunega na ġevonuto tarimari; benamo mai ġauvei ġia baġana vini-vanaġiri. <sup>4</sup> A ġai tauġema ġema taimi mabaranai tu ġauġau e ġobatai baġana torea.”

<sup>5</sup> Apostolo tarimari ġeri boioġa ġia mabarari na ġeiaku-iaġiato. Benamo ġia na mai tau maiġeri ġeġabirito: Stefano, veġabidadama na e Iauka Veavaġa na evonuto tarimana; e Filippo; Prokoro; Nikanoro; Timon; Pamena; e Nikolas, Antioka tarimana senaġi Iuda tarimari ġeri toma-rakariġo ekorana-iaġiato-ġoi. <sup>6</sup> Ġia na mai tau maiġeri apostolo ġoirari ai ġevaġa-ruġarito, benamo apostolo na ġia iatari ai ġeġuriġurito ema apostolo ġimari ġia iatari ai ġetore-kaurito.

<sup>7</sup> Benamo Barau ġena guruġa eraga-rovorovoto. Ema Iesu korana-iaġina tarimari Ierusalem ai ġevovoka-ġarimoġito, ema Rubu Veavaġa vereri ġutuma gorogoro na maki Barau ġena guruġa ġeġabi-raġeato, benamo ġeveġabidadamato.

### *Stefano ġeġabi-tariato*

<sup>8</sup> Stefano tu Barau ġena varevare-bara e seġuka na evonuto tarimana, ġia na nuġa-farevaġi veiġari boruri baregori tarimarima ġoirari ai eveirito-ġoi. <sup>9</sup> Senaġi

vekira-fitoġa barego evariġisito. Iuda tarimari ġeri rubu doġorona ta ġekiraġirito-ġoi “Ruġavaġi tarimari”. Ġia ema Iuda tarimari, Kurene e Alesandria na ema Kilikia e Asia tanobara na ġeiaġomato tarimari, Stefano ġesi ġeveġare-veġareto. <sup>10</sup> Senaġi Stefano ġena guruġa tu asi ġelautariato-ġoi, korana ġia tu lauka Veaġa na eviniato-ġoi iauneganai eguruġato-ġoi. <sup>11</sup> Benamo ġia na tarima kotari nuġari ġeġanirito beġene kira, “Ġai na Stefano ġaseġaġiato, ġia na Mose e Barau ekira-fitoġarito.” <sup>12</sup> Mo dabarai ġia na tarimarima, e Iuda vereri, ema taravatu ġevevaġa-riba iaġiato-ġoi tarimari ġekira-vaisivaisirito. Ġia Stefano ġenai ġeiaġoto, ġea ġabi-tariato, benamo Iuda ġeri kanisoro ġoirana ġana ġeġori-iaġoato. <sup>13</sup> Monai beġene ġofaġofa ġana vevaġa-bade tarimari kotari ġeġori-toġarito, benamo ġekirato, “Mai tarima na tu ġaro mabarari ai ġita ġera Rubu Veaġana e Mose ġena taravatu ekira-fitoġarini. <sup>14</sup> Ġai na ġaseġaġiato, ekirato, ‘Iesu, Nasareta tarimana, na mai Rubu Veaġana bevaġa-rakavaiani, ema Mose na evinirato veiġari mabarari bevaġa-iraurini.’”

<sup>15</sup> Kanisoro ai ġevegogo-taġoto-ġoi tarimari mabarari na Stefano ġeġita-karakaraiato, ema ġoirana ġeġitaato tu noġa moġo aneru ta ġoirana.

## 7

*Stefano ġena ġobata*

<sup>1</sup> Benamo Rubu Veaġa verena baregona na Stefano edanaġiato, ekirato, “Maiġeri guruġa tu moġoni ba?” <sup>2</sup> Stefano na evaġa-veserito, ekirato, “Tarikakagu e tamagu mabarami, au ġoseġaġigu! Ġita senera Aberahamo Haran vanuġanai roġosi roġo berea tanu nai, mareva barego Barauna ġia ġenai eforito Mesopotamia ai, <sup>3</sup> benamo ġia ekiraiato, ekirato, ‘Ġemu bese e tanobara noiaġuia, benamo au na bavaġa-ġitamuni tanobarana ġana bono iaġo.’ <sup>4</sup> Benamo ġia na Kaldea tanobarana eraga-kwaneato, benamo Haran ai ea vanuġato. Ma tamana emaseto murinai, Barau na etuġu-iaġomaiato initoma ġotanua-iaġiani tanobarana ġana. <sup>5</sup> A Barau na Aberahamo tu ġena tano misina kota maki asi eviniato. Kwaku vaġa-ruġatarina gabuna ilailanai misina kota maki asi eviniato. Senaġi Barau eguruġa-toreto ġia na tano ta beviniani, ġia e ġia murina na beġe ġorani tarimari na tano ta beġe ġaunaiani ġia ġeri. Mo ġaro ai Aberahamo tu asi natuna. <sup>6</sup> Barau na ma evaġa-guruġaiato, ekirato, ‘Ġoi ġemuna beġe ġorani beseri tu tano boruna tai beġe tanuni. Ma laġani sinau vasivasi (400) mo gabu tarimari ġeri vetuġunaġi tarimari ai beġe vaġa-iaġorini e beġe vaġa-midigu midigurini.’ <sup>7</sup> Barau ma ekirato, ‘Isaraela tarimari na vetuġunaġiri ġeiaġo-vinini beseri tu au na bavevaġa-maoro vinirini, moġa murinai ġia tu mo tano na beġe raka-rosini, mai gabu ai au beġema toma-rakariġo viniguni.’ <sup>8</sup> Benamo Barau na Aberahamo kefi-lamavaġi veiġana eviniato, mo tu ġia ġena kiraġitore vetoġana. Benamo Aberahamo na Isako evaġa-ġoraiato, ma ġaro vaġa-imaima toitoina (8) murinai tauġanina kefina elama-vaġiato. Moġa murinai Isako na Iakobo evaġa-ġoraiato, ma Iakobo na ġera doġoro ġedebarini tarimari gabanana ruarua (12) evaġa-ġorarito.

<sup>9</sup> Doġoro debari tarimari Iosefa ġenai ġemamato, benamo Aigupito tarimari ġeri ai ġevoivoi-iaġiato. Senaġina Barau tu Iosefa ġesi, <sup>10</sup> ema ġena dabara doko mabarari ġerina evaġa-maġuriato. Barau na Iosefa iaunega eviniato, ema Pharao, Aigupito verena, nuġana evaġa-namoato Iosefa ġenai, benamo Pharao na eura-viniato ema seġuka eviniato, Aigupito tanona ema ġia ġena numa tarimari e farefareri bene ġita-ġauri.

<sup>11</sup> Benamo Aigupito tanona mabarana ema Kanana tanona mabarana doġe ġeġorato, monana vito e nanu mase baregona evaġa-ġoraiato, benamo ġita senera tu asi ġeri ġaniġani doġari dabarana. <sup>12</sup> Senaġina Iakobo eseġaġito Aigupito tu ma widina, benamo ġia na ġita senera etuġu-iaġorito, mo tu ġia ġeri iaġoiaġo giniginena. <sup>13</sup> Ma ġeri iaġoiaġo vaġa-ruaruanai Iosefa tauġena kakana e tarina ekira-vararito ġia tu deikara, benamo Pharao na Iosefa ġena bese eribaiato. <sup>14</sup> Moġa murinai Iosefa evetuġuto, tamana Iakobo ma ġena bese ġeri ai Aigupito ġana beġene iaġoma ġana. Iakobo besena Kananai



tu mabarana gabana imaima ma gabana ruarua imaima (75). <sup>15</sup> Benamo Iakobo Aigupito ġana evariġoto, monai ġia e ġita senera ġemaseto. <sup>16</sup> Ġia tauġaniri tu Sekem ġana ġeġwa-ġenoġoi iaġorito, benamo monai ġea guririto. Mo gara gabuna tu Aberahamo na Hamora naturi ġerina moni na evoiato.

<sup>17</sup> Barau na ġena kiraġitore Aberahamo ġenai bevaġa-moġoniani ġarona ekavinaġito-ġoi nai tu, ġita ġera tarimarima Aigupito ai ġeġutuma-gorogoroto. <sup>18</sup> Ma moġa murinai tu vere ta na Aigupito eġita-ġauato. Mo vere moġa tu asi ribana Iosefa. <sup>19</sup> Ġia na ġita senera eġofarito-ġoi e evaġa-midigu midigurito-ġoi, ema ekirarito-ġoi, naturi raraka-rarakari ġeri numa na beġene tore-rosiri, beġene mase ġana. <sup>20</sup> Mo negai Mose emaġurito. Ma Mose eġorato nai, marevana tu namo vedaurea. Ma ġia tu ġue toitoi tamana ġena numai ġenariato, <sup>21</sup> benamo numa na ġetore-rosiato nai tu, Pharao natuna ġuiatona na eġabiato, benamo natunai evaġa-iaġoato. <sup>22</sup> Mose tu Aigupito ġeri riba e iaunega mabarana ġevaġa-ribaiato, ema ġena guruġa e veiġa ma seġukari tarimanai eiaġoto.

<sup>23</sup> Ma ġena maġuri laġanina gabana vasivasi (40) eġabiato, benamo karonna Isaraela tarimari nea raka-ġitari etato. <sup>24</sup> Ġia na Aigupito tarimana ta eġitaiato, Isaraela tarimana ekwariato-ġoi, benamo ġia eiaġoto gogobana eragato, benamo mo Aigupito tarimana evaġi-maseato. <sup>25</sup> Mose matoru ekirato tu ġena tarimarima beġe tuġamaġi-fakani, ġia ġenana Barau na Isaraela tarimari bevaġa-maġuririni, senaġi moġa Isaraela tarimari na tu asi ġeriba-maoroato. <sup>26</sup> Ma elaġanito nai, ġia na Isaraela tarimari ruarua eġitarito ġevevaġito-ġoi, benamo nevaġa-mainori ġana ekirarito, ekirato, ‘Gomi tau ruarua, ġoseġaġi, ġomi tu tarikaka moġo ruarua, ma kara dainai tu taumi ruarua ġovevaġini?’ <sup>27</sup> Senaġi vevaġi ekoraiato tarimana na Mose edori-veġitaiato, benamo ekirato, ‘Goi tu deikara na ġai ġema vere ema toto-iobukaiobuka tarimanai evaġa-iaġomuto? <sup>28</sup> Ġoi ourani tu ġoraġani Aigupito tarimana ovaġi-maseato kavana au novaġi-masegu otoni?’ <sup>29</sup> Mose na mo guruġa eseġaġiato, benamo eraga-kwareġato, Midian ġana egari-rakato. Monai etanuto-ġoi nuġanai natuna ruarua ġemaġurito.

<sup>30</sup> Laġani gabana vasivasi (40) ġekorito murinai, aneru ta tano fakanai Sinai Ġorona sevina Mose ġenai efoforito. Mo aneru tu ġau ruguruguna ġenai karava morenai eiaġoto, benamo Mose ġenai efoforito. <sup>31</sup> Mose na moġa eġitaiato nai, eġabato; benamo nea ġita-ginikaua ġana eraka-kavinaġi iaġoto-ġoi nuġanai, Vereġauka garona eseġaġiato, maiġesi ekirato, <sup>32</sup> ‘Au tu ġoi senemu Aberahamo, Isako, e Iakobo ġeri Barau.’ Mose egari-rakavato, benamo asi eurato ma bene boġe-iaġo ġenoġoi. <sup>33</sup> Barau na evaġa-guruġaiato, ekirato, ‘Ġemu tamaka kwakumu na novei-vaġiri, korona mani oruġa-taġoni gabuna tu tano veaġana. <sup>34</sup> Moġoni, au ġegu tarimarima Aigupito ai ġevaġa-midigu midigurini tu baġitari ema ġeri midigumidigu ġabana guruna baseġaġiri nai, au bamariġo tu navaġa-maġuriri ġana. Toma noiaġoma, au na ġoi tu Aigupito ġana atuġu-ġenoġoimuni.’

<sup>35</sup> Mai Mose tu Isaraela tarimari na ġeruġaiato tarimana. Maiġesi ġekirato, ‘Goi tu deikara na ġai ġema vere e toto-iobukaiobuka tarimanai evaġa-iaġomuto?’ Mai tarima sebna moġo tu Barau na etuġuato bene vere e bene vevaġa-maġuri. Ema ġia na maki ġau ruguruginai karava moreri ai efoforito aneruna ġenana evaġa-kavaiato. <sup>36</sup> Ġia na Isaraela tarimari Aigupito na eġori-rosirito nai, nuġa-farevaġi veiġari e vetoġa boruri eveirito-ġoi, Aigupito nuġanai e Davara Kakakakanai ema tanobara fakanai laġani gabana vasivasi (40). <sup>37</sup> Mai Mose sebna na Isaraela tarimari ekirarito, ekirato, ‘Barau na ġemi peroveta tarimana ta betuġuani, au etuġuguto kavana. Mo peroveta tu ġomi ġemi tarimarima ta.’ <sup>38</sup> Ġia tu Isaraela tarimari ġeri vegogo nuġanai tano fakanai ġita senera ema Sinai Ġoronai evaġa-guruġaiato aneruna ġesi monai. Ġia na Barau ġena maġuri guruġana Barau ġenana eġabiato, ġita ma bene vaġa-ribara ġana.

<sup>39</sup> Senaġina ġita senera asi ġeurato ġena guruġa beġene ġabi-raġea, ema ġia ġekira-fitoġaiato ema nuġari ai ġeri ura tu Aigupito ġana ma ġeġenoġoi. <sup>40</sup> Ġia na Arona

ġekiraiato, ġekirato, ‘Ġita ġera barau tari noveiri, ġita ġoirarai beġene raka ġana. Korana mai Mose ġita Aigupito na eġori-rosirato tarimana tu ġita asi ribara kamasi ta bevei bene.’ <sup>41</sup> Mo ġaro ai ġia na boromakau natuna kavana kwaivakukuna ġeveiato. Benamo mo kwaivakuku ġoiranai ginitaġo dagarari ġea toreto ema ġeġani-verekoto. Tauġeri ġimari na ġeveiato dagarana ġeverere-viniato. <sup>42</sup> Benamo Barau eraka-veġitato, ma Isaraela tarimari evini-iaġorito, guba visiġuri beġene toma-rakariġo viniri ġana. Mo tu peroveta tarimari ġeri bukai ġetoreato ilailanai, ekirani,

‘Isaraela tarimami! Laġani gabana vasivasi (40) tano fakanai ġovaġirito-ġoi mamoeiri, boromakauri, e ginitaġo dagarari tu dia au ġegu.

<sup>43</sup> Mo tu kwaivakuku barauna Molok ġena farai rubuna, ema ġemi barau Refan ġena visiġu iouiouna ġoġwaiato-ġoi; moġeri kwaivakuku tu ġomi na ġoveirito, boġono toma-rakariġo viniri ġana.

Moġa lorinai au na ġomi batuġu-rakamini Babulona mo rekena ġana.’

<sup>44</sup> Ġita senera tanobara fakanai ġetanuto-ġoi nai tu, farai rubuna maki ġia ġesi. Mo farai rubuna Barau na ġena guruġa moġoniri evaġa-foforirito-ġoi. Mo farai rubuna ġeragaiato tu Barau na Mose ekira-varaiato lorinai, ema Mose na farai rubuna vetoġana eġitaiato ilailanai moġo ġeveiato. <sup>45</sup> Moġa murinai ġita senera na mo farai rubuna tamari ġerina ġeġabiato, benamo Iosefa ġena veġorikau neganai ġeġwakau-iaġoato irau bese tarimari tu ġita senera ġoirari ai Barau na ġeri tano na elai-veġitarito. Mo farai rubuna monai etanuto mo, Davida ġena nega. <sup>46</sup> Davida na Barau ġena vevaġa-namo eġabiato, ema enoġinoġito, monai Iakobo ġena Barau ġena tanu numana bene ragaia etato. <sup>47</sup> Senaġina Solomona na vau ġena numa eragaiato.

<sup>48</sup> Senaġi Iaru-korokoro Barauna tu tarimarima ġimari na ġeragarini numari ai tu asi etanuni, peroveta tarimana ekirani kavana,

<sup>49</sup> ‘Vereġauka ekirani,

“Guba tu au ġegu terona,

ema tanobara tu au kwakugu vaġa-ruġatarina gabuna.

Be, au ġegu numa tu kamasi-kamasi na boġo ragaiani?

Au ġegu iaġaraġi gabuna tu aiġa?

<sup>50</sup> Maiġeri dagara mabarari

au ġimagu na asi aveirito, ei?” ’

<sup>51</sup> Stefano ma eguruġato, ekirato, “Kira-ġuirraġi tarimami! Ġomi nuġami e seġami tu Barau asi ġeura-viniani tarimari kavari. Ġomi tu senemi ġeveito-ġoi kavari ġoveini, vanaġivanaġi Iauka Veaġa ġolai-veġitaiani! <sup>52</sup> Kamara peroveta tu ġomi senemi na asi ġevaġa-midigu midiguato? Ġia na tu Vei-iobukaiobuka Tarimana ġena iaġoma ġekiraġi-fofori guineato tarimari tu ġevaġi-maserito. Ma toma ġomi na tu Iesu boġo revaia e boġo vaġi-debaia. <sup>53</sup> Barau ġena taravatu aneru na ġeġwa-mariġoato tu ġomi na ġoġabiato, senaġina asi ġokorana-iaġiato.”

*Stefano forena ġeġidara-maseato*

<sup>54</sup> Ġia na mo guruġa ġeseġaġiato nai, ġebaru-rakavato, gadikari maki ġeġara-taririto Stefano ġenai. <sup>55</sup> Senaġi Stefano tu Iauka Veaġa na evaġa-vonuato, egaga-raġeto guba ġana, benamo gubai Barau marevana baregona eġitaiato, ema Iesu eġitaiato Barau aroribanai ruġataġo. <sup>56</sup> Benamo ekirato, “Ġoboġe! Guba bevekeo-faka aġitaiani, ema Tarimarima Natuna tu Barau aroribanai eruġa-taġoni!”

<sup>57</sup> Mo guruġa ġeseġaġiato nai tu, ġimari na seġari ġekou-ġaurito vau ġefararato. Benamo mabarari vaġa-sebo ġia ġeraga-viniato, <sup>58</sup> ġeġabiato, benamo siti murina ġana ġeinu-rosiato, benamo fore na ġeġidaraiato. Ma vaġa-moġoni tarimari ġeri dabuġa tu futua ta arana Saulo, ġia kwakuna koranai ġetorerito. <sup>59</sup> Ġeġidaraiato-ġoi nuġanai,

Stefano eḡuriḡurito, ekirato, “Iesu Vereḡauka o, au iaukagu noḡabi-raḡea.” <sup>60</sup> Evetuitarito, benamo ma taḡina ḡesi ekea-raḡeto, ekirato, “Vereḡauka o, ḡeri veiḡa rakavana maiḡa voina asi bono viniri.” Moḡesi eguruḡato, benamo emaseto.

## 8

<sup>1</sup> Saulo na Stefano vaḡimasena tu eḡabi-raḡeato.

### *Ekalesia vaḡa-midigumidiguna e lai-lausilausina evesinato*

Mo ḡaro ai Ierusalemā nuḡanai ekalesia vaḡa-midigumidiguna e lai-lausilausina baregona evesinato. Veḡabidadama tarimari mabarari ḡeraga-rovorovoto, Iudea e Samaria tanori mabarari ḡana ḡeiaḡoto, senaḡi apostolo tarimari ḡereḡari moḡo ḡeraga-kwanerito. <sup>2</sup> Barau korana-iaḡina tarimari kotari na Stefano taḡina ḡevei-rakavato e ma taḡiri ḡesi ḡekeuato, benamo ḡea guriato. <sup>3</sup> Senaḡina Saulo na tu ekalesia nevaḡa-rakava korikoria etato. Numa tata nuḡari ai eraka-toḡato-ḡoi, benamo veḡabidadama tauri e vavineri einu-rosirito-ḡoi, ma eḡabi-iaḡorito-ḡoi dibura numai ea biri-ḡaurito.

### *Filipo Samaria ai eḡobatato*

<sup>4</sup> Ḡevaḡa-karovorito tarimari tu ḡeiaḡoto gaburi ai Barau ḡena guruḡa ḡea ḡobata-iaḡiato. <sup>5</sup> Filipo tu Samaria vanuḡana baregona ḡana eiaḡoto, monai Keriso varina ea fiuato. <sup>6</sup> Ḡutuma na Filipo ḡena guruḡa ḡeseḡaḡiato ema nuḡa-farevaḡi veiḡari eveirito ḡeḡitarito nai, ḡia mabarari na ḡeseḡaḡi-vini magomagoato. <sup>7</sup> Iauka rakavari tarimarima ḡutuma ḡerina ma ḡabari ḡesi ḡeraka-vaḡito, ema tauḡaniri tavi tari ḡemaseto tarimari e kwaku rakava tarimari ḡutuma ḡenamoto. <sup>8</sup> Moḡa lorinai mo Samaria vanuḡana nuḡanai iaku baregona eḡorato.

<sup>9</sup> Mo vanuḡai tarima ta etanuto-ḡoi arana tu Simona. Guinenai ḡena meḡameḡa e ḡora veiḡari na Samaria tarimari evaḡa-ḡaba rakavarito-ḡoi. Tauḡena evekiraḡito-ḡoi, ḡia tu varaḡe rakava, <sup>10</sup> ema tarimarima mabarari mo vanuḡa nuḡanai misina na beiaḡo mo baregona na ḡeseḡaḡi-viniato-ḡoi, ema ḡekirato-ḡoi, “Mai tarima tu mo Barau ḡenana eiaḡomato seḡukana ḡekiraḡiani ‘Seḡuka Baregona’.” <sup>11</sup> Ḡia ḡeseḡaḡi-viniato, korana ḡaro barego vedaurea ḡia ḡena meḡameḡa veiḡari na evaḡa-ḡabarito. <sup>12</sup> Senaḡi Filipo na Barau ḡena Basileia, (ḡena veḡitaḡau seḡukana evaḡa-ruḡaiani maiḡa), Varina Namona e Iesu Keriso arana varina eḡobata-vinirito nai, tau e vavine na ḡevaḡa-moḡoniato, benamo ebatisorito. <sup>13</sup> Simona na maki evaḡa-moḡoniato, benamo babatise eḡabiato. Moḡa murinai Simona na Filipo ekaferi-kaferiato, ma Filipo na seḡuka veiḡari baregore e vetoḡa boruri eveirito-ḡoi nai, eḡaba-rakavato.

<sup>14</sup> Apostolo tarimari Ierusalemāi ḡetanuto-ḡoi ḡeseḡaḡito, Samaria tarimari na tu varau Barau ḡena guruḡa ḡeḡabi-raḡeato, benamo Petero e Ioane ḡetuḡu-iaḡorito Samaria ḡana. <sup>15</sup> Tauri ruarua ḡeraḡasito nai tu, veḡabidadama tarimari iatari ai ḡeḡauḡauto, Iauka Veḡa beḡene ḡabia ḡana. <sup>16</sup> Korana Iauka Veḡa ḡia ta iatari ai tu roḡosi roḡo bere raka-riḡo. Ḡia tu Iesu Vereḡauka aranai moḡo babatise ḡeḡabiato. <sup>17</sup> Petero e Ioane ḡimari ḡia iatari ai ḡeveḡabikauto, benamo ḡia na Iauka Veḡa ḡeḡabiato.

<sup>18</sup> Simona na apostolo tarimari eḡitarito, ḡimari ḡetore-kaurito vau Iauka Veḡa ḡeḡabiato, benamo ḡia na moni Petero e Ioane eduḡi-vinirito, ekirato, <sup>19</sup> “Au maki mani seḡuka ḡovinigu, be ḡimagu ta iatanai bana tore-kaua nai, Iauka Veḡa bene ḡabia.”

<sup>20</sup> Senaḡi Petero na ekiraiato, ekirato, “Ḡoi ma ḡemu moni ḡesi karava gabuna ḡana ḡoiaḡo, korana otuḡamaḡini Barau ḡena varevare tu moni na bovoiani! <sup>21</sup> Mai ḡauvei ai ḡoi tu asi ḡemu gabu, korana nuḡamu tu asi roroḡoto Barau ḡoiranai. <sup>22</sup> Mai ḡemu ura rakavana ḡenana novetuḡamaḡi-kure, benamo Vereḡauka nonoḡia, betaḡu ḡia na maniḡesi tuḡamaḡi ḡeḡevana oḡabiani nuḡamu ai maniḡa betuḡamaḡi-fitoḡaiani.

<sup>23</sup> Korana aḡitamuni, ḡoi tu nuḡa-ḡirimaḡirima na ovonuto, ema rakava na ebaru-bubuḡaumuto.” <sup>24</sup> Benamo Simona na Petero evaḡa-veseato, ekirato, “Mani ḡemi veiḡa, au iatagu ai Vereḡauka nonoḡia, be mani bokiraḡiri dagarari ta au ḡegu ai asi bene ḡora.”

<sup>25</sup> Petero e Ioane na Vereḡauka ḡena guruḡa ḡekiraḡi-foforiato e ḡevari-fiuato murinai, Ierusalemā ḡana ḡeḡenoḡoito. ḡeri ḡenoḡoi ai Samaria vanuḡari vovokari Vari Namona ḡeḡobata-iaḡiato.

#### *Filipo e Itiopia tarimana baregona*

<sup>26</sup> Vereḡauka ḡena aneru ta na Filipo evaḡa-guruḡaiato, ekirato, “Novariḡisi, gabina (o south) rekena ḡana noiaḡo, bono iaḡo mo, Ierusalemā na Gasa ḡana ḡeiaḡoni dabarana ḡana. Mo tu tano fakana dabarana, tarima ta asi etanuni.” <sup>27</sup> Benamo evariḡisito, eiaḡoto. Eiaḡoto-ḡoi nuḡanai, Itiopia tarimana ta, daḡi baregona tarimana, tu ḡena vanuḡa ḡana eḡenoḡoito-ḡoi. ḡia tu Itiopia ḡitaḡauna vavinena baregona ḡena farefare eḡitaḡaurito-ḡoi tarimana baregona. ḡia tu eunuko, (seuri ḡefararito tarimana). ḡia Ierusalemā ḡana eiaḡoto tu, Barau benea toma-rakariḡo vinia ḡana. <sup>28</sup> ḡena ḡenoḡoi ai kariota iatanai etanukauto vau, Isaia peroveta tarimana ḡena buka eiavi-iaḡoato-ḡoi. <sup>29</sup> Benamo Iauka Veāḡa na Filipo evaḡa-guruḡaiato, ekirato, “Noiaḡo, mo kariota sevinai bonoa raka.” <sup>30</sup> Benamo Filipo kariota sevinā ḡana eraga-iaḡoto, benamo mo tarima eseḡaḡiato, Isaia peroveta tarimana ḡena buka eiaviato-ḡoi. Benamo ekirato, “Mani guruḡa oiaviani anina ma ribamu ba?” <sup>31</sup> ḡia evaḡa-veseto, ekirato, “Au tu kamasi baribani. Mai tu tarima ta na bekira-varaguni vau bariba-maoroni.” Benamo Filipo ekiraiato, ekirato, “Kariotai noma raḡekau, be sevigū ai noma tanu.”

<sup>32</sup> ḡia na buka nuḡanai eiaviato-ḡoi toretorena tu maiḡa, “ḡia tu mamoe kavana ḡeḡori-iaḡoato, beḡene vaḡi-masea ḡana; ema ḡia tu mamoe natuna kavana ḡuiri ḡefakosi-vaḡirini nai tu, mururi asi ḡekeorini, moḡesina kavana ḡia maki muruna asi ekeoato.

<sup>33</sup> ḡetore-riḡoato e ḡena Kota dabarana ḡekouato.

ḡena bese tarimari tu dei na bekiraḡirini?

Korana ḡena maḡuri tanobarai tu bema kori.”

<sup>34</sup> Eunuko tauna na Filipo enoḡiato, ekirato, “Nokira-varagu, mai peroveta tarimana na tu deikara moḡesi ekiraḡiato? ḡia tauḡena evekiraḡito ba ta ekiraḡiato?” <sup>35</sup> Benamo Filipo na mo toretore ḡenana ḡena guruḡa esinaiato, ema Iesu Varina Namona evaḡa-ribaiato.

<sup>36</sup> Mo dabara na ḡeiaḡoto nuḡanai, nanu gabuna tai ḡeraḡasito. Benamo mo eunuko tauna na Filipo ekiraiato, ekirato, “Noboḡe, nanu tu maiḡa, kara na au babatisogu elau-ḡauani?” [<sup>37</sup> Benamo Filipo ekirato, “Bema nuḡamu mabarana ḡesi ovaḡa-moḡoniani nai tu ba-babatisomuni.” ḡia evaḡa-veseto, ekirato, “Oi, nuḡagu mabarana ḡesi avaḡa-moḡoniani Iesu Keriso tu Barau Natuna.”]

<sup>38</sup> Benamo ḡena draiva ekiraiato, kariota nevaḡa-ruḡataria, benamo kariota eruḡa-tarito. Filipo e eunuko tauri ruarua nanu ai ḡeraka-riḡoto, benamo Filipo na eunuko tarimana ebabatisoato. <sup>39</sup> Tauri ruarua nanu na ḡeraḡekauto-ḡoi nai, Vereḡauka Iaukana na Filipo tu eḡabi-veḡitaiato. Eunuko tarimana na asi ma eḡitaiato, senaḡi ḡena iaḡoiaḡo dabara na eiaḡoto-ḡoi roḡo ma iakuna ḡesi. <sup>40</sup> Filipo tu Asoto ai ma ea foforito. Monai vanuḡa mabarari ḡari eiaḡoto, Vari Namona ea ḡobata-iaḡiato-ḡoi, eiaḡoto mo Kaisarea ai eraḡasito.

## 9

#### *Saulo evetuḡamaḡi-kureto*

<sup>1</sup> Saulo roḡo Vereḡauka ḡekorana-iaḡiato-ḡoi tarimari vaḡa-rakavari e vaḡi-maseri guruḡari evei-gwadato-ḡoi ma baruna ḡesi. Benamo eiaḡoto Rubu Veāḡa verena baregona ḡenai, <sup>2</sup> enoḡiato, vevaḡa-riba fefana bene torea, Damaseko ai Iuda tarimari

ġeri rubu bene viniri ġana. Be, Iesu ġekorana-iaġiani tauri e vavineri monai bene doġariri nai tu bene barubaruri, benamo Ierusalemā ġana bene ġori-ġenoġoi iaġomari.

<sup>3</sup> Benamo Saulo na Ierusalemā eiaġuiato ma Damaseko ġana eiaġoto. Damaseko vanuġa ekavinaġiato nuġanai, asikauna mama ta guba na emoreto, ġia enanagi-tariato.

<sup>4</sup> Benamo ġia tano ai eketo-tarito, ma garo ta eseġaġiato, ekirato, “Saulo, Saulo! Kara dainai au ovaġa-midigu midiguguni e olaiguni?” <sup>5</sup> Ġia evedanaġito, ekirato, “Vereġauka, ġoi tu deikara ei?”

Mo garo evaġa-veseto, ekirato, “Au tu Iesu, ġoi na au ovaġa-rakavaguni tarimagu. <sup>6</sup> Senaġi novariġisi, vanuġa baregonai noa raka-toġa, monai vau tarima ta na bekiramuni kara ma bono vei.”

<sup>7</sup> Ġia ġekavaiato tarimari mabarari ġeruġa-tarito, asi ġeguruġato, korana garo tu ġeseġaġiato, a tarimana tu asi ġeġitaiato. <sup>8</sup> Saulo tano na evariġisito, matana eiaġaiato nai tu, dagara ta asi eġitaiato. Benamo karonā na ġimanai ġeġabito, Damaseko ġana ġeġori-iaġoato. <sup>9</sup> Ġaro toitoi veġata matana ebubuto asi eboġeboġeto, ema asi eġaniġanito e nanu o dagara ta asi eniuato.

<sup>10</sup> Damaseko ai Iesu ekorana-iaġiato-ġoi tarimana ta arana Anania, mata-vanaġi ai Vereġauka na evaġa-guruġaiato, ekirato, “Anania!” Ġia evaġa-veseto, ekirato, “Ou! Vereġauka, au maiġegu.” <sup>11</sup> Vereġauka na evaġa-guruġaiato, ekirato, “Novariġisi, be dabara ta arana Roroġoto Dabarana na noiaġo. Bono iaġo Iudas ġena numa nuġanai, Taso tarimana ta arana Saulo bonoa vedanaġi-iaġia, korana ġia tu monai moġa eġuri-ġurini. <sup>12</sup> Ġia na mata-vanaġi ai tarima ta arana Anania beġitaia, beraka-toġa, ġimana ġia iatanai betore-kauri, matana bene fafa ġana.”

<sup>13</sup> Anania evaġa-veseto, ekirato, “Vereġauka, tarima ġutuma na ġegu ġekiraġito, mai tau na Ierusalemā ġoi ġemu tarimarima veaġari tu veiġa rakava kwaikwairi evei-vinirini. <sup>14</sup> Ema Damaseko ġana beiaġoma tu Rubu Veaġa vereri baregori na maoro ġeviniato, ġoi aramu ġevaġa-raġeani tarimari mabarari bene barubaruri e dibura numai bene toreri ġana.” <sup>15</sup> Senaġina Vereġauka na ekiraiato, ekirato, “Noiaġo, korana mai tau tu au na varau aġabi-viriġiato, bese irauirau tarimari e tanobara vereri baregori ema Isaraela tarimari ġoirari ai au aragu bene kiraġia ġana. <sup>16</sup> Ema au na bavaġa-ġitaiani, ġia au aragu bakunai tu midigumidigu vovoka roġo beġabini.”

<sup>17</sup> Benamo Anania eiaġoto, numai eraka-toġato, ema ġimana Saulo iatanai etore-kauato. Benamo ekirato, “Saulo tarikakagu, Vereġauka Iesu, ġia tu maiġana oiaġomato-ġoi nai dabara tumanai ġemu ai eforito tarimana. Ġia na betuġugu, korana matamu ma bene fafa ema Iauka Veaġa na ġoi bene vaġa-vonumu ġana.” <sup>18</sup> Asikauna dagara ta maġani-kone ġunari noġa matana na eketo-vaġito, benamo ma eboġeboġe-ġenoġoito. Moġa murinai evaisi-raġeto, benamo babatiso eġabiato. <sup>19</sup> Eġaniġanito murinai, tauna ma ekokore-ġenoġoito.

### *Saulo Damaseko ai eġobatato*

Ma Saulo Damaseko ai tu ġaro kotari roġo ma etanuto, Iesu ġekorana-iaġiato-ġoi tarimari ġesi. <sup>20</sup> Ġia asikauna rubu ġana eiaġoto, Iesu ea ġobata-iaġiato, ekirato, “Iesu tu Barau Natuna.” <sup>21</sup> Saulo ġeseġaġiato tarimari mabarari nuġari ġefarevaġito, benamo ġekirato, “Mai tarima tu Iesu arana ġekiraġiani tarimari Ierusalemā evaġirini tarimana ene? Ema maiġana beiaġoma tu mai veiġa sebona uranai bene ġabiri, be Rubu Veaġa vereri ġeri ai bene ġori-ġenoġoi-iaġori ġana ene?”

<sup>22</sup> Senaġi Saulo ġena ġobata seġukana tu ebaregoto-ġoi. Ġena guruġai Iesu evaġa-moġoniato-ġoi, moġoni Iesu tu Keriso, (Barau na ekiraġi-toreato vevaġa-maġuri tauna). Mo guruġa Iuda tarimari Damaseko ai ġetanuto-ġoi tarimari tu asi ġeri vaġa-vese dabarana.

<sup>23</sup> Ġaro ġutuma ġekorito murinai, Iuda tarimari ġevegogoto, Saulo vaġi-masena dabarana ġeboioġaiato; <sup>24</sup> senaġi kara ġeboioġaiato dagarana tu tarima tari na Saulo

ġekira-varaiato, be eribaiato. Boġi-laġani vanuġa barana ġatama bokari ġeġita-ġaurito-ġoi, ġia beġene vaġia uranai. <sup>25</sup> Senaġi boġi ta Iesu ġekorana-iaġiato-ġoi tarimari na ġeġabiato, boseġai ġeġuraiato, benamo vanuġa maġuna murikana na ġetuġu-riġoato.

#### *Saulo Ierusalem ai*

<sup>26</sup> Saulo Ierusalem ai ea votuto nai tu, ġena ura Iesu ġekorana-iaġiato-ġoi tarimari ġesi beġene tanu-vegogo, senaġi ġia mabarari na ġegari-viniato, korana asi ġevaġa-moġoniato-ġoi, ġia tu moġoni korikori Iesu ġena mero. <sup>27</sup> Senaġi Banabas na ea ġoriato, apostolo tarimari ġeri ai eġori-iaġoato. Ġia na vau ġeri ekiraġito, Saulo na Vereġauka dabarai kamasi eġitaiato, ema Vereġauka na eguruġa-viniato. Ema ekira-vararito, kamasi Saulo tu Damaseko ai ma kokorena ġesi, asi egarito, Iesu aranai eġobatato nai. <sup>28</sup> Moġa lorinai Saulo ġia ġesi ġetanuto-ġoi ema Ierusalem ai mabararai eġobatato-ġoi Vereġauka aranai ma kokorena ġesi. <sup>29</sup> Grik garo ai ġeguruġato-ġoi Iuda tarimari ġesi ġeguruġato-ġoi e ġeveġare veġareto-ġoi, senaġi ġia na tu beġene vaġi-masea dabarana ġevetauato-ġoi. <sup>30</sup> Tarikaka na mai boioġa ġeribaiato nai tu, Saulo Kaisarea ġana ġeġori-variġoato, ma monana Taso ġana ġetuġu-rakaiato.

<sup>31</sup> Moġa lorinai ekalesia mabarana Iudea, Galilea, e Samaria tanori ai maino eġorato. Ekalesia ġena kokore ebaregato e Vereġauka garina ġeveito-ġoi ema Iauka Veaġa na evaġa-kavarito.

#### *Petero Lida e Iopa ai*

<sup>32</sup> Petero gabu mabarari ġari eiaġoto, nuġanai tu Lida ġana maki evariġoto, Barau ġena tarimarima veaġari rakaġitari. <sup>33</sup> Monai tarima ta arana Aenea edoġariato. Ġia kwakuna tu mase ema laġani imaima toitoi (8) veġata ġena genagena bedina na asi evariġisito. <sup>34</sup> Benamo Petero na evaġa-guruġaiato, ekirato, “Aenea, Iesu Keriso na evaġa-namomuni. Novariġisi, ġemu genagena noiokua.” Asikauna Aenea evariġisito. <sup>35</sup> Monai ġetanuto-ġoi Lida e Saron tarimari mabarari na ġeġitaiato, benamo Vereġauka ġenai ġeraka-kureto.

<sup>36</sup> Iopai Iesu ekorana-iaġiato-ġoi vavinena ta arana Tabita etanuto-ġoi. Grik garo ai arana tu Doreka, anina tu “deer”. Ġia tu veiġa namori ġutuma eveito-ġoi, ema asi ġeri-ġari tarimari evaġa-kavarito-ġoi. <sup>37</sup> Mo negai ġia tu ekeveto, benamo emaseto. Tauġanina ġeguriato, benamo numa tuġunai daiġutu tai ġea toreato. <sup>38</sup> Iopa e Lida fakari tu asi manaġa. Be Iesu ġekorana-iaġiato-ġoi tarimari Iopai ġeseġaġito Petero tu Lidai nai, tarima ruarua ġetuġu-iaġorito ġia ġenai, beġene noġia, beġene kira, “Ġai ġesi si-iaġo, asi nokwaibol!” <sup>39</sup> Moġa lorinai Petero evariġisito, benamo ġia ġesi ġeiaġoto. Eraġasito nai tu, tuġuna daiġutuna ġana ġeġori-varaġeato. Monai vabu mabarari na ġeruġa-ġeġeraġiato, benamo koudi e dabuġa kotari, Doreka na maġurinai eturirito-ġoi dagarari, ġia ġevaġa-ġita-iaġiato ma taġiri ġesi. <sup>40</sup> Petero na ġia mabarari daiġutu na etuġu-rosirito, benamo evetui-tarito, eġuri-ġurito. Moġa murinai eboġe-tarito, mase vavinena eġitaiato, benamo ekirato, “Tabita, novariġisi!” Tabita na matana eiaġarito, ma Petero eġitaiato, benamo etanu-vaisito. <sup>41</sup> Petero na ġimanai eġabito, evaġa-ruġa-vaissato. Benamo veġabidadama tarimari e vabu ekea-toġarito. Ġia ġema raka-toġato nuġanai, Tabita tu maġuri eruġa-taġoto-ġoi. Benamo Petero na ġeri ai etuġu-iaġoato. <sup>42</sup> Mai veiġa varina Iopa mabararai eraga-rovorovoto, benamo tarima ġutuma na Vereġauka ġevaġa-moġoniato. <sup>43</sup> Petero ġaro vovoka Iopai etanuto, boromakau kefiri eġauvei-iaġirito-ġoi tarimana arana Simona ġesi.

## 10

#### *Petero e Korenelio*

<sup>1</sup> Tarima ta arana Korenelio, ġia tu Kaisarea vanuġanai etanuto-ġoi. Ma ġia tu Roma ġeri vetari tarimari sinau sebna (100) eġorikaurito-ġoi tarimana. Ġia na vetari doġorona arana ġekiraġiato-ġoi tu “Itali ġeri Vetari Doġorona” eġita-ġaurito-ġoi. <sup>2</sup> Ġia e ġena numa tarimari mabarari ġesi tu Barau ġekorana-iaġiato-ġoi ema Barau

garina ġeveito-ġoi. Ġia na asi ġeri-ġari Iuda tarimari evaġa-kava baregorito-ġoi, ema vanaġivanaġi eġauġauto-ġoi Barau ġenai. <sup>3</sup> Lavilavi ta, horaġauna 3 koloko rekenai ġia emata-vanaġito, Barau ġena aneru ta eġita-korikoriatu, ema raka-toġato, benamo ġia evaġa-guruġaiato, ekirato, “Korenelio!” <sup>4</sup> Benamo ma garina ġesi Korenelio na mo aneru eġita-karakaraiato, benamo ekirato, “Vereġauka, kara?”

Aneru na evaġa-veurato, ekirato, “Ġemu ġuriġuri e ġemu vevaġa-kava asi ġeri-ġari tarimari ġeri ai tu Barau na eġabi-raġerito, ema ġia na etuġamaġirini. <sup>5</sup> Toma, tau kotari Iopa ġana notuġu-iaġori, be tau ta arana Simona, ġia arana ta tu Petero, beġenea ġoria. <sup>6</sup> Ġia tu Simona, boromakau kefiru eġauveu-iaġirini tarimana ġesi etanuni; ġena numa tu kone rikinai.”

<sup>7</sup> Mo evaġa-guruġaiato aneruna na eraga-kwaneato, benamo Korenelio na ġena vetuġunaġi tarimari ruarua ema ġena vetari tarimana ta ekea-iaġomarito. Ġena vetari tarimana moġa tu Barau ekorana-iaġiato-ġoi tarimana e ġia tu vanaġivanaġi Korenelio sevina ġia vetuġunaġina ġeiaġo-viniato-ġoi tarimana ta. <sup>8</sup> Kara eġorato dagarari mabarari Korenelio na ekira-vararito, benamo Iopa ġana etuġu-iaġorito.

#### *Petero ġena mata-vanaġi*

<sup>9</sup> Ma elaġanito, ġia tu dabara na roġo ġeiaġoto-ġoi, Iopa ġekavi-naġiato, ġaroġotai Petero tu numa tuġunai eraġekauto, nea ġuriġuri ġana. <sup>10</sup> Ġia varau evitoato, benamo ġena ura tu neġaniġani. Ma ġaniġani tu roġo ġerovinarito-ġoi nuġanai, ġia emata-vanaġito. <sup>11</sup> Ġia na guba evekeoto eġitaiato, ema dagara ta dabuġa baregona kavana, daigunina vasivasi emariġoto-ġoi ġia ġenai, noġa moġo ġetuġu-mariġoato-ġoi tanobara ġana. <sup>12</sup> Ġia emariġoto-ġoi nuġanai tu maġuri dagarari irauirau mabarari, kwakuri vasivasi ġerakani dagarari, e ġedarani dagarari, ema guba na ġerovoni manuri. <sup>13</sup> Benamo garo ta na ekiraiato, ekirato “Petero, novariġisi, be novaġiri, noġaniri!” <sup>14</sup> Senaġi Petero evaġa-veseto, ekirato, “Vereġauka, asiġina ġinavaġi! Rakava e asi veiareva dagarari ta au na roġosi roġo bara ġania.” <sup>15</sup> Mo garo na ma evaġa-guruġa ġenoġoiato ekirato, “Barau na eiarevarito dagarari ta rakavana asi bono kiraġi.” <sup>16</sup> Vaġa-toitoi moġesi eġorato, benamo mo dabuġa asikauna tu guba ġana ma eġabi-varaġeato.

<sup>17</sup> Petero na mo ġena mata-vanaġi ai eġitarito dagarari anina roġo etuġamaġi-vetaurito-ġoi nuġanai, Korenelio ġena vetuġunaġi tarimari tu ġevotuto, ma ġeribato Simona ġena numa tu ainai. Benamo ġeiaġoto mo numa ġatama bokana korana ġoiranai ġea ritoġo-tarito. <sup>18</sup> Benamo ġekeato e ġevedanaġito, ġekirato, “Simona, arana ta ġekiraġiani Petero, tu mainai etanuni ba?” <sup>19</sup> Petero na tu roġo mo mata-vanaġi anina etuġamaġi-vetauato-ġoi nuġanai, lauka Veaġa na evaġa-guruġaiato, ekirato, “Noseġaġi, ġoi tu tarima toitoi na ġevetaumuni. <sup>20</sup> Be novariġisi, noraka-riġo, ġia ġesi boġono iaġo. Asi bono ġoiaġi, korana au na atuġurito bene.”

<sup>21</sup> Petero eraka-riġoto mo tarima ġeri ai, benamo ekirato, “Ġovetauani tauna tu au maiġegu. Kara dainai boġo iaġoma?” <sup>22</sup> Ġia ġevaġa-veseto, ġekirato, “Ġai tu vetari tarimari sinau sebona (100) eġori-kaurini tarimana arana Korenelio na betuġuma. Ġia tu vei-iobukaiobuka e Barau garina eveini tarimana, ema Iuda tarimari mabarari na maki ġegubakau-baregoani. Ġia tu Barau ġena aneru ta na ekiraiato, ġoi bene keakaumu, ġena numa ġana bono iaġo, ema ġoi na kara bokiraġirini bene seġaġiri.” <sup>23</sup> Benamo Petero na mo tarima eġabi-raġerito ġena numai, monai ġegenato.

#### *Petero tu Korenelio ġena numa ġana eiaġoto*

Boġiboġi ai ġevariġisito, benamo Petero ġia ġesi ġeiaġoto, ema tarikaka kotari Iopa na maki ġia ġesi ġeiaġo-sebonato. <sup>24</sup> Ġia ġeiaġoto, dabara tumanai ġea genato, ma elaġanito vau Kaisareai ġevotuto. Korenelio na tu ġia enari-taġorito-ġoi, garagarana e ġatana maki ekea-vegogorito ġena numai. <sup>25</sup> Petero eraka-toġato nuġanai, Korenelio na edoġariato, benamo kwakuna koranai evetui-tarito ma etutuġutari-viniato. <sup>26</sup> Senaġi Petero na evaġa-ruġa-vaisiato, ekirato, “Novariġisi, au maki tarimarima moġo.” <sup>27</sup> Numa

nuġanai ġeraka-toġato-ġoi nai, Petero na Korenelio evaġa-guruġaiato-ġoi. Ma numa nuġanai tu tarimarima ġutuma vegogotaġo edoġaririto. <sup>28</sup> Benamo ġia na evaġa-guruġarito, ekirato, “Ġomi tauġemi maki ma ribami ginikau, ġai ġema taravatu ekirani, Iuda tarimana ta irau bese tarimana ta ġesi asi bene tanu-vegogo o asi bene raka-ġitaia maki, taravatu. Senaġi Barau na bevaġa-ġitagu, au na tarima ta asi bana kiraġia ġia tu rakava o asi veiareva. <sup>29</sup> Moġa lorinai boġo keakaugu nai, baiaġoma moġo, asi bakira-sirivaġi. Be nadanaġimi, au tu kara dainai boġo keakaugu?”

<sup>30</sup> Korenelio ekirato, “Ġaro vasivasi varau beġe iaġo, au tu ġegu numai aġauġauto-ġoi horaġauna 3 koloko lavilavi rekenai, maitoma horaġauna kavana. Benamo asikauna dabuġa kurokuro lelevaġina na evedabuġato tarimana ta ġoiragu ai eruġa-tarito, <sup>31</sup> benamo ekirato, ‘Korenelio! Barau na ġemu ġauġau beseġaġia e vevaġa-kava veiġari asi ġeri-ġari tarimari ġeri ai etuġa-maġirito. <sup>32</sup> Iopa ġana novetuġu-iaġo, Simona, ġia arana ġekiraġiani Petero ġetoni, beġenea kiraia, be bene iaġoma. Ġia tu Simona, boromakau kefiru eġauvei-iaġirini tarimana ġena numai etanuni kone rikinai.’ <sup>33</sup> Moġa lorinai asikauna vetuġumu araga-veito, ema bovei-nauġa, veiġa namo taumu, korana boiaġoma bene. Toma ġai mabarama tu Barau ġoiranai maiġema, ma Vereġauka na bevaġa-naġimu guruġari mabarari baġana seġaġiri ġana.”

#### *Petero ġena ġobata*

<sup>34</sup> Benamo Petero ġena guruġa esinaġato, ekirato, “Au toma bama riba-maoro, Barau na tarimarima mabarari tu eġabiraġe-ilailarinu. <sup>35</sup> Bese mabarari nuġari ai tu deikara na ġia garina eveini, ema veiġa iobukari eveini tarimana moġo ġia na eġabi-raġeani. <sup>36</sup> Barau na Isaraela tarimari ġeri ai etuġu-iaġomaġato varina tu maiġa, mo tu maino varina Iesu Keriso ġenana maino varina namona efiuato-ġoi. Iesu Keriso tu tarima mabarari ġeri Vereġauka. <sup>37</sup> Ġomi ma ribami Iudea nuġanai kara eġorato, Galilea na evesinato. Mo tu Ioane na babatiso eġobata-iaġiato murinai. <sup>38</sup> Iesu, Nasareta tarimana varina, ġomi ma ribami, kamasi Barau na Iauka Veaġa e seġuka ġia iatanai ebubu-riġoato. Ġia tu gabu mabarari ġari eiaġoto, veiġa namori eveirito-ġoi, ema Diabolo ġena seġuka na eġabirito tarimari mabarari evaġa-maġuririto-ġoi, korana Barau tu ġia ġesi. <sup>39</sup> Ġai tu ġia na Iuda e Ierusalem tanori ai eveirito-ġoi dagarari mabarari ġavaġa-moġonirini tarimama. Ġia tu satauro ai ġeikoko-kauato nai ġevaġa-maseato. <sup>40</sup> Senaġina Barau na ġaro vaġa-toitoinai (3) evaġa-variġisi ġenoġoġato ema evaġa-foforiato beġene ġitaia ġana. <sup>41</sup> Ġia tu tarimarima mabarari na asi ġeġitaġato, senaġi ġevaġa-moġoniani tarimari, mo tu Barau na eviriġi-guinerito tarimari na moġo ġeġitaġato. Ma moġeri tarimari tu ġai maiġema. Ġia evariġisi-ġenoġoito murinai, ġai tu ġia ġesi ġaġaniġani-vegogoto e ġaniuniu-vegogoto. <sup>42</sup> Ġia na evaġa-naġimato, tarimarima ġeri baġana ġobata e baġana kiraġi-foforia, ġia tu Barau na eġabihidiato, maġuri tarimari e mase tarimari ġeri vevaġa-maoro tarimanai evaġa-iaġoato. <sup>43</sup> Peroveta tarimari mabarari na ġia ġekiraġi-foforiato-ġoi, ġekirato-ġoi, ġia beġe vaġa-moġoniani tarimari mabarari tu ġia arana seġukanai Barau na ġeri rakava betuġamaġi-fitoġarini.”

#### *Irau bese tarimari Iauka Veaġa ġeġabiato*

<sup>44</sup> Petero roġo eguruġato-ġoi nuġanai, Barau ġena guruġa ġeseġaġiato-ġoi tarimari mabarari iatari ai Iauka Veaġa eraka-riġoto. <sup>45</sup> Iuda tarimari Iesu ġevaġa-moġoniato-ġoi ema Petero ġesi Iopa na ġeiaġomato tarimari tu ġeġaba-rakavato, korana Barau na Iauka Veaġa irau bese tarimari maki evinirito iatari ai ebubu-riġoato. <sup>46</sup> Korana ġeseġaġirito garo irauri ai ġeguruġato-ġoi, ema Barau ġevaġa-raġeato. Benamo Petero ekirato, <sup>47</sup> mai tarimarima na tu Iauka Veaġa varau beġe ġabia, ġita na taġabiato kavana. Be, nanu nuġanai babatiso beġene ġabia ġana tu deikara na bekira-ġoiani? <sup>48</sup> Moġa lorinai ġia na ekirarito, Iesu Keriso aranai beġene babatisori. Benamo ġia na Petero ġenoġoġato, ġaro kotari ġia ġesi roġo ma beġene tanu.



## 11

*Petero* ġena guruġa-fofori Ierusalem a i

<sup>1</sup> Apostolo e tarikaka Iudea tanonai mabarari ġeseġaġito, irau bese tarimari na maki Barau ġena guruġa varau ġeġabi-raġeato. <sup>2</sup> Benamo Petero Ierusalem a ġana evaraġeto nai tu, Iesu ġevaġa-moġoniato-ġoi tarimari, senaġi tauġaniri kefiru tu ġelama-vaġirito, moġeri na ġeġau-fitoġaiato, <sup>3</sup> ġekirato, “Ġoi tu kefiru asi ġelama-vaġirini irau bese tarimari ġeri numai oa raka-toġato, ema ġia ġesi oa ġaniġani-vegogoto!”

<sup>4</sup> Benamo Petero na vari mabarana ġeri ekiraġito, kamasi evesinato mo mag-ona. Ekirato, <sup>5</sup> “Au tu Iopa vanuġana baregonai aġuriġurito-ġoi, nuġanai amata-vanaġito. Aboġeto, dagara ta dabuġa baregona kavana, daigunina tu vasivasi (4), guba na emariġoto-ġoi, noġa moġo ġetuġu-mariġoato-ġoi, ġoiragu ai ema vetore-tarito. <sup>6</sup> Aboġe-ġurato nai tu, maġuri dagarari irauirau, tanobarai kwakuri vasivasi na ġerakani bureġari, e boġai ġetanuni bureġari, e ġedarani dagarari, ema guba na ġerovoni manuri aġitarito. <sup>7</sup> Benamo garo ta aseġaġiato, ekirato, ‘Petero, novariġisi, be novaġiri e noġaniri!’ <sup>8</sup> Senaġi au akirato, ‘Vereġauka, asiġina ġinavaġi, rakava e asi veiareva dagarari ta au murugu na roġosi beġere raka-toġa.’ <sup>9</sup> Mo garo guba na ma eguruġa-ġenoġoito, ekirato, ‘Barau na eiarevarito dagarari tu rakavari asi bono kiraġiri.’ <sup>10</sup> Vaġa-toitoina moġesi eġorato, benamo dagara mabarari guba ġana ma eġabi-varaġerito.

<sup>11</sup> Mo horaġauna sebonai tarima toitoi au atanuto-ġoi numanai ġeraġasito. Ġia tu Kaisarea na ġetuġurito au ġegu ai. <sup>12</sup> Benamo Iauka Veaġa na ekiraguto, ġia ġesi bana iaġo, asi bana ġoiaġi. Mai tarikaka imaima sebona (6) maki au ġesi Kaisarea ġana ġaiaġoto, ema mabarama Korenelio ġena numai ġaraka-toġato. <sup>13</sup> Ġia na ġema ekiraġiato, kamasi aneru ta, ġia ġena numai eforito eġitaiato, ema ekiraiato, ekirato, ‘Iopa ġana novetuġu-iaġo, Simona, ġia arana ta tu Petero, beġenea kiraia, bene iaġoma. <sup>14</sup> Ġia na guruġa tari ġemu bekiraġirini, benamo mo guruġa ġerina Barau na ġoi ema ġemu numa tarimari mabarari bevaġa-maġurimini.’ <sup>15</sup> Au na guruġa vau asinaġato nuġanai, Iauka Veaġa emariġoto ġia iatari ai, Pentekoste ġaronai ġita iatarai emariġoto kavana. <sup>16</sup> Benamo Vereġauka na kara ekiraġiato dagarana atuġamaġi-doġariato, ekirato, ‘Ioane tu nanu na ebatisoto-ġoi, senaġina ġomi tu Iauka Veaġa na bebatisomini.’ <sup>17</sup> Bema Barau na mo varevare sebona moġo, ġita Vereġauka Iesu Keriso tavaġa-moġoniato nai evinirato varevarena, irau bese tarimari maki evinirito nai tu, au tu deikara, be au na Barau bakira-ġoiani?”

<sup>18</sup> Ġia na mo guruġa ġeseġaġiato nai, ġeri guruġa barubaru ġevaġa-magoato, benamo Barau ġevaġa-raġeato, ġekirato, “O kato, irau bese tarimari maki Barau na vetuġamaġi-kure dabarana bevaġa-ġitari, maġuri beġene ġabia ġana.”

*Ekalesia evesinato Antioka a i*

<sup>19</sup> Stefano emaseto nai, ekalesia vaġa-midigumidiguna e lai-lautilausina eġorato, benamo veġabidadama tarimari ġevaġa-raga rovorovorito. Ġia kotari ġeiaġoto mo Foenikia, Saipras e Antioka ai ġea raġasito. Monai Iuda tarimari ġeri ai moġo Iesu varina ġeġobata-iaġiato-ġoi. <sup>20</sup> Senaġi veġabidadama tarimari kotari, Saipras e Kurene tarimari tu Antioka ġana ġeiaġoto, Grik tarimari ġeri ai maki vari ġea fiuato, Iesu Vereġauka Varina Namona ġeġobata-iaġiato-ġoi. <sup>21</sup> Vereġauka seġukana tu ġia ġesi, be tarimarima ġutuma-bara Vereġauka ġevaġa-moġoniato ema ġevetuġamaġi-kureto.

<sup>22</sup> Ierusalem a ekalesiari na mai vari ġeseġaġiato, benamo ġia na Banabas Antioka ġana ġetuġu-iaġoato. <sup>23</sup> Ġia Antiokai eraġasito, benamo Barau ġena varevare-bara tarimarima ġeri ai eġitaiato nai, eiaku-rakavato. Ma mabarari elaunaġirito, moġoni ai Vereġauka beġene korana-iaġia ma nuġari mabarari ġesi. <sup>24</sup> Banabas tu tarima namona, Iauka Veaġa e veġabidadama na evonuto. Ema tarimarima ġutuma-bara Vereġauka ġena tarimarimai ġeiaġoto.

<sup>25</sup> Benamo Banabas Taso ġana eiaġoto, Saulo vetau-vetauna. <sup>26</sup> Edoġariato, benamo Antioka ġana eġori-iaġoato. Monai mo laġani sebona, tauri ruarua ekalesia ġesi

ġevegogoto-ġoi e tarimarima ġutuma-bara ġevaġa-ribarito-ġoi. Iesu ġekorana-iaġiato-ġoi tarimari tu Antioka vanuġanai vau ġekiraġirito “Christian”.

<sup>27</sup> Mo ġaro ai peroveta tarimari kotari Ierusalem na Antioka ġana ġevariġoto. <sup>28</sup> Ta ġia fakari ai arana tu Agabo. Agabo evariġisito, Iauka na evaġa-ribaiato ilailanai tanobara mabaranai doġe baregona beġorani varina efiu-guineato. Mo doġe baregona tu Klaudio ġena veġitaġau ġarori ai eġorato. <sup>29</sup> Iesu ġekorana-iaġiato-ġoi tarimari na ġeura-iaġiato, ġia tata ġeri doġari ilailari ai tarikakari Iudeai ġeri ai ġeri varevare dagarari kotari beġene tuġu-iaġo, beġene vaġa-kavari ġana. <sup>30</sup> Mo veiġa tu ġeveiato, Banabas e Saulo ġeri ai ġeri moni ġetuġukauto, rubu ġitataġona tarimari beġene viniri ġana.

## 12

*Ekalesia vaġa*-midigumidiguna e lai-lautilusina ebaregato-ġoi

<sup>1</sup> Moġeri ġaro ai Kini Heroda na ekalesia tarimari kotari eġabi-taririto, bene vaġa-midigu midiguri ġana. <sup>2</sup> Iakobo (o Iames), Ioane kakana, tu baġa na debana ebasi-ġutuato. <sup>3</sup> Heroda na Iuda tarimari eġitarito, mo veiġa ġeiaku-iaġiato nai tu, Petero maki ma ea ġabi-tariato. Mo tu asi etubuni faraona verekona ġarori ai eġorato. <sup>4</sup> Petero eġabi-tariato, benamo dibura numai etoreato. Monai vetari tarimari gabanana imaima sebona (16) etorerito, vasiri vasiri ai evaġa-ruġarito vauro, Petero ġeġita-ġauato. Heroda ġena ura tu Pasova murinai vauro, tarimarima ġoirari ai bene ġori-rosia ema bene vaġa-kotaia. <sup>5</sup> Moġa lorinai Petero tu dibura numai ġeġita-ġauato-ġoi, a ekalesia tu Barau ġenai ġeġauġau-kokore kokoreto-ġoi Petero ġena.

*Aneru na Petero evaġa*-maġuriato

<sup>6</sup> Boġi, ma belaġanini tu Heroda na tarimarima ġoirari ai Petero beġori-rosiani, Petero tu seini na ġebarubaruato, benamo vetari tarimari ruarua vekaravari ai egenato, ema ġatama-boka ġitaġauna vetari tarimari na maki ġatama-boka ġenari-taġoato-ġoi. <sup>7</sup> Benamo Vereġauka ġena aneru ta efoforito, Petero sevinau eruġa-tarito, ema mama ta dibura numa nuġanai enanagi-tariato. Mo aneru na Petero ġabana ebota-karaiato, benamo evaġo-tataġaiato, ma ekiraiato, ekirato, “Ragavei, novariġisi!” Benamo seini Petero ġimana na ġeketo-vaġito. <sup>8</sup> Benamo aneru na evaġa-guruġaiato, ekirato, “Ġemu gabaġau nobaru-taria, ema ġemu tamaka noveiri.” Benamo Petero na eveirito. Aneru ma ekirato, “Ġemu koudi na noveseġo, be au murigu na noiaġoma.” <sup>9</sup> Petero ġia murinai erakato mo, dibura numa na eraka-rosito. Senaġi ġia tu asi ribana, mo aneru na kara eveiato-ġoi tu moġoni. Ġia matoru ekirato tu, emata-vanaġini etato-ġoi. <sup>10</sup> Ġatama-boka ġitaġauna tarimari ġeruġato gabuna ta ġeraka-vanaġiato, ma vaġa-ruaruana ma ġeraka-vanaġiato, ġeiaġoto mo, auri ġatama-bokanai ġea raġasito. Moġa tu vanuġa barana rakarosina ġatama-bokana. Mo ġatama-boka tu tauġena moġo ġia ġeri evekeoto, benamo ġeraka-rosito. Dabara na ġeraka-variġoto-ġoi nuġanai, asikauna aneru na Petero eraga-kwaneato.

<sup>11</sup> Monai vau Petero eribato ġia ġenai kara eġorato, benamo ekirato, “Au toma moġoni bama riba, Vereġauka na ġena aneru betuġua tu, Heroda ġimana na, ema Iuda tarimari na au ġegu ai kara ta beġene veia ġetato-ġoi ġenana bema vaġa-maġurigu.

<sup>12</sup> Mo veiġa etuġamaġi-fakaiato, benamo Maria ġena numa ġana eiaġoto. Maria tu Ioane Mareko sinana. Monai numa nuġanai tu tarimarima ġutuma ġevegogoto, ġeġauġauto-ġoi. <sup>13</sup> Petero numa murikana ġatama bokanai esekeseketo, benamo vetuġunaġi ġuiatona ta arana Roda eiaġoto, nea ġitaia ġana. <sup>14</sup> Senaġi ġia na Petero garona eseġaġi-leaiato, benamo iaku na evaġa-vonuato, benamo ġatama-boka tu asi ekeo-fakaiato, a ġia tu eraga-ġenoġoito, ea kirarito, Petero tu murikai eruġa-taġoni. <sup>15</sup> Ġia na ġekiraiato, ġekirato, “Ġoi tu bebabomu ba!” Senaġi ġia eġiġiraġeto-ġoi, ekirato, “Moġoni, Petero tu murikai eruġa-taġoni.” Benamo ġekirato, “Mani tu ġia ġena aneru!”

<sup>16</sup> Senaġina Petero tu roġo esekeseke-ġiġiraġeto-ġoi. Benamo ġeiaġoto, ġatama-boka ġea keo-fakaiato nai tu, Petero ġeġitaiato, ġeġaba-rakavato. <sup>17</sup> Petero ġimana na ekira-ġoirito asi beġene guruġa, benamo Vereġauka na kamasi dibura numa na eġori-rosiato ġeri ekiraġito. Ġia na evaġa-guruġarito, ekirato, “Iakobo (o Iames) e tarikaka mabarari ġeri mai vari boġono kiraġia.” Benamo ġia tu erakato, gabu ta ġana ma eiaġoto.

<sup>18</sup> Boġiboġi, vetari tarimari fakari ai tu daradara baregona eġorato; ġevedanaġi-vedanaġito, ġekirato, “Petero tu kamasi bevei?” <sup>19</sup> Heroda na gabu mabarana evetau-ġinikauato, senaġi Petero asi eġoitaġoato. Benamo Petero ġeġita-ġauato tarimari evaġa-kotarito murinai, ġena vetari tarimari o soldia ekirarito beġenea vaġi-maseri. Moġa murinai Heroda na Iudea eraga-kwaneato, ma Kaisareai ġaro tari ea tanuto.

#### *Heroda emaseto*

<sup>20</sup> Heroda tu Taia e Sidono tarimari ebaruvini-rakavarito; moġa lorinai Taia e Sidono tarimari ġeveġabi-vegogoto, ma Heroda ġea ġitaiato. Senaġi guine, Blasto, Heroda ġena gena-daiġutuna ġitataġona tarimana ġesi roġo ġeveġatato, ġevaġa-maranaiato, ema ġia rekeri ai roġo ekauto. Moġa murinai vauro ġeiaġoto, Heroda ġenai maino ġea noġiato, korana ġia ġeri tanobara ġaniġanina tu Heroda ġena tanobarai ġeġabito-ġoi.

<sup>21</sup> Benamo ekiraġi-toreato ġaronai, Heroda na ġena vere dabuġana eveiato, benamo ġena teronai ea tanukauto vau, tarimarima eguruġa-vinirito. <sup>22</sup> Benamo tarimarima ġeġabato, ġekirato, “Mai tu barau ta garona, dia tarimarima garona.” <sup>23</sup> Mo horai Vereġauka ġena aneru ta na Heroda ekwariato, korana ġia na mo guruġa eseġaġiato nai, Barau tu asi evaġa-raġeato. Ġia tu ġuioġuio na ġeġaniato, emaseto.

<sup>24</sup> Senaġi Barau ġena guruġa tu ebaregato e eraga-rovorovoto.

<sup>25</sup> Banabas e Saulo tu ġeri ġauvei ġevaġa-koriato, benamo Ierusalemna na ġeġenoġoito; Ioane Mareko maki ġeġori-kauato.

## 13

#### *Banabas e Saulo ġeġabi-viriġirito e ġetuġurito*

<sup>1</sup> Antioka ekalesiana nuġanai tu peroveta e vevaġa-riba tarimari kotari. Arari tu Banabas; Simeona, arana ta tu Niga; Lukio, Kurene tarimana; Manaen, ġia tu Gavana Heroda ġesi ġevaġa-baregorito; e Saulo. <sup>2</sup> Ġia na Vereġauka ġetoma-rakariġo viniato-ġoi e ġeġani-veaġato-ġoi nuġanai, Iauka Veaġa na ekirarito, ekirato, “Banabas e Saulo tu au ġegu boġono ġabi-ġerevaġiri, korana au na bakeari, ġegu ġauvei ta beġene veia ġana.” <sup>3</sup> Benamo ġia ġeġani-veaġato e ġeġuriġurito murinai, ġimari ġia iatari ai ġetore-kaurito, benamo ġetuġu-rakarito.

#### *Saipras ai*

<sup>4</sup> Iauka Veaġa na Banabas e Saulo etuġurito, benamo tauri ruarua kone vanuġana Seleukia ġana ġevariġoto. Seleukia na tauri ruarua bouti ai ġeraġeto, benamo Saipras motumotu ġana ġevanaġito. <sup>5</sup> Banabas ma Saulo Salami ai ġevotuto nai, Barau ġena guruġa Iuda tarimari ġeri rubu tari ai ġea ġobata-iaġiato. Ioane Mareko maki ġia ġesi, ġia tauri ruarua evaġa-kavarito-ġoi.

<sup>6</sup> Tauri ruarua na Saipras motumotu mabarana ġeraka-vanaġiato, ġeiaġoto Pafo vanuġanai ġea raġasito. Monai Iuda ġeri ġora e peroveta ġofaġofa tarimana ta arana Bar-Iesu ġea doġariato. <sup>7</sup> Ma Bar-Iesu tu motumotu verena, ma iaunega rakavarakava tarimana arana Seregio Paulo ġatana. Mo vere na Banabas e Saulo ekea-iaġorito ġia ġoirana ġana, korana ġena ura tu Barau ġena guruġa bene seġaġia. <sup>8</sup> Senaġi mo ġora tarimana Elima, (Bar-Iesu arana ta tu Elima), na ġeri guruġa ekira-fitoġarito, ġena ura vere na Iesu asi bene vaġa-moġonia. <sup>9</sup> Benamo Saulo, arana ta tu Paulo, Iauka Veaġa na evaġa-vonuato, benamo Elima eġita-karakaraiato. <sup>10</sup> Benamo ekirato, “Ġoi tu Diabolo natuna, ema veiġa iobukaiobukari mabarari tu ġoi na ovetari-vinirini! Ġoi tu ġofaġofa e rakava mabarari na ovonuto. Vereġauka ġena veiġa iobukaiobukari

gofagofai bono vaḡa-iaḡori uranai ovededegwani. Mo veiḡa tu aitoma vau bovaḡa-dokoani? <sup>11</sup> Noseḡaḡi! Toma Vereḡauka ḡena seḡuka ḡoi ḡemu ai befoforini, matamu bebubuni, ma laḡani mamana asi boḡitaiani, beiaḡoni mo, ḡaro ta.”

Asikauna Elima tu mukuna na matana eḡabi-ḡauato, benamo eraka-ḡeḡeraḡi ḡeḡeraḡito, ḡena ura ta na ḡimanai bene ḡabi, ma bene ḡori-kaua. <sup>12</sup> Mo vere na kara eḡorato dagarana eḡitaiaato nai, Vereḡauka evaḡa-moḡoniato. Ema eḡaba-rakavato Vereḡauka ḡena vevaḡa-riba guruḡari ai.

*Antioka vanuḡana* Pisidia ai

<sup>13</sup> Paulo ma karonā ḡesi Pafo ḡeraga-kwaneato, bouti na Pega ḡana ḡeiaḡoto. Pega tu Pamfilia nuḡanai. Pegai benamo Ioane Mareko na Paulo e Banabas eraga-kwanerito, ḡia tu Ieruselema ḡana ma eḡenoḡoi-iaḡoto. <sup>14</sup> Pega na kwakuri na Antioka ḡana ḡeiaḡoto. Antioka tu Pisidia tanonai. Sabadi ai tu Iuda tarimari ḡeri rubu ai ḡeraka-toḡato, bena ḡetanu-tarito. <sup>15</sup> Mose ḡena taravatu e peroveta tarimari ḡeri toretore ḡeiavirito murinai, rubu ḡitaḡauna tarimari na noḡinoḡi ḡetuḡu-iaḡoato ḡia tauri ruarua ḡeri ai, ḡekirato, “Tarikaka, bema ma ḡemi vevaḡa-gwaḡiḡi guruḡari mai tarimarima ḡeri ai nai tu, ḡai ḡaurani, ḡeri ḡokiraḡi.”

<sup>16</sup> Paulo evariḡisito, ḡimana na eiave-taririto, benamo ekirato, “Isaraela taumi e irau bese tarimari fakari ai Barau garina ḡoveini tarimami, ḡoseḡaḡi! <sup>17</sup> Mai Isaraela tarimari ḡeri Barau na ḡai senema eḡabi-viriḡirito, ema ḡia na evaḡa-ḡutumarito, Aigupito tanonai ḡetanuto-ḡoi nai. Ma Barau ḡena seḡuka baregona na Aigupito tanona na eḡoriroririto, <sup>18</sup> ema laḡani gabana vasivasi (40) kavana tano fakanai ḡia ḡeri ai evevaḡa-gwaḡiḡito. <sup>19</sup> ḡia na Kanana tanonai bese imaima ruarua (7) tarimarimari evaḡa-moutaririto. Ma ḡeri tano tu eḡabiato, Isaraela tarimari evinirito e ḡeri tanobarai evaḡa-iaḡoato. <sup>20</sup> Mo dagara mabarari tu laḡani sinau vasivasi ma gabana imaima (450) kavana nuḡanai ḡeḡorato. Moḡa murinai ḡia na vevaḡa-roroḡoto tarimari evinirito, eiaḡoto mo peroveta tarimana Samuela ḡena veḡitaḡau laḡanina. <sup>21</sup> Ma ḡeri vere o kini ta beḡene ḡabia noḡinoḡina ḡeveito nai, Barau na Saulo evinirito. ḡia tu Kisa natuna, mo tu Beniamina ḡena doḡoro tarimana. Saulo na laḡani gabana vasivasi (40) eḡita-ḡaurito. <sup>22</sup> Saulo kini dagina na eḡabi-vaḡiatio murinai, Barau na Davida eḡabiato, Isaraela ḡeri kini ai evaḡa-iaḡoato. Barau na Davida tu maiḡesina ekiraḡi-foforiato, ekirato, ‘Au na Davida, Iese natuna, badoḡaria, ḡia tu au nuḡagu na euravini-rakavaiani tarimana. ḡia na au ḡegu ura veiḡari mabarari beveirini.’ <sup>23</sup> Barau na ḡena guruḡatore ilailanai, Davida besena na, Isaraela tarimari ḡeri vevaḡa-maḡuri tarimana etuḡu-mariḡoato. Mo vevaḡa-maḡuri tarimana tu Iesu.

<sup>24</sup> Iesu roḡosi roḡo bere ḡauvei nuḡanai, Ioane na Isaraela tarimari mabarari eḡobatavinirito, ekirarito, ḡeri rakava ḡerina beḡene vetuḡamaḡi-kure, benamo babatiso beḡene ḡabia. <sup>25</sup> Ioane na ḡena ḡauvei dori evaḡa-koriato nuḡanai, tarimarima ekirarito, ekirato, ‘Ḗomi ḡotuḡa-maḡini au tu dei? Au tu dia ḡomi na ḡovaḡa-nogaiani tarimana. Senaḡi ḡoboḡe! Ḗia tu au murigu na mani eiaḡomani, ma au tu asi ilaila ḡia kwakuna tamakari bakoki-vaḡirini.’

<sup>26</sup> Tarikakagu, Aberahamo besena, ema ḡomi irau bese fakari ai Barau garina ḡoveini tarimami: Mai vevaḡa-maḡuri guruḡana tu ḡita ḡera etuḡu-iaḡomaiato. <sup>27</sup> Ieruselema tarimari ma ḡeri vere ḡesi Iesu asi ḡeḡita-leaiato, ema Iesu, peroveta tarimari ḡeri guruḡa Sabadi mabarari ai ḡeiavirito-ḡoi, tu asi ḡetuḡamaḡi-fakarito. Moḡesina naima ḡia na Iesu vaḡi-masena guruḡana ḡekiraḡito nai, peroveta tarimari ḡeri guruḡa ḡevaḡa-moḡonirito. <sup>28</sup> Oba, vaḡi-masena korana ta tu asi ḡedoḡariato, senaḡina Pilato ḡenoḡiato, bene vaḡi-masea ḡetato. <sup>29</sup> Buka Veagāi ḡia ḡekiraḡiato guruḡari mabarari ḡeveirito murinai, satauro tuḡuna na ḡeḡabi-riḡoato, benamo fore ḡekwaiato kouḡana garanai ḡea toreato. <sup>30</sup> Senaḡi Barau na mase na ma evaḡa-variḡisi ḡenoḡoiato, <sup>31</sup> ḡia ḡesi Galilea na Ieruselema ḡana ḡeiaḡoto-ḡoi tarimari na ḡaro vovoka ḡeḡitaiaato. Ma ḡia toma tu Isaraela tarimari ḡeri ai Iesu ḡekiraḡi-foforiani.

<sup>32</sup> Ema Barau na ġita senera kara ekiraġitore-vinirito Varina Namona ġomi ġakira-varamini. <sup>33</sup> Mo kiraġitore tu Barau na ġita, ġia tuburi, ġera evaġa-moġoniato, mo tu ġia na Iesu mase na ma evaġa-variġisi ġenoġoiato nai. Salamo vaġa-ruaruanai etoreato ilailana, ekirani,

‘Ġoi tu au Natugu;

toma au tu ġoi Tamamu ai baiaġo.’

<sup>34</sup> Barau na moġoni mase na evaġa-variġisi ġenoġoiato e asi ma beġenoġoini gara ġana, benamo beboraġani. Barau na tu maiġesi ekiraġiato, ekirato,

‘Davida ġena akiraġi-torerito,

vevaġa-namo veaġari e moġoniri tu ġomi bavinimini.’

<sup>35</sup> Ema Salamo ta nuġanai ma ekirani,

‘Ġoi ġemu tarima veaġana tu

asi beboraġani,

korana tu asi bene ġora otato.’

<sup>36</sup> Davida ġena ġuru ai Barau ġena vetuġunaġi eiaġo-vinito-ġoi nai emaseto, benamo senena seviri ai ġeguriato, ma tauġanina tu eboraġato. <sup>37</sup> Senaġi Iesu, Barau na mase na evaġa-variġisi ġenoġoiato tarimana, tu tauġanina asi eboraġato. <sup>38</sup> Moġa lorinai, tarikakagu mabarami, au aurani boġono riba, ġai tu Iesu bakunai rakava tuġamaġi-fitoġari varina ġomi ġemi ġavari-fiuani. <sup>39</sup> Mose ġena taravatu na ġomi ġemi rakava tu asi beruġa-vaġirini riba, a Iesu na ġia ġevaġa-moġoniani tarimari mabarari ġeri rakava tu eruġa-vaġirini, vei-iobukaiobuka tarimari ai evaġa-iaġorini. <sup>40</sup> Rorimi boġono vetore, be peroveta tarimari na ġekiraġirito dagarari, ġemi ai asi beġene ġora; ġekirato,

<sup>41</sup> ‘Ġomi veġabi-varaġevaraġe

tarimami ġoboġeboġe!

Nuġami ġefarevaġi, benamo ġomase!

Korana ġemi maġuri ġarori ai

au na veiġa ta baveiani,

enabe ta na ġemi bekiraġi-ginikauani,

senaġi asi boġo vaġa-moġoniani!’ ”

<sup>42</sup> Paulo e Banabas rubu na ġeraka-riġoto-ġoi nuġanai, tarimarima na ġenoġirito, ġoira Sabadi ai ma beġene ġenoġoi, be mo guruġa kotari ma ġeri beġene kiraġi.

<sup>43</sup> Tarimarima vegogo na ġeġwa-lausiato murinai, Iuda tarimari ġutuma, ema irau bese tarimari, Barau ġekorana-iaġiato-ġoi tarimari, ġutuma maki Paulo e Banabas muriri na ġeiaġoto. Tauri ruarua na ġevaġa-guruġarito e ġelaunaġirito, Barau ġena varevare-bara nuġanai beġene ruġa-gwaġiġi.

<sup>44</sup> Sabadi vaġa-ruaruanai, dori moġo mo vanuġa baregona tarimari mabarari na Vereġauka ġena guruġa seġaġi-seġaġina ġeraka-vegogoto. <sup>45</sup> Iuda tarimari na mo ġutuma ġeġitarito nai, ġemama-rakavato; benamo Paulo na kara ekiraġirito-ġoi guruġari, ġia na ġekira-fitoġarito e ġevei-veġare veġareato. <sup>46</sup> Senaġi Paulo e Banabas tu ma kokoreri ġesi ġevaġa-veserito, ġekirato, “Barau ġena ura lorinai tu ġia ġena guruġa ġai na ġomi baġana kiravara-guinemi. Senaġi ġomi na asi ġoġabi-raġeani, monana tu ġomi tauġemi na ġovaġa-moġoniani, ġomi tu asi ilaila maġuri vanaġivanaġi boġo ġabiani. Moġa lorinai, ġai na ġomi ġaraġa-kwanemini, ma irau bese tarimari ġeri ai ġaiaġoni. <sup>47</sup> Korana Vereġauka na tu maiġesi evaġa-naġimato, ekirato,

‘Au na ġomi atoremto tu,

irau bese tarimari ġeri mamai

boġono iaġo,

be vevaġa-maġuri boġono ġabi-rosia tanobarai ġetanuni tarimari mabarari ġeri ai.’ ”

<sup>48</sup> Irau bese tarimari na mo guruġa ġeseġaġiato nai, ġeikuto e Vereġauka ġena guruġa ġevaġa-raġeato; ema Barau na eġabi-viriġirito maġuri vanaġivanaġi beġe ġabiani tarimari mabarari ġeveġabidadamato. <sup>49</sup> Vereġauka ġena guruġa mo gabu mabarana nuġanai eraga-rovorovoto. <sup>50</sup> Senaġi Iuda tarimari na irau bese vavineri,

dagi baregori ġeġabi-taġorito-ġoi ma Barau ġekorana-iaġiato-ġoi vavineri, e vanuġa baregonai veġitaġau tauri, nuġari ġeġanirito. Benamo ġia na vevaġa-midigumidigu ġevaġa-ġoraiato Paulo e Banabas ġeri ai, ema ġeri gabu na ġelai-rosirito. <sup>51</sup> Tauri ruarua na kwakuri kauri ġekwari-ketoketorito, ġia ġeri kira-sirivaġi vaġa-moġoniri ġana, benamo Ikonía ġana ġeiaġoto. <sup>52</sup> Iesu ġekorana-iaġiato-ġoi tarimari Antiokai tu iaku e Iauka Veaġa na ġevonuvonu-raġeto.

## 14

*Ikonía ai*

<sup>1</sup> Ikoníai Paulo e Banabas tauri ruarua Iuda tarimari ġeri rubu ai ġeveito-ġoi kavana ġeraka-toġato, benamo ġeġobatato. Ġeri ġobata na Iuda e Grik tarimari ġutuma lelevaġi ġeveġabidadamato. <sup>2</sup> Senaġi Iuda tarimari asi ġeurato Iesu beġene vaġa-moġonia, tarima kotari na irau bese tarimari ġelaunaġi-naġirito, benamo tarikaka veġabidadama nuġanai tarimari ġeiau-rakava vinirito. <sup>3</sup> Paulo e Banabas monai ġetanu-maukato. Ma kokoreri ġesi Vereġauka ġena varevare-bara guruġana ġekiraġiato-ġoi. Vereġauka na ġeri guruġa evaġa-moġonirito tu seġuka evinirito, vetoġa boruri e nuġa-farevaġi veiġari ġeveito. <sup>4</sup> Senaġi mo vanuġa baregona tarimari tu ġevevare-kirato, reke-ta Iuda tarimari ġesi ġekauto, reke-ta tu apostolo tarimari ġesi. <sup>5</sup> Benamo irau bese tarimari e Iuda tarimari ma ġeri veguine-iaġi tauri ġesi ġeverori-vegogoto, ġeurato apostolo beġene vaġa-midigu midiguri e fore na beġene ġidara-maseri. <sup>6</sup> Senaġi Paulo e Banabas na mo boioġa ġeribaiato, benamo Likaonia tanonai vanuġa baregori ruarua Listera e Derebe, ema seviri tanori ġana ġegari-iaġoto e seviri vanuġari tari ġari. <sup>7</sup> Monai Vari Namona ġeġobata-iaġiato-ġoi.

*Listera e Derebe ai*

<sup>8</sup> Listerai tarima ta etanuto-ġoi; ġia tu kwakuna rakava emaġurito, be asi erakato-ġoi. <sup>9</sup> Mo tarima tu eseġaġi-taġoto-ġoi Paulo eġobatato-ġoi nuġanai. Paulo na eġita-karakaraiato, benamo eribato ġia tu ġena veġabidadama na bevaġa-namoani riba, <sup>10</sup> benamo eguruġa-fararato, ekirato, “Novariġisi, noruġa-tari. Benamo eburi-vaisito, erakato.

<sup>11</sup> Tarimarima ġutuma na kara Paulo na eveiato ġeġitaiato nai, ġeri Likaonia garonai ġekoġoto, ġekirato, “Barau tu tarimarimai beġe iaġo, beġe raka-riġo ġita ġerai!” <sup>12</sup> Ġia na Banabas arana tu Dios ġetato, ema Paulo arana tu Hemes ġetato, korana Paulo tu eguruġa-vovokato-ġoi. <sup>13</sup> Dios ġena Rubu Veaġa verena ġena rubu tu vanuġa barana murikanai. Ġia na boromakau e veravera vanuġa maġuna ġatama bokana ġana eġwa-iaġorito, korana tarimarima ġutuma ġesi ġeurato, apostolo ġeri ai ginitaġo veiġari beġene vei ġana.

<sup>14</sup> Senaġina apostolo ruarua Banabas e Paulo na ġeseġaġirito, kara ġeveia ġetato nai, ġeri dabuġa ġedarerito, benamo ġutuma nuġari ai ġeraga-ġabaġaba-toġato. <sup>15</sup> Ġekirato, “Karase ġomi tau tu maiġesi ġoveini? Ġai maki tarimarima moġo ġomi kavana! Ġai na tu Vari Namona ġomi ġemi ai ġaġabi-iaġomaiani, ġomi ġakiramini, mai asi tauri dagarari boġono raga-kwaneri, benamo Barau maġurina ġenai boġono raka-ġenoġoi ġatoni. Ġia na guba, tanobara, daġaru-bara, e ġetanu-iaġirini dagarari mabarari eveirito. <sup>16</sup> Guinenai ġia na bese mabarari etao-fitoġarito, tauġeri ġeri ura dabarari ai beġene raka ġana. <sup>17</sup> Senaġi dagara namori eveirini ġerina, ġia tauġena vanaġivanaġi evevaġa-moġonini: Ġia na ġura guba na evinimini e varovaro dagarari ġeri ġaro korikoriri ai evinimini. Ġia na ġaniġani asisebo evinimini e nuġami iaku na evaġa-vonurini.” <sup>18</sup> Moġesi ġevaġa-guruġarito, senaġina mo tarimarima ġutuma-bara tu ġia tauri ruarua ġeri ai ginitaġo ġauveina ġeveia roġo ġetato-ġoi, kiraġoiri tu tauri ruarua ġeri ai tu egwaġiġito.

<sup>19</sup> A Iuda tarimari kotari Antioka e Ikonía na ġeiaġomato, ma moġeri tarimari ġia rekeri ai ġeġabi-vanaġirito. Benamo Paulo fore na ġeġidaraiato ma ġeinu-rosiato

vanuġa murina ġana. Ġia ġetuġamaġito tu varau emaseto. <sup>20</sup> Senaġi Iesu ġekorana-iaġiato-ġoi tarimari na ġeruġa-ġeġeraġiato nai tu eruġa-vaisito, benamo vanuġa barana ġana ma erakatoġa-ġenoġoito. Boġiboġi tu Banabas ġesi Derebe ġana ġeiaġoto.

*Siria Antiokana* ġana ġeġenoġoito

<sup>21</sup> Paulo e Banabas na Derebe ai Vari Namona ġeġobata-iaġiato, benamo tarimarima ġutuma Iesu korana-iaġina tarimari ai ġeġabi-toġarito. Benamo ma ġeġenoġoi-iaġoto>Listera, e Ikonja, ema Pisidia Antiokana ġana. <sup>22</sup> Ġia na Iesu ġekorana-iaġiato-ġoi tarimari ġevaġa-kokorerito e ġelaunaġirito, ġeri veġabidadama beġene ġabi-gigitariri. Ema ġekirato, “Ġita tu midigumidigu vovoka bita ġabirini vau Barau ġena Basileiai bita raka-toġani.” <sup>23</sup> Tauri ruarua na rubu tatai veġorikau tarimari ġevaġa-ruġarito. Ma tauri ruarua ġeġani-veaġato e ġeġauġauto murinai, Vereġauka ġimanai ġetore-kaurito. Mo tu ġia na ġeġabidadama-viniato-ġoi Vereġaukana ġenai.

<sup>24</sup> Pisidia tanona na ġeraka-vanaġito murinai tu, Pamfilja tanonai ġeraġasito. <sup>25</sup> Pega vanuġanai Vereġauka ġena guruġa ġeġobata-iaġiato murinai tu, Atalia vanuġana ġana ġeiaġoto. <sup>26</sup> Atalia na tu bouti na ġeġenoġoi-iaġoto Antioka ġana. Monai tu, ġeri evanelia iaġoiaġona roġosi roġo beġene sinaia nai, tarikaka na Barau ġena namo e varevare-bara nuġanai ġetore-kaurito, mai ġauvei beġene veia ġana. Ġauveina tu toma beġe vaġa-koria.

<sup>27</sup> Antiokai ġeraġasito nai tu, ekalesia tarimari ġevaġa-vegogorito, benamo Barau na ġia ġerina kara eveirito dagarari mabarari, e kamasi ġia na irau bese tarimari ġeri veġabidadama ġatama bokana ekeoato variri, ġeri ekiraġito. <sup>28</sup> Monai Iesu ġekorana-iaġiato-ġoi tarimari ġesi tauri ruarua ġetanu-maukato.

## 15

*Ekalesia vegogona baregona Ierusalemaj*

<sup>1</sup> Tau kotari Iudea na Antioka ġana ġevariġoto, benamo tarikaka veġabidadama nuġanai tarimari ġevaġa-ribarito, ġekirato, “Gomi tu vevaġa-maġuri asi ilaila boġo ġabiani riba, bema mero tauġaniri kefi-lamavaġi veiġana Mose ġena taravatu ai ekiraġiani dagarana asi boġo korana-iaġiani nai.” <sup>2</sup> Mo guruġa ġaramanai, Paulo e Banabas ġia ġesi veġare-veġare baregona ġeveiato. Moġa lorinai Paulo e Banabas ema Antioka ekalesia tarimari kotari ġeviriġirito, Ierusalemaj ġana beġene varaġe, be apostolo e ekalesia ġeġori-kauato-ġoi tarimari ġeri ai mo guruġa beġenea vedanaġi-iaġia.

<sup>3</sup> Ġia tu rubu na ġetuġu-iaġorito. Ma Foenikia e Samaria tanori nuġari na ġeraka-vanaġito nai tu, monai tarikaka ġeri ġekiraġito, kamasi irau bese tarimari Barau ġenai ġevetuġamaġi-kureto. Tarikaka mabarari na mo vari ġeseġaġiato nai, mabarari ġeiakurakavato. <sup>4</sup> Ierusalemaj ġeraġasito nai, ekalesia tarimari, e apostolo tauri, ema ekalesia ġeġita-taġoato-ġoi tarimari na ġeġabi-raġerito. Benamo Barau na ġia ġerina kara eveito dagarari mabarari ġeri ġekiraġito. <sup>5</sup> Senaġi Farisea doġoro na Iesu ġeġabidadama-viniato-ġoi tarimari kotari ġeruġa-vaisito, benamo ġekirato, “Irau bese tarimari maki tauġaniri kefiriri beġene lama-vaġiri, ema boġono kirari, Mose ġena taravatu beġene korana-iaġia.”

<sup>6</sup> Benamo apostolo e ekalesia ġeġita-taġoato-ġoi tarimari ġetanu-vegogoto, ma mo vedanaġi ġetuġa-maġiato. <sup>7</sup> Ġeguruġa-iaġi maukaiato murinai, Petero evariġisito, benamo ekirato, “Tarikakagu mabarami, ġomi ma ribami, kai-veġata ġomi vefakami ai Barau na au eġabi-hidiguto, irau bese tarimari ġeri Vari Namona bana kiraġia, be ġia maki beġene seġaġi e beġene veġabidadama. <sup>8</sup> Ema tarimarima nuġari eribarini Barauna na irau bese tarimari lauka Veaġa evinirito, ġita evinirato kavana. Mo veiġa ġenana evaġa-ġitarani, ġia maki eġabi-raġerito. <sup>9</sup> Ġita e ġia fakarai vaġa-iraura vetoġana ta tu asi eveiato, korana tu ġeri veġabidadama lorinai, Barau na nuġari eiarevarito. <sup>10</sup> Ma toma tu kara dainai Barau ġotovo-naġiani, Iesu ġekorana-iaġiani tarimari iatari ai meto

gotorerini. Mo tu gita taugera na e gita senera na maki mo maruna gwaḡwana asi geilailato dagarana. <sup>11</sup> Asiḡina! Gita taribani, gita tu Iesu Vereḡauka ḡena namo e varevare-bara lorinai, Barau na evaḡa-maḡurirani, ḡia maki moḡesina.”

<sup>12</sup> Petero moḡesi ekirato nai, vegogo tarimari mabarari asi ḡeguruḡato. Benamo Banabas e Paulo ḡeseḡaḡi-vinirito, Barau ḡia ḡerina vetoḡa boruri e nuḡa-farevaḡi veiḡari, Grik tarimari fakari ai eveirito dagarari, mabarari ḡekiraḡirito.

<sup>13</sup> Gīa ḡeguruḡa-ḡosito vau, Iakobo (o Iames) eguruḡato, ekirato, “Tarikakagu mabarami, ḡoseḡaḡigu! <sup>14</sup> Simona na inivau bekiraḡi-ginikaua, kamasi tovotovonai Barau na irau bese tarimari etuḡamaḡirito, benamo ḡia fakari na bese ta eḡabi-viriḡiato, ḡia arana beḡene ḡabia ḡana. <sup>15</sup> Mai tu peroveta tarimari ḡeri guruḡa ḡesi beḡe ilaila-ginikau, korana maiḡesi ḡetoreato,

<sup>16</sup> ‘Vereḡauka ekirani:

Maiḡa murinai au ma baḡenoḡoi-iaḡomani,  
benamo Davida ḡena numa,  
eḡwa-kafuato dagarana,  
ma baraga-ḡenoḡoiani.

ḡefuki-rovorovoato dagarana,  
au na ma baraga-ḡenoḡoiani,  
ema bavaḡa-ruḡavaisi-ḡenoḡoiani.

<sup>17</sup> Korana tu tarimarima kotari maki mabarari na,  
ema au aragu ḡeḡabi-rakaoani tarimari irau bese tarimari mabarari na,  
au, Vereḡauka, beḡene vetaugu ḡana.

<sup>18</sup> Vereḡauka na maiḡeri dagara mabarari bevaḡa-ḡorarini.

Ma irau laḡani ai veḡata maiḡeri veiḡa evaḡa-foforirito.’

<sup>19</sup> Moḡa lorinai au atuḡamaḡini, irau bese tarimari ḡevetuḡamaḡi-kureni Barau ḡenai nai tu, ḡeri ai asi bitana vaḡa-gwaḡiḡia. <sup>20</sup> Senaḡi fefa ta bitana torea, bitana kirari, kwaivakuku ḡevarevare-vinirini ḡaniḡaniri tu asi beḡene ḡaniri, korana mo tu ḡofaḡofa barauri ḡevinirini dagarari; mata-boraḡa veiḡari asi beḡene veiri, ema ḡaiḡori na ḡebito-maserini bureḡari asi beḡene ḡaniri e rara asi beḡene ḡani. <sup>21</sup> Korana Mose ḡena taravatu tu kai-veḡata vanuḡa baregori mabarari ai ḡeḡobata-iaḡirini ema Sabadi ḡarori mabarari ai Iuda tarimari ḡeri rubu ai ḡeivirini.”

*Irau bese veḡabidadama tarimari ḡeri fefa*

<sup>22</sup> Benamo apostolo e ekalesia ḡeḡori-kauato-ḡoi tarimari ema ekalesia mabarari ḡeurato, ḡia fakari na tau kotari beḡene ḡabi-viriḡiri, benamo Paulo e Banabas ḡesi Antioka ḡana beḡene tuḡu-iaḡori. Gīa na Iudas, arana ta tu Barasaba ḡetato-ḡoi, e Silas ḡeḡabi-viriḡirito. Gīa tu tarikaka na ḡegubakau-baregorito-ḡoi tarimari. <sup>23</sup> Mai fefa tu ḡia ḡesi ḡetuḡu-iaḡoato:

“ḡai ḡomi tarikakami veḡabidadama nuḡanai, apostolo tarimama e ekalesia ḡeḡita-taḡoani tarimama na ḡema vevaḡa-namo ḡatuḡu-iaḡosiani, ḡomi tarikaka veḡabidadama nuḡanai irau bese tarimami, Antioka ai, Siria ai, e Kilikia ai ḡotanuni tarimami mabarami ḡemi ai. <sup>24</sup> ḡai baḡama seḡaḡi, mainana tau kotari ḡeiaḡosito, benamo ḡeri guruḡa na ḡemi tuḡamaḡi ḡevaḡa-veḡonurito e ḡevaḡa-daradaramito. Korana tu ḡekiramito, tauḡanimi kefiri boḡono lama-vaḡiri ema taravatu boḡono korana-iaḡia. Senaḡi mani tu dia ḡai ḡemana ḡeḡabito guruḡari. <sup>25</sup> Moḡa lorinai, ḡema vegogo ai ḡai mabarama na ḡavaḡa-moḡoniato, tau kotari baḡana ḡabi-hidiri, be baḡana tuḡu-iaḡosiri, ḡema tuḡamaḡikau tarimari Banabas e Paulo ḡesi beḡene iaḡosi. <sup>26</sup> Gīa tu ḡeri maḡuri gwairi asi ḡeḡabirito, ḡetore-taririto, ḡera Vereḡauka Iesu Keriso arana dainai. <sup>27</sup> Moḡa lorinai, Iudas e Silas baḡa tuḡuri, kara baḡa toreri dagarari ḡia tauḡeri mururi na guruḡai ḡomi ḡemi ai beḡene vaḡa-moḡoniri ḡana. <sup>28</sup> Iauka Veavaḡa e ḡai ḡakirato, namona tu ḡomi iatami ai meto ta asi baḡana tore-kaua. <sup>29</sup> Gīa fefa barauri o kwaivakuku



ġevinirini ġaniġaniri asi boġono ġani; rara asi boġono ġani; ġaiġori na ġebito-maserini bureġari asi boġono ġaniri; e mata-boraġa veiġari asi boġono veiri. Mo dagara ġerina boġo raka-veġitani nai, ġomi tu boġo iaġo-ginikauni. Boġono gena.”

<sup>30</sup> Ġeviriġirito tarimari ġetuġurito, benamo Antioka ġana ġevariġoto. Monai veġabidadama tarimari mabarari ġevaġa-vegogorito vau, ġeri fefa ġevinirito. <sup>31</sup> Ġia na mo fefa ġeiaviato nai, ġeikaku-rakavato, korana vevaġa-kava guruġana ġeseġaġiato nai. <sup>32</sup> Iudas e Silas, ġia tauġeri tu peroveta tarimari. Ġia tauri ruarua na tarikaka ġeri guruġa ġutuma ġekiraġirito, ġelaunaġirito e ġevaġa-gwaġiġirito. <sup>33</sup> Ġaro kotari monai ġetanuto murinai, ma mainori ġesi tarikaka na ġetuġu-ġenoġoirito, ġetuġurito tarimari ġeri ai. [<sup>34</sup> Senaġi Silas tu eurato Antiokai roġo bene tanu.] <sup>35</sup> Paulo e Banabas tu Antiokai ġetanu-maukato, ma tarima ġutuma ġesi Vereġauka ġena guruġa ġevevaġa-riba iaġiato-ġoi, e ġeġobata-iaġiato-ġoi.

#### *Paulo e Banabas ġeveraga-kwaneto*

<sup>36</sup> Ġaro kotari ġevanaġito murinai, Paulo na Banabas evaġa-guruġaiato, ekirato, “Taura ruarua ma siġenoġoi-iaġo, Vereġauka ġena guruġa taġobata-iaġiato-ġoi vanuġari mabarari ġari, tarikakara bitana ġitari, ġeri veġabidadama maġurina tu aiġesina.” <sup>37</sup> Banabas ġena ura tu Ioane Mareko maki neġori-kaua, be ġia ġesi beġene iaġo. <sup>38</sup> Senaġi Paulo asi ġena ura ġia beġene ġori-kaua, korana ġia na Pamfilia ai tu eraga-kwanerito, ema ġia ġesi asi ġeġauveito mo ġeri ġauvei magona. <sup>39</sup> Moġa ġaramanai ġia tauri ruarua veġareveġare baregona ġeveiato. Benamo tauri ruarua ġeveraga-kwaneto. Banabas na Mareko eġoriatto, bouti ai ġeraġeto, benamo Saipras ġana ġeiaġoto. <sup>40</sup> A Paulo na tu Silas eġabi-viriġiato. Tarikaka na Vereġauka ġena varevare-bara vevaġa-namona ġevinirito murinai ġerakato. <sup>41</sup> Siria e Kilikia tanori na ġeraka-vanaġito, benamo ekalesia doġorori monai ġevaġa-gwaġiġirito-ġoi.

## 16

#### *Timoteo tu Paulo e Silas ġesi ġeiaġoto*

<sup>1</sup> Paulo monana evanaġi-iaġoto Derebe ai ea votuto, ma monana tu eiaġoto Listera ai ea raġasito. Listerai tu Iesu ekorana-iaġiato-ġoi tarimana ta etanuto-ġoi, arana tu Timoteo. Timoteo sinana tu Iuda vavinena, ġia maki eveġabi-dadamato-ġoi vavinena, senaġi tamana tu Grik tarimana. <sup>2</sup> Tarikaka mabarari Listerai e Ikonai na Timoteo tu tarima namonai ġekiraġiato-ġoi. <sup>3</sup> Paulo eurato Timoteo tu bene ġori-kaua, be ġia ġesi beġene iaġo, moġa lorinai, ġia tauġanina kefina elama-vaġiato. Moġesi ġeveiato, korana monai ġetanuto-ġoi Iuda tarimari mabarari ribari, Timoteo tamana tu Grik tarimana.

<sup>4</sup> Vanuġa loriri na ġevanaġi-iaġoto-ġoi nai tu, Ierusalem ai ġetanuni apostolori e ekalesia ġorikauri tarimari na ġevaġa-moġonirito guruġari veġabidadama tarimari ġeri ġekiraġito-ġoi, ġia na beġene korana-iaġiri ġana. <sup>5</sup> Benamo ekalesia tarimari ġeri veġabidadama ġevaġa-kokorerito, e ġaro mabarari ai ekalesia ġeġutumato-ġoi.

#### *Troas ai - Paulo ġena mata-vanaġi*

<sup>6</sup> Paulo ma karona ġesi Frigia e Galatia tanori nuġari na ġeraka-vanaġito moġo, korana Iauka Veaġa na ekira-ġoirito, Asia tanori ai Barau ġena guruġa asi beġene vari-fiua. <sup>7</sup> Misia tano vetoġanai ġeraġasito, benamo Bitinia tanonai ġeraka-toġa ġetato, senaġi Iesu Iaukana asi eurato ġia mo ġana beġene iaġo. <sup>8</sup> Moġa lorinai Misia na ġevanaġito, Troas vanuġanai ġea votuto. <sup>9</sup> Mo boġi Paulo emata-vanaġito. Ġia na Makedonia tarimana ta ruġataġo eġitaiato, ġia enoġiato-ġoi, ekirato, “Makedonia ġana noiaġoma, noma vaġa-kavama.” <sup>10</sup> Paulo na mo mata-vanaġi eġitaiato murinai, ġaraga-ġabikavito, Makedonia ġana baġana iaġo ġana. Korana ġaribato, mo tu Barau na ekeamato, mo tarimarima ġeri ai Vari Namona baġana fiua ġana.

#### *Filipi ai - Lidia ġena vetuġamaġi-kure*

<sup>11</sup> Moġa lorinai Troas ai bouti ai ġaraġeto, benamo maoromaoro Samotrake motumotu ġana ġaiaġoto. Monai ġagenato, elaġanito vau Neapoli ġana ġaiaġoto. <sup>12</sup> Monana ġunika ġana ġaiaġoto mo, Filipi ai ġaraġasito. Filipi tu Makedonia tanonai vanuġa baregona eruġa-guinetu vanuġana, e Roma ġeri gabu. Monai ġaro kotari ġatanuto. <sup>13</sup> Sabadi ai, vanuġa maġuna ġatama bokana na ġaraka-rosito, ġaruka rekena ġana ġaiaġoto, ġai ġatuġamaġito, Iuda tarimari ġeri ġauġau gabuna ta tu monai. Ġai ġatanutarito, benamo mo ġaruka rikinai ġevegogoto vavineri ġavaġa-guruġarito. <sup>14</sup> Monai eseġaġimato-ġoi vavinena ta arana Lidia, Taiatira vavinena. Ġia tu voiri barego dabuġari evoivoi-iaġirito-ġoi. Ġia tu Barau etoma-rakariġo viniato-ġoi vavinena. Ġia Vereġauka na nuġana ekeoato, benamo Paulo na kara ekiraġiato-ġoi eseġaġiato ma eġabi-raġeato. <sup>15</sup> Ġia ma ġena numa tarimari ġesi babatiso ġeġabiato murinai, ġia na enoġimato, ekirato, “Bema ġovetuġamaġini au tu Vereġauka ġenai moġoni aveġabidadamani nai tu, si-iaġo, be au ġegu numai bitana tanu.” Benamo ġia na nuġama eġanirito, benamo ġia ġesi ġaiaġoto.

### *Filipi dibura numanai*

<sup>16</sup> Ġaro ta ġauġau gabuna ġana ġaiaġoto-ġoi nuġanai, vetuġunaġi ġuiatona ta na edoġarimato. Ġia tu iauka rakavana ta na eboroġiato, ma ġoirai kara beġe ġorani dagarari ekiraġi-foforirito-ġoi. Ġoirai beġe ġorani dagarari ekiraġi-foforirito-ġoi nai tu, ġitaġauna tarimari ġeri moni ġutuma evaġa-ġorarito-ġoi. <sup>17</sup> Mo ġuiato na Paulo e ġai mabarama murima na eiaġomato, ekoġoto-ġoi, maiġesi ekirato-ġoi, “Maiġeri tarima tu Iaru-korokoro Barauna ġena vetuġunaġi tarimari! Vevaġa-maġuri kamasi boġo ġabiani dabarana varina ġefiuani.” <sup>18</sup> Ġaro vovoka moġesi eveito-ġoi, eiaġoto mo, Paulo ebaruto, benamo eruġa-kureto, mo iauka rakavana ekiraiato, ekirato, “Iesu Keriso aranai au na akiramuni, mani kekeni ġenana noraka-vaġi!” Benamo mo horai moġo iauka rakavana mo ġuiato ġenana eraka-vaġito.

<sup>19</sup> Mo ġuiato ġitaġauna tarimari ġeribato, ġia ġeri moni doġari dabarana ekorito, benamo ġia na Paulo e Silas ġeġabi-taririto, taravatu tauri ġeri ai maketi gabuna ġana ġeinu-iaġorito. <sup>20</sup> Kota ġeseġaġini tarimari ġoirari ai ġevaġa-ruġarito vau ġekirato, “Mai tu Iuda tarimari. Ġia na ġita ġera vanuġa baregonai rakava ġevaġa-ġoraiani. <sup>21</sup> Ema ġia na ġevevaġa-riba iaġirini veiġari ġita ġera taravatu na tu asi eġabi-raġerini. Ġita tu Roma tarimara, ġia ġeri veiġa tu asi bita ġabi-raġerini e asi bita veirini riba.”

<sup>22</sup> Tarimarima ġutuma-bara ġia ġesi ġekauto, Paulo e Silas ġeguru-vinirito. Benamo Kota ġeseġaġini tarimari na Paulo e Silas ġeri dabuġa ġedarerito, benamo mo ġutuma-bara ġekirarito, beġene kwariri. <sup>23</sup> Ġekwari-biruġa biruġarito murinai, dibura numai ġefiu-toġarito, ema dibura numa ġitaġauna tarimana ġekiraiato, bene ġitaġau-ginikaui. <sup>24</sup> Ġia na mo vevaġa-naġi guruġana eseġaġiato, benamo dibura numana nuġana buroburonai efu-toġarito. Kwakuri tu ġau duduri baregori ma metori vekaravari ai ebaru-taririto.

<sup>25</sup> Boġi nuġanai Paulo e Silas tu ġeġuriġurito-ġoi e Barau vaġa-raġena mariri ġeġabirito-ġoi, ma dibura numa tarimari kotari na tu ġeseġaġi-taġorito-ġoi. <sup>26</sup> Asikauna tano-iaga baregona eraġasito, dibura numana korana duġuri maki eġareva-ġareva vinubato. Vaġa-sebo ġatama-boka mabarari ġevekeoto, e dibura tarimari ġebarurito seiniri mabarari ġeketoketo-vaġito. <sup>27</sup> Dibura numana ġitaġauna tarimana etataġato, mo ġatama-boka mabarari eġitarito tu vekeo. Ġena tuġamaġi dibura tarimari mabarari tu ġeraga-lemato etato, benamo ġena vetari baġana einu-vaġiato, ma tauġena nevevaġi-mase etato. <sup>28</sup> Senaġi Paulo na eġaba-viniato, ekirato, “Tauġemu asi novevaġa-rakava! Ġai mabarama tu maiġema!” <sup>29</sup> Dibura numa ġitaġauna tarimana kere keari eveito, eraga-toġato, benamo ma ġoġo-ġoġona ġesi Paulo e Silas kwakuri korari ai ea keto-tarito. <sup>30</sup> Benamo monana eġori-rosirito ma edanaġirito, ekirato, “Vere tarimami, au tu kamasi baveini vau maġuri badoġariani?”

<sup>31</sup> Ĝia na ĝevaĝa-veseato, ĝekirato, “Iesu Vereĝauka bono ĝabidadama-vinia, benamo maĝuri boĝabiani, ĝoi e ĝemu numa tarimari mabarari.” <sup>32</sup> Benamo ĝia na Vereĝauka ĝena guruĝa, ĝia ma ĝena numa tarimari mabarari ĝesi, ĝeri ĝekiraĝito. <sup>33</sup> Mo boĝi horanai moĝo, dibura numa ĝitaĝauna tarimana na tauri ruarua eĝori-iaĝorito, manuĝari ea ĝuriĝirito, ema ĝia ma ĝena numa tarimari mabarari ĝesi mo boĝi sebonai ĝebabatorito. <sup>34</sup> Moĝa murinai ĝia na Paulo e Silas ĝena numa nuĝanai eĝori-toĝarito, benamo ĝaniĝani evinirito, ĝeĝanito. Ma ĝia ma ĝena numa tarimari ĝesi tu iaku na ĝevonuto, korana ĝia toma tu Barau ĝenai ĝeveĝabidadamani.

<sup>35</sup> Boĝiboĝi, Kota ĝeseĝaĝini tarimari na vetuĝunaĝi-iaĝovini tarimari ĝetuĝurito, ĝekirato, “Mani dibura numai tarimari ruarua ĝoa tuĝu-vaĝiri.” <sup>36</sup> Benamo dibura numa ĝitaĝauna tauna na Paulo ekira-varaiato, ekirato, “Kota ĝeseĝaĝini tarimari na guruĝa beĝe tuĝua, ĝoi e Silas tu baĝana tuĝu-rosimi beĝesi. Moĝa lorinai ĝoraka-rosi ma mainomi ĝesi.” <sup>37</sup> Senaĝi Paulo na vetuĝunaĝi-iaĝovini tarimari ekirarito, ekirato, “Ĝai tu Roma tarimama, senaĝi ĝia na tarimarima ĝutuma-bara ĝoirari ai ĝai ĝekwari-kavamato moĝo, a ĝema rakava tu asi ĝevetauto, senaĝi dibura numai ĝefiu-toĝamato. Ma inıtoma tu vekuretoĝai ma ĝetuĝu-rosima ĝetoni? Asiĝina ĝinavaĝi! Ĝia tauĝeri maiĝana beĝene iaĝoma, benamo ĝai beĝenema ĝori-rosima.”

<sup>38</sup> Benamo vetuĝunaĝi-iaĝovini tarimari na mo guruĝa Kota ĝeseĝaĝini tarimari ĝekira-vararito. Ĝia ĝeseĝaĝito Paulo e Silas tu Roma tarimari ai ĝeiaĝoto nai tu ĝegarito. <sup>39</sup> Benamo ĝeiaĝoto, Paulo e Silas ĝenoĝirito, ĝeri rakava beĝene tuĝamaĝi-fitoĝari. Benamo ĝia tauri ruarua dibura numa na ĝetuĝu-rosirito, e ĝenoĝirito, mo vanuĝa barana beĝene raga-kwanea. <sup>40</sup> Paulo e Silas na dibura numana ĝeraga-kwaneato, Lidia ĝena numa ĝana ĝeiaĝoto. Monai tarikaka ĝesi ĝevedoĝarito, benamo vevaĝa-gwaĝiĝi guruĝari na ĝevaĝa-kokorerito, benamo ĝerakato.

## 17

### *Tesalonika ai*

<sup>1</sup> Paulo e Silas na Amfipoli e Apolonia ĝeraka-vanaĝiato, ĝeiaĝoto mo Tesalonikai ĝeraĝasito. Iuda tarimari ĝeri rubu ta tu monai. <sup>2</sup> Paulo tu eveito-ĝoi kavana rubu ai eraka-toĝato. Ema Sabadi ĝarori toitoi nuĝari ai, ĝia tu tarimarima ĝesi Buka Veaĝa guruĝari ĝeguruĝa-guruĝa-iaĝirito. <sup>3</sup> Ĝia ĝeri ekiraĝi-ginikauto-ĝoi, e evaĝa-moĝoniato-ĝoi, Keriso tu bemidigu-midiguni e mase na ma bevariĝisi-ĝenoĝoini. Ema ekirato, “Mai Iesu, varina ĝomi ĝemi afiuani tarimana, tu Keriso, (Barau na ekiraĝi-toreato vevaĝa-maĝuri tauna).” <sup>4</sup> Iuda tarimari kotari na mo guruĝa ĝevaĝa-moĝoniato, benamo Paulo e Silas ĝesi ĝesebonato. Ema Barau ĝetoma-rakariĝo viniato-ĝoi Grik tarimari ĝutuma lelevaĝi e vanuĝai ĝeri dagi barego vavineri ĝutuma maki ĝia ĝesi ĝesebonato.

<sup>5</sup> Senaĝi Iuda tarimari tu ĝemamato, benamo voivoi gabunai seĝafore lelevaĝi tarimari kotari ĝeĝabi-vegogorito, seĝafore doĝorona ta ĝesinaıato. Benamo ĝia na gururaĝe e vevaĝi baregona vanuĝa barana nuĝanai ĝeveıato. Ma Iason ĝena numa ĝeraĝeato, Paulo e Silas beĝene doĝariri, be tarimarima ĝoirari ai beĝene ĝori-rosiri ĝana. <sup>6</sup> Senaĝi asi ĝedoĝaririto, benamo Iason e tarikaka kotari ĝeinu-iaĝorito, vanuĝa ĝitaĝauna tauri ĝoirari ĝana, ma koĝori ĝesi ĝekirato, “Tanobara mabarari ai mai tarima na rakava ĝevaĝa-ĝoraiani, ma toma tu mai ĝana beĝe iaĝoma, <sup>7</sup> benamo Iason na ĝena numai eĝita-ĝaurini. Ĝia na Kaisara ĝena taravatu ĝekiraĝi-fitoĝaiani, korana tu ĝekirani, vere barana ta ma ĝetoni. Ĝekirani, mo vere arana tu Iesu.” <sup>8</sup> Vanuĝa tarimari e ĝitataĝona tarimari na mo guruĝa ĝeseĝaĝiato nai, ĝeri daradara ebaregote. <sup>9</sup> Benamo ĝia na Iason ma karona ĝesi ĝevaĝa-fainirito moĝo, benamo ĝetuĝu-rakarito.

### *Berea ai*

<sup>10</sup> Eboĝito nai tu asikauna tarikaka na Paulo e Silas Berea ĝana ĝeraga-tuĝu-rakarito. Bereai ĝea raĝasito nai tu ĝeiaĝoto, Iuda tarimari ĝeri rubu ĝana. <sup>11</sup> Bereai tarimarima tu

tarima namori, dia Tesalonika tarimari kavari. Ġia na Barau ġena guruġa ġeseġaġiato-ġoi nai, ġeura-iaġi baregoato-ġoi. Ema ġaro mabarari ai Buka Veaġa nuġanai kara Paulo na ekiraġiato-ġoi ġevetauato-ġoi. Korana tu ġeurato-ġoi beġene riba, Paulo na kara ekiraġiato-ġoi guruġari tu moġoni ba, beġene vaġa-moġoniri ġana. <sup>12</sup> Iuda tarimari ġutuma Iesu Keriso ġevaġa-moġoniato; ema Grik vavineri barego-baregori kotari na e Grik tauri ġutuma maki Iesu Keriso ġevaġa-moġoniato.

<sup>13</sup> Senaġi Iuda tarimari Tesalonikai ġeseġaġito, Paulo tu Bereai Barau ġena guruġa eġobata-iaġiato-ġoi. Benamo ġeiaġoto, vanuġa tarimari nuġari ġea ġanirito e ġekira-vaisi vaisirito. <sup>14</sup> Benamo Paulo tu asikauna tarikaka na kone ġana ġetuġu-rakaiato; a Silas ema Timoteo tu Bereai ġetanuto. <sup>15</sup> Paulo ġekava-iaġoato tauri na ġeġori-iaġoato mo Atena. Monana ma ġeġenoġoito Berea ġana. Ġia ġeġenoġoito nai tu, Paulo ġena keakau guruġana ta maki ġeġwaiato, ekirato, Silas e Timoteo ġia ġenai beġene iaġo-ġarimoġi etato.

#### *Atena ai*

<sup>16</sup> Atenai, Paulo na Silas e Timoteo evaġa-nogarito-ġoi nuġanai, mo vanuġa baregona eġitaiato tu kwaivakuku na ġevaġa-vonuato. Benamo ġia nuġana emeto-rakavato. <sup>17</sup> Moġa lorinai eiaġoto Iuda tarimari ġeri rubu ġana, Iuda tarimari e irau bese tarimari Barau ġetoma-rakariġo viniato-ġoi tarimari ġesi ġeguruġa-guruġato. Ema ġaro mabarari ai maketi ai ġeraka-refoto-ġoi tarimari evaġa-guruġarito-ġoi. <sup>18</sup> Vevaġa-riba tauri irauri, ġeri orea ġekiraġirito-ġoi tu Epikurea ema Stoiki, na Paulo ġeġoitaġoato, benamo ġevaġa-veġare veġareato. Ġia kotari ġevedanaġito, ġekirato, “Mai muru-babo tu kara ekiraġiani?” Ma kotari ġevaġa-veseto, ġekirato, “Ġia mai tu noġa moġo barau irauri ekiraġirini.” Ġia moġesi ġekirato, korana Paulo tu Iesu e ġena variġisi-ġenoġoi varina eġobata-iaġiato-ġoi. <sup>19</sup> Benamo ġia na Paulo ġeġabiato, Areopago ġorona ġana ġeġori-iaġoato, kanisoro ġevegogoto-ġoi gabuna ġana. Benamo monai ġekiraġiato, ġekirato, “Ġai ġaurani tu ġariba, mai vevaġa-riba variġuna oveiani tu kara okiraġiani? <sup>20</sup> Ġoi na guruġa tari okiraġirini tu ġai na asi ġaseġaġirini dagarari, naima ġai ġaurani tu aniri baġana ribari.” <sup>21</sup> Korana Atena tarimari mabarari e irau gabu tarimari monai ġetanuni tu, ġauvei ta asi ġeveiato-ġoi, senaġi ġia ġeri veiġa sebona tu ġaro mabarari ai mo guruġa variġuri moġo ġekiraġi-taġorito-ġoi e ġeseġaġi-taġorito-ġoi.

<sup>22</sup> Benamo Paulo tu Areopago vegogona nuġana na eruġa-vaisito, benamo ekirato, “Atena tarimami! Au na ġomi aġitamini, ġomi tu ġemi barau ġeri ai ġovetuġamaġikau-barego korikorini. <sup>23</sup> Korana ġemi vanuġai arakaorakaoni e ġemi toma-rakariġo gaburi aġitarito nai tu, au na fata veaġana ta aġitaiato, iatanai tu mai guruġa ġetoreato, ‘ASI RIBAMA BARAUNA ĠENA.’ Moġa lorinai mo asi ribami Barauna, ġomi na ġotoma-rakariġo viniani tu, toma au na akira-varamini.

<sup>24</sup> Tanobara e tanobara nuġanai ġetanuni dagarari mabarari eveirito Barauna tu guba e tanobara verena. Ġia tu tarimarima ġimari na ġeragarito rubu veaġari ai tu asi etanuni. <sup>25</sup> Ġia tu dagara tai asi erabuto, be tarimarima ġimari na ġia ġena tu asi beġe veiani riba. Ġia tauġena na tarimarima mabarari maġuri evinirini, iaġari ema dagara mabarari evinirini. <sup>26</sup> Tarima sebona ġenana ġia na tarimarima beseri mabarari evaġa-ġorarito, ema tanobara mabarana beġene tanu-iaġia etato. Ġia tauġena na ġeri maġuri laġaniri ema ġeri tanu gaburi korikori eboioġa-guinerito. <sup>27</sup> Barau na moġesi eveiato, korana ġia beġene ġita-vetaua ġana; ema beġene vetau-kokore kokorea, benamo beġene doġaria. Oba, Barau e ġita tata vefakara tu asi manaġa. <sup>28</sup> ‘Korana ġita tu, ġia koranai tamaġurini, taġareva-ġarevani e roġo tamaġuri-taġoni.’ Ġemi mari ġegarani e ġesisiba-iaġirini tauri na ġekiraġiato kavana, ġekirato, ‘Ġita maki ġia natuna.’

<sup>29</sup> Ġita tu Barau natuna lorinai, asi bitana tuġamaġi, Barau tu golo, silva, o fore, tarimarima ġena boioġai ema ribai ekororito dagarari kavana. <sup>30</sup> Guinenai tarimarima tu asi ġeri ribamaoro nai, Barau na moġeri tu eġita-ragakwanerito. Senaġi toma tu, ġia na tarimarima mabarari gabu mabarari ai ekirarini, beġene vetuġamaġi-kure. <sup>31</sup> Korana

ġia na ġaro ta ekiraġi-toreato, mo ġaro ai ġena ġabiviriġi tarimana na tanobarai vevaġa-maoro beveiani ma iobukaiobukana ġesi. Barau na mo tau evaġa-moġoniato tarimarima mabarari ġoirari ai, vetoġana tu mase na evaġa-variġisi ġenoġoiato.”

<sup>32</sup> Mase na variġisi-ġenoġoina guruġana ġeseġaġito nai, kotari na tu Paulo ġerikiriki-iaġiato. Ma kotari tu ġekirato, “Ġai ġaurani tu, mo vari ġema ma nokiraġi-ġenoġoia.”

<sup>33</sup> Benamo Paulo na mo vegogo eraga-kwaneato. <sup>34</sup> Senaġi tau lakouna tu ġia ġesi ġerakakauto e Barau ġenai ġeveġabidadamoto. Ġia fakari ai tu Dionisio, ġia tu Areopago ġoro ai ġevegogoto-ġoi tarimana ta, e vavine ta arana Damari, ema tarima kotari maki.

## 18

### *Korinto ai*

<sup>1</sup> Moġa murinai Paulo na Atena eraga-kwaneato, Korinto ġana eiaġoto. <sup>2</sup> Monai ġia na Iuda tarimana arana Akwila eġoitaġoato. Akwila tu Ponto ai emaġurito. Ġia tu ġaraġona Priskila ġesi Itali na vau ġeraġasito. Ġia Itali na ġeiaġomato, korana tu Klaudio na Iuda tarimari mabarari ekirarito, Roma beġene raga-kwanea. Paulo eiaġoto ġia ġeri ai, ea ġitarito. <sup>3</sup> Ġia maki Akwila ma ġaraġona ġesi kavana farai numari eturito-ġoi. Moġa lorinai Paulo monai tu ġia tauri ruarua ġesi etanuto-ġoi ema ġeġauvei-vegogoto-ġoi. <sup>4</sup> Sabadi mabarari ai tu Iuda tarimari ġeri rubu ai eġobatato-ġoi, Iuda e Grik tarimari nuġari neġabiri uranai.

### *Silas e Timoteo ġeraġasito*

<sup>5</sup> Silas e Timoteo Makedonia na ġeraġasito nai, Paulo tu Barau ġena guruġa eġobata-iaġiato-ġoi ġaro mabaranai, Iuda tarimari ġeri ai ekiraġi-foforiato-ġoi, Iesu tu moġoni Keriso, (Barau na ekiraġi-toreato vevaġa-maġuri tauna). <sup>6</sup> Senaġi Iuda tarimari na Paulo ġena guruġa ġevaġa-ġenoġoiato, e guruġa asi namori ġenai ġekira-veġare veġareato nai, Paulo na ġena dabuġa ekorakoraġato ġia ġoirari ai vauro evaġa-guruġa gwaġiġi-vinirito, ekirato, “Ġomi rarami verebana tu tauġemi iatami ai! Au ġegu ai vereba ta asiġina. Toma au tu aiaġoni irau bese tarimari ġeri ai.”

<sup>7</sup> Benamo mo rubu na eraka-rosito, eiaġoto, irau bese tarimana arana Titio Iusto ġena numa ġana. Titio tu Barau etoma-rakariġo viniato-ġoi tarimana, ma ġena numa tu rubu sebinai moġo. <sup>8</sup> Krispo, rubu ġorikauna tarimana e ġena numa tarimari mabarari ġesi tu Vereġauka ġeġabidadama-viniato-ġoi. Ema Korinto tarimari ġutuma na maki vari ġeseġaġiato, benamo ġevaġa-moġoniato ema babatiso ġeġabito.

<sup>9</sup> Boġi tai Vereġauka na Paulo mata-vanaġi ai evaġa-guruġaġiato, ekirato, “Asi bono gari, murumu asi bene kafu, bono guruġa! <sup>10</sup> Korana au tu ġoi ġesi bene; ta na asi beiaġo-vinimuni e asi bevaġa-rakavamuni riba, korana au ġegu tarimarima tu ġutuma mai vanuġa baregonai.” <sup>11</sup> Moġa lorinai Paulo monai etanuto laġani ta e ġue imaima sebona (6); Barau ġena guruġa tarimarima evaġa-riba iaġirito-ġoi.

<sup>12</sup> Galio tu Akaia tanona ġeri gavana ġauveina eveito-ġoi nuġanai, Iuda tarimari ġeġaru-vegogoto, Paulo ġeġabi-tariato, Kota gabuna ġana ġeġori-iaġoato. <sup>13</sup> Ġekirato, “Mai tarima na tarimarima nuġari eġanirini, ma taravatu na asi ekiraġiani maġurinai Barau beġene toma-rakariġo vinya etoni.” <sup>14</sup> Paulo neguruġa etato nuġanai, Galio na Iuda tarimari ekirarito, ekirato, “Ġomi Iuda tarimami, bema veiġa rakavana tai o kerere baregona tai boġoro samani nai tu, bara seġaġi-vinimi riba. <sup>15</sup> Senaġi mani veġareveġare tu vevaġa-riba, e ara, ema tauġemi ġemi taravatu veġareveġarereri, naima tauġemi na boġono vei-roroġotori. Au na maniġesina daġarari Kotai tu asi baseġaġirini!” <sup>16</sup> Benamo ġia na Kota gabuna na elai-rosirito. <sup>17</sup> Ġia mabarari na rubu ġorikauna tarimana, Sostene, ġeġabi-tariato, Kota gabuna ġoiranai benamo ġekwari-korukoruato. Ma Galio tu eġitarito senaġi eboġe-ġuiraġito moġo.

### *Paulo Antioka ġana eġenoġoito*

<sup>18</sup> Paulo Korinto ai tarikaka veḡabidadama nuḡanai tarimari ḡesi tu ḡaro kota vovoka roḡo ma ḡetanuto. Moḡa murinai eraga-kwanerito, benamo Priskila e Akwila ḡesi bouti ta Siria ḡana ḡeiaḡoto. Kenkrea na roḡosi beḡere raka nuḡanai, ḡia tu debana ḡeraroato, korana ḡena kiraḡitore gwaḡiḡina ta Barau ḡenai eveiato nai. <sup>19</sup> Efeso ai ḡeraḡasito, benamo Paulo na Priskila e Akwila monai eraga-kwanerito. ḡia tu Iuda tarimari ḡeri rubu ai eraka-toḡato benamo Iuda tarimari ḡesi ḡea guruḡa-guruḡato. <sup>20</sup> ḡia na ḡenoḡiato, monai Iuda tarimari ḡesi roḡo bene tanu, senaḡi ḡeri noḡinoḡi asi eḡabi-raḡeato. <sup>21</sup> Senaḡi ḡena rakai tu iniḡesi evaḡa-guruḡarito, ekirato, “Bema Barau beurani nai, ḡomi ḡemi ai ma baḡenoḡoi-iaḡomani.” Benamo bouti ai ea raḡekauto, ma Efeso eraga-kwaneato.

<sup>22</sup> Kaisareai eraḡasito nai, kwakuna na Ierusalem a ḡana evaraḡeto, ekalesia ḡesi ḡea veḡoitaḡoto vauro, Antioka ḡana evariḡo-iaḡoto. <sup>23</sup> ḡaro kotari monai etanuto murinai, Galatia e Frigia tanori ḡana eiaḡoto, Iesu ḡekorana-iaḡiato-ḡoi tarimari mabarari gabu tatai ḡetanuto-ḡoi tarimari ea vaḡa-kokorerito.

<sup>24</sup> Mo horai Iuda tarimana ta arana Apolos, Alesandria ai emaḡurito tarimana, Efeso ḡana eiaḡoto. ḡia ḡena riba tu varaḡe lelevaḡi, guruḡai namo vedaurea e Buka Veaḡa maki eriba-ginikau-raḡeato. <sup>25</sup> ḡia tu Vereḡauka ḡena dabara ḡevaḡa-ribaiato, benamo nuḡana mabarana ḡesi Iesu varina efiuato, e evaḡa-riba-iaḡi ginikauato. Dagara sebona, ḡia tu Ioane ḡena babatise moḡo eribaiato. <sup>26</sup> Rubu nuḡanai eḡobatato-ḡoi ma kokorena ḡesi. Monai Priskila e Akwila na ḡeseḡaḡiato, benamo ḡeḡori-kauato, ḡia ḡetanuni numana ḡana ḡeḡori-iaḡoato, monai vauro Barau ḡena dabara moḡonina ḡevaḡa-riba ginikauato. <sup>27</sup> Benamo Apolos eurato, Akaia ḡana bene iaḡo. Moḡa lorinai tarikaka Efeso ai ḡetanuni na ḡevaḡa-kavaiato, e fefa ta ḡetoreato Akaiai Iesu ḡekorana-iaḡiato-ḡoi tarimari ḡeri, ḡenoḡirito, Apolos eiaḡoni nai beḡene ḡabi-raḡea. Apolos ea raḡasito nai tu, Barau ḡena varevare-bara ḡenana Barau ḡevaḡa-moḡoniato tarimari tu vevaḡa-kava barego Apolos ḡenana ḡedoḡariato. <sup>28</sup> Korana ḡena guruḡa kokoreri ḡerina Iuda tarimari evaḡa-ketorito tarimarima ḡutuma ḡoirari ai, Apolos na Buka Veaḡa na ḡeri evaḡa-moḡoniato-ḡoi Iesu tu Keriso, (Barau na ekiraḡi-toreato vevaḡa-maḡuri tauna).

## 19

### *Paulo Efeso ai*

<sup>1</sup> Apolos tu Korinto ai etanuto-ḡoi nai, Paulo gunika rekena na eiaḡoto mo Efeso ai ea raḡasito. Monai Iesu ḡekorana-iaḡiato-ḡoi tarimari tari edoḡaririto, <sup>2</sup> benamo edanaḡirito, ekirato, “Iesu ḡenai ḡoveḡabidadamato nai, Iauka Veaḡa ḡoḡabiato ba?” ḡia ḡevaḡa-veseto, ḡekirato, “Asiḡina, ḡai tu Iauka Veaḡa maki etanuni guruḡana ta tu roḡosi maki baḡana seḡaḡia.” <sup>3</sup> Benamo Paulo na ma edanaḡirito, ekirato, “Be ḡomi na tu kamara babatise ḡoḡabiato?” ḡia ḡevaḡa-veseto, ḡekirato, “Ioane ḡena babatise.”

<sup>4</sup> Benamo Paulo ekirato, “Ioane tu rakava ḡerina ḡevetuḡamaḡi-kureto tarimari ebabatorito, ema Isaraela tarimari ekirarito, ḡia murina na beiaḡomani tarimana beḡene ḡabidadama-vinia, mo tu Iesu.” <sup>5</sup> Mo guruḡa ḡeseḡaiato nai, Vereḡauka Iesu aranai babatise ḡeḡabiato. <sup>6</sup> Paulo ḡimana ḡia iatari ai etore-kaurito nai tu, Iauka Veaḡa emariḡoto ḡia iatari ai. Benamo garo irauirau ai ḡeguruḡato, e Barau na ḡia ḡeri ai evaḡa-foforirito guruḡari ḡevari-fiurito. <sup>7</sup> Tauri mabarari tu gabanana ruarua (12) kavana.

<sup>8</sup> Paulo monai ḡue toitoi etanuto. Ma vanaḡivanaḡi rubu ai eraka-toḡato-ḡoi, Barau ḡena Basileia, (ḡena veḡitaḡau seḡukana evaḡa-ruḡaiani maiḡa), eḡobata-iaḡiato-ḡoi ma kokorena ḡesi, ema tarimarima ḡesi ḡeguruḡa-iaḡiato-ḡoi e nuḡari eḡanirito-ḡoi. <sup>9</sup> Senaḡi tari nuḡari tu bubu, be asi ḡeseḡaḡi-viniato, ema tarimarima ḡutuma ḡoirari ai Vereḡauka ḡena dabara iatanai guruḡa tu rakavari ḡekiraḡito. Moḡa lorinai Paulo na eraga-kwanerito, Iesu ḡekorana-iaḡiato-ḡoi tarimari moḡo eḡori-kaurito, benamo ḡaro mabarari ai Tirano ḡena vevaḡa-riba numanai evaḡa-ribarito-ḡoi. <sup>10</sup> Laḡani ruarua

moġesina eveito, moġesina naima Asia tanonai ġetanuto-ġoi Iuda tarimari e Grik tarimari mabarari na Barau ġena guruġa ġeseġaġiato.

#### *Skeva natuna*

<sup>11</sup> Barau na Paulo ġenana veiġa boruri irauri eveirito. <sup>12</sup> Ġia na eġauvei-iaġirito-ġoi mukori e eriġorito-ġoi dabuġari keve tarimari ġeri ai ġeġabi-iaġorito-ġoi nai tu, ġeri keve ġenamoto-ġoi, e iauka rakavari ġia ġerina ġeraka-vaġito-ġoi.

<sup>13</sup> Iuda tarimari kotari monai ġerakaoto-ġoi ma iauka rakavari ġelai-vaġirito-ġoi tauri na maki Vereġauka Iesu arana ġevatoato iauka rakavari na ġeboroġirito tarimari iatari ai. Iauka rakavari ġekirarito, ġekirato-ġoi, “Paulo na eġobata-iaġiani tarimana Iesu aranai akiramini, ġoraka-vaġi.” <sup>14</sup> Skeva, Iuda ġeri Rubu Veaġa verena baregona ta, natuna merori imaima ruarua (7) tu moġesina ġeveito-ġoi. <sup>15</sup> Benamo ġaro ta iauka rakavana na ekirarito, ekirato, “Iesu tu au ribagu, ema Paulo maki ma ribagu, a ġomi tu deikara?” <sup>16</sup> Benamo iauka rakavana na eboroġiato tarimana na tauri imaima ruarua (7) na eguru-vinirito, ebota-korukorurito. Evaġa-vevaġi rakavarito, be mo numa na ġema raga-rosito tu kefiru kori e ma rarari.

<sup>17</sup> Efeso ai ġetanuto-ġoi tarimari, Iuda e Grik tarimari mabarari, na mo vari ġeseġaġiato nai, ġegari-rakava rakavato, ema Iesu Vereġauka arana ġevaġa-raġe baregoato. <sup>18</sup> Iesu ġevaġa-moġoniato tarimari vovoka ġeiaġomato, benamo ġutuma ġoirari ai ġeri veiġa rakavari ġekiraġi-foforirito. <sup>19</sup> Meġameġa tarimari ġutuma ġeri meġa bukari ġeġwa-vegogorito, benamo tarimarima mabarari ġoirari ai ġegaburito. Mo buka voiri ġevaġa-vegogorito tu silva moniri 50,000. <sup>20</sup> Mai veiġa seġukari ġeġorato ġerina Vereġauka ġena guruġa eraga-rovorovoto, e ebaregoto ma seġukana ġesi.

#### *Efeso ai gururaġe baregona eġorato*

<sup>21</sup> Moġeri muriri ai Paulo nuġanai etuġamaġito, Makedonia e Akaia tanori na bene vanaġi-iaġo Ierusalemna ġana. Ekirato, “Mo ġana bana iaġo murinai, Roma maki bana ġitaia.” <sup>22</sup> Benamo Timoteo e Erasto, ġia ġevaġa-kavaiato-ġoi tarimari ruarua, Makedonia ġana etuġu-iaġorito, a ġia tu Asia tanonai kota roġo etanu-maukato.

<sup>23</sup> Mo ġaro sebonai Efeso ai gururaġe baregona eġorato, korana Vereġauka ġena Dabara dainai. <sup>24</sup> Monai silva eġauvei-iaġirito-ġoi tarimana ta arana Demetrio, ġia na barau vavinena arana Diana ġena rubu baregona ġitaġitana ilailanai rubu misimisiri silva na eveirito-ġoi. Monana ġena ġauvei tarimari moni boruri barego vedaurea ġedoġarito. <sup>25</sup> Benamo Demetrio na ġia mabarari, e ġia ġeri ġauvei kavana tarimari ekea-vegogorito, ma ekirarito, ekirato, “Tau, ġomi tau mabarami ribami ġita ġera moni tu mai ġauvei na eiaġomani. <sup>26</sup> Toma ġomi tauġemi na ġoġitaiani e ġoseġaġiani, mai tarima Paulo na kara eveiani. Ġia ekirani, tarimarima ġimari na ġeveirini barauri tu dia barau, ema ġia na tarimarima ġutuma-bara nuġari eġanirini, e eġori-veġitarini, dia Efeso ai moġo, senaġi Asia tanona mabaranai maki. <sup>27</sup> Mai tu dia ġita ġera ġauvei namona arana moġo evaġa-rakavaiani, senaġi barau vavinena baregona, Diana, ġena rubu maki asi aninai beġe vaġa-iaġoani, e Diana iaru-korokorona asi ma beġe vevato-iaġiani; aba, mai barau vavinena tu Asia tarimari mabarari e tanobara mabarana na ġetoma-rakariġo viniani.”

<sup>28</sup> Mo guruġa ġeseġaġiato nai, ġebaru-rakava rakavato, e ġekoġoto, ġekirato, “Efeso barauna Diana tu iaru-korokoro!” <sup>29</sup> Benamo mo guru baregona eraġeto na mo vanuġa barana mabarana tu iauvoiauvo e daradara na eġauato. Ma Paulo ġesi ġerakao-vegogoto-ġoi Makedonia tarimari ruarua, Gaius e Aristako, tu ġeġabi-taririto, benamo marere gabuna ġana ġeġori-ragaraga-iaġorito. <sup>30</sup> Paulo ġena ura tu tarimarima ġutuma-bara ġoirari ai bene raka-rosi, senaġi Iesu ġekorana-iaġiato-ġoi tarimari asi ġeurato, ma ġeruġa-ġauato. <sup>31</sup> Asia vereri kotari Paulo ġatana. Ġia na maki ġena guruġa ġetuġuto, ġenoġiato, marere gabunai asi bene fofori.

<sup>32</sup> Mo vegogo nuġanai daradara asikeikeina eġorato, korana tarimarima mabarari irau ġabaġabana keakeana ġeiaġoto. Ġeġabato-ġoi e ġekeato-ġoi nai, tari tu guruġa ta

ġekiraġiato-ġoi, ma kotari tu guruġa boruri tari ġekiraġirito-ġoi, korana tarima ġutuma tu asi ribari kara dainai ġea ġaru-vegogoto. <sup>33</sup> Iuda tarimari na Alesanda mo ġutumabara nuġana na ġetuġu-rosiato, tarimarima ġoirari ai ea ruġato, Iuda tarimari iatari ai bene guruġa ġana. Benamo Alesanda ġimana na tarimarima elau-taririto asi beġene gururaġe ġana. <sup>34</sup> Senaġi ġeġita-leaiato, ġia tu Iuda tarimana nai, mabarari vaġa-sebo mai guruġa sebona moġo ġekoġo-iaġi ġenoġoi-ġenoġoiato-ġoi, ġekirato-ġoi, “Efeso barauna, Diana, tu iaru-korokoro!”

<sup>35</sup> Vanuġa ġena toretore tauna o klak mo tarimarima ġutuma evaġa-magorito, benamo ekirato, “Efeso tarimami, tarimarima mabarari ma ribari, Efeso tu Diana barau vavinena baregona ġena rubu ġitaġauna vanuġana, e guba na fore veaġana Diana ilailanai dagarana eketo-firiġoto ġitaġauna vanuġana maki. <sup>36</sup> Tarima ta na maiġeri dagara asi bekira-ġuniġaurini riba. Moġa lorinai asi ġoguru-raġe, asi ġovei-taġuitaġui. <sup>37</sup> Mai tarimarima na rubu dagarana ta tu asi beġe lemaia, e ġera barau vavinena ġenai maki guruġa rakavana ta asi beġe kiraġi, senaġi ġomi na maiġana boġo ġori-iaġoma-kavari. <sup>38</sup> Bema Demetrio ma ġena ġauvei tauri ġesi ma ġeri baru tarima ta ġenai nai tu, ġita tu ma ġera gavana, ġera Kota ġarori tu vekeo. Monai vauro beġene vei-roroġotori. <sup>39</sup> Bema ġourani dagara ta ma boġono kiraġia nai tu, taravatu na evaġa-moġoniato vegogonai vauro beġene guruġa-iaġia. <sup>40</sup> Toma kara beġora korana beġe danaġirani nai, ġita tu bita kerereni. Korana mai gururaġe baregona bita veia tu asi tauna ta, e ġera ġaru-vegogo kava anina tu asi bita kiraġiani riba.” <sup>41</sup> Eguruġa-ġosito murinai, ġevegogoto tarimari etuġu-rovorovorito.

## 20

*Paulo tu Makedonia e Grik ġana eiaġoto*

<sup>1</sup> Mo daradara nuġanai ġekoġoto-ġoi, ġeġabato-ġoi, moġa emeġomeġo-tarito murinai, Paulo na Iesu ġekorana-iaġiato-ġoi tarimari ekea-vegogorito; benamo elaunaġirito murinai, eġabi-tuġurito. Benamo ġia tu ma erakato Makedonia ġana. <sup>2</sup> Mo gabu nuġari na eraka-vanaġito-ġoi nai, guruġa ġutuma ekiraġito, tarimarima evaġa-kokorerito-ġoi. Monana eiaġoto mo, Grik ai evotuto. <sup>3</sup> Monai ġue toitoi etanuto. Bouti na Siria ġana bene iaġo ġana eġabi-kavito-ġoi nuġanai tu eseġaġito, Iuda tarimari na tu ġia beġene vaġia boioġana ġetogaiato-ġoi. Moġa lorinai Makedonia na dabarai bene ġenoġoi-vanaġi etato. <sup>4</sup> Tarima kotari na ġia ġekavaiato, tarimari tu maiġeri: Sopata Piro, Berea tarimana; Aristako e Sekundo, Tesalonika tauri; Gaius, Derebe tarimana; Tikiko e Trofimo, Asia tauri; e Timoteo. Moġeri na ġekavaiato, Asia ġana ġeiaġoto. <sup>5</sup> Ġia tu ġeraka-guinetto, Troas ai vau ġai ġea vaġa-nogamato. <sup>6</sup> Senaġi ġai tu Asi Etubuni Faraona Verekona ekorito murinai vau, Filipi ġaraga-kwaneato. Ġaro imaima (5) ġekorito vau, ġia ġeri ai Troas ai ġavotuto, ġavedoġarito. Monai tu ġaro imaima ruarua (7) ġatanuto.

*Paulo ġena iaġoiaġo magona Troas ai*

<sup>7</sup> Fura sebona ġena ġaro giniguenenai o Sandei ai ġaraka-vegogoto anibou baġana ġani ġana. Benamo Paulo na mo lavilavi tu tarimarima eġobata-vinirito, eiaġoto mo, boġi nuġana, korana belaġanini ġia tu berakani nai. <sup>8</sup> Mo numa tuġuna daiġutunai ġai ġavegogoto, moġa lamefa na tu asisebo ġevaġa-ġararito. <sup>9</sup> Mero futuana ta arana Eutiko tu windoa nuġanai etanuto. Paulo ġena guruġa emauka-iaġoto-ġoi nuġanai, Eutiko matana tu egenagenato-ġoi mo ea gena-vetuġa-rekwato. Benamo mo numa tuġuna na stori vaġa-toitoina (o third story) na ea keto-firiġoto mo tano ai. Ġea ġabi-vaisiato nai tu mase. <sup>10</sup> Senaġi Paulo eraka-riġoto, Eutiko iatanai evefiukauto, eregoato, benamo ekirato, “Nuġami asi ġeraġe, ġia tu maġuri!” <sup>11</sup> Moġa murinai numa tuġuna ġana ma evaraġeto, ma farao ebuki-ġutuato, ġeġanito. Ġena guruġa ma esiriġuato, eiaġoto mo elaġanito, benamo erakato. <sup>12</sup> Vegogo tarimari na mo futua ġeġoriatto, benamo ma verereri ġesi ġerakato.

*Paulo Troas na eiaġoto mo Mileto*



<sup>13</sup> Ĝai tu bouti na Aso ĝana ĝaiaĝo-guineto, a Paulo tu monai vau ma baĝa ĝura-kauani. Paulo na tu moĝesina ekiramato, korana ĝia tu kwakuna na beraka-vanaĝini etato. <sup>14</sup> Aso ai ema doĝarimato, benamo ĝaĝura-kauato, Mitilene ĝana ĝaiaĝoto. <sup>15</sup> Monana bouti na ma ĝaiaĝoto mo elaĝanito vau, Kioso iata-raĝenai ĝadarokauto. Mo ĝaro murinai tu Samo ai ma ĝavotuto, ma ĝaro ta ma evanaĝiato vauro, Mileto ai ĝaraĝasito. <sup>16</sup> Paulo eurato, Efeso tu beĝene raga-vanaĝia, Asia tanonai ĝaro kotari beĝe vaĝa-koririni garina, korana ĝia nuĝana eĝariĝarito-ĝoi. Ĝena ura bema ma dabarana nai tu, Ierusalemi beĝene votu vauro, Pentekoste ĝarona bene raĝasi, mo tu Pasova ĝaro gabana imaima (50) murinai.

*Paulo ĝena veĝabituĝu guruĝari Efeso ekalesiana ĝorikauna tauri ĝeri ai*

<sup>17</sup> Paulo tu Mileto vanuĝana na Efeso ekalesia ĝorikauna tauri ĝeri guruĝa etuĝu-iaĝoto, ekirarito, beĝene iaĝoma, ĝia ĝesi beĝenema vedoĝari. <sup>18</sup> Ĝia ĝema votuto nai, evaĝa-guruĝarito, ekirato, “Ĝomi ma ribami au ĝaro mabarari ai ĝomi ĝesi tatanuto-ĝoi nai, aiĝesina atanuto, ĝaro tovotovona na Asia tanonai ama raĝasito veĝata. <sup>19</sup> Ĝaro vovoka Iuda tarimari ĝeurato-ĝoi au beĝene kougu, veiĝa rakavari ĝutuma au ĝegu ai ĝeveirito-ĝoi. Senaĝi nuĝagu ma maranana ĝesi moĝo e ma taĝigu ĝesi Vereĝauka vetuĝunaĝina aiaĝo-vinito-ĝoi. <sup>20</sup> Ĝomi ribami, vaĝa-kava-iaĝimi guruĝari mabarari avaĝa-ribamito, ta asi akure-toĝaiato, ĝemi numai e ĝutuma ĝoirari ai avevaĝa-ribato-ĝoi nai. <sup>21</sup> Iuda tarimari e Grik tarimari ĝoirari ai aguruĝa-foforito-ĝoi, ĝeri rakava ĝerina beĝene vetuĝamaĝi-kure, Barau ĝenai beĝene ĝenoĝoi, ema ĝera Vereĝauka Iesu Keriso beĝene ĝabidadama-vinia. <sup>22</sup> Au toma tu Ierusalemi ĝana aiaĝoni, korana Iauka Veaĝa na evaĝa-naĝiguni nai, ma asi ribagu monai tu kara ĝegu ai beĝorani. <sup>23</sup> Dagara sebona moĝo au ribagu tu Iauka Veaĝa na vanuĝa baregori mabarari ai evaĝa-ribaguni, au ĝoiragu ai tu dibura numa e midigumidigu evaĝa-noga taĝoguni. <sup>24</sup> Senaĝi au ĝegu ai, au ĝegu maĝuri tu asi atuĝamaĝi-baregoani, kara ĝana atoni, ĝegu ura sebona tu ĝegu raga-iruiru moĝo bana vaĝa-ĝuĝuru, ema mo ĝauvei Vereĝauka Iesu na eviniguto, bana veia etato ĝauveina, bana vaĝa-koria. Mo ĝauvei tu: Barau ĝena varevare-bara Varina Namona bana kiraĝi-foforia.

<sup>25</sup> Au tu ĝomi mabarami fakami ai arakao-rakaoto, Barau ĝena Basileia, (ĝena veĝitaĝau seĝukana evaĝa-ruĝaiani maiĝa), ĝemi aĝobata-iaĝiato. A toma au ribagu, ta na asi ma boĝita-ĝenoĝoiguni. <sup>26</sup> Moĝa lorinai toma ĝaro ĝomi ĝoirami ai au aguruĝa-foforini, bema ĝomi ta Barau ĝenana beraka-rekwarekwani nai, verebana tu dia au ĝegu ai. <sup>27</sup> Korana Barau ĝena ura mabarana avaĝa-ribamito, misina ta maki asi akira-ĝuniĝauato. <sup>28</sup> Tauĝemi lorimi boĝono vetore, ema mamoe serina lorina boĝono toreri. Mani mamoe serina tu Iauka Veaĝa na evinimito boĝono ĝitaĝauri ĝana. Barau ĝena ekalesia boĝono ĝita-ĝaua e boĝono ĝori-kaua. Mani tu ĝia Natuna rarana na evoiato. <sup>29</sup> Au ribagu, au barakani murigu ai tu boĝa kwaivari rakavari ĝomi fakami ai beĝe raka-toĝani, benamo mani mamoe serina beĝe vaĝa-rakavaiani. <sup>30</sup> Ĝomi tauĝemi fakami na maki tau kotari beĝe variĝisini, benamo ĝofaĝofa guruĝari beĝe kiraĝini, Iesu ĝekorana-iaĝiani tarimari ĝia na beĝene ĝori-ĝerevaĝiri ĝana. <sup>31</sup> Moĝa lorinai lorimi boĝono vetore! Boĝono vetuĝamaĝi-taĝo, au na tu laĝani toitoi veĝata matagu ma taĝina ĝesi, ĝomi asisiba-vini boĝimito-ĝoi e asisiba-vini laĝanimito-ĝoi.

<sup>32</sup> Toma Barau ĝimanai e ĝena varevare-bara guruĝana nuĝanai atoremini, ĝia na tu bevaĝa-ruĝa-iobukamini ilaila, ema voimi bevinimini evaĝa-veaĝarito tarimari mabarari ĝesi. <sup>33</sup> Au na ta ĝena silva, o golo, o dabuĝa urana asi aveito. <sup>34</sup> Ĝomi tauĝemi ma ribami, au ĝegu rabu e karogu ĝeri rabu dagarari mabarari tu, mai ĝimagu ruarua ĝeri ĝauvei ĝerina aĝabito-ĝoi. <sup>35</sup> Dagara mabarari nuĝari ai au na avaĝa-ĝita iaĝimito-ĝoi, au moĝesi ĝauvei kokorekokore ĝerina vauro moira-moira tarimari bitana vaĝa-kavari. Iesu Vereĝauka ĝena guruĝa boĝono tuĝamaĝi-taĝoa, ekirato, ‘Varevare iakuna tu barego, a ĝevinirani nai taĝoitaĝoni iakuna tu kei.’”

<sup>36</sup> Paulo eguruġa-ġosito vau, ġia ġesi ġevetui-tarito, benamo mabarari ġesi ġeġuriġurito. <sup>37</sup> Ġia mabarari ġetaġi-rakavato, ġevefaġato, ma ġeverauato. <sup>38</sup> Ġia nuġari ġevekwaraġi-rakavato tu maiġesina evaġa-guruġarito nai, ekirato, ġia na ġoirana asi ma beġe ġita-ġenoġoiani. Benamo bouti ġana ġeġori-iaġoato.

## 21

### *Paulo Ierusalem* ġana eiaġoto

<sup>1</sup> Ġia ġesi ġaveġabi-tuġuto, benamo ġarakato. Davara na ġaiaġoto, maoromaoro mo Koso ai ġavotuto; ma elaġanito vau Rodes ġana ġaiaġoto, monana ma ġaiaġoto Patara. <sup>2</sup> Foenikia ġana beiaġoni boutina monai ġadoġariato, ma ġaraġeto, benamo ġaragato. <sup>3</sup> Ġaboġe-iaġoto Saipras ġaġitaiato, benamo gabina (o south) rekena na ġavanaġito, ġaiaġoto mo Siria ai ġaraġasito. Taia vafuna na vau ġaraka-riġoto, korana mo bouti farefarena tu monai beġe tore-riġorini nai. <sup>4</sup> Iesu ġekorana-iaġiato-ġoi tarimari kotari monai ġadoġaririto, ġia ġesi fura o wiki sebona ġatanuto. Iauka seġukana ġenana ġia na Paulo ġekiraiato, Ierusalem ġana asi bene iaġo. <sup>5</sup> Senaġi ġema raka ġarona eġabiato, benamo ġarakato. Ġia mabarari ma ġaraġori e ma naturi ġesi vanuġa baregona na ġeġori-rosimato kone ai. Benamo ġai mabarama ġavetuitui-tarito, ġaġuriġurito. <sup>6</sup> Ġia tata ġesi ġaveġabi-tuġuto, benamo ġai tu bouti baregonai ġaraġeto, a ġia tu monana ġeġenoġoito ġeri numa ġari.

<sup>7</sup> Taia na ġaiaġoto Tolemais. Ġema davara iaġoiaġona dokona moġa. Monai tarikaka tari ġesi ġavedoġarito, ma ġavaġa-namorito, ġia ġesi ġaro sebona ġatanuto. <sup>8</sup> Elaġanito, benamo kwakuma na ġarakato, ġaiaġoto, Kaisarea ai ġaraġasito. Monai evanelia tarimana arana Filipino ġena numa ġana ġaiaġoto, ġia ġesi ġatanuto. Ġia tu Ierusalem tarima imaima ruarua (7) ġeġabi-viriġirito tarimana ta. <sup>9</sup> Ġia natuna ġuiatori vasivasi tu Barau na peroveta varevarena evinirito.

<sup>10</sup> Ġaro vovoka monai ġatanuto murinai, peroveta tarimana ta arana Agabo, Iudea na ema raġasito. <sup>11</sup> Ġia tu ġai ġemai eiaġomato, ma Paulo ġena gabaġau eġabi-vaisiato, benamo ġia tauġena kwakuna e ġimana ebarubarurito, benamo ekirato, "Iauka Veaġa tu maiġesi ekirani, 'Mai gabaġau tarimana tu Iuda tarimari na Ierusalem maiġesina beġe barubaruani, benamo irau bese tarimari ġimari ai beġe tore-kauani.'"

<sup>12</sup> Mai guruġa ġaseġaġiato nai, ġai ema monai tarima kotari ġesi Paulo ġanoġiato, Ierusalem ġana asi bene iaġo. <sup>13</sup> Senaġi ġia evaġa-veseto, ekirato, "Kara taġina ġoveini e au nuġagu ġovaġa-moiraiani? Au tu rovinatore, dia Ierusalem beġe barubaruguni moġo, senaġi Vereġauka Iesu arana bakunai bamaseni maki." <sup>14</sup> Ġai tu asi ilaila ġia nuġana baġa ġaniani nai, ma ġia noġinoġina ġavaġa-dokoato, benamo ġakirato, "Vereġauka ġena ura moġo bene vetore."

<sup>15</sup> Ġaro kotari ġekorito murinai, ġema farefare ġaġabi-kavirito, benamo Ierusalem ġana ġaiaġoto. <sup>16</sup> Kaisarea ai ġetanuto-ġoi Iesu ġekorana-iaġiato-ġoi tarimari kotari maki ġai ġesi ġaiaġoto. Ġia na ġeġori-iaġomato, Nason, Saipras tarimana, ġena numa ġana. Nason tu kai-veġata na Iesu ekorana-iaġiato-ġoi tarimana.

### *Paulo na Iakobo (o Iames) eraka-ġitaiato*

<sup>17</sup> Ierusalem ġaraġasito nai tu, tarikaka na ma iakuri ġesi ġeġabi-raġemato. <sup>18</sup> Elaġanito, benamo Paulo tu ġai ġesi ġaiaġoto Iakobo ġitaġitana; ma rubu ġorikauna tarimari mabarari tu monai vegogotaġo. <sup>19</sup> Paulo na evaġa-namorito murinai, ġia ġena ġauvei ġenana Barau na irau bese tarimari kamasi eveirito-ġoi variri mabarari ġeri ekiraġito.

<sup>20</sup> Ġia na ġeseġaġiato nai, mabarari na Barau ġevaġa-raġeato. Benamo ġia na Paulo ġekiraiato, ġekirato, "Tarikakama, oġitaiani Iuda tarimari vira-tausen varau Iesu ġeġabidadama-viniani, ema taravatu maki ġekorana-iaġi gigitariani. <sup>21</sup> Ġoi varimu tu ġia ġekira-vararito. Ġekirarito, ġoi na irau tano ai ġetanuni Iuda tarimari

mabarari ovaḡa-ribarini, okirani, Mose ḡena taravatu beḡene raga-kwanea, naturi merori tauḡaniri kefiru asi beḡene lama-vaḡiri, ema Iuda seneri ḡeri veiḡa asi beḡene korana-iaḡiri. <sup>22</sup> Be, ḡai tu kamasi toma ḡaveini? Ḡoi boma raḡasi varina tu beḡe seḡaḡiani veḡata. <sup>23</sup> Moḡa lorinai kara baḡa kiravara-vinimuni veiḡana bono veia. Tauri vasivasi (4) maiḡeri, ḡia tu kiraḡitore gwaḡiḡina ta ḡeveiato Barau ḡenai. <sup>24</sup> Ḡia ḡesi boḡono iaḡo, e ḡoi maki ḡia ḡesi boḡono veiareva, ema beḡe ḡwa-iaḡoni dagarari vori bono vei, be ḡia debari beḡe rarorini. Maiḡesi boveini vau, tarimarima mabarari beḡe ribani, ḡoi iatamu ai ḡekiraḡirito-ḡoi guruḡari mabarari tu asi moḡoni, a ḡoi tauḡemu maki Mose ḡena taravatu ilailanai otanuni. <sup>25</sup> Irau bese ḡeveḡabidadamani tarimari tu ḡeri fefa varau ḡatuḡuto, ḡakirarito, kwaivakuku ḡevinirito ḡaniḡaniri tu asi beḡene ḡaniri, rara e ḡaiḡori na ḡebora-maserini bureḡari viriḡori tu asi beḡene ḡani, ema asi beḡene mata-boraḡa.”

<sup>26</sup> Benamo Paulo na mo tarima vasivasi evaḡa-ḡabirito, benamo elaḡanito nai, mabarari veiareva ḡauveina ḡea veiato. Moḡa murinai Rubu Veaḡai eraka-toḡato, ma aitoma veiareva bemagoni ḡarona, ema aitoma varevare dagarari ḡia tata arari ai betoreni ekiraḡi-foforirito.

#### *Iuda tarimari na Paulo Rubu Veaḡai ḡeḡabi-tariato*

<sup>27</sup> Ḡeri veiareva ḡauveina tu ḡaro imaima ruarua (7); dori ḡekorito nuḡanai, Iuda tarimari kotari Asia tanona na ḡeiaḡomato, ḡia na Paulo Rubu Veaḡai ḡeḡitaiao. Ḡia na tarimarima mabarari nuḡari ḡeḡanirito, benamo Paulo ḡeḡabi-tariato, <sup>28</sup> ḡekoḡoto, ḡekirato, “Isaraela taumi, ḡai ḡovaḡa-kavama! Mai tarima maiḡa tu gabu mabarari ḡari eiaḡoni, tarimarima mabarari evaḡa-ribarini; Isaraela tarimari, e Mose ḡena taravatu, ema mai Rubu Veaḡa asi beḡene korana-iaḡia etoni. Toma maki, ḡia na Grik tarimari mai Rubu Veaḡa nuḡanai beḡori-toḡari, mai gabu veaḡana bevaḡa-rakavaia.” <sup>29</sup> Moḡesina ḡekirato, korana ḡia na Efeso tarimana arana Trofimo, Paulo ḡesi mo vanuḡa baregonai ḡeḡitarito, ema ḡetuḡamaḡito, ḡia tu Paulo na Rubu Veaḡai eḡori-toḡaiato. <sup>30</sup> Vanuḡa mabarana iauvoiauvo e daradara na eḡabiato, ema tarimarima mabarari monai ḡema ḡaru-vegogoto, benamo Paulo ḡeḡabi-tariato, Rubu Veaḡa na ḡeinu-rosiato. Asikauna Rubu Veaḡa ḡatama-bokari ḡebiririto.

<sup>31</sup> Ḡia na Paulo ḡevaḡi-masea ḡetato-ḡoi nuḡanai, tarima ta eraga-varaḡeto, Roma vetari verena baregona ea kira-varaiato, Ieruselema mabaranai tu gururaḡe baregona ḡeveiani. <sup>32</sup> Ḡia tu asikauna ḡena vetari ḡitaḡauna tarimari e vetari tarimari eḡoririto, benamo ḡeraga-riḡoto mo ḡutuma-bara ḡeri ai. Tarimarima na vetari verena baregona ma ḡena vetari tauri o soldia ḡesi ḡeḡitarito nai, ḡia na Paulo kwarikwarina ḡevaḡa-dokoato. <sup>33</sup> Benamo vetari verena baregona Paulo ḡenai eiaḡoto, eḡabiato, ḡena mero ekirarito, seini ruarua na beḡene baru-taria. Benamo evedanaḡito, ekirato, “Mai tu kamara tau, e ḡia tu kara beveia?” <sup>34</sup> Mo ḡutuma-bara nuḡanai tari ḡefararato-ḡoi; guruḡa ta ḡekiraḡiato-ḡoi, ma kotari na tu guruḡa ta, be vetari verena baregona na maki guruḡa roroḡotona ta asi eḡabiato. Moḡa lorinai ḡena mero ekirarito, Paulo tu vetari tarimari ḡeri gabu ḡana beḡene ḡori-iaḡoa. <sup>35</sup> Raḡekau ai ḡeḡori-votuato nai tu, vetari tarimari na ḡefaḡa-vaisiato, ḡeḡwa-raḡeato, korana mo tarimarima mabarari tu ḡeniara-lelevaḡito nai. <sup>36</sup> Mo tarimarima mabarari ḡia murina na ḡeraka-iaḡoto tu, ḡefararato-ḡoi, ḡekirato, “Ḡovaḡi-masea!”

#### *Paulo tauḡena evelauḡau-tovoto*

<sup>37</sup> Dori moḡo vetari tarimari ḡeri numai ḡeḡori-toḡaiato nuḡanai, Paulo na vetari verena baregona evaḡa-guruḡaiato, ekirato, “Bavaḡa-guruḡamuni lorinai ba?” Ḡia na evaḡa-veiseato, ekirato, “Ḡoi Grik ḡeri garo ma ribamu? <sup>38</sup> Be ḡoi tu dia mo Aigupito tarimana, ḡaro kotari varau beḡe iaḡo, ḡia na gavamani vevaḡi-vinina esinaiao, ema vaḡideba tarimari daḡara vasivasi (4,000), ma ḡeri vevaḡi farefareri ḡesi, tano fakana ḡana eḡori-iaḡorito tarimamu?” <sup>39</sup> Paulo na evaḡa-veiseato, ekirato, “Au tu Iuda

tarimagu, amaḡurito vanuḡana baregona arana tu Taso, ma arana vanuḡana, ḡia Kilikia tanonai. Anoḡimuni, mani ḡemu veiḡa, mai tarimarima navaḡa-guruḡari.”<sup>40</sup> Vetari verena baregona na maoro eviniato, benamo Paulo raḡekau ai eruḡato, ḡimana na tarimarima elau-taririto. Gururaḡe emagoto, benamo Paulo na Heberu garo ai evaḡa-guruḡarito.

## 22

<sup>1</sup> “Tarikakagu e tamagu mabarami, ḡoirami ai navekiraḡi-faka, be boḡono seḡaḡi.”  
<sup>2</sup> Ḗia ḡeseḡaḡiatio, Heberu garo ai evaḡa-guruḡarito nai, asi gurugururi ai ḡeiaḡoto, mabarari ḡeseḡaḡi-magomagoto; benamo Paulo ekirato:

<sup>3</sup> “Au tu Iuda tarimagu, Taso vanuḡanai Kilikia tanona nuḡanai amaḡurito, senaḡi mai Ierusalemama vanuḡa baranai abaregoto. Gamaliel ḡena vevaḡa-riba nuḡanai atanuto-ḡoi, ḡia na ḡita senera ḡeri taravatu veiḡari gwaḡiḡiri evaḡa-ribaguto-ḡoi, ema Barau ḡena ḡauvei aveiatio-ḡoi ma kokoregu ḡesi, toma ḡomi na ḡokokore-iaḡiani ilailanai. <sup>4</sup> Au na mai dabara ḡekorana-iaḡiatio-ḡoi tarimari tu avaḡa-midigu midigurito-ḡoi mo ḡea maseto-ḡoi. Tau e vavine aḡabirito-ḡoi, dibura numari ai abubu-toḡarito-ḡoi. <sup>5</sup> Rubu Veaḡa verena baregona e kanisoro tarimari mabarari na maki beḡe vaḡa-moḡoniguni, au tu moḡoni akirani. Au tu ḡia na maki fefa ḡeviniguto, tarikaka Iuda tarimari Damaseko ai ḡeri bana viniri ḡana. Benamo au mo ḡana aiaḡoto, mai tarimarima bana ḡabiri, seini na bana barubaruri ma Ierusalemama ḡana bana ḡori-iaḡori, ḡeri rakava vori beḡene ḡabiri ḡana.”

*Paulo ḡena vetuḡamaḡi-kure ekiraḡiatio*

<sup>6</sup> “Au roḡo dabara na aiaḡoto-ḡoi, ma Damaseko akavinaḡiatio, ḡaro tu tubuagu ai mama baregona ta guba na emariḡoto, asikauna ema nanagi-tariguto. <sup>7</sup> Au tano ai aketo-tarito, ema garo ta aseḡaḡiatio, au evaḡa-guruḡaguto, ekirato, ‘Saulo! Saulo! Karase nai au ovaḡa-rakavaguni?’ <sup>8</sup> Benamo au avedanaḡito, akirato, ‘Vereḡauka, ḡoi tu deikara?’ Ḗia evaḡa-veseto, ekirato, ‘Au tu Iesu, Nasareta tarimagu, ḡoi na ovaḡa-rakavaguni tarimagu.’ <sup>9</sup> Au karogu maki na mama ḡeḡitaiatio, benamo ḡegarito, senaḡi au eguruḡa-viniguto garona tu asi ḡeseḡaḡiatio.

<sup>10</sup> Benamo avedanaḡito, akirato, ‘Vereḡauka, au tu kara toma aveiani?’ Vereḡauka evaḡa-veseto, ekirato, ‘Novariḡisi, Damaseko ai noa raka-toḡa, monai vau ta na bevaḡa-ribamuni, ḡoi tu kara boveini.’ <sup>11</sup> Mo mama baregona na matagu evei-bubuato, benamo karogu na ḡimagu ai ḡeḡabito, Damaseko ḡana ḡeḡori-iaḡoguto.

<sup>12</sup> Monai tau ta arana Anania, ḡia tu Barau garina eveito-ḡoi e taravatu ekorana-iaḡiatio-ḡoi tarimana, ema Iuda tarimari mabarari Damaseko ai ḡetanuto-ḡoi na ḡegubakau-baregoato-ḡoi. <sup>13</sup> Ḗia eiaḡomato sevigu ai ema ruḡa-tarito, benamo ekirato, ‘Saulo tarikakagu, matamu ma nefafa.’ Asikauna moḡo matagu ḡefafato, ḡia aḡitaiatio. <sup>14</sup> Moḡa murinai Anania na ekiraguto, ekirato, ‘Ḗita senera ḡeri Barau na varau beḡabiviriḡimu, ḡia ḡena ura kara bono veia, bono ribaia. Ema vei iobukaiobuka tarimana bono ḡitaia, e ḡia tauḡena muruna na beguruḡani garona bono seḡaḡia. <sup>15</sup> Korana ḡoi tu ḡia bovaḡa-moḡoniani tarimamu, kara boḡita e boseḡaḡi maiḡeri, tarima mabarari bokiravararini. <sup>16</sup> Kara ma ovaḡa-nogaiani? Novariḡisi, babatiso noḡabia. Ḗia arana nokea-raḡea, benamo ḡemu rakava neḡuriḡi-vaḡiri.’ ”

*Paulo ḡena kea irau bese tarimari bene ḡobata-viniri ḡana*

<sup>17</sup> “Monana Ierusalemama ḡana aḡenoḡoito, benamo Rubu Veaḡai aḡuriḡurito-ḡoi nuḡanai, amata-vanaḡito. <sup>18</sup> Monai au na Vereḡauka aḡitaiatio, au evaḡa-guruḡaguto, ekirato, ‘Noraga-vei, Ierusalemama noragakwane-ḡarimoḡia, korana mainai au varigu bokiraḡiani, senaḡi mai tarimarima na asi beḡe vaḡa-moḡonimuni.’ <sup>19</sup> Au na avaḡa-veseato, akirato, ‘Vereḡauka, ḡia tu ma ribari ginikau, au rubu mabarari ḡana aiaḡoto-ḡoi, ḡevaḡa-moḡonimuni tarimari aḡabirito-ḡoi, dibura numanai abiri-ḡaurito-ḡoi e

akwaririto-ḡoi. <sup>20</sup> Ema ḡoi evaḡa-moḡonimuto-ḡoi tarimana Stefano rarana ḡevaḡa-riḡoato ḡaronai au tu monai, ḡevaḡi-maseato avaḡa-moḡoniato, ema ḡevaḡiatio-ḡoi tarimari ḡeri dabuḡa anaririto.’ <sup>21</sup> Senaḡi Vereḡauka na ekiraguto, ekirato, ‘Noiaḡo, korana au na batuḡumuni, irau bese tarimari gabu manaḡai ḡetanuni tarimari ḡeri ai.’ ”

<sup>22</sup> Tarimarima na Paulo ḡeseḡaḡi-taḡoato-ḡoi, eiaḡoto mo, ḡia moḡesi eguruḡato. Benamo ḡefararato, ḡekirato, “Ḡoḡabi-fitoḡaia! Ḡovaḡi-masea! Ḡia tu asi ḡena namo ta emaḡuri-taḡoni mai tanobarai.” <sup>23</sup> Ḡeḡabato-ḡoi, ḡeri dabuḡa ḡeiave-iaverito-ḡoi, e forara ḡefiu-vaisito-ḡoi. <sup>24</sup> Roma ḡeri vetari verena baregona na ḡena mero ekirarito, Paulo beḡene ḡori-iaḡoa, vetari tarimari ḡeri tanu gabuna ḡana. Ema ekirarito beḡene kwaria, e beḡene danaḡia kara ḡaramanai ḡia moḡesi ḡeḡabaḡaba-viniani, bene kira-varari. <sup>25</sup> Senaḡi ḡebarubaruato-ḡoi beḡene kwaria ḡana nuḡanai Paulo na vetari ḡitaḡauna tarimana ekiraiato, ekirato, “Mai moḡoni taravatu nuḡanai ekiraḡiani, ḡoi na Roma tarimana bokwari-guinea; a ḡia na kara bevei-leaia Kota na tu roḡosi bere kira-varaia, senaḡi?”

<sup>26</sup> Mo vetari ḡitaḡauna tarimana na mo guruḡa eseḡagiato, benamo eraga-iaḡoto vetari verena baregona ḡenai, ekiraiato, ekirato, “Ḡoi tu kara toma oveiani? Mo tarima tu Roma tarimana!” <sup>27</sup> Moḡa lorinai vetari verena baregona eiaḡoto Paulo ḡenai, benamo ea danaḡiatio, ekirato, “Nokira-varagu, ḡoi tu Roma tarimamu ba?” Paulo evaḡa-veseto, ekirato, “Oi.” <sup>28</sup> Benamo vetari verena baregona ekirato, “Au Roma tarimagu ai aiaḡoto tu moni baregona gavamani avinirito.” Paulo evaḡa-veseto, ekirato, “Senaḡi au tu Roma beseri ḡerina aḡorato Roma tarimagu.” <sup>29</sup> Asikauna Paulo beḡe danaḡiani tarimari ḡeruḡa-ḡenoḡoito, ema vetari verena baregona maki egarito, korana eriba-maoroto, Paulo tu Roma tarimana, ḡia na ebarubaruato ḡekwaria ḡana.

#### *Paulo kanisoro ḡoiranai*

<sup>30</sup> Ma elaḡanito, vetari verena baregona ḡena ura bene riba-maoro, kara dainai Iuda tarimari na Paulo ḡevaḡa-daḡaiato. Moḡa lorinai ḡia na Paulo ḡebaruato varori ḡeruḡarito, benamo Rubu Veaḡa vereri baregori e kanisoro mabarana ekirarito beḡene vegogo. Benamo ḡia na Paulo eḡori-iaḡoato, ḡia ḡoirari ai ea vaḡa-ruḡaiato.

#### *Paulo Iuda ḡeri kanisoro tarimari ḡoirari ai*

## 23

<sup>1</sup> Paulo na kanisoro tarimari eḡita-karakararito, benamo ekirato, “Tarikakagu mabarami! Au tu ma nuḡa iobukaiobukagu ḡesi Barau ḡoiranai atanuni, beiaḡoma mo initoma.” <sup>2</sup> Paulo moḡesina eguruḡato nai tu, Rubu Veaḡa verena baregona Anania na Paulo sevinaḡi taḡoto-ḡoi tauri ekirarito, Paulo bokana beḡene foro-ḡaua. <sup>3</sup> Benamo Paulo na ekiraiato, ekirato, “Ḡoi tu Barau na beforomuni, ḡoi kobe ḡevaḡa-kurokuroato kavana, rakava asi beḡene ḡitaia ḡana, ḡofaḡofa tarimamu! Ḡoi maninai botanu tu taravatu ilailanai au okota-viniguni, senaḡi ḡoi tauḡemu na taravatu boleaia, tarima bokirari, au ḡeforogu bos!” <sup>4</sup> Paulo sevina tauri na ḡekiraiato, ḡekirato, “Ḡoi tu Barau ḡena Rubu Veaḡa verena baregona ḡenai guruḡa rakavari okiraḡini!” <sup>5</sup> Paulo evaḡa-veseto, ekirato, “Tarikakagu, au tu asi bariba-maoro ḡia tu Rubu Veaḡa verena baregona. Korana ribagu Buka Veaḡai tu ekirani, ‘Ḡomi ḡemi vere tu asi boḡono guruḡa-rakava vinia.’ ”

<sup>6</sup> Paulo na ḡia tari eḡitarito tu Sadukea tarimari, ma kotari tu Farisea tarimari, benamo kanisoro ḡoiranai ekoḡoto, ekirato, “Tari-kakagu, Isaraela tarimami, au tu Farisea tarimagu, Farisea tarimana natuna. Au tu vevaḡa-kota gabunai maiḡegu, korana au ḡegu tuḡamaḡikau, mase tarimari tu ma beḡe variḡisi-ḡenoḡoini!”

<sup>7</sup> Moḡesi ekirato, benamo Farisea tarimari ema Sadukea tarimari ḡeveḡare-veḡareto, ema ḡeri vegogo maki evetavi-kirato. <sup>8</sup> Korana Sadukea tarimari ḡekirani, tarimarima mase na tu asi ma beḡe variḡisi-ḡenoḡoini, ema aneru e iauka tu asi ḡetanuni; a Farisea tarimari na moḡeri mabarari tu ḡevaḡa-moḡonirini. <sup>9</sup> Moḡesina naima fararafarara

guruna ebaregato-ḡoi, nuḡanai taravatu ḡevevaḡa-riba iaḡiato-ḡoi Farisea tarimari ḡeruḡa-vaisto, ma kokoreri ḡesi ḡeguruḡato, ḡekirato, “Mai tarima ḡenai rakava ta tu asi bita doḡaria! Bema ḡia tu iauka na o aneru ta na moḡoni bevaḡa-guruḡaia nai tu, Barau asi sivaḡa-vevaḡia!”<sup>10</sup> Veḡareveḡare eseḡuka-ḡaraḡarato nai, vetari ḡitaḡauna tarimana baregona egarito, Paulo beḡe inu-vedare vedareani garina. Moḡa lorinai ḡena vetari tauri ekirarito, beḡene rakariḡo-iaḡo, Paulo beḡene ḡabi-veḡitaia Iuda tarimari fakari na, benamo vetari tauri ḡeri numa ḡana beḡene ḡori-iaḡoa.

<sup>11</sup> Ma elaḡanito boḡinai, Vereḡauka Paulo sevinai ema ruḡa-tarito, benamo ekirato, “Ḡoi na mai Ierusalemi au okiraḡi-foforiguto ilailanai, Romai maki moḡesi bonoa kiraḡi-foforigu.”

*Paulo vaḡivaḡina boioḡana ḡetogato*

<sup>12</sup> Ma elaḡanito boḡiboḡinai, Iuda tarimari kotari ḡevegogoto, ma boioḡa ta ḡetogaiato. Ḡia na kiraḡitore guruḡana gwaḡiḡina ḡekiraḡiato, ḡekirato kara ta asi beḡe ḡaniani e asi beḡe niuani, beiaḡoni mo, Paulo beḡe vaḡiani.<sup>13</sup> Mo boioḡa ḡetogavegogoto tauri mabarari tu gabana vasivasi (40) maki evanaḡiato.<sup>14</sup> Benamo ḡeiaḡoto Rubu Veaḡa vereri baregori e Iuda vereri ḡeri ai, ma ḡea kirato, ḡekirato “Ḡai tu kiraḡitore guruḡana gwaḡiḡina baḡa kiraḡia, asi baḡa ḡaniḡanini, beiaḡoni mo, Paulo baḡa vaḡi-maseani.<sup>15</sup> Maitoma ḡoi ma kanisoro ḡesi noḡinoḡi guruḡana ḡotuḡu-iaḡoa, Roma ḡeri vetari verena baregona ḡenai, be Paulo ḡomi ḡemi ai bene tuḡu-mariḡoa, boḡono ḡofa-ḡaua, boḡono kira, ḡomi na Paulo ḡoura-viniani, korana ḡia ḡenana guruḡa iobukana boḡono ḡabia ḡana. Senaḡi ḡai tu baḡa vaḡa-noga-taḡoni, mainai roḡosi berema raḡasi, a ḡai na tu baḡa vaḡi-maseani.”

<sup>16</sup> Senaḡi Paulo tobana natuna merona na mo boioḡa eseḡaḡi-kauato, benamo eiaḡoto, vetari tauri ḡeri numai eraka-toḡato, ma Paulo ekira-varaiato.<sup>17</sup> Benamo Paulo na vetari ḡorikauna tarimana ta ekeaiato, benamo ekiraiato, ekirato, “Mai mero variḡuna vetari verena baregona ḡenai noḡori-iaḡoa. Korana ḡia na ḡena guruḡa ta beḡwa-iaḡomaia, bene kira-varaia.”<sup>18</sup> Ma vetari ḡorikauna tarimana na eḡori-iaḡoato vetari verena baregona ḡenai, ekirato, “Dibura numanai tarimana, Paulo na bekeagu e benoḡigu, mai mero variḡuna ḡoi ḡemu ai bana ḡori-iaḡomaia, korana ḡia na ḡemu guruḡa ta beḡwa-iaḡomaia, bene kira-varamu ḡana.”

<sup>19</sup> Vetari verena baregona na ḡimanai eḡabito, eḡori-ḡerevaḡiato vauro, edanaḡiato, ekirato, “Kara ourani ḡegu nokiraḡia?”<sup>20</sup> Ḡia ekirato, “Iuda tarimari na guruḡa ta beḡe vaḡa-moḡonia, boinani beḡene vei-ḡofakau, benamo ḡoi beḡene noḡimu, be Paulo bono tuḡu-variḡoa kanisoro ḡoirana ḡana. Ḡeri veḡofaḡau guruḡana ḡoi beḡene kiramu tu, ḡia ḡeri ura Paulo varina korikori kotari ma beḡene ḡabi.<sup>21</sup> Senaḡi asi bono seḡaḡi-viniri, korana tau mabarari gabana vasivasi (40) bevanaḡia tu beḡe gumuni, ḡia beḡe vaḡa-nogaiani. Ḡia tu kiraḡitore guruḡana gwaḡiḡina ḡekiraḡiato, asi beḡe ḡaniḡanini e dagara ta asi beḡe niuani, beiaḡoni mo, Paulo beḡe vaḡi-maseani. Mo veiḡa beḡene veia ḡana, ḡia toma tu beḡe veikavi, ḡoi ḡemu vaḡa-veve moḡo ḡevaḡa-noga taḡoani.”

<sup>22</sup> Vetari verena baregona na ekiraiato, ekirato, “Au ḡegu bokiraḡi guruḡana maiḡa, tarima ta asi ma bonoa kira-varaia.” Benamo ḡia na mero variḡuna etuḡu-rakaiato.

*Paulo Gavana Feliki ḡenai etuḡu-iaḡoato*

<sup>23</sup> Benamo vetari verena baregona na ḡena vetari ḡorikauna tauri ruarua ma ekearito, benamo ekirarito, ekirato, “Vetari tauri sinau ruarua (200), e hosi ai raḡe tarimari gabana imaima ma gabana ruarua (70), ema auri fiu tauri sinau ruarua (200) boḡono ḡabi-toreri, toma boḡi horaḡauna 9 koloko Kaisarea ḡana boḡono iaḡo ḡana.<sup>24</sup> Paulo bene raḡe hosiri tari maki boḡono rovina-toreri, be Gavana Feliki ḡenai maḡuri boḡono ḡori-iaḡoa ḡana.”

<sup>25</sup> Benamo vetari verena baregona na fefa ta maiḡesina etoreato:

<sup>26</sup> “Au Klaudia Lisia na ḡoi Feliki, gavana tarimamu namo vedaureamu, atore-vinimuni: Avaḡa-namomuni!<sup>27</sup> Iuda tarimari na mai tau ḡeḡabiato, ma dori moḡo ḡevaḡi-maseato.

Senaḡi au aribato, ḡia tu Roma tarimana naima ḡegu vetari tauri ḡesi ḡaiaḡoto, ḡavaḡa-maḡuriato. <sup>28</sup> Au aurato tu bana riba, kara koranai ḡevaḡa-daḡaiato-ḡoi, moḡa lorinai aḡori-variḡoato, ḡeri kanisoro ḡoirana ḡana. <sup>29</sup> Au na adoḡariato tu ḡia ḡeri taravatu ḡaramanai ḡevaḡa-daḡaiani, senaḡi ḡia beḡene vaḡi-masea o dibura numanai beḡene torea korana ta tu asi adoḡariato. <sup>30</sup> Iuda tauri na beḡene vaḡi-masea ḡana, boioḡana ḡetogato varina ḡegu ḡekiraḡito nai, atuḡamaḡito, ḡoi ḡemu ai bana tuḡu-iaḡosia. ḡia ḡevaḡa-daḡaiani tarimari maki akirarito, ḡoi ḡoiramu ai ḡeri vevaḡa-daḡa guruḡari beḡene kiraḡiri.”

<sup>31</sup> Vetari tauri na ḡekirarito veiḡana ḡeveiato. Mo boḡi, ḡia na Paulo ḡeḡabi-iaḡoato mo Antipatri. <sup>32</sup> Elaḡanito vau, vetari tauri kwakuri na ḡerakani tauri ḡeri tanu gabuna ḡana ḡeḡenoḡoito. Hosi tauri moḡo Paulo ḡesi ḡeiaḡoto. <sup>33</sup> Kaisareai ḡea raḡasito, benamo fefa ḡeḡabiato, gavana ḡeviniato, ema Paulo maki ḡevini-vanaḡiatio. <sup>34</sup> Gavana na fefa eiaviato, benamo Paulo edanaḡiatio, ḡia tu kamara gabu tarimana. ḡia eribato Paulo tu Kilikia tarimana nai, <sup>35</sup> ekirato, “Gevaḡa-daḡamuni tarimari beḡema raḡasini vauro, kara ovei-leaiato guruḡana au na baseḡaḡimuni.” Benamo gavana ekirato, Paulo beḡene ḡabi-iaḡoa, Kota numanai beḡene ḡita-ḡaua. Mo Kota numana tu Heroda na maḡurinai eragaiato.

## 24

### *Iuda tarimari na Paulo ḡevaḡa-daḡaiato*

<sup>1</sup> ḡaro imaima ḡekorito murinai, Rubu Veaḡa verena baregona, Anania, Kaisarea ḡana evariḡoto, Iuda vereri kotari e taravatu ma ribana tarimana ta arana Teretulo ḡesi. Mabarari ḡevariḡoto, Gavana Feliki ḡoiranai vauro Paulo ḡevaḡa-daḡaiato guruḡana ḡea kiraḡiatio. <sup>2</sup> Paulo ekea-toḡaiato, benamo Teretulo na Paulo ḡevaḡa-daḡaiato guruḡana ḡoiranai ekiraḡirito, ekirato, “Namo vedaurea veremu Feliki! ḡoi ḡemu veḡitaḡau gaburenai tu maino ai baḡa tanu-mauka kenene, e ḡema bese bene namo ḡana, dagara namori vovoka bovaḡa-variḡu ḡenoḡoiri. <sup>3</sup> Mai tu gabu mabarari ai e ḡaro mabarari ai ḡai na ḡaḡabi-raḡeani, moḡa lorinai ḡoi tu ḡavaḡa-namo baregomuni. <sup>4</sup> Au asi aurani, ḡoi ḡemu taimi bana vaḡa-kori-kavaia, senaḡi anoḡimuni, novetuḡa-ḡwama, asi bono baru, be ḡema guruḡa kubina tu noseḡaḡia. <sup>5</sup> ḡai na mai tau ḡadoḡariato tu, rakava vaḡa-ḡorana tarimana, ḡia na gururaḡe barego evaḡa-ḡorarini, Iuda tarimari tano mabarari ai ḡetanuni fakari ai. ḡia tu Nasareta doḡorona ḡeri veḡorikau tarimana ta. <sup>6</sup> ḡia na tu Rubu Veaḡa maki nevaḡa-rakavaia etato, senaḡi ḡai na ḡaḡabi-tariato, [ḡema taravatu ilailanai baḡana vaḡa-kotaia ḡatato. <sup>7</sup> Senaḡi vetari verena baregona, Lisia, ema raka-toḡato, benamo ma ḡaramana ḡesi Paulo ḡai ḡimama na ema ḡabi-veḡitaiatio. <sup>8</sup> Benamo Lisia ḡena guruḡa ilailanai, ḡia vaḡa-daḡana tarimari tu ḡoi ḡoiramu ḡana beḡe iaḡoma.] ḡoi tauḡemu na ḡia bodanaḡi-ginikauani vauro, ḡia ḡavaḡa-daḡaiani dagarari mabarari tauḡena na bekira-varamuni.” <sup>9</sup> Iuda tarimari maki ḡia ḡesi ḡekauto, ḡekirato mai bekiraḡiri dagarari mabarari tu moḡoni.

### *Paulo ḡena vetoreḡau guruḡana Feliki ḡoiranai*

<sup>10</sup> Gavana na Paulo vetoḡa ta evei-viniato Paulo ma bene guruḡa ḡana, benamo Paulo eguruḡato, ekirato, “Au ribagu, laḡani ḡutuma varau beḡe iaḡo, ḡoi tu mai bese tarimari ḡeri Kota ḡitaḡauna ḡauveina oveiani. Moḡa lorinai au tu ma iakugu ḡesi ḡegu vetoreḡau guruḡana ḡoi ḡoiramu ai akiraḡiani. <sup>11</sup> ḡoi tauḡemu na maki asikauna boraga-doḡariani, ḡaro gabanana ruarua (12) maki roḡosi bene vanaḡia nuḡanai, au tu Ierusema ḡana toma-rakariḡo avaraḡeto. <sup>12</sup> Ma mai au ḡevaḡa-daḡaguni tarimari na ta ḡesi Rubu Veaḡai ḡaveḡare-veḡareto-ḡoi nuḡanai asi ḡedoḡariguto, ema asi ḡedoḡariguto tarimarima avaḡa-vegogorito rubu nuḡanai o gabu tai vanuḡa baregona nuḡanai. <sup>13</sup> Ema mai ḡevaḡa-daḡaguni dagarari maki ḡoi ḡoiramu ai asi beḡe vaḡa-moḡonirini riba.

<sup>14</sup> A mai tu moġoni akirani, au na tu ġai senema ġeri Barau atoma-rakariġo viniani e mo Dabara Variġuna akorana-iaġiani, ma mai dabara ġia tauġeri na tu dabara ġofaġofana ġetoni. Mose ġena taravatu ema peroveta tarimari na ġetorerito guruġari mabarari tu avaġa-moġonirini. <sup>15</sup> Au ġegu tuġamaġikau Barau ġenai e mai tau ġeri tuġamaġikau tu sebona moġo, moġa tu maiġesi: Vei-iobukaiobuka tarimari e vei-rakava tarimari mabarari mase na ma beġe variġisi-ġenoġoini. <sup>16</sup> Moġa lorinai au tu vanaġivanaġi nuġagu bene iobukaiobuka vededegwana aveini Barau ġoiranai e tarimarima ġoirari ai.

<sup>17</sup> Laġani kota vovoka varau ġeiaġoto, au na Ierusalemata araga-kwaneato. Moġa murinai au ma baġenoġoi-iaġo ġegu tarimarima ġeri ai, asi ġeri-ġari tarimari ġeri moni baġabi-iaġo e varevare dagarari Barau bana vinia ġana. <sup>18</sup> Ma au tu taravatu na ekiraġiani ilailanai veiareva veiġana avaġa-koriato nuġanai, Asia tanona na ġeiaġomato Iuda tauri kotari na Rubu Veaġa nuġanai ġedoġariguto. Moġa nuġanai au sevigu ai tu ġutuma-barana ta asiġi, e ta ġesi maki asi aveġare-veġareto-ġoi. <sup>19</sup> Moġeri Iuda tarimari Asia tanona na ġeiaġomato beġere iaġoma, be ġoi ġoiramu ai au beġerema vaġa-daġagu, beġere kira-varamu, au na tu kamara rakava aveiato. <sup>20</sup> A mai tarima maiġeri na ġekiraġi-foforia, au kanisoro ġoiranai aruġato ġaronai, au ġegu ai tu kamara rakava ġedoġariato. <sup>21</sup> Senaġi dagara sebona moġo tu, ġia ġoirari ai aruġato, afararato, akirato, 'Mase tarimari ma beġe variġisi-ġenoġoini atoni naima, ġomi na au toma ġovaġa-kotagu ġotoni.' ”

<sup>22</sup> Mo Dabara, (mai tu Iesu Keriso ġabidadama-vinina dabarana), Feliki tu ma eribaginikauato. Ġia na Kota ma etuġu-naġiato, ekirato, “Vetari verena baregona, Lisia, beraġasini vau, au na ġomi ġemi guruġa bavei-oroġotoani.” <sup>23</sup> Benamo ġia na vetari ġitaġauna tarimana ekiraiato, Paulo dibura numanai beġene ġita-ġaua, senaġi ġitaġauna asi beġene vei-gwaġiġia. Ġatana kotari na ġevaġa-kavaia beġe toni nai tu beġene ġabi-raġeri.

#### *Paulo Feliki e Drusila ġoirari ai*

<sup>24</sup> Ġaro kotari ġeiaġoto muriri ai, Feliki ma ġaraġona Drusila ġesi ġeraġasito. Drusila tu Iuda vavinena. Feliki na Paulo vetuġuna eveito, benamo Paulo eiaġomato, Iesu Keriso ġabidadama-vinina guruġari ekiraġirito eseġaġiato. <sup>25</sup> Senaġi Paulo ġena sisibai tu vei-iobukaiobuka e vevaġa-gwaġiġi ema Barau ġena Kota baregona beiaġomani guruġari ekiraġirito nai, Feliki egarito, benamo ekirato, “Benamo, toma tu noraka roġo, ġaro namona tai vauro ma bana kea-iaġomamu.” <sup>26</sup> Feliki ġena tuġamaġi ta maki, Paulo na moni kota bene vinia. Moġa lorinai ma ekea-ġenoġoi ġenoġoiato-ġoi, ġia ġesi beġene guruġa-guruġa ġana.

<sup>27</sup> Laġani ruarua murinai, Porokio Festo na Feliki ġena gavana ġauveina gabuna eġabiato. Senaġi Iuda tarimari na beġene ura-vinia ġana, Paulo tu dibura numanai eraga-kwaneato.

## 25

#### *Paulo Festo ġoiranai*

<sup>1</sup> Festo beveġitaġauni tanonai eraġasito, ma ġaro toitoi ġekorito murinai, Kaisarea na Ierusalemata ġana evaraġeto. <sup>2</sup> Monai Rubu Veaġa vereri baregori e Iuda ġitaġauna tauri na Paulo ġevaġa-daġaiato guruġari ġea kiraġirito, ma Festo ġenoġiato, <sup>3</sup> ġia bene vaġa-kavari, be Paulo Ierusalemata ġana bene tuġu-iaġoa. Korana Paulo dabara tumanai beġene gana-torea ma beġene vaġi-masea boioġana tu varau ġetogaiato-ġoi. <sup>4</sup> A Festo evaġaveseto, ekirato, “Paulo tu Kaisareai moġea, dibura numanai ġeġita-ġauani, ma au tu mo ġana dori ma aġenoġoi-iaġoni. <sup>5</sup> Be ġemi veġitaġau tarimari neġi au ġesi Kaisarea ġana baġana iaġo, be monai kara evei-leaiato beġene kiraġia, bema ġia na rakava ta eveiato nai tu.”



<sup>6</sup> Festo ġaro imaima toitoi (8) o gabanana (10) ġia ġesi monai ġetanuto vauro, Kaisarea ġana ma evariġoto. Elaġanito vau Kota gabunai ea tanu-tarito, benamo evetuġuto, Paulo ġoirana ġana beġene ġori-iaġomaia ġana. <sup>7</sup> Paulo ema raġasito nai tu, Ierusalemna na ġeiaġomato Iuda tarimari na ġeruġa-ġeġeraġiato, benamo ġevaġa-daġaiato guruġari gwaġiġiri ġutuma ġekiraġirito, senaġina ġeri guruġa tu asi vaġa-moġoniri gaburi. <sup>8</sup> Benamo Paulo ma evaġa-veseto, ekirato, “Iuda tarimari ġeri taravatu, e Rubu Veaġa, ema Roma verena vaġa-rakavari ġana, veiġa rakavana ta asi aveiato.”

<sup>9</sup> Senaġi Festo na Iuda tarimari bene vaġa-iakuri ġana Paulo edanaġiato, ekirato, “Ġoi ourani Ierusalemna ġana bono varaġe, be mai ġevaġa-daġamuni guruġari tu monai vau bana seġaġiri ba?” <sup>10</sup> Paulo evaġa-veseto, ekirato, “Au tu Kaisara, Roma ġeri vere, ġena Kota gabuna ġoiranai aruġani, be mainai Kota na vevaġa-iobuka veiġana au ġegu ai bene veia. Au na Iuda tarimari vaġa-rakavari veiġana ta tu asi aveiato, ġoi tauġemu maki ribamu ginikau. <sup>11</sup> Bema taravatu asi akorana-iaġiato o mase veiġana rakavana ta aveiato, voina tu bana mase neganai, au tu asi akira-sirivaġini bana mase ġana tu-na. Senaġi bema mai Iuda tarimari ġeri vevaġa-daġa guruġari au iatagu ai ġekiraġirini tu asi moġoni nai, tarima ta asi ġena seġuka au bevini-vanaġiguni ġia ġeri ai. Au aurani tu Kaisara na bene seġaġigu!”

<sup>12</sup> Benamo Festo ma ġena kanisoro ġesi ġeguruġa-guruġato murinai, Paulo evaġa-veseato, ekirato, “Kaisara ġenai bonoġinoġi lorinai, Kaisara ġenai boiaġoni!”

#### *Paulo Agripa e Berenike ġoirari ai*

<sup>13</sup> Ġaro kotari ġevanaġito murinai, vere Agripa e tobana Berenike, Festo rakaġitana e beġene vaġa-namoa ġana, Kaisarea ai ġeraġasito. <sup>14</sup> Monai ġaro kota vovoka ġetanuto murinai, Festo na Paulo guruġana vere ġena ekiraġi-ginikauto, ekirato, “Tarima ta tu mainai maiġa. Ġia tu Feliki na dibura numai eraga-kwaneato. <sup>15</sup> Au Ierusalemna ġana aiaġoto nai tu, Iuda ġeri Rubu Veaġa vereri baregori e Iuda vereri na Paulo ġevaġa-daġaiato guruġari ġegu ai ġeġwa-iaġorito, e au ġenoġiguto, ġekirato, ġia ġenai vevaġa-iobuka veiġana bana veia. <sup>16</sup> Senaġi au na avaġa-veserito, akirato, ‘Ġita Roma tarimara ġera maġuri nuġanai ġevaġa-daġaiani tarimana tu asi roġo bita vaġi-mase guineani. Ġia tu ġevaġa-daġaiani tauri ġesi beġe raka-vegogoni, ema ġevaġa-daġaiani tarimari ġoirari ai ġevaġa-daġaiani guruġari bevaġa-veve guinerini roġo.’ <sup>17</sup> Moġa lorinai ġia ema au mainai ġaraġasito nai tu, au tu asi ma avaġa-nogato. Senaġi elaġanito nai, Kota gabunai atanu-tarito, benamo akirato, Paulo ġeġori-iaġomaia atato. <sup>18</sup> Vevaġa-daġa tauri ġeruġa-vaisito nai, au mataboru atuġamaġito tu, veiġa rakavari vevaġa-daġari beġe veini atato, senaġi asiġina. <sup>19</sup> Ġia ġeri ġuruġa mabarari tu, tauġeri ġeri toma-rakariġo dabarari veġare-veġareri kotari, ema tarima ta arana Iesu guruġana moġo. Iesu tu emaseto, senaġi Paulo ekirani, ġia tu maġuri. <sup>20</sup> Mo dagara dabarari vetauvetauri au ġegu ai tu egwaġiġito. Moġa lorinai au na Paulo adanaġiato, eurani Ierusalemna ġana bene iaġo ba, monai vau ġia ġevaġa-daġaiani guruġari bana vaġa-iobuka iobukari. <sup>21</sup> Senaġi Paulo enoġinoġito, dibura numanai moġo beġene ġita-ġaua, bene iaġo mo, Kaisara na vauro bene seġaġia. Moġa lorinai akirarito, dibura numanai beġene ġita-ġaua, bene iaġo mo, Kaisara ġenai bana tuġu-iaġoa.”

<sup>22</sup> Benamo Agripa na Festo ekiraiato, ekirato, “Au aurani mai tarima tauġegu na bana seġaġia.” Festo evaġa-veseto, ekirato, “Boinani vau boseġaġiani.”

<sup>23</sup> Elaġanito, benamo Agripa e Berenike tu ġeveġabi-raġeto, dabuġa marevari maki barego lelevaġiri ġeveirito, benamo ma marevari ġesi Kota numanai ġema raka-toġato, vetari ġorikauna tarimari baregori e vanuġa barana tarima baregori ġesi. Festo eguruġato, benamo Paulo ġema ġori-toġaiato. <sup>24</sup> Benamo Festo ekirato, “Kini Agripa e ġai ġesi boġoma fofori tarimami mabarami! Mai tau maiġa ġoġitaiani. Ġia tu Iuda tarimari Ierusalemna e mainai Kaisareai maiġeri na ġevaġa-daġaiato guruġana au ġegu ai ġeġwa-iaġoato. Ġia ġekoġoto, ġekirato, ġia tu asi ma bene maġuri-iaġo. <sup>25</sup> Senaġi ġia ġenai veiġa ta asi adoġariato bene mase ġana. Ma ġia tauġena, Kaisara aranai

enoḡinoḡito. Moḡa lorinai, ḡia tu Kaisara ḡenai bana tuḡu-iaḡoa atato. <sup>26</sup> Senaḡi au tu asi ariba-ginikauni, ḡita ḡera vere barana ḡenai fefa tu kamasi batoreani. Moḡa lorinai ḡomi ḡoirami ḡana baḡori-iaḡomaia, e namo barana tu, ḡoi ḡoiramu ḡana, Kini Agripa. Be mainai sidanaḡi-ginikaua, be mai vetauvetauna kara bitana doḡaria guruḡana tu Kaisara ḡena bana tore-iaḡoa. <sup>27</sup> Korana au atuḡamaḡini tu asi roroḡoto, mai dibura tarimana au na batuḡu-iaḡoani, a vaḡa-daḡana guruḡana tauna korikori tu asi batuḡu-kauani.”

## 26

*Paulo tauḡena* vetoreḡau guruḡari ekiraḡirito Agripa ḡoiranai

<sup>1</sup> Agripa na Paulo ekiraiato, ekirato, “Maoro avinimuni, tauḡemu novevarifiu.” Benamo Paulo ḡimana eḡabi-vaishiato, benamo ḡena vetoreḡau guruḡari esinaiato, ekirato: <sup>2</sup> “Kini Agripa! Au tu aiakuni, korana Iuda tarimari na ḡevaḡa-daḡaguni dagarari mabarari tu, toma ḡoi ḡoiramu ai avaḡa-veserini. <sup>3</sup> Korana tu Iuda seneri na veḡata ḡeri veiḡa e veḡareveḡare mabarari ḡoi tu ma ribamu ginikau. Moḡa lorinai anoḡimuni, bono vevaḡa-gwaḡiḡi, be ḡegu guruḡa bono seḡaḡiri.

<sup>4</sup> Au aiḡesi atanuto, misigu na veḡata eiaḡomato mo toma, ḡegu tanobarai e Ierusalem, Iuda tarimari mabarari tu ma ribari. <sup>5</sup> Au tu tovotovona na veḡata ḡeribaguto, ḡeguruḡa-fofori bema ḡeurani nai tu. ḡegu maḡuri evesinato na veḡata au tu Farisea doḡorona tarimagu. Toma-rakariḡo korana-iaḡina ḡevaḡa-gwaḡiḡiani doḡorona. <sup>6</sup> Ma toma au Kota gabunai bama ruḡa, korana tu Barau na ḡai senema ekira-torerito guruḡana atuḡamaḡi-kauani nai. <sup>7</sup> ḡai ḡema doḡoro gabanana ruarua (12) na mo guruḡa-tore ḡevaḡa-moḡoniani, ma ḡenari-taḡoani bemoḡonini naima, ḡia na Barau ḡetoma-rakariḡoani boḡi-laḡani ma kokoreri ḡesi. Vere o, au tu mo tuḡamaḡikau ḡaramanai Iuda tarimari na ḡevaḡa-daḡaguni. <sup>8</sup> Karase nai ḡomi Iuda tarimami tari tu ḡokirani, Barau na mase tarimana tu asi ilaila ma bevaḡa-variḡisiani?

<sup>9</sup> Au maki atuḡamaḡito, dagara ḡutuma gorogoro bana veiri, Iesu Nasareta tarimana arana bana lau-ḡaua ḡana. <sup>10</sup> Ierusalem, au tu moḡesi aveito-ḡoi. Rubu Veḡa vereri baregori na seḡuka ḡeviniguto, benamo Barau ḡena tarimarima veaḡari ḡutuma dibura numanai atorerito-ḡoi, ema beḡene vaḡi-maseri ḡetato-ḡoi nai tu, au maki beḡene mase guruḡana avaḡa-moḡoniato-ḡoi. <sup>11</sup> ḡaro vovoka Iuda tarimari ḡeri rubu tatai araka-toḡato-ḡoi, benamo akwari-korukorurito-ḡoi, ema Iesu beḡene kiraḡi-rakavaia ḡana avaḡa-urarito-ḡoi. Au na abaruvini-rakava rakavarito-ḡoi, naima vanuḡa baregori boruri ḡari maki aiaḡoto-ḡoi, bana vaḡa-midigu midiguri e bana lai-lausilaisiri ḡana.”

*Paulo evetuḡamaḡi-kureto* varina

<sup>12</sup> “Mo veiḡa uranai Rubu Veḡa vereri baregori na maoro ḡeviniguto ema ḡetuḡuguto, Damaseko ḡana aiaḡoto. <sup>13</sup> Benamo, Verebara, au tu dabara na roḡo aiaḡoto-ḡoi, a ḡaro tu tubuamai, benamo ḡaro mamana maki evanaḡiato mamana, guba na emariḡoto, aḡitaiato, ma au ḡesi ḡaiaḡoto tarimari e au enanagi-tarimato. <sup>14</sup> ḡai mabarama tano ai ḡaketo-tarito. Benamo au na garo ta aseḡaḡiato, Heberu garo ai au evaḡa-guruḡaguto, ekirato, ‘Saulo, Saulo! Karase nai au ovaḡa-rakavaguni. Mani ḡoi na tu ḡau masakona matana ofudiani, naima ḡemu ai tu gwaḡiḡi ema tauḡemu ovevaḡa-rakavani.’ <sup>15</sup> Benamo au akirato, ‘Vereḡauka, ḡoi tu deikara?’ Vereḡauka evaḡa-veseto, ekirato, ‘Au tu Iesu, ḡoi na ovaḡa-rakavaguni tarimagu. <sup>16</sup> Senaḡi novariḡisi, ema noruḡa-tari. Au ḡoi ḡemu ai bafofori korana tu navaḡa-ruḡamu, be au ḡegu vetuḡunaḡi tarimamu ai bono iaḡo ḡana. Ema toma kara boḡita dagarari e ḡoirai kara bavaḡa-ḡitamuni dagarari maki tarima tari ḡeri bonoa kiraḡi-foforiri ḡana. <sup>17</sup> Au na Isaraela tarimari e irau bese tarimari ḡerina bavaḡa-maḡurimuni. ḡoi tu au na atuḡumuni, <sup>18</sup> matari bono vaḡa-fafari, ema mukuna

na bono ġori-kureri, be mamai beġene ruġa, ema Satani ġena seġuka na bono ġabi-vaġiri, be Barau rekenai beġene ruġa. Benamo Barau na ġeri rakava bene tuġamaġi-fitoġari ema Barau na eġabi-viriġirito ma evaġa-veaġarito tarimari ġesi gabu beġene ġauna, korana au ġegu ai ġeveġabidadamani nai.’

*Paulo na ġena ġauvei ekiraġiani*

<sup>19</sup> Moġa lorinai, Kini Agripa, au tu mo mata-vanaġi guba na ema foforito dagarana ġenai tu asi akira-sirivaġito. <sup>20</sup> Guine tu Damaseko ai e Ierusalem ai aġobatato, moġa murinai Iudea tanona mabaranai e irau bese fakari ai maki. Au aġobatato-ġoi nai tu, akirarito-ġoi, ġeri rakava ġerina beġene vetuġamaġi-kure, Barau ġenai beġene iaġo. Benamo ġeri vetuġamaġi-kure tu ġeri veiġa na beġene vaġa-moġoniri. <sup>21</sup> Mo tu moġa ġaramanai Iuda tarimari na Rubu Veaġa nuġanai ġeġabi-tariguto, ġevaġi-masegu ġetato. <sup>22</sup> Senaġi mo ġaro na beiaġoma mo maitoma, au tu Barau na evaġa-kavaguni. Moġa lorinai mai bama ruġa-tari, tarima mabarari misina na beiaġo baregona ġoirari ai ama guruġa-foforini. Au na kara boruna ta tu asi akiraġiani, senaġina peroveta tarimari na e Mose na kara ġekiraġiato beġorani dagarana moġo. <sup>23</sup> Dagarana maiġa, Keriso tu bene midigumidigu, ma tau giniguinena mase na ma bene variġisi-ġenoġoi, benamo Barau ġena mama varina Iuda tarimari e irau bese tarimari ġeri ai bene vari-fiua.”

<sup>24</sup> Paulo moġesi evetoreġauto nuġanai tu, Festo na efarara-viniato, ekirato, “Paulo, ġoi tu bobabo! Ġemu riba baregona na evaġa-babomuni.” <sup>25</sup> Paulo evaġa-veseto, ekirato, “Verebara Festo, au tu asi bababo. Au na kara akiraġirini guruġari tu moġoni e maġata. <sup>26</sup> Kini Agripa! Au tu ma kokoregu ema asi garigu ġesi ġoi bavaġa-guruġamuni, korana mai dagara maiġeri mabarari ġoi tu ma ribamu. Au ribagu, mai bakiraġiri dagarari mabarari ġoi ġemu ai ta tu asi bevekure-toġa, korana maiġeri dagara tu vekuretoġa gabunai ta asi eġorato. <sup>27</sup> Kini Agripa, ġoi na mai peroveta tarimari ġeri guruġa ovaġa-moġonirini ba? Au ribagu ġoi na ovaġa-moġonirini.”

<sup>28</sup> Agripa na Paulo ekiraiato, ekirato, “Mai horaġauna kotunai, dori moġo nuġagu bovaġa-moirai, benamo dori moġo Keriso bavaġa-moġonia.” <sup>29</sup> Paulo evaġa-veseto, ekirato, “Horaġauna kubinai ba maukanai, senaġi au na Barau anoġiani, ġoi e init-oma au ġeseġaġi-taġoguni tarimami mabarami au kavana boġoro vei, senaġina mai ġebarubaruguto kavana moġo asiġi.”

<sup>30</sup> Paulo moġesina eguruġa-ġosito, benamo kini, e gavana, e Berenike, ema ġia ġesi ġetanuto tarimari mabarari ġevariġisito. <sup>31</sup> Ġeraka-rosito murika ġana, benamo ġeguruġa-guruġato nai tu ġekirato, “Mai tau tu veiġa rakavana ta voina tu bere mase o dibura numai bere tanu veiġana ta tu asi eveiato.” <sup>32</sup> Benamo Agripa na Festo ekiraiato, ekirato, “Bema asi bere kira, Kaisara na ġena guruġa benea seġaġia asi beresi nai, mai tau tu tara ruġa-vaġia.”

## 27

*Paulo Roma ġana eiaġoto*

<sup>1</sup> Itali ġana baġana iaġo guruġana emoġonito nai tu, Paulo e dibura tarimari kotari tu vetari ġitaġauna tarimana arana Iulio ġimanai ġetorerito. Ġia tu Kaisara ġena vetari doġorona nuġanai. <sup>2</sup> Ġai tu Adramitio boutina tai ġaraġeto. Mo bouti tu Asia tanona koneri ġari beiaġoni boutinai. Benamo mo bouti na ġadauto. Makedonia tarimana ta arana Aristako maki ġai ġesi ġaiaġoto. Ġia tu Tesalonika na eiaġomato.

<sup>3</sup> Ma elaġanito vau Sidono ai ġaraġasito. Iulio na Paulo evetuġa-ġwaiato, benamo maoro eviniato, karona ġeri ai bene iaġo, be ġena ura dagarari beġene vinia. <sup>4</sup> Mo gabu ġaraga-kwaneato nai, Saipras motumotu ravaravana rekena na ġaiaġoto, korana iavara tu ġoirama na eiaġomato-ġoi. <sup>5</sup> Kilikia e Pamfilia iatari na ġaraga-vanaġito, ġaiaġoto, Mira ai ġadaro-kauto. Mira tu Likia tanonai. <sup>6</sup> Monai vetari ġitaġauna tarimana na Alesandria boutina, Itali ġana beiaġoni boutina, edoġariato, benamo monai evaġa-raġe vanaġimato.

<sup>7</sup> Ĝaro vovoka tuĝama tuĝama moĝo ĝadau-iaĝoto-ĝoi, e ma vekwaraĝima ĝesi Kenido sevinai ĝaraĝasito. Monai iavara na eraga-ĝaumato lorinai, Krete motumotu ravaravana rekena na ĝaiaĝoto. Mo tu Salmone duduna reke ta kefona na. <sup>8</sup> Ma vekwaraĝima ĝesi fenu rikiri na ĝaiaĝoto mo, gabu ta arana Darokau Gaburi Namori ai ĝaraĝasito. Mo gabu e Lasea vanuĝana vefakari tu asi manaĝa.

<sup>9-10</sup> Ĝaro vovoka monai varau ĝekorito, e bouti na monana rei-iaĝo tu gwaĝiĝi e ma garina, korana ĝaniveaĝa ĝarona maki varau ekorito. Moĝa lorinai Paulo na ekiratoreĝaurito, ekirato, “Tau mabarami, au aribani ĝita ĝera iaĝoiaĝo tu berakavani. Ĝera farefare mabarari beĝe rekwerekwani ema bouti maki berakava-moĝovaĝini. Dia maiĝeri dagara moĝo, senaĝi ĝita ĝera maĝuri maki bita fitoĝarini.” <sup>11</sup> Senaĝi vetari ĝitaĝauna tarimana na tu bouti taritarina tarimana baregona e bouti tarimana garori eseĝaĝirito, a Paulo ĝena guruĝa tu asi eĝabi-raĝeato. <sup>12</sup> Mo darokau gabuna faraka e iavara ĝueri ai tu asi namo. Moĝa lorinai ĝutuma na tu ĝeurato baĝana dau-tovo, be Foeniki ai vau faraka e iavara ĝueri baĝana ĝabiri. Foeniki tu Krete ai darokau gabuna ta. Reke ta tu iavaraĝere (o south-west) eĝoiraiiani, o reke ta tu buibara (o north-west) eĝoiraiiani.

#### *Iavara na davara evaĝa-rakavaiato*

<sup>13</sup> Iavaraĝere evesinato, tuĝana moĝo eĝauto-ĝoi nai, ĝia ĝetuĝa-maĝito tu ĝeri ĝaro namona beĝe doĝaria. Moĝa lorinai dogo ĝeinu-raĝeato, benamo Krete fenu rikiri na moĝo ĝedau-iaĝoto. <sup>14</sup> Asikauna tu iavara baregona arana koiviru, motumotu iataragena na emariĝoto. <sup>15</sup> Bouti ai ema kwari-kauato, benamo ĝai tu asi ĝema daunaĝi dabarana. Ĝoira ĝana iaĝo uradikana asi ĝaveito, senaĝi iavara ĝena urai moĝo ĝadauto. <sup>16</sup> Motumotu misina arana Kauda gabigabina rekena ĝadau-toĝato vau, ravaravana na ĝadau-iaĝoto. Monai vauro bouti misina ĝobina ĝatorea ĝatato, vaĝa-maĝurina uranai ĝavekwaraĝi-rakavato. <sup>17</sup> Ĝia na bouti misina ĝeinu-raĝeato bouti tuĝuna ĝana, benamo bouti ĝesi ĝebaru-kafaiato bene ĝabi-taria ĝana. Ema ĝegarito, be bouti faraina maki ĝeinu-riĝoato, benamo ĝareito moĝo. Ĝia ĝeri gari korana tu iavara na bouti beĝwa-iaĝoani mo Sirtis ai Afrika rekena davara sefana mirina tai bea tanukauni garina. <sup>18</sup> Mo iavara baregona ema ureure baregori ĝesebonato nai, bouti maki dori moĝo ĝevei-buruato-ĝoi. Moĝa lorinai elaĝanito nai tu, bouti ai ĝeĝurarito farefareri mabarari davarai ĝebubu-reirito, bouti bene meraĝa ĝana. <sup>19</sup> Ĝaro vaĝa-toitoinai tauĝeri ĝimari na bouti farefarena ma ĝefiu-riĝorito. <sup>20</sup> Ĝaro ĝutuma varau ĝeiaĝoto, ma ĝaro e visiĝu asi ĝefoforito, ema iavara maki ebarego-sirivaĝito. Benamo ĝema tuĝamaĝikau mabarari ĝekorito, korana ĝatuĝamaĝito, ĝai tu asi ĝema maĝuri dabarana.

<sup>21</sup> Ĝaro ĝutuma asi ĝeĝaniĝanito murinai, Paulo ĝoirari ai eruĝato, benamo ekirato, “Ĝomi tau, ĝomi tu au garogu ĝoro seĝaĝia, be Krete na asi tara dau-rosi; be mai farefare maiĝesi asi tara bubu-fitoĝari. <sup>22</sup> Senaĝi toma au na alaunaĝimini, akirani, boĝono kokore! Korana tu ta asi bomaseni. Senaĝi bouti ĝereĝana moĝo moĝoni berakava-moĝovaĝini. <sup>23</sup> Au tu Barau ĝena tarima ta ema au tu ĝia vetuĝunaĝina aiaĝo-vinini. Ĝoraĝani boĝi, ĝia ĝena aneru ta sevigu ai ema ruĝa-tarito, <sup>24</sup> benamo ekirato, ‘Paulo, asi bono gari. Ĝoi tu Kaisara ĝoiranai roĝo boa ruĝani, ema Barau ĝena namo ĝoi ĝemu ai ĝenana, ĝoi ĝesi boĝo iaĝoma tarimari mabarari maĝuri beĝe doĝariani.’ <sup>25</sup> Moĝa lorinai, ĝomi tau, au na akiramini, boĝono kokore. Korana au na Barau tu avaĝa-moĝoniani, kara aneru na bekira-varagu tu bekiraĝiri ilailanai beĝe ĝorani. <sup>26</sup> Senaĝi ĝita tu iavara na motumotu tai bea kwari-kaurani.”

<sup>27</sup> Boĝi vaĝa-gabanana vasivasi (14) ĝai tu Adria Davaranai iavara na ekwari-rakao rakaomato-ĝoi. Boĝi nuĝanai bouti ĝwaragana tauri ĝevemami-raĝito, ĝai tu tano varau ĝakavinaĝiato. <sup>28</sup> Moĝa lorinai varo dudunai dagara metona ta ĝebaru-kauato, benamo davarai ĝefiu-reiato. Moĝa nuĝanai ĝeribato, davara ĝena variĝo tu 37 mita kavana. Asi luana ma ĝeĝitaiato, monai davara ĝena variĝo tu 27 mita moĝo. <sup>29</sup> Bouti fore ĝeri ai beverarakauni garinai, bouti murina rekena dogo vasivasi ĝefiu-reirito. Benamo

ġeġauġauto bene raga-laġani ġana. <sup>30</sup> Bouti ġwaragana tauri ġeri ura tu beġene raga-  
lema. Moġesina naima ġia na bouti misina dobu ai ġetore-reiato, ġevei-ġofakauto bouti  
ġoiranai dogo kotari moġeri ġeiaġoto, ġea tore-riġori ġetato. <sup>31</sup> Senaġi Paulo na vetari  
ġitaġauna tarimana e vetari tauri ekirarito, ekirato, “Bema bouti ġwaragana tauri bouti  
ai asi beġe tanuni nai tu, ġomi maki asi boġo maġurini.” <sup>32</sup> Moġa lorinai vetari tauri na  
bouti misina varori ġekari-ġuturito, benamo ġevaġa-rei kwareġaiato.

<sup>33</sup> Dori elaġanito-ġoi nai, Paulo na ġia mabarari enoġirito, ġaniġani kota beġene  
ġani. Ġia ekirato, “Ġomi tu ġaro gabanana vasivasi (14) boġo vaġa-noga-iaġia, kara ta  
roġosi ġoro ġania. <sup>34</sup> Moġa lorinai boġono kokore e maġuri tuġamaġinai anoġimini,  
ġaniġani kota ġoġani. Korana ġomi debami ġuiri tu sebna ta maki asi berekwa-rekwani  
bene. <sup>35</sup> Moġesi ekirato murinai, ġia na beredi ta eġabiato, benamo ġia mabarari ġoirari  
ai Barau evaġa-namoato, ma edudu-ġutuato, benamo eġaniato. <sup>36</sup> Ġia mabarari maki  
nuġari ġevaġa-gwaġiġirito, benamo ġeġaniġanito. <sup>37</sup> Bouti nuġanai ġai mabarama tu  
276. <sup>38</sup> Ġia mabarari ġeġani-maseto, benamo bouti bene meraġa uranai, widi tu davarai  
ġefiu-reirito.

#### *Geta o ureure na bouti ebota-kirakiraiato*

<sup>39</sup> Elaġanito nai, bouti ġwaragana tauri na tanobara vetoġana tu asi ġeġita-ginikauato.  
Senaġi ġaruka tanobara na davara ġana eraka-rosini, ma fenuna koutoġana ġesi moġo  
ġeġita-iaġoato. Benamo ġetuġamaġito, bema ma dabara nai tu, monai bouti beġere  
vaġa-raga-raġea ġetato. <sup>40</sup> Benamo dogo varori ġekari-ġuturito, davarai ġeraga-  
kwanerito. Mo hora sebonai leva o bara ġebaru-taririto varori maki ġeruġarito. Benamo  
ġoira rekenai farai ġediuato, iavara na ġoira fenuna ġana bene kwari-iaġori uranai.  
<sup>41</sup> Senaġi bouti tu semure ġenai everarato, benamo etanukauto. Bouti ġoirana tu  
evedaġi-nunuto, a murina rekena tu ureure na ebota-kirakiraiato, e eveluki-rovorovoto.  
<sup>42</sup> Vetari tauri ġeboioġato, dibura tarimari tu beġene vaġi-maseri, korana beġe nau-  
rakani, benamo beġe raga-lemani garina. <sup>43</sup> Senaġi vetari ġitaġauna tarimana ġena ura  
tu Paulo bene vaġa-maġuria, moġa lorinai ġia na ekira-ġoirito, mo veiġa asi beġene  
veia. Benamo ma nau ribari tauri ekirarito, davarai ġeburi-rei, benamo beġene nau-  
guine-iaġo fenu ġana. <sup>44</sup> A tarima mabarari tu ġau tubiri o bouti taviri tari beġene ġabiri  
vau, ġia muriri na beġene rei-iaġo. Mo dabarai mabarari tanobara ġea doġariato, ta asi  
erekwa-rekwato.

## 28

#### *Malta motumotunai*

<sup>1</sup> Ta davarai kamasi ta asi eveito, mabarama namo moġo kone ai ġaraġekauto. Benamo  
monai vauro ġaribato, mo motumotu arana tu Malta. <sup>2</sup> Mo motumotu tarimari na ġai  
ġemai tu veiġa namo vedaureana ġeveiato. Korana mo ġura e nagure nuġanai ġema  
karava bara ta ġegasiato ġai bene tunu-seġuseġuma ġana. <sup>3</sup> Paulo eiaġoto lako degona  
ta ea ġabiato, benamo karavai ema tore-raġeato. Mota ta mo lako degonai karava  
gugurana na eġabiato, benamo ema nene-rosito, ma Paulo ġimanai ekafukauto. <sup>4</sup> Mo  
motumotu tauri na mo mota Paulo ġimanai ġerokautaġo ġeġitaiato, benamo tauġeri  
ġevemugu-vinito, ġekirato, “Asi ġofaġofa, mai tarima tu vevaġideba tarimana. Korana  
davara na tu benau-maġuri, senaġina godio vavinena Dike tu asi veġata eurani ġia bene  
maġuri.” <sup>5</sup> Senaġi Paulo na mo mota tu karavai ekora-fiuraġeato, ma Paulo tu rakava ta  
asi eġoitaġoato. <sup>6</sup> Tarima ġetuġamaġito, Paulo tauġanina tu toma egoba-vaisi-raġeni, ba  
toma eketo-tarini, benamo emaseni. Ġevaġa-noga manaġato, senaġi Paulo ġenai kara  
rakavana ta tu asi eġorato. Benamo ġia ma ġevetuġamaġi-kureto, benamo ġekirato, “Ġia  
maki barau ta!”

<sup>7</sup> Mo gabu e motumotu tauna baregona arana Publio. Ġia ġena gabu tu asi manaġa. Ġia  
na eġabi-raġemato, e ġaro toitoi veġata ġia ġena varivari tarimamai evaġa-iaġomato.  
<sup>8</sup> Publio tamana tu keve e efurito-ġoi, be genagenai egenataġoto-ġoi. Paulo ġenai  
eraka-toġato, ma eġuriġurito, ema ġimana iatanai etore-kaurito, benamo ġena keve

enamoto. <sup>9</sup> Mo veiġa eġorato, benamo mo motumotu ai keve tarimari mabarari Paulo ġenai ġeiaġoto, benamo ġia na ġeri keve ġerina evaġa-namorito. <sup>10</sup> Ġeri varevare dagarari vovoka ġevinimato. Ma ġadau ġana bakunai tu ġema iaġoiaġo ai baġa uravirinini dagarari ma ġevinimato.

#### Romai ġaraġasito

<sup>11</sup> Ġue toitoi murinai Alesandria boutina tai ġaraġeto. Mo bouti ai tu barau arana Dios natuna kafa merori ruarua vetoġari o fikisari ġeberarito. Mo bouti maki faraka e iavara ġueri tu mo motumotu ai edoġaririto. <sup>12</sup> Ġaragato mo Sirakuse ai ġaraġasito. Monai ġaro toitoi ġatanuto. <sup>13</sup> Monana ġadau-ġeġeraġi-iaġoto mo Regio. Ġaro ta evanaġiato murinai, gabina iavarana etoġato, ma ġaro vaġa-ruaruanai vauro Puteoli ai ġaraġasito. <sup>14</sup> Monai tarikaka kotari ġadoġaririto. Ma ġaro imaima ruarua (7) tu ġia na monai ġeġabi-tarimato. Monana vau ġaraka-iaġoto Romai ġaraġasito. <sup>15</sup> Monai tarikaka kotari varima ġeseġaġiato, benamo ġai ġemai ġeiaġomato mo, vanuġa keiri arari Apia-Foru e Taven-Toi ġana. Paulo na eġitarito, benamo Barau evaġa-namoato, e tauna egwaġiġito.

#### Roma nuġanai

<sup>16</sup> Romai ġaraġasito nai, Paulo tu maoro ġeviniato, ġereġana bene tanu. Senaġi vetari tauna ta na moġo bene ġita-ġaua. <sup>17</sup> Ġaro toitoi ġevanaġirito murinai, Paulo na Iuda ġedebaiato-ġoi tauri ekea-vegogorito. Ġema raka-vegogoto, benamo ġia na evaġa-guruġarito, ekirato, “Tarikakagu, au na ġera tarima ta asi avaġa-rakavaiato, ema senera ġeri veiġa maki asi avaġa-rakavarito. Senaġi au tu Ierusalem ai ġeġabiguto dibura tarimana ta noġa, benamo Roma ġeri gavamani ġimari ai ġetore-kauguto. <sup>18</sup> Ġia na ġedanaġiguto, ma ġegu guruġa ġeseġaġiato nuġanai tu ġeriba-maoroto, au tu asi ġegu vei-rakava ema beġene vaġi-masegu korana ta maki asi ġedoġariato. Moġa lorinai ġeurato beġene tuġu-vaġigu. <sup>19</sup> Senaġi Iuda tarimari na mo ura tu asi ġeġabi-raġeato. Moġa lorinai au tu asi ġegu dabara ta, naima anoġi-noġito Kaisara na ġegu guruġa bene seġaġia. Dia au tu ġegu tarimarima navevaġa-maoro-viniri ġana atato. Asiġi. <sup>20</sup> Moġa lorinai bakea-iaġomami, au ġesi sima guruġaguruġa ġana. Korana Isaraela ġena tuġamaġikau lorinai au maiġesi ġebarubaruguto.”

<sup>21</sup> Ġia na ġevaġa-veseato, ġekirato, “Ġoi guruġamu fefana ta Iudea na asi ġadoġariato. Tarikakara monana ġeiaġomato tauri na maki varimu rakavana ta asi ġekiraġiato, be asi ġaseġaġiato. <sup>22</sup> Senaġi ġai ġaurani tu ġoi ġemu tuġamaġi guruġana baġana seġaġia. Korana gabu mabarari ai tarimarima na ġoi na mai doġoro tu ġerori-toreani.”

<sup>23</sup> Moġa lorinai ġia na ġaro ta ġeġabi-viriġiato. Mo ġaro ai tarima-rima ġutumabara Paulo ġena tanu gabuna ġana ġeiaġoto. Boġiboġi na veġata evesinato eiaġoto mo lavilavi, Paulo na Barau ġena Basileia eġobata-iaġiato. Ema Mose ġena taravatu na e peroveta tauri ġeri buka na Iesu varina ġia ġeri ekiraġi-ginikauto, Iesu beġene vaġa-moġonia uranai. <sup>24</sup> Tarima kotari na tu ġena guruġa ġeġabi-raġeato, a kotari na tu asi ġevaġa-moġoniato. <sup>25</sup> Ġia nuġari tu dia sebona, moġa lorinai ġeraka-rovorovoto. Senaġi roġosi roġo beġene raka nuġanai, Paulo na guruġa ta ekiraġiato, maiġesi ekirato, “Iauka Veaġa peroveta tarimana Isaia ġenana ġomi senemi tu guruġa moġonina ekira-vararito.

<sup>26</sup> Korana iniġesi ekirato,  
‘Noiaġo maiġeri tarima ġeri ai,  
benamo bono kira:  
Seġaġi tu boġo seġaġini,  
senaġi asi boġo riba-maoroni.

Ġita tu boġo ġitani,  
senaġi asi boġo ġita-fakani.

<sup>27</sup> Korana maiġeri tarima  
nuġari tu mukuna,  
seġari tu vekodobeġau,

ema matari maki bubu.  
 Irau matari na beḡe ḡitani  
 e seḡari na beḡe seḡaḡini  
 e beḡe tuḡamaḡi-fakani,  
 benamo beḡe vetuḡamaḡi-kureni  
 ema bavaḡa-namorini garina.

(Barau tu moḡesi ekirani).<sup>7</sup>

<sup>28</sup> Moḡa lorinai au aurani ḡomi boḡono riba, Barau ḡena vevaḡa-maḡuri varina tu irau bese tarimari ḡeri ai etuḡu-iaḡoato, be ḡia na beḡe seḡaḡiani!” [<sup>29</sup> Paulo moḡesi eguruḡato murinai, Iuda tarimari ḡerakato, ma tauḡeri fakari ai moḡo veḡareveḡare baregona ta ḡeveiato.]

<sup>30</sup> Laḡani ruarua tauḡena na edavaiato-ḡoi numanai etanuto. Ma ḡia ḡenai ḡeiaḡomato-ḡoi tarimari mabarari eḡabi-raḡerito-ḡoi. <sup>31</sup> Barau ḡena Basileia, (ḡena veḡitaḡau seḡukana evaḡa-ruḡaiani maiḡa), guruḡana eḡobata-iaḡi vinirito-ḡoi, ema Vereḡauka Iesu Keriso varina evaḡa-ribarito-ḡoi ma kokorena ḡesi. Ma tarima ta na tu asi ma ekiraḡoiato-ḡoi.

## PAULO ĠENA TORETORE ROMA EKALESIARI ĠERI

Roma vaġa-foforina guruġari

Paulo na mai fefa Roma ekalesiari ġeri tu laġani 56 ema 57 fakari nuġari ta etoreato, mo tu Korinto ekalesiari vaġa-toitoina ma evarivaririto nuġanai etore-vinirito; mai tu Iesu emaseto murinai etoreato.

Paulo ġena ura baregona Roma ġana bene iaġo, senaġi Ierusalemata ġana eiaġoto roġo (Apostolo 19:21). Monai Iuda tarimari tari na ġeġabi-tariato, ma ġevaġia ġetato. Senaġina Barau na enari-ġauato, ma Roma ġana bene iaġo dabarana ekeoato. Moġa lorinai Paulo tu Roma ġana eiaġoto laġani 59 nuġanai kavana.

Paulo Roma ġana tu roġosi bere iaġo nuġanai, mai fefa etore-vinirito. Paulo ġena ura baregona tu, Barau ġena Vari Namona ġeri bene vaġa-fofori ginikaua, ema Roma ekalesiari bene vaġa-kokoreri ġana (Roma 1:1 ema 11).

Roma bukana nuġanai siri baregori tu karoa 1:16-17.

Mai fefa nuġanai Paulo na Roma ekalesiari ġeri dagara tari ekiraġi-ginikaurito tu maiġeri: 1) Iuda tarimari ema irau bese tarimari tu Keriso ġena Vari Namona ġenana vauro Barau ġoiranai vei-iobukaiobuka tarimari beġe ruġa-tarini, a dia taravatu ġenana. 2) Tanobara tarimari mabarari, Iuda tarimari ema irau bese tarimari, tu vei-rakava nuġanai ġetanuni (karoa 1-3). 3) Karoa 3-8 nuġanai tu vevaġa-roroġoto varina e vevaġa-veaġa varina, ema Barau marevana mamana baregona befoforini varina. 4) Karoa 9-11 tu ġabiviriġi varina; Barau na Iuda tarimari asi beġabi-raġeri, Keriso asi ġevaġa-moġoniani nai; ema Iuda tarimari Barau na ma beġabiraġe-ġenoġoirini, korana Keriso ġenai ma beġe veġabidadamani. 5) Karoa 12-16 tu ekalesia doġorona kamasi beġene tanu Barau ġoiranai.

*Paulo na apostolo ġauveina eveiato, korana Barau na ekeaiato nai*

<sup>1</sup> Au Paulo, Keriso Iesu ġena vetuġunaġi taugu; ġeguna mai fefa eiaġosini. Au tu ekeaguto, ġena apostolo tarimagu ai aiaġoto, ema eviriġiguto, Barau ġena Vari Namona bana vari-fiua ġana. <sup>2</sup> Mai Vari Namona tu guinenai Barau na peroveta tarimari mururi na ekiraġi-toreato, benamo Buka Veaġa nuġanai ġetoreato. <sup>3</sup> Mai tu Barau Natuna, ġita ġera Vereġauka Iesu Keriso, varina. Ġia tu tanobarai ema maġurito, ema Kini Davida garakana. <sup>4</sup> Ġia mase ġenana evariġisi-ġenoġoito, monana Iauka Veaġa na ma seġukana ġesi ġita ġerai evaġa-foforiato ġia tu Barau tuġutuġu Natuna. <sup>5</sup> Iesu ġenana ema ġia arana bakunai, ġai varevare-bara e apostolo dagina ġaġabiato, bese irauirau tarimari baġana vetauri, Barau beġene vaġa-moġonia e beġene seġaġi-vinia. <sup>6</sup> Ma ġomi maki, Roma nuġanai ġotanuni tarimami, ġia ġesi Barau na ekea-sebonamito, Iesu Keriso ġena tarimarimai boġono iaġo ġana.

<sup>7</sup> Ġomi Roma nuġanai ġotanuni tarimami mabarami, Barau na eura-vinimini e ekeamito, ġena veaġa tarimari ai ġoiaġoto, ġomi avaġa-namomini: Barau ġita Tamara ema ġera Vereġauka Iesu Keriso ġerina varevare-bara ema maino ġemi ai bene tanu.

*Paulo ġena ura baregona Romai bene varivari*

<sup>8</sup> Ġegu guruġa giniguinena, au ġegu Barau atanikiu-viniani Iesu Keriso aranai ġomi mabarami iatami ai, korana ġemi veġabidadama variri tanobara mabarana nuġanai ġekiraġi-foforirini. <sup>9</sup> Natuna Varina Namona aġobata-iaġiani, ma iaukagu mabarana ġesi vetuġunaġina aiaġo-vinini Barauna ġoiranai, ġomi tu ġegu ġuriġuri mabarari nuġari ai asi atuġa-rekwamini. <sup>10</sup> Ema maki ġegu ġuriġuri nuġari ai anoġinoġi-bukani, akirani, bema initoma Barau eurani nai, ġegu dabara ta bene vei-roroġotoa, be ġemi ai bana iaġosi. <sup>11</sup> Korana au ġegu ura baregona tu bara ġitami, be Iauka Veaġa varevareri kotari ma bara vinimi, boġono kokore ġana. <sup>12</sup> Mo tu ġomi e au tara velaunaġi-vevini ġera veġabidadama nuġanai.



<sup>13</sup> Tarikakagu mabarami, boḡono riba-maoro, nega ḡutuma aurato ḡomi ḡemi ai bana iaḡosi atato, senaḡi ḡegu iaḡosi lairi tu ḡevetoutou-kauni beiaḡoma mo toma. ḡegu ura, irau bese tari na ḡegu ḡauvei ḡenana vevaḡa-kava ḡeḡoitaḡoato ema Iesu Keriso ḡena doḡoro tarimari ai ḡeiaḡoto kavana, ḡomi maki fakami ai bana vevaḡa-kava. <sup>14</sup> Barau na ḡauvei eviniguto, Grik tarimari e asi Grik tarimari, iaunega tarimari e vei-babobabo tarimari bana vaḡa-kavari ḡana. <sup>15</sup> Moḡa lorinai au ḡegu ura baregona tu, mai Vari Namona ḡomi Romai ḡotanuni tarimami mabarami ḡemi ai maki bana ḡobata-iaḡia.

*Vari Namona tu ma ḡena seḡuka*

<sup>16</sup> Barau ḡena Vari Namona maiakana asi aveini, korana mai Vari Namona nuḡanai Barau seḡukana eḡauveini, ḡia ḡevaḡa-moḡoniani tarimari vaḡa-maḡuriri ḡana: Iuda tarimari ḡeri ai guine, gabi ai vau bese irauirau tarimari. <sup>17</sup> Korana Vari Namona nuḡanai tu Barau na tarimarima kamasi vei-iobukaiobuka tarimari bekiraḡirini efoforini. Vei-iobukaiobuka tu veḡabidadama nuḡanai moḡo korana na beiaḡo mo magona, Buka Veḡai ekirani kavana: “Barau beḡabidadama-viniani tarimana tu Barau na vei-iobukaiobuka tarimanai bekiraḡiani, benamo bemaḡurini.”

*Barau ḡena baru tarimarima ḡeri ai*

<sup>18</sup> Barau ḡena baru guba na efoforini, korana tarimarima na Barau asi ḡekorana-iaḡiani e veiḡa iobukaiobukari asi ḡeveirini. Ma ḡeri veiḡa rakavari ḡerina guruḡa moḡonina ḡelaulau-ḡauani. <sup>19</sup> Barau beḡe ribaiani maḡuriri mabarari ḡia ḡeri ai tu fofori, Barau tauḡena na evaḡa-fofori ginikaurito. <sup>20</sup> Barau asi taḡitaiani, senaḡi guba e tanobara eveirito, monana beiaḡoma mo toma, Barau vetoḡana vekuretoḡana tu taḡita-ginikaurini. ḡia tu moḡoni Barau tuḡutuḡu ema ḡena tanu-vanaḡivanaḡi seḡukana tu ḡimana ḡauveiri dagarari na maki ḡevaḡa-foforiani, be taribaiani. Moḡa lorinai tarimarima tu asi ḡena vetoreḡau laina.

<sup>21</sup> Oba, ḡia moḡoni ma ribari Barau, be ḡere vaḡa-raḡea, senaḡi asi ḡevaḡa-raḡeani ema asi maki ḡetanikiu-viniani. A ḡeri tuḡamaḡi tu vei-taḡuitaḡui na moḡo ḡevaḡa-vonurini. Moḡa lorinai ḡeri tuḡamaḡi babobabori na nuḡari ḡevaḡa-mukunarini. <sup>22</sup> ḡia tauḡeri ḡekirani, ḡia tu ma iaunegari ḡetoni, senaḡi ḡia tu ḡebaboto. <sup>23</sup> Be maḡuri vanaḡivanaḡi Barauna beḡere vaḡa-raḡea, senaḡi ḡima veivei dagarari vaḡa-ilailana ma beḡe maseni tarimari iouiouri o laulauri, e boḡa bairi, manu, ema tano ai ḡedarani dagarari iouiouri ḡevaḡa-moḡonirini.

<sup>24</sup> Moḡa lorinai Barau na veiḡa mirori beḡene vei ḡana etao-fitoḡarito, be beḡene mata-boraḡa nuḡari ai ḡeverere-iaḡirini ilailanai, e tauḡeri fakari ai vevaḡa-maiaka veiḡari irauirauri na tauḡaniri beḡene vaḡa-rakavari. <sup>25</sup> ḡia na Barau ḡena guruḡa moḡoniri gaburi ai tu ḡofaḡofa veiḡari ḡeveirini, ema Barau na eveirito dagarari ḡetomarakariḡo vinirini e vetuḡunaḡiri ḡeiaḡo-vinini, a moḡeri eveirito Barauna tu asiḡi. ḡia moḡo ḡereḡana sivevato-iaḡia, asi dokona, asi magona. Amen.

<sup>26</sup> Tarimarima moḡesi ḡeveito nai, Barau na etao-fitoḡarito, maiaka veiḡari beḡene uravini-lelevaḡiri ḡana. ḡeri vavine maki veḡaraḡo maḡuriri roroḡotori ḡeiaḡuirini, ma karori ḡesi ḡevékima-vevinini. <sup>27</sup> Tauri maki ḡia kavana, vavine ḡesi kima maḡuriri korikori tu ḡeiaḡuirini, ma tau karori ḡemata-ḡaniḡani-iaḡirini. Mo tu tau tauḡeri karori ḡesi moḡo boru ḡeravani. Maiḡeri veiḡa rakavari voiri metori tu ḡia tauḡeri na ḡeḡabirini.

<sup>28</sup> Ma iatanai, ḡia tu asi ḡeurato, Barau beḡene riba-ginikaua e tuḡamaḡi-faka ḡia nuḡari iaḡasiri ai beḡene tanu, naima etao-fitoḡarito ḡeri tuḡamaḡi babobabori ḡeri ai, be asi beḡere veiri veiḡari beḡene veiri ḡana. <sup>29</sup> ḡia tu rakava mabarari na ḡevonuvonu-raḡeto, veiḡa rakavari, mata-ḡaniḡani, tuḡamaḡi barubaru, mama, vaḡideba, veḡareveḡare, veribaḡani e tarimarima vaḡa-ketori veiḡari, veroritore, <sup>30</sup> guruḡa vemuriḡoi, Barau ḡeiau-rakavaiani, seḡafore rakavarakava, kira-sirivaḡi, e veiavi; vekiraḡi-varaḡevaraḡe, rakava vei dabarari variḡuri ḡevaḡa-reforini, sina-tama

garori asi geseḡaḡirini; <sup>31</sup> asi ḡetuḡamaḡi-fakani, asi tuḡamaḡi-kauri tarimari, veuravini asi ribari tarimari, vevetuḡaḡwa asi ribari tarimari. <sup>32</sup> Oba, ḡia tu ma ribari, Barau ḡena veḡausina o sisiba tu ekirani, vei rakava tarimari tu beḡe maseni. Senaḡi ḡia na tu ḡeveirini, ma dia ḡia na moḡo ḡeveini, senaḡi tarimarima kotari na ḡeveirini maki ḡeiaunamorini e ḡeḡabi-raḡerini.

## 2

### *Barau ḡena vevaḡa-maoro*

<sup>1</sup> A ḡoi tarima tari ovaḡa-maororini ma kerereri ai oragani tarimamu, ḡoi tu asi ḡemu vekira-ḡuniḡau laina. Ḗoi na tarima ta ovaḡa-maoroani, ma ḡena veiḡa rakavari okiraḡirini nai tu, ḡoi tauḡemu moḡo ovevaḡa-metoni e ovevaḡa-kotani. Korana tu tarima ta ḡena veiḡa rakavari okiraḡirini veiḡari tu, ḡoi tauḡemu na maki oveirini. <sup>2</sup> Ḗita tu ribara, Barau na moḡesi veiḡa rakavari ḡeveirini tarimari bevaḡa-maoro vinirini, ma meto bevinirini tu roroḡoto. <sup>3</sup> Kamasi ḡotuḡamaḡini, ḡomi, tarimarima kika moḡo, na tarimarima kotari ḡovevaḡa-maoro vinirini, ma nuḡanai tu ḡomi tauḡemi na maki mo veiḡa rakavari tu ḡoveirini. Ḗomi ḡotuḡamaḡini Barau ḡena vevaḡa-maoro ḡenana tu boḡo raga-maḡurini? <sup>4</sup> Ba Barau ḡena namo baregona, e nuḡana eḡabi-tariani, e vevaḡa-gwaḡiḡi iatari ai tu asi tauri ḡotoni? Ba asi ḡoribani Barau ḡena namo baregona anina tu, ḡomi boḡono vetuḡamaḡi-kure ma boḡono raka-kure ḡana? <sup>5</sup> Senaḡina ḡomi nuḡami tu ḡovaḡa-gwaḡiḡirini, ma asi ḡovetuḡamaḡi-kureni. Maiḡesi ḡoveini tu tauḡemi iatami ai ḡemi meto iatai-iatai ḡolabulabu-kaurini. Ma Barau ḡena Kota baranai ḡena vevaḡa-maoro roroḡotona beveiani mo ḡaro ai vau ḡena baru bevaḡa-foforiani, benamo ḡemi veiḡa metori boḡo ḡabirini. <sup>6</sup> Barau na “tata karakara ḡoveito ilailari ai tauri ma bevinimini.” <sup>7</sup> Tarima kotari tu ḡobiri ḡevetoreni veiḡa namori ḡeveini, Barau marevana, e ḡabiraḡena, ema asi bedokoni maḡurina ḡevetauani. Barau na ḡia tu maḡuri vanaḡivanaḡi bevinirini. <sup>8</sup> A tarima kotari tu tauḡeri ḡeri namo moḡo ḡevetaurini, ema guruḡa e maḡuri moḡonina tu ḡeruḡarini, ma rakava veiḡari ḡekorana-iaḡirini. Ḗia tu Barau na beiau-rakavarini ma baruna ḡesi. <sup>9</sup> Beḡe vei-rakavani tarimari mabarari tu rakava metona baregona ema midigumidigu baregona beḡe ḡabiani. Mo tu Iuda tarimarima ḡeri ai beḡe ḡora-guineni, ma murinai tu irau bese tarimari ḡeri ai maki beḡe ḡorani. <sup>10</sup> Senaḡi veiḡa namori beḡe veini tarimari mabarari ḡeri tu, Barau na mareva baregona e vemataurai barana ema maino bevinirini: Iuda tarimari ḡeri ai guine, ma murinai tu irau bese tarimari ḡeri ai maki. <sup>11</sup> Korana Barau na tarimarima mabarari maḡuri sebonai moḡo eḡabi-raḡerini, ḡeri veiḡa loriri ai voiri evinirini.

### *Barau na Iuda tarimari e irau bese tarimari bevevaḡa-maoro vinirini*

<sup>12</sup> Irau bese tarimari tu Mose ḡena taravatu asi ribari, nuḡanai ḡevei-rakavani, moḡeri mabarari beḡe mase-buḡani, (Barau na bekota-vinirini), taravatu murikanai enabe asi ribari; ema Iuda tarimari tu taravatu ma ribari, senaḡina ḡevei-rakavani tarimari mabarari tu taravatu na bevaḡa-maoro vinirini. <sup>13</sup> Korana taravatu ḡeseḡaḡiani moḡo tarimari, Barau ḡoiranai tu dia vei-iobukaiobuka tarimari, senaḡi taravatu ḡekorana-iaḡiani tarimari vau, Barau na ekiraḡirini vei-iobukaiobuka tarimari.

<sup>14</sup> Oba, irau bese tarimari tu asi ḡeri taravatu, senaḡi ḡeri maḡuri nuḡari ai taravatu na ekiraḡirini veiḡari tu ḡeveirini. Moḡeri mabarari tu ḡeri taravatu ai ḡeiaḡoni, a ḡia tu asi ḡeri taravatu senaḡi. <sup>15</sup> Ḗia ḡeri veiḡa na evaḡa-foforiani, Barau ḡena taravatu na eura-vinirini veiḡari tu ḡia loruri ḡuturi ai etorerito. Maiḡa tu nuḡari iaḡasiri na maki evaḡa-moḡonirini, korana tu ḡaro tari ai ḡeri tuḡamaḡi na evaḡa-daḡa-raḡerini, ma ḡaro tari ai tu gogobari eragani. <sup>16</sup> Au na Vari Namona aḡobata-iaḡiani tu, Barau na tarimarima ḡena veiḡa e tuḡamaḡi vekuretoḡari Iesu Keriso ḡenana bevevaḡa-maoro vinirini ḡaronai vau beḡe foforini.

### *Iuda tarimari e taravatu*

<sup>17</sup> A ġoi Iuda tarimamu tu kamasi otuġamaġini? Oba, ġoi tu ovekiraġini Iuda tarimamu. Ma ġoi tu taravatu ġenai ovetabekauni, e oveiavini, okirani, ġoi tu Barau ġena bese tarimamu. <sup>18</sup> Ma okirani, Barau tu ma ribamu e ġena ura veiġa namo vedaureari e rakavari oġita-learini, korana taravatu na evaġa-ribamuni nai. <sup>19</sup> Ġoi okirani, moġoni ġoi na mata-bubu tarimari boġori-kaurini, ema ġoi tu mukunai ġetanuni tarimari ġeri kere mamana; <sup>20</sup> ema vei-babobabo tarimari kira-rogori tarimamu, e mero keikeiri ġeri vevaġa-riba tarimamu, korana tu taravatu nuġanai iaunega ema guruġa moġoniri ġetanuni dagarari tu ma ribamu. <sup>21</sup> Ġoi na karomu tu ovaġa-ribarini, a ġoi tauġemu tu asi ovevaġa-ribani. Tarimarima oġobata-vinirini nai tu okirani, “Asi boġono lema,” otoni, a ġoi tu olemani. <sup>22</sup> Tarimarima asi beġene veġura-vanaġi otorini, ma ġoi tu oveġura-vanaġini. Kwaivakuku oiau-rakava-vinirini, senaġi ġeri rubu nuġari farefareri tu olemarini. <sup>23</sup> Taravatu ovaġa-raġe lelevaġirini nuġanai tu, Barau ġoi na tu asi ogubakauani, ġena taravatu tu oseġafore-vinirini. <sup>24</sup> Buka Veaġai tu iniġesi ekirani, “Barau arana irau bese tarimari na vekaravari ai ġekira-fitoġaiani, korana tu ġomi ġemi kira-sirivaġi lorinai.”

<sup>25</sup> Mero tauġani kefiri lamavaġi veiġana tu ma tauna, bema taravatu bokorana-iaġirini nai. Senaġi bema taravatu okira-sirivaġi vinirini nai, ġemu kefi-lamavaġi veiġana tu asi taunai beiaġoni, ema ġoi tu kefina asi ġelama-vaġiato tarimana kavanai. <sup>26</sup> Irau bese tarimari tu kefiri asi ġelama-vaġito. Senaġi bema taravatu maġuriri korikori ġeveini nai tu, Barau ġoiranai ġia tu kefiri ġelama-vaġirito tarimari kavana, ene? <sup>27</sup> Oba, taravatu bukana tu ġemu ai, ema kefimu tu ġelama-vaġiato. Senaġina bema ġoi na taravatu okira-sirivaġiani nai tu, taravatu ekorana-iaġiani tarimana, mai tu irau bese tarimana, Kota seanai betanuni, benamo ġoi bevaġa-kotamuni. Aba, tauġani rekenai tu kefina asi ġelama-vaġiato, senaġi. <sup>28</sup> Bema tarima ta tu arana korina moġo Iuda tarimana ema kefi-lamavaġi maki murika ema tauġani kefina vetoġana korina moġo nai tu, ġia tu dia Iuda tarimana korikori. <sup>29</sup> Asiġina ġinavaġi. Iuda tarimana o Barau ġena bese tarimana korikorina tu deikara nuġana iaġasina na ema ġena tuġamaġi na evaġa-foforiani, ġia tu Iuda tarimana. Ema kefi-lamavaġi veiġana maki tarimarima loruna ġutunai bene fofori. Ġia tu dia taravatu guruġari ġetorerito moġeri korana-iaġiri ai beġorani. Asiġina. Ġia tu Barau Iaukana na tarimarima nuġana iaġasinai beveiani dagarana. Mo tarima moġa tu dia tarimarima na bevaġa-raġeani, senaġi Barau na bevaġa-raġeani.

### 3

<sup>1</sup> Iuda tarimari na irau bese tarimari ġevanaġirito? Mero tauġaniri kefiri ġelama-vaġirini ġenana tu kara namona ġedoġariato? <sup>2</sup> Aba, dagara namori ġutuma ġedoġaririto! Tovotovonai tu Barau na ġia muruna guruġari korikori evaġa-ġauna-iaġirito.

<sup>3</sup> Ma bema Iuda tarimari kotari Barau ġenana ġeraka-veġitato, asi ġeri veġabidadama nai tu aiġesi? Moġoni, Iuda tarimari kotari tu asi ġeri veġabidadama; senaġi ġia asi ġeri veġabidadama lorinai, Barau ġena kiraġitore maki asi taunai beiaġoni ba? <sup>4</sup> Asiġina ġinavaġi! Barau tu moġoni veġata, ġena kiraġitore asi eketoni, ma tarimarima tu ġeġofaġofani. Buka Veaġai ekirani kavana,

“Barau, ġoi boguruġani nai tu,

beġe vaġa-moġonimuni,

ema Kotai beġe ġofaġofa-iaġimuni nai maki bovaġa-darererini.”

<sup>5</sup> Tarima kotari na ġeri vefafauġau guruġari beġe kiraġirini, beġe kirani: Bema ġita ġera veiġa asi roroġotori na tu Barau ġena vei-iobukaiobuka etore-fofori ginikauani nai, ġita tu kara bita toni? Bita kirani, Barau na ġena baru veiġari ġita iatarai ematorerini nai tu maoro ba? <sup>6</sup> Asiġina, Barau ma ġena maoro. Bema Barau tu asi roroġoto nai tu, ġia na tanobara mabarana tu kamasi bevevaġa-maoro viniani? <sup>7</sup> Tarima ta ma bevefau-ġauni, bekirani, “Bema au ġegu ġofaġofa na Barau ġena guruġa moġoniri evaġa-fofori ginikaurini ema ġia marevana evaġa-baregoani nai tu, kara dainai au tu

roḡo mo evaḡa-daḡaguni rakava tarimagu etoni?”<sup>8</sup> Mo guruḡa tu babo, noḡa moḡo ini guruḡa kavana, “Rakava sivei, be namo bene fofori.” Tarima kotari na ḡai ḡevaḡa-rakavamani, ḡeḡofaḡofa-iaḡimani, ḡekirani, ḡai tu maiḡesi ḡakirani ḡetoni. Maiḡesi ḡai ḡeḡofaḡofa-iaḡimani tarimari Barau na voiri metona bevinirini tu asi vetoukauna, korana ḡeri ḡofaḡofa lorinai.

*Tarima ta asi iobukaiobuka*

<sup>9</sup> Benamo kara ma bita toni? ḡita Iuda tarimara moḡo namo, a irau bese tarimari tu asiḡi? Asiḡina ḡinavaḡi! Varau bita kiraḡia, Iuda tarimari e irau bese tarimari vekaravari ai ta tu asi ḡena rakava asi bita toni.<sup>10</sup> Buka Veaḡai tu maiḡesi ḡetoreato:

“Tarima ta asi iobukaiobuka,  
sebona kwarikwari ta maki asiḡina;

<sup>11</sup> tarima ta asi etuḡamaḡi-roroḡotoni,  
ta na maki Barau asi evetauani.

<sup>12</sup> Mabarari ḡeraka-doḡe-muriḡito,  
ḡia mabarari veiḡa iobukaiobukana tu asi ḡeveiani,

mabarari asi ḡevei-roroḡotoni,  
ta veiḡa namo asi ribana,

sebona kwarikwari ta maki asiḡi.

<sup>13</sup> ḡia godokari mase guriri kouḡari kavana;  
meari na ḡofaḡofa rakavari ḡekiraḡirini.

ḡeri guruḡa na mase ḡevaḡa-ḡorarini,  
noḡa moḡo mota foisiniri  
ḡia bibiḡari ai ḡetanuni.

<sup>14</sup> Mururi ai tu vevane e vekira-barubaru na ḡevonu-fokafokato.

<sup>15</sup> ḡia tu ḡeḡarimoḡi-rakavani vevaḡi ema vevaḡideba veiḡari ai;

<sup>16</sup> ḡeri iaḡoiaḡo gaburi ai tu vei-rovorovo e rakava ḡeiaḡuini.

<sup>17</sup> Maino maḡuriri tu asi ribari.

<sup>18</sup> Asi ḡeri vegubakau ta Barau ḡenai.”

<sup>19</sup> ḡita ribara, maiḡeri taravatu guruḡari na kara dagara ḡekiraḡiani tu, mo deikara taravatu gaburenai ḡetanuni tarimari ekirarini. Moḡa tauna tu, taravatu gaburenai ḡetanuni tarimari ema tarimarima mabarari maki mururi na kara ta asi beḡene kiraḡia, ema mai tanobarai tarimarima mabarari Barau ḡoiranai beḡene ruḡa-tari ma ḡeri vei-rakava.<sup>20</sup> Moḡa lorinai taravatu korana-iaḡina maḡurinai tarima ta asiḡina ḡinavaḡi Barau ḡoiranai Barau na bekiraḡi-foforiani, ḡia tu vei-iobukaiobuka tarimana. Asiḡina, taravatu ḡenana ḡita na vei-rakava taribaiani.

*Vei-iobukaiobuka tu veḡabidadama ḡenana eiaḡomani*

<sup>21</sup> Senaḡi initoma kamara dabarai Barau na tarimarima ekiraḡirini vei-iobukaiobuka tarimari etoni dabarana tu bema fofori-ginikau. Mo tu dia taravatu korana-iaḡina maḡurinai. Asiḡina. Mai tu Mose ḡena taravatu na ema peroveta tarimari ḡeri guruḡa-fofori ai ḡekiraḡiato dabarana na.<sup>22</sup> Mai vei-iobukaiobuka Barau ḡenana eiaḡomani tu Iesu Keriso beḡe ḡabidadama-viniani tarimari mabarari na beḡe ḡabiani. Ta tu asi irau.

<sup>23</sup> Korana tarimarima mabarara tu rakava tarimara moḡo, be mabarara Barau marevana namona ḡenana taveḡitato.<sup>24</sup> Senaḡi Barau ḡena varevare-bara nuḡanai asi ḡera kerere etorani, korana Keriso Iesu ḡenana ḡera rakava ḡerina evaḡa-maḡurirato.<sup>25</sup> Barau na Iesu tu ginitaḡo varevarenai evaḡa-iaḡoato, korana tarimarima ḡia ḡenana bene ḡabiraḡeri ḡana. Moḡa maḡurina tu iniḡesi: Deikara ḡia raranai beveḡabi-dadamani tu,

Barau na ḡena rakava betuḡamaḡi-fitoḡarini. Barau na mo maḡuri eveiato anina tu, ḡia ḡena iobukaiobuka bene vaḡa-foforia ḡana. Guinenai rakava ḡeveito-ḡoi nai tu, eḡita-daḡaseḡirito-ḡoi, rakava voiri asi eveito-ḡoi.<sup>26</sup> Ma maitoma Iesu tu ginitaḡo varevarenai evaḡa-iaḡoato korana ḡena vei-iobukaiobuka bene vevaḡa-ḡita-iaḡiri initoma ḡana, be

ġia ġena iobukaiobuka bene fofori, e ġia na Iesu Keriso ġeġabidadama-viniani tarimari maorori bene kiraġiri.

<sup>27</sup> Be ġita tu kara bita veiavi-iaġiani? Vekokoroku tu asi ġena gabu ta. Kara dainai? Taravatu takorana-iaġiani nai? Asiġi, maġuri tu veġabidadama maġurinai moġo bita doġariani. <sup>28</sup> Korana bitana riba-maoro, tarimarima tu veġabidadama lorinai Barau na eġabi-raġerani, a dia taravatu bita korana-iaġiani nai.

<sup>29</sup> Be Barau tu Iuda tarimari moġo ġeri? Ġia tu dia irau bese tarimari maki ġeri Barau? Aba, ġia tu irau bese tarimari maki ġeri Barau, <sup>30</sup> korana Barau tu sebona moġo. Ġia na tauġaniri kefiru ġelama-vaġito tarimari veġabidadamai maorori bekiraġini, ema kefiru asi ġelama-vaġirito tarimari maki maorori bekiraġini mo veġabidadama sebona na. <sup>31</sup> Moġa nuġanai veġabidadama na taravatu seġukana tavaġiani? Asiġina ġinavaġi! Senaġi taravatu tavaġa-ruġa gigitariani.

## 4

### *Aberhamo ġena veġabidadama*

<sup>1</sup> Ġita tu kara ma bita kiraġiani, senera Aberhamo na mai maġuri maiġa ema ġoitaġoato iatanai? <sup>2</sup> Bere moġoni, Aberhamo ġena ġauvei e veiġa bakunai Barau ġoiranai vei-iobukaiobuka tarimanai bere iaġo tu, tauġena bere vekiraġi, ġia tu kwalimu-koru na bere vekiraġi. Senaġi ġia Barau ġoiranai tu asi ġena vekokoroku gabuna ta. <sup>3</sup> Buka Veaġa nuġanai tu kara etoni? Buka Veaġa nuġanai tu ekirani, “Aberhamo na Barau ġena guruġa evaġa-moġoniato nai, Barau ekirato, ġia tu vei-iobukaiobuka tarimana etato.” <sup>4</sup> Tarima ta eġauveini, benamo voina beġabiani. Ġia mo eġauveini nai, voina eġabiani moġa tu, ġevarevare-viniani dagarana asi bita toni. Asiġina ġinavaġi. Mo tu ġia ġena ġauvei voina veġata. <sup>5</sup> Senaġi tarima ta, ġia tu ġauvei o veiġa ta asi eveiani, senaġi ġia tu Barau, rakava tarimari vei-iobukaiobuka tarimari ai evaġa-iaġorini Barauna, ġenai eveġabidadamani. Mai tarima maiġa tu ġena veġabidadama lorinai, Barau na ekiraġiani, ġia tu vei-iobukaiobuka tarimana etoni. <sup>6</sup> Davida na maki mo guruġa sebona ekiraġiato. Maiġesi tarimari tu ekirarito, beġe iakuni etato. Mo tu ġauvei o veiġa tari asi ġeveirini, senaġi Barau, rakava tarimari asi ġeri veirakava etorini Barauna, na ġia tu ekirarini, vei-iobukaiobuka tarimari etorini. Davida ekirato,

<sup>7</sup> “Ġeri kira-sirivaġi etuġamaġi-fitoġarini,

e ġeri rakava eġabi-vaġirito tarimari tu beġe iakuni.

<sup>8</sup> Vereġauka na ġena rakava iatanai asi ma beiavi-kaurini tarimana tu beiakuni.”

<sup>9</sup> Vevaġa-namo ema iaku maiġesiri tu tauġaniri kefiru ġelama-vaġirito tauri moġo ġeri, ba tauġaniri kefiru asi ġelama-vaġirito tauri maki ġeri? Varau bita kira, Aberhamo tu ġena veġabidadama lorinai, Barau ekirato, ġia tu vei-iobukaiobuka tarimana etato.

<sup>10</sup> Aitoma ġia vei-iobukaiobuka tarimanai eiaġoto? Tauġanina kefiru ġelama-vaġiato murinai, ba tauġanina kefiru roġosi roġo beġene lama-vaġia nuġanai. Ġia tu dia tauġanina kefiru ġelama-vaġiato murinai vauro Barau ekirato, ġia tu vei-iobukaiobuka tarimana etato. Asiġina. Ġia tu tauġanina kefiru roġosi roġo beġene lama-vaġia nuġanai, vei-iobukaiobuka tarimanai eiaġoto. <sup>11</sup> Ġia tauġanina kefiru tu gabi vauro ġelama-vaġiato. Mo tauġanina vauro ma ġelama-vaġiato moġa tu, ġia tauġanina roġosi roġo beġere lama-vaġia nuġanai vei-iobukaiobuka tarimanai eiaġoto, moġa vetoġana moġo ma evaġa-moġoniato. Monana Aberhamo tu Barau ġevaġa-moġoniani tarimari tamari ai eiaġoto, enabe tauġaniri kefiru asi ġelama-vaġirito senaġi. Korana Barau ġevaġa-moġoniani tarimari tu, Barau na eġabi-raġerini vei-iobukaiobuka tarimari.

<sup>12</sup> Ema ġia tu tauġaniri kefiru ġelama-vaġirito tarimari maki tamari. Au na dia tauġaniri kefiru ġelama-vaġi-kavarito tarimari akiraġirini. Asiġina. Senaġi tamara Aberhamo tauġanina kefiru roġosi beġere lama-vaġia nuġanai, Barau eġabidadama-viniato kavana, ġia na maki Barau moġesina ġeġabi-dadama-viniani tarimari akiraġirini.

*Taravatu e veḡabidadama*

<sup>13</sup> Barau na Aberahamo ekira-toreato, ekirato, ḡia ma garakana ḡesi na mai tanobara beḡe ḡaunaiani. Mai kiraḡitore guruḡana Barau na ekiraḡiato tu, dia Aberahamo na taravatu ekorana-iaḡiato nai, senaḡi Barau eḡabidadama-viniato nai, benamo vei-iobukaiobuka tarimanai eiaḡoto. <sup>14</sup> Bema taravatu ḡekorana-iaḡiani tarimari na tanobara beḡere ḡaunaia nai, veḡabidadama tu asi ḡena namo ta, ema kiraḡitore guruḡana maki guruḡa korina moḡo. <sup>15</sup> Aba, taravatu na tu Barau ḡena baru baregona evaḡa-ḡoraiani. Senaḡi bema taravatu asiḡina tu, tarima ta na taravatu ta asi beleaiani.

<sup>16</sup> Moḡa lorinai, guruḡatore tu veḡabidadama ḡenana eiaḡomani, be Barau ḡena namo e varevare-bara nuḡanai guruḡatore tauri moḡoniri Aberahamo ma garakana ḡesi ḡeri ai beḡe ḡorani. A dia taravatu gaburenai ḡetanuni tarimari moḡo ḡeri ai, senaḡi Aberahamo ḡena veḡabidadama nuḡanai ḡetanuni tauri maki ḡeri. Aberahamo tu ḡita mabarara tamara. <sup>17</sup> Buka Veḡai evetoreto kavana: “Au na ḡoi tu tanobara ḡutuma tamari ai avaḡa-iaḡomuto.” Mai Aberahamo na evaḡa-moḡoniato Barauna ḡoiranai Aberahamo tu ḡita tamara. Mai Barau na mase tarimari ma evaḡa-maḡuri ḡenoḡoirini ema tanobarai asi ḡeḡorato dagarari evaḡa-ḡorarini.

<sup>18</sup> Aberahamo ḡena tuḡamaḡikau noḡa asi vaḡa-tubukauna dagarana ta, senaḡi Barau ḡena guruḡai evetuḡa-maḡi-kauto, ma evaḡa-moḡoniato lorinai, tanobara ḡutuma tamari ai eiaḡoto. Barau na ekira-toreato ilailanai: “Ḡoi garakamu tu beḡe vovokani visiḡu kavana.” <sup>19</sup> Aberahamo mo negai ḡena laḡani tu dori sinau sebona (100), ma tauḡanina maki emoirato, ma mase tauḡaniri ilailari ai varau eiaḡoto, e Sara maki asi ilaila ḡia mero ta beḡabiani riba. Ḡia na maiḡeri tu eḡitarito, senaḡi maiḡeri na ḡia ḡena veḡabidadama asi veḡata ḡevaḡa-moiraiato. <sup>20</sup> Moḡa nuḡanai ḡia asi etuḡamaḡi-iauvoiauvoto, asi edaradarato, ema asi eḡareva-ḡarevato maki Barau ḡena guruḡatore iatanai. A ḡia tu ḡena veḡabidadama moḡo evaḡa-gwaḡiḡiato, benamo Barau moḡo evaḡa-raḡeato. <sup>21</sup> Korana ḡia tu nuḡana mabarana ḡesi eribato, Barau ma seḡukana, kara ekiraḡi-toreato dagarana tu bevaḡa-ḡoraiani. <sup>22</sup> Moḡesina naima Barau na ekiraiato, “Ḡia tu vei-iobukaiobuka tarimana,” etato.

<sup>23</sup> Mai guruḡa maiḡeri, “Ḡia tu vei-iobukaiobuka tarimana,” tu dia Aberahamo ḡereḡana ḡena moḡo ekiraḡiato, <sup>24</sup> senaḡi ḡita ḡerai maki ekiraḡiato. Ḡita ḡera Vereḡauka Iesu Keriso mase na evaḡa-variḡisi ḡenoḡoiato Barauna tavaḡa-moḡoniani tarimara maki Barau na bekirarani, vei-iobukaiobuka tarimara, betoni. <sup>25</sup> Barau na Iesu etuḡu-iaḡomaiato, tanobarai emaseto, ḡita ḡera rakava benema voi-vaḡiri ḡana. Ma ḡita Barau na vei-iobukaiobuka tarimarai bene kiraḡira ḡana uranai, mase na ma evaḡa-variḡisi ḡenoḡoiato.

## 5

*Barau na ḡita vei-iobukaiobuka tarimara etato*

<sup>1</sup> Moḡa lorinai ḡita tu ḡera veḡabidadama lorinai, Barau ekirato, ḡita tu vei-iobukaiobuka tarimara etato, ma ḡera Vereḡauka Iesu Keriso ḡenana Barau ḡesi maino taḡabiato. <sup>2</sup> Ḡita tu Iesu Keriso bakunai veḡabidadama ḡenana Barau ḡena namo e varevare-bara nuḡanai bita bere-toḡa, benamo nuḡanai taruḡa-taḡoni. Ema taiakuni, korana tavetuḡamaḡikauni, Barau na vau ḡia marevana baregona bevinirani. <sup>3</sup> Dia moḡa moḡo, senaḡi ḡera midigumidigu ai maki bitana verere, korana ma ribara, midigumidigu na vevaḡa-gwaḡiḡi evaḡa-ḡoraiani <sup>4</sup> Vevaḡa-gwaḡiḡi na veribaḡani bita vaḡa-darererini, ma veribaḡani bita vaḡa-darererini tu, Barau marevana baregona bita tuḡamaḡi-kauani. <sup>5</sup> Mai tuḡamaḡikau na tu asi bevaḡa-dabara dokorani, korana tu Barau na lauka Veḡa evinirato, maiḡa ḡenana ḡita lorura ḡuturi ai Barau na ḡena veuravini ebubu-ḡuraiato.

<sup>6</sup> Ḡoseḡaḡi, ḡita tu roḡo asi kokorera nuḡanai, Barau na eḡabi-toreato ḡaronai varau Keriso emaseto, ḡita, Barau tatuḡamaḡi-fitoḡaiani tarimara, bene voi-ḡenoḡoira ḡana. <sup>7</sup> Tarima namona uranai ta bemaseni ba? Gwaḡiḡi! Senaḡi tarima namo vedaureana uranai tu, betaḡu ta bevetuḡamaḡi-kwalimuni, benamo bemaseni riba. <sup>8</sup> Senaḡi toma

mainai tu Barau ġena veuravini ema vaġa-foforiani: Ġita roġo rakava tarimara nuġanai, Iesu tu varau emaseto ġita dairai.

<sup>9</sup> Ribara, Iesu rarana na bema iarevara, benamo asi ġera rakava besi. Moġa lorinai ġia bakunai, Barau ġena baru baregona bevaġa-foforiani ġaronai bevaġa-maġurirani. <sup>10</sup> Ġita roġo Barau tavetari-viniato-ġoi nuġanai, Barau Natuna ġena mase na Barau ġesi ma evaġa-veġata ġenoġoirato. Toma ġita tu Barau ġatanai ma taiaġo-ġenoġoito, moġa lorinai Iesu emaġuri-ġenoġoito ġenana, vevaġa-maġuri maki bita ġoitaġoani. <sup>11</sup> Dia moġa moġo, senaġi ġera Vereġauka Iesu Keriso bakunai Barau ġenai bitana verere, korana Iesu Keriso ġenana ġita Barau ġesi maino bitama ġabia ema bitama veġata.

*Adamu tu mase evaġa-ġoraiato, Keriso na tu maġuri evaġa-ġoraiato*

<sup>12</sup> Ġita ribara, tarima sebona evei-rakavato, benamo ġia ġenana rakava tanobarai ema bere-toġato. Ma rakava na mase eġabi-iaġomaiato. Moġesina naima mase na tarimarima mabarari eguguvirito, korana tarimarima mabarari ġevei-rakavato. <sup>13</sup> Moġa anina tu, vei-rakava tanobarai tu eġora-guinetto, a Mose ġenana taravatu tu gabi vauro eiaġomato. Senaġi bema taravatu asiġina nai, Barau na vei-rakava, o sikira taravatu ġedaġa-seġiani rakavana, tarima ta ġenai asi bekiraġiani. <sup>14</sup> Senaġi ribara, Adamu ġena nega na beiaġoma mo Mose ġena negai, tarimarima tu mase ġena seġuka gaburenai ġetanuto-ġoi. Oba, Barau ġena vevaġa-naġi guruġana ta tu asi ġekira-sirivaġi viniato Adamu na eveiato kavana, senaġina ġia mabarari maki mase ġena seġuka gaburenai ġetanuto-ġoi.

Adamu na ġoirai vau beiaġomani tarimana moġo ema vaġa-foforiato. (Mo tu Keriso). <sup>15</sup> Senaġi mai varevare dagarana asi voina maiġa tu irau, dia mo Adamu ġena vei-rakava ġesi ilaila. Mai tarima sebona ġena vei-rakava ġainai, tarima ġutuma ġemaseto. Senaġi Barau ġena namo e varevare-bara ema varevare dagarana mo vei-rakava ġena seġuka evanaġiato: Barau ġena mai namo baregona ema varevare dagarana tu tarima sebona, Iesu Keriso, ġenana eiaġomato, ma tarimarima ġutuma ġeri ai evebubu-riġoto. <sup>16</sup> Barau ġena varevare dagarana tu irau, dia mo tarima sebona, Adamu, ġena vei-rakava kavana: Vei-rakava sebona moġo eġorato ġenana, Barau na tarimarima e tanobara mabarana ekota-viniato, ma rakava voina metona baregona iatarai etoreato. Senaġi Barau ġena varevare dagarana rakava vovoka muriri na ema bere-rosito, monana tarimarima tu vei-iobukaiobuka tarimari ai evaġa-iaġorito. <sup>17</sup> Moġoni, mo tarima sebona na mo vei-rakava eveiato, monana tanobara mabarana mase ġena seġuka gaburenai etanuni. Mase tu mai vei-rakava eveiato tarimana ġenana eiaġomato tanobara ġana. Senaġina tarima sebona, Iesu Keriso, ġia na eveiato dagarana na mo vei-rakava eveiato tarimana ġena veiġa seġukana na evanaġiato. Tarimarima mabarari, Barau ġena namo ma varevare-bara barego lelevaġina ema vei-iobukaiobuka varevarena beġe ġabiani tarimari tu, Iesu Keriso ġenana maġuri beġe ġabiani, benamo kini kavana beġe vereni.

<sup>18</sup> Mo Adamu ġena vei-rakava sebona ġainai, Barau ekirato, tarimarima mabarari tu vei-rakava tarimari ema rakava voina beġe ġabiani etato. A Keriso ġena veiġa iobukaiobukana sebona ġenana, tarimarima mabarari vei-iobukaiobuka tarimari ai beġe iaġoni ma maġuri beġe ġabiani riba. <sup>19</sup> Ema tau sebona ġena kira-sirivaġi na tarimarima vovoka vei-rakava tarimari ai ġeiaġoto. Moġa ilailana, tau sebona ġena seġaġi na tarima ġutuma iobukaiobuka tarimari ai bevaġa-iaġorini.

<sup>20</sup> Betaġu taravatu etore-kauato tu rakava bene barego ġana. (O sikira, taravatu ġenana tarimarima ġeri rakava mabarari beġene fofori-ginikau). Senaġi vei-rakava ebaregoni gabunai tu, Barau ġena namo e varevare-bara maki ebarego-lelevaġini. <sup>21</sup> Guinena tarimarima tu vei-rakava ġena veġitaġau seġukana gaburenai ġetanuto, monana mase eġorato. Moġesina kavana, Barau ġena namo e varevare-bara na tu vei-iobukaiobuka evaġa-foforiani, ma maġuri vanaġivanaġi ġera Vereġauka Iesu Keriso ġenana eġabi-iaġomaiani ġita ġerai.

## 6

*Rakava* ġenai tamaseto, Keriso ġena maġuri nuġanai ġita tu maġuri

<sup>1</sup> Be kara bita toni? Ba sikira, rakava veiġari sivei-ġenoġoi ġenoġoiri, be Barau na ġena namo e varevare-bara ġerai bene vaġa-fofori barego-lelevaġiri? <sup>2</sup> Asiġina ġinavaġi! Ġita veġabidadama tarimara tu varau tamaseto rakava ġenai, (mai tu rakava maġurina ġenana taveġitato); ma kamara dabarai tu rakava maġurina nuġanai roġo ma bita tanuni? <sup>3</sup> Ġita babatiso taġabiato anina tu maiġa: Ġita na mo babatiso taġabiato tu Keriso Iesu ġena maġuri nuġanai tabere-toġato, ma mo babatiso taġabiato nuġanai, ġita tu ġia ġesi tamase-sebonato. Ba ġomi maiġa tu asi ribami? <sup>4</sup> Babatiso taġabiato anina tu, ġita maki Keriso ġesi tamase-vegogoto, ma Barau na Keriso ġesi eguri-sebonarato. Benamo Tamara marevana ema seġukana baregona na Keriso mase na ma evaġa-variġisi ġenoġoiato kavana, ġita maki maġuri variġu gerageranai bitana tanu.

<sup>5</sup> Bema ġita Keriso ġesi tasebonato, benamo ġia emaseto kavana ġita maki tamaseto nai, moġoni, ġia Barau na mase na evaġa-maġuri ġenoġoiato kavana, ġita maki moġesi Barau na bevaġa-maġuri ġenoġoirani veġata. <sup>6</sup> Korana ġita ribara, ġita ġerai tarima guinena moġa tu Keriso ġesi vaġa-sebo satauro ai ġeraġeto. Mo veiġa eġorato tauna tu, rakava eveito-ġoi tauġanina ma ġena ura rakavari ġita ġerana bene koki-fitoġa moġovaġia, be ġita veiġa rakavari ġeri tuġu-rakaorakao tarimarai asi ma bitana iaġo ġana. <sup>7</sup> Korana mase tarimana na veiġa rakavana ta asiġina ġinavaġi ma bevei-ġenoġoiani.

<sup>8</sup> Bema ġita Keriso ġesi tamase-vegogoto nai, moġoni veġata taribani, Keriso ġesi maki bita tanu-vegogoni. <sup>9</sup> Korana ma ribara, Keriso mase na tu varau evariġisi-ġenoġoiato, be asi ma bemase-ġenoġoini; mase asi seġukana ġia ġenai. <sup>10</sup> Keriso mo emaseto nai tu, rakava ġena seġuka evaġa-keto-moġovaġiato. A toma mai maġuri ġia na etanu-iaġiani maiġa tu, Barau ġena moġo etanuni. <sup>11</sup> Mo dabara sebonai ġomi maki tauġemi iniġesi boġono vekiraġi: Ġomi tu veiġa rakavari ġeri ai tu varau ġomaseto, ma Keriso Iesu ġena maġuri nuġanai ġomi tu maġuri ġotanuni Barau ġena.

<sup>12</sup> Moġa lorinai rakava na mani ma berakavani tauġanina maniġa ġenana ġomi asiġina ġinavaġi bene ġori-kaumi. Korana bema mani ma berakavani tauġanina maniġa rakava na beġori-kauani nai, ġomi tu ġia ġena ura rakavari boġo korana-iaġirini. <sup>13</sup> Tauġanimi legana ta rakava asi boġono vinia, be veiġa rakavari veiveiri farefarenai asi bene vaġa-iaġoa. A ġomi tu mase na ma evaġa-maġuri ġenoġoimito lorinai, tauġanimi mabarari Barau boġono vinia. Tauġanimi legari mabarari maki Barau boġono vinia, veiġa maorori beġene vei ġana. <sup>14</sup> Be rakava na ġomi asi ma bene ġori-kaumi, korana ġomi tu dia taravatu ġena seġuka gaburenai ġotanuni. Asiġina. Ġomi tu Barau ġena namo ema varevare-bara nuġanai ġotanuni.

*Vei-iobukaiobuka* ġena vetuġunaġi tarimara

<sup>15</sup> Be kara maia? Veiġa rakavari roġo bitana vei, korana ġita tu dia taravatu gaburenai tatanuni, ne Barau ġena namo e varevare-bara nuġanai tatanuni, be bisini vei-rakava ba? Asiġina ġinavaġi! <sup>16</sup> Ġomi asi ribami, bema tauġemu tarima ta ġena tuġu-rakaorakao tarimamu ai ovevaġa-iaġoni, garona bono seġaġia otoni nai, ġoi tu mo tarima ġena tuġu-rakaorakao tarimamu ai varau oiaġoni. Mo tu rakava ġena vetuġunaġi tarimamu ai boiaġoni, benamo dokonai tu boa maseni. O Barau ġena guruġa bokorana-iaġiani, benamo vei-iobukaiobuka tarimamu ai boiaġoni. <sup>17</sup> Barau sitanikiu-vinia, korana ġomi tovotovonai tu rakava ġena tuġu-rakaorakao tarimami, senaġi toma tu Barau ġena guruġa moġonina ma nuġami mabarari ġesi ġokorana-iaġiani, ġevaġa-ribamito-ġoi ilailanai. <sup>18</sup> Benamo Barau na rakava ġenana eruġa-vaġimito, ma vei-iobukaiobuka ġena vetuġunaġi tarimami ai ġoiaġoto.

<sup>19</sup> Au na mai maġuri maiġeri tu tuġu-rakaorakao tarimari ġeri maġuri ai ama kiraġirini boġono tuġamaġi-fakari ġana, korana ġomi tauġani rekenai tu roġo asi kokoremi. Ġomi guinenai mani tauġanimi legari maniġeri tu veiġa mirori ema veiġa



rakava kwaikwairi ġeri tuġu-rakao-rakao dagarari ai ġovaġa-iaġorito. A initoma mani tauġanimi taviri maniġeri tu guinenai rakava ġenai ġoveirito ilailanai, vei-iobukaiobuka ġena vetuġunaġi dagarari ai boġono vaġa-iaġori, be beġene veaġa-tanu. <sup>20</sup> Ġomi rakava ġena tuġu-rakaorakao tarimami ai roġo ġotanuto-ġoi neganai, vei-iobukaiobuka tu asi ġena gabu ta ġomi ġemi maġuri nuġanai. <sup>21</sup> Ġomi mo veiġa ġoveirito moġeri ġerina tu kara namona ġoġoitaġoato, ei? Moġeri veiġa toma ġotuġamaġi-ġenoġoirini nai, ġemaiakamini. Moġeri veiġa magonai tu mase boġo ġoitaġoani.

<sup>22</sup> Senaġi ġomi toma tu rakava nuġana na eġabi-vaġimito, ma Barau ġena tuġu-rakaorakao tarimami ai ġoiaġoto. Barau ġena tuġu-rakaorakao tarimami ai boġo iaġoni, monana namo boġo doġariani dagarana na tu veaġa-bara tarimami ai boġo iaġoni. Benamo monana ġomi maġuri vanaġivanaġi boġo ġabiani. <sup>23</sup> Korana rakava voina tu mase, a Barau ġena varevare ġera Vereġauka Keriso Iesu ġenana bita ġabiani dagarana tu maġuri vanaġivanaġi.

## 7

Ġita tu dia taravatu ġena seġuka gaburenai tatanuni

<sup>1</sup> Tarikaka-ġore, ġomi tu moġoni asi ġoriba-maoroni? Ġomi tu taravatu ma ribami tarimami au na avaġa-guruġamini. Ribami, tarima roġo maġuri etanuni nai, ġia tu taravatu ġena seġuka gaburenai etanuni, a emaseni nai, taravatu tu asi ġena seġuka ġia ġenai. <sup>2</sup> Vaġa-ilailana, veġaraġo vavinena, bema ġaraġona roġo maġuri etanuni nai, ġia tu veġaraġo taravatuna gaburenai roġo betanuni. A ġaraġona bemaseni murinai, mo veġaraġo taravatuna moġa, seġukana gaburenai asi ma betanuni, befakani. <sup>3</sup> Bema ġia ġaraġona roġo maġuri nuġanai, ma bere veġaraġo-sirivaġi nai, ġia tu veġura-vanaġi vavinenai bitara kiraġia. Senaġi bema ġaraġona bere mase, ġia veġaraġo taravatuna ġena seġuka na tu bere raka-vaġi lorinai, asi bere veġura-vanaġi. Aba, tau fakana ta ma bere ġaraġoa maki, mo tu asi bere veġura-vanaġi.

<sup>4</sup> Tarikakagu, ġomi maki moġesina, Keriso tauġanina emaseto, monai tu ġomi maki taravatu ġenai ġomaseto, (mai tu, ġomi tu dia taravatu ġena seġuka gaburenai ġotanuni). Mo veiġa eġorato anina tu, ġomi Keriso ġena tarimarimai boġono iaġo ġana. Ġomi Keriso ġena tarimarimai ġoiaġoto korana tu, ġita mabarara ġwaġwara namori beġene vetore Barau ġenai ġana. Mai Keriso maiġa tu Barau na mase na ma evaġa-variġisi ġenoġoiato tarimana.

<sup>5</sup> Ġita na tauġanira ġeri ura veiġari roġo takorana-iaġirito-ġoi neganai tu, taravatu na ura rakavari evaġa-bere rosirito-ġoi. Moġeri ura rakavari ġita tauġanirai ġeġauveito-ġoi lorinai, ġita na mase beġe vaġa-ġorarini veiġari taveirito-ġoi. <sup>6</sup> Senaġi ġita toma taravatu ġenana eġabi-vaġirato, korana mo ebaru-barurato-ġoi dagarana ġenai varau tamaseto. Be ġita toma tu Iauka Veaġa ġena dabara variġunai Barau vetuġunaġina bita iaġo-vinini, a dia Buka Veaġai ġetorerito taravaturi koranaiaġi-gigitariri dabaranai.

*Taravatu* ġenana tu kara namona bita ġabiani?

<sup>7</sup> Ini tu kara ma bita toni? Taravatu tu rakava dagarana bita toni ba? Asiġina ġinavaġi! Moġoni, au vei-rakava tu asi bara ribaia, senaġi taravatu ġenana, naima aribaiato. Ilailana, au asi bara riba, tarima tari ġeri farefare mata-ġaniġaniri tu rakava veiġana, bere taravatu iniġesi asi bere kira, “Tarima tari ġeri farefare mata-ġaniġaniri asi bono vei.” <sup>8</sup> Senaġi vei-rakava na Barau ġena mo taravatu guruġana ġenai dabara ta eġita-doġariato, benamo mo dabara na eġauveito, benamo au nuġagu ai tarima tari ġeri farefare mata-ġaniġaniri tuġamaġiri e veiġari irauirauri ema vaġa-berebere rosirito. Korana bema taravatu asiġina nai, vei-rakava tu mase au ġegu ai, be asi ġena seġuka ta, (korana ġena seġuka nuġagu ai eġauveini moġa asi ribagu bene). <sup>9</sup> Taravatu roġosi roġo bara ribaia neganai, au tu maġuri atanuto-ġoi. Senaġi taravatu eiaġomato neganai, vei-rakava au ġegu ai eguru-variġisito, emaġurito. <sup>10</sup> Benamo au tu amaseto,

korana vei-rakava ġegu ai maġuri bene. Monana au ama ribato, maġuri bere ġabi-iaġomaia taravatuna na tu mase moġo eġwa-iaġomaiato. <sup>11</sup> Korana vei-rakava na taravatu guruġana ġenai dabara ta eġita-doġariato, benamo mo dabara na eġauveito, benamo au eġofa-darereguto. Be vei-rakava na au tu taravatu ġenana evaġi-maseguto. <sup>12</sup> Moġa lorinai taravatu tu veaġa, taravatu guruġari maki veaġa, maoro ema namo.

<sup>13</sup> Be, au tu mo dagara namona na ema vaġi-maseguto? Asiġina! Au tu vei-rakava na evaġi-maseguto. Mo dagara namona eiaġomato anina tu, vei-rakava vetoġana korikori nema vaġa-bererosia, be bitana riba, vei-rakava tu rakava kwaikwai. Senaġi vei-rakava tu mo dagara namona ġenana eġauveito, benamo au evaġa-maseguto. Be Barau ġena taravatu guruġana evaġa-foforiani, vei-rakava tu dagara rakava kwaikwaina.

#### *Rakava na ġera maġuri eguine-iaġirini*

<sup>14</sup> Ġita ribara, taravatu tu Barau Iaukana ġenana eiaġomato dagarana, a au tu tarimarima moġo, tauġani ai atanuni. Ma au tu vei-rakava na evoiguto, benamo ġena tuġu-rakaorakao tarimagu ai evaġa-iaġoguto. <sup>15</sup> Au na kara aveiani tu asi maki atuġamaġi-fakaiani. Korana mo veiġa, aurani bana veiri veġata atoni veiġari, tu asi aveirini, senaġi asi aura-vinirini veiġari tu aveirini. <sup>16</sup> Bema asi aura-vinirini veiġari aveirini nai, taravatu tu ama vaġa-moġoniani, ġia tu moġoni namo. <sup>17</sup> Mo veiġa nuġanai, mo tu dia au tauġegu nuġagu sigai mo vei-rakava aveiani. Asiġina! Mo tu mo vei-rakava au ġegu ai etanuni monana eveiani. <sup>18</sup> Au ma ribagu, au ġegu ai mai tauġanina ma ġena veiġa e ura rakavari nuġanai namo ta asiġina-ġinavaġi etanuni. Moġoni, aura-baregoni namo veiġari bana veiri atoni, senaġi ġauvei-iaġiri ġegu ai tu asi ilaila. <sup>19</sup> Ġegu ura tu veiġa namori bana veiri veġata atoni, senaġi asi akokoreni, veiġa rakavari moġo aveirini. Moġoni, asi veġata aurani veiġa rakavari bana veiri, senaġina roġo aveirini. <sup>20</sup> Moġa lorinai, bema au na kara aveiani tu asi veġata aurani bana veia atoni veiġana aveiani nai, mo tu dia au tauġegu nuġagu sigai aveiani. Asiġina! Mo tu vei-rakava au nuġagu ai etanuni, monana eveiani.

<sup>21</sup> Be au ġegu maġuri ai dagara ta noġa moġo taravatu ta kavana na eguine-iaġiguni, maiġesi eġauveini ama ġoitaġoani: Au namo veiġari navei atoni nai, rakava tu moġa nuġagu ai eġauveini. <sup>22</sup> Au iaukagu ai Barau ġena taravatu tu aiaku-iaġiani. <sup>23</sup> Senaġi au na taravatu o seġuka ta maia ama ġitaiani au tauġanigu legari tari nuġari ai ġeġauveini, au ġegu tuġamaġi na evaġa-moġoniani taravatuna ġevetari-viniani. Mai taravatu ta tu vei-rakava ġena taravatu o seġuka, ġia au tauġanigu legari ai eġauveini, ma au eġabiguni, benamo vei-rakava ġena dibura tarimanai evaġa-iaġoguni. <sup>24</sup> Au tu moġoni rakava kwaikwai tarimagu! Deikara na au bevaġa-maġuriguni mai mase tauġanina nuġana na? <sup>25</sup> Barau sitanikiua, korana ġita ġera Vereġauka Iesu Keriso ġenana evaġa-maġuriguto.

Moġa lorinai au tauġegu ġegu tuġamaġi na tu Barau ġena taravatu vetuġunaġina aveini, senaġi tauġanigu na tu vei-rakava ġena taravatu o seġuka vetuġunaġina aiaġo-vinini.

## 8

#### *Barau Iaukana nuġanai bitana maġuri*

<sup>1</sup> Tauna moġa, initoma Keriso Iesu ġena maġuri nuġanai ġetanuni tarimari tu, Barau na vei-rakava tarimari asi bekiraġirini ema asi bekota-vinirini. <sup>2</sup> Korana au tu Keriso Iesu ġena maġuri nuġanai maġuri Iaukana ġena taravatu seġukana na vei-rakava ema mase ġeri taravatu seġukari na varau eruġa-vaġiguto. <sup>3</sup> Taravatu tu tauġani, ma ġena ura rakavari tauġanina, na varau evaġa-moiraiato, be asi ġena seġukai eiaġoto, asi ilaila bevaġa-kavarani. Moġa lorinai taravatu na asi ilaila beveiani ġauveina tu Barau na eveiato. Mo tu Barau tauġena na Natuna korikori vei-rakava tarimari ilailari ai etuġu-iaġomaiato, rakava benema vaġa-darerea ġana. Benamo Keriso ġenana Barau na vei-rakava ġena seġuka tauġani ġenai ekiraġi-fitoġaiato, kerere ma evaġi-maseato. <sup>4</sup> Barau na mo veiġa eveiato anina tu, taravatu na vei-iobukaiobuka veiġana, eura-viniani

veiġana, ġita ġerai beġene fofori-ginikau ġana. Korana toma tu tauġani ġena urai asi tarakani, ne Iauka Veaġa ġena urai tarakani.

<sup>5</sup> Tauġani ġena ura lorinai ġetanuni tarimari tu, tauġani na eura-vinirini dagarari moġo ġetuġamaġi-taġorini; a Iauka Veaġa ġena ura loriri ai ġetanuni tarimari tu, Iauka Veaġa na eura-vinirini dagarari moġo ġetuġamaġi-taġorini. <sup>6</sup> Tarima ta tauġani ġena ura na eġori-kauani tarimana ġena tuġamaġi tu mase evaġa-ġoraiani; a Iauka Veaġa ġena ura na eġori-kauani tarimana ġenai maġuri e maino etanuni. <sup>7</sup> Tauġani dagarari etuġamaġirini tarimana ġena tuġamaġi na tu Barau evetari-viniani. Korana ġia ġena mo tuġamaġi na tu Barau ġena taravatu asi ekorana-iaġiani, ema asiġina-ġinavaġi maki bea korana-iaġiani riba. <sup>8</sup> Moġesina naima tauġani ġena urai ġerakani tarimari na, Barau tu asiġina-ġinavaġi beġe vaġa-iakuani.

<sup>9</sup> Senaġi ġomi tu dia tauġanimi ġeri ura na ġeġori-kaumini tarimami. Ġomi tu Iauka Veaġa na ġemi maġuri eġori-kaurini, korana Barau Iaukana tu ġomi nuġami ai etanuni. Boġono riba, deikara ġenai Keriso Iaukana asi etanuni, ġia tu dia Keriso ġena tarima. <sup>10</sup> Bema Keriso ġomi tata nuġami ai etanuni nai tu, enabe tauġanimi beġe maseni vei-rakava dainai, senaġina iaukani tu maġuri ġetanuni, korana vei-iobukaiobuka tarimami ai varau ġoiaġoto bene. <sup>11</sup> Iesu tu Barau Iaukana na mase na ma evaġa-variġisi ġenoġoiato. Ma bema Barau Iaukana ġomi nuġami ai etanuni nai, mani Iauka ġenana Barau na mani ma berakavani tauġanina, ġomi ġemi ai maniġa, maki maġuri beviniani.

<sup>12</sup> Moġa lorinai, tarikaka-ġore, ġita ġera ġauvei toma tu dia tauġani rekenai bitana tanu, ma tauġani ġena rakava veiġari ma bitana vei-tanu. <sup>13</sup> Korana bema tauġani ġena vei-rakava maġurinai boġo tanuni nai, boġo maseni; senaġi Iauka Veaġa ġena ura dabaranai boġo tanuni nai, tauġani ġena veiġa rakavari boġo vaġi-maserini, benamo ġomi tu boġo maġurini.

<sup>14</sup> Barau Iaukana na eġori-kaurini tarimari tu Barau natuna. <sup>15</sup> Korana ġomi na Iauka Veaġa ġoġabiato, maninana tu dia tuġu-rakaorakao tarimami ai ma bevaġa-iaġomini, be ma boġo garini maia. Asiġina. Mani tu venatu-vanaġi Iaukana ġoġabiato. Ġita tu ġia ġenana tataġi-ġaba-raġeni, takirani, “Tama, Tamagai o,” tatoni. <sup>16</sup> Iauka Veaġa tauġena ġita iaukara ġesi ġeguruġa-vegogoni, ġekirani, ġita tu Barau natuna. <sup>17</sup> Bema ġita Barau natuna nai, ġita maki ma bakura, be Barau na ekiraġi-torerito dagarari bita ġaunarini. Mai tu Keriso na varau eġaunarito dagarari Keriso ġesi bita ġauna-sebonarini. Mo tu dabara sebonai moġo: Keriso emidigu-midiguto moġesi bita midigu-midiguni nai, ġia na marevana baregona eġabiato moġa, ġita na maki bita ġabiani.

#### *Barau marevana baregona ġoirai bita ġabiani*

<sup>18</sup> Ġoirai Barau marevana baregona ġita ġerai bea foforini, monana, au atuġamaġini, initiba mai tamidigumidiguni maiġeri tu bea vanaġirini. <sup>19</sup> Barau ġimana veiveiri dagarari mabarari ġevenari-taġoni ma vetuġa-maġikauri ġesi, Barau na ġia natuna bevaġa-foforirini ema ġena mareva ma mamana baregona bevinirini ġarona ġetanuvaġa-nogaiani. <sup>20</sup> Korana tu Barau ġimana veiveiri dagarari mabarari tu benamo asi ġeri namo tai ġeiaġoto. Mai tu dia ġia tauġeri ġeurato asi ġeri namo ai beġene iaġo ġetato nai. Asiġina. Mai tu Barau tauġena ġena urai moġesina eveirito. Senaġina ġoirai dagara namona ġeri ai bevaġa-ġoraiani, moġa ma ġenari-taġoani. <sup>21</sup> Korana Barau na eveirito dagarari mabarari mase ema boraġa ġena dibura nuġanai ġetanuni roġo. Senaġi ġaro ta maiġeri dagara mabarari Barau na mo mase ema boraġa ġena dibura na bea ġabi-veġitarini, benamo Barau natuna ġeri gabu fakanai, ma mareva baregona gabunai, ma betorerini.

<sup>22</sup> Ġita ma ribara, Barau ġimana veiveiri dagarari mabarari tu, vavine ġeġabi ġana nuġari ġemidiguni kavana, ġia midigu ġeġanini. Mabarari ġeloduni, ġeġabani, beiaġoma mo toma. <sup>23</sup> Senaġi mai tu dia ġia moġo ġeloduni, ġeġabani. Asiġi. Ġita Iauka Veaġa ġwaġwana guinena taġabiato maiġera maki nuġarai taloduni, taġabani, Barau

na bene natu-vanaḡira ḡarona tanari-taḡoani nuḡanai. Mo tu ḡita tauḡanira bevaḡa-maḡuririni negana tanari-taḡoani. <sup>24</sup> Ḡita tu mai tuḡamaḡikau bakunai Barau na ḡita evaḡa-maḡurirato. Senaḡi tatuḡamaḡi-kauani dagarana taḡita-ḡoitaḡoani nai, asi ma bita tuḡamaḡi-kauani. Moḡa lorinai kamara deikara na varau eḡoitaḡoato dagarana roḡo etuḡamaḡi-kauani, ei? <sup>25</sup> A bema roḡosi roḡo bitara ḡabia dagarana tatuḡamaḡi-kauani nai tu, ma vevaḡa-gwaḡiḡira ḡesi bita nari vaḡa-noga taḡoani.

<sup>26</sup> Moḡa nuḡanai, Iauka Veaḡa na maki ḡita ḡera moira gaburi ai evaḡa-kavarani. Ma ḡita asi ribara kara bita ḡauḡau-iaḡirini, senaḡi Iauka Veaḡa tauḡena ḡita iatarai eḡauḡauni. Ḡia eḡuriḡurini nai tu, etaḡi-ḡabaraḡeni. Mo etaḡi-ḡabaraḡeni guruḡari tu tarimarima na asi ilaila beḡe kiraḡirini guruḡari. <sup>27</sup> Barau ma ribana ginikau ḡita nuḡara iaḡasiri ai kara ḡetanuni, ma Iauka Veaḡa ḡena tuḡamaḡi maki ḡia tu ma ribana. Korana Iauka Veaḡa tu Barau ḡena ura loriri ai ḡena doḡoro tarimari veaḡari iatari ai eḡuriḡurini.

<sup>28</sup> Ḡita ribara, deikara Barau ḡeura-viniani tarimari na ḡeri ai karakara ḡeḡorani dagarari mabarari ḡerina namo beḡe ḡoitaḡorini. Korana moḡeri tarima tu ḡia na ḡena ura lorinai ekearito, maḡuri beḡene ḡabia ḡana. <sup>29</sup> Barau na deideiri eriba-guinerito ḡia ḡeura-viniani tarimari tu ḡia na eviriḡirito, ḡia Natuna ilailanai bene vaḡa-iaḡori ḡana. Korana mo dabarai ḡia Natuna tu maḡuri guine meronai beiaḡoni tarikaka ḡutuma vefakari ai. <sup>30</sup> Mo eḡabi-hidirito tarimari tu ḡia na ekearito tarimari; ma mo ekearito tarimari tu ḡia na vei-iobukaiobuka tarimari ai ekiraḡirito; ma mai vei-maoromaoro tarimari ai ekiraḡirito tarimari tu, ḡia marevana baregona evinirito.

*Barau ḡena veuravini tu barego vedaurea*

<sup>31</sup> Be Barau na maiḡeri veiḡa eveirito iatari ai ḡita tu kara bita kiraḡiani? Bema Barau ḡita ḡesi, ḡita evaḡa-kavarani nai, dei na ḡita beiaḡoma-vinirani? Ta asiḡina, korana <sup>32</sup> Natuna korikori maki gwaina asi eḡabiato, senaḡi etao-fitoḡaiato ḡita bitana maḡuri ḡana. Ma kamara dabarai tu Iesu Keriso ḡesi dagara mabarari asi bevarevare-vini sebonarani? <sup>33</sup> Be, Barau na eviriḡirito tarimari tu deikara na bevaḡa-daḡarini Barau ḡoiranai? Ta asiḡina, korana Barau tauḡena na maorori ekiraḡirini! <sup>34</sup> Ma deikara na rakava voina metona bevinirini, ei? Ta asiḡina, korana Keriso Iesu tu emaseto, benamo Barau na ma evaḡa-maḡuri ḡenoḡoiato. Ḡia toma tu Barau ḡimana aroribanai etanutaḡoni, ma ḡita iatarai eḡuriḡurini. <sup>35</sup> Ḡita tu deikara na Keriso ḡena veuravini nuḡana na beḡabi-ḡerevaḡirani? Meto ḡerai ḡeraḡasini moḡerina ba? Maḡuri gwaḡiḡiri ḡerai ḡeraḡasini moḡerina ba? Ḡevaḡa-midigu midigurani e ḡelai-rovo-rovorani moḡerina ba? Vito nanu mase taḡoitaḡorini moḡerina ba? Asi kefira dabuḡari tatanuni moḡerina ba? Vevaḡa-gari dagarari taḡoirarini moḡerina ba? Vetari baḡari na beḡe vaḡirani monana, ei? Asiḡina veḡata! <sup>36</sup> Buka Veaḡai ekirani kavana,

“Ḡai tu ḡoi daimu ai vanaḡivanaḡi ḡevaḡi-masema veḡata ḡetoni.

Ḡai tu beḡene vaḡi-maseri ḡetoni mamoeeri kavana ḡeveimani.”

<sup>37</sup> Senaḡi euravini-baregorani Kerisona ḡenana maiḡeri meto mabarari nuḡari ai takokorenai veḡata, be tavaḡa-darererini. <sup>38</sup> Korana au ama riba-maoroni, ḡita tu dagara ta na asi ilaila veḡata Barau ḡena veuravini ḡenana beḡabi-ḡerevaḡirani: Mase o maḡuri, aneru o Iauka rakavari, inította taḡitarini dagarari na o ḡoirai vau mani beḡe ḡorani dagarari na, o seḡuka kotari, <sup>39</sup> guba tuḡunai dagara ta o tanobara gaburenai mase gabuna dagarana ta, o Barau ḡimana veiveiri dagarana ta na asiḡina-ḡinavaḡi Barau ḡena veuravini na beḡabi-veḡitarani, mo veuravini tu Barau na ḡita evinirato, korana ḡita tu ḡera Vereḡauka Keriso Iesu nuḡanai tatanuni.

## 9

*Isaraela, Barau na eḡabi-hidiato besena*

<sup>1</sup> Au tu Keriso ḡena maḡuri nuḡanai atanuni, naima asi aḡofaḡofani, guruḡa moḡoniri akiraḡirini, Iauka Veaḡa na au nuḡagu ai evaḡa-fofori ginikauani, ma au nuḡagu iaḡasina

na evaḡa-moḡoniani. <sup>2</sup> Au tu nuḡagu taḡitaḡi asikei, ma ḡegu nuḡa-vekwaraḡi Isaraela tarimari iatari ai maki asi ekorini. <sup>3</sup> ḡegu ura baregona tu maiḡa moḡo: Bere namo, au tarikakagu ema ḡegu doḡoro korikoriri maḡuri beḡene ḡabia uranai tu, Barau na au moḡo iatagu ai rakava meto lelevaḡina bere tore-kaua, ema Keriso ḡenana bere torefitoḡagu, be rekwarekwa tarimagu ai bara iaḡo, a ḡia tu au gabugu ai maḡuri beḡere ḡabia. <sup>4</sup> Mai tu Isaraela tarimari akiraḡirini. ḡia tu Barau na enatu-vanaḡirito e Barau na marevana e mamana baregona evaḡa-fofori vinirito; ema ḡena kiraḡitore guruḡari baregori evinirito, taravatu maki evinirito; e Barau beḡene toma-rakariḡoa maḡuriri ekira-vararito, ema guruḡa-tore tu ḡia ḡeri ai eveirito. <sup>5</sup> Aberahamo, Isako, Iakobo tu ḡia seseri doḡori, ema tauḡani rekenai bita ḡitaiani nai, Keriso tu ḡia ḡeri bese tauna. Keriso tu Barau, ma dagara mabarari debari tu ḡia. ḡia tu vanaḡivanaḡi bitana vaḡaraḡea. Amen.

<sup>6</sup> Au asi akirani, Barau ḡena guruḡa (Isaraela tarimari ḡeri ai) tu benamo asi tauri ai beḡe iaḡo atoni. Asiḡina. Au akirani tu, (Barau ḡena guruḡa tu Isaraela besena mabarana ḡeri senaḡi) dia Isaraela besena mabarana tu Isaraela tarimari korikori. <sup>7</sup> Ema maiḡesi maki asi bakirani: ḡia tu Aberahamo besena, be ḡia mabarari Aberahamo natuna batoni. Asiḡina. Korana Barau ekirato tu, “ḡoi besemu tu Isako ḡenana moḡo vau beḡea maḡurini.” <sup>8</sup> Moḡa anina tu: Tauḡani rekenai ḡemaḡurini tarimari tu dia Barau natuna. Asiḡina. ḡia tu Barau ḡena kiraḡitore maḡuriri korikoriri ai ḡemaḡurini tarimari moḡo tu Aberahamo besena. <sup>9</sup> Korana Barau ḡena kiraḡitore guruḡana tu iniḡesi ekirani, “Au na baḡabi-torea ḡaronai ma baḡenoḡoi-iaḡomani, benamo Sara na natumi merona ta beḡabiani.”

<sup>10</sup> Dia moḡa moḡo, senaḡi boḡono ḡitaia, Rebeka natuna kafa ruarua maki tamari tu sebona moḡo, mo tu ḡita tamara Isako. <sup>11-12</sup> Senaḡi kafa roḡosi beḡere maḡuri e veiḡa namona ta o rakavana ta maki roḡosi beḡere vei-karaia nuḡanai, Barau na Rebeka ekiraiato, ekirato, “Tau-guinenana na tau-muriseina ḡena vetuḡunaḡi beiaḡovinini.” Tovotovonai veḡata Barau moḡesina eguruḡato, korana ḡia ḡena boioḡa ilailanai eḡabi-hidiato merona tu gabunai betanuni veḡata. Tarima Barau na tu dia ḡeri ḡauvei e veiḡa namori bakuri ai ekearini, senaḡi Barau tauḡena ḡena ribai moḡo ekearini. <sup>13</sup> Buka Veāḡai etoreato kavana, ekirani, “Iakobo tu au na aura-viniani, senaḡi Esau tu aiaurakavaiani.”

<sup>14</sup> Be kara bita toni? Sikira, Barau tu dia vei-iobukaiobuka Barauna sisi? Asiḡina ḡinavaḡi veḡata. <sup>15</sup> Korana Barau na Mose tu ekiraiato, ekirato, “Au na deikara bavetuḡa-ḡwaiani tarimana, ḡia tu bavetuḡa-ḡwaiani, ema au na matari vetuḡari baḡwani tarimari tu, bavaḡa-kavarini korana bavetuḡa-ḡwari kekei.” <sup>16</sup> Moḡa lorinai, dagara baregona tu dia tarimarima ḡeri ura o vekwaraḡi, senaḡi Barau ḡena vevetuḡaḡwa. <sup>17</sup> Korana Buka Veāḡai ekirani, Barau na Pharao, Aigupito ḡeri vere, tu maiḡesina ekiraiato, ekirato, “Au na ḡoi kini ai atoremuto korana tu maiḡa, ḡoi ḡemu kira-sirivaḡi ai au ḡegu seḡuka bana vaḡa-rakarosia, be au aragu tanobara mabaranai beḡene kiraḡi-foforia.” <sup>18</sup> Moḡesina naima bema Barau eurani tarima ta nevetuḡa-ḡwaia etoni nai tu, evetuḡa-ḡwaiani, ma eurani ta nuḡana nevaḡa-gwaḡiḡi foroforoa etoni nai, nuḡana evaḡagwaḡiḡi foroforoani, benamo Barau ekira-sirivaḡi viniani.

<sup>19</sup> Ma ta na au bokiraguni, bokirani, “O kara dainai ḡita Barau na tu roḡo evaḡadaḡarani, ekirarani, ḡita tu vei-rakava tarimara veḡata etoni, ei? Be deikara tu ma kokorena Barau na neveia veḡata betoni veiḡana ḡia na bekira-ḡoiani, ei? <sup>20</sup> ḡoi tauḡemu novetuḡamaḡi, ḡoi tu deikara, be Barau garona ḡoi na oḡareani? Be, ḡimana na ḡeveiato dagarana ta na eveiato tarimana bekiraiani, ‘ḡoi tu kara dainai au maiḡesina oveiguto,’ betoni ba?” <sup>21</sup> Ribara, ḡuro eveini tarimana tu ma ḡena maoro veḡata, mo tano tavi baregona sebona eḡabiani, monana ḡuro ruarua beveirini. ḡuro ta tu namo vedaurea beveiani, mo tu vereko baregona ḡana, ma ḡuro ta tu bevei-kavaiani moḡo, vanaḡivanaḡi

daridari ǵana. Mai ǵuro vei tarimana maiǵa tu moǵoni ma ǵena maoro ba asiǵina mo veiǵa beveiani nai tu, ei?

<sup>22</sup> Barau maki moǵoni moǵesina eveito. Ǵia eurato, ǵia ǵena baru baregona nevaǵa-foforia, ema ǵena seǵuka nevaǵa-bererosia, be tarimarima na beǵene ribaia etato. Senaǵi ebaruvini-rakava rakavarito ma bene vaǵi-ǵosiǵosiri etato tarimari ǵeri ai, nuǵana eǵabi-tariato e evevaǵa-gwaǵiǵito. <sup>23</sup> Barau na mo veiǵa eveiato korana tu ǵia eurato, ǵia marevana barego lelevaǵina moǵa beǵene ribaia etato. Ǵita tu ǵia na evetuǵa-ǵwarato, ema ǵita tu Barau na tovotovonai veǵata erovina-torerato, ǵia marevana baregona bitana ǵabia ǵana. <sup>24</sup> Ǵita tu ǵia na ekearato tarimara. Barau na tu dia Iuda tarimama moǵo ekeamato, asiǵina, irau bese tarimami maki ekeamito. <sup>25</sup> Hosea nuǵanai eguruǵato kavana, ekirato, “Ǵia tu dia au ǵegu tarimarima, senaǵi ‘au ǵegu tarimarimai’ bakiraǵirini, ema asi aura-vinirini doǵorona bakiraǵirini, bakirani, ‘ǵegu uravini doǵorona’ batoni, <sup>26</sup> ema, ‘Ǵomi tu dia au ǵegu tarimarima’ atato gabunai, mo gabu sebonai ǵia bakiraǵirini, ‘Maǵuri Barauna natuna doǵorori.’ ”

<sup>27</sup> Isaia na Isaraela tarimari ekiraǵirini nai tu ekirato, “Mo tu moǵoni, Isaraela tarimari asisebo kone-mirina noǵa moǵo, senaǵi tarima viravira moǵo beǵe maǵurini. <sup>28</sup> Korana tu Vereǵauka na tanobara tarimari ǵeri rakava voiri tu beraga-vini-vaǵirini, asi bekwaiboni.” <sup>29</sup> Mai tu Isaia tovotovonai eguruǵato kavana, “Bere seǵuka rakava-rakava Vereǵaukana na ǵita besera tari asi bere goru-tariri nai, ǵita tu Sodoma e Gomora kavari bitara vei.”

#### *Isaraela tarimari asi ǵeri veǵabidadama*

<sup>30</sup> Be ǵita tu kara ma bita toni? Iniǵesina sikira: Irau bese tarimari tu vei-iobukaiobuka tarimari ai beǵene iaǵo vekwaraǵina tu asi ǵeveito (Isaraela tarimari kavana), senaǵi ǵeri veǵabidadama Iesu Keriso ǵenai ǵetoreani ǵenana, vei-iobukaiobuka tarimari ai ǵeiaǵoto. <sup>31</sup> A Isaraela tarimari na tu taravatu ǵekorana-iaǵi ginikauato Barau na vei-iobukaiobuka tarimari bene kiraǵiri ǵana nuǵanai tu, vei-iobukaiobuka tarimari ai asi ǵeiaǵoto. <sup>32</sup> Kara dainai? Korana ǵia tu dia veǵabidadama ǵenana vei-iobukaiobuka tarimari ai beǵe iaǵoni ǵetato. Asiǵina. Ǵia ǵekirato tu, ǵeri ǵauvei e veiǵa ǵerina vauro vei-iobukaiobuka tarimari ai beǵe iaǵoni ǵetato. Moǵa lorinai Keriso tu ǵia ǵeri vedaǵaraǵe forenai eiaǵoto, benamo ǵeketo-tarito. <sup>33</sup> Buka Veaǵai etoreato ekirani kavana, “Ǵoǵitaia, au na Sionai (o Ierusalem) fore ta atoreato, tarima bene vaǵa-vedaǵa-raǵeri ǵana, ema mo fore barana atoreato, bene vei-ketori uranai. Senaǵi ǵia bevaǵa-moǵoniani tarimana tu, asiǵina-ǵinavaǵi moǵo bemaikaiani.”

## 10

<sup>1</sup> Tarikakagu mabarami, au nuǵagu ǵena ura baregona korikori, ma ǵegu noǵinoǵi Barau ǵenai aveiani tu, Isaraela tarimari Barau na bene vaǵa-maǵuriri. <sup>2</sup> Korana au na maki ǵia avaǵa-moǵonirini, ǵia na Barau ǵena ura veiǵari beǵene korana-iaǵi ginikauri veǵata, senaǵi dagara sebona tu, Barau uravinina maǵurina korikori ǵia tu asi ribari. <sup>3</sup> Korana Barau ǵenana vei-iobukaiobuka eiaǵomani, moǵa ǵia tu asi ribari, be ǵia tauǵeri na ǵeri vei-iobukaiobuka veiǵari boruri ma ǵevaǵa-ruǵarini. Moǵesina naima Barau na tarimarima etore-roroǵotorini lairi korikori ǵia na tu asi ǵeǵabi-raǵerini. <sup>4</sup> Taravatu tu eiaǵomato mo Keriso ǵenai ema magoto. Toma tu Keriso beǵe vaǵa-moǵoniani tarimari mabarari tu vei-iobukaiobuka tarimari ai beǵe iaǵoni.

<sup>5</sup> Mose na taravatu korana-iaḡina ḡenana vau Barau ḡoiranai vei-iobukaiobuka tarimari ai beḡe iaḡoni lairi ekirarito nai, maiḡesina ekirato, “Mai taravatu maiḡeri beḡe korana-iaḡirini tarimari tu mai taravatu ḡenana maḡuri beḡe ḡabiani.” <sup>6</sup> Senaḡi veḡabidadama ḡenana vei-iobukaiobuka taḡoitaḡoani guruḡana Buka Veaḡai tu maiḡesina ekirani, “Nuḡamu ai asi bono kira, ‘Guba ḡana deikara bevaraḡeni?’ ” Be Keriso guba na bene ḡori-mariḡoa ḡana. <sup>7</sup> “Ema asi bono kira maki, ‘Deikara tano gaburena ḡana bevariḡoni?’ ” Be Keriso mase na bene ḡori-maraḡea ḡana. <sup>8</sup> A mai guruḡa korana korikori tu maiḡesi ekirani, “Guruḡa tu ḡoi sevisevimu ai maniḡa; ḡoi murumu ai ma ḡoi lorumu ḡutunai etanuni.” Ḡai na veḡabi-dadama guruḡana ḡomi ḡemi ai tu maiḡa ḡakiraḡiani. <sup>9</sup> Mo tu bema murumu na boguruḡa-foforini, bokirani, “Iesu tu Vereḡauka,” botoni, ma lorumu ḡutuna bovaḡa-moḡoniani, ḡia tu Barau na mase na ma evaḡa-variḡisi ḡenoḡoiato nai, Barau na bevaḡa-maḡurimuni. <sup>10</sup> Korana loruna ḡutuna na evaḡa-moḡoniani tarimana tu, Barau ḡoiranai vei-iobukaiobuka tarimanai eiaḡoni; ema muruna na eguruḡa-iaḡi foforini tu, maḡuri edoḡariani. <sup>11</sup> Korana Buka Veaḡai maiḡesina ekirani, “Ḡia evaḡa-moḡoniani tarimana tu asi bemaikaiani.” <sup>12</sup> Anina tu, Iuda tarimari e irau bese tarimari fakari ai vetoḡa boruna ta asi betanuni, korana tu ḡita mabarara ḡera Vereḡauka tu sebona kwariḡutu, Barau ḡereḡana moḡo, ma ḡia ḡenai ḡekea-raḡeni tarimarimari mabarari tu ḡena vevaḡa-namo barego vedaureana evinirini. <sup>13</sup> Korana, “Barau arana beḡe vatoani tarimari mabarari tu Barau na bevaḡa-maḡuririni.”

<sup>14</sup> Senaḡina, kamara dabarai Barau asi ḡevaḡa-moḡoniani tarimari ḡia ḡenai beḡe kea-raḡeni? Ema kamara lai ai Barau varina asi ḡeseḡaḡiato tauri na ḡia beḡe vaḡa-moḡoniani? Ema kamara dabarai ḡia varina beḡe seḡaḡiani, bema ta na asi beḡobatavinirini nai? <sup>15</sup> E deikara na beḡobatavinirini, bema Barau na ta asi betuḡuani nai? Buka Veaḡai ekirani kavana, “Vari Namona eḡwa-iaḡomaiani tarimana kwakuna tu namo vedaureana veḡata, (korana namo baregona evaḡa-foforiani).”

<sup>16</sup> Senaḡi dia tarimarima mabarari na Vari Namona ḡeḡabi-raḡeani, nai Isaia maiḡesi ekirani, “Vereḡauka, deikara na ḡaina guruḡa evaḡa-moḡoniani?” <sup>17</sup> Ḡita ribara, veḡabidadama tu Vari Namona ḡeḡobata-iaḡiani taseḡaḡiani, monana eiaḡomani; ema taseḡaḡiani varina tu Keriso ḡena guruḡa. <sup>18</sup> Senaḡi Isaraela tarimari tu kamasi? Barau ḡena guruḡa moḡoni ḡia na asi ḡeseḡaḡiato? Asiḡina, ḡeseḡaḡiato. Korana Buka Veaḡai ekirani, “Tarima kotari na tanobara mabaranai ḡea vari-fiuato, ema ḡeri guruḡa maki tanobara dokona-dokona ḡea ḡoitaḡoato.”

<sup>19</sup> Avedanaḡini: Isaraela tarimari na mo guruḡa tauna asi ḡedoḡariato? Asiḡina, ḡia ma ribari. Korana Mose varau maiḡesi ekirato, “Au na ḡomi tu asi arana besena ta ḡerina ḡomi bavaḡa-maiakamini. Ema au na ḡomi tu asi ḡetuḡamaḡi-fakani besena ḡenana bavaḡa-barumini.”

<sup>20</sup> Ema Isaia maki asi eguruḡa-garito, ekirato, “Au tu asi ḡevetauguto tarimari na ḡeḡoitaḡoguto, ema asi ḡevedanaḡi-vetauguto tarimari ḡeri ai avevaḡa-foforito.”

<sup>21</sup> Senaḡi Isaraela tarimari tu ekirarito, ekirato, “Boḡiboḡi na eiaḡoni mo ea lavini, au ḡimagu tu seḡafore ema kira-sirivaḡi tarimari ḡeri ai atuḡu-rosiani.”

## 11

### *Isaraela besena lakouna Barau na evetuḡarito*

<sup>1</sup> Moḡa lorinai ma avedanaḡini: Barau na ḡena Isaraela tarimari tu eruḡa-doḡe-muriḡirito ba? Asiḡina ḡinavaḡi! Au maki Isaraela tarimagu, Aberahamo besena, Beniamina ḡena doḡoro taugu. <sup>2</sup> Barau na ḡena tarimarima, tovotovona na veḡata eḡabi-hidirito tarimari, kamasi beruḡa-doḡe-muriḡirini? Ḡomi Buka Veaḡai Elia varina ḡetoreato tu moḡoni veḡata asi ribami? Ḡia Isaraela tarimari na beḡe vaḡi-maseani ḡetato nai, Barau ḡenai eḡauḡauto, maiḡesi ekirato: <sup>3</sup> Vereḡauka, ḡemu proveta

tarimari tu beḡe vaḡi-ḡosiri, ma ḡoi ḡevarevare-vinimuni dagarari ḡetore-kaurini e ḡegaburini fata veaḡari maki beḡe rovori. Mai tu au moḡo ḡereḡagu roḡo maiḡegu nuḡanai, au maki ḡevaḡi-masegu ḡetoni. <sup>4</sup> Ma Barau na ḡia tu kamasi evaḡa-veseato, ei? Barau ekirato, “Au ḡegu tarimarima mabarari daḡara imaima ruarua (7,000) atore-ḡerevaḡirito, roḡo maḡuri maniḡeri. ḡia na ḡofaḡofa barauna Bal asi ḡetoma-rakariḡo viniato.” <sup>5</sup> Maitoma maki, Barau na ḡena namo e varevare-barai Isaraela tarimari lakouna eḡabi-viriḡirito. <sup>6</sup> Bema ḡena vevetuḡaḡwa e varevare-barai eveḡabi-hidito nai, dia kara ta ḡeveiato bakunai eḡabi-viriḡirito. Korana bema ḡeri ḡauvei ta dainai Barau na bere ḡabi-hidiri nai, ḡena ḡabihidi veiḡana tu dia ḡena vevetuḡaḡwa e varevare-bara dainai, vevetuḡaḡwa maki asi anina.

<sup>7</sup> Be kara bita kiraḡiani? Isaraela tarimari na beḡene ḡabia ḡana ḡevetau-gwadagwadaiato dagarana tu ḡia na asi ḡeḡabiato, senaḡi Barau na eḡabi-hidirito tarimari kotari na moḡo ḡeḡabiato. A mabarari na tu Barau ḡena keakea asi ḡeseḡaḡi-viniato. <sup>8</sup> Buka Veaḡai ekirani kavana, “Barau na ḡia nuḡari e ḡeri tuḡamaḡi tu evei-veḡonurito, be tovotovona na veḡata mo inította ḡia tu asi ḡeboḡe-fakani, ema garo maki asi ḡeseḡaḡini.”

<sup>9</sup> Davida ḡena guruḡa maki maiḡesi ekirani, “Bere namo ḡari ḡaniḡani fatana maki ḡeri konagi e ḡeri ganai bene iaḡo, e ḡeri vekakenaḡi dagarana bene iaḡo, ema ḡeri vei-rakava voina ḡabiḡabina gabunai bene iaḡo.

<sup>10</sup> Bere namo matari bene vei-mukunari, be asi beḡene boḡeboḡe, ma doḡeri beḡene ḡeḡeva, be beḡene raka-dorudoru vanaḡivanaḡi.”

*Barau na boḡa* oliveri legari vamoka oliveri legari ḡeri ai ekafa-kaurito

<sup>11</sup> Ma avedanaḡini, Isaraela tarimari ḡevekakenaḡito nai tu, beḡene keto-moḡovaḡi ḡana ba? Asiḡina, dia moḡesina! Senaḡi ḡeri kira-sirivaḡi dainai, vevaḡa-maḡuri tu irau bese tarimari ḡeri ai evotuto, korana Isaraela tarimari beḡene launaḡiri, Barau ḡena vevaḡa-maḡuri beḡene vetaua ḡana. <sup>12</sup> Situḡamaḡia, Isaraela ḡeri kira-sirivaḡi na vevaḡa-namo barego tanobarai ema raka-toḡato, ema iauka maḡuriri ai ḡerabu-iaḡirini gaburi ai irau bese tarimari ḡeri ai namo-bara ema foforini, a Isaraela tarimari mabarari beḡe ḡenoḡoini Barau ḡenai nai tu, Barau ḡena vevaḡa-namo tu ma barego lelevaḡina bebubu-riḡoani.

<sup>13</sup> Mai tu ḡomi irau bese tarimami, avaḡa-guruḡamini, korana au tu ḡomi irau bese tarimami ḡemi apostolo taugu. Au ḡegu iaku tu barego mai ḡauvei aveiani nai. <sup>14</sup> Korana au aurani ḡegu tarimarima korikori bana vaḡa-vetuḡamaḡi daradarari, be kotari na maḡuri beḡene doḡariri. <sup>15</sup> Korana Iuda tarimari Barau na eruḡarito nai tu, tanobara boruri tarimari eḡabi-kavirito, a Barau na Isaraela tarimari ma beḡabi-raḡerini tu, kamasi beḡea vetoreni? Namu baregona beḡorani! Mo tu mase na maḡuri-ḡenoḡoi bevaḡa-ḡoraiani kavana.

<sup>16</sup> Bema ḡebaki-guineani beredina Barau ḡeviniani nai tu, mo beredi mabarana tu ḡia ḡena, ema bema ḡau ḡokana Barau ḡeviniani nai, legana maki ḡia ḡena. <sup>17</sup> Isaraela tu noḡa moḡo olive ḡauna namona ta. Barau na mo olive legana tari etau-korurito, ma ḡomi, boḡa olivena legari, eḡabimito, mo etau-korurito moḡeri gaburi ai evaḡa-kafakafa-kaumito, benamo toma tu mo olive namona ḡokana na ḡaniḡani namori ḡevaraḡeni, moḡeri ḡoḡanirini. <sup>18</sup> Moḡa lorinai asi boḡono veiavi ḡia vekaravari ai. Bema boḡo veiavini nai, boḡono riba: Dia ḡomi na ḡau ḡokana ḡovaḡa-kavaiani, asiḡina, ḡau ḡokana na ḡomi evaḡa-kavamini.

<sup>19</sup> Betaḡu boḡo kirani, “Olive legari tu etau-korurito, au ḡia gaburi ai bene vaḡa-kafakaugu ḡana.” <sup>20</sup> Oba, mani tu moḡoni. Senaḡi ḡia tu asi ḡeri veḡabidadama naima etau-korurito, ma ḡomi tu ḡemi veḡabidadama lorinai, ḡia gaburi ai ḡoruḡani. Moḡesina naima asi boḡono vetuḡamaḡi-varaḡe varaḡe, senaḡi boḡono gari moḡo. <sup>21</sup> Korana bema



Barau na olive legana korikoriri maki gwairi asi eḡabirito senaḡi etau-korurito nai, ḡomi maki gwaimi asi beḡabirini.

<sup>22</sup> Moḡeri na Barau ḡena veiau-namo veiḡana namona ma ḡena veiau-rakava veiḡana metona boḡono ḡitaia. Barau ḡabidadamanai ḡeketoni tarimari tu eiau-rakavarini, ma ḡeri ai veiḡa metona eveirini. Senaḡi ḡomi tu eiau-namomini. Barau na roḡo beiau-namo-iaḡomini, bema ḡia ḡena veiau-namo nuḡanai moḡo boḡo tanu-iaḡoni nai. Asiḡina nai tu, ḡomi maki bebasi-ḡutumini. <sup>23</sup> Iuda tarimari maki, bema Barau asi ḡevaḡa-moḡoniani veiḡari beḡe iaḡuirini, benamo Barau beḡe vaḡa-moḡoniani nai tu, Barau na ma bekafakau-ḡenoḡoirini. Korana Barau na ma bekafakau-ḡenoḡoirini riba. <sup>24</sup> ḡomi tu boḡa olivena ḡauna legana, a dia varovaro olivena, senaḡi eḡabimito, ma vamoka olivena ḡaunai ekafa-kaumito. Bema ḡomi boḡa olivena legari moḡesina eveimito nai, vamoka olivena legana etau-koruato, moḡea maki etau-koruato olivena ḡaunai ma bekafa-kauani riba.

*Israela tarimari mabarari Barau na bevaḡa-maḡuririni*

<sup>25</sup> Tarikakagu mabarami, au aurani mai guruḡa vekuretoḡana maiḡa boḡono ribaia, korana tauḡemi boḡo vekiraḡi-varaḡe varaḡeni garina: Israela tarimari nuḡari tu moḡesi gwaḡiḡi moḡo asi beḡe tanu-iaḡoni. Asiḡina. ḡia nuḡari e ḡeri tuḡamaḡi moḡesi beḡe tanu-iaḡoni, beiaḡoni mo, irau bese tarimari mabarari, (Barau na eḡabi-hidirito tarimari), beḡema bere-toḡani Barau ḡena maḡuri nuḡanai. <sup>26</sup> Moḡa murinai vau Israela besena mabarari Barau na bevaḡa-maḡuririni. Buka Veḡai etoreato ilailanai, ekirato,

“Siona (o Ierusalema) na

vevaḡa-maḡuri tauna beiaḡomani,

ḡia na Iakobo besena ḡenana Barau asi ḡetoma-rakariḡoani maḡurina betore-veḡitaiani.

<sup>27</sup> Benamo au na ḡia ḡeri rakava baḡabi-veḡitaiani nai,

au na ḡia ḡeri ai mai kiraḡitore gwaḡiḡina baveiani.”

<sup>28</sup> Iuda tarimari ḡutuma na Vari Namona ḡekira-fitoḡaiani nai, Barau ḡena vetari tarimari ai ḡeiaḡoto. Senaḡi moḡesi ḡeveito dainai, ḡemi maḡuri dabarana evekeoto. A ḡia tu Barau na eḡabi-hidirito besena lorinai, seneri (Aberahamo, Isako, Iakobo) bakuri ai Barau na eura-vinirini. <sup>29</sup> Korana Barau ḡena varevare ema ḡena keakea tarimarima ḡeri ai tu beḡe tanu-vanaḡi vanaḡini, asi ma beḡe vekoki-fitoḡani dagarari. <sup>30</sup> Vaḡa-ilailana ḡomi tovotovonai tu Barau ḡokira-sirivaḡi viniato-ḡoi, senaḡi toma tu Barau ḡena vevetuḡaḡwa boḡo ḡoitaḡoa. Gomi tu Israela tarimari ḡeri kira-sirivaḡi dainai, Barau ḡena vevetuḡaḡwa boḡo ḡabia. <sup>31</sup> Israela maki toma tu ḡekira-sirivaḡini, korana Barau na ḡomi evetuḡa-ḡwamini dainai, ḡia maki ma bene vetuḡa-ḡwari ḡana. <sup>32</sup> Korana Barau na tarimarima mabarari kira-sirivaḡi maḡurinai etore-toḡarito, korana ḡia ḡena vevetuḡaḡwa ḡia mabarari na beḡene ḡabia.

*Barau bitana vaḡa-raḡea*

<sup>33</sup> Barau ḡena iaunega ema riba tu barego, ma barego lelevaḡi veḡata! ḡia ḡena vevaḡa-maoro dabarana maki vetau-kavana beḡorani! ḡena dabara maki deikara na betuḡamaḡi-doḡariani? <sup>34</sup> Buka Veḡa ekirani kavana,

“Vereḡauka ḡena tuḡamaḡi tu dei na beribaiani?

O deikara na ḡia besisiba-viniani?

<sup>35</sup> Dei na Barau evini-farefareato, be Barau na ḡia ma bevini vaḡa-voiani?”

<sup>36</sup> Korana dagara mabarari korari tu ḡia, ema ḡia ḡenana ḡeḡorato e ḡefoforito, ema ḡia ḡena moḡo. ḡia moḡo bitana vaḡa-raḡea mo vanaḡivanaḡi. Amen.

<sup>1</sup> Tarikakagu mabarami, Barau ġena vevetuġaġwa tu barego aġitaiani ġita iatarai. Tauna moġa au na ġomi alaunaġimini, akirani, tauġanimi mabarari varevare dagarari maġuriri e veaġari ai boġono vaġa-iaġori, ema Barau na beiaku-iaġi-baregorini tauġaniri Barau boġono vini-raġea, ginitaġo varevareri kavana. Moġesina boġo veini tu, Barau boġo toma-rakariġo vini-korikoriani. <sup>2</sup> Mai tanobara ġena maġuri ema veiġa irauirauri asi boġono ġabi-raġeri ema asi boġono veiri. A ġomi tu ġemi tuġamaġi boġono vaġa-variġuri, be ġemi maġuri beġene vekurevo. Monana vau Barau ġena ura korikori boġo riba-ginikaurini. Boġo ribani maki, aiġa tu namo vedaurea, Barau na eiaku-iaġiani dagarana.

<sup>3</sup> Barau na ġena namo e varevare-bara lorinai ekeaguto, ġena apostolo ġauveina eviniguto nai, au na ġomi mabarami avaġa-guruġamini: Tauġemi asi boġono vetuġamaġi, ġomi ġemi riba ema veiġa tu varaġe lelevaġi. Asiġina. Namona tu boġono vetuġa-maġi-ginikau, Barau na veġabidadama aiġa baregona evinimito, moġa ilailanai moġo boġono tuġamaġi e guruġa. <sup>4</sup> Vaġa-ilailana ġita tauġanira tu sebona moġo, a legana tu ġutuma gorogoro, ma mai tauġanira legari ġeri ġauvei tu dia sebona. <sup>5</sup> Ġita ekalesia maki moġesi, ġita asisebo, senaġi Keriso ġena maġuri nuġanai ġita tu tauġani sebonai taiaġoto. Ma ġita tata tu karora tata ġeri, (dia mabarara tata ġera-ura ġera-urai bita rakani).

<sup>6</sup> Barau ġena namo ema varevare-barai evinirato ilailanai, varevare dagarari irauirau ġerai ġetanuni. Bema ta peroveta varevarena o seġukana eviniato nai, bene peroveta ġena veġabidadama ilailanai. <sup>7</sup> Bema ekalesia vetuġunaġi iaġoviniri eviniato nai, bene vaġa-kavari. Bema vevaġa-riba varevarena eviniato nai, bene vevaġa-riba. <sup>8</sup> Bema kotari ġeri veġabidadama vaġa-kokoreri varevarena eviniato nai, bene vaġa-kokoreri; bema rabu tarimari vaġa-kavari varevarena eviniato nai, bene vini-ginikauri; bema tarimarima ġorikauri varevarena eviniato nai, ma nuġana mabarana ġesi bene veġorikau; bema tarimarima vetuġaġwari varevarena eviniato nai, bene vetuġaġwari e bene vaġa-kavari ma iakuna ġesi.

#### *Veuravini*

<sup>9</sup> Nuġami mabarari ema ma moġoniri ġesi boġono veuravini. Rakava veiġari asi boġono ura-viniri, a veiġa namori boġono ġabi-gigitariri. <sup>10</sup> Vetarikaka veuravinina boġono korana-iaġi gwadaia, karomi tata ġesi boġono vegubakau, a dia tata tauġemi arami boġono tore-varaġe varaġeri. <sup>11</sup> Boġono ġauvei-kokore kokore, asi beġene ġubulefimi; Iauka Veaġa na nuġami bene vaġa-variġisiri, Vereġauka vetuġunaġina boġono iaġo-vini. <sup>12</sup> Ġotuġamaġi-kauani dagarana bakunai boġono iaku; meto ġoġoitaġorini nuġari ai boġono vevaġa-gwaġiġi; ġauġau asi boġono vaġa-moiria. <sup>13</sup> Barau ġena tarimarima ġeri rabu ma vetau-vetau gaburi ai boġono vaġa-kavari. Tarimarima boruri ġemi ai beġe iaġosini nai, boġono ġabi-raġeri, ema boġono nari-ginikauri.

<sup>14</sup> Ġevaġa-rakavamini tarimari boġono vaġa-namori, iatari ai boġono ġauġau, asi boġono vaġa-rakavari, asi boġono tovoġari. <sup>15</sup> Ġeverereni tarimari ġesi boġono verere-vegogo, ma ġemidigu-midiguni tarimari ġesi maki boġono midigu-midigu sebona. <sup>16</sup> Karomi ġesi nuġa sebonai boġono tanu, asi boġono vekokoroku, ne ma nuġami mabarari ġesi gaburemi tarimari ġesi boġono vetore-sebona. Tauġemi asi boġono vetore-varaġe varaġe, asi boġono kira, ġomi moġo ma iaunegami.

<sup>17</sup> Veiġa rakavari evei-vinimini tarimana ġena veiġa rakavari voina tu veiġa rakavari na asi ma boġono vaġa-voia. Boġono ġauvei-ġitaġita, be tarimarima mabarari ġoirari ai veiġa iobukaiobukari moġo boġono veiri. <sup>18</sup> Maino tanutanuna tu ġomi mabarami ġimami ai moġo maniġea, be ma dabarana nai tu, tarimarima mabarari ġesi maino ai boġono tanu. <sup>19</sup> Garagaragu namomi, ġevaġa-rakavamini tarimari ġeri vei-rakava voina asi boġono vei-viniri, a Barau faka boġono voina, be ġena baru vauro iatari ai bene vaġa-foforia. Korana Buka Veaiġa tu maiġesina ekirani, "Vereġauka ekirani, 'Au na vauro bavaġa-voirini.'" <sup>20</sup> Senaġi, "Bema ebaru-vinimuni tarimana evitoani nai, bono ġubua;

bema bokana ekokeni nai, nanu bono vinia bene niu. Maiġesina boveini nai tu, karava memeġari ġia debanai bolabu-kaurini,” bemaikaiani. <sup>21</sup> Rakava na ġoi asi bene vaġa-dareremu, ne ġoi na rakava veiġa namori na bono vaġa-darereri.

## 13

### *Taravatu tauri garori bitana seġaġiri*

<sup>1</sup> Tarimarima mabarari gavamani ġeri veġorikau maorona gaburenai beġene tanu ema beġene seġaġi-viniri. Korana gavamani boruna ta tu asi etanuni, senaġi Barau na evaġa-ruġarito ema maoro baregona evinirito gavamaniri moġo ġetanuni. <sup>2</sup> Moġesina naima gavamani ġeri guruġa eġarerini ma ekira-fitoġarini tarimana na tu Barau na evaġa-ruġarini tarimari eġarerini ma ekira-fitoġarini. Ma mo veiġa beveiani tarimana tu tauġena moġo vei-rakava tarimanai evevaġa-iaġoni, ma evevaġa-metoni.

<sup>3</sup> Veġitaġau o gavamani tarimari na vei-iobukaiobuka tarimari tu asi ġevaġa-garirini, ne ġia tu veiġa ġeleaiani tarimari ġevaġa-garirini. Bema ġomi ġourani, boġono tanu-rekoreko moġo, gavamani tarimari gariri asi boġono vei ġotoni nai, veiġa iobukaiobukari moġo boġono vei. Moġesi boġo veirini tu, ġia na bevaġa-raġemini. <sup>4</sup> Gavamani tarimari tu Barau ġena vetuġunaġi ġeiaġo-vinini, ġomi namo boġono ġoitaġo ġana ġeġauveini. Senaġi bema ġomi na veiġa boġo leaiani nai tu, boġono gari korana ma ribami, gavamani ġimanai tu vevaġa-maoro baġana eġabi-taġoani. Barau na asi evini-kavaiato, senaġi ġia vetuġunaġina eiaġo-vinini, kerere tarimari ġeri rakava voiri bene viniri ġana. <sup>5</sup> Moġa lorinai gavamani ġeri veġitaġau gaburenai bitana tanu ema garori bitana seġaġiri. Dia kerere voiri beġe vinirani moġo gariri ai, senaġi nuġarai maki taribani, veiġa namori bitana veiri.

<sup>6</sup> Ġomi tu moġesina naima ġotakesini. Gavamani takesi ġoviniani, korana gavamani tu Barau ġena vetuġunaġi ġeiaġo-vinini tarimari. Ġia ġeri taimi mabarana tu veġitaġau ġauveina ġeveiani. <sup>7</sup> Ma ġemi ġabitore nai, voiri boġono vei. Bema takesi roġosi boġono vini nai, boġono vini, ma moni kotari roġosi boġono vini nai, boġono vini; vegubakau nai, boġono vegubakau; vemataurai nai, boġono vemataurai.

### *Boġono veuravini, korana ġaro bevotu*

<sup>8</sup> Karomi ta ġenai ġemi ġabitore ta asi bene tanu, senaġi ġabitore sebona moġo bene tanu tu maiġa: Karomi boġono uravini-vanaġi vanaġiri. Korana karna eura-viniani tarimana na Barau ġena taravatu mabarana ekorana-iaġiani veiġana eveiani. <sup>9</sup> Mai taravatu maiġeri: Asi bono veġura-vanaġi; asi bono vevaġi-deba; asi bono lema; tarima tari ġeri dagara mata-ġaniġaniri asi bono vei; ma taravatu kotari maki, moġeri mabarari tu mai taravatu sebona na eġabi-vegogoani: “Sevimu tarimana bono uravinia, ġoi tauġemu oveura-vinini kavana.” <sup>10</sup> Veuravini na sevina tarimana asi evaġa-rakavaiani. Moġa lorinai dagara barego vedaureana Barau ġena taravatu nuġanai tu veuravini, korana taveura-vinini nai, taravatu mabarana takorana-iaġiani.

<sup>11</sup> Mai veiġa boġono veia, korana mai nega vetoġana tu ma ribami. Nega varau beraġasi, be ġotataġa gena na. Korana ġita vaġa-maġurira ġarona tu varau bekavinaġi-rakava, dia mo guinenai, Keriso taġabi-raġeato ġarona gabunai kavana. <sup>12</sup> Boġi tu dori ekorini, ġaro tu ġena raġe bakunai. Moġa lorinai mukuna veiġari sitore-tariri, ma mama dabuġari siriġo-kauri, vetari tarimari na vetari dabuġari ġeriġo-kaurini kavana. <sup>13</sup> Veiġa namori moġo sivei, laġani erakani tarimana kavana. A asi sivereko-lauvaġi lauvaġi e niuniu moġo asi sivaġa-kokorea, kima mata-ġaniġaniri asi sivei e asi simata-boraġa, asi sivevaġi-vevaġi ema asi simama. <sup>14</sup> Senaġi ġita tu Vereġauka Iesu Keriso moġo siriġoa, dabuġa tariġo-kaurini ilailanai. Ma tauġani ġena ura veiġari rakavari veiveiri tuġamaġiri tu asi siġabi-raġeri.

## 14

### *Moiramoira ema kokore*

<sup>1</sup> Veḡabidadamai emoiramoirani tarimana boḡono ḡabi-raḡea, enabe ḡena tuḡamaḡi tari ḡomi ḡemi tuḡamaḡi ḡesi asi ilaila, senaḡi asi boḡono vaḡa-veḡareveḡarea e asi boḡono ḡau-fitoḡaia. <sup>2</sup> Tarima ta ḡena veḡabidadama kokore nai, eḡani-taḡuitaḡuini, ma ta tu ḡena veḡabidadama moira lorinai, ḡaniḡani koriri, asi bureḡari, moḡo eḡanini. <sup>3</sup> Eḡani-taḡuitaḡuini tarimana na vamoka ḡaniḡaniri moḡo eḡanini tarimana asi bene kira-fitoḡaia, ema vamoka ḡaniḡaniri moḡo eḡanini tarimana na maki dagara mabarari eḡani-taḡuitaḡuirini tarimana asi bene vaḡa-rakavaia, korana ḡia tu Barau na varau eḡabi-raḡeato. <sup>4</sup> Ḡoi tu dei, be tarima ta ḡena vetuḡunaḡi tauna bono vevaḡa-maoro vinia? Ḡia ḡena veḡabidadamai eruḡa-gigitarini o eketoni moḡa tu ḡena baregona na vauro bekiraḡiani. Senaḡi ḡia tu beruḡa-gigitarini, korana Vereḡauka na kokore beviniani bene.

<sup>5</sup> Tarima ta na tu ḡaro tari evaḡa-veaḡa baregorini, ma ta na tu ḡaro mabarari ilaila moḡo etoni. Namona tu, ḡia tata nuḡari e ḡeri tuḡamaḡi ai beḡene riba ḡeri tuḡamaḡi tu maoro. <sup>6</sup> Tarima ta na ḡaro ta eḡabi-hidiani, benamo ekirani, mai tu ḡaro veaḡana etoni nai, mo tarima na mo veiḡa tu Vereḡauka ḡenai eveiani. Eḡani-taḡuitaḡuini tarimana maki Vereḡauka etuḡamaḡiani vauro eḡaniḡanini, korana ḡia na Barau etanikiu-viniani. Ema asi ebureḡani tarimana maki Vereḡauka etuḡamaḡiani vauro eḡani-ḡanini. Ḡia maki Barau etanikiuani. <sup>7</sup> Korana ḡita tamaḡurini nuḡanai dia tauḡera ḡera maḡuri moḡo, ma bita maseni maki dia ḡita tauḡera ḡereḡara ḡera bita maseni moḡo. Asiḡina ḡinavaḡi. <sup>8</sup> Maḡuri tatanuni nai, Vereḡauka ḡena tamaḡurini, ema bita maseni maki, Vereḡauka ḡena moḡo bita maseni. Moḡa lorinai, tamaḡurini o bita maseni, ḡita tu Vereḡauka ḡena veḡata. <sup>9</sup> Keriso emaseto ma emaḡuri-ḡenoḡoito korana tu, mase tarimari ema ḡemaḡurini tarimari ḡeri Vere ai bene iaḡo ḡana. <sup>10</sup> Moḡa lorinai karase ḡoi tarikakamu ovevaḡa-maoro viniani? Ma kara dainai tarikakamu okira-fitoḡaiani? Bono tuḡamaḡi, ḡita mabarabarara tu Barau ḡena vevaḡa-maoro seana ḡoiranai bita ruḡa-tarini, vevaḡa-maoro bita ḡabini. <sup>11</sup> Isaia na etoreato kavana, ekirani, “Vereḡauka ekirani, ‘Moḡoni veḡata, amaḡuri-taḡoni dainai, tui mabarabarari au ḡoiragu ai beḡe vetuitui-tarini, mea mabarabarari na Barau beḡe kiraḡi-foforiani.’ ”

<sup>12</sup> Moḡesi naima ḡita tata ḡera maḡuri Barau ḡoiranai bita kiraḡi-fofori foforirini.

*Tarikakamu* ḡena veḡabidadama asi bono vaḡa-rakavaia

<sup>13</sup> Moḡa lorinai karora ḡesi tauḡera asi bitana vevaḡa-maoro vevini. A namona ḡita tu ḡera tuḡamaḡi sivaḡa-maorori, be tarikakara ḡoirari asi sifatafata-ḡauri, ḡeri veḡabidadama na beḡe ketoni garina. <sup>14</sup> Iesu Vereḡauka nuḡanai amaḡurini nai, ma nuḡagu mabarana ḡesi ariba-maoroni, ḡaniḡani dagarana ta tu asi rakava o ma mirona Barau ḡoiranai. Senaḡi bema tarima ta na ḡaniḡani dagarana ta etuḡamaḡi-rakavaiani nai, mo ḡaniḡani dagarana tu ḡia ḡereḡana ḡenai moḡo moḡoni rakava o ma mirona. <sup>15</sup> Bema tarikakamu asi eiakuni, ḡoi na ḡoiranai kara oḡaniani eḡitaiani nai, bono riba, mo tu dia veuravini veiḡana ḡoi na oveiani. Ḡemu ḡaniḡani na tarikakamu ḡena maḡuri asi bono vaḡa-rakavaia. Keriso tu ḡia maki uranai emaseto. <sup>16</sup> Moḡa lorinai ḡemi veiḡa ḡobiri boḡono toreri, tarimarima maoro asi boḡono viniri, ḡemi veḡabidadama namori rakavari beḡene kiraḡiri. <sup>17</sup> Korana dagara baregona tu Barau ḡena Basileia, a dia ḡaniḡani o niuniu dagarari, senaḡina vei-iobukaiobuka, maino, ema iaku-verere Iauka Veaḡa ḡena maḡuri nuḡanai. <sup>18</sup> Deikara maiḡeri veiḡa nuḡari ai Keriso vetuḡunaḡina beiaḡo-vinini tarimana tu, Barau na beiaḡo-iaḡiani, ema tarimarima na maki beḡe vaḡa-moḡoniani.

<sup>19</sup> Moḡa lorinai mabarara sikokore, maino vaḡa-ḡorana ema ḡera veḡabidadama vaḡa-tubuna ḡauveiri siveiri. <sup>20</sup> Ḡaniḡani ḡaramari ai Barau ḡena ḡauvei asi boḡono vaḡa-rakavaia. Moḡoni, ḡaniḡani mabarari tu namo ema veiareva Barau ḡoiranai, senaḡi bema ḡoi na ḡaniḡani ta oḡaniani nai, tarima ta nuḡana ovaḡa-metoani, benamo ḡena

veḡabidadama na beketoni, moḡa neḡi asi namo. <sup>21</sup> Moḡa lorinai namona tu, asi bono bureḡa, e vine nanuna asi bono niu, ema tarikakamu vaḡa-daḡaraḡena veiḡana ta tu asi bono veia. Korana tarikakamu ta bovaḡa-daḡaraḡeani, benamo bevei-rakavani garina.

<sup>22</sup> Kara dagara ovaḡa-moḡoniani, maniḡa tu ḡoi ema Barau fakami ai moḡo bene tanu. (Senaḡi tarikaka tari asi bono launaḡiri, ḡoi na kara ovaḡa-moḡoniani dagarana beḡene ḡabi-raḡea, korana) nuḡanai kara eḡabi-raḡeani dagarana na nuḡana asi evaḡa-meto ḡenoḡoiani tarimana tu beiakuni. <sup>23</sup> Bema tarima ta tu mo kara eḡabi-raḡeani dagarana ma daradarana ḡesi beḡaniani nai, ḡia tu tauḡena bevevaḡa-metoni, korana ḡia tu asi veḡabidadamana ḡesi eḡaniani. Ema asi veḡabidadama ḡenana ḡeiaḡomani dagarari mabarari tu vei-rakava dagarari moḡo.

## 15

*Keriso* ḡena maḡuri bitana tovotovoa

<sup>1</sup> Ḡita ma kokorera tarimara na moira tarimari ḡeri keto ai bisini vaḡa-kavari, a dia tauḡera ḡereḡara moḡo lorira bitana toreri. <sup>2</sup> Ḡita tata karora loriri bisini toreri, be namo beḡene ḡabia, ema ḡeri veḡabidadama bitana vaḡa-tuburi. <sup>3</sup> Korana Keriso maki tauḡena lorina asi etoreato, senaḡi Buka Veaḡai etoreato ilailanai, ekirani, “Vanevane guruḡari metori ḡoi, Barau, iatamu ai ḡekiraḡirito tu, au iatagu ai beḡema ketokau.” <sup>4</sup> Guinena guruḡa mabarari Barau ḡena Bukai ḡetorerito moḡeri tu, ḡita beḡene vaḡa-riba-iaḡira ḡana ḡetorerito. Korana ḡita mo ḡetorerito guruḡari ḡerina vevaḡa-gwaḡiḡi ema vevaḡa-naḡi bisini ḡabia, benamo ḡoirarai Barau ḡena Basileia moḡa bisini tuḡamaḡi-kaua. <sup>5</sup> Vevaḡa-gwaḡiḡi ema velaunaḡi tu Barau evinini. Ḡia na ḡomi vekaravami ai nuḡa-sebona bene vaḡa-ḡoraia Keriso Iesu ḡotovotovoani nuḡanai. <sup>6</sup> Be nuḡa-sebonai ema garo sebonai ḡera Vereḡauka Iesu Keriso Tamana Barau boḡono vevato-iaḡia.

<sup>7</sup> Tata karomi ḡesi boḡono veiau-namo ema boḡono veḡabi-raḡe, Keriso na eiau-namomito ema eḡabi-raḡemito kavana. Moḡesina boḡo veini tu, Barau boḡo vaḡa-raḡe ḡitakauani. <sup>8</sup> Boḡono tuḡamaḡi: Keriso tu Iuda tarimari ḡeri vetuḡunaḡi taunai eiaḡoto, Barau ḡena vetuḡamaḡikau vaḡa-moḡonina, ema Barau ḡena kiraḡitore guruḡari, senera (Aberahamo, Isako, ema Iakobo) eguruḡa-tore vinirito guruḡari vaḡa-taunari ḡana. <sup>9</sup> Ema irau bese tarimari na maki Barau beḡene vaḡa-raḡea ḡena vevetuḡaḡwa bakunai. Buka Veaḡa etoreato ilailanai, “Moḡa lorinai irau bese tarimari vekaravari ai au na ḡoi bavaḡa-raḡemuni; ḡuriḡuri mariri baḡabini, ḡoi aramu bavaḡa-namoani.”

<sup>10</sup> Ma ekirani,

“Irau bese tarimami o, ḡia ḡena bese tarimari ḡesi ḡoiaku-vegogo.”

<sup>11</sup> Ma ekirani,

“Ḡomi irau bese tarimami,  
Vereḡauka ḡovaḡa-raḡea,  
ema ḡomi tarimarima mabarabarami,  
mari ai ḡia ḡovaḡa-raḡea.”

<sup>12</sup> Ema Isaia ma ekirani,

“Iese natuna ta betubu-vaisini,  
ḡena bese tarimana ta bevaisi-raḡeni,  
tanobara mabarana beḡita-ḡauani;  
irau bese tarimari ḡia ḡenai beḡe vetuḡamaḡikauni.”

<sup>13</sup> Vetuḡamaḡikau tu Barau ḡenana eiaḡomani. Ḡia na iaku verere ema maino na bene vaḡa-vonuvonu raḡemi ḡenai ḡoveḡabidadamani nuḡanai. Be monana Iauka Veaḡa ḡena seḡuka na ḡemi vetuḡamaḡikau bene vaḡa-barego lelevaḡia.

*Paulo, irau bese tarimari* ḡeri haroro tauna

<sup>14</sup> Tarikakagu mabarami, au bama riba-maoro, ḡomi maniḡemi tu namo na ḡovonuvonu-raḡeto, ḡoriba-ginikauto, ema karomi tata ḡesi boḡo vevaḡa-riba-vevinini

maki ilaila. <sup>15</sup> Senaḡi guruḡa matari tari ḡomi batore-vinimi nai, kota bakiraḡi-metori, mo tu ḡomi noḡa ma bakiravara-ḡenoḡoimi maia. Moḡesi aveini, korana Barau na ḡena namo e varevare-bara dabaranai mai ḡauvei eviniguto. <sup>16</sup> Ekeaguto, Keriso Iesu ḡena vetuḡunaḡi tarimanai bana iaḡo, ma irau bese tarimari vekaravari ai Rubu Veaḡa vereri ḡeri ḡauvei bana veia, Barau ḡena Vari Namona bana ḡobata-iaḡia. Benamo monana irau bese tarimari maki Barau na beḡabi-raḡerini varevare dagarari ai beḡene iaḡo. Ema Iauka Veaḡa na bene vaḡa-veaḡari.

<sup>17</sup> Moḡa lorinai Keriso Iesu ḡena maḡuri nuḡanai aveiavini, Barau ḡena vetuḡunaḡi aiaḡo-vinini nuḡanai. <sup>18</sup> Kara boruna ta guruḡana au asi baveini, senaḡi kara au na akiraḡiato ema aveiato ḡerina, kara Keriso na au ḡeguna eveiato, benamo irau bese tarimari na Barau ḡema-seḡaḡi-viniato, moḡa moḡo bakiraḡiani. <sup>19</sup> ḡegu ḡobata ema ḡauvei tu Iauka Veaḡa ḡena seḡuka na vetoḡa boruri ema nuḡa-farevaḡi veiḡari na evaḡa-foforirito-ḡoi. Moḡesina nai Ierusalem na aḡeḡeraḡito, aiaḡoto mo Iirikiko tanona, Keriso ḡena Vari Namona mabarana akiraḡi-fofori ginikauato. <sup>20</sup> Au ḡegu ura baregona vanaḡivanaḡi tu, Keriso roḡosi roḡo beḡere ribaia gaburi ḡana bana iaḡo, Vari Namona bana ḡobata-iaḡia. Korana asi aurato, tarima ta na ḡauvei evaḡa-ruḡaiato gabunai ma bana ḡauvei-iaḡo. <sup>21</sup> Senaḡi ḡegu ura tu, Buka Veaḡai etoreato kavana bana vei, ekirani,

“ḡia varina asi ḡekira-vararito tarimari na beḡene ḡitaia,  
ema varina asi ḡeseḡaḡiato tarimari na beḡene ribaia.”

<sup>22</sup> Moḡesi nai nega ḡutuma naiaḡosi atoni, senaḡi ama vedaḡa-raḡeni.

#### *Paulo na Roma benea ḡitaia boioḡana etogato*

<sup>23</sup> Senaḡi toma mainai au tu asi ḡegu ḡauvei gabuna ta maia, ema laḡani ḡutuma varau beḡe iaḡo nuḡari ai, au ḡegu ura baregona tu banasi raka-ḡitami, <sup>24</sup> nai atuḡamaḡini, Spein ḡana baiaḡoni nai tu, basi ḡitamini roḡo. Maninana bavanaḡini nai, atuḡamaḡini, basi raka-ḡitamini, ma ḡomi ḡesi bita tanu-kotunani roḡo. Moḡa murinai aurani, ḡomi na boḡono vaḡa-kavagu ḡegu iaḡoiaḡo bana iaḡo-vinia ḡana. <sup>25</sup> Initoma tu roḡo Ierusalem ḡana aiaḡoni, Barau ḡena tarimarima veaḡari navaḡa-kavari ḡana. <sup>26</sup> Korana Makedonia ema Akaia tanori ai tu nuḡari ma verereri ḡesi Ierusalem ai asi ḡeri-ḡari tarimari Barau ḡena tarimarima veaḡari vekaravari ai ḡetanuni moḡeri ḡeri moni ḡevaḡa-vegogoto. <sup>27</sup> ḡia tu ma iakuri ḡesi ḡeri moni ḡevaḡa-vegogoto, ma mo tu Iuda tarimari ḡeri ḡabitore ḡia ḡeri ai ḡevaḡa-voiani. Korana bema irau bese tarimari Iuda tarimari ḡeri namo iauka rekenai dagarari ḡeḡabirini nai tu, ḡia tauḡaniri rekenai farefarena maki Iuda tarimari ḡesi beḡe vare-barabararini. Korana ma ḡeri ḡabitore Iuda tarimari ḡeri ai dainai. <sup>28</sup> Be mai ḡauvei maiḡa bavaḡa-koriani, ema bana riba-maoro mai moni tarimari korikori na beḡene ḡoitaḡoa murinai vau, Spein ḡana baiaḡoni, ema ḡomi maki basi raka-ḡitamini ḡegu iaḡoiaḡo nuḡanai. <sup>29</sup> Au ma ribagu ḡomi ḡemi ai baiaḡosini nai, Keriso ḡena vevaḡa-namo barego lelevaḡina baḡabi-iaḡosiani ḡomi ḡemi ai.

<sup>30</sup> Tarikaka-ḡore, ḡera Vereḡauka Iesu Keriso aranai ema Iauka Veaḡa ḡena veuravini, ḡita iatarai etoreani veuravinina, bakunai, au ḡomi alaunaḡimini: Au ḡegu vekwaraḡi ai boḡono vaḡa-kavagu, iatagu ai Barau ḡenai boḡono ḡauḡau. <sup>31</sup> Boḡono ḡuriḡuri, be Barau na Iudea nuḡanai Keriso asi ḡevaḡa-moḡoniani tarimari ḡimari na bene vaḡa-maḡurigu, ema mo varevare dagarana Ierusalem ai Barau ḡena tarimarima veaḡari na beḡene ḡabi-raḡea ma iakuri ḡesi. <sup>32</sup> Be Barau ḡena ura ilailanai ḡomi ḡemi ai ma iakugu ḡesi bana iaḡosi, ema mabarara bisini vevaḡa-kokore. <sup>33</sup> Maino Barauna ḡomi mabarami sevimi ai bene tanu. Amen.

<sup>1</sup> Avaḡa-ribamini, ḡita tobara Foibe tu beiaḡosini. Ġia tu ekalesia ḡena vetuḡunaḡi vavinena ta Kenkrea rubuna nuḡanai. <sup>2</sup> Anoḡimini, Vereḡauka aranai boḡono ḡabiraḡea, ekalesia o veaḡa tarimari ḡoḡabi-raḡerini dabarari korikoriri ai. Ema ma ḡena ura dagarari ḡomi ḡemi ai nai, boḡono vinia. Korana ḡia ḡena vevaḡa-kava maki barego lelevaḡi tarimarima ḡutuma ḡeri ai. Au maki evaḡa-kava barego-lelevaḡiguto.

<sup>3</sup> Priskila ema Akwila au ḡegu vevaḡa-namo boḡono viniri. Ġia tauri ruarua tu au ḡesi ḡauvei sebona moḡo ḡaveiani Keriso Iesu ḡena ḡauvei nuḡanai. <sup>4</sup> Ġia tauri ruarua tu au uragu ai be dori ḡevaḡi-maserito. Au ema tanobara irauirau ai ḡetanuni ekalesiari ḡema iaku tu asikei ḡia tauri ruarua ḡeri ai. <sup>5</sup> Ġia ḡeri numai ḡeraka-vegogoni ekalesiana maki boḡono vaḡa-namori.

Au ḡatagu namona Epeneto au ḡegu vevaḡa-namo boḡono vinia. Ġia tu Keriso murinai eraka-guineto Asia tanobarana nuḡanai.

<sup>6</sup> Maria au ḡegu vevaḡa-namo boḡono vinia. Ġia tu ḡomi urami ai evekwaḡi-baregato.

<sup>7</sup> Au garagaragu Androniko ema Iunia au ḡegu vevaḡa-namo boḡono viniri. Ġia tu au ḡesi dibura numai ḡatanu-vegogoto. Apostolo mabarari vekaravari ai ḡia tauri ruarua tu ḡerevaḡi, ema ḡia tu Keriso ḡena maḡuri nuḡanai ḡeberetoḡa-guineto, muriri ai vau au ama bere-toḡato.

<sup>8</sup> Ampliato au ḡegu vevaḡa-namo boḡono vinia. Vereḡauka ḡena maḡuri nuḡanai ḡia tu au ḡatagu korikori.

<sup>9</sup> Urebano au ḡegu vevaḡa-namo boḡono vinia. Ġia tu ḡita ḡesi taḡauvei-vegogoni tarimana Keriso ḡena maḡuri nuḡanai. Au ḡatagu namona Stakis au ḡegu vevaḡa-namo boḡono vinia.

<sup>10</sup> Apele au ḡegu vevaḡa-namo boḡono vinia. Ġia tu moḡoni veḡata Keriso ḡena maḡuri nuḡanai eruḡa-gwaḡiḡini.

Aristobulo ḡena numa tarimari mabarari ḡegu vevaḡa-namo boḡono viniri.

<sup>11</sup> Au garagaragu Herodion ḡegu vevaḡa-namo boḡono vinia.

Narakiso ḡena numa tarimari deidei Vereḡauka ḡena doḡoro tarimari ḡegu vevaḡa-namo boḡono viniri.

<sup>12</sup> Trifena ema Trifosa au ḡegu vevaḡa-namo boḡono viniri. Maniḡeri vavine Vereḡauka ḡena ḡeḡauvei-vekwaraḡini.

Au tobagu namona Peresi ḡegu vevaḡa-namo boḡono vinia. Mani vavine maki Vereḡauka ḡena eḡauvei-vekwaraḡini.

<sup>13</sup> Rufo ma sinana ḡesi au ḡegu vevaḡa-namo boḡono viniri. Rufo tu Vereḡauka na eḡabi-viriḡiato ḡena vetuḡunaḡi taunai bene iaḡo, ma sinana tu au sinagu ai eiaḡoto.

<sup>14</sup> Asinikrito, Flegon, Hemes, Patroba, Hemas ema tarikaka tari ḡia ḡesi ḡetanuni maniḡeri ḡegu vevaḡa-namo boḡono viniri.

<sup>15</sup> Filologo, Iulia, Nereus ma tobana, e Olimpasi, ema Barau ḡena tarima veaḡari ḡia ḡesi ḡetanuni mabarari ḡegu vevaḡa-namo boḡono viniri.

<sup>16</sup> Karomi tata vetarikaka verauna na boḡono vaḡa-namori

Keriso ḡena ekalesia mabarabarari na ḡemi vevaḡa-namo beḡe tuḡu.

### *Velaunaḡi tari*

<sup>17</sup> Tarikakagu mabarami, alau-naḡimini, boḡono boḡe-ḡotoḡoto, vetavi-kirakira veiḡari ḡeveirini tarimari ema ḡomi ḡemi veḡabidadama ḡefatafata-ḡaurini, dia ḡomi na ḡoḡabirito vevaḡa-ribari na. Maniḡeri tarima seviri ḡana asi boḡono raka-kavi.

<sup>18</sup> Korana maniḡeri tarima tu dia ḡita ḡera Vereḡauka Keriso ḡena vetuḡunaḡi ḡeiaḡo-viniani, a ḡia tauḡaniri ḡeri ura veiḡari ḡeveirini. Ġia tu ḡeri guruḡa meriḡa-meriḡari na ema ḡeri guruḡa ginikau-ginikau na asi iaunegari tarimari ḡeri tuḡamaḡi ḡeḡofadarerini. <sup>19</sup> Tarimarima ḡutuma na ḡomi ḡemi seḡaḡi varina varau ḡeseḡaḡiato. Moḡa

lorinai au gēgu verere asikei gōmi gēmi ai. Senaḡi au aurani, veiḡa namori boḡono riba-ginikauro, ma veiḡa rakavari asiḡina ḡinavaḡi boḡono veiri. <sup>20</sup> Maino Barauna na nega kotuna moḡo benamo Satani gōmi kwakumi fanafana na gaburenai befana-fatafataiani.

ḡita ḡera Vereḡauka Iesu ḡena namo ema varevare-bara gōmi iatami ai bene tanu.

<sup>21</sup> Timoteo, au ḡauvei karogu, ema au garagaragu Lukio, Iason ema Sosipata na ḡemi vevaḡa-namo guruḡari beḡe tuḡu.

<sup>22</sup> Au, Teretio, Paulo ḡena guruḡa mai fefai batorea taugu, na maki Vereḡauka aranai gēgu vevaḡa-namo atuḡu-iaḡosiani.

<sup>23</sup> Gaius na ḡemi vevaḡa-namo guruḡari betuḡu. Au tu ḡia na ḡena numai enariguni, ema ekalesia tarimari mabarari tu mainai ḡeraka-vegogoni.

Erasto, mai siti ḡena moni eḡita-ḡauani tarimana, ema ḡita tarikakara Kwatas na ḡemi vevaḡa-namo beḡe tuḡu.

[<sup>24</sup> ḡita ḡera Vereḡauka Iesu Keriso ḡena namo ema varevare-bara gōmi iatami ai bene tanu.]

*Barau vaḡa-raḡena guruḡari*

<sup>25</sup> Barau sivaḡa-namo, korana ḡia na gōmi gēmi veḡabidadama bevaḡa-kokore-iaḡirini au gēgu Vari Namona, Iesu Keriso aḡobata-iaḡiani varina, ḡenana. Mai vari tu guineri laḡaniri na veḡata vekuretoḡa etanuto-ḡoi dagarana bema fofori. <sup>26</sup> Maitoma moḡeri tu tanu-vanaḡivanaḡi Barauna ḡena guruḡa ilailanai peroveta tauri ḡeri toretore na ḡema vaḡa-foforirini, ma tama ribarini. Mai veiḡa ema vetoreto anina tu, tanobara mabarari na ḡia beḡene vaḡa-moḡonia ema beḡene seḡaḡi-vinia ḡana. <sup>27</sup> Iaunega Barauna sebona kwarikwari sivaḡa-raḡea Iesu Keriso bakunai. ḡia marevana baregona bene tanu vanaḡivanaḡi. Amen.



## PAULO ĠENA TORETORE GINIGUINENA KORINTO EKALESIARI ĠERI

1 Korinto vaġa-foforina guruġari

Korinto ekalesiana doġorona tu Paulo ġenana eġorato (Apostolo 18). Ma mai fefa giniguinena Paulo na etoreato korana tu, Korinto ekalesiari fakari ai tu meto kota ġeġorato-ġoi. Ma ġia na Paulo ġetore-viniato, ġedanaġiato, kamasi beġene vei ġetato. Moġesi naima Paulo na mai fefai ġeri vedanaġi evaġa-veaseato (7:1; 8:1; 12:1; 16:1), ema mo deideiri ġevei-rakavato-ġoi moġeri evaġa-guruġa-gwġiġirito ema ekalesia maġurina korikorina tu aiġesina ekira-vararito.

Paulo na mai fefa tu Efeso vanuġa na etore-vinirito, mo tu Efeso ekalesiari vaġa-toitoina evarivaririto taiminai. Mai fefa tu laġani 53 ma 55 fakari nuġanai ta etoreato, mo tu Iesu emaseto murinai.

Mai fefai siri baregori tu karoa 1:30-31. Ma ġena vevaġa-riba guruġari baregori ekiraġirito tu maiġeri: 1) Ekalesia doġorona korikori vetoġana boġitaiani, ġia tu Iesu Keriso ġena vere o veġitaġau gaburenai ġetanuni. 2) Barau ġena ekalesia doġorona korikori tu dia tarima o tanobara ġena iaunegai ekalesia doġorona beġe ġori-kauani, senaġi Barau ġena iaunegai ema seġukai. 3) Ekalesia doġorona korikori tu Barau na eboioġaiato dabaranai moġo beġe tanuni. 4) Ekalesia doġorona korikori tu Barau ġena guruġa beġe korana-iaġiani, ema Barau ġena veuravini ai moġo beġe tanuni.

Paulo na mai fefa tu maiġesina eboioġaiato:

1. Ekalesia nuġanai vevare-kirakira eġorato - karoa 1-4
2. Veiġa rakavari ekalesia nuġanai - karoa 5-7
3. Kwaivakuku ġevinirini bureġari - karoa 8-10
4. Tomaraka-riġo dabarana - karoa 11
5. Iauka Veaġa ġena varevare - karoa 12-14
6. Variġisi-ġenoġoi - karoa 15
7. Guruġa dokona - karoa 16

<sup>1</sup> Au Paulo, Barau ġena urai ekeaguto, Keriso Iesu ġena apostolo tarimagu ai bana iaġo, ema ġita tarikakara Sostene ġesi tauma ruarua ġemana mai fefa eiaġosini, <sup>2</sup> Barau ġena ekalesia tarimami Korinto nuġanai ġotanuni ġemi. Ġomi tu Barau ġena tarimarima, be Keriso Iesu nuġanai varau evaġa-veaġamito, ma ġomi Barau na ekeamito tu boġono veaġa uranai. Tarimarima mabarari gabu mabarari ai ġetanuni ġera Vereġauka Iesu Keriso aranai ġeġauġauni tarimari maki, Barau na ġomi ġesi ekea-sebonamito, boġono veaġa uranai. Iesu Vereġauka tu ġia e ġita mabarara ġera Vereġauka.

<sup>3</sup> Ġita Tamara Barau ema Vereġauka Iesu Keriso ġerina varevare-bara ema maino ġemi ai bene tanu.

*Paulo na Barau etanikiu-viniato*

<sup>4</sup> Au na ġegu Barau vanaġivanaġi atanikiu-viniani ġomi iatami ai, korana ġia ġena varevare-bara ġomi Keriso Iesu nuġanai ġotanuni tarimami evinimito nai. <sup>5</sup> Iesu Keriso ġesi ġosebonani nai, Barau na ġomi dagara mabarari ai varau bevaġa-taġami, guruġa kiraġikiraġi iaunegari mabarana ema tuġamaġi-faka mabarana maki evinimito. <sup>6</sup> Keriso varina maki ġomi nuġami ai tu varau emoġonito e ġemi veġabidadamai ġoruġa-gwaġiġini. <sup>7</sup> Moġesina naima ġita ġera Vereġauka Iesu Keriso ġena iaġoma roġo ġovaġa-noga-taġoani nuġanai tu, Iauka Veaġa ġena varevare tai tu asi ġorabuni. <sup>8</sup> E Barau na ġomi bevaġa-ruġa gwaġiġimini beiaġoni mo magona. Be ġera Vereġauka Iesu Keriso ġena vevaġa-kota ġaronai ġomi tu asi ġemi vei-rakava bene doġarimi. <sup>9</sup> Barau tu ma ġena vetuġamaġikau. Ġia na ġomi ekeamito, ġia Natuna Iesu Keriso ġita ġera Vereġauka ġesi boġono sebana moġo ġana.

*Ekalesia nuġanai vevare-kirakira eġorato*

<sup>10</sup> Tarikakagu mabarami, au na ġita ġera Vereġauka Iesu Keriso aranai anoġimini, aurani mabarabarami tu dagara sebona moġo boġono kiraġia, be tauġemi fakami ai asi boġono vevare-kirakira. Ġomi mabarami ġemi tuġamaġi ema ura sebonai moġo boġono tanu. <sup>11</sup> Korana tarikakagu, ġomi varimi tu Kloe ġena numa tarimari na ġemakiravaraguto, ġekirato, ġomi tu tauġemi moġo ġoveġare-veġareni fakami ai. <sup>12</sup> Au na akiraġiani gabuna tu iniġa. Ta tu okirani, “Au tu Paulo murinai arakani.” Ta tu okirani, “Au tu Apolos murinai arakani.” Ma ta ma okirani, “Au tu Kefas, (mai tu Petero), murinai arakani.” Ma ta maki ma okirani, “Au tu Keriso murinai arakani.” <sup>13</sup> Keriso tu bevare-kirakira, be doġoro ġutumai beiaġo ba? Mo tu Paulo ġomi urami ai ġevaġa-satauroato ba? O Paulo aranai ġomi ġebabatisomito? <sup>14</sup> Au na Barau atanikiu-viniani, korana au na ġomi ta asi ababatisomito, a Krispo ema Gaius moġo ababatisorito. <sup>15</sup> Asi namo ġomi ta bokirani, “Ġai tu Paulo na eababatisomato nai ġena mero ai ġaiaġoto,” botoni. <sup>16</sup> Moġoni, Stefanas ma ġena numa tarimari ġesi maki au na ababatisorito. Ma asi aribani, au na tarima kotari maki ma ababatisorito ba asiġina.

<sup>17</sup> Au Keriso na etuġuguto tu, dia bana babatiso ġana, senaġi Vari Namona bana ġobata-iaġia ġana. Ma dia iaunega lelevaġi tarimari ġeri guruġa maġurinai bana ġobata-iaġia, korana Keriso ġena satauro asi seġukanai beiaġoni garina.

#### *Satauro Varina*

<sup>18</sup> Moġoni, satauro varina mase dabaranai ġerakani tarimari na tu asi ġevaġa-moġoniani, ġekirani tu vari babona ġetoni. Senaġi maġuri dabaranai tarakani tarimara ġerai tu Barau ġena seġuka satauro varina nuġanai efoforini. <sup>19</sup> Buka Veaġa nuġanai Barau tu maiġesi ekirani,

“Au na iaunega lelevaġi tarimari ġeri iaunega tu asi tauri ai bavaġa-iaġorini, ema ġeriba-vanaġito tarimari ġeri riba lelevaġina bavaġa-rakavarini.”

<sup>20</sup> Be iaunega lelevaġi tarimari tu ainai? Vevaġa-riba e toretore tarimari tu ainai? Ribavanaġi tarimari guruġa ġevaġa-vevaġirini tauri tu ainai? Barau na evaġa-foforiato, mai tanobara ġena iaunega tu babo veġata.

<sup>21</sup> Moġoni, Barau ġena iaunega tu fofori, korana Barau na guba ema tanobara eveirito mabarari na ġena iaunega tu ġevaġa-foforiani, senaġina tarimarima tauġeri ġeri iaunega na Barau asi ġeribaiato. Moġesina nai Barau ekirato, namona tu, satauro varina, tarimarima na ġekira-baboani varina, ġevaġa-moġoniani tarimari Barau na bene vaġa-maġuriri. <sup>22</sup> Iuda tarimari ġeri ura baregona tu vetoġa boruri beġene ġita, a Grik tarimari tu iaunega ġeġita-vetauni. <sup>23</sup> Senaġi ġai na tu Keriso, ġevaġa-satauroato tarimana, ġaġobata-iaġiani, ġia tu vevaġa-maġuri tauna. Ma mai vari Iuda tarimari ġeri ai tu guruġa rakavana e Grik tarimari ġeri ai tu vari babona. <sup>24</sup> Senaġi Barau na ekearito tarimari, Iuda tarimari e Grik tarimari, ġita mabarara ġerai Keriso tu Barau ġena seġuka ema Barau ġena iaunega. <sup>25</sup> Barau ġena veiġa tarimarima na ġekira-babobaborini, moġeri veiġa na tarima ġeri iaunega evanaġirini. Ema Barau ġena veiġa tarimarima na moira-moirai ġekiraġirini, moġeri na tarima ġeri kokore evanaġirini.

<sup>26</sup> Tarikakagu mabarami, ġovetuġamaġi-ġenoġoi, ġomi tu aiġesi tarimami Barau na ekeamito. Ġomi tanobara iaunegana ġesi bita vaġa-vetovomini nai, ġomi viravira moġo ma iaunegami, e ġomi viravira moġo ġoseġukato, ema ġomi viravira moġo ġemi bese tu vere. <sup>27</sup> Senaġi Barau na tu mai tanobarai babo tarimari eviriġirito, benamo ġia ġerina mai tanobara ġena iaunega tarimari evaġa-maiakarito. Ema Barau na mai tanobarai moira tarimari eviriġirito, benamo ġia ġerina tanobarai kwalimu tarimari evaġa-maiakarito. <sup>28</sup> Ema Barau na mai tanobarai tarima tari, asi ġeiavirini, ġeġita-fitoġarini e ġekirani, namo ta asi beġe vaġa-ġoraiani ġetoni tarimari, eviriġirito, benamo ġia ġerina tanobarai ġevaġa-raġerini tarimari asi tauri ai evaġa-iaġorito. <sup>29</sup> Mo veiġa eveiato korana tu, tarima ta ġia ġoiranai asi bene vetore-varaġevaraġe ġana. <sup>30</sup> Ġomi ġemi maġuri tu Barau na Keriso Iesu ġesi evaġa-sebonaiato. Keriso Iesu tu Barau na eġabiato ġita ġera iaunegai evaġa-iaġoato. Keriso ġenana ġita tu Barau ġena vei-iobukaiobuka tarimara e Barau ġena vevaġa tarimara, ema Barau na rakava nuġana na

evoi-vaḡirato, ma rakava toma tu asi seḡukana ḡita ḡerai. <sup>31</sup> Moḡa lorinai Buka Veaḡai ekirani ilailana bitana tanu, ekirani, “Tarima ta eurani bene veiavi nai tu, Vereḡauka na kara ḡita iatarai eveiato veiavina moḡo bene veiavi-iaḡia.”

## 2

<sup>1</sup> Tarikakagu mabarami, au ḡomi ḡemi ai aiaḡosito, Barau ḡena guruḡa vekuretoḡana ḡemi aḡobata-iaḡiato tu, dia guruḡa gwaḡiḡiri ai e ḡegu iaunegai ḡomi avaḡa-guruḡamito. <sup>2</sup> Au ḡomi ḡesi roḡo tatanuto-ḡoi nai, au ḡegu ura baregona aveiato tu, dagara ta tu asi bana kiraḡia, senaḡi Iesu Keriso moḡo, o sikira, Iesu Keriso, ḡevaḡa-satauroato tarimana moḡo bana ḡobata-iaḡia. <sup>3</sup> Au ḡomi ḡesi tatanuto-ḡoi tu asi kokoregu, ma garigu ḡesi, ema tauḡanigu maki eḡoḡo-ḡoḡoato-ḡoi. <sup>4</sup> Ema au ḡegu guruḡa e ḡobata maki dia tarimarima ḡeri iaunega guruḡari na, senaḡi au ḡegu guruḡa ema ḡobata tu Iauka Veaḡa seḡukana avaḡa-foforiato-ḡoi. <sup>5</sup> Moḡesi naima ḡomi ḡemi veḡabidadama tu tarimarima ḡeri iaunegai asi boḡono vaḡa-ruḡari, senaḡi Barau ḡena seḡukai boḡono vaḡa-ruḡari.

*Iauka ḡenana eiaḡomani iaunegana*

<sup>6</sup> Moḡoni, Iauka rekenai ḡefakirato tarimari tu, guruḡa iaunegari avinirini. A maiḡeri guruḡa iaunegari tu dia mai tanobara ḡena iaunegai o mai tanobara ḡorikauri tarimari ḡeri iaunegai; ḡia ḡeri iaunega tu mai ekorini. <sup>7</sup> Au na akiraḡiani iaunegana tu Barau ḡena iaunega vekuretoḡana. Tarimarima ḡerina tu ekure-toḡaiato, senaḡi ḡia na mai tanobara roḡosi roḡo bere veia nuḡanai, eḡabi-toreato, ḡita na mareva baregona bitana ḡabia uranai. <sup>8</sup> Mai iaunega vekuretoḡana tanobara ḡeḡori-kauani tarimari na ta maki asi ḡeribaiao. Korana bema beḡere ribaia nai tu, mareva baregona Vereḡaukana tu asi ḡere vaḡa-satauroa. <sup>9</sup> Senaḡi Buka Veaḡai ekirani ilailanai, “Ta matana na asi eḡitaiato, ta seḡana na asi eseḡaḡiato, ta ḡena tuḡamaḡi asi etuḡamaḡi-fakaiato, moḡa tu Barau na erovina-toreato, ḡia beḡe ura-viniani tarimari ḡeri.”

<sup>10</sup> Mai tu vekuretoḡa dagarari, senaḡi Barau na ḡita ḡerai tu evaḡa-foforirito ḡia Iaukana ḡenana. Iauka tu dagara mabarari eragaḡirini, Barau ḡenai dagara dobumasemaseri maki eragaḡirini. <sup>11</sup> Vaḡa-ilailana tarima ta na tarima boruna ḡena tuḡamaḡi asi eribaiani. Asiḡina. Mo tarima tauḡena iaukana na vau ḡia nuḡanai tuḡamaḡi vekuretoḡari eribarini. Barau maki moḡesina, tarima ta na ḡia ḡena tuḡamaḡi asi eribaiani, senaḡi Barau Iaukana na moḡo eribaiani. <sup>12</sup> ḡita na tu dia mai tanobara iaukana taḡabiato. Asiḡina. ḡita tu Barau na etuḡuato Iaukana taḡabiato, Barau na varevare evini-kavarato, dagarari bitana riba-maorori ḡana.

<sup>13</sup> Maiḡeri dagara tu dia tarimarima ḡeri iaunegai ḡevaḡa-ribamani guruḡari loriri ai ḡakiraḡirini. Senaḡi mai tu Iauka Veaḡa na evaḡa-ribamani guruḡari ilailari ai ḡaguruḡani. Iauka rekenai dagarari o guruḡari tu Iauka Veaḡa na evaḡa-ribamani ilailanai ḡakiraḡirini. <sup>14</sup> Tanobara tarimana na Barau Iaukana ḡenana dagara ta tu asi bedoḡariani, korana ḡia tanobara tarimana ḡenai mo tu babo dagarari, ema asi maki beribarini, korana moḡeri dagara mo tu Iauka Veaḡa nuḡanai ḡetanuni tarimari na vau beḡe ribarini. <sup>15</sup> Iauka Veaḡa ḡia nuḡanai etanuni tarimana na, dagara mabarari beḡita-ginikaurini e betuḡamaḡi-fakarini, senaḡi ḡia tauḡena tu ta na asi beḡita-ginikauani e asi beriba-maoroani. <sup>16</sup> Korana Buka Veaḡa nuḡanai maiḡesi ekirani, “Deikara na Vereḡauka nuḡana eribaiani? Deikara na ḡia besisiba-viniani? A Keriso ḡena tuḡamaḡi tu ḡita ḡerai etanuni.”

## 3

*Barau ḡena vetuḡunaḡi tarimari*

<sup>1</sup> Tarikakagu mabarami, au na ġomi avaġa-guruġamito-ġoi tu dia Iauka Veaġa na eguine-iaġirini tarimari kavana. Senaġi au na ġomi tu tanobara maġurinai ġetanuni tarimari kavana avaġa-guruġamito-ġoi. Mo negai ġomi Keriso ġena veiġa e maġuri nuġanai tu roġo raraka-raraka. <sup>2</sup> Moġesi naima au na ġomi tu lata gorari ai aġubumito, a dia ġaniġani gwaġiġiri ai. Korana mo negai ġomi iauka ġaniġaniri gwaġiġiri ġaniġaniri ġana tu roġosi roġo boġoro barego-ginikau. Aba, initoma maki ġomi tu roġosi roġo boġoro barego-ginikau, roġo raraka-raraka iaukai; <sup>3</sup> korana ġomi tu roġo tauġanimi ġeri ura rakavari na ġeguine-iaġimini. Ġomi fakami ai mama e vevane tu roġo ġetanuni, mainana moġo evaġa-moġoniani ġomi tu mai tanobara tarimari ġeri maġuri ai roġo ġotanuni. <sup>4</sup> Ġomi tu roġo tanobara maġurinai ġotanuni, korana ġomi ta okirani, “Au tu Paulo ġena,” ma ta tu ma okirani, “Au tu Apolos ġena.”

<sup>5</sup> Be Apolos tu dei? Ema Paulo tu dei? Ġia tauri ruarua tu vetuġunaġi tarimari koriri moġo, ġia ġerina ġomi Iesu ġovaġa-moġoniato. Ġai tauma ruarua tu Vereġauka na ġauvei tata evinimato. <sup>6</sup> Au tu avaroto, a Apolos na tu nanu na edairiato, senaġi Barau na tu evaġa-garaiato. <sup>7</sup> Moġesi naima evaroto tarimana e nanu na edairirito tarimana tauri ruarua tu asi arari, senaġi Barau ġereġana moġo, korana ġia na dagara evaġa-gararini. <sup>8</sup> Evaroni tarimana ema nanu na edairini tarimana tu ilaila moġo. Ġia tata ġeri ġauvei ilailari ai Barau na voiri bevinirini. <sup>9</sup> Ġai tu Barau ġesi ġaġauvei-sebonani tarimama, a ġomi tu Barau ġena vamoka; ġomi maki Barau ġena numa.

*Barau ġena ġauvei tu numa ragaragana kavana*

<sup>10</sup> Barau na ġena namo e varevare-bara eviniguto ilailanai, au tu numa raga tarimagu namonai aiaġoto. Numa vaġa-ruġavaisina duġuna forena aragaiato (o kwakuri avaġa-ruġa ginikaurito), ma ta na tu iatanai numa eragaiani. Senaġi numa beġe ragaiani tarimari tata tu beġene venari, kamasi numa beġe ragaiani tu. <sup>11</sup> Barau na Iesu Keriso tu numa vaġa-ruġavaisina duġuna forenai evaġa-iaġoato. Ma ta na numa vaġa-ruġavaisina duġuna boruna ta tu asi ma beragaiani veġata. <sup>12</sup> Tarima tari na mai numa vaġa-ruġavaisina duġuna forena (o numa kwakuri) iatanai tu golo, silva o galasi foreri beġe ġauvei-iaġirini numa beġe ragani nai, a tarima tari na ġau, reġi o biri beġe ġauvei-iaġirini. <sup>13</sup> Ġia tata ġeri ġauvei vetoġari tu Vereġauka ġena Kota baregona ġaronai vau bevaġa-foforirini. Korana mo ġauvei tu karava na bevaġa-foforiani ema karava na tarima tata ġeri ġauvei betovo-naġirini, moġeri ġauvei tu namori ba rakavari. <sup>14</sup> Bema tarima ta na mo numa vaġa-ruġavaisina duġuna forenai eragaiato numana tu karava na asi beġaraiani nai, ġia tu voina namona beġabiani. <sup>15</sup> Bema ġena numa karava na beġaraiani tarimana tu, ġena ġauvei mabarari tu beġe rekwa-rekwani, ġia ġereġana moġo bemaġurini. Senaġi ġia tu noġa moġo karava na beraga-maġurini.

*Ġomi tu Barau ġena Rubu Veaġa*

<sup>16</sup> Ġomi asi ribami, ġomi tu Barau ġena Rubu Veaġa ema Barau Iaukana tu ġomi nuġami ai etanuni, ei? <sup>17</sup> Bema tarima ta na Barau ġena Rubu Veaġa bevaġa-rakavaiani nai, ġia maki Barau na bevaġa-rakava kwaikwaiani, korana Barau ġena Rubu tu veaġa, ema ġomi tu ġia ġena Rubu Veaġa.

*Tarimarima asi boġono vaġa-veiaviri*

<sup>18</sup> Tarima ta ġena tuġamaġi na asi bene ġofaia. Bema tarima ta ġomi fakami ai etuġamaġini, ġia tu ma iaunegana mai tanobarai, ġia tu babo tarimanai bene iaġo, be bene iaunega. <sup>19</sup> Korana mai tanobara iaunegana Barau ġoiranai tu iaunega babona. Buka Veaġai ekirani kavana, ekirani, “Barau na iaunega tarimari tauġeri ġeri iaunega rakavari nuġari ai eġabi-taririni.” <sup>20</sup> Ema Buka Veaġai maki ma ekirani, “Vereġauka ribana, iaunega tarimari ġeri tuġamaġi tu asi tauri, koriri moġo.”

<sup>21</sup> Moġesi naima, tarima ta na tarimarima tu asi bene vaġa-veiaviri. Korana dagara mabarari tu ġomi ġemi. <sup>22</sup> Paulo e Apolos ema Petero; mai tanobara mabarana tu

ġomi ġemi, maġuri e mase, maitoma ġefoforini dagarari ema ġoirai vau beġe iaġomani dagarari; mabarari tu ġomi ġemi. <sup>23</sup> A ġomi tu Keriso ġena, ema Keriso tu Barau ġena.

*Vereġauka tauġena na ġena vetuġunaġi tarimari ġeri maġuri evetau-ginikaaurini*

#### 4

<sup>1</sup> Moġesi naima ġomi na ġai boġono tuġamaġima, ġai tu Keriso ġena vetuġunaġi-iaġovinina tarimama, ema Barau ġena vekuretoġa dagarari ġitaġauri tarimama. <sup>2</sup> Farefare ġeviniani bene ġita-ġauri ġetoni tarimana ġena biaguna ġena ura baregona, ġia tu ma vetuġa-maġikauna ġesi farefare bene nariri. <sup>3</sup> Au tu kamasi ġotoni? Au tu asi atuġamaġini, ġomi na au boġo vetau-ginikauguni o tarimarima ġeri Kota maġurinai beġe vetau-ginikauguni ba asiġina. Au tu tauġegu maki asi avevaġa-maoroni. <sup>4</sup> Au tauġegu avetuġamaġini, ġegu rakava ta asi atuġamaġi-doġariani. Senaġi asi akirani, au tu asi ġegu vei-rakava. Vereġauka na moġo au eġita-ginikauguni. <sup>5</sup> Moġesina naima Vereġauka roġosi bene iaġoma e ġena vevaġa-kota ġarona roġosi bene ġabia nuġanai, maitoma tu tarima ta asi boġono vetau-vinia. Vereġauka na mukuna furufuru ai vekuretoġa dagarari mabarari mamai betore-rosirini, ema tarimarima ġeri tuġamaġi loruri ġutunai ġetanu-vekuretoġani maki bevaġa-foforirini. Mo ġaro ai Barau na tata bevaġa-raġerini ġeri veiġa loriri ai.

<sup>6</sup> Tarikakagu mabarami, maiġeri guruġa au tauġegu ema Apolos ġema bavaġa-vetovori, korana tu ġomi namo boġono doġari uranai. Be, ġai ġemana maiġa boġono ribaia, “Buka Veaġai ġetoreato guruġana asi boġono vanaġia.” Monana tarima sebona ta moġo asi boġo vaġa-veiaviani e ta asi boġo kira-fitoġaiiani. <sup>7</sup> A ġoi tu deikara na tarima baregomu ai etoremuto tarimarima mabarari fakari ai? Ġoi ġemu dagara mabarari tu dia Barau na evinimuto? Bema ġoi na Barau ġenana odoġaririto nai tu, kara dainai ovekokorokuni, noġa dia Barau ġenana oġoitaġoato dagarana oveini?

<sup>8</sup> Ġomi tu ġoura-vinirini dagarari na varau boġo vonuvonu-raġe. Ġomi tu varau boġo taġa-ġosi. Ġai tu ġomi na boġo vanaġima, korana ġomi tu varau boġo kini, be ġoveġitaġauni. (Ġomi tu noġa moġo Keriso varau bere iaġoma-ġenoġoi kavana ġoveini). Au ġegu ura barana sebona, ġomi tu moġoni boġoro kini, be ġai maki ġomi ġesi bitara kini-sebona. (Korana boġono riba, Keriso ma beġenoġoi-iaġomani nai, ġai maki ġomi ġesi bita kinini). <sup>9</sup> Senaġi au atuġamaġini tu maiġesi: Barau na ġai apostolo tu gabi tarimamai etoremato, mai tanobarai asi beġene ġita-leama e asi beġene iavima gabunai etoremato. Ġai tu noġa tarima kotari, Kota na evaġa-moġonirini beġene vaġi-maseri etoni, benamo ġeġabirini, ġutuma-bara ġoirari ai ġevaġa-ruġa-rosirini, beġene ġitari vau beġene vaġiri ġetoni kavana. Ġai maki Barau na mai tanobara mabarana nuġanai etore-rosimato, aneru e tarimarima ġoirari ai. <sup>10</sup> Ġai tu babo Keriso ġaramanai bene, a Keriso nuġanai ġomi tu iaunega. Ġai tu asi kokorema, a ġomi tu ma kokoremi. Ġomi tu ġeguba-kaumini, a ġai tu asi ġegubakaumani. <sup>11</sup> Ġai ġatanu-iaġomani mo toma tu ġavito-maseni e ġananu-maseni; dabuġa rakavari na ġavedabuġani; ġekwarimani; ema asi ġema tanutaġo numari. <sup>12</sup> Ġai tu tauġema ġimama na ġaġauveini. Tarima na ġekira-fitoġamani nai, ġai na tu ġavaġa-namorini; ġevaġa-midigu midigumani e ġelai-lautilusimani, senaġi ġaruġa-gwaġiġini moġo, voiri asi ġaveirini. <sup>13</sup> Ġai arama tu ġevaġa-rakavarini, a ġai na tu ġavaġa-guruġa ginikaaurini. Ġai tu tanobara ġena momo ai ġaiaġoto, e tanobara na eruġamani asi eġabi-raġemani beiaġoma mo toma.

<sup>14</sup> Au na maiġeri mabarari atorerini tu, dia ġomi navaġa-maiakami ġana, senaġi ġomi tu au natugu, aura-vinimini tarimami, naima akiravara-toreġaumini. <sup>15</sup> Aba, Keriso nuġanai ġevaġa-ribamini e ġeġori-kaumini tarimari tu betaġu 10,000, senaġi tama tu asi vovoka ġomi fakami ai, sebona moġo. Korana Vari Namona ġenana au tu ġomi tamami ai aiaġoto Keriso Iesu nuġanai. <sup>16</sup> Moġesi naima au na ġomi alaunaġimini, au boġono tovtovogu. <sup>17</sup> Moġa lorinai maki au na Timoteo ġomi ġemi ai atuġu-iaġosiato.

Ĝia Vereĝauka nuĝanai tu au natugu e auravini-rakavaiani, ema ĝia tu Vereĝauka ĝena ĝauvei evei-ĝitakauani ma vetuĝamaĝikauna ĝesi. Ĝia na au Keriso Iesu nuĝanai aiĝesi atanuni maĝurina ma bekira-varamini, gabu e rubu mabarari ai avevaĝa-riba iaĝirini ilailari ai.

<sup>18</sup> Ĝomi tari tu ĝovekokorokuni, noĝa moĝo au ĝomi ĝemi ai tu asi baiaĝosini noĝa ĝoveini. Ĝomi garimi aveini ĝotoni. <sup>19</sup> Senaĝi bema Vereĝauka ĝena ura nai tu, ĝemi ai baiaĝosi-ĝarimoĝini. Benamo au baiaĝosini vauro, maniĝeri tarima ĝeri vekokoroku guruĝari ema ĝeri seĝuka basi ribarini. <sup>20</sup> Korana ainai Barau na ĝena Basileia o veĝitaĝau evaĝa-ruĝaiani, monai tu dia guruĝa korina ĝesi moĝo efoforini. Asiĝi. Barau ĝena veĝitaĝau tu ma seĝukana ĝesi efoforini. <sup>21</sup> Ĝomi na tu aiĝa ĝoura-viniani? Au ĝomi ĝemi ai tu ma kwarigu ĝesi bana iaĝosi, ba veuravini ai ema manau ai, ei?

## 5

### *Veĝa rakavari Korinto ai*

<sup>1</sup> Ma aseĝaĝini, ĝekirani, ĝomi fakami ai mata-boraĝa maĝurina eĝorani. Mai mata-boraĝa maĝurina ĝomi fakami ai eĝorani tu Barau asi ribari beseri fakari ai maki asi eĝorani veiĝana. Au ĝekiraguni, tau ta na sinana raĝetaĝona eĝabiani, benamo ĝaraĝonai evaĝa-iaĝoani, egena-viniani. <sup>2</sup> Ma nuĝanai ĝomi tu ĝovekokorokuni. Ĝomi tu nuĝami taĝi na beĝere vonu, be moĝesi eveini tarimana tu ĝomi fakami na boĝoro tuĝu-veĝitaia. <sup>3</sup> Aba, au tauĝanigu ĝomi vekaravami ai tu asiĝina, senaĝi iaukai au tu ĝomi vekaravami ai maniĝegu. Be mai veiĝa eveiani tarimana tu au na varau bavaĝa-maoroa, au tauĝani ai ĝomi ĝesi maninai mani ĝegu bara vaĝa-maoroa ilailanai. <sup>4</sup> Ĝomi ĝera Vereĝauka Iesu Keriso aranai ĝoraka-vegogoni, ema au iaukagu maki ĝomi vekaravami ai nuĝanai, ĝera Vereĝauka Iesu Keriso ĝena seĝukai, <sup>5</sup> ĝomi na maniĝesi eveini tarimana tu Satani boĝono vinia, tauĝanina bene vaĝa-rakavaia uranai bene. Moĝesina boĝono veia, be Iesu Vereĝauka ĝena ĝenoĝoi ĝaronai ĝia iaukana tu bene maĝuri.

<sup>6</sup> Ĝomi ĝoveiavini tu asi namo. Ĝomi asi ribami farao evaĝa-tubuani muramurana misina na farao mabarana evaĝa-tubuani? <sup>7</sup> Moĝesina naima farao evaĝa-tubuani muramurana guinena mabarana ĝemina boĝono tore-veĝitaia, be ĝomi tu beredi variĝuna asi farao evaĝa-tubuani muramurana beredinai boĝono iaĝo. Au ribagu, ĝomi tu moĝoni beredi variĝuna, dia farao evaĝa-tubuani muramurana ĝesi ĝevei-sebonamito beredina. Korana Keriso tu moĝoni ĝita ĝera mamoe natuna ginitaĝo ĝana. Ĝia tu ĝita urarai ginitaĝo ĝana ĝevaĝiatio. <sup>8</sup> Moĝa lorinai Rubu Veaĝa verekona bitana ĝabi-gwaĝiĝia, senaĝi dia farao evaĝa-tubuani muramurana guinena ĝesi. Mai veiĝa tari ilailana tarima vaĝa-rakavari tuĝamaĝiri e veiĝa rakavari tu farao evaĝa-tubuani muramurana kavana, be maiĝeri maki bitana tore-veĝitari Rubu Veaĝa verekona bita ĝabi-gwaĝiĝiani nai. Ĝita na Rubu Veaĝa verekona bita ĝabi-gwaĝiĝiani nai tu, dia farao evaĝa-tubuani muramurana ĝesi ĝevei-sebonaiani beredina ĝesi. Moĝa tauna tu, ma moĝonira ĝesi ema moĝoni ai bitana ĝabia.

<sup>9</sup> Fefa tai au na ĝomi atore-vinimito nuĝanai akiramito, mata-boraĝa tarimari ĝesi tu asi boĝono vekako. <sup>10</sup> Moĝesi atore-vinimito nai, au na tu dia eklesia murikanai ĝetanuni tarimari akiraĝirito, au iniĝesi tu asi akirato, ĝekima-rakaoni, o ĝemata-ĝaniĝanini, o ĝofaĝofa veiĝari ai ĝeverarini, o kwaivakuku ĝetoma-rakariĝo vinirini tarimari ĝerina tu boĝono rakaveĝita-moĝovaĝi. Korana bema maiĝeri tarima ĝerina ĝoveĝita-moĝovaĝi boĝo toni nai tu, mai tanobara boĝo iaĝuiani. <sup>11</sup> Senaĝi toma au na atore-vinimini tu, akirani, deikara ekirani, ĝia tu tarikaka veĝabidadama nuĝanai, senaĝi ĝia tu ekimani o emata-ĝaniĝanini, o babarau etoma-rakariĝo vinirini, o tarimarima ĝeri maĝuri ekiraĝi-rakava rakavarini, o niuniu tarimana, o ĝofaĝofa veiĝari eveirini tarimana ĝesi asi boĝono vekako. Maiĝesi tarimari ĝesi tu asi maki boĝono ĝani-vegogo.

<sup>12-13</sup> Au tu asi ġegu ġauvei ta ekalesia murikanai ġetanuni tarimari au na bavaġa-maororini. Barau na vau bekota-vinirini. Senaġi ġomi tu ma ġemi maoro ekalesia nuġanai ġetanuni tarimari boġo vaġa-maororini. Buka Veaġa ekirani ilailanai, “Veirakava tarimana ġomi fakami na boġono tore-veġitaia!”

## 6

*Vekotavini ekalesia karomi ġesi*

<sup>1</sup> Bema ġomi ta ekalesia karomu ta ġesi ġoveġare-veġareni nai, kara dainai tu Barau asi ġekorana-iaġiani Kota seġaġi tarimari ġeri ai oa samaniani, ġia beġene vevaġa-maoro ġana, a Barau ġena tarimarima veaġari ġeri ai mo meto tu asi ġoġabi-iaġoani vei-maorona, ei? <sup>2</sup> Ġomi asi ribami, tanobara maġurinai ġetanuni tarimari tu Barau ġena tarimarima na beġe vaġa-maororini? Karase nai ġomi na mai dagara misiri tu asi ilaila tauġemi na ġemi vegogo ai boġo vaġa-maororini? <sup>3</sup> Ġomi asi ribami, ġita na tu aneru bita kota-vinirini? Bema moġesi bita veini nai tu, atuġamaġini, mai vanaġivanaġi tatanu-iaġiani maġurina dagarari maki bita vetau-ginikaurini riba. <sup>4</sup> Ġoġitaiani, bema mai vanaġivanaġi tatanu-iaġiani maġurina dagarari ġita na bita vetau-ginikaurini, karase nai tu Barau asi ġekorana-iaġiani Kota tarimari ġeri ai ġoiaġoni, ġemi beġene vevaġa-maoro ġotoni. <sup>5</sup> Maiġesi akirani tu ġomi beġene maiakami ġana. Moġoni korikori, ġomi fakami ai iaunega tarimana sebona ta maki asiġina ġinavaġi moġo, be ġia na tarikakana vekaravari ai mani meto misina asi bevaġa-maoroani, ei? <sup>6</sup> A ġomi tu ekalesia karona ta na karona ta eġori-kotaiani, ma tauri ruarua tu ġeiaġoni, Iesu asi ġevaġa-moġoniani tarimari ġoirari ai ġea ruġa-tarini, ġekota ġana.

<sup>7</sup> Moġoni, ġomi tauġemi moġo vekaravami ai ġoveġori-kotani tauna korikori tu, ġomi ġemi veġabidadama maġurina na tu moġoni boġo keto-korikori. Karase nai tarikakami tari na ġevaġa-rakavamini nai tu, asi moġo ġoġabi-raġerini? Kara dainai ġofaġofai ġemi farefare ġeverarimi ġetoni nai tu, asi moġo ġoġabi-ragerini, ei? <sup>8</sup> A ġomi tu tarikakami ġesi tauġemi moġo ġofaġofai ġoveverarini e ġovevaġa-rakavani.

<sup>9</sup> Ġomi asi ribami, veiġa iobukaiobukari asi ġeveini tarimari na Barau ġena Basileia tu asi beġe ġaunaiani. Tauġemi nuġami na asi beġene ġofami. Korana tu ġekimani tarimari, kwaivakuku ġetoma-rakariġorini tarimari, veġura-vanaġi tarimari, tau tu tau karori ġesi ġekimani, ema ġeġiġiraġeni tauġeri karori ġesi maiaka veiġari beġene vei ġetoni tarimari, <sup>10</sup> ġelemeni tarimari, ġemata-ġaniġanini tarimari, niuniu tarimari, ġofaġofa veiġari ai ġeveverarini tarimari, ema tarimarima ġeri maġuri ġekiraġi-rakava rakavarini tarimari na Barau ġena Basileia tu asi beġe ġaunaiani. <sup>11</sup> Ma ġomi kotari guinenai tu moġesi ġoveito-ġoi tarimami. Senaġi ġomi tu ġita ġera Barau laukana na Iesu Vereġauka aranai varau eġuriġimito, evaġa-veaġamito, ema asi ġemi vei-rakava etato.

Ġita tauġanira tu Iauka Veaġa ġena tanu numana

<sup>12</sup> Ta bekirani, “Dagara mabarari au ġegu ai tu asi taravatu,” betoni. Ġomaoroni, senaġi dia mo dagara mabarari ġerina ġomi namo boġo doġarini. Dagara mabarari au ġegu ai tu asi taravatu, senaġi asi namo au dagara ta na beġori-kauguni, benamo ġena tuġu-rakaorakao tarimanai baiaġoni. <sup>13</sup> Ma ta bekirani, “Ġaniġani tu sinaġe ai bene tanu ġana e sinaġe tu ġaniġani ġana.” Mai tu moġoni! Senaġi ġaniġani e sinaġe tu Barau na tauri ruarua bevaġa-rakavarini. Ġita tauġanira Barau na eveiato tu dia tarimarima na bitana kima-iaġia ġana. Asiġina. Barau na tauġani tu Vereġauka ġena eveiato, ma Vereġauka maki tauġani ġena Vere. <sup>14</sup> Barau na Vereġauka mase na evaġa-variġisi ġenoġoiato, ema ġita maki mase na bevaġa-variġisi ġenoġoirani, Barau tauġena ġena seġuka na.

<sup>15</sup> Ġomi asi ribami, tata tauġanimi tu Keriso tauġanina koturikoturi, ei? Ma Keriso tauġanina koturikoturi moġeri tu naġabiri, be mata-boraġa tarimari tauġaniri ai navaġa-iaġori? Asiġina ġinavaġi! <sup>16</sup> Ba ġomi tu asi ribami, mata-boraġa vavinena ġesi

evekafani tarimana tu mo mata-boraġa vavinena ġesi sebonai ġeiaġoni? Korana Buka Veaġa nuġanai Barau ekirato, “Mo tarima ruarua tu tauġani sebonai moġo beġe iaġoni.”<sup>17</sup> Senaġi Vereġauka ġenai bekafakauni tarimana tu Vereġauka ġesi iauka sebonai beġe iaġoni.<sup>18</sup> Mata-boraġa maġurina ġenana boġono raka-veġita. Veiġa rakava mabarari tarimarima na ġeveirini tu tauġani murikana moġo rakavana, senaġi ekimani tarimana tu tauġena tauġanina nuġanai evei-rakava viniani.<sup>19</sup> Ba ġomi tu asi ribami, ġomi tauġanimi tu Iauka Veaġa ġena Rubu Veaġa, ma Iauka Veaġa tu ġomi tauġanimi nuġanai etanuni, ei? Mani Iauka Veaġa tu Barau na evinimito, moġa lorinai ġomi tu dia tauġemi ġemi, senaġi ġomi tu Barau ġena.<sup>20</sup> Ġomi tu Barau na voimi varau eveirito, evoi-ġenoġoimito, be tauġanimi tu Barau ġena. Moġa lorinai tauġanimi na Barau boġono vaġa-raġea.

## 7

## Veġaraġo guruġari

<sup>1</sup> Maitoma tu ġemi fefai au ġotore-viniguto guruġari ma navaġa-voiri. Tau ta asi eveġaraġoni tu namo.<sup>2</sup> Senaġi kima veiġana eġorani lorinai, namona tu tau tata tauġeri ġaraġori sebori sebori beġene ġaraġo, e vavine tata maki tauġeri ġaraġori sebori sebori beġene ġaraġo.<sup>3</sup> Tau tauġanina tu ġaraġona ġena, be tauġanina ġaraġona ġenai asi bene koua, a ġaraġona ġena ura bene veiri. Vavine maki moġesi, tauġanina tu ġaraġona ġena, be tauġanina ġaraġona ġenai tu asi bene kou-ġaua, a ġaraġona ġena ura bene veiri.<sup>4</sup> Veġaraġo vavinena tu asi ġena maoro ġia tauġena tauġanina ġenai, a ġaraġona tauna moġo ma ġena maoro ġia tauġanina ġenai. Veġaraġo tauna maki moġesina, ġia tu asi ġena maoro ġia tauġena tauġanina ġenai, a ġaraġona vavinena moġo ma ġena maoro ġia tauġanina ġenai.<sup>5</sup> Ġoveġaraġoto tarimami tu ġaraġomi ġeri ai tauġanimi asi boġono kouri. Senaġi taumi ruarua nuġa sebonai boġo kirani, ġoġaniveaġa e ġoġauġau boġo toni, moġa uranai vauro mo negai boġono tanu-faka. Senaġi moġa bekorini murinai tu, ma boġono gena-vegogo maia. Moġesi boġono vei, be Satani na asi ġovevaġa-gwaġiġi-iaġiani gabunai asi bene riba-ġanimi.<sup>6</sup> Maiġesi aguruġani tu, ġomi navaġa-kavami ġana moġo, dia taravatu atoreani, akirani, boġono veia veġata atoni.<sup>7</sup> Korana au ġegu ura baregona ġomi tau mabarami tu au kavana boġoro vei, asi boġoro veġaraġo. Senaġi Barau na tau tata varevare eviniato, tau ta ġena varevare tu bene veġaraġo, ma ta ġena tu asi bene veġaraġo.

<sup>8</sup> Au na asi ġaraġori tarimari ema ġaraġori ġemaseto tarimari tu akirarini: Ġia tu gora, asi beġene veġaraġo, beġene tanu moġo au kavana.<sup>9</sup> Senaġi bema ġia asi ilaila beġe vevaġa-gwaġiġini nai tu, benamo beġene veġaraġo. Korana beġe veġaraġoni tu namo, a asi namo kima veiġari nuġari ai karava noġa beġene ġara.

<sup>10</sup> A Veġaraġo tarimami tu mai taravatu avinimini. Senaġi mai tu asi au ġegu taravatu. Asiġina. Mai tu Iesu Vereġauka ġena taravatu ġomi ġemi: Veġaraġo vavinena na ġaraġona asiġina ġinavaġi bene dobi-kwaneana.<sup>11</sup> Senaġi irau ġaraġona bedobi-kwaneani nai tu, bene tanu-gora moġo, a asiġina tu, ġaraġona ġesi ma beġene veġaraġo-ġenoġoi. Ema veġaraġo tauna na maki ġaraġona asiġina ġinavaġi bene dobi-kwaneana.

<sup>12</sup> Tarima kotari ġeri ai tu nakira, -mai tu au moġo ġegu guruġa dia Vereġauka ġena guruġa, -bema veġabidadama nuġanai tarikaka ta ġaraġona vavinena tu Iesu asi evaġa-moġoniani vavinena, senaġi ġena ura ġaraġona tauna ġesi beġene tanu-vegogo nai, mo tau na ġaraġona vavinena asi bene dobi-kwaneana.<sup>13</sup> Ema bema vavine ta ġaraġona na Iesu tu asi evaġa-moġoniani, senaġi eurani ġaraġona vavinena ġesi beġene tanu-vegogo, mo vavine na ġaraġona asi bene dobi-kwaneana.<sup>14</sup> Korana Iesu asi evaġa-moġoniani tauna tu ġaraġona vavinena ġenana moġo veiareva etanuni, ema Iesu asi evaġa-moġoniani vavinena tu ġaraġona tauna ġenana moġo veiareva etanuni. Bema asiġina nai tu, toma ġomi natumi Barau ġoiranai tu asi veiareva, senaġi ġia toma tu veaġa.<sup>15</sup> Senaġi bema Iesu asi evaġa-moġoniani tauna o vavinena ġaraġona ġenana bedobini nai tu, namo bene dobi, bene raka. Mo Iesu evaġa-moġoniani tauna o vavinena mai dabarai tu



befakani, meto ta asi beḡwaiyani. Barau na ḡomi ekeamito maino ai boḡono tanu. <sup>16</sup> Ḣoi veḡabidadama vavinemu tu kamasi ḡoi oribani, ḡoi na ḡaraḡomu vei-rakava nuḡana na bovaḡa-maḡuriani? O ḡoi veḡabidadama taumu tu kamasi ḡoi oribani, ḡoi na ḡaraḡomu vei-rakava nuḡana na bovaḡa-maḡuriani?

*Barau na ekeamito ilailanai boḡono tanu*

<sup>17</sup> Ḣomi tata Iesu Vereḡauka na evinimito ilailari ai ema Barau na tata ekeamito ilailari ai moḡo boḡono tanu. Au na tu mai taravatau misina ekalesia mabarari avaḡa-ribarini. <sup>18</sup> Bema tau ta tauḡanina kefina ḡelama-vaḡiato murinai vau, Barau na ekeaiato nai tu, kefina asi ma bene inu-ḡaua, benamo ḡelamaiato fauna bene kure-toḡaia. Ema bema tau tauḡanina kefina roḡosi beḡene lama-vaḡia nuḡanai, Barau na ekeaiati nai tu, kefina asi beḡene lama-vaḡia maia. <sup>19</sup> Korana tu kefi-lamavaḡi tu asi anina ta, ema kefi asi lamavaḡi maki asi anina ta. Dagara baregona tu Barau ḡena taravatau guruḡari boḡabi-gigitaririni.

<sup>20</sup> Tarimarima mabarari aiḡesina ḡetanuto-ḡoi nuḡanai, Barau na ekearito, moḡesi moḡo beḡene tanu. <sup>21</sup> Ḣoi Barau na ekeamuto neganai, ḡoi tu tuḡu-rakaorakao tarimamu asi voimu otanuto-ḡoi, ei? Asi ḡena rakava, namo moḡo. Moḡa tuḡamaḡi vekwaraḡina asi bono vei, senaḡi mani tuḡu-rakaorakao maḡurina beḡe tuḡu-vaḡimuni nai tu, bono ḡabi-raḡea. <sup>22</sup> Korana tarima ta roḡo tuḡu-rakaorakao tarimana nuḡanai, Barau na ekeaiato Vereḡauka ḡesi beḡene sebona, ḡia tu varau fakai etanuni, korana ḡia tu Vereḡauka ḡena tarima. Aba, tauḡani ai ḡia tu roḡo tuḡu-rakaorakao tarimana senaḡi. Moḡa ilailanai, asi tuḡu-rakaorakao tarimana o fakai etanuni tarimana Barau na ekeaiati tu Vereḡauka ḡena tuḡu-rakaorakao tarimana. <sup>23</sup> Ḣomi tu Barau na voimi varau eveito, evoi-ḡenoḡoimito. Be tarimarima ḡeri tuḡu-rakaorakao tarimami ai asi boḡono iaḡo.

<sup>24</sup> Tarikakagu mabarami, ḡita tata aiḡesi tatanuto-ḡoi nuḡanai, Barau na ekearato, bena moḡesi moḡo Barau ḡesi bitana tanu.

*Sisiba guruḡari gora ema vabu ḡeri ai*

<sup>25</sup> Ma roḡosi beḡene veḡaraḡo ḡuiatori e futuari ḡeri taravatu ta Vereḡauka na au tu asi eviniguto. Senaḡi au ḡegu tuḡamaḡi ai aḡitaiani guruḡana nakiraḡia, korana au tu Vereḡauka ḡena vevetuḡaḡwai moḡo etoreguto, guruḡa moḡoniri moḡo bana kiraḡiri ḡana. <sup>26</sup> Mai nega rakavari maiḡeri meto baregori ḡeḡorani dainai, au atuḡamaḡini, tau tu toma ḡotanuni kavana moḡo boḡono tanu-iaḡo. <sup>27</sup> Ḣoi oveḡaraḡoto taumu tu, ḡaraḡomu dobi-kwanena tuḡamaḡina asi bono vei. A asi ḡaraḡomu meromu tu, ḡuiato asi bono vetau, ta noḡaraḡoa uranai. <sup>28</sup> Senaḡi bema ḡoi boa veḡaraḡoni maki namo, ḡoi na vei-rakava ta asi boveiiani. Ma ḡuiato beveḡaraḡoni maki namo, ḡia na vei-rakava ta asi beveiani. Senaḡi beḡe veḡaraḡoni tarimari tu ḡeri maḡuri nuḡanai meto vovoka beḡe doḡaririni. Ma au na tu mo meto ḡerina navaḡa-maḡurimi atoni.

<sup>29</sup> Tarikakagu mabarami, au na kara akiraḡiani tauna tu iniḡa: Nega tu bekubi-rakava. Be, maitoma na besinaia beiaḡoni tu, veḡaraḡo tauri tu asi ḡaraḡori noḡa beḡene tanu. <sup>30</sup> Ema ḡetaḡini tarimari noḡa moḡo asi ḡetaḡini tarimari kavana beḡene tanu, e ḡeverereni tarimari noḡa moḡo asi ḡeverereni tarimari, e farefare ḡevoini tarimari tu farefare ta asi ḡeḡaunaiani tarimari noḡa moḡo, <sup>31</sup> ema tarima na mai tanobara dagarari ḡeḡauvei-iaḡirini nai, moḡeri dagara tu asi beḡene ḡabiri dagara baregori ḡia ḡeri maḡuri nuḡari ai. Korana mai tanobara vetoḡana korikori tu varau ekori-iaḡoni.

<sup>32</sup> Au asi aurangi, mai tanobara dagarari na ḡemi tuḡamaḡi beḡene vaḡa-vonuri. Asi eveḡaraḡoto tarimana tu Vereḡauka ḡena dagara etuḡamaḡi-ḡutumarini, aiḡesi Vereḡauka iauna bevaḡa-namoani etoni. <sup>33</sup> Veḡaraḡo tauna tu mai tanobara dagarari etuḡamaḡi-ḡutumarini, aiḡesi ḡaraḡona iauna bevaḡa-iakuani etoni. <sup>34</sup> Moḡesina naima ḡia tu egabi-daḡadaḡani, tavi ta tavi ta na ḡeinuani. Veḡaraḡo vavinena ema asi kota maki ekima-karato ḡuiatona tu ma ḡeri irau. Asi ḡaraḡona vavinena tu Vereḡauka ḡena dagara betuḡamaḡi-ḡutumarini. Ḣia ḡena ura tu tauḡanina ema iaukana beḡene veaḡa Vereḡauka ḡena. Senaḡi veḡaraḡo vavinena tu tanobara dagarari betuḡamaḡi-ḡutumarini, aiḡesi ḡaraḡona iauna bevaḡa-iakuani etoni.

<sup>35</sup> Mai tu ǫomi bana vaǫa-kavami ǫana maiǫeri akiraǫirini, dia ǫomi akirakira-ǫaumini. Senaǫi mai tu au ǫegu ura ǫomi boǫono tanu-ginikau moǫo, e kara ta na asi bene koukou-ǫaumi Vereǫauka vetuǫunaǫina boǫo iaǫo-vinini nai.

<sup>36</sup> Bema tau ta etuǫamaǫini, kirakauna ǫuiatona, asi kota maki ekima-karato ǫuiatona, ǫenai ǫena veiǫa tu asi roroǫoto, ema ǫena ura kirakauna ǫenai ebarego-lelevaǫini, ma eǫitaiani asi ilaila bevevaǫa-gwaǫiǫini nai tu, tauri ruarua beǫene veǫaraǫo ǫena ura lorinai. Mo tu vei-rakava asi beveini. <sup>37</sup> Senaǫi bema tarima ta nuǫana evaǫa-gwaǫiǫiani, ma dagara ta na nuǫana asi maki evaǫa-ǫariǫariani, e tauǫena tauǫanina ǫena ura etuǫamaǫi-fitoǫaiani, e tauǫena nuǫanai ekirato kirakauna, asi kota maki ekimato ǫuiatona, tu asi beǫaraǫoani, tarimana maki namo. Ǫia na maki veiǫa namona beveiani. <sup>38</sup> Moǫesina naima tarima ta na kirakauna, asi kota maki ekima-karato ǫuiatona, beǫaraǫoani tu, veiǫa namona beveiani; senaǫi kirakauna asi beǫaraǫoani tarimana na tu, veiǫa namo lelevaǫina beveiani.

<sup>39</sup> Veǫaraǫo vavinena ǫaraǫona roǫo maǫuri etanuni nai, ǫia tu veǫaraǫo taravatuna na eǫabiani, be ǫaraǫona ǫesi moǫo beǫene tanu-vanaǫi vanaǫi. Ǫia tu ǫaraǫona bemaseni, monai vauro ǫia befakani. Be ǫia beuranai, tau ta ǫesi ma ǫeveǫaraǫo betoni nai, beǫene veǫaraǫo asi taravatuna. Senaǫi Vereǫauka evaǫa-moǫoniani tauna moǫo bene ǫaraǫoa. <sup>40</sup> Senaǫi au ǫegu tuǫamaǫi ai aǫitaiani, ǫia moǫesi gora moǫo betanuni asi ǫaraǫona nai tu beiaku-lelevaǫini. Ema au aribani, au na maki Barau Iaukana aǫabiato.

## 8

*Kwaivakuku ǫevarevare-vinirini bureǫari bitana ǫaniri ba asiǫina?*

<sup>1</sup> Mai tu kwaivakuku ǫevarevare-vinirini bureǫari guruǫari ma aveini. Ǫomi kotari ǫokirani, “Ǫita mabarara tu ma ǫera riba.” Oba, mai tu moǫoni. Senaǫi ǫita ǫera riba na tu vekokoroku evaǫa-ǫoraiani, a veuravini na tu tarimarima evaǫa-kokoreani. <sup>2</sup> Bema tarima ta etuǫamaǫini, ǫia na dagara ta eribaiato, mai tarima na kara bere ribaia dagarana korikorina tu roǫosi roǫo bere ribaia. <sup>3</sup> Senaǫi Barau eura-viniani tarimana tu, Barau ma ribana ǫia.

<sup>4</sup> Moǫa lorinai kwaivakuku ǫevarevare-vinirini bureǫari ǫeri ai, au ǫegu guruǫa tu maiǫa: Ǫita ribara, mai tanobara nuǫanai kwaivakuku tu asi dagara ta e asi aniri. Ema Barau tu sebona kwariǫutu moǫo, ma ta tu asiǫina maia. <sup>5</sup> Aba, mai ǫekira-baraurini dagarari ǫetanuni gubai o mai tanobarai, korana initoma maiǫeri barau e vere tu asisebo, <sup>6</sup> senaǫi ǫita ǫerai tu, Tamara Barau tu sebona kwariǫutu moǫo, dagara mabarari tu ǫia na evaǫa-ǫorarito, ema ǫita maki ǫia ǫena tatanuni. Ema Vereǫauka Iesu Keriso maki sebona kwariǫutu moǫo, ǫia ǫenana dagara mabarari ǫeǫorato, ema ǫita maki ǫia na maǫuri evinirani nai, tamaǫuri-tanuni.

<sup>7</sup> Senaǫi tarimarima mabarari maiǫa tu asi ǫeribaiani. Korana tarima kotari tu kwaivakuku ǫemarana-iaǫirito, be maitoma maki bureǫa ǫeǫanirini nai, ǫia tu roǫo ǫetuǫa-maǫini, mo bureǫa tu kwaivakuku ǫevarevare-vinirito bureǫari. Moǫa lorinai moǫesi bureǫari ǫeǫanirini nai, ǫenuǫa-vekwaraǫini, ǫetuǫamaǫini, veiǫa rakavana ǫeveiani.

<sup>8</sup> Ǫita dia ǫaniǫani na Barau sevina ǫana beǫabi-kavirani. Bema asi bita ǫaniani nai tu, Barau ǫoiranai rakava kwaikwai tarimara? Asiǫina! O bema bita ǫaniani nai tu, Barau ǫoiranai tarimarima namora? Asiǫina! <sup>9</sup> Senaǫi boǫono ǫita-ginikaua, mo veiǫa ǫomi na maki boǫo veiani riba, maninana ǫeri veǫabidadama moiramaira tarimari boǫo vaǫa-vedaǫa-raǫerini. <sup>10</sup> Korana bema nuǫa moira tarimana na ǫoi ma ǫemu riba mai gabu ai beǫitamuni, kwaivakuku rubunai oǫaniǫanini nai, ǫia tu bolaunaǫiani noǫa, be beiaǫoni, kwaivakuku ǫevarevare-vinirito bureǫari bea ǫanirini. <sup>11</sup> Benamo mo veǫabidadama moiramaira tarimana, mo tu ǫoi tarikakamu veǫabidadama nuǫanai, ema Keriso tu ǫia maki uranai emaseto, senaǫi ǫoi ǫemu riba dainai mo tarima tu berekwa-rekwani. <sup>12</sup> Moǫesina naima, mai maǫuri ai tarikakamu bovei-rakava viniani,

benamo ġia nuġa moira moġa bovaġa-rakavaiani nai, ġoi tu Keriso bovei-rakava viniani. <sup>13</sup> Moġa lorinai, bema au na kwaivakuku ġevarevare-vinirini bureġana ta baġaniani nuġanai, au tarikakagu ta rakava beveini tu, au bureġa asi ma baġani-ġenoġoini. Moġesi aveini anina tu, tarikakagu ta bavaġa-vedaġa-raġeani, benamo rakava beveini ġesi.

## 9

*Apostolo tarimari* ġeri ġauvei voina ema ġeri maoro

<sup>1</sup> Au tu fakai atanuni tarimagu, dagara ta na asi ebarubaruguni. Au tu apostolo, ema ġita ġera Vereġauka Iesu maki aġitaiato. Ġomi tu au ġegu ġauvei Vereġauka nuġanai ġwaġwari. <sup>2</sup> Bema tarima boruri ġoirari ai au tu dia apostolo tarimagu, moġa tu asi kara ta, korana ġomi ma ribami, au tu apostolo. Ema ġomi mani ġemi tu vetoġa ta, au ġegu apostolo ġauveina vaġa-moġonina ġana, korana Vereġauka ġoġabi-raġeato nai.

<sup>3</sup> Au ġeriba-korikorigu ġetoni, ġedanaġiguni nai, au na tu maiġesi avaġa-veserini: <sup>4</sup> Ba ġai apostolo tu asi ġema maoro, ġama ġaniġani e niuniu dagarari baġa doġarini, ei? <sup>5</sup> Ba ġai apostolo tu asi ġema maoro, ekalesia vavineri baġa ġaraġorini, benamo baġa ġori-rakao rakaorini ġema iaġoiaġo ai, apostolo kotari, e Vereġauka tarina merori, e Kefas, (mai tu Petero), ġeveini kavana, ei? <sup>6</sup> Ba mai tu au ema Banabas moġo tauma ruarua tauġema ġema ġauvei ġenana ġema-ġama baġana ġoitaġo? <sup>7</sup> Kamara vetari tarimana tu tauġena ġena kokore ai eveġubuto-ġoi vetari ġauveina eveiato-ġoi nuġanai tu, ei? Ma deikara na vine tavoġana tu eveiato moġo, ma vine ġeġwato nai tu, ġwaġwari asi eġanirito, ei? Ma dei tu mamoe serina enarito moġo, a ġia ġerina lata tu asi eġabito, niuto, ei?

<sup>8</sup> Ġomi ġotuġamaġini, mai tu tarimarima moġo ġeri tuġamaġi guruġari akiraġirini, a Barau ġena taravatu maiġesi tu asi ekirani ġotoni, ei? <sup>9</sup> Mose ġena taravatu nuġanai tu iniġesi ekirani, “Boromakau muruna dagara ta na asi bono kou-ġaua, widi momori nekokiri uranai efanafana-taririni neganai.” Ġomi ġotuġamaġini, Barau na boromakau tu etuġamaġi-baregorini naima moġesi eguruġato? Asiġina! <sup>10</sup> Barau na mai tu ġita etuġamaġirato nai maiġesi eguruġato. Moġoni, Barau na mai guruġa tu ġita urarai ekiraġiato. Korana Barau eurato tu, tano efokaiiani tarimana e widi tauri ekwari-vaġirini tarimana, tauri ruarua ġeġauvei-iaġiani dagarana ġenana eiaġomani ġaniġanina ġia maki beġene ġani. <sup>11</sup> Ġomi fakami ai iauka dagarari namori ġavaroto. Ma ġomi ġemina, ġai tauġanima vaġa-kavari ġana, farefare tu asi veġata baġana ġabi, ei? <sup>12</sup> Bema ġomi na apostolo kotari ġovaġa-kavarini tauġanina vaġa-kavari farefareri e moniri ai, au atuġamaġini, ġai ma ġema maoro ġomi ġemi na farefare e moni barego lelevaġi baġara doġari.

Senaġi ġai mo maoro moġa tu asi ġaġauvei-iaġiato. A ġai tu ġavito-maseto e ġananu-maseto moġo, korana asi ġaurato, Keriso varina namona bene raga-rovorovo dabarana baġana koukou-ġaua. <sup>13</sup> Ġomi asi ribami, Rubu Veaġai veaġa dagarari ġeġauvei-iaġirini tarimari tu Rubu Veaġa na ġari ġaniġani ġeġabirini? Ema fata veaġanai ġeġauveini tarimari tu, fata veaġanai varevare dagarari ġeġauvei-iaġirini kwari ġari ġeġabirini. <sup>14</sup> Moġa ilailanai, Vereġauka na taravatu etoreato, ekirato, deikara Vari Namona beġe ġobata-iaġiani tarimari tu, Vari Namona ġevari-fiuani voina beġene ġabia veġata.

<sup>15</sup> Senaġi au Vereġauka na mai maoro eviniguto, maiġa tu asi aġauvei-iaġiani. Ema au na maiġeri guruġa atore-vinimini tu akirani, maiġeri veiġa au ġegu ai boġono veiri atoni? Asiġina! Initoma maki au tu maiġesi moġo bana tanu mo bana mase tu namo vedaurea, ġegu ġauvei voina ġomi ġemi ai asiġina ġinavaġi bana vetau. Maiġesi atanuni tu aiakuni e avekokorokuni, ma asi aurani au ġegu vekokoroku tu guruġa koriri moġo benesi. <sup>16</sup> A Vari Namona baġobata-iaġiani nai, au tu asi bavekokorokuni, korana Vereġauka ekirato, bana vari-fiuva veġata etato. Bema Vari Namona asi bavari-fiuani nai, au tu vetuġagu kekei, asi ġegu namo ta moġo. <sup>17</sup> Bema au nuġagu siga moġo baurani, mai ġauvei naveia veġata batoni nai tu, ma voigu. Senaġi bema dia au ġegu urai aveiani, moġa anina tu, Barau na eviniguto ġauveina, naima aġauvei-iaġiani. <sup>18</sup> Be, moġesina

nai, au voigu tu kara baḡabiani? Maiḡa moḡo: Mo tu Vari Namona avari-fiuani nai tu, bavarifiu-kavaiani asi voina. Au tu ma ḡegu maoro ḡegu-ḡagu bana ḡabia, senaḡi ḡegu maoro tu asi aḡauvei-iaḡiani.

*Paulo tu tarimarima mabarari ḡeri vetuḡunaḡi tarimanai eiaḡoto*

<sup>19</sup> Aba, au fakai atanuni tarimagu, dia tarima ta ḡena tuḡu-rakaorakao tarimagu, senaḡi au tauḡegu moḡo tarima mabarari ḡeri vetuḡunaḡi tarimagu ai avevaḡa-iaḡoto. Korana mai maḡuri ai tu tarima ḡutuma baḡabi-iaḡomarini Keriso ḡenai. <sup>20</sup> Iuda tarimari ḡesi ḡatanuni tu, Iuda tarimagu ai aiaḡoni, korana Iuda tarimari bana ḡabi-iaḡori Keriso ḡenai uranai. Au tauḡegu tu dia Mose ḡena taravatu gaburenai atanuni, senaḡi taravatu gaburenai ḡetanuni tarimari ḡesi ḡatanuni tu, au maki taravatu gaburenai atanuni, korana taravatu gaburenai ḡetanuni tarimari bana ḡabi-iaḡori Keriso ḡenai uranai. <sup>21</sup> A asi ḡeri taravatu tarimari ḡesi ḡatanuni tu, ḡia kavana dia taravatu gaburenai atanuni. Moḡa anina tu, au Barau ḡena taravatu ḡenana aveḡitato? Asiḡina! Au monai tu Keriso ḡena taravatau gaburenai atanuni. Moḡesi aveini korana tu, asi ḡeri taravatu tarimari Keriso ḡenai bana ḡabi-iaḡori uranai. <sup>22</sup> Veḡabidadamai moiramoira tarimari ḡesi ḡatanuni tu, ḡia kavana atanuni. Veḡabidadamai moiramoira atanuni korana tu, veḡabidadamai moiramoira tarimari Keriso ḡenai bana ḡori-iaḡori uranai. Au tu tarimarima mabarari ḡeri maḡuri irauirauri atovotovorini, bena ḡia ḡesi ḡatanu-sebona sebonani. Korana aurani, dabara irauirauri mabarari bana ḡauvei-iaḡiri, be moḡeri na tarima kotari bana vaḡa-maḡuriri. <sup>23</sup> Au maiḡesi aveini tu, Vari Namona bene raga-rovorovo ḡana. Korana aurani, Vari Namona ḡena namo ḡomi ḡesi bana ḡabi-vegogoa ḡana.

*Raga-iruiru ai bono kokore*

<sup>24</sup> Ḡomi asi ribami, raga-iruiru ai tu raga-iruiru ai beḡe ruḡani tarimari mabarari beḡe raga-vaḡa-seboni, senaḡi tarima sebona na moḡo kokore voina beḡabiani? Ḡomi maki moḡesi boḡono raga-gwada, be kokore voina boḡono ḡabia. <sup>25</sup> Ḡere nuḡanai ḡerakatoḡani tarimari mabarari tu tauḡeri ḡerovina-ginikauni tereinini ai. Ḡia moḡesina ḡeveini tu, dia betanu-vanaḡi vanaḡini koronana beḡene ḡabia uranai. Senaḡi ḡita betanu-vanaḡi vanaḡini koronana bitana ḡabia uranai taraga-iruiruni. <sup>26</sup> Moḡesi naima, au tu eraga-taḡuitaḡuini tarimana kavana asi aragani. Senaḡi au tu voigu bana ḡabia uranai araga-gwadani. Ema au vefaisi ai evefaisi-ginikauni tarimana kavana aveini, ḡegu faisai iavara korinai moḡo asi etubuni. <sup>27</sup> Asiḡina, au tauḡanigu tu afaisiani, au ḡegu tuḡu-rakaorakao dagananai avaḡa-iaḡoani, ḡena ura rakavari asi aveini. Korana asi namo, tarima kotari aḡobata-vinirini, senaḡi au tauḡegu na voigu ḡoirai asi baḡabiani.

## 10

*Israela ḡerina bisini matakani*

<sup>1</sup> Tarikakagu mabarami, au aurani, ḡita tubura ḡeri ai kara eḡorato moḡa asi boḡono tuḡarekwaia. Ḡita tubura tu, Barau na magube etuḡuato dabara bene kira-varari ḡana, moḡa gaburenai ḡerakato, ema ḡia tu Davara Kakakakana nuḡana na ḡeraka-vanaḡito. <sup>2</sup> Ḡia mabarari tu magube ai ema daḡaru-bara nuḡanai Barau na ebatisorito, ma Mose ḡena tarimarimai ḡeiaḡoto. <sup>3</sup> Ḡia mabarari iauka ḡaniḡanina sebona ḡeḡaniato. <sup>4</sup> Ema mabarari iauka nanuna sebona ḡeniuato. Korana ḡia tu iauka forena, ḡia muriri na erakato forena, ḡenana nanu ḡeniuto. Mo fore moḡa tu Keriso. <sup>5</sup> Senaḡi Barau nuḡana tu asi eiakuto ḡutuma ḡeri ai, moḡesi nai tano fakanai tauḡaniri ḡemase-fitari fitarito.

<sup>6</sup> Maiḡeri dagara ḡeḡorato tu, ḡita matara vaḡa-kaniri ḡana. Be ḡita na moḡeri bisini ḡitari, benamo ḡita dagara rakavari asi bitana mata-ḡaniḡani iaḡiri, ḡia ḡemata-ḡaniḡanito kavana. <sup>7</sup> Ema kwaivakuku asi bisini toma-rakariḡo viniri, ḡia kotari ḡeveito kavana. Buka Veaḡai ekirani kavana, “Tarimarima ḡetanu-tarito, ma ḡeḡani-verekoto, moḡa murinai tu ḡevariḡisito, ḡeḡereto e ḡebarato, (mata-boraḡai ḡedau-toḡato).”

<sup>8</sup> Ema ġita maki asi bisini kima e mataboraġa-taġuitaġui, korana ġia kotari tano fakanai ġekimato e ġemata-boraġato nai tu, tarimarima mabarari 23,000 veġata ġemaseto. <sup>9</sup> Vereġauka ġita na asi bisini tovo-naġia, korana ġia kotari na ġetovo-naġiato tarimari tu, mota na ġekafurito, benamo ġemaseto. <sup>10</sup> Asi bisini guruġa-vevuriġoi, korana ġia kotari ġeguruġa-vevuriġoito nai tu, mase aneruna na evaġi-mase maserito.

<sup>11</sup> Maiġeri veiġa ġeġorato anina tu, ġita na bisini ġitari, benamo matara beġene kani uranai, ġita maitoma tatanuni tarimara ġerai. Korana ini horai mai tanobara tu magonai varau beraġasi. <sup>12</sup> Moġesi naima, bema ġomi ġotuġamaġini, ġemi veġabidadamai ġoruġa-gigitarini ġotoni nai tu, lorimi boġono vetore, boġo ketoni ġesi. <sup>13</sup> Mani veribaġani ġoġoitaġorini tu, dia veribaġani boruri. Asiġi. Mani tu tarima tata ġeri ai vanaġivanaġi eġorani dagarari. Barau tu vetuġamaġikau Barauna, be beġitamuni, asi bovaġa-darereani veribaġanina tu ġemu ai asi bevaġa-foforiani. A ġoi veribaġani boraka-ġoitaġoni nai, Barau na tu ġemu raga-maġuri dabarana ta maki betore-rosiani, korana mo veribaġani nuġanai bono ruġa-gwaġiġi ġana.

*Barau e iauka rakavari asi boġono korana-iaġi sebonari*

<sup>14</sup> Moġa lorinai, tarikakagu, kwaivakuku toma-rakariġo viniri ġerina boġono veġita-moġovaġi. <sup>15</sup> Au na tu iaunega tarimami avaġa-guruġamini, be tauġemi na au kara akiraġirini maiġeri boġono tuġamaġi-ginikauri. <sup>16</sup> Anibou taġaniani neganai, vevaġa-namo kapusina taġabiani, ma Barau tavaġa-namoani, benamo taniuani. Mo tu Keriso rarana mabarara na taniu-sebonaiani, Keriso rarana ġesi ġia ema ġita tasebonani, ene? Ema beredi tatavi-kiraiani nai maki, mabarara Keriso tauġanina taġani-vegogoani, Keriso tauġanina ġesi ġia ema ġita tasebonani, ene? <sup>17</sup> Ġita tu vovoka, senaġi mabarara beredi sebonai ema tauġani sebonai taiaġoni. Tauna korikori, ġita tu mo beredi sebona moġo taġani-vegogoani.

<sup>18</sup> Israela tarimari situġamaġi-iaġori. Ginitaġo dagarari fata veaġanai ġegaburito-ġoi, kwari ġeġanirito-ġoi tu, mo fata veaġana ġesi sebonai ġeiaġoto-ġoi. <sup>19</sup> Au na mai guruġa akiraġirini tauri tu kara? Au akirani, kwaivakuku ġevarevare-vinirini dagarari tu ma aniri atoni ba? O kwaivakuku tu dagara korikorina atoni ba? <sup>20</sup> Asiġi. Au tu iniġesi akirani: Barau asi ribari beseri ginitaġo dagarari ġevinini tu, iauka rakavari ġevarevare-vinirini, a dia Barau ġevarevare-viniani. Moġesi nai au tu asi aurani, ġomi iauka rakavari ġesi sebonai boġono iaġo. <sup>21</sup> Ġomi asiġina ġinavaġi Barau ġena kapusi e iauka rakavari ġeri kapusi boġo ġabi-vegogorini, benamo Barau ġena kapusi ai boġo niuni ema iauka rakavari ġeri kapusi ai maki boġo niuni. Asiġina. Ġomi asiġina ġinavaġi Barau ġena teibolo boġo ġaniġanini e vaġa-sebo iauka rakavari ġeri teibolo maki boġo ġaniġanini. <sup>22</sup> Ġita tu maiġesi sivei, be Barau sivaġa-uraia tatoni, ei? Be ġita ġera kokore tu Barau ġena kokore evanaġiato ba?

*Vanaġivanaġi Barau bisini vaġa-raġea*

<sup>23</sup> Dagara mabarari tu asi taravaturi, senaġi dia dagara mabarari ġerina namo bita doġarini. Dagara mabarari tu asi taravaturi, senaġi dia dagara mabarari ġerina vevaġa-kava bita doġarini. <sup>24</sup> Tarima ta tauġena ġereġana ġena namo moġo asi bene vetaua, senaġi tarima tari ġeri namo beġene ġabia uranai bene ġauvei e bene tanu.

<sup>25</sup> Bureġa ġevoivoi-iaġirini gabunai bureġa ġetorerini, moġeri tu boġono ġaniri, mo tu asi taravaturi. Asi boġono vedanaġi-rakaorakao, nuġami boġo tore-metorini garina. <sup>26</sup> Korana, Buka Veaġai ekirani kavana, “Tanobara tu Barau ġena, ema tanobara nuġanai ġetanuni dagarari mabarari maki Barau ġena.”

<sup>27</sup> Bema Iesu asi evaġa-moġoniani tarimana na ta beġori-iaġomuni ġena numai ġaniġani, benamo ġoi bourani noiaġo botoni nai, kara ġoiramu ai etore-taririni tu bono ġaniri moġo. Asi bono vedanaġi, nuġamu botore-metoani garina. <sup>28</sup> Senaġi bema tarima ta na bekiramuni, bekirani, “Mai tu kwaivakuku ġevarevare-viniato bureġana,” betoni, moġa vauro asi bono ġania. Korana mo bekira-varamu tarimana uranai e nuġana

bevekwarag̃ini garina. <sup>29</sup> Au na nuḡa mainai akiraḡirini tu, dia ḡoi nuḡamu akiraḡiani, senaḡi mo bekira-varamuni tarimana nuḡana akiraḡiani.

Betaḡu ta ekirani: Kara dainai au, maḡuri fakanai e namonai atanuni tarimagu, tarima ta na nuḡanai au bekota-viniguni. <sup>30</sup> Bema au na Barau atanikiu-viniani vau aḡaniḡanini, kara dainai Barau batanikiuani ḡaniḡanina aḡaniani nai tu, guruḡa rakavari ḡegu ai ekiraḡini?

<sup>31</sup> Moḡesi naima, ḡoḡaniḡanini o ḡoniuniuni o kara ḡoveiani nai, dagara mabarari ai Barau boḡono vaḡa-raḡea. <sup>32</sup> Tarima ta asi boḡono vaḡa-vedaḡa-raḡea. Iuda tarimana o irau bese tarimana o Barau ḡena ekalesia asi boḡono vaḡa-daḡa-raḡeri, beḡe ketoni garina. <sup>33</sup> Au maki avededegwani, tarimarima mabarari nuḡari navaḡa-namori ḡana. A dia au tauḡegu ḡegu namo avetauani, senaḡi tarima vovoka ḡeri namo avetaurini, Barau na bene vaḡa-maḡuriri ḡana.

## 11

<sup>1</sup> Au ḡegu maḡuri boḡono tovtovoa, korana au Keriso ḡena maḡuri atovotovoani bene.

### *Deba kumuḡauna veiḡana*

<sup>2</sup> Au na ḡomi tu avaḡa-raḡemini, korana dagara mabarari ai au ḡotuḡamaḡiguni, ema vevaḡa-riba guruḡari aḡabirito, ḡemi avaḡa-riba-iaḡirito, moḡeri ḡokorana-iaḡirini. <sup>3</sup> Senaḡi au aurani toma ḡomi boḡono riba, tau mabarari ḡeri deba tu Keriso, ema vavine ḡeri deba tu tau; ema Keriso ḡena deba tu Barau. <sup>4</sup> A tau mabarari debari beḡe kumuḡaurini vauro, beḡe ḡauḡauni o beḡe perovetani nai tu, ḡeri deba tauna Keriso asi beḡe gubakauani. <sup>5</sup> Ema vavine mabarari debari asi kumuḡau beḡe ḡauḡauni o beḡe perovetani nai tu, ḡeri deba, (mo tu ḡia ḡaraḡori), asi beḡe mataurairini. Korana moḡa tu noḡa debari ḡerarorini kavana. <sup>6</sup> Bema vavine ta debana asi ekumuḡauani nai tu, debana ḡwina beḡene fakosi-vaḡiri, (mata-boraḡa vavineri kavana). Ma bema vavine ta ḡwina fakosi-vaḡina o raro-vaḡina bemaiaikaiani nai tu, debana bene kumuḡaua.

<sup>7</sup> A tau tu debana asi bene kumuḡaua, korana ḡia tu Barau ḡitaḡitana kavana, ema ḡia na tu Barau marevana baregona evaḡa-foforiani. A vavine tu tau marevana. <sup>8</sup> Korana dia tau o Adamu tu vavine ḡenana eiaḡomato, senaḡi vavine o Eva tu tau ḡenana eiaḡomato. <sup>9</sup> Ema Barau na tau eveiato tu dia vavine ḡena, senaḡi vavine ḡia tu tau ḡena eveiato. <sup>10</sup> Moḡesi naima vavine na debari beḡene kumuḡauri, korana mo vetoḡa na ḡia bevaḡa-foforiani, ḡia tu ma ḡeri maoro Barau ḡena ḡauvei beḡe veiani, ema aneru na beḡene ḡita-vetoḡari ḡana. <sup>11</sup> Senaḡi Vereḡauka ḡena maḡuri dabaranai tau tu dia ḡereḡari moḡo ḡetanuni, ma vavine maki dia ḡereḡari moḡo ḡetanuni. Asiḡina. Vavine tu tau ḡesi beḡe sebonani, ma tau tu vavine ḡesi beḡe sebonani. <sup>12</sup> Korana tu vavine tau ḡenana eiaḡomato kavana, tau maki vavine ḡerina ḡeḡorani. Senaḡi dagara mabarari tu Barau ḡenana ḡeiaḡomani.

<sup>13</sup> ḡomi tauḡemi na ḡotuḡamaḡi-ginikaua. Vavine ta debana asi kumuḡauna neganai, Barau ḡenai beḡuriḡurini tu namo ba? <sup>14</sup> Mai tanobara mabarana nuḡanai tau e vavine vetoḡara marevari na evaḡa-foforiani, tau ta ḡwina bevaḡa-gara maukaiani tu maiaka veiḡana beveiani tauḡena ḡenai. <sup>15</sup> Senaḡi bema vavine ḡwina bevaḡa-gara maukaiani nai, mo tu ḡia marevana bevaḡa-baregoani. Korana Barau na vavine ḡwina eviniato tu debana bene kumuḡaua ḡana. <sup>16</sup> Bema tarima ta beurani, mai guruḡa neḡarea betoni nai, au tu asi ḡegu guruḡa ta maia. Senaḡi ḡegu guruḡa sebona tu maiḡa: Ḡai ḡemai ema Barau ḡena ekalesia mabarabarari nuḡari ai veiḡa boruna ta tu asiḡina maia.

### *Vereḡauka ḡena anibou*

<sup>17</sup> Mai tu veiḡa tari ḡomi na boḡono korana-iaḡiri veiḡari ma nakira-varami. Senaḡi au na ḡomi tu asi avaḡa-raḡemini, ḡomi ḡemi raka-vegogo nuḡari ai tu vevaḡa-rakava tu barego ḡoveiani, a namo ta tu asi ḡovaḡa-ḡoraiani. <sup>18</sup> Tovotovonai tu iniḡesi nakirami. Au aseḡaḡini, ḡomi ḡemi ekalesia raka-vegogori nuḡari ai tu dia nuḡa sebonai ḡoḡabini,

a ġomi tu ġovevare-kirakirani, benamo tauġemi ġoveġare-veġareni. Au na mai guruġa maiġa tu kota avaġa-moġoniani. <sup>19</sup> Aba, ġomi vefakami ai vevare-kirakira tu bene vetore veġata, be Barau na deidei evaġa-moġonimito tarimami tu boġono fofori.

<sup>20</sup> Ġomi ġoraka-vegogoni nai tu, dia Vereġauka ġena lavi ġaniġanina dokona o anibou ġoġani-vegogoani. Asiġina. <sup>21</sup> Ġomi ġoġaniġanini nai, dei eguineni, dei egabini ġotoni, ġoveraga-veragaiani, a karomi asi ġovaġa-nogarini. Ta tu vito etanuni, ma ta tu eniubabobaboni. <sup>22</sup> Ġomi tu asi ġemi numa, be ġemi numai asi boġo ġanini e boġo niuni ġotoni, ei? Ma Barau ġena rubu tu dagara misina ġotoni, ġoġita-ġuiraġiani, ema asi ġeri-ġari tarimari ġovaġa-maiakarini, ei? Au ġomi ġemi ai tu kara nakiraġia, navaġa-raġemi ba? Asiġina ġinavaġi, au na ġomi tu asi bavaġa-raġemini.

<sup>23</sup> Ġomi mai avinimini guruġana maiġa tu Vereġauka ġenana aġabiato guruġana: Iesu Vereġauka ġerevaiato boġinai beredi eġabi-vaisiato, <sup>24</sup> benamo Barau evaġa-namoato murinai, etavi-kiraiato, benamo ekirato, “Ġoġabia, ġoġania, mai tu au tauġanigu, ġomi urami ai ginitaġo dagarana eiaġoto. Mai veiġa boġono veia-ġoi, au tuġamaġi-iaġigu ġana.” <sup>25</sup> Mo lavi ġaniġanina o anibou murinai, Iesu na beredi eveiato ilailanai kapusi ma eġabi-vaisiato, benamo ekirato, “Mai kapusi tu Barau ġena Ginitaġo Variġuna, au raragu na bevaġa-moġoniani. Mai kapusi ai boġo niuani nai, au tuġamaġi-iaġigu ġana boġono niu.”

<sup>26</sup> Korana mai beredi boġo ġaniani e mai kapusi ai vine nanuna boġo niuani nai tu, vanaġivanaġi Vereġauka ġena mase boġo vari-fiuani mo, ġia ma beġenoġoini. <sup>27</sup> Moġesina naima deikara na Vereġauka asi begubakauani vau, mai beredi beġaniani e Vereġauka ġena kapusi ai beniuni nai, mo tarima na Vereġauka tauġanina ema Vereġauka rarana ġenai vei-rakava beveini. <sup>28</sup> Tarima ta ġia nuġana bene ragaġi-guinea vauro, mo beredi bene ġania, ema mo kapusi vine nanuna bene niua. <sup>29</sup> Korana deikara na Vereġauka asi begubakauani vau beġanini ema beniuni nai, mo beredi beġaniani e mo kapusi ai vine nanuna beniuni nuġanai tu, ġia tauġena moġo bevekota-vinini e rakava metona ġenai betore-kauani. Korana ġia na Iesu tauġanina tu asi etuġamaġi-doġariani. <sup>30</sup> Moġesi naima ġomi fakami ai ġutuma tu tauġanimi ġemoirani e ġokeveni, kotari maki varau ġemaseto. <sup>31</sup> A bema ġita tauġera nuġara bita vetau-guinerini nai tu, Barau na ġita asi bekota-vinirani. <sup>32</sup> Senaġi Vereġauka na ġita ġera kerere bekiraġirini nai tu, ġia na bevaġa-matakanirani. Vereġauka ġita moġesina beveirani tarimara tu, tanobara maġurinai ġetanuni tarimari ġesi asi bene vaġa-rakava sebonara ġana.

<sup>33</sup> Moġesi naima, tarikakagu, anibou uranai boġo raka-vegogoni nai, asi boġono veiġari-veiġari, karomi tari maki boġono vaġa-nogari. <sup>34</sup> Bema ta bevitoani nai tu, ġena numai bene ġaniġani. Asi namo ġemi raka-vegogo na tu ġomi kota-vinimi dabarana maki bevaġa-ġoraiani. Guruġa kotari tu roġo bana iaġosi vauro, ma bana kira-varami.

## 12

### *Iauka Veaġa ġena varevare*

<sup>1</sup> Tarikakagu mabarami, toma tu aurani, Iauka Veaġa na ġomi tata evinimini varevareri nakira-varami. Korana au aurani maiġeri varevare ġomi na boġono ribari. <sup>2</sup> Ġomi ma ribami, Barau roġosi roġo boġoro ribaia neganai, dagara kotari na asi ġeguruġani babauri ġeri ai ġeġori-iaġomito-ġoi e ġeġori-taġuitaġuimito-ġoi. <sup>3</sup> Moġesi naima avaġa-ribamini, Barau Iaukana na eġori-kauani tarimana tu asi bekirani, “Iesu iatanai rakava barana bene tanu.” Ema tarima ta maki maiġesi asi bekira-kavani, “Iesu tu Vereġauka,” senaġi Iauka Veaġa na beboroġiani tarimana tu moġa.

<sup>4</sup> Iauka ġena varevare tu irauirauri, senaġi Iauka sebona moġo ġenana ġeiaġomani. <sup>5</sup> Vetuġunaġi-iaġovini dabarari tu irauirau, senaġi Vereġauka tu sebona moġo ġenana ġeiaġomani. <sup>6</sup> Ġauvei veiveiri seġukari maki irauirau, senaġi Barau tu sebona na moġo ġena tarimarima mabarari nuġari ai evaġa-ġorarini. <sup>7</sup> Iauka Veaġa tu tarima tata ġeri ai efoforini, korana ekalesia mabarana vevaġa-kava beġene doġari uranai. <sup>8</sup> Tarima ta

tu Iauka Veāga na guruāga iaunegari eviniani, ma tarima ta tu mo Iauka Veāga sebona na Barau āgena guruāga tauna korikori evaāga-ribaiani. <sup>9</sup> Ma mo Iauka Veāga sebona na tarima ta tu veāgabadadama eviniani, ma mo Iauka sebona na tarima ta tu keve tarimari vaāga-namori varevarena o seāgukana eviniani. <sup>10</sup> Ma tarima ta tu nuāga-farevaāgi veiāgari boruri bene veiri varevarena o seāgukana eviniani, ma tarima ta tu bene peroveta āgana seāguka eviniani, ma tarima ta tu Barau Iaukana o Iauka rakavari boruri bene ribari varevarena o ribana eviniani, ma tarima ta tu garo irauirauri ai bene guruāga varevarena o ribana eviniani, ema tarima ta tu garo irauirauri ai beāge guruāgani nai, guruāga aniri bene vaāga-vanaāgiri varevarena o ribana eviniani. <sup>11</sup> Maiāgeri mabarari tu Iauka Veāga sebona kwariāgutu moāgo āgena āgauvei. Ema mai Iauka Veāga na āgena ura ilailanai varevare tarima tata evinirini.

*Tauāgani tu sebona, ma legana āgutuma gorogoro*

<sup>12</sup> Tarima tauāganina tu sebona moāgo, senaāgi legana tu āgutuma gorogoro; ma mo tauāgani legana tu asisebo, senaāgi āgia mabarari na tu tauāgani sebona kwariāgutu ai moāgo āgiaāgoto. Keriso maki moāgesina. <sup>13</sup> āgita kotari tu Iuda tarimara e tari tu irau bese tarimara, kotari tu tuāgu-rakaorakao tarimara e tari tu fakai tatanuni tarimara, senaāgi āgita mabarara tu Iauka Veāga sebona na ebatisorato, benamo tauāgani sebonai taiaāgoto. Ema Barau na āgita mabarara āgerai Iauka Veāga sebona evinirato, āgia na bene vaāga-vonura āgana.

<sup>14</sup> Tauāgani maki dia legana sebona na moāgo eveiato, senaāgi lega āgutuma gorogoro na. <sup>15</sup> Bema kwaku bere kira, “Au tu dia āgima, be au tu dia tauāgani legana ta.” Asiāgina, āgia tu roāgo tauāgani legana ta veāgata. <sup>16</sup> Ma seāga ma bere kira, “Au tu dia mata, be au tu dia tauāgani legana ta.” Asiāgina, āgia tu tauāgani legana ta veāgata. <sup>17</sup> Bema tauāgani mabarana tu bere mata moāgo nai tu, kamasi vau bere seāgaāgi. Ma bema tauāgani mabarana bere seāga moāgo nai, dagara bonari tu kamasi vau bere noāgori. <sup>18</sup> Senaāgi Barau na lega tata tauāgani ai etorerito. Barau na āgena ura gaburi tatai etorerito. <sup>19</sup> Bema tavi sebona moāgo tauāgani ai bere iaāgo nai tu, tauāgani mabarana tu kamasi? <sup>20</sup> Senaāgi tauāgani moāgesina tu asiāgina. Tauāgani legana tu āgutuma, senaāgi tauāgani tu sebona moāgo.

<sup>21</sup> Moāgesi naima mata na āgima maiāgesi asi bekiraiani, “Au na āgoi asi aura-vinimuni,” o deba na kwaku asi bekiraiani, “Au na āgoi asi aura-vinimuni.” <sup>22</sup> Ma tavi ta reke ai bita āgitaiani tu, mo tauāgani legari tari taāgitarini asi kokoreri tatoni, senaāgi bema moāgeri lega asiāgina nai tu, tauāgani asi bere āgauvei-ginikau. <sup>23</sup> Ema tauāgani legari tari tatuāgamaāgi-keirini, takirani, moāgeri lega gubakauri tu kei tatoni, senaāgi moāgeri āgeri ai āgita āgera vegubakau tu barego tatoreani. Ma tauāgani legari kotari āgitaāgitari tu asi marevari, senaāgi moāgeri āgita na tu nuāgara mabarari āgesi tanari-ginikaurini. <sup>24</sup> Ma tauāgani legari kotari ma marevari dagarari tu asi tatuāgamaāgi-baregorini. Senaāgi Barau na tu tauāgani legari irauirauri mabarari etore-sebonarito, benamo āgia na asi āgegubakaurini legari tu vegubakau barego iatari ai etore-kauato. <sup>25</sup> Barau na moāgesi eveiato korana tauāgani legari kotari moāgo asi bisini vaāga-namori āgana. Senaāgi tauāgani legari mabarari bisini āgitaāgau-ilailari āgana. <sup>26</sup> Bema lega sebona ta bemidigu-midiguni nai, lega mabarari āgia āgesi beāge midigumidigu sebonani. Ema lega ta beāge matauraiani nai tu, lega mabarari mo lega āgesi beāge iaku-vegogoni.

<sup>27</sup> āgomi tata maniāgemi tu Keriso tauāganina legari tata āgia tauāganina nuāganai. Ma āgomi mabarami tu Keriso tauāganina sebonai āgoiaāgoto. <sup>28</sup> Benamo ekalesia nuāganai Barau na mabarari āgeri āgauvei tata evinirito. Eto-re-guinerito tarimari tu apostolo tarimari, āgia muriri ai vaāga-ruaruana tu peroveta tarimari etorerito, ma āgia muriri ai vaāga-toitoina tu vevaāga-riba tarimari etorerito. Ma muriri ai tu nuāga-farevaāgi veiāgari beāgene vei tarimari, ma muriri ai tu keve tarimari beāgene vaāga-namori varevarena o seāgukana āgeāgiabiato tarimari, e beāgene vevaāga-kava tarimari, e āgauvei tari beāgene āgori-kauri tarimari, ema garo irauirau ai beāgene guruāga tarimari. <sup>29</sup> Tarimarima mabarari tu apostolo tarimari moāgo ba? Tarimarima mabarari tu peroveta tarimari moāgo ba?



Tarimarima mabarari tu vevaḡa-riba tarimari moḡo ba? Tarimarima mabarari tu nuḡa-farevaḡi veiḡari ḡeveirini tarimari moḡo ba? <sup>30</sup> Tarimarima mabarari keve tarimari ḡevaḡa-namorini varevarena o seḡukana ḡeḡabiato tarimari ba? Tarimarima mabarari garo irauirau ai ḡeguruḡani ba? Tarimarima mabarari garo irauirau ai ḡeguruḡani guruḡari tauri ḡekiraḡi-foforirini tarimari ba? <sup>31</sup> Varevare baregona korikori boḡono ura-dikadika-iaḡia.

#### *Veuravini*

Maitoma dabara namo vedaureana au na ḡomi ḡemi avaḡa-foforiani.

### 13

<sup>1</sup> Bema au tarimarima ḡeri garo irauirauri ai bara guruḡa ema aneru garori ai maki bara guruḡa, senaḡi au asi ḡegu veuravini, au ḡegu guruḡa tu auri ḡekwariani o funu ruarua ḡevaḡa-vesekerini gururi ḡeraḡeni kavana. <sup>2</sup> Bema peroveta varevarena o seḡukana ḡegu ai bere tanu, ema riba mabarari e vekuretoḡa dagarari mabarari bara ribari. Ema ḡegu veḡabidadama barego bere tanu, be ḡoro baregori maki bara vaḡa-veraḡa-raḡeri, ma gabu boruri ai ma beḡerea ruḡa. Senaḡi au asi ḡegu veuravini nai, au tu asi ḡegu namo ta. <sup>3</sup> Ema ḡegu farefare mabarari asi ḡeri-ḡari tarimari bara viniri, e tauḡanigu tarimarima ḡimari ai bara tore-kaua, benamo beḡere gabua, senaḡi au asi ḡegu veuravini nai, au na dagara namona ta asi bara doḡaria.

<sup>4</sup> Ma ḡena veuravini tarimana tu evevaḡa-gwaḡiḡini. Veuravini tu vevetuḡaḡwa e vevaḡa-kava na evonuto. Veuravini nuḡanai mama asi etanuni. Veuravini nuḡanai veiavi e vekiraḡi-varaḡevaraḡe asi etanuni. <sup>5</sup> Veuravini na tarimarima vaḡa-rakavari veiḡari asi eveirini, tauḡena ḡena namo moḡo asi evetauani, asi ebaru-ḡariḡarini, ta ḡena rakava asi etuḡamaḡi-taḡorini. <sup>6</sup> Vei-rakava asi eiaku-iaḡirini, senaḡi Barau ḡena guruḡa ema maḡuri moḡoniri moḡo eiaku-iaḡirini. <sup>7</sup> Veuravini tu ma manauna ḡesi dagara mabarari nuḡari ai eruḡa-tarini, dagara mabarari nuḡari ai Barau tu bevaḡa-moḡoniani, ema ḡena vetuḡamaḡikau maki Barau ḡenai roḡo betoreani, meto mabarari ai bekokoreni.

<sup>8</sup> Veuravini tu asi veḡata ekorini, beruḡa-taḡo vanaḡi-vanaḡini. Peroveta guruḡari mabarari neḡi beḡea korini, garo irauirau mabarari maki beḡea magoni, riba mabarari beḡea korini. <sup>9</sup> Korana ḡita ḡera riba tu koturi moḡo e ḡera peroveta maki koturi koturi moḡo. <sup>10</sup> Senaḡi mo dagara namo vedaureana beiaḡomani nai, mo kotuna moḡo namo taribarito dagarari tu beḡe rekwa-rekwani. <sup>11</sup> Au roḡo mero misigu ai tu, mero misiri ḡeri guruḡa na aiaḡoto-ḡoi, mero misiri ḡeri tuḡamaḡi na aiaḡoto-ḡoi, ema mero misiri ḡeri tuḡamaḡi na atuḡamaḡito-ḡoi. Senaḡi au ama tau-doḡadoḡato nai tu, mero misimisiri ḡeri tuḡamaḡi mabarari atore-veḡitarito. <sup>12</sup> Toma Barau ḡena dagara tu veḡia ai noḡa taḡita-vaguna vagunarini. A Barau ḡoirana ema ḡita ḡoirara bita veḡita-veḡita karakarani, monai vauro Barau ḡena dagara vetoḡari korikoriri bita ḡita-ginikaurini. Toma au na tu koturi moḡo aribarini. Senaḡi mo ḡaro ai vau bariba-ginikaurini, au Barau na eriba-ginikauguto kavana. <sup>13</sup> Mai dagara toitoi tu beḡe tanu-vanaḡi vanaḡini: Veḡabidadama, vetuḡamaḡikau, ema veuravini. Senaḡi mai dagara toitoi vekaravari ai tu veuravini moḡo barego lelevaḡi.

### 14

#### *Iauka Veavaḡa ḡena varevare dagarari tari ḡauvei-iaḡiri*

<sup>1</sup> Veuravini maḡurina boḡono vetau-guinea! Ema Iauka Veavaḡa ḡena varevare boḡono uravini barego-iaḡiri; a Iauka Veavaḡa ḡena peroveta varevarena o seḡukana tu boḡono uravini barego-lelevaḡia. <sup>2</sup> Korana garo boruri ai eguruḡani tarimana tu dia tarimarima evaḡa-guruḡaiani, senaḡi ḡia tu Barau moḡo evaḡa-guruḡaiani. Moḡoni, tarimarima na ḡia kara bekiraḡiani tu asi beḡe tuḡamaḡi-doḡariani, korana ḡia tu Barau Iaukana na vekuretoḡa dagarari ekiraḡirini. <sup>3</sup> A eperovetani tarimana tu tarimarima evaḡa-guruḡarini. Ma ḡia ḡena peroveta guruḡari na tu tarimarima evaḡa-kokorerini,

elaunaḡirini, ema tarimarima nuḡari evaḡa-gwaḡiḡirini. <sup>4</sup> Garo boruri ai eguruḡani tarimana tu tauḡena ḡena veḡabidadama moḡo evaḡa-tubuani, a eperovetani tarimana na tu ekalesia mabarari ḡeri veḡabidadama evaḡa-kokorerini.

<sup>5</sup> Au ḡegu ura tu ḡomi mabarami garo boruri ai boḡono guruḡa. Senaḡi au aura-baregoni ḡomi tu Barau ḡenana ḡeiaḡomani guruḡari boḡono peroveta-iaḡiri. Korana Barau ḡenana ḡeiaḡomani guruḡari eperoveta-iaḡirini tarimana na garo irauri ai eguruḡani tarimana evanaḡiani; senaḡi garo irauri ai beguruḡani tarimana beguruḡani guruḡari ma beḡe vaḡa-vanaḡirini e beḡe kiraḡi-fakarini tu lorinai. Korana beḡe vaḡa-vanaḡirini e beḡe kiraḡi-foforirini nai tu, ekalesia ḡeri veḡabidadamai kokore beḡe ḡabini.

<sup>6</sup> Tarikakagu mabarami, bema au baiaḡosini ḡomi ḡemi ai ḡaronai tu, garo boruri ai basi vaḡa-guruḡamini, senaḡi guruḡa tauri tu asi bakiraḡi-foforirini; monana au ḡeguna namo ta boḡo ḡabiani ba? Asiḡina! Moḡoni, Barau na au evaḡa-ribaguni guruḡari ḡomi ḡemi ai bakiraḡi-foforirini o riba bavinimini, o baperovetani, o Barau ḡena guruḡa ḡemi ai havevaḡa-riba iaḡiani, monai vauro au ḡeguna namo boḡo ḡoitaḡoni. <sup>7</sup> Miusiki vaḡa-ḡereri dagarari boḡono tuḡamaḡiri, ilailana ivirikou o hap (gita kavana). Bema gururi asi beḡe raḡe-ginikauni nai tu, kamasi tarima na kamara mari ḡeḡere-iaḡiani bita seḡaḡi-leaiani? Ḡia tu mo ivirikou o hap gururi beḡe raḡe-ginikauni vauro, kamara mari ḡeḡere-iaḡiani bita ribaiani. <sup>8</sup> Ema bema vetari kibina asi beḡe fururu-ginikauni nai tu, ta na tuari uranai asi berovina-toreni. <sup>9</sup> Ḡomi maki moḡesina kavana, bema garo boruri ai boḡo guruḡani nai, tarimarima tu kamara dabarai ḡomi na kara ḡokiraḡiani beḡe tuḡamaḡi-doḡariani? Ḡomi ḡemi guruḡa mo tu tano korinai boḡo kiraḡirini noḡa iavara boḡo vaḡa-guruḡaiani. <sup>10</sup> Mai tanobarai garo irauirau tu asisebo, ma ḡia mabarari ma tauri moḡo. <sup>11</sup> Senaḡi bema garo ta anina asi ribagu, moḡa tauna tu, au tu dia mo garo borunai eguruḡani tarimana ḡena vanuḡa tarimagu, ema ḡia maki moḡesina, ḡia tu dia au ḡegu vanuḡa tarimana. <sup>12</sup> Ḡomi ḡemi ai maki moḡesina. Ḡomi tu Iauka Veaḡa ḡena varevare ḡouravini-barego iaḡirini; ma toma tu ekalesia ḡeri veḡabidadama vaḡa-kokorena varevarena ḡabiḡabina uranai boḡono kokore, be mo varevare ai tu boḡono tubu.

<sup>13</sup> Moḡesi naima, garo boruri ai eguruḡani tarimana tu, ḡauḡau ai Barau bene noḡia, be kara bekiraḡirini guruḡari maki bene vaḡa-vanaḡiri e bene kiraḡi-foforiri. <sup>14</sup> Korana bema au garo boruri ai aguruḡani tu, au iaukagu moḡo eḡuriḡurini, a au ḡegu tuḡamaḡi ai tu asi atuḡamaḡi-doḡarini au tu kara akiraḡirini. <sup>15</sup> Be kara toma aveiani? Au tu iaukagu ḡenana bana ḡauḡau, ema batuḡamaḡi-fakaiani garonai maki bana ḡuriḡuri. Au iaukagu ḡenana bana mari, ema batuḡamaḡi-fakaiani garonai maki bana mari. <sup>16</sup> Bema ḡoi iaukamu na Barau mari ai ovaḡa-raḡeani nai tu, kamara dabarai mo garo asi ribana tarimana “Amen” betoni, ḡoi Barau ovaḡa-namoani nuḡanai, ei? Ḡia tu “Amen” asi bekiraḡiani, korana ḡia asi beribani ḡoi kara okiraḡiani. <sup>17</sup> Moḡoni, ḡoi na Barau tu otanikiu-ginikauani, senaḡi mo sevimu tarimari ḡeri veḡabidadama tu asi ovaḡa-kokorerini. <sup>18</sup> Au na Barau atanikiuani, korana au garo boruri ai tu aguruḡa-iakuni, ḡomi mabarami avanaḡimini. <sup>19</sup> Senaḡi ekalesia ḡuriḡuri ḡeraka-vegogoni nai, namona tu beḡe tuḡamaḡi-fakaiani garonai guruḡa imaima moḡo bana kiraḡiri, tarimarima tari bana vaḡa-ribari. Moḡesina tu namo, a garo boruri ai guruḡa 10,000 bakiraḡirini tu asi ḡena namo ta.

<sup>20</sup> Tarikakagu mabarami, mero misimisiri ḡeri tuḡamaḡi kavana asi boḡono tuḡamaḡi. A vei-rakava ḡeri reke ai tu mero raraka-rarakari ilailari ai boḡono iaḡo. Senaḡi tuḡamaḡi-fakai tu tau-doḡadoḡa kavana boḡono vei. <sup>21</sup> Buka Veaḡa nuḡanai tu maiḡesi etoreato,  
 “Vereḡauka ekirani,  
 ‘Tarima garori boruri na  
 ema gabu boru tarimari mururi na  
 au na maiḡeri tarima bavaḡa-guruḡarini.

Senaġi moġesi maki asi veġata beġe seġaġi-viniguni.’ ”

<sup>22</sup> Moġesi naima garo boruri ai ġeguruġani tu, Iesu asi ġevaġa-moġoniani tarimari moġo ġeri ai tu vetoġa ta, a dia Iesu ġevaġa-moġoniani tarimari ġeri vetoġa. Senaġi Barau ġena guruġa ġeperoveta-iaġirini tu, Iesu ġevaġa-moġoniani tarimari moġo ġeri, a dia Iesu asi ġevaġa-moġoniani tarimari ġeri. (Mai tu, garo boruri ai ġeguruġani tu, Iesu asi ġevaġa-moġoniani tarimari na vevaġa-kava ta asi beġe ġoitaġoani. Senaġi Barau ġena guruġa ġeperoveta-iaġirini tu, Iesu asi ġevaġa-moġoniani tarimari na vevaġa-kava beġe ġoitaġoani).

<sup>23</sup> Bema ekalesia mabarami gabu sebonai ġoraka-vegogoni, benamo mabarabarami garo boruri boġo guruġani, ma nuġanai tu ġomi fakami ai asi ribana tarimana ta o Iesu asi evaġa-moġoniani tarimana ta bema raka-toġani nai, bekirani, “Ġomi tu debami beġe rakava, boġo babol!” betoni. <sup>24</sup> Senaġi bema mabarami boġo perovetani nuġanai, ġomi fakami ai Keriso asi evaġa-moġoniani tarimana ta o asi etuġamaġi-fakani tarimana ta bema raka-toġani nai tu, ġomi mabarami na Barau ġena guruġa ġoperoveta-iaġiani guruġari na mai tarima loruna begwanuani, benamo beribani, ġia tu vei-rakava tarimana, ema mabarami na boġo ġita-viriġiani. <sup>25</sup> Mo tarima ġena tuġamaġi vekuretoġari mabarari boġo kiraġi-foforirini, benamo bevetui-tarini, Barau betomarakariġo viniani, bekirani, “Moġoni, Barau tu ġomi ġesi etanuni.”

#### *Toma-rakariġo veiġari roroġotori*

<sup>26</sup> Moġesina naima, tarikakagu, ġuriġuri boġo raka-vegogoni nai, ġomi mabarami tata ma ġemi ġauvei. Tari tu mari beġe ġabini, tari tu beġe vevaġa-ribani, tari tu garo boruri ai beġe guruġani, tari tu Barau ġena guruġa beġe vaġa-foforirini tarimari, tari garo boruri ai beġe guruġani guruġari beġe vaġa-vanaġirini e beġe kiraġi-foforirini. Dagara mabarari tu ekalesia ġeri veġabidadama vaġa-tubuna ġana moġo boġono veiri.

<sup>27</sup> Bema tarima ta garo boruri ai eguruġani nai, tarima ruarua o toitoi ma beġene guruġa. Namona tu tarima toitoi na beġene guruġa-karoa, senaġi tauri toitoi vaġa-sebo asi beġene guruġa. Ta bene guruġa-ġosi murinai vauro ta ma bene guruġa, ma ta maia. Benamo garo boruri ai beġe guruġa-ġosini murinai tu, ekalesia ta na moġesi guruġa bene vaġa-vanaġiri, bene kiraġi-foforiri. <sup>28</sup> Senaġi bema vaġa-vanaġi tarimana ta asiġina nai tu, mo garo boruri ai eguruġani tarimana tu rubu nuġanai asi bene guruġa. Ġereġana tauġena vau bene guruġa-vevini, ema Barau bene vaġa-guruġaia. <sup>29</sup> Barau ġena guruġa ġeperoveta-iaġirini tarimari ruarua o toitoi beġene peroveta, ma kotari na tu moġeri guruġa beġene vetau-ġinikauri. <sup>30</sup> Bema Barau ġena guruġai etanu-tarini tarimana ġenai efoforini, bene kiraġi-foforia ġana nai, eguruġa-ġineni tarimana ġena guruġa tu bene vaġa-magoa. <sup>31</sup> Namona tu ġomi seboni seboni boġono peroveta, be kara ġokiraġiani mabarari beġene riba ema mabarari beġene launaġiri. <sup>32</sup> Barau ġenana peroveta guruġari edoġaririni tarimana tu, moġeri guruġa ġena urai vau bekiraġirini. <sup>33</sup> Barau tu dia vei-veġonu veġonu evaġa-ġoraiani Barauna, senaġi ġia na tu maino evaġa-ġoraiani Barauna.

Ekalesia doġorori mabarari ġeveini kavana, <sup>34</sup> ġomi ġemi vavine maki ekalesia vegogori ai asi beġene guruġa, korana ġia tu asi ġeri maoro ġia beġe guruġani. Senaġi ġia tu Mose ġena taravatu na ekiraġiani ilailanai beġene tanu tau gabureri ai. <sup>35</sup> Bema dagara tari ġeribari beġe toni nai tu, ġaraġori numai vauro beġene danaġiri. Korana vavine ekalesia vegogori ai beġe guruġani tu ma maiakana. <sup>36</sup> Ġomi na mai guruġa asi ġoġabi-raġeani? Barau ġena guruġa tu ġomi ġemina erefoto ba? Ba Barau ġena guruġa na tu ġomi moġo ema ġoitaġomito, ei?

<sup>37</sup> Bema tarima ta tauġena evetuġamaġini ġia tu peroveta ema ġia tu lauka Veaġa na evonuvonu-raġeto etoni tarimana tu, ġomi mai atore-vinimini guruġari bene ġabi-raġeri, bene kira, mai tu moġoni Vereġauka ġena taravatu guruġari. <sup>38</sup> Bema tarima ta maiġeri guruġa betuġamaġi-fitoġarini, Barau na ġia maki betuġamaġi-fitoġaiani.

<sup>39</sup> Moġesi naima, tarikakagu, peroveta uradikadikana tu boġono vei, ma garo boruri ai guruġa-iaġiri ai tu asi boġono vekiraġoi. <sup>40</sup> Senaġi dagara mabarari boġono ġauvei-iaġi ginikauri, ema dabara korikoriri ai boġono veiri.

## 15

*Iesu* ġena variġisi-ġenoġoi

<sup>1</sup> Tarikakagu mabarami, au aurani, mo Vari Namona, ġomi ġemi aġobata-iaġiato moġa, ġemi tuġamaġi ai ma navaġa-variġu ġenoġoia. Mai Vari Namona ġomi na tu ġoġabi-raġeato, ema ġomi tu mai Vari Namonai ġoruġa-gwaġiġini. <sup>2</sup> Bema au na mo aġobata-vinimito guruġana moġa roġo boġo ġabi-gwaġiġiani nai, ġomi tu mo Vari Namona ġenana Barau na bevaġa-maġurimini. A bema asiġina nai tu, ġomi na ġovaġa-moġoni-kavaiato.

<sup>3</sup> Vereġauka ġenana au na kara adoġariato guruġana tu, ġomi ma akira-varamito. Mo guruġa moġa tu guruġa giniginena e guruġa baregona. Mo guruġa tu Buka Veaġai ġetoreato guruġana ilailanai, ekirani: Keriso ġita ġera rakava bene ġabi-vaġiri uranai emaseto; <sup>4</sup> ma ġeguriato, ma ġaro vaġa-toitoinai mase na ma evariġisi-ġenoġoito, Buka Veaġai ġetoreato ilailanai. <sup>5</sup> Benamo Petero ġenai evevaġa-foforito, ma murinai tu ġena mero gabanana ruarua (12) ġeri ai maki. <sup>6</sup> Moġa murinai tu veġabi-dadama nuġanai tarikaka mabarari sinau imaima (500) ġevegogoto nuġanai ġeri ai efoforito; tari varau ġemaseto, a ġutuma tu roġo maġuri. <sup>7</sup> Ma murinai tu Iakobo (o Iames) ġenai efoforito, ma murinai tu apostolo mabarari ġeri ai maki.

<sup>8</sup> Ma magona korikorinai tu, au, noġa moġo amaġuri-rakavato tarimagu, ġegu ai ema foforito. <sup>9</sup> Korana au tu apostolo mabarari ġeri dokona korikori tarimagu, ma au tu asi ġegu namo ta moġo, tarimarima na au apostolo tarimagu ai beġe kiraġiguni. Korana au na Barau ġena ekalesia avaġa-midigu midigurito-ġoi, e alai-lausilausirito-ġoi. <sup>10</sup> Senaġi Barau ġena namo e varevare-barai, au tu mai ġegu apostolo tarimagu ai ama iaġoto. Ema Barau ġena namo e varevare-bara au ġegu ai tu asi etore-kavaiato. Moġoni, au na ġauvei tu barego lelevaġi aveiato, a apostolo kotari tu asiġina. Senaġi mo tu dia au tauġegu ġegu kokore ai moġeri ġauvei aveirito. Asiġina. Mo tu Barau ġena namo e varevare-barai kokore eviniguto, benamo mo ġauvei aveirito. <sup>11</sup> Moġesina naima au aġobatato o apostolo tari ġeġobatato, asi ġena irau ta, korana vari tu sebona moġo ġaġobata-iaġiato, ma ġomi na maki mo vari sebona, moġa moġo ġovaġa-moġoniato.

Ġita ġera variġisi-ġenoġoi

<sup>12</sup> Senaġi bema Keriso ġaġobata-iaġiani nai, ġakirani, Keriso tu Barau na mase na ma evaġa-variġisi ġenoġoiato ġatoni, kamasi nai ġomi fakami ai ġomi kotari tu ġokirani, mase tarimari tu asi ma beġe variġisi-ġenoġoini? <sup>13</sup> Bema mase na variġisi-ġenoġoi tu asiġi, moġa tauna tu, Keriso mase na tu asi ma evariġisi-ġenoġoito. <sup>14</sup> Ema bema Keriso mase na asi evariġisi-ġenoġoito, moġa anina, ġai ġema ġobata tu asi tauri, ema ġomi ġemi veġabidadama maki asi tauri. <sup>15</sup> Moġesi tu ġai beġere ribama, Barau na asi eveiato dagarana ġai na tu ġakiraġi-moġoni moġoni-kavaiani, ġaġofaġofani. Korana ġai na Barau varina ġafiuani, ġakirani, Barau na Keriso mase na ma evaġa-variġisi ġenoġoiato ġatoni nuġanai, Barau na Keriso mase na tu asi evaġa-variġisi ġenoġoiato. Ma guruġa moġonina tu, mase tarimari mase na tu asi ma ġevariġisi-ġenoġoini. <sup>16</sup> Aba, bema mase tarimari mase na asi ma ġevariġisi-ġenoġoini, moġa anina tu Barau na Keriso tu mase na asi ma evaġa-variġisi ġenoġoiato. <sup>17</sup> Ema bema Barau na Keriso mase na tu asi ma evaġa-variġisi ġenoġoiato, ġomi ġemi veġabidadama tu asi aniri e ġomi tu roġo rakava nuġanai ġotanuni. <sup>18</sup> Ema mo deikara Keriso ġevaġa-moġoniato tarimari ġemaseto tu, rakava voina beġe ġabiani. <sup>19</sup> Ma bema mai tamaġuri-taġoni maġurina ġena namo moġo uranai Keriso ġenai tavetuġamaġikauni nai tu, tarimarima mabarabarari vefakari ai ġita kika vetuġara tu barego lelevaġi.

<sup>20</sup> Senaġi Keriso tu moġoni mase na evariġisi-ġenoġoito, ema ġia tu ġemaseto tarimari mabarari fakari ai ġia tu evariġisi-ġenoġoi guineto, ilailana ġau ġwaġwari

ġeġora-guineni kavana. <sup>21</sup> Mase tu tarima sebona, Adamu, ġenana evesinato. Moġa ilailanaġi variġisi-ġenoġoi maki tarima sebona, Keriso, ġenana evesinani. <sup>22</sup> Vaġa-ilailana, tarimarima mabara-barari tu Adamu ġenana ġeiaġomani, moġa lorinai beġe maseni veġata; senaġi Iesu Keriso ġesi beġe sebonani neganai, Barau na ma bevaġa-maġuri ġenoġoirini. <sup>23</sup> Senaġi ġita mabarara tata ġera ġaro korikori loriri ai bita variġisi-ġenoġoini: Giniguine tu Keriso, ġia tu evariġisi-ġenoġoi guineto. Ma ġia ma beiaġomani ġaronai tu, ġia ġena tarimarima mabarari ma beġe variġisi-ġenoġoini. <sup>24</sup> Maiġa murinai Keriso na Barau ġevetari-viniani iaukari ġeri veġitaġau e maoro ema seġuka mabarari asi ġeri kokore ai bevaġa-iaġorini e bevaġa-rakavarini, benamo Barau ġena Basileia o veġitaġau seġukana Tamana Barau ġimanai betore-kauani. Benamo tanobara dokona beiaġomani. <sup>25</sup> Korana Keriso tu roġo bevereni, ġena veġitaġau tu betanuni roġo, beiaġoni mo, ġia ġevetari-viniani iaukari e tarimari mabarari ġia kwakuna fanafana gaburenai befana-taririni. <sup>26</sup> Keriso na evetari-viniani dagarana ta, magona korikori ai vauro bevaġa-keto-moġovaġiani, tu mase. <sup>27</sup> Korana Buka Veaġai tu iniġesi ekirani, “Barau na dagara mabarari ġia kwakuna gaburenai etorerito, mai tu ġena veġitaġau gaburenai etorerito.” Senaġi ekirato, “dagara mabarari ġia kwakuna gaburenai etorerito,” etato nai, Barau tu asi eiavi-kauato, korana tu Barau na dagara mabarari Keriso kwakuna gaburenai etore-toġarito. <sup>28</sup> Dagara mabarari Keriso ġena veġitaġau gaburenai Barau na betorerini, moġa murinai tu Barau Natuna tauġena maia Barau ġena veġitaġau gaburenai bevetore-toġani. Moġo tauna tu, Barau na dagara mabarabarari bedebarini.

<sup>29</sup> Bema variġisi-ġenoġoi asiġina, mai tarima kotari ġemase-guineto tarimari urari ai babatiso ġeġabini tu kamasi beġe veini, ei? Ġia tu kara dainai ġemase-guineto tarimari urari ai babatiso ġeġabini? Betaġu ġia na variġisi-ġenoġoi ġevaġa-moġoniani nai, mo veiġa ġeveiani. <sup>30</sup> Ema ġai maki, kara dainai tu hora mabarari ai dori moġo ġevaġi-masemani senaġi roġo ġaġiġiraġeni, bema variġisi-ġenoġoi asiġina nai tu? <sup>31</sup> Tarikakagu mabarami, moġoni, ġaro vanaġivanaġi au ġegu mase ġekiraġiani. Senaġi maiġa maki moġoni, ġomi na Iesu ġoġabi-raġeato nai, ġera Vereġauka Keriso Iesu ġoiranai au tu averere-baregoni. <sup>32</sup> Bema au vaġa-ilailana mai tarimarima ġeri tuġamaġi babobabori noġa moġo Efeso ai boġa bairi rakavari kavana bara vaġa-vevaġiri, au tu kara dagara namona ġegu ai bere ġora? Bema variġisi-ġenoġoi asiġina nai, au tu moġesi asi bara vei, asiġina ġinavaġi. Bema Barau na mase na asi ma bevaġa-variġisi ġenoġoirani nai tu, maiġesi tara kira, “Siġaniġani ema siniuniu, korana boinani tu bita maseni bene.”

<sup>33</sup> Tarima ta na asi bene ġofami! “Tarima rakavari bita kakorini nai tu, ġera maġuri namori beġe rakava-kwaikwaini.” <sup>34</sup> Ġotataġa, veiġa iobukaiobukari ġoveiri, vei-rakava ġovaġa-dokoa. Korana ġomi kotari Barau tu asi ribami roġo. Mai tu ġomi beġene maiakami ġana aguruġani.

#### *Variġisi-ġenoġoi tauġanina tu irauna*

<sup>35</sup> Senaġi kotari tu beġe vedanaġini, beġe kirani, “Mase tarimari tu kamasi ma beġe variġisi-ġenoġoini? Ma beġe variġisini nai, tauġaniri tu aiġesina?” <sup>36</sup> Babo! Ġoi na kara tano ai ovaroani tu, asi roġo etubuni mo, ovaroani dagarana bemaseni vau. <sup>37</sup> Widi o dagara ta novaroa otoni nai tu, dia tauġani oġabiani, benamo ovaroani. Asiġina, ġoi na mo widi o kara novaroa otoni dagarana tu ġutuna ġuena oġabiani, ma ovaroani. <sup>38</sup> Ma Barau tauġena na ġena ura ilailanaġi mo widi o kara ġovaroani, moġeri tata tauġaniri korikori evinirini. <sup>39</sup> Tauġani mabarari viriġori tu irauirau. Tarimarima viriġori irau, kwakuri vasivasi ġemaġurini dagarari vaġa-ilailana bai, boromakau, mamoe, e kotari viriġori irau, maġani-kone viriġori irau ema manu maki viriġori irau. <sup>40</sup> Guba dagarari tauġaniri tu ta, ma tanobara ġetanuni tarimari e dagarari maki irau. Guba tauġanina marevana ta ema mai tanobara tauġanina marevana maki ta. <sup>41</sup> Ġaro marevana ta ema ġue marevana ta, ema visiġu marevari maki irauri. Visiġu tata maki marevari irauirau.

<sup>42</sup> Mase na variḡisi-ḡenoḡoi maki moḡesi. Beḡe guriani tauḡanina tu beboraḡani, a Barau na ma bevaḡa-variḡisi ḡenoḡoiani tauḡanina tu asi ma beboraḡa-ḡenoḡoiani. <sup>43</sup> Beḡe guriani tauḡanina tu vetoḡana asi namo, ema tarimarima na asi beḡe urani ḡitaḡitana, a Barau na ma bevaḡa-variḡisi ḡenoḡoiani tauḡanina tu ma marevana. Beḡe guriani nai tu, moiramaira asi kokorena, a Barau na mo tauḡanina ma bevaḡa-variḡisi ḡenoḡoiani nai tu, ma seḡukana. <sup>44</sup> Ḣeguriani nai tu, tanobara tauḡanina, a Barau na evaḡa-variḡisi ḡenoḡoiani nai tu, iauka tauḡanina. Tanobara tauḡanina tu ta etanuni, moḡa lorinai iauka tauḡanina maki ta etanuni. <sup>45</sup> Buka Veaḡa nuḡanai ekirani, “Tarima guinena, Adamu, Barau na eveiato tu maḡuri tarimanai evaḡa-iaḡoato.” A Adamu magona, Keriso, tu maḡuri bevinini Iaukanai evaḡa-iaḡoato. <sup>46</sup> Tanobara tauḡanina tu eguineto, a dia iauka tauḡanina. Tanobara tauḡanina murina na vauro, iauka tauḡanina eiaḡomato. <sup>47</sup> Tarima guinena, Adamu, tu tanobara ḡenana eiaḡomato, Barau na tano kauna na eveiato, a tarima vaḡa-ruaruana tu Keriso, guba na emariḡoto tarimana. <sup>48</sup> Barau na tano kauna na eveirito tarimari tauḡaniri tu Adamu tauḡanina kavana, mo tu ma tano kauna na eveiato tarimana tauḡanina kavana, ema guba tauḡanina beḡe ḡabiani tarimari maki Keriso tauḡanina kavana, mo tu guba na eiaḡomato tarimana tauḡanina kavana. <sup>49</sup> Initoma ḡita tu Barau na mo tano kauna na eveiato tarimana vetoḡana kavana. A gabi vau mai guba na eiaḡomato tarimana vetoḡana ilailanai bita iaḡoni.

<sup>50</sup> Tarikakagu mabarami, au na kara akiraḡiani tauna tu maiḡa, tarimarima, mai tanobarai ḡetanuni kavana, ma tauḡaniri, ma viriḡori, ema ma rarari tu, Barau ḡena Basileia nuḡanai asi beḡe raka-toḡani. Ema ma beboraḡani dagarana tu tanu-vanaḡi vanaḡi Basileiana nuḡanai asi betanuni riba. <sup>51</sup> Ḣoseḡaḡi, vekuretoḡa guruḡana ta akira-varamini: Ḣita mabarara tu asi bita maseni, senaḡi ḡita mabarabarara tauḡanira tu Barau na bekurevorini. <sup>52</sup> Mo tu asikauna moḡo beḡorani, noḡa matara iaḡataḡo nunaḡa ta vaḡa-kafurina mo ma taraga-keorini kavana, asi kwaibona. Kibi dokona guruna beraḡeni, benamo ḡemaseto tarimari ma beḡe variḡisi-ḡenoḡoiani, benamo tauḡani asi ma beḡe rakava-ḡenoḡoiani. Ma ḡita roḡosi bitana mase tarimara maki tauḡanira beḡe vekurevoni, mo tu tauḡani variḡuri bita ḡabirini. <sup>53</sup> Korana mai ma beboraḡani tauḡanina tu bene vekurevo, benamo asi ma beboraḡani tauḡanina bene vetore-fofori, ema mai ma bemaseni tauḡanina tu bene vekurevo, benamo asi bemaseni tauḡanina ma bene vetore-rosi. <sup>54</sup> Aba, mai ma beboraḡani tauḡanina tu bene vekurevo, benamo asi ma beboraḡani tauḡanina bene vetore-rosi, ema mai ma bemaseni tauḡanina tu bene vekurevo, ma asi ma bemaseni tauḡanina ma bene vetore-rosi. Mai dabarai Buka Veaḡai evetoreto guruḡana bemoḡonini, “Mase tu Barau ḡena kokore na varau evaḡa-darereato.

<sup>55</sup> Mase o, ḡoi ḡemu kokore tu aiḡea?

Mase o, ḡoi na tarimarima ogwanurini garaḡotana tu ainai?”

<sup>56</sup> Mase egwanurini garaḡotana tu vei-rakava ema vei-rakava ḡena seḡuka tu taravatu ḡenana eiaḡomani. <sup>57</sup> Senaḡi Barau tatanikiuani, korana ḡia na ḡita ḡera Vereḡauka Iesu Keriso ḡenana kokore evinirani.

<sup>58</sup> Moḡa lorinai, tarikakagu, au na aura-vinimini tarimami, ḡemi veḡabidadamai boḡono ruḡa-gigitari, tarima ta o dagara ta na asi bene vei-ḡareva ḡarevami, vanaḡivanaḡi Vereḡauka ḡena ḡauvei boḡono veia ma kokoremi ḡesi. Korana boḡono riba, ḡomi ḡemi ḡauvei Vereḡauka nuḡanai tu asi ḡovei-taḡuiani, senaḡi ma voimi.

## 16

*Ierusalem* ekalesia tarimari vaḡa-kavari ḡana moni vaḡa-vegogo

<sup>1</sup> Maitoma tu Ierusalem veaḡa o ekalesia tarimari vaḡa-kavari uranai moni boḡono vaḡa-vegogo guruḡari akiraḡini. Mai guruḡa tu Galatia ekalesia mabarari akirarito, beḡene veia atato guruḡana, ḡomi akira-varamini. Au aurani tu ḡomi maki mai veiḡa boḡono veia. <sup>2</sup> Fura ḡarona giniguinenai o Sandei vanaḡivanaḡi ḡomi tata tu ḡemi doḡari ilailari ai moni ta boḡono tore-toḡaia. Moḡeri moni tu boḡono tore-vegogo vegogori, be

au baiaḡosini ḡaronai tu, moni mabarana bene rovinatore, asi ma bisini vaḡa-vegogo. <sup>3</sup> Ema au basi votuni nai tu, ḡomi na boḡo vaḡa-moḡonirini tarimari bavimirini, benamo Ieruselema ḡana beḡe ḡabi-iaḡorini. Beḡe iaḡoni nai tu, au na guruḡa-fofori fefana ta maki batoreani, be beḡe ḡwa-kauani. <sup>4</sup> Bema baḡitaiani au tauḡegu baiaḡoni tu namo nai tu, au ḡesi baḡa iaḡoni.

*Paulo* ḡena ura Korinto ḡana bene iaḡo

<sup>5</sup> Au baiaḡosini basi-ḡitamini, Makedonia tanona na nuḡana na baraka-vanaḡini nai, korana au tu Makedonia tanona nuḡana na baraka-vanaḡini bene. (Makedonia ekalesiari bana raka-ḡitari, senaḡi monai asi batanuni, baraka-vanaḡini moḡo). <sup>6</sup> A au baiaḡosini nai tu, atuḡamaḡini, ḡomi ḡesi kota roḡo bita tanuni banaḡu. Betaḡu faraka e iavara ḡueri maki maninai bita ḡabiani ḡomi ḡesi. Bere namo, ḡegu iaḡoiaḡo ai baura-vinirini dagarari tu ḡomi na boḡono vaḡa-kavagu. <sup>7</sup> Au tu asi aurani taimi misina moḡo ḡomi ḡesi bana tanu, benamo ma bana iaḡuimi maia. Au ḡegu tuḡamaḡi ai tu aurani, ḡomi ḡesi bitana tanu-mauka, senaḡi mo tu bema Barau na maoro beviniguni vauro. <sup>8</sup> A au tu Efeso ai batanuni mo Pentekoste ḡarona, <sup>9</sup> korana Barau ḡena ḡauvei bana veia dabarana tu varau bekeoa, be toma ḡegu ḡauvei tu barego lelevaḡi. Senaḡi tarimarima vovoka na maki ḡekouguni, ḡauvei asi bana veia ḡetoni.

<sup>10</sup> Bema Timoteo beiaḡosini nai tu, boḡono nari-ginikaua, be ḡomi ḡesi betanuni nai, asi bene tanu-garigari. ḡia maki au kavana Vereḡauka ḡena ḡauvei eveiani. <sup>11</sup> Moḡa lorinai tarima ta na asi bene ḡita-ḡuiraḡia. Senaḡi boḡono vaḡa-kavaia e maino ai boḡono tuḡua, au ḡegu ai ma bene ḡenoḡoi-iaḡoma. Korana au tu tarikaka kotari ḡesi ḡia ḡanariani.

<sup>12</sup> Ma tarikakara Apolos tu au na alaunaḡiato, tarikakara tari ḡesi be ḡomi ḡemi ai bene iaḡosi atato. Senaḡi ekirato, maitoma tu asi ilaila beiaḡosini, a ḡaro namona tai vauro beiaḡosini.

*Guruḡa* dokona

<sup>13</sup> Tauḡemi boḡono venari-ginikau, ḡemi veḡabidadamai boḡono ruḡa-gwaḡiḡi, nuḡami beḡene gwaḡiḡi, boḡono kokore. <sup>14</sup> Dagara mabarari boḡo veirini nai tu, veuravini ai moḡo boḡono veiri.

<sup>15</sup> Tarikakagu mabarami, ḡomi Stefanas ḡena numa tarimari mabarari tu ma ribami. ḡomi ma ribami, ḡia na Iesu Keriso ḡeḡabi-raḡeato nai tu, ta maki roḡosi roḡo bere ekalesia Akaia nuḡanai. Ma ḡia tu veaḡa o ekalesia tarimari ḡeri ḡauvei ai ḡevekiraḡikauto, ḡevaḡa-kavarito. Moḡa lorinai anoḡimini, <sup>16</sup> ḡomi maki moḡesi tarimari garori boḡono seḡaḡi-viniri, ema ḡai ḡesi ḡeḡauveini e ḡevekwaraḡini tarimari mabarari maki.

<sup>17</sup> Aiakuni, korana Stefanas e Fotunato ema Akaiko au ḡegu ai ḡeiaḡomato nai. Asi ilaila baiaḡosini, ḡomi ḡesi bita tanuni nuḡanai, mai tauri toitoi na ḡomi gabumi ḡeḡabirito, moḡesi nai au nuḡagu egenatarito. <sup>18</sup> Ema ḡia na au nuḡagu ḡevaḡa-iaku ḡenoḡoiato, ema ḡomi maki nuḡami ḡevaḡa-iaku ḡenoḡoirito. Moḡesi naima ḡia tu boḡono ḡabi-raḡeri.

<sup>19</sup> Asia ruburi na ḡomi ḡemi vevaḡa-namo ḡetuḡuni. Akwila e Priskila na ema ekalesia ḡia ḡeri numai ḡetanuni mabarari na nuḡari mabarari ḡesi ḡevaḡa-namomini Vereḡauka aranai. <sup>20</sup> Tarikaka mabarari na ḡevaḡa-namomini. ḡomi maki karomi tata vetarikaka verauna na boḡono vaḡa-namori.

<sup>21</sup> Au Paulo ḡimagu na mai vevaḡa-namo guruḡari atorerini.

<sup>22</sup> Bema tarima ta na Vereḡauka asi eura-viniani tu, ḡia iatanai rakava baregona bene tanu mo vanaḡivanaḡi. ḡera Vereḡauka o, noiaḡoma.

<sup>23</sup> ḡera Vereḡauka Iesu Keriso ḡena namo e varevare-bara ḡomi ḡemi ai bene tanu.

<sup>24</sup> Au ḡegu veuravini ḡomi ḡesi bene tanu. Keriso Iesu ḡenana ḡita tu doḡoro sebona tarimara.

## PAULO ĜENA TORETORE VAĜA-RUARUANA KORINTO EKALESIARI ĜERI

2 Korinto vaĝa-foforina guruĝari

Mai fefa vaĝa-ruaruana tu vevaĝa-gwaĝiĝi fefana Paulo na etoreato. Paulo na mai fefa tu Makedonia na Korinto ekalesiari etore-vinirito. Mai fefa tu laĝani 55 ema 57 fakari ai etoreato, mo tu Iesu maki emaseto murinai vau.

Mai fefa nuĝanai siri baregori tu karoa 1:3-4 ema 5:18.

Paulo na mai fefa etoreato korana tari tu maiĝeri: 1) Ĝofaĝofa tarimari na ĝia ĝena apostolo ĝauveina ĝevaĝa-rakavaia ĝetato-ĝoi moĝeri guruĝari eveito. 2) Ierusalemari Barau ĝena tarima veaĝari ĝetanuni moĝeri ĝeri moni tari beĝene tore-vegogo etato (9:1-5). 3) Mo ĝena fefa giniginena monai mo vei-rakava tarimana ma beĝene ĝabiraĝea e beĝene ura-vinia etato (2:5-11).

Paulo na mai fefa tu maiĝesina eboioĝaiato:

1. Ma veĝabi-sebona ĝenoĝoi guruĝari - karoa 1-7
2. Ierusalemari ekalesiari varevare viniri guruĝari - karoa 8-9
3. Korinto nuĝanai apostolo tarimari ĝofaĝofari na Paulo ĝena apostolo ĝauveina ĝekira-rakavaiato nai, Paulo tauĝena evekiraĝi-maĝatato guruĝari - karoa 10-13

<sup>1</sup> Au Paulo, Barau ĝena ura lorinai Keriso Iesu ĝena apostolo ai evaĝa-iaĝoguto, ema ĝita tarikakara veĝabidadama nuĝanai Timoteo ĝesi ĝemana mai fefa eiaĝosini.

Ĝomi Barau ĝena ekalesia Korinto nuĝanai, ema veaĝa tarimami mabarabarami, Akaia tanona mabarana nuĝanai ĝotanuni tarimami, ĝemi atore-vinimini.

<sup>2</sup> Barau ĝita Tamara ema Vereĝauka Iesu Keriso ĝerina varevare-bara ema maino ĝemi ai bene tanu.

### Paulo na Barau etanikiuato

<sup>3</sup> Barau sivaĝa-namoa, ĝia tu ĝita ĝera Vereĝauka Iesu Keriso Tamana. Ĝia tu vevetuĝaĝwa Tamana e vevaĝa-kava Barauna korikori. <sup>4</sup> Barau na ĝai ĝema midigu-midigu e dabara doko nuĝari ai evaĝa-kavamani. Moĝesi naima ĝai na maki tarima kotari ĝeri meto ai baĝa vaĝa-kavarini riba, Barau na ĝai evaĝa-kavamani ilailanai. <sup>5</sup> Moĝoni, Keriso na eĝabiato midiguna ĝai ĝemai tu barego-lelevaĝi; ma ĝai ĝema vevaĝa-kava Keriso ĝenana maki barego lelevaĝi. <sup>6</sup> Ĝai baĝa midigu-midiguni tu ĝomi vevaĝa-kava ema vevaĝa-maĝuri boĝono ĝabia ĝana. Ĝai Barau na evaĝa-kavamani tu ĝomi vevaĝa-kava boĝono ĝabi ĝana. Ma mai vevaĝa-kava boĝo ĝabiani mainana ĝomi nuĝami bevaĝa-gwaĝiĝirini, benamo ĝai ĝamidigu-midiguni kavana midigumidiguri boĝo ĝabirini nai tu, boĝo kokoreni. <sup>7</sup> Ĝai ĝema vetuĝamaĝikau ĝomi ĝemi ai tu barego ĝatoreani, korana tu ĝaribani, ĝomi tu ĝai ĝesi tamidigumidigu-sebonani, ema vevaĝa-kava maki ĝai ĝesi taĝabi-sebonaiani.

<sup>8</sup> Tarikaka mabararami, ĝai Asia tanonai aiĝesi meto ĝaĝoitaĝoto maki ĝaurani baĝana vaĝa-ribami. Ĝai Asia ai tu meto barego lelevaĝi ĝadoĝariato, ĝema gwada e riba mabararami maki ĝekorito, be ĝema tuĝamaĝi tu benamo, asi baĝa maĝurini, baĝa maseni. <sup>9</sup> Moĝoni, ĝai ĝema vemamiraĝi tu, ĝai beĝene vaĝi-masema dabarana tu varau ĝevaĝa-moĝoniato. Senaĝi asiĝina. Ĝai ĝemai moĝeri veiĝa ĝeĝorato tauna tu, ĝai tauĝema ĝema kokore ai asi baĝana veĝabidadama, senaĝi mase na maki evaĝa-vaisi-raĝerini Barauna ĝenai moĝo baĝana veĝabidadama. <sup>10</sup> Ĝia na mase nuĝari na evaĝa-maĝurimato, ma roĝo ma bevaĝa-maĝurimani. Ĝai ĝema vetuĝamaĝikau tu Barau ĝenai ĝatore-kauani, ĝoirai maki ĝia na ma bene vaĝa-maĝurima ĝana. <sup>11</sup> Mo tu ĝomi na maki ĝauĝau ai roĝo boĝo vaĝa-kavamani nai. Benamo Barau na tarimarima vovoka ĝemi ĝauĝau dainai, ĝai bevaĝa-kavamani. Mo vevaĝa-kava tarimarima vovoka na beĝe ĝitaiani, benamo ĝai na mo namo ĝadoĝariani bakunai, mabararami na Barau beĝe tanikiuani.



Paulo ġena boioġa ekefoato

<sup>12</sup> Ġai ġema vekokoroku anina tu maiġa: Ġai nuġamai ġamamiraġiani, ġai ġema maġuri e veiġa mai tanobarai, o sikira, ġema vegaragara ġomi ġesi tu dabara veaġanai ema moġoninai. Maiġeri veiġa veaġari ema moġoniri tu Barau ġena varevare-bara ġenana ġeiaġomani, a dia tanobara tarimari ġeri iauneganai ġeveirito-ġoi. <sup>13</sup> Ġai na ġomi fefa ġatore-vinimini tu dia fefa gwaġiġiri ġatore-vinimini. Asiġina. Ġai ġema fefai kara ġakiraġirini guruġari tu ġomi na boġo iavirini ema fefa tauri maki boġo tuġamaġi-doġaririni fefari moġo. <sup>14</sup> Moġoni, kotuna varau ġotuġamaġi-doġarimato. Ema atuġa-maġini, gabi vau boġo tuġamaġi-doġari korikorimani. Benamo Iesu Vereġauka beġenoġoini ġaronai, ġomi na ġai boġo vaġa-raġemani, ġai na ġomi baġa vaġa-raġemini kavana.

<sup>15</sup> Au ariba-maoroto, ġai boġo riba-ginikaumani ema ġemai boġo tuġamaġikauni naima, au na boioġa aveiato tu banasi rakaġita-guinemi, be vaġa-ruarua ġomi bana vaġa-kavami. <sup>16</sup> Au ġegu boioġa guinena tu Makedonia ġana baiaġoni nai, banasi raka-ġitami ema Makedonia na ma baġenoġoini nuġanai maki, ma banasi raka-ġitami atato. Ma manina na vau Iudea ġana baiaġoni nai, au ġegu iaġoiaġo ai beġene vaġa-kavagu farefareri tari boġono vinigu vauro boġono tuġugu. <sup>17</sup> Ġomi ġotuġa-maġini, au tu dia nuġagu mabarana ġesi maiġesi aboioġato ei? Ba ġomi ġotuġamaġini, au tu mai tanobara maġurinai roġo ġetanuni tarimari ġeri veiġa na aiaġoni, be murugu na tu, “Oi, oi” atato, a nuġagu gabigabinai tu “Asiġina, asi baiaġoni,” atato. <sup>18</sup> Barau guruġa moġoninai moġo etanuni kavana, ġai maki moġesina; ġomi ġemi ai vari ġaġobata-iaġiani nai, dia murumai tu “Oi” ġatoni, ma nuġamai tu “Asiġi” ġatoni. <sup>19</sup> Korana Barau Natuna, Iesu Keriso, ġomi fakami ai au, e Silas, ema Timoteo, na ġaġobata-iaġiato-ġoi tu dia muruma na moġo ġakirato-ġoi, “Iesu varina tu Oi, moġoni,” ma nuġama gabigabiri na tu “Asiġi, ġofaġofa” ġatato-ġoi. Asiġina. Ġia ġena maġuri nuġanai tu “Oi, moġoni” moġo etanuni vanaġivanaġi. <sup>20</sup> Barau ġena kiraġitore mabarari eveirito tu “Oi moġoni” moġo, Keriso ġena maġuri nuġanai ġemoġonito. Moġesi nai ġai na Keriso ġenana Barau ġavaġa-raġe-baregoani, ġakirani, “Oi, mo tu moġoni” ġatoni. <sup>21</sup> Ġomi ema ġai tu Barau tauġena na evaġa-kokorerani e evaġa-ruġa gwaġiġirani Keriso ġena maġuri nuġanai. Ġia na eġabirato, evaġa-veaġarato, <sup>22</sup> ema evaġa-moġonirato, ġita tu ġia ġena tarimarima, ġena vetoġa o maka maki ġita ġerai etoreato, ema ġita lorura ġutunai ġia Iaukana etore-toġaiato, mo Iauka ġenana ġita evaġa-riba ginikaurato, ġia ġena vevaġa-namo mabarana maki vauro bita ġabiani veġata.

<sup>23</sup> Barau ma ribana mai kara akiraġirini tu mabarari moġoni, e au nuġagu o lorugu ġutuna maki ġia ma ribana; au mo Korinto ġana asi aiaġosito tauna korikori tu maiġa: Au asi aurato, ġomi ġemi vei-rakava banasi kiraġi-fofori foforiri, benamo monana ġomi nuġami bana vaġa-metori. <sup>24</sup> Au tu dia ġomi ġemi vere, be ġomi ġemi mani veġabidadama nuġanai tu ġai na kara baġa kiraġirini veiġari moġo boġono veiri. Asiġina. Mai tu ġomi ema ġai taġauvei-sebonani, ġomi boġono iaku tuġamaġinai. Korana ġomi mani tu tauġemi ġemi veġabidadamai lorinai ġoruġa-gigitarini.

## 2

<sup>1</sup> Moġesi naima nuġagu aroriato akirato, asi ma banasi raka-ġitami, korana bavaġa-guruġa gwaġiġimini, benamo nuġami beġe metoni garina. <sup>2</sup> Korana bema au ġegu guruġa na ġomi nuġami beġere vaġa-metori nai, au tu dei na ma beġere vaġa-iakugu? Korana au boġoro vaġa-iakugu tarimami tu varau nuġami bavaġa-metori. <sup>3</sup> Moġesi naima au na mo fefa gwaġiġina moġa atore-vinimito. Au asi aurato, au bana iaġosi tu, boġo vaġa-iakuguni tarimami na au boġono vaġa-nuġa midigumidigu, korana au ma ribagu au aiakuni gabunai tu ġomi maki au ġesi, be taiaku-sebonani. <sup>4</sup> Moġoni, au nuġagu tu ma metona ġesi ema ġegu vetuġamaġi maki ebarego-rakavato e ataġito maki, mo fefa ġomi ġemi atoreato-ġoi nai. Mo fefa gwaġiġina atore-vinimito tu dia ġomi

nuḡami bana vaḡa-metori ḡana. Asiḡina. Au na mo fefa moḡesina atore-vinimito anina tu, au aurato ḡomi boḡono riba, au na ḡomi tu auravini-rakavamini.

*Vei-rakava tarimana* ḡena rakava boḡono tuḡamaḡi-fitoḡaia

<sup>5</sup> Bema ḡomi ta na nuḡa-midigumidigu evaḡa-ḡoraiani nai, au mo gabu ai tu asi ḡegu nuḡameto. Aba, gabu tari tu asi aiaku-iaḡirito, senaḡi ḡomi mabarami tu nuḡameto barego evinimito, o sikira, ḡomi ḡutuma, korana au asi aurani, ḡomi ḡemi ai mo veiḡa guruḡana bana kiraḡi-meto lelevaḡia. <sup>6</sup> Ḳomi ḡutuma na mani tarima na mo veiḡa eveiato voina metona baregona ḡoviniato, ma mo tu ḡenai ilaila be benamo, meto asi ma boḡono vini-lelevaḡia. <sup>7</sup> Ma toma tu ḡena rakava boḡono tuḡamaḡi-fitoḡaia ema boḡono launaḡia kekei. Asi namo tuḡamaḡi midigumidiguna na mai tarima bevaḡa-ketoani ḡena veḡabidadama ḡenana. <sup>8</sup> Moḡesina naima, au na ḡomi anoḡimini, mai tarima boḡono kiravara-ginikaua, ḡia tu moḡoni ḡoura-viniani. <sup>9</sup> Au na mo fefai atore-vinimito korana aurato, ḡomi bana riba-ginikaumi, moḡoni au na avaḡa-ribamito dagarari mabarari ḡokorana-iaḡi korikoririni ba? <sup>10</sup> Bema ḡomi na tarima ta ḡena rakava ḡotuḡamaḡi-fitoḡaiani tu, au na mo tarima ḡena vei-rakava maki atuḡamaḡi-fitoḡaiani. Ma bema rakava ta au na atuḡamaḡiato, mo rakava tu Keriso ḡoiranai au na varau atuḡamaḡi-fitoḡaia ḡomi ḡemi namo uranai. <sup>11</sup> Moḡesi aveito anina tu, Satani na ḡita beḡofarani, benamo mo meto misina bevaḡa-barego lelevaḡiani garina. Korana Satani eḡauveini dabarari ḡita tu ma ribara.

*Paulo* ḡena ura baregona Tito bene doḡaria

<sup>12</sup> Troas vanuḡana ḡana aiaḡoto, Keriso Varina Namona bana vari-fiua ḡana. Au Troas vanuḡanai araḡasito, benamo ariba-maoroto, Vereḡauka na mo vanuḡai Vari Namona bana fiua ḡatama-bokana tu ḡegu ekeoato. <sup>13</sup> Senaḡi au nuḡagu ai maino tu asi aḡabiato-ḡoi, nuḡagu evekwarāḡito-ḡoi, korana au tarigu Tito Troas ai tu asi adoḡariato. Moḡesi naima Troas tarimari aḡabi-tuḡurito moḡo, benamo Makedonia ḡana ma aiaḡoto.

*Keriso ekokoreto lorinai* ḡita takokoreni

<sup>14</sup> Barau atanikiu-viniani, korana vanaḡivanaḡi ḡia na ḡena seḡuka kokorenai Iesu Keriso ḡena maḡuri nuḡanai ḡai eḡori-kaumani. Benamo ḡai ḡemana Keriso varina tu noḡamo muramura bonana namona na tanobara mabarana ḡeḡabiani, benamo ḡeribaiani. <sup>15</sup> Moḡoni, Barau ḡoiranai ḡai tu Keriso varina bonana namona, Barau na rakava ḡenana evaḡa-maḡuririto tarimari fakari na ema vei-rakava tarimari mase dabaranai ḡerakani tarimari fakari ai. <sup>16</sup> Mase dabaranai ḡerakani tarimari ḡeri, ḡai tu mase boraḡari bonari, mase bevaḡa-ḡoraiani dagarana. A Barau na evaḡa-maḡuririto tarimari ḡeri ai, ḡai tu maḡuri muramurana bonana namona, maḡuri evaḡa-ḡoraiani dagarana. Senaḡi dei na mai ḡauvei baregona beveiani riba? <sup>17</sup> Ḳai dia tarima tari kavana, be Barau ḡena guruḡa ḡeḡobata-iaḡiani tu moni beḡene doḡari ḡana; a ḡai tu dia Barau ḡena guruḡa ḡaḡobata-iaḡiani tu moni na beḡene voima ḡana. Asiḡina. Ḳai tu Barau na etuḡumato, mai ḡauvei baḡana veia etato. Ḳai tu Keriso ḡesi ḡasebonato, ma Barau ḡoiranai ḡai tu nuḡama maoro e moḡoni ai Barau ḡena guruḡa ḡakiraḡiani.

### 3

*Taravatu e Iauka*

<sup>1</sup> Ḳai mai guruḡa ḡakiraḡirini tu, ḡai tauḡema moḡo ma ḡavevaḡa-raḡe ḡenoḡoini, ḡakirani, “Ḳai tu moḡoni vei-iobukaiobuka tarimama korikori,” ḡatoni ba? Ba tarima kotari ḡeveini kavana ḡaurani tarimarima na ḡema vevaḡa-moḡoni fefana ta ḡomi ḡemi beḡene torea, beḡene kira, “Ḳai tu tarima namoma, be boḡono ḡabi-raḡema.” O ḡomi na ḡai boḡono ḡabi-raḡema uranai ḡema vevaḡa-moḡoni fefana ta boḡono torea ḡatoni? <sup>2</sup> Ḳomi maniḡemi tu ḡai ḡema fefa, ḡai vaḡa-moḡonima fefami, ḡai lorumai Keriso na eberarito, ma tarimarima mabarari na ḡeribamini ema ḡeivimini. <sup>3</sup> Ḳomi ḡemi maḡuri na evaḡa-fofori ginikauani, ḡomi tu Keriso ḡena fefa, ḡai ḡema ḡauvei ḡenana

eberamini o etoremimi, (ma tarimarima na ġeiaviani). Ġomi tu Keriso ġena fefa, dia bairo na eberamito fefami, senaġi maġuri vanaġivanaġi Barauna Iaukana na eberamito fefami. Ma ġomi Keriso na tu dia fore lefalefari iatari ai ebera-kaumito, senaġi ġomi tu tarimarima loruri ai ebera-toġaiato.

<sup>4</sup> Ġai na maiġeri guruġa ġakiraġirini, korana ġai tu Keriso ġenana ma ġema tuġamaġikau Barau ġenai. (Korana ġia na evaġa-kavamani ġena ġauvei veiveinai). <sup>5</sup> Aba, ġai tauġema ġereġama na maiġeri veiġa tu asi ilaila baġa veirini. Moġesi naima ġai na dagara ta ġavaġa-ġoraiato tu asi ġatoni. Asiġina. Ġai tu Barau na ġereġana na moġo kokore ema riba ġai evinimani nai mai ġauvei ġaveirini. <sup>6</sup> Barau na kokore ema riba evinimani nai, ġia ġena kiraġitore o ginitaġo variġuna ġavarifiuani. Mo tu dia taravatu bukanai ġetorerito dagarari ġavari-fiurini, asiġina, ġai tu Iauka Veaġa na tarimarima ġeri maġuri ai kara eveiani ġavari-fiurani. Korana taravatu bukanai etorerito vevaġa-naġiri na tu tarima ġevaġi-maserini, bema asi ġekorana-iaġiani nai; senaġi Barau Iaukana na tu tarimarima maġuri evinirini.

#### *Barau ġena ginitaġo variġuna marevana baregona*

<sup>7</sup> Ġoseġaġi, Mose na Barau ġena taravatu tu Isaraela tarimari evaġa-ribarito-ġoi, moġeri na tu mase maki ġevaġa-ġoraiato-ġoi. Mo taravatu moġeri tu Barau na fore iatanai eberarito, ma marevari mamari tu barego rakava. Moġeri taravatu Barau na fore ai eberarito dagarari Mose na eġabi-iaġomarito-ġoi nai, Mose tu ġoirana maki emamato-ġoi, be Isaraela tarimari Mose ġoiranai maki asi ġeboġekau-maukato-ġoi, korana mo mareva mamana na matari efai-fitoġarito-ġoi nai. Senaġina mo taravatu mamari marevana baregona moġa tu asikauna ma erekwarekwato-ġoi. <sup>8</sup> Bema taravatu mamana marevana baregona tu moġesi neganai, Barau Iaukana ġena ġauvei mamana marevana ema seġukana tu barego lelevaġi. <sup>9</sup> Bema mase maki evaġa-ġoraiani ġauveina mamana marevana tu barego, vei-iobukaiobuka evaġa-ġoraiani ġauveina mamana marevana ema seġukana tu barego lelevaġi. <sup>10</sup> Toma taravatu mamana marevana baregona moġa tu asi marevana, korana Barau Iaukana mamana marevana ema seġukana tu barego lelevaġi. <sup>11</sup> Ma bema Mose na mo asi betanu-maukani taravatuna moġa eġabi-iaġomaiato, mamana marevana tu barego nai tu, betanu-vanaġi vanaġini dabarana mamana marevana ema seġukana tu barego lelevaġi veġata.

<sup>12</sup> Ġai tu mai dabara variġuna o ginitaġo variġuna ġenai ġavetuġa-maġikauni, naima asi ġagarini, ma kokorema ġesi ġakiraġiani. <sup>13</sup> Ġai tu dia Mose kavana, be ġoirama ġakou-ġaurini. Mose tu ġoirana kouġau dabuġana na ġoirana ekou-ġauato, korana Isaraela tarimari na ġia ġoirana na mo mama marevana erekwa-rekwato-ġoi moġa asi beġene ġeġitaia ġana. <sup>14</sup> Senaġi Isaraela tarimari nuġari e ġeri tuġamaġi Barau na evaġa-mukunarito. Korana tu mo ġaro na beiaġoma mo maitoma, mo kouġau dabuġana ġia nuġari e ġeri tuġamaġi evaġa-mukunarito dabuġana tu roġo etanuni, be ginitaġo guinena bukana ġeiaviani nai, asi ġetuġamaġi-doġariani. Mo ġia nuġari ema ġeri tuġamaġi ekou-ġaurini dabuġana tu Keriso ġesi beġe sebonani vauro bevekeo-fakani. <sup>15</sup> Toma maki Mose ġena taravatu guruġari ġeiavirini nai, ġia nuġari tu kouġau dabuġana na ekou-ġauani. <sup>16</sup> Senaġi tarima ta betuġamaġi-kureni, benamo Vereġauka ġenai ma beiaġoni tarimana ġenana mo kouġau dabuġana tu bekoki-fitoġaiani. <sup>17</sup> Ma mai Vereġauka tu Iauka Veaġa ekiraġiani. Be Vereġauka Iaukana ainai eġauveini gabuna, ġeġabi-raġeani tarimari tu dagara ta na asi ebarubarurini. Asiġina, ġia tu fakai ġetanuni. <sup>18</sup> Ma ġita ġoirara tu kouġau dabuġana na asi kouġau, be Vereġauka mamana e marevana baregona ġita ġerana veġiana noġa efoforini, tarimarima na ġeġitaiani. Vereġauka tu Iauka Veaġa, ma ġia ġenai mo mama e marevana baregona eiaġomani. Monana esenisirani Vereġauka kavanai taiaġoni, ema ġia mamana e marevana barego lelevaġina ġita maki evini-vanaġi vanaġirani.

## 4

*Iauka farefarena gwaḡutu nuḡanai*

<sup>1</sup> Barau ḡena vevetuḡaḡwai moḡo mai ḡauvei ḡai evinimato. Moḡa lorinai ḡai tu asi ḡatuḡamaḡi-moirani mai ḡauvei veiveinai. <sup>2</sup> Ḡai tu maiaka veiḡari vekuretoḡari, tarimarima na asi ḡeḡita-learini veiḡari, tu ḡaiaḡuirito. Ema ḡai tu asi ḡaḡofaḡofani e Barau ḡena guruḡa anina maki ḡai na tu asi ḡakefoani. Asiḡina. Ḡai na Barau ḡena vari moḡonina tu tauna korikori moḡo ḡakiraḡi-fofori ginikauani. Monana tarimarima beḡene riba, ḡai tu ma moḡonima ḡesi Barau ḡena ḡauvei ḡaveiani ḡia ḡoiranai.

<sup>3</sup> Senaḡi bema ḡai na mai Vari Namona ḡavari-fiuidi maiḡa vekuretoḡa nai tu, mai vari maiḡa tu mase koufanai ḡerakani tarimari moḡo ḡeri ai vekuretoḡa. <sup>4</sup> Maiḡeri tarima, Keriso asi ḡevaḡa-moḡoniani tarimari, tu mai tanobara barauna arana Satani na ḡeri tuḡamaḡi evei-mukunarito, naima mai Vari Namona mamana emamani tu asi ḡeḡitaiani. Mai Vari Namona mamana maiḡa tu Keriso mamana marevana baregona emamani. Ma mai Keriso maiḡa tu Barau vetoḡana korikori. <sup>5</sup> Ḡai tu dia ḡai tauḡema varima ḡafiurini. Asiḡina. Ḡai na tu Iesu Keriso ḡaḡobata-iaḡiani, ḡakirani, Keriso tu Vereḡauka korikori. Ma ḡai tu ḡomi ḡemi vetuḡunaḡi tarimamai ḡavevaḡa-iaḡoni Iesu ḡagubakauani lorinai. <sup>6</sup> Korana Barau tovotovonai ekirato, “Mukuna furufuru nuḡana na nemama-rovorovo,” etato. Ma mo Barau sebona na ḡai nuḡamai ema vaḡa-mama rovorovoato korana tu, Barau mamana baregona Iesu Keriso ḡoiranai emamato moḡa bene vaḡa-foforia, benamo baḡana ribaia e baḡana tuḡamaḡi-fakaia ḡana.

<sup>7</sup> Senaḡi mai farefare namo vedaureana tu ḡai tauḡanima nuḡanai maiḡea, mai tauḡanima tu noḡa tano na ḡeveirini gwaḡuturi, ma beḡe korini, monana tarimarima mabarari na beḡene ḡitaia, ma beḡene riba maki, mai seḡuka barego lelevaḡina ḡai ḡemai maiḡa tu Barau ḡenana eiaḡomani, ma dia ḡai ḡemana. <sup>8</sup> Ḡai tu reketa-reketa na ḡeḡaru-ḡeḡeraḡimani, ḡevaḡa-midigu midigumani e meto maki barego ḡevinimani, senaḡi ḡema kokore tu asi ekorini. Ḡaro kotari tu ḡadaradarani, asi ribama kara ma baḡa veiani, korana maḡuri tu gwaḡiḡi, senaḡi ḡema tuḡamaḡikau Barau ḡenai tu asi emoirani veḡata. <sup>9</sup> Tarimarima na asi ḡeura-vinimani, ḡevaḡa-midigumidigu baregomani, senaḡi Barau tu ḡai sevisivimai moḡo etanuni, asi eiaḡuimani; semo na ḡekwari-ketomani, senaḡi asi ḡamaseni. <sup>10</sup> Iesu emaseto, mo mase moḡa tu vanaḡivanaḡi ḡai tauḡanimai ḡaḡwarakao-rakaoani. Ḡaribani, ḡai maki, Iesu ḡevaḡi-maseato kavana, beḡe vaḡi-masemani. Moḡesi eḡorani korana tu, Iesu ḡena maḡuri maki vanaḡivanaḡi ḡai tauḡanima na bene fofori, be tarimarima na beḡene ḡitaia. <sup>11</sup> Ḡai roḡo maḡuri ḡatanuni apostoloma tu, vanaḡivanaḡi beḡene vaḡi-masema ḡetoni, Iesu varina ḡakiraḡiani ḡaramanai. Mai veiḡa eḡorani tauna korikori tu, Iesu ḡena maḡuri, (mo tu Iesu emaḡuri-ḡenoḡoito mo maḡuri moḡa), seḡukana ḡai tauḡanima na bene fofori, be tarimarima na beḡene ḡitaia ḡana. <sup>12</sup> Moḡesi naima mase ḡena ḡauvei tu ḡai (apostolo) ḡemai eveiani, senaḡi maḡuri tu ḡomi ḡemi maḡuri nuḡanai eḡauveini.

<sup>13</sup> Buka Veḡai ekirani, “Au na Barau avaḡa-moḡoniato, moḡesina naima aguruḡato.” Ḡai maki mo veḡabidadama sebona moḡa nuḡanai naima ḡakirani, Barau ḡavaḡa-moḡoniani nai ḡaguruḡani. <sup>14</sup> Korana ḡai ribama, Iesu Vereḡauka mase na evaḡa-variḡisi ḡenoḡoiato Barauna na ḡai maki ma bevaḡa-variḡisi ḡenoḡoimani Iesu kavana, benamo ḡai ema ḡomi, mabarara beḡabi-iaḡomarani ḡia ḡoiranai bea vaḡa-ruḡa-tarirani. <sup>15</sup> Ḡai na midigumidigu e meto ḡaḡabirini tu, ḡomi na namona boḡono doḡaria ḡana, ema monana tarimarima ḡutuma gorogoro na Barau ḡena namo ema varevare-bara beḡene doḡaria. Benamo mai Barau ḡena namo ema varevare-bara dainai, tarimarima ḡutuma na Barau beḡene tanikiu-vini-baregoa e ḡia marevana e mamana baregona beḡene vaḡa-raḡea.

*Veḡabidadamai moḡo bitana tanu*

<sup>16</sup> Moġa lorinai ġai tu asi kota maki ġatuġamaġi-moirani. Aba, tauġanima tu eġaukani, bemoira-iaġoni, senaġi iaukama tu ġaro loriri ai evaġa-variġurini. <sup>17</sup> Ema maiġeri midigumidigu e meto misiri asikauna na beġe raga-korini dagarari voiri beġe foforini tu barego lelevaġi. Barau na maiġeri voiri tu marevana barego lelevaġina, betanu-vanaġi vanaġini dagarana, bevinimani. <sup>18</sup> Moġesi naima ġai matama na tu dia toma ġeġorani matara na taġitarini dagarari ġaġita-karakararini. Asiġina. Ġai matama na tu, toma matara na asi taġitarini dagarari, ġaġita-karakararini. Korana toma matara na taġitarini dagarari tu asikauna ma beġe korini, senaġi kara toma asi taġitaiani dagarana tu betanu-vanaġi vanaġini, asi bekorini dagarana.

## 5

*Guba tauġanina e mai tanobarai tatanuni tauġanina*

<sup>1</sup> Ġai ribama, mai tanobarai ġatanu-iaġiani foutana o tauġanina berakavani mase ai nai, gubai asi ġima veiveina numana ta Barau ġenana baġa ġabiani, tanu-vanaġivanaġi numana. <sup>2</sup> Mai tanobara tauġani numanai ġatanuni tu ġataġitaġini ġaġabaġabani, korana midigumidigu e meto barego ġaġoitaġoni dainai. Be ġai ġema ura baregona tu, Barau na guba na beiaġomani tauġanina na nevaġa-dabuġama. <sup>3</sup> Korana guba tauġanina na bedabuġa-ġaumani tarimarima kavana nai, ġai tu dia iauka moġo baġa rakao-rakaoni ġia ġoiranai gubai, senaġi ġai iaukama tu kouġau initoma kavana. <sup>4</sup> Korana ġai roġo mai tanobara tauġanina numanai ġatanuni tu, ġaġabaġabani e meto barego ġevinimani. Maiġa tauna tu, asi ġaurani mai tanobara tauġanina maiġa ġakoki-vaġia o ġamase ġatoni. Asiġina. Ġai ġema ura tu Barau na guba tauġanina numana variġuna na bene vaġa-dabuġa-ġauma, be maġuri tauġanina na ma beġe maseni tauġanima moġo gabuna bere boroġia ġatoni. <sup>5</sup> Barau tauġena na ġita tu mai maġuri variġuna maiġa bitana ġabia ġana erovina-torerato. Moġesi naima ġia na Iauka Veaġa tu evini-guinerato. Barau na mai Iauka Veaġa evini-guinerato anina tu, ġita bitana riba-ginikau, tauġani variġuri maki bevinirani.

<sup>6</sup> Moġesi naima vanaġivanaġi ġai nuġama tu gwaġiġi, asi ġatuġamaġi-iauvoiauuvoni. Ma ġai ribama, mai tanobara tauġanina numanai roġo ġatanuni nai tu, ġai Vereġauka ġesi vanuġa korikori gubai tu asi ġatanu-vegogoni. <sup>7</sup> Ġai veġabidadamai moġo ġatanuni, dia matama na ġaġitarini dagarari na ġeġori-kaumani. <sup>8</sup> Au mo bakira kavana, ġai tu asi ġagarini, ma tuġamaġikauma ġesi ġaurani, mai tauġani ġenana baġana veġita, benamo Vereġauka ġesi baġana tanu, Vereġauka etanuni vanuġanai. <sup>9</sup> Moġesi naima ġai ġema ura barego sebona moġo ġoiramai ġatoreani tu, ġia iauna moġo baġana vaġa-namoa. Mo tu mai tanobara tauġanina nuġanai baġa tanuni, o mai tanobara tauġanina numana na baġa raka-vaġini, benamo Vereġauka ġesi gubai baġa tanuni, ġai ġema ura tu, ġia iauna moġo baġana vaġa-namoa. <sup>10</sup> Korana ġita mabarara Keriso ġena Kota seana ġoiranai tu bita ruġa-rosini veġata. Monai ġita mabarara tata mai tanobara tauġaninai tatanuni nai, veiġa namori o rakavari taveirini, maiġeri voiri ilailari bita ġabirini.

*Keriso na Barau ġatanai evaġa-iaġorato*

<sup>11</sup> Ġai ma ribama, Vereġauka tu ma garina, korana tu ġoiranai bita ruġa-tarini. Moġesi naima ġai na tarimarima ġasisiba-vinirini, beġene tuġamaġi-vekefo ġana. Ġai nuġama e ġema tuġamaġi kamasi tu Barau ma ribana ginikau, ema au atuġamaġini, ġomi maki ġai nuġami ai ġoribamani. <sup>12</sup> Maiġesi ġaguruġani tu, dia ġai tauġema ġomi ġoirami ai ġakirani, ġai tu moġoni vei-iobukaiobuka tarimama korikori. Asiġina. Maiġeri guruġa ġakira-varamini tauna korikori tu, ġai boġono veiavi-iaġima, be tanobara iaunegari e ribari ġevekokoroku-iaġirini tarimari boġono vaġa-veseri ġana. Maniġeri tarimarima tu matari na ġeġitarini dagarari ġevekokoroku-iaġirini, a tarimarima nuġari ai ġetanuni dagarari tu asi ġeġitarini. <sup>13</sup> Bema ġai tu ġababo-rakaoni ġotoni nai, mo tu Barau ġena ġauvei ġaveiani dainai; o bema ġema tuġamaġi maoro nai, mo tu ġomi namo boġono ġabia ġana.

<sup>14</sup> Ĝai tu Keriso ĝena veuravini na elaunaĝi-naĝimani, ema ĝai moĝoni ĝariba-ginikauni, Keriso tu tarimarima mabarara ĝera vei-rakava dainai emaseto. Moĝesi naima, tarimarima mabarara maki ĝia ĝena mase ai tamase-vegogoto. <sup>15</sup> Keriso tu ĝita tarimarima mabarara ĝera vei-rakava lorinai emaseto naima, ĝita initoma tamaĝuritanuni tarimara mabarara tu, dia ĝita tata tauĝera ĝera ura loriri ai moĝo bitana tanu. Asiĝina. Ĝita mabarara tu Keriso ĝenai moĝo bisini tanu, korana tu ĝia ĝita urarai emaseto, ma Barau na mase na ma evaĝa-variĝisi ĝenoĝoiato.

<sup>16</sup> Moĝesina naima ĝai na maitoma tarimarima tu dia tauĝanina rekenai ĝena maĝuri ĝaĝitaiani. Aba, tovotovonai tu Keriso maki tauĝanina rekenai ĝatuĝamaĝiato-ĝoi, senaĝi toma moĝesi tu asi ĝatuĝamaĝiani. <sup>17</sup> Moĝesi naima bema tarima ta Keriso ĝena maĝuri nuĝanai etanuni, mo tarima tu tarimarima variĝu geragerana. Mo maĝuri guinena etanu-iaĝiato-ĝoi moĝa tu ekorito, ĝia tu maĝuri variĝu geragerana eĝabiato, ma mai maĝuri variĝunai etanuni. <sup>18</sup> Maiĝeri dagara mabarari tu Barau na ĝita ĝera evinirani. Barau tavetari-viniato-ĝoi, senaĝi Keriso ĝena mase ĝenana ĝia na ma eĝabiraĝe-ĝenoĝoirani. Ema ĝai maki Barau na mai ĝauvei evinimato, mo tu tarimarima baĝana kira-varari, Barau na maino ĝabiĝabina dabarana tu varau eveiato, be ĝia ema Barau maino beĝe ĝabiani riba. <sup>19</sup> Mai guruĝa anina tu: Barau na Keriso tanobara ĝana etuĝu-iaĝomaiato, benamo ema maseto. Keriso ĝena mase ĝenana Barau tu tanobara tarimari mabarari ĝesi maino ĝeĝabiato: Tarimarima ĝeri rakava asi ma etuĝamaĝi-taĝorini, senaĝi etuĝamaĝi-fitoĝarini. Barau na mai ĝauvei ĝai evinimato, maino guruĝana maiĝa baĝana ĝobata-iaĝia.

<sup>20</sup> Moĝesi naima ĝai tu Keriso ĝaruĝa-boroĝiani mai tanobarai. Ma Keriso ĝena vari ĝavari-fiuanai nai tu, noĝa Barau tauĝena ĝai ĝemana tarimarima eura-maĝirini, ĝia ĝesi maino beĝene ĝabia. Ĝai na Keriso aranai ĝomi ĝanoĝimini, “Barau ĝesi maino boĝono ĝabia.” <sup>21</sup> Korana Keriso tu enabe asi ĝena rakava, senaĝi ĝita ĝera vei-rakava lorinai, Barau na ĝia noĝa moĝo vei-rakava tarimanai evaĝa-iaĝoato. Barau na mo veiĝa eveiato korana tu, Keriso ĝesi bita sebonani ĝenana, ĝita mabarabarara tu vei-iobukaiobuka tarimari ai bitana iaĝo ĝana Barau ĝoiranai.

## 6

<sup>1</sup> Ĝai tu Barau ĝesi ĝaĝauvei-vegogoni, moĝesina naima ĝalaunaĝimini, Barau ĝena namo e varevare baregona ĝoĝabi-raĝeato maniĝa tu boĝono ĝabi-gigitaria, asi boĝono vaĝa-rakavaia. <sup>2</sup> Korana Barau tu maiĝesi ekirani ĝena bukai, “Au na baiu-namomini ma baĝabi-raĝemini ĝarona beĝabiani nai tu, ĝemi noĝinoĝi baĝabi-raĝerini, ema vevaĝa-maĝuri ĝaronai tu, au na bavaĝa-kavamini.”

Au na avaĝa-guruĝamini, maitoma ĝarona tu Barau na tarimarima beiau-namorini ema beĝabi-raĝerini. Ma maitoma ĝarona tu Barau na tarimarima bevaĝa-maĝuririni ĝarona!

<sup>3</sup> Ĝai tu asi ĝaurani, tarima ta na ĝai ĝema ĝauvei nuĝanai kerere ta bene ĝoitaĝoa ma beĝene vaĝa-daĝama, moĝa lorinai ĝai na tarima ta vaĝa-vedaĝa-raĝena veiĝana ta asi ĝaveiani. <sup>4</sup> Moĝesi naima ĝema veiĝa e guruĝa mabarari ai ĝavevaĝa-foforini, ĝai tu moĝoni Barau ĝena vetuĝunaĝi-iaĝovinina tarimama. Meto nuĝari ai ĝavevaĝa-gwaĝiĝini; tarimarima na ĝevaĝa-midigu midigumani; ĝema ĝauvei nuĝanai maĝuri gwaĝiĝiri ĝadoĝaririni; tarimarima na ĝevaĝa-dabara dokomani; <sup>5</sup> ĝekwarimani, ĝediburamani, ĝutuma-bara na ĝeĝaru-ĝeĝeraĝimani ĝefarara-farara vinimani; ĝauvei ai ĝavekvaraĝi-rakavani, asi ĝagenani, asi ĝaĝaniĝanini. <sup>6</sup> Ĝema maĝuri e veiĝa tarimarima e Barau ĝoirari ai ĝenamo-vedaureani; Barau ĝena maĝuri e ĝena vari ĝaribaiani; maĝuri metori ĝaĝoitaĝorini, senaĝi ĝatuĝamaĝi-gwaĝiĝini; ĝevaĝa-rakavamani tarimari asi ĝabaru-vinirini, senaĝi ĝaiu-namorini; lauka Vevaĝa na evaĝa-kavamani dabara mabarari ai, ma nuĝama mabarari ĝesi tarimarima ĝaura-vinirini.

<sup>7</sup> Barau ǵena guruǵa moǵonina moǵo ǵaǵobata-iaǵiani Barau ǵena seǵukai; vei-iobukaiobuka farefareri tu ǵimama aroribamai ema ǵimama kaurimai ǵerina ǵavetarini.

<sup>8</sup> Ǵai tu ǵaruǵa-gwaǵiǵini, tarimarima na ǵevaǵa-raǵemani o ǵevaǵa-rakavamani nuǵari ai, varima ǵevaǵa-rakavarini o ǵevaǵa-namorini nuǵari ai; ǵekiramani, ǵai na tarimarima ǵaǵofa-taǵui-taǵuirini ǵetoni, senaǵi ǵai tu guruǵa moǵoniri moǵo ǵakiraǵirini. <sup>9</sup> Ǵekirani, ǵia tu asi ribari ǵai ǵetoni, senaǵi ǵai tu ǵeǵita-leamani, ǵia ma ribari ginikau ǵai tu dei. Ǵevaǵimani, be ǵamaseni, senaǵi roǵo ma ǵamaǵurini. Ǵebotamani, senaǵi asi ǵamaseni. <sup>10</sup> Ǵevaǵa-nuǵa midigu-midigumani, senaǵi vanaǵivanaǵi ǵaiakuni ǵaverereri. Asi ǵema asi ǵama, senaǵi tarimarima vovoka ǵavaǵa-taǵarini. Dagara ta asi ǵaǵwa-tanuani, senaǵi Barau na ǵena tarimarima evinirito dagarari mabarari tu ǵai ǵema.

<sup>11</sup> Korinto tarimami, ǵai ǵomi ǵemi ai tu ǵaguruǵa-fiu-iaǵoni moǵo, asi ǵagarini, ema nuǵama maki ǵakeorini, ǵaura-vinimini nai. <sup>12</sup> Ǵai na ǵomi tu ǵaura-vinimini, senaǵi ǵomi na neǵi ǵai asi ǵoura-vinimani. <sup>13</sup> Au na ǵomi tu natugu kavana avaǵa-guruǵamini: Ǵomi nuǵami asi boǵono kouri, nuǵami boǵono keori, be ǵai na ǵomi ǵaura-vinimini kavana, ǵomi na maki ǵai moǵesi boǵono ura-vinima.

*Keriso asi ǵevaǵa-moǵoniani tarimari ǵesi asi boǵono vekako*

<sup>14</sup> Keriso asi ǵevaǵa-moǵoniani tarimari ǵesi asiǵina ǵinavaǵi boǵono veǵata e asi boǵono vekako. Korana kamara dabarai vei-iobukaiobuka e vei-rakava veiǵari beǵe veǵatani ema beǵe sebonani, ei? Asi ilaila! Ema kamara dabarai mama ema mukuna furufuru beǵe veǵatani ema beǵe sebonani, ei? Asi ilaila! <sup>15</sup> Keriso ema Satani tu kamara dabarai beǵe nuǵa-sebonani, ei? Ema veǵabidadama tarimana ema asi eveǵabidadamani tarimana tu kamara dabarai ǵia tauri ruarua ǵeri tuǵamaǵi beǵe sebonani? <sup>16</sup> O Barau ǵena Rubu Veaǵa e babarau ǵeri rubu tu kamara dabarai Rubu Veaǵa sebonai moǵo beǵe iaǵoni, ma Barau sebona moǵo beǵe toma-rakariǵoani? Ǵita mabarara tu Barau ǵena Rubu Veaǵa. Ma Barau ekirato, “Au tu ǵia nuǵari ai batanuni, ma ǵia vekaravari ai barakaorakaoni. Au tu ǵia ǵeri Barau ai baiaǵoni, ma ǵia tu au ǵegu tarimari ai beǵe iaǵoni.”

<sup>17</sup> Moǵa lorinai Vereǵauka ma ekirato, “Vei-rakava tarimari vekaravari na ǵoma-rakarosi, ma ǵia seviri na ǵoraka-veǵita. Asi iareva dagarari asi boǵono ǵabi-karari, moǵesi tu baǵabi-raǵemini.”

<sup>18</sup> Iaru-korokoro Vereǵaukana tu maiǵesi ekirani, “Au tu ǵomi Tamami ai baiaǵoni, ma ǵomi tu au natugu taumi ema vavinemi ai bavaǵa-iaǵomini.”

## 7

<sup>1</sup> Ǵatagu mabarami, ǵoseǵaǵi, Barau na mai guruǵatore maiǵeri tu ǵita ǵera ekiraǵirito. Moǵa lorinai tauǵanira ema iaukara ǵevaǵa-rakavarini dagarari mabarari ǵita ǵerana si-iareva-fitoǵari. Be Barau ǵenai ma vegubakaura ǵesi tatanuni nuǵanai, ǵera maǵuri tu namo ema veaǵa korikori.

*Paulo ǵena iaku tu asikei, korana Korinto tarimari ǵevetuǵamaǵi-kureto*

<sup>2</sup> Nuǵami ai ǵai ǵema faka kota boǵono veia. Ǵai tu tarima ta ǵenai veiǵa rakavana ta asi ǵaveiato. Ǵai na tarima ta ǵena maǵuri asi ǵavaǵa-rakavaiato. Ǵai na tarima ta ǵofaǵofa dabaranai ǵena dagara ta asi ǵaǵabiato. <sup>3</sup> Au maiǵesi akirani tu, dia ǵomi ǵemi ai meto atore-kauani. Asiǵina. Au varau baguruǵa-guine, ǵomi tu ǵai loruma ǵuturi

ai ǫotanuni, ǫauravini-rakavamini. Be ǫomi ǫesi bita tanuni o bita maseni, ǫai ǫema veuravini ǫomi ǫemi ai tu asi bedokoni, roǫo betanuni. <sup>4</sup> Au ǫegu tuǫamaǫikau tu barego lelevaǫi etanuni ǫomi ǫemi ai, korana ǫemi veǫabidadamai ǫoruǫa-gwaǫiǫini. Moǫesi naima au na ǫomi avaǫa-veiavimini tarimarima ǫoirari ai, ma au maki ǫolaunaǫi-baregoguni. Meto baregori ǫaǫoitaǫorini mabarari nuǫari ai maki, au ǫegu iaku tu roǫo etanuni, asi kota edokoni o ekeini.

<sup>5</sup> Makedonia tanobaranai ǫaraka-toǫato nai, ǫai tauǫanima tu asi kota maki ǫeiaǫaraǫito meto e midigumidigu ǫerina. Gabu mabarari ǫana ǫaiaǫoto-ǫoi tu, meto e midigumidigu ǫaǫoitaǫoto-ǫoi, tarimarima na ǫevaǫa-veǫare veǫaremato-ǫoi e ǫekoumato-ǫoi. Ema nuǫama ǫeraǫeto-ǫoi. <sup>6</sup> Senaǫina Barau na tu meto e midigumidigu na nuǫari ǫevaǫa-moirarini tarimari evaǫa-kavarini. ǫia na nuǫama evaǫa-gwaǫiǫirito, Tito etuǫu-iaǫomaiato nai. <sup>7</sup> Ma ǫai tu dia ǫia eiaǫomato nai moǫo, nuǫama ǫegwaǫiǫito. Senaǫi ǫomi na aiǫesi ǫovaǫa-kavaiaato moǫeri variri ǫema ema kiraǫito, moǫeri na maki ǫelaunaǫi-baregomato. Evaǫa-ribaguto, ǫomi ǫemi ura baregona au boǫonoasi ǫitagau. Ema ǫemi nuǫa-midigumidigu e au ǫoura-viniguni e ǫourani au gogobagu boǫono raga, ema au ǫegu guruǫa ǫokorana-iaǫirini variri mabarari ema kiraǫirito. Moǫa lorinai au ǫegu iaku ebarego-lelevaǫito.

<sup>8</sup> Ribagu, au na fefa atore-iaǫoato, monana evaǫa-nuǫa midigumidigu-mito, senaǫi au tu asi adaradarato. Aba, tovotovonai tu adaradarato, korana ariba-maoroto, au na fefa na nuǫami evaǫa-metorito, senaǫi mo tu ǫemi nuǫameto tu asi etanu-maukato. <sup>9</sup> Ma initoma au tu averereni, dia ǫomi nuǫami avaǫa-metorito nai, senaǫi mo ǫemi nuǫa-midigumidigu ǫenana ǫovetuǫamaǫi-kureto, benamo Barau ǫenai ǫoǫenoǫoito. ǫai na ǫomi ǫemi ai rakava metona ta asi ǫaveiaato, senaǫi Barau ǫena ura veǫata ǫomi boǫono nuǫa-midigumidigu, korana ǫemi veiǫa ǫekerereto nai. <sup>10</sup> Barau ǫenana eiaǫomani nuǫa-midigumidiguna tu asi tuǫamaǫi vevaǫa-ǫwana. Korana tu mo nuǫa-midigumidigu ema vetuǫamaǫina tu vetuǫamaǫi-kure evaǫa-ǫoraiani. Mai dabarai vetuǫamaǫi-kure eǫorani vau Barau na tarimarima evaǫa-maǫuririni. A mai tanobara maǫurina ǫenana eiaǫomani nuǫa-midigumidigu e vetuǫamaǫina na tu mase evaǫa-ǫoraiani. <sup>11</sup> Mai Barau ǫenana eiaǫomani nuǫa-midigumidigu e vetuǫamaǫina na kara ǫomi ǫemi ai bevaǫa-ǫorari ǫotuǫamaǫi-ginikaua. Maniǫa ǫenana ǫomi toma ǫemi tuǫamaǫi beǫe maoro, ma ǫoura-rakavani veiǫa namori moǫo fakami ai boǫono veiri. Ema ǫemi ura baregona tauǫemi boǫono veiareva-faka meto tari ǫerina. Ma mo kerere eveito tarimana ǫenai asi ǫoiakuto, ma au garigu ǫoveito, ma ǫemi ura baregona ǫemi ai ma bana iaǫosi, ma ǫemi ura baregona maki mo kerere eveito tarimana ǫena maǫuri bene maoro veǫata, ma ǫemi ura ǫia tu ǫena veiǫa rakavana voina metona bene ǫabia veǫata. ǫomi na maiǫeri veiǫa mabarari ǫoveirini ǫerina ǫovevaǫa-moǫonini, ǫomi tu mo veiǫa rakavana ǫenana boǫo veǫabi-vaǫi, ma asi ǫemi kerere ta.

<sup>12</sup> Au na mo fefa ǫomi ǫemi atoreato-ǫoi nuǫanai tu, dia mo kerere eveito tarimana ǫena maǫuri totomaorona tuǫamaǫina aveito-ǫoi, o mai tarima na nuǫari evaǫa-metorito tarimari atuǫamaǫirito-ǫoi. Asiǫina. Au na mo fefa atore-iaǫosiato anina tu, Barau ǫoiranai ǫomi tauǫemi boǫono riba-maoro, ǫomi na ǫai tu moǫoni nuǫami mabarari ǫesi ǫai ǫoǫabi-raǫemani e ǫogubakaumani. <sup>13</sup> ǫai tu ǫomi ǫemi veiǫa mai bakiraǫiri veiǫari na ǫelaunaǫi-baregomani.

Senaǫi mo ǫemi veiǫa na ǫelaunaǫimato, ma kokore barego ǫaǫabiato-ǫoi, moǫa iakunai tu ma ǫaiaku-rakavato maia, korana Tito ekirato, maninai ǫomi na ǫia tu ǫoǫabiraǫe-ginikauato, ema nuǫana egenagena-tarito. <sup>14</sup> Au na ǫomi ǫia ǫoiranai tu avaǫa-veiavimito, ma tauǫemi ǫemi veiǫa na ǫovevaǫa-foforito ǫoiranai, be eǫitamito, moǫesi naima aiakuni, korana asi ǫovaǫa-maiakaguto. Ema mo ǫemi veiǫa na ǫovevaǫa-foforito, ǫai na Tito ǫoiranai ǫomi ǫavaǫa-veiavimito guruǫari tu moǫoni veǫata, asi ǫofaǫofa. <sup>15</sup> Ma Tito na ǫomi ǫemi seǫaǫi etuǫamaǫirini, ema ǫomi na ǫia ma nuǫa-raǫemi e nuǫa-ǫoǫoǫoǫomi ǫesi ǫoǫabi-raǫeato, moǫeri ma etuǫamaǫi-iaǫosirini nai, ǫia ǫena veuravini ǫomi ǫemi ai tu ebarego-lelevaǫini moǫo. <sup>16</sup> Au tu averereni, korana



moḡoni ama ribani asi adaradarani, ḡomi na tu veiḡa namori ema iobukaiobukari moḡo ḡoveirini bene.

## 8

*Ekalesia na moni* ḡevaḡa-vegogorito Ierusalema ekalesiari ḡeri

<sup>1</sup> Tarikaka mabarami, maitoma ḡai ḡema ura tu, Barau ḡena namo e varevare-bara Makedonia ai ekalesia doḡorori iatari ai etoreato boḡono ribaia. <sup>2</sup> Ḡia ḡeri ai tu meto e midigumidigu barego eraḡasito, senaḡi ḡia nuḡari tu iaku e verere na ḡevonuvonuraḡeto. Ḡia tu moḡoni ogoḡami, asi ḡeri-ḡari, senaḡi ḡia ḡeri varevare tu barego rakava ḡeveiato. <sup>3</sup> Au na ḡomi ḡemi ai akiraḡi-fofori korikoriani, ḡia ḡeri ḡoitaḡo tu kei, a ḡeri vini tu barego-rakava tarikakari tari vaḡa-kavari ai; ma ḡia ḡeri ai doḡari-doḡariri maki gwaḡiḡi, a farefareri e moniri maki benamo ḡevini-fitoḡarito moḡo. Ma mo veiḡa tauḡeri ḡeri urai moḡo ḡeveiato. <sup>4</sup> Ḡia tauḡeri na ḡeri-ḡari na ḡai ḡenoḡi-ginikaumato, ḡeurato, ḡia maki ḡai beḡene ruḡa-karoma, be mai ḡauvei mainai tarima veaḡari beḡene vaḡa-kavari. <sup>5</sup> Ḡai ḡema tuḡamaḡi, ḡia ḡeri varevare monina tu misina moḡo beḡe vinini. Senaḡi ḡia ḡeri vini ḡaḡitaiaito tu barego vedaurea, ḡai na kara tovtovonai ḡatuḡamaḡiatio, moḡa maki ḡevanaḡiatio. Ḡia tovtovonai tu tauḡeri roḡo Vereḡauka ḡenai ḡevevinito, ma moḡa murinai tu Barau ḡena ura ḡekorana-iaḡiatio, be ḡai ḡemai maki tauḡeri ḡevevinito.

<sup>6</sup> Moḡesina naima ḡai na Tito ḡanoḡiatio, ḡakirato, ḡomi ḡemi veuravini varevarena moniri egogorito kwari, moḡeri tu tauḡena na bene gogo-vaḡiri. Korana tovtovonai maninai moni-gogo ḡauveina tu ḡia na esinaiaito. <sup>7</sup> Ḡomi Korinto ekalesiana dagara mabarari ai ḡomi tu moḡoni ḡoiaruto: Ḡemi veḡabidadama e ḡemi guruḡai, ḡemi riba iauka maḡurinai, ḡemi ura barego lelevaḡina Barau ḡena ḡauvei nuḡanai boḡono vevaḡa-kava, ema ḡemi veuravini ḡai ḡemai tu barego lelevaḡi. Ḡai ḡema velaunaḡi ḡomi ḡemi ai tu, mai veuravini varevareri vini maki boḡono vaḡa-baregoa.

<sup>8</sup> Mai veuravini varevareri boḡono vini atoni maiḡa tu, dia akirani, boḡono veia veḡata atoni. Senaḡi maiḡesi akiramini tauna tu maiḡa: Tarikaka kotari tu ḡeiaḡo-ginikauni karori tari vaḡa-kavari ai. Moḡesi naima au na ḡomi atovo-naḡimini, ḡomi ḡemi veuravini tarikaka tari ḡeri ai tu aiḡesina naribaia atoni. <sup>9</sup> Ḡita ḡera Vereḡauka Iesu Keriso ḡena namo e varevare-bara ḡomi tu ma ribami. Ḡia tu taḡa verena, senaḡi ḡomi urami ai asi ḡena farefare tarimanai ema vevaḡa-iaḡoto. Iesu asi ḡena farefare ai ema iaḡoto anina tu, ḡomi farefare vovoka tarimami ai boḡono iaḡo ḡana.

<sup>10</sup> Ḡemi vini au na maki ḡomi na boḡono doḡaria ḡana, au ḡegu vevaḡa-gwada guruḡana tu maiḡa: Ḡoraḡani laḡaninai ḡomi na tu dia moni vaḡa-vegogo moḡo ḡosinaiaito, senaḡi ḡomi tu ḡourato, mai veiḡa maki boḡono veia veḡata. <sup>11</sup> Moḡesi naima ḡosinaiaito ḡauveina boḡono vaḡa-kori ginikaua. Moḡesina tu mai boḡono veia veḡata ḡotato ḡauveina tu boḡo vaḡa-kori ginikauani, monana bevaḡa-moḡoni korikoriani. Boḡo vinini nai tu, ḡemi ai kara maniḡeri ilailari ai moḡo boḡono vini. <sup>12</sup> Bema nuḡami mabarari ḡesi ḡemi ai kara ḡetanuni maniḡeri ilailari ai boḡo vinini dagarari tu, Barau na beiaku-iaḡirini e beḡabi-raḡerini. A ḡemi ai asi ḡetanuni dagarari asi boḡo vinini, moḡeri Barau na tu asi benuḡameto-iaḡirini, ema ḡomi maki asi bebaru-vinimini. <sup>13</sup> Ḡai asi ḡaurani, tari ḡovaḡa-kavari uranai, ḡomi tauḡemi iatami ai meto baregona boḡono tore-kaua, asi ḡemi-ḡami ai boḡono vevaḡa-iaḡo. Asiḡina. Ḡai ḡaurani tu, ḡomi ema ḡovaḡa-kavarini tarimari boḡono ilaila moni e farefare rekenai ḡatoni. <sup>14</sup> Mai taimi ai tu ḡomi na ḡia ḡeri ura dagarari boḡo vinirini, korana ḡomi ḡemi-ḡami tu vovoka tabutabu. Be ḡomi na ḡia ḡeri rabu ai ḡovinirini kavana, ḡomi ḡemi rabu ai maki ma beḡe vinimini. Mo dabarai ta asi berabuni. <sup>15</sup> Buka Veaḡai ekirani kavana, “Ḡutuma egogo-vegogoto tarimana ḡana tu dia eḡutuma-lelevaḡito,

ma kotuna moḡo egogo-vegogoato tarimana ḡana tu dia misina korokoro, senaḡi taunai.”

*Paulo na Tito Korinto ḡana etuḡuato*

<sup>16</sup> Au na Barau atanikiu-viniani, korana tu au ḡegu nuḡa-vekwaraḡi ḡomi ḡemi ai etanuni, mai nuḡa-vekwaraḡi sebona maiḡa tu Barau na Tito nuḡanai maki etoreato. <sup>17</sup> Korana ḡia tu dia ḡai na ḡanoḡiato dainai moḡo easi raka-ḡitamini. Asiḡina. ḡia tauḡena maki nuḡana mabarabarana eura-rakavani veḡata bene iaḡosi, ḡomi bene raka-ḡitami. <sup>18</sup> ḡai tarikakama ta maki Tito ḡesi ḡatuḡu-iaḡosiani. Mai tarikaka maiḡa tu ekalesia doḡorori mabarari na ḡavaḡa-raḡeani, korana ḡia na Vari Namona eḡobata-iaḡiani ma nuḡana mabarana ḡesi. <sup>19</sup> Ema mai tarikaka maiḡa tu ekalesia doḡorori mabarari na ḡeḡabi-viriḡiato, ḡai bene kavama mai varevare moniri baḡa ḡwa-iaḡorini nai ḡetato. Mai ḡauvei ḡaveiani korana tu, tarimarima mabarari na Vereḡauka beḡene vaḡa-raḡe baregoa ḡana, ema ḡai ḡaurani tarimarima baḡana vaḡa-kavari ḡatoni maḡurina baḡana vaḡa-foforia ḡana. <sup>20</sup> ḡai asi ḡaurani, tarima na ḡai beḡene roritorema ma beḡene vaḡa-rakavama. Moḡesina naima mai veuravini ai ḡevinito monina maiḡa tu dabara namonai ḡaḡauvei-iaḡiani. <sup>21</sup> Korana ḡai ḡema ura baregona tu, veiḡa roroḡotona baḡana veia, dia Barau ḡoiranai moḡo, senaḡi tarimarima maki ḡoirari ai.

<sup>22</sup> Ma ḡita tarikakara ta maki ḡia ḡesi ḡatuḡu-iaḡosiani, ḡia bekavarini. Mai tarikaka maiḡa tu ḡai na ḡaḡitaiani, ḡia tu moḡoni eura-baregoni, Barau vetuḡunaḡina bene iaḡo-vini etoni. Ema ḡia tu moḡoni ma ḡena vetuḡamaḡikau ḡomi ḡemi ai maki. <sup>23</sup> Tito maniḡa maki apostolo au kavana, ma ḡai tauma ruarua tu ḡomi vekaravami ai ḡaḡauvei-vegogoni. A mani ḡita tarikakara ruarua maniḡeri tu ekalesia doḡorori tata arari ai beḡe iaḡosi, ma ḡia tauri ruarua tu ḡeri ḡauvei ema veiḡai Keriso ḡevaḡa-raḡe baregoani. <sup>24</sup> Moḡesina naima, ḡemi veuravini vetoḡana korikori ema ḡai na ḡomi ḡavaḡa-raḡemini tauna korikori, ḡia ḡoirari ai boḡono vaḡa-fofori korikoria, be ekalesia doḡorori mabarari na beḡene ḡitaia ema beḡene vaḡa-moḡonimi.

9

<sup>1</sup> Au na aḡitaiani tu, asi korana ta moḡo ḡomi na Barau ḡena tarima veaḡari moni ḡovarevare-vinirini guruḡari au na ma bakiraḡirini. <sup>2</sup> Korana ḡomi ḡemi ura boḡono vaḡa-kavari veḡata ḡotato moḡa tu ribagu, be moḡa tu Makedonia tarimari ḡoirari ai maki ḡomi aveiavi-iaḡimito. Au na ḡia avaḡa-guruḡarito, akirato, ḡomi Akaia ai ḡotanuni tarimami tu, ḡoraḡani laḡanina na veḡata beiaḡoma mo toma ḡorovina-toreto boḡono vini ḡana. Ma ḡomi na tarimarima boḡono vaḡa-kavari nuḡa-vekwaraḡina ḡoveini guruḡana mani ḡeseḡaḡiato, benamo Makedonia tarimari kotari maki ḡeura-dikadikato, ḡia maki beḡene vevaḡa-kava veḡata ḡetato. <sup>3</sup> A au na mai tarikakara maiḡeri atuḡu-iaḡosirini tauna korikori tu, beḡene riba, ḡai na ḡavaḡa-veiavimini guruḡari tu dia guruḡa koriri moḡo. Be au aurani, ḡomi ḡemi varevare moniri tu boḡono gogo-toreri vauro boḡono venari-taḡo, au na ḡia akira-vararito ilailanai. <sup>4</sup> Asi namo Makedonia tarimari kotari au ḡesi beḡe rakakauni, benamo ḡomi beḡe ḡitamini tu, dia ḡai na ḡaveiavi-iaḡimini gabunai beḡe ḡoitaḡomini, ḡomi ḡemi varevare moniri tu asi gogotore. ḡomi tu asi bakiraḡimi, senaḡi ḡai tu beḡe maiaka-korukorumani, korana ḡai ḡomi ḡemi ai tu ḡatuḡamaḡi-dadamaḡi-baregoni nai. <sup>5</sup> Moḡesina naima au batuḡamaḡi, mai tarikakara maiḡeri namona tu nanoḡiri, be beḡene iaḡosi-guine; be ḡomi ḡemi veuravini varevarena moniri, mo ḡokiraḡi-torerito moniri tu beḡene kirami, ma boḡono tore-vegogo guineri vauro, ḡai boḡono nari-taḡoma. Benamo ḡai baḡana votu nai, ḡemi veuravini varevarena moniri tu toretaḡo. Monana bevaḡa-foforiani ḡomi ma ḡemi veuravini ḡesi ḡia ḡeri ḡovinini, a dia nuḡami asi iakuri ḡesi ḡovarevareni.

*Vovoka bevaroni tarimana*

<sup>6</sup> Mai guruḡa akiraḡiani maiḡa tu boḡono tuḡamaḡi-taḡoa: ḡaniḡani ḡueri asi vovoka bevaroni tarimana tu, kwakwai maki ḡaniḡani asi vovoka bedoḡarini. A ḡaniḡani

ḡueri ḡutuma gorogoro bevaroni tarimana tu, kwakwai maki ḡaniḡani ḡutuma lelevaḡi bedoḡarini. <sup>7</sup> Tarima ta nuḡana i evaḡa-moḡoniani ilailanai bene vini. A dia nuḡana ma daradarana ḡesi bene vini, o dia tarimarima ḡekirani beḡene tore veḡata ḡetoni naima beḡene vini. Korana nuḡana faka ema ma iakuna ḡesi evinini tarimana tu Barau na eura-viniani. <sup>8</sup> Ma Barau ḡena namo e varevare-bara lelevaḡina ḡomi iatami ai betorerini. Benamo monana ḡaro mabarari ai ḡemi ura dagarari mabarabarari boḡo ḡoitaḡorini, ema dia ḡoura-vinirini dagarari moḡo, senaḡi dagara kotari maki. Ema monana ḡauvei namori maki barego lelevaḡi boḡo veirini. <sup>9</sup> Buka Veaḡai ekirani kavana,

“Barau na ḡena varevare tu  
asi-ḡeri e asi-ḡari tarimari  
barego lelevaḡi evinirini,  
ḡena vei-iobukaiobuka tu  
betanu-vanaḡi vanaḡini.”

<sup>10</sup> Barau na ḡaniḡani ḡueri vamoka vei tarimari evinirini beḡene varori ḡana, ema tarimarima ḡaniḡani evinirini beḡene ḡaniri ḡana. Mai Barau sebona mainana ḡemi ḡaniḡani ḡueri ḡovarorito moḡeri bevaḡa-vovoka tabutaburini, ema ḡemi veiḡa namori ḡwaḡwari beḡe ḡutuma-gorogoroni. <sup>11</sup> Ma dabara mabarari ai ḡomi bevaḡa-taḡamini, ma monana nuḡami sebonai e ma veuravinimi ḡesi varevare mabarari boḡo vinini. Benamo ḡai ḡemana boḡo tuḡurini varevareri tarimarima na beḡe ḡoitaḡorini nai, mabarari na Barau ma beḡe tanikiu-viniani. <sup>12</sup> Korana mai ḡauvei ḡomi na ḡoveiani maiḡa tu, dia Barau ḡena tarimarima veaḡari na ḡeura-vinirini dagarari moḡo ḡovinirini, senaḡi mai ḡomi ḡemi varevare bakuri ai, tarimarima vovoka na Barau ḡetanikiu-vini baregoani. <sup>13</sup> Korana mai tarimarima ḡovaḡa-kavarini ḡauveiri, mainana ḡomi ḡemi veiḡa namori bevaḡa-fofori ginikaurini. Ma tarimarima beḡe ribani, ḡomi na Vari Namona tu dia murumi korina na moḡo ḡokiraḡiani, senaḡi ḡokorana-iaḡiani maki. Ema ḡomi ḡemi farefare e moni maki ma veuravinimi ḡesi ḡia e tarimarima mabarari ḡesi ḡovare-barabararini beḡe ḡitarini. Maiḡeri veiḡa namori loriri ai tarimarima na Barau beḡe vonevone-raḡeani. <sup>14</sup> Benamo ḡia na ḡomi beḡe tuḡamaḡi-baregomini, ma iatami ai beḡe ḡauḡauni. Moḡesi beḡe veini anina tu, Barau ḡena namo e varevare barego lelevaḡina ḡomi iatami ai etanuni dainai. <sup>15</sup> Barau sitanikiu-vinia, korana ḡia ḡena varevare barego lelevaḡina ḡita evinirato bene.

## 10

*Paulo na ḡena ḡauvei ḡevaḡa-rakavaia ḡetato tarimari guruḡari eveito*

<sup>1</sup> Maitoma au Paulo tauḡegu na nuḡagu ma manauna e maranana ḡesi ḡomi anoḡimini. Mai nuḡa manau e marana tu Keriso ḡenana ḡeiaḡomani dagarari. Ḡomi fakami ai tarima kotari na tu maiḡesina ḡeḡofaḡofa-iaḡiguni, ḡekirani, au ḡomi ḡoirami ai tu manau e agarini, a ḡomi sevimi na araka-ḡerevaḡini, irau ai atanuni, ḡomi tu guruḡa gwaḡiḡiri e metori atore-vinimini, ḡetoni. <sup>2</sup> Au na ḡomi anoḡimini, mani ḡofaḡofa guruḡari asi boḡono ḡabi-raḡeri, be ḡomi asi bana vaḡa-guruḡa gwaḡiḡimi au baiaḡosini nai. Korana au baiaḡosini nai tu, au atuḡamaḡini, ḡai ḡeḡofaḡofa-iaḡimani tarimari tu basi vaḡa-guruḡa gwaḡiḡi-vinirini. Maiḡeri tarima na ḡai ḡeḡofaḡofa-iaḡimani tu ḡekirani, ḡai tu roḡo tanobara maḡurinai ḡatanuni tarimari ḡeri veiḡai ḡaiaḡoni. <sup>3</sup> Oba, ḡai tu moḡoni roḡo tanobarai ḡatanuni, senaḡi ḡai tu dia mai tanobara tarimari ḡevetarini kavana ḡavetarini. <sup>4</sup> Ḡai ḡema vetari farefareri tu dia tarimarima ḡimari na ḡeveirini dagarari. Asiḡina. Ḡai ḡema vetari farefareri tu kokore e seḡuka baregori, Barau ḡenana ḡeiaḡomani dagarari. Maiḡeri na ḡavetari-vinirini seḡukari ema iaunegari baḡa vaḡa-rakavarini riba. <sup>5</sup> Ma maiḡeri vetari farefareri na Barau ema ḡena riba ḡekoukou-ḡaurini veḡare-veḡareri e veiḡari mabarari ḡavaḡa-rakavarini. Ema tarimarima ḡeri tuḡamaḡi irauirauri mabarari ḡakira-fitoḡarini. Ma tarimarima ḡakirarini, ḡeri tuḡamaḡi tu Keriso moḡo beḡene korana-iaḡia. <sup>6</sup> Ma ḡomi mabarami

na Keriso moḡoni boḡo korana-iaḡi korikoriani, moḡa murinai vauro ḡai na mani ḡeseḡafore-foreni tarimari ḡeri rakava voiri metori baḡa vinirini riba.

<sup>7</sup> Ḡomi tarimarima tu tauḡanina vetoḡana ḡereḡana moḡo ḡoḡitaiani. Bema tarima ta tauḡena evekiraḡini, ḡia tu moḡoni Keriso ḡena tarima korikori nai tu, bene riba, ḡai maki Keriso ḡena tarimarima ḡia kavana. <sup>8</sup> Au tu Vereḡauka na maoro e seḡuka eviniguto, ḡomi ḡemi maḡuri e veḡabidadama bana vaḡa-ruḡa gwaḡiḡiri ḡana, a dia bana vaḡa-rakavari ḡana. Ma au mai ḡauvei aveiani nuḡanai, bavekokorokuni tu asi bemaikaguni. <sup>9</sup> Au tu asi aurani ḡomi iniḡesi boḡono tuḡamaḡi, au na ḡomi tu vevaḡa-gari fefari moḡo atore-vinimini. <sup>10</sup> Au moḡesi akirani, korana tarima kotari ḡekirani, “Paulo na fefa etorerini nai, guruḡa tu baregori e ma seḡukari etorerini, senaḡi ḡia tauḡena ema foforini ḡita ḡerai, ḡia ḡitaḡitana tu asi garina e ḡena guruḡa maki asi guguraḡiri, ema asi mamiraḡiri maki.” <sup>11</sup> Maniḡesina ḡeguruḡani tarimari tu beḡene riba-maoro, ḡai irau gabu na fefa kamasi ḡatore-iaḡosini vetoḡari ema mami-raḡiri aiḡesi, ḡai baḡasi foforini tauḡanima korikoriri ai, ḡema veiḡa o ḡauvei seḡukari ema guruḡari maki moḡesi moḡo ilaila, fefai ḡomami-raḡirini kavana.

<sup>12</sup> Ḡai mani tauḡeri moḡo ḡevevaḡa-raḡeni tarimari ḡesi tu asi baḡa vevaḡa-vetovoni, ema ḡai ḡema ḡauvei maki ḡia na kara ḡeveiani ḡauveina ḡesi asi ilaila ḡauvei sebonai baḡa kiraḡiani. Asiḡina ḡinavaḡi. Maniḡeri tarima tu tauḡeri moḡo ma ḡevevaḡa-vetovoni, karori tari ḡeri riba e veiḡa ḡesi. Ema ḡia tu tauḡeri moḡo ta evariḡisini, tauḡena ḡena veiḡa karona ta ḡenai evaḡa-ilailaiani. Ḡia maniḡesi ḡeveini tauna korikori, ḡia tu moḡoni asi iaunegari. <sup>13</sup> Senaḡi ḡai tu Barau na evinimato maorori e gaburi makari, moḡeri nuḡari ai moḡo baḡa vekokoroku-iaḡirini. Ma ḡomi mani ḡotanuni tanona maki Barau na ḡai evinimato tanona makana nuḡanai. <sup>14</sup> Barau na ḡai maoro evinimato, ḡomi mani ḡotanuni tanona maninai, Vari Namona baḡa vari-fiuanai e baḡa vevaḡa-riba-iaḡiani. Moḡesi naima maninai ḡaḡauveini vekokorokuna ḡaveini tu ḡamaoroni, korana ḡai tu ḡomi ḡemi ai ḡasi-raḡasito. Moḡa lorinai ḡomi mani ḡotanuni maniḡa tu, ḡai ḡema ḡauvei tanona nuḡanai, korana tu ḡai na Keriso ḡena Vari Namona maninai ḡasi-ḡwa-raḡasiato. <sup>15</sup> Ḡai tu Barau na evinimato tanori e maorori asi ḡavanaḡirini. Ema ḡai tu dia tarima boruri na ḡauvei ḡeveiato vekokorokuri ḡaveirini. Asiḡina. Ḡomi tu Keriso Varina Namona tu ḡai na ḡavaḡa-ribamito. Ma ḡai ḡema tuḡamaḡi baregona tu, ḡomi ḡemi veḡabidadama bebarego-iaḡoni, benamo ḡai ḡema ḡauvei ḡomi vekaravami ai maki bebarego-lelevaḡini. <sup>16</sup> Moḡa murinana tu mani gabu maninana, tanobara kotari ḡana ma baḡa iaḡoni, monai Vari Namona ma baḡa ḡobata-iaḡiani. Korana ḡai tu asi ḡaurani, tarima tari na varau ḡeḡauvei-iaḡirito gaburi, ḡai na baḡana vekokoroku-iaḡiri.

<sup>17</sup> Buka Veavaḡa ekirani, “Bema tarima ta eurani bene vekokoroku nai tu, Vereḡauka moḡo bene veiavi-iaḡia.” <sup>18</sup> Korana dia tauḡeri ḡevekiraḡi-varaḡe varaḡeni tarimari Barau na evaḡa-moḡoniani. Asiḡina. Vereḡauka na evaḡa-raḡeani tarimana moḡo, Barau na evaḡa-moḡoniani.

## 11

### *Paulo ema apostolo ḡofaḡofari*

<sup>1</sup> Au ḡegu ura sebona tu, au ḡegu guruḡa babori kota roḡo boḡoro seḡaḡiri e boḡoro ḡabi-raḡeri. Mani ḡemi veiḡa ḡoḡabi-raḡegu. <sup>2</sup> Au ḡegu ura barego vedaureana ḡomi tu Keriso nuḡanai moḡo boḡono tanu, ma Barau ḡena ura baregona ḡomi ḡemi ai maki moḡesi. Au tu moḡa dainai ḡomi ḡemi ai amamani, mai tu Barau na eḡabi-raḡeani mamana. Au na ḡomi tu tau sebona moḡo ḡana akira-kaumito, mo tu Keriso. Moḡesi naima au na ḡomi anari-ginikaumini. Korana au ḡegu ura tu, Keriso ema ekalesia ḡeri veḡaraḡo ḡaronai, ḡomi tu noḡa ḡuiato ta futua ta ḡesi asi ekima-karato ḡuiatona kavana, namo vedaurea e vinuba, ḡaraḡori Keriso ḡoirana ḡana bana tuḡu-kavimi. <sup>3</sup> Senaḡi au tu agarini, korana mota na ḡena ḡofaḡofa iaunegari na Eva eḡofaiato,

benamo Barau ġena guruġa asi ekorana-iaġiato kavana, boġo veini garina. Ġomi maki ġofaġofa guruġari na ġemi tuġamaġi beġe vei-veġonurini, benamo Keriso ġokorana-iaġi korikoriani maġurina na boġo raka-veġitani. <sup>4</sup> Au na ġomi agari-vinimini anina tu maiġa, bema tarima ta eiaġosini, benamo ġomi ġemi ai Keriso boruna ta eġobata-iaġiani, dia ġai na ġaġobata-iaġiato Kerisona; o iauka boruna ta ma ġoġabia ġetomini, dia ġai na ġomi iatami ai ġimama ġatore-kaurito, benamo ġoġoitaġoato Iauka Veaġana; o Vari Namona boruna ġemi ġeġobata-iaġiani, dia ġai ġemana ġoseġaġiato ma ġoġabi-raġeato Vari Namona neganaġi, ġomi na moġeri tarima tu ġoseġaġirini, ma ġeri guruġai ġoġabi-raġerini moġo.

<sup>5</sup> Senaġi au atuġamaġini, mani ġevekiraġini apostolo irauri veġata barego lelevaġiri ġetoni tarimari na, au tu asi ġevanaġiguto. <sup>6</sup> Aba, au guruġa-ġitaġita dabarana tu asi aribaiato, senaġi riba au ġegu ai tu etanuni. Ma maiġa tu dabara mabarari nuġari ai ġemi ai ġavaġa-fofori ġinikaurito.

<sup>7</sup> Ġomi ma ribami, au na ġomi ġemi ai Barau ġena Vari Namona aġobata-iaġiato tu asi voina, be mo ġauvei voina ġomi na tu asi ġoviniguto. Ma mo maġuri aveiato tu, au tauġegu avetore-variġoto, ġomi bana tore-varaġemi uranai. Ma ġomi ġotuġamaġini, mo veiġa au na aveiato tu avei-rakavato, ei? <sup>8</sup> Ġomi Vari Namona avaġa-ribamito-ġoi ġauveina voina tu, ekalesia doġorori tari na ġeviniguto-ġoi, noġa moġo alemarito-ġoi. <sup>9</sup> Ma au ġomi ġesi tatanuto-ġoi nuġanai, dagara kotari aurato-ġoi nai, au na ġomi tu asi avaġa-doġe ganiganimito-ġoi. Korana tu tarikaka tari, Makedonia na ġeiaġomato tarimari, ġia na aura-vinirini dagarari ġema-viniguto. Au tu ġomi vaġa-doġe-ganiganimi maġurina ta asi aveiato. Moġesi moġo bavei-iaġoni, asi bavaġa-doġe ganiganimini. <sup>10</sup> Keriso ġena guruġa moġonina tu aribaiato, ma nuġagu ai etanuni. Moġesi naima au baveiavini nai tu, mai Akaia tanona nuġanai etanuni tarimana ta asi bekira-ġoiguni riba. <sup>11</sup> Au na mai veiġa aveiani tu, ġomi asi aura-vinimini nai ba? Moġoni, Barau ma ribana au na ġomi tu auravini-baregomini.

<sup>12</sup> Ma ġomi na au moni e farefare na asi boġono vaġa-kavagu atoni veiġana tu, roġo bavei-iaġoani-ġoi. Mai veiġa aveiani korana tu, mani apostolo ġofaġofari maniġeri beġene fofori-ġinikau ġana. Mai tu noġa ġia kwakuri ai ġeruġa-taġoni tanona gaburena akwaiani, beġene fana-kafua, benamo beġene keto-ġura, ma monana ġomi boġono riba-korikori, ġia tu moġoni dia ġai ġesi ġauvei sebona ġaveiani. Korana ġia na kara ġeveiani tu ġeveiavi-iaġiani, ġeri ura ġomi na boġono vaġa-moġoniri, boġono kira, ġia tu moġoni ġai ġesi ġauvei sebona moġo ġaveiani boġonososi ġana. <sup>13</sup> Maniġeri tarima tu apostolo ġofaġofari, ġauvei ġofaġofari ġeveirini. Ġia maniġeri tu tauġeri moġo ġevekiraġini, Keriso ġena apostolo ġetoni, senaġi mani tu ġeġofaġofani, ġia tu dia Keriso ġena apostolo korikoriri. <sup>14</sup> Mani veiġa maninana au nuġagu tu asi efarevaġini, korana Satani tauġena maki vetoġana ekefoani, noġa Barau ġena mama aneruna noġa moġo eveini, benamo tarimarima eġofarini. <sup>15</sup> Moġesina naima Satani ġena vetuġunaġi ġeiaġo-vinini tarimari maki tauġeri moġo tarimarima ġoirari ai beġe vekiraġini, ġia tu Barau ġena vetuġunaġi tarimari. Ġia tu Barau na vau ġeri veiġa voiri bevinirini.

*Paulo na* ġena apostolo ġauveina ġaramanai midigumidigu barego eġabiato-ġoi

<sup>16</sup> Mo guruġa ma akiraġi-ġoiani. Tarima ta asi bene kira au tu babo. Senaġi bema ġomi na au boġo kira-baboguni nai tu, babo tarimari ġoġabi-raġerini e ġoseġaġi-vinirini kavana, au maki boġono ġabi-raġegu e boġono seġaġi-vinigu, be au maki kota bana vekokoroku. <sup>17</sup> Mai kara akiraġiani tu, dia Vereġauka na maoro eviniguni nai, maiġesi ġena guruġa na aiaġoni. Asiġina. Mai tu naveiavi uranai, babo tarimari ġeri veiġa na aiaġoni. <sup>18</sup> Korana tarima ġutuma tu tanobara maġurinai ġetanuni tarimari ġeri vekokoroku na ġeiaġoni. Moġesi naima au maki baveiavini. <sup>19</sup> Ġomi na mani babo tarimari ġeri vevaġa-riba ġoġabi-raġerini e ġoseġaġirini, korana ġomi tauġemi moġo ġoveġita-tarini, benamo ġokirani, “Ġomi tu moġoni ma iaunegami,” ġotoni. <sup>20</sup> Moġoni, ġomi tu tarima ta ġomi ġemi ai eiaġosini, benamo ġena tuġu-rakaorakao tarimami ai

evaḡa-iaḡomini, o ḡemi-ḡami everari-verari vaḡirini, o kara eura-vinirini dagarari tu ḡomi ḡemina eḡabini moḡo, e tauḡena moḡo evetore-varaḡe varaḡeni, ema ḡoirami eforo-bubuḡaurini, mo tu ḡena veiḡa na e guruḡa na, tarimana tu ḡoḡabi-raḡeani ema ḡoseḡaḡiani maki. <sup>21</sup> Au tu nakira emaiakaguni, korana ḡai nuḡama tu asi ḡwaḡiḡi, be maiḡeri veiḡa ḡomi ḡemi ai tu asi ḡaveirito-ḡoi.

Bema tarima ta ḡia na eveirito veiḡari eveiavi-iaḡiani nai tu, au maki au na aveirito veiḡari bavekokoroku-iaḡiani riba. Au maiḡesi aguruḡani tu, babo ḡeri guruḡa na aiaḡoni. <sup>22</sup> ḡia tu Heberu tarimari ḡetoni, ei? Au maki Heberu tarimagu. ḡia Isaraela besena ḡetoni, ei? Au maki Isaraela besena. ḡia Aberahamo tubuna ḡatana ḡetoni, ei? Au maki Aberahamo tubuna ḡatana. <sup>23</sup> ḡia Keriso ḡena vetuḡunaḡi ḡeiaḡo-vinini tarimari ḡetoni, ei? Au na Keriso vetuḡunaḡina tu nuḡagu e tauḡanigu mabarabarana ḡesi Keriso vetuḡunaḡina aiaḡo-viniani. Au tu ababoni, maiḡeri guruḡa akiraḡirini, senaḡi ḡomi na roḡo ḡolaunaḡi-naḡiguni naima maiḡesi aguruḡani. Au tu avekwaḡi-lelevaḡito, a ḡia tu asiḡi; ḡaro vovoka ḡediburaguto, ḡekwari-rakava rakavaguto, ema ḡaro ḡutuma dori amaseto-ḡoi. <sup>24</sup> Iuda tarimari na vaḡa-40 ḡevekwari-iaḡiani varona na tauḡanigu ai vaḡa-39 veḡata ḡekwariato. <sup>25</sup> Vaḡa-toitoi oro kwarina na ḡeribiguto, vaḡa-sebona fore na ḡetakiguto, vaḡa-toitoi davara nuḡanai au araḡeto boutina eḡwakirakiraiato, be dori amaseto, ma ḡaro ta tu davarai boḡi vinubana ta e ḡaro vinubana ta arei-iaḡiato tuba ta iatanai. <sup>26</sup> Au tu gabu sebonai moḡo asi atanuni, vanaḡivanaḡi gabu boruri na arakanaḡi-rakanaḡini, Keriso Varina Namona avari-fiuani. ḡaro tari ai tu ḡarukai dori areini, ma ḡaro tari ai tu seḡafore tarimari na vefakari ai arakaḡurani, ma ḡaro tari ai tu ḡegu tanobara tarimari korikori na dori ḡevaḡiguni e ḡevaḡa-rakavaguni, ḡaro tari irau bese tarimari na dori ḡevaḡiguni; ma ḡaro tari vanuḡa barari ai meto barego araka-ḡoitaḡorini, ma ḡaro tari tu tano fakana nuḡanai meto barego aḡoitaḡoni, ma ḡaro tari tu davara nuḡari ai dori amaseni; ma ḡaro tari tu ḡevetarikaka-ḡofaḡofani tarimari na ḡevaḡa-rakavagu ḡetoni. <sup>27</sup> ḡauvei metori aveini e avekwaḡi-rakavani, boḡi ḡutuma asi agenani; avito-maseni, ananu-maseni; ḡaro vovoka tu ḡaniḡani aruḡarini, korana aḡani-veaḡani bene, ma ḡaro tari asi ḡegu dabuḡa, kefigu kori moḡo, be enagureguni. <sup>28</sup> Ma maiḡeri dagara ḡutuma ma bakiraḡirini riba; senaḡi iniḡa moḡo nakiraḡia: ḡaro vanaḡivanaḡi rubu mabarari gabu tatai ḡetanuni anuḡa-vekwaḡi iaḡi-baregorini. <sup>29</sup> Ekalesia ta Iauka rekenai emoirani nai tu, au maki ḡia ḡesi amoirasebonani. Ma ekalesia ta tarima ta na eḡori-veḡonuani, benamo rakava eveini nai, au tu abaru-rakavani.

<sup>30</sup> Bema au asi ḡegu dabara ta, ma navekokoroku batoni nai, au tu ḡegu moira ḡevaḡa-ḡorarini gaburi moḡeri moḡo bavaḡa-veiavirini. <sup>31</sup> ḡita ḡera Vereḡauka Iesu Keriso Tamana Barau ma ribana au tu asi aḡofaḡofani. Barau bitana vaḡa-raḡea mo vanaḡivanaḡi. <sup>32</sup> Damaseko ai atanuto-ḡoi nai tu, Kini Areta ḡena gavana na vetari tarimari ekirarito, vanuḡa barana maḡuna mabarana beḡene nari-ḡaua, au beḡene ḡabitarigu ḡana. <sup>33</sup> Senaḡi au tu tarikaka tari na boseḡa baregonai ḡevaḡa-tanu-ḡuraguto, benamo vanuḡa maḡuna windoana na varoseina ḡetuḡu-riḡoguto, benamo mo gavana ḡimana na araga-maḡurito.

## 12

### *Paulo* ḡena mata-vanaḡi

<sup>1</sup> Vekokoroku ai tu kara namona ta asi badoḡariani, senaḡi baveiavini roḡo. Mata-vanaḡi ai Vereḡauka na evaḡa-foforirito dagarari aḡitarito ema aseḡaḡirito guruḡari roḡo nakiraḡiri. <sup>2</sup> Au tarima ta Keriso nuḡanai ma ribagu; ḡia tu Barau na eḡabivaraḡeato guba vaḡa-toitoina ḡana. Mo veiḡa eḡorato negana na beiaḡoma mo initoma tu laḡani gabanana vasivasi (14). Mo tau guba vaḡa-toitoina ḡana tu iaukana roḡo tauḡanina nuḡanai, o iaukana tauḡanina na eveḡitato, ma iaukana ḡereḡana moḡo eḡabi-varaḡeato, moḡa tu au asi ribagu, a Barau ḡereḡana moḡo ma ribana. <sup>3</sup> Mo tarima

au tu ma ribagu. A mo tarima tu iaukana roġo tauġanina nuġanai o iaukana tauġanina na eraka-veġitato vau mo maġuri eġorato, moġa au tu asi ribagu, senaġi Barau ġereġana moġa ma ribana. <sup>4</sup> Mai tarima akiraġiani maiġa tu, paradaiso ġana eġabi-varaġeato. Benamo monai dagara tari ġita na asi ilaila bita kiraġi-fofori ginikaurini, ema dagara ta ġesi maki asi bita vaġa-vetovorini dagarari, Vereġauka na ekiraġirito, eseġaġirito. Moġeri dagara tu tarima ta na asi ilaila bekiraġi-foforirini dagarari. <sup>5</sup> Au na tu moġesina tarimana ġereġana moġo bavaġa-veiaviani. A au tauġegu tu asi bavekokorokuni, au tu ġegu moiramaira gaburi moġeri baveiavi-iaġirini, (korana tu moġeri dairi ai tarima na asi ġevaġa-raġeguni). <sup>6</sup> Au navekokoroku barasi maki, au tu dia babo ġeri veiġa na bara iaġo, korana au tu guruġa moġoniri moġo bara kiraġiri bene. Senaġi au tu asi veġata aurani moġeri bana kiraġi-rosiri, korana asi ġegu ura moġeri dairi ai, au tarimarima na beġene tuġamaġi-varaġe varaġegu. A au aurani tu, kara aveiani maiġa, tarimarima na beġene ġitaia vauro beġene riba-maoro, au tu tarima kamasigu.

<sup>7</sup> Au tu Vereġauka na dagara iaru-korokorori evaġa-foforirito, benamo aġitarito e aseġaġirito, senaġi moġeri bakuri ai au tauġegu bavekiraġi-varaġe varaġeni garinai tu, Barau na midigumidigu ta au tauġanigu ai etore-toġaiato. Moġa tu noġa gini masikona ta au viriġogu nuġanai etanuni. Mo gini masikona moġa tu iauka rakavana ta. Ġia tu Satani ġena vetuġunaġi eiaġo-vinini iaukana, au bene vaġa-midigu midigugu, benamo au asi bana vekiraġi-varaġe varaġe ġana au ġegu ai etanuni. <sup>8</sup> Vereġauka tu vaġa-toitoina veġata anoġiato, mai Satani ġena vetuġunaġi-iaġovini iaukana au ġeguna bene koki-vaġia ġana. <sup>9</sup> Senaġina Vereġauka na maiġesina ekiraguto, “Au ġegu namo e varevare-barana ġereġana moġo dagara baregona ġoi na oura-viniani, korana au ġegu seġuka tu moiramaira tarimana ġenana vauro efofori-korikorini.” Moġesina naima au na tu ġegu moiramaira gaburi moġeri moġo baveiavi-iaġirini, Keriso ġena seġuka au ġegu ai bene tanu ġana. <sup>10</sup> Moġesi naima Keriso bakunai ġegu ġauvei nuġanai amoiramoirani, o tarima na guruġa e veiġa rakavari ġegu ai ġeveirini, o avekvaraġini nai, o ġevaġa-midigu midiguguni nai, o ġegu dabara doko ġarori ai, au tu aiakuni averereni moġo, korana amoirani negari ai tu, kokore barego vedaureana ma aġoitaġoni.

*Paulo* ġena ura sebona tu Korinto ekalesiana doġorona bene vaġa-kavaia

<sup>11</sup> Au tu tauġegu babo ai bavevaġa-iaġo, maiġesi aguruġani, senaġi mai dia au tauġegu nuġagu siga moġo maiġesi aveini, au ġomi na ġotuġu-naġinaġiguni naima, babo ai avevaġa-iaġoni. Au tu ġomi na namogu boġoro kiraġi, senaġi ġomi na au tu ġokure-toġaguni. Aba, au tu moġoni asi aragu, senaġi mani ġemi “apostolo iaru-korokorori” na au tu asi beġe vanaġiguni. <sup>12</sup> Apostolo korikoriri vetoġari tu vevaġa-gwaġiġi ai, vetoġa boruri ai, nuġa-farevaġi veiġari ai, ema seġuka veiġari boruri ai ġevaġa-foforirito ġomi ġoirami ai, be ġoġitarito maniġeri. <sup>13</sup> Ġomi tu kamara veiġai au na ġomi asi atuġamaġikau-baregomini, ekalesia doġorori kotari atuġamaġikau-baregorini kavana, ei? Asi veiġa tai. Asiġina. Au na ġomi tu moġoni, ġomi ġesi tatanuto-ġoi, monai moġo asi aurato-ġoi, au uragu ai boġono vekvaraġi. Benamo moġa moġo. Ma bema mai veiġa maiġa ġomi na ġoġitaiani asi namo nai tu, benamo anoġimini, ġegu mai vei-rakava boġono tuġamaġi-fitoġaia.

<sup>14</sup> Au toma tu bavei-kavi, naiaġosi atoni. Mai ma baiaġosini maiġa tu ġomi rakaġitami avaġa-toitoiani maiġa. Mai ma baiaġosini mainai maki, asi ma bavaġa-vekwaraġimini, korana au tu dia ġomi ġemi farefare e moni urari na baiaġosini, asiġina, au tu ġomi moġo urami na baiaġosini. Au na ġomi maiġesina aveimini tauna korikori tu maiġa, dia natu na tama sina ġeri farefare e moni etore-ġerevaġirini. Asiġina. Tama sina na naturi ġeri farefare e moni ġetore-ġerevaġirini. <sup>15</sup> Moġesina naima au baiaġosini nai, ma iakugu ġesi, kara ġegu ai maiġeri mabarari ġomi bavinimini, ema au maki nuġagu mabarana ġesi bavinimini, ġomi bana vaġa-kavami ġana. Bema au na ġomi tu auravini-baregomini, karase nai ġomi na au tu asi ġouravini-baregoguni?

<sup>16</sup> Kotari na maki ġevaġa-moġoniguni, au ġomi tu asi avaġa-vekwariġimito-ġoi, senaġi maiġesi ma ġekiraguni. Au tu iaunega rakavarakava, be au na ġomi ġemi ai moni tu ġofaġofa dabarari tari na aġabirito-ġoi ġetoni. <sup>17</sup> Be mo tarima tari ġomi ġemi ai atuġu-iaġosirito, moġeri tu akirarito, ġomi ġemi ai au ġegu moni maki beġene gogo atato ba? <sup>18</sup> Au na Tito anoġiato, ġomi beneasi raka-ġitami atato nai tu, ġita tarikakara ta maki atuġuato, be Tito ekavaiato, ġeiaġosito. Ma Tito eiaġosito nai tu, ġomi ġemi moni easi ġofaġofa-iaġirito, ei? Tito ema au tu iauka sebona nuġanai moġo ġaġauveini, ema dabara sebona na moġo ġaraka-iaġoni.

<sup>19</sup> Ba ġomi vanaġivanaġi ġotuġa-maġini, ġai tu bakuma ġabiġauri guruġari ġomi ġemi ai ġakiraġini ġotoni, ei? Moġoni, ġai tu Keriso nuġanai ema ġai kara ġakiraġirini tu Barau ġoiranai ġaguruġani. Au na aura-vinimini tarimami, ġoseġaġi, ġai na mai kara ġaveirini dagarari mabarari maiġeri tu ġomi boġono kokore uranai ġaveirini. <sup>20</sup> Au tu agarini, korana au basi-raġasini nai, ġomi tu dia au na aura-vinirini veiġari ġovei-tanurini basi-ġoitaġomini, benamo ġomi na ġoura-viniani veiġana au ġegu ai asi boġo doġariani garina. Au agarini, ġomi tu roġo ġovevaneni, ġomamani, ġovebaru-vini rakava-rakavani, ġomata-ġaniġanini, karomi guruġa asi namori ġovinirini, ġoveroritoreni, ġoveiavini, nuġami e ġemi tuġamaġi dia gabu sebonai, senaġi irauirau. <sup>21</sup> Ma au agarini, au basi-votuni nai tu, au ġegu Barau na au bevaġa-maiakaguni ġomi ġoirami ai, benamo matagu gorari beġe riġoni, korana ġevei-rakavato tarimari tu asi ġevetuġamaġi-kureto veiġa rakavari ġerina, kima maġurina na ema mata-boraġa veiġari na. Maiġeri veiġa ġerina ġia ġevemiro-fatafatani.

## 13

### *Vekira-toreġau magona*

<sup>1</sup> Mai tu vaġa-toitoina au ġomi ġemi ai mai aiaġosini. Ma Buka Veaġai ekirani kavana, “Tarima ruarua o toitoi na beġe vaġa-moġonirini guruġari tu moġoni korikori.” <sup>2</sup> Au vaġa-ruaruana ġomi asi-raka-ġitamito nai tu, ġevei-rakavani tarimari e tarima kotari maki au na akira-toreġaurito, au na kara baveiani au baiaġosini nai. Ma maitoma tu au manaġai roġo mai-ġegu nuġanai, ma avaġa-guruġamito kavana ma akira-toreġaurini. Bema au ma baiaġosi-ġenoġoini nai, deikara roġo rakava veiġari evei-tanuni tarimana tu, gwaina asi basi-ġabiani, ġena vei-rakava voina metona baviniani. <sup>3</sup> Korana ġomi ġemi ura tu boġono vaġa-moġonia veġata, Keriso tu moġoni au ġeguna eguruġani ba asiġina. Ġoseġaġi, Keriso ġomi ġemi ai tu asi emoirani, asiġi. Ġia kara ġomi fakami ai neveia betoni seġukana tu barego lelevaġi. <sup>4</sup> Aba, Keriso, mo tu tauġanina ġena moiramoira lorinai, satauro tuġunai ġeikoko-kauato, benamo emaseto, senaġi ġia initoma tu Barau ġena seġukai emaġuri-tanuni. Iesu Keriso nuġanai ġai maki tauġani ai tu moiramoira Iesu kavana, senaġi Barau ġena seġukai ġamaġuri-tanuni Keriso ġesi. Ema ġomi ġemi ai ġai na kara baġa veiani tu mai Barau ġena seġukai.

<sup>5</sup> Ġomi tauġemi nuġami ema ġemi maġuri boġono ragaġi-ginikauri, ġomi tu moġoni ġoveġabidadamani ba asiġina. Ġomi tauġemi ġemi maġuri na ema ġemi veiġa na boġono vevaġa-fofori korikori! Ba ġomi tauġemi tu asi ġoriba-maoroni, Keriso Iesu tu ġomi nuġami ai etanuni ba? Bema moġoni tauġemi ġovetovo-naġini, benamo ġoribani, Keriso tu dia ġomi nuġami ai, monai vauro ġomi tu moġoni asi ġoveġabidadama-korikorini. <sup>6</sup> Au moġoni aribani, ġomi tauġemi na ġai boġo riba-maoromani, ġai tu moġoni Keriso vetuġunaġina ġaiaġo-vinini, a dia Barau na asi evaġa-moġonimato tarimama. <sup>7</sup> Ma ġai ġema ġauġau ai Barau ġanoġiani, ġakirani, ġomi bene vaġa-kavami, be veiġa rakavana ta asi boġono veia. Ġai tu dia ġaġuriġurini, ġakirani, tarimarima na ġai vetovo-naġi ai ġakokoreto, moġa beġene ġitaia ġatoni. Asiġina. Au ġegu ura ġomi tu vei-iobukaiobuka tarimami ai boġono iaġo. A tarima-rima beġe kirani, ġai tu ġaketoto beġe toni, moġa ġai na tu asi ġatuġa-maġiani. <sup>8</sup> Korana tu ġai na guruġa moġonina kouġauna veiġana ta tu asi ilaila baġa veiani, a ġai na tu guruġa moġonina



moḡo baḡa vaḡa-foforiani. <sup>9</sup> Ġai ḡamoirani nuḡanai, ḡomi ḡokokoreni tu, ḡai ḡema iaku ebaregoni. Ema ḡai ḡema ḡauḡau baregona ḡaveiani tu, ḡomi boḡono kokore-korikori ḡemi veḡabidadamai. <sup>10</sup> Moḡesina naima mai fefai maiḡeri guruḡa atore-vinimini, au mainai roḡo maiḡegu nuḡanai. Korana au asi aurani, au banasi-raḡasi nai tu, ḡomi bana vaḡa-guruḡa gwaḡiḡimi. Korana Vereḡauka na au mai maoro baregona eviniguto tu, ḡomi ḡemi veḡabidadama bana vaḡa-kokoreri, a dia bana vaḡa-rakavari ḡana.

*Veḡabituḡu dokona*

<sup>11</sup> Tarikakagu, ḡegu guruḡa magona tu maiḡa, boḡono gena. Tuḡamaḡi barana ḡoirami ai boḡono torea tu, boḡono namo-vedaurea, ḡegu guruḡa mabarari boḡono korana-iaḡiri. Nuḡami beḡene gwaḡiḡi, mabarabarami tuḡamaḡi sebona moḡo boḡono ḡabia, maino ai boḡono tanu, ema veuravini e maino Barauna ḡomi sevisevimi ai bene tanu.

<sup>12</sup> Karomi tata vetarikaka verauna na boḡono vaḡa-namori.

<sup>13</sup> Veāḡa o ekalesia tarimari mabarari na ḡeri vevaḡa-namo ḡemi ai ḡetuḡu-iaḡosiani.

<sup>14</sup> Vereḡauka Iesu Keriso ḡena namo e varevare-bara ema Barau ḡena veuravini ema Iauka Veāḡa ḡena vekako namona, ḡomi mabara-barami iatami ai bene tanu.

## PAULO ĜENA TORETORE GALATIA EKALESARI ĜERI

Galatia vaĝa-foforina guruĝari

Paulo na mai fefa tu betaĝu Antioka, Efeso o Makedonia ai etanuto-ĝoi nuĝanai etoreato. Mai tu laĝani 48 ema 58 fakari ai ta etoreato. Mo tu Iesu maki emaseto murinai vau. Ĝia ĝena guruĝa baregori mai fefa nuĝanai tu karoa 2:19-21; 3:2-3; 3:11; 5:1 ekiraĝirito.

Paulo na mai fefa etoreato korana tu Iuda tarimari tari ĝe-ekalesiato moĝeri na Galatia ekalesiari vevaĝa-riba kerereri ĝevinirito-ĝoi naima. Ĝia ĝekirato-ĝoi, tarimarima tu Mose ĝena taravatu guruĝari beĝe korana-iaĝirini vauro vevaĝa-maĝuri korikori beĝe ĝoitaĝoani. Moĝesi naima evaĝa-guruĝa gwaĝiĝirito, ekirarito, maĝuri ema vei-iobukaiobuka tu veĝabidadama ĝereĝana ĝenana moĝo Barau ĝena namo ema varevare-bara nuĝanai bita ĝabiani, a dia ĝera ĝauvei e veiĝa ĝerina. Ema ekirarito, ĝita tu Keriso ĝena mase na taravatu ĝena seĝuka na eruĝa-vaĝirato, ema ĝita tu Iauka Veaĝa varau taĝabiato, be Iauka na bene ĝori-kaura.

Paulo na ĝena fefa tu maiĝesi eboioĝaiato:

1. Paulo tauĝena na Vari Namona guruĝana ekiraĝiato - karoa 1-2
2. Vevaĝa-maĝuri tu taravatu ĝenana ba Barau ĝena namo e varevare-bara ĝenana eiaĝomani - karoa 3-4
3. Veiĝa rakavari ĝerina bitana raka-faka ba roĝo bitana veiri - karoa 5-6

<sup>1</sup> Au Paulo, apostolo tarimagu na mai fefa tu ĝomi Galatia nuĝanai ekalesia doĝoromi ĝemi atore-iaĝosiani. Au tu dia tarimarima ĝeri urai mai ĝauvei aveiani, e dia tarima ta na etuĝuguto, mai apostolo ĝauveina bana veia etato. Asiĝina. Au tu Iesu Keriso ema Tamara Barau na etuĝuguto nai, mai apostolo ĝauveina aveiani. Iesu Keriso tu Barau na mase na ma evaĝa-variĝisi ĝenoĝoiato. <sup>2</sup> Ĝegu vevaĝa-namo tu tarikakara mabarari au ĝesi mainai ĝatanuni ĝesi, ĝomi Galatia nuĝanai ekalesia doĝoromi ĝemi ĝatuĝu-iaĝosiani.

<sup>3</sup> Barau ĝita Tamara ema Vereĝauka Iesu Keriso ĝerina namo e varevare-bara ema maino ĝomi ĝemi ai bene tanu. <sup>4</sup> Iesu Keriso na ĝita ĝera Barau ema Tamara ĝena ura ekorana-iaĝirito, ĝia tauĝena ĝena maĝuri ĝita ĝera rakava dainai etore-tariato. Mo veiĝa eveiato anina tu, ĝita toma mai tanobarai etanuni rakavana ĝenana bene vaĝa-maĝurira uranai. <sup>5</sup> Tamara Barau arana bitana vaĝa-raĝea vanaĝivanaĝi! Amen.

*Vari Namona tu sebona kwariĝutu moĝo*

<sup>6</sup> Ĝomi na mani maĝuri boĝo veia nai, au tu badaradara-rakava moĝo. Korana ĝomi tu Keriso ĝena namo e varevare-bara lorinai, Barau na ekeamito, ĝena tarimarimai boĝono iaĝo ĝana. Ma nuĝanai ĝomi tu asikauna ĝia ĝenana ma boĝo ragaraka-veĝita, benamo vari boruna ta ma boĝo ĝabi-raĝea. <sup>7</sup> Mani vau boĝo ĝabi-raĝea maniĝa tu dia Vari Namona. Asiĝina ĝinavaĝi moĝo. Ĝomi mani tu moĝoni, tarima kotari na ĝeĝofa-veĝonumini. Ĝia ĝeurani tu, Keriso Varina Namona beĝene vei-veĝonua veĝata ĝetoni. <sup>8</sup> Senaĝi ĝai na ĝomi tu Keriso Varina Namona moĝo ĝemi ĝaĝobata-iaĝiato, ma vari boruna ta tu asiĝina. Bema ĝai o guba aneruna ta vari boruna ta ĝemi ma baĝa ĝobata-iaĝiani nai, dei moĝesina beveini tarimana tu, rakava baregona ĝenai betanu-vanaĝi vanaĝini. <sup>9</sup> Mai guruĝa tu bita kiraĝia, senaĝi au na mai akiraĝi-ĝenoĝoiani. Bema tarima ta na ĝemi ai "Vari Namona" easi-ĝobata iaĝiani, senaĝi ĝia na eĝobata-iaĝiani varina tu mo ĝoĝabi-raĝeato varina moĝa ĝesi asi ilaila nai tu, mo tarima ĝenai rakava metona baregona bene tanu-vanaĝi vanaĝi.

<sup>10</sup> Au maiĝesina aguruĝani tu, tarimarima na beĝene ĝabi-raĝegu ĝana, ba Barau na bene ĝabi-raĝegu? Ba mai tarimarima iauri navaĝa-namori ĝana aguruĝani?

Bema tarimarima iauri inította maki roḡo navaḡa-namori barasi, au toma Keriso ḡena vetuḡunaḡi ai tu asi bara iaḡo.

*Paulo apostolo tarimanai eiaḡoto varina*

<sup>11</sup> Tarikakagu mabarami, au na ḡomi avaḡa-guruḡa korikorimini. Mo Vari Namona na ḡomi ḡemi ai aḡobata-iaḡiato, moḡa tu dia tarima ta ḡenana erefo-taḡuito moḡo varina. <sup>12</sup> Mai Vari Namona maiḡa, au na tu dia tarima ta ḡenana aḡabiato, ema dia tarima ta na evaḡa-ribaguto. Asiḡina ḡinavaḡi. Mai Vari Namona maiḡa tu Iesu Keriso tauḡena na ḡegu ai evaḡa-foforiato vau aribaiato.

<sup>13</sup> Au guinenai Iuda ḡeri doḡoro nuḡanai atanuto-ḡoi nai, kara aveirito-ḡoi variri tu ḡoseḡaḡirito, be ḡomi ma ribami. Barau ḡena ekalesia doḡorona aiḡesi avaḡa-midigu midigurito-ḡoi e alai-lausilausirito-ḡoi bana vaḡa-rakavari veḡata atato-ḡoi variri tu ma ribami. <sup>14</sup> Au na Iuda seneri ḡeri maḡuri mabarabarari akorana-iaḡi ginikaurito-ḡoi. Ma au na mai maḡuri aveiato-ḡoi nuḡanai tu, Iuda tarimari au ḡuru karogu tauri mabarari au na aguine-iaḡirito-ḡoi.

<sup>15</sup> Senaḡi au tu roḡo sinagu legana nuḡanai, Barau na eḡabi-viriḡiguto, ema ḡena namo e varevare-bara lorinai ekeaguto, ḡia ḡena ḡauvei bana veia etato. Benamo Barau na eura-viniato ḡaronai, <sup>16</sup> Natuna au ḡegu ai evaḡa-foforiato. Keriso au ḡegu ai, Barau na evaḡa-foforiato, anina tu, ḡia eurato, au na Natuna Varina Namona irau bese tarimari ḡeri ai bana ḡobata-iaḡia ḡana. Barau na Natuna ḡegu ai evaḡa-foforiato nai tu, tarima ta ḡenai asi ma avedanaḡito. <sup>17</sup> Ierusalemā ḡana ḡeapostolo-guineto tarimari ḡeri ai vedanaḡi maki asi avaraḡeto. A au mo veiḡa aḡoitaḡoato murinai tu, maoromaoro Arabia ḡana aiaḡoto. Ma monana ma aḡenoḡoi-iaḡoto Damaseko ḡana. <sup>18</sup> Monai, laḡani toitoi (3) ḡevanaḡito murinai vau, Ierusalemā ḡana avaraḡeto, Petero ḡesi baḡana guruḡa-ḡuruḡa uranai. Petero ḡesi Ierusalemā ḡaro gabanana imaima (15) ḡatanuto. <sup>19</sup> Au mo negai apostolo boruna ta tu asi aḡitaiato. Au tu Vereḡauka tarina Iakobo (o Iames) moḡo aḡitaiato. <sup>20</sup> Barau ḡoiranai au na ḡomi mai tu guruḡa moḡoniri atore-vinimini, asi aḡofaḡofani.

<sup>21</sup> Ierusalemā araga-kwaneato tu, Siria ema Kilikia tanori ḡana aiaḡoto. <sup>22</sup> Keriso ḡena tarimarima, Iudea tanonai ḡetanuni ekalesiari, au ḡitaḡitagu ḡia tu asi ribari. <sup>23</sup> Senaḡi ḡia na au tu varigu korina moḡo maiḡesi eragato ḡeseḡaḡiato-ḡoi, ḡekirato-ḡoi, “ḡita guinenai evaḡa-midigu midigurato-ḡoi e elai-lausilausirato-ḡoi tarimana, toma tu nevaḡa-rakavaia etato-ḡoi veḡabidadamana ma eḡobata-iaḡiani.” <sup>24</sup> Benamo Barau na kara au ḡegu ai eveiato, moḡa ḡeseḡaḡiato nai tu, Barau ḡevaḡa-raḡeato.

## 2

*Apostolo tarimari na Paulo ḡena ḡauvei ḡevaḡa-moḡoniato*

<sup>1</sup> Laḡani gabanana vasivasi (14) ḡekorito murinai vau, Banabas ḡesi Ierusalemā ḡana ma ḡaḡenoḡoi-iaḡoto. Tito maki au na aḡori-kauato, be ḡia maki ḡaiaḡoto. <sup>2</sup> Au tu Barau na ḡegu ai evaḡa-foforiato, naima aiaḡoto Ierusalemā ḡana. Ma monai Vari Namona, irau bese tarimari ḡeri aḡobataiato-ḡoi varina, Ierusalemā ekalesia ḡeri akiraḡiato. Ma mo Vari Namona tu veḡorikau tarimari baregori ḡereḡari ḡeri ai maki akiraḡiato, ḡia na ḡegu ḡauvei beḡene vaḡa-moḡonia ḡana; korana agarito, akirato, asi namo au ḡegu ḡauvei guinena moḡa, o mai ḡauvei variḡuna aveirini maiḡa asi tauri ai beḡe iaḡoni gariri. <sup>3</sup> Tito tu Grik tarimana, ma au Ierusalemā neganai, ḡia tu au ḡesi, senaḡi ḡia tauḡanina kefina beḡene lama-vaḡia ḡiḡiraḡena tu asi ḡeveito. <sup>4</sup> Senaḡi ekalesia o tarikaka ḡofaḡofari tari ḡai fakamai ḡerakatoḡa-ḡairito, ḡeurato tu, Tito tauḡanina kefina beḡene lama-vaḡia veḡata ḡetato. ḡia ḡai fakamai ḡema-rakatoḡa-ḡairito, korana ḡeurato, ḡai Keriso Iesu ḡesi ḡasebonato nai, ḡai ḡema maḡuri namona e fakana maiḡa, beḡene ḡita-lemaia uranai. Korana ḡia ḡeri ura tu, Iuda ḡeri sene taravaturi na ḡai ma beḡene barubaruma maia. <sup>5</sup> Senaḡi hora misina nuḡanai ta maki ḡia garori tu asiḡina

ġinavaġi veġata ġaseġaġirito. Ġai moġesina ġaveito tauna korikori tu, Vari Namona guruġana moġonina ġomi rekemi ai bene tanu-vesiriġu uranai.

<sup>6</sup> Veġorikau tarimari baregori tu ma arari, a asi arari au ġegu ai, ġia tu ilaila moġo. Barau na tarimarima tu dia tauġanina murikana vetoġana eġitaiani. Maniġeri veġorikau tarimari na guruġa ta auna vari iatanai tu asi ġetore-kauato. <sup>7</sup> Senaġi ġeġitaguto, Barau na au ġauvei eviniguto tu, mero tauġaniri kefiru asi ġelama-vaġirito tarimari ġeri, mo tu irau bese tarimari ġeri, Vari Namona bana ġobata-iaġia etato, ilailana Petero mero tauġaniri kefiru ġelama-vaġirito tarimari ġeri ai, mo tu Iuda tarimari ġeri ai, Vari Namona bene ġobata-iaġia etato kavana. <sup>8</sup> Korana Barau Iuda tarimari ġeri apostolo tarimana Petero ġena ġauvei nuġanai eġauveito-ġoi kavana tu, au irau bese tarimari ġeri apostolo tarimagu ġegu ġauvei nuġanai maki eġauveini. <sup>9</sup> Iakobo (o Iames), Petero ema Ioane tu rubu duġuna tarimari monai. Ġia na au ġegu ai Barau ġena namo e varevarebara ġeġita-leaiato, benamo ġimari aroribari na au e Banabas ġeġabi-rukumato. Moġa anina tu, ġia ma nuġari mabarari ġesi ġekirato, Banabas ema au tu irau bese tarimari ġeri ai, ma ġia tu Iuda tarimari ġeri ai beġe iaġoni. <sup>10</sup> Guruġa sebna moġo ġai ġevinimato tu ġekirato, asi ġeri-ġari tarimari baġana tuġamaġiri e baġana vaġa-kavari ġetato. Senaġi mai veiġa tu au tauġegu na maki bana veia veġata atoni veiġana.

*Paulo na Petero ekira-feiato, korana veiġa ġofaġofana eveiato nai*

<sup>11</sup> Petero Antioka ġana eiaġomato neganai tu, au na ġoirana ġutu-ġutunai akira-matana matanaiato, korana ġia na veiġa eleaiato nai. <sup>12</sup> Tovotovonai Iakobo na etuġurito tarimari Petero ġenai roġosi roġo beġere laġasi neganai, Petero tu irau bese tarimari ġesi ġeġaniġani vegogoto-ġoi. Senaġi Iakobo na etuġurito Iuda tarimari ġevotuto nai, ġia tu irau bese tarimari fakari na ma eraka-veġitato. Petero irau bese tarimari fakari na eraka-veġitato, korana mero tauġaniri ġelama-vaġirini veiġana ġekorana-iaġiani tarimari, Iuda tarimari, gariri eveito nai. <sup>13</sup> Iuda tarimari kotari maki Petero ġesi ġesebonato, be Petero ġena mo veiġa ġofaġofana ġeveiato. Ma Banabas maki ġia ġeri mai ġofaġofa maġurina na, be ġia maki ġeġofa-darereato. <sup>14</sup> Senaġi au ġegu ġitaġitai ġia tu Vari Namona maġurina korikorinai tu asi ġerakato-ġoi naima ġia mabarabarari matari ġutuġuturi ai au na Petero akira-matana matanaiato, akirato, “Ġoi tu Iuda tarimamu, senaġi Iuda tarimari ġeri sene maġurinai tu asi otanuni, a ġoi tu irau bese tarimari ġeri tanu-maġurinai otanuni. Ma kara dainai tu irau bese tarimari ovaġa-naġirini, Iuda tarimari seneri ġeri taravatu lorinai beġene tanu otoni, ei?”

*Iesu bevaġa-moġoniani tarimana na moġo, Barau na vei-iobukaiobuka tarimanai bekiraġiani*

<sup>15</sup> Aba, ġita Iuda tarimara tu Iuda korikoriri ġerina taġorato. Ġita tu dia irau bese tarimari ġerina taġorato. Irau bese tarimari tu vei-rakava tarimari. <sup>16</sup> Ma ġita Iuda tarimara tu ribara, Barau na tarimarima tu dia taravatu na ekiraġirini veiġari ġekorana-iaġi ginikaurini nai, ekirarini, asi ġeri vei-rakava etorini. Asiġina. Ġia tu Keriso ġenai ġeveġabidadamani naima ekirarini, asi ġeri vei-rakava etoni. Ġita maki moġesi. Keriso Iesu tavaġa-moġoniato naima Barau ekirato, asi ġera rakava etato. Dia taravatu na ekiraġirini veiġari takorana-iaġi ginikaurini dainai. Asiġina. Keriso ġenai taveġabi-dadamato nai. Korana tu taravatu ekorana-iaġi ginikaurini tarimana ta Barau na tu asiġina ġinavaġi beġabi-raġeani. Asiġina moġo. <sup>17</sup> Bema ġita Iuda tarimara tavekwarāġini, taurani, Keriso ġesi bitana sebna, be Barau na bene ġabi-raġera tatoni nai tu, ġita tauġera tavevaġa-foforini, ġita tu vei-rakava tarimara. Moġa anina tu, Keriso eiaġomato vei-rakava benema vaġa-baregoa ba? Asiġina ġinavaġi! <sup>18</sup> Bema au na mo taravatu, asi tauri ai avaġa-iaġorito dagarari, ma navaġa-ruġa ġenoġoiri atoni nai, au tu moġoni vei-rakava tarimagu, taravatu asi akorana-iaġiani. <sup>19</sup> Korana taravatu akorana-iaġirito-ġoi maġurinai au tu varau amaseto, be taravatu au na asi ma bakorana-iaġi ġenoġoiani. Taravatu akorana-iaġiato-ġoi maġurinai au tu amaseto anina tu, Barau ġena moġo bana tanu uranai. <sup>20</sup> Au tu Keriso ġesi ġesatauro-sebonaguto; dagara sebna

tu, roĝo maĝuri atanuni, senaĝi mai tu dia au tauĝegu ĝegu maĝuri. Asiĝina. Mai tu Keriso au nuĝagu ai maĝuri etanuni. Au mai tauĝani nuĝanai mai maĝuri atanu-iaĝiani maiĝa tu, Barau Natuna ĝenai aveĝabidadamani lorinai atanuni. Mai Barau Natuna na au eura-viniguto, ma au maĝuri bana ĝabia ĝana, tauĝena ĝena maĝuri evini-fitoĝaiato. <sup>21</sup> Au na Barau ĝena namo e varevare-bara tu asi atore-veĝitaiani. Asiĝina ĝinavaĝi. Korana bema tarima ta na taravatu bekorana-iaĝiani nai, vei-iobukaiobuka tarimanai beiaĝoni neganai, Keriso tu bere mase-kava, asi ĝena namo ta.

### 3

*Taravatu tana korana-iaĝia*, ba veĝabidadamai moĝo bisini tanu

<sup>1</sup> Ĝomi Galatia tarimami babomi! Iesu Keriso satauro ai ĝeikoko-kauato varina tu au ĝegu ĝobatai, be matami ĝutuĝutunai akiraĝi-fofori ginikauato. Ma ĝomi mai tu kamara ĝora tarimana na ĝemi tuĝamaĝi bemeĝa-veĝonuri maia, ei? <sup>2</sup> Au aurani, mai dagara sebona ĝomi na ĝokira-varagu: Ĝomi na Iauka Veaĝa tu taravatu ĝokorana-iaĝi ginikauato nai ĝoĝabiato, ba Keriso Varina Namona ĝoseĝaĝiato, benamo ĝovaĝa-moĝoniato nai ĝoĝabiato? <sup>3</sup> Ĝomi tu moĝoni boĝo babo-korikori, ei? Ĝomi maĝuri variĝuna dabaranai raka tu Iauka Veaĝa ĝena seĝukai ĝosinaiato, maitoma ĝomi ĝourani, magona tauĝemi ĝemi kokore ai boĝono ĝoitaĝoa ĝotoni? <sup>4</sup> Be, ĝomi mo meto ma midigumidigu tu ĝoĝoitaĝo-kavarito, asi ĝeri namo ta? Senaĝi mo meto ma midigumidigu, au ribagu tu, asi ĝoĝwa-kavarito. <sup>5</sup> Ma nadanaĝimi atoni, Barau na ĝomi Iauka Veaĝa evinimini e fakami ai nuĝa-farevaĝi veiĝari boruri eveirini, korana ĝomi na taravatu ĝokorana-iaĝi ginikauani nai ba? Ba Keriso Varina Namona ĝoseĝaĝiani, benamo ĝovaĝa-moĝoniani dainai?

<sup>6</sup> Ĝotuĝamaĝi-ĝenoĝoi, Aberahamo ĝotuĝamaĝia: “Ĝia tu Barau na ekiraĝi-toreato guruĝana evaĝa-moĝoniato naima, Barau ekirato, ĝia tu vei-iobukaiobuka tarimana, etato.” <sup>7</sup> Moĝesina naima boĝono riba, Barau ĝeĝabidadama-viniani tarimari ĝereĝari moĝo Aberahamo natuna. <sup>8</sup> Buka Veaĝai etore-guineato guruĝana na ekiraĝiani, ekirani, ĝoirai Barau na irau bese tarimari tu ĝeri veĝabidadama ĝerina vau bekirarini, asi ĝeri rakava betoni. Moĝesina naima, Aberahamo ĝenai Vari Namona tu ekiraĝi-fofori guineato, ekirato, “Tanobara mabarabarari beseri tu, ĝoi ĝemuna vau vevaĝa-namo beĝe doĝariani.” <sup>9</sup> Aberahamo na Barau eĝabidadama-viniato, benamo Barau ĝenana vevaĝa-namo eĝoitaĝoato. Moĝa ilailanai Barau ĝenai ĝeveĝabi-dadamani tarimari mabarabarari tu, Barau ĝena vevaĝa-namo beĝe ĝabiani.

<sup>10</sup> Taravatu ĝekorana-iaĝi ginikauani vau, Barau ĝoiranai vei-iobukaiobuka tarimari ai beĝe iaĝoni ĝetoni tarimari mabarari iatari ai tu rakava metona lelevaĝina etanuni. Korana Buka Veaĝai tu maiĝesina ekirani, “Taravatu bukanai ĝetorerito guruĝari asi ĝekorana-iaĝi vanaĝi-vanaĝirini tarimari iatari ai tu rakava metona lelevaĝina betanuni.” <sup>11</sup> Buka Veaĝa na bevaĝa-fofori ginikaua, taravatu bekorana-iaĝiani tarimana Barau ĝoiranai tu dia vei-iobukaiobuka tarimana. Korana “Barau beĝabidadama-viniani tarimana tu vei-iobukaiobuka tarimanai beiaĝoni, be bemaĝurini.” <sup>12</sup> Taravatu tu irau veĝata, ĝia tu dia veĝabidadama ĝenana eiaĝomani. Korana Buka Veaĝa ekirani, “Taravatu ekorana-iaĝi ginikauani tarimana tu taravatu ĝenana moĝo maĝuri beĝabiani.”

<sup>13</sup> Senaĝi ĝita tu taravatu ĝena rakava metona lelevaĝina ĝenana Keriso na varau evoi-vaĝirato. Ĝita tu ĝia tauĝena na eruĝa-boroĝirato, benamo mo rakava meto lelevaĝina tu ĝia na eĝabiato. Korana Buka Veaĝai etoreato, ekirani, “Ĝau ai ĝetou-kaurini, ĝemaseni tarimari mabarabarari iatari ai tu Barau na rakava meto lelevaĝina etore-kauani.” <sup>14</sup> Keriso na ĝita taravatu ĝena rakava meto lelevaĝina ĝenana evoi-vaĝirato, tauna korikori tu, Barau na Aberahamo vevaĝa-namo eviniato, mo vevaĝa-namo moĝa tu irau bese tarimari na maki Iesu Keriso ĝenana beĝene ĝabia uranai.

Korana mo dabarai tu, Barau na ekiraḡi-toreato Iaukana tu Iesu Keriso beḡe vaḡa-moḡoniani tarimari mabarari na maki beḡe ḡabiani.

*Barau* ḡena taravatu na Barau ḡena guruḡatore guinena asi ilaila bekoki-fitoḡaiani

<sup>15</sup> Tarikakagu mabarami, tarimarima ḡera tanu-maḡurinai guruḡa vaḡa-ilailana ta nakiraḡia. Vaḡa-ilailana tarimarima ḡera kiraḡitore guruḡana emoḡonini, benamo tavaḡa-ruḡaiani nai tu, mo guruḡatore moḡa tarima ta na asi ma bekira-fitoḡaiani o iatanai guruḡa boruna ta asi ma betore-kauani. <sup>16</sup> Barau na mo guruḡatore guruḡari tu Aberahamo ema Aberahamo besena sebona moḡo ḡeri ai ekiraḡirito. Buka Veaḡai etoreato guruḡana tu dia maiḡesi ekirani, “Ḡoi besemu ḡutumari ḡeri,” korana moḡesi bere kira tu tarimarima ḡutuma bere kiraḡiri; senaḡi ḡia tu ekirani, “Ḡoi besemu sebona ḡenai.” Mai tu tarima sebona kwariḡutu moḡo ekiraḡiani, mo tu Keriso ḡereḡana moḡo ekiraḡiani. <sup>17</sup> Au na kara akiraḡiani tu iniḡa: Barau ḡena guruḡatore guruḡana Aberahamo tu evini-guineato; ma laḡani sinau vasivasi ma gabana toitoi (430) evanaḡiatio murinai vau, Barau na taravatu evaḡa-ruḡaiato. Ma vau ema ruḡato taravatuna na Barau ḡena guruḡatore guinena moḡa tu asiḡina ḡinavaḡi bekoki-fitoḡaiani, benamo Barau ḡena guruḡatore moḡa tu asi taunai bevaḡa-iaḡoani. Asiḡina ḡinavaḡi veḡata. <sup>18</sup> Bema Barau na evinirato dagarana tu taravatu bita korana-iaḡi ginikauani vau bita ḡabiani nai tu, mo bita doḡariani dagarana moḡa tu, ribara, dia ekiraḡi-toreato maḡurinai bita doḡariani. Senaḡi Barau tu ḡena namo e varevare-barai eguruḡa-toreto, ma Aberahamo eviniato.

<sup>19</sup> Bema moḡesi nai tu, kara dainai taravatu eiaḡomato? Taravatu eiaḡomato anina tu, tarimarima na Barau ḡekira-sirivaḡiatio-ḡoi maḡurina, moḡa tu taravatu na bene vaḡa-fofori ginikaua. Ma Barau na mai taravatu tu dia betanu-vanaḡi vanaḡini etato. Asiḡina. Mai taravatu tu betanu-iaḡoni mo, Aberahamo natuna bemaḡurini vau bea magoni. Korana Barau ḡena mo guruḡatore tu ḡia ḡenai eveiatio. Mai taravatu tu Barau na aneru ta eviniatio. Benamo mo aneru na tu Barau ma tarimarima vefakari ai eruḡato tarimana eviniatio. Ma mo vefakari ai eruḡato tarimana na tu, ḡita ḡerai ekiraḡi-foforiatio, bitana korana-iaḡia ḡana. <sup>20</sup> Bema tarima sebona moḡo eḡauveini nai tu, vefakai eruḡani tarimana tu asi ḡena ḡauvei. Ma Barau mainai tu ḡereḡana moḡo, e ḡereḡana moḡo eguruḡa-toreto.

*Taravatu anina tu kara?*

<sup>21</sup> Be, moḡa tauna tu, taravatu na Barau ḡena guruḡatore guruḡana ekira-fitoḡaiani? Asiḡina ḡinavaḡi. Korana bere Barau na tarimarima taravatu ta bere viniri, benamo mo taravatu ḡenana tarima maḡuri beḡere doḡaria nai tu, moḡoni, ḡita tu taravatu korana-iaḡi-ginikauna ḡenana, vei-iobukaiobuka tarimarai bitara iaḡo. <sup>22</sup> Senaḡi Buka Veaḡai etoreato guruḡana na ekiraḡi-foforiani, ekirani, “Mai tanobara mabarabarana tu veirakava ḡena seḡuka gaburenai etanuni.” Moḡa lorinai kara Barau na ekiraḡi-toreato dagarana, moḡa tu Iesu Keriso ḡenai bita veḡabidadamani vau bita doḡariani. Moḡa tauna tu, Keriso bevaḡa-moḡoniani tarimana tu Barau na ekiraḡi-toreato varevarena beviniani.

<sup>23</sup> Iesu ḡenai veḡabidadama maiḡa roḡosi roḡo bere fofori nuḡanai, tovtovonai ḡita tu taravatu ḡena seḡuka gaburenai tatanuto-ḡoi, taravatu na ebiri-ḡaurato mo, Iesu ḡenai veḡabidadama Barau na ma ema vaḡa-foforiatio. <sup>24</sup> Be, taravatu na tu ḡita eguine-iaḡirato mo, Keriso eiaḡomato, benamo ekorito. Moḡa anina, ḡita tu Iesu ḡenai bita veḡabidadamani vau, Barau bekirani, ḡita tu asi ḡera rakava betoni. <sup>25</sup> Initoma tu veḡabidadama ḡena nega beraḡasi, naima taravatu na ḡita tu asi ma beḡori-kaurani.

*Veḡabidadamai Barau natunai bita iaḡoni*

<sup>26</sup> Ḡomi mabarabarami tu Barau natuna, korana tu Keriso Iesu ḡenai ḡoveḡabidadamani bene. <sup>27</sup> Ḡomi babatiso ḡoḡabiatio tarimami mabarami, Keriso ḡesi ḡosebonato, be Keriso nuḡanai ḡotanuni. <sup>28</sup> Ḡomi mabarami fakami ai ta tu asi ḡemu irau ta. Ḡoi tu Iuda tarimamu o irau bese tarimamu, tuḡu-rakaorakao tarimamu

o fakai otanuni tarimamu, vavine o tau, senaḡi ḡomi mabarami tu sebona moḡo. Keriso Iesu ḡesi ḡosebonato nai, ḡomi mabarami tu sebona kwariḡutu moḡo. <sup>29</sup> Bema ḡomi Keriso ḡena tarimarima nai, ḡomi tu Aberahamo besena, ema Barau na ekiraḡi-toreato dagarana maki boḡo ḡabiani.

## 4

*Vetuḡunaḡi tauna tu irau, ma natuna korikoriri maki irau*

<sup>1</sup> Au tu iniḡesi akirani: Mero misina ta, bema ḡia roḡo mero kei neganai, tamana na eviniato dagarari mabarabarari asi roḡo beḡaunarini. Aba, mo dagara mabarabarari tu ḡia ḡena fafare, senaḡi ḡia tu roḡo mero kei, naima ḡia na asi roḡo beḡaunarini. A ḡia tu tuḡu-rakaorakao tarimana kavana roḡo betanuni. <sup>2</sup> Mo mero misina benariani tarimari, ema mo ḡena dagara beḡe ḡita-ḡaurini tarimari ḡeri veḡitaḡau gaburenai roḡo betanuni, beiaḡoni mo, tamana na ekiraḡi-toreato ḡarona bea ḡabiani. <sup>3</sup> ḡita maki moḡesina, roḡo mero misira e kekenira misira negari ai tu, taravatu irauirau e tanobara barauri ḡeri tuḡu-rakaorakao merora e kekenirai taiaḡoto. <sup>4</sup> Senaḡi Barau na eviriḡiato ḡarona evotuto nai, Barau na Natuna etuḡu-iaḡomaiato, vavine ta ḡenana ema maḡurito. Barau Natuna etuḡu-iaḡomaiato maiḡa tu, taravatu ḡena seḡuka gaburenai ema maḡurito. <sup>5</sup> ḡia taravatu ḡena seḡuka gaburenai ema maḡurito korana tu, taravatu ḡena seḡuka gaburenai tatanuni tarimarimara benema voi-ḡenoḡoira, benamo Barau natunai bisini iaḡo ḡana.

<sup>6</sup> ḡomi tu moḡoni Barau natuna. Moḡesi naima Barau na Natuna Iaukana etuḡu-mariḡoato, ḡita tata lorurai o nuḡarai eraka-toḡato, ma etanuni. Mo Iauka moḡa ḡita lorura ḡuturi na ekea-rosini, ekirani, “Tamagai, Tamagai!” etoni. <sup>7</sup> Moḡesi naima ḡomi toma tu dia taravatu ḡena tuḡu-rakaorakao tarimami. Asiḡina. ḡomi toma tu Barau natuna. ḡomi tu moḡoni Barau natuna lorinai, Barau na natuna bevinirini dagarari mabarabarari tu ḡomi na maki boḡo ḡabirini.

*Paulo na Galatia tarimari etuḡamaḡi-baregorito*

<sup>8</sup> Guinenai ḡomi na Barau roḡosi roḡo boḡoro ribaia neganai, ḡomi tu ḡofaḡofa barauri ḡotoma-rakariḡo vinirito-ḡoi, (ḡia tu ḡima veiveiri dagarari moḡo), ḡia ḡeri tuḡu-rakaorakao tarimari ai ḡoiaḡoto. <sup>9</sup> Senaḡi toma tu, Barau boḡoma ribaia, ba nakira, Barau na ḡomi bema ribami. Ma kamasi nai tu taravatu moiramoirari, asi tauri dagarari ma ḡokorana-iaḡi ḡenoḡoiri ḡotoni? ḡomi ḡourani tu, maniḡeri taravatu na ma beḡene barubaru-tarimi ḡotoni, ei? <sup>10</sup> ḡomi tu ḡaro e ḡue, vereko ḡarori e laḡani tari ḡotuḡamaḡi-baregorini e ḡokorana-iaḡi baregorini. <sup>11</sup> Au ḡomi ḡemi veiḡa aḡitarini tu, mai ama tuḡamaḡi-garini. Akirani, au ḡomi ḡemi ai tu, betaḡu avekwaḡi-kavato banaḡu atoni.

<sup>12</sup> Tarikakagu mabarami, anoḡimini, au kavana boḡono vei, korana au maki taravatu aiaḡuiato nai, ḡomi kavana aveito bene. ḡomi na au ḡegu ai veiḡa rakavana ta tu asi ḡoveiato. <sup>13</sup> ḡomi maki ma ribami, au tovotovonai ḡomi Vari Namona au na aḡobata-vinimito tu, mo keve ta na eḡabiguto, benamo maninai tatanuto-ḡoi nai. <sup>14</sup> Aba, au ḡegu ai mo keve moḡa tu, ḡomi ḡemi ai vetovonaḡi baregona ta, senaḡi asi ḡoḡita-fitoḡaguto, e asi ḡoragakwane-moḡovaḡiguto. A ḡomi na au tu Barau ḡena aneru ta boḡoro ḡabi-raḡea ilailanai ḡoḡabi-raḡeguto. Ma au tu noḡa moḡo Keriso Iesu tauḡanina korikorina noḡa ḡoveiguto. <sup>15</sup> ḡomi ḡemi iaku e verere maki barego. A toma tu kamasi, mo iaku e verere tu aiḡeri, ei? Mai tu moḡoni aguruḡani, mo negai bema boḡoro ura, matami ḡoḡibo-vaḡiri, benamo au ḡovinigu boḡoro si nai tu, ḡoro ḡibo-vaḡiri, benamo boḡoro vinigu. <sup>16</sup> Toma tu kamasi? Guruḡa moḡoniri akira-varamini nuḡanai tu, ḡemi vetari tarimanai ma boḡo vaḡa-iaḡogu?

<sup>17</sup> Maniḡeri ḡofaḡofa tarimari na ḡomi ḡemi ai ura tu barego lelevaḡina ḡetoreani, senaḡi ḡia ḡeri tuḡamaḡi e ura tu asi roroḡoto. ḡia ḡeri ura baregona ḡeveiani tu, ḡomi

ġai ġemana moġo boġono raka-veġita, benamo ġia ġeri ai beġene ġabi-vanaġimi ġetoni. Ma ġia na beġene ġabi-vanaġimi, be ġia boġono ura-viniri ġetoni. <sup>18</sup> Vanaġivanaġi tarimarima namo beġene ġabia uranai, bita uravini-baregorini tu namo vedaurea. Ma namo bene ġora ġana, tarimarima bouravini-baregorini maġurina tu, dia au ġoiragu ai moġo boġono veia. Asiġina. <sup>19</sup> Natugu, ġomi tu au na atuġamaġi-kaumini. Au tu ġomi urami ai, be noġa vavine ma baniri na mero ġeruġu-vaġirini ġetoni nai, midigu ġeġabirini kavana, au midigu aġanini. Mai midigumidigu tu baġabi-iaġoani mo, Keriso vetoġana korikori ġomi ġemi ai bevetoreni. <sup>20</sup> Initoma au ġegu ura barana tu, ġomi sevimi ai barasi ruġa-tari, be garogu bara kefoa, bara vaġa-kava ginikaumi. Korana au ġomi ġemi ai tu mai ama daradarani, asi aribani, kamasi bavaġa-kavamini.

#### *Hagar ma Sara*

<sup>21</sup> Ġomi taravatu gaburenai tanu ura-dikana ġoveini tarimami na ġokira-varagu. Ġomi taravatu na kara ekiraġiani guruġana tu ġoseġaġi-ginikauani ba? <sup>22</sup> Buka Veaġa tu maiġesi etoreato: Aberahamo natuna tu ruarua, ta tuġu-rakaorakao vavinena ġenana emaġurito, ma ta tu vavine fakana, dia tuġu-rakaorakao vavinena, ġenana. <sup>23</sup> Tuġu-rakaorakao vavinena ġenana emaġurito merona tu, Aberahamo e Hagar ġegenavegogoto, monana eġorato. Senaġi vavine fakana ġenana emaġurito merona tu, Barau ġena guruġatore lorinai emaġurito. <sup>24</sup> Mai vetoġa maiġeri tu guruġa vaġa-ilailari veiġari moġo. Mai vavine ruarua maiġeri tu, Barau ġena kiraġitore ruarua ġevaġa-foforirini. Hagar tu Barau ġena kiraġitore ta Sinai Ġorona na eiaġomato dagarana ekiraġiani, ma ġia na eruġa-vaġirito tarimari tu tuġu-rakaorakao tarimari. <sup>25</sup> Mai guruġa “Hagar” tu Arabia tarimari na Sinai Ġoronai ġekiraġiani. Ema Hagar maki toma etanuni Ierusalemata vetoġana kavana. Korana mai Ierusalemata sitina e Ierusalemata tarimari tu tuġu-rakaorakao tarimari. <sup>26</sup> Senaġi gubai etanuni Ierusalemata tu faka. Ma ġia tu ġita sinara. <sup>27</sup> Buka Veaġai tu maiġesina ekirani,

“Vavine gabanimu,

mero asi oġabini vavinemu,

e mero ġabi midiguna asi ribamu vavinemu,

noiaku e noverere!

Korana tu ġaraġona na eiaġuiato vavinena natuna tu ġutuma gorogoro,

ma ġaraġona na asi eiaġuiato vavinena natuna tu asi vovoka.”

<sup>28</sup> Tarikakagu mabarami, ġomi tu Isako kavana. Barau ġena guruġatore lorinai, Barau natunai ġoiaġoto. <sup>29</sup> Mo negai Aberahamo e Hagar ġegenavegogoto nai, eġorato merona na Iauka Veaġa ġena seġukai emaġurito merona evaġa-midigu midiguato, moġesi kavana maitoma maki mo veiġa sebona eġorani. <sup>30</sup> Senaġi Buka Veaġai etoreato guruġana tu kara etoni? Ġia tu ekirani, “Mani tuġu-rakaorakao vavinena ma natuna ġesi tu ġomi sevimi na boġono lai-veġitari. Korana vavine fakana natuna ġena farefare mani tuġu-rakaorakao vavinena natuna ġesi tu asi veġata beġe ġauna-vegogoani.” <sup>31</sup> Ma, tarikakagu, ġita tu dia tuġu-rakaorakao vavinena natuna. Asiġina. Ġita tu vavine fakana natuna.

## 5

#### *Taravatu irauirauri ġeri tuġu-rakaorakao tarimari ai asi ma boġono iaġo*

<sup>1</sup> Ġita tu bitana faka uranai, Keriso na taravatu misimisiri ġerina eruġa-vaġirato. Be boġono ruġa-gigitari. Ma tauġemi mani Iuda tarimari ġeri taravatu misimisiri e vereko irauirauri ġeri tuġu-rakaorakao tarimami ai asi ma boġono vevaġa-iaġo.

<sup>2</sup> Ġoseġaġi! Au Paulo na akiramini, bema ġomi tauġanini kefiru beġe lama-vaġirini nai tu, Keriso na ġita bene ruġa-vaġira ġana, kara eveiato, moġa tu asi ġena seġuka ġomi ġemi ai. <sup>3</sup> Ema mani deidei tauġaniri kefiru beġe lama-vaġirini tarimami tu navaġa-guruġami, ġoseġaġi. Ġomi tu taravatu mabarari misikose boġono korana-iaġi ginikauri veġata. <sup>4</sup> Bema ġomi ġokirani, taravatu boġono korana-iaġi ginikaua, be



Barau Ɠoiranai vei-iobukaiobuka tarimami ai boƓono iaƓo Ɠotoni tu, tauƓemi moƓo Keriso Ɠenana ƓoveƓabi-ƓerevaƓini. Ema Ɠomi tu Barau Ɠena namo e varevare-bara Ɠenana ƓoveƓitani. <sup>5</sup> Iauka VeaƓa Ɠena seƓukai Barau Ɠenai taveƓabidadamani, ema tavaƓa-nogani, Barau na vei-iobukaiobuka tarimara benesi Ɠana. <sup>6</sup> Keriso Iesu Ɠesi esebonato tarimana tu tauƓanina kefina Ɠelama-vaƓiato ba asi Ɠelama-vaƓiato tu asi Ɠeri irau ta; mai veiƓa ruarua Ɠerina namo ta asi beƓorani. Dagara baregona korikori tu veƓabidadama, mo veƓabidadama na veuravini evaƓa-foforiani.

<sup>7</sup> Ɠomi tu raga-iruiru ai Ɠoraga-ginikauto-Ɠoi. Ma kamara deikara na Ɠoirami easi-kouƓauato, benamo toma tu guruƓa moƓonina asi ma Ɠokorana-iaƓiani? <sup>8</sup> Mani vevaƓa-ura veiƓana maniƓa tu dia Ɠomi ekeamito Barauna Ɠenana eiaƓomani. <sup>9</sup> BoƓono riba, farao evaƓa-tuburini muramurana kotuna na farao evaƓa-tubu baregoani. <sup>10</sup> Barau Ɠenai Ɠegu tuƓamaƓi tu atorekau-gwaƓiƓiani, korana ribagu, Ɠia na bevaƓa-kavamini, benamo iaunega boruna ta asi ma boƓo Ɠabi-raƓeani. Mani Ɠomi evaƓa-tuƓamaƓi daradaramini tarimana maniƓa tu, Ɠena veiƓa voina metona bedoƓariani veƓata.

<sup>11</sup> Tarikakagu mabarami, bema au na mero tauƓaniri kefiri lamavaƓi veiƓana initoma roƓo aƓobata-iaƓiani nai, au karase nai tu roƓo ƓevaƓa-midigu midiguguni? Bema au na mero tauƓaniri kefiri lamavaƓi veiƓana roƓo bara Ɠobata-iaƓia nai tu, Keriso ƓevaƓa-satauroato varina aƓobata-iaƓiani, mainana tarimarima nuƓari tu asi bere vaƓa-metori. <sup>12</sup> Ɠomi Ɠemi tuƓamaƓi Ɠevei-veƓonu veƓonurini tarimari maniƓeri, namona tu tauƓeri na seuri beƓene farari.

<sup>13</sup> MoƓoni, tarikakagu, Ɠomi Barau na ekeamito tu, taravatu irauirau korana-iaƓiri Ɠerina boƓono raka-faka Ɠana. Ma Ɠomi tata tu dia taravatu gaburenai Ɠotanuni, senaƓi fakai Ɠotanuni. Mani fakai Ɠotanuni dainai tu, tauƓani Ɠena ura rakavari boƓono korana-iaƓiri ba? AsiƓina ƓinavaƓi! Ɠomi tu ma veuravinimi Ɠesi karomi Ɠesi boƓono vevaƓa-kava, e karomi Ɠeri vetuƓunaƓi boƓono iaƓo-vini. <sup>14</sup> Taravatu mabarabarari tu taravatu guruƓana sebonai moƓo Barau na evaƓa-iaƓoato, ekirato, “Sevimu tarimana bono ura-vinia, Ɠoi tauƓemu oveura-vinini ilailanai.” <sup>15</sup> Bema Ɠomi tauƓemi karomi tata Ɠesi moƓo boƓo vekira-Ɠarama Ɠaramani e boƓo vevaneni nai tu, boƓono venari, korana karomi Ɠesi tauƓemi moƓo boƓo vevaƓa-rakavani, benamo veƓabidadama na boƓo ketoni garina.

#### *TauƓani Ɠena veiƓa e Iauka Ɠena veiƓa*

<sup>16</sup> Au tu iniƓesina akirani: Iauka VeaƓa na Ɠemi maƓuri bene guine-iaƓiri, be tauƓani Ɠena ura rakavari asi boƓono korana-iaƓiri. <sup>17</sup> Ɠita ribara, tauƓani na euravini-baregorini veiƓari, Iauka na tu asi eura-vinirini, ema Iauka na euravini-baregorini veiƓari, tauƓani na tu asi eura-vinirini. Ɠia tauri ruarua tu ƓevevaƓini. MoƓesina naima, Ɠoi na veiƓa namori bono veiri otoni veiƓari tu asi oveirini. <sup>18</sup> A bema Ɠoi Iauka na eƓori-kaumuni nai, Ɠoi tu dia taravatu gaburenai otanuni.

<sup>19</sup> TauƓani na euravini-iaƓirini veiƓari tu maiƓeri: Mata-boraƓa veiƓari, veiƓa mirori, kima veiƓari, <sup>20</sup> kwaivakuku toma-rakariƓo, Ɠora e meƓameƓa, vebaruvini, vevane, mama, niaraniara, arana beƓene vaƓa-raƓea etoni veiƓari, veƓareveƓare, vevare-kirakira veiƓari, <sup>21</sup> dagara mata-kifakifari o mata-ƓaniƓaniri, niuniu ema ƓoreƓore, ma veiƓa irauirau maiƓesi kavari. Guinenai akira-toreƓaumito kavana, toma maki akira-toreƓaumini, maiƓesi veiƓari beƓe veini tarimari tu, asiƓina ƓinavaƓi Barau Ɠena Basileia nuƓanai beƓea raka-toƓani.

<sup>22</sup> SenaƓi Iauka ƓwaƓwana tu maiƓeri: Veuravini, iaku, maino, vevaƓa-gwaƓiƓi, veiau-namo, nuƓa-namo, vetuƓamaƓikau, <sup>23</sup> nuƓa-Ɠavemuko o manau, ema nuƓa-gwaƓiƓi. MaiƓeri veiƓa tu taravatu na asi ekourini, asi taravaturi. <sup>24</sup> Keriso Iesu Ɠena tarimarima korikori vetoƓana tu maiƓesi: Ɠia tu tauƓani na eƓabiraƓe-baregorini dagarari e euravini-iaƓirini dagarari mabarabarari eikoko-kaurito satauro tuƓunai Keriso Ɠesi.

<sup>25</sup> Bema ġita Iauka Veaġa na ġera maġuri eguine-iaġirini nai tu, Iauka Veaġa ġena dabarai maki bisini raka. <sup>26</sup> Ġita tauġera asi sivekiraġi-varaġevaraġe, e karora nuġari asi sivei-barubaruri, ema karora tata ġeri ai dagara tari moġeri asi simata-ġaniġani-iaġiri.

## 6

*Ekalesia karomi* ġesi boġono vevaġa-kava

<sup>1</sup> Tarikakagu mabarami, bema fakami ai tarima ta na veiġa eleaiani ġoġitaiani nai tu, Iauka Veaġa na ġemu maġuri eguine-iaġiani tarimamu na nuġamu ma manauna ġesi bono vaġa-kavaia, ġena maġuri bono toto-iobukaia maia. Senaġi ġoi tauġemu maki bono venari. Asi namo Satani na ġoi maki beriba-ġanimuni ġesi. <sup>2</sup> Karomi tata ġesi boġono vevaġa-kava, ġemi meto boġono ġwa-barabarari, korana moġesi boġo veini tu, Keriso ġena taravatu boġo korana-iaġi ġitakauani. <sup>3</sup> Bema tarima ta tauġena bevetuġa-maġini, ġia tu tarima korikori betoni, a nuġanai ġia tu asi ġeiaviani tarimana. Ġia tu tauġena kekei moġo eveġofaġofa-iaġini kekei. <sup>4</sup> Tarimarima mabarari tu tata ġeri veiġa e maġuri beġene vetau-ginikauri. Benamo moġa murinai vauro tata ġia tauġena ġena maġuri namona iakuna bene vei. A dia ġia ġena maġuri namona tarima ta ġena maġuri ġesi bene vaġa-vetovoa. <sup>5</sup> Korana tu tarima tata ġereġana na ġena maruna metona bene ġwaia.

<sup>6</sup> Tarima ta deikara riba eġabini Barau ġena guruġai tarimana tu, ġia ġenai kara etanuni dagarari kota ġena vevaġa-riba tarimana bene varevare-vinia.

<sup>7</sup> Tuġamaġi kerereri na asi beġene ġabimi. Barau tu asi boġo ġofaiani. Tarimarima tu kara ġuena evaroani, benamo moġa ġwaġwana ġereġana moġo eġabiani. <sup>8</sup> Tauġani ġena ura rakavari ekorana-iaġirini tarimana tu, tauġani ġena ura rakavari ġerina maġuri rakava kwaikwaina e mase bedoġaririni. A Iauka Veaġa ġena veiġa namori ekorana-iaġirini tarimana tu, Iauka Veaġa ġena veiġa namori ġerina maġuri vanaġivanaġi beġabiani. <sup>9</sup> Moġesina naima veiġa namori veiveiri ai asi bitana gau. Korana veiġa namori veiveiri asi bita vaġa-ketoani nai tu, kwakwa negana korikorinai tu ġaniġani bita kwa-doġarini. <sup>10</sup> Moġa lorinai ġita ġera mai nega namonai tu tarimarima mabarabarari ġeri ai veiġa namori bisini veiri. Ma mai veiġa namori tu Keriso ġenai ġeveġabidadamani besena mabarabarari ġeri ai tu bisini veiri veġata.

*Dia kefi lamavaġi* ġenana maġuri boġoitaġoani

<sup>11</sup> Mai fefa tu au tauġegu na batorea ġomi ġemi. Ġoġitaiani, mai guruġa-matari baregori atorerini mai fefai. <sup>12</sup> Ġoseġaġi, ġomi tauġanimi kefiri beġene lama-vaġiri guruġari ġevei-gwadarini tarimari, maniġeri tu tauġani murika na dagarari koriri ġevekokoroku-iaġirini tarimari. Mani tarimarima maniġeri tu Keriso ġena satauro dainai beġe vaġa-midigu midigurini garinai maniġesi ġeveini. <sup>13</sup> Tauġaniri kefiri ġelama-vaġirini tarimari na taravatu tu asi ġekorana-iaġiani. A ġia tu ġeura-baregoni, ġomi tauġanimi kefiri beġene lama-vaġiri ġetoni. Ġia ġeura-dikani tauna korikori tu, ġomi tauġanimi kefiri beġe lama-vaġirini nai, beġene veiavi ġana. <sup>14</sup> Au dagara ta vekokorokuna tu asiġina ġinavaġi baveini, a au tu ġita ġera Vereġauka Iesu Keriso ġena satauro moġo bavekokoroku-iaġiani. Korana mai satauro ġenana tanobara dagarari au ġegu ai tu ġemaseto satauro tuġunai, ema au maki tanobara dagarari ġeri ai tu amaseto satauro tuġunai. <sup>15</sup> Mero tauġaniri kefiri ġelama-vaġirini nai, namo ta asi beġorani, ema mero tauġaniri kefiri asi beġe lama-vaġirini nai, maki namo ta asi beġorani. Korana dagara baregona sebona Barau ġenai tu, Barau na tarima variġu geragerarai evaġa-iaġorani. <sup>16</sup> Mai maġuri maiġa beġe tuġamaġiani e beġe korana-iaġiani tarimari tu Barau ġena tarimarima o Isaraela tarimari korikori; ġia iatari ai maino e vevetuġaġwa bene tanu.

<sup>17</sup> Maitoma beiaġoni, tarima ta na au meto asi ma bene vinigu, korana Iesu ġebaru-viniani tarimari na ġekwariguto, be ġegu giri tauġanigu ai aġwa-rakaorini, moġeri na ġevaġa-foforinai, au tu Iesu Vereġauka ġena vetuġunaġi tarimana korikorina.

<sup>18</sup> Tarikakagu mabarami, ġita ġera Vereġauka Iesu Keriso ġena namo ma varevare-  
bara ġomi mabarami iaukani ġesi bene tanu. Amen.

## PAULO ĜENA TORETORE EFESO EKALESIARI ĜERI

Efeso vaĝa-foforina guruĝari

Paulo na mai fefa tu Romai dibura numanai etanuto-ĝoi nuĝanai etoreato (Apostolo 28). Mai fefa tu betaĝu laĝani 60 o 61 ai etoreato, mo tu Iesu maki emaseto murinai. Mai fefa anina baregona tu, “Ekalesia doĝorona tu Keriso Tauĝanina,” ema mai fefa ĝeĝori-kauani siriri tu karoa 4:1-4.

Paulo na mai fefa etoreato ĝena ura baregona tu, Efeso ema Asia Keina (o Asia Minor) mabarana nuĝanai maki Iesu Keriso ĝevaĝa-moĝoniani tarimari, 1) ĝeri veuravini ema veĝabidadama Keriso ĝenai ma beĝene tore-sirivaĝia ĝana; 2) bene launaĝiri, tarima guinena ma ĝena maĝuri rakavari ĝesi beĝene koki-fitoĝaia, ma tarima variĝu geragerana beĝene tore-kaua; 3) bene vaĝa-ribari, Keriso tauĝanina nuĝanai Iuda tarimari ema irau bese tarimari tu sebona moĝo, asi ĝeri irau ta; 4) Keriso ema ekalesia doĝorona nuĝari ai kara vekuretoĝana etanuni bene vaĝa-foforia ĝana.

Paulo na mai fefa tu maiĝesina eboioĝaiato:

1. Ĝita ĝera farefare ĝena barego Keriso ĝena maĝuri nuĝanai - karoa 1-3
2. Ĝita Keriso ĝena maĝuri nuĝanai tu aiĝesina bitana tanu - karoa 4-6

<sup>1</sup> Au Paulo, Barau ĝena ura lorinai Keriso Iesu ĝena apostolo tarimagu ai aiaĝoto. Mai fefa tu Efeso ai Barau ĝena veaĝa tarimami, Keriso Iesu ĝenai ma ĝemi vetuĝamaĝikau tarimami, atore-vinimini. <sup>2</sup> Barau ĝita Tamara ema Vereĝauka Iesu Keriso ĝerina varevare-bara e maino ĝemi ai bene tanu.

*Keriso ĝena maĝuri nuĝanai Barau na namo iauka rekenai evinirani dagarari*

<sup>3</sup> Barau, ĝita ĝera Vereĝauka Iesu Keriso Tamana, sivaĝa-raĝea, korana Keriso ĝesi tasebonato maĝurina nuĝanai, ĝia na iauka rekenai gubai ĝetanuni dagarari namori moĝeri mabarari ĝita evinirato. <sup>4</sup> Tanobara roĝosi roĝo bere veia ĝaronai veĝata, Keriso na vevaĝa-maĝuri ĝauveina beveiani bakunai, Barau na ĝita ĝia ĝena eĝabi-viriĝirato. Ĝita eĝabi-hidirato tu, ĝia ĝoiranai bitana veaĝa e asi ĝera vei-rakava ta bitana tanu ĝana. Barau ĝena veuravini lorinai, <sup>5</sup> ĝia na mai maĝuri eboioĝa-guineato, ekirato, ĝita tu Keriso ĝenana ĝia natunai bevaĝa-iaĝorani. Mai tu ĝia tauĝena ĝena nuĝa-namo ai ĝena ura eveiato veiĝana. <sup>6</sup> Barau ĝena namo e varevare baregona marevana namo vedaureana sivaĝa-raĝea. Korana mai namo e varevare-bara maiĝa tu Barau na ĝita evini-kavarato moĝo, euravini-baregoani merona, Iesu Keriso, ĝena maĝuri nuĝanai.

<sup>7</sup> Ĝita tu, Keriso emaseto nai, rarana na evoi-ĝenoĝoirato, e ĝera rakava maki etuĝamaĝi-fitoĝarito. Mai tu Barau ĝena namo e varevare-bara namo vedaureana veiĝana, <sup>8</sup> ĝita ĝerai barego lelevaĝi evaĝa-foforiato, ema iaunega e tuĝamaĝi-faka evinirato. <sup>9</sup> Barau ĝena ura Keriso ĝenana beveiani veiĝana tu vekuretoĝa, senaĝi tauĝena ĝena nuĝa-namo ai ĝita evaĝa-ribarato. <sup>10</sup> Mai Barau ĝena ura o boioĝa maiĝa tu ekiraĝi-toreato ĝarona beĝabiani vauro bevaĝa-foforiani. Mo tu gubai ĝetanuni dagarari e tanobarai ĝetanuni dagarari mabarari Keriso kwakuna koranai beĝabi-vegogorini. Benamo Keriso na moĝeri dagara mabarari beguine-iaĝirini.

<sup>11</sup> Ĝita tu Keriso bakunai Barau na ĝena eĝabi-viriĝirato, tauĝena na tovtovonai veĝata eboioĝaiato ilailanai. Ma dagara mabarari maki ĝia tauĝena na eura-iaĝirni dabarari ai eĝauvei-iaĝirini. <sup>12</sup> Moĝa lorinai ĝai Iuda tarimama, deiri Keriso ĝavaĝa-moĝoniato ma ĝenai ĝavetuĝa-maĝikau-guineto tarimama na Barau marevana baregona baĝana vaĝa-raĝea.

<sup>13</sup> Ma ĝomi irau bese tarimami na maki mai guruĝa moĝonina tu ĝovaĝa-moĝoniato, mo tu Barau na ĝomi bevaĝa-maĝurimini Varina Namona guruĝana. Ĝomi mai guruĝa ĝoseĝaĝiato nai tu, ĝovaĝa-moĝoniato, benamo Keriso ĝenai ĝovetuĝamaĝikauto. Moĝesina naima Barau na ĝomi maki ĝia ĝena tarimarimai evaĝa-iaĝomito. Barau na

ġomi eġabi-raġemito vetoġana ġemi ai eveiato tu, Iauka Veaġa, ekiraġi-toreato Iaukana, evinimito. <sup>14</sup> Ġita na Iauka Veaġa tu varau taġabiato, moġesi naima ribara, Barau na ġena tarimarima ġeri ekiraġi-toreato dagarana tu ġita na maki bita ġabiani. Initoma tu roġo tavenarini, beiaġoni mo, Barau na ġena tarimarima beġabi-iaġorini ġia sevina ġana. Barau marevana baregona sivaġa-raġea.

*Paulo ġena ġauġau*

<sup>15</sup> Moġesina naima, au tu Iesu Vereġauka ġoġabidadama-viniani e Barau ġena tarimarima veaġari ġoura-vinirini varina ama seġaġiato ġarona na veġata, <sup>16</sup> Barau tanikiu-vinina ġomi bakumi ai tu asi avaġa-magoani, e iatami ai aġauġauni. <sup>17</sup> Akirani, ġera Vereġauka Iesu Keriso ġena Barau na iaunega ema vevaġa-fofori Iaukana bene vinimi, be Barau boġono riba-ginikaua. Barau tu Tamara, ma ġia marevana ma mamana tu iaru-korokoro. <sup>18</sup> Ma Barau anoġiani, akirani, ġemi tuġamaġi mama bene vinimi, ġena vevaġa-namo irau vedaureana, voina baregona dagarana boġono ġabia uranai ekeamito ġotuġamaġikauani, moġa tu boġono riba-ginikaua. Be Barau ġena tarimarima veaġari na dagara namo vedaureari beġe ġabirini, moġeri tu boġono ribari. <sup>19</sup> Ema Barau tavaġa-moġoniani tarimara nuġarai Barau ġena seġuka iaru-korokorona eġauveini maiġa maki boġono ribaia. Barau ġena mai seġuka maiġa ġena ġauvei kokorena tu barego lelevaġi. <sup>20</sup> Ġia na tu mai seġuka kokorena Keriso ġenai evaġa-foforiato nai, Keriso mase na evaġa-variġisi ġenoġoiato, e gubai ġia ġimana aroribanai evaġa-tanuato. <sup>21</sup> Keriso tu monai tuġunai etanuni e evereni. Ġia tu iauka rakavari mabarari, ġeveġitaġauni iaukari, e ġeri maoro barego lelevaġi iaukari, e ma ġeri seġuka iaukari, ma seġuka lelevaġi aneruri, ema ara ġekiraġirini arari mabarari iata-raġeri ai evereni. Mai tu dia mai tatanuni neganai moġo, asiġina, mai tu ġoirai vau mani eiaġomani neganai maki ġia tu bebereni veġata. <sup>22</sup> Barau na dagara mabarari Keriso kwakuna fanafanana gaburenai etorerito, e Barau na ġia tu ekalesia mabarana bene debaia etato. <sup>23</sup> Ekalesia tu Keriso tauġanina. Ma mai tauġanina maiġa tu Keriso tauġena ġena maġuri na evaġa-vonu-raġeato, ema dagara mabarari maki gabu mabarari ai evaġa-vonurito.

2

*Barau na Keriso ġesi ma bevaġa-maġurirani*

<sup>1</sup> Guinenai ġomi iaukami tu mase ġotanuto-ġoi, korana ġemi kira-sirivaġi e veiġa rakavari ai bene. <sup>2</sup> Mo negai ġomi na mai tanobara ġena veiġa rakavari ġoveirito-ġoi, ema iauka rakavari eġita-ġaurini iaukana ġokorana-iaġiato-ġoi. Mai veġitaġau iaukana maiġa ġena basileia o veġitaġau seġukana tu barego lelevaġi guba e tanobara fakari ai. Ma ġia toma tu Barau asi ġeseġaġi-viniani tarimari nuġari ai etanuni e eġauveini. <sup>3</sup> Guinenai ġita mabarara maki ġia kavana taveito-ġoi, tauġani ġena veiġa rakavari tavaġa-moġonirito-ġoi. Tauġanira e nuġara ġeri ura e tuġamaġi rakavari takorana-iaġirito-ġoi. Moġa lorinai ġita maki tarimarima kotari kavari Barau ġena baru baregona tu ġita iatarai etanuto-ġoi.

<sup>4-5</sup> Moġoni, ġita iaukara tu mase ġera kira-sirivaġi lorinai, senaġi vevetuġaġwa-bara Barauna ġena veuravini barego vedaurea lorinai, Keriso ġesi ma evaġa-maġuri ġenoġoi-sebonarato. Boġono riba, ġita tu Barau ġena namo e varevare-bara moġo bakunai evaġa-maġurirato. <sup>6</sup> Keriso Iesu ġena maġuri nuġanai, ġita tu Barau na Keriso ġesi mase na evaġa-variġisi sebonarato, ma Keriso ġesi ġena vere seanai evaġa-tanu sebonarato guba vanuġanai. <sup>7</sup> Moġesi eveito korana tu, ġoirai ġia ġena veiau-namo vetoġana, ġena namo e varevare-bara barego lelevaġina ġerana bene vaġa-foforia uranai. Mai Barau ġena veiau-namo vetoġana, ġena namo e varevare-bara na efororito maiġa tu, Keriso Iesu ġesi tasebonato nuġanai, ġita ġerai evaġa-foforiato.

<sup>8</sup> Ġomi tu ġemi veġabidadama ġenana Barau na ġena namo e varevare-barai evaġa-maġurimito. Ġomi tu dia tauġemi ġemi kokore na ġovevaġa-maġurito. Asiġina, mai tu Barau ġena varevare ġita evinirato. <sup>9</sup> E dia ġomi ġemi ġauvei dairi ai voimi ġoġabiato

dagarana, be moġa veiavina tarima ta asi bene vei. <sup>10</sup> Ġita tu Barau ġimana veiveina tarimara. Barau na Keriso Iesu ġenana tarima variġurai evaġa-iaġorato, ġauvei e veiġa namori bisini veiri ġana. Mai ġauvei e veiġa namori tu Barau na varau erovina-torerito, ġita na bisini veiri ġana.

*Keriso na bese ruarua evaġa-sebonarito*

<sup>11</sup> Ġomi boġono tuġamaġi, guinenai ġomi irau bese tarimami Iuda tarimari na ġekiraġimito-ġoi “kefimi asi lamavaġi tarimami”. Iuda tarimari tauġaniri kefiru tu lamavaġi. Ġia na mai mero tauġaniri kefiru lamavaġi veiġana tu tauġeri ġimari na ġeveiani veiġana. <sup>12</sup> Boġono tuġamaġi, ġomi mo negai Keriso ġesi tu ma fakami, e Isaraela besena nuġanai maki ġomi tu vanuġa boru tarimami nai asi ġeġabi-raġemito, ema Barau ġena kiraġitore eveirito nuġanai, eguruġa-toreto dagarari maki ġomi na tu asi boġo doġaririni. Ema ġomi mai tanobara nuġanai tu asi ġemi Barau ema dagara namona ta ġoirai asi ġotuġamaġi-kauani. <sup>13</sup> Ġomi guinenai tu manaġa rakava, senaġi toma Keriso Iesu ġesi ġosebonato nai, ġoma kavinaġito Barau ġenai. Ġomi Keriso rarana na ema ġabi-kavinaġimito.

<sup>14</sup> Korana Keriso tauġena tu ġita ġera maino evaġa-ġoraiani tarimana. Ġia na ġita bese ruarua bese sebonai moġo evaġa-iaġorato. Korana ġai Iuda besena ema ġomi irau bese tarimami vekaravarai ġita evare-kirarani kobena tu Keriso tauġanina satauro ai emaseto nai evare-kiraiato, benamo evaġa-rakava-ġosiġosiatu. <sup>15</sup> Ġia na Mose ġena taravatu nuġanai velaunaġi guruġari ġetanuni dagarari mabarari maki erovorito. Keriso na mo veiġa eveiato anina tu, ġia ġena ura ġita bese ruarua ġerana ġia tauġena ġesi bene vaġa-sebonara, tarima variġuna sebona moġo bene veia ġana; ema ġita fakarai maki maino bene vaġa-ġoraia ġana. <sup>16</sup> Ġia satauro ai emaseto korana tu, mai bese ruarua tauġani sebonai moġo bene vaġa-sebonari, benamo Barau ġenai ma bene ġabi-ġenoġoiri ġana. Ema ġia fakari ai ġeri veiau-rakava maki, satauro ai emaseto nai, evaġa-koririto.

<sup>17</sup> Keriso eiaġomato tu, maino varina ema ġobata-iaġiatio. Mai maino varina ġomi irau bese, Barau ġesi fakami manaġa tarimami ġemi, e Iuda tauri, Barau ġesi fakari kavinaġi tarimari ġeri, ema vari-fiuato. <sup>18</sup> Ġita mabarara, irau bese tarimami e Iuda tarimama, tu Keriso ġenana lauka sebona nuġanai moġo Tamara ġenai bita iaġoni.

<sup>19</sup> Tauna moġa, ġomi toma tu dia tanukau e vanuġa boru tarimami. Asiġina, toma ġomi tu Barau ġena tarimari ġesi vanuġa sebona e Barau ġena numa tarimami. <sup>20</sup> Ġomi tu numa, fore iatanai ġeragarini kavana. Barau na ġomi tu apostolo tarimari e peroveta tarimari iatari ai eraga-kaumito, ma Keriso Iesu tu ġemi numa daigunina o duġuna forena baregona. <sup>21</sup> Keriso ġena maġuri nuġanai mo numa ġauna mabarana evaġa-tubu-tubukau ginikauato, ma ebaregoni Rubu Veaġai eiaġoni Vereġauka ġena maġuri nuġanai. <sup>22</sup> Keriso ġesi ġosebonato nai, ġomi maki Barau na tarimarima tari ġesi eġabi-vegogomini, benamo Barau ġena tanu numanai ġoiaġoni lauka nuġanai.

### 3

*Paulo ġena ekalesia ġauveina irau bese tarimari fakari ai*

<sup>1</sup> Tauna moġa, au Paulo na Vari Namona ġomi irau bese tarimami ġemi aġobata-iaġiani ġaramanai, dibura numai atanuni maiġegu. Au tu Keriso Iesu ġena dibura tarimanai aiaġoto, ma ġomi iatami ai Barau ġenai aġuriġurini. <sup>2</sup> Au atuġamaġini, ġomi tu varau ġoseġaġito, au Barau na ġena namo lorinai mai ġauvei eviniguto, Vari Namona, varevare-bara varina, ġomi irau bese tarimami ġemi bana ġobata-iaġia ġana. <sup>3</sup> Mai vari vekuretoġana, (mai tu ġomi irau bese tarimami maki Barau ġena tarimarimai ġoiaġoto varina), Barau na au ġegu ai evaġa-foforiato. Mai vari maiġea tu kotuna varau batorea ini fefa nuġanai. <sup>4</sup> Mai fefa maiġa boġo iavianai nai tu, boġo riba-maoroni, au Keriso varina vekure-toġana tu ma ribagu. <sup>5</sup> Barau na mai vari vekuretoġana maiġa guinenai ġetanua-iaġomato-ġoi tarimari tu asi evaġa-ribarito. Senaġi toma tu Barau na lauka Veaġa ġenana ġena apostolo veaġari e peroveta tarimari veaġari ġeri ai ema vaġa-foforiato.

<sup>6</sup> Mai vari vekuretoġana Barau na ema vaġa-foforiato varina tu maiġa: Irau bese tarimari maki Vari Namona ġenana Iuda tarimari ġesi bese sebonai e tauġani sebonai moġo beġe iaġoni. Benamo mabarabarari na Barau na ekiraġi-toreato dagarana Keriso Iesu ġenana beġe ġabiani. <sup>7</sup> Barau ġena namo e varevare-bara lorinai, mai Vari Namona maiġa bana varifiu-rakao rakaoa etato. Barau ġena mai namo e varevare-bara varevarena tu ġia ġena seġuka eġauveini ġenana au eviniguto. <sup>8</sup> Aba, au tu Barau ġena tarimarima mabarari ġeri dokodokona tarimagu, senaġi Barau na ġena namo lorinai mai ġauvei eviniguto, irau bese tarimari ġoirari ai Vari Namona bana ġobata-iaġia etato. Mai Vari Namona maiġa tu Keriso ġenai maġuri e dagara namo vedaureari tarimarima tauġera na asi bita ġoitaġorini dagarari ekiraġirini. <sup>9</sup> Ema tarimarima mabarari ġeri ai bana kiraġi-fofori ginikau, Barau ġena ura e boioġa tu, irau bese tarimari maki ġeri vevaġa-maġuri taunai bene iaġo. Mai boioġa o tuġamaġi maiġa tu tanobara evesinato monana veġata dagara mabarari eveirito Barauna ġenai vekuretoġa etanuni. <sup>10</sup> Barau ġena tuġamaġi tu, maitoma vauro ekalesia ġenana ġia ġena iaunega e tuġamaġi irauirauri, ġeveġitaġauni iaukari e ġeri maoro barego lelevaġi iaukari ġeri ai bene vaġa-foforiri etato. Mai iauka maiġeri tu guba fakanai ġetanuni iaukari. <sup>11</sup> Mai tu Barau ġenai vanaġivanaġi etanuni boioġana. Barau na mai ġena boioġa maiġa tu ġita ġera Vereġauka Keriso Iesu ġenana vauro ema vaġa-foforiato. <sup>12</sup> Ġita tu Keriso ġena maġuri nuġanai tatanuni, ema ġia ġenai taveġabidadamani lorinai, Barau sevina ġana tu asi garina ġesi e nuġara gwaġiġi bita raka-kavini. <sup>13</sup> Moġa lorinai au ġegu ura baregona tu asi boġono tuġamaġi-moiramoira, au amidigu-midiguni nai. Au midigu-midigu aġoitaġoni tu, ġomi namo boġono ġoitaġo ġana.

#### *Paulo Efeso ekalesiari ġeri eġauġauto*

<sup>14</sup> Au na moġeri mabarari Tamara na eveirito dagarari atuġamaġirini nai, ġoiranai avetui-tarini ma aġuri-ġurini. <sup>15</sup> Ġia tu bese sebona tarimari gubai e tanobarai ġetanuni Tamari. Ma ġia na mai bese sebona arana eturaiato. <sup>16</sup> Barau mamana marevana tu irau veġata ma barego lelevaġi naima, au na anoġiani, akirani: Ġia ġena mama marevana asikeikeina na ġia tauġena Iaukana ġenana seġuka bene vinimi, be nuġami e iaukami bene vaġa-kokoreri. <sup>17</sup> Korana mo dabarai tu Keriso maki ġemi veġabidadama lorinai, be ġomi nuġami ai betanuni. Ema Barau anoġiani, ġomi maki ġau ġokana e lamuna tano nuġana ġana ġevariġoni, benamo ġevelamulamumu-tarini nai, ġau tano iatanai eruġa-gwaġiġini ilailanai, ġomi maki moġesina nuġami veuravini na bene vaġa-vonuri, be veuravini ai boġono ruġa-gigitari. <sup>18</sup> Be Barau ġena tarimarima veaġari mabarari ġesi Keriso ġena veuravini barego lelevaġina, rababana, e maukana, e varaġena, ema dodokuna boġono ribaia, <sup>19</sup> ema boġono riba, mai Keriso ġena veuravini tu riba mabarari maki evanaġirini. Mai veuravini boġono ribaia, be Barau tauġena ema ġena maġuri mabarana na ġomi bene vaġa-vonuvonu-raġemi.

<sup>20</sup> Barau ġena seġuka ġita ġeraġi eġauveini tu, dagara barego lelevaġiri eveirini; ġita na ġia tanoġiani dagarari ema ġita na tatuġamaġirini dagarari mabarari maki evanaġirini. <sup>21</sup> Moġa lorinai ġita ekalesia nuġanai tarimara e Keriso Iesu ġena maġuri nuġanai tarimarimara ġuruna ġuruna na mabarabarara na Barau moġo bitana vaġa-raġea vanaġivanaġi. Mai tu guruġa moġonina. Amen!

## 4

#### *Ekalesia mabarara tu Keriso nuġanai tauġani sebona*

<sup>1</sup> Au Paulo tu dibura numai atanuni, korana Vereġauka vetuġunaġina aiaġo-viniani nai. Au na ġomi alaunaġimini, Barau na ekeamito maġurinai moġo boġono tanu, boġono tanu-namonamo moġo. <sup>2</sup> Karomi vekaravari ai ġomi tu boġono vetore-variġo, ema manau ai boġono tanu, boġono vevaġa-gwaġiġi. Ma karomi tari na veiġa ġelearini nai tu, veuravini ai nuġami boġono vaġa-gwaġiġiri karomi ġeri ai, be karomi tata ġesi

asi boḡono vebaru-vini, a boḡono veiau-namo moḡo. <sup>3</sup> Ġita tu Iauka Veāḡa na eḡabi-vegogorato, be tasebonato, ma maino varona na ebaru-vegogorato, be maino ai tatanuni. Moḡa lorinai mai tasebonato ma maino ai tatanuni maḡurina maiḡa tu boḡono kokore, be boḡono ḡabi-gigitaria.

<sup>4</sup> Ġita mabarara tu tauḡani sebona moḡo, ema Iauka maki sebona moḡo ḡerai etanuni. Ma Barau na ḡomi ekeamito maki dagara sebona moḡo uranai ekeamito, ma ḡita toma tu mo dagara sebona moḡo tatuḡamaḡi-kauani, (mo tu maḡuri vanaḡivanaḡi). <sup>5</sup> Vereḡauka sebona etanuni, veḡabidadama sebona etanuni, babatiso veiḡana sebona moḡo etanuni. <sup>6</sup> Barau maki sebona etanuni, ma ḡia tu ḡita mabarabarara Tamara; e ḡia tu barego ma tarimarima mabarara iata-raḡerai etanuni, eḡita-ḡaurani, ema tarimarima mabarara fakarai eḡauveini, ma tarimarima mabarara nuḡarai etanuni.

<sup>7</sup> Ma ḡita tata tu Keriso na varevare evinirato, ḡia ḡena namo e varevare-bara ilailari ai bene vinira etato kavana. <sup>8</sup> Moḡesina naima Buka Veāḡai Keriso varina maiḡesi ekirani, “Ġia guba ḡana ma evaraḡeto nai tu,

dibura tarimari ebarubarurito,  
benamo ḡia murinai evaḡa-rakarito, ma eḡori-kaurito,  
benamo tarimarima varevare evinirito.”

<sup>9</sup> Mai guruḡa, “Ġia ma evaraḡeto,” anina tu kara? Mai guruḡa, “Ġia ma evaraḡeto,” na ḡita evaḡa-ribarani, Keriso tu dia evaraḡeto moḡo. Asiḡina. Ġia tovotovonai tu tanobara gabigabina ḡana roḡo evariḡoto. <sup>10</sup> Mo evariḡoto tarimana moḡa, ḡereḡana guba mabarari tu evanaḡirito, ḡia tu tuḡuna vanigerena ḡana evaraḡeto. Ġia moḡesi evaraḡeto anina tu, guba e tanobara mabarana ḡia na tauḡena Iaukana na bene vaḡa-vonua ḡana. <sup>11</sup> Ma ḡia tauḡena na kotari tu apostolo ḡauveina evinirito, (mai tu ekalesia vaḡa-ruḡana ḡauveina), tari tu peroveta ḡauveina evinirito, tari tu evanelia ḡauveina evinirito, tari tu ekalesia nari ḡauveina e Barau ḡena guruḡa vaḡa-riba-iaḡina ḡauveina evinirito. <sup>12</sup> Moḡeri ḡauvei evinirito tauna korikori tu, Barau ḡena tarimarima veaḡari bene rovina-toreri, ḡena ḡauvei beḡene veiri, e Keriso tauḡanina beḡene vaḡa-tubu ginikaua, <sup>13</sup> bene iaḡo mo, ḡita ḡera veḡabidadama ema ḡera riba Barau Natuna ḡenai beḡea baregoni e bita sebona-korikorini, benamo bita barego-ginikauni, ema Keriso ḡena veiḡa e maḡuri mabarana maki ḡita na bita ḡabiani.

<sup>14</sup> Benamo mo dabarai ḡita tu dia mero raraka-rarakari kavari, be vevaḡa-riba irauirauri na e tarimarima ḡeri iaunega ḡofaḡofari na ema tuḡamaḡi rakavari na asi beḡene ḡofa-iaḡora e ḡofa-iaḡomara; noḡa moḡo ḡasi iavara ema ureure na ekwari-iaḡoani ekwari-iaḡomaiani kavana. <sup>15</sup> Senaḡi ḡita tu veuravini ai guruḡa moḡoniri bitana kiraḡi, be Keriso ḡena maḡuri nuḡanai dagara mabarari ai tu bitana barego. Keriso tu ḡita edebarani. <sup>16</sup> Keriso tu tauḡani debana, ma tauḡani mabarana tu ḡia ḡena seḡukai legana tata ḡia na etorerito gaburi ai ḡeḡauveini. Ma ḡia ḡena seḡukai komukomuri evaḡa-tubukau gwaḡiḡirini varovarori na turiḡa komukomuri evaḡa-tubutubu-kaurini, ema evaḡa-tubutubukau gigitaririni. Benamo monana tauḡani legana irauirau tauḡani nuḡanai tata ḡena ḡauvei ḡeveiani, benamo tauḡani ebaregoni, ema ma veuravinina ḡesi tauḡena etubu-baregoni.

*Barau* ḡena doḡoro tarimari ḡeri tanu dabarana

<sup>17</sup> Tauna moḡa, au aurani, mai guruḡa ta nakira-varami Vereḡauka aranai. Au ḡegu ura baregona, ḡomi tu roḡo mukunai ḡetanuni tarimari ḡeri tanu maḡurinai tu asi ma boḡono tanu-ḡenoḡoi. Korana ḡia ḡeri tuḡamaḡi tu asi aniri dagarari ḡeri ai ḡetorerini. <sup>18</sup> Ġia ḡeri tuḡamaḡi tu mukuna furufuru, be asi ḡeri tuḡamaḡi-faka dabarari. Barau ḡena maḡuri ai maki ḡia tu murikanai ḡetanuni, korana ḡia tu asi ribari ḡeri nuḡa-bubu ai bene. <sup>19</sup> Ġia tu veiḡa namori mamiraḡiri ema veiḡa rakavari mamiraḡiri maki asiḡina ḡinavaḡi ḡemami-raḡirini. Ġia tu tauḡeri ḡevevini-fitoḡato rakava ḡena, vei-taḡuitaḡui dabarari ai ḡerakani e mata-boraḡa veiḡari ḡeuravini-baregorini.



<sup>20</sup> Senaḡi ḡomi na Keriso ḡena maḡuri tu dia moḡesina ḡoribaiato. <sup>21</sup> Ḳomi na ḡia varina tu moḡoni ḡoseḡaḡiatio, ema Iesu ḡena maḡuri nuḡanai guruḡa moḡonina Iesu ḡenai etanuni tu ḡevaḡa-riba-iaḡimito. <sup>22</sup> Ḳevaḡa-ribamito tarimari ḡekirato: Ḳemi maḡuri guineri boḡono koki-fitoḡari, dabuḡa guineri ḡokoki-fitoḡarini kavana. Mo tu tarima guinena ḡekiraḡiatio. Ḳia tu dagara tari na ḡeḡofaiani, ma moḡeri mata-ḡaniḡaniri ai be erakava-kwaikwaini. Ḳia tu boḡono koki-fitoḡaia. <sup>23</sup> Be ḡemi tuḡamaḡi mabarana ma bene veiareva-ḡenoḡoi. <sup>24</sup> Ema tarima variḡuna ma boḡono riḡo-kaua, dabuḡa variḡuna ḡoriḡo-kauani kavana. Mai tarima variḡuna tu Barau ilailana iobukaiobuka e veaḡa eveiatio.

<sup>25</sup> Moḡa lorinai ḡomi tata na veiḡa ḡofaḡofari ḡemina boḡono tore-veḡitari, benamo sevimi tarimari ḡesi guruḡa moḡoniri moḡo boḡono kiraḡi. Moḡesi boḡono vei, korana ḡita mabarara tu tauḡani sebona legana tata. <sup>26</sup> Boḡo baruni, senaḡi vei-rakava tu asi boḡono vei; e ḡemi baru asi bene iaḡo mo, ḡaro benea keto-firiḡo. <sup>27</sup> Diabolo faka ta asi boḡono vinia. <sup>28</sup> Elemani tarimana asi ma bene lema-ḡenoḡoi, a bene iaḡo, benea ḡauvei. Ḳia tauḡena ḡimana na ḡauvei namori bene veiri, be bene ḡoitaḡori dagarari kotari tu asi ḡeri-ḡari tarimari bene vaḡa-kava-iaḡiri. <sup>29</sup> Bokami na guruḡa rakavari asi beḡene raka-rosi. Senaḡi vevaḡa-kokore guruḡari moḡo boḡono kiraḡi, moira tarimari vaḡa-kavari ḡana, be beḡe seḡaḡirini nai, kokore beḡene ḡabi. <sup>30</sup> Ema Barau ḡena Iauka Veaḡa asi boḡono vaḡa-nuḡa-metoe. Korana Iauka Veaḡa tu Barau ḡena vetoḡa o maka ḡomi ḡemi ai etanuni. Moḡa anina ḡomi tu ḡia ḡena. Mani maka ḡomi ḡemi ai tu betanuni, beiaḡoni mo, Barau na ḡomi bevaḡa-maḡuri korikorimini ḡarona. <sup>31</sup> Nuḡa ḡirimaḡirima, baru e baru-rakavarakava, vevane ema vevaḡi, e tarima vaḡa-rakavari tuḡamaḡiri, ema guruḡa rakavari mabarari boḡono tore-veḡitari ḡemina. <sup>32</sup> Karomi ḡesi boḡono veiau-namo ema boḡono veveura-vini. Tata karomi ḡeri ai veiḡa rakavari ḡoveirini moḡeri boḡono tuḡamaḡi-fitoḡari, Keriso ḡena maḡuri nuḡanai Barau na ḡemi rakava etuḡamaḡi-fitoḡarito kavana.

## 5

### *Mamai boḡono tanu*

<sup>1</sup> Ḳomi tu Barau natuna, euravini-baregomini, moḡa lorinai ḡia boḡono tovoovoa. <sup>2</sup> Veuravini ai boḡono tanu Keriso kavana. Ḳita eura-vinirato lorinai, tauḡena tauḡanina e ḡena maḡuri etore-tariato ḡita urarai. Ḳia na tauḡanina tu varevare dagarana bonana namo vedaureana dagarana evaḡa-iaḡoato, ema Barau ḡena ginitaḡo mamoenai evaḡa-iaḡoato.

<sup>3</sup> Ḳomi tu Barau ḡena tarima veaḡami ai ḡoiaḡoto lorinai, kima ema mata-boraḡa guruḡari, veiḡa mirori guruḡari, e mata-ḡaniḡani guruḡari ḡomi fakami ai asi boḡono kiraḡiri. <sup>4</sup> Guruḡa mirori, guruḡa babori, ema vaseva rakavari maki asi boḡono kiraḡiri, korana maiḡeri tu asi namo, senaḡi ḡomi tu Barau moḡo boḡono tanikiu-vinia. <sup>5</sup> Korana dagara sebona boḡono riba: Ekimani tarimana, e veiḡa mirori eveini tarimana, e emata-ḡaniḡanini tarimana tu Keriso ema Barau ḡeri Basileiai ḡia tu asi voina e asi ḡena gabu. Mata-ḡaniḡani veiḡana tu noḡa moḡo kwaivakuku toma-rakariḡo-vinina veiḡana kavana.

<sup>6</sup> Tarimarima ḡeri ḡofaḡofa guruḡari na asi bene ḡofami, korana Barau ḡena baru-baregona tu maniḡeri veiḡa ḡaramari ai ḡeseḡaforeni tarimari iatari ai bema vaḡa-foforiani. <sup>7</sup> Moḡa lorinai moḡesi ḡeveini tarimari ḡesi asi boḡono vekako. <sup>8</sup> Ḳomi guinenai maki mukuna furufuru tarimari, senaḡi toma ḡomi Vereḡauka ḡena maḡuri nuḡanai tu mama tarimari. Ḳomi tu mama natuna, be mama maḡurinai boḡono tanu ema boḡono raka. <sup>9</sup> Mama ḡwaḡwana tu veiḡa e tuḡamaḡi namori, veiḡa iobukaiobukari, ema guruḡa e maḡuri moḡoniri nuḡari ai etanuni. <sup>10</sup> Vereḡauka na kamara maḡuri ema veiḡa euravini-baregorini boḡono vetauri, be boḡono ribari. <sup>11</sup> Mukuna veiḡari ema ḡauveiri tu asi ḡwaḡwari namori, be asi boḡono veiri ema asi boḡono ḡauvei-iaḡiri.

A ġomi na moġeri veiġa e ġauvei tu boġono vaġa-foforiri, mo tu vei-rakava veiġari.<sup>12</sup> Korana mai seġafore tarimari na kara ġevei-vekuretoġarini, moġeri tu bokiraġirini ai moġo bemaikamuni.<sup>13</sup> Senaġi mama na tu moġeri dagara mabarari evaġa-fofori ginikaurini, be mamai tu vetoġari korikori ġefoforini,<sup>14</sup> korana mama na vauro dagara vetoġari korikori evaġa-foforini. Moġesi naima ġera guruġa ta ekirani, “Roġo ogenani tarimamu notataġa!

Mase na novariġisi!

Be Keriso na bene mama-tarimu.”

<sup>15</sup> Moġa lorinai, ġemi veiġa loriri boġono toreri, babo tarimari kavari asi boġono vei, senaġi iaunega tarimari boġono tovotovori.<sup>16</sup> Ġemi taimi mabarana boġono ġauvei-iaġi ginikauri, a ta asi boġono fitoġa-kavaia, korana toma tu nega rakava-kwaikwaina.<sup>17</sup> Tauna moġa, asi boġono vei-babobabo, senaġi Vereġauka ġena ura tu kara, moġeri boġono tuġamaġi-fakari, be boġono ribari.<sup>18</sup> Wain asi boġono niu-lelevaġi, bevaġa-babomini ġesi. Mo veiġa na ġemi maġuri bevaġa-rakavaiani. A ġomi tu Iauka Veaġa na neġi bene vaġa-vonuvonu-raġemi.<sup>19</sup> Karomi Salamo ai e Barau vaġa-raġena mariri ai ema Iauka Veaġa na evinimini mariri ai boġono vaġa-guruġari. Boġono mari ema nuġami mabarari ma iakumi ġesi Vereġauka boġono vaġa-raġea.<sup>20</sup> Vanaġivanaġi ġera Vereġauka Iesu Keriso aranai Tamara Barau boġono tanikiu-vinia dagara mabarari dairi ai.

<sup>21</sup> Karomi gabureri ai boġono tanu, moġesi boġo veini tu Keriso boġo gubakauani.

*Veġaraġo vavineri ema tauri*

<sup>22</sup> Veġaraġo vavinemi, Vereġauka ġena veġitaġau gaburenai ġotanuni kavana, ġaraġomi ġeri veġitaġau gaburenai boġono tanu.<sup>23</sup> Korana tau tu ġaraġona vavinena ġena deba tarimana, Keriso ekalesia ġena deba tarimana kavana. Keriso tu ekalesia ġena vevaġa-maġuri tarimana. Ekalesia tu Keriso tauġanina.<sup>24</sup> Vaġa-ilailana ekalesia Keriso ġena veġitaġau gaburenai etanuni kavana, vavine maki ġaraġori tauri ġeri veġitaġau gabureri ai beġene tanu dagara mabarari ai.

<sup>25</sup> Tau, ġaraġomi vavineri boġono ura-viniri, Keriso na ekalesia eura-viniato ilailanai, benamo ġia uranai Keriso tauġena ġena maġuri etore-tariato.<sup>26</sup> Keriso moġesina eveito tu, ekalesia bene vaġa-veaġaia, ġena tarimarimai beġene iaġo ġana. Ġia na ġena guruġa na e nanu na eġuriġiatio, evaġa-veaġaiatio.<sup>27</sup> Benamo Keriso tauġena ġoirana ekalesia marevana baregona na benema vaġa-ruġa-taria ġana. Benamo ekalesia ġia ġoiranai bene ruġa tu, ġenai miro misina ta maki asiġina, kefi ġemakuku-makukuni kavari maki asiġina, ema rakava misina ta maki asiġina ġinavaġi. Senaġi ekalesia Keriso ġoiranai tu veaġa ema vaġa-daġana kererena misina ta maki asiġina ġinavaġi bene ruġa-tari.<sup>28</sup> Mai dabara sebonai tau na ġaraġori vavineri beġene ura-viniri. Beġene ura-viniri tauġeri tauġaniri ġeura-vinirini ilailanai. Ġaraġona vavinena eura-viniani tarimana tu ġia tauġena maki eveura-vinini.<sup>29</sup> Korana tau ta na ġia tauġena tauġanina vaġa-rakavana tu asi eurani, senaġi eġubuanu e eġitaġau-ginikauani, Keriso na ġena ekalesia eveiani kavana.<sup>30</sup> Korana ġita tu ġia tauġanina legana.<sup>31</sup> (Tau e vavine tu tauġanina sebona, Buka Veaġai ekirani kavana, ekirani), “Moġesi naima tau na tamana e sinana beraga-kwanerini, benamo ġaraġona vavinena ġenai bema-kafakauni, benamo tauri ruarua tauġani sebonai beġe iaġoni.”<sup>32</sup> Mai guruġa ema maġuri maiġa tu vekuretoġa, ma anina tu barego lelevaġi. Au na Keriso ema ekalesia ġeri veġaraġo akiraġirini.<sup>33</sup> Senaġi ma nakira: Ġomi tata na maki ġaraġomi vavineri boġono ura-viniri, tauġemi tauġanimi ġoura-vinirini kavana. Vavine na maki ġaraġomi tauri boġono gubakauri.

## 6

*Natu e tama sina*

<sup>1</sup> Natu, tamami e sinami garori boġono seġaġiri Vereġauka ġena maġuri nuġanai ġotanuni nai, korana mo tu veiġa maorona.<sup>2</sup> “Tamamu e sinamu bono gubakauri,”

korana mai tu taravatu giniginena ma kiraḡi-torena ḡesi dagarana: <sup>3</sup> “Be ḡemu tanu maḡurina bene namo ema mai tanobarai ḡemu tanu-maḡuriri beḡene mauka.”

<sup>4</sup> Ma tama na maki, natumi asi boḡono vaḡa-baruri, senaḡi Vereḡauka ḡena vevaḡa-riba guruḡari ema sisiba guruḡari boḡono viniri. Be moḡeri guruḡa e veiḡa beḡene korana-iaḡiri ḡeri tanu ḡarori mabarari ai.

*Tuḡu-rakaorakao merori e ḡeri baregori*

<sup>5</sup> Tuḡu-rakaorakao meromi, ma vegubakaumi e ma garimi ḡesi mai tanobarai ḡeḡita-ḡaumini tarimari garori boḡono seḡaḡiri. Ḡomi ḡeḡita-ḡaumini tarimari maniḡeri tu ma nuḡami mabarari ḡesi boḡono seḡaḡi-viniri, Keriso nuḡami mabarari ḡesi boḡoro seḡaḡi-vinia ilailanai boḡono seḡaḡi-viniri. <sup>6</sup> Tarima tari tu ḡeḡita-ḡaurini tarimari iauri ḡevaḡa-namori ḡana tu ḡoirari ai ḡeḡauvei-ginikauni, senaḡi ḡeḡita-ḡaurini tarimari ḡeraka-doḡe-muriḡini tu asi ḡeḡauvei-kokoreni. Ḡia ḡeri veiḡa na asi boḡono iaḡo. Ḡomi tu Keriso ḡena vetuḡunaḡi tarimami lorinai, ma nuḡami mabarari ḡesi Barau ḡena ura boḡono veia. <sup>7</sup> Nuḡami mabarari ma namori ḡesi vetuḡunaḡi boḡono iaḡo-vini, Vereḡauka ḡenai boḡoro veia kavana, a dia tarimarima ḡeri. <sup>8</sup> Korana ribami, Vereḡauka na ḡemi ḡauvei namori ḡoveirini voire tata bevinimini. Enabe ḡomi tu tuḡu-rakaorakao tarimami o fakai e maḡuri namonai ḡotanuni tarimami, voimi tata bevinimini veḡata.

<sup>9</sup> Ḡomi veḡitaḡau tarimami maki, ḡemi tuḡu-rakaorakao merori ḡeri ai veiḡa namori boḡono vei. Veiḡa metori e vaḡa-gariri veiḡari ḡeri ai asi boḡono vei, korana ḡomi ma ribami, ḡia ema ḡomi eḡita-ḡaumini Verena baregona tu gubai etanuni. Ema ma ribami maki, ḡia na tarimarima ḡeri vetoḡai tu asi eḡabi-raḡerini, ḡia ḡenai tarimarima tu mabarari ilaila moḡo.

*Vetari dabuḡari*

<sup>10</sup> Ḡegu guruḡa magona tu maiḡa: Boḡono kokore Vereḡauka ḡena maḡuri nuḡanai, ema Vereḡauka ḡena seḡuka na bene vaḡa-kokoremi. <sup>11</sup> Barau ḡena vetari dabuḡari mabarari boḡono veiri, be Diabolo ḡena iaunega boioḡari ḡofaḡofari eveirini nai, boḡono kokore, be boḡono tore-ḡauri. <sup>12</sup> Korana ḡita tu dia tarimarima ḡesi tavetarini. Asiḡina. Ḡita tu ḡeveḡitaḡauni iaukari baregori, e ḡeri maoro barego iaukari, e mai tanobarai mukuna ḡeḡita-ḡauani iaukari, ema iauka rakavari asisebo guba gaburi ai ḡetanuni iaukari ḡesi tavevaḡini. <sup>13</sup> Moḡa lorinai Barau ḡena vetari dabuḡari mabarari na ḡovedabuḡa, be ḡaro rakava kwaikwaina bene iaḡoma nai, ḡomi tu boḡono ruḡa-gigitari, ema ḡauvei mabarari boḡo vei-ḡosirini murinai, ḡomi tu roḡo boḡono ritoḡo-gwaḡiḡi.

<sup>14</sup> Be, boḡono ruḡa-gigitari, ma maiḡesi boḡono vedabuḡa: Gabakami ai guruḡa moḡonina boḡono toua, gabaḡau gabakami ai ḡotouani kavana. Vei-iobukaiobuka tu koba kouḡauna ḡana, funu dabuḡa kavana kobami ai boḡono kafa-kauri. <sup>15</sup> Ema kwakumi ai tu maino varina namona boḡono fiua veiḡana boḡono veia, tamaka ḡoveirini kavana. <sup>16</sup> Moḡeri muriri ai tu veḡabidadama ḡesina boḡono ḡabi-vaizia, monana Diabolo ḡena veiḡa rakavari na bedibamini dibari ma karava-karavari ḡesi boḡo kourini e boḡo laubusebuserini riba. <sup>17</sup> Ema vevaḡa-maḡuri boḡono ḡabia, ḡemi kwaraḡau ai boḡono vaḡa-iaḡoa. Ema Barau ḡena guruḡa boḡono ḡabi-vaizia vetari baḡana kavana, Barau ḡena guruḡa tu Iauka Veaḡa ḡena vetari baḡana.

<sup>18</sup> Iauka Veaḡa ḡena seḡuka nuḡanai boḡono ḡauḡau-vanaḡi vanaḡi. Ḡemi ḡauḡau ai tu ḡauḡau dabarari irauirauri ai boḡono ḡuriḡuri ema ḡemi ura dagarari mabarari noḡinoḡiri boḡono vei. Tauḡemi lorimi maki boḡono vetore e rakava boḡono vaḡa-darereri, ema Barau ḡena tarima veaḡari mabarari iatari ai boḡono ḡauḡau-vanaḡivanaḡi. <sup>19</sup> Au maki iatagu ai boḡono ḡuriḡuri. Be naguruḡa ḡana, bokagu bana keoa tu, Iauka Veaḡa na guruḡa bene vinigu, be mai Vari Namona vekuretoḡana tu asi garigu ḡesi tarimarima bana kira-varari. <sup>20</sup> Au tu mai Vari Namona maiḡa bana fiua ḡana tarimagu. Ma au tu mai Vari Namona uranai dibura numai ma seinigu atanuni. Boḡono ḡauḡau, be Barau na bana kiraḡia etoni ilailanai, asi garigu ḡesi bana kiraḡi-foforia.

*Guru*ḡa magona

<sup>21</sup> Tikiko tu ḡita tarikakara namona ta ema ḡia tu ma ḡena vetuḡamaḡikau Vereḡauka ḡena maḡuri nuḡanai. Dagara mabarari, au aiḡesina atanuni e kara aveini variri mabarari tu boḡono ribari ḡana, be Tikiko na vauro beasi kira-varamini. <sup>22</sup> Au na ḡia tu moḡesina naima atuḡu-iaḡosiani. Bene iaḡosi, be ḡai ḡema tanu maḡurina mainai tu aiḡesina boḡonoasi ribari, ema beneasi vaḡa-gwaḡiḡimi.

<sup>23</sup> Maino tarikaka mabarami ḡesi bene tanu. Tamara Barau ema Vereḡauka Iesu Keriso ḡerina eiaḡomani veuravinina ma veḡabidadamana ḡesi maki tarikaka mabarari ḡesi bene tanu. <sup>24</sup> Barau ḡena namo e varevare-bara tu, ḡera Vereḡauka Iesu Keriso asi ekorini veuravinina na ḡeuravini-vanaḡi vanaḡiani tarimari mabarari iatari ai bene tanu.

## PAULO ĜENA TORETORE FILIPI EKALESIARI ĜERI

Filipi vaĝa-foforina guruĝari

Ekalesia doĝorona Filipi ai tu Paulo ema Silas ĝerina eĝorato, mo tu Paulo ĝena evanelia varivarina vaĝa-ruaruana eveiato taiminai (Apostolo 16).

Paulo na mai fefa tu Romai ediburato-ĝoi nuĝanai etoreato. Mai fefa tu laĝani 60 beiaĝo 61 fakanai ta etoreato, mo tu Iesu emaseto murinai.

Mai buka anina baregona tu "Iaku ema verere", ema ĝena siri baregona tu karoa 4:4. Mai fefa nuĝanai "iaku" tu ĝutuma boiavi-ĝoitaĝorini: 1:4-6; 1:14-18; 1:25-26; 2:2; 2:14-16; 2:17-18; 2:25-29; 3:1-3; 4:4; 4:10-12; ema veĝabidadama, veuravini, nuĝa-sebona ema vetore-variĝo o vevaĝa-manau boĝo ĝitaiani tu iaku ĝenana etubu-raĝeni.

Mai fefa etoreato tu, 1) ekalesia doĝorona bene tanikiuri, ĝevarevare-viniato lorinai, ema bene vaĝa-ribari bevarivaririni; 2) bene launaĝiri, Keriso ĝena tuĝamaĝi beĝene tovotovo, ĝeri tuĝamaĝi sebonai moĝo beĝene torea; 3) bene launaĝiri, taimi namori ai o rakavari ai beĝene iaku moĝo ema ĝeri vetarikaka Iesu Keriso ĝesi tu bene tanu asi bene iagaiaga.

Paulo na mai fefa tu maiĝesina eboioĝaiato:

1. Keriso tu ĝita ĝera maĝuri - karoa 1
2. Keriso tu ĝita ĝera tuĝamaĝi ai bene tanu - karoa 2
3. Keriso ĝenai matara bene tubukau - karoa 3
4. Keriso tu ĝita ĝera kokore korana - karoa 4

<sup>1</sup> Au Paulo ema Timoteo, Keriso Iesu ĝena vetuĝunaĝi tauma, na ĝomi Filipi ai Barau ĝena tarimarima veaĝari ma ĝemi ekalesia guine-iaĝina tarimari ema vevaĝa-kava tarimari ĝesi atore-vinimini. Ĝomi tu Keriso Iesu ĝesi varau ĝosebonato. <sup>2</sup> Barau ĝita Tamara ema ĝera Vereĝauka Iesu Keriso ĝerina varevare-bara ema maino ĝemi ai bene tanu.

*Paulo na Barau evaĝa-namoato*

<sup>3</sup> Ĝomi atuĝamaĝimini negari mabarari ai, ĝegu Barau atanikiu-viniani. <sup>4</sup> Ĝegu ĝauĝau ai vanaĝivanaĝi ĝomi mabarami iatami ai aĝuriĝurini ma iakugu ĝesi, <sup>5</sup> korana ĝemi vevaĝa-kava dabarari namori na ĝovaĝa-kavaguto Vari Namona varifiunai, Vari Namona ĝoĝabi-raĝeato ĝaron na beiaĝoma mo initoma. <sup>6</sup> Ma ribagu maoro, Barau na mai ĝauve i namona, nuĝami ai evaĝa-foforiato ĝauveina tu, bevesiriĝuni, beiaĝoni mo, Keriso Iesu ĝena ĝenoĝoi ĝaronai vau bevaĝa-kori ginikauani.

<sup>7</sup> Ĝomi mabarami ĝegu vemamiraĝi na evaĝa-moĝoniani, ĝomi tu au nuĝagu ai roĝo ĝotanuni. Aba, dibura numai atanuni nuĝanai, o Kota ĝeseĝaĝini tarimari ĝoirari ai Vari Namona akiraĝi-foforiani e gogobana aragani nuĝanai maki, ĝomi tu au nuĝagu ai veĝata. Korana ĝomi mabarami maki Barau na ĝena varevare-bara evinimito, au eviniguto kavana. <sup>8</sup> Barau ma ribana vedaurea, au ĝomi akiramini, au ĝegu veuravini ĝomi mabarami ĝemi ai tu barego vedaurea, Keriso Iesu na euravini-baregomini kavana.

<sup>9</sup> Barau anoĝiani, ĝemi ai veuravini bene tubu-barego vedaurea, ma riba ema iaunega bene vinimi, be Barau ĝena ura boĝono riba-ginikauri. <sup>10</sup> Monana vauro boĝo ribani, dagara namori tu aiĝeri na ĝemi tanu beĝe vaĝa-namorini rakava mabarari ĝerina, benamo Iesu Keriso ma beĝenoĝoi-iaĝomani ĝaronai, ĝomi tu asi vetoukaumi e asi ĝemi kerere ta maki. <sup>11</sup> Ema veiĝa namori e iobukaiobukari mabarari, Iesu Keriso ĝenana ĝeiaĝomani dagarari, ĝomi ĝemi ai beĝe tanuni, Barau vevato-iaĝina e vaĝa-raĝena ĝana.

*Paulo tu dibura numai etanuni, senaĝi Vari Namona ebaregoni*

<sup>12</sup> Tarikakagu, ĝegu ura boĝono riba, au beĝe diburagu o kara beĝe ĝora ĝegu ai dagarari na Vari Namona ĝena tubu tu asi beĝe vaĝa-rakavaia. Asiĝina. Moĝeri na tu

Vari Namona ġena tubu beġe vaġa-baregoa. <sup>13</sup> Mai maġuri ġenana Kaisara, Roma ġeri vere, ġena numa ġeġita-ġauani tauri ema tarimarima mabarari maki beġe riba, au tu Iesu Keriso ġena vetuġunaġi aiaġo-vinini ġaramanai, dibura numai atanuni. <sup>14</sup> Ma ġegu tanu dibura numai ġenana maki au tarikakagu ġutuma ġeri veġabidadama Vereġauka ġenai beġe gwaġiġi naima, Barau ġena guruġa ma kokoreri ġesi ġeġobata-iaġiani.

<sup>15</sup> Moġoni, tarima kotari na ġegu ġauvei namo dainai, ġemama-viniguni. Ġeri ura tu au ġevaġa-rakavagu ġetoni, naima Keriso ġeġobata-iaġiani. Senaġi kotari na tu nuġa-namo ai ġeġobata-iaġiani. <sup>16</sup> Maiġeri tu veuravini ġenana ġeġobatani, korana ribari, au diburai atanuni tu, Vari Namona gogobana bana raga ġana Kota tarimari ġoirari ai. <sup>17</sup> A tarima kotari na Keriso ġeġobata-iaġiani tu dia nuġa-namo ai, senaġi tauġeri arari beġene vaġa-raġeri ġana. Ġeri tuġamaġi tu, au dibura numanai roġo atanuni nuġanai, ġegu meto ġevaġa-baregoa ġetoni. <sup>18</sup> Bevaitovo, au ġegu iaku tu ebaregoni. Korana nuġa-namo ai Keriso ġeġobata-iaġiani ba asiġina, senaġi dagara baregona tu Keriso varina bene fiu-rovorovo dabara mabarari ai. Ma ġegu iaku maki bebarego-iaġoni moġo. <sup>19</sup> Korana ġemi ġauġau ai Barau ġonoġiani ema Iesu Keriso Iaukana na evaġa-kavaguni. Moġa lorinai au ribagu, au tu maġuri badoġariani. <sup>20</sup> Ġegu ura baregona ema dabaragu mabarana ġesi akirani, au tu asiġina ġinavaġi bana moira ġegu ġauvei nuġanai. Moġesi nai initoma dibura numai vanaġivanaġi akokoreni kavana bana kokore, be au taugu mabarana ġesi Iesu Keriso arana ma bana vaġa-raġea ġegu maġuri ġenana o ġegu mase ġenana.

<sup>21</sup> Be au ġegu ai maġuri tu kara? Iesu Keriso moġo! Moġa lorinai mase au ġegu ai tu dagara namona. <sup>22</sup> Betaġu bema roġo bamaġuri-taġoni nai, ribagu Keriso ġena ġauvei roġo baveiani, senaġi asi aribani, aiġa bara ġabia, mase ba maġuri? <sup>23</sup> Au tu dagara ruarua auravini-baregorini: Ġegu ura mai maġuri bara raga-kwanea, be Keriso sevinai bara tanu tu dagara namo vedaureana moġo; <sup>24</sup> senaġi namona tu ġomi bana vaġa-kavami ġana, be mai tauġani nuġanai roġo bana tanu. <sup>25</sup> Au tu ribagu, au roġo maġuri batanuni. Ġomi ġesi roġo bita tanuni, korana ġemi veġabidadama vaġa-tuburi ema ġemi iaku vaġa-baregori ġana. <sup>26</sup> Au ma baiaġosini neganai, ġomi tu boġo iakuni au ġegu ai, ema Keriso Iesu boġo vaġa-raġeani.

### Ġemi tanu

<sup>27</sup> Dagara sebona tu Keriso ġena Vari Namona na ekiraġiani ilailanai boġono tanu. Baiaġosini ġitaġitami ba manaġa na moġo varimi baseġaġini, baribani, ġomi tu nuġa-namo ai ġoritoġo-gigitarini ema nuġa sebonai Vari Namona ġoveseġaġi-vevini-iaġiani ma kokoremi ġesi. <sup>28</sup> Ġebaru-vinimini tarimari na asiġina ġinavaġi beġene vaġa-garimi. Monana ġeri ai vetoġa beveiani, ġia tu Barau na bevaġa-rakava kwaikwairini, a ġomi tu Barau na bevaġa-maġurimini. <sup>29</sup> Ġomi tu dia Keriso ġena varevare-bara e namo lorinai Keriso ġovaġa-moġoniani tarimami ai ġoiaġoto moġo, senaġi ġomi tu Keriso ġena midigumidigu ai maki boġono midigu ġana ġia aranai. <sup>30</sup> Ġomi maki initoma au ġesi bisini vetari-vegogo. Mai vetari tu vetari guinena ġoġitaiato-ġoi vetarina ini roġo ma ġoseġaġiani vetarina roġo avetari-iaġiani.

## 2

### Keriso ġena vevaġa-manau ema iaru-korokoro

<sup>1</sup> Ġemi maġuri Keriso nuġanai monana evaġa-kokoremini ba? Ema ġena veuravini na ġemi tuġamaġi evaġa-gwaġiġirini ba? Ġomi na Iauka Veaġa ġatami ai ġovaġa-iaġoato ma ġotanu-vegogoni ba? Ma ġemi vevetuġaġwa ema vevaġa-kava ġatami tata ġeri ai ġoveirini ba? <sup>2</sup> Moġa lorinai anoġimini, boġono vaġa-iaku korikorigu, ġemi tuġamaġi vegogo ai, veuravini sebonai ema nuġami e iaukami maki sebonai boġono tanu. <sup>3</sup> Dagara ta asi boġono veia vevaġa-raġe tuġamaġina maġurina ema veiavi maġuriri ai, senaġi

ġomi tauġemi boġono vevaġa-variġo tata fakami ai, a karomi boġono ġabi-ġesitaġori.  
<sup>4</sup> Karomi ġeri namo maki boġono vetau, a dia ġomi tauġemi ġereġami ġemi namo moġo.

<sup>5</sup> Ġemi veiġai Keriso Iesu kavana boġono vei, ġena tuġamaġi boġono ġabia:

<sup>6</sup> Ġia tu dagara mabarari ai

Barau ġesi ilaila,  
 senaġi asi etuġamaġito,  
 mo maġuri moġa bene ġabi-taria.

<sup>7</sup> Ġia tu tauġena evekiraġi-fitoġato,  
 benamo vetuġunaġi merona kavanai eiaġoto.

Ġia maki tarimarima kavana eġorato,  
 benamo ġita fakarai ema tanuto.

<sup>8</sup> Ġia tu eveġwa-variġoto ema Barau eseġaġi-viniato-ġoi mo ġena mase,  
 aba, satauro ai emaseto noġa moġo vei-rakava tarimana ta kavana.

<sup>9</sup> Moġa lorinai Barau na eġabi-vaisiato guba tuġunai,  
 ma ara namo vedaureana eviniato.

Mo ara tu ara ta ġesi asi ilaila.

<sup>10</sup> Iesu arana bakunai guba aneruri,

e tanobarai ġetanuni tarimari,  
 ema tanobara gaburenai o mase gabunai ġetanuni tarimari mabarari beġene vetuitui-  
 tari ġia ġoiranai.

<sup>11</sup> Ema mea mabarari na Iesu Keriso beġene kiraġia “Vereġauka”,  
 Barau ġita Tamara vevato-iaġina ġana.

*Bitana mama-rovorovo tanobara ġena mama*

<sup>12</sup> Au ġatagu mabarami, vanaġivanaġi au ġoseġaġi-viniguto-ġoi ġera ġauvei vegogo  
 ai kavana murigu ai maki boġono seġaġi-vinigu veġata. Boġono ġauvei ma garimi ema  
 ma ġoġo-ġoġomi ġesi, maġuri boġono doġaria uranai. <sup>13</sup> Korana Barau tu ġomi nuġami  
 ai eġauveini, ġomi elaunaġimini e kokore evinimini, ġena ura boġono veiri ġana.

<sup>14</sup> Ġauvei mabarari asi mugumugumi ema asi vanevanemi ġesi boġono ġauvei-iaġiri.

<sup>15</sup> Be ġomi tu Barau natuna asi vetoukaumi ema namo vedaureami ai boġono iaġo, mai  
 tanobara rakava kwaikwai ema ġevei-rakava-moġovaġini tarimari fakari ai; be boġono  
 mama-rovorovo, noġa moġo visiġu boġi ai ġemamani kavana. <sup>16</sup> Mo tu bema maġuri  
 guruġana boġo korana-iaġiani e boġo vari-fiuani nai. Moġa boġo veiani nai, au tu  
 ma ġegu maoro havekokorokuni ġomi ġemi ai Keriso ma beġenoġoi-iaġomani ġaronai.  
 Korana mo ġaro ai au tu baribani, au ġegu vekwaraġi ema ġauvei ai tu asi avekwaraġi-  
 kavato.

<sup>17</sup> Bere au bara mase, ma raragu bere vebubu-rovorovo, noġa moġo ġomi ġemi  
 veġabidadama varevarena Barau ġoviniani kavana. Irau moġesi nai, au tu aiakuni, ema  
 ġegu verere maki ġomi ġesi tavei-sebonaiani. <sup>18</sup> Mai dabara sebonai ġomi maki boġono  
 verere, be mabarara bitana verere-vegogo.

*Timoteo batuġu-iaġosiani*

<sup>19</sup> Bema Iesu Vereġauka ġena ura nai tu, atuġamaġini, Timoteo tu batuġu-iaġosiani;  
 be ġomi varimi banama seġaġia nai, au nuġagu benema gena-tari. <sup>20</sup> Timoteo ġereġana  
 na moġo au ġegu vemamiraġi eribaiani, ema ġomi ġobimi vetuġamaġina evei-baregoni.

<sup>21</sup> Tarimarima mabarari tu tauġeri ġeri maġuri moġo loriri ġetorerini, a Iesu Keriso  
 ġena ġauvei tu asi ġevetauani. <sup>22</sup> Ġomi tu ribami ginikau, ġia vetoġana ema ġena  
 vetuġamaġikau, kamasi ġia e au, noġa tama ma natuna ġeġauvei-vegogoni kavana, Vari  
 Namona ġaġobata-iaġiani. <sup>23</sup> Moġa lorinai bana tuġu-iaġosi-ġarimoġia, maġuri mainai  
 kamasi bevetoreni ġegu ai bana riba vau. <sup>24</sup> A ġegu vetuġamaġikau Vereġauka ġenai  
 atoreani, au maki vau mani ma baiaġosini ġemi ai.

*Epafrodito ġena iaġosi*

<sup>25</sup> Ĝegu tuĝamaĝi ai akirani, namona tu tarikakara Epafrodito ma bana tuĝu-ĝenoĝoi-iaĝosia. Ĝia maki au ĝesi ĝaĝauveito e Keriso ĝena vetari ai ĝavetari-vegogoto tauna. Ĝomi maki vetuĝunaĝimi eveito, au ĝegu ai ĝotuĝuato nai, ĝemi varevare dagarari na bene vaĝa-kavagu ĝana. <sup>26</sup> Ĝia maki eura-baregoni ĝomi bene ĝitami. Ema enuĝa-vekwaraĝini ĝemi ai, korana ĝena keve varina ĝoseĝaĝiatio nai. <sup>27</sup> Moĝoni veĝata, ĝia tu ekeve-rakavato, dori emaseto, senaĝi Barau ĝena vevetuĝaĝwa ĝia iatanai, ema dia ĝia iatanai moĝo, senaĝi au iatagu ai maki, korana ĝegu nuĝa-meto bebaregoni garina. <sup>28</sup> Moĝa lorinai ĝegu ura baregona bana ragatuĝu-iaĝosia ĝemi ai, be boĝono ĝitaia ma boĝono iaku, benamo au ĝegu nuĝa-vekwaraĝi bene meraĝa kekei. <sup>29</sup> Boĝono ĝabiraĝea ma iakumi ĝesi ĝera Vereĝauka aranai, ema ĝemi vegubakau marevana bene fofori tarima maiĝesiri ĝeri ai. <sup>30</sup> Korana ĝena maĝuri ĝaramana asi eveito, ema dori emaseto, korana Keriso Varina Namona ĝaramanai. Vetoĝa maiĝesina ĝegu vevaĝa-kava ĝomi na ĝoro vinigu kavana tu ĝia na au ema vaĝa-kavaguto.

### 3

*Keriso evaĝa-moĝoniani tauna tu vei-iobukaiobuka tarimana*

<sup>1</sup> Tarikakagu mabarami, ĝegu guruĝa magona nuĝanai maiĝesi nakira: Boĝono iaku, korana Vereĝauka ĝesi ĝokaro-vekafani nai. Asi bagauni, guruĝa guineri batuĝu-ĝenoĝoi ĝenoĝoini, korana ĝomi ĝobimi toretoreri ĝana.

<sup>2</sup> Lorimi boĝono vetore ekalesia vaĝa-rakavana tauri gariri. Ĝia tu kwaiva rakavari kavana, ĝeri tuĝamaĝi tu ĝita mabarara tauĝanira kefiri bitana lama-vaĝiri ĝetoni, Isaraela besena ĝeveini kavana. <sup>3</sup> Senaĝi tauĝani kefiri lamavaĝi veiĝana korikorina tu ĝita na taĝabiato, a ĝia tu asiĝi: Ĝita tu Iauka Veaĝa ĝena seĝukai Barau tatutuĝu-tari viniani, ema Keriso Iesu ĝenai tavetuĝa-maĝikauni, ema ĝera veĝabidadama tu dia tauĝani ai vetoĝa ĝeveini moĝeri ai tatoreani.

<sup>4</sup> Bere tauĝani ĝena vetoĝa ema ĝera veiĝa dagara baregori nai, ĝegu veĝabidadama tu tauĝani ĝena vetoĝa dagarari ema ĝegu veiĝa ĝeri ai bara torea riba. Bema ta ĝena veĝabidadama tauĝanina ĝena vetoĝa dagarari ema ĝena veiĝa ĝeri ai bene torea etoni nai, au tu ma ĝegu maoro moĝeri dagarai bara veĝabidadama. <sup>5</sup> Amaĝurito, ĝaro vaĝa-imaima toitoinali (8) tauĝanigu kefina ĝelama-vaĝiatio. Au tu Isaraela tarimagu, Beniamina ĝena doĝoro tarimagu, Heberu rarari tarimagu korikori. Iuda tarimari ĝeri taravatu akorana-iaĝi ginikauato-ĝoi, korana au tu Farisea tarimagu. <sup>6</sup> Barau ĝena taravatu bana korana-iaĝi ginikaua ĝaramanai tu, ekalesia doĝorona avaĝa-midigu midigurito. Ema Iuda ĝeri taravatu mabarabarari akorana-iaĝi ginikau ginikaurito-ĝoi, asi ĝegu vei-rakava ta.

<sup>7</sup> Moĝeri dagara mabarari guinenai tu atuĝamaĝi-baregorito-ĝoi; senaĝi initoma Keriso ama ribaiato nai, mo dagara guineri mabarari aĝitarini tu asi ĝeri namo ta maki. <sup>8</sup> Moĝoni veĝata, dagara mabarari tu asi tauri dagarari, senaĝi dagara baregona sebona moĝo tu Keriso Iesu, ĝegu Vereĝauka, bana riba-ginikaua. Oba, dagara mabarari momo ai ĝeiaĝoto au ĝegu ai, Keriso moĝo bana ĝabi-gigitaria ĝana uranai. <sup>9</sup> Ĝegu ura ĝia ĝesi bana sebona-korikori, korana ribagu, taravatu ekorana-iaĝi gini-kauani tarimana Barau ĝoiranai ĝia tu dia vei-iobukaiobuka tarimana, senaĝi Keriso evaĝa-moĝoniani tarimana moĝo; korana Barau na vei-iobukaiobuka tarimari bekiraĝirani dabarana sebona tu veĝabidadama ĝenana moĝo. <sup>10</sup> Ĝegu ura baregona tu Keriso bana riba-ginikaua, ema mase na evaĝa-vasi-raĝeato seĝukana bana ĝabia; ema emidiguto midiguna maki bana mami-tovoa, ma ĝia ĝena mase kavanai au maki bana mase. <sup>11</sup> Mainana vau atuĝamaĝini, au maki mase na bavaisiraĝe-ĝenoĝoini.

<sup>12</sup> Au asi akirani, moĝeri mabarari varau aĝabirito, o varau anamo-vedaureato, asiĝina. Senaĝi au tu avekwaraĝi-rakavani, auna bana ĝabia ĝana, korana Keriso Iesu ĝena kwalimu ai au maki eĝabiguto ĝia ĝena. <sup>13</sup> Moĝoni, tarikakagu, asi akirani varau akwalimuto atoni, asiĝina. Dagara sebona moĝo tu, maĝuri guineri atuĝarekwarito,



ma gōiragu dagarana bana gōitaōoa kokorena moōo avetauani. <sup>14</sup> Initoma tu araga-maoromaoroni, kiraōgitore makana aiaōo-viniani, mo kwalimu voina bana gābia uranai, dagarana tu Barau gēna maōguri gubai. Korana Barau na Keriso Iesu gēnana ekeaguto, mo maōguri bana gābia gāna.

<sup>15</sup> Gita gēra veōabidadamai taruōa-gwaōiōito taura tu maiōesi bisini tuōamaōi-vegogo. A gōmi betaōu dagara tari ai gēmi tuōamaōi tu irau nai, Barau na vau tuōamaōi-faka bene vinimi. <sup>16</sup> Dagara sebona, iauka maōguriri namori gita na varau taōgabitiro moōeri bitana gābi-gigitariri.

<sup>17</sup> Tarikakagu mabarami, au boōono tovtovogu. Veiōa namo gēveini tarimari boōono marereri e boōono tovtovori maki, vevaōa-gita namori avaōa-gitamini kavana. <sup>18</sup> Korana varau avaōa-guruōa gēnoōoi-gēnoōoimito-ōoi, senaōi ini tu ma avaōa-guruōamini ma taōigu gēsi: Gūtuma gēkirani, Keriso murinai gērakani gētoni, senaōi gēōofaōofani, Iesu Keriso gēna satauro gēvetari-viniani. <sup>19</sup> Gīa varau rakava gabuna gāna gēiaōoni, korana gēri barau tu gīa tauōaniri na gēiaku-iaōirini dagarari. Gēri veiōa rakavari, gēre maiaka-iaōiri veiōari, gēveiavi-iaōirini. Ema mai tanobara dagarari moōo gētuōamaōi-gigitaririni. <sup>20</sup> A gita tu Guba Basileia tarimara. Moōa lorinai gēra vevaōa-maōuri tauna, gēra Vereōauka Iesu Keriso ma iakura gēsi tanariani, guba tuōuna na beiaōomani. <sup>21</sup> Gīa na gita mai tauōanira moiramoirari maiōeri bekurevorini, benamo gīa tauōanina namo vedaureana kavanai beōe iaōoni. Korana gīa seōukana na dagara mabarari gīa gēna veōitaōau gaburenai beōe tanuni.

## 4

### *Sisiba guruōari tari*

<sup>1</sup> Tauna moōa, tarikakagu, Vereōauka gēna maōuri nuōanai boōono ruōa-gwaōiōi. Au na auravini-baregomini ema bana gītami veōata atoni, korana gōmi tu au gēgu verere korana e gēgu kwalimu vetoōana.

<sup>2</sup> Euodia ema Sintike, anoōimini, nuōami beōene sebona, korana gōmi tu Vereōauka gēna doōoro vavinemi. <sup>3</sup> Gōi maki, Sisigo, au karogu namona, anoōimuni, mani vavine kika bono vaōa-kavari, gīa maki au gēsi gāōauvei-vegogoto-ōoi Vari Namona fiufiunai, e Klement ema gita karora tari maki. Gīa arari tu Barau gēna maōuri vanaōivanaōi bukanai varau etorerito.

<sup>4</sup> Vereōauka gēna maōuri nuōanai gāro mabarari ai boōono iaku. Ma nakira: Boōono iaku. <sup>5</sup> Gēmi manau e nuōa-marana boōono vevaōa-gita-iaōiri tarimarima gēri ai. Korana Vereōauka gēna iaōoma bekavinaōi-rakava. <sup>6</sup> Dagara ta tuōamaōi-vekwaraōina asi boōono vei, senaōi vanaōivanaōi gēmi rabu dagarari gāuōau ai Barau boōono noōia ma tanikiumi gēsi. <sup>7</sup> Benamo Barau na gēna maino, gita mabarara gēra riba e tuōamaōi-faka evanaōiato mainona, bevinimini, ma mo maino na gōmi lorumi ema gēmi tuōamaōi mabarari benari-ginikaurini, Keriso Iesu gēna maōuri nuōanai gōtanuni dainai.

<sup>8</sup> Tarikakagu mabarami, gēgu toretore magona rekenai nakira, vanaōivanaōi veiōa maiōesi kavari boōono tuōamaōi-iaōiri: Maōuri moōoniri, dagara marevana irau veōata, vei-iobukaiobuka, veiōa namo vedaureari, veuravini veiōari, ema vegubakau maōuriri. Dagara namori ema tarimarima na gēvaōa-raōerini veiōari mabarari boōono tuōamaōi-iaōiri. <sup>9</sup> Gēgu gōbata na gōribarito guruōari ema gēgu veiōa na gōdoōaririto veiōari mabarari gēmi maōuri ai boōono gāuwei-iaōiri e boōono korana-iaōiri. Benamo maino evinirani Barauna gōmi gēmi ai bene tanu.

### *Filipi tarimari gēri vevaōa-kava*

<sup>10</sup> Gēgu iaku tu asikei ema Vereōauka avaōa-namoani nuōagu mabarana gēsi, korana gēmi vevaōa-kava varevarena ma boōo tuōu-iaōomaia nai. Au ribagu, asi gōtuōarekwaguni, gēmi ura vanaōivanaōi boōono vaōa-kavagu, senaōi gabu manaōgai atanuni nai, asi gēmi dabara ta au vaōa-kavagu. <sup>11</sup> Au tu dia dagara tai akubini naima

maiġesi aguruġani. Asiġina. Au tu ġegu-ġagu vovoka o asiġina, senaġi badukuani ilaila.

<sup>12</sup> Au tu akubini vetoġana ma ribagu, ema ġegu-ġagu ġevovokani vetoġana maki ma ribagu, be taimi tai gabu tai maiġeri maġuri baraga-ġoitaġorini nai, aiġesina badukurini tu ribagu. Mai riba vekuretoġana tu varau aribaiato. Moġesina nai au tu beġe ġubumaseguni o bevitoguni, ġegu-ġagu vovoka o bakubini au ġegu ai tu ilaila moġo. <sup>13</sup> Maġuri aiġesina ġegu ai evetoreni, senaġina asi ġegu daradara, korana Keriso na ġena seġuka eviniguni nai.

<sup>14</sup> Senaġi aiakuni, korana ġemi vevaġa-kava barego mai ġegu meto nuġanai bama doġaria. <sup>15</sup> Ġomi Filipi tarimami tu ribami: Makedonia aiaġuiato, tovotovonai Vari Namona aġobata-iaġiato-ġoi nai, ekalesia doġorona ta na asi evaġa-kavaguto-ġoi ġeri moni e farefare na, ġomi moġo ġereġami. <sup>16</sup> Ġomi na vevaġa-kava dagarari vovoka ġotuġu-tuġukauto-ġoi au Tesalonika vanuġanai atanuto-ġoi nuġanai. <sup>17</sup> Au asi atuġamaġini, au ġomi ġemina vevaġa-kava dagarari bana doġari, senaġi ġegu ura baregona tu, ġomi ġemi ai ġemi vini auna bene barego bana ġitaia.

<sup>18</sup> Au ġegu ai ġomi ġemi varevare dagarari ġotuġu-iaġomarito tu mabarari maiġeri, be ġegu-ġagu tu vovoka ema ilaila. Ribagu, aura-vinirini dagarari mabarari maiġeri Epafrodito na eġwa-iaġomarito ġegu ai. Ġemi varevare dagarari bonari irau veġata Barau na eġabi-raġerini ginitaġo varevareri, Barau ġevaġa-iakuani dagarari. <sup>19</sup> Ġegu Barau na ġena farefare namori ema vovoka tabutaburi Keriso Iesu ġenana bevarevarevini ginikaumini ġemi rabu ġarori ai. <sup>20</sup> Tamara Barau bitana vaġa-raġea vanaġivanaġi, Amen.

#### *Vevaġa-namo guruġari*

<sup>21</sup> Iesu Keriso ġena tarimarima mabarari ġeri vevaġa-namo ġeguna eiaġosini. Ġita tarikakara au ġesi ġatanuni na ġemi vevaġa-namo beġe tuġu. <sup>22</sup> Barau ġena vevaġa tarimari mabarari ġerina vevaġa-namo beġe tuġu ġemi, ema Kaisara, Roma ġeri vere, ġena numa tarimari na maki ġemi vevaġa-namo baregona beġe tuġua.

<sup>23</sup> Vereġauka Iesu Keriso ġena namo ema varevare-bara ġomi tata iatami ai bene tanu.

## PAULO ĠENA TORETORE KOLOSE EKALESIIARI ĠERI

Kolose vaġa-foforina guruġari

Paulo na mai fefa tu Romai ediburato-ġoi nuġanai etoreato. Mai fefa tu laġani 60 beiaġo 61 nuġanai etoreato, mo tu Iesu emaseto murinai.

Mai fefa siri baregori tu karoa 2:9-10.

Paulo na mai fefa etoreato korana tu tarima tari na Kolose ai ekalesia doġorori ġeri veġabidadama ġevei-veġonuato-ġoi nai. Moġesi naima Paulo na mai fefa etoreato tu Kolose ekalesiari evaġa-guruġa-toreġaurito ema maiġeri evaġa-ribarito, 1) tarimarima ġeri iaunega ema vevaġa-riba ġofaġofari tu aiġeri ema Keriso ġena maġuri korikorina tu aiġa; 2) Keriso tu moġoni ekalesia doġorona debana veġata; 3) tarima guinena ma ġena maġuri rakavari ġesi beġene koki-fitoġaia, ma tarima variġuna beġene torekaua; 4) tarimarima ġeri taravatu veiġari ema ġeri ura asi beġene ġabi-raġeri e asi beġene korana-iaġiri.

Paulo na mai fefa tu maiġesina eboioġaiato:

1. Deba, Keriso, ġena mareva baregona - karoa 1:1-2:5

2. Tauġani, ekalesia doġorona, aiġesina bene tanu ema bene ġauvei - karoa 2:6-4:18

<sup>1</sup> Au Paulo, Barau ġena ura lorinai Keriso Iesu ġena apostolo tarimagu ai evaġa-iaġoguto, ema ġita tarikakara veġabidadama nuġanai Timoteo ġesi, ġemana mai fefa eiaġosini, <sup>2</sup> ġomi tarikakama Kolose nuġanai ġotanuni ġemi. Keriso ġena maġuri nuġanai ġita tu tarikaka. Ġomi tu Barau ġena tarima veaġami ema ma ġemi vetuġamaġikau maki. Ġita Tamara Barau ġena varevare-bara ema maino ġomi ġemi ai bene tanu.

*Kolose tarimari na Keriso ġeġabidadama-vini korikoriatu*

<sup>3</sup> Ġai vanaġivanaġi ġomi iatami ai ġaġauġauni nai, ġera Vereġauka Iesu Keriso Tamana, Barau, tu ġatanikiu-viniani. <sup>4-6</sup> Korana tu, ġai tauma ruarua na ġomi varimi tu maiġesi ġaseġaġiatio: Ġomi na tovotovonai Vari Namona ġenana eiaġomato guruġana, guruġa moġonina, ġoseġaġiatio nai tu, dagara namona Barau na gubai etore-taġoani ġemi, moġa varina tu ġovaġa-moġoni korikoriatu. Ma ġomi na tu moġesina naima Keriso Iesu ġoġabidadama-vini korikoriani, ema Barau ġena veaġa o ekalesia tarimari mabarari maki ġoura-vinirini. Mani Vari Namona ġomi ġemi ai eraġasito, maniġa tu tanobara mabaranai ġevarifiu-rakao rakaoani, ma ġwana namori maki ġeġorani, e tarimarima maki ġutuma lelevaġi na maki ġeġabi-raġeani. Mai Vari Namona ġwaġwana namona evetoreni tanobara mabaranai, ilailana ġomi na mani Vari Namona ġoseġaġiatio e Barau ġena namo e varevare-bara korikorina ġoribaiatio ġarona na veġata ġomi fakami ai evesinato, ma eiaġomani, maniġa kavana evetoreni. <sup>7</sup> Ġomi tu Epafras na mai Vari Namona easi vaġa-ribamito. Ġia tu ġai karoma namona, ema ġai ġesi Keriso ġena vetuġunaġi ġaiaġo-vinirini tarimana ta. Epafras tu Keriso ġena ġauvei tarimana namona, ma ġena vetuġamaġikau, ma ġomi maki evaġa-kava ginikaumini. <sup>8</sup> Ġomi ġemi veuravini lauka Veaġa na evinimini, maniġa maki Epafras na ema kira-varamato.

*Paulo ġena ġauġau Kolose ekalesia tarimari iatari ai*

<sup>9</sup> Moġesi naima ġai tu ġomi varimi ġaseġaġiatio ġarona na beiaġoma mo toma, ġomi iatami ai ġema ġuriġuri asi ġavaġa-ketoani. Vanaġivanaġi Barau ġanoġiani, ġakirani, ġia ġena ura mabarana bene vaġa-riba ġitakaumi, ema lauka Veaġa ġenana eiaġomani iaunegana e tuġamaġi-fakana maki mabarana boġono ġabia. <sup>10</sup> Ġai maiġesina ġaġauġauni anina tu, Vereġauka na eura-viniani maġurinai boġono tanu ġana, ema ġemi veiġa e maġuri mabarabarari ai maki ġia boġono vaġa-vererea ġana. Aba, ġemi veiġa namori mabarari ġwaġwari beġene fofori, ema Barau maki boġono riba-ginikaua. <sup>11</sup> E ġema ġuriġuri tu, Barau ġena seġuka iaru-korokorona na seġuka bene

vinimi, be boḡono kokore-koru. Korana mo kokore na tu meto ḡoḡoitaḡorini maiḡeri nuḡari ai boḡo ruḡa-gwaḡiḡini e boḡo vevaḡa-gwaḡiḡini. E ma iakumi ḡesi <sup>12</sup> Tamara Barau boḡo tanikiu-viniani. Korana ḡomi tu varau eḡabi-raḡemito, be ḡia ḡena tarima veaḡari na ḡena Basilea ma mamana baregona nuḡanai kara beḡe ḡaunarini dagarari ḡomi na maki boḡo ḡaunarini. <sup>13</sup> Ḡita mabarara Barau na tu mukuna ḡena seḡuka barana nuḡana na evaḡa-maḡurirato, ma Natuna ḡena veḡitaḡau seḡukana nuḡanai etore-toḡarato. Mo Natuna tu Barau na euravini-baregoani. <sup>14</sup> Ḡita tu Barau Natuna na evoi-ḡenoḡoirato, ma Barau na ḡia bakunai ḡera rakava etuḡamaḡi-fitoḡarato.

*Keriso ḡena ḡauvei*

<sup>15</sup> Barau tu asi taḡitaiani, senaḡi Barau vetoḡana korikorina tu Natuna ḡenana eforito. Ma mai Barau Natuna maiḡa tu Barau ḡimana veiveiri dagarari mabarari fakari ai ḡia tu guine, emaḡuri-guineto merona kavana. <sup>16</sup> Korana Keriso ḡenana Barau na gubai ḡetanuni dagarari mabarari ema tanobarai ḡetanuni dagarari mabarari eveirito. Taḡitarini dagarari ema asi taḡitarini dagarari eveirito. Seḡuka lelevaḡi iaukari mabarari, e seḡuka lelevaḡi aneruri, e veḡorikau iaukari, ema ḡeri seḡuka e maoro barego lelevaḡi iaukari eveirito. Dagara mabarabarari tu Barau na Keriso ḡenana eveirito, ma Keriso ḡena moḡo eveirito. <sup>17</sup> Keriso tu maiḡeri dagara mabarari roḡosi beḡere ḡora nuḡanai veḡata etanuto-ḡoi. Ma dagara mabarari maki ḡia ḡena seḡuka na eḡabi-taḡorini. <sup>18</sup> Ekalesia doḡorona debana tu Keriso, ema ekalesia doḡorona tu ḡia tauḡanina. Ekalesia ḡena maḡuri korikori tu ḡia ḡenana eiaḡomato, ema ḡia tu mero guinena, mase tarimari mabarari fakari na Barau na mase seḡukana na evaḡa-maḡuriato. Korana dagara mabarari ḡia ḡena veḡitaḡau gaburenai beḡene tanu ḡana. <sup>19</sup> Korana Barau ḡena ura baregona, Keriso ḡenai ḡia ḡena maḡuri e mareva mabarana bene tanu. <sup>20</sup> Ma Barau ḡena ura dagarari mabarari Keriso ḡenana ḡia ḡenai ma bene ḡabi-ḡenoḡoiri etato, mai tu tanobarai ḡetanuni dagarari mabarari ema gubai ḡetanuni dagarari mabarari. Moḡesina naima Keriso rarana satauro ai eriḡoto, benamo Barau na maino eveiato dagara mabarari ḡesi.

<sup>21</sup> Ḡomi guinenai Barau ḡesi fakami tu manaḡa rakava, e ḡemi tuḡamaḡi ai maki Barau tu ḡovetari-viniato-ḡoi, korana ḡomi tu veiḡa rakavari ḡoveirito-ḡoi. <sup>22</sup> Senaḡi toma tu Keriso tauḡanina korikori ḡevaḡi-maseato, monana ḡomi ḡia ḡenai ma eḡabi-ḡenoḡoimito. Barau na Keriso ḡena mase ḡenana vau tauḡena ḡenai eḡabi-kavamito, korana tu eurato, ḡia ḡoiranai tu vevaḡa tarimari bene vaḡa-ruḡa-tarimi, e asi ḡemi kerere misina ta maki, e tarima ta na maki asi bene vaḡa-daḡami. <sup>23</sup> Senaḡi ḡomi tu ḡemi veḡabidadamai boḡono kokore e boḡono ruḡa-gigitari, ema Vari Namona ḡoseḡaḡiato nai, ḡemi tuḡamaḡikau ḡovaḡa-ruḡaiato, monana ta na asi bene ḡori-ḡerevaḡimi. Ḡomi na tu mai Vari Namona maiḡa ḡoseḡaḡiato. Ma tanobarai ḡetanuni tarimarimari mabarari ḡeri maki mai Vari Namona maiḡa ḡevari-fiuato. Au Paulo maki mai Vari Namona vetuḡunaḡina aiaḡo-viniani e aḡobata-iaḡiani.

*Paulo ḡena ḡauvei ekalesia urari ai*

<sup>24</sup> Maitoma au tu aiakuni, korana au tu ḡomi urami ai amidigu-midiguto. Ekalesia tu Keriso tauḡanina, ma Keriso tu mai tauḡanina maiḡa uranai emidigu-midiguto. Ma au toma mai tauḡanigu ai mai midigumidigu aḡwaiiani tu, Keriso ḡena ekalesia navaḡa-kavaia uranai. Au tauḡanigu ai midigumidigu roḡo aḡwaiiani, korana tu Keriso ḡena ekalesia uranai mo midigumidigu Keriso na eḡwaiato moḡa tu roḡosi roḡo bene kori nai. <sup>25</sup> Au tu Barau na evaḡa-ruḡaguto, ekalesia ḡena vetuḡunaḡi bana iaḡo-vini etato. Barau na mai ḡauvei eviniguto tu, ḡomi ḡemi ai Barau ḡena guruḡa mabarana bana vaḡa-fofori korikoria ḡana. <sup>26</sup> Guinena na veḡata ema ḡuru mabarari ḡerina veḡata mai maḡuri vekuretoḡana maiḡa tu vekuretoḡa, beiaḡoma mo, Barau ḡena tarimarima vevaḡari ḡeri ai vauro bema vaḡa-foforia. <sup>27</sup> Irau bese tarimari vekaravari ai, Barau eurato, ḡena tarimarima vevaḡari ḡeri ai mai maḡuri vekuretoḡana marevana barego lelevaḡina bene vaḡa-foforia etato. Mai maḡuri vekuretoḡana marevana barego lelevaḡina bene

vaḡa-foforia etato maḡurina tu maiḡea: Keriso ḡomi nuḡami ai etanuni. Ḡita na mareva baregona tatuḡamaḡi-dadamaḡiani marevana tu maiḡa. <sup>28</sup> Ḡai na tu mai Keriso maiḡa ḡaḡobata-iaḡiani. Ema iaunega irauirauri ḡerina tarimarima mabarabarari ḡakira-toreḡaurini e ḡavaḡa-ribarini, korana ḡaurani, tarimarima mabarari Keriso ḡena maḡuri nuḡanai tu beḡene namo-vedaurea vauro, Barau ḡenai baḡana ḡori-iaḡori. <sup>29</sup> Moḡa uranai avekwaḡi-rakavani. Keriso ḡena kokore au nuḡagu ai eḡauveini seḡukana tu barego lelevaḡi. Moḡesina naima au tu Keriso ḡena kokore ai mai ḡauvei aveiani.

## 2

<sup>1</sup> Au aurani, ḡomi tu boḡono riba, au tu avekwaḡi-rakavani, ḡomi Kolose ekalesiami, e Laodikea ekalesiari, ema au ḡoiragu roḡosi roḡo beḡene ḡitaia ekalesiari vovoka, mabarabarami navaḡa-kavami uranai. <sup>2</sup> Au ḡegu ura baregona sebona tu, ḡia nuḡari beḡene gwaḡiḡi, ema mabarari veuravini sebonai moḡo beḡene iaḡo. Korana tu moḡesi beḡe veini vauro beḡe tuḡamaḡi-faka ginikauni, benamo Barau ḡena vekuretoḡa dagarana beḡe ribaiani. Barau ḡena vei-vekuretoḡa dagarana tu Keriso. <sup>3</sup> Iaunega ema riba vonu-fokafokana mabarana tu Keriso ḡenai vekuretoḡa ḡetanuni. <sup>4</sup> Maiḡeri guruḡa akira-varamini korana tu, irau tarima ta na nuḡa-ḡani guruḡari namori na beḡofa-veḡonumini garina. <sup>5</sup> Au tu moḡoni tauḡanigu ḡomi fakami ai tu asiḡina. Senaḡi iauka rekenai au tu ḡomi sevimi ai, be ḡauvei ḡovei-ginikaurini ema Keriso ḡenai ḡemi veḡabidadama tu roḡo barego aḡitaiani, moḡa lorinai averere-rakavani.

*Keriso ḡesi bisini sebona, be maḡuri bisini ḡabia*

<sup>6</sup> Keriso Iesu tu ḡomi na ḡoḡabi-raḡeato, benamo ḡemi Vereḡaukai ḡovaḡa-iaḡoato. Moḡa lorinai ḡomi tu ḡia ḡena maḡuri nuḡanai moḡo boḡono raka e boḡono tanu. <sup>7</sup> Ḡomi ḡemi maḡuri tu ḡau ḡokana tano nuḡana ḡana evariḡo-korikorini kavana, Keriso ḡenai beḡene variḡo. E numa fore iatanai ḡeragaiiani kavana, Keriso iatanai ḡemi maḡuri boḡono vaḡa-ruḡakauri e boḡono ragari. Ema ḡevaḡa-ribamito ilailanai ḡemi veḡabidadama beḡene kokore-korikori, ma vanaḡivanaḡi Barau tu boḡono tanikiu-vinia.

<sup>8</sup> Lorimi boḡono vetore, asi namo tarima ta na tarimarima ḡeri iaunega ḡofaḡofari koriri na ḡomi nuḡami beḡanirini, benamo beḡori-dareremini garina. Mai tarimarima ḡeri iaunega ḡofaḡofari tu tarimarima na ḡevaḡa-ruḡarini maḡuriri e veiḡari ḡeri ai; senaḡina moḡeri tuḡamaḡi veḡonuri tu tanobara barauri ḡerina ḡeiaḡomani, a dia Keriso ḡenana ḡeiaḡomani. <sup>9</sup> Korana Barau ḡena maḡuri e veiḡa mabarari tu Keriso tauḡanina nuḡanai ḡetanuni. <sup>10</sup> Ma Keriso nuḡanai mai maḡuri ḡomi na ḡoḡabiato. Keriso tu veḡorikau iaukari e aneruri mabarari ema ḡeri maoro barego lelevaḡi iaukari mabarari fakari ai ḡeri Vere. <sup>11</sup> Ḡomi Keriso ḡesi ḡosebonato nai tu, tauḡanimi kefiri ḡelama-vaḡirito, senaḡi mai tu dia tarimarima ḡimari na ḡeveiani veiḡana akiraḡiani. Asiḡina. Mai tu Keriso ḡena kefi-lamavaḡi veiḡana. Moḡa tauna tu, tauḡani ḡena veiḡa rakavari ḡomi ḡemi na ḡokoki-fitoḡarito. <sup>12</sup> Korana babatiso ḡoḡabiato neganai, ḡomi tu noḡa Keriso ḡesi ḡeguri-sebonamito; ema Barau na Keriso ḡesi evaḡa-vaisiraḡe ḡenoḡoimito, korana Barau ḡena ḡauvei seḡukana ḡovaḡa-moḡoniato nai. Mo seḡuka na Barau na Keriso mase na ma evaḡa-variḡisi ḡenoḡoiato. <sup>13</sup> Guinenai ḡomi iaukami tu mase, korana ḡemi kira-sirivaḡi e vei-rakava bene, ema tauḡani ḡena veiḡa rakavari maki ḡomi tauḡanimi ḡerina roḡosi beḡere lama-fitoḡari. Senaḡi toma ḡomi iaukami tu Keriso ḡesi Barau na evaḡa-maḡuri ḡenoḡoirito. Ḡita ḡera rakava mabarari tu Barau na etuḡamaḡi-fitoḡarito. <sup>14</sup> Taravatu guruḡari ema taravatu asi takorana-iaḡiato voiri metori ḡita iatarai ḡetanuni, moḡeri tu mabarari Barau na asi tauri ai evaḡa-iaḡorito, be ekoki-fitoḡarito. Barau na mo taravatu moḡeri ḡeri seḡuka tu eḡabi-vaḡiato, benamo Keriso ḡena satauro ai eikoko-kauato. <sup>15</sup> Ema Barau na veḡorikau iaukari rakavari e ḡeri maoro barego lelevaḡi iaukari, ḡeri kokore mabarari asi tauri ai evaḡa-iaḡorito e evaḡa-rakavarito. Keriso ḡena satauro seḡukana na iauka rakavari Barau na evaḡa-ketorito, ma tarimarima ḡoirari ḡutuḡuturi ai evaḡa-maiakarito, ma muriri ai evaḡa-rakarito.

<sup>16</sup> Moġesina naima ġaniġani e niuniu dagarari taravaturi irauirauri ġaramari ai tarima ta na asi bene ġau-fitoġami. Ema tarima ta na Barau tuġamaġi-iaġina verekona, o ġue variġuna verekona, o Sabadi ġarona ġaramanai maki asi bene ġau-fitoġami. <sup>17</sup> Mai dagara maiġeri tu ġoirai vau beġea ġorani dagarari laulauri moġo. A maġuri korikorina tu Keriso ġenana bita ġabiani. <sup>18</sup> Bema tarima ta ġoġitaiani, tauġena manau tarimanai evevaġa-iaġo ġofa-kauni e aneru etoma-rakariġo-vinirini, ema nuvi o mata-vanaġi ai asi eġitarini dagarari eguruġa-iaġirini nai tu, garona asi boġono seġaġia. Ġia mani ġena tuġamaġi maniġa tu eveġonu-fatafatato. Maniġesina tarimarima na tu ġomi moġo beġe ġofa-dareremini, benamo voimi namona asi boġo ġabiani. <sup>19</sup> Keriso tu deba; ma mani tarima tu deba ġenana ġeraka-veġitato, be deba ġenai ġia tu asi ġetubukauni. Mai deba na tauġani mabarana ġaniġani eviniani, ema tauġani nuġanai turiġa evaġa-tubukau gigitaririni, ema tauġani mabarana evaġa-tubu vegogoani, Barau ġena ura lorinai.

<sup>20</sup> Ġomi tu Keriso ġesi ġomase-sebonato, be ġomi na taravatu irauirau e tanobara barauri tu asi ma boġo korana-iaġirini. Ma kara dainai tu mai tanobara maġurinai ġotanuni tarimari noġa maiġeri taravatu ma ġokorana-iaġirini, ei? <sup>21</sup> Ġokirani, “Asi ġoġabi-karaia; asi ġomami-tovoa; ġimami na asi ġoġabi-tovoa,” ġotoni. <sup>22</sup> Senaġi mani dagara maniġeri tu boġono ġaniri e boġono ġauvei-iaġiri ġana. A maniġeri taravatu ema vevaġa-riba tu tarimarima ġerina moġo ġeiaġomani dagarari. <sup>23</sup> Moġoni, maniġeri taravatu na tu ġita ġerai Barau toma-rakariġona tuġamaġina bevaġa-ġoraiani, e manau veiġana ġerai bevaġa-ġoraiani, tauġani vaġa-midigu-midiguna bevaġa-ġoraiani. Moġesi naima tarima kotari ġetuġamaġini, maiġeri taravatu tu iaunega tarimari ġerina ġeiaġomani. Senaġi maiġeri taravatu na tu ġita asi bevaġa-kavarani, ma tauġani ġena ura rakavari asi bevaġa-ketorini.

### 3

*Keriso* ġesi tasebonani nai tu, maġuri variġuna taġabiani

<sup>1</sup> Ġomi tu Barau na Keriso ġesi evaġa-maġuri ġenoġoimito, naima gubai ġetanuni dagarari boġono vetau-baregori, e nuġami maki monai boġono toreri. Keriso tu monai Barau ġimana aroribana rekenai etanu-taġoni teronai. <sup>2</sup> Vanaġivanaġi ġemi tuġamaġi ai tu gubai ġetanuni dagarari boġono tuġamaġi-taġori, a tanobara dagarari tu asi boġono tuġamaġiri. <sup>3</sup> Korana ġomi tu varau ġomaseto tanobara maġurina ġenai, ma ġemi maġuri korikori tu vekuretoġai etanuni Keriso ġesi, Barau ġenai. <sup>4</sup> Keriso tu ġomi ġemi maġuri korikorina. Ġia ma beforini ġaronai, ġomi maki Keriso ġesi boġo fofori-sebonani, ema ġena mareva ma mamana baregona boġo ġabiani.

<sup>5</sup> Moġa lorinai tauġanina ġena veiġa e maġuri rakavari ġemi ai roġo ġetanuni, maniġeri mabarari boġono vaġi-maseri. Tauġanina ġena veiġa e maġuri rakavari tu maiġeri: Mata-boraġa veiġari, veiġa mirori, kima veiġari, matabara e veiġa rakavari uravini-baregori maġurina, ema mata-ġaniġani maġuriri. Mata-ġaniġani maġurina tu babarau toma-rakariġori veiġana. Maiġeri mabarari ġerina boġono raka-veġita. <sup>6</sup> Korana mai veiġa maiġeri ġaramari ai Barau ġena baru o Kota baregona seġafore tarimari ġeri ai bema vaġa-foforiani. <sup>7</sup> Guinenai ġomi maki tanobara ġena veiġa e maġuri rakavari nuġari ai ġotanuto-ġoi nai tu, moġeri veiġa rakavari ġomi na maki ġoveirito-ġoi.

<sup>8</sup> Senaġi toma mai veiġa maiġeri ġomi ġemina tu boġono tore-veġitari: Tuġamaġi-baru, baru rakavarakava, tarima vaġa-rakavari tuġamaġiri e veiġari, guruġa rakavari kiraġikiraġiri ema sivarai mirori kiraġikiraġiri. <sup>9</sup> Tauġemi fakami ai guruġa o veiġa ġofaġofari ai ta na ta asi bene ġofaia. Korana ġomi na ġemi maġuri guinena ma ġena veiġa rakavari ġesi tu dabuġa rakavana ġokoki-fitoġaiani kavana ġokoki-fitoġarito, <sup>10</sup> ma tarima variġu geragerana ġoriġo-kauato, dabuġa variġu geragerana ġoriġo-kauani ilailanai. Ma ġia maiġa tu Barau na vanaġivanaġi evaġa-variġu ġenoġoiani, eveiato Barauna vetoġana korikori bene ġabia e bene riba-ginikaua ġana. <sup>11</sup> Mai maġuri

variġuna taġabiato mainai tarima ta asi irau. Be iniġesi asi bisini kira, ġai tu Iuda tarimama, a ġia tu irau bese tarimari; ġai tu mero tauġaniri kefiru ġalama-vaġini doġorona, a ġia tu mero tauġaniri kefiru asi ġelama-vaġini doġorona; asi bisini kira maki, ġia tu asi ġesikulito tarimari e maġuri mamana roġosi roġo beġene ġitaia tarimari; ġai tu asi tuġu-rakaorakao tarimama, a ġia tu tuġu-rakaorakao tarimari. Asiġina, maiġesi asi bitana guruġa. Korana Keriso ġereġana moġo barego ema ġita mabarara nuġarai etanuni.

<sup>12</sup> Ġomi tu Barau na varau eġabi-viriġimito tarimami, e ġena veaġa tarimami, ema Barau na euravini-rakavamini tarimami. Moġa lorinai vevetuġaġwa, veiau-namo, manau, marana, ema vevaġa-gwaġiġi maġuriri na boġono vedabuġa. <sup>13</sup> Meto o maġuri gwaġiġiri tari ġoġoitaġorini karomi tari ġerina nai tu, boġono vevaġa-gwaġiġi karomi ġeri ai. Bema tarima ta ġomi fakami ai karona ta na evaġa-veġare veġareani nai tu, mo rakava moġa bene tuġamaġi-fitoġaia, Keriso na ġomi ġemi vei-rakava etuġamaġi-fitoġarito kavana. <sup>14</sup> Maiġeri mabarari iatari ai tu veuravini na boġono vedabuġa. Korana tu mai maġuri namori mabarari tu veuravini na vauro ebaru-sebona ginikaurini, benamo ġeġauvei-ġitakauni. <sup>15</sup> Keriso ġena maino na nuġami bene ġori-kauri. Korana Barau na ġomi ekea-vegogomito anina tu, tauġani sebonai boġono iaġo, benamo maino ai moġo boġono tanu. Ema Barau boġono tanikiu-vinia. <sup>16</sup> Keriso ġena guruġa tauri korikori e ġeri seġuka ġomi nuġami ai tu beġene vonuvonu-raġe. Monana karomi tata ġesi Keriso ġena guruġa iaunega korikorina na boġono vevaġa-riba e boġono vekira-toreġau. Ma nuġami ai Barau ġotanikiu-viniani nai tu, Salamo boġono mari, e Barau vaġa-raġena mariri boġono mariri, ema Iauka Veaġa na evinimini mariri boġono mariri. <sup>17</sup> Kamara ġauvei boġo veiani nai, guruġai boġo veiani o veiġai boġo veiani, mabararari Iesu Vereġauka aranai moġo boġono veiri. Ma ġia ġenana Tamara Barau boġono tanikiu-vinia.

*Ekalesia tarimana ma* ġaraġona e natuna ema ġena tuġu-rakaorakao tarimari ġesi ġeri tanu maġurina korikori

<sup>18</sup> Veġaraġo vavinemi, ġomi tu ġaraġomi ġeri veġitaġau seġukana gaburenai boġono tanu. Korana mai maġuri maiġa Vereġauka ġoiranai tu maġuri namona. <sup>19</sup> Veġaraġo taumi, ġaraġomi boġono uravini-baregori, e ġaraġomi ġeri ai nuġami asi boġono vei-ġirimaġirimari. <sup>20</sup> Natu, dagara mabarari ai tamami e sinami tu garori boġono seġaġi-viniri. Korana mai veiġa tu Vereġauka iauna evaġa-namoani. <sup>21</sup> Tama, natumi asi boġono vaġa-baruri, korana beġe tuġamaġi-moirani, asi beġe kokoreni garina.

<sup>22</sup> Tuġu-rakaorakao tarimami, mai tanobarai ġeri vetuġunaġi ġoiaġo-vinini tarimari garori boġono seġaġiri. Ġia tu dagara mabarari ai garori boġono seġaġiri. Dia ġia ġoirari ai moġo, tarima iauri beġene vaġa-namori ġetoni nai ġevei-ġofakauni tarimari kavari. Asiġina. Ġomi tu Vereġauka gubakauna maġurinai nuġami ma raġeri ġesi ema nuġami mabarari ġesi boġono seġaġi-viniri. <sup>23</sup> Ma kamara ġauvei boġo veiani nai, boġono veia nuġami mabarari ġesi. Ġauvei tu asi tarimarima ġeri ġauvei ġoveiani noġa boġono veia. Asiġina. Ġomi na tu Vereġauka ġena ġauvei ġoveiani maġurinai boġono veia. <sup>24</sup> Ġomi tu ma ribami, Vereġauka na vau voimi bevinimini, korana ġomi na tu Keriso Vereġauka ġena vetuġunaġi ġoiaġo-viniani. <sup>25</sup> A tarima ta na veiġa beleaiani nai, mo veiġa beleaiani voina tu beġabiani veġata. Korana Vereġauka ġoiranai tarima mabarari tu ilaila moġo, dia ta tu egubakauani, ma ta tu asi egubakauani.

#### 4

<sup>1</sup> Ġomi vetuġunaġi veremi, mani ġemi tuġu-rakaorakao tarimari maniġeri ġeri-ġari tu, ġeura-vinirini ilailari ai boġono viniri. Ġia ma ġeri maoro kara ġomi ġemina beġere ġoitaġori dagarari tu boġono viniri veġata, ema veiġa namori e moġoniri ġeri ai boġono veiri. Korana ġomi maki boġono riba, ġomi eġita-ġaumini Verena maki etanuni gubai.

*Vevaġa-riba* guruġari kotari maia

<sup>2</sup> Ĝauĝau asi boĝono vaĝa-ketoa. Vanaĝivanaĝi boĝono ĝuriĝuri. Ĝemi ĝauĝau ai boĝono venari maki, e Barau boĝono tanikiu-vinia. <sup>3</sup> Ma ĝai ĝema maki boĝono ĝuriĝuri, be Vari Namona baĝana vari-fiua ĝana, Barau na ĝatama-boka gabu tari ai bene keori. Be mo ĝana baĝana iaĝo, ma Keriso varina vekuretoĝana monai baĝana vari-fiua. Au tu mai Keriso varina vekuretoĝana maiĝa ĝaramanai seini na ĝebarubaruguto. <sup>4</sup> Boĝono ĝauĝau, be au na mai vari vekuretoĝana maiĝa bana kiraĝi-fofori ĝitakaua, Barau ekirato bana kiraĝi-fofori ginikaua etato ilailanai.

<sup>5</sup> Keriso roĝosi beĝene ĝabi-dadama-vinia, roĝo murikai ĝetanuni tarimari ĝeri ai tu, veiĝa iaunegari e namori boĝono veiri. Ema ĝia vefakari ai boĝo raka-ĝurani negari ai, moĝeri mabarari tu asi boĝono vaĝa-rakavari, korana ĝia boĝo vaĝa-kavarini negana tu kubi moĝo bene. <sup>6</sup> Vanaĝivanaĝi boĝo guruĝani nai, boĝono garo-namo. Ĝemi guruĝa maki ma damenari boĝono kiraĝiri e boĝono guruĝa-ĝitaĝita, be ĝemi guruĝa tarimarima na beĝene ura-viniri e ĝeseĝaĝi-namori moĝo beĝene si. Moĝesina boĝo veini nai, tarima sebori sebori aiĝesina boĝo vaĝa-veserini dabarari boĝo ribarini.

#### Veĝabituĝu guruĝari

<sup>7</sup> Au varigu mabarana tu tarikakara namona, Tikiko, na vauro beasi kira-varamini. Ĝia Keriso ĝena maĝuri nuĝanai tu ma vetuĝamaĝi-kauna ĝesi evevaĝa-kavani, ema ĝia tu au ĝesi Vereĝauka ĝena vetuĝu-naĝi ĝaiaĝo-viniani. <sup>8</sup> Au na Tikiko ĝomi ĝemi ai atuĝu-iaĝosiani tauna korikori tu, ĝai mainai kamasi ĝatanuni maĝurina beneasi vaĝa-ribami ĝana. Ĝia na ĝai ĝema tanu maĝurina bene kira-varami, be ĝomi nuĝami bene vaĝa-gwaĝiĝiri uranai. <sup>9</sup> Ĝia tu Onesimo ĝesi eiaĝosini. Onesimo tu ma ĝena vetuĝamaĝikau, ema ĝia tu ĝai tarikakama namona ta. Ĝia maki ĝomi ĝemi tarima ta. Ĝia tauri ruarua na mainai kara ĝeĝorani dagarari mabarabarari beĝeasi vaĝa-ribamini.

<sup>10</sup> Aristako na ĝena vevaĝa-namo ĝomi ĝemi ai etuĝu-iaĝosiani. Ĝia tu au ĝesi ĝadiburato, be dibura numai ĝatanuni mainai. Banabas tarikakana Mareko na maki ĝemi vevaĝa-namo betuĝu. Mareko ma Banabas tu tarikaka, senaĝi ĝia sinari e tamari tu irau, dia sebona. Mareko ĝomi ĝemi ai beiaĝosini nai, boĝono ĝabi-raĝea ĝana guruĝari tu varau asi-kira-varamito. <sup>11</sup> Ema Iesu, arana ta ĝekiraĝiani Iusto, na maki ĝemi vevaĝa-namo betuĝu. A Iuda tarimari fakari ai au ĝesi Barau ĝena Basileia ĝauveina ĝaveiani tarimari tu maiĝeri moĝo. Ĝia na au ĝevaĝa-kava ginikauguni.

<sup>12</sup> Ĝomi karomi ta, Keriso Iesu ĝena vetuĝunaĝi eiaĝo-vinini tarimana, arana Epafra, na maki ĝemi vevaĝa-namo betuĝua. Ĝia tu vanaĝivanaĝi ĝomi urami ai evekwaraĝini ĝauĝau ai. Ĝia ĝena noĝinoĝi baregona Barau ĝenai eveiani tu, Barau na ĝomi ĝia ĝena urai bene vaĝa-ruĝatari korikorimi. Ema Barau ĝena ura ĝomi na nuĝami mabarari ĝesi boĝono vaĝa-moĝonia, ema boĝono korana-iaĝi ginikaua. <sup>13</sup> Au aguruĝa-fofori korikorini, moĝoni, Epafra tu ĝomi maniĝemi, e Laodikea tarimari, e Hierapoli tarimari mabarami urami ai moĝoni evekwaraĝi-rakavato. <sup>14</sup> Ĝita ĝatara namona Luka, doketa tarimana, ema Dema, tauri ruarua na ĝemi vevaĝa-namo beĝe tuĝu. Luka tu doketa tarimana.

<sup>15</sup> Au ĝegu vevaĝa-namo ĝita tarikakara Laodikea ai ĝetanuni tarimari boĝono viniri. E ĝegu vevaĝa-namo Nimfa boĝono vinia, e Nimfa na numai ekalesia doĝorona ĝerakavegogoni maniĝeri maki boĝono viniri. <sup>16</sup> Mai fefa ĝomi ĝemi ai boĝo iavi-ĝosiani murinai tu, boĝono tuĝu-iaĝoa, ma Laodikea ekalesiari ĝeri ma beĝenea iavi-foforia. Ma Laodikea ekalesiari atore-vinirito fefana maki ĝomi fakami ai boĝono iavi-foforia. <sup>17</sup> Ma Arekipo maiĝesi boĝono kiraia, boĝono kira, "Vereĝauka ĝena maĝuri nuĝanai ĝauvei oĝabiato maniĝa tu bono ĝauvei-iaĝi ginikaua."

<sup>18</sup> Mai vevaĝa-namo guruĝari tu au Paulo tauĝegu ĝimagu na atorerini. Au boĝono tuĝamaĝigu, au tu roĝo ma seinigu diburai. Barau ĝena namo e varevare-bara ĝomi iatami ai bene tanu.



## PAULO ĠENA TORETTORE GINIGUINENA TESALONIKA EKALESIARI ĠERI

1 Tesalonika vaġa-foforina guruġari

Mai fefa ġena tuġamaġi baregona tu Iesu ġena ġenoġoi-iaġoma vaġa-ruaruana. Korana tu Iesu ġena iaġoma vaġa-ruaruana mai fefai tu ekiraġi-ġutumaiato.

Paulo na mai fefa tu Korinto na etore-iaġoato, mo tu ġena evanelia varivarina vaġa-ruaruana nuġanai (Apostolo 17:1-14). Mai fefa Paulo na tu laġani 50 ema 51 nuġanai ta etoreato, mo tu Keriso maki emaseto murinai vau.

Mai fefai siri baregori tu karoa 4:15-18.

Paulo na mai fefa giniginena etoreato korana eurato, Tesalonika ekalesiari 1) bene launaġiri, Barau na ġeri ai eveirito veiġari tarimarima ġoirari ai beġene vaġa-foforiri; 2) bene vaġa-ribari, Iesu ma beiaġomani; 3) bene launaġiri, Barau korana-iaġina maġurina korikorinai beġene tanu.

Paulo na mai fefa tu maiġesi eboioġaiato:

1. Ġia aiġesi vevaġa-maġuri ġeġoitaġoto - karoa 1-3
2. Ġia aiġesina beġene tanu mo maġuri variġunai - karoa 4-5

<sup>1</sup> Ġai tauma toitoi, Paulo, Silas, e Timoteo, na Tamara Barau ema Vereġauka Iesu Keriso ġena ekalesia Tesalonika nuġanai ġatore-vinimini.

Varevare-bara ema maino ġemi ai bene tanu.

*Tesalonika tarimari* ġeri maġuri

<sup>2</sup> Ġai tu ġaro mabarari ai Barau ġavaġa-namoani ġomi mabarami daimi ai, ema ġema ġuriġuri nuġari ai ġakiraġimini. <sup>3</sup> Korana Barau, ġita Tamara, ġoiranai ġavetuġamaġi-taġoni, ġomi ġemi veġabidadama kamasi ġotovo-naġirini, e ġemi veuravini ai kamasi ġoġunaġaveni, ema ġemi vetuġamaġikau ġita ġera Vereġauka Iesu Keriso ġenai kamasi ġovaġa-gwaġiġirini. <sup>4</sup> Tarikakama mabarami, ġai ribama ġomi tu Barau na eura-vinimini ema ġia na eviriġimito ġia ġena. <sup>5</sup> Korana Vari Namona ġai na ġavinimito tu dia guruġai moġo, senaġi Iauka Veaġa ma seġukana e ma moġonina ġesi. Ġomi maki ma ribami, ġomi ġemi namo uranai ġai tu kamasi ġatanuto ġomi fakami ai.

<sup>6</sup> Benamo ġomi na maki ġai ġotovotovomato ema Vereġauka ġotovotovoato enabe ġevaġa-midigu midigumito, senaġi Barau ġena guruġa ġoġabi-raġeato ma vereremi ġesi. Mo verere Iauka Veaġa na evinimito. <sup>7</sup> Tauna moġa ġomi tu vevaġa-ġita namonai ġoiaġoto veġabidadama tarimari mabarari Makedonia ema Akaia ġeri. <sup>8</sup> Korana ġomi ġemina Vereġauka ġena guruġa eraka-rosito tu dia Makedonia ema Akaia nuġari ai moġo, senaġi ġomi ġemi veġabidadama Barau ġenai tu gabu mabarana beġe ribaia. Moġa lorinai monai ġai na guruġa ta tu asi ma baġa kiraġiani. <sup>9</sup> Ġia tauġeri maki ġevekiraġito ġai na ġavarivarimito nai, ġomi na ġai kamasi ġoġabi-raġemato, ema kamasi babarau ġoiaġuirito, Barau maġurina ema moġonina vetuġunaġina boġono iaġo-vini ġana, <sup>10</sup> ema Natuna Iesu ġonariani guba na ma beġenoġoi-iaġomani. Ġia tu Barau na mase na ma evaġa-variġisi ġenoġoiato, ema ġena baru bevaġa-foforiani o tarimarima bevaġa-kotarini ġaronai, Iesu na bevaġa-maġurirani.

## 2

*Paulo* ġena ġauvei Tesalonika ai

<sup>1</sup> Tarikakama mabarami, ġomi tauġemi ma ribami, ġemi ai ġaiaġosito nai, asi ġaġauvei-kavato. <sup>2</sup> Ġomi ribami maki, ġai Tesalonika ġana roġosi roġo baġana iaġosi nai, Filipi ai ġevaġa-midigu midigumato e ġekira-fitoġamato. Moġoni, ġeiaġoma-vini baregomato, senaġina Barau na evaġa-kokoremato, ġena Vari Namona baġana kira-varami ġana. <sup>3</sup> Ġai ġema velaunaġi ġomi ġemi ai tu dia guruġa babobabo ai, dia tuġamaġi rakavari ai, e dia ta baġana ġofaia ġana. <sup>4</sup> Senaġi Barau na evaġa-moġonimato

Vari Namona baḡana fiua. Moḡa lorinai ḡakiraḡiani, dia tarimarima baḡana vaḡa-iakuri ḡana, senaḡi Barau baḡana vaḡa-iakua ḡana. ḡia na ḡai nuḡama evetaurini. <sup>5</sup> ḡomi ribami, e Barau maki ḡoiranai, ḡai ḡaiaḡosito nai tu, dia nuḡa-ḡani ai ḡavaḡa-raḡe ḡofakaumito-ḡoi, e mata-ḡaniḡani ai ḡaguruḡa-ḡofakauto-ḡoi. <sup>6</sup> ḡai tu asi ḡomi na boḡono vaḡa-raḡema, o tarima tari na beḡene vaḡa-raḡema ḡatato. <sup>7</sup> ḡai tu Keriso ḡena apostolo tarimama, be ma ḡema maoro, ḡema-ḡama ḡomi ḡemi ai baḡara kiraḡi. Senaḡi ḡomi ḡesi tatanuto-ḡoi neganai, ḡai tu marana, sina ta na natuna eḡita-ḡaurini kavana. <sup>8</sup> ḡauravini-rakavamito lorinai ḡaurato, dia Barau ḡena Vari Namona moḡo ḡemi baḡana kiraḡi, senaḡi ḡema maḡuri maki ḡatore-taririto, korana ḡema veuravini ḡemi ai tu barego lelevaḡi.

<sup>9</sup> Tarikakama mabarami, ḡai kamasi ḡaḡauveito-ḡoi ema ḡavekwaraḡito-ḡoi roḡo ḡotuḡamaḡi-taḡorini, ene? Barau ḡena Vari Namona ḡaḡobata-vinimito-ḡoi nuḡanai, boḡi-laḡani ḡaḡauveito-ḡoi, ḡema-ḡama baḡana doḡari uranai, baḡa vaḡa-doḡe-ganimini garina.

<sup>10</sup> ḡomi na ḡoḡitamato ema Barau na maki eḡitamato ḡai kamasi ḡaveaḡato, ḡavei-maoromaoroto ema asi ḡema kerere ta ḡomi vaḡa-moḡoni tarimami fakami ai. <sup>11</sup> ḡomi ma ribami, ḡai na ḡomi tata ḡaveimito-ḡoi tu tama na natuna korikorina eveiani kavana. <sup>12</sup> ḡai na ḡavaḡa-kokoremito-ḡoi, ḡemi tuḡamaḡi ḡavaḡa-gwaḡiḡirito-ḡoi, ema ḡalau-naḡimito-ḡoi Barau vaḡa-iakuna veiḡari boḡono veiri ḡana. ḡia na ekeamini, ḡena Basileia ma marevana baregona bene vinimi ḡana. <sup>13</sup> ḡai na Barau ḡatanikiu-viniani ḡaro mabarari ai, korana ta tu, ḡena guruḡa ḡaḡabi-iaḡosiatto neganai, ḡomi na ḡoseḡaḡiatto ema ḡoḡabi-raḡeato tu dia tarimarima ḡeri guruḡa, senaḡi guruḡa moḡonina korikori, Barau ḡena guruḡa. Mo guruḡa tu ḡovaḡa-moḡoniani tarimami nuḡami ai eḡauveini. <sup>14</sup> Tarikakama mabarami, ḡomi tu Barau ḡena ekalesia Keriso Iesu nuḡanai Iudea ḡesi boḡo ilaila, korana Iuda tarimari na ḡia ḡevaḡa-midigu midigurito ilailanai, ḡomi maki ḡemi doḡoro tarimari na ḡevaḡa-midigu midigumini. <sup>15</sup> Iuda tarimari na Iesu Vereḡauka ema peroveta tarimari ḡevaḡirito, ema ḡai maki ḡelaimato. Barau tu asi ḡevaḡa-iakuani, ema tarimarima mabarari ḡekira-sirivaḡi vinirini. <sup>16</sup> ḡai maki ḡekira-ḡoimani irau bese tarimari ḡeri ai Vari Namona asi baḡana kiraḡia, korana maḡuri vanaḡivanaḡi beḡe ḡabiani garina. Moḡesi ḡeri rakava vanaḡivanaḡi ḡevaḡa-baregorini. Senaḡi Barau ḡena baru maki iatari ai tu varau bevotu.

*Paulo* ḡena ura baregona Tesalonika tarimari ma bene ḡitari

<sup>17</sup> Tarikakama mabarami, nega kotari roḡo ḡai ḡomi sevimi na ḡeinu-veḡitamato, dia tuḡamaḡi ai, senaḡi tauḡani ai, asi ma ḡaḡitamini. ḡema ura baregona ḡoirami baḡana ḡitari. <sup>18</sup> ḡai ḡaurato tu ma baḡana iaḡosi ḡomi ḡemi ai. Moḡoni, au Paulo, vaḡa-vira akirato, senaḡi Satani na ḡema dabara ekouato. <sup>19</sup> Baḡana ḡenoḡoi veḡata, korana ḡomi tu ḡai ḡema tuḡamaḡikau, ḡema verere e ḡema kokore voina ḡera Vereḡauka Iesu ḡoiranai ḡia ma beiaḡomani ḡaronai. <sup>20</sup> Moḡoni, ḡai ḡema veiavi e verere korana tu ḡomi.

### 3

*Paulo na Timoteo* etuḡuato Tesalonika ḡana

<sup>1</sup> ḡai ḡema vevaḡa-gwaḡiḡi ḡekorito, benamo ḡakirato, namona tu ḡai tauma ruarua moḡo Atena ai baḡana tanu, <sup>2</sup> a ḡai tarikakama Timoteo tu baḡana tuḡua ḡomi ḡemi ai. ḡia tu ḡai ḡesi Barau ḡena vetuḡunaḡi ḡaiaḡo-viniani, Keriso ḡena Vari Namona ḡaḡobata-iaḡiani. ḡia na bene vaḡa-kokoremi ema ḡemi tuḡamaḡi bene vaḡa-gwaḡiḡiri ḡemi veḡabidadama nuḡanai. <sup>3</sup> Be, ḡomi ta na ḡena veḡabidadama asi bene raga-kwanea mani midigumidigu ḡoḡoitaḡorini nuḡanai. ḡomi ribami, maniḡeri tu bita ḡoitaḡorini veḡata. <sup>4</sup> ḡai roḡo ḡomi ḡesi tatanuto-ḡoi nai, ḡakiramito-ḡoi, ḡita tu beḡe vaḡa-midigu midigurani, benamo moḡeri ḡefoforito, be ḡoribarito. <sup>5</sup> Moḡa lorinai, ḡegu

vevaġa-gwaġiġi ekorito, benamo Timoteo atuġu-iaġosiato, ġia ġenana banama riba, ġemi veġabidadama tu kamasi ġotoreani. Korana irau dabara tari ai veribaġani tauna na beriba-ġanimini, benamo ġai ġema vekwaraġi asi taunai beiaġoni garina.

*Timoteo* ġena vevarifiu

<sup>6</sup> Toma Timoteo tu ġomi ġemina beġenoġoi, ġomi ġemi veġabidadama e veuravini variri namona bema kiraġiri. Bekirama, ġomi na ġai roġo ġotuġamaġi-taġomani, ema ġourani boġono ġitama, ġai na ġomi baġana ġitami ġatoni kavana. <sup>7</sup> Moġa lorinai, tarikakama, ġema midigumidigu ema dabara doko mabarari nuġari ai ġemi veġabidadama na ġevaġa-kokoremato. <sup>8</sup> Korana ġomi Vereġauka ġenai boġo ruġa-gigitarini neganai, ġai ġema maġuri toma tu moġoni beġe namoni. <sup>9</sup> Barau ġomi daimi ai kamasi baġa tanikiu-viniani, korana ġai ġema verere tu asikeikeina ġomi ġemi ai Barau ġoiranai. <sup>10</sup> Boġi-laġani ma nuġama mabarari ġesi ġaġauġauni, ġomi ġoirami ma baġana ġitari ema ġemi veġabidadamai ġorabuni dagarari na baġana vaġa-kavami ġana.

<sup>11</sup> Bere namo ġita Tamara Barau tauġena na ema ġera Vereġauka Iesu na ġema dabara beġene veia, ġomi ġemi ai baġana iaġosi. <sup>12</sup> Ġera Vereġauka na maki ġomi veuravini na bene vaġa-vonuvonu-raġemi, karomi tata ema tarimarima mabarari boġono ura-viniri uranai, ġai na ġomi ġaura-vinimini kavana. <sup>13</sup> Barau na nuġami bene vaġa-kokoreri, benamo asi ġemi vei-rakava ta e ma veaġami ġesi Tamara Barau ġoiranai boġono ruġa, ġera Vereġauka Iesu ma beiaġomani ma ġena veaġa tarimarimari mabarari ġesi ġaronai. Amen.

#### 4

*Barau na eura-viniani maġurina*

<sup>1</sup> Tarikakama mabarami, ġegu guruġa vaġa-magona tu maiġa. Barau vaġa-iakuna ġana aiġesi boġono tanu tu ġavaġa-ribamito. Moġoni, ġomi tu moġesi ġomaġurini. Iesu Vereġauka aranai ġanoġimini e ġalaunaġimini, ma boġono kokore-iaġiri ġana. <sup>2</sup> Korana vevaġa-riba guruġari Iesu Vereġauka ġena maoro na ġavinimito tu ġomi ma ribami.

<sup>3</sup> Barau ġena ura tu boġono veaġa, mata-boraġa e veġura-vanaġi veiġari ġerina boġono raka-veġita. <sup>4</sup> Ġomi tau tata maki ġaraġomi ġesi boġono tanu ma veaġami e ma vegubakaumi ġesi. <sup>5</sup> Dia mata-boraġa na bene ġori-kaumi noġa Barau asi ribari beseri kavana. <sup>6</sup> Ema mo veiġa rekenai tau ta na tarikakana asi bene ġofaġofa-iaġia ema ġena ura bene veia. Ġai na ma nuġama mabarari ġesi ġakira-guinemito: Moġesi eveini tarimana tu Vereġauka na ġena rakava voina beviniani. <sup>7</sup> Korana Barau na ekearato tu dia tana mata-boraġa e tana veġura-vanaġi, senaġi tana veaġa ġana. <sup>8</sup> Moġa lorinai, dei na mo vevaġa-riba ġekira-fitoġaiiani tu dia tarimarima ġekira-fitoġarini, senaġi Iauka Veaġa evinimini Barauna ekira-fitoġaiiani.

<sup>9</sup> Au na tarikaka uraviniri guruġari tu toma asi batore-vinimini, korana Barau na evaġa-ribamito, ġomi tata boġono veura-vevini. <sup>10</sup> Moġoni, ġomi na tu tarikaka mabarari Makedonia nuġanai ġoura-vinirini. Senaġi tarikakama, ġai na ma ġavaġa-naġimini, mani veiġa boġono vaġa-baregoa. <sup>11</sup> Dagara baregona ġomi kamasi boġono tanu tu maiġesi: Asi boġono guru-raġe. Tauġemi ġemi ġauvei boġono vei, ema tauġemi ġimami na boġono ġauvei ġemi-ġami boġono doġari ġana, ġai na ġakiramito ilailanai. <sup>12</sup> Monana vau asi ekalesia tarimari na beġe gubakaumini, ema ta ġenai asi boġo tuġamaġikauni, korana dagara tai asi boġo rabuni.

*Iesu* ġena ġenoġoi ġarona

<sup>13</sup> Tarikakama mabarami, ġai ġaurani boġono riba, ġemaseto tarimari tu kamasi. Be, asi boġono tuġamaġi-meto, asi ġeri tuġamaġi-dadamaġi tarimari kavana. <sup>14</sup> Ġita na tavaġa-moġoniani tu Iesu emaseto, murinai tu ma evariġisi-ġenoġoito. Moġesi nai ma tavaġa-moġoniani deikara Iesu ġeġabidadama-viniato-ġoi nuġanai ġemaseto tarimari tu Barau na ma bevaġa-variġisi ġeno-ġoirini, Iesu ġesi beġabi-vegogorini.

<sup>15</sup> Ġai na kara ġavaġa-ribamini dagarari tu Vereġauka ġena guruġa: Vereġauka beġenoġoini ġaronai, ġita deidei roġo maġuri tatanuni tarimara na ġemase-guineto tarimari asi bita raga-kwanerini, asi bita guineni Vereġauka ġesi veġoitaġo. <sup>16</sup> Barau beguruġani ma seġukana ġesi, aneru baregona maki bekeakeani, ema Barau ġena dudu befururuani ġaronai, Vereġauka tauġena guba na bemariġoni. Benamo deikarari ġemaseto, Keriso ġevaġa-moġoniato-ġoi nuġanai ġemaseto tarimari, beġe variġisi-guineni. <sup>17</sup> Moġa murinai, ġita roġo tamaġurini ema roġo tatanuni tarimara Barau na ġia ġeri ai ma bevaġa-raka-kaurani magube nuġari ai Vereġauka ġesi bitana vedoġari ġana, guba e tanobara fakari ai. Benamo Vereġauka ġesi bita tanu-vanaġi vanaġini. <sup>18</sup> Moġa lorinai maiġeri guruġa ġerina ġomi tata boġono vevaġa-kokore-vevini.

## 5

*Boġono rovina-tore Vereġauka ma beiaġomani*

<sup>1</sup> Tarikakama mabarami, ġai na ġomi asi ma baġa tore-vinimini, aitoma mo nega e hora beġe foroforini. <sup>2</sup> Korana ġomi tauġemi ma ribami ġitakau, Vereġauka ġena iaġoma ġaronai tu lema tarimana, boġi eiaġomani kavana, beiaġomani. <sup>3</sup> Tarimarima beġe kirani, “Maino ema dagara mabarari namo moġo.” Nuġanai tu asikauna kerere baregona na beġabirini, noġa vavine ma banina diana eguruni kavana. Tarima ta asi beraga-maġurini. <sup>4</sup> Senaġi tarikakama, ġomi tu dia mukuna nuġanai ġotanuni tarimami, be mo ġaro na nuġami tu asi bene vaġa-farevaġiri lema tarimana kavana. <sup>5</sup> Ġomi mabarami tu mama e laġani tarimami. Ġita tu dia boġi e mukuna ġeri tarimarima. <sup>6</sup> Moġa lorinai ġita tu asi bitana gena, asi bitana tanu-kava, tarima tari ġeveini kavana, senaġi bitana tataġa, bitana boġeboġe, ema ġera tuġamaġi beġene maoro. <sup>7</sup> Ġegenani tarimari tu boġi ai ġegenani, ema ġeniuniuni tarimari maki boġi ai ġeniuniuni. <sup>8</sup> Senaġi ġita tu laġani ġena tarimarima dainai, ġera tuġamaġi beġene maoro. Ġita tu veġabidadama e veuravini ġesiri kobarai bitana toreri, ema vevaġa-maġuri vetuġamaġina debara kwaraġaunai tana vaġa-iaġoa. <sup>9</sup> Korana Barau na eġabi-viriġirato tu dia ġia ġena baru na tana midigumidigu ġana, senaġi vevaġa-maġuri bitana ġabia ġera Vereġauka Iesu Keriso ġenana. <sup>10</sup> Ġia ġita urarai emaseto tu, ġia ġesi bitana tanu-vanaġi vanaġi ġana, enabe ġita roġo maġuri o mase ġia ma beiaġomani ġaronai. <sup>11</sup> Moġa lorinai ġomi tata boġono vevaġa-kokore-vevini e boġono vevaġa-kava-vevini, maitoma ġoveini kavana.

*Vevaġa-riba guruġari tari*

<sup>12</sup> Tarikakama mabarami, ġanoġimini, ġomi fakami ai ġeġauvei-kokoreni, Vereġauka aranai ġenarimini e dabara korikori ai ġevaġa-ribamini tarimari boġono gubakauri. <sup>13</sup> Ġeri ġauvei dainai boġono gubakau-baregori ema boġono ura-viniri. Ma mainomi ġesi boġono tanu.

<sup>14</sup> Tarikakama mabarami, ġavaġa-naġimini, ġauvei asi ġeveini tarimari boġono sisibavini, ġegarini tarimari boġono vaġa-kokoreri. Moira tarimari boġono vaġa-kavari, tarimarima mabarari ġeri ai boġono vevaġa-gwaġiġi.

<sup>15</sup> Boġono boġeboġe, tarima ta na rakava na rakava voina asi bene veia, senaġi vanaġivanaġi ġomi tata ġemi ai ema tarimarima mabarari ġeri ai maki veiġa namori moġo boġono veiri.

<sup>16</sup> Ġaro mabarari ai boġono verere. <sup>17</sup> Ġaro vanaġivanaġi boġono ġauġau. <sup>18</sup> Barau boġono tanikiu-vinia dagara mabarari ġeri ai. Korana mani tu Barau ġena ura ġomi Keriso Iesu ġesi ġomaġurini nuġanai.

<sup>19</sup> Iauka Vevaġa karavana asi boġono vei-busea. <sup>20</sup> Peroveta guruġari asi boġono kira-fitoġari. <sup>21</sup> Dagara mabarari boġono riba-ginikauri; namori moġo boġono ġabi-raġeri. <sup>22</sup> Rakava dagarari mabarari ġerina boġono raka-veġita.

*Vevaġa-namo guruġari*

<sup>23</sup> Maino Barauna na bene vaḡa-veaḡa ginikaumi. Iaukami, e ḡemi maḡuri, ema tauḡanimi mabarari ḡia na bene nariri, kerere ta na maki asi bene ḡabimi, bene iaḡo mo, ḡera Vereḡauka Iesu Keriso ḡena iaḡoma ḡaronai. <sup>24</sup> Ḡomi ekeamito Barauna ḡena guruḡa mabarari tu moḡoni, ḡia na beveirini.

<sup>25</sup> Tarikakama mabarami, ḡai maki iatamai boḡono ḡuriḡuri.

<sup>26</sup> Tarikaka mabarari vetarikaka verauna na boḡono vaḡa-namori.

<sup>27</sup> Alaunaḡimini Vereḡauka aranai mai fefa boḡono iavi-foforia tarikaka mabarari ḡoirari ai.

<sup>28</sup> Ḡera Vereḡauka Iesu Keriso ḡena varevare-bara ḡomi ḡemi ai bene tanu.

**PAULO ĠENA TORETORE VAĠA-RUARUANA TESALONIKA EKALESIARI ĠERI**

2 Tesalonika vaġa-foforina guruġari

Paulo na mai fefa vaġa-ruaruana tu mo fefa giniguinena etoreato ma ġue imaima sebona (6) evanaġiato murinai ma etoreato. Mo tu ġia roġo Korinto ai etanuto-ġoi nuġanai etoreato.

Mai fefa nuġanai siri baregona tu karoa 2:3.

Paulo na mai ġena fefa vaġa-ruaruana etoreato mainai tu Tesalonika ekalesiari 1) ġevaġa-midigu midigurito-ġoi nuġanai evaġa-gwadarito; 2) Iesu ġena ġenoġoi-iaġoma vaġa-ruaruana guruġari kotari ma ekira-vararito; 3) evaġa-naġirito, ġeri veġabidadamai beġene ruġa-gwaġiġi bene iaġo mo, Iesu Vereġauka bene ġenoġoi, ema elaunaġirito maki, asi beġene ġubulefi.

Paulo na ġena fefa vaġa-ruaruana tu maiġesi eboioġaiato:

1. Nuġari evaġa-gwaġiġirito, ekirarito, Keriso tu ma beiaġomani - karoa 1
2. Loriri beġene vetore korana Keriso ġofaġofana tu beiaġoma-guineni roġo - karoa 2
3. Ekalesia aiġesina beġene tanu maġurina - karoa 3

<sup>1</sup> Ġai tauma toitoi, Paulo, Silas, e Timoteo na Tamara Barau ema Vereġauka Iesu Keriso ġena ekalesia Tesalonika nuġanai ġatore-vinimini.

<sup>2</sup> Barau ġita Tamara ema Vereġauka Iesu Keriso ġerina varevare-bara e maino ġemi ai bene tanu.

*Keriso ma beiaġomani ġaronai, Barau na tarimarima ġeri rakava voiri bevinirini*

<sup>3</sup> Tarikakama mabarami, ġai na tu Barau baġana tanikiu-vinia ġaro mabarari ai ġomi daimi ai. Moġesi baġa veini tu maoro, korana ġemi veġabidadama ebarego-rakavani, ema ġemi veuravini karomi mabarari ġeri ai maki ebaregoni. <sup>4</sup> Moġa lorinai ġomi ġavaġa-raġemini Barau ġena ekalesia nuġari ai. Ġavaġa-raġemini korana ġomi tu enabe ġelaimini e ġevaġa-midigu midigumini, senaġi ġemi veġabidadama ġoġabi-gigitariani.

<sup>5</sup> Mo veiġa mabarari na Barau ġena vevaġa-maoro vetoġana namona ġevaġa-moġoniani, moġa anina ġomi tu ilaila ġia ġena Basileia boġo ġabiani, korana mo Basileia dainai ġomidigu-midiguni. <sup>6</sup> Barau tu maoro veiġari moġo beveini: Ġomi dei na ġevaġa-midigu midigumini tarimari ġia na ma bevaġa-midigu midigurini. <sup>7</sup> Ema ġemi midigumidigu ġerina bevaġa-iaġaraġimini ema ġai maki. Moġesi beveirani Iesu Vereġauka ma ġena aneru ma seġuka baregori ġesi guba na beġe mariġoni ġaronai. <sup>8</sup> Ma karava moremorena ġesi beiaġomani; Barau asi ġekorana-iaġiani tarimari ema ġera Vereġauka Iesu ġena Vari Namona asi ġeġabi-raġeani tarimari ġeri rakava voiri bema vinirini. <sup>9</sup> Ġeri rakava voiri tu maiġa: Ġia tu Vereġauka ġenana e ġena mama seġukana ġenana ma fakari beġe tanuni, midigu vanaġivanaġi beġe ġabini. <sup>10</sup> Mo tu beġorani Keriso ma beiaġomani ġaronai, ġena tarimarima mabarari na beġene vaġa-raġea, ema ġevaġa-moġoniani tarimari na beġene vaġa-namoa ġana. Ġomi maki ġia ġesi, korana ġaġobata-vinimito, ġoġabi-raġeato nai.

<sup>11</sup> Moġa lorinai vanaġivanaġi ġomi iatami ai ġaġuriġurini. Ġera Barau ġanoġiani, ġemi maġuri bene vaġa-namori, korana ġia na ekeamito tu boġono maġuri ġana. Ġia seġukana na ġemi ura namori mabarari ai bene vaġa-ġaunami, ema ġemi veġabidadama dainai ġoveirini ġauveiri e veiġari bene vaġa-ġuġururi. <sup>12</sup> Monana, Iesu Vereġauka arana beġene vaġa-raġea ġomi daimi ai, ema ġomi beġene vaġa-raġemi ġia bakunai. Ġita ġera Barau e Vereġauka Iesu Keriso na ġeri varevare-bara ġerina moġeri dagara mabarari beġene vaġa-ġorari.

<sup>1</sup> Tarikakama mabarami, ġai na ġanoġimini, ġera Vereġauka Iesu Keriso ġena iaġoma rekenai ema ġera veġoitaġo e raka-vegogo ġia ġesi: <sup>2</sup> Nuġami asi beġene veġonu-ġarimoġi, o beġe kirani Vereġauka ġena ġenoġoi ġarona tu bevotu beġe toni neganai, nuġami asi beġene meto. Mo guruġa asi boġono vaġa-moġonia, enabe beġe kirani, mo tu peroveta guruġana, o ġobatai ġekiraġiato guruġana, o ġai na fefa nuġanai ġatoreato guruġana. <sup>3</sup> Tarima ta na veiġa irauri ai asi bene ġofami. Korana Vereġauka ġena ġaro tu asi roġo beraġasini, beiaġoni mo, tarimarima ġutuma ġeri veġabidadama beġe raga-kwanerini, ema taravatu ekira-fitoġaiani tarimana befoforini. Ġia tu Barau na karava gabunai bea toreani. <sup>4</sup> Tarimarima ġetoma-rakariġo vinirini e ġeguba-kaurini dagara veaġari mabarari mo tarima na bekira-fitoġarini, ema ġia tauġena bevetore-varaġeni. Ġia beiaġoni Barau ġena Rubu Veaġa nuġanai betanu-tarini, benamo bekirani, “Au tu Barau,” betoni.

<sup>5</sup> Au ġomi ġesi roġo tatanuto-ġoi nai, moġeri mabarari akira-varamito. Ġomi na asi ġotuġamaġi-taġorini? <sup>6</sup> Taravatu ekira-fitoġaiani tarimana tu toma bere fofori, senaġi dagara ta na elau-ġauani, ġomi tu ma ribami kara. Ġarona korikorinai vau mo taravatu ekira-fitoġaiani tarimana befoforini. <sup>7</sup> Taravatu ekira-fitoġaiani tarimana ġena veiġa vekuretoġari initiba kota ġefoforini, senaġi kara beġe ġorani dagarari tu asi roġo beġe ġorani, beiaġoni mo, eruġa-ġaurini tarimana na dabara bekeoani. <sup>8</sup> Monai vau taravatu ekira-fitoġaiani tarimana befoforini, senaġi Iesu Vereġauka ma beiaġomani ġaronai, muruna seġukana na bevaġiani, ema ekimore-kimoreni mamana ġesi beiaġomani, benamo bevaġa-rakavaiani. <sup>9</sup> Taravatu ekira-fitoġaiani tarimana tu Satani ġena seġukai beiaġomani, ġofaġofa veiġa boruri e nuġa-farevaġi veiġari mabarari beveirini. <sup>10</sup> Ema ġena veiġa ġeġevari na mase dabaranai ġerakani tarimari beġofarini. Ġia tu beġe rekwa-rekwani, korana beġene maġuri ġana guruġa moġonina tu asi ġeġabi-raġeato e asi ġeura-viniato. <sup>11</sup> Moġa lorinai Barau na tuġamaġi veġonuri ġia nuġari ai bevaġa-rakatoġarini, ġofaġofa beġene vaġa-moġoniri ġana. <sup>12</sup> Moġa tauna tu, deikara na guruġa moġonina asi ġeġabi-raġeato, senaġi rakava ġeiku-viniato tarimari mabarari tu, Barau na ġeri rakava voiri bevinirini.

#### *Maġuri boġono ġabia ġana Barau na eġabi-viriġimito*

<sup>13</sup> Tarikakama mabarami, ġai na tu Barau baġana tanikiu-vinia ġaro mabarari ai, moġesi baġa veini tu maoro, korana ġia na eura-vinimini, ema tovtovonai eviriġimito bene vaġa-maġurimi ġana. Mo maġuri boġo doġariani, korana Iauka Veaġa ġena seġuka na evaġa-maġurimini, Barau ġena tarima veaġami ai evaġa-iaġomini, ema Vereġauka ġena guruġa moġonina ġovaġa-moġoniani. <sup>14</sup> Barau na ekeamito Vari Namona ġaġobata-vinimito ġenana. Ġomi ekeamito ġera Vereġauka Iesu Keriso ġena mareva baregona boġono ġabia ġana. <sup>15</sup> Moġa lorinai, tarikakama, boġono ruġa-gigitari, ġaġobata-vinimito ema fefai ġatore-vinimito vevaġa-riba guruġari mabarari boġono korana-iaġiri.

<sup>16</sup> Ġera Vereġauka Iesu Keriso tauġena ema Barau ġita Tamara na ġeura-vinirani. Ema ġena varevare-bara ġenana ġita tata nuġara evaġa-kokorerini ema evaġa-kavarani ġera vetuġamaġikau ġia ġenai tatoreani nuġanai, toma bene iaġo vanaġivanaġi. <sup>17</sup> Ġia ġanoġiani, nuġami bene vaġa-kokoreri, ema bene vaġa-kavami guruġa e veiġa namori boġono veiri ġana.

### 3

#### *Ġema boġono ġuriġuri*

<sup>1</sup> Tarikakama mabarami, ġema guruġa magonai tu, ġema boġono ġauġau, benamo Vereġauka ġena guruġa bene raga-rovorovo, ema gabu mabarari ai tarimarima na beġene ġabi-raġea ma vaġa-namona ġesi Barau ġenai, ġomi ġemi ai eġorato kavana.

<sup>2</sup> Barau boḡono noḡia maki, ḡia na rakava kwaikwai tarimari ḡerina bene vaḡa-maḡurima. Korana dia tarimarima mabarari na Vereḡauka ḡena guruḡa ḡevaḡa-moḡoniani.

<sup>3</sup> Senaḡi Vereḡauka tu ma ḡena vetuḡamaḡikau ḡomi ḡemi ai. Ḳia na bevaḡa-kokoremini, ema Satani ḡenana bevaḡa-maḡurimini. <sup>4</sup> Ḳai ḡema veḡabidadama ḡomi ḡemi ai tu Barau na evinimato, e ḡaribani, ḡakiramito veiḡari ḡoveirini ema roḡo boḡo vei-vesiriḡurini. <sup>5</sup> Vereḡauka na ḡemi tuḡamaḡi e ura mabarari bene ḡori-kauri, be Barau ḡena veuravini ema Iesu Keriso na evinimini vevaḡa-gwaḡiḡina boḡono riba-ḡitakauri.

Ḳauvei tu dagara baregona

<sup>6</sup> Tarikakama mabarami, Vereḡauka Iesu Keriso aranai ḡakiramini, ekalesia tarimari ḡubulefiri, ḡavaḡa-ribarito guruḡari asi ḡekorana-iaḡirini tarimari, ḡerina boḡono raka-veḡita. <sup>7</sup> Ḳomi ribami ginikau, ḡomi tu ḡai ḡaveito kavana boḡono vei. Ḳai tu asi ḡavei-ḡubulefito ḡomi ḡesi tatanuto-ḡoi nai. <sup>8</sup> Tarima ta ḡena-ḡana asi ḡaḡabi-raḡe kavarito-ḡoi, senaḡi ḡavoirito-ḡoi. Ḳai tu boḡi-laḡani ḡaḡauveito-ḡoi, ḡavekwaragito-ḡoi, korana ḡomi ta baḡa vaḡa-doḡe-ganimini garina. <sup>9</sup> Ḳai ma ḡema maoro, ḡomi ḡemi ai ḡema-ḡama baḡa kiraḡini. Senaḡi ḡema ura tu vevaḡa-ḡita namonai baḡana iaḡo, ema ḡai boḡono tovotovoma uranai moḡesi ḡaveito-ḡoi. <sup>10</sup> Ḳai ḡomi ḡesi tatanuto-ḡoi nai, vevaḡa-riba guruḡana ta ḡavinimito tu maiḡesi: “Bema tarima ta ḡauvei asi eurani nai, ḡaniḡani ta maki asi boḡono vinia.”

<sup>11</sup> Moḡesi ḡakirani, korana ḡaseḡaḡini tarima tari ḡomi fakami ai tu ḡubulefi ḡetanuni, ḡauvei asi ḡeveini, senaḡi tarima tari ḡeri ḡauvei ai ḡevekougou-ḡauni. <sup>12</sup> Vereḡauka Iesu Keriso aranai ḡavaḡa-guruḡa gwaḡiḡirini e ḡasisiba-vinirini, beḡene tanu-ḡitakau, asi beḡene raka-taḡuitaḡui, senaḡi tauḡeri beḡene ḡauvei, ḡeri-ḡari beḡene doḡari ḡana.

<sup>13</sup> Senaḡi ḡomi, tarikakama, akiramini, asi boḡono gau, veiḡa namori veiveiri ai. <sup>14</sup> Bema tarima ta na mai fefai ḡatore-iaḡosirini guruḡari asi eurani bene seḡaḡiri nai, nuḡami ai bene tanu, ḡia ḡesi asi boḡono vekako, be bene maiakaia. <sup>15</sup> Ḳami vetari tarimanai asi boḡono vaḡa-iaḡoa, senaḡi tarikakami ḡoveirini ilailanai boḡono vaḡa-ribaia.

*Vevaḡa-namo guruḡari*

<sup>16</sup> Vereḡauka, ḡita ḡera maino korana, ḡia na ḡaro vanaḡivanaḡi ḡena maino bene vinimi ḡemi maḡuri tata nuḡari ai. Vereḡauka ḡomi mabarami ḡesi bene tanu.

<sup>17</sup> Mai vevaḡa-namo guruḡana au, Paulo, tauḡegu na atoreani. Ḳegu fefa dokori ai vevaḡa-namo guruḡari maiḡesi kavana ḡimaḡu na atorerini. Mo tu au ḡegu fefa vaḡa-moḡoniri vetoḡana.

<sup>18</sup> Ḳera Vereḡauka Iesu Keriso ḡena varevare-bara ḡomi mabarami ḡemi ai bene tanu.



## PAULO ĠENA TORETORE GINIGUINENA TIMOTEO ĠENA

1 Timoteo vega-foforina guruġari

Paulo na mai fefa maiġa tu dia ekalesia doġorona ta ġena etoreato, mai tu tarima sebona arana Timoteo moġo ġena etoreato. Timoteo tu betaġu Paulo ġena evanelia ġauveina nuġanai emaġuri-ġenoġoito (Apostolo 14; 1 Timoteo 1:2).

Paulo na mai fefa Timoteo ġena tu laġani 61 ma 65 fakari ai ta etoreato, mo tu Iesu emaseto murinai.

Mai fefa nuġanai siri baregori tu karoa 3:15; 4:12; 6:11-12.

Paulo na mai fefa etoreato tu, 1) Timoteo evaġa-guruġa toreġauato, vevaġa-riba tarimari ġofaġofari na beġe ġofaiani garina; 2) ekalesia doġorona ġorikauri tarimari ema diakono tu aiġesina tarimari bene ġabiri; 3) vevaġa-riba moġoniri bene vevaġa-riba-iaġi; 4) Timoteo elaunaġiato, Vari Namona eribaiato moġa ġobina bene torea ema bene ġobata-iaġia.

Ġena toretore tu maiġesina eboioġaiato:

1. Vevaġa-riba guruġari moġoniri bene ġabi-gigitariri - karoa 1
2. Ġauġau e toma-rakariġo guruġari - karoa 2
3. Veġitaġau tarimari baregori ema diakono tu kamasiri beġene ruġa - karoa 3
4. Vevaġa-riba tarimari ġofaġofari - karoa 4
5. Vetuġunaġi-iaġiovini tarimana e ekalesia doġorona aiġesi beġene tanu - karoa 5-6

<sup>1</sup> Au Paulo, Keriso Iesu ġena apostolo tarimagu, ġeguna mai fefa eiaġosini. Mai apostolo ġauveina aveiani tu ġita ġera vaġa-maġuri Barauna ema Keriso Iesu ġeri guruġa lorinai. Ġita tu Keriso Iesu ġenai moġo tavetuġamaġikauni.

<sup>2</sup> Timoteo, ġoi atore-vinimuni, natugu korikori veġabidadama nuġanai. Barau ġita Tamara ema Keriso Iesu ġita ġera Vereġauka ġerina varevare-bara, vevetuġaġwa, e maino ġemu ai bene tanu.

Vevaġa-riba ġofaġofa tarimari loriri bono toreri

<sup>3</sup> Makedonia ġana naiaġo atato nai, ġoi avaġa-guruġamuto, akirato, Efeso ai bono tanu. Korana tarima tari monai tu guruġa ġofaġofari ġevevaġa-riba iaġirini. Ġoi na moġeri tarima bonoa kirari, beġene doko. <sup>4</sup> Bono kirari, sinasina e tuburi ġatari arari tu asi beġene vetauri, korana moġeri na tu veġareveġare moġo beġe vaġa-ġorarini. Ema moġeri maki ġia ġeri veġabidadama asi beġe vaġa-kavarini, ema Barau na ġita ġerai kara neveia etoni dagnarana asi beġe ribaiani. <sup>5</sup> Au ġegu mai guruġa tauna korikori tu ġegu ura veuravini bene fofori. Mo veuravini tu nuġa namo vedaureana, tuġamaġi iobukaiobukana, ema veġabidadama moġonina ġerina eiaġomani. <sup>6</sup> Tarima tari tu moġeri na ġeraka-veġitato, benamo guruġa babori, asi tauri guruġari ġekiraġirini. <sup>7</sup> Ġia ġeurani tu Barau ġena taravatu vevaġa-riba-iaġiri tarimari ai beġene iaġo, senaġina ġia tauġeri ġeri guruġa tu asi ġetuġamaġi-fakarini, ġeguruġa-iaġirini dagnarari tauri korikori maki vekuretoġa rakava, asi ribari.

<sup>8</sup> Ġita ribara, taravatu tu namo bema tarima na beġauvei-iaġi ginikauani nai. <sup>9</sup> Maiġa maki ma ribara: Taravatu ġeveirito tu dia vei-iobukaiobuka tarimari ġeri, senaġi taravatu asi ġekorana-iaġirini tarimari ġeri, ema kira-sirivaġi tarimari ġeri, Barau garina asi ġegarini e vei-rakava tarimari ġeri, asi veaġa tarimari ema Barau asi ġegubakauani tarimari, sinari e tamari ġevaġirini ema vaġivaġi tarimari. <sup>10</sup> Mata-boraġa e veġuravanaġi tarimari, tau o vavine karori ġesi ġekimani tarimari, tarimarima ġelemarini benamo ma ġevoivoi-iaġirini tarimari, ġofaġofa tarimari Kota nuġanai ġofaġofa guruġari ġekiraġini. Ema veiġa rakavari ġutuma ġeveini vevaġa-riba guruġari moġoniri ġesi asi ilaila. Taravatu tu moġeri tarimarima ġeri ġeveirito. <sup>11</sup> Mo vevaġa-riba

guruḡari moḡoniri tu Vari Namona nuḡanai, Barau na au eviniguto bana kiraḡi-foforiri ḡana. Mo Vari Namona tu mareva namo Barauna ḡena mama e seḡuka varina.

*Paulo na Keriso etanikiu-viniato*

<sup>12</sup> Ḡera Vereḡauka Keriso Iesu na kokore eviniguto, ema etuḡamaḡiguto ma ḡegu vetuḡamaḡikau ḡena vetuḡunaḡi baiaḡo-vinini. Moḡesina naima etoreguto, ḡena vetuḡunaḡi bana iaḡo-vinia ḡana. Moḡa lorinai atanikiu-viniani. <sup>13</sup> Moḡoni, guinenai au na Keriso tu aguruḡa-rakava viniato-ḡoi, alai-veḡitaiato-ḡoi ema avei-veḡareveḡare rakavaiato-ḡoi. Senaḡi Barau na evetuḡa-ḡwaguto, korana mo negai kara aveiato-ḡoi tu au asi ribagu, ema Keriso asi avaḡa-moḡoniato-ḡoi. <sup>14</sup> Ḡera Vereḡauka ḡena varevarebara barego lelevaḡi au iatagu ai ebubu-kauato, veḡabidadama e veuravini ḡesi. Mo veḡabidadama e veuravini tu Keriso Iesu ḡesi bita sebonani vau bita ḡabirini dagarari.

<sup>15</sup> Mai guruḡa tu moḡoni, ema tarimarima mabarari na beḡene ḡabi-raḡea e beḡene vaḡa-moḡonia tu namo: Keriso Iesu tanobara ḡana eiaḡomato tu vei-rakava tarimari vaḡa-maḡuriri ḡana. Vei-rakava tarimari mabarari fakari ai rakava kwaikwai tarimana tu au. <sup>16</sup> Senaḡi Barau ḡena vevetuḡaḡwa au, rakava kwaikwai tarimagu, ḡegu ai etoreato, korana Keriso Iesu ḡena vevaḡa-gwaḡiḡi bene vaḡa-foforia ḡana. Vevaḡa-ḡita namonai bene vaḡa-iaḡogu, tarimarima na beḡene vaḡa-moḡonia vau, ḡia ḡenai beḡene veḡabidadama, maḡuri vanaḡivanaḡi beḡene ḡabia ḡana. <sup>17</sup> Barau tu tanu-vanaḡivanaḡi Verena, ḡia mase asi ribana, asi ḡitaḡitana, ḡia ḡereḡana kwariḡutu moḡo Barau. Ḡia moḡo bitana gubakaua, bitana vaḡa-raḡea toma bene iaḡo mo vanaḡivanaḡi. Amen.

*Timoteo na vetari namona bene vetari-iaḡia*

<sup>18</sup> Timoteo, natugu o, au mai vaḡa-naḡi ḡoi avinimuni, peroveta tarimari na ḡeperoveta-iaḡimuto ilailanai, moḡeri bono tuḡamaḡi-taḡori. Mo peroveta guruḡari bono korana-iaḡiri, be Barau ḡena vetari nuḡanai vevaḡi namona bono veia. <sup>19</sup> Ḡemu veḡabidadama bono ḡabi-gigitaria, ema nuḡamu iauna namo bene tanu. Tarima tari na nuḡari garori asi ḡeseḡaḡi-vinirito, benamo ḡeri veḡabidadama tu noḡa bouti fore ai ḡevaḡa-daḡi-kauani, benamo eḡwa-kirakiraiani kavana. <sup>20</sup> Moḡesi ḡeveito tarimari ta tu Himenaio ma ta tu Alesanda. Ḡia tauri ruarua tu Satani ḡimana nuḡanai atorerito. Korana ḡia beḡene riba, be Barau asi ma beḡene vei-veḡare veḡarea ḡana.

2

*Rubu toma-rakariḡo dabarana korikori*

<sup>1</sup> Au ḡegu sisiba giniginena tu maiḡa: Tarimarima mabarari urari ai Barau boḡono noḡi-vinia, boḡono ḡauḡau, tarimarima urari ai Barau e tarima vekaravari ai boḡono ruḡa, Barau boḡono noḡia ema boḡono tanikiu-vinia. <sup>2</sup> Kini e gavamani mabarari ḡeri maki boḡono ḡuriḡuri, be bitana tanu-ginikau ma mainora ḡesi, ema Barau bitana korana-iaḡia ma moḡonira ḡesi. <sup>3</sup> Moḡesi tu namo, ema Barau ḡera vevaḡa-maḡuri tarimana bita vaḡa-verereani. <sup>4</sup> Barau eurani tarimarima mabarari beḡene maḡuri ema guruḡa moḡonina beḡene ribaia. <sup>5</sup> Korana Barau tu sebona kwariḡutu moḡo; ema Barau e tarimarima vefakari ai eruḡani tarimana maki sebona moḡo, Keriso Iesu. <sup>6</sup> Ḡia tauḡena ḡena maḡuri evinito, tarimarima mabarari bene voi-ḡenoḡoiri ḡana. Barau ḡena vevaḡa-moḡoni na tu mo ḡaro eḡabi-viriḡiatio, monai vau ema foforito. <sup>7</sup> Moḡesina nai au etoreguto, apostolo e ḡobata tarimagu. Mai tu moḡoni, asi aḡofamini. Au etoreguto tu, irau bese tarimari ḡeri ai veḡabidadama korikorina bana vevaḡa-riba-iaḡiri.

<sup>8</sup> Au aurani gabu mabarari ai tau tu ḡimari veaḡari beḡene ḡabi-vaisiri ḡauḡau nuḡanai. Senaḡi ḡauḡau ai ḡimari veaḡari beḡe ḡabi-vaisirini nai tu, nuḡari tu asi baruri ema asi daradarari ḡesi.

<sup>9</sup> Au aurani vavine maki beḡene vedabuḡa-ginikau, ma vegubakauri ḡesi dabuḡa beḡene riḡo. Ḡuiri asi beḡene fego-irauirauri, ema golo o aḡeva ma marevari irauirau

na asi beḡene vera, ema voiri baregori dabuḡari na maki asi beḡene vedabuḡa. <sup>10</sup> Senaḡi veiḡa namori ema roroḡotori mabarari veravera noḡa beḡene veiri. Korana Barau ḡegubakauani vavineri ḡeri veiḡa korikori tu moḡesina. <sup>11</sup> Vavine na Barau ḡena guruḡa beḡene seḡaḡi-viniri ma nuḡa ḡave-mukori ḡesi, asi beḡene guru-raḡe. <sup>12</sup> Au asi aurani vavine vevaḡa-riba ḡauveina beḡene vei, ema veḡorikau maḡurinai ḡia na tau asi beḡene guine-iaḡiri, ema asi beḡene guru-raḡe. <sup>13</sup> Korana Barau na Adamu evei-guineato, murinai vauro Eva ma eveiato. <sup>14</sup> Ema Satani na tu dia Adamu eḡofaiato, senaḡi Eva eḡofaiato, benamo evei-rakavato. <sup>15</sup> Senaḡina vavine tu mero beḡene ḡabi. Korana monana vavine vevaḡa-maḡuri beḡe ḡabiani. Mo tu bema ḡeri veḡabidadama e veuravini beḡe ḡabi-taririni ema beḡe veaḡani e beḡe tanu-ginikauni.

### 3

#### *Veḡorikau tarimari rubu nuḡanai*

<sup>1</sup> Mai guruḡa tu moḡoni: Bema tarima ta eura-rakavani, ekalesia ḡorikauna dagina bene ḡabia etoni, ḡia tu ḡauvei namo vedaureana eura-viniani. <sup>2</sup> Ekalesia ḡorikauna tarimana tu maiḡesi bene tanu: Ḡia tu vei-iobukaiobuka tarimana, rakava ta ḡenai asi boḡoitaḡoani. Ḡia tu ḡaraḡona vavine sebona moḡo, vevaḡa-gwaḡiḡi tarimana, ḡena tuḡamaḡi e veiḡa maki roroḡoto. Tarima boruri eḡabi-raḡerini ḡena numai ema vevaḡa-riba ḡauveiri ma ribana tarimana. <sup>3</sup> Asi niuniu rakava-rakava tarimana ema asi eniarianarani tarimana, senaḡi manau ema maino tarimana; moni asi emata-ḡaniḡanini tarimana. <sup>4</sup> Ḡena numa tarimari eḡitaḡau-ginikaurini tarimana ema natuna keikeiri na garona ḡeseḡaḡi-viniani ma vegubakauri ḡesi tarimana. <sup>5</sup> Korana bema tarima ta na ḡena numa tarimari korikori asi beḡitaḡau-ginikaurini nai tu, kamara dabarai Barau ḡena ekalesia doḡorona beḡita-ḡauani? <sup>6</sup> Ekalesia variḡuna na veḡorikau dagina asi bene ḡabia, korana beveiavini ḡesi. Korana bevekokorokuni nai, Barau na vevaḡa-maoro bevei-viniani Diabolo evei-viniato kavana. <sup>7</sup> Ḡia tu asi ekalesia na maki ḡegubakauani tarimana, ma tari na guruḡa rakavari asi beḡe kiraḡini ḡenai, ma Diabolo ḡena rigririgi ai maki asi bea toḡani.

#### *Diakono tarimari*

<sup>8</sup> Diakono maki moḡesi, tarimarima na ḡeri veiḡa namori lorinai ḡegubakaurini tarimari, ema dia dagara ta kiraḡi-iaḡinai tu tarima ta ḡenai tu guruḡa ta ḡea kiraḡiani, ma ta ḡenai tu guruḡa boruna ta ma ḡea kiraḡiani tarimari. Wain asi ḡeniu-ḡutumaiani, ema moni e farefare asi ḡemata-ḡaniḡani-iaḡirini, ema veiḡa ḡofaḡofari ḡerina moni o farefare asi ḡeḡabini tarimari. <sup>9</sup> Ḡia na guruḡa moḡoniri korikori vekuretoḡari Barau na ḡita taveḡabidadamani tarimara ḡerai ema vaḡa-foforirito, moḡeri ḡeḡabi-gigitaririni nuḡari ma iobukaiobukari ḡesi. <sup>10</sup> Ḡia tu boḡono tovanaḡi-guineri. Bema ḡeri ai vetoukau ta asi boḡo ḡoitaḡoani nai, diakono dagina beḡene ḡabi. <sup>11</sup> Ḡaraḡori vavineri maki tarimarima na ḡegubakaurini vavineri, asi ḡeverori-toreni, ma vevaḡa-gwaḡiḡi ribari e ma ḡeri vetuḡamaḡikau dagara mabarari ḡeri ai. <sup>12</sup> Diakono tu ḡaraḡona vavine sebona moḡo, natuna ema ḡena numa tarimari ḡitaḡauri ma ribana. <sup>13</sup> Korana diakono ḡauveina ḡevei-ginikauani tarimari tu tarimarima na beḡe gubakaurini, ema ḡia tauḡeri maki nuḡari ma kokoreri ḡesi Keriso Iesu ḡenai ḡeri veḡabidadama beḡe vaḡa-ruḡarini.

#### *Guruḡa vekuretoḡa mabarana*

<sup>14</sup> Oba, au ḡegu tuḡamaḡi tu bana raga-iaḡosi, be banasi ḡitamu, senaḡina mai guruḡa tu atore-vinimuni. <sup>15</sup> Bema bakwaiboni nai, mai guruḡa na bene vaḡa-ribamu, tarimarima Barau ḡena bese nuḡanai tu kamasi beḡene tanu. Barau ḡena bese tarimari tu maḡuri Barauna ḡena ekalesia, ema ḡia tu guruḡa moḡonina duḡuna baregona ema korana. <sup>16</sup> Moḡoni, Barau korana-iaḡina tu vekuretoḡa ema dobu-masemase, Barau na evaḡa-foforiato tu maiḡa:  
Ḡia tu efoforito tarima tauḡaninai,

Iauka Veagā na iobukaiobukana ekiraġiato,  
 aneru na ġeġitaiato.  
 Tanobara mabarari fakari ai ġeġobata-iaġiani,  
 tanobarai tarimarima na ġevaġa-moġoniani,  
 ġena mareva baregonai Barau na eġabi-varaġeato.

## 4

*Veavaġa-riba ġofaġofa tarimari*

<sup>1</sup> Iauka Veagā na ekiraġi-foforiani, tarima tari ġoirara ġarori ai Keriso ġabidadama-  
 vinina beġe raga-kwaneani, benamo ġofaġofa iaukari beġe seġaġi-vinirini, ema iauka  
 rakavari ġeri vevaġa-riba beġe ġabi-raġerini. <sup>2</sup> Mo vevaġa-riba tu guruġa ġofaġofa  
 tarimari na beġe kiraġirini. Ġia ġeri tuġamaġi iobukaiobuka dabarana tu emaseto, noġa  
 moġo auri seġuka lelevaġi na ġegabu-maserito kavana. <sup>3</sup> Mo tarima na tarimarima  
 ġekira-ġoirini asi beġene veġaraġo, ema ġaniġani tari beġe kiraġirini tu asi beġene  
 ġani. A mo ġaniġani tu Barau na eveirito dagarari. Keriso ġevaġa-moġoniani e guruġa  
 moġonina ġeribaiato tarimari na beġene ġaniri vaġa-namo ġauġauna murinai. <sup>4</sup> Korana  
 tu dagara mabarari Barau na eveirito tu namo moġo. Ma ġaniġani ta tu asi bitana ruġaia,  
 bema Barau tatanikiu-viniani vau taġabi-raġerini nai. <sup>5</sup> Korana mo tu Barau ġena guruġa  
 na ema ġuriġuri na ġevaġa-veaġarini Barau ġoiranai.

*Keriso ġena vetuġunaġi tarimana namona*

<sup>6</sup> Bema ġoi na moġeri guruġa tarikakara bovaġa-ribarini nai, ġoi tu Keriso Iesu ġena  
 vetuġunaġi tarimamu namomu ta. Ema Iesu ġabidadama-vinina guruġari moġoniri  
 ema vevaġa-riba guruġari namori okorana-iaġirini, maniġeri tu iauka ġaniġaniri, ġoi  
 ġeġubub-iaġimuni. <sup>7</sup> Sinasina babori ġerina tu bono veġita ema bono raga-kwaneri.  
 Barau korana-iaġi-korikorinai bono kokore. <sup>8</sup> Tauġanina vaġa-kokorena veiġari ġeri  
 namo tu misina moġo, senaġi Barau korana-iaġina ġena namo tu barego lelevaġi dabara  
 mabarari ai tu-na. Korana monana tu namo bita doġariani mai maġuri nuġanai ema  
 ġoira maġurinai. <sup>9</sup> Mo tu guruġa moġonina, be bitana ġabiraġe-ginikaua. <sup>10</sup> Moġa  
 uranai tavekwaraġini ema tamidigu-midiguni, korana tu maġuri Barauna ġenai ġera  
 tuġamaġikau tatore-kauani. Ġia tu tarimarima mabarari ġeri vevaġa-maġuri Barauna,  
 ma ġia tu ġevaġa-moġoniani tarimari ġeri vevaġa-maġuri Barauna korikorina.

<sup>11</sup> Mai guruġa maiġeri bono velaunaġi-iaġiri e bono vevaġa-riba-iaġiri. <sup>12</sup> Ta na ġoi  
 asi bene ġita-fitoġamu, korana ġoi tu maraġa variġu moġo, senaġi vevaġa-ġita-iaġi  
 tarimamu namomu ai bono iaġo ġemu guruġai, veiġai, veuravini ai, veġabidadamai,  
 ema maġuri namo vedaureanai. <sup>13</sup> Buka Veagā bono iavi-foforia tarimarima ġeri ai,  
 bono ġobata-iaġia, bono vevaġa-riba-iaġia, bene iaġo mo, au bana iaġosi. <sup>14</sup> Barau na  
 evinimuto varevarena ġauvei-iaġinai asi bono moira. Mo varevare o seġuka tu peroveta  
 guruġari ġerina oġabiato dagarana, ekalesia ġorikauna tarimari ġimari ġoi debamu  
 ai ġetore-kaurito ġaronai. <sup>15</sup> Moġeri dagara bono ġauvei-iaġi ġitakauri. Mai ġauvei  
 bono kokore-iaġia nuġamu e tauġanimu mabarari ġesi, be ġemu kokore tarimarima  
 mabarari na beġene ġitaia. <sup>16</sup> Ġemu maġuri ġobina bono torea, ema ġemu vevaġa-riba  
 guruġari loriri bono toreri. Mai veiġa maiġeri bono vei-vanaġi vanaġiri. Korana bema  
 moġesi boveini nai, tauġemu bovevaġa-maġurini ema ġeseġaġi-vinimuni tarimari maki  
 bovaġa-maġuririni.

## 5

*Ġauvei veġabidadama tarimari rekeri ai*

<sup>1</sup> Tarima baregona ta asi bono kira-feia; senaġi bono vaġa-guruġa ġaveġavea tamamu  
 kavana. Maraġa variġu tu bono vaġa-guruġari tarikakamu kavana. <sup>2</sup> Vavine baregori  
 sinamu kavana bono veiri, ema vavine variġu tobamu kavana bono veiri, ma nuġa namo  
 vedaureana ġesi.

<sup>3</sup> Vabu ġereġari kwariġutu moġo nai tu bono gubakauri. <sup>4</sup> Senaġina vabu ta bema ġia tu ma natuna, o ma tubuna nai tu, ġia guine tu Barau korana-iaġina veiġana ġeri bese nuġanai roġo beġene riba-iaġia e beġene vaġa-foforia. Mo tu ġeri bese ġobiri beġene toreri ema vaġa-kavari. Moġesina veiġari ai tu tamari e sinari ma tuburi ġaukari ġeri vekwaraġi ġevaġa-voi ġenoġoirini. Ma maiġesi veiġari na tu Barau ġevaġa-iakuani. <sup>5</sup> A vabu, ġereġana moġo asi tau ġitaġauna, ġena tuġamaġikau tu Barau ġenai moġo betoreani. Boġi-laġani beġauġauni, Barau benoġiani bene vaġa-kavaia ġana. <sup>6</sup> Senaġi tauġanina vaġa-vererena moġo veiġana eveiani vabuna tu varau emaseto, enabe roġo maġuri etanuni. <sup>7</sup> Mai guruġa tu vabu mabarari bono viniri, be ta ġenai rakava ta asi beġene doġaria. <sup>8</sup> Senaġi bema tarima ta na garagarana, o sikira ġena numa tarimari korikori, ġeri-ġari asi eġwaġwa-raġasini e eġuburini nai, ġia ġena veġabidadama Keriso ġenai tu ekure-toġaiani. Ġia ġena rakava na tu asi eveġabidadamani tarimana ġena rakava maki evanaġiani.

<sup>9</sup> Vabu ta arana asi bono torea roġo, vabu mabarari arari otorerini bukanai. Senaġina bema ġia ġena maġuri laġanina 60 evanaġiato, ema tau sebona moġo eġaraġoato. <sup>10</sup> Ema ġena veiġa namo lorinai tarimarima na ġeribaiani, e natuna ġobiri etoreginikaurini, varivari tarimari eġabi-raġerini ġena numai, veaġa o ekalesia tarimari kwakuri eġuriġirini, (moġa anina tu tauġena evetore-riġoni), ġevaġa-midigu midigurini tarimari evaġa-kavarini, ema veiġa namori ai ekokoreni vabuna moġo arana bono torea.

<sup>11</sup> Senaġi vabu variġuri tu arari asi bono toreri, korana ġeri tuġamaġi rakavari na beġe ġori-kaurini, benamo Keriso ġenana beġe raka-veġitani, benamo ma beġe veġaraġoni. <sup>12</sup> Benamo metona tauġeri na beġe ġabiani, korana ġeri guruġatore guinena Keriso ġenai ġefitoġaiani lorinai. <sup>13</sup> Ġubulefi beġe ribaiani ema numa loriri ai beġe raġekau-raġekauni. Dia ġubulefi moġo, senaġina beġe mugumuguni, raka-boġeraġe boġeraġe ema asi ġere kiraġiri guruġari beġe kiraġirini. <sup>14</sup> Moġa lorinai au aurani vabu variġuri tu beġene veġaraġo, be naturi beġene vaġa-ġorari, ema ġeri numa beġene ġita-ġauri, benamo evetari-vinirani iaukana faka ta asi beġene vinia ġita bene ġofaġofa-iaġira ġana. <sup>15</sup> Korana vabu tari tu varau Iesu ġena dabara na beġe raka-veġita, benamo Satani murinai ġerakani.

<sup>16</sup> Senaġi bema Iesu evaġa-moġoniani vavinena ta ġena numai vabu tari ġetanuni, mo vavine na mo vabu bene ġitaġau-ginikauri, be ekalesia iatanai meto asi beġene toreka. Moġesi tu vau ekalesia na tu ġereġari ġetanuni vaburi moġo beġita-ġaurini.

<sup>17</sup> Ekalesia ġeġori-kauani tarimari, ekalesia ġauveina ġevei-ginikaurini tarimari, tu boġono gubakau-baregori, ema voiri iatari ai boġono torekau. Mai tu Barau ġena guruġa ġeġobata-iaġirini e ġevevaġa-riba-iaġirini tarimari akiraġirini. <sup>18</sup> Korana Buka Veaġa tu maiġesina ekirani, “Boromakau na widi efanafana-iaġirini nai tu, muruna asi bono barubarua.” Ma ekirani, “Ġauvei tarimana ġena ġauvei tu voina bene ġabia, moġesina tu maoro.”

<sup>19</sup> Bema tarima ta na ekalesia eġori-kauani tarimana ekiraiani, ġia tu ekerereri nai tu, asi bono seġaġi-viniri, bene iaġo mo, tarima ruarua o toitoi na beġe vaġa-moġoniani vau. <sup>20</sup> Ġevei-rakavani tarimari tu ekalesia tarimari ġoirari ai bono vaneri, be tarimarima maki beġene gari.

<sup>21</sup> Barau e Keriso Iesu ema aneru veaġari ġoirari ai au ġoi avaġa-guruġamuni, mai vevaġa-naġi guruġari bono seġaġi-viniri nuġamu sebonai. Tarima baregori ema garagaramu moġo asi bono ġabi-raġeri. <sup>22</sup> Ġimamu tarima ta tubuanai asi bono torekau-ġarimoġia, tari ġeri veiġa rakavai asi bono vei-rakava, tauġemu lorimu bono vetore, bono namo-vedaurea.

<sup>23</sup> Nanu korikori moġo asi bono niu, senaġi wain koturi kota maki bono niu, korana nuġamu bene iarevaia, okeve-kinikini ġutumani bene.

<sup>24</sup> Tarimarima tari ġeri rakava tu fofori-ginikau, ma moġeri rakava na ġia tu ġeraga-kwanerini, benamo ġeiaġo-guineni Barau ġena Kota gabuna ġana. Senaġi tari ġeri rakava tu vekuretoġa, gabivau muriri na ġerakanaġi-rakanaġini. <sup>25</sup> Moġesina moġo

veiġa namori maki maġatai foforitaġo. Senaġina veiġa namori tari asi ġefofori-ġariġarini dagarari tu vekuretoġa moġo asi beġe tanuni, senaġi beġea foforini.

## 6

<sup>1</sup> Tuġunaġi ġeiaġo-vinini tarimari na ġeri baregona tu beġene gubakaua ema ġena veġorikau gaburenai beġene tanu. Moġesina beġe veini nai tu, ġeri baregona na Barau arana ema ġita ġera vevaġa-riba iatari ai guruġa rakavari asi bekiraġini. <sup>2</sup> Bema tuġunaġi ġeiaġo-vinini tarimari ġeri baregori tu Iesu ġevaġa-moġoniani tarimari nai tu, maiġesi asi beġene tuġamaġi, “Mai tu au tarikakagu, be garona asi naseġaġia e asi nagubakaua.” Asiġina! Ġia tu maiġesi neġi beġene vei, ġeri baregori ġeri vetuġunaġi misikose mabarari beġene iaġovini-ginikau. Korana ġia ġeri ġauvei ġena namo tu ġeri baregori, Iesu ġevaġa-moġoniani tarimari, na beġe ġabiani; moġeri tu ġia ġatari namori.

*Vevaġa-riba ġofaġofa ema farefare moġoniri*

Maiġeri dagara ġia bono vaġa-ribari ema bono launaġi-iaġiri. <sup>3</sup> Bema tarima ta vevaġa-riba gofaġofari bevevaġa-riba iaġirini, ema ġena vevaġa-riba ġita ġera Vereġauka Iesu Keriso ġena guruġa moġonina ġesi asi besebonani, ma Barau ġena maġuri asi bevaġa-ribarani, <sup>4</sup> ġia tu veiavi tarimana, ema dagara ta asi etuġa-maġi-fakaiani. Ġia tu vedanaġi iraurauri beveini, ema Barau ġena guruġa bevevane-iaġirini. Moġeri na tu mama, vevane, guruġa rakavari, tarimarima ġeri ai vevaġa-daġa tuġa-maġiri rakavari beġe vaġa-ġorarini, <sup>5</sup> ema vanaġivanaġi veġareveġare maki asi ġedokoni. Moġesina ġeveini tarimari ġeri tuġamaġi tu rakava kwaikwai, ema guruġa moġonina na ġeraka-veġitato; ġia maboru ġetuġamaġini, Barau korana-iaġina tu farefare ġutuma bodoġarini dabarana.

<sup>6</sup> Moġoni, Barau ġekorana-iaġiani, ema farefare voġori na ma asi ġeiaġoni tarimari tu farefare ġutuma lelevaġiri beġe ġoitaġoni. <sup>7</sup> Korana dagara ta tanobara ġana asi taġabi-iaġomaiato, ema dagara ta maki tanobara na asi bita ġabi-iaġoani, asiġina! <sup>8</sup> Moġa lorinai, bema ġita ma ġara ġaniġani e ma ġera dabuġa nai tu, bitana kira, maiġeri tu ilaila ġemai. <sup>9</sup> Tarimarima deikara ġeurani farefare ġutuma lelevaġi beġene doġari ġetoni tarimari tu veribaġani na eġabirini, ġeri ura babori ema ura rakavari na evaġa-daġa-raġerini, monana einu-riġorini rakava ġana ema karava gabuna ġana. <sup>10</sup> Korana moni uravinina tu rakava mabarari lamuna. Tarimarima tari moni ġeuravini-baregoani tu Iesu ġabi-dadama-vinina na ġeraka-veġitato, ema nuġa midigumidigu vovoka na nuġari egwanurini.

*Paulo ġena vevaġa-riba guruġari Timoteo ġenai*

<sup>11</sup> Senaġi ġoi, Barau ġena tarima, moġeri dagara mabarari bono raga-kwaneri! Benamo veiġa iobukaiobukari, Barau korana-iaġina, veġabidadama, veuravini, vevaġa-gwaġiġi, nuġa manau bono vetauri ma kokoremu ġesi. <sup>12</sup> Veġabidadama vetarinai bono kokore. Maġuri vanaġivanaġi bono ġabi-taria, korana mai maġuri uranai tu Barau na ġoi maki ekeamuto, tarimarima ġutuma ġoirari ai ġemu veġabidadama okiraġi-foforiato ġaronai.

<sup>13</sup> Barau na dagara mabarari maġuri evinirini, ema Keriso Iesu Pontio Pilato ġoiranai evevarifiuto tu guruġa namona ekiraġiato. Mai Barau e Keriso Iesu ġoirari ai ġoi avaġa-naġimuni: <sup>14</sup> Mai taravatu guruġari mabarari bono korana-iaġiri nuġamu asi vetoukauna ta ġesi ema kerere ta ġemu ai maki asiġina, roroġoto moġo, bene iaġo mo, ġita ġera Vereġauka Iesu Keriso ġena iaġoma ġarona. <sup>15</sup> Barau tauġena ġena ġaro korikori beraġasini ai vau, Iesu Keriso beforini. Barau ġereġana moġo Vere namo vedaureana, Veġitaġau Tarimana sebona kwariġutu tu, kini ġeri Kini ema vere ġeri Vere. <sup>16</sup> Ġia moġo ġereġana etanu-vanaġi vanaġini; ġia tu mama barego lelevaġina nuġanai etanuni, moġa lorinai ta na asi beraka-kaviani riba; ġia tu ta na asi eġitaiato ema ta na asi beġitaiani riba. Ġia ġenai vegubakau ema seġuka bene tanu mo vanaġivanaġi. Amen.

<sup>17</sup> Farefare Ɠutuma tarimari mai tanobarai bono kirari, asi beƓene veiavi, tanobara farefareri Ɠeri ai Ɠeri tuƓamaƓi-dadamaƓi asi beƓene torea, korana moƓeri mabarari beƓe korini, senaƓi Barau Ɠenai beƓene vetuƓamaƓikau; Ɠia na dagara namori Ɠutuma evinirani Ɠera verere Ɠari. <sup>18</sup> Bono kirari, veiƓa namori beƓene vei, veiƓa namori Ɠeri farefare namori ai beƓene vaƓa-iaƓori. VeƓabiraƓe tarimari ai beƓene iaƓo ema Ɠeri farefare tarima tari maki kota beƓene viniri ma verereri Ɠesi. <sup>19</sup> Mo dabarai Ɠia Ɠeri farefare namori beƓe vaƓa-vegogo-torerini Ɠoirari Ɠarori Ɠana, ema maƓuri korikori beƓe Ɠabiani.

<sup>20</sup> Timoteo, Barau na evinimuto guruƓari bono Ɠabi-tariri, guruƓa rakavari e guruƓa babori ema iaunega ƓofaƓofari vevaneri ai asi bono raka-toƓa. Tarima tari na mo iaunega ƓekiraƓirini, “Riba”. Mo tu ƓeƓofaƓofani. <sup>21</sup> Tarimarima tari na mo “Riba” Ɠetoni moƓa ƓeƓabi-raƓerito, benamo Ɠeri veƓabidadama Iesu Ɠenai ƓeiaƓuiato.

Barau Ɠena namo e varevare-bara Ɠomi Ɠemi ai bene tanu.

## PAULO ĠENA TORETORE VAĠA-RUARUANA TIMOTEO ĠENA

2 Timoteo vaĠa-foforina guruġari

Paulo na Timoteo ġena mai fefa vaĠa-ruaruana tu Paulo Romai ediburato taiminai etoreato. Etoreato laġanina tu 66 ma 67 fakari ai ta etoreato, mo tu Iesu emaseto murinai.

Mai fefa nuġanai siri baregori tu karoa 1:13-14; 2:15; 4:1-5.

Paulo na mai fefa vaĠa-ruaruana etoreato, ġena ura tu, 1) Timoteo maġuri moġoni ai moġo bene tanu; 2) meto baregori beġoitaġoni nuġanai asi bene moira, senaġi vetuġunaġi ġauveina bene kokore-iaġia.

Paulo na mai fefa tu maiġesina eboioġaiato:

1. Keriso varina moġonina Timoteo na bene ġabi-gigitaria - karoa 1
2. Keriso ġena vetuġunaġi ġauveina bene korana-iaġia - karoa 2
3. Keriso ġenana beġe veġitani tarimari guruġari ekiraġito - karoa 3
4. Keriso ġena guruġa ġereġana moġo bene ġobata-iaġia - karoa 4:1-5
5. Paulo ġena veġabituġu guruġari etuġuto - karoa 4:6-22

<sup>1</sup> Au Paulo, Keriso Iesu ġena apostolo tarimagu, Barau ġena ura lorinai; ġeguna mai fefa eiaġosini. Barau na etuġuguto, ekiraġi-toreato maġurina Keriso Iesu ġenana bita doġariani maġurina bana ġobata-iaġia ġana.

<sup>2</sup> Timoteo, ġoi atore-vinimuni, natugu, aura-vinimuni. Barau ġita Tamara ema Keriso Iesu ġita ġera Vereġauka ġerina varevare-bara, vevetuġaġwa, e maino ġemu ai bene tanu.

*Paulo* ġena vevaġa-namo e vevaġa-kokore guruġari

<sup>3</sup> Boġi e laġani vanaġivanaġi ġegu ġuriġuri nuġari ai ġoi atuġamaġimuni. Ġegu ġauġau nuġari ai tu Barau, ma nuġagu iau-namona ġesi vetuġunaġina aiaġo-viniani Barauna, atanikiu-viniani. Barau tu au tubugu ġatagu na maki vetuġunaġina ġeiaġo-viniato. <sup>4</sup> Otaġito atuġamaġiani, ema ġegu ura baregona ġoi ma bana ġitam, ġegu iaku bene barego ġana. <sup>5</sup> Ġoi ġemu veġabidadama moġonina ma atuġamaġi-ġenoġoiani. Mani veġabi-dadama maniġa tu tovotovonai tubumu vavinena Lois e sinamu Eunike ġeri ai maki etanuto-ġoi. Au aribani, mo veġabidadama sebona tu ġoi ġemu ai etanuni. <sup>6</sup> Moġesina nai avaġa-vetuġamaġi ġenoġoimuni, Barau na evinimuto varevarena, au ġimagu iatamu ai atore-kauato nai, oġabiato dagnarana, bono ġauvei-iaġia. <sup>7</sup> Korana Barau na ġita evinirato laukana na tu nuġara asi bevaġa-garirini laukana, senaġi kokore, veuravini, e nuġa-gwaġiġi evinirani laukana.

<sup>8</sup> Ġita ġera Vereġauka ġena guruġa kiraġi-foforinai asi bene maiakamu, ema au Keriso ġaramanai dibura numai atanuni nai maki, maiakagu na asi bene maiakamu. Senaġi Barau ġena kokore ai bono vevaġa-gwaġiġi ema au ġesi bono sebona, be Vari Namona ġaramanai bitana midigumidigu. <sup>9</sup> Ġia na evaġa-maġurirato ema ġena keakea vevaġana na ekearato ġena tarimarimai bitana iaġo ġana. Moġesi eveito tu, dia ġita ġera veiġa e ġauvei namo naima, senaġi ġia tauġena ġena ura e ġena varevare-bara na moġo. Mo varevare-bara tu tovotovonai veġata, guba e tanobara roġosi roġo bere veia nuġanai, Barau na Keriso Iesu ġenana evinirato. <sup>10</sup> Senaġi maitoma tu ġita ġerai Vevaġa-maġuri Tarimana Keriso Iesu eiaġomato lorinai, mai varevare-bara ġita ġerai ema foforito. Keriso na mase ġena seġuka evaġa-koriato, ema Vari Namona ġenana maġuri e tanu-vanaġivanaġi evaġa-foforiato. <sup>11</sup> Barau na au etoreguto tu mai Vari Namona bana ġobata-iaġia, bana ġwa-rosia, ema bana vevaġa-riba-iaġia ġana.

<sup>12</sup> Mo ġauvei ġaramanai au maiġesi amidigu-midiguni. Senaġi au tu asi emaiakaguni, korana aġabi-dadama-viniani tarimana tu ribagu ginikau. Ema au maki ribagu ġitakau, mai ġauvei ġimagu ai etoreato maiġa tu beġitaġau-ginikauani beiaġoni mo Kota baregona ġarona beraġasini. <sup>13</sup> Guruġa moġoniri au ġeguna oseġaġirito guruġari bono ġabi-gigitariri e bono korana-iaġiri veġabi-dadamai e veuravini ai. Mo veġabidadama



e veuravini tu Keriso Iesu ġenana ġeiaġomani. <sup>14</sup> Barau na evinimuto varevarena bono ġita-ġaua. Ġita nuġarai etanuni Iauka Veaġana na mo varevare ġitaġaunai bene vaġa-kavamu.

<sup>15</sup> Ġoi ma ribamu Asia tanonai ġetanuni tarimari mabarari tu au ġeguna ġeraka-veġitato, Figelo e Hemogenes maki. <sup>16</sup> Onesiforo ma ġena numa tarimari ġesi tu Vereġauka na ġena vevetuġaġwa iatari ai bene torea, korana ġia na nega ġutuma au nuġagu evaġa-gwaġiġiato-ġoi. Ema au dibura numai atanuto maiakana na asi emaiakaiato. <sup>17</sup> Ġia Romai eraġasito ġaronai tu, au evetau-kokore kokoreguto mo edoġariguto. <sup>18</sup> Vereġauka na ġena vevetuġaġwa iatanai bene torea mo, Kota baregona ġaronai! Ema ġoi ma ribamu ginikau Efeso ai au vetuġunaġigu aiġesi eiaġo-viniato.

## 2

*Keriso Iesu* ġena vetari tarimana moġonina

<sup>1</sup> Moġa lorinai, natugu, ġoi tu Keriso Iesu ġena varevare-bara nuġanai bono kokore. <sup>2</sup> Tarimarima vovoka ġoirari ai au ġeguna kara oseġaġirito dagarari vetuġamaġikau tarimari bono vaġa-ribari. Benamo moġeri na maki tarima tari ġeri ma beġenea kiraġi.

<sup>3</sup> Keriso Iesu ġena vetari tarimana namonai bono iaġo, ema midigumidigu nuġanai bono vevaġa-gwaġiġi au aveini kavana. <sup>4</sup> Vetari tarimana ġena maġuri ma ribamu. Evetarini nuġanai, ġauvei tari asi beveirini riba. Senaġina ġia ġena ura tu eġabi-toġaiato vetari verena vaġa-iakuna veiġana moġo bene veia. <sup>5</sup> Raga-iruiru baranai eragani tarimana, asi bekokoreni riba o korona asi beġabiani riba, bema raga-iruiru taravatuna asi bekorana-iaġiani nai tu. <sup>6</sup> Vamoka vei tarimana beġauvei-kokoreni tu tauġena roġo voina bene ġabi-guinea kwakwa ġaronai. <sup>7</sup> Vereġauka na vau tuġamaġi-faka bevinimuni, benamo mo guruġa mabarari bakiraġiri boriba-ginikaurini.

<sup>8</sup> Maiġa tu bono tuġamaġi-taġoa. Iesu Keriso tu Davida senena, mase na evariġisi-ġenoġoito. Au na tu maiġesina akiraġiani Vari Namona aġobata-iaġiani nai. <sup>9</sup> Moġesina naima ġevaġa-midigu midiguguni, dibura numai maki seini na ġebarubaruguni noġa vevaġideba o lema tarimagu. Senaġina Barau ġena guruġa tu asi barutari. <sup>10</sup> Moġa lorinai midigumidigu mabarari avevaġa-gwaġiġi-iaġirini Barau na eġabi-viriġirito tarimari dairi ai, be ġia maki Keriso Iesu ġenana eiaġomani vevaġa-maġurina, ema etanu-vanaġi vanaġini marevana baregona beġene ġabia uranai.

<sup>11</sup> Mai tu guruġa moġonina:

“Bema ġita Keriso ġesi tamaseto nai tu, ġia ġesi maki bita maġurini.

<sup>12</sup> Bema tavevaġa-gwaġiġini nai, ġia ġesi maki bita veġorikau-sebonani.

Bema ġia takira-ġuniġauani nai, ġia na maki ġita bekira-ġuniġaurani.

<sup>13</sup> Bema ġita asi tavetuġamaġikauni, ġia tu roġo gabunai ma ġena vetuġamaġikau beruġa-taġoni;

Korana ġia tauġena tu asi bevekira-ġuniġauni, (mai tu ġena kiraġitore guruġari ġia na asiġina ġinavaġi bekeforini).”

Ġauvei tarimana namona

<sup>14</sup> Mo guruġa ma bono vaġa-riba ġenoġoiri, ema Barau ġoiranai bono kira-toreġauri, guruġa koriri veġare-veġareri asi beġene vevaġi. Korana monana namo ta asi bevaġa-ġoraiani, senaġi beġe seġaġini tarimari ġeri maġuri moġo bevaġa-rakavarini. <sup>15</sup> Bono ġauvei-ġunaġave, be Barau ġoiranai bono fofori nai, bene vaġa-moġonimu, ġauvei tarimana asi emaiakaiani tarimana kavana. Korana ġia na tu Barau ġena guruġa moġonina evevaġa-riba ginikauani. <sup>16</sup> Sisiba rakavari e babori asi bono kiraġi, ema ġerina bono veġita, korana mo sisiba ġekiraġirini tarimari tu Barau ġenana ġerakamanaġani. <sup>17</sup> Guruġa moġesina ġekiraġirini tu noġa manuġa rakavari ġebakarini

kavana. Himenaio e Fileto tu moġesina tarimari. <sup>18</sup> Ġia tauri ruarua na tu guruġa moġonina dabarana ġeraga-kwaneato. Ġekirani variġisi-ġenoġoi tu evetoreto, be ekorito. Moġesina ġeguruġani nai, tarima tari ġeri veġabidadama ġevaġa-rakavarini.

<sup>19</sup> Senaġi Barau ġena guruġa korana tu eruġa-gwaġiġini fore baregona noġa, asi beġareva-ġarevani. Iatanai tu mai guruġa etoreato, “Vereġauka ma ribana deikara tu ġia ġena.” Ma ekirani, “Deikara ekirani ġia tu Vereġauka ġena etoni tarimana tu vei-rakava ġenana bene raka-veġita.”

<sup>20</sup> Numa baregona nuġanai tu mereki irauirauri moġeri, dia mabarari golo e silva na ġeveirito dagarari moġo, senaġi ġau e tano na ġeveirito dagarari maki moġeri. Tari tu ġaro baregori ai vau beġe ġauvei-iaġirini, a tari tu ġeġauvei-iaġi vanaġivanaġirini ġaniġani ġari o momo fitoġa dagarari. <sup>21</sup> Bema maiġeri veiġa rakavari ġerina tauġena eveiarevani tarimana tu, ġauvei namori ġauvei-iaġiri tarimanai Vereġauka na bevaġa-iaġoani ema bevaġa-veaġaiani. Ġia tu eġita-ġauani tarimana ġena ġauvei tarimana aroribanai beiaġoni ġauvei namori mabarari veiveiri ġana.

<sup>22</sup> Ġuru variġu ġeri ura rakavari mabarari bono raga-kwaneri, ema maiġeri bono korana-iaġiri: Vei-iobukaiobuka, veġabidadama, veuravini, ema maino. Ma nuġari namo vedaureari Vereġauka ġenoġiani bene vaġa-kavari ġana tarimari ġesi bono sebona. <sup>23</sup> Vedanaġi e veġareveġare babori ġerina bono raka-veġita, korana ġoi ribamu moġeri na tu vevane beġe vaġa-ġorarini. <sup>24</sup> Vereġauka ġena vetuġunaġi tarimana tu asi bene vevane, senaġi tarimarima mabarari bene iaunamo-viniri, bene vevaġa-riba ginikau, asi bene baru. <sup>25</sup> Ġekira-fitoġaiani tarimari bene kira-rogori ma manauna ġesi, betaġu Barau na bevaġa-vetuġamaġi kurerini, benamo guruġa moġonina beġe ribani. <sup>26</sup> Benamo ġia ġeri tuġamaġi beġe roroġoto-ġenoġoini ema Diabolo ġena rigirigi na beġe raga-veġitani, korana ġia na roġo eġabi-taririni ġena ura beġene veiri ġana.

### 3

Ġaro magori ai

<sup>1</sup> Ema maiġa maki bono ribaia: Ġaro dokori ai tu rakava ġutuma beġe ġorani. <sup>2</sup> Tarima tu tauġeri moġo beġe veura-vevinini, moni beġe mata-ġaniġani iaġirini, beġe vekiraġi-varaġe varaġeni, beġe veiavini, ġeri guruġa beġe rakavani, tamari sinari beġe kira-sirivaġi vinirini, tanikiu maki asi beġe toni, ema asi beġe veaġani. <sup>3</sup> Asi beġe veura-vini, tarima ġeri rakava asi beġe tuġamaġi-fitoġarini, beġe verori-toreni, asi beġe vevaġa-gwaġiġini, beġe niara-niararini, beġe kira-sirivaġini. <sup>4</sup> Ġia tu beġe revani, ġeri tuġamaġi rakavari ilailari ai beġe vei-taġuitaġuini, nuġari veiavi na beġe vonuni, tanobara iakuri e verereri beġe ura-vinirini, a Barau tu asi beġe ura-viniani. <sup>5</sup> Barau korana-iaġina tu tauna korikori iouiouna murikana rekenai moġo ġetovotovoani, a ġia tauna korikori seġukana tu ġeruġaiani. Mo tarimarima ġerina tu bono raka-veġita.

<sup>6</sup> Moġesina tarimari tu tarimarima ġeri numa nuġari ai ġeraka-toġani, benamo nuġari moira vavineri ġeġofarini. Mo nuġari moira vavineri tu ġeri veiġa rakavari metori na ġelaulau-taririni, ema ġeri ura rakavari na ġeġori-kaurini. <sup>7</sup> Moġeri vavineri tu vanaġivanaġi riba ġevetauni, senaġina guruġa moġonina tu asi ġedoġariani. <sup>8</sup> Iane e Iambre, Aigupito ġeri ġora tarimari, na Mose ġelaulau-ġauato kavana, mai vevaġa-riba ġofaġofa tarimari na guruġa moġonina ġelau-ġauani. Ġia ġeri tuġamaġi tu rakava kwaikwai, ema ġia tu ġeri veġabidadamai asi ġekokoreto, ġeketoto. <sup>9</sup> Senaġi asi beġe raga-kwareġani, korana tarimarima mabarari na ġeri babo beġe ġita-doġariani, Iane e Iambre ġeri ai eġorato kavana.

*Vevaġa-naġi magori*

<sup>10</sup> Senaġi ġoi na tu au ġegu vevaġa-riba guruġari mabarari okorana-iaġirito, ġegu veiġa, ġegu ura tauri, ġegu veġabidadama, ġegu vevaġa-gwaġiġi, ġegu veuravini, ġegu ruġa-gwaġiġi otovotovorito. <sup>11</sup> Ġelai-veġitaguto, ġevaġa-midigu midiguguto, ġegu

midigumidigu maiġeri mabarari au ġegu ai ġeġorato Antioka, e Ikonja, ema Listera ai. Ġevaġa-midigu midiguguto nuġanai avevaġa-gwaġiġito. Vereġauka na moġeri mabarari ġerina eġabi-maġuriguto. <sup>12</sup> Moġoni, Keriso Iesu nuġanai Barau korana-iaġina beġe urani tarimari mabarari tu moġesina beġe vaġa-midigu midigurini. <sup>13</sup> Ma vei-rakava tarimari e ġofaġofa tarimari tu moġesi moġo beġe vei-iaġoni, rakava ġenana rakava lelevaġinai beġea raġasini, tarima tari beġe ġofarini, ema ġia maki Diabolo na beġofarini. <sup>14</sup> Senaġi ġoi tu kara oribaiato ema oġabi-raġeato maniġa moġo bono korana-iaġia. Korana ġevaġa-ribamuto tarimari ġoi tu ma ribamu, <sup>15</sup> ema keimu na beiaġoma maitoma Buka Veaġa guruġari ma ribamu; maiġeri Buka Veaġa guruġari na iaunega beġe vinimuni, benamo Keriso Iesu ġenai boveġabidadamani vevaġa-maġuri ġabiġabina ġana. <sup>16</sup> Buka Veaġa guruġari mabarari tu Barau nuġana na ġeraka-rosito, benamo tarimarima nuġari ai Iauka Veaġa na evaġa-raka-toġarito. Ma ġia tu ma ġeri namo guruġa moġoniri vevaġa-riba-iaġiri ġana, rakava vaġa-foforiri, rakava vaġa-roroġotori ġana, ema dabara iobukaiobukana vevaġa-riba-iaġina ġana. <sup>17</sup> Mo guruġa ġerina Barau ġena tarimarima beġene riba-ginikau, benamo veiġa namori mabarari beġene veiri.

## 4

<sup>1</sup> Barau e Keriso Iesu ġoirari ai avaġa-guruġa gwaġiġimuni. Iesu beġenoġoini ġaronai tu, ġena veġitaġau gaburenai maġuri tarimari e mase tarimari viriġiviriġi bea veivinirini. <sup>2</sup> Barau ġena guruġa bono ġobata-iaġia, ġaro namori ai e ġaro rakavari ai. Tarimarima ġeri veiġa rakavari na bono vaġa-roroġotori, bono kira-feiri, bono launaġiri, bono vaġa-ribari ma vevaġa-gwaġiġimu ġesi. <sup>3</sup> Korana ġaro ta beiaġomani, monai tarimarima na vevaġa-riba moġonina tu asi beġe seġaġi-viniani, a ġeri ura rakavari loriri ai vevaġa-riba tarimari ġutumari ma beġe ġabirini, ġia na ġeuravini-rakavarini guruġari beġene seġaġiri ġana. <sup>4</sup> Guruġa moġonina seġaġi-seġaġina ġenana beġe raka-veġitani, a ġia tu sinasina guruġari vau beġe ura-baregoni. <sup>5</sup> Senaġi ġoi tu bono veġitaġau dagara mabarari ġeri ai, midigumidigu nuġanai bono vevaġa-gwaġiġi, Vari Namona ġobata-iaġina ġauveina bono veia, Barau ġena vetuġunaġi ġauveina mabarana bono ġauvei-iaġi ġitakaua.

<sup>6</sup> Korana au tu dori amaseni, ema au raragu tu bevebubuni noġa vine nanuna Barau ġevarevare-viniani nai ġebubuani kavana. Au ġegu rakaveġita ġarona tu beraġasi. <sup>7</sup> Vetari nuġanai avevaġi-ġitakauto, au ġegu raga-iruiru tu varau bavaġa-koria, ġegu veġabidadama tu roġo aġabi-tariani. <sup>8</sup> Toma ġegu vei-iobukaiobuka korona eveitoretato, etanuni mo Kota baregona ġarona beraġasini nai, Vereġauka, Kota Tarimana Iobukaiobukana, na beviniguni. Dia au moġo, senaġi mo deikara-deikara ġia bema foforini ġaronai ġeura-viniani tarimari maki bevinirini.

## Veġabituġu guruġari

<sup>9</sup> Bono kokore, be au ġegu ai bono iaġoma-ġarimoġi. <sup>10</sup> Korana Dema na tu mai tanobara maġurina euravini-baregoani, benamo au eraga-kwaneguto, Tesalonika ġana eiaġoto. Kreske tu Galatia ġana eiaġoto, ema Tito tu Dalmatia ġana. <sup>11</sup> Luka ġereġana moġo au ġesi. Mareko bono ġoria, ġoi ġesi boġono iaġoma, korana ġia tu ġunaġave e au ġegu ġauvei nuġanai bevaġa-kavaguni riba. <sup>12</sup> Tikiko tu Efeso ġana atuġuato. <sup>13</sup> Ġoi boiaġomani nai tu, auna koudi bono ġwa-kaua, Troas vanuġanai Karpo ġenai araga-kwaneato, ema ġegu buka maki bono ġwa-kauri, dagara baregona tu mamoe e nanigosi kefiri na ġeveirito toretore ġana dagarari, asi bono tuġa-rekwari.

<sup>14</sup> Alesanda, auri eġauvei-iaġirini tarimana, na au evaġa-rakava baregoguto. Mo kara eveiato tu Vereġauka na vau voina beviniani. <sup>15</sup> Ġia ġenai tu tauġemu bono venari, korana ġia tu ġai ġema vevaġa-riba guruġari ekira-fitoġa rakavarito.

<sup>16</sup> Tovotovonai Kota tarimari ǵoirari ai aruǵato nai tu, ta sevigū ai asi eruǵa-tarito, asi evaǵa-kavaguto, mabarari na ǵeraga-kwaneguto. Aǵau-ǵauni, Barau na moǵeri vei-rakava voiri asi bene viniri. <sup>17</sup> Senaǵina Vereǵauka tu au sevigū ai eruǵa-tarito, benamo kokore eviniguto. Moǵesina eveiguto korana tu, Vari Namona au na bana kiraǵi-foforia, benamo irau bese tarimari mabarari na beǵene seǵaǵia ǵana. Ema au tu Barau na laion bokana na evaǵa-maǵuriguto. <sup>18</sup> Vereǵauka na rakava mabarari ǵerina beǵabi-maǵuriguni, ema ǵena Guba Basileia ǵana beǵori-ginikauguni. Ǵia arana bitana vaǵa-raǵea bene iaǵo vanaǵivanaǵi, asi magona. Amen.

*Vevaǵa-namo dokona*

<sup>19</sup> Au ǵegu vevaǵa-namo atuǵuani Priska (o Priskila) e Akwila ǵeri ai, ema Onesiforo ma ǵena numa tarimari ǵeri ai. <sup>20</sup> Erasto tu Korinto ai betanu, ema Trofimo tu Mileto ai baraga-kwaneā, korana ekeveni nai. <sup>21</sup> Bono kokore, be bono iaǵoma-ǵarimoǵi, faraka e iavara ǵueri roǵosi bene ǵabia nuǵanai.

Eubulo, Pude, Lino, e Klaudia ǵeri vevaǵa-namo ǵetuǵuani, ema ekalesia tarikaka mabarari na maki.

<sup>22</sup> Vereǵauka tu ǵoi iaukamu ǵesi bene tanu. Barau ǵena namo e varevare-bara ǵomi ǵemi ai bene tanu.

## PAULO ĠENA TORETORE TITO ĠENA

Tito vaġa-foforina guruġari

Mai fefa tu Paulo na Tito ġereġana ġena etoreato. Mai fefa Paulo tu Roma dibura numana na etoreato. Mai fefa etoreato laġanina tu 64 ma 65 fakari nuġanai ta, mo tu Iesu maki emaseto murinai vau.

Mai fefai siri baregori tu karoa 2:11-14; 3:8.

Paulo na mai fefa etoreato korana ġena ura, 1) Tito bene kiraia, ekalesia doġorori ġorikauri tarimari tu kamasiri bene ġabiri; 2) Tito bene vaġa-ribaia, Barau ġena namo ema varevare-bara nuġanai Barau korana-iaġina maġurina tu aiġesina bene tanu-iaġia; 3) Tito bene launaġia, vevaġa-riba guruġari moġoniri bene vevaġa-riba-iaġiri.

Mai fefa Paulo na tu maiġesina eboioġaiato:

1. Barau korana-iaġina maġurina ekalesia doġorona nuġanai - karoa 1
2. Barau korana-iaġina maġurina numa tatai - karoa 2
3. Barau korana-iaġina maġurina tanobara mabaranai - karoa 3

<sup>1</sup> Au Paulo, Barau ġena vetuġu-naġi tarimagu ema Iesu Keriso ġena apostolo, ġeguna mai fefa eiaġosini. Au tu Barau na etuġuguto, Barau na eġabi-hidirito tarimari ġeri veġabidadamai bana vaġa-kavari, e guruġa ema maġuri moġonina bana vaġa-ribari ġana. Mai guruġa ema maġuri moġonina beġe ribaiani tu, Barau beġe korana-iaġi-korikoriani. <sup>2</sup> Korana monana vauro maġuri vanaġivanaġi beġe tuġamaġi-dadamaġiani e beġe ġabiani. Mai maġuri vanaġivanaġi maġurina maiġa tu tanobara roġosi bene vesina nuġanai veġata, Barau na ekiraġi-toreato. Ġia tu asi eġofaġofani Barauna. <sup>3</sup> Senaġi maitoma vauro Barau tauġena na eġabi-toreato ġaronai tauġena na bema vaġa-foforia. Mai Vari Namona maiġa tu ġita ġera Vevaġa-maġuri Barauna ġena guruġa lorinai au ġegu ġobatai akiraġi-foforiani.

<sup>4</sup> Tito, mai fefa tu ġoi ġemu atore-iaġosiani. Ġoi tu au natugu korikori ġita ġera mai veġabidadama sebona maiġa nuġanai:

Tamara Barau ema Keriso Iesu ġita ġera Vevaġa-maġuri Verena ġerina varevare-bara ema maino ġemu ai bene tanu.

*Tito ġena ġauvei Krete motumotunai*

<sup>5</sup> Au na ġoi Krete ai araga-kwanemuto korana tu, kara maninai roġosi bana veiri dagarari bono veiri ġana. Ema vanuġa baregori mabarari ai ekalesia ġorikauri tarimari tari bono vaġa-ruġari mo akiramuto kavana. <sup>6</sup> Ekalesia ġorikauna tarimana tu veiġa namori moġo eveini, rakava ta ġenai asi boġoitaġoani tarimana. Ġaraġona tu sebona moġo; natuna na Iesu Keriso ġevaġa-moġoniani, asi ġeniara-kava niara-kavani, e asi ġeseġaforeni, ema guruġa veroro asi ġeseġaġini merori. <sup>7</sup> Korana ekalesia eguine-iaġirini tarimana tu Barau ġena ġauvei eġita-ġauani tarimana. Moġesina naima ġia tu veiġa namori moġo bene vei, a rakava ta ġenai asi bene tanu, asi bene kira, ġia tu tarima baregona, benamo tarimarima na tu ġia ġereġana ġena ura moġo beġene korana-iaġia benesi, asiġi. Asi bene baru-ġarimoġi, dia niuniu rakava-rakava tarimana, dia nuġa-ġirima-ġirima tarimana, dia ġofaġofa veiġari ai ġena-ġana eġoitaġoni tarimana. <sup>8</sup> Ġia tu veġabiraġe tarimana, veiġa namori eura-vinirini tarimana, vevaġa-gwaġiġi tarimana, vei-iobukaiobuka e veaġa tarimana, ema nuġa-gwaġiġi tarimana. <sup>9</sup> Guruġa moġonina ġevaġa-ribaiato guruġari bene ġabi-gigitariri, be ġia na moġeri vevaġa-riba moġonina bene ġabi-iaġoa, benamo tarima kotari ma benea launaġiri, e vevaġa-riba moġonina ġekira-fitoġaiani tarimari maki bene vaġa-guruġa gwaġiġiri, be ġeri kerere gaburi beġene ġita-doġariri.

*Krete motumotunai tu vevaġa-riba tarimari ġofaġofari vovoka moġeri*

<sup>10</sup> Guruḡa moḡonina asi ḡekorana-iaḡiani, ḡekira-sirivaḡini tarimari, e guruḡa asi tauri ḡekiraḡirini tarimari, ema vevaḡa-riba babori na tarimarima ḡeḡofarini tarimari tu asisebo maniḡeri. Iuda tarimari fakari ai ekalesia nuḡanai ḡeraka-toḡato tarimari tu maniḡesina ḡeveini. <sup>11</sup> Maniḡeri tarima tu boḡono kira-ḡoiri. Korana ḡia na tu bese mabarari ḡeri veḡabidadama ḡevaḡa-rakavarini. ḡia tu asi ḡere vevaḡa-riba-iaḡiri dagarari ḡevevaḡa-riba-iaḡirini. Ema ḡia mani-ḡeri tu moni e farefare beḡene viniri uranai ḡevei-ḡofakauni. <sup>12</sup> ḡia fakari ai ḡeri peroveta tarimana ta tu maiḡesi ekirato, “Krete tarimari tu vanaḡivanaḡi ḡeḡofaḡofani, boḡa bairi rakava kwaikwairi, ḡubulefi ma boḡeka tarimari.” <sup>13</sup> ḡia ekiraḡirito guruḡana maiḡa tu moḡoni. Moḡa lorinai bono kira-matana matanari, be nuḡari mabarari ḡesi e ma moḡoniri ai beḡene veḡabidadama. <sup>14</sup> Ema Iuda seneri ḡeri sinasina asi beḡene seḡaḡiri, ema Barau ḡena guruḡa moḡonina ḡenana ḡeraka-veḡitani tarimari ḡeri taravatu maki asi beḡene korana-iaḡiri.

<sup>15</sup> Nuḡa namo vedaurea tarimari ḡeri ai dagara mabarari tu namo vedaurea e veiareva. Senaḡi nuḡa asi veiareva ema Keriso asi ḡevaḡa-moḡoniani tarimari ḡeri ai dagara ta tu veiareva asi betanuni. Asiḡina ḡinavaḡi. Korana ḡia tu ḡeri tuḡamaḡi e nuḡari tu rakava kwaikwai bene. <sup>16</sup> Moḡeri tarima ḡekirani, ḡia tu Barau ma ribari ḡetoni, senaḡi ḡeri veiḡa na evaḡa-foforiani, ḡia tu Barau asiḡina ḡinavaḡi ribari. Maiḡeri tarima tu vei-rakava ma kira-sirivaḡi tarimari, ema veiḡa namori veiveiri ḡia ḡeri ai tu gwaḡiḡi foroforo.

## 2

*Vevaḡa-riba moḡonina e iobukaiobukana*

<sup>1</sup> Senaḡi ḡoi na tu vevaḡa-riba moḡonina bono vaḡa-ribari. <sup>2</sup> Tarima ḡaukari bono kirari, nuḡari beḡene ḡabi-tariri, beḡene tuḡamaḡi-roroḡoto e beḡene vevaḡa-gwaḡiḡi. Nuḡari mabarari e ma moḡoniri ḡesi beḡene veḡabidadama, e beḡene veura-vini, ema beḡene ruḡa-gwaḡiḡi. <sup>3</sup> Vavine ḡaukari maki mai vevaḡa-riba sebona moḡo bono viniri. Bono kirari, ḡia ḡeri maḡuri ema veiḡa beḡene vevaḡa. Tarimarima arari asi beḡene vaḡa-rakava-kavari, e asi beḡene niu-babobabo. A ḡia tu veiḡa namori moḡo beḡene vevaḡa-riba-iaḡiri. <sup>4</sup> Benamo ḡia ḡeri mo vevaḡa-riba ḡerina vavine variḡuri na ḡaraḡori ema naturi beḡe ura-vinirini. <sup>5</sup> E beḡe vevaḡa-gwaḡiḡini, Barau ḡoiranai beḡe namo-vedaureani, ema ḡeri numa beḡe ḡita-ḡaurini, ema ḡauveiri maki beḡe vei-ḡinikaurini, ma vavine namori ai beḡe iaḡoni e ḡaraḡori beḡe gubakaurini ema beḡe seḡaḡi-vinirini. Maiḡesi veiḡari beḡe veirini nai tu, Barau ḡena guruḡa tarimarima na asi beḡe kira-fitoḡaiiani.

<sup>6</sup> Tau maraḡa variḡuri maki mai velaunaḡi sebona moḡo bono viniri. Bono kirari, beḡene vevaḡa-gwaḡiḡi. <sup>7</sup> Dagara mabarari veiveiri ai tu ḡoi tauḡemu na vevaḡa-ḡita-iaḡi veiḡari namori bono veiri, be beḡene ḡitari. Bovevaḡa-ribani nuḡanai maki ḡere ai asi bono guruḡa, senaḡi guruḡa moḡoniri, guruḡa korikoriri, <sup>8</sup> ema guruḡa iobukaiobukari bono kiraḡiri, be tarima ta na ḡemu guruḡa asi bene ḡaoa. Moḡesina boveini tu, ḡoi ḡekira-fitoḡamuni tarimari beḡe maiakarini, benamo ḡita iatarai guruḡa rakavana ta asi beḡe kiraḡiani.

<sup>9</sup> Tuḡu-rakaorakao tarimari bono launaḡiri, ḡeri baregori garori beḡene seḡaḡiri ema beḡene vaḡa-verereri ḡeri vetuḡunaḡi mabarari ḡeiaḡo-vinirini nuḡari ai. A asi beḡene guruḡa-vaḡa-voiri bonosi. <sup>10</sup> E bono kirari, ḡeri baregori ḡeri farefare asi beḡene lemalema-vaḡiri. Senaḡi ḡeri veiḡa namori moḡo beḡene vaḡa-foforiri. Ma mo veiḡa namori na ḡeri baregori beḡene vaḡa-ḡitari, ḡia ḡeri ai asi beḡene daradara, senaḡi beḡene tuḡamaḡikau. Maiḡesi beḡe veini tu, ḡita ḡera Vevaḡa-maḡuri Barauna ḡena vevaḡa-riba, tarimarima na tu beḡe vaḡa-raḡeani dabara mabarari nuḡari ai.

<sup>11</sup> Korana Barau ḡena namo e varevare-bara ḡenana vevaḡa-maḡuri eiaḡomato, mo vevaḡa-maḡuri tu tarimarima mabarari ḡeri ai ema foroforo. <sup>12</sup> Barau ḡena namo e varevare-bara na ḡita evaḡa-ribarani, Barau asi takorana-iaḡi korikoriani maḡurina tu bitana fitoḡari. A ḡita mai tanobarai tatanuni tu, vevaḡa-gwaḡiḡi maḡurinai bitana

tanu, veiḡa iobukaiobukari bitana vei ema Barau bitana korana-iaḡi korikoria, <sup>13</sup> ḡaro baregona e namona tanari-taḡoani nuḡanai tu. Ḡita initoma tu Iesu Keriso tanari-taḡoani; ḡia tu ḡita ḡera Barau baregona e ḡera Vevaḡa-maḡuri Tarimana; ḡena iaḡoma ma marevana asikeikeina ḡesi moḡo tanari-vegogo-taḡoani. <sup>14</sup> Iesu Keriso ḡita urarai tauḡena evevinito, ḡita veiḡa rakava kwaikwairi nuḡari na bene voi-vaḡira ḡana uranai. Ema ḡita tu ḡia ḡereḡana ḡena moḡo bene vaḡa-namo vedaureara, benamo bene tore-ḡerevaḡira, ḡena tarimarima namori ai bisini iaḡo, ma ḡauvei namori moḡo veiveiri bisini uradika ḡana.

<sup>15</sup> Ḡoi na tu maiḡeri maḡuri e veiḡa bono vevaḡa-riba-iaḡiri. Ḡemu maoro baregona maniḡa bono ḡauvei-iaḡia, tarimarima bono launaḡiri, ema ḡeseḡaforeni tarimari bono kira-feifeiri. Tarima ta na asi bene kira-fitoḡamu.

### 3

#### Aiḡesi ekalesia ḡere tanu

<sup>1</sup> Ḡemu tarimarima ma bono vaḡa-guruḡari, bono kirari, kini e gavamani ḡeri veḡitaḡau gaburenai beḡene tanu e beḡene seḡaḡi-viniri. Ema vanaḡivanaḡi beḡene venari-taḡo, veiḡa namori beḡene veiri ḡana. <sup>2</sup> Tarima ta ḡenai guruḡa rakavana ta asi beḡene kiraḡia, ta ḡesi asi beḡene vekira o vevane. A ḡia tu manau ai moḡo beḡene tanu ema tarimarima mabarari veiḡa namori moḡo beḡene vei-viniri.

<sup>3</sup> Korana tu ḡita maiḡera maki guinenai tu babo, Barau asi ribara, Barau taseḡaforeviniato-ḡoi, Satani na eḡofarato-ḡoi, be Barau ḡena dabarai asi tarakato-ḡoi. Ḡita moḡeri negari ai tu veiḡa rakavari irauirauri taura-vinirito-ḡoi, e tauḡani korina vaḡa-vererena veiḡari irauirau ḡeri tuḡu-rakaorakao tarimari ai tavevaḡa-iaḡoto. Tarima vaḡa-midigumidiguri e vaḡa-vedaḡa-raḡeri tuḡamaḡiri taḡabito-ḡoi ema tarima ḡeri ai tamamato-ḡoi, baru na tavonuvonu-raḡeto-ḡoi e karora ḡesi taveiau-rakavato-ḡoi.

<sup>4</sup> Senaḡi ḡita ḡera Vevaḡa-maḡuri Barauna ḡena veiau-namo ema ḡena veuravini ḡita tarimara ḡerai ema foforito nai tu, <sup>5</sup> ḡita ema vaḡa-maḡurirato. Ḡita tu dia ḡera vei-iobukaiobuka dainai ema vaḡa-maḡurirato. Asiḡina. Ḡia tauḡena ḡena vevetuḡaḡwai moḡo ema vaḡa-maḡurirato. Eḡuriḡi-matamatarato tamaḡuri-ḡenoḡoito ḡaronai, ema lauka Vevaḡa na ḡera maḡuri ma evaḡa-variḡu ḡenoḡoirito. <sup>6</sup> Mai lauka Vevaḡa tu Iesu Keriso ḡita ḡera Vevaḡa-maḡuri Tarimana ḡenana Barau na ḡita iatarai ebubukauato. <sup>7</sup> Keriso na mai maḡuri eveiato, korana ḡita tu ḡia ḡena namo e varevare-bara ḡenana moḡo vei-iobukaiobuka tarimarai evaḡa-iaḡorato Barau ḡoiranai. Ema maḡuri vanaḡivanaḡi tatuḡamaḡi-dadamaḡiani maḡurina maki Barau na bevinirani, benamo bita ḡabiani.

<sup>8</sup> Mai velaunaḡi guruḡari maiḡeri tu moḡoni korikori. Be au aurani, ḡoi na mai veiḡa namori maiḡeri tarimarima ḡeri ai bono kiraḡi-baregori, be mani Barau ḡenai ḡeveḡabidadamani tarimari maniḡeri tu ḡeri maḡuri beḡene nariri; ema ḡauvei namori ḡeveini maniḡeri tu roḡo beḡene vei-iaḡori. Korana mani veiḡa maniḡeri tu veiḡa namori ema maniḡeri na tarimarima mabarari maki beḡe vaḡa-kavarini. <sup>9</sup> A vedanaḡi babori e tubu ḡata o sene ainana ḡeiaḡomato moḡeri kiraḡi-ginikau ginikauri e veḡareveḡare, ema Mose ḡena taravatu vevaneri mabarari ḡerina tu bono veḡita. Korana maniḡeri na vevaḡa-kava namona ta tu asi bodoḡariani. Mani tu asi tauri dagarari. <sup>10</sup> Ekalesia doḡorona nuḡanai vetavi-kirakira veiḡana eveiani tarimana tu bono kira-toreḡaua, bono kiraia, mo veiḡa asi bene veia. Beseḡaforeni, benamo mo veiḡa roḡo beveiani nai, vaḡa-ruaruana ma bono kira-toreḡaua. Moḡa murinai roḡo eḡiḡiraḡeni nai tu, bono ḡita-fitoḡaia moḡo. <sup>11</sup> Korana maniḡesi vetavi-kirakira veiḡari eveirini tarimana tu bono riba, ḡia ḡena maḡuri tu rakava kwaikwai ema vei-rakava nuḡanai etanuni. Ḡia tu tauḡena ḡena vei-rakava na evaḡa-moḡoniani, ḡia tu moḡoni rakava tarimana.

*Vevaḡa-riba guruḡari magori*

<sup>12</sup> Au na Atemas o Tikiko ġoi ġemu ai batuġu-iaġosiani nai tu, dabara ta bono vetaua, benamo au ġegu ai bono iaġoma Nikopoli ġana. Korana au tu akirato, faraka e iavara ġueri nuġari ai tu monai baġabiani atato bene. <sup>13</sup> Taravatu tarimana Senas e Apolos ġeri dabara bono raga-vei, be bono ragatuġu-iaġomari. Botuġu-iaġomarini nai tu, ġeri ura dagnarari mabarari maki bono vini-ginikauri.

<sup>14</sup> Ġita ġera tarimarima mabarari ġauvei namori veiveiri ai asi beġene biga dabarari bono vaġa-ribari, be beġene ribari. Korana moġeri dabara beġe ribarini nai tu, ġaro vanaġivanaġi ġeri-ġari tu tauġeri beġe ġauveini, benamo beġe ġoitaġoni, ema ġeri ġauvei maki ġwaġwari beġe vetoreni.

<sup>15</sup> Mainai au karogu mabarari na ġemi vevaġa-namo beġe tuġu. Ġema vevaġa-namo maki veġabidadama nuġanai ġai ġeura-vinimani tarimari bono viniri.

Barau ġena namo e varevare-bara ġomi mabarami ġemi ai bene tanu.



## PAULO ĠENA TORETTORE FILEMONA ĠENA

Filemona vaġa-foforina guruġari

Paulo na mai fefa tu Filemona ġena Roma dibura gabuna na etoreato. Mai fefa tu laġani 60 ma 61 fakari nuġanai ta etoreato, mo tu Iesu emaseto murinai vau.

Mai fefa anina baregona tu “Veġabi-raġe ġenoġoi”. Ma siri baregori mai fefai tu siri 15 ema 16.

Paulo na Filemona mai fefa etore-viniato korana tu ġena ura, 1) Filemona bene kiraia, Onesimo ma bene ġabi-raġea tarikaka maġurinai; 2) Filemona bene kira-varaia, ġia tu dibura na dori eraka-rosini, ma beraka-rosini ġaronai tu Filemona bea raka-ġitaiani.

Paulo na Filemona ġena mai fefa tu maiġesina eboioġaiato:

1. Paulo na Filemona evaġa-veiaviato - siri 1-7
2. Paulo na Onesimo iatanai Filemona enoġiato - siri 8-21
3. Veġabituġu ġuruġari ekiraġirito - siri 22-25

<sup>1</sup> Au Paulo, Keriso Iesu ġaramanai diburai atanuni tarimagu, ema tarikakara Timoteo, ġemana eiaġosini.

Ġauvei sebona ġaveiani tarimana e ġatama namona Filemona ġemu atore-vinimuni. <sup>2</sup> Ema tobara Afia, ema ġatara namona, Barau ġena vetari nuġanai iauka rekenai, Arekipo, ema ġoina numai ġevegogoni ekalesiari ġeri atore-vinirini.

<sup>3</sup> Tamara Barau ema Vereġauka Iesu Keriso ġerina maino ema varevare-bara ġemi ai bene tanu.

*Filemona* ġena veuravini ema veġabidadama

<sup>4</sup> Filemona, ġegu Barau atanikiu-viniani ema vanaġivanaġi ġegu ġauġau ai akiraġimuni, <sup>5</sup> korana ġemu veġabidadama Vereġauka Iesu ġenai ema ġemu veuravini Barau ġena veaġa tarimari mabarari ġeri ai aseġaġimuni nai. <sup>6</sup> Moġa lorinai aġuriġurinai ġemu veġabidadama bono vari-fiua tarima tari ġeri ġana, be dagara namori taġaunarini Keriso ġenai taveġabidadamani lorinai, bono riba-ġitakauri. <sup>7</sup> Moġoni, tarikakagu, ġemu veuravini na evaġa-iaku rakavaguto ema elaunaġi-rakavaguto, korana ġoi na veaġa tarimari nuġari ovaġa-kokorerito.

*Paulo* ġena noġinoġi

<sup>8</sup> Au tu nuġagu gwaġiġi Keriso nuġanai ġoi bara kiramu kara boro vei, <sup>9</sup> senaġi veuravini nuġanai moġo anoġimuni ġemu veuravini dainai. Mai tu au, Paulo, baġauka ema Keriso Iesu ġaramanai diburai maiġegu. <sup>10</sup> Onesimo, au natugu, uranai anoġimuni. Ġia tu Keriso nuġanai au natugu ai eiaġoto, korana au roġo dibura numana nuġanai, iaukai ġia tamanai aiaġoto. <sup>11</sup> Guinenai ġia tu asi namo ġoi ġemu ai, senaġina toma vetuġunaġi iaġovininai ġia tu ilaila nai, ġoi na oura-viniani ema au na maki aura-viniani.

<sup>12</sup> Ġia tu au lorugu ġutuna, mai atuġu-iaġosi ġenoġoiani, be bono ġabi-raġea. <sup>13</sup> Au ġegu ura ġia tu mainai bana ġabi-taria au sevigu ai, be ġoi gabumu bene ġabia au bere vaġa-kavagu, au Vari Namona ġaramanai roġo diburai nuġanai. <sup>14</sup> Senaġi ġegu ura ġoi na maoro boro vinigu vau bara ġabi-taria, moġesi naima asi aġabi-tariato. Au asi aurani maki ġoi bana kiramu kara bono veia. Au ġegu tuġamaġi, bema veiġa namori tari au durudurugu ġana bourani veiveiri nai tu, nuġamu sigai moġo bono veiri.

<sup>15</sup> Betaġu ġoi ġemuna Onesimo eveġitato ġaro kotuna anina tu, ma boġabi-ġenoġoiani nai tu, ġoi ġesi bene tanu-vanaġi vanaġi ġana. <sup>16</sup> Dia ġemu tuġu-rakaorakao tarimana asi voina moġo. Asiġina. Moġoni, ġia tu ġemu vetuġunaġi tarimana, senaġi ġia toma tu ġoi tarikakamu moġoninai beiaġo, naima bono ura-vinia. Au na ġia tu anari-ġitakauani nuġagu mabarana ġesi, ema ġoi na maki bouravini-lelevaġiani nuġamu mabarana ġesi. Ġia boura-viniani ema boġabi-raġeani tarima ta ema Vereġauka nuġanai tarikaka ta.

<sup>17</sup> Bema au oġabi-raġeguni ġoi ġatamu, Onesimo maki bono ġabi-raġea au boġabi-raġeguni ilailanai. <sup>18</sup> Bema kerere ta eveiato ġoi ġemu ai o ma ġena ġabitore ġoi

ġemu ai nai tu, au aragu ai bono toreri. <sup>19</sup> Au Paulo ġimagu na mai fefa atoreani. Mo ġabitore tu voiri mabarari bavini-ġenoġoimuni. Ġoi maki ma ġemu ġabitore au ġegu ai. Ġoi maġuri tu au ġeguna oġoitaġoato, senaġi maniġeri tu asi bita kiraġirini. <sup>20</sup> Be, tarikakagu Vereġauka nuġanai, mani ġemu veiġa ġegu noġinoġi bono ġabi-raġea. Ġita taura ruarua tu Keriso nuġanai tatanuni, be bono vaġa-iakugu.

<sup>21</sup> Ġemu seġaġi ai avetuġa-maġikauni nai batore-vinimu. Au ribagu, dia anoġimuni veiġari moġo boveirini, senaġi veiġa namori boruri maki boveini. <sup>22</sup> Dagara ta maia. Ġegu gena daiġutuna ta bono ġabi-torea, korana atuġamaġini, Barau na ġemi ġauġau beġabi-raġeani, be beġabi-iaġosiguni ġemi ai.

*Vevaġa-namo guruġari*

<sup>23</sup> Epafras, Keriso Iesu ġaramanai au ġesi dibura numanai ġatanuni, ġia na evaġa-namomuni. <sup>24</sup> Ema Mareko, Aristako, Dema ema Luka au ġesi ġaġauvei-sebonani tarimari, ġia na maki ġeri vevaġa-namo ġevinimuni.

<sup>25</sup> Vereġauka Iesu Keriso ġena varevare-bara mabarami ġemi ai bene tanu.

## HEBERU

Heberu vaḡa-foforina guruḡari

Mai fefa toretorena tarimana ta tu asi ribana. Tari ḡekirani tu Luka na etoreato, tari ḡekirani tu Apolos, o Banabas, o Priskila, o Akwila, o Paulo na etoreato ḡetoni. ḡutuma ḡekirani tu Paulo ḡetoni korana fefa tu Paulo ḡena fefa tore maḡurinai ḡetoreato. Mai fefa tu laḡani 60 ema 70 fakari nuḡanai ta ḡetoreato, mo tu Iesu emaseto murinai.

Mai fefai siri baregori tu karoa 1:3; 4:14-16.

Mai fefa etoreato tarimana ḡena ura baregona tu, 1) Heberu ekalesiari bene kirari, ekalesia maḡurina korikorinai beḡene tanu, a Iuda ḡeri sene taravaturi ema maḡuriri ḡerina tu beḡene raka-veḡita ma ḡeri ai asi ma beḡene ḡenoḡoi-iaḡo, maḡuri vanaḡivanaḡi asi beḡe doḡariani garina (2:1; 6:4-6; 10:26); 2) Iesu Keriso bene vaḡa-foforia, ḡia tu moḡoni Barau vetoḡana korikori ema foforito tanobarai; 3) Barau ḡena Ginitaḡo Variḡuna Iesu ḡenai emoḡonito moḡa bene vaḡa-fofori ginikaua etato.

Mai fefa tu maiḡesina eboioḡaiato:

1. Vevaḡa-riba-iaḡi guruḡari - karoa 1-10:18
2. Ekalesia tanutanuna maḡuriri - karoa 10:19-13:25

*Barau ḡena guruḡa Natuna ḡenana*

<sup>1</sup> Guinenai, ḡaro vovoka e dabara ḡutumai Barau na peroveta tarimari ḡerina senera evaḡa-guruḡarito. <sup>2</sup> Senaḡi toma, mai ḡaro dokori ai, tu Natuna ḡenana ema vaḡa-guruḡarato. Barau na dagara mabarari tu Natuna eviniato bene ḡaunari. Ema ḡia ḡenana maki Barau na guba e tanobara eveirito. <sup>3</sup> ḡia tu Barau marevana e mamana baregona evaḡa-foforiani, ema ḡia tu Barau tauḡena kavana. ḡia ḡena guruḡa seḡukana na dagara mabarari eḡabi-taḡorini. ḡia tauḡena na ḡera rakava ḡuriḡivaḡiri dabarana evei-ḡitakauato murinai, Barau Iaru-korokoro aroribanai ea tanu-tarito gubai.

*Barau Natuna tu barego vedaurea, aneru maki evanaḡirito*

<sup>4</sup> Barau na Natuna tu etore-varaḡeato, aneru evanaḡirito. Korana tu arana eviniato maki varaḡe lelevaḡina, aneru arari evanaḡirito. <sup>5</sup> Korana Barau na aneru ta tu asi ekiraiato, ekirato,

“ḡoi tu au Natugu,  
toma au tu ḡoi Tamamu ai baiaḡo.”

O maiḡesi maki asi ma ekiraiato, ekirato,

“Au tu ḡia Tamanai baiaḡoni,  
ema ḡia maki au Natugu ai beiaḡoni.”

<sup>6</sup> Ema Barau na Natuna guinena tanobara ḡana ma beḡori-iaḡomaiani nai tu bekirani,  
“Barau ḡena aneru mabarami na boḡono toma-rakariḡo vinia.”

<sup>7</sup> Aneru ekiraḡirito nai tu ekirato,  
“Barau na ḡena aneru eveirito iavara kavana,  
ḡena vetuḡunaḡi tarimari karava emoreni noḡa.”

<sup>8</sup> Senaḡina Natuna ekiraḡiani tu ekirani,  
“Barau o, ḡoi ḡemu Vere dagina tu betanu-vanaḡi vanaḡini,  
ḡemu Basileia tu ma iobukaiobukamu ḡesi oḡori-kauani.

<sup>9</sup> Vei-iobukaiobuka tu oura-vinirini,  
ma veiḡa rakavari tu asi oura-vinirini.

Moḡa lorinai, Barau o,  
ḡemu Barau na maki karomu fakari ai ḡoi eḡabi-viriḡimuto,  
debamu ai diḡa esisiato,  
iaku na evaḡa-vonumuto.”

<sup>10</sup> Ema ma ekiraiato, ekirato,  
“Vere o, tovotovonai tu

gōi na tanobara oveiato,  
ema guba maki gōi gīmamu veiveina.

<sup>11</sup> Gīa tu beḡe korini,  
senaḡi gōi tu botanuni;  
mabarari dabuḡa kavana beḡe rakavani.

<sup>12</sup> Gōi na koudi noḡa boiokurini,  
dabuḡa kavana vetoḡari beḡe irauni,  
senaḡi gōi vetoḡamu tu asi beirauni,  
ema gōi ḡemu maḡuri laḡaniri maki  
asi beḡe magoni.”

<sup>13</sup> Barau na aneru ta maki asi ekiraiato,  
“Aroribagu ai noma tanu,

bene iaḡo mo, gōi ḡevetari-vinimuni tarimari gōi kwakumu fanakauna dagananai  
batore-taririni.”

<sup>14</sup> Aneru mabarari tu vetuḡunaḡi iaukari moḡo, Barau na etuḡurito deikara vevaḡa-  
maḡuri beḡe ḡabiani tarimari vaḡa-kavari ḡana.

## 2

### *Vevaḡa-maḡuri baregona*

<sup>1</sup> Moḡa lorinai kara taseḡaḡirito guruḡari tu tana ḡabi-gigitariri, asi namo ḡerana  
beḡe rekwerekwani, benamo taiaḡo-viniani gabuna bita leaiani. <sup>2</sup> Korana aneru na ḡita  
senera ḡeri ḡevari-fiurito guruḡari tu moḡoni veḡata, ma mo guruḡa moḡeri ḡekira-  
sirivaḡi-iaḡirito e asi ḡekorana-iaḡirito tarimari tu ḡeri vei-rakava ilailari ai metona  
ḡeḡabiato, <sup>3</sup> a ḡita tu kamasi bita raga-maḡurini, bema mai vevaḡa-maḡuri baregona  
bita ḡita-ḡuiragiani nai tu? Mai vevaḡa-maḡuri tu tovotovonai Vereḡauka tauḡena na  
evari-fiuato. Moḡa murinai tu ḡeseḡaḡiatio tarimari na ḡai ḡema-kiravaramato mo tu  
moḡoni. <sup>4</sup> Barau na maki evaḡa-moḡoniato vetoḡa boruri ai, e nuḡa-farevaḡi veiḡari ai,  
e seḡuka veiḡari boruri dabara irauirauri ai, ema Iauka Veaḡa ḡena varevare dagarari  
na. Mo Iauka Veaḡa ḡena varevare dagarari tu Barau ḡena ura lorinai veḡabidadama  
tarimari evinirito.

### *Iesu na vevaḡa-maḡuri gabuna ḡana eḡori-iaḡorani*

<sup>5</sup> Mo tanobara beiaḡomani ḡai na ḡakiraḡiani tu Barau na dia aneru ḡeri veḡitaḡau  
gaburenai etoreato. <sup>6</sup> Senaḡina Buka Veaḡa nuḡanai gabu tai tarima ta evarifiuto,  
ekirato,

“Barau o, tarimarima tu dei,  
be gōi na otuḡamaḡi-gwaḡiḡiani?

O Tarimarima Natuna tu dei,  
be gōi na oraka-ḡitaiani?

<sup>7</sup> Gōi na kota otore-variḡoato aneru gabureri ḡana;  
murinai mareva baregona e vegubakau koronana ḡenai otore-kauato,

<sup>8</sup> ema dagara mabarari ḡia kwakuna gaburenai otorerito.”

Korana Barau na dagara mabarari tu ḡia ḡena veḡitaḡau gaburenai etorerito. Moḡoni,  
Barau na dagara ta tu asi etore-ragakwaneato, ḡia ḡena veḡitaḡau gabuna murikanai.  
Senaḡina maitoma dagara mabarari tu dia ḡia ḡena veḡitaḡau gaburenai taḡitarini.

<sup>9</sup> Senaḡi Iesu taḡitaiani, ḡia tu Barau na mo faka kotunai etore-variḡoato aneru gabureri  
ḡana, korana Barau ḡena varevare-bara ḡenana tarimarima mabarari urari ai bene mase.  
Toma Iesu tu taḡitaiani, iatanai Barau na mareva e vegubakau baregona etore-kauato,  
korana tu midigumidigu ai emaseto.

<sup>10</sup> Dagara mabarari eveirito e eḡaunarito Barauna, ḡena ura tu Iesu roḡo midigumidigu  
ḡenana asi vetoukaunai bene iaḡo-guine. Moḡa murinai vauro natuna ḡutumari ma bene  
ḡori-iaḡomari, benamo ḡia marevana e mamana baregona beḡene ḡabia. Barau ḡenai

dabara roroḡotona sebona tu moḡa moḡo. Korana Iesu tu Barau natuna ḡeri vevaḡa-maḡuri tarimana baregona. <sup>11</sup> Tarimarima evaḡa-veaḡarini tauna, Iesu, ema Iesu na evaḡa-veaḡarito tarimari Tamari tu sebona. Moḡa lorinai Iesu tu asi emaiakaiani mo evaḡa-veaḡarito tarimari ekiraḡirini ḡia tarikakana. <sup>12</sup> Ḡia na Barau ekiraiani, ekirani, “Ḡoi aramu tu au tarikakagu ḡeri ai bakiraḡi-foforiani; ekalesia nuḡanai ḡoi mari ai bavonevone-raḡemuni.”

<sup>13</sup> Ma ekirato,

“Barau ḡenai baveḡabidadamani.”

Ema ma ekirato maki,

“Au tu maiḡegu Barau na eviniguto doḡorona natuna ḡesi.”

<sup>14</sup> Korana Barau natuna mabarari tu ma viriḡori e ma rarari nai, ḡia tauḡena maki ḡia ilailari ai eiaḡoto. Moḡesi eveito korana tu, ḡena mase ḡenana mase seḡukana eḡabi-taḡoani tarimana, Diabolo, bene vaḡa-rakavaia ḡana. <sup>15</sup> Ema tarimarima deikara ḡeri maḡuri nuḡanai mase garina na eḡuḡuvirito bene vaḡa-maḡuriri ḡana. <sup>16</sup> Moḡoni, Iesu na tu dia aneru evaḡa-kavarito, senaḡi Aberahamo besena. <sup>17</sup> Moḡa lorinai Barau na Iesu tu dabara mabarari ai tarina doḡoro ilailari ai eveirito. Korana mo dabarai vau vevetuḡaḡwa e vetuḡamaḡikau Rubu Veaḡa verena baregonai beiaḡoni. Ema Barau vetuḡunaḡina beiaḡo-vinini, tarimarima ḡeri rakava na bene voi-vaḡiri ḡana. <sup>18</sup> Korana Iesu tauḡena na veribaḡani midigumidiguna mamina eḡabiato, toma kamara deikara veribaḡani beḡoitaḡoni nai tu bevaḡa-kavaiani riba.

### 3

*Iesu ḡena seḡuka na Mose ḡena seḡuka evanaḡiato*

<sup>1</sup> Moḡa lorinai, tarikakagu veaḡami, ḡomi tu Barau na ekeamito guba na. Ḡemi tuḡamaḡi boḡono tore-gwaḡiḡia Iesu ḡenai. Ḡia tu Barau na etuḡuato Rubu Veaḡa verena barana. Ḡita na tu ḡia takiraḡi-foforiani. <sup>2</sup> Iesu tu Barau na evaḡa-ruḡaiato Rubu Veaḡa verena. Ema ḡia tu ma ḡena vetuḡamaḡikau Barau ḡenai, ilailana Mose ma ḡena vetuḡamaḡikau Barau ḡena numai kavana. <sup>3</sup> Numa eragaiani tarimana tu ḡegubakau-baregoani, a eveiani numana tu ḡegubakau-keiani. Moḡesi kavana Barau na Iesu tu mareva baregona eviniato, Mose na eḡabiato marevana evanaḡiato. <sup>4</sup> Numa mabarari tu ma ragaragari tarimari, senaḡina dagara mabarari veiveiri tu Barau ḡereḡana. <sup>5</sup> Mose tu vetuḡunaḡi-iaḡovini tarimana, ḡia ma ḡena vetuḡamaḡikau Barau ḡena numai. Ema ḡena ḡauvei tu ḡoirai Barau na kara bekiraḡirini guruḡari ekiraḡi-foforirito-ḡoi. <sup>6</sup> Senaḡina Keriso, Barau Natuna, tu Barau ḡena numa eḡita-ḡauani. Ḡita tu ḡia ḡena numa, bema ma kokorera e ma iakura ḡesi taveiavi-iaḡiani tuḡamaḡikaunai bita veḡabi-gwaḡiḡini beiaḡoni mo magona.

*Barau ḡena tarimarima ḡeri iaḡaraḡi*

<sup>7</sup> Moḡa lorinai Iauka Veaḡa ekirani kavana bitana vei, maiḡesi ekirani, “Toma bema Barau garona boḡo seḡaḡiani nai tu,

<sup>8</sup> nuḡami asi boḡono vaḡa-gwaḡiḡi foroforori, senemi tanobara fakanai veribaḡani ḡaronai ḡeseḡaforeto kavana.

<sup>9</sup> Oba, tamami na laḡani gabana vasivasi (40) tanobara fakanai ḡegu ḡauvei ḡeḡitaiato, senaḡina ḡeribaḡaniguto e ḡevaḡa-uraguto.

<sup>10</sup> Moḡa lorinai mo bese abaru-vinirito,

benamo akirato, ‘Ḡia nuḡari tu vanaḡivanaḡi au ḡeguna ḡeveḡitani, ema au ḡegu veiḡa maki asi ḡeribarini.’

<sup>11</sup> Moḡa lorinai ma barugu ḡesi aguruḡa-foforito,

‘Ḡia au ḡegu iaḡaraḡi ai tu asi beḡe raka-toḡani.’”

<sup>12</sup> Tarikakagu mabarami, boḡono venari. Asi namo tarikaka ta ḡomi fakami ai loruna ḡutunai vei-rakava betanuni, ema Barau ḡena guruḡa asi bevaḡa-moḡoniani, benamo maḡuri Barauna ḡenana beraka-veḡitani. <sup>13</sup> Toma mai ḡaro maiḡa Barau ekirani,

“Tomaḡaro” etoni ḡiranai, karomi tata ḡesi boḡono velaunaḡi, be vei-rakava ḡena ḡofaḡofa na ta nuḡamu asi bene vaḡa-gwaḡiḡia. <sup>14</sup> ḡita tu Keriso ḡesi tasebonato, bema tovotovonai taḡabi-raḡeato veḡabidadamana moḡa bita ḡabitari-gwaḡiḡiani beiaḡoni mo magona. <sup>15</sup> Buka Veaḡa ekirani kavana,

“Tomaḡaro ai bema garona

boḡo seḡaḡiani nai,

nuḡami asi boḡono vaḡa-gwaḡiḡiri,

guinenai ḡomi senemi seḡafore ai ḡeveito kavana.”

<sup>16</sup> Dei na tu Barau garona ḡeseḡaḡiatio, senaḡi ḡena guruḡa ḡekira-fitoḡarito, benamo ḡevaḡa-baruato? Mo tu Mose na Aigupito na eḡori-rosirito tarimari mabarari, ene?

<sup>17</sup> Ema deikarari tu Barau na mo laḡani gabana vasivasi (40) nuḡanai ebaru-vinirito? Tarimari tu moḡeri, rakava ḡeveito, benamo tano fakanai ḡeketoto, benamo ḡemaseto, ene? <sup>18</sup> Ema Barau na tu deikarari ekirarito, ekirato, “Au ḡegu iaḡaraḡi gabunai tu asi beḡe raka-toḡani.” ḡeseḡaforeto tarimari ekirarito, ene? <sup>19</sup> Moḡa lorinai ḡita taribani, ḡia tu asi ḡeraka-toḡato, korana Barau asi ḡevaḡa-moḡoniatto-ḡoi nai.

#### 4

<sup>1</sup> Barau ḡena iaḡaraḡi ai bita raka-toḡani guruḡatorena tu roḡo eruḡa-taḡoni. Moḡa lorinai bitana venari, ḡita fakarai ta mo iaḡaraḡi ai asi beraka-toḡani garina. <sup>2</sup> Korana mo Vari Namona ḡita ḡera ḡeḡobata-iaḡiatio tu Isaraela tarimari ḡeri maki ḡeḡobata-iaḡiatio. Senaḡi mo guruḡa ḡeseḡaḡirito ḡerina namo ta asi ḡeḡoitaḡoato, korana tu ḡeseḡaḡirito moḡo, ma asi ḡevaḡa-moḡonirito.

<sup>3</sup> Senaḡi ḡita Barau tavaḡa-moḡoniani tarimara tu, mo iaḡaraḡi ai bita raka-toḡani ḡena guruḡa ilailanai, ekirato,

“Au ḡegu baru ai kiraḡitore guruḡana gwaḡiḡina akiraḡi-foforiato, akirato,

‘Au ḡegu iaḡaraḡi ai tu

asi beḡe raka-toḡani.’”

Moḡoni, Barau tu moḡesi ekirato, senaḡina ḡia na tanobara eveiato nai, ḡena ḡauvei mabarari tu varau evaḡa-koririto. <sup>4</sup> Gabu tai Buka Veaḡa nuḡanai ḡaro vaḡa-imaime ruaruana (7) ekiraḡiatio nai tu, maiḡesina ekirani, “ḡaro vaḡa-imaime ruaruana (7) Barau tu ḡena ḡauvei mabarari ḡerina eiaḡaraḡito.” <sup>5</sup> Ema mai vau bita kiraḡia gabunai maki ekirato, “ḡia au ḡegu iaḡaraḡi ai tu asi beḡe raka-toḡani.”

<sup>6</sup> Senaḡina tari mo iaḡaraḡi ai beḡe raka-toḡani guruḡatorena tu roḡo eruḡani gabunai. Ma Isaraela tarimari, Vari Namona ḡeseḡaḡi-guineato tarimari, tu mo iaḡaraḡi ai asi ḡeraka-toḡato, korana tu ḡeseḡaforeto nai. <sup>7</sup> Moḡa lorinai Barau na ḡaro ta ma eḡabi-viriḡiatio, “Tomaḡaro” ekiraḡiatio. Ma laḡani vovoka ḡekorito murinai, Barau, Davida ḡenana maiḡesi eguruḡato, ekirato,

“Toma, bema Barau garona

boḡo seḡaḡiani nai,

nuḡami asi boḡono vaḡa-gwaḡiḡiri.”

<sup>8</sup> Bema Iosua na iaḡaraḡi bere viniri, Barau na moḡa murinai iaḡaraḡi ḡarona ta tu asi ma bere kiraḡia. <sup>9</sup> Moḡa lorinai Barau ḡena tarimarima ḡeri iaḡaraḡi tu roḡo ḡoirai eruḡa-taḡoni. <sup>10</sup> Korana Barau ḡena iaḡaraḡi ai eraka-toḡani tarimana tu ḡena ḡauvei na eiaḡaraḡini, ilailana Barau ḡena ḡauvei na eiaḡaraḡito kavana. <sup>11</sup> Moḡa lorinai sikokore, Barau ḡena iaḡaraḡi ai tana raka-toḡa uranai. Ma ḡita fakarai ta asi bene keto, guinenai ḡeseḡaforeto tarimari kavari.

<sup>12</sup> Barau ḡena guruḡa tu maḡuri e ma seḡukana. Matana maki raga-rakava, vetari baḡana ta matana ruarua maki evanaḡiatio, erakatoḡa-korikorini maḡuri ma iauka vekaravarina, ema turiḡa komukumuri ruarua ḡeraga-sebonato vekaravarina. Tarima loruna ḡutuna ḡena ura e tuḡamaḡi maki eriba-viriḡiani. <sup>13</sup> Barau na eveirito dagarari mabarari tu ta asi vekuretoḡa ḡia matanai. Ema ḡia ḡoiranai ḡita mabarara ḡera maḡuri bita vari-fiurini.

*Iesu Rubu Veāgā* verena barego vedaureana

<sup>14</sup> Barau Natuna Iesu tu gīta gēra Rubu Veāgā verena barego vedaureana; gīa tu guba eraka-vanaḡirito. Moḡa lorinai gēra veḡabidadamai tana veḡabi-gwaḡiḡi. Mo tu gīta na takiraḡi-foforiani veḡabidadamana. <sup>15</sup> Gīta gēra Rubu Veāgā verena baregona tu gīta gēra moiramaira gīa na maki emami-raḡirini. Korana tu gīa maki gēnai veribaḡani irauirau mabarari ḡefoforito gīta gērai kavana. Senaḡi gīa tu asi evei-rakavato. <sup>16</sup> Moḡa lorinai ma kokorera ḡesi Barau gēna namo e varevare-bara terona ḡana siraka-kavi-iaḡo. Monai Barau gēna vevetuḡaḡwa bitana ḡabia, ema gēna varevare-bara tana ḡoitaḡoa, be bita ura-viniani nai, bene vaḡa-kavara.

## 5

<sup>1</sup> Rubu Veāgā vereri baregori mabarari tu tarimarima fakari na Barau na eḡabi-viriḡirito, benamo evaḡa-ruḡarito, tarimarima arari ai Barau gēna ḡauvei beḡene veia ḡana. Gīa gēri ḡauvei tu tarimarima gēri rakava voi-vaḡiri ḡana varevare dagarari Barau beḡene vinia ema boromakau, mamoe, e manu beḡene vaḡiri, benamo beḡene gaburi, Barau na bonari bene noḡori ḡana. <sup>2</sup> Rubu Veāgā verena baregona tauḡena maki ma ḡena moira gaburi, naima gīa na asi ribari tarimari ema Barau gēna dabara na ḡeraka-veḡitani tarimari bevetuḡa-ḡwarini riba. <sup>3</sup> Gīa tauḡena maki ma ḡena moira lorinai, gīa na rakava voi-vaḡiri varevareri tu gīa gēna evinini, ema tarimarima gēri maki evinini.

<sup>4</sup> Rubu Veāgā verena baregona dagina eḡabini tarimana tu arana barego. Tarima ta na mai ginitaḡo ḡauveina tauḡena na asi beḡabi-kavaiani, senaḡi gīa tu Barau na bene keaia vau, vaḡa-ilailana Arona ekeaiato kavana.

<sup>5</sup> Keriso maki moḡesi, dia tauḡena eveḡabi-varaḡeto Rubu Veāgā verena baregonai evetoreto, senaḡina Barau na evaḡa-ruḡaiato, ekiraiato, ekirato, “Goi tu au Natugu, toma au tu ḡoi Tamamu ai baiaḡo.”

<sup>6</sup> Gabu tai maki ekirani,  
“Goi tu Rubu Veāgā verenai  
botanu-vanaḡi vanaḡini  
Melkisedek kavana.”

<sup>7</sup> Iesu tanobarai etanuto-ḡoi ḡarori ai tu ma taḡi-koḡokoḡona ema matana ma nanuri ḡesi Barau gēnai eḡuriḡurito-ḡoi, ema enoḡi-raḡeto-ḡoi. Korana tu Barau na ḡereḡana na moḡo mase gēnana bevaḡa-maḡuriani. Barau na eseḡaḡiato, korana tu ma vegubakauna ḡesi Barau garina eveito-ḡoi nai. <sup>8</sup> Gīa tu Barau Natuna, senaḡi gēna midigumidigu na vau seḡaḡi dabarana eribaiato. <sup>9</sup> Enamo-vedaureato murina vau, gīa beḡe seḡaḡi-viniani tarimari mabarari gēri maḡuri vanaḡivanaḡi vaḡa-ḡorana tarimanai eiaḡoto. <sup>10</sup> Ema Barau na evaḡa-ruḡaiato Rubu Veāgā verena baregona Melkisedek kavana.

*Asi boḡono* mero-kaukau

<sup>11</sup> Gīa varina tu vovoka bita kiraḡirini, senaḡina moḡeri kiraḡi-viriḡiviriḡiri tu gwaḡiḡi, korana ḡomi tu asi ḡotuḡamaḡi-faka ḡarimoḡini. <sup>12</sup> Mai nega mainai ḡomi tu vevaḡa-riba tarimami ai ḡoro iaḡo, be ḡoro vevaḡa-riba-ḡoi. Senaḡina ḡomi tu roḡo ḡourani ta na Barau gēna guruḡa moḡoniri korari na ma bene vaḡa-ribami ḡotoni. Gomi tu roḡo lata ḡourani, ḡaniḡani gwaḡiḡiri tu asiḡina. <sup>13</sup> Deikara lata roḡo eruruni tu roḡo mero keina. Gīa tu veiḡa iobukaiobukari ema veiḡa asi roroḡotori vetoḡari tu roḡo asi ribana. <sup>14</sup> A ḡaniḡani gwaḡiḡiri tu tarima baregori ḡari. Gīa na tu ḡeḡauvei-iaḡi vanaḡivanaḡirini. Geḡauvei-iaḡirini ḡarori ai tu tauḡeri maki ḡevevaḡa-ribani namo e rakava vetoḡari beḡene ḡita-leari ḡana.

## 6

<sup>1</sup> Moḡa lorinai namona tu Keriso gēna vevaḡa-riba guruḡari tovotovonai riba guineri ḡeḡorani dagarari tu si-iaḡuiri. Benamo gīa gēna vevaḡa-riba baregori ḡana si-iaḡo.

Tovotovonai riba guineri ġeġorani dagarari moġo asi bitana vevaġa-riba-iaġi ġenoġoi-ġenoġoiri. Mo tu vei-rakava ġerina tuġamaġi-kure ma raka-kure e Barau ġenai veġabidadama. <sup>2</sup>Babatiso vevaġa-ribari e ġima tarima iatari ai torekau, mase na variġisi-ġenoġoi e vevaġa-roroġoto vanaġivanaġi. <sup>3</sup>Moġa tu bita veiani bema Barau na bevaġa-moġoniani nai.

<sup>4</sup>Bema tarima ta ġena veġabidadama beraga-kwaneani tu, kamara dabarai ma bevetuġamaġi-kureni? Ġia nuġana tu evaġa-mamaiato, ema guba na eiaġomato varevarena emami-tovoato, ema lauka Veaġa maki eġabiato. <sup>5</sup>Ema Barau ġena guruġa namona edoġariato e vau ma beiaġomani tanobarana seġukari maki emamirito. <sup>6</sup>Bema ġia veġabidadama na ma beketo-veġitani, ġia tu Barau Natuna ma evaġa-satauro ġenoġoiani, ema ġutuma barai ma etore-rosiani e evaġa-maiakaiani. Ġia ma novaġa-vevetuġamaġi-kurea ġana tu asi dabarana ta.

<sup>7</sup>Ġaro vovoka ġura eraguni, benamo tano na mo nanu erimaiani. Benamo bema mo tano iatanai ġevaroni tarimari ġari ġaniġani namori bevaġa-ġorarini nai tu, Barau na mo tano namo beviniani. <sup>8</sup>Senaġina ġau ma giniri ema ġauġa ma ġiniġiniri evaġa-gararini tanona tu asi ġena namo; Barau na mo tano bekiraġiani tu tano rakavana, ema dokonai tu begabuani.

<sup>9</sup>Ġatagu mabarami, moġoni, maiġesina ġavaġa-guruġa gwaġiġimini, senaġina ġatuġamaġi-gwaġiġini, ġomi tu namo baregona ema vevaġa-maġuri boġoa ġoitaġoani. <sup>10</sup>Barau ġena veiġa tu asi ġeġeva. Barau ġemi ġauvei ema ġia arana ġoura-viniani nai, ġena tarimarima ġovaġa-kavarito ema initoma roġo ġovaġa-kavarini tu asi betuġa-rekwarini. <sup>11</sup>Ġai ġema ura baregona tu ġomi tata maniġesi moġo boġono ġauvei-kokore-iaġo, ġemi tuġamaġikau beġenea moġoni bene iaġo mo dokonai. <sup>12</sup>Be asi beġene ġubulefimi, senaġina mo tarimarima ġeri veġabidadama e ġeri vevaġa-gwaġiġi ġerina mo kiraġitore ġeġabiani, boġono tovotovori.

#### *Barau ġena kiraġitore*

<sup>13</sup>Barau ġena kiraġitore guruġana Aberahamo ġenai eveiato tu tauġena aranai eguruġa-toreto, korana tu tarima ta ma asi varaġe ġia iatanai, aranai beguruġa-toreni lorinai. <sup>14</sup>Ekirato, “Moġoni, ġoi tu bavaġa-namomuni ema besemu ġutuma bavanimuni.” <sup>15</sup>Benamo Aberahamo evevaġa-gwaġiġito, asi eġubulefito mo Barau na ekiraġi-torerito dagarari ġenai ġefoforito.

<sup>16</sup>Tarimarima guruġatore gwaġiġiri mabarari ġeveini nai tu, tarima baregona ta ġia iataraġeri ai aranai ġeguruġa-toreni. Monana mo guruġa-tore guruġana gwaġiġina evaġa-moġoniani, benamo veġareveġare guruġari mabarari elauġaurini. <sup>17</sup>Guinenai Barau ġena kiraġitore tu guruġatore guruġana gwaġiġinai eveiato. Korana ġia ġena ura ġia na kiraġitore beġe ġaunaiani tarimari beġene riba-ginikau, ġia ġena kiraġitore tu asi bevekefoni. <sup>18</sup>Mo guruġatore ruarua tu beġe tanuni, asi beġe vekefoni. Ema mo dagara ruarua ġerina ġita taribani, Barau tu asi beġofaġofani riba. Be ġita deidei rakava ġenana taraga-veġitato, benamo Barau ġenai taiaġomato tarimara tana kokore-korikori, be mo tuġamaġikau ġoirarai eruġa-taġoni tana ġabia. <sup>19</sup>Mo tuġamaġikau taġabiato tu ġita ġera maġuri eġabi-tariani dagarana. Mai tuġamaġikau tu moġonina e asi eirauni. Ġia tu vekouġau dabuġana na murina ġana eraka-toġani, eiaġoni mo, veaġa lelevaġi daiġutuna nuġana ġana. <sup>20</sup>Mo ġana tu Iesu eiaġo-guineto ġita bene vaġa-maġurira uranai. Ġia tu Melkisedek ġena dabarai Rubu Veaġa verena baregonai betanu-vanaġi vanaġini.

## 7

#### *Melkisedek tu Rubu Veaġa verena baregona*

<sup>1</sup>Mai Melkisedek tu Salem vanuġa barana verena, ema ġia tu Iaru-korokoro Barauna ġena Rubu Veaġa verena. Ġia na Aberahamo edoġariato, vanuġa barari ġeri vere baregori o kini tari vetari ai evaġirito, benamo eġenoġoito-ġoi nuġanai, Aberahamo evaġa-namoato. <sup>2</sup>Ema Aberahamo na vetari ai eġabirito farefareri, karava gabanana (10)



eveirito, benamo karava ta Melkisedek eviniato. Melkisedek arana anina giniguinena tu “Veiġa Iobukaiobuka Verena”, ma arana ta tu “Salem Verena”, moġa anina tu “Maino Verena”.<sup>3</sup> Ġia asi tamana, asi sinana, asi besena ta, ema ġena maġuri evesinato ġarona e ġena maġuri emagoto ġarona maki asiġina. Ġia tu Barau Natuna kavana etanuni, Rubu Veaġa verena vanaġivanaġi.

<sup>4</sup> Melkisedek ġoġitaia, ġia tu tarima arana barego lelevaġi, korana Aberahamo tu senera baregona na maki vetari ai eġabirito farefareri karava gabanana (10) ġerina ta ġia eviniato. <sup>5</sup> Taravatu ekirani, Levi besena Rubu Veaġa verena dagina beġe ġabiani tarimari tu karava gabanana ġerina ta beġene gogo Isaraela tarimari ġerina, mo tu tarikaka ġerina. Moġoni, tarikakari maki Aberahamo ġena bese tarimari, senaġina ġia ġerina beġene gogo. <sup>6</sup> Melkisedek senena tu dia Levi ġenana eiaġomato, senaġina Aberahamo ġenana karava ta eġabiato. Ma ġia na Barau ġena kiraġitore eġabiato tarimana evaġa-namoato. <sup>7</sup> Asi bita daradara-iaġiani, tarima baregona na tarima keina vevaġa-namo eviniani. <sup>8</sup> Levi senena, karava gabanana ġerina ta ġeġabiato doġorori, tu ma ġemaseto-ġoi. A Melkisedek na maki karava ta eġabiato, senaġi ġia tu Buka Veaġa na ekiraġiani asi emaseto. <sup>9</sup> Benamo maiġesi ma nakira, Levi maki karava gabanana ġerina ta ġeġabiato-ġoi tarimana. Ġia na Aberahamo ġenana Melkisedek karava ta ma evini-ġoiato.

<sup>10</sup> Korana Melkisedek na Aberahamo eġoitaġoato ġaronai tu, Levi tu roġosi roġo bene maġuri, roġo ġatana Aberahamo tauġaninai.

#### *Iesu tu Melkisedek kavana*

<sup>11</sup> Guinenai Barau na Isaraela tarimari taravatu evinirito. Mo taravatu ekirani, Levi besena na ginitaġo veaġa ġauveina beġene veia. Senaġi bema Levi besena ġeri Rubu Veaġa verena ġenana e ġeri ġauvei seġukana na mo namo vedaurea beġere ġabia nai tu, kara dainai Barau tu ma ekirato, Rubu Veaġa verena ta ma betuġuani Melkisedek ilailanai, ma dia Arona kavana? <sup>12</sup> Korana bema ginitaġo ġauveina ġeveiani tarimari ġeri doġoro ġesenisito nai tu, taravatu maki besenisini. <sup>13</sup> Korana Iesu mai takiraġiani tarimana tu irau doġoro. Ġia ġena doġoro tarimana ta fata veaġana iatanai ginitaġo ġauveina asi eveito. <sup>14</sup> Korana ribara, ġita ġera Vereġauka tu Iuda besena na emaġurito. Ma Mose na Rubu Veaġa vereri ekiraġirito-ġoi nai tu, Iuda doġorona tu asi ekiraġiato.

<sup>15</sup> Ema kara bita kiraġia toma tu bita ġitafaka-ginikauani, korana Rubu Veaġa verena ta ma befori Melkisedek kavana. <sup>16</sup> Ġia tu dia senena kavari, taravatu seġukanai Rubu Veaġa verenai eiaġoto, senaġina maġuri vanaġivanaġi ġenana eiaġomani seġukana na Rubu Veaġa verenai eiaġoto. <sup>17</sup> Korana Barau na maiġesi ekiraiato, ekirato, “Ġoi tu Rubu Veaġa verenai botanu-vanaġi vanaġini Melkisedek kavana.”

<sup>18</sup> Mo taravatu guinena tu etore-veġitaia, korana ġia tu asi seġukana ema asi bevevaġa-maġurini riba. <sup>19</sup> Korana Mose ġena taravatu na dagara ta tu asi evaġa-namo vedaureaiato. Moġesina naima Barau na tuġamaġikau lagilagina ta ma etore-rosiato, moġa ġenana ġita Barau sevina ġana bita raka-kavini.

<sup>20</sup> Barau na Iesu tu guruġatore guruġana gwaġiġina eveiato vau, Rubu Veaġa verenai etoreato! A Rubu Veaġa vereri mabarari ġeri ai tu guruġatore ta asi eveiato. <sup>21</sup> Senaġi Iesu Rubu Veaġa verenai eiaġoto tu Barau na guruġatore gwaġiġina eveiato vau. Barau na maiġesi ekiraiato, “Vereġauka tu eguruġa-foforito ma ġena tuġamaġi asi ma bekefoani:

‘Ġoi tu Rubu Veaġa verenai botanu-vanaġi vanaġini.’ ”

<sup>22</sup> Mai guruġatore guruġa gwaġiġina lorinai, Iesu tu ginitaġo variġuna ma namona korikori vaġa-moġoninai eiaġoto.

<sup>23</sup> Guinenai Rubu Veaġa vereri tu vovoka, korana tu ġemaseto-ġoi, be ta Rubu Veaġa verenai asi etanu-rovaġito. <sup>24</sup> A Iesu tu etanu-vanaġi vanaġini lorinai, ġia tu Rubu Veaġa

verenai betanu-rovaḡini. <sup>25</sup> Moḡa lorinai deikara ḡia ḡenana Barau ḡenai beḡe iaḡoni tu bevaḡa-maḡuririni riba. Korana Iesu tu ḡia urari ai Barau ḡenai bene ḡauḡau ḡana etanu-vanaḡi vanaḡini.

<sup>26</sup> Maiḡesi Rubu Veaḡa verena baregona na ḡita ḡera ura dagarari evinirani. ḡia tu veaḡa, asi ḡena vei-rakava, vetoukau ta ḡenai asiḡina, namo vedaurea; ḡia tu vei-rakava tarimari kavana asiḡi. Ma Barau na guba tuḡuna korikorinai ea toreato. <sup>27</sup> ḡia tu dia guinenai Rubu Veaḡa vereri baregori kavana, ḡaro korikoriri ai varevare dagarari bevinini. Guine tu ḡia ḡena vei-rakava Barau na bene tuḡamaḡi-fitoḡari ḡana evinito, ma moḡa murinai tu tarimarima ḡeri rakava Barau na bene tuḡamaḡi-fitoḡari ḡana. ḡia tu vaḡa-sebona moḡo tarimarima ḡeri vei-rakava ḡana ginitaḡo varevarena eviniato. Moḡa tu ḡia tauḡena ginitaḡo varevarenai eiaḡoto, benamo Barau ḡenai evevini-raḡeto. <sup>28</sup> Mose ḡena taravatu na tu ma ḡeri moira tarimari Rubu Veaḡa verena baregonai etorerito-ḡoi. Senaḡina Barau ḡena guruḡatore guruḡana gwaḡiḡina, Mose ḡena taravatu murinai ema foforito dagarana, na tu Barau Natuna evaḡa-ruḡaiato. ḡia tu Barau na evaḡa-namo vedaureaiato, ma namo vedaurea betanu-vanaḡi vanaḡini.

## 8

*Iesu tu ḡita ḡera Rubu Veaḡa verena baregona*

<sup>1</sup> ḡai na kara ḡakiraḡiani tu maiḡa. ḡita tu ma ḡera Rubu Veaḡa verena baregona. ḡia tu gubai Iaru-korokoro Barauna ḡena terona aroribanai etanu-tarito. <sup>2</sup> Barau ḡena veaḡa gabuna nuḡanai eḡauveini. Mo tu farai rubuna korikori Vereḡauka na eragaiato, dia tarimarima na ḡeragaiato.

<sup>3</sup> Rubu Veaḡa vereri baregori mabarari tu ḡevaḡa-ruḡarito, varevare dagarari ema boromakau, mamoe, manu beḡene vini ḡana. Moḡa lorinai mai Rubu Veaḡa verena baregona, Keriso, maki ma ḡena dagara tari, bene vini ḡana. <sup>4</sup> Bema ḡia tanobarai bere tanu tu, Rubu Veaḡa verenai asi bere iaḡo, korana tu maiḡa, Rubu Veaḡa vereri tu varau ḡetorerito maiḡeri, varevare dagarari ḡevini-tanuni, Iuda ḡeri taravatu ekiraḡiatio ilailanai. <sup>5</sup> ḡia varevare dagarari mainai veaḡa lelevaḡi daiḡutunai ḡevinini tu, gubai mo veaḡa lelevaḡi daiḡutuna kavana e vetoḡana moḡo. Moḡesina nai Barau na Mose toma-rakariḡo ḡana farai rubuna bene ragaia ḡana, naima ekira-toreḡauato, ekirato, “Bono ḡitaia, dagara mabarari boveirini nai tu, ḡoro ai avaḡa-ḡitamuto ilailanai moḡo bono veiri.” <sup>6</sup> Senaḡina toma Iesu na ginitaḡo varevareri vini-toreḡau veiḡana guinenai Rubu Veaḡa vereri ḡeri ḡauvei evanaḡiatio. Korana Barau ḡena kiraḡitore variḡunai Iesu tu Barau e tarimarima vekaravari ai eruḡani, ginitaḡo variḡuna bene vaḡa-seḡukaia ḡana, ma mai ginitaḡo na mo ginitaḡo guinena seḡukana evanaḡiani. Ema Barau ḡena kiraḡitore variḡuna na mo ginitaḡo guinena kiraḡitorenai maki evanaḡiatio. <sup>7</sup> Bema mo ginitaḡo guinena asi ḡena rakava tu, Barau na ginitaḡo variḡuna ta asi ma bere kiraḡia. <sup>8</sup> Senaḡina Barau na tarimarima ḡeri ai rakava eḡoitaḡoto naima ekirato,

“Vereḡauka eguruḡa-foforini,  
‘Boḡono seḡaḡi, ḡaro ta mani eiaḡomani,  
au na ginitaḡo variḡuna ta ma baveiani,  
Isaraela besena e Iuda besena ḡeri.

<sup>9</sup> 1 Mai ginitaḡo tu dia guinenai ḡia seneri ḡeri aveiatio moḡa kavana.  
Dia mo ḡaro ai ḡimari ai aḡabito,  
benamo Aigupito na aḡori-rosirito ginitaḡona kavana.  
Korana ḡia tu au ḡegu ginitaḡo ḡenai  
asi ḡevetuḡamaḡikauni naima,  
au na araga-kwanerito,  
Vereḡauka tu moḡesina eguruḡani.

<sup>10</sup> Vereḡauka ma ekirani,

‘Ḗoira ḡarori ai au na mai ginitaḡo Isaraela besena ḡeri ma baveiani:

Au gēgu taravatu gīa debari ai batore-toḡarini ema gīa nuḡari ai batorerini.  
 Au tu gīa ḡeri Barau ai baiaḡoni ema gīa maki au gēgu tarimarimai beḡe iaḡoni.

<sup>11</sup> Tarima ta na sevinai etanuni tarimana asi ma bevaḡa-ribaiani,  
 ema tarima ta tarikakana asi bekiraiani,  
 ‘Vereḡauka noribaia!’

Korana mabarari na beḡe ribaguni,  
 misina na beiaḡoni mo baregona.

<sup>12</sup> Ḡeri kira-sirivaḡi batuḡamaḡi-fitoḡarini,  
 ema ḡeri rakava mabarari asi ma batuḡamaḡirini.’ ”

<sup>13</sup> Barau na mai ginitaḡo maiḡa ekiraḡiani, “ginitaḡo variḡuna” etoni nai tu, gīa na mo  
 ginitaḡo tovotovonai moḡa tu guinena na ekiraḡiani. Ma kara eguinenani e erakavani tu  
 asikauna berekwarekwani.

## 9

<sup>1</sup> Ginitaḡo guinena tu ma ḡena taravatu misimisiri toma-rakariḡo ḡana, ema ma  
 ḡena gabu veaḡana maki. Mo gabu veaḡana tu tanobarai etanuni dagarana. <sup>2</sup> Barau  
 toma-rakariḡona ḡana farai rubuna ta ḡeragaiato. Mo farai rubuna nuḡanai daiḡutu  
 giniguinena tu Veaḡa Gabuna ḡetato. Ḡia nuḡanai tu lamefa torekauna dagarana, teibolo  
 e Barau ḡeviniato berediri. <sup>3</sup> Kouḡau dabuḡana vaḡa-ruaruana murinai tu daiḡutu ta  
 maia. Moḡa tu Veaḡa Lelevaḡi Gabuna ḡetato. <sup>4</sup> Ḡia nuḡanai tu golo fatana, goḡu ma  
 bonana iatanai beḡene vei ḡana, ema Kiraḡitore Mauḡana; ḡia murikana mabarana tu  
 golo na ḡeveiato. Ma mauḡa nuḡanai tu golo ḡurona ta, nuḡana ma manana e Arona  
 ḡena togoi, egarakauto dagarana, ema fore ruarua Barau na iatari ai taravatu etoreto  
 foreri. <sup>5</sup> Mo mauḡa iatanai tu kerubi ruarua ḡevaḡa-ruḡa veḡoirarito. Mo kerubi tu ḡau  
 garagarari, vetoḡari tu aneru kavari. Ta tavi ta dudu ai ḡevaḡa-ruḡaiato, ma ta maki tavi  
 ta dudu ai, ma faneri ḡekeorito, benamo rakava voivaḡiri gabuna ḡegoru-tariato. Mo  
 kerubi ruarua na tu Barau ḡena mareva baregona ḡekiraḡiani. Senaḡi maiḡeri dagara  
 misikoseri mabarari tu toma asi baḡa kiraḡirini.

<sup>6</sup> Dagara mabarari moḡesi ḡeveirito murinai, Rubu Veaḡa vereri ḡaro vanaḡivanaḡi  
 daiḡutu giniguinena nuḡanai ḡeraka-toḡato-ḡoi, benamo ḡeri ḡauvei ḡeveirito-ḡoi.  
<sup>7</sup> Senaḡi rubu verena baregona ḡereḡana moḡo laḡani ta nuḡanai vaḡa-sebona daiḡutu  
 vaḡa-ruaruana nuḡanai eraka-toḡato-ḡoi. Ḡena rakatoḡa ḡarori mabarari ai tu rara  
 maki eḡabi-taḡoato-ḡoi. Mo rara ḡia na tu rakava tuḡamaḡi-fitoḡari ḡana ginitaḡo  
 dagarana evaḡa-iaḡoato-ḡoi. Guine tu ḡia ḡena rakava ḡana evinito-ḡoi ema murinai  
 tu tarimarima ḡeri rakava ḡana. Mo rakava tu asi ribari nai ḡeveirito-ḡoi rakavari.  
<sup>8</sup> Iauka Veaḡa na maiḡeri veiḡa mabarari ḡerina ḡita tu maiḡesina evaḡa-guruḡarini:  
 Bema Barau toma-rakariḡona ḡana farai rubuna giniguinena roḡo eruḡa-taḡoni nai  
 tu, Veaḡa Lelevaḡi Gabuna rakatoḡa dabarana tu roḡosi roḡo bene vekeo. <sup>9</sup> Mo farai  
 rubuna tu toma mai negai kara beḡe ḡorani evaḡa-foforiani. Mai farai rubuna nuḡanai  
 varevare dagarari e ginitaḡo dagarari vaḡa-ilailana boromakau, mamoe, manu Barau  
 ḡeviniato-ḡoi dagarari mabarari na ḡetoma-rakariḡoto-ḡoi tarimari nuḡari asi ilaila  
 beḡe iarevarini. <sup>10</sup> Korana mo Barau ḡeviniato-ḡoi dagarari tu ḡaniḡani e niuniu  
 dagarari, ema tarima beḡene iareva ḡana veḡuriḡi maḡuriri irauirau. Mai tu mabarari  
 tauḡani taravaturi moḡo. Barau na tarimarima evinirito beḡene korana-iaḡiri, bene iaḡo  
 mo, ḡaro ta, dabara variḡuna bevaḡa-ruḡaiiani.

### *Iesu rarana*

<sup>11</sup> Senaḡi Keriso tu dagara namori ḡema-foforito ḡeri Rubu Veaḡa verena baregona.  
 Ḡia tu farai rubuna barana e namo vedaureana nuḡana na eraka-toḡato. Dia tarimarima  
 na ḡeragaiato farai rubuna, korana mo farai rubuna tu dia mai tanobara dagarana.  
<sup>12</sup> Keriso tu dia nanigosi o boromakau naturi rarari seḡukari ai mo rubu ai eraka-  
 toḡato. Senaḡi ḡia tu ḡia rarana seḡukanai Veaḡa Lelevaḡi Gabuna nuḡanai vaḡa-  
 sebona moḡo eraka-toḡato. Benamo ḡita eḡabivaḡi-moḡovaḡirato rakava ḡena seḡuka

na. <sup>13</sup> Nanigosi ma boromakau rarari ema boromakau natuna variḡuna ḡegabuato kauna, Rubu Veaḡa vereri na vei-rakavai ḡemiroto-ḡoi tarimari iatari ai misimisiri ḡefiu-kaurito-ḡoi. Moḡesina ḡeveirito-ḡoi tu tarimarima tauḡaniri ḡevaḡa-veaḡarito-ḡoi Barau ḡoiranai. <sup>14</sup> Senaḡi Keriso rarana na moḡeri evanaḡirito. Korana ḡita nuḡara, mase ḡevaḡa-ḡoraiani ḡauveiri ḡerina, eiarevarato, maḡuri Barauna ḡena vetuḡunaḡi bitana iaḡo-vini ḡana. Keriso tu asi vetoukauna ta, tauḡena tanu-vanaḡivanaḡi laukana ḡenana eevinito Barau ḡenai.

<sup>15</sup> Ginitaḡo variḡuna nuḡanai Keriso tu Barau e tarimarima fakari ai eruḡani. Korana tu Barau na ekearito tarimari mabarari na ekiraḡi-toreato maḡuri vanaḡivanaḡina beḡene ḡabia. Moḡesi nai Keriso emaseto, tovotovona ginitaḡona nuḡanai tarimarima ḡevei-rakavato ḡeri rakava na bene ruḡa-vaḡiri ḡana.

<sup>16</sup> Tarima ta roḡosi bene mase nuḡanai, beurani bene guruḡa-fofori, bemaseni nai tu, natuna na ḡena farefare bene ḡabiri. Mo ura o guruḡa-fofori tu fefai betoreani ḡia ḡena kiraḡitore guruḡana. Natuna na mo farefare asi roḡo beḡabirini bene iaḡo mo, tamana ḡena mase tarimarima ḡoirari ai bevaḡa-moḡoniani vau. <sup>17</sup> Korana tu mo ura ḡetoreani fefana tu eguruḡa-foforini tarimana bemaseni vau ma ḡena seḡuka, a bema ḡia roḡo maḡuri tu, mo ura ḡetoreani fefana tu asi seḡukana. <sup>18</sup> Moḡesina nai ginitaḡo ginigunena maki rarana vau evaḡa-seḡukaiato-ḡoi. <sup>19</sup> Korana Mose na taravatu guruḡari mabarari tarimarima ḡeri evarifiu-ḡosiato-ḡoi murinai, boromakau naturi variḡuri e nanigosi rarari eḡabirito-ḡoi, benamo nanu ḡesi egiro-sebonarito-ḡoi. Moḡa murinai isopo legana vulu kakakakana na ḡebaruato dagarana mo rara ma nanunai efereiato-ḡoi. Benamo Mose na mo isopo legana ma vulunai rara tu taravatu bukana e tarimarima iatari ai efu-kaurito-ḡoi. <sup>20</sup> Mose ekirato, “Mai rara tu ginitaḡo vaḡa-moḡonina dagarana Barau na ekiramito boḡono korana-iaḡia.” <sup>21</sup> Farai rubuna ema mo rubu nuḡanai toma-rakariḡo ai ḡeḡauvei-iaḡirito-ḡoi farefareri mabarari iatari ai veiḡa sebona eveiato-ḡoi. Iatari ai rara misimisiri efuifukauto-ḡoi. <sup>22</sup> Moḡoni, taravatu ekirani ilailanai, dori dagarana mabarari tu rara na beḡe iarevani. Korana rara asi beriḡoni nai tu, vei-rakava tuḡamaḡi-fitoḡari maki asiḡina.

<sup>23</sup> Senaḡina maiḡeri mai tu guba dagarari iouiouri moḡo maiḡesi ḡeiarevarini. A gubai korikoriri ḡetanuni dagarari iareva-iarevari ḡana ginitaḡo varevarena tu namona lelevaḡi. Maiḡeri ginitaḡo varevareri evanaḡirini. <sup>24</sup> Korana Keriso tu dia tarimarima na ḡeveiato veaḡa lelevaḡi daiḡutuna nuḡanai eraka-toḡato. Iesu tu guba korikorinai eraka-toḡato. Ma maitoma tu ḡita urarai Barau ḡoiranai efoforini. Mo tarima na ḡeveiato moḡa tu gubai veaḡa lelevaḡi daiḡutuna moḡo ḡevaḡa-ilailaiato. <sup>25</sup> Rubu Veaḡa verena baregona tu laḡani tata nuḡari ai Veaḡa Lelevaḡi Gabunai rara eḡabi-toḡato-ḡoi. Keriso moḡesina tu asi eveini. Ḗia tu dia gubai eraka-toḡato murinai vau vanaḡivanaḡi tauḡena ginitaḡo varevarenai eiaḡoni, benamo Barau ḡenai eevinini. <sup>26</sup> Moḡesina tu tanobara evesinato na veḡata bene midigumidigu. Senaḡi mai tanobara magona eḡabi-iaḡoani, mainai vau vaḡa-sebona moḡo ema foforito. Mo tu ginitaḡo varevarenai evevaḡa-iaḡoto rakava bene ḡabi-veḡitari ḡana. <sup>27</sup> Evetoreto, tarimarima mabarari tu vaḡa-sebona moḡo beḡe maseni, ma murinai tu Barau na bevaḡa-kotarini. <sup>28</sup> Keriso kavana vaḡa-sebona moḡo ginitaḡo dagarana eiaḡoto, tarimarima mabarari ḡeri rakava bene ḡabi-veḡitari ḡana. Senaḡi ḡia tu ma bema-fofori ḡenoḡoini. Mo tu dia rakava ma benema ḡabi-vaḡiri ḡana, senaḡina deikara ḡia ḡenari-taḡoani tarimari vaḡa-maḡuriri ḡana.

## 10

*Ginitaḡo* guinena na rakava asi beḡabi-veḡitarini

<sup>1</sup> Mose ḡena taravatu tu dagarana namori vau beḡe ḡorani iouiouri moḡo, dia dagarana tauri korikori. Ḗia na mo ginitaḡo dagarari laḡani laḡani ḡevinito-ḡoi, senaḡina mo ginitaḡo dagarari na toma-rakariḡo ḡeiaḡoto-ḡoi tarimari asi evaḡa-namo vedaurearito.

<sup>2</sup> Bema mo ginitaḡo dagarari na ḡetoma rakariḡoto-ḡoi tarimari beḡere vaḡa-namo vedaureari nai tu, asi ma beḡere ginitaḡo-ḡenoḡoi. Korana ḡia tu ḡere iareva-moḡovaḡi,

ema ma ǵeri vei-rakava guineri mamiraǵiri asi ma ǵere ǵabi-ǵenoǵoiri. <sup>3</sup> Senaǵi mo ginitaǵo veiǵari laǵani tatai ǵeveirito-ǵoi veiǵari na tu mo laǵani tata nuǵari ai ǵevei-rakavato-ǵoi, moǵeri ǵekira-vararito-ǵoi. <sup>4</sup> Korana tu boromakau e nanigosi rarari na rakava tu asi ilaila beǵabi-veǵitarini. <sup>5</sup> Moǵa lorinai Keriso tanobara ǵana eiaǵomato nai tu ekirato,

“Goi tu ginitaǵo dagarari vaǵa-ilailana boromakau, mamoe, nanigosi ema varevare dagarari asi ourani,

senaǵi tauǵani ta ovei-toreato au ǵegu.

<sup>6</sup> Karava na boromakau, mamoe, nanigosi eǵararini,

ema vei-rakava bono ǵabi-vaǵiri ǵana ginitaǵo varevareri ǵeveini ǵeri ai maki asi oiakuni.

<sup>7</sup> Moǵesi naima au akirato,

‘Barau o, au tu iniǵegu,

Buka Veaǵai tu au ǵekiraǵiguto, au baiaǵoma tu ǵoi ǵemu ura bana veia ǵana.’ ”

<sup>8</sup> Keriso ǵena guruǵa giniguinena tu maiǵa, “Ǵoi tu ginitaǵo dagarari e varevare dagarari asi ourani. Karavai ǵegaburini varevareri e vei-rakava bono ǵabi-vaǵiri ǵana ginitaǵo varevareri ǵeveini maki asi oura-vinirini, ema ǵeri ai asi oiakuni.” Maiǵeri veiǵa tu taravatu na ekiraǵirini ilailanai, senaǵi ǵoi na tu asi oiaku-iaǵirini. <sup>9</sup> Moǵesi nai ma ekirato, “Barau o, au tu iniǵegu, au baiaǵoma tu ǵoi ǵemu ura veiǵana bana veia ǵana.” Benamo ginitaǵo veiǵana giniguinena etore-veǵitaiato, benamo moǵa gabunai tu ta ma evaǵa-ruǵaiato. <sup>10</sup> Benamo Barau ǵena ura lorinai, Iesu Keriso tauǵanina ginitaǵo dagarana evaǵa-iaǵoato vaǵa-sebona moǵo. Benamo monana ǵita evaǵa-veaǵarato.

<sup>11</sup> Rubu Veaǵa vereri mabarari ǵaro vanaǵivanaǵi tata ǵeruǵa-tarito-ǵoi, benamo mo ginitaǵo ǵauveiri ǵeveirito-ǵoi. Senaǵi ǵeri ginitaǵo dagarari tu dagara sebori moǵo ǵevinito-ǵoi vanaǵivanaǵi. Ema mo ginitaǵo dagarari na rakava tu asi ǵeǵabi-veǵitarito-ǵoi. <sup>12</sup> Senaǵi Keriso na rakava ǵabivaǵiri ǵana tu ginitaǵo sebona moǵo eveiato ǵaro mabarari ǵana. Benamo moǵa murinai Barau ǵimana aroribanai ea tanu-tarito. <sup>13</sup> Mo negai beiaǵoma maitoma tu evenarini, beiaǵoni mo, ǵia ǵevetari-viniani tarimari mabarari Barau na ǵia kwakuna fanakauna dagarana betore-taririni. <sup>14</sup> Korana ginitaǵo dagarana sebona na moǵo evaǵa-veaǵarito tarimari evaǵa-namo vedaurearito. Ma ǵia tu namo vedaurea beǵe tanuni, vanaǵivanaǵi.

<sup>15</sup> Iauka Veaǵa na maki evaǵa-ribarani. Guine tu ekirato,

<sup>16</sup> “Vereǵauka ekirani,

‘Moǵeri ǵaro muriri ai,

au ǵia ǵeri tu mai ginitaǵo baveiani.

Au ǵegu taravatu ǵia nuǵari ai batore-toǵarini,

ema ǵia debari ai baberarini.’ ”

<sup>17</sup> Ema ma ekirato,

“Ǵia ǵeri vei-rakava e veiǵa ǵeǵevaǵeǵevari asi ma batuǵamaǵi-ǵenoǵoirini.”

<sup>18</sup> Maiǵeri etuǵamaǵi-fitoǵarito nai tu, rakava ǵabi-veǵitari ǵana varevare dagarana ta tu asiǵina maia.

*Barau sevina* ǵana siraka-kavi ma tuǵamaǵi kokorera ǵesi

<sup>19</sup> Moǵa lorinai, tarikakagu, ǵita tu nuǵara gwaǵiǵi Iesu rarana ǵenana Veaǵa Lelevaǵi Gabunai bita raka-toǵani. <sup>20</sup> Mo vekouǵau dabuǵana o ketin evedare-kikimato, monana Keriso na ǵita ǵera maǵuri dabarana variǵuna ekeo-fakaiato. Mo vekouǵau dabuǵana tu Keriso tauǵanina. <sup>21</sup> Ǵita tu ma ǵera Rubu Veaǵa verena baregona, Barau ǵena numa eǵita-taǵoani. <sup>22</sup> Ǵita nuǵara tu eiarevarito rakava mamiraǵiri ǵerina, ema tauǵanira maki nanu namo vedaureana na eǵuriǵirito. Moǵesi naima Barau ǵenai siraka-kavinaǵi nuǵara ma moǵoniri ǵesi e ma ǵera veǵabidadama korikoriri ǵesi. <sup>23</sup> Ǵera tuǵamaǵikau tavaǵa-moǵoniani dagarana ǵenai tana veǵabi-gigitari, asi tana ǵareva-ǵareva. Korana Barau na kara ekiraǵi-toreato tu beveiani. <sup>24</sup> Ema karora bitana tuǵamaǵiri kamasi tata bita vaǵa-kavarini, benamo beǵe veura-vinini, ema ǵauvei namori beǵe veini. <sup>25</sup> Ǵita

ġera raka-vegogo ai bitana fofori-ġoi, asi bitana tanu, tari ġeveini kavana. Senaġi karora ġesi velaunaġi bitana vaġa-baregoa. Korana tu tauġemi na varau ġoġitaiani, Keriso ġena iaġoma ġarona tu mai ekavinaġi-rakavani.

<sup>26</sup> Bema guruġa moġonina taribaiani murinai, ma taġiġiraġeni, benamo tavei-rakavani nai tu, bitana riba, rakava ġabi-veġitari ġana, ginitaġo dagnarana ta tu asiġina maia. <sup>27</sup> Senaġi ma garira ġesi kara ġoirai ġerai beġorani, moġa moġo bitana nari-taġoa. Mo tu Barau ġena Kota Baregona, ema Barau ġevetari-viniani tarimari e iaukari beġararini karavana. <sup>28</sup> Tarima ta na Mose ġena taravatu asi ekorana-iaġiato-ġoi, benamo ġeġita-kauato-ġoi tarimari ruarua o toitoi na ġekiraġi-foforiato-ġoi. Mo tarima tu ġevaġi-maseato-ġoi, asi ġevetuġa-ġwaiato-ġoi. <sup>29</sup> Ġomi ġotuġamaġini, Barau Natuna deikara na kwakuna fanakauna dagnarani evaġa-iaġoani tarimana tu kamasi? Mai tarima tu rakava voina baregona beġabiani. Ġia na tu mo ginitaġo rarana, ġia evaġa-veaġaiato dagnarana, asi veaġa raranai evaġa-iaġoani. Ema varevare-bara Iaukana ġenai maki veiġa rakava kwaikwaina eveiani. <sup>30</sup> Korana ġita ma ribara Barau ekirato, “Rakava voina tu au na bavaġa-voiani, au na bavini-ġenoġoiani.” Ema ma ekirato, “Vereġauka na ġena tarimarima beġita-viriġirini.” <sup>31</sup> Maġuri Barauna ġimanai boketo-raġeni tu garina maki asikeikeina.

<sup>32</sup> Ġaro guineri ġotuġamaġi-ġenoġoiri. Barau ġena mama ġoġabiato murinai, midigumidigu barego ġodoġarito, senaġi ġoruġa-gigitarito. <sup>33</sup> Negatari ai tu ġutuma bara ġoirari ai ġevaġa-maiakamito-ġoi, ma ġevaġa-midigu midigumito-ġoi. Ema negatari ai tu ġomi kavana ġevaġa-midigu midigurito-ġoi tarimari seviri ai ġoruġa-tarito-ġoi, ġoruġa-duku dukurito-ġoi. <sup>34</sup> Ġediburarito tarimari ġesi ġomidigumidigu sebonato-ġoi, ema ġemi farefare ġeverarimito-ġoi maki ġoiaku-iaġirito-ġoi moġo. Korana ma ribami, ġomi tu ma ġemi farefare namori, beġe tanu-vanaġi vanaġini dagnarari.

<sup>35</sup> Moġa lorinai ġemi tuġamaġi kokore maniġa asi boġono fitoġari. Korana maniġa voina tu barego lelevaġina boġoa ġabiani. <sup>36</sup> Boġono vevaġa-gwaġiġi, korana Barau ġena ura veiġana boġo vaġa-koriani murinai tu, kara ekiraġi-toreato mabarana boġo ġabiani. <sup>37</sup> Korana Buka Veaġa ekirani,

“Nega tu misina moġo,  
ma beiaġomani etoni tarimana tu beiaġomani, asi bekwaiboni.

<sup>38</sup> Au ġegu vei-iobukaiobuka tarimana tu ġena veġabidadama lorinai bemaġurini. Senaġi murina ġana ma beraka-ġenoġoini nai, au tu asi baiakuni ġia ġenai.”

<sup>39</sup> Senaġi ġita tu murira ġana asi ma bita raka-ġenoġoini, benamo bita rekwarkwani. Asiġina, ġita tu ma ġera veġabidadama, be maġuri bita ġabiani.

## 11

### Veġabidadama tarimari

<sup>1</sup> Veġabidadama anina tu mai-ġesi. Tatuġamaġi-dadamaġirini dagnarari tavaġa-moġoni korikoririni. Matarai roġosi bitana ġitari, senaġina tavaġa-moġoni korikoririni, moġeri dagara tu moġoni ema bita ġabirini. <sup>2</sup> Sene tarimari tu ġeri veġabidadama lorinai, Barau na eġabi-raġerito.

<sup>3</sup> Taveġabidadamani lorinai taribani, Barau eguruġato, benamo guba e tanobara evetoreto. Moġa lorinai mai taġitarini dagnarari tu Barau na asi taġitarini dagnarari ġerina eveirito.

<sup>4</sup> Abela tu ma ġena veġabidadama Barau ġenai lorinai, Barau eviniato varevare dagnarana na Kaino ġena varevare dagnarana evanaġiato. E ma ġena veġabidadama lorinai, Barau na ġena varevare dagnarana ekiraġiato varevare namona ema Barau na evaġa-moġoniato ġia tu vei-iobukaiobuka tarimana. Ma Abela tu varau emaseto, senaġina ġena veġabidadama lorinai roġo eguruġani.

*Abela, Enoka, Noa*

<sup>5</sup> Enoka ma ǵena veǵabidadama lorinai, Barau na eǵabi-varaǵeato moǵo, asi emaseto. Ma tarimarima na maki asi ǵedoǵariato, korana Barau na eǵabi-vaǵiatio. Roǵosi bene ǵabi-veǵitaia nuǵanai, Barau ǵena bukai ekirani, Enoka na Barau iauna evaǵa-iakuato.

<sup>6</sup> Asi ǵena veǵabidadama tarimana na Barau tu asiǵina ǵinavaǵi bevaǵa-iakuani. Korana deikara Barau ǵenai eiaǵomani tarimana tu bene vaǵa-moǵoni Barau tu maǵuri etanuni. Ema Barau ǵevetauani tarimari mabarari tu voiri namori Barau na bevinirini.

<sup>7</sup> Noa ma ǵena veǵabidadama lorinai, Barau na ǵoirai beǵe ǵorani dagarari ekira-toreǵauato. Mo tu Noa na roǵosi bene ǵitari dagarari. Noa na Barau evaǵa-moǵoniatu, benamo ma garina ǵesi bouti ta eragaiato, ǵaraǵona e natuna bene vaǵa-maǵuriri ǵana. Ǵia ǵena veǵabidadama na tanobara tarimari ekiraǵi-foforirini rakava tarimari. Ma ǵia tu ǵena veǵabidadama lorinai Barau na ekiraiato vei-iobukaiobuka tarimana. Mai vei-iobukaiobuka tu veǵabidadama ǵenana eiaǵomani dagarana.

### *Aberahamo*

<sup>8</sup> Aberahamo ma ǵena veǵabidadama lorinai, Barau na ekeaiato nai eseǵaǵiatio. Barau na ekeaiato tu ǵena vanuǵa bene raga-kwaneana, ma Barau na tanobara ta ma beviniani, mo ǵana bene iaǵo. Benamo Aberahamo eraka-rosito moǵo, asi ribana aiǵana eiaǵoni senaǵi eiaǵoto moǵo. <sup>9</sup> Ma ǵena veǵabidadama lorinai, Barau na ekiraǵi-toreato tanobaranai ea vanuǵato. Ma monai tu noǵa moǵo tanukau tarimana ta tanobara borunai etanuni kavana. Isako e Iakobo kavana farai numari ai ǵetanuto-ǵoi. Maiǵeri tarima toitoi tu Barau ǵena kiraǵitore ǵeǵabiatio. <sup>10</sup> Korana Aberahamo tu vanuǵa baregona evaǵa-nogaiato-ǵoi. Mo vanuǵa tu fore baregona iatanai beruǵakauni. Mo vanuǵa tu Barau tauǵena na beboioǵaiani e beragaiani.

<sup>11</sup> Veǵabidadama lorinai Sara na kokore eǵabiatio bene ǵabi ǵana, ema eǵauka-rakavato, senaǵi mero keina evaǵa-maǵuriatio. Ǵia ma ribana, Barau na kara ekiraǵi-toreato dagarana tu beǵorani. <sup>12</sup> Benamo mai tarima sebana eǵauka-rakavato, senaǵi ǵia ǵenana senena ǵemaǵuritu tu guba visiǵuri kavana vovoka tabutabu, ema kone mirina kavana asi iavi-iavina.

<sup>13</sup> Maiǵeri tarimarima mabarari tu veǵabidadamai ǵetanuto-ǵoi nuǵanai ǵemaseto. Barau na ekiraǵi-torerito dagarari ǵia na tu asi ǵeǵabito, senaǵi manaǵai moǵo ǵeǵita-guinerito, benamo ǵeǵabi-raǵerito. Ema ǵeguruǵa-foforito ǵia tu tanobara boruna tarimari. Ǵia mai tanobarai tu ǵetanukauni moǵo. <sup>14</sup> Moǵesina ǵeguruǵani tarimari tu ǵeri guruǵa na ǵevaǵa-foforirini, ǵia tu ǵeri tanobara korikorina ǵevetauani. <sup>15</sup> Bema ǵeraga-kwaneato tanobarana ǵere tuǵamaǵi-ǵenoǵoia nai tu, ma dabara ǵere ǵenoǵoi. <sup>16</sup> Senaǵi ǵia tu tanobara namo vedaureana ǵeuravini-rakavaiato-ǵoi. Mo tu gubai etanuni dagarana. Moǵa lorinai Barau tu asi emaiakaiani, ǵia ǵeri Barau ǵetoni nai, korana Barau na ǵeri vanuǵa baregona ta eraga-toreato.

<sup>17</sup> Aberahamo tu ma ǵena veǵabidadama. Moǵesina nai Barau na etovonaǵiatio nai tu, natuna Isako ginitaǵo dagarana evaǵa-iaǵoato, benamo Barau ma evarevare-viniatio. Aberahamo ribana, Barau na kiraǵitore tu ǵia eviniatio, senaǵina ǵia natuna sebana kwariǵutu moǵo tu ginitaǵo dagarana ǵana bene vaǵia etato. <sup>18</sup> Barau na Aberahamo maki maiǵesina ekiraiatio, ekirato, “Isako ǵenana moǵo ǵoi senemu beǵe maǵurini.” <sup>19</sup> Aberahamo etuǵamaǵito tu Barau na Isako ma bevaǵa-maǵuri ǵenoǵoiani riba. Moǵesina naima iniǵesina ma sikiraǵia: Aberahamo na Isako mase na eǵabi-ǵenoǵoiatio.

### *Isako, Iakobo, Iosefa*

<sup>20</sup> Isako ma ǵena veǵabidadama lorinai, Iakobo e Esau evaǵa-namorito, ema ǵeri ai vau beǵea ǵorani dagarari ekiraǵirito.

<sup>21</sup> Iakobo ma ǵena veǵabidadama lorinai, dori emaseto-ǵoi nuǵanai tu Iosefa natuna ruarua evaǵa-namorito, ema ǵena togoi ǵenai eveǵabi-ritoǵoto, benamo Barau etoma-rakariǵo viniatio.

<sup>22</sup> Iosefa ma ġena veġabidadama lorinai, eġauka-dorudoruto, dori emaseto-ġoi nuġanai tu, Isaraela tarimari Aigupito na beġe raka-vaġini ekiraġiato, ema turiġana kamasi beġene veia guruġana evinirito.

*Mose*

<sup>23</sup> Mose tamana e sinana Barau ġenai tu ma ġeri veġabidadama. Moġa lorinai Mose emaġurito ġaronai ġeġitaiato mero keina namona korikori, benamo kini ġena guruġa garina tu asi ġeveito. Senaġi tamana e sinana na ġeġabiato, benamo numa nuġanai ġue toitoi ġetore-gumuato.

<sup>24</sup> Mose ma ġena veġabidadama lorinai, ebaregato nai tu asi eurato beġene kira, ġia tu Pharao natuna ġuiatona natuna merona. <sup>25</sup> Ġia tauġena eurato, Barau ġena tarimarima ġesi beġene vaġa-midigumidigu sebonaia. Ma asi eurato, vei-rakava nuġanai asi beġe tanu-maukani verereri ai bene tanu-namo. <sup>26</sup> Ġia na etuġamaġiato tu, Keriso uranai beġe vaġa-maiakaiani voina tu barego lelevaġi, Aigupito ai farefare voiri bevanaġirini. Korana ġia tu eboġeguine-iaġoto, ġoirai voina eġita-iaġoato.

<sup>27</sup> Mose ma ġena veġabidadama lorinai, Aigupito na eraka-veġitato, Aigupito verena bebaruni garina asi egarito. Ġia tu ekokoreto, korana tu asi taġitaiani Barauna ġia na tu matana na noġa moġo eġitaiato. <sup>28</sup> Ma ġena veġabidadama lorinai, Rubu Veaġa verekona ekorana-iaġiato ema Isaraela tarimari ekirarito, rara ġeri ġatama-boka koberi murikari ai beġene dau. Benamo mase aneruna na naturi, ġemaġuri-guineto merori, asi bene vaġiri.

*Isaraela tarimari na Barau ġeġabidadama-viniato*

<sup>29</sup> Isaraela tarimari na Barau ġeġabidadama-viniato lorinai, Davara Kakakakana nuġana na tanobara kaukauna na noġa moġo ġeraka-vanaġito. Ma Aigupito tarimari maki ġevanaġi ġetato nai tu, davara na eġutu-ġaurito.

<sup>30</sup> Isaraela tarimari ma ġeri veġabidadama lorinai, Ieriko vanuġa maġuna ġaro vaġa-imaima ruarua (7) ġeraka-ġeġeraġiato murinai eketoto.

<sup>31</sup> Mata-boraġa ġuiatona Rahaba Barau ġenai eveġabidadamato lorinai, Isaraela ġeri maramara tarimari eġabi-raġerito, benamo Barau ġeseġafore-viniato-ġoi tarimari ġesi asi ġevaġi-sebonaiato.

<sup>32</sup> Ma kara ma bakiraġiani? Asi ġegu taimi Gideona, Barak, Samson, Iefeta, Davida, Samuela ema peroveta tarimari variri bakiraġirini. <sup>33</sup> Ġia tu ma ġeri veġabidadama lorinai, tanobara basileiari ġevetari-vinirito nai, ġekokoreto-ġoi. Veiġa iobukaiobukari ġeveito-ġoi, ema kiraġitore dagarari ġeġabirito laion bokari ġekou-ġaurito. <sup>34</sup> Karava seġuka rakava ema-moreni ġevei-buserito, ema vetari baġari matari na ġeraga-maġurito. Ġeri moiramoiri nuġari ai ġekokoreto; vetari ai tu guruġari maki seġuka rakava, ema ġevetari-vinirito-ġoi doġorori ġevaġa-ketorito-ġoi. <sup>35</sup> Ġemaseto-ġoi tarimari ma ġevaġa-maġuri ġenoġoirito-ġoi, benamo sinari na ma ġeġabi-ġenoġoirito-ġoi. Ma tari tu dibura numai tauġaniri ġekwari-rakava kwaikwairito-ġoi ma dori ġemaseto-ġoi, senaġi asi ġeurato-ġoi Barau beġene kira-ġuniġaua, benamo dibura numana na beġene ruġa-vaġiri. Korana ġeri ura tu vaġa-variġisi ġenoġoi namona beġene ġabia.

<sup>36</sup> Ma tari tu ġevaseva-vaseva iaġirito-ġoi, ġekwaririto-ġoi, ma tari tu seini na ġebarurito-ġoi, benamo dibura numanai ġetorerito-ġoi. <sup>37</sup> Fore na ġetakirito-ġoi; ma tari tu ġeso-ġuturito-ġoi; ma tari tu vetari baġari na ġevaġirito-ġoi. Mamoe kefiru e nanigosi kefiru ġevei-rakaoto-ġoi, asi ġeri-ġari, ġevaġa-midigu midigurito-ġoi, ema tarimarima na veiġa asi namori ġeri ai ġevei-vinirito-ġoi. <sup>38</sup> Tanobara ġia ġeri ai tu asi namo moġo. Tanobara fakari na e ġoro tuġuri na, tano kouġari na, ema guri na ġetanurakaoto-ġoi.

<sup>39</sup> Maiġeri tarimarima mabarari ġeri veġabidadama loriri ai, Barau na evaġa-maġuririto. Senaġina ta na Barau na ekiraġi-toreato dagarana ta tu asi eġabiato.

<sup>40</sup> Korana Barau na dabara namona ta ġita ġera eboioġaiato. Ġia ġena ura ġia maki ġita ġesi vaġa-sebo vau bene vaġa-namo vedaureara.



## 12

<sup>1</sup> Mo veḡabidadama tarimari, ḡita ḡeḡita-taḡorani tarimari, tu ḡutuma lelevaḡi, magube na noḡa moḡo beḡe ḡeḡeraḡira. Moḡa lorinai ḡita ḡekoukou-ḡaurani dagarari, ema vei-rakava ḡita ḡebarubaru-tarirani dagarari mabarari sifitoḡari. Benamo ma kokorera ḡesi ḡoirarai Barau na etoreato raga-iruirunai siraga. <sup>2</sup> Matara Iesu ḡenai sitore-kauri. Korana Iesu na ḡita ḡera veḡabidadama esinaiato, ema bevaḡa-ḡuḡuruani. ḡia na ḡoiranai mo iaku e verere etuḡamaḡiato nai, satauro maiakana asi etuḡamaḡiato. Benamo Barau ḡena terona aroribanai etanu-tarito.

<sup>3</sup> Iesu situḡamaḡia. ḡia tu vei-rakava tarimari na asi ḡeḡabi-raḡeato, ḡeseḡaforeviniato, senaḡina ekokoreto. Moḡa lorinai asi boḡono tuḡamaḡi-moira, e asi boḡono ruḡa-ḡuirāḡi. <sup>4</sup> ḡomi tu rakava ḡesi ḡovevaḡi-tanuni. Senaḡina ḡomi mani vevaḡi nuḡanai tu, ta raramu roḡosi roḡo bere riḡo. <sup>5</sup> Ema ḡomi tu Barau na ekeamito ḡia natuna, senaḡi mai velaunaḡi guruḡana tu ḡotuḡarekwaiato, ekirato, “Natugu, Vereḡauka na vevaḡa-riba veiḡari gwaḡiḡiri evinimuni nai, asi bono ḡabi-meraḡari, ema bekira-feimuni nai, nuḡamu asi bono vaḡa-moiraia.

<sup>6</sup> Korana Vereḡauka na eura-vinirini tarimari tu vevaḡa-riba gwaḡiḡiri evinirini, ema ḡia natunai evaḡa-iaḡorini tarimari mabarari tu ekwaririni.”

<sup>7</sup> Moḡa lorinai matakani veiḡari ḡemi ai beḡe ḡorani nai tu boḡono kokore. Korana ḡomi tu Barau natuna naima moḡesina eveimini. Ma siḡitaia, kamara mero keina tu tamana na asi evaḡa-matakaniani? <sup>8</sup> Tama mabarari na naturi ḡevaḡa-matakanirini. Ma bema ḡomi Barau na asi evaḡa-matakanimini, moḡa anina ḡomi tu dia Barau natuna korikori, ḡomi tu gara meromi. <sup>9</sup> Vaḡa-ilailana tauḡani rekenai ḡita tamara korikoriri na ḡevaḡa-matakanirani, benamo moḡeri korari ai tamara tagubakaurini. Moḡesina kavana namona tu ḡita tata iaukara Tamari Barau maki tana gubakaua, benamo bitana maḡuri. <sup>10</sup> ḡita tamara na tu ḡaro kotunai moḡo ḡevaḡa-matakanirani. Mo tu ḡia tauḡeri na ḡetuḡamaḡiani namo ḡetoni ḡarori ai moḡo. Senaḡi Barau na evaḡa-matakanirani tu ḡita ḡera namo ḡana, ema ḡia ḡesi bitana vevaḡa-vegogo ḡana. <sup>11</sup> Maitoma matakani veiḡari ḡeiaḡomani tu ma midigumidiguri, asi iakuri. Senaḡina murinai vau mo matakani veiḡari ḡerina beribani tarimana tu vei-iobukaiobuka ema maino tarimanai beiaḡoni.

*Nuḡara bitana vaḡa-kokoreri ema bitana ruḡa-gigitari*

<sup>12</sup> Moḡa lorinai ḡimami beḡe ḡeroḡero-riḡo, ḡoḡabi-vaisiri, ema tuimi beḡe moira ḡeḡoḡo-ḡoḡorini, ḡovaḡa-kokoreri. <sup>13</sup> Benamo kwakumi na ḡoraka-iaḡirini fanari ḡovei-roroḡotori, be kwaku rakava tarimana kwakuna asi bene rakava-lelevaḡi, senaḡi bene namo.

<sup>14</sup> Boḡono kokore-korikori, tarimarima mabarari ḡesi maino ai boḡono tanu uranai. Be ḡemi maḡuri beḡene vevaḡa e asi vetoukaunai beḡene iaḡo bene. Korana tu ma vetoukauna e asi vevaḡa tarimana na Vereḡauka tu asi beḡitaiani. <sup>15</sup> Boḡono venari, be tarima ta Barau ḡena varevare-bara ḡenana asi bene raka-veḡita, ma nuḡa-ḡirima ḡokana nuḡanai asi bene tubu-raḡe. Korana nuḡa-ḡirima ḡokana betubuni, ḡokana mamakina na ḡomi fakami ai rakava bevaḡa-ḡoraiani, benamo tarimarima vovoka bevaḡa-rakavarini Barau ḡoiranai. <sup>16</sup> Boḡono ḡitaia, ta ḡomi fakami ai mata-boraḡa veiḡari asi bene veiri, ema Esau na Barau asi ekorana-iaḡiato kavana asi bene vei. Esau na tu ḡena maḡuri guine seḡukana ḡaniḡani diḡu sebona moḡo uranai evare-fitoḡaiato. <sup>17</sup> Moḡa murinai ḡomi ma ribami, mo maḡuri guine vevaḡa-namona tamana ḡenana neḡabia etato tu tamana na asi eḡabi-raḡeato. Moḡoni, tamana ma taḡina ḡesi enoḡiato, senaḡi tamana asi ma etuḡamaḡi-ḡenoḡoito.

<sup>18</sup> ḡomi tu dia ḡimami na boḡo ḡabi-karaiani ḡorona ḡana boḡo iaḡoma, Isaraela tarimari kavana. ḡia tu Sinai ḡorona sevina korikorinai ḡeruḡato, benamo karava emoreto ḡeḡitaia, ema mukuna dubara kiukiuna e iavara barego lelevaḡina; <sup>19</sup> ema kibi

guruna asikeikeina eraġeto e garo baregona eguruġato ġeseġaġirito. Isaraela tarimari na mo garo ġeseġaġiato nai tu, Mose ġenoġiato mo garo na asi ma bene vaġa-guruġari. <sup>20</sup> Korana Barau na taravatu guruġari evinirito nai tu, ġegari-rakavato, Barau tu ekirato, “Bema tarima ta na o boromakau ta o nanigosi ta na mo ġoro bea vei-karaiani nai tu, fore na boġono taki-masea.” <sup>21</sup> Moġeri vetoġa ġefoforito gariri tu asikeikeiri, benamo Mose ekirato, “Au tu eġoġo-ġoġoguni, agari-rakava rakavani.”

<sup>22</sup> Senaġina ġomi tu Siona Ġorona ġana boġo iaġoma e guba Ierusalemna maġuri Barauna ġena vanuġa baregona ġana, ema aneru ġutuma gorogoro asi iavi-iaviri ġeri ai boġo iaġoma. <sup>23</sup> Ġomi tu vegogo baregona ġena e Barau natuna ġemaġuri-guineto ekalesiari ġeri ai boġo iaġoma. Ġia arari tu Barau na gubai etorerito. Ema ġomi tu tarimarima mabarari Kotai beġita-viriġirini Barauna ġenai e vei-iobukaiobuka tarimari iaukari, Barau na evaġa-namo vedaurearito iaukari, ġeri ai boġo iaġoma. <sup>24</sup> Ema Iesu ġenai boġo iaġoma. Iesu ginitaġo variġunai tu Barau e tarimarima fakari ai eruġani. Ema ġia rarana ġenai boġo iaġoma. Iesu rarana tu ġomi ġemi ai eketokauto. Ma Iesu rarana na ekiraġiani guruġana seġukana na Abela rarana ġena guruġa seġukana evanaġiani.

<sup>25</sup> Boġono venari, Barau na evaġa-guruġamini nai, garona asi boġono kira-sirivaġi-vinia. Korana tanobarai Barau na ekira-toreġaurito tarimari ġekira-sirivaġito nai tu, asi ġeraga-maġurito. Ġeri kira-sirivaġi voina ġeġabiato. Ġita tu kamasi bita raga-maġurini? Barau toma tu gubai etanuni, benamo monana ġita ekira-toreġaurani. Bema ġia ġenana bita raka-veġitani nai tu, kamasi bita raga-maġurini. <sup>26</sup> Moġeri ġaro ai Barau garona na tanobara eruku-iagaiagaiato. Senaġina toma Barau tu eguruġa-toreto, ekirani, “Au na tanobara vaġa-sebona maia barukuani. Dia tanobara ġereġana moġo barukuani, senaġina guba maki barukuani.” <sup>27</sup> Mai guruġa “vaġa-sebona maia” anina tu, guinenai Barau na eveirito dagarari beġe iagaiagani nai tu bekoki-veġitarini. Korana tu asi beġe iagaiagani dagarari moġo beġene tanu ġana.

<sup>28</sup> Ġita na taġabiani basileiana tu asi beġareva-ġarevani. Moġa lorinai Barau sitanikiu-vinia, ema Barau na eura-viniani maġurinai sitoma-rakariġo vinia ma vegubakaura e ma garira ġesi. <sup>29</sup> Korana ġita ġera Barau tu karava ġaraġara.

## 13

### *Barau vaġa-iakuna veiġari*

<sup>1</sup> Ġomi fakami ai tarikaka veuravinina bene tanu-vanaġi vanaġi. <sup>2</sup> Tarima boruri ġabiraġeri asi boġono tuġa-rekwaia, korana tarima tari maniġesi ġeveito-ġoi nai tu, aneru ġeġabi-raġerito. Senaġi ġia tu asi ġeriba-maoroto mo tu aneru ġeġabi-raġerini.

<sup>3</sup> Dibura numanai ġetanuni tarimari boġono tuġamaġiri. Boġono tuġamaġi, ġomi maki ġia ġesi dibura numanai ġoro tanu-vegogo. Ema ġevaġa-midigu midigurini tarimari boġono tuġamaġiri. Boġono tuġamaġi ġomi maki ġere vaġa-midigu midigumi.

<sup>4</sup> Tarimarima mabarari na veġaraġo beġene gubakaua, ema veġaraġo tarimari ġeri genagena gabuna bene namo-vedaurea. Korana ma ġaraġona, senaġina ekimara-karaoni, o ma eveġaraġo-sirivaġini tarimana, ema mata-boraġa veiġari ġeveini tarimari mabarari tu Barau na ġeri rakava voini bevinirini.

<sup>5</sup> Moni asi boġono uravini-lelevaġiri. Kara dagara ġemi ai maniġeri boġono ġabiraġeri ma iakumi ġesi. Boġono kira, mai dagara ġemai maiġeri tu ġemai ilaila. Korana Barau tu ekirato,

“Au na asiġina ġinavaġi baraga-kwanemini,  
ema ġereġami asiġina ġinavaġi baiaġuimini.”

<sup>6</sup> Moġa lorinai nuġara ma kokoreri ġesi bitana kira,  
“Vereġauka na au bevaġa-kavaguni,

be au asi bagarini.

Tarimarima na tu kara beġe veiani au ġegu ai?”

<sup>7</sup> Ġotuġamaġi-ġenoġoi, ġeguine-iaġimito-ġoi tarimari ġotuġamaġiri. Ġia na Barau ġena guruġa ġemi ġekiraġito. Ġia ġeri maġuri na kara ġefoforito eiaġoto mo ġea maseto boġono tuġamaġiri, ema ġia ġeri veġabidadama boġono tovotovori.

<sup>8</sup> Iesu Keriso tu ġoraġani, toma, ema vanaġivanaġi asi beirauni. <sup>9</sup> Vevaġa-riba irauirauri na dabara moġonina na asi beġene ġori-veġitami. Namona tu Barau ġena varevare-bara na ġita iaukara bene vaġa-kokoreri. Ġaniġani taravaturi irauirauri na ġita iaukara tu asi beġe vaġa-kokorerini. Moġeri taravatu ġekorana-iaġirito-ġoi tarimari tu namo ta asi ġeġoitaġoato.

<sup>10</sup> Ġita tu ma ġera fata veaġana. Senaġina Barau toma-rakariġona ġana farai rubuna nuġanai ginitaġo ġauveiri ġeveito-ġoi tarimari tu mai fatai asi beġe ġaniġanini.

<sup>11</sup> Rubu Vevaġa verena baregona na boromakau, nanigosi, mamoe evaġirito-ġoi nai, tauġaniri tu eġabi-rosirito-ġoi Isaraela tarimari ġeri totoġa gabuna na, benamo murikai vau ea gaburito-ġoi. Rarari moġo Vevaġa Lelevaġi Gabunai eġabi-toġarito-ġoi, rakava ġabiveġitari varevarena bene vei-iaġiri ġana. <sup>12</sup> Moġesina naima Iesu maki rarana na tarimarima bene vaġa-veaġari ġana tu, Ierusalemata vanuġa barana maġuna murikanai emidigu-midiguto. <sup>13</sup> Moġa lorinai ġita maki Iesu ġenai totoġa murikana ġana sirakarsi. Be, ġia na eġabiato maiakana ġita na maki bitana ġabia. <sup>14</sup> Korana mainai ġita tu asi ġera tanu-vanaġivanaġi vanuġana. A ġita tu vanuġa vau ma beiaġomani dagarana tavetauani. <sup>15</sup> Moġa lorinai vanaġivanaġi Barau vonevone-raġena varevareri Iesu ġenana bitana vini-raġea Barau ġenai. Barau arana vonevone-raġena tu ġita murura ġwaġwana. <sup>16</sup> Veiġa namori veiveiri asi boġono tuġa-rekwari, ema ġemi ai guruġa moġoniri maniġeri karomi ġeri maki boġono kiraġi. Korana tu maniġesina veiġari tu ginitaġo dagarari namori Barau na eiaku-iaġirini.

<sup>17</sup> Ġeguine-iaġimini tarimari garori boġono seġaġiri, ema ġeri veġorikau maorona gaburenai boġono tanu. Korana ġia na tu ġomi ġemi maġuri ġeġita-ġaurini, ema ġomi ġemi maġuri aiġesina Barau ġenai beġea kiraġirini. Garori boġono seġaġiri, be ma iakuri ġesi ġeri ġauvei beġene veia, a dia nuġari ma metori ġesi. Korana bema nuġari ma metori ġesi ġomi beġe narimini nai tu, ġomi na namo ta asi boġo doġariani.

<sup>18</sup> Ġema boġono ġuriġuri. Ġai ribama ġai nuġama tu veiareva Barau ġoiranai, ema ġema ura barana tu vegubakau ai moġo baġana tanu. <sup>19</sup> Ġegu noġinoġi barego lelevaġina ġomi ġemi ai tu boġono ġauġau, be ġemi ai ma bana ġenoġoi-ġariġari.

<sup>20</sup> Maino Barauna na ġera Vereġauka Iesu tu betanu-vanaġi vanaġini ginitaġo rarana ġenana ma evaġa-maġuri ġenoġoiato. Iesu tu mamoe nari tarimana baregona. <sup>21</sup> Mai maino Barauna na dagara namori mabarari bene vinimi, ġena ura boġono veia ġana. Ema kara ġia na eiaku-iaġirini dagarari Iesu Keriso ġenana ġita nuġarai bene ġauvei-iaġiri. Mareva baregona tu ġia ġena bene iaġo mo vanaġivanaġi. Amen.

<sup>22</sup> Tarikakagu mabarami, anoġimini, ġegu vevaġa-naġi guruġari maiġeri boġono ġabi-raġeri ma nuġami namori ġesi; korana fefa tu kubina moġo batorea. <sup>23</sup> Au aurani navaġa-ribami, ġita tarikakara Timoteo tu dibura numana na beġe tuġu-vaġia. Bema ġia bema raġasi-ġarimoġini tu, tauma ruarua baġa iaġosini ġitaġitami.

<sup>24</sup> Ġema vevaġa-namo ġemi veġorikau tarimari ema Barau ġena tarimarima vevaġari mabarari boġono viniri. Itali tarimari na maki ġemi vevaġa-namo beġe tuġu.

<sup>25</sup> Barau ġena namo e varevare-bara mabarami ġemi ai bene tanu.

## IAKOBO (O IAMES) ĠENA TORETORE

Iakobo (o Iames) vaġa-foforina guruġari

Mai fefa tu Iakobo (o Iames), Iesu tarina, na etoreato. Ġia tu Ierusalemka ekalesia ġorikauna tarimana ta. Mai fefa etoreato laġanina tu 45 ma 49 fakari nuġanai ta, mo tu Iesu emaseto murinai.

Mai fefa etoreato korana tu, 1) Heberu ekalesiari veribaġani ema meto baregorige ġeġoitaġoto-ġoi nai, nuġari bene vaġa-gwaġiġiri etato; 2) Heberu ekalesiari vefakari ai tu veiġa ema maġuri asi roroġotori tari ġeġorato-ġoi, naima moġeri bene vei-roroġotori ġana uranai; 3) Heberu ekalesiari bene kira-varari, veġabidadama korikorina tu veiġa namori na bevaġa-foforiani.

Iakobo na mai fefa tu maiġesi eboioġaiato:

1. Veġabidadama veribaġani na betovo-naġiani ema bevaġa-foforiani - karoa 1:1-18
2. Veġabidadama ġera ġauvei e veiġa na bevaġa-foforiani - karoa 1:19-2:26
3. Veġabidadama ġera guruġa na bevaġa-foforiani - karoa 3
4. Veġabidadama Barau korana-iaġina maġurina korikorina na bevaġa-foforiani - karoa 4-5

<sup>1</sup> Au Iakobo (o Iames), Barau e Vereġauka Iesu Keriso ġeri vetuġunaġi tarimagu, ġeguna mai fefa eiaġosini, ġomi Isaraela doġoromi gabanana ruarua (12) tanobara boruri ai ġotanau-lausilausini ġemi ai. Avaġa-namomini.

*Veribaġani ġenana veġabidadama bekokoreni*

<sup>2</sup> Tarikakagu mabarami, veribaġani iraurau boġo ġoitaġorini nai, boġono iaku-iaġiri moġo. <sup>3</sup> Korana ġomi ribami, veribaġani na ġemi veġabidadama etovo-naġirini nai, kokore ema vevaġa-gwaġiġi evaġa-ġorarinai. <sup>4</sup> Benamo kokore ema vevaġa-gwaġiġi ġemi ai bene barego-korikori, be ġemi ai maki kerere ta asi bene tanu e vetoukau ta maki asiġina, ema dagara tai asi boġono rabu.

<sup>5</sup> Senaġi bema ġomi fakami ai ta asi iaunegana nai tu, Barau bene noġia, ġia na beviniani, korana Barau tu nuġana mabarana ema nuġana ma iakuna ġesi ġia ġenoġiani tarimari mabarari evinirini. <sup>6</sup> Senaġi enoġini nai tu veġabidadamai moġo bene noġi, nuġana asi bene daradara. Korana eiauvo-iauvoni tarimana tu davara ureurena iavara na ekwari-iaġo kwari-iaġomaiani kavana. <sup>7</sup> Moġesi tarimana tu bene riba, ġia Vereġauka ġenana dagara ta tu asi bedoġariani. <sup>8</sup> Etuġamaġi-ruaruani tarimana tu ġena ġauvei mabarari ai asi eruġa-gigitarini.

*Asi ġena-ġana tarimana ema ma ġena-ġana tarimana*

<sup>9</sup> Tarikaka ta asi ġena e asi ġana tu bene iaku, korana Barau ġenai ġia tu barego. <sup>10</sup> Ema ma ġena ma ġana tarimana maki bene iaku, Barau na betore-variġoani neganai. Korana berekwa-rekwani boġa veraverari kavana. <sup>11</sup> Ġaro emaraġeni nai, ekirini gugurana na ġauġa etunu-maraiani, benamo veraverana eketo-vaġini, ġitaġitana marevana ekorini. Ġena-ġana vovoka tarimana maki moġesina kavana berekwa-rekwani ġena taġa ġauveiri iaġoviniri nuġanai.

*Vetovonaġi ema veribaġani ainana eiaġomani*

<sup>12</sup> Veribaġani nuġari ai evevaġa-gwaġiġini tarimana tu bene iaku, korana mo vetovonaġi bekorini nai, roġo beruġa-taġoni tu maġuri koronana beġabiani. Mo maġuri tu Barau na ekiraġi-toreato ġia ġeura-viniani tarimari ġeri. <sup>13</sup> Bema tarima ta veribaġani edoġariani nai, asi bene kira, "Mai veribaġani tu Barau ġenana eiaġomani." Korana Barau tu veiġa rakavari na asi beġe tovo-naġiani riba, ema ġia na tarima ta maki asi eribaġaniani. <sup>14</sup> Senaġi tarimarima veribaġani edoġariani tu bema ġia eveġwa-veġitani, benamo tuġamaġi rakavari na nuġana ġeġaniani, ġeġofaiani. <sup>15</sup> Ġena ura rakavari na

nuḡana ḡevaḡa-vonuani, benamo rakava ḡevaḡa-ḡoraiani. Ema rakava etubu-baregoni nai tu mase evaḡa-ḡoraiani.

<sup>16</sup> Tarikakagu namomi, ta na asi bene ḡofami. <sup>17</sup> Vevaḡa-ḡauna dagarari namori mabarari ema varevare roroḡotori dagarari mabarari tu tuḡuna na ḡeiaḡomani, Mama Tamana, guba mamana eveiato Barauna, ḡenana ḡemariḡoni. Guba mamana eirauni, senaḡi ḡia tu asi eirauni o mukuna na maki asi eḡabiani. <sup>18</sup> Ḣia tauḡena ḡena urai moḡo ḡena guruḡa moḡonina ḡenana evaḡa-maḡurirato, korana tarimarima ema ḡemaḡurini dagarari tari ḡimana na eveirito dagarari mabarari fakari ai bitana guine ḡana.

### *Seḡaḡi e veiḡa*

<sup>19</sup> Tarikakagu namomi, maiḡa tu boḡono ribaia: Ḣomi tata guruḡa seḡaḡi-seḡaḡiri ai boḡono ḡarimoḡi, senaḡi guruḡai boḡono veḡabitari, ema asi boḡono baru-ḡariḡari. <sup>20</sup> Korana tarimarima ḡeri baru ḡerina Barau ḡena veiḡa roroḡotori asi beḡe forofori. <sup>21</sup> Moḡa lorinai maḡuri rakavari ema veiḡa mirori mabarari boḡono fitoḡari. Barau na nuḡami ai evaroato guruḡana boḡono ḡabi-raḡea ma manaumi ḡesi. Korana mani guruḡa na bevaḡa-maḡurimini riba.

<sup>22</sup> Ḣena guruḡa tu asi boḡono seḡaḡiri moḡo, senaḡi ḡoseḡaḡirini guruḡari tu ḡemi veiḡai boḡono vaḡa-foforia, tauḡemi boḡo veḡofani garina. <sup>23</sup> Deikara Barau ḡena guruḡa eseḡaḡiani moḡo, senaḡi veiḡana tu asi eveiani tu veḡia ai tauḡena ḡoirana eḡitaiani kavana. <sup>24</sup> Tauḡena veḡiai eveḡitani, benamo eraka-veḡitani nai tu ma evetuḡa-rekwani ḡia vetoḡana tu aiḡesina. <sup>25</sup> Senaḡi deikara taravatu namo vedaureana, tarimarima ḡeri rakava eruḡa-vaḡirini taravatuna, eḡita-ginikauani, eseḡaḡi-vanaḡi vanaḡiani ema asi eseḡaḡi-taḡuini, senaḡi ḡena veiḡai evaḡa-foforiani, ḡia tu Barau na ḡena ḡauvei mabarari nuḡari ai bevaḡa-namoani.

<sup>26</sup> Bema tarima ta tauḡena evekiraḡini tu Barau ekorana-iaḡiani etoni, senaḡi meana tu asi enariani, mani tarima tu tauḡena moḡo eveḡofaḡofa-iaḡiani ema Barau korana-iaḡina veiḡana maki asi tauna. <sup>27</sup> Ḣita Tamara Barau na ekalesia tarimana namo vedaureana e moḡonina maiḡesi etuḡamaḡiani: Gara e vabu ḡeri taḡitaḡi ai eḡita-ḡaurini ema tauḡena evenarini tanobara mirona na bevemironi garina.

## 2

### *Ekalesia mabarari tu ilaila moḡo*

<sup>1</sup> Tarikakagu mabarami, ḡera Vereḡauka Iesu Keriso mamana e seḡukana tu barego, ḡia ḡovaḡa-moḡoniani tarimami, tarimarima mabarari boḡono ḡabiraḡe-ilailari, dia ḡeri vetoḡai boḡono ḡabi-raḡeri. <sup>2</sup> Bema tarima ta, ḡimana ma golo aḡevana e ḡena dabuḡa maki irau moḡo, bema raka-toḡani ḡemi vegogo nuḡanai, ema asi ḡena-ḡana tarimana ta ḡena dabuḡa tu kitakata bema raka-ḡurani. <sup>3</sup> Benamo ḡomi na dabuḡa ma marevana eveiani tarimana tu boḡo gubakau-baregoani, benamo boḡo vaḡa-guruḡaiani, boḡo kirani, “Mai tanutanu namonai noma tanu,” a asi ḡena-ḡana tarimana tu boḡo kiraiani, “Iomonai noa ruḡa,” o, “Mai kurabo ai noma tanu au kwakugu koranai.” <sup>4</sup> Moḡa ḡenana ḡomi tu tauḡemi moḡo ḡovevaḡa-irauni ema vevaḡa-maoro maki ḡoveiani ḡemi tuḡamaḡi rakavari ḡerina.

<sup>5</sup> Ḣoseḡaḡi, tarikakagu namomi, Barau na mai tanobarai asi ḡeri asi ḡari tarimari eḡabi-viriḡirito, veḡabidadama na beḡene vonuvonu-raḡe, ema ḡena Basileia beḡene ḡabia uranai. Mo Basileia tu Barau na ekiraḡi-toreato, ḡia ḡeura-viniani tarimari moḡo beḡe raka-toḡani. <sup>6</sup> Senaḡi ḡomi na asi ḡeri ema asi ḡari tarimari tu ḡoḡita-ḡuiraririni. Dei na ḡomi evaḡa-rakavamini, ema einu-iaḡomini Kota gabuna ḡana? Ma ḡeri-ḡari tarimari maniḡesi ḡeveini, ene? <sup>7</sup> Ḣia na mani ara namona, ḡomi na ḡovaḡa-moḡoniani tarimana arana Keriso, ḡekiraḡi-rakava rakavaiani.

<sup>8</sup> Dagara namona tu maiḡa: Barau ḡena Basileia taravatuna boḡono korana-iaḡia, Buka Veaḡai ḡetoreato maiḡesi ekirani, “Sevimu tarimana bono ura-vinia tauḡemu oveura-vinini kavana.” Maniḡa ḡokorana-iaḡi korikoriani nai tu maorona ḡoveiani. <sup>9</sup> Senaḡi

bema ġomi na tarimarima ġeri vedabuġa o dagi ilailari ai moġo ġoġabi-raġerini nai, ġomi tu rakava ġoveiani, ema taravatu na maki ekiramini, ġomi tu taravatu ġokira-fitoġaiani tarimami. <sup>10</sup> Korana mo deikara na taravatu mabarana ekorana-iaġiani, senaġi sebona moġo eketoni, ġia na taravatu mabarana ekira-fitoġaiani. <sup>11</sup> Korana mo Barau sebona ekirato, “Asi bono veġura-vanaġi,” ma ekirato, “Asi bono vaġivaġi.” Moġa lorinai bema ġoi asi boveġura-vanaġini, senaġi bovaġivaġini nai, ġoi tu taravatu okira-fitoġaiani tarimamu. <sup>12</sup> Ġoguruġani ema veiġa ġoveirini nai, Barau ġena taravatu boġono tuġamaġia, korana mo tu ma seġukana tarimarima ġeri rakava ġerina beruġa-vaġirini. Moġa maki bea vevaġa-maoro vinimini. <sup>13</sup> Deikara tarimarima asi evetuġa-ġwarini tu, Barau na maki ġia asi bevetuġa-ġwaiiani ġena Kota baregona ġaronai. Senaġi deikara ta na tarimarima evetuġa-ġwarini, Kota garina asi bene vei, korana vevetuġaġwa na vevaġa-maoro evanaġiani.

#### *Veġabidadama ma veiġana*

<sup>14</sup> Tarikakagu mabarami, tarima ta bekirani, ġia tu ma ġena veġabidadama, senaġi bema ġena veiġa na asi evaġa-moġoniani nai, kara namona bevaġa-ġoraiani? Mo veġabidadama na bevaġa-maġuriani riba ba? <sup>15</sup> Vaġa-ilailana, bema tarikaka tauna ta o vavinena ta asi ġena dabuġa ema asi ġana ġaniġani. <sup>16</sup> Benamo ġomi ta na bokiraiani, bokirani, “Ma nuġa namomu ġesi noiaġo. Bono veseġo, be asi bene naguremu e bono ġanimase-ginikau!” Senaġi tauġanina eura-vinirini dagarari tu asi oviniani, ġena namo tu kara? <sup>17</sup> Veġabidadama maki moġesi, bema veġabidadama ġereġana moġo ema veiġana asi evaġa-foforiani nai tu mase, asi tauna.

<sup>18</sup> Senaġi tarima ta ma bekirani, “Ġoi tu ma ġemu veġabidadama, senaġi veiġa tu au ġegu ai.” Benamo au ġegu vevaġa-veve tu iniġesi, “Ġemu veġabidadama naġitaia. Kamara dabarai bovaġa-ġitaguni bema veiġa asi evaġa-foforiani nai? Senaġi au ġegu veġabidadama tu fofori, ġegu veiġa na evaġa-ġitamuni.” <sup>19</sup> Ġoi na ovaġa-moġoniani, Barau tu sebona moġo. Namu! Senaġina iauka rakavari na maki ġevaġa-moġoniani, benamo ġeġoġo-ġoġorini korana ġegarini. <sup>20</sup> Ġoi babo! Ġoi ourani tauna korikori noġitaia veġabidadama veiġana asi evaġa-foforiani tu asi tauna. <sup>21</sup> Ġita senera Aberahamo tu kamasi nai Barau na evaġa-moġoniato ġia tu veiġa iobukaiobuka tarimana? Ġia tu ġena veiġa na natuna Isako fata veaġa iatanai Barau evarevare-viniato. <sup>22</sup> Be oġitaiani, ġia ġena veġabidadama ema ġena veiġa tu ġeġauvei-vegogoto; ġena veġabidadama tu ġena veiġa na ġevaġa-moġoniato. <sup>23</sup> Benamo Buka Veaġai ġetoreato guruġana emoġonito, maiġesi ekirani, “Aberahamo na Barau evaġa-moġoniato, benamo Barau na eġabi-raġeato ġia tu vei-iobukaiobuka tarimana.” Ema Barau na maki ekiraiato, ekirato, “Au ġatagu.” <sup>24</sup> Ġoġitaiani, tarimarima tu ġena veiġa na Barau na eġabi-raġeani, dia ġena veġabidadama ġenana moġo.

<sup>25</sup> Rahaba mata-boraġa vavinena maki moġesi. Ġia tu ġena veiġa ġenana Barau na eġabi-raġeato. Isaraela rivirivi tarimari ġena numai eġabi-raġerito ema dabara boruna ma etuġu-rosirito. <sup>26</sup> Vaġa-ilailana tauġani asi iaukana tu mase, veġabidadama maki moġesi, bema asi veiġana tu mase.

### 3

#### *Murumi boġono nariri*

<sup>1</sup> Tarikakagu mabarami, ġomi ġutuma tu vevaġa-riba tarimami ai asi boġono iaġo. Korana ma ribami, Barau ġena Kota ġaronai ġia na ġai, vevaġa-riba tarimama, ġema veiġa tu bevetau-ġitakaurini, dia ekalesia tarimari tari kavana. <sup>2</sup> Ġita mabarara ġaro ġutuma kerere taveini. Senaġi bema tarima ta kerere ta asi eveiani ġena guruġai nai, ġia tu asi vetoukauna ema tauġanina mabarana benariani riba. <sup>3</sup> Hosi bokanai taritari aurina tatore-toġaiani, korana taurani bene seġaġira; moġesi tauġanina mabarana bita tariiani riba. <sup>4</sup> Lagatoi ġotuġamaġia: Asikeikeina, iavara baregona na vau ekwari-ragaiani, senaġi tarina tu misina korokoro. Mo tari misina korokoro na etariani tarimana ġena

ura gaburi mabarari ġana etari-iaġoani. <sup>5</sup> Moġa ilailanai mea makina: Misina korokoro, senaġi dagara baregori eveiavi-iaġirini.

Boġa maki aiġa baregona, senaġi karava misina na beġara-ġosiani. <sup>6</sup> Mea maki karava kavana. Tauġanira mabarari fakari ai ġia tu rakava gabuna tauġanira mabarana evaġa-miroani. Tauġanira ema iaukara evaġa-rakavarini. Ġera tanu dabarari mabarari mea na bevaġa-kerererini riba, korana ġia tu karava kavana ġita eġararani. Mo karava tu eġaravanaġi vanaġini gabuna na eġabini. <sup>7</sup> Tarimarima tu vevaġa-marana ma ribana, ema ġemaġurini dagarari irauirau maki mabarari evaġa-marinarini e evaġa-marandarito-ġoi ilailana manu, mota, davara dagarari, ema boġa bairi maki. <sup>8</sup> Senaġi tarima ta na mea tu roġosi roġo bene vaġa-maranaia. Ġia tu rakava ema asi vaġa-maranaia, vevaġa-mase nanuna rakavana na evonuvonu-raġeto. <sup>9</sup> Ġita meara na ġera Vereġauka ema Tamara tavaġa-namoani, ema meara na maki Barau na ġia vetoġana kavana eveirito tarimarimari tavaġa-rakavarini. <sup>10</sup> Mo muru sebona na vevaġa-namo guruġari ema vevaġa-rakava guruġari ġeraka-vaġini. Tarikakagu mabarami, maniġesi veiġa asi bene ġora. <sup>11</sup> Nanu gurina sebona na nanu ma mamina ema nanu mamakina asi beraka-vaġini, ene? <sup>12</sup> Tarikakagu, figi ġaunai olive asi beġwani ema olive ġaunai maki figi asi beġwani. Moġa ilailanai damena nanuna na ġaruka nanuna asi beraka-rosini riba.

#### *Barau ġenana eiaġomani iaunegana*

<sup>13</sup> Deikara ġomi fakami ai tu ma iaunegana ema etuġamaġi-fakani? Ġena maġuri namori na bene vaġa-moġonia, ema ġena veiġa namori bene veiri ma iaunegana e manauna ġesi. <sup>14</sup> Senaġi bema ġomi nuġami ai mama, baru, ema veiavi ġetanuni nai, asi boġono kira, “Ġai tu ma iaunegama!” Moġesina ġomi na guruġa moġonina ġokure-toġaiani. <sup>15</sup> Mani iaunega tu dia guba na o Barau ġenana ġemariġoni, senaġi ġia tu tanobara ġena, tarimarima nuġari na ġemaraġeni ema iauka rakavari ġerina ġeiaġomani. <sup>16</sup> Korana mama ema veiavi ġetanuni gaburi tu daradara etanuni, ema veiġa rakavari mabarari maki ġetanuni. <sup>17</sup> Senaġi guba na eiaġomani iaunegana tu asi mirona e asi vetoukauna ta. Beġabi-raġeani tarimana ġena veiġa tu maiġa: Maino, garo-namo, veġata. Ġia tu ma ġena vevetuġaġwa ema ġwaġwana maki namori. Veira-veira ema vei-ġofakau asi ribana. <sup>18</sup> Maino ai ġetanuni tarimari tu noġa moġo varovaro ġueri ġevaroni kavana. Maino na veiġa namori ġutuma evaġa-ġorarini. Moġeri veiġa namori tu tarimarima ġeri maġuri ai ġefoforini noġa kwakwa ġaronai dagara namori ġedoġaririni kavana.

## 4

#### *Tanobara veġatana*

<sup>1</sup> Vevaġi e vevane ġomi fakami ai tu kara na ġevaġa-ġorarini? Mani tu ġemi ura rakavari nuġami ai tauġeri tata ġevevaġini ġerina ġeiaġomani. <sup>2</sup> Dagara kota ġourani, senaġi asi ġoġabirini, benamo ġovaġi-vaġini. Dagara kota ġouravini-rakavarini, senaġi asi ġodoġaririni, benamo ġovevaneni e ġovevaġini. Ġoura-vinirini dagarari asi ġodoġaririni, korana Barau asi ġonoġiani nai. <sup>3</sup> Ema ġonoġinoġini maki asi ġoġoitaġoni, korana ġemi tuġamaġi tu rakava; ġourani kara ġonoġirini dagarari tu ġereġami na boġono ġaunari.

<sup>4</sup> Ġomi veġuravanaġi tarimami, (Barau ġenana ġoveġitato tarimami)! Ġomi asi ribami tanobara ġesi boġo veġatani tu Barau asi boġo ura-viniani? Deikara eurani tanobara ġesi bene veġata etoni tarimana na tu Barau evetari-viniani. <sup>5</sup> Buka Veaġai guruġa ta tu maiġesi ekirani, “Barau na ġita nuġarai etoreato Iauka Vevaġana eura-rakavani, ġia na bene guine-iaġira.” Ġomi ġotuġamaġini mo guruġa ġetore-kavaiato?

<sup>6</sup> Senaġi Barau ġena varevare-bara tu barego ġita ġerai. Moġa lorinai ġena Buka Vevaġai maiġesi ekirani, “Eveiavini tarimana tu Barau na etore-veġitaiani, a manau tarimana tu ġena varevare-bara eviniani.”

<sup>7</sup> Moġa lorinai boġono vevaġa-manau, Barau gaburenai boġono tanu. Satani boġono kira-ġoia, benamo ġomi ġemi na beraga-kwareġani. <sup>8</sup> Barau ġenai boġono raka-kavi, benamo ġia maki ġomi ġemi ai beraka-kavini. Ġimami boġono ġuriġiri, ġomi rakava tarimami! Nuġami boġono iarevari ġomi tuġamaġi ruarua tarimami! <sup>9</sup> Boġono dabara-doko, boġono nuġa-midigumidigu, ema boġono taġi. Ġemi riki tu nuġa midigumidigu ai bene iaġo, ema ġemi iaku tu nuġameto ai bene iaġo! <sup>10</sup> Vereġauka ġoiranai boġono tutuġu-tari, benamo ġia na bene ġabi-vaisimi.

*Asi boġono vekira-rakava*

<sup>11</sup> Tarikakagu mabarami, ġomi tata asi boġono vekira-rakava. Deikara na tarikakana ta ekira-rakavaiani o vevaġa-maoro evei-viniani tu Barau ġena taravatu ekira-rakavaiani ema vevaġa-maoro evei-viniani. Bema ġoi na taravatu vevaġa-maoro ovei-viniani nai, ġoi na tu asi okorana-iaġiani, senaġi vevaġa-maoro tarimanai oiaġoni. <sup>12</sup> Barau ġereġana moġo tu taravatu evini-riġoni e vevaġa-maoro evinini tarimana. Ġia ġereġana moġo ma seġukana bevaġa-maġurini ema bevaġa-rakavani. Ġoi tu deikara, be sevimu tarimana vevaġa-maoro ovei-viniani?

*Asi boġono veiavi o vekokoroku*

<sup>13</sup> Ġoseġaġi, ġomi deikara maiġesi ġokirani, “Toma o boinani ġita tu bita iaġoni mai taoni o iomo taoni ġana. Monai laġani sebona bita tanuni, benamo bisnesi bita ġwa-ragaiani, moni asi gadara bita doġarini.” <sup>14</sup> Ġomi asi ribami ġemi maġuri boinani tu kamasi bevetoreni. Ġomi ġemi maġuri tu kara? Ġomi tu goġu kavana, ebere-rosini negakotuna, benamo ma erekwarekwani. <sup>15</sup> Ġomi tu maiġesi boġoro kira, “Bema Vereġauka beurani nai tu bita maġurini ema maiġesi o moġesi bita veini.” <sup>16</sup> Senaġi ġomi tu ġovevaġa-raġeni ema ġoveiavini; moġesi vevaġa-raġeri tu rakava.

<sup>17</sup> Moġa lorinai, kamara tarima ma ribana, ġia na veiġa namona bere veia dagarana, senaġi asi eveiani nai, ġia tu veiġa rakava tarimana.

## 5

*Farefare ġutuma tarimami lorimi boġono vetore*

<sup>1</sup> Ma ġemi farefare ġutuma tarimami, ġoseġaġi! Boġono taġi, boġono taġi-koġokoġo, korana midigumidigu asikeikeina ġemi ai mani eiaġomani. <sup>2</sup> Ġemi farefare mabarari tu beġe boraġa, ema ġemi dabuġa tu faro na beġe ġaniri. <sup>3</sup> Ġemi golo ema ġemi silva tu beġe lala-lala o rasta. Mo lala-lala na tu ġomi bekiraġi-rosimini, ema viriġomi beġanirini karava kavana. Mai ġaro dokori ġana ġemi taġa ġosenurito. <sup>4</sup> Ġoseġaġi, ġemi vamokai ġeġauveito tarimari ġomi na voiri asi ġovinirito. Ġeri nuġa-vekwaraġi ġoseġaġi! Mo ġemi ġaniġani ġevaġa-vegogorito tarimari ġeri taġi tu varau Iarukorokoro Vereġaukana na bea seġaġia. <sup>5</sup> Ġomi ġemi maġuri mai tanobarai tu taġai e iaku verere nuġanai, ema ġoġoreġore-rakavani. Boġo ġanimase ema boġo goba-rakava, vaġivaġimi ġarona tu varau bevotu. <sup>6</sup> Ġomi na asi ġeri rakava tarimari ġovaġa-daġa-kavarito ema ġovaġi-maserito, ġia na asi ġeġabi-iaunaġimito.

*Vevaġa-gwaġiġi ema ġuriġuri*

<sup>7</sup> Tarikakagu mabarami, boġono vevaġa-gwaġiġi bene iaġo mo, Vereġauka bene iaġoma. Iaraġa tarimana ġoġitaia, evaġa-nogani, ġena vamokai varovaro dagarari tauri namori enaririni, evevaġa-gwaġiġini eiaġoni mo, ġura guinena e ġura ma beragu-gabini ġurana eraguni. <sup>8</sup> Ġomi maki boġono vevaġa-gwaġiġi. Nuġami beġene kokore, korana Vereġauka ġena iaġoma maki varau bekavinaġi.

<sup>9</sup> Tarikakagu mabarami, tauġemi fakami ai asi boġono verori-tore, Barau na vevaġa-maoro bevinimini garina. Ġoseġaġi, Kota eseġaġini tarimana tu varau ġatama-bokai eruġa-taġoni. <sup>10</sup> Tarikakagu mabarami, Vereġauka aranai ġeguruġato-ġoi peroveta tarimari ġotuġamaġiri. Ġeri midigumidigu nuġari ai ġevevaġa-gwaġiġito-ġoi. Ġomi



maki moġesi boġono vevaġa-gwaġiġi. <sup>11</sup> Ġoġitaiani, ġita na tavaġa-raġerini, korana ġevevaġa-gwaġiġito nai. Iobu ġena vevaġa-gwaġiġi varina tu ġoseġaġiato, ema ġomi ma ribami, Vereġauka na kamasi dokonai voina namona eviniato, korana Vereġauka ġena veuravini ema ġena vevetuġaġwa tu barego vedaurea.

<sup>12</sup> Tarikakagu mabarami, dagara barego vedaureana tu maiġa: Guruġa gwaġiġiri na asi boġono kiraġi-tore ġemi guruġa vaġa-moġoniri ġana. Guba o tanobara o dagara boruna ta aranai asi boġono kiraġi-tore. Bema “Oi” ġotoni nai tu, oi moġo boġono si, a “Asiġina” ġotoni nai maki, asiġina moġo boġono si. Moġesi tu Barau na asi bekiramini ġomi tu kerere.

Ġuriġuri ma seġukana

<sup>13</sup> Ġomi fakami ai ta emidigumidiguni ba? Bene ġuriġuri. Ta eiakuni ba? Barau vaġa-raġena mariri bene ġabi. <sup>14</sup> Ta ekeveni ba? Ġia tu ekalesia ġeġori-kauani tarimari vetuġuri bene vei, beġenema ġuriġuri ġia iatanai ema diġa na beġenema dau Vereġauka aranai. <sup>15</sup> Benamo ġauġau ma veġabidadamari ġesi nai tu, keve tarimana benamoni. Barau na ġena keve bevaġa-namoani, ema bema rakava eveito nai, ġena rakava betuġamaġi-fitoġarini. <sup>16</sup> Moġa lorinai, ġemi rakava karomi tata ġeri ai boġono kiraġi-foforiri, ema tata ġeri boġono ġuriġuri, be ġemi keve na boġono namo. Barau ġena ura eveirini tarimana ġena ġauġau tu seġuka rakava. <sup>17</sup> Elia tu tarimarima ġita kavana. Ġia eġuriġuri-gwadagwadato ġura asi bene ragu ġana, benamo tanobarai ġura laġani toitoi (3) ma ġue imaima sebona (6) asi eraguto. <sup>18</sup> Ma eġuriġuri-ġenoġoito, benamo guba evekeo-fakato, ġura ma eraguto; benamo tano na ġaniġani ma evaġa-ġoraiato.

<sup>19</sup> Tarikakagu mabarami, bema ġomi ta Barau ġena guruġa moġonina ġenana beraka-veġitani, benamo ta na ma bea ġori-ġenoġoiani nai tu, veiġa namona beveiani. <sup>20</sup> Boġono riba, deikara na veiġa rakava tarimana ġena dabara ġeġevana na eġori-ġenoġoiani nai tu, ġia na mo veiġa rakava tarimana iaukana mase ġenana evaġa-maġuriani, ema rakava ġutuma maki Barau na etuġamaġi-fitoġarini.

## PETERO ĠENA TORETORE GINIGUINENA

1 Petero vaġa-foforina guruġari

Petero tu kone ai maina tarimana, ma ġia tu Iesu ġena mo mero gabanana ruarua (12) nuġanai maki. Mai fefa Petero na tu betaġu Romai etoreato laġani 62 ma 64 fakari nuġanai ta. Mo tu Iesu maki emaseto murinai vau.

Siri baregori mai fefai tu karoa 1:7; 4:12-13.

Mai fefa etoreato nuġanai ġia ġena ura tu Iuda ekalesiari ema irau bese ekalesiari 1) bene vaġa-kokoreri, be tarimarima na ġevaġa-midigu midigurito-ġoi nuġanai beġene ruġa-gwaġiġi; 2) ġoirai veribaġani baregori beġe raga-ġoitaġorini moġeri ġana erovinatorerito; 3) ġoirai Barau ġena mareva baregona ġeġoira-taġoani moġa ġeri evaġa-foforiato; 4) bene launaġiri, be ekalesia ġauveiri korikori beġene veiri.

Petero na ġena fefa tu maiġesina eboioġaiato:

1. Barau ġena vevaġa-maġuri ma ekiraġi-variġu-ġoiato - karoa 1:1-2:10

2. Midigumidigu nuġanai aiġesina beġene tanu - karoa 2:11-4:11

3. Midigumidigu nuġanai ġeri veiġa ġobiri beġene toreri - karoa 4:12-5:11

<sup>1</sup> Au Petero, Iesu Keriso ġena apostolo taugu, na mai fefa atore-iaġosiani. Ġomi, Barau ġena ġabi-viriġi tarimami, ġemi gabu korikori ġoraga-kwanerito, toma tu Ponto ai, Galatia ai, Kapadokia ai, Asia ai, ema Bitinia tano boruri ai ġotanu-lautilausini tarimami ġemi ai. <sup>2</sup> Ġomi tu Barau, ġita Tamara, na eriba-guinemito ema eġabi-hidimito, ġena tarimarimai boġo iaġoni. E ġia Iaukana na evaġa-veaġamito korana tu, Iesu Keriso boġono seġaġi-vinia ema ġia rarana na bene ġuriġimi ġana, be veiareva boġono tanu Barau ġoiranai.

Barau ġena varevare-bara ema maino na bene vaġa-vonuvonu-raġemi.

Maġuri vanaġivanaġi

<sup>3</sup> Barau, ġita ġera Vereġauka Iesu Keriso Tamana, sivaġa-namoa! Korana ġena vevetuġaġwa barego vedaureana lorinai, maġuri variġuna ġita evinirato, Iesu Keriso mase na evaġa-variġisi ġenoġoiato ġenana. Mai veiġa ġenana ġita nuġara tu maġuri vanaġivanaġi tatuġamaġi-kauani dagarana na evaġa-vonurini. <sup>4</sup> E Barau na ġena tarimarima ġeri etore-rogoani vevaġa-namo baregona, bitana ġabia dagarana, tu ġoirai taġita-iaġoani. Barau na gubai etore-rogorini ġomi ġemi, korana monai tu asi beġe boraġani, asi beġe rakavani, e asi beġe verumuni. <sup>5</sup> Ġomi tu ġemi veġabidadama dainai Barau seġukana na eġita-ġaumini, beiaġoni mo, ġia na varau erovina-toreato vevaġa-maġurina nega magonai bevaġa-foforiani, matami na boġo ġitaiani e boġo ġabiani.

<sup>6</sup> Ġomi toma kotunai tu midigumidigu barego ġoġanini, korana veribaġani irauirauri ġoġoitaġoni bene. Senaġi ġemi iaku tu bene barego-lelevaġi, korana Barau ġena vevaġa-maġuri boġo ġabiani bene. <sup>7</sup> Maiġeri veribaġani irauirauri ġeiaġomani tu, Barau na ġomi ġemi veġabidadama etoto-iobuka iobukarini, korana Iesu Keriso beforini ġaronai tu, Barau ġenana vevaġa-raġe e mareva namona ema vegubakau boġo doġariani. Golo karava na evaġa-namo vedaureaiani ma voina evaraġe-lelevaġini, senaġi ġomi ġemi veġabidadama voina tu ma varaġe lelevaġi. <sup>8</sup> Ġomi na roġosi roġo maki ġoro ġitaia, senaġi ġoura-viniani. Initoma maki asi ġoġitaiani, senaġi ġoġabidadama-viniani ema iaku na ġovonu-vonu-raġeni. Ġemi iaku maki asi tau kirari vaġa-namona ta. <sup>9</sup> Korana Keriso ġenai ġoveġabidadamani voina tu, ġomi vevaġa-maġuri ġoġoitaġoni.

<sup>10</sup> Mai vevaġa-maġuri maiġa tu peroveta tarimari na ġevetau-ginikau ginikauato, ema ġia na ġekiraġi-tore guineato, mai varevare dagarana tu Barau na ġomi bevinimini, (Keriso beiaġomani ġaronai). <sup>11</sup> Beiaġomani ġarona e kamasi beiaġomani beġene ribaia

ġana ġetuġamaġi-vekwaraġito-ġoi. Mo negai Keriso Iaukana tu ġia nuġari ai eġauveito-ġoi ema ekira-vararito-ġoi, Keriso tu ġena midigumidigu bevevaġa-gwaġiġi-iaġiani, ma moġa murinai vau ġia marevana baregona beġabiani. <sup>12</sup> Barau na peroveta tarimari evaġa-ribarito, ġia na mo vari ġeġobata-iaġiato-ġoi tu dia ġia tauġeri ġeri namo ġana, senaġi ġomi ġemi. Korana ġia na mo dagara, ġekiraġirito dagarari, tu toma ġena vetuġunaġi tarimari na Vari Namona ġevari-fiuani guba na etuġu-mariġoato Iauka Veaġana seġukanai, be ġoseġaġini. Maiġeri dagara tu aneru maki ġeri ura baregona beġene ribaia.

### Boġono veaġa

<sup>13</sup> Moġa lorinai, nuġami beġene veiareva, boġono vevaġa-gwaġiġi. Iesu Keriso befoforini ġaronai Barau na bevinimini varevarena ġenai, nuġami mabarana ġesi boġono torea. <sup>14</sup> Barau natunai ġoiaġoto nai, ġia boġono seġaġi-vinia. Barau asi ribami negari ai tauġani ġena ura rakavari na ġeġori-ġeġevamito-ġoi veiġari asi ma boġono vei-ġenoġoiri. <sup>15</sup> Senaġi ekeamito Barauna tu veaġa, ilailanai ġomi maki boġono veaġa ġemi veiġa mabarari nuġari ai. <sup>16</sup> Korana Buka Veaġa nuġanai etoreato, Barau ekirato, “Boġono veaġa, korana au tu veaġa.”

<sup>17</sup> Ġoġauġauni negari ai, Barau tu Tamami ai ġokiraġiani, ma ġia na tarimarima mabarari tu dabara sebonai moġo evaġa-maoro vinirini, tata ġeri veiġa ilailari ai; moġa lorinai mai tanobarai roġo ġotanukauni nuġanai tu, Barau boġono gubakaua e boġono seġaġi-vinia. <sup>18</sup> Korana ma ribami, senemi ġeri maġuri rakavari ġomaġuri-iaġirito-ġoi ġerina Barau na evaġa-maġurimito ginitaġo dagarana tu asi berakavani dagarana. Dia silva o golo kavari. <sup>19</sup> Senaġi evaġa-maġurimito ginitaġo dagarana tu Keriso rarana, rara namo vedaureana, Barau ġena mamoe natuna rarana asi mirona e kererena. <sup>20</sup> Ġia tu Barau na tanobara roġosi bere veia neganai veġata, eġabi-viriġiato. Senaġi ġita vaġa-maġurira ġana mai nega gabiri ai ema vaġa-foforiato. <sup>21</sup> Ġia bakunai Barau ġoġabidadama-viniani. Barau na mase ġenana evaġa-variġisi-ġenoġoiato, e marevana baregona eviniato. Moġa lorinai ġomi na Barau ġoġabidadama-viniani, ema ġemi tuġamaġikau ġia ġenai ġotoreani.

<sup>22</sup> Toma, ġomi na guruġa moġonina ġoseġaġi-viniato lorinai, tauġemi ġoveiarevato, ema karomi veġabidadama tauri ġesi moġoni ai ġoveura-vevinini. Moġa lorinai boġono veura-vevini ma nuġami mabarari ġesi. <sup>23</sup> Korana ġomi tu ġomaġuri-ġenoġoito, tarima variġu geragerami ai ġoiaġoto, dia tama sina ġerina, ġia tu ġemaseni, senaġi Barau ġena maġuri guruġana, etanu-vanaġi vanaġini guruġana, ġenana evaġa-maġuri ġenoġoimito. <sup>24</sup> Buka Veaġa ekirani kavana, “Tarimarima mabarari tu reġi kavana, ġia marevari tu reġi ġwaġwana kavana. Reġi tu ġemaraini,

ema veravera maki ġeketoni,

<sup>25</sup> senaġi Vereġauka ġena guruġa tu betanu-vanaġi vanaġini.”

Mai guruġa tu Vari Namona ġomi ġemi ai ġevari-fiuato.

## 2

### Vereġauka tu maġuri forena, fore namo vedaureana

<sup>1</sup> Moġa lorinai, tuġamaġi rakavari mabarari, e ġofaġofa mabarari, e vemuriġoi mabarari, e mama, ema guruġa rakavari mabarari boġono fitoġa-kwareġari. <sup>2</sup> Vau ġemaġurini mero keiri kavari boġono vei, vanaġivanaġi iauka ratana boka-kokena boġono boka-koke, be moġa niuniunai boġono barego e vevaġa-maġuri boġono ġabia.

<sup>3</sup> Korana ġomi tauġemi na ġodoġariato, Vereġauka ġena namo tu aiġesina.

<sup>4</sup> Vereġauka ġenai ġoiaġoma, ġia tu maġuri forena, tarimarima na ġefitoġaiato, korana asi ġena namo ta ġetato. Senaġi Barau na eġabi-viriġiato, korana fore namo

vedaureana ġia ġoiranai. <sup>5</sup> Maġuri foreri kavana ġoiaġoma, be ġomi maki Barau Iaukana na Rubu Veaġai bene raga-iaġimi. Monai Rubu Veaġa vereri veaġami ai boġono iaġo, ma Barau na Iesu Keriso bakunai eġabi-raġerini iauka varevareri, ġemi maġuri, boġono vinia.

<sup>6</sup> Korana Buka Veaġa ekirani,  
 “Au na fore namo vedaureana ta aviriġiato,  
 ġia tu Sionai (o Ierusalem)  
 duġu forenai avaġa-iaġoato.  
 Dei na ġia bevaġa-moġoniani  
 tarimana tu asi bemaikaiani.”

<sup>7</sup> Ġovaġa-moġoniani tarimami ġemi ai mai fore tu namo vedaurea, senaġi asi ġevaġa-moġoniani tarimari ġeri ai tu,  
 “Numa ragaragana tarimari na  
 asi ġeura-viniato nai ġefitoġaiato,  
 ġekirato fore rakavana,  
 dagnarana tu fore mabarari fakari ai fore namo vedaureana,  
 duġu forenai eiaġoto.”

<sup>8</sup> Ma toretore tai ekirani,  
 “Mai fore na tarimarima bevaġa-kake-naġirini,  
 e bevaġa-ketorini forena.”

Barau ġena guruġa asi ġeseġaġiato dainai, ġevake-naġito, mo tu Barau na ekiraġi-guineato, moġesi beġe veiani.

<sup>9</sup> Senaġi ġomi tu ġabi-viriġi besena, Kini ġena Rubu Veaġa veremi, bese veaġana, Barau ġena tarimarima. Eġabi-viriġimito, mukuna na ekea-rosimito, benamo ġena mama namo vedaureanai etoremto, korana tu ġia ġena veiġa namori boġono kiraġi-foforiri ġana. <sup>10</sup> Guinenai ġomi tu dia Barau ġena tarimarima, senaġi toma ġomi tu ġia ġena tarimarima. Guinenai Barau ġena vevetuġaġwa tu asi ribami, senaġi toma ġia ġena vevetuġaġwa ġodoġariato.

*Barau ġena vetuġunaġi tarimari*

<sup>11</sup> Ġatagu mabarami, anoġi-gwaġiġimini, ġomi tu tarima boru e tanukau tarimami mai tanobarai. Tauġani ġena ura rakavari asi boġono veiri, maniġeri na vanaġivanaġi ġomi iaukani ġevetari-vinirini. <sup>12</sup> Senaġi Barau asi ribari tarimari ġoirari ai ġemi veiġa beġene namo. Beġe rori-toremni, rakava-vei tarimami ai beġe kiraġimini, senaġi ġemi veiġa namori beġe ġitarini neganai, ġia na Barau beġe vaġa-raġeani, ġia na tarimarima bekota-vinirini ġaronai.

<sup>13</sup> Vereġauka ġovaġa-moġoniani nai, gavamani ġeri taravatu mabarari boġono korana-iaġiri: Kini boġono seġaġi-vinia, korana ġia tu varaġe vedaurea. <sup>14</sup> E gavana tauri boġono seġaġi-viniri. Ġia na veiġa rakava tarimari beġene vaġa-rakavari, ema veiġa namo tarimari beġene vaġa-namori ġana eġabi-torerito. <sup>15</sup> Korana Barau ġena ura tu, ġomi ġemi veiġa namori na asi ribari tarimari ġeri guruġa babobabori boġono lautariri. <sup>16</sup> Kokore ai boġono tanu, be dagara ta na asi bene barubarumi, Keriso na eruġa-vaġirito tarimari kavana. Senaġi asi boġono kira, “Ġai tu maġuri namonai e fakanai ġatanuni, be veiġa rakavari baġa veirini tu asi kara ta.” Asiġina. Barau ġena vetuġunaġi tarimami ai boġono tanu. <sup>17</sup> Tarima mabarari boġono gubakauri. Karomi veġabidadama tarimari boġono ura-viniri. Barau boġono vaġa-raġea, e kini boġono gubakaua.

*Keriso kwakuna gabunai boġono raka*

<sup>18</sup> Tuġu-rakaorakao tarimami asi voimi, ġitaġaumi tauri boġono seġaġi-viniri, moġoni ai boġono gubakauri, dia veiġa-namo e garo-namo tarimari moġo, senaġi niara-niara tauri maki. <sup>19</sup> Korana Barau na eura-viniani veiġana tu maiġa: Barau ġena ura ġokorana-iaġirini dainai, enabe asi ġemi rakavai beġe vaġa-midigu midigumini, senaġi boġo vevaġa-gwaġiġini. <sup>20</sup> Ġemi rakava dairi ai beġe kwarimini ma boġo vevaġa-gwaġiġini, moġa ġena namo ġomi ġemi ai tu kara? Senaġi bema veiġa namori

goveini nuġanai beġe vaġa-midigu midigumini ma boġo vevaġa-gwaġiġini moġo, Barau ġoiranai tu namo eġabi-raġeani. <sup>21</sup> Ġomi tu moġesi boġono vei ġana, Barau na ekeamito. Korana ġomi daimi ai Keriso tauġena emidigu-midiguto, e ġia na mai vevaġa-ġita ġomi ġemi ai eraga-kwaneato. Moġa lorinai ġomi tu ġia kwakuna gabunai boġono raka. <sup>22</sup> Ġia na rakava ta asi eveiato, e ta na ġia muruna na ġofaġofa guruġana asi eseġaġiato. <sup>23</sup> Ġeguruġa-rakava-viniato, senaġi guruġa rakavari na asi evaġa-voirito; ġevaġa-midigu midiguato neganai, vaġa-voi guruġari asi ekiraġirito. Ġia ribana, Barau tu vevaġa-maoro tauna iobukaiobukana, naima ġia ġimanai etoreato. <sup>24</sup> Keriso tauġena tauġaninai ġita ġera rakava eġwa-raġerito satauro tuġuna ġana. Moġesi eveito tu, vei-rakava ġenai bitana mase, asi ma bitana vei-ġenoġoia, ema vei-iobukaiobuka ġenai bitana maġuri, Barau ġena ura bitana korana-iaġiri. Boġono tuġamaġi: Ġia manuġana dainai, ġoi onamoto. <sup>25</sup> Ġomi tu rekwarekwa mamoei kavari ġoraka-taġui taġuito-ġoi. Senaġi toma ġomi tu iaukama nariġauna e ġitaġauna tauna Keriso na ma beġabi-ġenoġoimi.

### 3

#### *Veġaraġo vavinemi ema taumi*

<sup>1</sup> Ġomi veġaraġo vavinemi maki moġesi, ġaraġomi gabureri ai boġono tanu. Moġesi boġo veini nai, tari ġaraġomi tu Barau ġena guruġa asi ġevaġa-moġoniani tauri, senaġi ġemi veiġa namori na moġo nuġari beġabirini, benamo beġe vetuġamaġi-kureni; a Barau ġena guruġa ta ġeri tu asi boġo kiraġiani. <sup>2</sup> Korana ġemi veiġa roroġotori ema ġemi vegubakau ġia ġeri ai beġe ġitarini tu namo. <sup>3</sup> Marevami ġenamo-vedaurea urari ai tauġanimi asi boġono vaġa-veraverari. Ilailana, ġuimi ġovei-iraurini, golo ġotoreni e dabuġa namori vedaureari ġoriġorini. <sup>4</sup> Asiġina, ġomi tu lorumi ġuturi neġi boġono vaġa-veraverari, asi beġe rakavani veraverari na, manau e nuġa-namo. Moġeri tu Barau ġoiranai dagara baregori. <sup>5</sup> Guinenai, ġita tubura ġatara ġeri negai maki vavine veaġari, Barau ġenai ġeveġabidadamoto-ġoi vavineri, tu moġesi ġevevaġa-marevato-ġoi, e ġaraġori gabureri ai ġetanuto-ġoi. <sup>6</sup> Sara kavana, ġaraġona eseġaġi-viniato-ġoi; ġaraġona tu “Ġegu vereġauka” etato-ġoi. Ġomi toma tu ġia natuna, bema ġemi veiġa tu namo e kara ta garina asi ġoveini.

<sup>7</sup> Ġomi tau maki ġaraġomi ġesi ġotanuni nai, boġono riba-ginikauri. Boġono riba, ġia tu asi fakosiri. Ġaraġomi boġono gubakauri, korana Barau na maġuri vanaġivanaġi tu ġia e ġomi bevarevare-vinimini. Moġesi boġono vei, be dagara ta na ġemi ġauġau-vegogo asi bene vaġa-rakavari.

#### *Veiġa namori ai bitana midigu-midigu*

<sup>8</sup> Guruġa vaġa-magona maiġa: Mabarami nuġami boġono vaġa-sebonari, boġono vevaġa-kava-vevini, e boġono veura-vevini tarikaka kavari. Boġono vevetuġaġwa-vevini e boġono marana. <sup>9</sup> Veiġa rakavari e garo rakavari asi boġono vevaġa-voi-vevini, senaġi ġevaġa-rakavamini tarimari boġono vaġa-namori. Korana Barau na ekeamito tu moġesi boġono vei, benamo ġomi na maki ġena vevaġa-namo boġono ġabia. <sup>10</sup> Korana Buka Veāġa ekirani,

“Deikara maġuri eurani e ġaro namori bene ġitari etoni tarimana tu meana bene naria, guruġa rakavari asi bene kiraġi,  
e muruna na ġofaġofa guruġari asi bene kiraġiri.

<sup>11</sup> Rakava bene raga-kwaneā,  
veiġa namori bene vei.

Maino bene vetaua nuġana mabarana ġesi.

<sup>12</sup> Korana Vereġauka na tu vei-iobukaiobuka tarimari eġita-ġaurini,  
e ġeri ġauġau eseġaġirini.

Senaġi vei-rakava tarimari tu  
Vereġauka na asi eura-vinirini.”

<sup>13</sup> Veiġa namori bouravini-baregorini nai tu, dei na ġoi bevaġa-rakavamuni? <sup>14</sup> Senaġi irau beġe vaġa-mididgu midigumini ġemi vei-iobukaiobuka dairi ai nai tu boġono iaku. Tarima ta garina asi boġono vei, e asi boġono daradara. <sup>15</sup> Senaġi nuġami ai Keriso boġono korana-iaġia, boġono vaġa-raġea, ġia tu ġomi ġemi Vereġauka. E vanaġivanaġi boġono venari-taġo, bema ta na bedanaġimini, “Kara dainai Keriso ġoġabidadama-viniani” betoni nai, ġena boġono kiraġi-ginikau. <sup>16</sup> Senaġi manau ai e vegubakau ai ġena boġono kiraġi-ginikau. Ġemi veiġa loriri boġono toreri, asi namo gabivau boġono riba ġomi tu asi maoro. Keriso murinai ġorakani ma veaġami ġesi dainai, ġemugumugu-iaġimini e rakavami ġekiraġini tarimari tu tauġeri roġo beġe maiakarini. <sup>17</sup> Barau ġena urai veiġa namori ġoveini dairi ai ġomidigu-midiguni nai tu namo. A asi namo ġemi veiġa rakavari dairi ai boġono midigu-midigu.

<sup>18</sup> Keriso emaseto, ġera rakava bene voi-vaġiri ġana. Ġia tu nega sebona moġo emaseto, asi ma bemaseni. Ġia tu vei-iobukaiobuka tauna, ġita rakava tarimara bene kurevora, be Barau ġenai bene ġori-iaġora ġana. Tauġani maġurinai tu ġevaġi-maseato, senaġi iauka maġurinai ġia tu evariġisi-ġenoġoito. <sup>19</sup> E iaukai ġia eiaġoto mase gabuna o dibura ġana, monai ġetanuni tarimari iaukari ġeri ea ġobatato. <sup>20</sup> Ġia tu guinenai ġekira-sirivaġito tarimari, Noa na ġasi baregona eveiato neganai, benamo Barau na evaġa-nogarito ma vevaġa-gwaġiġina ġesi, (ġeri rakava ġerina beġene vetuġamaġi-kure ġana). Senaġi ġasi baregona nuġanai ġeraka-toġato tarimari tu asi ġutuma. Tauri mabarari tu imaima toitoi (8) moġo nanu na evaġa-maġuririto. <sup>21</sup> Mo nanu moġa tu babatiso vetoġana kavana, korana babatiso na toma ġomi evaġa-maġurimini, dia tauġani mirona ġuriġi-vaġina, senaġi Barau ġonoġiani nuġami bene iarevari ġana Barau ġoiranai. Iesu Keriso mase na evaġa-variġisi ġenoġoiato bakunai evaġa-maġurimini. <sup>22</sup> Ġia tu gubai eraka-toġato, Barau aroribana rekenai etanuni. Aneru, e ma ġeri maoro baregona iaukari, ema seġuka tauri mabarari tu ġia gaburenai ġetanuni.

#### 4

##### *Ekalesia maġurina*

<sup>1</sup> Keriso tu tauġaninai emidigu-midiguto lorinai, ġomi maki ġemi tuġamaġi boġono vaġa-gwaġiġiri, ġia ġena tuġamaġi ġesi beġene ilaila; korana tauġaninai emidigu-midiguni tarimana na veiġa rakavari eraga-kwanerini. <sup>2</sup> Tauna moġa, ġomi roġo mai tanobarai ġotanuni nuġanai tu, tauġanimi ġeri ura rakavari asi boġono korana-iaġiri, a Barau ġena ura neġi boġono korana-iaġia. <sup>3</sup> Ġomi tu kai-veġata Barau asi ribari tarimari ilailari ai ġotanuto-ġoi, mata-boraġa e veġura-vanaġi veiġari ġoveito-ġoi, ġoniu-lelevaġito-ġoi, ġovei-taġuitaġuito-ġoi, ġoniu-vegogoto-ġoi, e barau ġofaġofari ġotoma-rakariġo vinirito-ġoi. <sup>4</sup> Toma, ġia tu ġeveiauni, korana ġia ġesi asi ġovekakoni, e asi ġovei-taġuitaġuini. Moġa lorinai rakavami ġekiraġini. <sup>5</sup> Senaġi ġia tu maġuri tarimari e mase tarimari vaġa-maoro-viniri Barauna ġoiranai beġe ritoġoni, ġeri veiġa moġeri beġe kiraġirini. <sup>6</sup> Moġa lorinai Iesu na Vari Namona tu ġemaseto tarimari iaukari ġeri maki evari-fiuato. Moġesi eveito korana tu, enabe Barau na tauġani ai evaġa-maoro vinirito tarimarima mabarari kavana, (mai tu ġemaseto), senaġi iaukai tu roġo beġe maġurini, Barau emaġurini kavana.

##### *Barau ġena varevare dagarari ġitaġauri tarimari namori*

<sup>7</sup> Dagara mabarari magori tu bekavinaġi. Boġono venari-taġo e boġono vevaġa-gwaġiġi, be ġemi ġauġau asi boġono vaġa-ketoa. <sup>8</sup> Barego vedaureana tu, tata boġono veura-vevini ma nuġami mabarari ġesi, korana veura-vevini na rakava ġutuma elautaririni. <sup>9</sup> Karomi tata ġesi veiġa namori boġono vei-vevini, boġono veġabiraġe-vevini, asi boġono vemugu-mugu e veroritore. <sup>10</sup> Ġomi tata mabarami tu, Barau na evaġa-ġaunamito varevare dagarari iraurau ġitaġauri tarimami namomi, moġa lorinai karomi dairi ai boġono ġauvei-iaġiri, kamara varevare dagarana Barau ġenana ġodoġariato

ilailanai. <sup>11</sup> Deikara eḡobatani nai, ḡia tu Barau ḡena guruḡa bene vari-fiua. Deikara evevaḡa-kavani nai, ḡia tu Barau ḡena kokore na bene vevaḡa-kava. Mo dabarai dagara mabarari nuḡari ai Barau bita vaḡa-raḡeani, Iesu Keriso bakunai. Mareva namona e seḡuka tu ḡia ḡena, bene iaḡo mo vanaḡivanaḡi. Amen.

### *Ekalesia midigumidiguna*

<sup>12</sup> Ḡatagu mabarami, midigumidigu karava mamiri noḡa ḡoḡabini nai tu, nuḡami asi beḡene farevaḡi, asi boḡono kira, dagara boruna ta ḡemi ai eḡorani. (Asiḡina, mani tu ḡomi tovenaḡimi dagarana moḡo). <sup>13</sup> Senaḡi Keriso emidigu-midiguto kavana ḡomidigu-midiguni dainai, boḡono iaku, gabivau ḡia marevana baregona bevaḡa-foforiani neganai vau ma boḡo iaku-sirivaḡini. <sup>14</sup> Keriso murinai ḡorakani nai, rakavami beḡe kiraḡini neganai, boḡono iaku, korana monana boḡo ribani, Barau Iaukana, mareva-namo Iaukana, tu ḡomi iatami ai etanuni. <sup>15</sup> Bema ḡomi ta omidigu-midiguni nai, mani midigumidigu tu dia ovevaḡi-debani, o olemani, o seḡafore veiḡana rakavana ta oveiani, o tarima ta ḡena ḡauvei metona oveiani nai omidigu-midiguni. <sup>16</sup> Senaḡi bema ḡoi tu Keriso murinai orakani dainai omidigu-midiguni neganai, asi bene maiakamu, senaḡi Barau bono vaḡa-raḡea, Keriso arana oḡwa-rakaoani nai.

<sup>17</sup> Barau ḡena vevaḡa-maoro negana tu varau beraḡasi, e vevaḡa-maoro tu Barau ḡena tarimarima ḡeri ai bevesinani. Bema ḡita ḡerai bevesinani neganai, Barau ḡena Vari Namona asi ḡevaḡa-moḡoniani tarimari ḡeri ai tu kamasi bea ḡorani? <sup>18</sup> Korana Buka Veavaḡa ekirani,

“Maḡuri ḡabiḡabina Barau ḡeseḡaḡi-viniani tarimari ḡeri ai tu gwaḡiḡi.

O Barau asi ḡevaḡa-moḡoniani

e vei-rakava tarimari dabarari tu

kamasi bevetoreni? (Ḡia ḡeri ai tu meto lelevaḡi!)”

<sup>19</sup> Tauna moḡa, Barau ḡena ura lorinai midigu ḡeḡanini tarimari tu veiḡa namori moḡo beḡene vei, ema ḡeri maḡuri tu eveirito Barauna ḡimana nuḡanai beḡene toreri, korana ḡia na etuḡamaḡi-kaurini.

## 5

### *Ekalesia ḡorikauna tarimari*

<sup>1</sup> Au na ḡomi fakami ai ekalesia ḡorikauna taumi avaḡa-guruḡamini. Au maki ekalesia ḡori-kauna taugu. Keriso emidigu-midiguto-ḡoi au tu matagu na aḡitaiato, e ḡia marevana baregona bevaḡa-foforiani neganai, au tu ma augu. Moḡa lorinai au na ḡomi anoḡi-gwaḡiḡimini: <sup>2</sup> Barau ḡena mamoe serina boḡono ḡitaḡau-ginikaua. Ḡia na ḡomi evinimito tu, nuḡami na eura-iaḡiani lorinai boḡono ḡita-ḡaua, ḡia ḡena ura ilailanai. Dia mugumugu ai, senaḡi nuḡami na eura-iaḡiani lorinai. Dia moni o farefare boḡono doḡari ḡana, senaḡi nuḡami ḡeri urai. <sup>3</sup> Barau na ḡomi ḡemi veḡitaḡau gaburenai etoreato mamoe serina (o ekalesia doḡorona) asi boḡono dori-naḡinaḡia noḡa moḡo vere baregori ḡeveini kavana. Senaḡi ḡomi marevami boḡono vaḡa-ḡitari, be beḡene tovotovomi. <sup>4</sup> Moḡesi boḡo veini nai, mamoe Ḡitaḡauri Tauna Baregona, Keriso, beḡoirarefoni ḡaronai, korona namo vedaureana, asi berakavani dagarana, boḡo ḡabiani, mo tu maḡuri vanaḡivanaḡi.

<sup>5</sup> Moḡa ilailanai, ḡomi tarima variḡumi maki veḡitaḡau tauri boḡono seḡaḡi-viniri, ma ḡomi mabarami na manau dabuḡana boḡono vedabuḡa-iaḡia, boḡono vevaḡa-kava-vevini, korana Buka Veavaḡa ekirani, “Veiavi tarimari tu Barau na elautaririni, senaḡi manau tarimari tu ḡena namo e varevare-bara evinirini.” <sup>6</sup> Moḡa lorinai, tauḡemi boḡono vevaḡa-manau, Barau ḡimana seḡukana gaburenai, benamo ḡarona bene raḡasi neganai, ḡia na bene ḡabi-vaishimi. <sup>7</sup> Ḡemi nuḡa-vekwaraḡi dagarari mabarari ḡia ḡimanai boḡono toreri, korana ḡia na eḡita-ḡaumini. <sup>8</sup> Boḡono tuḡamaḡi-roroḡoto, boḡono venari! Korana vaḡa-rakavami tauna, Diabolo, tu erakao-rakaoani, laion noḡa

emagarani, emaramarani, ta neġania uranai. <sup>9</sup> Ġemi veġabidadamai boġono ruġa-gigitari, benamo Diabolo boġono kora-ġoia. Korana boġono tuġamaġi, ġoġanini midiguri ilailari tu ġomi karomi tanobara mabaranoi maki ġeġanini.

<sup>10</sup> Senaġi Barau, namo e vare-vare-bara mabarari na evonuto Barauna, na Keriso bakunai ekeamito, nega kotunai moġo boġo midigu-midiguni murinai, ġena tanuvanaġivanaġi marevana namona boġono ġabia ġana. Ġia na vau bevaġa-namo ginikau-mini, bevaġa-ruġa gigitarimini, e bevaġa-kokoremini. <sup>11</sup> Seġuka tu ġia ġena, bene iaġo vanaġivanaġi! Amen.

*Vevaġa-namo magona*

<sup>12</sup> Siluano, (mai tu Silas), na bevaġa-kavagu, mai fefa kubina baġa tore-iaġosia ġomi ġemi. Ġia au na aġitaiani tu, ġita tarikakara ma ġena vetuġamaġikau ekalesia nuġanai. Mai fefa batorea korana tu ġegu ura bana vaġa-kokoremi e bana vaġa-ribami, Barau ġena namo e varevare-bara moġonina tu maiġa. Be mai namo e varevare-bara nuġanai boġono ruġa-gigitari.

<sup>13</sup> Ġomi karomi ekalesia tarimari Babulona ai maiġeri, (mai tu ekalesia tarimari Romai ekiraġirini), ġia maki Barau na eġabi-viriġirito tarimari, na ġemi vevaġa-namo beġe tuġu, e natugu Mareko na maki ġemi vevaġa-namo betuġu. <sup>14</sup> Veuravini verauna na boġono vevaġa-namo-vevini.

Keriso nuġanai ġotanuni tarimami mabarami maino ġemi ai bene tanu.



## PETERO ĠENA TORETORE VAĠA-RUARUANA

2 Petero vaĠa-foforina guruġari

Petero na mai fefa vaĠa-ruaruana maki betaġu Roma na etoreato. Etoreato laġanina tu 65 ma 67 fakari nuġanai ta, mo tu Iesu emaseto murinai. Petero tu mai fefa etoreato murinai vauro ġebaru-seiriġoato, benamo ġevaġiato.

Mai fefa nuġanai siri baregori tu karoa 3:17-18.

Petero na mai fefa etoreato tauna korikori tu, 1) Barau ġena tarima veaġari bene vaĠa-naġiri, be Barau korana-iaġina veiġari korikori beġene veiri ġana; 2) vevaĠa-riba tarimari ġofaġofari na beġe ġofa-darererini garina ekira-toreġaurito; 3) riba korikorina Barau ġenana eiaġomani tu aiġesina ema Satani na riba ġofaġofana evaĠa-raka-rosiani ribana tu aiġesina, moġeri ekiraġi-foforirito; 4) Vereġauka ġena ġaro ai Kota baregona beveġabini moġa ekiraġi-fofori ġinikauato.

Petero na mai fefa tu maiġesina eboioġaiato:

1. Barau ġenana eiaġomani ribana korikorina tu kamasina - karoa 1
2. Riba moġonina na boraka-veġitani tu kara rakavana beġorani - karoa 2
3. Barau ġena kiraġitore moġoniri - karoa 3

<sup>1</sup> Au, Simona Petero, Iesu Keriso ġena vetuġunaġi ema ġena apostolo taugu; ġeguna mai fefa eiaġosini.

Ġomi ġai ġesi ġera veġabidadama sebona taġabiato tarimami atore-vinimini. Ġera Barau, ġera VevaĠa-maġuri Tarimana Iesu Keriso, ġena vei-iobukaiobuka e vetuġamaġikau lorinai, ġomi maki mo veġabidadama namo vedaureana sebona ġoġabiato ġai apostolo kavana. <sup>2</sup> Ġemi riba e tuġamaġi-faka Barau ġenai ema ġera Vereġauka Iesu Keriso ġenai beġene barego. Monana vau varevare-bara e maino maki ġemi ai beġene barego.

*Barau na ekeamito ġia ġena*

<sup>3</sup> Ġena seġuka na Iesu Keriso na ġera maġuri vaĠa-kokoreri dagarari mabarari varau evinirato, Barau ġena ura bitana korana-iaġi korikoriri ġana. Korana Keriso ġenana Barau tama ribaiato, ġena mareva baregona e namo ġerina ekearato tarimana. <sup>4</sup> Ġena mareva baregona e namo ġerina ġena kiraġitore baregori e namo vedaureari varau evinirato vaĠa-ilailana: Mai tanobara ġena ura rakavari ema mase ġevaĠa-ġorarini veiġari ġerina bene vaĠa-maġurira, ma Barau maġurina korikorina bitana ġabia.

<sup>5</sup> Moġa lorinai boġono kokore, ġemi veġabidadama ġenai veiġa namo boġono torekau; veiġa namo ġenai tuġamaġi-maġata boġono torekau; <sup>6</sup> tuġamaġi-maġata ġenai nuġa-gwaġiġi boġono torekau; nuġa-gwaġiġi ġenai vevaĠa-gwaġiġi boġono torekau; vevaĠa-gwaġiġi ġenai Barau korana-iaġina boġono torekau. <sup>7</sup> Barau korana-iaġina ġenai tarikakami veuraviniri boġono torekau; ema tarikakami veuraviniri ġenai veuravini tarimarima mabarari ġeri ai boġono torekau.

<sup>8</sup> Maiġeri maġuri tu ġomi ġemi ai beġene tanu, ema beġene barego, korana maiġeri na ġomi beġe launaġi-naġimini ema beġe vaĠa-kokoremimi, benamo ġemi riba Iesu Vereġauka ġenai tu asi beġe tanu-kavani, senaġi ġwaġwari namori vovoka beġe vetoreni. <sup>9</sup> A bema maiġeri maġuri ai erabuni tarimana, ġia tu mata-bubu tarimana kavana, korana Barau na ġena veiġa rakavari guineri varau eġuriġi-fitoġarito evetuġarekwani.

<sup>10</sup> Moġa lorinai, tarikakagu, boġono kokore, Barau na ekeamito e eviriġimito maniġa boġono vaĠa-moġonia. Moġesi boġo veini nai tu, asi boġo ketoni. <sup>11</sup> Moġesi boġo veini nai, Barau na beġabiraġe-ġinikaumini, benamo ġera Vereġauka e VevaĠa-maġuri Tarimana Iesu Keriso ġena tanu-vanaġivanaġi Basileiana nuġanai boġo raka-toġani.

<sup>12</sup> Mo maġuri namona tu ġomi ġoirami ai enarimini, moġa lorinai au na ġomi vanaġivanaġi basisiba-vini ġenoġoi-ġenoġoimini. Moġoni, maiġeri dagara mabarari

varau ƣoribarito, ema Barau ƣena guruƣa moƣonina ƣoƣabiato ema ƣoƣabi-gigitariani maki. <sup>13</sup> Senaƣi au atuƣamaƣini, mai dabara namori ƣomi tu ƣemi vetuƣamaƣi-taƣo ai bana vaƣa-foforiri, au roƣo amaƣuri-taƣoni nuƣanai. <sup>14</sup> Korana au ribagu, au tauƣanigu korina tu dori atore-tariani, ƣita ƣera Vereƣauka Iesu Keriso na evaƣa-guruƣaguto ilailanai. <sup>15</sup> Moƣesi naima ƣegu ura mai dagara mabarari bana sisiba-vini ginikaumi. Benamo ƣegu mase murinai, ƣomi na boƣono tuƣamaƣi-taƣo vanaƣi-vanaƣiri ƣana.

*Iesu marevana baregona matama na ƣaƣitaiato*

<sup>16</sup> Ƣai tu dia sinasina ƣofaƣofari na ƣita ƣera Vereƣauka Iesu Keriso ƣena seƣuka ema ƣena iaƣoma-ƣenoƣoi ƣomi ƣavaƣa-ribamito. Asiƣina! Ƣai tauƣema matama na ƣia marevana baregona ƣaƣitaiato. <sup>17</sup> Ƣai matama ƣutuƣutunai Barau ƣita Tamara na ƣia ara baregona ema mama ma seƣukana eviniato. Mo mama baregona nuƣanai etanuni Barauna guba na ekea-riƣoto Iesu ƣenai, ekirato, “Mai tu au Natugu, aura-viniani; ema ƣia ƣenai aiaku-rakavani maki.” <sup>18</sup> Ƣai tauƣema na ƣaseƣaƣiato, mai garo guba na emariƣoto, ƣia ƣesi ƣoro veaƣanai ƣatanuto-ƣoi nai.

<sup>19</sup> Moƣa lorinai ƣai tu peroveta tarimari na ƣekiraƣi-torerito guruƣari ƣaƣabi-gigitaririni. Ƣomi maki moƣeri guruƣa boƣo korana-iaƣirini tu namo, korana peroveta tarimari ƣeri guruƣa tu lamefa kavana, gabu mukunai emamani, beiaƣoni mo nega beraƣasini, Keriso, laƣani visiƣuna ƣomi nuƣami ai bemama-rovorovoni. <sup>20</sup> Moƣeri mabarari iatari ai ini guruƣa asi boƣono tuƣarekwaia: Tarima ta ƣia ƣereƣana ƣena ribai peroveta guruƣari tauri asi bekiraƣirini. <sup>21</sup> Korana peroveta guruƣari tu dia tarimarima ƣeri ura na ƣeiaƣomato, senaƣi lauka Veaƣa na tarimarima evaƣa-naƣirito lorinai, ema guruƣa evinirito ilailanai, Barau ƣena guruƣa ƣeperoveta-iaƣirito-ƣoi.

2

*Vevaƣa-riba tarimari ƣofaƣofari*

<sup>1</sup> Guinenai peroveta tarimari ƣofaƣofari tu Isaraela tarimari fakari ai ƣefoforito-ƣoi. Mo dabara sebonai vevaƣa-riba tarimari ƣofaƣofari maki ƣomi fakami ai beƣe fororini. Ƣia na vekuretoƣai vevaƣa-riba ƣofaƣofari beƣe vaƣa-ribamini, ƣemi veƣabidadama vaƣa-rakavari uranai. Ema ƣeri Vereƣauka, evoirito tarimana, maki ƣia na beƣe ruƣaiiani; moƣesi beƣe veini, ƣia tauƣeri na ƣeri mase beƣe vaƣa-ƣarimoƣiani. <sup>2</sup> Ƣutuma na maki ƣia ƣeri veiƣa rakavari e mata-boraƣa veiƣari beƣe tovoovorini, moƣeri urari ai kotari na dabara moƣonina tu dabara rakavanai beƣe kiraƣiani. <sup>3</sup> Ƣeri mata-ƣaniƣani ƣerina guruƣa ƣofaƣofari na nuƣami beƣe ƣanirini, beiaƣoni mo beƣea ƣabimini. Senaƣi ƣia tu kai-veƣata na vevaƣa-maoro-viniri tarimana tu enari-taƣoni, ema ƣia vaƣa-maseri tarimana tu eƣita-taƣorini.

<sup>4</sup> Barau na ƣevei-rakavato aneruri maki asi evaƣa-maƣuririto, senaƣi rakava gabunai efiu-riƣorito. Monai seini na ebarubarurito mukuna furufuru nuƣanai, vevaƣa-maoro ƣarona ƣevaƣa-nogaiani. <sup>5</sup> Ema Barau na tanobara guinena maki asi evaƣa-maƣuriato, senaƣi ƣutuƣutu evaƣa-foforiato tu Barau asi ƣekorana-iaƣiato-ƣoi tarimari ƣeri ai; a Noa, vei-iobukaiobuka eƣobata-iaƣiato-ƣoi tarimana, ema tarima imaima ruarua (7) moƣo ƣia ƣesi evaƣa-maƣuririto. <sup>6</sup> Barau na Sodoma e Gomora maki evaƣa-maoro vinirito, karava na evaƣa-ƣara ƣosirito, kau ai ƣeiaƣoto. Mo veiƣa ƣenana Barau asi ƣekorana-iaƣiani tarimari matari bene vaƣa-kaniri ƣana. <sup>7</sup> A Lota moƣo eƣabi-maƣuriato, ƣia tu vei-iobukaiobuka tarimana, ƣia maki tarimarima ƣeri veiƣa rakavari e boraƣari tuƣamaƣiri ai egauto. <sup>8</sup> Mo tarima iobukaioubukana tu rakava tarimari fakari ai etanuto-ƣoi, ƣaro vanaƣivanaƣi enuƣa-midigu midiguto-ƣoi, korana ƣia na Barau ƣena taravatu kira-fitoƣari veiƣari eƣitarito-ƣoi ema eseƣaƣirito-ƣoi nai.

<sup>9</sup> Boƣono tuƣamaƣi, Vereƣauka na tu ƣia ƣekorana-iaƣiani tarimari veribaƣani e vedaƣaraƣe nuƣari na beƣabi-maƣuririni riba, a vei-rakava tarimari bebiri-ƣaurini, beiaƣoni mo, Barau na bevaƣa-maoro vinirini ƣaronai. <sup>10</sup> Ma tarima kotari na rakava

voina barego lelevaḡina beḡe doḡariani, mai tu tauḡanina ḡena ura boraḡari ḡeiaḡo-vinirini tarimari ema Barau ḡena guruḡa ḡekira-fitoḡaiiani tarimari.

Mai vevaḡa-riba tarimari ḡofaḡofari tu veiavi e vekiraḡi-rakava rakava tarimari, iauka baregori asi ḡegubakaurini, ḡerikiriki-iaḡirini. <sup>11</sup> Aneru tu kokore e seḡuka lelevaḡi, mai ḡofaḡofa tarimari ḡeri seḡuka ḡevanaḡirito, senaḡi aneru na iauka baregori tu asi ḡevaḡa-daḡarini e asi ḡevei-veḡare veḡarerini Vereḡauka ḡoiranai. <sup>12</sup> A maiḡeri tarimarima tu asi ḡetuḡamaḡini, ḡeri vemamiraḡi na moḡo ḡeḡori-kaurini, noḡa moḡo boḡa bairi kavana, ḡemaḡurini tu beḡene vaḡiri moḡo ḡana kavari. Asi ḡeribarini dagarari ḡerikiriki-iaḡirini. Moḡa lorinai ḡia tu mo boḡa bairi kavari beḡe vaḡa-rakavarini e beḡe rekwarekwani. <sup>13</sup> ḡeri veiḡa rakavari voiri beḡe ḡabirini. Tauḡaniri vaḡa-iakuri veiḡari laḡani matabarai ḡeveirini, asi ḡemaiakarini. Moḡeri tarima ḡomi ḡemi ḡanivegogo ḡoveirini nai, ḡia tu miro noḡa ḡomi fakami ai; korana ḡeri vevaḡa-riba ḡofaḡofari tu ḡemi ḡanivegogo ai maki ḡekiraḡirini. <sup>14</sup> Vavine ta ḡeḡitaiani nai, mata-boraḡa tuḡamaḡiri moḡo ḡeveini; rakava veiveiri ai asi ḡegauni. Veḡabidadamai roḡosi beḡene gwaḡiḡi tarimari ḡevaḡa-toḡarini. ḡia nuḡari tu mata-ḡaniḡani ai ḡevaḡa-maranarito. Barau na ḡeri rakava voiri bevinirini veḡata. <sup>15</sup> ḡia na dabara maorona beḡe raga-kwanea, ḡeraka-taḡuitaḡuini, Balam, Beoro natuna, eveito kavana. ḡia tu moni uranai veiḡa rakavari eveirito-ḡoi. <sup>16</sup> Senaḡi ḡena veiḡa rakavari lorinai, doniki na evaḡa-guruḡaiato. Doniki tu asi guruḡa ribana, senaḡi tarimarima garori ai evaḡa-guruḡaiato, naima mo tarima ḡena veiḡa babori veiveiri evaḡa-dokoato.

<sup>17</sup> Moḡeri tarima tu nanu guriri kakorori kavana; ema magube iavara na ekwari-rakaorakaorini kavana. Barau na mukuna furufuru gabuna ḡeri etoreato. <sup>18</sup> ḡeguruḡa-kavani ema ḡeveiavi-kavani, ma tarima kotari tu vau moḡo dabara moḡoninai asi ḡerakani tarimari fakari na ḡeraka-veḡitani, senaḡi ḡia na tu tauḡanina ḡena ura rakavari e mata-boraḡa veiḡari na ma ḡema-gagare-ḡaurini. <sup>19</sup> Tarima ḡeḡofarini, ḡekirani, maḡuri namona e fakana beḡe doḡariani ḡetoni, senaḡi ḡia tauḡeri tu ḡeri ura rakavari vetuḡunaḡiri ḡeiaḡo-vinini. Korana tarimarima tu veiḡa rakavana ta na eboroḡiani nai, ḡia tu mo veiḡa rakavana ḡena tuḡu-rakaorakao tarimana. <sup>20</sup> Moḡoni, ḡia na ḡita ḡera Vereḡauka e Vevaḡa-maḡuri Tarimana Iesu Keriso ḡema-ribaiato dainai, tanobara ḡena miro e vei-rakava ḡenana ḡeraka-veḡitato; senaḡi moḡa murinai bema rakavana nuḡanai ma ḡeraka-toḡani, benamo ḡena seḡuka gaburenai ma ḡetanuni neganai, ḡia ḡeri maḡuri tu berakava-kwaikwaini dokonai, dia tovotovonai kavana. <sup>21</sup> ḡia tu dabara roroḡotona asi ḡere riba-guinea tu namo, a asi namo, ḡeribaiato murinai, taravatu veaḡana, ḡeḡabiato dagarana, ma ḡeruḡa-doḡemuriḡiani. <sup>22</sup> Moḡesi ḡeveini nai, ḡia na mai veḡausina o sisiba guruḡari ruarua maiḡeri ḡevaḡa-moḡonirini, ekirani, “Kwaiva na emumuta-vaḡiani dagarana ma ea ḡani-ḡenoḡoiani,” ema, “Ḗevaḡa-fouani baina tu ma eḡenoḡoini, ea vedokurani.”

### 3

#### *Iesu Keriso ḡena ḡenoḡoi*

<sup>1</sup> Ḗatagu mabarami, maitoma tu fefa vaḡa-ruaruana mai atore-vinimini. Mai fefa ruarua ḡerina, au na ḡomi nuḡami ai tuḡamaḡi roroḡotori bana vaḡa-variḡu ḡenoḡoiri atoni. <sup>2</sup> Au aurani peroveta veaḡari na ḡekiraḡirito guruḡari guineri laḡaniri ai boḡono tuḡamaḡi-taḡori, ema apostolo tarimari na ḡera Vereḡauka e Vevaḡa-maḡuri Tarimana ḡena vevaḡa-naḡi ḡekira-varamito guruḡari maki.

<sup>3</sup> Guine tu, ḡomi boḡono riba-maoro: Ḗaro dokori ai vei-ḡareḡare tarimari beḡe foforini, ḡeri ura rakavari na beḡe guine-iaḡirini. Ḗia na beḡe rikiriki-iaḡimini, <sup>4</sup> beḡe kirani, “Keriso eguruḡa-toreto, ma beḡenoḡoi-iaḡomani etato, nene? Be ḡia tu ainai? Ḗita tamara ḡevaḡa-noga-kavato, kai-veḡata ḡemaseto, senaḡi dagara mabarari tu tanobara evesinato kavana roḡo gaburi ai ḡetanuni!”

<sup>5-6</sup> Maiġeri tarima asi ġeurani mai guruġa maiġa beġene seġaġia: Barau na tanobara guinena ġutuġutu nanuna na evaġa-rakavaiato. A guba e tanobara tu tovotovonai veġata ġena guruġa ġenana eveirito, ma tanobara tu nanu nuġana na emaraġeto ema nanu na etanu-ġeġeraġiato. <sup>7</sup> Ma inította guba e tanobara roġo ġetanuni tu, Barau ġena guruġa sebona na eġabi-taġorini, karava na vau bene vaġa-rakavaia tuġamaġinai. Barau asi ġekorana-iaġiani tarimari vaġa-roroġotori ema vaġa-mouri ġaronai vau bevaġa-rakava sebonarini.

<sup>8</sup> Ġatagu mabarami, mai dagara sebona asi boġono tuġarekwaia: Vereġauka ġenai taimi tu irau, ġita ġerai tu irau, korana ġia ġenai ġaro sebona tu laġani 1,000 kavana, ema laġani 1,000 tu ġaro sebona kavana. <sup>9</sup> Vereġauka na ekiraġi-torerito dagarari veiveiri ai tu asi ekwaiboni, tarima kotari ġetuġamaġini kavana. Asiġina, ġia ġomi ġemi ai tu evevaġa-gwaġiġini, korana ġia asi eurani tarima ta bene rekwarekwa, senaġi eurani mabarara ġera rakava ġerina bitana vetuġamaġi-kure ma bitana raka-kure.

*Guba tanobara beġe* rekwarekwani

<sup>10</sup> Senaġi Vereġauka ġena ġaro beraġasini tu lema tarimana ta eraġasini kavana. Mo ġaro ai guba beġe rekwa-rekwani ma gurugururi ġesi. Gubai ġetanuni dagarari mabarari karava na bevaġa-ġara ġosirini, ema tanobara ma iatanai ġetanuni dagarari mabarari beġe rekwa-rekwani. <sup>11</sup> Boġono tuġamaġi, maiġeri dagara mabarari tu maiġesi dabaranai beġe rakavani, be ġomi tu kamasi boġono tanu ġotoni? Ġomi ġemi maġuri tu beġene veaġa ema Barau ġena ura boġono korana-iaġiri. <sup>12</sup> Barau ġena ġaro boġono naria, ema ġena raġasi boġono vaġa-ġarimoġia. Mo ġaro ai guba beġe ġararini e beġe rakavani, ema gubai ġetanuni dagarari seġukana na bevaġa-veverini. <sup>13</sup> Senaġi ġita tu Barau na ekiraġi-toreato dagarana tavaġa-nogaiani, guba e tanobara variġuri, monai veiġa roroġotori beġe tanuni gabuna.

*Velaunaġi* e vevaġa-namo guruġari

<sup>14</sup> Moġa lorinai, ġatagu mabarami, alaunaġimini, mo ġaro ġovaġa-nogaiani nuġanai, asi miromi e asi ġemi kerere ta boġono tanu Barau ġoiranai, ema ġia ġesi maino ai boġono tanu. <sup>15</sup> Ġera Vereġauka ġena vevaġa-gwaġiġi boġono tuġamaġia, ġia tu ġomi evaġa-nogamini bene ġabi-maġurimi tuġamaġinai. Barau na ġita tarikakara namona Paulo iaunega eviniato, benamo ġia na moġesi ilailanai etore-vinimito. <sup>16</sup> Ġia ġena fefa mabarari ai maki maniġa ekiraġiani. Dagara kotari ġena fefa nuġari ai tu gwaġiġi rakava, asi ribari tarimari ema ġeri veġabidadama asi gwaġiġi tarimari na ġevevaġa-riba-iaġi ġofaġofarini. Buka Veaġa nuġanai maki toretore mabarari moġesi ġeġofaġofa-iaġirini. Moġesi ġeveini nai, tauġeri ġeri maġuri ġevaġa-rakavarini.

<sup>17</sup> Senaġi ġomi, au ġatagu namomi, tu varau ma ribami, maiġeri dagarai lorimi boġono vetore, be taravatu asi ġekorana-iaġiani tarimari na asi beġene ġofa-dareremi, ġemi veġabidadama namori na boġo keto-firiġoni garina. <sup>18</sup> A ġita ġera Vereġauka e Vevaġa-maġuri Tarimana Iesu Keriso ġena namo e veuravini ġerai etoreani moġa boġono vaġa-tubua-ġoi, ema ġia boġono riba-ginikaua. Ġia marevana bisini vaġa-raġea toma bene iaġo vanaġivanaġi! Amen.

## IOANE ĠENA TORETORE GINIGUINENA

1 Ioane vaġa-foforina guruġari

Ioane na mai fefa giniginena maiġa tu dia ekalesia ta ġena o ekalesia doġorona ta ġena etoreato. Asiġi. Mai tu irau bese ekalesia doġorori tari, ema Keriso ġevaġa-moġoniato-ġoi gabu mabarari ai ġetanuni tarimari ġeri. Ioane ġena Vari Namona, e Ioane ġena fefa toitoi, ema Apokalupo tu ġia na etorerito. Ioane na mai fefa tu laġani 85 ma 100 fakari nuġanai ta etoreato, mo tu Iesu maki emaseto murinai vau.

Mai fefa nuġanai siri baregори tu karoa 4:16; 5:13.

Ioane na mai fefa etoreato korana tu eurato, 1) ekalesia bene vaġa-ribari, Barau ġenana eiaġomani ribana moġonina eġabiani tarimana tu Barau sevisevinai vanaġivanaġi etanuni; 2) tarikaka bene vaġa-naġiri, ġia tata ġeri veġata Barau ġesi, e tarikaka tari ġesi, e tanobara tarimari ema dagarari ġesi, ema vei-rakava tarimari ġesi beġene ġita-ginikauri. Asi beġene vekako mata-bubu; 3) Keriso ġevetari-viniani tarimari ġeri ġofaġofa veiġari bene kiraġi-foforiri.

Ioane na mai fefa tu maiġesina eboioġaiato:

1. Barau tu lamefa mamana kavana emamani - karoa 1-2
2. Barau tu veuravini - karoa 3-4
3. Barau tu maġuri - karoa 5

*Maġuri guruġana*

<sup>1</sup> Tovotovona na veġata etanuto dagarana, ġaseġaġiato, matama na ġaġitaiato, ġenai ġaboġekauto, ema ġiamama na ġaġabi-karaiato: Mai tu Maġuri Guruġana ġavari-fiuidi. <sup>2</sup> Mo maġuri efoforito, benamo ġai na ġaġitaiato. Moġa lorinai ġemi ġavari-fiuidi ema maġuri vanaġivanaġi ġakira-varamini. Mo maġuri tu Tamara ġesi etanuto-ġoi ema ġai ġemi ema foforito. <sup>3</sup> Ġai na ġaġitaiato ema ġaseġaġiato maġurina ġomi ġemi ġakiraġi-foforiani, be ġomi maki ġai ġesi bitana sebona uranai, korana ġai tu Tamara ema ġia Natuna Iesu Keriso ġesi doġoro sebona. <sup>4</sup> Mai guruġa ġatore-vinimini, korana ġita nuġara iaku na beġene vonuvonu-raġe ġana.

*Barau tu mama*

<sup>5</sup> Iesu ġenana ġaseġaġiato varina ġemi ġavari-fiuidi tu maiġa: Barau tu mama, mukuna kotuna ta maki ġia ġenai asi etanuni. <sup>6</sup> Bema ġita mukuna maġurini roġo tarakani nuġanai bita kirani, ġita tu Barau ġesi tadoġoro-sebonani, ġita tu taġofaġofani ema guruġa moġonina asi takorana-iaġiani. <sup>7</sup> Senaġi bema mama nuġanai bita rakani Barau kavana, ġita tata tu doġoro sebona tarimara, ema ġia Natuna Iesu rarana na ġita ġera rakava mabarari beġuriġi-vaġirini.

<sup>8</sup> Bema ġita bita kirani, ġita tu asi ġera vei-rakava, ġita tu tauġera taveġofani, ema ġita ġera guruġa moġonina tu asiġina. <sup>9</sup> A bema ġita ġera vei-rakava bita kiraġi-foforirini nai, ġia tu ma ġena vetuġamaġikau, ġera veiġa rakavari mabarari betuġamaġi-fitoġarini, ema ġera veiġa ġeġevaġeġevari beġuriġi-vaġirini. <sup>10</sup> Bema ġita bita kirani, nega sebona maki asi tavei-rakavato, Barau tu ġofaġofa baraunai bita vaġa-iaġoani, ema ġia ġena guruġa tu ġita nuġarai asi etanuni.

## 2

*Keriso ġita ġera vevaġa-kava tauna*

<sup>1</sup> Natugu, mai guruġa atore-vinimini tu ġomi rakava asi boġono vei ġana. Senaġi bema tarima ta bevei-rakavani nai, ġita tu ma ġera vevaġa-kava tarimana Tamara ġesi etanuni, Iesu Keriso, vei-iobukaiobuka tarimana. <sup>2</sup> Keriso na ġita ġera rakava voivaġiri ġauveina eveiato, dia ġita ġera rakava moġo, senaġi tarimarima mabarari ġeri rakava.

<sup>3</sup> Bema ġita Barau ġena taravatu guruġari bita korana-iaġirini nai, monana bita ribani, ġita tu moġoni Barau taribaiao. <sup>4</sup> Bema ta bekirani, "Au tu Barau ribagu," senaġi

ġena taravatu guruġari asi bekorana-iaġirini, mo tarima tu ġofaġofa tarimana, guruġa moġonina ġia nuġanai asi etanuni. <sup>5</sup> Senaġi deikara na Barau ġena guruġa ekorana-iaġirini tu, Barau moġoni eura-viniani ma nuġana mabarana ġesi. Monana vau taribani, ġita tu ġia ġesi moġoni sebona. <sup>6</sup> Deikara ekirani, ġia tu Barau ġesi doġoro sebona etoni tarimana tu, Iesu Keriso etanuto-ġoi kavana bene tanu.

#### *Taravatu variġuna*

<sup>7</sup> Ġatagu mabarami, mai taravatu atore-vinimini tu dia variġu, senaġi taravatu guinena, tovotovona na veġata ġoġabiato dagnarana. Mai taravatu guinena tu ġoseġaġi-guineato taravatuna. <sup>8</sup> Senaġi mai taravatu atore-vinimini maki tu variġu; mo taravatu ġena moġoni tu Keriso ġenai ema ġomi ġemi ai maki efoforini, korana mukuna tu mai ekorini ema mama moġonina tu varau emamani.

<sup>9</sup> Tarima ta ekirani, ġia tu mama nuġanai etanuni, senaġi tarikakana tu ebaru-viniani, ġia tu roġo mukuna nuġanai etanuni. <sup>10</sup> Tarikakana eura-viniani tarimana tu mama nuġanai etanuni. Ġia bevaġa-vedaġa-raġeani dagnarana ta ġenai asi etanuni. <sup>11</sup> Senaġi tarikakana ebaru-viniani tarimana tu mukuna nuġanai etanuni e erakani. Ġia asi ribana aiġana eiaġoni, korana mukuna na matana evei-bubuani.

<sup>12</sup> Natugu, au na atore-vinimini korana tu, ġomi ġemi rakava tu Barau na etuġamaġi-fitoġarito Keriso aranai.

<sup>13</sup> Tamagu, atore-vinimini korana tu, tovotovona na veġata etanuto tarimana tu ġoribaiato.

Maraġa variġu, atore-vinimini korana tu, Satani ġovaġa-darereato.

<sup>14</sup> Natugu, atore-vinimini korana tu, Tamara ġoribaiato.

Tamagu, atore-vinimini korana tu, tovotovona na veġata etanuto tarimana tu ġoribaiato.

Maraġa variġu, atore-vinimini, korana ġomi tu ma gwadami; Barau ġena guruġa ġomi nuġami ai etanuni, ema ġomi na Satani ġovaġa-darereato.

<sup>15</sup> Tanobara asi boġono ura-vinia, ema tanobara dagnarari maki asi boġono ura-viniri. Bema tarima ta tanobara eura-viniani nai, Barau ġena veuravini ġia nuġanai tu asi etanuni. <sup>16</sup> Korana tu tanobara veiġari mabarari, tauġani ġena ura rakavari, mata-ġaniġani, ema veiavi, tu dia Tamara Barau ġenana ġeiaġomani, senaġi tanobara ġenana ġeiaġomani. <sup>17</sup> Mai tanobara ema tarimarima na ġemata-ġaniġanirini dagnarari mabarari tu beġe korini, senaġi Barau ġena ura eveiani tarimana tu betanu-vanaġi vanaġini.

#### *Keriso evetari-viniani tarimana*

<sup>18</sup> Natugu, ġaro dokona tu maiġa. Ġoseġaġito ilailanai Keriso evetari-viniani tarimana tu beiaġomani, maitoma maki Keriso ġevetari-viniani tarimari vovoka beġe iaġoma. Moġesi nai taribani, mai tu hora magona. <sup>19</sup> Moġeri tarimarima tu ġita ġesi tavegogoto-ġoi, senaġi ġia tu dia ġita ġera doġoro korikori. Moġa lorinai ġita ġeraga-kwanerato. Bema ġia moġoni ġita ġera doġoro korikori nai tu, ġita ġesi roġo tara tanu. Senaġi ġita ġerana ġeveġitato. Monana evaġa-foforiani, ġia mabarari tu dia ġita ġera doġoro.

<sup>20</sup> A ġomi na tu Iauka Veaġa ġoġabiato, Keriso na eboroġimito, moġa lorinai ġomi mabarami guruġa moġonina tu ma ribami. <sup>21</sup> Au na atore-vinimini tu dia guruġa moġonina asi ribami nai, senaġi guruġa moġonina tu ma ribami dainai, ema ribami maki, ġofaġofa tu guruġa moġonina ġenana asi eiaġomani.

<sup>22</sup> Ġofaġofa tarimana tu dei? Iesu tu dia Keriso, (Barau na ekiraġi-toreato vevaġa-maġuri tauna), etoni tarimana. Mo tarima tu Keriso evetari-viniani tauna. Ġia tu Tamara e Natuna ekira-fitoġarini tarimana. <sup>23</sup> Natuna ekira-fitoġaiani tarimana tu Tamana maki ġia ġenai tu asiġina. A deikara na Natuna eġabi-raġeani tarimana tu, Tamana maki eġabi-raġeani, ema Tamana maki ġia ġenai etanuni.

<sup>24</sup> Tovotovona na veġata ġoseġaġiato guruġana nuġami ai bene tanu. Bema nuġami ai betanuni tu, ġomi maki Natuna e Tamana nuġari ai boġo tanuni. <sup>25</sup> Ema mai maġuri vanaġivanaġi tu Keriso tauġena na ġita ġera ekiraġi-toreato dagnarana.

<sup>26</sup> Maiġeri guruġa ġomi atore-vinimini tu, ġomi ġeġofa-veġitami ġetoni tarimari akiraġi-foforirini. <sup>27</sup> Senaġi ġomi na Iauka Veaġa ġoġabiato Keriso ġenana tu nuġami ai etanuni. Moġa lorinai inította vevaġa-riba tarimana ta ġomi bene vaġa-ribami ġana tu asi boġo ura-viniani. Korana mo Iauka Veaġa na dagara mabarari evaġa-ribamini, ema ġena guruġa tu moġoni, dia ġofaġofa. Moġa lorinai evaġa-ribamito ilailanai, Keriso nuġanai boġono tanu.

<sup>28</sup> Natugu, Keriso nuġanai boġono tanu. Be ġia befoforini ġaronai tu nuġara ma kokoreri ema asi beġene maiakara ġia ġoiranai ġena ġenoġoi ai. <sup>29</sup> Bema ġomi ma ribami Keriso ġena veiġa tu iobukaiobuka nai, boġo ribani, ġevei-iobuka iobukani tarimari mabarari tu Barau ġenana ġemaġurito.

### 3

#### *Barau natuna*

<sup>1</sup> Ġoġitaia, Tamara ġena veuravini tu asikeikeina ġita iatarai etoreato. Moġesi naima ġita ekiraġirani Barau natuna. Moġoni, ġita tu ġia natuna. Moġa lorinai tanobara na maki asi eribarani, korana Barau maki asi ġeribaiato. <sup>2</sup> Ġatagu mabarami, maitoma ġita tu Barau natuna. Ġita kara ai bita iaġoni tu roġosi bene fofori. Senaġi ġita ribara, Keriso befoforini ġaronai, ġita tu ġia ilailanai bita iaġoni, korana ġia tu vetoġana korikorinai bita ġitaiani. <sup>3</sup> Tarimarima mabarari mai tuġamaġikau ġeġabiani tu, tauġeri ġevevaġa-iarevani, korana Keriso tu asi mirona e asi vetoukauna ta.

<sup>4</sup> Rakava ġeveini tarimari mabarari tu Barau ġena taravatu ġekira-fitoġaiani, korana vei-rakava tu taravatu ġekira-fitoġaiani dagarana. <sup>5</sup> Senaġi ġomi tu ma ribami, Keriso efoforito korana tu, ġita ġera rakava bene ġabi-veġitari ġana. Ġia ġenai rakava ta tu asiġi. <sup>6</sup> Keriso nuġanai etanuni tarimana tu asi evei-rakava rovaġi-rovaġini. Rakava eveini tarimana na Keriso tu asi eġitaiato ema asi eribaiato maki.

<sup>7</sup> Natugu, ta na asi bene ġofami. Veiġa iobukaiobukari eveini tarimana tu vei-iobukaiobuka tarimana, vaġa-ilailana Keriso kavana vei-iobukaiobuka tarimana. <sup>8</sup> A vei-rakava eveini tarimana tu Diabolo ġena tarima, korana Diabolo tu tovotovona na veġata roġo evei-rakava-iaġomani. Barau Natuna efoforito korana tu, Diabolo ġena ġauvei benema vaġa-rakavaia ġana.

<sup>9</sup> Barau ġenana emaġurito tarimana tu asi bevei-rakava rovaġi-rovaġini, korana Barau ġena maġuri tu ġia ġenai etanuni. Ġia tu vei-rakava asi ma bevei-ġenoġoini, korana Barau tu ġia Tamana. <sup>10</sup> Barau natuna ema Diabolo natuna vetoġari ġeri irau tu maiġesi beġe foforini: Veiġa iobukaiobukari asi eveini tarimana ema tarikakana asi eura-vinirini tarimana tu dia Barau natuna.

#### *Boġono veura-vevini*

<sup>11</sup> Tovotovona na veġata ġoseġaġiato guruġana tu maiġesi: Ġita tata bitana veura-vevini. <sup>12</sup> Ġita tu Kaino eveito kavana tu asi bitana vei. Ġia tu Satani ġena tarima. Tarina korikorina Abela evaġi-maseato. Karase nai Kaino na evaġiato? Korana ġia ġena veiġa tu rakava, a tarina ġena veiġa tu iobuka.

<sup>13</sup> Tarikakagu mabarami, bema tanobara maġurinai ġetanuni tarimari na beiau-rakavamini nai, nuġami asi beġene farevaġi. <sup>14</sup> Ġita ribara, ġita tu mase ġenana maġuri ġenai tavanaġito. Vetoġana tu tarikakara taura-vinirini. Tarikakana asi eura-viniani tarimana tu roġo mase nuġanai etanuni. <sup>15</sup> Deikara tarikakana eiau-rakava-viniani tarimana tu vevaġideba tarimana. Ġomi ribami, vevaġideba tarimana nuġanai tu maġuri vanaġivanaġi asi etanuni. <sup>16</sup> Keriso na ġena maġuri etore-tariato, ġita bitana maġuri ġana. Monai veuravini anina bita ribaiani. Moġa lorinai ġita na maki tarikakara dairi ai ġera maġuri bitana tore-tariri neġi namo. <sup>17</sup> Bema tarima ta ma ġena farefare vovoka, benamo tarikakana ta beġitaiani ġena rabu ai, senaġi asi ma bevetuġa-ġwaiani e asi bevaġa-kavaiani, kamara dabarai Barau ġena veuravini ġia nuġanai betanuni?

<sup>18</sup> Natugu, ġera veuravini tu dia guruġa koriri ai moġo bitana kiraġiri, senaġi veiġai ema moġoni ai bitana vaġa-foforia.

<sup>19</sup> Monana vau bita ribani, ġita tu Barau ġena guruġa moġonina na beġori-kaurani, ema Barau ġoiranai nuġara beġe kokoreni. <sup>20</sup> Bema ġita nuġara beġe kirani, ġita tu kerere, bitana riba, Barau tu barego, a ġita nuġara tu kei, ema Barau tu dagara mabarari ma ribana. <sup>21</sup> Ġatagu mabarami, bema ġita nuġara na asi beġe kiraġi-kerererani nai tu, ġita nuġara tu ma gwadara ġesi Barau ġoiranai bita ruġa-tarini. <sup>22</sup> Ema bita noġiani dagarari mabarari Barau na bevinirani, korana ġena taravatu guruġari takorana-iaġirini ema Barau vaġa-iakuna veiġari taveirini nai. <sup>23</sup> Ġia ġena taravatu guruġana tu maiġa: Ġia Natuna Iesu Keriso arana bitana vaġa-moġonia, ema ġita tata bitana veura-vevini, Keriso na taravatu guruġana evinirato ilailanai. <sup>24</sup> Barau ġena taravatu guruġari ekorana-iaġirini tarimana tu Barau nuġanai etanuni, ema Barau maki ġia nuġanai etanuni. Barau na Iauka Veaġa evinirato, monana ġita taribani, ġia tu ġita nuġarai etanuni.

#### 4

*Iauka moġonina ema ġofaġofa iaukana*

<sup>1</sup> Ġatagu mabarami, iauka mabarari asi boġono vaġa-moġoniri, senaġi iauka boġono ribari ġana boġono tovanaġi-guineri. Ġia tu Barau ġenana ġeiaġomato ba? Korana peroveta tarimari ġofaġofari ġutuma tanobarai ġerakao-rakaoni. <sup>2</sup> Barau iaukana tu mai vetoġai boġo ribaiani: Iauka mabarari beġe kirani, “Iesu Keriso tu tarimarimai eiaġoto,” ġia tu moġoni Barau ġenana. <sup>3</sup> Ma iauka mabarari asi beġe kirani, Iesu Keriso tu tarimarimai eiaġoto, tu dia Barau ġenana. Ġia tu Iesu evetari-viniani iaukana. Ġoseġaġito, ġia tu beiaġomani, ema ġia tu varau maiġa tanobarai.

<sup>4</sup> Natugu, ġomi tu Barau ġenana, ema ġomi na peroveta tarimari ġofaġofari ġovaġa-darererito, korana ġomi nuġami ai etanuni iaukana seġukana na tanobara iaukari ġeri seġuka evanaġirini. <sup>5</sup> Mo peroveta tarimari ġofaġofari tu tanobara ġena, moġesi naima ġeri guruġa tu tanobara ġena dabarai ġeguruġani, ema tanobara na maki ġia ġeseġaġi-vinirini. <sup>6</sup> Senaġi ġita tu Barau ġena. Be Barau ġena tarimarima na tu beġe seġaġi-vinirani, a Barau asi ġekorana-iaġiani tarimari na tu asi beġe seġaġi-vinirani. Iauka moġonina e ġofaġofa iaukana tu mo vetoġai bita ġita-learini.

*Barau tu veuravini*

<sup>7</sup> Ġatagu mabarami, ġita tata bitana veura-vevini, korana veuravini tu Barau ġenana eiaġomani. Eveura-vinini tarimana tu Barau ġenana emaġurito, ema ġia ma ribana Barau. <sup>8</sup> Asi ġena veuravini tarimana tu Barau asi ribana, korana Barau tu veuravini. <sup>9</sup> Barau ġena veuravini ġita ġerai tu maiġesi evaġa-foforiato: Barau na Natuna ġora-ġereġa tanobara ġana etuġuato, ġia bakunai ġita bitana maġuri ġana. <sup>10</sup> Veuravini anina tu maiġa: Dia ġita na Barau taura-viniato, senaġi ġia na ġita eura-vinirato, benamo Natuna etuġuato, ġena mase ġenana ġita ġera rakava benema voi-vaġiri ġana.

<sup>11</sup> Ġatagu mabarami, Barau na ġita tu moġesina eura-vinirato nai, ġita maki tata bitana veura-vevini. <sup>12</sup> Tarima ta na Barau asi eġitaiato. Senaġi bema ġita tata taveura-vevinini nai tu, Barau tu ġita nuġarai etanuni ema ġena veuravini tu ebaregoni ġita nuġarai.

<sup>13</sup> Ġita ma ribara ġita tu Barau nuġanai tatanuni, ema Barau maki ġita nuġarai etanuni, korana ġia iaukana ġita evinirato. <sup>14</sup> Ġai na ġaġitaiato, ema tari maki ġakiravararito, Tamara na tu Natuna etuġuato tanobara ġena vevaġa-maġuri tarimanai bene iaġo ġana. <sup>15</sup> Bema tarima ta bekirani, “Iesu tu Barau Natuna,” ġia nuġanai tu Barau ema ġia maki Barau nuġanai etanuni. <sup>16</sup> Ema ġita maki ribara e tavaġa-moġoniani, Barau na ġita eura-vinirani.

Barau tu veuravini, ema veuravini ai etanuni tarimana tu Barau nuġanai etanuni, ema Barau maki ġia nuġanai etanuni. <sup>17</sup> Moġesi bita tanuni vau, Barau ġena veuravini



bebaregoni ġita ġerai, benamo Kota baregona ġaronai ġita tu ma kokorera ġesi bita foforini. Korana ġita ġera maġuri mai tanobarai tu Keriso ġena maġuri ġesi ilaila. <sup>18</sup> Veuravini ai gari tu asi etanuni. Veuravini korikorina na gari elai-fitoġaiani. Gari ai etanuni tarimana tu vei-rakava voina garina eveini. Bema tarima ta egarini, ġia tu veuravini korikori ai roġosi bene barego.

<sup>19</sup> Ġita taveura-vinini, korana Barau na ġita euravini-guinerato. <sup>20</sup> Bema tarima ta ekirani, “Au na Barau aura-viniani,” senaġi tarikakana tu ebaru-viniani, ġia tu ġofaġofa tarimana. Korana bema ġia tarikakana eġitaiani, senaġi asi eura-viniani, kamara dabarai asi eġitaiani Barauna beura-viniani. <sup>21</sup> Keriso na mai taravatu guruġana evinirato: Barau eura-viniani tarimana na tu tari-kakana maki bene ura-vinia.

## 5

**Ġera kokore tanobara iatanai**

<sup>1</sup> Deikara na evaġa-moġoniani Iesu tu moġoni Keriso, (Barau na ekiraġi-toreato vevaġa-maġuri tauna), ġia tu Barau ġenana emaġurito. Ema Tamana eura-viniani tarimana na tu natuna maki eura-viniani. <sup>2</sup> Barau taura-viniani ema ġena taravatu guruġari takorana-iaġirini nai tu, moġeri na ġita bita ribani, Barau natuna taura-vinirini. <sup>3</sup> Barau taura-viniani nai tu ġena taravatu guruġari takorana-iaġirini. Ġia ġena taravatu guruġari korana-iaġiri tu asi gwaġiġi. <sup>4</sup> Korana tu Barau natuna mabarari na tanobara ġevaġa-darereani. Ġita tu ġera veġabidadama na tanobara tavaġa-darereani. <sup>5</sup> Deikara na tanobara evaġa-darereani? Iesu evaġa-moġoniani ġia tu Barau Natuna etoni tarimana moġo.

**Barau na ġia Natuna Iesu Keriso ekiraġi-foforiani**

<sup>6</sup> Iesu Keriso tu eiaġomato nanu na ebabatisoato, ema rarana eriġoto satauro ai. Ġia tu dia nanu ġereġana na moġo eiaġomato, senaġi nanu e rara ġerina. Iauka Veavaġa na evaġa-foforiani mai tu moġoni, korana Iauka tu moġoni. <sup>7</sup> Dagara tu toitoi na ġevaġa-foforiani: <sup>8</sup> Iauka, nanu, ema rara. Ġia toitoi ġeri guruġa-fofori tu sebona.

<sup>9</sup> Tarimarima ġeri vevaġa-moġoni guruġari tu taġabi-raġerini, senaġi Barau ġena vevarifiu tu barego lelevaġi, korana moġa tu Barau ġena vevaġa-moġoni, Natuna evaġa-moġoniani guruġana. <sup>10</sup> Mo vevaġa-moġoni guruġana tu Barau Natuna ġevaġa-moġoniani tarimari nuġari ai ġetanuni. A Barau asi ġevaġa-moġoniani tarimari na Barau tu ġofaġofa baraunai ġevaġa-iaġoani, korana Barau na Natuna evari-fiuato guruġana asi ġevaġa-moġoniani. <sup>11</sup> Guruġa moġonina tu maiġa: Barau na maġuri vanaġivanaġi varau evinirato, ema mo maġuri vanaġivanaġi tu ġia Natuna nuġanai. <sup>12</sup> Barau Natuna eġabi-raġeato tarimana na maġuri eġabiato. A Barau Natuna asi eġabi-raġeato tarimana na maġuri asi eġabiato.

**Maġuri vanaġivanaġi**

<sup>13</sup> Maiġeri guruġa tu ġomi, Barau Natuna arana ġovaġa-moġoniani tarimami, atorevinimini, korana tu boġono riba, ġomi tu varau maġuri vanaġivanaġi ġoġabiato. <sup>14</sup> Ġita nuġara tu maiġesi vau ma kokoreri ġesi Barau ġoiranai bita ruġani, mai tu bema dagara ta ġia ġena ura ilailanai bita noġiani nai tu beseġaġirani. <sup>15</sup> Ġita ribara, ġia na ġera noġinoġi mabarari eseġaġirini. Ema ġita maki ribara, bita noġini dagarari tu bita ġabini ġia ġenana.

<sup>16</sup> Bema tarima ta tarikakana eġitaiani vei-rakava eveiani, senaġi mo rakava na asi bevaġa-maseani, tu bene ġauġau ġia ġena, be Barau na maġuri bene vinia. Moġa tu evei-rakavani, senaġi mo vei-rakava na asi bevaġa-maseani tarimana akiraġiani. Vei-rakavana ta tu mase evaġa-ġoraiani. Moġa tu asi bene ġauġau-iaġia atoni. <sup>17</sup> Veiġa ġeġeva-ġeġeva mabarari tu vei-rakava, senaġi vei-rakava tari tu mase asi ġevaġa-ġorarini.

<sup>18</sup> Ġita ribara, Barau ġenana ġemaġurito tarimari tu asi ġevei-rakava rovaġi-rovaġini, korana Barau Natuna na enariġau-ġitakaurini, ema Diabolo na asi eġabi-kararini. <sup>19</sup> Ġita ribara, ġita tu Barau natuna, ema tanobara mabarana tu Diabolo na eġori-kauani.

<sup>20</sup> Ġita ma ribara maki, Barau Natuna tu eiaġomato, ġia na tuġamaġi-faka evinirato, Barau moġoni bitana ribaia ġana. Ġita tu Barau moġonina nuġanai tatanuni, korana ġia Natuna Iesu Keriso nuġanai tatanuni. Iesu Keriso tu Barau moġonina ema ġia tu maġuri vanaġivanaġi.

<sup>21</sup> Natugu, barau ġofaġofari ġerina boġono veġita.

## IOANE ĠENA TORETORE VAĠA-RUARUANA

2 Ioane vaġa-foforina guruġari

Ioane na mai fefa tu Barau na eġabi-viriġiatio ekalesia vavinena ma natuna ġeri etoreato, moġa tu betaġu rubu ta ma ekalesiari ekiraġirini.

Mai fefa tu laġani 85 ma 100 fakari nuġanai ta Ioane na etoreato, mo tu Iesu maki emaseto murinau vau.

Mai fefa nuġanai siri baregori tu siri 9 beiaġo 11.

Ioane na mai fefa etoreato ġena ura tu, 1) mo ekalesia Keriso ġena vevaġa-ribai beġene ruġatari-gigitari ema vanaġivanaġi moġeri vevaġa-riba guruġari loriri ai beġene raka; 2) ġofaġofa tarimari, dia Keriso Iaukana na eġori-iaġomarini tarimari, beġene ġitari, beġe ġofa-darererini garina; 3) mo ġofaġofa tarimari ġeiaġomani nai tu, asiġina ġinavaġi beġene ġabi-raġeri etorito.

Ioane na mai fefa tu maiġesi eboioġaiatio:

1. Vevaġa-riba moġonina lorina na moġo ema veuravini ai beġene raka - siri 1-6

2. Veiġa kerereri asi beġene veiri - siri 7-13

<sup>1</sup> Au, ekalesia ġorikauna taugu, na mai fefa Barau na eġabi-viriġimito vavinemu ma natumu ġesi atore-vinimini. Ġomi tu nuġagu mabarana ġesi aura-vinimini, dia au na moġo aura-vinimini, senaġi guruġa moġonina ġeribaiatio tarimari mabarari na maki ġomi ġeura-vinimini. <sup>2</sup> Korana guruġa moġonina ġita nuġarai etanuni ema ġita ġesi betanu-vanaġi vanaġini.

<sup>3</sup> Tamara Barau ema Iesu Keriso, Tamara Natuna, ġerina varevare-bara, vevetuġaġwa, ema maino ġemi ai bene tanu, moġoni ai e veuravini ai.

*Guruġa moġonina ema veuravini*

<sup>4</sup> Au tu averere-baregoni, korana ġoi natumu tari adoġaririto guruġa moġoninai ġetanuni nai, ġita Tamara na ekirarato ilailanai. <sup>5</sup> Vavine, maitoma ġoi anoġimuni tu, ġita tata bisini veura-vevini. Dia taravatu variġuna atore-vinimini, senaġi mo tu tovotovona na veġata taġabiatio dagarana. <sup>6</sup> Veuravini tu maiġesi: Barau ġena taravatu guruġari ilailari ai bitana raka. Tovotovona na veġata ġoseġaġiatio kavana, ġia ġena taravatu guruġana tu veuravini ai boġono raka.

<sup>7</sup> Ġofaġofa tarimari tu ġutuma tanobarai ġerakao-rakaoni. Iesu Keriso tu tarimarimai eiaġoto tu asi ġevaġa-moġoniani e asi ġekiraġiani. Moġesi tarimari tu ġofaġofa tarimari, ema Keriso ġevetari-viniani tarimari. <sup>8</sup> Moġesina nai, lorimi boġono vetore, ġemi vekwaraġi ai kara ġoġoitaġorito dagarari ġomi ġemina beġe veġitani garina. Namona tu ġomi voimi mabarana boġono ġabi-ġosiri. <sup>9</sup> Deikara na Keriso ġena vevaġa-riba guruġari beraga-kwanerini, vevaġa-riba tari beġabi-raġerini tarimana, ġia ġenai Barau asi etanuni. A deikara Keriso ġena vevaġa-riba guruġari bekorana-iaġirini tarimana tu, Tamana e Natuna tauri ruarua eġabirito. <sup>10</sup> Bema tarima ta beiaġosini, vevaġa-riba guruġari irauri bekiraġirini tu, asi boġono ġabi-raġea ġemi numai, ema asi boġono vaġa-namo maki. <sup>11</sup> Korana tu bevaġa-namoani tarimana tu mo tarima ġena vei-rakava beġabiani, benamo ġia maki vei-rakava tarimanai beiaġoni.

*Guruġa magona*

<sup>12</sup> Au aurani guruġa ġutuma bara tore-vinimi, senaġi asi aurani fefai bana toreri. Ġegu ura tu bana iaġosi ema ġomi ġesi bitana guruġa-guruġa, be ġera verere bene barego-lelevaġi.

<sup>13</sup> Ġoi tarikakamu vavinena, Barau na eġabi-toreato vavinena, ġia natuna na ġeri vevaġa-namo ġetuġuani ġoi ġemu.

## IOANE ĠENA TORETORE VAĠA-TOITAINA

3 Ioane vaġa-foforina guruġari

Ioane na mai fefa vaġa-toitoina tu ekalesia gwaġiġina ta arana Gaius ġena etoreato.

Mai fefa tu laġani 85 ma 100 fakari nuġanai ta Ioane na etoreato, mo tu Iesu maki emaseto murinau vau.

Siri baregona tu siri 5.

Ioane na mai fefa etoreato ġena ura tu, 1) Gaius bene launaġia, mo tarikaka tari eġabi-raġerito moġeri dairi ai; 2) Gaius bene vaġa-ribaia, mo seġafore tarimana arana Diotrefe tu Ioane tauġena beiaġoni vauro bea kira-feifeiani etato; 3) Demetrio ġena veiġa namori bene ġitari etato.

Ioane na mai fefa tu maiġesi eboioġaiato:

1. Gaius evaġa-naġiatio - siri 1-8

2. Diotrefe ekira-rakavaiato - siri 9-11

3. Demetrio evaġa-raġeato - siri 12-14

<sup>1</sup> Au, ekalesia ġorikauna taugu, na ġatagu namona Gaius atore-vinimuni. Ġoi aura-vinimuni ma nuġagu mabarana ġesi.

<sup>2</sup> Ġatagu namomu, Barau anoġiani dagara mabarari oveirini tu namo beġene vaġa-ġorari ġana, ema ġoi maki asi bono keve-misimisi, korana au ribagu ġoi iaukamu tu namo, be namo e iaku ai moġo bono tanu. <sup>3</sup> Tarikakara tari ġeiaġomato, benamo kamasi ġoi guruġa moġonina okorana-iaġiani e ġemu vetuġamaġikau ġema-varifiuato. Moġeri aseġaġirito nai, au tu aiaku-rakavato. <sup>4</sup> Aseġaġini, au natugu guruġa moġonina ġekorana-iaġiani nai, ġegu iaku e verere ġebarego-rakavani. Dagara tari iakuri oveini maki evanaġirini.

*Gaius ġena ġauvei ġevaġa-raġeato*

<sup>5</sup> Ġatagu namomu, ġoi tu ma ġemu vetuġamaġikau mani ġauvei oveiani nai, korana tarikakara tari ġeri iaġoiaġo ai oġabi-raġerini, enabe asi ribamu tarimari. <sup>6</sup> Ġia na mai ekalesia ġoirari ai ġoi ġemu veuravini ġema-kiraġi-foforirito. Mani ġemu veiġa ma bono vaġa-kavari, be ġeri iaġoiaġo beġene iaġo-vinia Barau ġena ura dabarana ilailanai. <sup>7</sup> Korana tu Keriso arana dainai ġeraka-rosito, ema ġeri iaġoiaġo ai tu asi ekalesia tarimari ġerina kara ta asi ġeġabi-raġeato. <sup>8</sup> Ġita na tu moġesi tarimari bitana vaġa-kavari, korana moġesina tu guruġa moġonina varifiuna uranai bita ġauvei-vegogoni.

*Diotrefe ġena veiġa tu rakava*

<sup>9</sup> Fefa kubina ta ekalesia doġorona atore-viniato, senaġi Diotrefe bene veġorikau etoni tarimana na au na kara akiraġirini tu asi eġabi-raġerini. <sup>10</sup> Moġa lorinai au baiaġosini tu, ġia na kara eveirini veiġari mabarari basi kiraġi-foforirini, guruġa rakavari ġai ġemai ekiraġirini guruġari ema eġofaġofani guruġari! Dia moġeri veiġa moġo, senaġi tarikakara tari ġema-varivarini maki asi eurani bene ġabi-raġeri. Mo varivari bene ġabi-raġeri etoni ekalesiari maki ekourini ema ekalesia na etore-veġitarini.

*Demetrio ġena veiġa tu namo*

<sup>11</sup> Ġatagu namomu, rakava veiġari asi bono tovtovori, senaġi veiġa namori moġo. Veiġa namori eveini tarimana tu Barau ġena tarima, a veiġa rakavari eveini tarimana tu Barau asi eġitaiato.

<sup>12</sup> Tarimarima mabarari ġekirani, Demetrio tu tarima namona ġetoni; Barau ġena guruġa moġonina na maki evaġa-foforiani tu tarima namona. Ġai na maki ġia tu moġesi ġakiraġiani, ema ġoi tu ma ribamu, ġai ġema guruġa tu moġoni.

*Dokona guruġari*

<sup>13</sup> Au aurani guruḡa ḡutuma bara tore-vinimi, senaḡi asi aurani fefai bana toreri.

<sup>14</sup> Au ḡegu tuḡamaḡi tu bana iaḡosi, be taura ruarua tana tanu-veḡoira vau tana guruḡa-guruḡa.

<sup>15</sup> Maino ḡemu ai bene tanu. Ḡatara maiḡeri na ḡevaḡa-namomuni. Ḡatara maninai tata ḡegu vevaḡa-namo bono viniri.

## IUDAS (O IUD) ĠENA TORETORE

Iudas (o Iud) vaġa-foforina guruġari

Mai fefa tu Iudas (o Iud), Iesu tarina, na etoreato. Mai fefa tu ekalesia mabarari ġeri.

Iudas na mai fefa tu laġani 65 ma 70 fakari nuġanai ta etoreato, mo tu Iesu emaseto murinai.

Siri baregona tu siri 3.

Iudas na mai fefai ekalesia mabarari ekirarito, 1) ġeri veġabidadamai beġene ruġa-gwaġiġi; 2) beġene venari, apostolo ġofaġofari na beġe ġofa-veġonurini garina; 3) Barau ġena vevaġa-riba guruġari beġene korana-iaġiri.

Iudas na mai fefa tu maiġesina eboioġaiato:

1. Veġabidadama na ġeveġitani tarimari ġeri veiġa - siri 1-16
2. Veġabidadama beġene ġabi-gwaġiġia - siri 17-23

<sup>1</sup> Au Iudas, Iesu Vereġauka ġena vetuġunaġi tarimagu, ema Iakobo (o Iames) tarina, ġeguna mai fefa eiaġosini. Ġomi Barau na ekeamito tarimami, Tamara Barau na eura-vinimini ema Iesu Keriso na eġita-ġaumini tarimami, atore-vinimini.

<sup>2</sup> Vevetuġaġwa, maino, ema veura-vini na boġono vonuvonu-raġe.

*Vevaġa-riba tarimari ġofaġofari*

<sup>3</sup> Ġatagu mabarami, ġegu ura baregona ġera vevaġa-maġuri dabarana guruġana bana tore-vinimi atato, senaġi au na aġitaiato, namona tu ġegu fefai bana launaġimi, Barau ġena veaġa tarimari evinirito veġabi-dadamana boġono ġabi-gigitaria. <sup>4</sup> Korana tarima kotari, Barau asi ġekorana-iaġiani tarimari, tu vekure-toġai ġomi fakami ai ġerakatoġa-ġairito. Maniġeri tarima na tu ġita ġera Barau ġena varevare-bara ġeġabiani, ġia ġeri veiġa rakavari beġene veiri ġana dabaranai ġevaġa-iaġoani, ema Iesu Keriso ġera Vereġauka e Vere Baregona sebna kwariġutu moġo ġekira-fitoġaiani. Barau na kai-veġata ġena bukai etore-vanaġiato, ġeri rakava voiri beġe doġaririni.

<sup>5</sup> Ġomi Buka Vevaġa variri mabarari ġoriba-guinerito, senaġi aurani ma navaġa-riba ġenoġoimi, Vereġauka na Isaraela tarimari tu aiġesina evaġa-maġuririto Aigupito tanona na, senaġi murinai asi ġevaġa-moġoniato tarimari tu ma evaġi-maserito. <sup>6</sup> Aneru tari maki ġotuġamaġiri, ġeri dagi korikori asi ġeġabi-gwaġiġirito, ema ġeri tanu gabuna ġeraga-kwaneato. Moġa lorinai Barau na mukuna gabunai etorerito, tanu-vanaġivanaġi seiniri na ebaru-taririto, ġena Kota baregona ġarona ġana. <sup>7</sup> Sodoma e Gomora, ema seviri ai taoniri asi boġono tuġarekwari. Moġeri tarima ġeri veiġa maki aneru ġeveito veiġari kavana ġeveirito, ġemata-boraġato e veiġa boraġari ġeveito, benamo tanu-vanaġivanaġi karavana na eġararito, mo tu ġita ġera ġitaġita ġana.

<sup>8</sup> Moġesi veiġa ilailanai, mo nuvi tarimari na maki tauġeri tauġaniri moġesi ġevaġa-rakavarini; Barau ġena maoro ġekira-fitoġaiani, ema iauka baregori ġevei-veġare veġarerini. <sup>9</sup> A Maikolo, aneru mabarari ġeri vere ta, Diabolo ġesi ġevevaneto, Mose tauġanina dei na bene ġabia ġaramanai nai, Maikolo na Diabolo guruġa rakavari na asi evaneato, senaġi ekiraiato, “Vereġauka na bene kira-feimu!” etato. <sup>10</sup> Senaġi moġeri tarima tu asi ġetuġamaġi-maġatarini dagarari ġevei-veġare veġarerini; ema ġeri vemamiraġi ai ġeribarini dagarari bai kavari, moġeri dagara na ġia ġevaġa-rakavarini. <sup>11</sup> Vetuġari kika! Ġia tu Kaino ġena veiġa beġe ġabia. Balam ekerereto kavana farefare boruri ragari beġe vei. Kora eseġa-foreto e tauġena evevaġa-rakavato kavana ġia maki beġe seġafore e tauġeri beġe vevaġa-rakava.

<sup>12</sup> Moġeri tarima ġomi ġemi ġanivegogo ġoveirini nai, ġia tu miro noġa ġomi fakami ai. Ġia tauġeri moġo ġevetuġamaġikauni. Ġia tu magube asi ġurari, iavara na eġwara-rakarakao-kavarini kavana. Ema ġau korukoru meramerai maki asi ġwaġwana kavana, ma ġokaġokari ġelau-raġerini, ġemase-vaġa-ruaruani. <sup>13</sup> Ġia tu davara ureureri na

kaburo-buro ġefoforini noġa, ġeri maiaka veiġari ġefoforini. Ġia tu ġeri dabara ġeraga-kwanerito visiġuri kavana, Barau na mukuna furufuru gabuna ġeri etoreato etanuvanaġi vanaġini.

<sup>14</sup> Adamu besena vaġa-imaima ruaruana (7), Enoka, ġia na moġeri tarima eperoveta-iaġirito, ekirato, “Ġoboġe, Vereġauka tu mai eiaġomani ma ġena aneru veaġari asi gadaragadara ġesi, <sup>15</sup> tarimarima mabarari vevaġa-maoro bene viniri ġana. Barau asi ġekorana-iaġiani tarimari ġeri rakava nuġanai Barau asi ġekorana-iaġiani veiġari ġeveirini, ema vei-rakava tarimari, Barau asi ġekorana-iaġiani tarimari, na Barau guruġa rakavari ġeviniato, mabarari ġeri vei-rakava voina bene kiraġiri ġana.” <sup>16</sup> Moġeri tarima tu mugumugu e veroritore moġo ribari. Ġia tu ġeri ura rakavari ġeiaġo-vinirini, tauġeri ġevevaġa-raġeni ema tarima tari ġevaġa-namo ġofa-kaurini ġia tauġeri namo beġene doġari uranai.

#### *Velaunaġi guruġari*

<sup>17</sup> Senaġi ġomi, ġatagu mabarami, ġera Vereġauka Iesu Keriso ġena apostolo na ġevaġa-guruġamito guruġari boġono tuġamaġi-taġori. <sup>18</sup> Ġevaġa-guruġamito, ġekirato, “Ġaro dokori ai vei-veġareveġare tarimari beġe foforini, Barau muriri ai beġe toreani, benamo ġeri ura rakavari beġe iaġo-vinirini.” <sup>19</sup> Moġeri tarimarima na ġomi fakami ai vetavi-kirakira ġevaġa-ġoraiani. Ġia tu ġeri ura rakavari na ġeguine-iaġirini. Iauka Veaġa ġia ġeri ai maki asiġi.

<sup>20</sup> Senaġi ġomi, ġatagu mabarami, ġemi veġabidadama veaġana boġono ġabigigitaria, ma iatanai ġemi maġuri boġono tore-varaġea. Iauka Veaġa seġukanai boġono ġauġau. <sup>21</sup> Barau ġena veuravini nuġanai boġono tanu ema ġera Vereġauka Iesu Keriso ġena vevetuġaġwai boġono naria, korana ġena vevetuġaġwai maġuri vanaġivanaġi bevinimini. <sup>22</sup> Ġetuġamaġi-iauvoiauvoni tarimari boġono vetuġaġwari. <sup>23</sup> Tarima kotari karava nuġana na boġono inu-vaġiri, boġono vaġa-maġuriri. Ma kotari boġono vetuġari, senaġi ma garimi ġesi, ġeri miro na beġe vaġa-rakavamini garina.

#### *Barau vaġa-raġena ġuriġurina*

<sup>24</sup> Barau na benarimini riba, benamo asi boġo ketoni, ema ġia ġena mareva baregonai bea toremeni asi vetoukaumi e ma iakumi ġesi. <sup>25</sup> Ġita ġera Barau sebona, ġera Vereġauka Iesu Keriso bakunai evaġa-maġurirani Barauna, bitana vaġa-raġea. Ġia tu iaru-korokoro ma marevana baregona, kokore e seġuka mabarana tu ġia ġena, toma bene iaġo vanaġivanaġi! Amen.

## APOKALUPO

Apokalupo vaḡa-foforina guruḡari

Apokalipsis (o Apokalupo) Grik garo ai anina ta tu “vevaḡa-fofori”. Mai buka tu Ioane na etoreato ekalesia doḡorori imaima ruarua (7) ema Iesu ḡevaḡa-moḡoniani tarimari tanobara mabaranaḡi ḡetanuni tarimari ḡeri.

Ioane na mai Apokalupo bukana tu motumotu tai arana Patmos ai ediburato-ḡoi nuḡanaḡi etoreato. Mai buka tu laḡani 90 ema 96 fakari nuḡanaḡi ta etoreato, mo tu Iesu maki emaseto murinaḡi vau.

Siri baregori mai Apokalupo bukana nuḡanaḡi tu karoa 1:19; 21:5.

Iesu na Ioane ekiraiato, mai buka etoreato korana tu, Iesu ḡena ura kara ḡoirai dori ḡeḡorani dagarari tarimarima na beḡene ribari. Mai buka Ioane na etoreato korana tari tu, 1) Keriso Iesu Vereḡauka ḡena ḡauvei irauirauri tata bene vaḡa-foforiri ḡana uranaḡi; 2) Asia Keina (o Minor) ai ekalesia doḡorori imaima ruarua (7) moḡeri bene kirari, e bene launaḡiri, ema ḡevei-rakavato-ḡoi nai bene kira-feifeiri ḡana; 3) Genese ai vevaḡa-maḡuri boioḡana Barau na ekiraḡiato moḡa dokona bemoḡonini e bevetore-korikorini bene vaḡa-fofori ginikaua ḡana.

Ioane na mai Apokalupo bukana tu maiḡesi eboioḡaiato:

1. Keriso Barau na mareva baregona eviniato varina - karoa 1
2. Keriso vetuḡunaḡi ḡauveiri maitoma eveirini - karoa 2-3
3. Keriso ḡena kokore varina - karoa 4-22

*Ioane ḡena mata-vanaḡi guruḡari*

<sup>1</sup> Mai toretore maiḡa tu Iesu Keriso ḡenai Barau na kara evaḡa-foforiato guruḡana. Barau na eviniato, korana tu eurato, Iesu na ḡena vetuḡunaḡi tarimari dori moḡo ḡeḡorani dagarari bene vaḡa-ribari ḡana. Keriso na aneru etuḡuato, ḡena vetuḡunaḡi tarimana Ioane evaḡa-ribaiato. <sup>2</sup> Ioane na Barau ḡena guruḡa ema Iesu Keriso ḡena vevarifiu eḡitarito dagarari mabarari evari-fiurito. <sup>3</sup> Mai peroveta guruḡari beiaviani tarimana tu beverereni, ema mai peroveta guruḡari, Ioane na etorerito maiḡeri, beḡe seḡaḡirini ema beḡe korana-iaḡirini tarimari maki beḡe verereni. Korana mai dagara mabarari beḡe ḡorani ḡarona tu varau beraḡasi-rakava.

*Ioane ḡena vevaḡa-namo guruḡana ekalesia doḡorori imaima ruarua (7) ḡeri*

<sup>4</sup> Au Ioane, Asia tanobaranai ekalesia doḡoromi imaima ruarua (7) atore-vinimini: Varevare-bara e maino tu ḡomi ḡemi ai bene tanu. Mo varevare-bara e maino tu etanuni, etanuto, ema ma beiaḡomani Barauna ḡenana eiaḡomani, ema iauka imaima ruarua (7) Barau ḡena terona ḡoiranaḡi ḡeruḡani ḡerina eiaḡomani, <sup>5</sup> ema Iesu Keriso ḡenana eiaḡomani. ḡia tu Barau ḡena guruḡa evaḡa-moḡoniani ema evaḡa-foforiani ma vetuḡamaḡikauna ḡesi. ḡia tu mero guinena mase na evariḡisi-ḡenoḡoito, ema ḡia tu tanobara vereri mabarari ḡeri Vere.

ḡia na eura-vinirani e ḡera rakava rarana na eḡuriḡi-fitoḡarito, <sup>6</sup> benamo Barau ḡena Basileia doḡorona tarimarai evaḡa-iaḡorato, ema Rubu Veavaḡa vereri ai evaga-iaḡorato, ḡia Tamana e ḡena Barau vetuḡunaḡina bitana iaḡo-vini ḡana. ḡia ḡenai mareva baregona e seḡuka bene tanu vanaḡivanaḡi! Amen.

<sup>7</sup> ḡoḡitaia, ḡia tu magube nuḡana na eiaḡomani, mata mabarari na beḡe ḡitaiani, ḡegwanuato tarimari na maki. Ema tanobara tarimari mabarari ḡia koranaḡi beḡe taḡi-rakavani. Mo tu moḡoni. Amen.

<sup>8</sup> Vereḡauka Barau ekirani, “Au tu Alefa ema Omega, (giniguinena ema dokona), atanuni, atanuto, e ma baiaḡomani, Iaru-korokoro Barauna.”

*Keriso Ioane ḡenai efoforito*



<sup>9</sup> Au Ioane, ġomi tarikakami ema Vereġauka ġena ġauvei tavei-vegogoani tarimagu. Au tu ġomi ġesi Iesu ġena maġuri nuġanai tamidigu-midigu sebonani, e Barau ġena Basileia nuġanai tatanu-sebonani, ema meto nuġari ai tavevaġa-gwaġiġini e taruġa-gwaġiġini. Au Barau ġena guruġa aġobata-iaġiani ema Iesu varina guruġari avaġa-moġonirini e akiraġi-foforirini ġaramanai tu, Patmos motumotunai ġea tore-ragakwaneguto. <sup>10</sup> Vereġauka ġena ġaro ai Barau laukana na eboroġiguto, benamo murigu ai garo baregona ta noġa moġo dudu guruna kavana aseġaġiato. <sup>11</sup> Mo garo tu maiġesina ekirato: “Kara boġitarini dagarari bukai bono tore-vanaġiri, benamo mai ekalesia doġorori imaima ruarua (7) maiġeri ġeri bono tuġu-iaġori: Efeso, Smena, Pegamo, Taiatira, Sadis, Filadelfia ema Laodikea ġeri.”

<sup>12</sup> Aruġa-kureto, deikara na au evaġa-guruġaguto naġitaia ġana, benamo au na golo na lamefa torekauri ġeveirito dagarari imaima ruarua (7) aġitarito. <sup>13</sup> Mo lamefa torekauri dagarari vekaravari ai tu tarima ta noġa moġo Tarimarima Natuna kavana, ġena dabuġa tu mauka kenene evariġoto mo kwakuna fanafanana, ema kobana tu golo beletana na etore-ġeġeraġiato. <sup>14</sup> Ġia debana ema ġuina tu kurokuro vulu kavana, snou noġa kuroġaroġaro, ema matana tu karava moreri noġa moġo ekimore-kimoreato-ġoi. <sup>15</sup> Ġia kwakuna fanafanana tu auri boraborari karava na ġegaburini, benamo ġevei-ginikaurini nai ġeveġia-veġiani kavana. Ma garona tu ġaruka vovoka ġeġaru-gwadani gururi kavana. <sup>16</sup> Ġia ġimana aroribanai tu visiġu imaima ruarua (7) eġabirito, ma bokana na tu vetari baġana matana reketa-reketa raga-rakava-rakava eraka-rosito. Ġia ġoirana ġitaġitana tu ġaroġota kirikiri, ġaro etorani mamana kavana.

<sup>17</sup> Au na aġitaia to nai, kwakuna koranai aketo-tarito mase tarimana ta noġa moġo. Benamo ġia ġimana aroribana au iatagu ai etore-kauato, bena ekirato, “Asi nogari! Au tu giniguinena ema dokona. <sup>18</sup> Au tu maġuri atanuni. Amaseto, senaġi toma au tu maġuri batanu-vanaġi vanaġini. Ema Mase e mase tarimari iaukari ġetanuni Gabuna (o Hades) kina tu au ġegu ai. <sup>19</sup> Moġesina naima mai oġitarini dagarari mabarari bono tore-vanaġiri, mai tu inította ġetanuni dagarari ema ġoirai vauro beġea ġorani dagarari. <sup>20</sup> Mai visiġu imaima ruarua (7) au ġimagu aroribanai boġitari ema lamefa torekauri dagarari golo na ġeveirito imaima ruarua (7) anina vekuretoġana tu maiġa: Visiġu 7 tu ekalesia doġorori 7 ġeri aneru. Ma golo na lamefa torekauri ġeveirito dagarari 7 tu ekalesia doġorori 7.”

## 2

**Vevaġa-riba guruġana Efeso ai ekalesia doġorona ġena**

<sup>1</sup> “Efeso ai ekalesia doġorona ġeri aneru tu maiġesi bono tore-vinia:

Ġimana aroribanai visiġu imaima ruarua (7) eġabi-taġorini ema golo na lamefa torekauri ġeveirito dagarari 7 vekaravari na erakaoni tarimana ġena guruġa tu maiġeri. <sup>2</sup> Ġoi ġemu veiġa namori, ġemu ġauvei nuġanai ġemu vekwaraġi ema ġemu vevaġa-gwaġiġi tu au ma ribagu. Ema au ribagu, tarima rakavari ġoi na asi boġabi-raġerini, ema asi apostolo tarimari, senaġi tauġeri moġo apostolo tarimari ai ġevevaġa-iaġoni tarimari, maki ġoi na otovo-naġirito, benamo oribarito ġia tu ġofaġofa tarimari. <sup>3</sup> Au aragu ġaramanai meto oġoitaġoto, senaġi ovevaġa-gwaġiġito ema okokoreto, asi kota maki oruġa-moirato.

<sup>4</sup> Senaġi mai dagara sebna moġo ġemu ai asi aura-viniani: Tovotovonai ġemu veuravini baregona au ġegu ai otoreato-ġoi, moġa tu oiaġuiato. <sup>5</sup> Bono tuġamaġi-ġenoġoi, ġoi tu kamasi oġabi-raġeguto, ma boketo tu ainai mani boa raġasi! Ġemu rakava ġenana bono vetuġamaġi-kure, be tovotovonai oveirito-ġoi veiġari ma bono veiri. Bema asi bovetuġamaġi-kureni ma asi boraka-kureni nai, au tu baiaġosini, benamo ġemu lamefa vaġa-ruġakauna dagarana gabuna na basi ġabi-veġitaiani. <sup>6</sup> Senaġi ġoi ġemu namo tu Nikolaita tarimari ġeri veiġa rakavari asi oura-vinirini. Moġeri veiġa tu au na maki asi aura-vinirini.

<sup>7</sup> Ma seḡana tarimana na Iauka Veaḡa na ekalesia doḡorori kara ekiravara-vinirini guruḡari tu bene seḡaḡiri. Bekokoreni tarimana tu au na maoro baviniiani, ḡia maḡuri ḡauna, Barau ḡena paradaiso ai etubuni dagarana, ḡwaḡwana beḡaniani.”

*Veaḡa-riba guruḡana Smena ai ekalesia doḡorona ḡena*

<sup>8</sup> Smena ai ekalesia doḡorona ḡeri aneru tu maiḡesina bono tore-vinia:

“Giniguinena ema dokona, e emaseto benamo ma emaḡuri-ḡenoḡoito tarimana ḡena guruḡa tu maiḡeri: <sup>9</sup> Ḳoi meto ema midigumidigu oḡoitaḡoni au ma ribagu, ema asi ḡemu asi ḡamu maki au ma ribagu. Senaḡi moḡoni veḡata ḡoi tu farefare vovoka tarimamu! Mani tauḡeri moḡo ḡevekiraḡini Iuda tarimari ḡetoni tarimari na ḡoi iatamu ai guruḡa rakavari ḡekiraḡirini guruḡari tu au ma ribagu. Ḳia tu dia Iuda tarimari korikori, a ḡia tu Satani ḡena doḡoro tarimari. <sup>10</sup> Ḳoirai midigumidigu tari dori oḡoitaḡorini, senaḡi mo midigumidigu gariri asi bono vei. Bono ḡitaia, ḡomi kotari tu Diabolo na betovo-naḡimini, be diburai betoremimi, benamo monai ḡaro gabanana (10) boḡo midigu-midiguni. Monai maki enabe bomaseni, senaḡi ḡemu vetuḡa-maḡikau au ḡegu ai tu bene tanu. Moḡesina boveini nai tu, maḡuri koronana baviniimuni.

<sup>11</sup> Ma seḡana tarimana na Iauka Veaḡa na ekalesia doḡorori kara ekiravara-vinirini guruḡari bene seḡaḡiri. Bekokoreni tarimana tu mase vaḡa-ruaruana na asi bevaḡa-rakavaiani.”

*Veaḡa-riba guruḡana Pegamo ai ekalesia doḡorona ḡena*

<sup>12</sup> “Pegamo ai ekalesia doḡorona ḡeri aneru tu maiḡesina bono tore-vinia:

Ḳena vetari baḡana matana reketa-reketa ma ragari tarimana ḡena guruḡa tu maiḡeri: <sup>13</sup> Au ribagu ḡoi ainai otanuni. Ḳoi tu Satani ḡena vere seana evaḡa-ruḡa-tariato vanuḡanai otanuni. Senaḡina ḡoi na au aragu tu ma moḡonimu ḡesi okorana-iaḡiani, ḡemu veḡabidadama au ḡegu ai maki asi veḡata oraga-kwaneato. Antipas ḡomi ḡemi vanuḡa baregona nuḡanai ḡevaḡi-maseato ḡaronai maki, ḡoi ḡemu veḡabidadama tu asi oraga-kwaneato. Antipas tu ma vetuḡa-maḡikauna ḡesi au varigu evaḡa-moḡoniato-ḡoi ema ekiraḡi-foforiato-ḡoi. Satani tu mani ḡomi ḡemi vanuḡa baregona nuḡanai etanuni. <sup>14</sup> Senaḡi dagara tari ḡoi ḡemu ai maniḡeri au na tu asi aura-vinirini. Tarima kotari ḡoi rekemu ai maniḡeri tu Balam ḡena vevaḡa-riba veiḡari roḡo ḡekorana-iaḡirini. Balam na vevaḡa-riba kerereri Balak eviniato nai, Isaraela tarimari eḡorikau-darererito, bena rakava ḡeveito, kwaivakuku ḡevinirito bureḡari ḡeḡanirito ema mata-boraḡa veiḡari ḡeveirito-ḡoi. <sup>15</sup> Moḡa kavana ḡoi rekemu ai tarima kotari maniḡeri maki Nikolaita doḡoro tarimari ḡeri vevaḡa-riba ḡofaḡofa veiḡari ḡekorana-iaḡirini. <sup>16</sup> Ḳovetuḡamaḡi-kure! Bema asiḡina nai tu, au ḡoi ḡemu ai baiaḡosi-ḡarimoḡini, benamo vetari baḡana au murugu ai mainana basi vaḡa-vevaḡirini.

<sup>17</sup> Ma seḡana tarimana na Iauka Veaḡa na ekalesia doḡorori kara ekiravara-vinirini guruḡari bene seḡaḡiri. Bekokoreni tarimana tu, au na mana baviniiani. Mai mana maiḡa toma tu vekuretoḡa etanuni. Ema ḡia tu au na fore kurokurona ta baviniiani. Mo fore kurokurona iatanai tu ara variḡuna ta etoreato, mo tu ta asi beribani, beḡabiani tarimana na moḡo beribaiani.”

*Veaḡa-riba guruḡana Taiatira ai ekalesia doḡorona ḡena*

<sup>18</sup> “Taiatira ai ekalesia doḡorona ḡeri aneru tu maiḡesina bono tore-vinia:

Barau Natuna, matana tu karava moreri noḡa moḡo kimorekimore, ma kwakuna fanafanari tu auri boraborari karava na ḡegaburini, benamo ḡevei-ginikaurini nai ḡeveḡia-veḡiani kavana, ḡena guruḡa tu maiḡeri: <sup>19</sup> Ḳemu ḡauvei, ḡemu veuravini ema veḡabidadama, ḡemu vetuḡunaḡi iaḡovini ema vevaḡa-gwaḡiḡi, ema toma ḡauvei oveiani tu barego lelevaḡi, tovotovonai oveirito-ḡoi moḡeri tu ovanaḡirini. Moḡeri mabarari aḡita-iaḡomarini, be ribagu.

<sup>20</sup> Senaḡi mai dagara sebona ḡoi ḡemu ai maniḡa tu asi veḡata aura-viniani. Ḡoi tu Iesebel, tauḡena moḡo evekiraḡini peroveta vavinena etoni maniḡa, ḡoi na tu oḡabi-raḡeani. Mani vavine ḡena vevaḡa-riba na au ḡegu vetuḡunaḡi-iaḡovini tarimari ḡemata-boraḡani ema kwaivakuku ḡevinirini bureḡari ḡeḡanirini. <sup>21</sup> Au na ḡia tu ḡena taimi aviniato, mo mata-boraḡa veiḡari na bene vetuḡamaḡi-kure ḡana. Senaḡi ḡia tu asi veḡata eurani bene vetuḡamaḡi-kure. <sup>22</sup> Moḡa lorinai ḡia tu genagena gabunai bafiu-kauani, monai bea midigu-midiguni. Ḡia ḡesi veḡura-vanaḡi veiḡari ḡeveini tarimari maki ḡia ḡesi midigumidigu baregona beḡe ḡabi-sebonaiani. Bema ḡia Iesebel ḡena veḡura-vanaḡi veiḡari na asi beḡe vetuḡamaḡi-kureni nai tu, mo midigumidigu beḡe ḡabiani. <sup>23</sup> Ḡia natuna maki au na bavaḡi-maserini. Benamo monana ekalesia doḡorori mabarari beḡe ribani, au tu tarimarima nuḡari iaḡasiri ema ḡeri tuḡamaḡi aragaḡirini tarimagu. Ema ḡomi tata maki ḡemi veiḡa ilailari ai voimi bavinimini.

<sup>24</sup> Ḡomi Taiatira ai ekalesia kotari tu Iesebel ḡena vevaḡa-riba rakavari asi ḡokorana-iaḡirini ema Satani ḡena iaunega vekuretoḡari, dobudoburi ḡekiraḡirini, tu asi ḡoribarini. Ḡomi mani ḡemi tu avaḡa-guruḡa korikorimini, ḡemi ai meto ta tu asiḡina ḡinavaḡi batore-kauani. <sup>25</sup> Dagara baregona tu, mani kara ḡemi ai maniḡa, moḡa boḡono ḡabi-gigitaria mo, au bana ḡenoḡoi-iaḡoma.

<sup>26</sup> Bekokoreni ema au ḡegu ura bekorana-iaḡiani mo magona bea ḡabiani tarimana tu, au na maoro baviniani, tanobara beseri beguine-iaḡirini. <sup>27</sup> Ḡia na tanobara beseri tu auri togoina na beḡori-kaurini ma seḡukana baregona ḡesi, ma tano ḡurori noḡa bekwari-kira kirarini. Au na ḡia seḡuka baviniani, Tamagu ḡenana seḡuka aḡabiato ilailanai. <sup>28</sup> Ema ḡia tu au na laḡani visiḡuna baviniani, (mo seḡuka vetoḡana). <sup>29</sup> Ma seḡana tarimana na Iauka Veaḡa na ekalesia doḡorori kara ekiravara-vinirini guruḡari bene seḡaḡiri.”

### 3

*Veavaḡa-riba guruḡana Sadis ai ekalesia doḡorona ḡena*

<sup>1</sup> “Sadis ai ekalesia doḡorona ḡeri aneru tu maiḡesina bono tore-vinia:

Barau Iaukana imaima ruarua (7) ḡia ḡenai ḡetanuni ema visiḡu imaima ruarua (7) eḡabi-taḡorini tarimana ḡena guruḡa tu maiḡeri: Ḡoi na ḡauvei oveirini tu au ma ribagu. Tarimarima na ḡoi ḡekiraḡimuni, ḡekirani, “Mani ekalesia tu maḡuri” ḡetoni, senaḡi korikorina ḡoi tu mase otanuni. <sup>2</sup> Notataḡa, ḡemu ai veḡabidadama maḡurina kotuna moḡo dori emase-vaḡini maniḡea novaḡa-kokorea. Korana au na ḡoi ḡemu ḡauvei aḡoitaḡoato dia roroḡoto au ḡegu Barau ḡoiranai. <sup>3</sup> Moḡesina naima Vari Namona ḡoseḡaḡiato ma ḡoḡabi-raḡeato maniḡa boḡono tuḡamaḡia ema boḡono korana-iaḡia, be ḡemi rakava ḡerina ḡovetuḡamaḡi-kure. Bema asi botataḡani nai, au ḡemu ai noḡa moḡo lema tarimana ta kavana baiaḡosini. Be kamara taimi ai basi raḡasini, moḡa tu asi kota maki boribaiani.

<sup>4</sup> Senaḡi ḡoi ḡemu tarima kotari Sadis ai maniḡeri, ḡeri dabuḡa asi kota maki ḡevaḡa-miro-kararito. Ḡia maniḡeri tu au ḡesi baḡa rakao-rakao vegogoni, ma dabuḡa kurokurori baḡa riḡorini, korana ḡia ḡeri veiḡa tu iobukaiobuka bene. <sup>5</sup> Bekokoreni tarimana tu ḡia kavari dabuḡa kurokurori na bavaḡa-dabuḡaiani. Au na ḡia arana maḡuri bukana na asi barumu-fitoḡaiani, a au Tamagu ma ḡena aneru ḡesi ḡoirari ai ḡia arana bakiraḡi-foforiani.

<sup>6</sup> Ma seḡana tarimana na Iauka Veavaḡa na ekalesia doḡorori kara ekiravara-vinirini guruḡari bene seḡaḡiri.”

*Veavaḡa-riba guruḡana Filadelfia ai ekalesia doḡorona ḡena*

<sup>7</sup> “Filadelfia ai ekalesia doḡorona ḡeri aneru tu maiḡesina bono tore-vinia:

Davidu ḡena ki, (veavaḡa-maḡuri kina), eḡabi-taḡoani tarimana, tarima veavaḡana ema moḡoni korikorina. Ḡia na kara bekeo-fakaiani, tarima ta na asi ma bekou-ḡauani riba, ema bekouani dagarana ta na asi ilaila ma bekeoani riba. Mai tarima ḡena guruḡa tu

maiġesina: <sup>8</sup> Ġoi ġemu ġauvei oveirini au ma ribagu. Noboġe, ġoiramu noġitaia, ġoi ġoiramu ġatama bokana tu bakeo-fakaia, ma tarima ta asi ġena seġuka ma bekouani. Au ribagu ġoi ġemu kokore tu misina moġo, senaġi au ġegu guruġa tu oġabi-gigitariato, ema au aragu maki asi okira-ġuniġauato. <sup>9</sup> Bono ġitaia, mani Satani ġena rubu tarimari maniġeri tu tauġeri ġevekiraġini Iuda tarimari ġetoni, senaġi ġia tu dia Iuda tarimari. Ġia maniġeri tu au na baġabi-iaġosirini, ġoi kwakumu koranai beġeasi tutuġu-tarini. Benamo beġe riba-maoroni, ġoi tu au na aura-vinimuni. <sup>10</sup> Ġoi tu au ġegu vevaġa-naġi guruġari okorana-iaġirito ma ovevaġa-gwaġiġito naima, tanobarai veribaġani taimina bevotuni nai, ġoi tu baġitaġau-ginikaumuni. Mo veribaġani na tu mai tanobara iatanai ġetanuni tarimari mabarari batovo-naġirini. <sup>11</sup> Au tu dori aiaġosini. Kara oġabiato maniġa tu bono ġabi-gigitaria, be tarima ta na ġemu korona, ġemu kokore auna, asi bene ġabia. <sup>12</sup> Bekokoreni tarimana tu au Tamagu ġena Rubu Veaġana duġuna tarimanai bavaġa-iaġoani. Mo gabu asiġina ġinavaġi ma beiaġuiani. Au na ġia ġenai au ġegu Barau arana ema au ġegu Barau ġena vanuġa baregona o siti arana baberaiani. Ieruselema variġuna tu au ġegu Barau ġena siti, ma mai siti maiġa tu guba na au Tamagu ġenana bemariġoni. Au aragu variġuna maki ġia ġenai batoreani.

<sup>13</sup> Ma seġana tarimana na Iauka Veaġa na ekalesia doġorori kara ekiravara-vinirini guruġari bene seġaġiri.”

*Vevaġa-riba guruġana Laodikea ai ekalesia doġorona ġena*

<sup>14</sup> “Laodikea ai ekalesia doġorona ġeri aneru tu maiġesina bono tore-vinia:

Guruġa moġoni korikorina ekiraġiani tarimana arana Amen ġenana eiaġosini. Ġia tu ma ġena vetuġamaġikau e Barau ġena guruġa evaġa-moġoni korikoriani ema ekiraġi-foforiani tarimana, ema Barau na eveirito dagarari mabarari ġenana ġeiaġomato tarimana ġena guruġa tu maiġeri: <sup>15</sup> Ġoi ġemu ġauvei oveirini au ma ribagu. Au ribagu, ġoi tu dia faraka ema dia seġuka. Au ġegu ura sebona ġoi tu boro faraka moġo o boro seġuka moġo! <sup>16</sup> Senaġi ġoi tu seġuseġu, a dia seġuka moġo o dia faraka moġo. Moġesina naima ġoi tu au bokagu na bakanunu-fitoġamuni. <sup>17</sup> Ġoi tu okirani, ‘Au tu ġegu farefare vovoka tabutabu, ġegu-ġagu ġutuma gorogoro bavaġa-vegogori, be au tu ilaila, kara ta asi ma atuġamaġiani.’ Senaġi ġoi tu asi oriba-maoroni ġoi tu madi kekei ma vetuġamu, asi ġemu asi ġamu, ġoi tu mata-bubu ema asi dabuġamu, korimu. <sup>18</sup> Au na ġoi asisiba-vinimuni, akiramuni, au ġeguna golo bono voi. Korana auna golo tu karava na evaġa-veveato, benamo momori mabarari tu ġeiarevarito. Be au ġegu ai mai golo bovoiani nai tu, botaġani. Ema dabuġa kurokurori maki bono voi, be bono vedabuġa-iaġi, kefimu korina maiakana bono kou-ġaua. Ema mata muramura maki bono voi, be matamu ai bono torea, bena bono boġeboġe. <sup>19</sup> Au na aura-vinirini tarimari tu akira-feirini ema atoto-maororini. Moġesina naima ġemu maġuri ema veiġa bono tuġamaġi-ginikau, benamo bono vetuġamaġi-kure ma bono raka-kure.

<sup>20</sup> Noseġaġi! Au ġatama-bokai aruġa-taġoni ma afidifidini. Bema tarima ta na au garogu beseġaġiani, benamo ġatama-boka bekeo-fakaiani nai, au baraka-toġani, benamo ġia ġesi baġa ġaniġanini ema ġia maki au ġesi beġaniġanini. <sup>21</sup> Bekokoreni tarimana tu au na maoro baviniani, au ġesi ġegu teronai baġa tanuni. Au kavana, au akokoreto nai Tamagu ġena teronai Tamagu ġesi ġatanuni.

<sup>22</sup> Ma seġana tarimana na Iauka Veaġa na ekalesia doġorori kara ekiravara-vinirini guruġari bene seġaġi.”

## 4

*Barau ġena terona gubai*

<sup>1</sup> Maiġa murinai au aboġe-iaġoto tu, ġatama-boka vekeofaka-taġo guba vanuġanai aġitaiato. Benamo garo ta kibi guruna noġa, mo tovtovonai aseġaġiato garona moġa ekirato, “Maiġana noma raġe, be maiġa murinai kara dori ġeġorani dagarari nama vaġa-ġitamu.” <sup>2</sup> Asikauna Iauka Veaġa na eboroġiguto, benamo ġoiragu ai tu tarima ta guba

teronai etanu-taḡoto-ḡoi aḡitaiato. <sup>3</sup> Mo teronai etanu-taḡoto-ḡoi tarimana vetoḡana tu fore arana iaspa ḡekimore-kimorerini marevari, ema fore kakakakari arana kanelia marevari kavana, marevana tu irau moḡo. Ma mo terona tu kevau na eḡeḡeraḡiatio. Mo kevau vetoḡana tu noḡa moḡo emeral forena kavana. <sup>4</sup> Mo terona moḡa tu terona gabana ruarua ma vasivasi (24) na ḡetore-ḡeḡeraḡiatio. Ma mo terona 24 ai tu veḡitaḡau tarimari baregori tata ḡetanuto. ḡia mabarari tu dabuḡa kurokurori moḡo ḡeriḡoto, ema tata debari ai tu golo koronari sebori sebori ḡeveito. <sup>5</sup> Mo terona monana kiriku ekimoreato-ḡoi, garo baregori ema ḡaita eragato-ḡoi. Ma mo terona ḡoiranai tu lamefa imaima ruarua (7) ḡeḡarato-ḡoi. Mo lamefa ḡeḡarato-ḡoi moḡeri, mo tu Barau iaūkana imaima ruarua (7). <sup>6</sup> Ema mo terona ḡoiranai maki davara veḡiaveḡiana, nega-vaḡuravaḡura aisi kavana.

Ma maḡuri dagarari vasivasi (4) tu nuḡana buroburonai, mo terona ḡeruḡa-ḡeḡeraḡiatio. ḡia ḡoirari ema muriri tu matari tu ḡutuma. <sup>7</sup> Mo maḡuri dagarana guinena tu noḡa moḡo laion, vaḡa-ruaruana dagarana tu noḡa moḡo boromakau tauna, vaḡa-toitoina ḡoirana tu tarimarima kavana, ema vaḡa-vasivasina tu noḡa moḡo erovoni ugavana kavana. <sup>8</sup> Mai maḡuri dagarari maiḡeri tata faneri tu imaima sebona (6), ma mai faneri maiḡeri mabarari tu mata na moḡo ḡevonuto, faneri nuḡana rekeri dagarari maki mata moḡo. ḡia tu vanaḡivanaḡi boḡi-laḡani asi ḡeiaḡaraḡini, mai guruḡa maiḡa asi ḡevaḡa-ketoani, ḡekirani:

“Veaḡa, veaḡa, veaḡa,

Vereḡauka, Barau tuḡutuḡu, tu veaḡa,

guinenai etanuto-ḡoi,

maitoma maki etanuni,

ema ma beiaḡomani!”

<sup>9</sup> Mai teronai etanu-taḡoto-ḡoi tarimana tu maḡuri etanu-vanaḡi vanaḡini. Ma maiḡeri maḡuri dagarari na mo teronai etanu-taḡoto-ḡoi tarimana ḡevaḡa-raḡeato-ḡoi, e ma vegubakauri ḡesi ḡetoma-rakariḡoato-ḡoi, ema ḡetanikiu-viniato-ḡoi nai, <sup>10</sup> mo veḡitaḡau tarimari baregori gabana ruarua ma vasivasi (24) tu mo teronai etanuni tarimana ḡoiranai ḡevetui-tarito-ḡoi. Benamo mai maḡuri etanu-vanaḡi vanaḡini tarimana ḡetoma-rakariḡo viniato-ḡoi. ḡeri korona maki ḡia ḡoiranai ḡetore-taririto-ḡoi, benamo ḡekirato-ḡoi,

<sup>11</sup> “ḡai ḡema Vereḡauka ema Barau,

ḡoi tu iaru-korokoro,

be tarimarima ema maḡuri dagarari mabarari na ḡoi tu beḡene vaḡa-raḡemu, beḡene gubakaumu,

ema seḡuka maki mabarana ḡoi ḡemu.

Korana dagara mabarari tu

ḡoi na oveirito,

ema ḡoi ḡemu urai moḡo oveirito

ema initoma ḡetanuni.”

## 5

### *Mamoe natuna ema toretore fefana maukana*

<sup>1</sup> Benamo aboḡeto, mo teronai etanu-taḡoto-ḡoi tarimana ḡimana aroribanai tu toretore fefana maukana ta aḡitaiato. Mo fefa tu tavita-tavitai ma toretorena, ḡeiokuato, ema vaḡa-imaima ruarua (7) veḡata ḡekada-ḡauato. Mo ḡekada-ḡaurito gaburi mabarari tu tabu vetoḡana ḡetoreato. <sup>2</sup> Ma gwada rakavarakava aneruna ta aḡitaiato, garona tu asikeikeina eḡobatato, ekirato, “Deikara tu ilaila mai kumuka tabuna bekokiani riba, e mai fefa maukana ma toretorena bekeoani?” <sup>3</sup> Senaḡi tarima ta gubai o tanobarai o tanobara gaburenai ta asi ilaila veḡata mo fefa bekeo-fakaiani ema nuḡanai beboḡe-ḡurani. <sup>4</sup> Benamo ataḡi-rakava rakavato, korana tarima sebona kwarikwari ta maki asi

veḡata ḡeḡoitaḡoato, mo fefa maukana ma toretorena bekeoani ma nuḡanai beboḡe-ḡurani. <sup>5</sup> Benamo mo veḡitaḡau tarimari baregori ta na ekiraguto, ekirato, “Asi notaḡi! Noboḡe! Iuda doḡorona ḡeri laion, Davida Natuna noḡitaia, ḡia tu ekokoreto. ḡia na mani fefa maukana ma toretorena bekeoani bene, ema mani ḡekumuato kumukari taburi imaima ruarua (7) maki bekokirini bene.”

<sup>6</sup> Benamo aboḡeto, Mamoe Natuna aḡitaiato. ḡia tu terona nuḡana buroburonai eruḡa-taḡoto-ḡoi, mo maḡuri dagarari vasivasi (4) ema veḡitaḡau tarimari baregori tu ḡeruḡa-ḡeḡeraḡiatio. Mamoe Natuna ḡitaḡitana tu tari na ḡevaḡi-maseato. ḡia guduna tu imaima ruarua (7) ema matana maki 7. Mo tu Barau iaukana 7 ekiraḡirini. ḡia tu Barau na tanobara mabarana ḡana etuḡu-iaḡorito. <sup>7</sup> Mamoe Natuna eiaḡoto, benamo teronai etanu-taḡoto-ḡoi tarimana ḡimana aroribanai mo fefa maukana ma toretorena moḡa eḡabiato. <sup>8</sup> Fefa maukana ma toretorena eḡabiato nai, maḡuri dagarari vasivasi ema veḡitaḡau tarimari baregori 24 Mamoe Natuna ḡoiranai ḡevetui-tarito. ḡia tata tu ma ḡeri hap (ḡita noḡa) ema golo ḡurori nuḡari ai tu muramura goḡuna ma bonari. Mo goḡu ma bonari tu Barau ḡena tarima veaḡari ḡeri ḡauḡau guruḡari. <sup>9</sup> Benamo ḡia na mari variḡuna ta maiḡesina ḡemariato,

“ḡoi na fefa maukana ma toretorena boḡabiani ilaila,  
ema ḡia kumuna ma taburi maki bokeo-fakarini ilaila,  
korana ḡoi tu ḡevaḡi-masemuto,

ma ḡoi raramu na tau vavine Barau ḡena ovoi-vaḡirito doḡoro mabarari ḡerina, e garo mabarari ḡerina, ema bese mabarari ema tanobara mabarari na.

<sup>10</sup> ḡoi na ḡia tu Barau ḡena Basileia doḡorona tarimari ai ovaḡa-iaḡorito, ema Barau vetuḡunaḡina beḡene iaḡo-vini ḡana Rubu Veaḡa vereri ai ovaḡa-iaḡorito. ḡia tu tanobara mabarana iatanai beḡe veḡorikauni.”

<sup>11</sup> Ma aboḡe-iaḡoto, aneru garori asisebo-asisebo aseḡaḡirito. Moḡeri aneru tu asi iavi-iaviri, milion ḡutuma maki ḡevanaḡirito. ḡia na terona ema maḡuri dagarari vasivasi ema veḡitaḡau tarimari baregori ḡeruḡa-ḡeḡeraḡirito. <sup>12</sup> Ma mai mari ḡemari-gigitariato,

“Mamoe Natuna,  
ḡevaḡi-maseato dagarana,  
tu ma ḡena maoro, seḡuka beḡabiani,  
e farefare vovoka, e iaunega,  
ema kokore beḡabiani!

Ema ḡia ma ḡena maoro tarimarima mabarari na beḡe gubakauani,  
ma beḡe vaḡa-raḡeani  
ema beḡe vonevone-raḡeani!”

<sup>13</sup> Benamo Barau na eveirito dagarari mabarari guba nuḡanai, tanobara iatanai, tanobara gaburenai, e davara nuḡanai dagarari mabarari na mai mari ḡevaisiatio aseḡaḡirito,

“Teronai etanu-taḡoni Barauna  
ema Mamoe Natuna,  
tauri ruarua na vevaḡa-raḡe,  
vegubakau, mareva baregona,  
ema seḡuka beḡene ḡabiri,  
bene iaḡo mo vanaḡivanaḡi asi magona!”

<sup>14</sup> Benamo maḡuri dagarari vasivasi na ḡevaḡa-moḡoniatio, ḡekirato, “Amen!” Ema veḡitaḡau tarimari baregori 24 ḡevetui-tarito, Barau ḡetoma-rakariḡo viniatio.

## 6

*Fefa maukana ma toretorena* ḡekumukaiatio kadari o tabu vetoḡari Mamoe Natuna na ekeorito

<sup>1</sup> Benamo au na Mamoe Natuna aḡitaiato, fefa maukana ma toretorena vaḡa-imaiana ruarua (7) ḡekada-tariato dagarana kadana giniginena ekeo-fakaiato. Moḡa ekeoato-ḡoi nuḡanai tu, maḡuri dagarari vasivasi fakari ai ḡia ta eguruḡato, garona tu noḡa guba eguruato, ekirato, “Noiaḡoma!” <sup>2</sup> Aboḡe-iaḡoto nai tu, hosi kurokurona ta aḡitaiato, eraḡeto tarimana ḡimana tu ma fevana, ema ḡia tu korona ta maki eviniato. ḡia erakarsito tu, vetari ai ekokoreto-ḡoi ema eiaḡoto tu ma bene kokore ḡana.

<sup>3</sup> Benamo Mamoe Natuna na kumuka vaḡa-ruaruana kadana ekeo-fakaiato nai, maḡuri dagarana vaḡa-ruaruana aseḡaḡiato, ekirato, “Noiaḡoma!” <sup>4</sup> Benamo hosi ta ma erakarsito. Moḡa tu hosi kakakakana. Eraḡeto tarimana tu seḡuka eviniato, tanobara na maino bene ḡabi-veḡitaia, be tarimarima tauḡeri beḡene vevaḡi-masemase ḡana. Mo tarima tu vetari baḡana asikeikeina ta eviniato.

<sup>5</sup> Kumuka vaḡa-toitoina kadana ekeo-fakaiato nai tu, maḡuri dagarana vaḡa-toitoina aseḡaḡiato, ekirato, “Noiaḡoma!” Au aboḡe-iaḡoto nai, hosi dubadubana aḡitaiato, eraḡeto tarimana ḡimanai tu dagara ḡeri meto vaḡa-foforiri o sikele dagarana ta eḡabiato. <sup>6</sup> Benamo au na garo ta maḡuri dagarari vasivasi (4) fakari na eiaḡomato aseḡaḡiato, ekirato, “(Bita doḡe be), widi kilo sebona davana tu ḡaro sebona ḡauveina voina, ema bali (widi kavana) kilo toitoi davana tu ḡaro sebona ḡauveina voina. Senaḡi olive diḡana ema vine nanuna tu asi boḡono vaḡa-rakavari.”

<sup>7</sup> Ma Mamoe Natuna na kumuka vaḡa-vasivasina kadana ekeo-fakaiato nai tu, maḡuri dagarana vaḡa-vasivasina aseḡaḡiato, ekirato, “Noiaḡoma!” <sup>8</sup> Aboḡe-iaḡoto nai tu, hosi ta aḡitaiato, tauḡanina ḡitaḡitana noḡa kurokuro. Eraḡeto tarimana arana tu Mase, ma mase tarimari iaukari ḡetanuni Gabuna (o Hades) tu ḡia murina na eraganaḡi-raganaḡito-ḡoi. Tauri ruarua seḡuka evinirito, tanobara taviri vasivasi nuḡanai tavi sebona beḡene ḡita-ḡaua, be vetari ai, doḡe ai, keve rakavari na, ema boḡai ḡetanuni veḡaniveḡani dagarari na tarimarima beḡene vaḡi-maseri.

<sup>9</sup> Ma kumuka vaḡa-imaiana kadana ekeo-fakaiato nai tu, Barau ḡena guruḡa ḡaramanai, e mo guruḡa ḡevaḡa-moḡoniato ema ḡevari-fiuato ḡaramanai ḡevaḡi-maserito tarimari iaukari maḡuri fata veaḡana gaburenai aḡitarito. <sup>10</sup> ḡia mabarari ḡekoḡo-baregato, ḡekirato, “Vere tuḡutuḡu, ḡoi tu veaḡa ema moḡoni veḡata, aitoma vau ḡoi na tanobarai ḡetanuni tarimari bovaḡa-maoro vinirini, benamo ḡai rarama ḡevaḡa-riḡorito bovaḡa-voirini?” <sup>11</sup> Benamo ḡia mabarari tata dabuḡa kurokurori evinirito, ekirarito, negakota roḡo ma beḡene naritari etato. Beḡene vaḡa-noga mo, ḡia karori toma vetuḡunaḡi ḡeiaḡo-vinini tarimari ema tarikakari kotari, ḡia ḡevaḡirito kavana, beḡe vaḡi-maserini mo, ḡeri numera korikori bene ḡabia.

<sup>12</sup> Au na Mamoe Natuna aḡitaiato, kumuka vaḡa-imaiana sebona (6) ekeo-fakaiato nuḡanai, tano-iaga asikeikeina eragato, e ḡaro eduba-dubato, dabuḡa dubadubari noḡa, e ḡue evekurevoto, ekakarato rara kavana. <sup>13</sup> Ema guba na visiḡu ḡeketo-firiḡoto tanobara ḡana, noḡa figi maḡitari iavara na figi ḡauna na eruku-keto ketorini kavana. <sup>14</sup> Guba maki erekwa-rekwato, noḡa moḡo fefa maukana, ḡetoretore-iaḡiani dagarana, ḡeiokuani kavana. Ma ḡoro ema motumotu mabarari gaburi ekoki-veḡitarito. <sup>15</sup> Benamo tanobara kiniri, e vereri, e vetari ḡitaḡauna tauri baregori, e ḡeri farefare asisebo tarimari, e kokore rakavarakava tarimari, tuḡu-rakaorakao tarimari ema maḡuri namona e fakanai ḡetanuni tarimari, ḡia mabarari kouḡa nuḡari ai ema ḡoro ai fore baregori vekaravari ai ḡea gumuto. <sup>16</sup> Benamo ḡoro ema fore baregori ḡenoḡirito, ḡekirato, “ḡai iatamai ḡoma ketokau, ḡoma lautarima, be teronai etanuni Barauna ḡoirana ḡenana ema Mamoe Natuna ḡena baru baregona ḡenana ḡoma kure-toḡama!” <sup>17</sup> Korana ḡia ḡeri baru ḡarona baregona tu varau bevotu, deikara beruḡa-tarini riba?”

## 7

Barau ḡena vetuḡunaḡi tarimari 144,000

<sup>1</sup> Moḡa murinai aneru vasivasi (4) aḡitarito, tanobara daiguniri vasivasi ai ḡeruḡato. Mo aneru na tu tanobara iavarari vasivasi ḡelautaririto, tanobarai e davarai asi beḡene

raga, ema ǵau maki asi beǵene kwari-ǵarevari ǵana. <sup>2</sup> Ma murinai tu aneru ta ma aǵitaiato, ǵaro eraǵeni rekena na emaraǵeto. Mo aneru na maǵuri Barauna ǵena vevaǵa-moǵoni vetoǵana o makana eǵabi-taǵoato-ǵoi. Ǵia na mo aneru vasivasi, Barau na seǵuka evinirito tanobara ema davara beǵene vaǵa-rakavari aneruri, efarara-vinirito, ekirato, <sup>3</sup> “Tanobara, davara, ema ǵau asi roǵo boǵono vaǵa-rakavari, bene iaǵo mo, Barau ǵena vetuǵunaǵi tarimari bakuri ai ǵia ǵena vetoǵa baǵana toreri murinai vau.” <sup>4</sup> Moǵa murinai Barau ǵena vetoǵa bakuri ai ǵetorerito tarimari mabarari tu 144,000 aseǵaǵiatio. Ǵia tu Isaraela doǵorori gabanana ruarua (12) mabarari ǵerina, doǵorori tu maiǵeri:

<sup>5</sup> Iuda ǵena doǵoro tarimari - 12,000

Reubena ǵena doǵoro tarimari - 12,000

Gad ǵena doǵoro tarimari - 12,000

<sup>6</sup> Asere ǵena doǵoro tarimari - 12,000

Naftali ǵena doǵoro tarimari - 12,000

Manase ǵena doǵoro tarimari - 12,000

<sup>7</sup> Simeona ǵena doǵoro tarimari - 12,000

Levi ǵena doǵoro tarimari - 12,000

Isakara ǵena doǵoro tarimari - 12,000

<sup>8</sup> Sebulun ǵena doǵoro tarimari - 12,000

Iosefa ǵena doǵoro tarimari - 12,000

Beniamina ǵena doǵoro tarimari - 12,000

*Tarima* ǵutuma lelevaǵi dabuǵa kurokurori ǵeveito

<sup>9</sup> Moǵa murinai aboǵe-iaǵoto, tarima ǵutuma lelevaǵi, asi tau iaviǵosina, aǵitarito. Mo tu tanobara irauirau mabarana tarimana, e doǵoro irauirau mabarana tarimana, e bese irauirau mabarana tarimana, ema garo irauirau mabarana tarimana. Ǵia mabarabarari tu terona ema Mamoe Natuna ǵoirari ai ǵeruǵato. Ǵia mabarari dabuǵa maukari kurokurori ǵeveito, ema ǵimari ai tu galamo lauri noǵa dagarari ǵeǵabito. (Mo tu ǵia ǵeri kokore vetoǵari). <sup>10</sup> Ǵia ǵekoǵo-baregato, ǵekirato, “Vevaǵa-maǵuri tu ǵita ǵera Barau, teronai etanukauni Barauna, e Mamoe Natuna ǵerina eiaǵomani.” <sup>11</sup> Ma aneru mabarari na tu terona e veǵitaǵau tarimari baregori ema maǵuri dagarari vasivasi (4) ǵeruǵa-ǵeǵeraǵirito. Benamo Barau ǵena terona koranai ǵevetui-tarito, ǵoirari tano ai, Barau ǵetoma-rakariǵo viniato, <sup>12</sup> ǵekirato, “Moǵoni veǵata! Vevaǵa-raǵe, e mareva baregona, e iaunega, e vevaǵa-namo, e vegubakau, e seǵuka, ema kokore tu ǵita ǵera Barau ǵena toma bene iaǵo vanaǵivanaǵi, Amen!

<sup>13</sup> Benamo veǵitaǵau tarimana baregona ta na edanaǵiguto, ekirato, “Mai dabuǵa kurokurori na beǵe vedabuǵa tarimari tu deikara, ema ǵia tu ainana beǵe iaǵoma?”

<sup>14</sup> Benamo avaǵa-veseto, akirato, “Ǵegu vere, au asi ribagu. A ǵoi tu ribamu.” Benamo ǵia na ekira-varaguto, ekirato, “Mai tarima maiǵeri tu midigumidigu baregori nuǵari na ǵeiaǵomato. Ǵeri dabuǵa tu Mamoe Natuna, ginitaǵo mamoea, rarana na ǵevei-kurokuro-rito. <sup>15</sup> Moǵesina naima, ǵia tu Barau ǵena terona ǵoiranai ǵeruǵani, ema ǵena Rubu Veaǵa nuǵanai boǵi-laǵani ǵia vetuǵunaǵina ǵeiaǵo-vinini. Ema teronai etanuni Barauna na enari-ǵaurini. <sup>16</sup> Ǵia tu asi ma beǵe vito-ǵenoǵoirini, e bokari asi ma beǵe koke-ǵenoǵoini. Ǵaro iatari ai asi ma bekirini ema ǵaro seǵukana na asi ma begugurarini. <sup>17</sup> Korana terona nuǵanai etanuni Mamoe Natuna na beǵita-ǵaurini. Ǵia na beǵori-iaǵorini maǵuri nanuna eǵaruani gabuna ǵana. Ema Barau na matari gorari mabarari bedau-vaǵirini.”



<sup>1</sup> Mamoe Natuna na kumuka vaḡa-imaima ruaruana (7) kadana ekeo-fakaiato nai, guba vanuḡanai aoa tavina ta veḡata guru ta maki asi eraḡeto. <sup>2</sup> Benamo Barau ḡoiranai ḡeruḡato aneruri imaima ruarua (7) aḡitarito, dudu 7 evinirito.

<sup>3</sup> Benamo aneru ta ma eiaḡomato, fata veaḡana sevinai eruḡato, ḡimanai tu golo ḡurona ta. Ḡia tu muramura ma bonana barego lelevaḡi ḡeviniato, Barau ḡena tarima veaḡari ḡeri ḡau-ḡau ḡesi terona ḡoiranai golo fatana veaḡanai Barau bene varevarevinia ḡana. <sup>4</sup> Mo muramura goḡuna ma bonana goḡuna ema Barau ḡena tarima veaḡari ḡeri ḡauḡau ḡesi, mo aneru ḡimana na ḡevaraḡeto Barau ḡoirana ḡana. <sup>5</sup> Moḡa murinai aneru na golo ḡurona eḡabiato, fata veaḡana karavana na evaḡa-vonuato, benamo tanobara iatana ḡana efiu-riḡoato. Monana ḡaita guruna eraḡeto, garo gururi tari ḡeraḡeto, e kiriku eragato, ema tano eiagato.

*Aneru na ḡeri dudu ḡefurururito*

<sup>6</sup> Benamo aneru imaima ruarua (7) ḡeri dudu ḡeḡabi-torerito, beḡene furururi ḡana. <sup>7</sup> Aneru giniguinena na ḡena dudu efururuato, benamo aisi foreri misimisiri ema karava rara ḡesi ḡesebonato ḡevetoreto. Benamo moḡeri mabarari tanobara ḡana ebuburiḡorito. Ma tanobara tavi toitoi nuḡanai tavi sebona eḡara-ḡosiato, ḡau toitoi nuḡari ai tu sebori tu ḡeḡara-ḡosirito, e ḡauḡa ema reḡi mabarari ḡeḡara-ḡosirito.

<sup>8</sup> Aneru vaḡa-ruaruana na ḡena dudu efururuato nai tu, dagara ta, ḡoro-dagara-bara ta noḡa ma karavana, davarai evefiu-reito. Benamo daḡaru-bara tavi toitoi nuḡanai tavi ta tu rarai eiaḡoto. <sup>9</sup> E daḡaru-bara maḡuri dagarari toiri-toiri nuḡari ai sebori tu ḡemaseto, e bouti toiri-toiri nuḡari ai sebori tu ḡeburuto.

<sup>10</sup> Aneru vaḡa-toitoina ḡena dudu efururuato nai tu, visiḡu-dagara-bara ta kere morena kavana guba na eketoto, benamo ḡaruka toiri nuḡari ai sebori ai, e ḡeḡaruḡarurini nanuri ai eketo-reito. <sup>11</sup> Mo visiḡu arana tu “Mamaki”. Nanu gaburi toiri nuḡari ai sebori tu ḡemamakito. Benamo tarimarima vovoka na mo nanu mamakiri ḡeniurito nai ḡemaseto.

<sup>12</sup> Aneru vaḡa-vasivasina ḡena dudu efururuato nai, ḡaro e ḡue ema visiḡu tu taviri toitoiri nuḡari ai tavi sebori tu ḡesemorito, naima mo tavi toitoiri nuḡari ai tavi sebori tu ḡemukunato. Moḡa lorinai ḡaro mamana tavi toitoi nuḡanai tavi sebona tu asi emamato, ema boḡi tavi toitoi nuḡanai tavi sebona ta ḡue e visiḡu tu asi emamato.

<sup>13</sup> Benamo aboḡeto, ugava ta guba tuḡuna vanigerenai erovoto-ḡoi aḡitaiato, maiḡesi ekea-fararato, ekirato, “Tanobarai ḡotanuni tarimami, vetuḡami kika! Vetuḡami kika! Vetuḡami kika! Korana tu aneru toitoi, ḡeri dudu roḡosi ḡere furururi aneruri, na ḡeri dudu beḡe furururini gururi ai tu, meto ema midigumidigu barego lelevaḡina beḡorani.

## 9

*Dudu vaḡa-imaimana (5)*

<sup>1</sup> Aneru vaḡa-imaimana na ḡena dudu efururuato, benamo visiḡu ta aḡitaiato, guba na eketoto tanobarai. Mo visiḡu tu guri variḡo kwareḡana, (iauka rakavari ḡeri dibura), kina eviniato. <sup>2</sup> Mo guri ekeo-fakaiato nai tu, goḡu ebebubu-rosito noḡa moḡo karava baregona goḡuna kavana. Benamo mo guri goḡuna na ḡaro mamana ema guba fakana emukuna-ḡaurito.

<sup>3</sup> Goḡu nuḡana na madudu ḡeraka-rosito tanobarai, ema seḡuka evinirito, seḡukana tu kavikavi seḡukari kavana. <sup>4</sup> Ḡia ekirarito, tanobarai ḡauḡa ta, e tanobarai ḡetubuni dagarana ta, ema ḡau ta asi beḡene vaḡa-rakavaia, senaḡi deidei bakuri ai Barau ḡena vetoḡa o maka asi etanuni tarimari moḡo beḡene vaḡa-rakavari etato. <sup>5</sup> Ekirarito maki, mo tarima asi beḡene vaḡi-maseri, senaḡi ḡue imaima (5) nuḡanai beḡene vaḡa-midigu midiguri. Mo midigumidigu ḡeḡanito moḡeri tu kavikavi na tarima ekavirini midiguna kavana. <sup>6</sup> Mo ḡue imaima nuḡanai tarimarima tu ḡemase ḡana mase beḡe vetauani, senaḡi asi beḡe maseni. Ḡeri ura baregona ḡemase beḡe toni, senaḡi mase ḡerina beveḡitani.

<sup>7</sup> Mo madudu ġitaġitari tu hosi noġa, ġea vetari ġana ġeruġa-toreto. Ġia debari ai tu golo koronana noġa moġo dagarana ta, ema ġoirari ġitaġitari tu tarima ġoirari kavana. <sup>8</sup> Ġuiri tu vavine ġuiri noġa moġo, doġari tu laion doġari kavana. <sup>9</sup> Kobari kouġauri ġana dabuġana tu auri dabuġana kavana. Faneri gururi tu hosi asisebo kwakuri gururi ema kariota asisebo vetari nuġanai ġeraka-toġani gururi kavana. <sup>10</sup> Ġia tu ma ġiġuri, ema ġiġuri bonari tu kavikavi ġiġuri bonari kavana. Ġiġuri nuġari ai tu tarimarima ġue imaima (5) beġene vaġa-midigu midiguri seġukana etanuni. <sup>11</sup> Ġia tu ma ġeri vere baregona o kini. Ġia na eġita-ġaurini. Ġia dagarana tu mo guri variġo kwareġana aneruna. Mo aneru arana Heberu garori ai tu Abadon, ma Grik garori ai tu Apolion, (anina tu vaġa-rakava kwaikwai tarimana).

<sup>12</sup> Rakava baregori giniginena tu bekori moġa, ma ruarua tu vau beġe iaġomani.

*Aneru vaġa-imaima sebona (6) na dudu efururuato*

<sup>13</sup> Aneru vaġa-6 na ġena dudu ma efururuato, benamo fata veaġana daiguni vasivasi ai gudu vasivasi moġeri ġerina garo ta eiaġomato aseġaġiato. Mo fata tu golo na ġeveiato, ma Barau ġena terona ġoiranai etanuni. <sup>14</sup> Mo garo na aneru vaġa-6 na ma ġena dudu moġa ekiraiato, ekirato, “Aneru vasivasi, ġaruka baregona arana Euftrate ai ġebaru-taririto, moġeri noruġa-vaġiri.” <sup>15</sup> Benamo mo aneru vasivasi eruġa-vaġirito, mai laġani, mai ġue, mai ġaro, mai aoa ġana Barau na eġabi-torerito tu, tarima toitoiri nuġanai sebona tu beġene vaġia. <sup>16</sup> Hosi tarimari hosi ai ġeraġeto ġena numera tu milion sinau ruarua (200). Mai numera tu aseġaġiato. <sup>17</sup> Mo hosi e iatari ai ġeraġeto tarimari au ġegu mata-vanaġi ai vetoġari tu maiġesina aġitarito: Ġia kobari kouġauna ġana auri dabuġana tu karava ġeġarani kakakaka karavari kavana, e blu, ema karava moreri o salfa borabora kavana. Hosi debari tu laion debari kavana, ma bokari tu karava e goġu ema karava moreri ġeraka-rosito. <sup>18</sup> Mo tarimarima vaġa-midigumidiguri dagarari toitoi moġeri, karava, goġu, ema karava moreri o salfa, hosi bokari na ġeraka-rosito dagarari, na tarimarima toiri-toiri nuġanai sebori-sebori tu ġevaġi-maserito. <sup>19</sup> Mo hosi ġeri seġuka tu bokari ai ema ġiġuri ai maki. Korana ġiġuri tu mota kavana, ma debari. Mo ġiġuri debari na tarimarima ġevaġa-midigu midigurito-ġoi.

<sup>20</sup> Tarimarima oreri, mo vevaġa-midigumidigu dagarari toitoi na asi ġevaġi-maserito tarimari, tu roġo asi ġevetuġamaġi-kureto ġimari ġauveiri ġerina. Iauka rakavari toma-rakariġori ema asi ġeboġeboġeni e asi ġeseġaġini ema asi ġerakani kwaivakukuri, golo, silva, auri boraborari, fore e ġau na ġeveirito dagarari toma-rakariġori asi ġevaġa-dokoato. <sup>21</sup> Ema ġeri vevaġideba, ġeri meġameġa, ġeri mata-boraġa veiġari, ema ġeri lema ġerina maki asi ġevetuġamaġi-kureto ma asi ġeraka-kureto.

## 10

*Aneru ema toretore fefana maukana misina*

<sup>1</sup> Benamo aneru ta, kokore lelevaġi aneruna, guba na ma emariġoto-ġoi aġitaiato. Ġia tu magube na ġevaġa-dabuġa maukaiato, ma debana iatanai tu kevau ta. Ġia ġoirana tu ġaro mamana noġa, ema kwakuna tu karava ġemoreni kavana. <sup>2</sup> Ġimanai tu toretore fefana maukana misina ta vekeo eġabitaġoato-ġoi. Ġia kwakuna aroribana tu davarai etoreato, ma kwakuna kaurina tu tanobarai etoreato. <sup>3</sup> Benamo eġaba-baregato, laion eniarani nai eġabani kavana. Ġia eġabato murinai, ġaita imaima ruarua (7) garori ġeguruġato, (ġia ġevaġa-veateo). <sup>4</sup> Mo ġaita 7 ġeguruġato moġeri dori atore-vanaġirito, senaġi guba na garo ta eiaġomato, ekirato, “Mani ġaita 7 kara beġe kiraġiri maniġeri tu nokure-toġari, asi bono tore-vanaġiri.”

<sup>5</sup> Benamo mo aneru, davarai e tanobarai kwakuna etorerito aneruna, aġitaiato, ġimana aroribana eġabi-vaisiatio, guba vanuġana eduġiato, <sup>6</sup> benamo tanu-vanaġivanaġi Barauna aranai guruġa-fofori gwaġiġina eveiato. Guba ema nuġari ai ġetanuni dagarari mabarari, e tanobara ema nuġari ai ġetanuni dagarari mabarari, ema daġaru-bara ema

nuḡari ai ḡetanuni dagarari mabarari tu ḡia na eveirito. Ḡia aranai mai guruḡa-fofori gwaḡiḡina eveiato, ekirato, “Taimi varau bekori, Barau asi ma bevaḡa-nogani. <sup>7</sup> Senaḡina aneru vaḡa-imaima ruaruana (7) na ḡena dudu befururuani neganai, Barau ḡena guruḡa vekuretoḡari veiḡari ema boioḡari beḡe ḡorani, ḡena peroveta tarimari ḡeri ai ekiraḡi-foforirito ilailari ai.”

<sup>8</sup> Benamo guba na aseḡaḡiatio garona na ma evaḡa-guruḡaguto, ekirato, “Noiaḡo, mo aneru davarai e tanobarai eruḡani aneruna, ḡimanai toretore fefana maukana evekeotaḡoni, moḡea noḡabia.” <sup>9</sup> Benamo aiaḡoto, mo aneru akiraiato, mani toretore fefana maukana misina nevinigu atato. Benamo ḡia na ekiraguto, ekirato, “Noḡabia, be noḡani-ḡosia! Bokamu ai mamina tu gode mamina maki bevanaḡiani, senaḡi nuḡamu tu bevemukini.” <sup>10</sup> Benamo toretore fefana maukana misina mo aneru ḡimana na aḡabiatu, benamo aḡaniato. Aḡaniato mamina murugu ai tu gode mamina maki evanaḡiatio, senaḡi aḡani-ḡosiatu nai, nuḡagu tu evemukito.

<sup>11</sup> Benamo evaḡa-guruḡaguto, ekirato, “Tanobara beseri ḡutuma, garo irauirau tarimari ema ḡeri vere baregori o kini ḡeri ai karakara beḡe ḡorani dagarari ma bono peroveta-iaḡiri.”

## 11

### Vevaḡa-moḡoni tarimari ruarua

<sup>1</sup> Benamo vaḡa-vetovo ḡauna ta, ḡitaḡitana togoi noḡa, eviniguto, benamo ekiraguto, ekirato, “Noiaḡo, Barau ḡena Rubu Vevaḡa ema fata vevaḡana noa makaia, ema monai toma-rakariḡo tarimari vira bono iaviri. <sup>2</sup> Senaḡi mani Rubu Vevaḡa nuḡanai Iuda tarimari ḡeri toma-rakariḡo gabuna maḡuna murikana, maniḡa tu bono iaḡuia, asi bono makaia, korana maniḡa tu irau bese tarimari ḡeri (ḡuriḡuri gabuna) evinirito, ḡia na mai vanuḡa baregona vevaḡana ḡue gabana vasivasi ma ruarua (42) nuḡari ai beḡe fanafanatariani. <sup>3</sup> Au vaḡa-moḡonigu tarimari ruarua seḡuka bavirinini, benamo ḡaro mabarana 1,260 Barau na bevinirinini guruḡari beḡe kiraḡi-foforirinini. Ḡia tu fuse-dabuḡari na beḡe vedabuḡani.”

<sup>4</sup> Mai vaḡa-moḡonigu tauri ruarua tu mo olive ḡauri ruarua ema mo lamefa torekauri dagarari ruarua, tanobara Verena ḡoiranai ḡeruḡani moḡeri. <sup>5</sup> Bema tarima ta na nevaḡa-rakavari betoni nai tu, bokari na karava beḡe raka-rosini, benamo inairi beḡe vaḡa-buataririnini. Ḡia ḡevaḡa-rakavari beḡe toni tarimana tu moḡesina bemaseni. <sup>6</sup> Maiḡeri tarima ruarua tu ma seḡukari guba beḡe kou-ḡauani, benamo ḡia peroveta guruḡari beḡe kiraḡirinini ḡarori ai tu, ḡura asi beraguni. Ema ma seḡukari maki, nanu beḡe kurevoani, rarai beiaḡoni, e beḡe urani ḡarori ai tarimarima vaḡa-midigumidiguri dagarari irauirau tanobarai beḡe vaḡa-ḡorarini.

<sup>7</sup> Ḡeri vevarifiu beḡe vaḡa-magoani ḡaronai, vevaḡa-rakava dagarana guri variḡo kwareḡana, (iauka rakavari ḡeri dibura), nuḡana na beraka-rosini, benamo ḡia bevaḡa-vevaḡirinini. Ḡia ḡeri seḡuka bevanaḡiani, benamo bevaḡi-maserini. <sup>8</sup> Benamo ḡia tauḡaniri tu vanuḡa baregona dabarana nuḡanai gena-fitari beḡe tanuni. Guruḡa veabanaḡinai mo vanuḡa barana arana ḡekiraḡiani tu Sodoma ema Aigupito. Ḡia tauri ruarua ḡeri Vereḡauka tu mo vanuḡai ḡevaḡa-satauroato. <sup>9</sup> Ḡaro toitoi ma kwana nuḡari ai bese irauirau, doḡoro irauirau, garo irauirau, e tanobara irauirau tarimari ḡia tauḡaniri beḡe ḡitarini, senaḡi guriguriri tu asi beḡe urani. <sup>10</sup> Ḡia ḡeri mase dainai tanobarai ḡetanuni tarimari tu beḡe iakuni, beḡe ḡani-vegogoni e karori tata ḡeri varevare beḡe tuḡuni; korana tu mai peroveta tarimari ruarua na tanobarai ḡetanuni tarimari ḡeri ai midigumidigu baregona ḡevaḡa-ḡoraiato.

<sup>11</sup> Senaḡi mo ḡaro toitoi ma kwana ḡekorito murinai, maḡuri iaḡana Barau ḡenana ḡia tauri ruarua nuḡari ai eraka-toḡato, benamo ḡeruḡa-vaisito. Ḡia tauri ruarua ḡeḡitarito tarimari mabarari ḡegari-rakavato. <sup>12</sup> Benamo vevaḡa-moḡoni tauri ruarua na garo baregona ta ḡeseḡaḡiatio, guba na emariḡoto, ḡia evaḡa-guruḡarito, ekirato, “Maiḡana

gōmaraḡe!” Benamo tauri ruarua magube ta nuḡanai guba ḡana ḡevaraḡeto, ḡari inai tarimari ḡoirari ai. <sup>13</sup> Mo aoa nuḡanai moḡo tano-iaga baregona eragato, benamo vanuḡa baregona taviri gabanana (10) nuḡanai tavi sebona tu evaḡa-mouato, ma tarima mabarari 7,000 ḡemaseto. Senaḡi tarimarima oreri tu ḡegari-rakavato, benamo Guba Barauna ḡevaḡa-raḡeato.

<sup>14</sup> Rakava vaḡa-ruaruana tu bekori moḡa, senaḡi vaḡa-toitoina tu dori eiaḡomani.

*Dudu vaḡa-imaima ruaruana (7)*

<sup>15</sup> Aneru vaḡa-imaima ruaruana (7) na ḡena dudu efururuato, benamo garo baregori gubai ḡeguruḡato, ḡekirato, “Tanobara basileiana o veḡitaḡau seḡukana tu ḡita ḡera Vereḡauka ema ḡena Keriso ḡeri basileiai beiaḡo. Be ḡia tu bevere-vanaḡi vanaḡini!”

<sup>16</sup> Benamo veḡitaḡau tauri gabana ruarua ma vasivasi (24), Barau ḡoiranai ḡeri teronai ḡetanuni tarimari, ḡevetui-tarito, ḡoirari tano ai, Barau ḡetoma-rakariḡo viniato, <sup>17</sup> ḡekirato,

“Vereḡauka o, Iaru-korokoro Baraumu,  
otanuni, e otanuto-ḡoi,  
ḡai na ḡoi ḡatanikiu-vinimuni,  
korana ḡoi ḡemu seḡuka baregona oḡabiato,  
e ḡemu Basileia o veḡitaḡau tu varau osinaiato.

<sup>18</sup> Tanobara irauirau beseri ḡebaruto,  
benamo ḡoi ḡemu baru ma beraḡasi.

Mase tarimari kota-viniri taimina,  
ema mo peroveta tauri,  
ḡoi ḡemu vetuḡunaḡi tarimari,  
e ḡemu tarima veaḡari,

ema ḡoi aramu ḡematauraiani tarimari keiri baregori voiri viniviniri ḡarona,  
ema tanobara ḡevaḡa-rakavaiato tarimari vaḡa-rakavari ḡarona beiaḡoma.”

<sup>19</sup> Benamo Barau ḡena Rubu Veaḡa guba nuḡanai evekeoto, benamo ḡena Kiraḡitore Mauḡana Rubu Veaḡa nuḡanai eforito aḡitaiaato. Benamo kiriku-ḡaita, e garo gururi tari, e guba eguruato guruna baregona, e tano-iaga, ema aisi foreri asikeikeiri ḡeiaḡomato.

## 12

*Vavine ema ḡuḡaia kavana dagarana asikeikeina*

<sup>1</sup> Benamo nuḡa-farevaḡi vetoḡana baregona ta gubai eforito: Vavine ta, ḡaro na evedabuḡato, ma ḡue tu kwakuna gabureri ai, ema visiḡu gabanana ruarua (12) tu korona noḡa, ḡia debanai ḡevetore-ḡeḡeraḡito. <sup>2</sup> ḡia tu ma banina, ma dori eḡabito-ḡoi, moḡesina nai mero-ḡabi midiguna eḡabiato, be eḡabato-ḡoi.

<sup>3</sup> Benamo nuḡa-farevaḡi vetoḡana ta gubai ma eforito: ḡuḡaia kavana dagarana asikeikeina ta, kakakakana, debana mabarari tu imaima ruarua (7), guduna mabarari tu gabanana (10), ema korona maki 7 debana tata iatari sebori-sebori torekau. <sup>4</sup> ḡia ḡiḡuna guba visiḡuri toiri-toiri ḡerina sebori-sebori tu tanobara ḡana eiari-firiḡorito. ḡia tu mo vavine, dori eḡabito-ḡoi, ḡoiranai eruḡato, beḡabini nai, asikauna mero misina bene ḡabia, bene ḡania uranai. <sup>5</sup> Vavine eḡabito nai tu, mero evaḡa-ḡoraiato. Mo mero na tanobara irauirau beseri mabarari auri togoina na roḡo beḡori-kaurini ma seḡukana baregona ḡesi. Benamo mero emaḡurito nai ḡeraga-ḡabi-veḡitaiaato, Barau e ḡena terona ḡoirana ḡana ḡeḡwa-iaḡoato. <sup>6</sup> Mo vavine tu Barau na ḡena erovinatoreato gabuna tano fakana ḡana egari-iaḡoto. Monai beḡe nariani e beḡe ḡubuani ḡaro mabarari 1260 nuḡari ai.

<sup>7</sup> Benamo gubai vetari ta eḡorato: Maikolo ma ḡena aneru ḡesi ḡuḡaia kavana dagarana asikeikeina ḡevetari-viniato, benamo ḡuḡaia ma ḡena aneru na maki ḡia ma ḡevetari-vinirito. <sup>8</sup> Senaḡi ḡuḡaia kavana dagarana tu asi ekokoreto, naima gubai asi ḡeri

gabau ai ġevaġa-iaġorito. <sup>9</sup> Mo ġuġaia kavana dagarana asikeikeina, irau laġani veġata motana, arana “Diabolo” o “Satani”, tanobara mabarana eġofaiato dagarana, tu ġedorirosiato, e tanobarai ġefiu-riġoato. Ġena aneru mabarari maki ġia ġesi ġefiu-riġorito.

<sup>10</sup> Benamo gubai garo baregona ta eguruġato aseġaġiato, ekirato, “Toma ġita ġera Barau ġena vevaġa-maġuri, e ġena seġuka, e ġena veġitaġau baregona, ema ġena Keriso ġena maoro baregona varau beraġasi. Korana Barau ġoiranai ġita tari-kakara boġilaġani evaġa-daġarito-ġoi dagarana tu varau beġe fiu-riġoa. <sup>11</sup> Ġia tu tarikakara na Mamoe Natuna, (ginitaġo mamoeina), rarana ema ġia ġena guruġa moġoniri ġevari-fiurito-ġoi, moġerina ġekokoreto, be ġevaġa-ketoato. Ġeri maġuri asi ġetuġamaġi-kaurito, eiaġoto mo, ġea maseto. <sup>12</sup> Guba o, ema gubai ġotanuni tarimami o, boġono iaku! Senaġi tanobara e daġaru-bara ġomi tu vetuġami kika! Korana Satani tu ġomi ġemi ai varau beviriġosi, nuġana tu baru na bevonuvonu-raġe, korana ribana, ġia ġena nega tu varau bekubi-rakava.”

<sup>13</sup> Mo ġuġaia kavana dagarana eribato, ġia tu tanobarai ġefiu-riġoato neganai, mero evaġa-ġoraiato vavinena murina na ekureto. <sup>14</sup> Senaġi mo vavine tu ugava asikeikeina fanena ruarua Barau na eviniato, mo tano fakana, erovina-toreato gabuna, ġana bene rovo-iaġo uranai. Ġia monai tu laġani toitoi ma kwana beġene naria ema beġene ġubutanua ġana. Korana monai tu ġuġaia, mo mota rakavana, na asi ilaila beġabi-karaiani. <sup>15</sup> Benamo ġuġaia, mota rakavana, bokana na nanu evaġa-ġaru rosiato noġa ġabata kavana. Ġia eurato mo vavine tu mo ġabata na bene ġaru-kwareġaia etato. <sup>16</sup> Senaġi tano na mo vavine evaġa-kavaiato, korana tano evekeoto, benamo ġuġaia bokana na eraka-rosito ġarukana mabarana eboġeato. <sup>17</sup> Benamo ġuġaia kavana dagarana na mo vavine ebaruvini-rakavaiato, benamo eiaġoto, mo vavine besena, Barau ġena taravatu guruġari ġekorana-iaġirito-ġoi ema Iesu ġena vevarifiu guruġari ġevaġa-moġonirito-ġoi tarimari mabarari evetari-vinirito. <sup>18</sup> Benamo ġuġaia tu kone ai ea ruġato.

## 13

*Davara na vevaġa-rakava dagarana ebere-rosito, moġa tu Keriso ġofaġofana*

<sup>1</sup> Benamo au na vevaġa-rakava dagarana ta aġitaiato, daġaru-bara na eraka-raġeto. Ġia guduna mabarari tu gabanana (10), e debana mabarari tu imaima ruarua (7). Korana mabarari tu gabanana (10). Moġeri korana tu ġia guduna tata ġeri ai, ma debana tata ġeri ai tu Barau vaġa-rakavana arana. <sup>2</sup> Mo vevaġa-rakava dagarana aġitaiato, moġa ġitaġitana tu lepadi noġa, (lepadi tu taiga noġa), a kwakuna tu bea kwakuri kavana, ema bokana tu laion bokari kavana. Benamo ġuġaia kavana dagarana asikeikeina tauġena ġena seġuka, ġena terona, ema ġena maoro eġabirito, mo vevaġa-rakava dagarana eviniato. <sup>3</sup> Vevaġa-rakava dagarana debana tai tu giri baregona ta, ġevaġi-maseato girina, senaġi mo manuġa baregona tu enamoto. Tanobara tarimari mabarana mo vevaġa-rakava dagarana ġenai nuġari ġefarevaġi-rakavato, benamo ġia murinai ġerakato. <sup>4</sup> Tarimarima mabarari na ġuġaia ġetoma-rakariġo viniato, korana ġia ġena seġuka tu mo vevaġa-rakava dagarana eviniato. Ema vevaġa-rakava dagarana maki ġetoma-rakariġo viniato, ġevedanaġito, ġekirato, “Dei tu mai vevaġa-rakava dagarana kavana? Dei na ġia bevetari-viniani riba?”

<sup>5</sup> Mo vevaġa-rakava dagarana tu maoro eviniato tu, veiavi guruġari ema Barau vaġa-rakavana guruġari bene kiraġiri ġana, ema ġue gabana vasivasi ma ruarua (42) nuġari ai ġena maoro bene ġauvei-iaġiri. <sup>6</sup> Benamo muruna ekeoato, ma Barau vaġa-rakavana guruġari ekiraġi-matamato; Barau arana ema ġena tanu gabuna ekira-rakavarito, ema gubai ġetanuni tarimari mabarari evaġa-rakavarito. <sup>7</sup> E maoro eviniato, Barau ġena vevaġa tarimari bene vetari-viniri nuġanai bene kokore, be ġia bene vaġa-darereri ġana. Ema seġuka eviniato, doġoro mabarari, e bese mabarari, e garo mabarari, ema tanobara mabarari bene ġori-kauri ġana. <sup>8</sup> Tanobarai ġetanuni tarimari mabarari na ġia beġe toma-rakariġo viniani. Maiġeri tarima tu, Barau na tanobara roġosi bere veia veġata,

arari mo Mamoe Natuna, ǵevaǵiatio dagarana, ǵena maǵuri bukanai arari asi etorerito tarimari.

<sup>9</sup> Ma seǵana tarimana tu bene seǵaǵi. <sup>10</sup> Barau beurani dibura numanai beǵene baru-taria betoni tarimana tu, dibura numanai beǵe baru-tariani veǵata. Barau beurani vetari baǵana na beǵene vaǵi-masea betoni tarimana tu, vetari baǵana na beǵe vaǵi-maseani. Maiǵeri guruǵa na Barau ǵena tarima veaǵari evaǵa-guruǵarini, beǵene vevaǵa-gwaǵiǵi, ema ma ǵeri vetuǵamaǵikau ǵesi beǵene tanu.

*Vevaǵa-rakava dagarana vaǵa-ruaruana, moǵa tu peroveta tarimana ǵofaǵofana*

<sup>11</sup> Moǵa murinai au na vevaǵa-rakava dagarana ta ma aǵitaiato, tano na everaǵa-raǵeto. Ǵia guduna tu ruarua, Mamoe Natuna guduna kavana, ema ǵia tu ǵuǵaia kavana eguruǵato-ǵoi. <sup>12</sup> Ǵia na vevaǵa-rakava dagarana giniguinena moǵa aranai ǵena maoro e seǵuka mabarari eǵauvei-iaǵirito. Ma ǵia na tanobara tanu-iaǵina tarimari mabarari elau-naǵirito, mo vevaǵa-rakava dagarana giniguinena, debana giri baregona, ǵevaǵi-maseato girina, manuǵana enamoto dagarana, beǵene toma-rakariǵo vinia etato. <sup>13</sup> Mai vevaǵa-rakava dagarana vaǵa-ruaruana mainana veiǵa boruri baregori ema vetoǵa irauri tari eveirito-ǵoi. Ta tu, ǵia na tarimarima mabarari ǵoirari ǵutuǵutunai karava guba na evaǵa-mariǵoato. <sup>14</sup> Ǵia tu vetoǵa boruri kotari eviniato, mo vevaǵa-rakava dagarana giniguinena ǵoiranai eveirito, tanobarai ǵetanuni tarimari eǵofa-darererito. Ma ekirarito, mo vetari baǵana na ǵevaǵa-beroato, ma toma roǵo emaǵuri-tanuni vevaǵa-rakava dagarana, moǵa gubakauna ǵana tu vetoǵana dagarana o laulauna ta beǵene veia, benamo ǵene vaǵa-ruǵa-vaisia etato. <sup>15</sup> Mo vevaǵa-rakava dagarana vaǵa-ruaruana tu seǵuka eviniato, vevaǵa-rakava dagarana laulauna giniguinena moǵa iaǵa bene vinia, be bene guruǵa, ema mo vevaǵa-rakava dagarana laulauna asi ǵeurani toma-rakariǵo-vinina tarimari mabarari bene vaǵi-maseri ǵana.

<sup>16</sup> Benamo tarimarima mabarari, misiri e baregori, ma ǵeri farefare ǵutuma tarimari e asi ǵeri farefare tarimari, tuǵu-rakaorakao tarimari e fakai ǵetanuni o dia tuǵu-rakaorakao tarimari, etuǵu-naǵinaǵirito vetoǵa o maka ta ǵimari aroribari ai o bakuri ai beǵene ǵabia etato. <sup>17</sup> Moǵesi beǵene vei, be tarima ta dagara ta asi bene voivoi-kava o asi bene voivoi-iaǵi-kavaia, senaǵi mo vevaǵa-rakava dagarana giniguinena ǵena vetoǵa o maka, mai tu ǵia arana o arana eruǵa-boroǵiatio numerana, ǵenai tarimana ǵereǵana moǵo dagara bene voi e bene ǵwa-voivoi. <sup>18</sup> Iaunega tu maiǵa: Nuǵa-mama o tuǵamaǵi-faka tarimana na mo vevaǵa-rakava dagarana numerana bene vaǵa-gaua, korana mo numera tu tarima ta numerana. Numerana tu maiǵa: 666.

## 14

*Ginitaǵo mamoe na evoi-vaǵirito tarimari ǵeri mari*

<sup>1</sup> Benamo aboǵeto tu, Mamoe Natuna ǵoiragu ai aǵitaiato, Siona Ǵoronai eruǵa-taǵoto-ǵoi, ema ǵia sevinai tarimarima 144,000 ǵeruǵa-taǵoto-ǵoi. Bakuri ai tu ǵia arana ema Tamana arana ǵevetoreto. <sup>2</sup> Benamo guba na garo ta ǵaruka vovoka ǵeǵaru-gwadani gururi ema guba eguruani guruna noǵa aseǵaǵirito. Mo guru tu noǵamo hap ǵelauni tarimari na ǵeri hap ǵelaurito-ǵoi gururi kavana. <sup>3</sup> Ǵia tu mo terona, e maǵuri dagarari vasivasi (4), ema veǵitaǵau tarimari baregori ǵoirari ai mari variǵuna ta ǵemariato. Tarima ta na mo mari moǵa marimarina tu asi bedoǵariani riba, senaǵi mo tanobara na ginitaǵo mamoe na evoi-vaǵirito tarimari 144,000 ǵereǵari na moǵo. <sup>4</sup> Mai tarima maiǵeri tu vavine ǵesi asi ǵekimato o asi ǵeveǵura-vanaǵito, be asi ǵemiroto, ǵia tu tauǵeri ǵevenaumato, be ǵia tu namo vedaurea. Ǵia tu Mamoe Natuna aiǵana aiǵana eiaǵoni nai, murina na ǵerakani. Tarimarima vekaravari ai ǵia tu Barau na evoirito, ma Barau ema Mamoe Natuna ǵeri tarimarima giniguineri ai ǵeiaǵoto. <sup>5</sup> Mururi na ǵofaǵofa guruǵana ta asi ǵekiraǵiatio, ǵia ǵeri ai rakava misina ta maki asiǵina ǵinavaǵi.

*Aneru toitoi*

<sup>6</sup> Benamo au na aneru ta maia guba e tano fakari na erovoto-ḡoi aḡitaiato. Ḡia ḡenai tu Vari Namona, betanu-vanaḡi vanaḡini varina. Ḡia na mai Vari Namona tu tanobara mabarari, e doḡoro mabarari, e garo mabarari, ema bese mabarari tanobarai ḡetanuni ḡeri beḡene vari-fiua ḡana. <sup>7</sup> Eguruḡa-fararato, ekirato, “Barau garina boḡono vei ema Barau boḡono vaḡa-raḡea! Korana tu ḡia ḡena vevaḡa-kota aoana tu varau beraḡasi. Guba, e tanobara, e daḡaru-bara, ema nanu eḡaruani gaburi eveirito Barauna boḡono toma-rakariḡo vinia.”

<sup>8</sup> Aneru vaḡa-ruaruana murina na eiaḡomato, benamo ekirato, “Beketo, Babulona baregona varau beketo. Ḡia na tanobara irauirau beseri mabarari ḡia ḡena veḡura-vanaḡi wainina gwaḡiḡina evaḡa-niurito.”

<sup>9</sup> Ma aneru vaḡa-toitoina ḡia murina na eiaḡomato, benamo eguruḡa-fararato, ekirato, “Bema tarima ta na mo vevaḡa-rakava dagarana ema iouiouna dagarana betomarakariḡo viniani, ema ḡena maka bakunai o ḡimantai beḡabi-raḡeani tu, <sup>10</sup> ḡia maki Barau ḡena baru baregona wainina beniuani. Mo baru baregona wainina gwaḡiḡina moḡa tu mabarana Barau ḡena baru kapusina nuḡanai ebubu-ḡuraiato. Ḡia tu aneru veaḡari ema Mamoe Natuna ḡoirari ai karava morena e salfa nuḡanai bemidigu-midiguni. <sup>11</sup> Ḡia mo karava moreri nuḡanai beḡe midigu-midiguni goḡuna tu beraḡe-vanaḡi vanaḡini asi magona. Ma vevaḡa-rakava dagarana ema ḡia vetoḡana o laulauna dagarana beḡe toma-rakariḡo viniani tarimari o ḡia arana makana beḡe ḡabiani tarimari tu, boḡi-laḡani asi beḡe iaḡaraḡini.”

<sup>12</sup> Mainana Barau ḡena tarimarima veaḡari, Barau ḡena taravatu ḡekorana-iaḡiani ema Iesu ḡenai ḡevetuḡamaḡikauni tarimari, evaḡa-guruḡarini, beḡene vevaḡa-gwaḡiḡi ema beḡene kokore.

<sup>13</sup> Benamo guba na garo ta ma aseḡaḡiato, ekirato, “Maiḡeri guruḡa notoreri: Maitoma beiaḡoni tu, Vereḡauka ḡena maḡuri nuḡanai ḡetanuni tarimari beḡe maseni tu beḡene iaku.” Iauka Veaḡa evaḡa-veseto, “Oi, ḡia tu ḡeri ḡauvei e vekwaraḡi na beḡe iaḡaraḡini, korana tu ḡeri veiḡa namori ḡia ḡesi beḡe iaḡo-sebonani.” (Moḡa anina tu, ḡeri vekwaraḡi voina namona beḡe doḡariani veḡata).

#### *Tanobarai kwakwa ḡarona*

<sup>14</sup> Benamo aboḡe-iaḡoto, magube kurokurota ta aḡitaiato, ma mo magube kurokurota iatanai tu Tarimarima Natuna noḡa tarimana etanuto. Ḡia debanai tu golo koronana ta, ma ḡimantai tu baḡa ḡeḡevana masakona ta. <sup>15</sup> Benamo aneru ta maia Rubu Veaḡa na ema raka-rosito, bena magube kurokurota iatanai etanuto tarimana ekea-farara viniato, ekirato, “Ḡemu baḡa ḡeḡevana noḡabi-vaisia, benamo ḡaniḡani dagarari nobasi-vaḡiri! Korana kwakwa o basibasi ḡarona varau beraḡasi, tanobarai ḡaniḡani tu beḡe maḡe-ḡosi.” <sup>16</sup> Benamo mo magube iatanai etanuto tarimana ḡena baḡa ḡeḡevana tanobara iatana na edave-vanaḡiato, benamo tanobara ḡaniḡanina ebasi-vaḡiato, eḡabiato.

<sup>17</sup> Aneru ta maia guba na Rubu Veaḡa nuḡana na ema raka-rosito. Ḡia maki ḡimantai tu baḡa ḡeḡevana masakona ta. <sup>18</sup> Aneru ta maia fata veaḡana na eiaḡomato. Ḡia tu karava eḡita-ḡauato-ḡoi aneruna. Ḡia eiaḡomato, benamo baḡa ḡeḡevana masakona eḡabiato aneruna ekea-farara viniato, ekirato, “Ḡemu baḡa ḡeḡevana masakona noḡabia, ma tanobara vinena ḡwari ḡureri nokari-vegogori, korana vine ḡwari (o grapes) tu varau beḡe maḡe. <sup>19</sup> Benamo mo aneru na ḡena baḡa ḡeḡevana moḡa vaḡa-sebona edaveato, benamo tanobara iatana vine ḡwari mabarari ebasi-vaḡa-vegogorito. Benamo moḡesi mabarabarari eḡabirito, ma vine ḡwari ḡefanarini gabunai ea bubu-toḡarito. Mo vine ḡwari ḡefanarini gabuna moḡa, mo tu Barau ḡena baru ekiraḡiani gabuna. <sup>20</sup> Mo vine ḡwari mabarari vanuḡa baregona murikanai vine ḡwari ḡefanarini gabunai ḡefanafanataririto-ḡoi gorari beḡene riḡo ḡana. Benamo vine ḡwari ḡefanarini gabuna na rara eḡaru-rosito. Rara eḡaru-rosito ḡena geboka tu tano bevaraḡe mo, hosi muruna dokona, ma ḡena mauka tu stadia 1,600 o 300 kilomita.

## 15

*Aneru imaima ruarua (7) ǵeri ai vevaǵa-midigumidigu dagarari rakavari 7*

<sup>1</sup> Benamo gubai vetoǵa baregona ta, nuǵa-farevaǵi dagarana aǵitaiato: Aneru 7 aǵitarito, ǵeri ai tu dagara rakava kwaikwairi 7, tarimarima vaǵa-midigumidiguri dagarari. Mo tu dagara rakavari magona. Korana moǵeri na Barau ǵena baru bevaǵa-kori ginikauani.

<sup>2</sup> Ma davara ta veǵia kavana ma karavana aǵitaiato. Mo davara sevinai tu mo tarimarima, vevaǵa-rakava dagarana ema ǵia laulauna dagarana ema ǵia arana ekiraǵiani numerana ǵevaǵa-ketorito tarimari, ǵeruǵa taǵoto-ǵoi aǵitarito. Ǵia ǵimari ai tu Barau na evinirito hapiri ǵeǵabi-taǵorito-ǵoi, <sup>3</sup> ma Barau ǵena vetuǵunaǵi tarimana, Mose, ǵena mari ema Mamoe Natuna ǵena mari ǵemariato-ǵoi,

“Vereǵauka o, ǵoi tu

Iaru-korokoro Barauna,  
ǵemu ǵauvei tu barego,

asi tau vaǵa-ilailana

ema namo vedaurea. Ǵuru mabarari ǵeri Vere o,

ǵoi ǵemu dabara tu iobukaiobuka ema moǵoni veǵata.

<sup>4</sup> Vereǵauka o, deikara na ǵoi asi begari-vinimuni,

ma ǵoi aramu asi bevaǵa-raǵeani?

Korana tu ǵoi moǵo ǵereǵamu veaǵa.

Tanobara mabarari tarimari beǵe iaǵomani,

benamo ǵoi beǵema toma-rakariǵo vinimuni.

Korana tu ǵemu veiǵa iobukaiobukari varau beǵema fofori.”

<sup>5</sup> Maiǵa murinai au aboǵe-iaǵoto, benamo gubai Rubu Veaǵa, mo tu Barau na ǵena guruǵa moǵoniri evaǵa-foforirini farai numana veaǵana, evekeoto aǵitaiato. <sup>6</sup> Mo aneru imaima ruarua (7), ǵeri ai tu tarimarima vaǵa-midigumidiguri dagarari rakavari; farai numana veaǵana na ǵeraka-rosito, dabuǵa gwaǵiǵiri namori ema veǵia-veǵiari na ǵevedabuǵato, ema kobari ai tu golo beletari ǵetore-ǵeǵeraǵirito. <sup>7</sup> Benamo mo maǵuri dagarari vasivasi vekaravari ai ta na mo aneru 7 golo diǵuri 7 evinirito. Mo golo diǵuri tu tanu-vanaǵivanaǵi Barauna ǵena baru na evaǵa-vonu fokafokarito. <sup>8</sup> Benamo mo Rubu Veaǵa tu Barau marevana goǵuna ema seǵukana goǵuna na evaǵa-vonuato. Tarima ta Rubu Veaǵa nuǵanai asi roǵo beraka-toǵani riba, beiaǵoni mo, tarimarima vaǵa-midigumidiguri dagarari rakavari 7 beǵe korini vau.

## 16

*Barau ǵena baru diǵu imaima ruarua (7) nuǵari ai*

<sup>1</sup> Benamo garo baregona ta Rubu Veaǵa nuǵana na eiaǵomato aseǵaǵiato. Mo garo na tu aneru 7 evaǵa-guruǵarito, ekirato, “Ǵoiaǵo, Barau ǵena baru na evaǵa-vonurito diǵuri 7 maniǵeri tanobara iatanai ǵoa bubu-firiǵori.”

<sup>2</sup> Aneru giniguinena eiaǵoto, ǵena diǵu tanobara iatanai ea bubu-kauato. Benamo manuǵa ǵitaǵitari rakava kwaikwairi ma midiguri maki asikeikeiri vevaǵa-rakava dagarana ǵena vetoǵa o maka ǵeǵabiato ema ǵia iouiouna dagarana ǵetoma-rakariǵo viniato tarimari na ǵeǵoitaǵorito.

<sup>3</sup> Aneru vaǵa-ruaruana ǵena diǵu tu davarai ebubu-riǵoato. Benamo mo davara tu mase tarimana rarana kavana eveito, ma nuǵanai maǵuri ǵetanuni dagarari mabarari ǵemaseto.

<sup>4</sup> Aneru vaǵa-toitoina ǵena diǵu tu ǵarukai ema nanu eǵaruani gaburi ai ebubuato, benamo rarai ǵeiaǵoto. <sup>5</sup> Benamo nanu eǵita-ǵauani aneruna garona aseǵaǵiato, ekirato,

“Veaǵa Baraumu,

ǵoi tu tovotovonai otanuto-ǵoi,

ema initoma maki otanuni.



Ĝoi ĝemu kota-vini ĝauveina tanobara tarimari ĝeri ai maiĝesina oveiani tu maoro korikori moĝo.

<sup>6</sup> Korana ĝia na ĝoi ĝemu tarimarima veaĝari ema peroveta tarimari rarari ĝevaĝa-riĝorito.

Moĝesina naima ĝeri veiĝa lorinai,  
be rara boviniri beĝe niu.”

<sup>7</sup> Benamo Barau ĝena fata veaĝana na garo ta eiaĝomato aseĝaĝiato, ekirato, “Vereĝauka o, ĝoi tu moĝoni veĝata Iaru-korokoro Barauna, ĝemu kota-vini ĝauveiri tu dabara moĝoninai ema maoronai oveiani.”

<sup>8</sup> Aneru vaĝa-vasivasina ĝena diĝu tu ĝaro iatanai ebubu-kauato. Benamo ĝaro seĝuka eviniato, tarimarima karava na bene ĝarari ĝana. <sup>9</sup> Benamo mo ĝaro seĝukana gugurana baregona na tarimarima eĝararito. Ma monana tarimarima tu asi ĝevetuĝamaĝi-kureto, benamo Barau asi ĝevaĝa-raĝeato, ne ĝia na tu Barau arana ĝevaĝa-rakavaiato. Barau tu ma ĝena maoro baregona maiĝeri midigumidigu dagarari rakavari bevaĝa-ĝorarini e asi bevaĝa-ĝorarini.

<sup>10</sup> Aneru vaĝa-imaimana ĝena diĝu tu vevaĝa-rakava dagarana ĝena terona iatanai ebubu-kauato, benamo ĝena veĝitaĝau gabuna tu emukuna-furufuruto. Benamo tarimarima midigumidigu baregona na eĝabirito, ma meari ĝekafu-taririto. <sup>11</sup> Mo midigumidigu ema manuĝa dairi ai, ĝia na gubai etanuni Barauna ĝevaĝa-rakavaiato. A ĝia tu asi ĝeurato ĝeri veiĝa rakavari ĝerina beĝene vetuĝamaĝi-kure.

<sup>12</sup> Aneru vaĝa-imaima sebonana (6) ĝena diĝu tu Eufrate ĝarukana baregona nuĝanai ebubu-ĝuraiato. Benamo mo ĝaruka baregona eroroto, ĝaro eraĝeni rekena na kini (ma ĝeri vetari doĝorori ĝesi) beĝe iaĝomani, moĝeri ĝeri dabara evaĝa-fakaiato. <sup>13</sup> Moĝa murinai iauka rakavari toitoi farakeĝo noĝa moĝo aĝitarito. Ta tu dagara ta ĝuĝaia kavana, (mai tu Satani), bokana na ema raka-rosito, ta tu vevaĝa-rakava dagarana, (mai tu Keriso ĝofaĝofana), bokana na ema raka-rosito, ma ta tu peroveta ĝofaĝofa tarimana bokana na ema raka-rosito. <sup>14</sup> Mo iauka moĝeri tu demoni iaukari, ĝia na vetoĝa irauirauri ĝeveirito-ĝoi, ema ĝeiaĝoto tanobara mabarana kiniri ĝeri ai, beĝenea vaĝa-vegogori, be Iaru-korokoro Barauna ĝena ĝaro baregonai tu Barau beĝene vaĝa-vevaĝia ĝana.

<sup>15</sup> “Noseĝaĝi! Au tu lema tarimari kavana baiaĝomani! Bevaĝa-noga-taĝoni ema ĝena dabuĝa kefinai bevei-taĝorini tarimana tu bene iaku. Korana ĝia tu kefina kori asi beiaĝoni, benamo ĝutuma-bara nuĝanai asi bemaiaĝiani.”

<sup>16</sup> Benamo demoni iaukari toitoi na kini mabarari ĝeĝori-vegogorito gabu tai, Heberu garori ai mo gabu arana tu Amagedon.

<sup>17</sup> Aneru vaĝa-imaima ruaruana (7) ĝena diĝu tu guba fakanai ebubuato, benamo Rubu Veaĝa nuĝana na garo baregona ta terona na eiaĝomato, ekirato, “Varau bekori!”

<sup>18</sup> Benamo kiriku eragato, e garo gururi tari ĝeraĝeto, e guba eguruato, ema tano-iaga baregona eragato. Tarimarima tanobarai ĝetanu-guineto, monana beiaĝoma mo initoma moĝesi tano-iaga ta tu asi eĝorato. Moĝa tu tano-iaga barego lelevaĝina veĝata. <sup>19</sup> Benamo vanuĝa baregona evetavito, tavi toitoi ĝevetoreto, ema tanobara mabarari vanuĝari maki ĝeĝwa-kafu kafurito. Barau na vanuĝa baregona Babulona ma etuĝamaĝi-ĝenoĝoiato, benamo Barau ĝena baru ema nuĝa-ĝirimaĝirima wainina na evaĝa-vonu fokafokaiato kapusina eviniato, bene niua ĝana. <sup>20</sup> Benamo motumotu mabarari ĝeraga-rekwarekwato ema ĝoro maki ĝerekwarekwato, be asiĝina. <sup>21</sup> Ma guba na aisi, fore noĝa asikeikeiri, ĝeri meto tu pauna sinau sebona (100) kavana, tata tarimarima iatari ai ĝeketokauto. Benamo mo tarimarima na Barau guruĝa rakavari ĝeviniato-ĝoi, korana mo aisi, fore noĝa asikeikeiri, iatari ai ĝeketokauto-ĝoi dainai. Korana mo vevaĝa-midigumidigu dagarana rakavana moĝa tu rakava kwaikwaina.

<sup>1</sup> Benamo mo diḡu imaima ruarua (7) ḡeḡabi-taḡorito-ḡoi aneruri fakari ai ta tu au rekegu ḡana eiaḡomato, benamo au ema vaḡa-guruḡaguto, ekirato, “Noiaḡoma, be veḡura-vanaḡi vavinena baregona ḡena veḡura-vanaḡi voina metona beḡabiani metona navaḡa-ḡitamū. Ḡia tu nanu vovoka iatari ai etanuni. <sup>2</sup> Tanobarai ḡetanuni vereri baregori o kiniri mabarari tu ḡia ḡesi ḡeveḡura-vanaḡito. Ema tanobarai ḡetanuni tarimari maki ḡia ḡena veḡura-vanaḡi wainina na ḡeniu-babobaboto.”

<sup>3</sup> Benamo Iauka Veḡa na eborotḡiguto, aneru ta na eḡwa-rakaguto, tano fakana ḡana eḡwa-iaḡoguto. Monai vavine ta aḡitaiato, vevaḡa-rakava dagarana kakakakana ta iatanai etanu-taḡoto-ḡoi. Mo vevaḡa-rakava dagarana tauḡanina tu Barau vaḡa-rakavana arari ḡevaḡa-vonuato. Ḡia debana mabarana imaima ruarua (7), ema guduna tu gabanana (10). <sup>4</sup> Mo vavine tu dabuḡa kakakakari ema koturi kakakakari o pepolori namo vedaureari eriḡoto, ema golo e fore nauḡanauḡari ema aḡeva ma marevari na everato. Ḡimanai tu golo kapusina ta eḡabiato. Mo golo kapusina tu veiḡa rakava kwaikwairi ema ḡena veḡura-vanaḡi mirori na evonu-fokafokato. <sup>5</sup> Ḡia bakunai tu ara ta ḡeberaiato, anina maki vekuretoḡa, maiḡesi ḡetoreato, “Babulona barana, veḡura-vanaḡi sinari ema tanobarai veiḡa rakava kwaikwairi mabarari sinari.” <sup>6</sup> Benamo au na mo vavine aḡitaiato, Barau ḡena tarimarima veḡari, ḡevaḡi-maserito tarimari, rarari eniurito, be eniu-babobaboto. Mo tu Iesu ḡevaḡa-moḡoniato-ḡoi nai, ḡevaḡi-maserito tarimari rarari. Au na ḡia aḡitaiato nai, aḡaba-rakavato.

<sup>7</sup> Benamo mo aneru na ekiraguto, ekirato, “Ḡoi tu kara dainai oḡaba-rakavani? Mani vavine maniḡa varina vekuretoḡana ema mani vevaḡa-rakava dagarana iatanai beraḡe maniḡea, mani debana 7 ma ḡena gudu 10, varina vekuretoḡari tu nakiravara-ginikaumu. <sup>8</sup> Mo vevaḡa-rakava dagarana boḡitaia, moḡa tu guinenai etanuto-ḡoi, ma ḡia toma tu asi tauna. Ḡia tu tano gabigabina guri variḡo kwareḡana na bema raka-rosini, benamo beiaḡoni gabuna rakava kwaikwaina, midigumidigu baregona bea ḡabiani. Tanobarai ḡetanuni tarimari, Barau na tanobara eveiato monana veḡata arari maḡuri bukanai asi etorerito tarimari, na mo vevaḡa-rakava dagarana ḡeḡitaiato nai tu, nuḡari ḡefarevaḡi-rakavato. Korana ḡia tovotovonai tu etanuto-ḡoi, ma toma tu asi tauna, senaḡi ḡia tu ma beiaḡomani.

<sup>9</sup> Iaunega tarimana na maiḡa bene tuḡamaḡi-fakaia. Mo deba 7 tu mo vavine etanukauni ḡorori 7. <sup>10</sup> Ma ḡia aniri ta maki vere baregori o kini 7. Vere barari imaima tu ḡeketoto, sebona tu roḡo eruḡa-taḡoni, ma ta tu roḡosi bene iaḡoma. A ḡia beiaḡomani tu, mai tanobarai asi betanu-maukani. <sup>11</sup> Mo vevaḡa-rakava dagarana guinenai etanuto-ḡoi, ma initoma ḡia tu asi tauna, maniḡa tu kini vaḡa-imaima toitoina (8). Ḡia tu mani vere baregori o kini 7 karori ta, ma ḡia tu beiaḡoni gabu rakava kwaikwaina midigumidigu barego bea ḡaniani.

<sup>12</sup> Mo gudu 10 oḡitarito, moḡeri mo tu kini 10. Ḡia tauri 10 tu kini dagina ema beḡe ḡita-ḡaurini tano-barari roḡosi beḡene ḡabiri. Senaḡina ḡia tu aoa sebona mo vevaḡa-rakava dagarana ḡesi kini kavana veḡitaḡau maorona baregona beḡe ḡabiani. <sup>13</sup> Ḡia ḡeri tuḡamaḡi tu sebona moḡo, ema ḡeri seḡuka e maoro baregona tu mai vevaḡa-rakava dagarana beḡe viniani. <sup>14</sup> Ḡia na Mamoe Natuna beḡe vetari-viniani, senaḡi Mamoe Natuna na bevaḡa-ketorini, korana ḡia tu vere mabarari ḡeri Vere, ema kini mabarari ḡeri Kini. Ema ekearito e eḡabi-viriḡirito ema ma vetuḡa-maḡikauri ḡesi ḡia murinai ḡerakani tarimari maki ḡia ḡesi beḡe kokoreni.”

<sup>15</sup> Benamo mo aneru na ekiraguto, ekirato, “Mo veḡura-vanaḡi vavinena etanu-taḡoni nanuri boḡitari, moḡeri tu tanobara beseri, tarima ḡutuma gorogoro, tanobara irauirau tarimari, ema garo irauirau tarimari boḡitari. <sup>16</sup> Mo vevaḡa-rakava dagarana ema mo gudu 10 boḡitari dagarari, mani veḡura-vanaḡi vavinena tu beḡe iau-rakavaiani. Ḡia na asi ḡena farefare ai beḡe vaḡa-iaḡoani, e dabuḡana ḡenana beḡe fuki-vaḡirini, tauḡanina kori beḡe vaḡa-rakaiani; viriḡona beḡe ḡaniani ema karavai beḡe gaburaḡeani. <sup>17</sup> Korana Barau na maniḡeri kini nuḡari ai evaḡa-urato, ḡia ḡena ura beḡene

veia etato. Moġesina naima ġia maki ġeurato nai, ġeri seġuka mo vevaġa-rakava dagarana beġene vinia, be bene veġorikau, bene iaġo mo, Barau ġena guruġa mabarari beġenea ġuġuru. <sup>18</sup> Ema mo boġitaia vavinena tu vanuġa baregona. Ġia na tanobara vereri o kiniri mabarari eġori-kaurini.”

## 18

### *Babulona beketoni*

<sup>1</sup> Maiġa murinai aneru ta ma ġena seġuka baregona ġesi guba na emariġoto aġitaiato. Ġia marevana mamana na tanobara emama-vaġa-ġauato. <sup>2</sup> Benamo tuġana maki asi ekoġoto, ekirato,

“Beketo! Vanuġa baregona Babulona tu beketo!

Ġia tu demoni ġeri tanu gabunai beiaġo, e iauka rakavari ema iauka mirori, e manu rakava kwaikwairi ġeri tanutaġo gabunai beiaġo.

<sup>3</sup> Korana tu bese mabarari na ġena wain ġeniuato nai ġevei-babobaboto; mo wain tu ġena veġura-vanaġi ġauveiri.

Tanobarai ġetanuni kiniri mabarari tu ġia ġesi ġeveġura-vanaġito, ema tanobarai dagara ġeġwa-voivoirini tarimari maki ġia ġena farefare namori ġerina farefare vovoka tarimari ai ġeiaġoto.”

<sup>4</sup> Moġa murinai tu guba na garo ta eiaġomato ma aseġaġiato, ekirato,

“Ġegu tarima mabarami,

mai vanuġa baregona ġenana ġoma raka-rosi.

Be ġia ġena vei-rakava veiġari asi boġono veiri,

ġia na vevaġa-midigumidigu dagarari rakavari beġabirini dagarari ġomi na asi boġono ġabiri.

<sup>5</sup> Korana ġia ġena vei-rakava tu iatai-iatai bevesenu-senukau, bevaraġe mo, guba vanuġana maki bea doġaria.

Senaġi Barau na ġena veiġa, asi maorori dagarari, etuġamaġi-taġorini, asi etuġa-rekwarini.

<sup>6</sup> Ġia na ġomi evinimito ilailana ma boġono vini-vaġa-voia.

Ġena veiġa voina ilailana moġa boġono vaġa-ruaia, benamo boġono vinia.

Niuniu wainina kapusi sebna ġomi evinimito nai tu, ġena kapusi korikori ai niuniu wainina moġa nuġanai ta maia boġono bubu-ġuraia, boġono vaġa-ruaia, benamo voina boġono vinia.

<sup>7</sup> Tauġena eveġabi-varaġeto ema eġani-namoto-ġoi ema etanu-namoto-ġoi ilailanai, midigumidigu boġono vinia ema boġono vaġa-taġitaġia.

Ġia nuġanai tu eveiavini, ekirani,

‘Au tu kwin o vere vavinena kavana atanuni.

Au tu dia vabu ema asiġina ġinavaġi bataġi-vanoro vanoroni.’

<sup>8</sup> Moġesina naima ġia tu ġaro sebna nuġanai moġo midigumidigu iraurau na beġe vaġa-ketoani, mo tu mase, taġi-vanorovanoro, ema doġe ġenai beġe raġasini.

Ma ġia tu karava na beġaraiani.

Korana ġia ġeri rakava voina beviniani Barauna tu Barau Vereġauka,

ma ġia tu ma seġukana.”

<sup>9</sup> Tanobara kiniri, ġia ġesi veġura-vanaġi veiġari ġeveito ema ġia ġesi ġeġani-namoto-ġoi e ġetanu-namoto-ġoi kiniri, na ġia beġaraiani goġuna beġe ġitaiani nai tu, taġina beġe veini, ema beġe taġi-vanoroani. <sup>10</sup> Ġia ġena midigumidigu beġe ġitaiani, moġa garina na manaġai beġe ruġani, benamo beġe taġi-guruġani, beġe kirani,

“Vetuġamu! Siti baregona vetuġamu kekei!

Babulona o, seġuka rakava sitina!

Ġoi tu aoa sebna nuġanai moġo ġemu rakava voina metona boġabia!”

<sup>11</sup> Tanobarai dagara ġevoivoi-iaġirini tarimari beġe taġini ema beġe taġi-vanoroani, korana ġeri voivoi-iaġi farefareri tu asi voivoiri tarimana ta. <sup>12</sup> Mo tu ġeri golo, e silva,

e fore namo vedaureari voiri barego foreri, ema aḡeva marevari asi-gadara dagarari; dabuḡa namori gwaḡiḡiri, e dabuḡa kota kakakakari o pepolori, e dabuḡa silikari, ema dabuḡa kakakakari; ma bonari ḡauri, e elefani doḡari na ḡeveirini dagarari irauirauri, e ḡau voiri barego ḡauri na ḡeveirito dagarari, e auri boraborari e auri namori ema mabolo na ḡeveirito dagarari; <sup>13</sup> ḡaniḡani mamiri vaḡa-namori muramurana arana sinamon, e ma bonari muramurari, e goḡu ma bonana eveiani muramurana, e bonana namona muramurana arana muro, e tauḡani ai ḡedauani muramurana arana frenkinsens; vine nanuna, e olive diḡana, farao ema widi, boromakau ema mamoe, hosi ema kariota, ema tarimarima maki. <sup>14</sup> Beḡe kirani, “Ḡau ḡwaḡwana bono ḡabia otato-ḡoi uradikana oveito-ḡoi dagarana tu ḡemuna beveḡita. Ḡemu farefare vovoka ema ḡemu mareva mabarari beḡe rekwa-rekwa, asi bodoḡari-ḡenoḡoirini maia!”

<sup>15</sup> Dagara ḡeḡwa-voivoini tarimari na maiḡeri dagara ḡeivoivoi-iaḡirito ema ḡia ḡenana farefare vovoka ḡeḡoitaḡoto, moḡeri tu manaḡai beḡea ruḡani, mo midigu-midigu ḡia na beḡabiani moḡa garina. Ḡia tu beḡe taḡi-rakava rakavani ema beḡe taḡi-vanoroni, <sup>16</sup> ema beḡe taḡi-guruḡa guruḡani, beḡe kirani, “Vetuḡamu! Vanuḡa baregona, vetuḡamu kekei!

Dabuḡa namori gwaḡiḡiri, e dabuḡa kota kakakakari o pepolori, ema kakakakari na ovedabuḡato; golo kimorekimoreri, e fore namo vedaureari, ema gudugudu marevari asi-gadarana oveiato-ḡoi.

<sup>17</sup> Aoa sebona nuḡanai moḡo ḡemu farefare vovoka tabutabu mabarari benamo beḡema kori-ketovaḡi!”

Bouti baregori ḡeḡwa-ragarini tarimari mabarari, e bouti ai davara na ḡeragani tarimari mabarari, e bouti ai ḡeḡauveini tarimari, ema davara maḡaniri ma dagara tari ḡerina ḡeri-ḡari ḡeḡoitaḡoni tarimari mabarari manaḡai ḡea ruḡato. <sup>18</sup> Benamo eḡaraiato goḡuna ḡeḡitaiato nai tu, maiḡesina ḡekirato, ‘Mai vanuḡa baregona tu irau veḡata, siti ta maiḡesina kavana tu asi etanuto-ḡoi.’ <sup>19</sup> Benamo tano-kauri debari ai ḡebubukauto, ḡetaḡito e ḡetaḡi-vanoro vanoroto, ḡekirato, “Vetuḡamu kekei! Vanuḡa baregona vetuḡamu kekei!

Ma ḡeri bouti davarai tarimari tu ḡia ḡena taḡa ḡenana farefare vovoka ḡeḡoitaḡoto, ene?

Aoa sebona nuḡanai ḡia tu asi ḡena farefare tai moḡo beiaḡo.

<sup>20</sup> Guba vanuḡana o, ḡia ḡena keto iakuna ḡovei.

Barau ḡena tarima veaḡami,  
e apostolo tarimami,  
ema peroveta tarimami,  
ḡoiaku ḡoverere;

korana ḡomi veiḡa rakavari evei-vinimito dainai, Barau na ḡena rakava voina bevinia.”

<sup>21</sup> Benamo aneru kokore rakavana ta na fore ta widi ḡegiro-iaḡirini diḡuna baregona ta kavana eḡabiato. Mo fore-diḡuna moḡa eḡabi-vaisiato, benamo davarai efiu-reiato, benamo ekirato,

“Vanuḡa baregona Babulona tu maiḡesi ma baruri ḡesi beḡe fiu-tariani, benamo berekwarekwa-moḡovaḡini, asi ḡitaḡitanai ma beiaḡoni.

<sup>22</sup> Hap ḡelauni ma mari ḡeḡabini gururi, e ivirikou ḡefururuni ema dudu ḡefururuni gururi ḡoi ḡemu maninai asi ma beḡe seḡaḡi-ḡenoḡoirini.

Ḡauvei namori ma ribari tarimari ḡoi nuḡamu ai asi ma beḡe tanu-ḡenoḡoini.

Widi ḡegiro-iaḡirini foreri gururi maki maninai asi ma beḡe seḡaḡi-ḡenoḡoirini.

<sup>23</sup> Maninai lamefa mamari asi ma beḡe ḡara-ḡenoḡoini.

Veḡaraḡo variḡu tauna e vavinena garona ta maki maninai asi ma beḡe seḡaḡi-ḡenoḡoiani.

Ḡoina dagara voivoi-iaḡiri tarimari mai tanobara nuḡanai ḡia tu tarima baregori.

Ġoi ġemu meġameġa tovoġari na tanobara irauirau mabarari oġori-darererito.

<sup>24</sup> Peroveta tarimari e Barau ġena tarimarima veaġari ġevaġirito rarari, ema tanobara iatanai tarimarima ġevaġirito rarari mabarari maki Babulona vanuġa baregona nuġanai ġea ġoitaġorito.”

## 19

### *Kokore marina gubai*

<sup>1</sup> Moġa murinai tu noġa moġo tarimarima asisebo-asisebo garori gururi gubai ġekoġoto-ġoi aseġaġirito, ġekirato,  
“Haleluia!

Vevaġa-maġuri, e mareva baregona,  
ema seġuka tu ġita ġera Barau ġena.

<sup>2</sup> Korana ġia tu dabara roroġotonai evevaġa-kotani ema rakava voiri evinini.

Ġia na veġura-vanaġi vavinena baregona vei-rakava voina meto lelevaġina bevinia.

Mai veġura-vanaġi vavinena na mai tanobara mabarana ġena veġura-vanaġi veiġana na bevaġa-rakava kwaikwaia.

Barau na ġena vetuġunaġi tarimari rarari evaġa-riġorito ġaramanai,  
rakava voina meto lelevaġina bevinia.”

<sup>3</sup> Ma ġekoġo-ġenoġoito, ġekirato,

“Haleluia!

Vanuġa baregona ġenana eraġeni goġuna tu asi bedokoni,  
mo goġu tu beraġe-vanaġi vanaġini.”

<sup>4</sup> Benamo mo veġitaġau tarimari gabanana ruarua ma vasivasi (24) ema mo maġuri dagarari vasivasi ġevetui-tarito, benamo Barau ġena teronai tanutaġo ġetoma-rakariġo viniato-ġoi, maiġesi ġekirato, “Amen, Haleluia!”

### *Mamoe Natuna ġena veġaraġo verekona*

<sup>5</sup> Benamo mo terona na garo ta eiaġomato, ekirato,

“Barau ġena vetuġunaġi

tarimami mabarami,  
e Barau garina ġogarini tarimami,

misina na beiaġo mo baregona,

ġera Barau ġovaġa-raġea!”

<sup>6</sup> Benamo au na guru ta noġa moġo ġutuma-bara gururi kavana aseġaġiatio, noġa ġaruka ġutuma ġeġaru-gwadani gururi kavana, ema noġa guba eguruani guruna baregona kavana, ġekoġoto-ġoi, ġekirato,

“Haleluia!

Ġita ġera Iaru-korokoro Barauna tu roġo Vere baregona etanuni.

<sup>7</sup> Mabarara si-iaku, siverere, ema sivaġa-raġea,

korana tu Mamoe Natuna ġena

veġaraġo ġarona varau bema raġasi,

ema ġaraġona maki beġe ġabi-torea.

<sup>8</sup> Dabuġa kurokurori gwaġiġiri namori, namoka-namokana, miro misina ta maki asiġina ġinavaġi na ġevaġa-dabuġaiatio.”

Mo dabuġa kurokurori gwaġiġiri namori tu Barau ġena veaġa tarimari ġeri vei-iobukaiobuka ekiraġirini.

<sup>9</sup> Benamo mo aneru na au ekiraguto, ekirato, “Maiġesi notorea: ‘Mamoe Natuna ġena veġaraġo ġani-vegogona uranai ġekea-kaurito tarimari tu beġene iaku!’” Ma ekiraguto, ekirato, “Mai tu Barau ġena guruġa moġoniri!” <sup>10</sup> Benamo au mo aneru kwakuna koranai avetui-tarito, natoma-rakariġo vinia ġana. Senaġi ġia na ekira-ġoiguto, ekirato, “Maniġesi tu asi novei! Au maki vetuġunaġi tarimagu ġoi kavana, ema ġoi tarikakamu Iesu varina guruġari ġevaġa-moġonirini tarimari kavana. Barau moġo

notoma-rakariġoa! Korana Iesu ġena vevarifiu guruġari na tu tarimarima elaunaġirini, peroveta guruġari beġene kiraġi-foforiri.”

*Hosi kurokuronai eraġeto tarimana*

<sup>11</sup> Ma au aboġeto, guba evekeoto, benamo ġoiragu ai hosi kurokuronsa ta aġitaiato. Mo hosi iatanai eraġeto tarimana arana tu “Vetuġamaġikau” ema “Moġoni” ġetato. Ġia tu veiġa iobukaiobukanai evevaġa-maoroni ema evetarini. <sup>12</sup> Ġia matana tu karava moreri kavana, ema debanai korona tu asisebo. Ġia ġenai ara ta evetoreto, mo ara tu ta asi ribana, ġia ġereġana moġo ribana. <sup>13</sup> Ġia tu rara na evonuto dabuġana na evedabuġato, ema arana tu “Barau ġena Guruġa”. <sup>14</sup> Guba vanuġana ġena vetari doġorona tu ġia murina na ġeraka-naġi-rakanaġito-ġoi. Ġia mabarari tu dabuġa gwaġiġiri namori, kurokurori ema namoka-namokari na ġevedabuġato, ma hosi kurokurori ai ġeraġeto. <sup>15</sup> Ġia bokana na tu vetari baġana raga-rakavarakava ema raka-rosito. Tanobara irauirau beseri tu mai vetari baġana ma ragana mainana bebasirini. Ġia na auri togoina na beġori-kaurini ma seġukana baregona ġesi. Ma vine ġwaġwari ġefanarini kavana bea fana-taririni. Moġa mo tu Iaru-korokoro Barauna ġena baru baregona bevaġa-rakarosiani gabuna. <sup>16</sup> Dabuġa maukana eriġoato ġenai ema maninai tu mai ara maiġa etoreato, “Kini mabarari ġeri Kini ema vere mabarari ġeri Vere.”

<sup>17</sup> Benamo au na aneru ta ġaro nuġanai eruġa-taġoto-ġoi aġitaiato. Mo aneru na guba fakana ġerovoni manuri ekea-farara vinirito, ekirato, “Ġoiaġoma, Barau ġena ġanivegogo baregonai ġoma rovo-vegogo. <sup>18</sup> Be tanobara vereri barari viriġori, e vetari doġorori ġeri veġorikau tauri baregori viriġori, e kokore lelevaġi tarimari viriġori, ema hosi viriġori e hosi ai ġeraġeni tarimari viriġori, ema tarimarima mabarari, tuġu-rakaorakao tarimari e fakai ġetanuni tarimari, tarima keiri e baregori, mabarari viriġori boġonoma ġaniri!”

<sup>19</sup> Benamo au na vevaġa-rakava dagarana ema tanobara vereri baregori ma ġeri vetari doġorori ġesi vegogotaġo aġitarito. Ġia tu hosi kurokuronai eraġeto tarimana ma ġena vetari doġorori ġesi beġene vetari-viniri ġana ġevegogoto. <sup>20</sup> Senaġi mo vevaġa-rakava dagarana ġeġabi-tariato, ema peroveta tarimana ġofaġofana maki, mai tu nuġa-farevaġi vetoġari boruri vevaġa-rakava dagarana aranai eveirito-ġoi tarimana. Mai vetoġa boruri maiġeri na vevaġa-rakava dagarana ġena maka ġeġabiato tarimari ema ġia vetoġana o laulauna dagarana ġetoma-rakariġoani tarimari eġofa-darererini. Ġia tauri ruarua tu kou karavana morena asikeikeinai e salfa nuġanai ġefiu-ġurarito. <sup>21</sup> Ma kotari tu hosi ai eraġeto tarimana bokana na vetari baġana eraka-rosito monana evaġi-masemaserito, ma manu mabarari ġeiaġoto, ġia viriġori ġeġani-ġosiġosirito.

## 20

*Laġani 1,000 nuġanai kara beġorani*

<sup>1</sup> Benamo au na aneru ta guba na emariġoto aġitaiato. Ġimanai tu guri variġo kwareġana, (iauka rakavari ġeri dibura), kina, ema tavi ta ġimanai tu seini asikeikeina ta. <sup>2</sup> Ġia na mo ġuġaia kavana dagarana baregona eġabi-tariato, mo tu sene bava motana, arana tu Diabolo o Satani. Mo aneru na seini na ebarubaruato, benamo ġia tu laġani 1,000 moġesi barutarinai betanuni. <sup>3</sup> Ma aneru na eġabiato, guri variġo kwareġanai efiu-ġuraiato, benamo guri eloka-ġauato, ema ekadakada-ġauato. Aneru na Satani moġesina eveiato anina tu, tanobara irauirau beseri asi bene ġofari, bene iaġo mo, laġani 1,000 benea kori. Moġa murinai bekeo-vaġiani, benamo murikai ġaro viravira ta moġo ma betanuni.

<sup>4</sup> Ma terona kotari ma aġitarito. Mo terona iatari ai tu Barau na Kota beġene seġaġi maorona evinirito tarimari ġetanuto. Ma aboġeto tu, Iesu varina guruġari ġevaġa-moġonirito e ġekiraġi-foforirito ema Barau ġena guruġa ġaramanai debari ġebasi-ġuturito tarimari iaukari maġuri aġitarito. Ġia tu mo vevaġa-rakava dagarana ema ġia

vetoġana o laulauna ġeveiato dagnarana asi ġetoma-rakariġo viniato, ema ġena maka bakuri ai o ġimari ai asi ġevaġa-kafarito. Ġia tu ġemaġuri-ġenoġoito, benamo Keriso ġesi laġani 1,000 ġevereto. <sup>5</sup> Mase na variġisi-ġenoġoi giniguinena tu moġa. Mase tarimari kotari tu asi roġo ġemaġuri-ġenoġoito mo, laġani 1,000 ea korito. <sup>6</sup> Mai mase na variġisi-ġenoġoi giniguinena beġe variġisini tarimari tu beġe iakuni ema vevaġa-namo barego beġe doġariani. Ġia tu mase vaġa-ruaruana seġukana na asi beġabirini. Ġia tu Barau ema Keriso ġeri Rubu Veaġa vereri ai beġe iaġoni, ema Keriso ġesi mo laġani 1,000 nuġanai beġe vereni.

#### *Satani ġena keto*

<sup>7</sup> Mo laġani 1,000 bekorini murinai, Satani tu ġena dibura gabuna na beġe keo-vaġiani, <sup>8</sup> benamo beiaġoni, tanobara iraurau beseri tanobara daiguni vasivasi nuġanai ġetanuni, mai tu Gog ema Magog, bea ġofa-taġuitaġuirini. Ġia mabarari bea ġori-vegogorini, vetari beġene veia ġana. Ġia mabarabarari beġe vegogoni tu, noġa kone mirina kavana asisebo-asisebo. <sup>9</sup> Tanobarana na beġe raka-iaġoni, benamo Barau ġena tarimarima ġetotoġato gabuna beġea gana-ġeġeraġiani. Mo totoġa gabuna tu Barau na eura-viniani sitina. Senaġi guba na karava emariġoto, benamo Satani ġena vetari doġorori ema ġararito. <sup>10</sup> Benamo Diabolo, eġofarito tauna, tu karava moreri e salfa kouna nuġanai beġe fiu-ġuraiani. Vevaġa-rakava dagnarana ema peroveta tarimana ġofaġofana tu monai varau ġefiu-ġurarito. Tauri toitoi tu monai mo karava moreri na vanaġivanaġi asi dokona asi magona beġara-tanurini.

#### *Kota Baregona*

<sup>11</sup> Moġa murinai au na terona kurokurona baregona ema terona iatanai etanuto tarimana aġitaiato. Tanobara ema guba ġia ġoirana na ġeraka-veġitato, benamo asi ma ġeġita-ġenoġoirito. <sup>12</sup> Benamo mase tarimari baregori ema keiri aġitarito mo terona kurokurona baregona ġoiranai. Benamo buka tari ekeorito. Mo buka ekeorito murinai tu, buka ta ma ekeoato, maġuri bukana tu moġa. Benamo mase tarimari mo buka tari moġeri ai ġeri veiġa etore-vanaġirito ilailari ai Barau na ekota-vinirito. <sup>13</sup> Davarai ġemaseto tarimari davara na ġevariġisito, e Mase ema mase tarimari iaukari ġetanuni Gabuna (o Hades) na ġevariġisito. Benamo mabarabarari tata karakara ġeveirito ilailari ai ekota-vinirito. <sup>14</sup> Benamo Mase ema mase tarimari iaukari ġetanuni Gabuna (o Hades) na ġevariġisito tarimari tu, karava kouna nuġanai ġefiufiu-ġurarito. Mo karava kouna moġa, mo tu mase vaġa-ruaruana. <sup>15</sup> Bema tarima ta arana maġuri bukanai asi ġeġoitaġoato tarimana tu, mo karava kounai ġefiu-ġuraiato.

## 21

#### *Guba ema tanobara variġuri*

<sup>1</sup> Benamo guba variġuna ema tanobara variġuna aġitarito, korana tu guba guinena ema tanobara guinena tu ġerekwa-rekwato. Davara maki asiġi. <sup>2</sup> Ma vanuġa baregona veaġana aġitaiato, mo tu Ierusema variġuna guba vanuġana na Barau ġenana emariġoto-ġoi. Ġia tu veġaraġo variġu vavinena ġaraġona ġena ġevaġa-dabuġaiani ema ġevaġa-vera ginikauani kavana. <sup>3</sup> Benamo garo baregona ta aseġaġiato terona na eiaġomato, maiġesi ekirato, “Toma Barau ġena tanu gabuna tu tarimarima ġesi, ġia toma tu tarimarima vefakari ai betanuni. Ġia tu Barau ġena tarimarimai beġe iaġoni, ema Barau tauġena ġia seviseviri ai betanuni, [ema ġia ġeri Barau ai beiaġoni].” <sup>4</sup> Ġia na matari gorari mabarari bedaurini. Mase e taġi-vanorovanoro e taġitaġi guruna ta ema midigumidigu tu beġe kori-ketovaġini, korana tu dagara guineri mabarari ġekorito.”

<sup>5</sup> Mo teronai etanuto Tarimana maiġesi ekirato, “Ġoġitaia, au tu dagara mabarabarari avaġa-variġu ġenoġoirini.” Ma ekirato, “Maiġeri guruġa tu notore-vanaġiri, korana mai tu guruġa moġoniri ema ġeri ai boġo vetuġamaġi-dadamaġini maki.” <sup>6</sup> Ma ekiraguto, ekirato, “Mabarari beġe kori. Au tu Alefa ema Omega, (giniguinena ema

ginigabina), matamana ema dokona. Bokana bekokeni tarimana tu au na maḡuri nanuna, eḡaruḡaruani dagarana, asi voina, baviniyani beniuani. <sup>7</sup> Rakava e meto bevaḡa-darererini tarimana, ḡena kokore voina tu maiḡeri mabarari beḡaunarini, ema au tu ḡia ḡena Barau ai baiaḡoni, ema ḡia maki au natugu ai beiaḡoni. <sup>8</sup> Senaḡi gari ai asi ḡeruḡa-gwaḡiḡini e asi ḡeveḡabi-dadamani tarimari, vei-rakava na ḡevevaḡa-miroto tarimari, vevaḡi-deba tarimari, ḡekima-rakaorakaoni tarimari, ḡemeḡameḡani e kwaivakuku ḡetoma-rakariḡo viniani tarimari, ema ḡeḡofaḡofani tarimari, mabarabarari ḡeri gabu tu karava moreri e salfa ḡeḡarani kouna. Mai tu mase vaḡa-ruaruana.”

### *Ierusalem variḡuna*

<sup>9</sup> Ma aneru ta au ḡegu ai eiaḡomato. Ḳia tu mo aneru 7 guinenai ḡimari tu diḡu 7, mo diḡu nuḡari ai tu tarimarima vaḡa-midigu-midiguri dagarari oreri na ḡevonuto aneruri ta. Ḳia eiaḡomato, benamo au ema kiraguto, ekirato, “Noiaḡoma, be veḡaraḡo variḡu vavinena nama vaḡa-ḡitamū, ḡia tu Mamoe Natuna ḡaraḡona!” <sup>10</sup> Benamo Barau laukana na eborogiguto, ma aneru na ḡoro baregona e mauka kenenena ḡana eḡwiaḡoguto. Benamo monana vau siti veaḡana, Ierusalem, Barau ḡenana guba vanuḡana na emariḡoto-ḡoi evaḡa-ḡitaguto. <sup>11</sup> Ḳia ḡenai tu Barau marevana mamana emamato-ḡoi, ema siti marevana vetoḡana tu fore namoka-namokari voiri asi keikeiri kavana, ema iaspa forena, fore veḡiaveḡiana kavana emamato-ḡoi. <sup>12</sup> Ḳia maḡuna tu asikeikeina ema maukana, ma ḡatama bokana tu gabanana ruarua (12). Mo ḡatama-boka 12 tu aneru 12 na ḡeḡita-ḡaurito-ḡoi. Mo ḡatama-boka tata iatari ai tu Isaraela doḡorori tata arari ḡetorerito, mo tu Isaraela doḡorori 12 moḡeri. <sup>13</sup> Ḳatama-boka tu toitoi ḡaro eraḡeni rekenai (o east), ma toitoi ḡaro evariḡoni rekenai (o west), ma debana rekenai (o north) toitoi, ema gabina rekenai (o south) toitoi ḡeveirito. <sup>14</sup> Vanuḡa baregona maḡuna tu korana o duḡu foreri 12 iatari ai ḡevaḡa-ruḡa-vaiaito. Moḡeri fore iatari ai tu Mamoe Natuna ḡena apostolo 12 arari tata ḡetorerito, fore ta ara ta, ma fore ta ara ta.

<sup>15</sup> Au ḡesi ḡaguruḡa-guruḡato-ḡoi mo aneru moḡa ḡimanai tu makamaka rulana o vevaḡa-vetovo dagarana, golo na ḡeveiato dagarana. Mo rula monana vanuḡa baregona e ḡatama bokana ema maḡuna bemakarini. <sup>16</sup> Siti ḡevaḡa-ruḡaiato daigunina tu vasivasi (4), e ḡena baḡaka ema mauka tu ilaila. Mo aneru na siti vevaḡa-vetovo dagarana na etovoato, makana eḡabiato tu stadia 12,000 o 2,400 kilomita. Ḳia ḡena mauka e baḡaka ema varaḡe maukana tu ilaila moḡo. <sup>17</sup> Maḡuna ḡena barego maki etovoato, makana tu kiubit 144 o 70 mita. Tarimarima ḡeri vevaḡa-vetovo dagarana mo aneru na eḡauvei-iaḡiato tu moḡesina.

<sup>18</sup> Vanuḡa baregona maḡuna tu iaspa, fore marevari asi gadara dagarari, na ḡeragaiato, ema siti tauḡena tu golo namo vedaureari, ekimore-kimorerini galasi maki ḡevanaḡirito golori na ḡeragaiato. <sup>19</sup> Vanuḡa baregona maḡuna ḡevaḡa-ruḡaiato korana o duḡu foreri tu fore namoka-namokari irauirauri na ḡevaḡa-veraiato: Duḡu forena giniginena tu iaspa forena, vaḡa-ruaruana tu safai, vaḡa-toitoina tu kalakedo, vaḡa-vasivasina tu emeral, <sup>20</sup> vaḡa-imaimana tu sadoniki, vaḡa-6-na tu konilian, vaḡa-7-na tu krisolait, vaḡa-8-na tu beril, vaḡa-9-na tu topas, vaḡa-10-na tu krisopres, vaḡa-11-na tu haiasin, vaḡa-12-na tu ametis. <sup>21</sup> Mo ḡatama-boka gabanana ruarua (12) moḡeri tu tata galasi foreri o pel voiri barego lelevaḡiri e marevari irau veḡata na ḡeveirito. Ḳatama-boka ta pel ta, ḡatama-boka ta pel ta. Siti dabarana baregona tu golo namo vedaureana na, noḡa galasi kavana na ḡeveiato.

<sup>22</sup> Vanuḡa baregona nuḡanai Rubu Veaḡa ta asi aḡitaiato, korana Vereḡauka, Iarukorokoro Barauna, ema Mamoe Natuna, ḡia tu mo vanuḡa barana ḡena Rubu Veaḡa. <sup>23</sup> Mo vanuḡa baregonai ḡaro mamana ema ḡue mamana tu asi bemamani, korana Barau marevana mamana monai bemamani, ema Mamoe Natuna tu mo siti ḡena lamefa. <sup>24</sup> Tanobara mabarana besena tu ḡia mamana beḡe rakani, ema tanobara vereri o kiniri mabarari na dagara e farefare marevari namori monai beḡea ḡwa-toḡarini. <sup>25</sup> Ḳaro sebona ta maki vanuḡa barana ḡatama bokana asi beḡe biririni, korana mo siti tu boḡi na



asi beḡabi-ḡauani. <sup>26</sup> Tanobara irauirau mabarari ḡeri farefare marevari ema ḡeri taḡa mabarana ḡia ḡena beḡea ḡwa-toḡarini. <sup>27</sup> Dagara ma mirona ta tu asi beraka-toḡani, e maiaka ema ḡofaḡofa veiḡari beveini tarimana ta maki asiḡina ḡinavaḡi beraka-toḡani. Deidei Mamoe Natuna ḡena maḡuri bukanai arari etore-vanaḡirito tarimari ḡereḡari moḡo beḡe raka-toḡani.

## 22

### Maḡuri nanuna ḡarukana

<sup>1</sup> Moḡa murinai aneru na maḡuri nanuna ḡarukana evaḡa-ḡitaguto. Mo nanu tu nega-vaḡura-vaḡurana galasi kavana. Ma mo nanu tu Barau ema Mamoe Natuna ḡeri terona na eḡaru-rosito. <sup>2</sup> Siti dabarana baregona nuḡana ḡana ḡeḡaru-iaḡoto-ḡoi. Mo ḡaruka rikina reketa-reketai tu maḡuri ḡauri ḡetubuto. Mo ḡau tu ḡue tata nuḡari ai ḡwaḡwari ḡeḡorato-ḡoi, mai tu laḡani sebona nuḡanai nega vaḡa-12 ḡeḡwato-ḡoi; ema ḡau lauri na tanobara mabarari beseri evaḡa-namorito-ḡoi e evaḡa-maḡuririto-ḡoi. <sup>3</sup> Monana bevesinani beiaḡoni, tarima ta iatanai o tanobara iatanai tovoḡa ta tu asi ma betanuni. Barau ema Mamoe Natuna ḡeri terona tu vanuḡa baregona nuḡanai, ma ḡena vetuḡunaḡi tarimari na vetuḡunaḡina beḡe iaḡo-vinini. <sup>4</sup> ḡia ḡoirana beḡe ḡitaiani, ema ḡia arana maki ḡia bakuri ai betanuni. <sup>5</sup> Monai boḡi tu asiḡina. Lamefa ema ḡaro mamari ta asi beḡe ḡitaiani e asi beḡe urani, korana Barau, Vereḡauka na mama bevinirini. Ema ḡia tu vere beḡe tanu-vanaḡi vanaḡini.

### Iesu Vereḡauka ma beḡenoḡoi-iaḡomani

<sup>6</sup> Benamo mo aneru na au evaḡa-guruḡaguto, ekirato, “Mai guruḡa tu moḡoniri ema ḡeri ai maki bovetuḡamaḡi-dadamaḡini. Vereḡauka, ḡia laukana tu peroveta tarimari mururi na eguruḡani Barauna, ḡena aneru etuḡuato, ḡia ḡena vetuḡunaḡi tarimari kara dori ḡeḡorani dagarari bene vaḡa-ḡitari ḡana. <sup>7</sup> ḡoseḡaḡi, au tu dori aiaḡosini. Mai buka nuḡanai peroveta guruḡari bekorana-iaḡirini tarimana tu bene iaku.”

<sup>8</sup> Maiḡeri dagara aseḡaḡirito ema aḡitarito tarimana tu au, loane maiḡegu. Maiḡeri dagara aseḡaḡirito ema aḡitarito nai tu, ekira-varaguto ema evaḡa-ḡitaguto aneruna kwakuna koranai avetui-tarito, natoma-rakariḡo vinia atato. <sup>9</sup> Senaḡi ḡia na ekiraguto, ekirato, “Maniḡesi asi novei. Au tu ḡoi, e ḡoi tarikakamu peroveta tarimari, ema mai buka guruḡana ḡekorana-iaḡirini tarimari ḡesi ilaila, Barau vetuḡunaḡina aiaḡo-vinini. Barau notoma-rakariḡo vinia!” <sup>10</sup> Moḡa murinai ekiraguto, ekirato, “Mai bukai peroveta guruḡari asi bono kada-ḡauri, asi bono kure-toḡari, korana nega tu varau bekavinaḡi. <sup>11</sup> Vei-rakava tarimana bene vei-rakava-iaḡo roḡo, veiḡa mirori eveini tarimana veiḡa mirori bene vei-iaḡo roḡo, veiḡa iobukaiobukari eveini tarimana veiḡa iobukaiobukari bene vei-iaḡo roḡo, ema veaḡai etanuni tarimana veaḡai bene tanu-iaḡo.”

<sup>12</sup> Iesu maiḡesi ekirato, “ḡoseḡaḡi! Au tu dori aiaḡosini! Tarimarima ḡeri ḡauvei voiri tu au ḡegu ai, be aḡwa-iaḡosirini. Tarimarima mabarari ḡeri veiḡa e ḡauvei ilailari ai voiri bavirini. <sup>13</sup> Au tu Alefa ema Omega, (giniguinena ema dokona), au tu tovotovona veḡata ema magona.”

<sup>14</sup> ḡeri dabuḡa ḡeḡuriḡirini tarimari tu beḡe iakuni. ḡia tu Barau na maoro bevinirini, maḡuri ḡauna ḡwana beḡe ḡaniani, ema vanuḡa baregona ḡatama bokana na beḡe raka-toḡani. <sup>15</sup> A kwaiva (o vei-rakava tarimari), ḡemeḡameḡani tarimari, ḡekimani e ḡeveḡura-vanaḡini tarimari, vevaḡi-deba tarimari, kwaivakuku ḡetoma-rakariḡo viniani tarimari, ema ḡofaḡofa ḡeuradikani tarimari, mabarabarari tu siti murikanai beḡe tanuni. <sup>16</sup> “Au, Iesu, na ḡegu aneru batuḡu-iaḡosia, ekalesia doḡorori ḡeri mai vari moḡonina ḡomi neasi vaḡa-ribami ḡana. Au tu Davida garakana ema ḡia ḡenana aiaḡomato Tarimagu. Au tu laḡani visiḡuna, ma mamana baregona.”

<sup>17</sup> Iauka Veaḡa ema veḡaraḡo variḡu vavinena ḡekirani, “Noiaḡoma!” Ema beseḡaḡini tarimana maki nekira, “Noiaḡoma!” Bokana bekokeni tarimana bene iaḡoma; ema beurani tarimana, mai maḡuri nanuna, asi voina nanuna, bene niua.

*Guruḡa dokona*

<sup>18</sup> Mai bukai peroveta guruḡari beḡe seḡaḡirini tarimari mabarari akira-toreḡaurini: Bema deikara na mai guruḡa iatari ai guruḡa tari betore-kaurini tarimana tu, mai bukai tarima vaḡa-midiguri dagarari, ekiraḡirini dagarari, Barau na ḡia iatanai betore-kaurini.

<sup>19</sup> Ma bema tarima ta na mai peroveta bukana na guruḡa tari bekoki-vaḡirini nai, ḡia tu Barau na voina maḡuri ḡauna ḡenai ema siti veaḡana nuḡanai monai tanu-vanaḡivanaḡi moḡa, mai bukai ekiraḡirini maiḡeri, ḡia ḡenana beḡabi-vaḡirini.

<sup>20</sup> Maiḡeri dagara bekiraḡi-foforirini tarimana ekirani, “Oi, au tu dori aiaḡosini!”

Amen. Iesu Vereḡauka o, noiaḡoma!

<sup>21</sup> Iesu Vereḡauka ḡena namo ema varevare-bara ḡomi mabarami iatami ai bene tanu. Amen.